


# Goãmtɨ Yare Wereripɨ



Desano: Goãmtɨ Yare Wereripɨ New Testament

**Goãmu Yare Wereripũ**  
**Desano: Goãmu Yare Wereripũ New Testament**

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 25 Nov 2022 from source files dated 29 Jan 2022  
17771afc-c309-57fd-9ff3-2d5a0cd59ff1

## Contents

SAN MATEO . . . . .	1
SAN MARCOS . . . . .	75
SAN LUCAS . . . . .	120
SAN JUAN . . . . .	195
HECHOS . . . . .	249
ROMANOS . . . . .	314
1 CORINTIOS . . . . .	345
2 CORINTIOS . . . . .	376
GALATAS . . . . .	395
EFESIOS . . . . .	407
FILIPENSES . . . . .	418
COLOSENSES . . . . .	425
1 TESALONICENSES . . . . .	432
2 TESALONICENSES . . . . .	438
1 TIMOTEO . . . . .	442
2 TIMOTEO . . . . .	450
TITO . . . . .	456
FILEMÓN . . . . .	460
HEBREOS . . . . .	462
SANTIAGO . . . . .	486
1 PEDRO . . . . .	494
2 PEDRO . . . . .	502
1 JUAN . . . . .	507
2 JUAN . . . . .	514
3 JUAN . . . . .	515
JUDAS . . . . .	516
APOCALIPSIS . . . . .	519

## San Mateo

*Jesucristo Goãtm̄ magu ĩgu acawererã iribojegue majarã erã waĩre were gojam̄htaĩumi Mateo*

<sup>1</sup> Jesucristo ñecu sũmarã iribojegue majarã árĩñuma. Eropigu ĩgu ñecu mũru iribojegue majagu Davi waĩcũgu árĩmũriñumi. ĩgu árĩboro core erã ñecu Abrahã waĩcũgu árĩmũriñumi.

<sup>2</sup> Abrahã Isaa pagu árĩñumi. Isaa Jacobo pagu árĩñumi. Jacobo Judã sã pagu árĩñumi. <sup>3</sup> Judã porã Fares Zara sã árĩñuma. Erã pago Tamar waĩcũgo árĩñumo. Fares Esrom pagu árĩñumi. Esrom Aram pagu árĩñumi. <sup>4</sup> Aram Aminadab pagu árĩñumi. Aminadab Naasón pagu árĩñumi. Naasón Salmón pagu árĩñumi. <sup>5</sup> Salmón Booz pagu árĩñumi. ĩgu pago Rahab árĩñumo. Booz Obed pagu árĩñumi. ĩgu pago Rut árĩñumo. Obed Isai pagu árĩñumi. <sup>6</sup> Isai Davi pagu árĩñumi. Davipu Israe majarã tauro opu árĩñumi. ĩgu Uria waĩcũgu mũru marapore ĩgu marapocũra pũru Salomo waĩcũgure porãcũño igo.

<sup>7</sup> Salomo Roboam pagu árĩñumi. Roboam Abías pagu árĩñumi. Abías Asa pagu árĩñumi. <sup>8</sup> Asa Josafat pagu árĩñumi. Josafat Joram pagu árĩñumi. Joram Uzías pagu árĩñumi. <sup>9</sup> Uzías Jotam pagu árĩñumi. Jotam Acaz pagu árĩñumi. Acaz Ezequia pagu árĩñumi. <sup>10</sup> Ezequia Manase pagu árĩñumi. Manase Amón pagu árĩñumi. Amón Josia pagu árĩñumi. <sup>11</sup> Josia Jeconia sã pagu árĩñumi. Erã árĩrisubure Israe yeba majarãre Babilonia majarãpu ñeagãñuma erã ya yebague peresu iimorã.

<sup>12</sup> Eropi Babilonia yeba erã ejara pũru, Jeconia marapo Salatiere porãcũño. Salatie Zorobabe pagu árĩñumi. <sup>13</sup> Zorobabe Abiud pagu árĩñumi. Abiud Eliaquim pagu árĩñumi. Eliaquim Azor pagu árĩñumi. <sup>14</sup> Azor Zadoc pagu árĩñumi. Zadoc Aquim pagu árĩñumi. Aquim Eliud pagu árĩñumi. <sup>15</sup> Eliud Eleazar pagu árĩñumi. Eleazar Matán pagu árĩñumi. Matán Jacobo pagu árĩñumi. <sup>16</sup> Jacobo José pagu árĩñumi. José María marapu árĩmũriñumi. Mariapu Jesu pago árĩmo. Jesupu masare taubu árĩgu Cristo erã arĩ piyudigu árĩmi.

<sup>17</sup> Eropirã Abrahãre mari queonũgacũ, ne Daviguere mari queotucũ, oã árĩpehrerã árĩrã catorce cururi gohra árĩñuma. Eropirã mari dipaturi Davire queocũ, ne Babiloniague Israe majarãre erã aĩgãboro core queotucũ catorce cururi gohra dipaturi árĩñuma. Eropiituhaja Babiloniague erã ejara pũru mari queonũgacũ ne Cristo ĩgu masa dehyoacũgue mari queotucũ catorce cururi gohra árĩñuma daja.

*Jesucristo ĩgu masa dehyoarare wereñumi Mateo*

*Lc 2.1-7*

<sup>18</sup> Eropigu Jesucristo õpa masa dehyoapu. ĩgu pago Mariapu José mera mojoto diribo árĩpo. Eropigo igo ĩgu mera marapũcũboro core Espĩritu Santo ĩgu turari mera majigu bocapo. Eropigo igo basi majigu opawahgũriñere masipo igo. <sup>19</sup> Eropigu José igore mojoto diribodigu irire masigu, diaye árĩrire ĩgu iigu árĩgu igore cóabu iiripu. Igore guhyasũuro iidiabigu, masa erã masibiricũ ta igore cóabu iiripu.

<sup>20</sup> Irire ĩḡu pepirisubu Goãmũ anyupũ quẽroque Josẽre dehyoagu, õpa arĩpũ.

—José, Davi mũrũ pãrami, María mera ḡuhyasĩriro mariro mojoto dirique. Igo Espĩritu Santo ĩḡu turari mera ne nijipo arĩ wahḡarigo añrimo. Eropigu ḡuhyasĩriro mariro igore mojoto dirique. <sup>21</sup> Igo porãcũgocumo. ĩḡu igo magũ ta ĩḡu ya maca majarãre erã ñeri iira dipuwajare taubu arĩḡucumi. ĩḡu eropa taubu arĩcũ Jesu waĩyegũca mũhũ ĩḡugãre, arĩpũ anyu Josẽre.

<sup>22</sup> I arĩpehreri eropa wayoro iribojegue majagu Goãmũ ya weremũhtadigu ĩḡu arĩ gojadiro dopa ta. Irire ĩḡure Goãmũ gojadoreñumi. Õpa arĩ gojamũriñumi Goãmũ yare:

<sup>23</sup> Nõmeo mũũ mera arĩbigo, majigugãre bocago porãcũgocumo igo magugãre. Eropigu Emanuel waĩcũgucumi ĩḡugã, arĩ gojañumi Goãmũ yare gojayudigugue.

Emanuel arĩdiaro “Goãmũ mari mera ta añrimi,” arĩdiaro iiaa.

<sup>24</sup> Goãmũ yagu anyu Josẽre eropa arĩ werera pũhrũ Josẽpũ wahḡã anyu ĩḡu dorediri dopa ta María mera mojoto diripũ. <sup>25</sup> Igo magugãre igo porãcũboro core Josẽpũ igo mera arĩnibiripũ. Iḡopũ porãcũpo pare. Eropigu ĩḡupũ igo magugãre Jesu waĩyepũ.

## 2

### *Abe mũririro majarã õaro masirã Jesure ĩarã ejañuma*

<sup>1</sup> Judea yeba arĩri maca Belén waĩcũri maca Jesu masa dehyoapũ. Irisubu Herode Judea yeba majarã erã tauro opũ arĩpũ. ĩḡu eropa masa dehyoara pũhrũ necãre buherã necãre õaro masirã abe mũririropũ majarã ahri, Jerusalẽngue erañorã. <sup>2</sup> Eropa erarã, masare ero majarãre serẽpiñorã:

—¿Judio masa erã tauro opũ arĩbu dohpaguere nohogue masa dehyoayuri ĩḡu? Abe ĩḡu mũririro majarãgue arĩrã, ne necãmũ dehyoacũ ĩabu. Eropa ĩḡu dehyoacũ ĩha “Opũ masa dehyoagu iicumi,” arĩ masiabu gũa. Eropa ĩḡu ne dehyoacũ ĩarã gũa yujuro mera ĩḡure umupeorã arirã iiaabu õgue, arĩ wereñorã necãre buheri masa masare.

<sup>3</sup> Erã eroparĩcũ pee erã opũre Herodere irire wererã wañorã. Eropigu gajigu opũ masa dehyoarare erã werecũ peegu Herodepũ ḡuñaricũpũ. Eropirã arĩpehrerã Jerusalén majarã sã ĩḡu iro dopa ta ḡuñaricũñorã erã sã. <sup>4</sup> Eropigu Herodepũ arĩpehrerã pahia oparãre, judio masare buherã sãre sihupehocãpũ. ĩḡu sihubeorã pũhrũ erã gamenerepehrecũ ĩha, erãre serẽpipũ ĩḡu:

—¿Nohogue masa dehyoagũcũri Goãmũ beyedigu Cristopũ mũa pepicũ? arĩ serẽpipũ ĩḡu erãre. <sup>5</sup> Õpa arĩ wereñorã erã ĩḡure:

—Belén, Judea yebague arĩri macague Cristo masa dehyoagũcumi. Õpa arĩ gojamũriñumi Goãmũ yare weremũhtadigu:

<sup>6</sup> Belén waĩcũri macague yujugu opũ dehyoagũcumi. ĩḡu Goãmũ yarãre Israe majarãre dorebu arĩḡucumi. Eropiro Belén Judea yeba arĩri macari watope bu arĩri maca arĩquerero gaji macari tauro arĩroca, arĩ gojamũriñumi Goãmũ yare gojayudigugue, arĩ wereñorã erã Herodere.

<sup>7</sup> Erã eropa arĩra pũhrũ Herode masa erã peebirogue abe mũririropũ arinirãre sihubeorũ. ĩḡu pohrogue erã ejara pũhrũ, erãre ĩḡu serẽpira

pũhrũ, erã necãmure erã ïaranure wereñorã erã ïgure. <sup>8</sup> Erã eropa werera pũhrũ Herodepũ erãre Belẽngue obeogu õpa arĩpũ erãre:

— ïgugãre õaro amaque. ïgugãre mua bocajara pũhrũ yũ sãre wererã arique mua. ïgugãre umupeogu wabu iiaa yũ sã, arĩ were obeeripũ erãre Herodepũ.

<sup>9</sup> ïgu eropa arĩra pũhrũ, erã waha wañorã. Erã eropa wacũ abe mũririropũ erã ïadiru necãmũpũ erã core wamũhtaniguicãyoro. Eropiro majigugã ïgu árĩro weca dujanugaja wayoro iriru necãmũ. <sup>10</sup> Eropirã necãmũ dujanugajacũ ïarã, bũrigã mucubiriñorã erã. <sup>11</sup> Majigugã ïgu árĩri wihigue eja, ñaja wañorã erã. Eropa ñajajarã majigugãre ïgu pago mera árĩgure ïañorã erã. Eropirã erã mereja, ïgure umupeoñorã. Umupeotuhaja, erã ya comorire aĩbeo, pãgũñorã erã ïgugãre aĩgãrirare omorã. Eropirã orore, buirire, poresuri sãre aĩwiu, ïgugãre waja mariro oñorã. <sup>12</sup> Irire otuhara pũhrũ carĩa wañorã erã. Erã eropa carĩcũ quẽroque Goãmũ werepũ erãre: “Herode pohro dujabiricãque,” arĩ werepũ Goãmũ erãre quẽroguere. ïgu eropa arĩ werera pũhrũ, erãpũ wahgãñorã. Erã eropa wahgãra pũhrũ gaji mague erã ya yebague dujarã dujaa wañorã.

*José sã Jesugãre aĩ duhrigã wañuma Egiptogue*

<sup>13</sup> Erã eropa wara pũhrũ Goãmũ yagu anyu quẽroque Josére dehyoagu, õpa arĩ werepũ:

— Wahgãque. Herodepũ majigugãre wejẽbu amagucumi dohpague. Eropigu majigu sãre ïgu pago sãre Egiptogue duru aĩ duhrigãque. Eroguere yũ dipaturi mũre werecãgue dujarique, arĩ werepũ anyu Josére.

<sup>14</sup> ïgu eroparĩcũ peegu, Josépũ ñami ta wahgã, majigu sãre ïgu pago sãre Egiptogue aĩ duhrigã wapũ. <sup>15</sup> Egiptogue eja, Herode ïgu ojocarioropẽ ta eroguere árĩñorã erã. Eropa wayoro iribojegue majagu Goãmũ ya weremũhtadigu ïgu arĩ gojadiro dopa ta. Irire ïgure Goãmũ gojadoreñumi. Õpa arĩ gojamũriñumi Goãmũ yare gojayudigũgue: “Egiptogue árĩgure yũ magure sihubeoabu,” arĩ gojamũriñumi Goãmũ yare weremũhtadigũgue.

*Herode majirãre wejẽdoreñumi*

<sup>16</sup> Eropigu necã buherã erã duhri dujaacũ peegu Herodepũ guatari-acãpũ. Eropigu Belén majarãre, iri maca pohro majarã sãre erã porãre uma porãgãre wejẽpehocãdorepũ ïgu. Ne dehyoarãre wejẽnũgadore pe bojori oparãre wejẽtudorepũ ïgu. Nere necãre buheri masa necãmure erã ïaranure wereñorã Herodere. Erã eroparĩcũ peegu ïgu Jesu masa dehyoarĩnure masigu, “I nũcu bojori ta ïgu opacumi,” arĩgu majirãre pe bojori oparãre wejẽtudorepũ. <sup>17</sup> ïgu eropiicũ iribojegue majagu Jeremia Goãmũ yare weremũhtadigu ïgu arĩ gojadiro dopa ta eropa wayoro. Õpa wereyu gojañumi ïgu:

<sup>18</sup> “Ramã waĩcũroque busũro carabu. Bũrigã bujawereri mera orerã carama. Raquel acawererã Israe masa marasã nome erã porãre bũrigã orerãcoma. Erã porã sĩricũ ïarã ne bujawere duhosome,” arĩ gojañumi iribojeguere Herode majirãre wejẽdoreborõ core.

<sup>19</sup> Eropi Herode ĩgu sĭrira pũhrũ Egiptogue árĩdigũre Josére Goãmu yagu anyu quẽroque dehyoapu daja. Eropa dehyoagu õpa arĩpu Josére:

<sup>20</sup> —Majigũgãre wejẽdianirã mũra sĭria wahãma. Eropigu ĩgu majigure, ĩgu pago sãre Israe yebague aĩ dujaaque mũhu, arĩ werepu anyu Josére.

<sup>21</sup> ĩgu eropa arĩra pũhrũ wahgã, majigũgãre ĩgu pago mera ta Israe yebague aĩ dujaa wapu. <sup>22</sup> Arquelao Herode magu ĩgu pagure gohrotodigu ĩgu árĩcũ pee, Josépu Judea yeba árĩgu gũipu. Eropigu dipaturi ta Goãmu quẽroque ĩgure werenemopu. ĩgure Judeague dipaturi dujadorebiripu. ĩgu eropa werera pũhrũ erã Galilea yebague waha wañorã. <sup>23</sup> Iri yebaguere Nazare waĩcũri macague eja árĩñorã erã. Eropa iĩñorã erã Goãmu yare weremuhtanirã erã gojadiro dopa ta. Õpa arĩ wereyumuriñuma: “‘Cristo Goãmu beyedigu Nazare majagu ta ãhrimi,’ arĩrãcoma masa,” arĩ gojamuriñuma iribojegue majarã.

### 3

*Ñu waĩyegu masare wereñumi*  
*Mr 1.1-8; Lc 3.1-9, 15-17; Jn 1.19-28*

<sup>1</sup> Eropi irisubure Ñu Goãmu yarãre waĩyeri masũ árĩpu. Judea yeba masa mariroque ĩgu Goãmu yare werenũgapu. <sup>2</sup> Õpa arĩ werepu masare ĩgu pohro ejarãre.

—Mũa ñero iirare bujawere duhucãque. Umaro majagu Goãmu mũa opu ĩgu árĩboro merogã duhyaa, arĩ werepu ĩgu Ñu.

<sup>3</sup> Iribojegue majagu Isaia Goãmu yare weremuhtadigu Ñu eropa waburire õpa arĩ gojajuñumi:

Masa mariroque werenigui gaguinigu õpa arĩ buhegucumi ĩgu:  
“Mari Opu ĩgu arĩburi mare amuro dopa ta ĩgu arĩboro core õarã árĩyuque mũa ĩgure peemorã,” arĩ wereniguigucumi, arĩ gojañumi Isaia.

<sup>4</sup> Ihĩ Ñu camello ya gasirire suhri sañagu, waibugu ya gasirodare tuãdiudigu árĩpu. Eropigu poreroare bamuripu. Eropárĩcũ nugu majarã momere bapu. <sup>5</sup> Jerusalén maca majarã, árĩpehrero Judea yeba árĩrã, dia Jordán waĩcũriya pohro árĩrã sã ĩgure peerã wañorã. <sup>6</sup> Erã eropa pee, erã ñero iirare bujawere, Goãmure irire weretarimuriñorã erã. Erã eropa werecũ peegu dia Jordán waĩcũriyague Ñu erãre waĩyepu.

<sup>7</sup> Eropigu bajarã fariseo masa, saduceo masa sã ĩgure waĩyedorerã ejacũ ĩagu Ñu werepu erãre:

—Mũa ñero iiricũrã ãhraa mũa. “Goãmure gua ñeri dipuwaja moabiricãporo,” arĩrã, ¿mũa yure waĩyedorerã ahriri? <sup>8</sup> ĩgu mũa ñero iira dipuwajare moabiricũ õpa iique mũa. Diaye ta mũa ñeri iirare bujowererã árĩrã, õarire gohrotorã árĩrã, õarire iique mũa. <sup>9</sup> Õpa arĩ pepibiricãque: “Abrahã mari ñecu mũru árĩmũripu. Eropirã Goãmu mera õhaa,” arĩ pepibiricãque mũa. Mũare arĩgu tĩaa. Abrahã pãramerã mũa árĩri duhpiburi árĩbeaa. Goãmu gamegu i utãyeri mera gajirãre iimasimi Abrahã acawererãre. Eropirã Abrahã

pāramerā mua áriri bu gohra ta āhraa. <sup>10</sup> Ōpa āhraa: Mari masa yucu iro dopa āhraa. Goāmupū come opagu iro dopa āhrimi. Eropigu űeri đucacuri yucare pa cohā, iri nuguri sāre tabetagucumi. Tabetatuhaja, peamegue cóāgucumi ĩgu iri yucare, iri nuguri sāre. Eropa ta iigucumi mua sāre ĩgure gamebirāre. <sup>11</sup> Yū pūhrū yū tauro turagu arigucumi. Ōatariagu āhrimi. ĩgu iro dopa đagu árĩbea yupū. Eropigu ĩgure pepigu “Yū tamera bu gohra árĩgu āhraa,” arĩ pepia yūhū. Mua űero iirare bujawerera pūhrū, yupū deco mera wāyēa. Yū pūhrū arigupū yūhū tauro iigucumi. Espiritu Santore ogucumi masa mera árĩniguibure. Eropigu peamegue ĩgu űerire soewearo dopa ta ĩgupū mua űero iirire coegucumi. <sup>12</sup> Yū pūhrū arigu trigo gasirire cóāgu iro dopa āhrimi. Gasirire cóāgu ĩgu sihburu mera árĩpehreri trigo yeri gasirire sūha weami. ĩgu eropa sūha weara pūhrū trigo gohra yeripare ĩgu diburi wihigue dibugucumi. ĩgu sūha weara gasiripare ĩgu soegucumi. Ōpa ii beyegucumi yū pūhrū arigupū. Ōarire gohrotonirāpūre ĩgu mera árĩniguicū iigucumi. Erā űerire bujawerebirāpūre peamegue yaribiri peamegue cóāgucumi, arĩ werepū űu.

*űu Jesure wāyēñumi*

*Mr 1.9-11; Lc 3.21-22*

<sup>13</sup> Pūhrū Jesu Galileague árĩdigū wapū. Jordán waĩcuriyague ejarū űure “Yūre wāyēque,” arĩgu. <sup>14</sup> Negohraguere űu ĩgure wāyēdiabiriripū.

—Cue, mupū yū tauro turagupūre yūre mū wāyēcū đaboaya. Mure wāyēbu árĩbeaa yūhū, arĩ yūhrípū űu Jesure.

<sup>15</sup> Jesupū yūhrípū ĩgure:

—Yūre wāyēque. Mari đpa iirā Goāmū ĩgu dorediro dopa ta iirā iiaa, arĩpū Jesu. ĩgu eroparĩcū peegu,

—Áh, arĩ yūhrípū űu. <sup>16</sup> Eropa arĩtuhaja Jesure wāyēpū. Wāyētuhajacū Jesu diague niguidigū majanugajapū. ĩgu majanugajacū ta, umūsi ĩgure pārima wayoro. Eropigu Goāmū yagu Espiritu Santo buja iro dopa bejagu ĩgu weca ĩgu dijaricū ĩapū ĩgu basi. <sup>17</sup> Eropiro umarogue wereniguiro cariyoro:

—Īhī yū magū yū mahigu āhrimi. ĩgu mera būrigā mucubiria, arĩro cariyoro umaroguere.

## 4

*Watĩ űerire iidoreriñumi Jesure*

*Mr 1.12-13; Lc 4.1-13*

<sup>1</sup> Eropi Espiritu Santopū Jesure masa mariogue wadorepū erogue watĩ ĩgure űerire iidoreboro dopa.

<sup>2</sup> Erogue ejaqu, cuarenta nuri gohra baro mariro árĩpū Jesu. Eropiro pūhrūguere ĩgure oa pūriyoro pare. <sup>3</sup> ĩgu oaboacū ĩagu watĩpū ĩgu pohrogue ejaqu đpa arĩpū:

—Mūhū Goāmū magū árĩgu đpa ĩhmuque. Iyerire utāyerire bari poyacū iique, arĩripū ĩgu Jesure.

<sup>4</sup> ĩgu eroparĩcū peegu Jesu gamebiripū. Eropigu Jesu đpa arĩ yūhrípū:



—Goãmũ yare erã gojarapũ òpa àhraa: “Masare bari mera dihta ojocaribiro gahmea. Árìpehreri Goãmũ Ìgũ ya wereniguiri mera árìro gahmea,” arĩmi Goãmũ, arĩ yũhripũ Jesu watĩre.

<sup>5</sup> Ìgũ eropa arĩ yũhrira pũhrũ watĩpũ Jerusalén waĩcũri macague Jesure aĩgãpũ. Eroque eja, Goãmũ ya wihì wecague Jesure aĩ mũrijapũ Ìgũ. <sup>6</sup> Aĩ mũrijatuha, Ìgũre òpa arĩripũ:

—¿Diaye ta Goãmũ magũ gohra ta àhriri mũhũ? Goãmũ yare erã gojarapũ òpa àhraa:

“Goãmũ Ìgũ yarã anyuare mũre ìhadibudoregũcumi. Eropirã erãpũ mũre ìhadiburãcoma mũgue utãye weca mehbejajari arĩrã,” arãa Ìgũ gojarapũ.

Erã mũre eropa ìhadibumorã árìcũ mũhũ Goãmũ magũ ta árìgũ ògue buhrima dija ìhmuque yũre. Mũre erã itamucũ ìhmuñata yũre, arĩripũ watĩpũ.

<sup>7</sup> Ìgũ eroparìcũ peegũ gamebiripũ Jesu. Òpa arĩ yũhripũ Ìgũre:

—Goãmũ yare erã gojarapũ òpa arãa: “Goãmũ mũa Opũ Ìgũ arĩrare ‘¿Diaye ta àhriri?’ arĩ masidiarã Goãmũre ii ìhmudoremaabiricãque,” arãa Goãmũ yare erã gojarapũ, arĩpũ Jesu.

<sup>8</sup> Ìgũ eropa arĩ yũhrira pũhrũ umadigũgue utãgũgue Jesure aĩ mũriapũ daja. Irìgũ wecague mũri bejaja, árìpehreri macarire i umũ majare ìhmupũ Jesure. Erã opari sãre ìhmupũ. <sup>9</sup> Eropa ìhmugũ Jesure òpa arĩpũ:

—Yũre mereja, “Mũhũ yũ opũ àhraa,” arĩ umupeoque mũhũ yũre. Mũhũ yũre eropa iicũ mũre árìpehreri i macarire mũre ogura, arĩ wereripũ watĩ.

<sup>10</sup> Ìgũ eroparìcũ Jesu òpa arĩ yũhripũ daja:

—Satana, waque mũhũ. Òpa arãa Goãmũ yare erã gojarapũ: “Mũ Opũ Goãmũ dihtare umupeoque. Ìgũ ya doreri dihtare iique,” arãa Goãmũ yare erã gojarapũ, arĩpũ Jesu watĩre.

<sup>11</sup> Ìgũ eroparìcũ peegũ watĩ waha wapũ. Ìgũ wara pũhrũ anyuapũ eja, Jesure itamuñorã. Ìgũre barire oñorã.

### *Galilea yeba Jesu buhenũgañumi*

*Mr 1.14-15; Lc 4.14-15*

<sup>12</sup> Eropi Ñure peresu erã iicũ peegũ, waha wapũ Jesu. Galilea yebague ejapũ. <sup>13</sup> Ero árìri macague Nazaregue waha, tarigã, Capernaum waĩcũri macague ejapũ. Galilea waĩcũri ditaru pohro árìbũ Capernaum. Iri macã Zabulón yeba pohro, Neftalí yeba pohro árìbũ Capernaum. Eroque eja arĩpũ Jesu. <sup>14</sup> Eropa ta iipũ Jesu iribojegue majagũ Goãmũ yare weremuhtadigũ Isaia Ìgũ arĩ gojadiro dopa ta. Òpa arĩ gojayuñumi:

<sup>15</sup> Zabulón yeba pohro, Neftalí yeba pohro, ditaru waro, Jordán waĩcũriya gajipũ masegue Galilea yeba àhraa. Iri yeba judio masa árìbirã ya yeba àhraa. <sup>16</sup> Ero majarã Goãmũ yare òaro masibeama. Eropa masibiriquererã ta òagũre ìarãgue masirãcoma. Erãpũ Goãmũre ne masibeama. Eropirã peamegue wamorã ta árìrima. Eropigũ yujugũ erãre Goãmũ yare masicũ iigũcumi, arĩ gojañumi Isaia Jesu eraboro coregue.

<sup>17</sup> Eroque árìgũ Goãmũ yare werenũgapũ Jesu:

—Múa ñeri iirare bujawereque. Eropa iirã ðaripure gohrotoque. Ūmaro majagu Goãmu áripehrerã tauro ĩgu opu áriboro merogã duhyaa, arĩ werenugapu ĩgu.

*Wapicũrã wai wejẽrãre ĩgu mera majarã árĩmorãre sihuñumi Jesu Mr 1.16-20; Lc 5.1-11*

<sup>18</sup> Eropi Galilea waĩcũri ditaru tũroque ejagu, Simore, ĩgu pagu magu Andre mera bocajapu Jesu. Simo ta Pedro erã arĩ piyugu áripu. Erã wai wejẽri masa árĩñorã. Erã ya wejẽri yucure mehyurã iĩñorã iri ditaru wũari ditarugue. <sup>19</sup> Erãre boca õpa arĩpu Jesu:

—Yũ mera majarã árĩmorã arique mua. Yũ mera mua aricũ waire ñeha gameneorã mua árĩro dopa ta, Goãmu yarã árĩmorãre masare sihu gameneomorã árĩcũ iigura muare. Yũ mera mua aricũ eropa iimorãre amugura muare. Eropirã yũ mera arique, arĩpu ĩgu erãre.

<sup>20</sup> Eropa ĩgu arĩcũ peerã ta erã ya wejẽdi yucure apicãa, Jesu mera waha wañorã.

<sup>21</sup> Eropirã erã Jesu mera tarigã, Santiagore ĩgu pagu magu Ñu sãre bocañaorã daja. Erã Zebedeo porã árĩñorã. Erã yaru dohodirugue erã pagu mera erã sã erã ya wejẽdi yucure amurã iĩñorã. Erã perãre ĩgu sihubeorũ. <sup>22</sup> ĩgu eropa sihubecũ pee, erãpu erã pagure, dohodiru sãre apĩ Jesu mera waha wañorã.

*Bajarã masare buheñumi Jesu*

*Lc 6.17-19*

<sup>23</sup> Eropi árĩpehrerogue Galilea yebare Jesu buhe curipu. Judio masa gũa buheri wirigue ðari buherire, ũmaro majagu ĩgu opu árĩricũre buherũ. Eropigu dorecurãre ðarã iigu árĩpehreri dorecurire cóãpu ĩgu. <sup>24</sup> ĩgu eropa iicũ peerã Siria yeba majarã árĩpehrerogue iri yeba árĩrã ĩgure masinugañorã. Eropa masirã, gajiropa árĩri dore oparãre, watẽa ñajasũnirãre, pũriri dorecurãre, sĩriri mura dorecurãre, dupu turabirã sãre aĩ ejañorã Jesu pohroque. Eropigu árĩpehrerãre erãre ðarã wacũ iipu Jesu.

<sup>25</sup> ĩgu eropa iicũ ĩarã, Galilea yeba majarã Decapoli yeba majarã, Jerusalén majarã, Judea yeba majarã, Jordán waĩcũriya gajipu masepu majarã, bajarã masa ĩgu mera wañorã.

## 5

*Ūtãgũgue mũria, ero buheñumi Jesu masare*

<sup>1</sup> Masa bajarã ĩgu pohro erã ejacũ ĩagu Jesu ũtãgũgue mũriapu. Mũrija, ero doajapu. Ero ĩgu doacũ ĩgu buherã ĩgu pohroque ejañorã.

<sup>2</sup> Erã ejacũ ĩagu õpa arĩ buhenugapu:

*Õpa árĩrã ãhrima mucubirirã, arĩ buheñumi Jesu*

*Lc 6.20-23*

<sup>3</sup> —Erã ñerire bujawererã, Goãmure gamerã mucubirirã ãhrima. Ūmaro majagu erã opu árĩroguere warãcoma erã. Ūmaro maja erã ya ãhraa. Eropirã burigã mucubirirãcoma.

<sup>4</sup> “Orerã sã mucubirirã ãhrima. Erãre mucubiricũ iimi mari Pagu. Eropirã mucubirirã árĩrãcoma.

<sup>5</sup> “Gajirãre tarinugadiabirã eropa árĩca arĩbirã mucubirirã ãhrima. Goãmu “Ogura,” ĩgu arĩrare oparãcoma. Eropirã erã sã mucubirirã árĩrãcoma.

<sup>6</sup> “Goāmũ ĩḡũ dorero dopa iidiarã, ðarire iidiarã mucubirirã ährima. Goāmũ ĩḡũ itamucũ erã ðarire ii ojogorocurãcoma. Eropirã mucubirirã árirãcoma.

<sup>7</sup> “Gajirãre mojomoro ĩarã mucubirirã ährima. Erã eropa mojomoro ĩacũ Goāmũ erã sãre mojomoro ĩagũcumi. Eropirã mucubirirãcoma.

<sup>8</sup> “Erã ñerire cóãñirã, mucubirirã ährima erã. Goãmure ĩarãcoma erã. Eropirã mucubirirãcoma.

<sup>9</sup> “Gajirãre gamequeãcũ bosarã mucubirirã ährima. Erãre “Yũ porã ährima,” arĩḡucumi Goãmũ. Eropirã mucubirirãcoma.

<sup>10</sup> “Goãmũ dorerire erã iira waja gajirã mera ñero tarinirãpũ umaro majagũ erã opũ árĩroguere ĩḡũ yare oparãcoma erã. Eropirã mucubirirãcoma.

<sup>11</sup> “Yahare mũa iira waja gajirã mũare erã turiquerecũ ta mucubirirã ähraa mũa. Mũare erã ñero iicũ mucubirirã ähraa mũa. Yaharã mũa árĩri waja mũare árĩpehreri ñeri quere goroweoquerecũ ta mucubirirã ähraa mũa. <sup>12</sup> Goãmũ yare weremũhtanirãre mũa core árĩñirãre erãguere ta ñero iimũhtañuma. Mũa sãre erãre iidiro dopa iicũ mucubirique. Õaro siporãcũque. Eropigũ umarogue mũa ejacũ wũaro ðaro ĩḡucumi mũare Goãmũ. Eropirã mucubirique mũa, arĩ werepũ Jesu.

*Moa iro dopa, boyoro iro dopa ährima Jesu yarã, arĩ buheñumi  
Mr 9.50; Lc 14.34-35*

<sup>13</sup> Eropi Jesu buhenemopũ:

—Moa waibũḡũ dihire iri ñero wabiricũ iiro dopa ta mũapũ yaharãpũ árĩpehrerã gajirãre ñerire erã iidiabiricũ iiaa. Moa ñeri wacũ dipaturi ðari iimasiya mara. Iri moa ne ðabeaa. Iri eropa wacũ iri moare cóãcãro gahmea. Irire cóãra pũhrũ weca ejama. Ne duhpiburi árĩbeaa iri erã cóãra. Iri duhpiburi árĩbiro dopa ta árĩbircãque mũa. Goãmũ yapũre iiniguicãque, arĩ werepũ Jesu.

<sup>14</sup> Eropi ĩḡũ buhenemopũ:

—Boyoro marire ĩhamasicũ iiro dopa ta mũapũre yaharãpũre i yeba majarãre Goãmũ yare wererã erãre masicũ iiro gahmea. Utãḡũ weca árĩri macare duhmasiya mara. <sup>15</sup> Eropi sihãgodirure masa sihãgorã gajino docague dibubeama. Irure sihãgogũ umarogue duhpeomi iri wihi majarã árĩpehrerã erã ĩaboro dopa. <sup>16</sup> Eropirã mũa sã mũa Goãmure mũa umupeorire dibubircãque. Õaro wereque. Eropirã ðarire iique. Mũa eropa iicũ ĩarã masa erã mari Pagũ umaro majagũre umupeorãcoma. “Īḡũ turagũ, ðagũ ährimi,” arĩrãcoma, arĩ werepũ Jesu.

*Goãmũ ĩḡũ dorerire ĩḡũ gojarare wereñumi Jesu*

<sup>17</sup> Eropa arĩtuhaja, erãre werenemopũ:

—Ire mũa masicũ gahmea yũhũ. Goãmũ ĩḡũ dorerire Moiserẽ ĩḡũ apirare, ĩḡũ yare weremũhtanirã erã gojara sãre cóãḡũ arigũ iibiribũ. Iri dorerire mũare ðaro were amugũ arigũ iibũ. Goãmũ yare erã werediro dopa ta ĩḡũ aribũ. <sup>18</sup> Diaye ta mũare arĩḡũ iiaa. I yeba umaro árĩropẽ ta ĩḡũ doreri sã árĩroca. Goãmũ ĩḡũ dorerare iipehogũcumi. <sup>19</sup> Eropirã iri dorerire yujurãyeri tarinũgarã, gajirãre eropa ta iidorerã bu árĩrã árĩrãcoma. Umãro majagũ opũ ĩḡũ árĩroque bu árĩrã iro dopa árĩrãcoma. Yujuñe dorerĩne árĩquerecũ ta erã tarinũgarã bu árĩrã iro dopa árĩrãcoma erã. Gajirãpũ ĩḡũ dorerire ðaro iirã, gajirãre

erã iiro dopa iidorerã umaro majagu ĩgu opu árĩroque oparã iro dopa árĩrãcoma erã. <sup>20</sup> Mũare arĩgu tĩaa yũũ. Masare buherã, fariseo masa sã Goãmu gamerire queoro iibeama. Erã tauro Goãmu gamerire iique mua. Mũa eropa iibirã, ĩgu opu árĩroquere ne ejasome mua, arĩ werepũ Jesu.

*Papũrire werenĩguire wereñumi Jesu*

*Lc 12.57-59*

<sup>21</sup> Eropa arĩtuhaja erãre werenemopũ:

—Iribojegue majarã õpa arĩ wererare ta peenirã árĩribũ mua: “Masare wejẽbircãque. Masare wejẽdigũ erã dipuwaja moabu ãhrimi,” erã arĩrare peenirã árĩribũ mua. <sup>22</sup> I erã werera tauñariro mũapũre werenemogura. ĩgu acaweregu mera papũridigũpũ masũre wejẽdigũ iro dopa ta ãhrimi. Eropigu erã dipuwaja moabu ãhrimi ĩgu sã. ĩgu acaweregare gameturigu dipuwaja moadorerã pohro erã aĩgãbu ta ãhrimi ĩgu sã. “Ñegu pee masibigu ãhraa mũũ,” ĩgu acaweregare arĩgũre peamegue wama gũhyataria ĩgũre.

<sup>23</sup> “Mũa acaweregu mũare ĩgu ĩhaturicũ ĩgu mera amumũhtaque Goãmũre serẽboro core. Eropirã Goãmũ wihigue mua Goãmũre umupeorã waboro core, waibugure mua oboro core õpa iique. <sup>24</sup> Goãmũre mua oburire duhucãnique dohpa. Mũa acaweregu pohrogue waha, “Dipaturi ĩhaturibircãrã. Irire iripẽta duhurã,” irire arĩque ĩgũre. Mũa eropa amura pũhrũ Goãmũre umupeorã waque daja ĩgu ya wihigue.

<sup>25</sup> “Gajigu mũare weresãdiagu, dipuwaja moadoreri wihigue mũare ĩgu aĩgãdiacũ, ĩgu mera guaro mariro arĩque. Dipuwaja moadoregu pohrogue ĩgu aĩ ejaboro core ĩgu mera õaro ahmu werenĩguique. Mũa eropa iicũ ĩagu mũare weresãbiribocumi. Mũa eropa iibiricũ erogũre mũare aĩ ejacũ ĩgũpũ dipuwaja moadoregũre weresãgũcumi. ĩgu eropa weresãcũ, beyegũpũ peresu iirãguere mũare ogũcumi. Eropirã erã mũare peresu iirãcoma. <sup>26</sup> Erogue árĩnĩguirãca mua. Ne erã wajayedorerare mua wajayepohocũgue wirirãca mua, arĩ werepũ Jesu.

*Gajigu marapo mera ñero iirire wereñumi Jesu*

<sup>27</sup> Õpa arĩ werenemopũ Jesu:

—Iribojegue majarã õpa erã arĩ wererare peenirã árĩribũ mua. “Gajigu marapo mera ñero iibiricãque,” erã arĩrare peenirã árĩribũ mua. <sup>28</sup> I erã werera tauñariro mũare ipũre werenemogura: Nomeore ñeabiriqueregu ta yujugu igo mera árĩdiagu igore ñero uaribejagu ñero guña pepigu ñero iituhami igo mera.

<sup>29</sup> “Eropirã mua cuiru diayepũ árĩdiru mera ñero iirã irirure mua gorawea cóãbodiropã dopa ta iri ñerire duhucãque. Irire duhubirã peamegue warãca. Mũa cuirure cóãcũ iri cuiru dihta dederea. Mũa ñerire duhubirãpũ peamegue waha ñetariario tarirãca. Eropirã iri ñerire duhucãque. <sup>30</sup> Eropirã mua mojoto diayepũ maja mojoto mera ñero iirã iri mojtore tabeta cóãbodiropã dopa ta iri ñerire duhucãque. Irire duhubirã peamegue warãca. Mũa mojtore mua cóãcũ iri mojtoto dihta dederea. Mũa ñerire duhubirãpũ peamegue waha ñetariario tarirãca. Eropirã iri ñerire duhucãque, arĩ werepũ Jesu.

*Erã marasã nomere cóãrire wereñumi Jesu*

*Mt 19.9; Mr 10.11-12; Lc 16.18*

31 Õpa arĩ werenemopu Jesu:

—Iribojegue i sãre arĩñuma: “Ígu marapore cóãdiagu ígu cóãburire wereripũ mera igore cóãmasimi,” arĩñuma iribojeguere. <sup>32</sup> I erã werera tauñariro muapure ire weregura: Yujugu ígu marapo umu mera ñero iibiriquerecũ ta igore cóãbocumi. Ígu eropa cóãdigo gajigu mera marapucugo ñero iigo iicumo gajigu mera árigo. Eropigu igo marapu igore cóãdigu igore gajigu mera ñero iicũ iimi. Eropigu ígu cóãdigo mera marapocugu igo mera ñero iigu iimi ígu sã, arĩ werepu Jesu.

*Waĩpeo arĩrare wereñumi Jesu*

33 Õpa arĩ werenemopu Jesu:

—Iribojegue majarãre erã òpa arĩ wererare peenirã árĩribu mua: “Mua arĩdiro dopa ta eropa iique. ‘Goãmũ mera diaye ta eropa iigura,’ mua arĩdiro dopa ta iique,” erã arĩ wererare peenirã árĩribu mua. <sup>34</sup> I erã werera tauñariro muare weregura. “Umaro mera diaye ta arĩgu iiaa,” arĩ umaro mera arĩ waĩpeo arĩbircãque. Umaropu mari Opu ígu árĩro ãhraa. Bu árĩro árĩbeaa. Ero eropa árĩro árĩcũ iarã eropa arĩmaabircãque. <sup>35</sup> I yeba mera ne waĩpeo arĩbircãque. I yeba sã Goãmũ ya yeba ta ãhraa. Ero eropa árĩro árĩcũ iarã eropa arĩmaabircãque. Jerusalén mera ne waĩpeobircãque. Turagu mari Opu ya maca ãhraa Jerusalén. Bu árĩro árĩbeaa. Eropirã eropa arĩmaabircãque. <sup>36</sup> “Yu dipuru mera diaye arĩgu iiaa,” arĩ waĩpeobircãque. Mua poari borecũ iimasibea mua. Iri ñiri wacũ sãre iimasibea mua. Eropa iimasibirã arĩrã “Yu dipuru mera diaye arĩgu iiaa,” arĩ waĩpeobircãque. <sup>37</sup> “Iirãra,” arĩrã waĩpeoro mariro diaye ta irire arĩniguicãque. “Iisome,” arĩrã sã waĩpeoro mariro arĩniguicãque. Mua waĩpeo arĩrã watĩ ñegu ígu dorero dopa ta iirã iica, arĩ werepu Jesu.

*Erã basi gamediarire wereñumi Jesu*

*Lc 6.29-30*

38 Õpa arĩ werenemopu daja Jesu:

—Iribojegue òpa erã arĩ wererare peenirã árĩribu mua. “Mure gajigu mu cuirure ígu patĩadiro dopa ta mu sã ígure patĩa gameque. Mu gucurirure ígu panuadiro dopa ta mu sã ígure ígu gucurirure panua gameque,” erã arĩ wererare peenirã árĩribu mua. <sup>39</sup> Erã werera tauñariro weregura daja muare. Muare ñero iidigure eropa ñacãque. Yujupu mu wayuporãre pacũ, “Gajipu sãre padiagu paque,” arĩque ígure. <sup>40</sup> Gajigu mure dipuwaja moagure ígu weresãcũ, ígu dipuwaja moagupu muhu camisa mera mure weresãdigure wajayedorebocumi. Ígu eropa wajayedorecũ ígure oque. Iriñere otuhaja mu weca majañe suhriro sãre onemoque ígure. <sup>41</sup> Yujugu surara gajinore yuju kilómetro mure aigãbasadorecũ, gaji kilómetro aigãnemobasaque daja ígure. <sup>42</sup> Mure serẽdigure ígu serẽropẽ ta oque ígure. Eropigu gajigu mure wayudorecũ wayuque ígure ígu wayudorerare, arĩ werepu Jesu.

*Mũare ñaturirãre mahique, arĩ wereñumi Jesu*

*Lc 6.27-28, 32-36*

<sup>43</sup> Ōpa arĩ werenemopũ daja Jesu:

—Masa ōpa arĩmũrima: “Mũa mera majarãre mahique. Eropirã mũare ñaturirãpũre ñaturi gameque daja,” erã arĩrare peenirã árĩribũ mũa. <sup>44</sup> Erã werera tauñariro weregũra mũare daja: Mũare ñaturirãre mahi umupeoque. Mũare ñero iirãre ōaro árĩdoreque. Mũare ñaturirãre ōaro iique. Eropirã mũare ñero wereniguirãre mũare ñero iirã sãre “Erã sã ōaro árĩporo,” arĩrã Goãmũre serẽbasaque. <sup>45</sup> Mũa eropa iirã mari Pagũ Ƶmaro majagũ Goãmũ porã ãhraa mũa. Goãmũpũ yujuropa ta iimi masare. Ñerãre, ōarã sãre abere asicũ iimi ĩgũ. Eropigũ Goãmũ ĩgũ dorerire iirã sãre, iibirã sãre deco merēcũ iimi ĩgũ. Masare yujuropa ĩgũ iiro dopa ta mũa sã masare iique. <sup>46</sup> Mũare umupeorã dihtare mũa umupeocũ ne duhpiburi árĩbeaa iri. Ñerã masa wajasea corerã sã eropa ta iima. Eropirã árĩpehrerãre umupeoque. <sup>47</sup> Mũa acawererã dihtare mũa ōaro bocatĩricũ ne duhpiburi árĩbeaa iri. Goãmũre masibirã sã eropa ta iima. Eropirã árĩpehrerãre ōaro bocatĩrique. <sup>48</sup> Ñeri marirã árĩque mũa. Mari Pagũ Ƶmaro majagũ ĩgũ ñeri marigũ ĩgũ árĩdiro dopa ta mũa sã ñeri marirã árĩque, arĩ werepũ Jesu.

## 6

*Ōari iirire wereñumi Jesu*

<sup>1</sup> Dipaturi ĩgũ werenemopũ:

—Goãmũ ya árĩburire ōarire iirã árĩrã, “Goãmũ yare iipehorã ãhraa gũa,” arĩ werebircãque gajirãre. Mũa eropa arĩ wererã mũa ōaro iira ne duhpiburi árĩbeaa. Eropigũ Goãmũ Ƶmaro majagũ ōarire mũa iira wajare mũare osome.

<sup>2</sup> “Eropirã mojomorocũrãre itamurã, iirire masare ii ñmubircãque. Masa erã ñabiro itamuque erãre. Gajirã iro dopa iibircãque. Erã masa bajarã watope mojomorocũrãre itamuma. Mague niguirã watope mari buheri wirigue árĩrã watope sãre ii ñmuma. Erã eropa iiquererã erã mari pũrũpũre ñero iicorerã ãhrima. Eropa masa watope ōarire ii ñhmurã erã, “Ōarã ãhrima erã,” masare arĩdorerã iima. Erã eropa iirã masa umupeori mera wajatatuhama. Eropigũ Goãmũpũ ne wajayesome erãre. <sup>3</sup> Eropirã mojomorocũrãre itamurã, iirire yayarogã iique. Mũa wapi mera árĩquererã ta ĩgũ ñabiro iirire iique. <sup>4</sup> Masa erã ñabirogue mojomorocũrãre itamuque. Masa ñabirogue mũa itamuquerecũ Goãmũpũ ñhami. Eropigũ mari Pagũpũ mũare wajayegũcumĩ, arĩ werepũ Jesu.

*Goãmũre serẽriñere buheñumi Jesu*

*Lc 11.2-4*

<sup>5</sup> Dipaturi ĩgũ werenemopũ:

—Goãmũre serẽrã, mari pũrũpũ ñero iicorerã iiro dopa iibircãque mũa. Erã mari buheri wirigue nigui, mague sãre nigui, Goãmũre serẽ ñmuma erã masare. Eropa serẽ ñhmurã diaye masa erãre umupeori mera erã mucubirituhama. Eropigũ Goãmũ erãpũre umupeosome. <sup>6</sup> Mũarũ Goãmũre serẽmorã mũa ya taribugue biha ñajaque. Biha ñaja mari Pagũ ñasũya marigũre serẽque. Mũa eropa iicũ masa erã

ĩabiro árĩquerecũ ta mari Pagupũ mũare ĩagũcumi. Eropa peegũ mũare õaro ĩigũcumi ĩgũ.

<sup>7</sup> “Eropirã Goãmũre serẽrã, pepiro mariro mũa serẽrãre ta dipaturi serẽ maji dujabiricãque. Eropa ta iima Goãmũre masibirã. “Bajasuburi yuju disiro ta gũa serẽcũ gũare peegũcumi,” arĩ pepima erã. <sup>8</sup> Erã iiro dopa ĩibiricãque. Mũa serẽboro core mari Pagũ mũa gamerire masituhami. <sup>9</sup> Eropirã õpa arĩ serẽro gahmea Goãmũre.

Gũa Pagũ umaro majagũ mũ õagũ árĩrire árĩpehrerã umupeoporo.

<sup>10</sup> Dohpaguere árĩpehrerã weca opũ árĩque. Umároguere mũ dorero dopa ta erã iiro dopa ta i yeba majarã sã eropa iiporo. <sup>11</sup> Eropigũ umuri nũcũ gũa baburire oniguicãque gũare. <sup>12</sup> Gajirã gũare erã ñero iirare gũa cãdijiro dopa ta mũ sã gũa ñero iirare cãdijique. <sup>13</sup> Eropigũ gũa ñero iiborare cãhmotaque. Eropigũ gũare ñerire ĩibiricãcũ iique. Mũhũ gũa Opũ turagũ eropa árĩniguigũca. Árĩpehrerã mũre eropa umupeoniguicãrãcoma, arĩ serẽque Goãmũre, arĩ wererũ Jesu.

<sup>14</sup> “Gajirãre mũare erã ñero iirare mũa cãdijicũ ĩagũ, mari Pagũ umaro majagũ mũa ñero iira sãre cãdijigũcumi. <sup>15</sup> Gajirã mũare erã ñero iirare mũa cãdijibiricũ mari Pagũ mũa ñero iira sãre cãdijisome, arĩ wererũ Jesu.

*Goãmũre umupeomorã ba duhurire buheñumi Jesu*

<sup>16</sup> Eropigũ ĩgũ erãre werenemopũ:

—Goãmũre umupeomorã ba duhurã bujawererã iro dopa ii ĩhmubiricãque. Eropa iima mari pũrũpũ ñero iicorerã. Erã erã diaporire bujawererã iro dopa ãhrima. Erã eropãrĩcũ erã ba duhucũ ĩha masima masa. Diaye ta mũare arĩgũ iiaa. Masa erãre umupeocũ gahmema erã. Eropirã erãre umupeocũ ĩarã mucubirituhama. Eropigũ Goãmũpũ erãre õaro iisome. Eropirã erã iiro dopa ii ĩhmubiricãque mũa. <sup>17</sup> Mũa sã ba duhurã mũa árĩniguiro dopa ta árĩque. Mũa ya dipure yũũ mera sũcã õaro wũapocãque. Mũa diapori sãre coecãque. <sup>18</sup> Mũa eropa iicũ mũa ba duhucũ ĩha masisome masarũ. Goãmũ dihta ĩha masigũcumi. Mũa seyaro mũa árĩcũ ĩgũpũ mũa mera ãhrimi. Eropa ĩagũ ĩgũ mũare õaro ĩigũcumi, arĩ wererũ Jesu.

*Umáro majare guñadoreñumi Jesu*

*Lc 12.33-34*

<sup>19</sup> Jesu werenemopũ daja:

—I yeba majare aĩ gameneobiricãque. Õ maja boa waboca. Iri boabiricũ yajari masũ aĩbocumi irire. ĩgũ yajabiricũ mega tuabocoma. Eropiro i yeba maja dederema guhya ãhraa. Eropirã i yeba majare burigã gamebiricãque. <sup>20</sup> Umáro majapũre turaro gameque mũa. Umáro majare mega tuamasibeama. Eroque mũa opaburi ne boabeaa. Eroguere yajari masũ ne aĩmasibeami. <sup>21</sup> Eroque mũa opaburi iri árĩcũ, umáro majare Goãmũ yare burigã guñarãca mũa, arĩ wererũ Jesu.

*Masa erã pepiro dopa ta iima, arĩ wereñumi Jesu*

*Lc 11.34-36*

<sup>22</sup> Eropĩ buhegũ õpa arĩ werenemopũ erãre:

—Mua cuiri mua dũpũre sihãgodiru iro dopa ta ãhraa, arĩ were-diacũ õpa ãhraa. Mua pepiro dopa ta iiaa. Mua õaro mera pepirã árĩrã õarire iiaa. <sup>23</sup> Mua ñerire pepirã árĩrã ñeri dihtare i mua. Õmaro majare mega tuamiaa. Eropirã mua ñeri dihtare mua pepiniguicãcũ iri ñeripũ ñetariari ãhraa, arĩ werepũ Jesu.

*Niyerure gamerã, Goãmũpũre gamebeama, arĩ wereñumi Jesu*

*Lc 16.13*

<sup>24</sup> Eropigũ ãgũ erãre werenemopũ:

—Yujugũ Goãmũpũre guñagũ niyerupũre guñabeami. Niyerupũre burigã guñagũ Goãmũpũre guñabeami. Eropigũ niyeru dihtare gamegũ árĩgũ Goãmũre mucubiricũ iibeami. Goãmũ sãre niyeru sãre peñere gametarimaja masiya mara mũare, arĩ werepũ Jesu.

*Goãmũ ãgũ porãre ñhadibumi, arĩ wereñumi Jesu*

*Lc 12.22-31*

<sup>25</sup> Eropigũ erãre werenemopũ:

—Eropigũ mũare ire arĩgũ iiaa. Mua árĩricũrũre mua barire, ihririre, suhri sãre wũaro guñaricũbiricãque. Mũare deyro moagũ bari dihtare bamorãre, suhri sañamorã dihtare Goãmũ iibiripũ mũare. Mua iri dihtare guñacũ gamebeami. <sup>26</sup> Mirimagũ porãre Goãmũ ãgũ ñhadiburire masique mua. Erã poeri moorã ãhrima. Eropiro erã bari dihburi wiri erãre mara. Mari Pagũpũ erãre erã baburire ohomi. Mirimagũ porã tauro mũapũre mahimi Goãmũ. Eropigũ mua sãre ñhadibugũcumĩ ãgũ. <sup>27</sup> Wũaro mua pepiri mera iri mũare pagarã wacũ iibeaa. Eropiro mua wũaro pepiri duhpiburi árĩbeaa.

<sup>28</sup> “¿Eropirã duhpĩrã mua suhri sañaburire wũaro guña bujawere pepicãri? Nũgũ maja gori iri gorire pepique. Iri gori ne iiro mariro õari goricũa. Iri gori õari suhri iro dopa õari gori dehyoaa. <sup>29</sup> Salomo opũ mũrũ õari suhri opagũ ãgũ árĩquerecũ ta iri goripũ ãgũ ya suhri tauro õari gori ãhraa. <sup>30</sup> Iri gorire õari gori iimi Goãmũpũ. Iri gori bajamenurigã árĩra pũhrũ ñaidija pehrea wahaa. Mero ãhri, gajinũ peamegue soe cóãcãma. Iri eropa mata pehrequerecũ ta iri gori iri õari gori árĩcũ iimi Goãmũ. Eropigũ Goãmũ iri gorire ãgũ õari gori ãgũ iidiro tauro mua sãre õaro iigũcumĩ. Suhrire ogũcumĩ. Goãmũre daberogã umupeoa mua. <sup>31</sup> Eropirã mua baburire, mua ihriburire, mua suhri sañaburire wũaro guñabiricãque. <sup>32</sup> Goãmũre masibirãpũ irire eropa amaniguicãma. Mari Pagũ mũaro majagũ árĩpehreri mua gamerire masimi. ãgũ eropa masicũ mua ya árĩburire wũaro guñabiricãque. <sup>33</sup> Goãmũ mua Opũ ãgũ árĩborore gamemũhtaque mua. Mua eropa iira pũhrũ Goãmũpũ mua gameri duhyacũ ogũcumĩ. <sup>34</sup> Eropirã ñamigãre mua dohpã warocuri arĩ wũaro bujawere ne pepibiricãque. Dohpagãre mua ñero tariboro árĩtuhaa. Eropirã dohpagã maja dihtare pepique. Gajinũ majare wũaro bujawere pepinemobiricãque. Goãmũpũ mũare itamugũcumĩ, arĩ werepũ Jesu.

## 7

*Gajĩrãre “Ñerã ãhrima,” arĩbiricãque, arĩ wereñumi Jesu*

*Lc 6.37-38, 41-42*

<sup>1</sup> Eropigũ ãgũ erãre werenemopũ:



—Gajirãre “Ñerã àhrima,” arĩ erã iirare werewuabiricãque mua. Mua eropa arĩ werewuabiricũ Goãmũ mua sãre “Ñerã àhrima,” arĩsome. <sup>2</sup> Gajirãre “Õaro iibeama,” mua arĩ pepidiro dopa ta Goãmũpũ mua sãre eropa ta arĩ ïagũcumĩ. Mua gajirãre beyero dopa Goãmũpũ mua sãre eropa ta beyegũcumĩ. <sup>3</sup> Mari werenĩgui queori mera buhecũ òpa iirã àhraa mua. Mua acaweregũ ïgũ cuirugue miri pogañegã mehñajacũ iri pogañegãre òaro ïhaa mua. Mua ya cuiripũre wuarimiji árĩquerecũ ta irimijire ne pepibea mua. Eropirã gajigũre miri pogañegãre mua ïaro dopa ta mua acaweregũ ïgũ ñero iiripũre òaro ïhaa mua. Mua basi turaro ñerire iiquererã ta irire eropa pepicãa mua. ¿Dohpa árĩronore eropa àhriri mua? <sup>4</sup> Òpa arĩ wereniũa mua acawererãre: “Acaweregũ, ñerire iigũ iica mũhũ. Eropigũ irire duhucãque,” arĩ wereniũa mua. Eropa ïgũre ñerire iidorebiriquererã mua sã ñerire duhubea. ¿Duhpirã irire ñerire iinirã árĩquereerã ta irire pee masibeari mua? <sup>5</sup> Eropa iirã masa erã pũrũpũre ñero iicorerã àhraa mua. Mua ñero iiripũre duhumãtaque. Mua eropa iira pũhrũ mua acawererãre “Mua ñero iirire duhucãque,” arĩ weremasia mua.

<sup>6</sup> Diayea iro dopa árĩrãre ñetariarãre Goãmũ ya òatariarire erã umupeobiririre werebiricãque erãre. “Erãgũe ñero wereya ñero arĩri,” arĩrã werebiricãque erãre, arĩ werepũ Jesu.

*Mari Pagũre mari serẽrĩre wereñumi Jesu*

*Lc 11.9-13; 6.31*

<sup>7</sup> Eropigũ ïgũ erãre werenemopũ:

—Goãmũre mari Pagũre serẽque mua. Mua eropa serẽrã mua aĩrãca. Mua serẽrĩre bocarãca. Goãmũre eropa serẽnĩguicãque mua. Mua eropa iicũ ïgũ mũare ogũcumĩ. <sup>8</sup> Árĩpehrerã Goãmũre serẽrã aĩrãcoma. Eropirã erã serẽrare bocarãcoma. Eropigũ árĩpehrerã Goãmũre eropa serẽnĩguicãrãre ïgũ erãre ogũcumĩ.

<sup>9</sup> “¿Mua porã barire mũare serẽcũ utãyepũre obocuri mua erãre? Obiriboya. <sup>10</sup> ¿Mua porã waire mũare serẽcũ añapũre obocuri mua erãre? Obiriboya mua. <sup>11</sup> Mua ñerã árĩquereerã ta mua porãre òarire omasia mua. Eropigũ mari Pagũ mua tauro òarire ohomi mũare ïgũ porãre ïgũre mua serẽrĩre.

<sup>12</sup> “Gajirã mũare òaro iicũ gahmea mua. Erãre mua òaro iicũ gamero dopa ta òaro iique erã sãre. Erã òaro iibiriquerecũ ta mũapũ erãre òaro iique. Eropa ta iidorea Moise dorerĩgũe, Goãmũ yare weremũhtanirã erã gojarague sã, arĩ werepũ Jesu.

*Miri disiporogã queorĩre wereñumi Jesu*

*Lc 13.24*

<sup>13</sup> Eropigũ ïgũ queorĩre werenemopũ erãre òpa arĩgũ:

—Goãmũ pohrogue wadiarã ïgũ yare iiro gahmea mũare. Eropirã ïgũ yare eropa iimaabiricãro gahmea. Miri disiporogãgũe mua wadiacũ diasa àhraa. Eropiro diasa àhraa Goãmũ pohrogue mua wadiacũ. Peamegue masa erã wacũ diasabeaa. Wuari disiporogue mari ñajacũ diasabeaa. Iri disiporogue ta masa erã ñajaboro dopa ta peamegue masa erã wacũ diasabeaa. Eropirã masa bajarã erogue warã iima. <sup>14</sup> Goãmũ pohrogue wadiacũ diasa àhraa. Bajamerãgã

masa erogue warācoma. Erogue warā umuri nucu Goāmū mera árĩniguirācoma, arĩ werepū Jesu.

*Yucugū ducare masirā dipagū sãre masiro dopa ta masa erā iirire ïarā erā árĩricurire masia mari, arĩ wereñumi Jesu*

*Lc 6.43-44*

<sup>15</sup> Eropigū ïgū werenemopū erāre:

—Ōaro pee masique. “Goāmū yare weremuhtarā āhraa,” arĩ guyarāre peebiricāque mūa. Erā ōarire iirā iro dopa aririma mūa pohrogue. Erā pepirigue ñerā āhrima erā. <sup>16</sup> Erā ñero iicū ïarā ñerā erā árĩcū masirāca mūa. Erā ōaro iicū ïarā, ōarā erā árĩcū masirāca mūa. Aña poragū dipatōrire ducacubeaa. Poracudigū sã higuera dipure ducacubeaa. <sup>17</sup> Ōadigū yucugū ōarire ducacua. Ñedigupū ñerire ducacua. <sup>18</sup> Yucugū ōadigū ñerire ne ducacumasibirica. Eropiro ñedigū sã ōarire ducacumasibirica. <sup>19</sup> Ōarire ducacubiriri yucure pa cóacā, peamegue soecāma. Eropa ta iigucumi Goāmū ïgū gamerire iibirāre. <sup>20</sup> Eropirā “Goāmū yare weremuhtarā āhraa,” arĩrā erā guyacū ōpa masirāca. Erā iiricurire ïaque. Erā ōarire iirā árĩcū ïha “Goāmū ya wereniguirā ta āhrima,” arĩ ïha masirāca. Erā ñerire iirā árĩcū ïha “Goāmū ya wereniguirā árĩbeama. Eropirā guyarā āhrima,” arĩ ïha masirāca, arĩ werepū Jesu.

*“Mũare ne masibea,” arĩgūca yũhũ bajarā masare, arĩ wereñumi Jesu*

*Lc 13.25-27*

<sup>21</sup> Eropigū ïgū erāre werenemopū:

—Bajarā yure “Yũ ïgū,” arĩrā árĩquererā ta umaro majagū Goāmū ïgū árĩroguere wasome erā. Yũ Pagū umaro majagū ïgū gamerire iirā dihta ïgū opū árĩroguere warācoma. <sup>22</sup> Pehrerinū árĩcū bajarā masa ōpa arĩrācoma yure: “Gua ïgū, mū yare gua buheabũ. Mū waĩ mera pũririre, watēare cóabũ. Eropirā mū turari mera baja deyoro moarire iiabũ gua,” yure arĩrācoma. <sup>23</sup> Erā eropa arĩquerecū ōpa arĩ yũhrigūca erāre: “Mũare ne masibea. Ñerire iirā āhraa mūa. Yũ pohro aribiricāque,” arĩgūca yũhũ erāre. Eropirā Goāmū gamerire ïique yũ pohro aridiarā, arĩ werepū Jesu.

*Pe wihi iira queorire wereñumi Jesu*

*Lc 6.47-49; Mr 1.22*

<sup>24</sup> Eropigū queori mera werepū Jesu erāre buhegū:

—Eropi árĩpehrerā i yũ wereniguirire peenirā yũ dorerire iirā, ōaro pee masigū wihi iidigū iro dopa āhrima erā. ïgū ũhcāri goberire seha, wihire nugunugapū. <sup>25</sup> ïgū wihire ïgū tuhajara pũhrũ deco burigā ahri, dia miritaria wayoro. Miruñe burigā weāyoro. Eropa waquerecū ta iri wihi ũhcāro ïgū nugura wihi árĩro ne mihrua dijabiriyoro. <sup>26</sup> Eropirā árĩpehrerā yũ wereniguirire peenirā árĩquererā ta yũ dorerire iibirāpū pee masibigū ïgū wihi iigū iro dopa āhrima. ïgupū ïgū wihire dia tũro maja imiporo weca nugu, ōaro iibiripū. <sup>27</sup> ïgū wihire tuhajara pũhrũ, deco burigā ahri, dia miritaria waha, miruñe burigā weāyoro. Eropa weāro iri wihire weā mehpicāyoro, arĩ werepū Jesu.

28-29 Īḡu eropa arī buhecū peerā, peemaria wañorā masa. “Īḡu marire opu ĩḡu buhero dopa ta buhemi ĩḡu. Marire buherā iro dopa buhebeami,” arī pepiñorā erā.

## 8

*Jesu cami boagure ðagũ wacũ iĩnumi*

*Mr 1.40-45; Lc 5.12-16*

<sup>1</sup> Jesu utāḡugue buhe doadigũ dijaa wapũ. Īḡu dijacū ĩarā masa bajarā ĩḡure nurusiañorā. <sup>2</sup> Ero ĩḡu wadiro yujugũ cami boagũ mague ĩḡure nurusiaja eja, mereja, ĩḡure serēpũ.

—Gua tĩḡu, muhũ yũre ðagũ iidiagũ iique, arĩpũ.

<sup>3</sup> Īḡu eroparĩcũ peegũ ĩḡu mojoto mera Jesu ĩḡure mohmepipũ.

—Áu, mure ðagũ wacũ iiaa, arĩpũ Jesu ĩḡure.

Īḡu eroparĩcũ ta iri cami boara yarima wayoro. <sup>4</sup> Eropa iituhaja Jesu ĩḡure arĩpũ daja:

—Yuhũ mure ðpa iirare ne gajirāre werebircāque. Mũ ya dũpũre ðarare pahire ĩhmugũ waque, “Ōaro āhrimi,” arĩdoreḡũ. Tuhajanugu Moise dorerire Goāmũ ĩḡu apidiro dopa ta iique. Eropigũ Goāmũ ya wihigue mirimagure asũ wahḡā apique mũ dore tarirare masa árĩpehrerā erā masimaja ðaro, arĩpũ Jesu.

*Surara opu ĩḡu pohro majagũ dorecũcũ Jesu ðagũ iĩnumi ĩḡure*

*Lc 7.1-10*

<sup>5</sup> Ero puhũ Jesu Capernaum waĩcũri macague ĩḡu ejacũ surara opu ĩḡu pohro eja, ĩḡure turaro ðpa arī serēpũ:

<sup>6</sup> —Gua tĩḡu, yũ pohro majagũ ne buhari mera dorecũḡũ wama-sibirinijagũ, ĩḡure buřigā pũricũ pepigũ yaha wihigue oyacumi ĩḡu, arĩpũ ĩḡu Jesure.

<sup>7</sup> Īḡu eroparĩcũ pee:

—Áu, arī, ĩḡure ĩḡu dorecũrĩre taugũ wagũra, arĩpũ Jesu.

Īḡu eroparĩcũ ðpa arĩpũ surara opu:

<sup>8-9</sup> —Opũ, ðaroca. Aribita. Ñegũ āhraa yuhũ. Yaha wihire mure ñajaridorebuno árĩbeaa yuhũ. Yuju diaye ta mũ turari mera dorebeoque. Mũ eropa iicũ yũ pohro majagũ ðagũ wagũcumĩ. Yũre yũ weca árĩrā gajirā oparā dorema. Yũ sã surarapũre dorea. Yujugure “Waque,” yũ arĩcũ ĩḡu wahami. Gajigure “Arique,” yũ arĩcũ ahrimi. Yũ pohro majagure “Ire iique,” yũ arĩcũ irire iimi. Eropigũ mũ ĩḡure mũ dorero dopa ta ĩḡu dorecũḡũ tarigũcumĩ, arĩpũ ĩḡu.

<sup>10</sup> Jesu ĩḡu eroparĩcũ pee uca wa bajarā masa ĩḡu mera nurũsĩarāre ðpa arĩpũ:

—Diaye ta mũare arĩḡũ iiaa. Ihĩ surara opu Israe masũ árĩbiriquereḡũ Goāmũre buřigā umupeomi. Īḡu pohro majagure yũ ðagũ wacũ iiburire masituhami. Ne Israe masare ihĩ iro dopa umupeorāre ĩanibea. <sup>11</sup> Mũare arĩḡũ iiaa. Bajarā ihĩ iro dopa árĩrā árĩpehrero majarā umaro majagũ ĩḡu opu árĩroḡue eja, erogue árĩrā mera barācoma. Mũa ñecũ sumarā mũra Abrahā, Isaa, Jacobo mera barācoma erā. <sup>12</sup> Masa gajirāpũ “Opũ ĩḡu árĩroḡue wamorā āhraa ḡua,” erā arĩquerecũ ta ñerogue naitĩarogue cóāḡāḡũcumĩ erāre. Erogue ĩḡu cóānirā buřigā ore, bujawereri mera erā ḡũcũrĩre cũridihurācoma, arī werepũ Jesu.

13 Irire eropa arĩtuhaja surara opũre arĩpũ:  
—Dujaaque mu ya wihigue. Mu pohro majagu tarigucumi. “Diaye ta tarigucumi,” arĩ mu pepidiro dopa ta tarigucumi, arĩpũ Jesu.  
İgu eroparĩcũ ta İgu pohro majagu pũ õha warũ.

*Pedro mũñecore dorecugore tauñumi Jesu*

*Mr 1.29-31; Lc 4.38-39*

14 Pũhrũ Jesu Pedro ya wihigue eja, Pedro mũñeco dorecũcũ İapũ İgu. Nımacũri árĩcũ oyapo İgo. 15 İgo eropa dorecũcũ İanıjagu İgo mojtore mohmeripũ. İgu eropa mohmepicũ ta nımacũri taria wayoro. Taricũ pepigo İgorũ wahgã, erãre barire ejopo.

*Jesu bajarã dorecũrãre tauñumi*

*Mr 1.32-34; Lc 4.40-41*

16 Eropi ñamicague bajarã watẽa ñajasũnirãre masa aĩ ejañorã Jesu pohrogue. Erã eropa aĩ ejacũ İagu mata İgu watẽare cõacũ masa õha wañorã. Eropıgu arĩpehrerãre dorecũrãre erã aĩ ejanirãre taupehocãpũ Jesu. 17 Eropa ta İpũ İgu irıbojegue majagu Goãmũ yare weremũhtadıgu İsaia İgu arĩdiro dopa ta. Õpa arĩ gojañumi: “Mari dorecũrĩre taucãmi İgu. Marire pũririre cohãmi İgu,” arĩ gojañumi İsaia Jesu arıborõ coregue.

*Yujurãyeri Jesu mera majarã árĩdiariñuma*

*Lc 9.57-62*

18 Jesu masa bajarã İgu pohro árĩcũ İagu,  
—Wũariya gajıpũ masegue ina tarıbujarã, arĩpũ İgu buherãre.  
19 Erã tarıbujaborõ core judıo masare buhegu Jesu pohrogue eja, õpa arĩpũ:

—Buhegu, mu mera wadiaa noho mu warõ, arĩpũ.

20 Jesu õpa arĩ yũhrıpũ:

—Yũ mera árĩcũ diasã ãhraa. Nũgu majarã diayea erã carĩburi toreri opama. Mirımagũ porã sã erã ya suhri opama. Yũpũre Goãmũ İgu obeodıgũpũre ne yaha wihi mara. Eropırã yũ mera árĩrã ñero tarırãca mũa, arĩ yũhrıpũ Jesu.

21 Eropı gajıgu Jesu buhegu õpa arĩpũ:

—Gua opũ, yũ pagũ İgu sĩricũ yaatuhajagu mu mera wagũra, arĩpũ İgu Jesure.

22 Jesu yũhrıpũ:

—Yũre gamebirã sĩrinirã iro dopa ta ãhrıma. Erãpũ sĩrinirãre yaaporo. Eropıgu mũpũ yũ mera majagu árıbu arıque dohparagã, arĩpũ İgu.

*Jesu miruñere yũsdoreñumi*

*Mr 4.35-41; Lc 8.22-25*

23 Eropa arĩtuhaja dohodırugue ñajapũ. Eropırã İgu buherã sã İgu mera waha ñajañorã. 24 Ero erã tarıbujarisubu irıyague miruñe bũrigã arıyoro. Eropıro pãgũri dohodırure mıucãrıyoro. Eropa miruñe weãquerecũ ta Jesupũ carıgu İpũ. 25 Eropa wacũ İarã erã İgũre wahgũñorã. Wahgũ õpa arıñorã:

—Opũ, mirımorã iica marı. Miruñere tauque, arıñorã.

26 Erã eroparĩcũ Jesu yũhrıpũ:

—¿Duhpirã gũımaacãri mũa? Yũre merogã umupeorã ãhraa mũa, arıpũ Jesu erãre.

Eropa arĩgu ta wahgãnugaja miruñere pãgúri sãre “Yusũque,” arĩpu. Īgu eroparĩcũ miruñe, pãgúri sã yusũdijapehrea wayoro. <sup>27</sup> Īgu eropa iicũ ĩha ũca, õpa arĩ wereniguiñorã erã basi.

—¿Ñehmũno masũ áhriri ihĩ? I miruñe, pãgúri sã yũhrisũgu áhrimi, arĩñorã erã.

*Watẽa ñajasũnirãre tauñumi Jesu*

*Mr 5.1-20; Lc 8.26-39*

<sup>28</sup> Erãre eropa wara pũhrũ taribujaja, Gerasa majarã ya yebague ejaapu. Eroge erã ejacũ perã ũma Jesure bocatĩriñorã. Masa goberi watopegue árinirã áriñorã. Erã watẽa ñajasũnirã áriñorã gorowererã guhyarã áriñorã. Eropirã erogue masa ne wabiriñorã. <sup>29</sup> Īgure bocatĩri õpa arĩ gaguiniguiñorã:

—¿Mũhu Goãmũ magũ duhpibu áhriri mũhu guã pohroguere? ¿Guare Goãmũ dorero ejabiriquerecũ ta dipuwaja moagu áhriri mũhu? arĩ gaguiniguiñorã erã watẽa mera.

<sup>30</sup> Ero pohro bajarã yesea ahma barã iĩñorã. <sup>31</sup> Erãre ĩanijarã, watẽapu õpa arĩ burigã serẽñorã Jesure:

—Guare oã ũmare cóãgu soã yesea pohroge wadoreque guare. Erã mera guare áridoreque, arĩ serẽñorã erã Jesure.

<sup>32</sup> —Áũ, waque, arĩpu Jesu.

Īgu eroparĩcũ watẽa perã masa mera árinirã waha, yesea pohroge ejañorã. Erãre ñajacũ ta yesea gorowere, dipatũrugue oma buha, wũariyague yuriñaja yuhria, miri sĩripehrea wañorã.

<sup>33</sup> Erã eropa wacũ ĩarã yeseare ĩhadiburãpu gũi, omagã wañorã. Macague eja yesea erã mirirare weresiripehocãñorã erã. Watẽa erã ñajasũnirãre Jesu ĩgu cóãra sãre werepehocãñorã erã. <sup>34</sup> Erã eropa weresirira pũhrũ iri maca majarã áripehrerã Jesure ĩarã ejañorã. Eropirã ĩgure ĩara pũhrũ turaro mera wiriadoreñorã ĩgure erã ya yebare.

## 9

*Dũpu bũhadigũre õagu wacũ iĩñumi Jesu*

*Mr 2.1-12; Lc 5.17-26*

<sup>1</sup> Erã eropa wadorera pũhrũ Jesu dohodirugue ñaja, wũariyague taribujaa, ĩgu ya macague ejaapu. <sup>2</sup> Eroge gajirã dũpu bũhadigũre pũgu mera coã aĩ wahgã erañorã Jesu pohro. “Jesu ĩre ĩgu dorecurire taricũ iigucumi,” arĩ pepiñorã erã. Erã eropa arĩ pepicũ masigu Jesu dorecũgure õpa arĩpu:

—Mucubirique mũhu. Mũ ñero iirare cóãtuhabu yũhu, arĩpu ĩgu.

<sup>3</sup> Īgu eroparĩcũ peerã yujurãyeri masare buherã õpa arĩ pepiriñorã erã basi: “Ihĩ eropa arĩ ĩgu wereniguiñorã mera Goãmũre ñero arĩgu iimi,” arĩ pepiñorã erã buherã. <sup>4</sup> Erã eropa arĩ pepicũ masigu, õpa arĩpu Jesupu:

—¿Duhpirã eropa arĩ ñero pepiri mũa? <sup>5</sup> “Mũ ñero iirare cóãbu,” yũ aricũ “Gũyagu áhrimi,” arãa mũa masibiriquererã ta. Īgure “Wahgãnugajaque. Curique,” yũ aricũ yũ arĩra diaye áriñorã aricũ mata mũa ĩha masirãca. <sup>6</sup> Yũhu masũ Goãmũ ĩgu obeodigu i yeba majarã erã ñero iirare cóãmasia yũhu. Mũa ire masiborore õpa ta ĩgu wahgãnugacũ iigura, arĩpu Jesu.

Eropa arituhaja dupu buhadigure opa aripu:

—Wahgānugajaque. Mu pūgure ai, mu ya wihigue dujaaque, aripu igure.

<sup>7</sup> Igu eroparicū ta peegu dupu buhadigu wahgānugaja, igu ya wihigue dujaa wapū. <sup>8</sup> Masa igu eropa wacū iarā güiñorā. Eropirā Jesure Goāmū igu turarire opacū iarā Goāmure umupeo, oaro wereniguiñorā.

*Jesu Mateore sihuñumi*

*Mr 2.13-17; Lc 5.27-32*

<sup>9</sup> Erā eropa iira puhru Jesu erogue aridigu wiria, yare Mateore bocatirimi. Oparā ya ariburire masare wajasea coregu ariribu. Eropigu irisubure yu mohmeri taribugue doabu. Ero yu doacū iagu, opa arimi yure:

—Yu mera majagu aribu arique, arimi yure Jesu.

Igu eroparicū pee, wahgānugaja igu mera wabu.

<sup>10</sup> Puhru yaha wihigue Jesu sā barā erama. Bajarā wajasea corerā “ñero iirā” erā arirā gua mera ta bama. <sup>11</sup> Erā mera gua bacū iarā, fariseo masa Jesu buherāre opa arima:

—¿Duhpigu mure buhegu wajasea corerā ñero iirā mera bahari? arima erā guare igu buherāre.

<sup>12-13</sup> Erā eroparicū peegu Jesupu opa queori mera yuhrimi:

—Dorecubirā duhture amabeama. Dorecūrā dihta duhture ahmama. Dorecūrā duhturu amaro dopa ta “Ñerā āhraa,” arirā yure amarācoma. Eropigu “Ñerā āhraa,” arirā dihtare erā ñero iirare bujaweredore oaripure gohrotocū iigu aribu yuhu. Erā basi “Ōarā āhraa gua,” arī pepirāre itamugu aribiribu. Goāmū igu arirare erā arī gojarare masique mūa. “Waimurāre wejē soemujurā yure eropa umupeocū ne gamebeaa. Gajirāre mūa mojomoro iacūpūre gahmea,” arimi Goāmū, arī gojañumi. I eropa aririre masique mūa. Irire oaro buhenemorā waque, arimi Jesu fariseo masare.

*Ba duhurire serēpiñuma Ñu buherā Jesure*

*Mr 2.18-22; Lc 5.33-39*

<sup>14</sup> Puhru Ñu waīyegu igu buherā gua pohro eja Jesure serēpima:

—Gua Ñu buherāpu bajasuburi Goāmū ya ariburire iirā ba duhua. Fariseo masa sā eropa ta ba duhuma. ¿Duhpirā mu buherāpu ba duhubeari? arima erā Jesure.

<sup>15</sup> Jesu erāre opa arī yuhrimi:

—Ōpa āhraa iri: Mojoto diridigu igu bosenu iicū igu mera majarā bujawererā ba duhurā aribeama. Igu mera arirā mucubiri barā iima. Eropa ta yu buherā sā yu mera arirā ba duhumasibeama. Yujunū yure Goāmū aīcāgucumi. Eropa igu yure aīra puhru yu buherā mera arīsome yuhu. Irisubugue ta yu buherā ba duhurācoma, arī yuhrimi Jesu.

<sup>16</sup> Erā iribojegue maja buheri mama buheri mera erā peñe buhemorediacū iagu opa arī werenemomi Jesu erāre:

—Ne mama gasiro suhri gasiro mera murañe suhrirore seretu masiya mara. Eropa seretura puhru mama gasiro mari coecū mura suhriro arīro yehguea wa daja, tara gameneo, wuatariaro yehgueacū iiaa. Eropa ta mura buheri mama buheri mera wapi moa buhebircāro

gahmea. <sup>17</sup> Eropirā ne igui deco imisīri decore waibūgu gasiro ajuro mura ajuro mera diyebiricāro gahmea. Eropiicū igui deco imisīri pahmura puhru mura ajurore yeguedija wahaa. Iri ajuro yehgucū igui deco sã, ajuro sã cohmoa wahaa. Eropirā igui deco waibūgu gasiro mama ajuro mera diyero gahmea. Eropiicū igui deco pahmuro ôaro iri ajuro sēraa. Eropa ta mama buheri mura buheri mera buhebircāro gahmea, arī weremi Jesu erāre.

*Jairo magore ôago ii, behreri opaniguigo sãre ôago wacū iinūmi Jesu Mr 5.21-43; Lc 8.40-56*

<sup>18</sup> Īgu eropa arī wererisubū gua judio masa buheri wihi opu Jesu pohrogue erami. Eraa, mereja, ôpa arīmi:

—Yū mago negāgue sīria wahāmo. Igore mū mojtore duhpeogu arique. Mū eropa iicū masagocumo, arīmi ĩgu Jesure.

<sup>19</sup> Īgu eroparīcū peegu Jesu wahgānugaja, ĩgu mera wami. Gua ĩgu buherā sã ĩgu mera wabū. <sup>20</sup> Gua erogue waniguicū ero nomeo Jesu purupu eja, ĩgu suhriro ojogore mohmepiñamo. Doce bojori gohra umari nucu behreniguigo árīpo. <sup>21</sup> Ôpa arī pepipo igo eropa iigo: “Īgu suhriro dihtare mohmepiñago ôago dujagoca yuhū,” arī pepipo igo. Eropigo igo mohmepicū mata igo di wirira purumujuyoro. <sup>22</sup> Igo eropa iicū masigu Jesu majinugaja, igore arīmi:

—Mucubirique mūhū. Mūhū yure umupeori mera ôago dujaa, arīmi ĩgu.

Īgu eroparīcū ta ôha wamo igo.

<sup>23</sup> Eropa iituhaja Jesu gua mera opu ya wihigue ejami sīridigo pohro. Ñajajagu bajarā masa i wihigue árīrā turaro busucū ĩami. Gajirā ñehamere orerāre gaguiniguirāre ĩami. Gajirā igogāre yaaboro core tarisu iro dopa árīrire purirāre ĩami. <sup>24</sup> Erā eropa iicū ĩagu masare ôpa arīmi:

—Wiriaque mūa. Sīribeamo igo. Carīgo iimo, arīmi erāre.

Īgu eroparīcū peerā, “Eroparīcāgu iimi ihī,” arīrā masa ĩayema ĩgure. <sup>25</sup> Īgupu erāre disiporogue wiupehocāmi. Tuhajanugu sīridigo pohrogue eja, igo mojtore ñeapu. Īgu eropa ñeañacū ta masa bejaja, wahgānugajapo igo. <sup>26</sup> Īgu eropa iirare peerā, ero majarā masa árīpehrerā masa werewñañorā.

*Perā cuiri ihajabirāre ĩacū iinūmi Jesu*

<sup>27</sup> Ero árīnirā gua Jesu mera wacū, perā cuiri ihajabirā ĩgure piyu nuruslāma:

—Opu Davi pārami masare taugu, guare mojomoro ĩaque mūhū, arī gaguiniguima erā.

<sup>28</sup> Erā eroparīcū Jesu gajī wihigue ñajami. Īgu eropa ñajacū masirā cuiri ihajabirā ĩgu pohrogue ñaja wama. Erā eropa ñajacū ĩagu ĩgupu erāre serēpimi:

—¿Marire ĩacū iigucumi ĩgu, arī pepiri mūa yure? arīmi ĩgu.

—Opu, eropa ta arī pepia gua, arī yuhrima erā.

<sup>29</sup> Erā eropa yuhricū ta erā cuirire ñapeomi. Ñapeogu, ôpa arīmi:

—Yure “Eropa iigucumi,” mūa arī pepidiro dopa ta eropa ta iigura, arīmi Jesu.

<sup>30</sup> Īgu eroparīcū ta erā cuiri ôha wabū. Eropi Jesu ôpa arīmi erāre:

—I yu òpa iirare gajiräre ne werebircäque, arĩrimi Jesu.

<sup>31</sup> Īgu eropa arĩquerecũ ta waha, i yeba majaräre weresirinirã árĩma ĩgu eropa iirare erã.

*Wereniguimasibigure wereniguicã iĩnumi Jesu*

<sup>32</sup> Iri wihire erã cuiri òha wanirã wiriarisubu gohra yujugu wereniguimasibigure aĩgãrima Jesu pohro masa. Watĩ ĩgure ñajasũdigu ĩgure wereniguimasibircũ iidi árĩmi. <sup>33</sup> Erã aĩ ejacũ ĩagu watĩre Jesu cóãmi. ĩgu eropa watĩre cóãcũ wereniguimasibiridigupu wereniguia wami. ĩgu eropa iicũ ĩarã árĩpehrerã ĩhamaria wama.

—Ne i yeba Israe yebaguere òpa iiräre ĩabirimurabu mari, arĩ wereniguima masa erã basi.

<sup>34</sup> Fariseo masa gajiropa arĩ wereniguima:

—Watẽa opu ĩgu turari mera watẽare cohãmi ihĩ, arĩ wereniguima erã.

*Masaremojomoro ĩañumi Jesu*

<sup>35</sup> Eropi árĩpehreri macari ero árĩri macarire, paga macari sãre buhe curigu wami Jesu gua mera. Òari buherire erã buheri wirigue buhegu wami ĩgu. Eropigu Goãmu ĩgu opu árĩborore weremi. Árĩpehreri dorecuri sãre ero majaräre taumi ĩgu. <sup>36</sup> Erã masa bajarã ñero tarirã, itamuri moorã, oveja dibuya marirã iro dopa erã árĩcũ ĩapu Jesu erãre. Eropa ĩagu Jesu erãremojomoro ĩami. <sup>37</sup> Eropigu òpa arĩmi ĩgu guare ĩgu buheräre:

—Ojoduca baja iri bugatuhajacũ baja árĩcũ mohmeri wuaro ãhraa. Mohmeri masapu bajamerãgã ãhrima. Eropa ta òari buherire peemorã bajarã árĩcũ wuaro ãhraa mari mohmeri. Iri eropa arĩquerecũ ta mari masare buhemorã bajamerãgã ãhraa. <sup>38</sup> Eropirã òari buherire buhemoräre gajiräre ĩgu obeomoräre serẽque Goãmure mua, arĩmi Jesu guare.

## 10

*Jesu doce gohra beyeñumi ĩgu buhedoregu obeomoräre*

*Mr 3.13-19; Lc 6.12-16*

<sup>1</sup> Pũru doce guare ĩgu buheräre Jesu sihubeo, turarire omi guare. Watẽare gua cóãmasiburire, árĩpehreri dorere gua taumasiburire omi guare.

<sup>2</sup> Òpa waĩcurã árĩbu gua Jesu ĩgu apinirã: Simo árĩmi. ĩgure ta Pedro arĩ piyumi Jesu. Simo pagu magu Andre árĩmi. Santiago ĩgu pagu magu Ñu mera árĩmi. Erã pagu Zebedeo waĩcumi. <sup>3</sup> Felipe, Bartolomé, Toma, yũhu Mateo árĩbu gua. Yũpu oparã ya árĩburire masare wajaseabasa coredigu árĩribu. Gua mera gajigu Santiago árĩmi. ĩgu Alfeo magu árĩmi. Eropigu Lebéo sã árĩmi. ĩgũpu Tadeo erã arĩ piyudigu árĩmi ĩgu. <sup>4</sup> Simo celote ya curu majagu, Juda Iscariote sã árĩma. Judapu Jesure ĩhaturiräre ĩhmubu árĩmi.

*Jesu ĩgu buheräre buhedoregu obeoñumi*

*Mr 6.7-13; Lc 9.1-6*

<sup>5</sup> Eropi guare ĩgu buheräre docere obeogu, “Òpa iique,” arĩ were-seremi guare:



—Judio masa árībirā pohroguere wabiricāque. Ne Samaria yeba maja macarigüe säre wabiricāque. <sup>6</sup> Israe yeba majarā pohroguerepüre waque. Goāmure masibirā āhrima erā. <sup>7</sup> “Ūmaro majagū opu árīboro merogā duhyaa,” arī buheque erāre. <sup>8</sup> Eropirā cami boarāre, gajī baja gajiropa árīri dore oparā säre ōarā wacū iique. Sīrinirāre masuque. Watēa ñajasūnirāre cohā wiuque erā watēare. Mūare iri turarire ogū iiaa. Eropirā mūa sā yū eropa odirō dopa ta masare wajasearo mariro ōarā wacū eropa iicāque.

<sup>9</sup> “Mūa warā ne niyerure aībiricāque. <sup>10</sup> Ne mūa ajure, ne peñe camisare, ne peba zaturī säre aīgābiricāque. Mūa buherogüere ero majarāpū mūare barire oporo.

<sup>11</sup> “Iri macarigüere ejarā, mūa carīborore masa ōaro umupeogu pohrogue amaque. Eropirā īgu ya wihi ta dujanique. Ne warāgue wiriaque iri wihire. <sup>12</sup> Eropirā wihigüe ñajarā “Āhriri,” arīque iri wihi majarāre. <sup>13</sup> Mūare erā gamecū, “Goāmū mera ōaro árīque mūa,” arīque erāre. Mūare erā gamebiricū, “Goāmū mera ōaro árīque,” mūa arībiricāque erāre. <sup>14</sup> Eropirā mūare erā gamebiricū, erā mūa buherire peediabiricū iarā iri wihire wiria waque. Eropa wiriarā, guburi maja nicure moje siripique erā ñaro, erā ya dipuwajare īhmmorā. Iri maca majarā mūare gamebiricū eropa ta iique erā säre. <sup>15</sup> Diaye ta mūare arīgu tiiaa. I ūmū pehrecūguere Sodoma majarā Gomorra majarā mūa burigā dipuwajacurācoma. Erā eropa dipuwajacuro tauro mūare gamebirāpū dipuwajacurācoma. arī weremī Jesu guare.

*Jesu yarāre gajirā erā ñero iīborore wereñumi Jesu*

Eropa arītuha ōpa arīnemomi guare īgu buherāre:

<sup>16</sup> —Yūre peeque mūa. Oveja iro dopa árīrāre mūare yeea guarā iro dopa ta ñerā árīrā watopegue obeogu iiaa. Eropirā mūapū ōaro pee masirā árīque. Eropirā gariboro mariro ōaro árīque erā mera. <sup>17</sup> Ōaro iique mūa. Masa mūare erā oparāre orācoma mūare dipuwaja moadorerā. Erā buheri wirigüe säre parācoma mūare. <sup>18</sup> Eropirā mūa yaharā mūa árīri dipuwaja macari majarā oparā pohrogue erā tauro oparā pohrogue säre aīgārācoma mūare dipuwaja moadoremorā. Eropirā mūare erogüe erā aīgācū judio masa árībirā oparā säre ōari buherire wererāca mūa. <sup>19-20</sup> Mūare oparā pohrogue erā aīgācū erāre mūa wereniguiburire wūaro pepibiricāque. Mūare erā serēpicū ta mūa erāre yūhriburire masirāca Goāmū mera. Eropa masirā mūa irire mūa gamero wereniguisme. Goāmūpū mari Pagū īgu Espírītu Santo mera mūare wereniguicū iigūcumi.

<sup>21</sup> “Irisubure erā tīrā erā pagū porā Jesu yarā árīcū īha wejēdore wiarācoma oparāre. Erā pagū sumará erā porā Jesu yarā erā árīcū īha wejēdore wiarācoma oparāre. Erā porāpū erā pagū sumará erā Jesu yarā erā árīcū īha wejēdore wiarācoma oparāre. <sup>22</sup> Eropirā masa árīpēhrerā yūre mūa umupeora dipuwaja īhaturirācoma mūare. Erā mūare erā ñero iiquerēcū ta mūare erā ñero iirare yujuro bojerā yūre duhubiricū Goāmū mūare taugūcumi. Eropigū īgu pohrogue mūare opagūcumi. <sup>23</sup> Yuju maca mūare erā ñero iicū gajī macague duhri wahgāque. Diaye ta mūare arīgu tiiaa. Israe yeba árīri macarire

mua buhepehoboro core, yũhu masu Goãmu ïgu obeodigu i yebague dujarigura.

<sup>24</sup> “Buherã erãre buhegure masi taribeama. Eropigu pohro majagu sã ïgu opu weca árïbeami. <sup>25</sup> Yujugu buhegure ïgure weredigu iro dopa dujaro gahmemi ïgu. Pohro majagu sãre ïgu opu iro dopa ta dujami. Muapu yu buherã ãhraa. Eropirã yure iidiro dopa ta mua sãre iirãcoma. Eropirã yure “Watï Beelzebú ãhrimi,” arï weresãrã, mua sãre yaharãre ñero arï wereniguirãcoma erã, arï weremi Jesu guare.

*¿Nihinore güicã õhari? arï wereñumi Jesu*

*Lc 12.2-7*

<sup>26</sup> Eropa arïra puhru Jesu õpa arïnemomi guare:

—Eropirã muare erã ñero iidiarãre güibiricãque. Masa erã yayasãrãre puhru gajirã masirãcoma. Erã dibura sãre gajirã masirãcoma. <sup>27</sup> Eropirã muare yayarogã yu wererare bajarã masa watope wereturiaque muapu. <sup>28</sup> Muare wejẽrã mua dupu dihtare wejẽmasima. Mua siporãpu sïribeaa. Eropirã muare wejẽdiarãre güibiricãque. Goãmupure güique. ïgu mua dupu mua siporãri sãre peamegue dedemasimi muare. Eropirã ïgupure güique.

<sup>29</sup> “Perã mirua wajamarima. Erã eropa wajamariquerẽ ta Goãmu õaro mahi ïhadibumi erãgãre. Goãmu dorebiricũ ne sïribeami yujugã. <sup>30</sup> Eropigu mua poarire ne yuju poadigã duhyaro mariro masipehomi Goãmu. Eropa ta mua árïricuri sãre masipehomi Goãmu. Eropa masigu muare ïhadibuniguicãmi. <sup>31</sup> Miruare ïgu ïhadiburo tauro muapure ïhadibumi Goãmu. Eropirã wuaro bujawere guñaricubiricãque mua, arï weremi Jesu.

*Jesure mua umupeorire wereque masare, arï wereñumi*

*Lc 12.8-9*

<sup>32</sup> Eropigu gua sãre werenemomi:

—Yujugu “Jesucristo yagu ãhraa,” masare ïgu arï werecũ yu sã ïgure “Yahagu ãhrimi,” arï weregura yu Pagu umaro majagugure. <sup>33</sup> Yujugu masare güigu “Jesucristo yagu árïbeaa,” masare ïgu arï werecũ yu sã “Yahagu árïbeami ïgu,” arï weregura yu Pagugure umaro majagugure, arï weremi Jesu.

*Jesu yu buhecũ masa erã basi game dũca warirãcoma, arï wereñumi*

*Lc 12.51-53; 14.26-27*

<sup>34</sup> Eropa arïtuhaja õpa werenemomi masare:

—¿Dohpa arï pepiri mua yure? ¿Yũhu masare yu buhegu aricũ yu buheri mera masa ïhaturisome, arï pepiri mua? Eropa árïbeaa. Masa yu buherire peerã pe curu erã basi dũca warirãcoma. Yujurãyeri yu buherire peerãcoma. Gajirãpu irire gamebirã erãre ïhaturirãcoma. Eropirã yujuro mera árïsome masa. <sup>35</sup> Murã yu buherire erã peera dipuwaja erã porã erãre ïhaturirãcoma. Murã nome erã yu buherire peera dipuwaja erã porã nome erãre ïhaturirãcoma. Erã muñecosã nome yu buherire erã peera dipuwaja erã beposã nome erãre ïhaturirãcoma. <sup>36</sup> Eropirã masa erã acawererãre yu buherire peecũ ïarã erãre ïhaturirã árïrãcoma.

<sup>37</sup> “Yure erã mahibodiro tauro erã pagu sumarãpũre mahitarinũgarã yaharã árïsome erã. Yure erã mahiborono tauro erã porãpũre

mahitarinugarā yaharā árísome erā. <sup>38</sup> Eropirā crusague yu sīridiro dopa ta yaharā erā árīra waja ñero tarirācoma erā sã. Eropa ñero taridiabirā yaharā árísome. <sup>39</sup> Masa yure guñaro mariro erā gamero iirā peamegue warācoma erā. Yaha árīburipure erā guñarā árīpehrerinuri Goāmũ mera ðaro árīniguicārācoma, arī weremi Jesu.

*Mari wajataburire wereñumi Jesu*

*Mr 9.41*

<sup>40</sup> Eropa arītuhaja ðpa werenemomi gua sãre:

—Mũare yaharāre yujugu ðaro mera bocatīrigu, yu sãre bocatīrigu iimi ĩgu. Eropigu yure ðaro bocatīrigu yure obeodigu sãre bocatīrigu iimi. <sup>41</sup> Eropigu Goāmũ yare weredigu wajatagucumi. ĩgure ðaro iigucumi Goāmũ. Eropigu ĩgu yahare ĩgu weregu árīcũ ĩagu yujugu ĩgure ðaro bocatīrigu weredigu iro dopa ta wajatagucumi ĩgu sã. Eropi gajigu ðaro iidigu wajatagucumi. Eropigu ĩgu ðaro iigu ĩgu árīcũ ĩagu yujugu ĩgure ðaro bocatīrigu ðaro iidigu dopa wajatagucumi ĩgu sã. <sup>42</sup> “Jesu yagugã ta àhrimi,” mũa arī ĩarã ĩgugãre itamudiarã deco yusari mera dihta tĩaquerecũ, diaye ta mũa sãre ðaro iigucumi Goāmũ, arī weremi Jesu.

## 11

*Ñu waiyegu ĩgu buherāre Jesure serēpidoregu obeoñumi*

*Lc 7.18-35*

<sup>1</sup> Guare ĩgu buherāre ĩgu eropa arī werera puhru ero pohro árīri macarigue buhegu waha wami ĩgu.

<sup>2</sup> Eropigu Ñu peresugue árīgu Jesu ĩgu iiricure peebeopũ. Eropa peegu Ñu ĩgu buherāre Jesure serēpidoregu obeopũ. <sup>3</sup> Eropirã gua pohrogue eja, Jesure serēpima erã Ñu buherã.

—Ñu ðpa arī serēpidoreami mure: “¿Yu puhru gajigu ĩgu arigucumi, yu eropa arīdigu ta àhriri mũa? ¿O gajigure corerãcuri gũa?” arī serēpi doreami Ñu, arīma erã Jesure.

<sup>4</sup> Erã eroparīcũ peegu Jesu yuhrimi:

—Dohpaguere mũa peerare, mũa ĩarare Ñure wererã waque. <sup>5</sup> Òpa arīque: “Jesu mera cuirī ĩhajibirã ĩhama. Curimasibirã cuhrima. Cami boanirã ðarã wahama. Peejabirinirã peea wahama. Sīrinirã masa wahama,” arī wereque. Eropirãmojomorocurãre ðari buherire yu wererare wereque ĩgure. Eropa arī weretuhaja ðpa arī wereque Ñure. <sup>6</sup> “Yure peegu ‘Diaye ta àhraa,’ arīgu ĩgu mucubirigu àhrimi,” arãmi Jesu, arī, Ñure wererã waque, arīmi Jesu.

<sup>7</sup> Ñu buherã erã wara puhru, Jesu Ñu árīricure werenugami masa bajarãre.

—Masa marirogue Ñu pohrogue warã ero majare taare miru weãcũ ĩarã ejabiribũ mũa. <sup>8</sup> Òari suhricugũ sãre ĩabiribũ mũa. Òari suhricurã oparã ya wirigue àhrima. <sup>9</sup> Masa marirogue ejarã Goāmũ yare weremũhtadigupure ĩarã ejabũ mũa. Diaye ta Ñu Goāmũ yare weremũhtagũ àhrimi. Gajirã Goāmũ yare weremũhtanirã tauro árīgu àhrimi Ñupũ. <sup>10</sup> Iribojegue Goāmũ yare erã gojarapũ ðpa arī wereyuyoro Ñure.

Mari Pagu İgu magure ðpa arİpu. “Mu core mare wereyubure obeogu iiaa,” arİmi Goamu, arİ gojañuma Nure.

<sup>11</sup> Mure diaye ta arİgu iiaa. Masa arİpehrerã tauro ahrimi Nu waİyegu. Irisubure İgu eropa arİquerecũ ta umaroguere Goamu İgu opu arİroguere arİpehrerã docanugagupu Nu tauro arİgucumi.

<sup>12-13</sup> “Nu waİyegu İgu eraboro core Moiseru İgu apira doreri mera Goamu marire doremi. Goamu ya weremuhtanirã mura erã gojara sã eropa ta arİribu marire dorera. Dohpaguepu Nu ðari buherire, Goamu opu İgu arİrire buhemi. İgu eropa buhecũ pee masa erã ejatuharo erã turari mera Goamu erã opu arİcũ burigã gahmema. <sup>14</sup> “Elia arİgucumi,” iribojegue erã arİdigu ta Nupu ahrimi. “Iribojegue majarã erã arİrare diaye ta ahraa,” arİdiarã Nu İgu erã eropa arİdigu arİcũ masirãca mua. <sup>15</sup> Õaro peeque mua ire, arİmi Jesu.

<sup>16</sup> Eropİgu ðpa arİnemomi masare:

—İMua dohpague majarã masa ñehmarano iro dopa ahriri mua pepicũ? Mua majirã iiro dopa ðpa ahraa. Doberi duarogue bira doarã, ðpa arİ duyasoma erãgã erã basi: <sup>17</sup> “Mua bayaburire tarisu purirabu gua. İDuhpirã mua mucubiri bayarã arİbirari? Eropirã gua burigã ñehamere orerabu. İMurpu duhpirã gua mera orebirari?” arİma duyasorã. Erã majirã arİ duyasorã iro dopa ta iirã ðpa iiaa mua dohpague majarã. <sup>18</sup> Nu waİyegu Goamu ya arİburire ba duhugu vinore ihribirimi. İgu eropa ihribiricũ İarã “Pee masibigu ahrimi,” arİribu mua İgure. <sup>19</sup> Yuru masu Goamu İgu obeodİgu arİgu yuhu baha, ihria. Yu eropa iicũ İarã ðpa arãa mua yurure. “İaque. İhİ wuaro bagu, merericugu sã ahrimi. Wajasea corerã ñero iirã erã wapicugu ahrimi İgu,” arãa mua yure. Mua gamero dopa gua iibiricũ ero wabea mure. Mua masibiriquererã ta gua iirare İarã, Goamu masirire gua opacũ masirãca mua, arİmi Jesu erãre.

*Iri macari majarãre turiñumi Jesu erã ñerire bujawerebiricũ İagu Lc 10.13-15*

<sup>20</sup> Puhru ero maja macari majarãre turİpu Jesu. Iri macarire gajİ macari sãre Goamu turari mera tauro deyoro moarire ii İhmudi arİrimi İgu. İgu eropa ii İhmuquerecũ ta erã ñero iirire duhubirinirã arİma erã. Eropİgu erãre ðpa arİpu İgu.

<sup>21</sup> —Corazın maca majarã mua ñero tarirãca. Betsaida majarã mua sã ñero tarirãca. Mua ya macaguere yuhu Goamu turari mera deyoro moarire iirabu. Mua peebirabu. Iribojegue Tiro waİcari macare, Sidón waİcari maca sãre yu deyoro moarire yu iicũ İarã ero majarãpu erã ñerire bujawereboañuma. Eropa iirã ðarİpuru gohrotoboañuma. Bujawererã bujawereri suhire saña, erã basi peame witu mera mohsiripeoboañuma erã ñero iirare bujawere İhmurã. Murpu eropa iibeaa. <sup>22</sup> Eropİgu mure arİgu tiiaa. Dipuwaja moarinu arİcũ, Goamu Tiro majarã mura, Sidón majarã mura tauro ñerã mua arİri waja mure ñero gohra dipuwaja moagucumi İgu. <sup>23</sup> Mua Capernaum majarã, mua ejatuharo Goamu pohrogu wadiarabu. Mua Goamu yare iidiabiricũ mure Goamu peamegue cõagucumi. Mua ya macague Goamu turari mera deyoro moarire ii İhmurabu. Mua yure peebirabu. Iribojegue Sodoma waİcari macare deyoro moarire

yū eropa iicū iri macarū dohpaguere árīboca. <sup>24</sup> Eropigu mũare arīgu tīaa. Dipuwaja moarinū árīcū Goāmū Sodoma maca majarā mũra tauro, mũarũre mũa ñeri dipuwaja dipuwaja moagũcumĩ, arīpũ Jesu iri macari majarāre.

*Yū pohrogue soorā arique, arĩnumi Jesu*

*Lc 10.21-22*

<sup>25</sup> Irisubu ĩgu Pagũ mera wereniguigu ōpa arĩmi Jesu.

—Ahũ, mũhũ ũmaro majarā tauro opu, i yeba majarā tauro opu āhraa. I mũ buherire “Masituhaja gũa,” arĩrāre masicū iibeaa. Mũ yare masipehobirāpũre masicū iabũ mũhũ. Mũhũ eropa iicū “Ōhaa,” arāa yũhũ mũre. <sup>26</sup> Eropo ta āhraa, Ahũ. Erā masibirāpũre erā masicū gahmeabũ mũhũ, arĩmi Jesu ĩgu Pagũre.

<sup>27</sup> Eropigu masare gũa sãre ōpa arĩ werenemomi:

—Yũ Pagũ árĩpehleri yũ iiborore apimi yũre. ĩgu dihta yũre ōaro masimi. Yũ sã ĩgũre masia. Yũ beyenirā sã ĩgũre masima yũ ĩgũre masidorerā árĩrā. Erā nũcũ ta yũ Pagũre masia gũa. <sup>28</sup> Goāmũ mera ōaro árĩdiarā baja dorerire iiraa mũa. Iri doreri nũcũre omaro iro dopa ta āhraa. Eropirā gariborea wahaa mũa iri dorerire iirā. Eropo gariborerā yũre serēque. Mũare soocū iigũra. <sup>29</sup> Yũhũ pũriro mera doregũ árĩbeaa. Nijiyajaro doregũ āhraa. Eropirā yũ doreripũre iique. Eropo iirā dipuwaja marirā ōaro árĩrāca mũa. <sup>30</sup> Eropiro yũ itamuri mera yahare iicū diasabeaa. Eropirā yũ dorerire iirā nũcũre pepiro mariro ōaro árĩrāca, arĩmi Jesu.

## 12

*Judio masa erā soorinũ árīcū trigo pororire turĩnuma Jesu buherā*

*Mr 2.23-28; Lc 6.1-5*

<sup>1</sup> Merogā ĩgu eropa arĩ buhera pũhrũ Sabado árīcū gũa Jesu mera trigo otera pohegue ĩha tariabũ. Eroque tariarā gũa ĩgu buherā oaboarā, trigo pororire turĩ aĩ babũ gũa. <sup>2</sup> Gũa eropa iicū ĩarā, fariseo masa Jesure ōpa arĩma:

—Peenique gũare. ¿Duhpirā erā mari soorinũ árĩquerecū ta mohmeri? Mari dorerire tarinũgarā iima erā, arĩma erā.

<sup>3-4</sup> Erā eroparīcū peegu Jesu “Yũ buherā tarinũgarā iibeama,” arīgu ōpa arĩmi erāre:

—Iribojegue Davi ĩgu mera majarā mera oaboagu Goāmũ ya wihigue ñaja, iri wihi árĩri panre bañumi ĩgu mera majarā mera. Iri pan pahia dihtare badorera árĩyoro. Goāmũ doreri gajirāre iri panre badorebiriyo. ¿Davi irire ĩgu iirare Goāmũ yare erā gojarapũgue buhebirari mũa? Davi iri panre bagũ Goāmũre tarinũgagũ iibirĩnumi. Dohpagāre yũ buherā sã trigo yerire turĩ barā Goāmũre tarinũgarā iibeama. <sup>5</sup> Eropi Goāmũ ya wihi mohmerā pahia ne soobeama mari soorinũre. Eropo soobiriquererā Goāmũ dorerire tarinũgarā árĩbeama. ¿Iri buhebirari mũa Goāmũ Moiserere ĩgu apirapũre? <sup>6</sup> Mũare arīgu tīaa: Goāmũ wihire umupeorā iri wihi mohmerā erā soobiricū ĩarā “Ōhaa,” arāa mũa. Erā tauro yũpũre umupeoro gahmea. <sup>7</sup> Goāmũ yare erā gojarapũ ōpa āhraa: “Waimũrāre wejē soerā yũre mũa eropa umupeocū gamebeaa. Gajirāpũre mũa mojomoro ĩacū gahmea yũhũ,” arĩmi Goāmũ, arāa ĩgu yare gojarapũre. ĩgu eropa

arĩrare mũa ðaro masirã, yu buherãre erã dipuwaja mariquerecũ ta erãre weresãmasibiriboya mũa. <sup>8</sup> Yũhu masu Goãmũ ĩgu obeodĩgu inonũ soorinũ sãre masa erã iiburire doremasia, arĩmi Jesu fariseo masare.

*Mojoto bũhadĩgu ðaro wañumi*  
*Mr 3.1-6; Lc 6.6-11*

<sup>9</sup> ĩgu eropa arĩra pũhrũ waha gũa judio masa buheri wihigue ejabu gũa Jesu mera. <sup>10</sup> Ero mojoto bũhagu arĩmi. Eropirã fariseo masapu Jesure weresãmorã, ĩgure serẽpima:

—Sabadonũ mari soorinũre masare ðarã wacũ iidorebeami Goãmũ. ¿Eropa ta àhriri mũ pepicũ? arĩ serẽpima erã.

<sup>11</sup> Jesu yũhrimi erãre:

—Mũa yagu oveja mari soorinũ arĩquerecũ gobegue ĩgu yuhriñajadĩgure ĩgure aĩ wiurãca mũa. <sup>12</sup> Oveja tauro àhrimi masupu Goãmũ ĩacũ. Eropiro mari soorinũ arĩcũ masure taucũ ðapũrica, arĩ yũhrimi Jesu erãre.

<sup>13</sup> ĩgu eropa arĩra pũhrũ mojoto bũhagure ðpa arĩmi:

—Mũ mojtore sĩsirãbeoque, arĩmi ĩgu.

Ĩgu eroparĩcũ mojoto bũhagupu sĩsirãbeomi. ĩgu eropa sĩsirãbeora pũhrũ ta ðari mojoto dujabũ. <sup>14</sup> Erã soorinũ ĩgu eropiicũ ĩarã fariseo masa waha, erã basi ðpa arĩñorã:

—¿Dohpa ii mari Jesure wejẽrãcuri? arĩñorã erã erã basi.

*Isaia Goãmũ yare weremuhtadĩgu iribojegue majagu Jesure wereyuñumi*

<sup>15</sup> Jesu erã eropa arĩrire masigu waha wami. ĩgu eropa wacũ bajarã masa ĩgure nurusiamã. Eropigu ĩgupu arĩpehrerã erã mera majarã dorecũrãre ðarã wacũ iimi. <sup>16</sup> Eropigu dorecũnirãre erãre ĩgu taurare gajirãre weredorebirimi ĩgu. <sup>17</sup> Eropa dorecũrãre ðarã wacũ iigu Goãmũ yare weremuhtadĩgu Isaia iribojegue ĩgu arĩ gojadiro dopa ta iigu iimi Jesu. ðpa arĩ gojañumi Isaia mũrũ:

<sup>18</sup> ðpa arĩmi Goãmũ: “Ihĩ yu pohro majagu àhrimi. ĩgu yu beyedigu àhrimi. ĩgure mahia. Eropigu ĩgu mera mucubiria. Yu Espĩrĩture ĩgure ogura. Eropigu yu turari mera arĩpehrerã masare diare iirire weregucumi ĩgu. <sup>19</sup> Eropigu ĩgu ne game dũyasosome. Eropigu gaguiniguisme. Eropigu masa bajarã watope ĩgu bariãgã gaguinigu weresome. <sup>20</sup> Guaro mariro masare mojomorocũrãre itamugucumi ĩgu. Daberogã ãjuri peamere yaubiro dopa ta masare turabirãre ðaro iigucumi ĩgu. Sĩporã marirãre ðaro sĩporãcũcũ iigucumi. Eropa ta iiniguigucumi ĩgu watĩre ĩgu tarinũgaboro core. <sup>21</sup> Eropirã masa bajarã ĩgure umupeorãcoma,” arĩmi Goãmũ ĩgu magu iiburire, arĩ gojañumi Isaia.

*Jesu watĩ turarĩre opami, arĩ weresãñuma masa*  
*Mr 3.19-30; Lc 11.14-23; 12.10*

<sup>22</sup> Yujunũ watĩ ñajasũdigũre masa aĩgãrimã gũa pohrogue Jesure taudorerã. ĩgupu watĩ ñajasũdigũ wereniguimasibirimi. Eropigu cuirĩ ihajabirimi. Erã ĩgure eropa aĩ eracũ ĩha ðagu wacũ iimi Jesu

ĩgure. Ĩgu eropa iicũ ðaro ĩha, wereniguimi pare. <sup>23</sup> Ĩgu eropa wacũ ĩarã, masa ĩhamaria wama.

—¿ĩhĩ Davi mũrũ pãrami masare taubu ãhriri? arĩma erã erã basi.

<sup>24</sup> Erã eroparĩquerecũ Jesu watẽare ĩgu cóãrare peerã fariseo masapũ ðpa arĩ pepiñorã:

—Beelzebú, watẽa opũ, ĩgu turari mera watẽare cohãmi Jesu, arĩ pepiñorã erã.

<sup>25</sup> Erã eropa arĩ pepicũ masigu, Jesu ðpa arĩ weremi erãre werenigui queori mera:

—Yuju yeba majarã erã basi gamequeãrã iri yeba majarã pehrea wabocoma. Yuju maca majarã erã basi gamequeãrã iri maca majarã pehrea wabocoma. Yuju wihi majarã sã gamequeãrã eropa ta wabocoma. <sup>26</sup> Eropigu Beelzebú watẽa opũpũ yũre watẽare cóãdoregu ĩgu basi ĩgu yarãre cóãboñumi ĩgu. Eropirã erã sã wapehrea waboñuma. <sup>27</sup> Õpa arĩ weresãa mũa yũre: “Ĩgu Beelzebú itamuri mera watẽare cohãmi,” arĩ weresãa mũa yũre. Mũa mera majarã sã watẽare cohãma. Eropirã erã “Watĩ ĩgu turari mera erãre cohãa gu,” arĩbeama. “Goãmũ ĩgu turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye árĩbircũ mũa mera majarã wererãcoma. <sup>28</sup> Eropigu yũpũ watẽare cóãgu Goãmũ ĩgu Espĩritu Santo turari mera cohãa. Yũ eropa cóãcũ ĩarã ðpa arĩ masirãca mũa: “Goãmũ ĩgu opũ árĩri i yebaguere árĩtuhajaa dohpaguere,” arĩrãca mũa.

<sup>29</sup> “Õpa ta ãhraa watĩ turagu tarinũgari werediãcũ: Wihi opũ turagure diribigu yajagu ĩgu ya wihigue ñajaja yajamasibeami. Ĩgure ĩgu dirira pũhrũ tamerare yajamasimi ĩgure, arĩ weremi Jesu.

Eropa arĩ weremi watĩre ĩgu tarinũgarare weregu. Watĩ turagu árĩquerecũ ta Jesu ĩgure tarinũgami watẽare cóãgu.

Eropa arĩtuhaja ðpa arĩ werenemomi Jesu masare guã sãre:

<sup>30</sup> —Yujugu yũre gamebigũ, yũre ĩhaturigu ãhrimi. Yujugu yũre itamubigu, yũre teboricucũ ĩgu iimi.

<sup>31</sup> “Eropigu mũare diaye arĩgu tiiaa yũhũ. Árĩpehreri ñerire masa erã iicũ erã wereniguicũ sãre Goãmũ cãdijimasimi. Eropa cãdijiqueregu Espĩritu Santore erã ñero arĩ wereniguicũ Goãmũ iri tamerare ne cãdijisome. <sup>32</sup> Yũ masũre Goãmũ ĩgu obeodigũre erã ñero arĩ wereniguicũ iri ñerire cãdijimasimi Goãmũ. Espĩritu Santopũre erã ñero arĩ wereniguicũ irire ne cãdijisome Goãmũ. Dohpaguere pehrerinũ pũhrũ sãre erã eropa arĩrare ne cãdijisome ĩgu, arĩ buhemi Jesu erãre.

*Yucũ dũcare masiro dopa ta masa erã wereniguirire peerã erã árĩricũrĩre masia mari, arĩ wereñumi Jesu*

*Lc 6.43-45*

<sup>33</sup> Eropigu ðpa arĩ werenemomi erãre werenigui queori mera:

—Õadigu yucũgu ðarire dũcacũa. Ñedigu yucũgu ñerire dũcacũa. Yucũgu dũcare masirã “Irigũ dũca ta ãhraa,” arĩ masia mari. Mari eropa masiro dopa ta masa erã wereniguirire peerã erã árĩricũrĩre masia mari. <sup>34</sup> Añaã iro dopa ñerã ãhraa mũa. Mũa ñerã árĩrã, ðarire wereniguimasibeaã mũa. Mari guñarigue mari pepidiro dopa ta mari wereniguia. <sup>35</sup> Õagu ðarire pepimi. Eropigu ðarire

wereniguimi. Ñegũ ñerire pepimi. Eropigu ñerire wereniguimi. <sup>36</sup> Mũare arĩgu iiaa. Ōaro pepi wereniguirã árĩque mũa. Ōaro wereniguibirinirã dipuwaja moarinũ árĩcũ, mũa eropa arĩmaacãrare Goãmure wererãca. <sup>37</sup> Mũa queoro wereniguirare masigu, “Ōarã àhrima,” arĩ beyegũcumi Goãmũ. Eropigu mũa ñero wereniguirare masigu, “Ñerã àhrima,” arĩ beyegũcumi ĩgu daja, arĩmi Jesu erãre.

*Masa ñerã Jesure deyoro moarire iidoreñuma*  
*Mr 8.12; Lc 11.29-32*

<sup>38</sup> Ĩgu eropa arĩra pũhrũ masare buherã, fariseo masa sã ĩgure ōpa arĩma:

—Buhegu, Goãmũ ĩgu obeodigu árĩgu Goãmũ turari mera ii ĩhmuque gũare, arĩrima erã.

<sup>39</sup> Jesu yũhrimi:

—Mũa dohpague majarã ñerã, Goãmure gamebirã àhraa. Yũhu diaye arĩgu árĩcũ mũa masidiarã Goãmũ turari mera deyoro moarire iidoreraa yũre. Mũa eropa dorequerecũ Goãmũ yare weremuhtadigu Jona iribojegue majagu Goãmũ turari mera ĩgu iira dihtare ĩhmumi Goãmũ mũare. <sup>40</sup> Jona uhrenũ gohra waimũ wũagu paru pohecaguere árĩñumi. Ĩgu iidiro dopa ta yũ sã masũ Goãmũ ĩgu obeodigu uhrenũ árĩguca yeba pohecaguere. <sup>41</sup> Iribojegue majarãpũ Nĩnive maca majarã Jona Goãmũ yare ĩgu wererare peerã, erã ñero iirare bujawereñuma. Ōarire gohrotoñuma. Dohpaguere mũa watopegue Jona tauro árĩgu àhraa yũhu. Yũhu Goãmũ yare mũare werequerecũ ta mũa ñero iirare bujawerebeaa. Eropirã Nĩnive majarã mũrapũ erã ñero iirare bujawerenirãpũ dipuwaja moarinũ árĩcũ mũa ñerire bujawerebirinirãre “Ñerã àhrima,” arĩ weresãrãcoma mũare. <sup>42</sup> Iribojegue majago, sur majago, opo bũro igo sã mũa dohpague majarãre weresãgocumo dipuwaja moarinũ árĩcũ. Igo Salomo opũ ĩgu masirire peediago yoaroguo aridigo Salomo opũre peego ejañumo. Eropigo ōaro iigo iĩnumo dohpague majarã tauro. Mũaare arĩgu tiiaa. Dohpaguere mũa watopegue Salomo tauro masigu àhraa yũhu. Yũhu mũa mera árĩquerecũ mũa yũ masirire peediabeaa. Mũa eropa peediabirira waja igo opo bũro mũare “Ñerã àhrima,” arĩ weresãgocumo, arĩmi Jesu erãre.

*Watĩ dipaturi masũguere ĩgu ñajara queorire wereñumi Jesu*  
*Lc 11.24-26*

<sup>43</sup> Eropigu dipaturi Jesu queori moa weremi masare.

—Yujugu watĩ masũ mera arĩdigũ waha, ĩgu deco mariri yebague cuhri, ĩgu sooborore amariñumi. <sup>44</sup> Eropa bocabigu ōpa arĩ pepiñumi ĩgu. “Masũre yũ cóãdigũ mera ta dipaturi árĩgu wagura,” arĩ pepiñumi ĩgu. Eropa arĩ pepigu ĩgu dujaa waha ĩgu cóãdigũre ta bocañumi daja. Ĩgu bocaboro core masũpũ ōagu árĩriñumi. <sup>45</sup> Eropigu watĩ gajirã siete watẽare ĩgu tauro ñerãre sihugu wañumi. Ĩgu eropa sihucũ erã arĩpehrerã ĩgu mera árĩñuma. Masũpũ ero core yujugu watĩre opagu ñegu árĩñumi. Pũhrũ bajarã watẽare opagu ñetariagu árĩñumi. Eropa dohpague majarã Goãmure gamebirã, yũ buherire peediabirã ñetariarã ta warãcoma, arĩmi Jesu erãre.



*Jesu acawererã ĩgu pohro erañuma*

*Mr 3.31-35; Lc 8.19-21*

<sup>46</sup> Masare ĩgu eropa arĩ wereniguirisubu ĩgu pago ĩgu pagu porã mera disiporo niguĩ, ĩgure weretamudiañorã. <sup>47</sup> Eropigu yujugu Jesure weremi:

—Mũ pago mũ pagu porã mera disiporo niguima mũre weretamudiarã, arĩmi.

<sup>48</sup> ĩgu eroparĩcũ peegu ero árĩrãre õpa arĩmi Jesu erãre buhebu:

—¿Noa áhriri yu pago gohra? ¿Noa ta yu pagu porã gohra áhriri mũa ĩacũ? arĩmi.

<sup>49</sup> Eropa arĩgu, guare ĩgu buherãre sĩpu, õpa arĩmi:

—Oã áhrima yu pago yu pagu porã iro dopa árĩrã. <sup>50</sup> Erã yu Pagu umaro majagu ĩgu gamerire iima. Eropa iirã yu pagu magu, yu pagu mago, yu pago iro dopa ta áhrima, arĩmi Jesu erãre.

## 13

*Jesu oteri masu ya queorire wereñumi*

*Mr 4.1-9; Lc 8.4-8*

<sup>1</sup> Irinũ ta Jesu whigüe árĩgu wiriami gua mera. Wiri, wuariyague waha, iriya tũro pohro doami. <sup>2</sup> ĩgu eropa doacũ ĩarã bajarã masa ĩgu pohrogue gamenerema. Eropa cũhñacũ ĩagu dohodirugue ñajaa, irirugue doami ĩgu. Masapu imiporogue niguima. <sup>3</sup> Eropigu baja queori mera weremi ĩgu erãre. Õpa arĩmi:

—Oteri masu otegu wañumi. <sup>4</sup> ĩgu eropa otecũ gajiyeri ma tũro yuri merejayoro. Ero mehmerejarayerire mirimagu porã ahri bacãñuma. <sup>5</sup> Eropi gajiyeri utã watope yuri merejayoro. Ero utã watope nicu mariñariro árĩro mata puhriyoro. <sup>6</sup> Eropa puhri araquerero, abe ĩgu burigã asicũ, nuguri marinijaro ñaiñaja sĩa wayoro. <sup>7</sup> Gajiyeri pora watope yuri merejayoro. Porapu puhri iri tiataria wa, oterayeripure wejẽcayoro. <sup>8</sup> Gajiyeri õari yebapu yurimerejayoro. Õaro puhri ducacayoro. Gajisari cien yeri, gajisari sesenta yeri, gajisari treinta yeri ducacayoro. <sup>9</sup> Irire õaro peeque mũa, arĩmi Jesu.

*Jesu werenigui queori mera ĩgu buherire wereñumi*

*Mr 4.10-12; Lc 8.9-10*

<sup>10</sup> ĩgu eropa arĩra puhru gua ĩgu buherã ĩgu pohro eja, serẽpibu ĩgure:

—¿Ne, duhpigu masare queori mera were buheri mũhu? arĩ serẽpibu gua.

<sup>11</sup> Jesu yuħrimi:

—Umaro majagu masa tauro opu ĩgu árĩrire iribojegue majarã erã masibirirare mũare masicũ iimi Goãmũ. Gajirãpure eropiibeami ĩgu. <sup>12</sup> Eropigu masirãre masinemocũ iigucumi ĩgu. Eropirã erãpu õaro masirãcoma. Masibirãpure merogã erã masiquerecũ erãpure masibircũ iigucumi ĩgu. <sup>13</sup> Eropigu queori mera buhea. Yu eropiicũ õpa waha. Dohpage majarã ĩaquererã pee masisome. Eropirã peequererã masibeama. Irire peebirinirã iro dopa áhrima erã. <sup>14</sup> Eropa árĩrã Isaia iribojegue majagu ĩgu arĩ gojadiro dopa ta iima erã. Õpa arĩ gojañumi:

Õpa arĩmi Goãmũ: “Goãmũ yare peerãca mũa. Eropa peequererã ne masisome mũa. <sup>15</sup> Mũa dipuru buri ãhraa. Eropirã mũa gamiro guberire bihaa peeri arĩrã. Mũa cuirire cuumitĩa ihari arĩrã. Eropa iibirã ðaro ãarã masiboaya mũa. Eropirã peerã masiboaya mũa. Mũa guñarigue ðaro masiboaya. Eropirã yare Goãmũre gameboaya mũa. Mũa eropa yare gamecũ mũa ñerire cãdiji, mũare tauboaya,” arĩmi Goãmũ, arĩ gojañumi Isaia, arĩmi Jesu.

<sup>16</sup> Mũarũ peerã masia. Eropirã mucubirirã ãhraa mũa. <sup>17</sup> Mũare ta arĩgũ iiaa. Dohpague mũa ãarire mũa peerire iribojegue majarã Goãmũ yarã burigã ãadiariñorã. Goãmũ yare weremuhtanirã sã irire burigã ãadiariñorã. Ne ãabiriñorã. Dohpague mũa peeri sãre burigã peediarĩñorã erã. Ne peebiriñorã. Erã eropa masidiaquerecũ ta Goãmũ erãre masidorebiripũ irisubugure, arĩ weremi Jesu guare ĩgũ buherãre.

*Jesu oteri masũ queorire were amuñumi ĩgũ buherãre*

*Mr 4.13-20; Lc 8.11-15*

<sup>18</sup> Pũhrũ Jesu guare werenemomi:

—Peeque mũa. Oteri masũ queorare mũare were amugũra. Yũre peerã ðaro masique. <sup>19</sup> Oteriyeri ðari buheri iro dopa ãhraa. Eropiro ma tũro mehmerejarayeri ðari buheri iro dopa ta ãhraa. Eropirã masa ðari buherire peequererã ta ne masibeama. Eropigũ masa ðari buherire erã peecũ ĩagũ ñegũrũ watĩ ahri, iri buherire ðari buherire masidorebeamĩ masare. Mirimagũ porã iriyerire erã dote aĩ badiro dopa ta iimi. <sup>20</sup> Eropi utã watope yuri merejarayeri ðari buheri iro dopa ta ãhraa. Eropirã masa ðari buherire pee, mucubiriri mera mata irire pee aĩma. <sup>21</sup> Eropa pee aĩquererã utã watope arĩri yucũ nuguri mariri yucũ iro dopa ta oã masa sã turabeama. Eropa turabirã yaha ðari buherire erã peera dipuwaja gajirã erãre ñero iicũ yahare duhucãma. Gajirã erãre erã ñero iicũ irire yujuro bojebiri, yahare duhucãma. <sup>22</sup> Eropi pora watope yuri merejarayeri ðari buheri iro dopa ta ãhraa. Eropirã masa ðari buherire peequererã i yeba majare wũaro pepiri mera niyerure gametarima. Erã eropa iicũ iripũ ðari buherire cãhmotaa. Iri cãhmotacũ masa Goãmũ gamerire iibeama. <sup>23</sup> Eropi ðari yeba yuri merejarayeri ðari buheri iro dopa ãhraa. Eropirã masa ðari buherire peerã irire ðaro masima. Eropa masirã arĩrã, Goãmũ gamerire iima erã. Yujurãyeri wũaro ðarire iima cien yeri ðucacũro dopa ta. Gajirã erã docañariro ðarire Goãmũ yare iima sesenta yeri ðucacũro dopa ta. Gajirã merogã ðarire iima treinta yeri ðucacũro dopa ta, arĩ weremi Jesu guare.

*Trigo watopegue taa tiara queorire wereñumi*

<sup>24</sup> Eropi dipaturi gaji queorire gũa sãre weremi Jesu.

—ũmaro majagũ ĩgũ opũ arĩrĩre werediacũ õpa ãhraa: Pohe opũ ĩgũ ya pohegue ðariyerire ĩgũ otediro dopa ta ãhraa mũmaro majagũ ĩgũ opũ arĩri. <sup>25</sup> Pohe opũ trigo otera pũhrũ arĩpehrerã ĩgũ mera majarã sã erã carĩrisubu ĩgũre ĩhaturigũ arĩñumi. Eropa arigũ trigo yeri erã oterayeri watope ñeri taare oteñumi. Otetuhaja waha wañumi. <sup>26</sup> Pũhrũ trigo sari puhri iiriyo. Eropiro iri ðucacũboro core arĩcũ iri ñeri taa sã puhri iri pohere tiha wacũ iiyoro. <sup>27</sup> Eropirã pohe opũre mohme corerã ĩgũ pohroge eja serẽpiñuma:

“Opu, ¿ōariyeri dihtare mā ya pohere otequerecū duhpiro ñeri taa sã tiari iri pohere?” arĩñuma erã. <sup>28</sup> “Yũre ìhaturigũ āhrañumi iri taare otegu,” arĩñumi pohe opu. “¿Taare gua curacũ gahmeri mũhũ?” arĩñũma ìgũre mohme corerã. <sup>29</sup> “Taare curabiricãque, taare curanijarã trigopũre curari,” arĩñumi. <sup>30</sup> “Trigo iri ñeri taa mera puhricãniporo. Iri ñairisubu dũca aĩrãre õpa arĩrã: ‘Iri ñeri taare cura gameneopimũhtaque irire soemorã. Pũhrũ trigore tũrĩque. Tũrĩpeho, irire yũ diburi wihigue apique,’ arĩrã erãre,” arĩñumi pohe opu, arĩmi Jesu queori mera weregu.

*Mostazayegã queorire wereñumi Jesu*

*Mr 4.30-32; Lc 13.18-19*

<sup>31</sup> Eropi gajĩ queori guare õpa arĩ buhemi daja.

—Ūmaro majagu ìgu opu arĩri werediacũ mostazayegã iro dopa āhraa. Iriyegã miriyegã gohra āhraa. Iriyegã yujugu oterĩ masũ ìgu pohegue oteami. <sup>32</sup> Iriyegãre ìgu pohegue otera pũhrũ õaro puhria. Eropi yucũgu wũatariadigũ wahaa. Eropa wacũ mirimagũ porã bajarã irigu dũpurigue suhri suama. Eropa ta ũmaro majagũre mari Opũre masirã bajamerãgã erã arĩmũhtaquerecũ ta pũhrũguere erã bajarã warãcoma, arĩ weremi Jesu

*Pan bugari queorire wereñumi Jesu*

*Lc 13.20-21*

<sup>33</sup> Eropi gajĩ queori mera guare õpa arĩ buhemi daja:

—Ūmaro majagu ìgu opu arĩri pan bugacũ iiburi iro dopa āhraa. Yujugo nomeo panre iigo pan bugacũ iiburi pohgare merogã moremo trigo pohga mera. Igo eropa iicũ pan bugacũ iiburi pohga merogã arĩquerero ta trigo pohgare õaro seyapehrea wahaa. Eropa ta ũmaro majagũre mari Opũre bajarã masa arĩpehrero majarã masirãcoma, arĩmi Jesu.

*Queori mera Jesu ìgu buherãre wereñumi*

*Mr 4.33-34*

<sup>34</sup> I arĩpehreri buherire queori mera weremi Jesu. Queori mariro werebirimi ìgu masare. <sup>35</sup> Eropa ta iimi ìgu Goãmũ yare weremũhtadigũ ìgu arĩ gojadiro dopa ta. Ōpa arĩ gojañumi iribojegue: Queori mera weregũra. Goãmũre i yebare ìgu ìhacũnugura pũhrũ, ne masare ìgu werebirirare weregũra, arĩ gojayuñumi Jesu iiborore.

*Jesu trigo watopegue ñeri taa tiara queorire were amupehoñumi*

<sup>36</sup> Eropi masare goeriseregu, wihigue ñajaa wami Jesu. Eropirã gũa ìgu buherã ìgu pohrogue eja, serẽpibũ gũa:

—Trigo watopegue ñeri taa tiara queorire werepehoque guare, arĩbu gũa ìgũre.

<sup>37</sup> Jesu yũhrimi guare:

—Pohe opu õariyerire otediro iro dopa ta āhraa yũhũ. Yũhũ masũ Goãmũ ìgu obeodigũ āhraa. <sup>38</sup> Pohepũ i yeba iro dopa ta āhraa. Ōariyeri puhriro ũmaro majagu ìgu opu arĩrogue arĩmorã iro dopa ta āhrima. Ñeri taapũ watĩ yarã iro dopa ta āhrima. <sup>39</sup> Pohe opũre ìhaturigũ ñeri taare otedigũ watĩ iro dopa ta āhrimi. Iri ñairisubu pehrerĩnũ iro dopa āhraa. Eropirã trigore aĩrã anyua iro dopa ta āhrima. <sup>40</sup> Iri ñeri taare erã curarare soe peamegue cõadiro dopa

ta pehrerinu árícũ watí yaräre peamegue cóârâcoma. <sup>41</sup> Yũhu masu Goãmũ ìgu obeodigu yaharã anyuare obeogura. Yu obeocũ anyuapu ñeri iidorenirãre, ñerire iinirãre yũ dorerogue gameneorãcoma. <sup>42</sup> Gameneotuhaja peamegue cóârâcoma erãre. Erogue erã buriḡã ore, bujawereri mera gũcũri cũridihurãcoma. <sup>43</sup> Eropirã Goãmũ yarã erã Pagũ erã Opũ ìgu árĩroque árĩrãcoma. Ero árĩrã, òaro mucubiriri mera árĩrãcoma erã. Ire òaro peeque mũa, arĩ weremi Jesu.

*Niyeru wũaro diburare ìgu bocara queorire wereñumi*

<sup>44</sup> Eropi gajĩ queori mera weremi daja:

—Umaro majagu ìgu opu árĩri niyeru wũaro diburare bocadiro iro dopa ahraa. Eropigu yujugu masu curigu wagu iri niyerure guñaña mariro bocañumi yuju yebague. Eropa bocagu buriḡã mucubiriñumi ìgu. Bocatuhaja waha iri yebague dipaturi dujara irire òaro dibunemoñumi. Eropigu ìgu bocarare aĩbu iri yebare asũdiañumi. Eropigu ìgu yare duapeho, iri yebare asũñumi. Umaro majagu opu ìgu árĩri ìgu bocadiro dopa ta ahraa. Ìgu bocarare ìgu buriḡã gamediro dopa ta umaro majagu masa weca opũre òaro erã masira puhru masa buriḡã gahmema ìgure, arĩ weremi Jesu.

*Waja pagariyere asũra queorire wereñumi*

<sup>45</sup> Eropi gajĩ queori mera weremi daja:

—Umaro majagu ìgu opu árĩri waja pagariye perla waĩcũriyere asũdigu iro dopa ahraa. <sup>46</sup> Iriyere amagu òataririyere bocañumi. Bocagu iriyere gametarigu árĩpehreri ìgu yare duapehogu wañumi. Eropa duatuhaja iriyere waja pagariyere asũñumi. Iriyerire buriḡã ìgu gamediro dopa ta umaro majagu masa weca opũre òaro erã masira puhru masa buriḡã gahmema ìgure, arĩmi Jesu.

*Wejẽdigu mehyura queorire wereñumi Jesu*

<sup>47</sup> Eropi gajĩ queori mera Jesu weremi daja gũa sãre:

—Umaro majagu ìgu opu árĩri wejẽdigu erã mehyudigu iro dopa ta ahraa. Irigu wejẽdigu mera bajarã waire gajiropa árĩrãre ñeama. <sup>48</sup> Irigu ujuturia wacũ wai wejẽrãpu irigare wejẽdigure imiporogue tara majaa òarã waire beyema. Òarãre erã purigue beye sãma. Ñerã waire cóãcãma. <sup>49</sup> Pehrerinu árícũ òpa ta árĩroca. Anyuapu masare beyerãcoma. Ñerãre beye aĩ wiurãcoma òarã watope árĩrãre. <sup>50</sup> Aĩ wiu, erãre peamegue cóârãcoma. Eroque erã ore, buriḡã bujawereri mera gũcũri cũridihurãcoma ñerãpu, arĩ weremi Jesu.

*Mũra buherire, mama buheri sãre wereñumi Jesu*

<sup>51</sup> Ìgu eropa arĩ werera puhru guare serẽpimi ìgu:

—¿I árĩpehrerire peeri mũa? arĩ serẽpimi ìgu.

—Peeã gũa, arĩ yũhribũ.

<sup>52</sup> Gũa eroparícũ ìgu weremi guare:

—Judio masare buherã watope yujugu umaro majagu ìgu opu árĩrĩre buhenugagu iri mama buherire buhegu iribojegue maja sãre masigu weremi. Ìgu wihi opu iro dopa ahrimi. Ìgu ìgu ya wihi diburare òarire aĩ wiugu, mamare, mũra sãre aĩ wiumi ìgu, arĩmi Jesu guare.

*Jesu Nazaregue ĩḡu ya macague wañumi*

*Mr 6.1-6; Lc 4.16-30*

<sup>53</sup> Iri queori bajare ĩḡu buhera pũhrũ ĩḡu mera ḡua waha wabũ. <sup>54</sup> Waha, ĩḡu masara macague ejabũ. Eroque eja, ḡua buheri wihigue buhemi ĩḡu. ĩḡu eropa buhecũ peerã, pee ũca wama erã.

—¿Nohogue masiyuri ihĩ i buherire? ¿Dohpa ii ĩḡu i deyoro moarire iimasiri? arĩ wereniguima erã erã basi. <sup>55</sup> Ihĩ taboa mohmeri masu magu ta ãhrimi ĩḡu. Eropi ĩḡu pago María ãhrimo. Eropi Santiago, José, Simo, Juda ĩḡu pagu porã ãhrima. <sup>56</sup> Dohpaguere ĩḡu pagu porã nome i maca ãhrima. Eropigu ĩḡu mari iro dopa ta árĩḡu ãhrimi. ¿Eropa árĩquereru ta nohogue peeyuri i buherire? arĩ wereniguima erã erã basi.

<sup>57</sup> Eropirã erã ĩḡure umupeobirima. Erã eropa umupeobiricũ ĩagu õpa arĩmi Jesu erãre:

—Árĩpehroque Goãmu yare weremuhtagure gajirã umupeoma. ĩḡu ya maca majarã ĩḡu ya wihi árĩrã dihta ĩḡure umupeobeama. Eropirã yare umupeobeaa mũa ohõ yuhũ masadigu árĩcũ, arĩmi ĩḡu erãre.

<sup>58</sup> Eropigu erã ĩḡure umupeobiricũ, iri macare baja deyoro moarire iibirimi Jesu.

## 14

*Ñu waĩyegu sĩrirare werera*

*Mr 6.14-29; Lc 9.7-9*

<sup>1</sup> Irisubure Herode Galilea majagu opu Jesu ĩḡu iirare peebeoru.

<sup>2</sup> Eropa peegu õpa arĩripũ:

—Ñu waĩyeri masu sĩridigu dipaturi masa dehyoagu iicumĩ. Eropa masadigu árĩḡu ĩḡu turarire opami ĩḡu deyoro moarire iigu, arĩripũ Herode ĩḡu pohro majarãre. Jesure “Ñu mũru ta ãhrimi,” arĩ pepiripũ ĩḡu Ñure ĩḡu wejedorera pũhrũ.

<sup>3-5</sup> Eropigu Ñure ĩḡu wejẽdoreboro core Herode ĩḡu pagu magu Felipe marapore ehma igo mera marapocũru. ĩḡu eropa iicũ ĩagu Ñu waĩyegu Herodepũre õpa arĩ wereniguipũ:

—Mu pagu magu marapore marapocũgu Goãmu dorerire tarinũgagu iiaa mũhũ, arĩripũ Ñu ĩḡure. ĩḡu eropa arĩra waja Herode ĩḡure wejẽdiaripũ. “‘Ñu Goãmu yare weremuhtagu ãhrimi,’ arĩ pepima judio masa,” arĩḡu erãpũre gũipũ Herode. “Ñure yu wejẽcũ erã guabocoma,” arĩḡu erãre gũipũ. Eropa gũigu Ñure wejẽdiabiriripũ. Eropa wejẽbiriqereru ta ĩḡure ñeha diridore, peresu iipũ. ĩḡure eropa iicũ gamepo ĩḡu marapo Herodia. <sup>6</sup> Eropi Herode ĩḡu masa dehyoaranũ árĩcũ bosenu iipũ ĩḡu. ĩḡu eropa bosenu iicũ ĩḡu marapo mago bosenu eranirã erã ihuro baya ihmupo igo. Igo eropa baya ihmucũ Herode mucubiripũ. Eropa mucubirigu igore arĩpũ:

<sup>7</sup>—Goãmu mera diaye ta arĩḡu iiaa. Yũre mu serẽropẽ ta ogara yuhũ mũre, arĩpũ pare Herodepũ ĩḡu marapo magore. <sup>8</sup> ĩḡu eroparĩcũ ĩḡu marapo igo magore igo serẽburire werepo igore. Igo eropa werẽcũ igo magopũ õpa arĩ serẽpo Herodere.

—Ñu waĩyegu dipurure tabetadoreque. Eropigu soropa mera ĩḡu dipurure yũre oque, arĩpo igo.

<sup>9</sup> Igo eroparĩcũ peegu Herode buringã bujawerepu. Masa erã peero “Mũ serẽro mũre ogura,” arĩtuhapu igu. Eropigu igu igu eropa arĩrare gahyasĩrigu “Mũre osome,” arĩmasibiripu igore. Eropigu igo igure dorero dopa ta Herodepu igu pohro majarãre Nure wejẽdorepu. <sup>10</sup> Eropigu Nũ dipurure tabetadorecãpu pare peresugue arĩgure. <sup>11</sup> Tabetatuhaja, soropa mera igu dipurure aĩgãriñorã erã. Igu marapo magore igu dipurure erã ocũ, igopu igo pagoguere aĩ taupo.

<sup>12</sup> Erã eropa iira puhru Nũ igu buhenirã igu dupu mumarore aĩgã wañorã. Eropa yaatuhajarã, erã irire Jesure wererã arima.

*Cinco mil masare bari oñumi Jesu*  
*Mr 6.30-44; Lc 9.10-17; Jn 6.1-14*

<sup>13</sup> Nũ sĩrirare peegu Jesu gua mera dohodirugue ñaja, masa marirogue sihu wami. Jesu erogue wacũ peerã, masa erã ya macarire wiri, marigüe waha igu core ejatuhãnorã. <sup>14</sup> Eropiro Jesu igu wadiru dohodiru tuhajara puhru igu bajarã masa arĩcũ iha, mojomoro ñami erãre. Eropa mojomoro ñagu erã mera bajarã dorecurãre ñarã wacũ iimi. <sup>15</sup> Ñamicague gua igu buherã õpa arĩbu:

—Ñamicague ãhraa. Ohõ masa marirogue ãhraa. Õgã arĩri macarigüe masare wadoreque. Erã baburire asũrã waporu, arĩribu gua igure.

<sup>16</sup> Jesu yuhrimi guare:

—Wabiricãporu erã. Mũa basi ta barire oque erãre, arĩmi guare.

<sup>17</sup> —Cinco pan dipurure, perã ta wai sãre iripẽta opaa gua, arĩ yuhribu gua.

<sup>18</sup> —Irire yure aĩgãrique mũa, arĩmi guare.

<sup>19</sup> Gua irire ora puhru, taa weca masare igu doadoremi pare. Erã eropa doarisubu cinco pan dipurure aĩ, perã wai sãre aĩ, umarogue ñhamuju, igu Pagure “Õhaa,” arĩmi. Õpa arĩtuhaja iri pan dipurure nuha, guare igu buherãre omi. Igu eropa ocũ guapu iri barire masare guerebu. <sup>20</sup> Eropirã arĩpehrerã ñaro baha yapia wama. Erã ba duharare doce puiri gohra aĩ gameneo, ujutu doobu gua. <sup>21</sup> Ero irire banirã uma dihtare queocũ cinco mil uma arĩma. Nome, majirã sã arĩma.

*Jesu deco weca curiñumi*  
*Mr 6.45-52; Jn 6.16-21*

<sup>22</sup> Puhru guare igu buherãre Jesu dohodirugue ñajadore wuariyague taribuja yuudoremi masare igu goerisererisubu. <sup>23</sup> Goeriseretuhaja, igu basi utãgugue mũria, igu Pagu Goãmu mera serẽgu wapu igu seyaro. <sup>24</sup> Irisubure wuariya deco gohra gua taribujacũ miruñe buringã ahri, pãgũri pagari wahgã, dohodirure deco paa ñajabu. <sup>25</sup> Eropa wacũ boyomũririboro core cãreña wahgãrisubu Jesu deco weca cuhraphi wahgãrimi gua pohrogue arigu. <sup>26</sup> Gua pohrogue igu aricũ ñarã güibu gua. Eropa güirã gaguiniguiribu.

—Sĩridi mũru watĩ ãhrimi, arĩ gaguiniguiribu gua.

<sup>27</sup> Gua eropa güicũ Jesu õpa arĩmi:

—Ne yure iha ucabiricãque. Yuhu ta ãhraa. Güibita, arĩmi guare.

<sup>28</sup> Igu eroparĩcũ peegu Pedro arĩmi igure:

—Yũ tĩgu, diaye ta mũhu ta árigũ, deco weca curi wahgádoreque yũre mũ pohrogue, arĩmi ĩgu.

<sup>29</sup> —Arique, arĩ yũhrimi ĩgũpũ.

Ĩgu eroparĩcũ Pedropũ dohodirugue árĩdigũ wiria, deco weca Jesu pohrogue niguiğarĩmi. <sup>30</sup> Miruñe iri burigã aricũ ĩagu gũimi. Eropa gũigu diha dija warimi.

—Yũre tauque, arĩ gaguiniguimi ĩgu Jesure.

<sup>31</sup> ĩgu eroparĩcũ ta Jesu ĩgu mojtore ñeha,

—Merogã umupeoa mũhu yũre. ¿Duhpigũ yũre guñaturabeari mũhu? arĩmi ĩgu Pedrore.

<sup>32</sup> Eropa arĩra pũru dohodirugue ñajama erã. Erã eropa ñajara pũru, miruñe taria wabũ. <sup>33</sup> Eropirã gũa ĩgu buherã dohodirugue árĩrã Jesure umupeobũ.

—Diaye ta mũhu Goãmu magũ ta ãhraa, arĩbu gũa ĩgũre.

*Genesare majarã dorecũrãre tauñumi Jesu*

*Mr 6.53-56*

<sup>34</sup> Eropi taribujaja, Genesare waĩcũri yebague ejabũ. <sup>35</sup> Ero majarã Jesure ĩha masima. Eropa masirã erã pohro árĩrãre dorecũrãre aĩğaridorema. Eropirã erã dorecũrãre ĩgu pohrogue aĩ erama.

<sup>36</sup> —Mũ suhriro tũro dihtare guare mohmepiñadoreque, arĩ serẽma erã Jesure. Eropirã árĩpehrerã dorecũrã ĩgu suhrirore mohmepiñanirã dihta ðarã wama.

## 15

*Masa ñerã wacũ iirire wereñumi Jesu*

*Mr 7.1-23*

<sup>1</sup> Eropi Jerusalén majarã, fariseo masa, masare buherã mera Jesu pohrogue erarã, serẽpima ĩgũre:

<sup>2</sup> —¿Duhpirã mari ñecũ sumarã mũra erã dorediro dopa iibeari mũ buherãpũ? Erã mari dorero dopa ta erã baboro core mojo coe ĩhmubeama, arĩma erã Jesure.

<sup>3</sup> Jesu yũhrigu serẽpimi erãpũre:

—¿Mũapũ duhpirã Goãmu doreripũre iibeari? ¿Duhpirã mũa ya doreri dihtare iiri mũapũ? <sup>4</sup> Ōpa arĩmi Goãmu: “Mũa pagũ sumarãre umupeoque,” arĩmi. Eropigu “Ĩgu pagũ sumarãre ñero werenigui coredigũre erã dipuwaja moarã wejẽbu árĩğucumi,” arĩmi Goãmu.

<sup>5</sup> ĩgu eropa arĩquerecũ ta mũapũ ōpa arĩdorea masare erã pagũ sumarãre. “Mũare itamumasĩbeaa. Mũare yũ oborare Goãmu ya árĩburire opehocãbũ,” arĩque mũa pagũ sumarãre,” arĩ buheraa mũa. <sup>6</sup> Mũa eropa buherã erã pagũ sumarãre erã umupeobiricũ iiaa mũa. Mũa eropa iirã Goãmu buherire tarinũgarã iiaa mũa mũa ya doreri dihtare iirã. <sup>7</sup> Masa erã ĩabiropũre ñero iicorerã ãhraa mũa. Goãmu ya weremũhtadigũgue Isaia mũare diaye ta were gojamũriñumi iribojuere:

<sup>8</sup> Ōã masa yũre ðaro wereniguiquererã yũre ðaro umupeobeama. Erã ya siporãripũ gajipũgue ãhraa. <sup>9</sup> Goãmu ya dorerire arĩbodirore erã ya werenigui dihtare buhema erã. Eropirã yũre umupeo erã sĩbuipeori duhpihuri árĩbeaa, arĩ gojañumi

Isaia, arĩmi Jesu fariseo masare, masare buherã sãre yujuropa ta.

10 Eropa arĩtuhaja ĩgu pohrogue masare sihubeo, òpa arĩmi:

11 —Peeque mua. Mua disirorire ñajaripu mua baripu masare ñerã masa wacũ iibea. Mua wereniguiripu mua ya disiro wiriripu muare ñerã árĩcũ iiaa, arĩmi Jesu.

12 ĩgu eropa arĩ buhera puhru gua ĩgu buherãpu ĩgure werebu:

—Mu eroparĩcũ peerã fariseo masa guama, arĩ werebu gua ĩgure.

13 Irire pee òpa arĩ yuhrimi guare:

—Erã otera iro dopa àhrima. Yu Pagu umaro majagu árĩpehreri oterare ĩgu otebirirare nuguri mera ta cura cóagucumi. 14 Erãre eropa ñacãque. Erã Goãmũ yare masibirã masa cuiri ñhajabirã iro dopa àhrima. Cuiiri ñhajabirã seyaro erã basi game tuagã erã perãgue ta mehtua yuhridijarãcoma gobegue. Eropa erã Goãmũ yare masibiriquererã ta gajirãre masibirãre buhediarima. Eropirã erã erã buherã sã peamegue warãcoma, arĩmi Jesu.

15 ĩgu eroparĩcũ peegu Pedro arĩmi:

—Ĩne queoriñere erã disiro wiriri queorire werenemoque guare daja, arĩmi ĩgu Jesure.

16 Jesu yuhrimi:

—¿Ne, peenibeari mua? 17 Masa erã barire bacũ erã ya disiro ñajaa. Eropiro erã parugue ñajaja, puhru erã dupupu ñerire cohãa. Ibu gohra àhraa. Mari bari marire ñerã wacũ iibea. ¿Ire masibeari mua? 18 Masa ya disiro wiriri, erã wereniguiripu erã pepiri àhraa. Erã ya pepiripu ñeri árĩro masare ñerã árĩcũ iiaa. 19 Erã pepirigue òpa ñeri nũgaa: Ñeri pepiri, masare wejẽri, gajigu marapo mera ñero iiri, ñero iirã nome mera ñero iiri, yajari, guyari, masare ñero quere iiri, masa erã pepirigue nũgaa. 20 Iri ñeripu masare ñerã árĩcũ iiaa. Masa erã dorerire marague erã iimuridiro dopa ta mojoto coebiriquererã ta erã bacũ iri masare ñerã masa árĩcũ iibea, arĩmi Jesu.

*Judio maso árĩbigo Jesure umupeoñumo*

*Mr 7.24-30*

21 Eropa arĩ buhetuhaja guare sihu waha wami daja. Tiro waĩcũri maca pohrogue Sidón waĩcũri maca pohrogue ejabu gua. 22 Gua erogue ejaçũ Canaa yeba majago ero árĩgo Jesu pohrogue eja, turaro mera wereniguimo:

—Opũ Davi pãrami, masare taugu yare mojomoro ñaque mũhu. Yu mago watĩ ñajasũdigo ñetariaro tarimo igo, arĩmo.

23 Igo eropa arĩquerecũ ta Jesu igore yuhribirimi. ĩgu eropa iicũ ñarã gua ĩgu buherãpu ĩgure òpa arĩribũ:

—Wadoreque igore. Ñe gariboro bũsucumo, arĩribũ gua.

24 Gua eroparĩcũ peegu ĩgu yuhrimi igore:

—Israe majarã oveja dederenirã iro dopa árĩrã dihtare itamudoregu obeomi yũ Pagu yare, arĩmi ĩgu.

25 ĩgu eroparĩcũ ta Jesu guburi pohro merejamo igo.

—Mũhu eropa arĩqueregu itamuque yare, arĩmo igo.

26 Jesu yuhrimi igore:

—Wihĩ opũ porã ya barire diayeare ocũ òabeaa. Eropa arĩgu, Israe masa yare gajĩ yeba majarãre yũ ocũ òabeaa, arĩ weremi Jesu igore.



27 —Eropa ta āhraa, Opū. Eropa árīquerecū barisubu dijarire diayea sã bacohrema. Gaji yeba majago yū árīquerecū ta yū sãre itamuque m̄h̄h̄, arī yūhrimo igo.

28 Igo eroparīcū īgū yūhrimi:

—M̄h̄h̄ nomeo, yūre b̄rigā umupeoa. M̄ gamero dopa ta eropa waroca, arīmi Jesu igore.

Īgū eroparīcū ta igo mago mata ðago wapo.

*Bajarā dorecūrāre ðarā wacū iīñumi Jesu*

29 Eropa arītuhaja guare sihu waha, Galilea waīcūriya turo pohrogue sihu ejami daja. P̄hr̄h̄ utāgugue m̄ria, erogue doajami. 30 Ero īgū doacū masa bajarā erama. Eropirā bajarā dorecūrāre aī erama. Curimasibirāre, cuiiri ihajabirāre, yujupū ñero guburucūrāre, apayuriri árīrāre, wereniguimasibirāre, bajarā gajirā dorecūrāre īgū pohrogue aī erama masa. Eropa aī erarā Jesu guburi pohrogā apima erā. Erā eropa duhupira p̄hr̄h̄ ðarā wacū iimi Jesu erāre. 31 Īgū eropa iicū ĩarā masa ĩhamaria wama. Wereniguimasibirinirā erā wereniguicū ĩarā, apayuriri árīnirā erā ðarā wacū ĩarā, curimasibirinirā erā curicū ĩarā, cuiiri ihajabirinirā erā ĩacū ĩarā, ĩhamaria wama erā. Eropirā ðpa arīma:

—Mari Israe majarā mari Opū Goāmū turagū ðagū āhrimi, arī umupeoma erā Goāmure.

*Cuatro mil gohrare masa bajarāre barire oñumi Jesu*

*Mr 8.1-10*

32 Īgū eropa iira p̄hr̄h̄ Jesu guare īgū buherāre sihubeo arīmi:

—Oā masa yū mera ūhrenū gohra arītuhajama. Erāre bari pehrea waca. Eropigū erāre mojomoro ĩhaa. Erā babiriquererā erā ya wirigue dujaacū gamebirica. Mague warā erā oaboarā turabiribocoma. Eropigū erāre bari ejotudiaca, arīmi īgū.

33 Īgū eroparīcū gua īgū buherā īgure serēpibū:

—¿Duhpii mari ðguere masa mariroguere barire bocabocuri erā bajarā masare ejoburire? arībū gua īgure.

34 —¿Dinacū dipuru pan dipurure opari m̄a? arīmi guare.

—Siete pan dipuru, bajamerāgā waire opaa, arī yūhrībū gua.

35 Gua eroparīcū peegū īgū masare taa weca doadoremi.

36 Tuhajanugu siete pan dipurure, waigā sãre aī, īgū Pagure “Ōhaa,” arī serētuhaja, pan dipurure nuha, guare īgū buherāre omi. Eropirā gua īgū buherā iri barire masare guerebū. 37 Eropirā masa irire baha, yapia wama. Erā ba dūharare siete puiri gohra aī gameneo ūjutu dobobū gua. 38 Ero banirāre ūma dihtare queocū cuatro mil gohra árīma. Nome, majirāgā sã árīma. 39 Erā eropa batuhajacū Jesu masare goerisere, dohodirugue ñaja, Magdala waīcūri yebague guare sihu ejami.

## 16

*Fariseo masa, saduceo masa sã Goāmū turari mera deyoro moarire Jesu iicū ĩadiariñuma*

*Mr 8.11-13; Lc 12.54-56*

1 Eropi fariseo masa, saduceo masa mera Jesu pohrogue erama. “Īgū Goāmū īgū obeodigū árībeami,” arī ĩadiariñuma. Eropirā īgure

Goāmũ turari mera deyoro moarire ĩġũ ii ĩhmucũ gamerima. ĩġũ ii ĩhmumasibiricũ “Goāmũ obeodigũ árĩbeamĩ,” arĩdiarima. <sup>2</sup> Erã ĩġũre deyoro moarire eropa iidorecũ Jesu yũhrimi erãre:

—Nami wacũ necã õaro boyocũ ĩarã “Õari ñami árĩroca,” arãa mũa. <sup>3</sup> Eropirã boyoropũre ñipicũ ĩarã, “Deco ariroca,” arãa mũa. Őmarore ĩhamemujurã, “Õpa waroca,” arĩ masia mũa. Eropa õaro masiquererã ta dohpague Goãmũ turari mera mũare yũ ii ĩhmuquerecũ ta ne irire õaro masibea mũa. <sup>4</sup> Dohpague majarã ñetariarã Goãmũre gamebirã Goãmũ turari mera ii ĩhmurire ĩadiarima. Deyoro moarire ii ĩhmusome yũhũ. Goãmũ yare weremuhtadigũ Jona mũrũ ĩġũre wadirore masituhã mũa. Iri dihtare ĩhmugũra mũare, arĩ yũhrimi Jesu.

Eropa arĩ weretuhaja ġũare sihu waha wami daja.

*Fariseo masa saduceo masa erã ñeri buherire wereñumi Jesu*  
*Mr 8.14-21*

<sup>5</sup> Wũari ditarugue ġũa taribujarã panre cãdijicãnirã árĩribũ.  
<sup>6</sup> Eropigũ Jesu ġũare weremi:

—Fariseo masa saduceo masa erã pan buġacũ iiburire õaro masique mũa. ġũhya ãhraa, arĩ weremi ġũare:

<sup>7</sup> ĩġũ eroparicũ pee wisirã ġũa basi irire wereniguibũ.

—Mari panre mari aĩġãribiricũ ĩagũ eropa arĩcumĩ ĩġũ, arĩ pepiribũ ġũa.

<sup>8</sup> ġũa eropa arĩrare masigũ, ġũare serẽpimi:

—¿Duhpirã panre mũa cãdijirare ġũhari mũa? Merogã gohra yũre umupeoa mũa. <sup>9</sup> ¿Masinibeari mũa? ¿Cinco mil umare cinco pan dipurure yũ nuha orare ġũñabeari mũa? ¿Erã baha yapira pũhrũ doce puiri gohra mũa ujuũtu doborare ġũñabeari mũa? <sup>10</sup> ¿Eropirã daja siete pan dipurure nuha, cuatro mil umare yũ ora sãre ġũñabeari mũa? ¿Erã baha yapira pũhrũ dinũcu puiri gohra mũa ujuũtu doborare ġũñabeari mũa? <sup>11</sup> ¿Eropirã pan buġacũ iiburire yũ werecũ duhpirã õaro peebeari mũa? Eropa arĩġũ pan gohrare arĩġũ iibea. Fariseo masa, saduceo masa erã pan buġacũ iiburire õaro iique, arĩġũ pan gohrare arĩġũ iibea, arĩ weremi ĩġũ ġũare.

<sup>12</sup> ĩġũ eropa arĩ werecũ ġũa masibũ. “Pan buġacũ iiburire,” arĩġũ pan gohrare arĩġũ iibirimi. Eropa arĩġũ fariseo masa, saduceo masa erã buherire arĩġũ iidi árĩrimi ġũare. “Erã ya buherire peebiricãque,” arĩġũ iimi.

*Jesu diaye ta Cristo ĩġũ árĩrire wereñumi Pedro*  
*Mr 8.27-30; Lc 9.18-21*

<sup>13</sup> Eropi Jesu mera warã Cesarea Filipo waĩcũri maca pohro árĩri macague ejabu ġũa. Eropigũ iri macague ġũa ejara pũhrũ Jesu ġũare ĩġũ buherãre serẽpiñami:

—¿Nihino árĩcũri yũhũ masa erã pepicũ? arĩ serẽpimi ĩġũ.

<sup>14</sup> —“Ñũ waĩyegũ ãhrimi,” arĩma mũre gajirã. Gajirã “Elia ãhrimi,” arĩma. Gajirãpũ “Jeremia árĩbocumi o gajigũ Goãmũ yare weremuhtanirã mera majagũ árĩbocumi,” arĩma, arĩ yũhribũ ġũa ĩġũre.

<sup>15</sup> —¿Mũarũ pepicũ nihino árĩcũri yũhũ? arĩ serẽpimi ĩġũ ġũare daja.

16 Simo Pedropu yuhrimi:

—Muhu Cristo Goamu obeodigu ahraa. Goamu ojocarigu magu ahraa muhu, arı yuhrimi Simo Pedro.

17 —Simo, Jona magu, muhu mucubirigu ahraa. Opa arı mu yure yuhrira masa erā werera arıbeaa. Yu Pagu umaro majagupu irire mre masicū iiami. 18 Mre arıgu tiiaa. Muhu Pedro waıcugu ahraa. (Pedro arıgu utāye arıgu iıpu.) Iye utāye weca wuarı wihire yu iibodiro dopa ta yaharāpüre yuju curu wuarı curu arıcū iıgıca yuhu. Eropıgu watı İgu yarā mera yaharāre tarınugasome. Eropırā yaharā ne peamegue wasome. 19 Umaro majagu mari Opı İgu arıro maja sawire mre ogura. Eropıgu i yebaguere mu iidorebiricū yu sā umarogue arıgu iidoresome. I yebaguere mu iidorecū umarogue yu sā iidoregura, arımi Jesu.

20 İgu eropa arıra puhru guare İgu buherāre weremi:

—Yure “Cristo ahrimi İgu,” ne arı weresiribiricāque gajirāre, arımi guare.

*Jesu İgu sıriburiñere, İgu masa marıaburiñe sare wereñumi*  
*Mr 8.31–9.1; Lc 9.22-27*

21 Irisubure ta Jesu guare İgu buherāre oaro werepehonugami:

—Jerusalengue yure waro gahmea dohpaguere. Erogue majarā, mūrā, pahia oparā, mari masare buherā sā yure ñero iirācoma. Eropırā yure wejērācoma. Eropa ta ñero tariro gahmea yure. Eropıgu uhrenu puhru ta masa marıagıca, arı weremi guare İgu.

22 İgu eroparıcū peegu Pedropu gajıpu ñarigā Jesure aıgā, İgure opa arımi:

—Opı, eropa arıbiricāque. Mu arıro dopa wabiricāporo. Mre erā wejēbiricāporo, arırimi İgu Jesure.

23 İgu eroparıcū peegu Jesu majınugaja, İgure opa arımi:

—Satana iro dopa werenıguıgu iiaa muhu. Eropa arıbiricāque. Mu pepiri masa ya pepiri ahraa. Goamu ya pepiri arıbeaa. Eropıgu yu iıborore cāhmotadiaa muhu, arımi Jesu Pedroro.

24 İgu eropa arıra puhru guare weremi:

—Yujugu yu mera majagu arıdiagu, İgu gamero iidiarire duhucāgıcumı. Eropıgu İgu yu mera majagu arıri dipuwaja ñero tarıgıcumı. Eropa ñero tariqueregu ta yahare iınıguıcāgı arıgıcumı. 25 Yujugu ması İgu ya arıburi dihtare pepıgu İgu dederea wagıcumı. Eropıgu yujugu ması yaha arıburi dihtare iıgu arıpehrerınarı yu mera umarogue oaro arıgıcumı İgu. 26 Yujugu ması i yeba majare arıpehrerire opaqueregu peamegue wagu oarire wıatasome. Eropıgu i yebague opaburi dihtare guıagu, İgu sırıgu waburire guıabıgu İgu sıporā mera peamegue dederegıcumı. 27 Yuhu ması Goamu obeodıgu yaharā anyua mera i yebague dujarıgıca. Yu Pagu İgu goesıriri mera dujarıgu arıpehrerā masare erā ñeri iira dipuwaja dipuwaja moagura. Erā oarıpüre erā iıcū oaro iıgıra erāre. 28 Diaye arıgu tiiaa. Yujurāyeri mu oğuerer arıri maa sıriboro core yure yu opı arıgu arıcūgue İarāca, arı weremi Jesu.

## 17

*Jesu ĩgu dũpũre gohrotoñumi*

*Mr 9.2-13; Lc 9.28-36*

<sup>1</sup> Eropi seis nũri pũhrũ Jesu Pedrore, Santiagore, ĩgu pagũ magũ Ñũ sãre umadigu utãgũgue erã dihtare sihumũriapũ. <sup>2</sup> Ũmarogue erã mũrijara pũhrũ erã ĩhabeoro ĩgu dũpũre gohrotopũ. ĩgu diapo abe umũ majagu iro dopa gohra gosesiriyoro. Eropiro ĩgu suhri gosesiriri suhri ðaro boreriñe wayoro. <sup>3</sup> Mata iribojegue majarã Moise mũrũ Elia mũrũ sã dehyoañorã. Eropirã Jesu, Moise, Elia mera ĩgu weretamucũ ĩañorã erã urerã ĩgu buherã. <sup>4</sup> Eropigu Pedro Jesure arĩpũ:

—Opũ, mari ohõ árĩcũ ðadiaa. Mũ gamecũ uñre wihigã iirã. Mũ ya wihigã, Moise ya wihigã, Elia ya wihigã iirã mari, arĩpũ.

<sup>5</sup> ĩgu eropa arĩ wereniguirisubu, imica curu ðaro gosesiriri curu erãre cãhmotacãyoro. Eropa wacũ imica curu pohecague Goãmũ ĩgu wereniguri busũyoro:

—Ĩhĩ yũ magũ yũ mahigu ãhrimi. ĩgu mera mucubiria. ĩgũre peeque, arĩri busũyoro.

<sup>6</sup> Eropa arĩro caricũ peerã ĩgu buherã uca mehmereja wañorã. <sup>7</sup> Erã eropa wara pũhrũ Jesu erã pohrogue eja, erãre buacare ñahpũ:

—Wahgãnũgajaque mũa. Gũibiricãque, arĩpũ ĩgu erãre.

<sup>8</sup> ĩgu eroparĩcũ erã ĩhabeo, Jesu dihtare ĩañorã. Gajirãre ĩabiriñorã.

<sup>9</sup> Eropirã utãgũgue erã دچارĩcũ Jesu erãre turaro mera arĩpũ:

—Dohparagã yũre eropa warare gajirãre ne werebiricãque. Yũhũ masũ Goãmũ ĩgu obeodigu yũhũ sĩri masa mũriara pũhrũ irire gajirãre wereque mũa, arĩpũ Jesu.

<sup>10</sup> ĩgu buherãpũ ĩgũre serẽpiñorã:

—“Cristo Goãmũ beyedigu ĩgu ariboro core Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñorã erã ĩgũre:

<sup>11</sup> Jesu yũhripũ:

—Diaye ta ãhraa. Eliare arimũhtadoremi Goãmũ árĩpehrerire amumũhtabure. <sup>12</sup> Őpa arĩgu mũare arĩgu iiaa. Elia eratuhami. ĩgu eropa eraquerecũ ta erã ĩgũre ne ĩha masibirima. Eropirã erã gamero dopa ñero iinirã árĩma ĩgũre. Eropa ta iirãcoma yũ masũre Goãmũ ĩgu obeodigũre. Erã eropa iicũ ñero tarigũca yũhũ, arĩpũ Jesu.

<sup>13</sup> ĩgu eropa arĩ werecũ erã peeñorã. “Elia,” arĩgu, Ñũ waĩyegũre weregu iipũ. Irire masiñorã pare erã.

*Jesu ñama sĩriri mũrũre dorecũgũre tauñumi*

*Mr 9.14-29; Lc 9.37-43*

<sup>14</sup> Eropirã utãgũgue mũrijanirã erã urerã Jesu mera dijararã gũa pohrogue erama bajarã masa árĩrogue. Erã eracũ ĩagũ yujugũ umũ Jesu pohrogue eja, merejami.

<sup>15</sup> —Opũ, yũ magũre mojomoro ĩaque. ĩgu ñama sĩriri mũrũre dorecũgũ ãhrimi. Eropigu ĩgu ñetariaro tarimi. Bajasuburi peamegue mehmerejamũrimi ĩgu. Yujuyerisuburi diaguere yuri ñajamũrimi. <sup>16</sup> Eropigu mũ buherã pohrogue aĩ erarabũ. Erã ĩgũre ðagũ wacũ iimasibirama, arĩmi ĩgu Jesure.

<sup>17</sup> Jesu arĩmi ero árĩrãre:

—Dohpague majarã mũa ñerã áhraa. ¿Yũre ne umupeo-birigohracãri? Yoari boje mũare buherabũ yũhũ. ¿Dipẽ yoari boje yũre mũa garibori? Ígũre aígãrique yũre, arĩmi Jesu.

<sup>18</sup> Ígũ majigure erã aĩ eratuhajacũ íha Jesu watĩre tuhri cóãmi. Eropigũ mata ðagũ wami ígũ magũ.

<sup>19</sup> Pũhrũ gua ígũ buherã gua seyaro árĩrã Jesure serẽpibũ:

—¿Duhpirã guapũ ígũ magũre watĩre cóãmasibirayuri? arĩ serẽpibũ gua.

<sup>20</sup> Jesu yũhrimi:

—Yũre daberogã umupeoa mũa. Diaye ta mũare weregũ iiaa. Goãmũre “Diaye ta iigũ áhrimi,” mũa arĩ umupeorã miriyegã mostazaye pegã mũa umupeoquererã irigũ utãgũre “Sohõgue waque,” mũa arĩcũ, waha waroca. Goãmũre eropa umupeorã árĩpehrerire iimasia mũa. <sup>21</sup> Ino watĩre mũa cóãdiarã Goãmũre bũrigã serẽro gahmea mũare. Eropirã ba duhuro gahmea Goãmũre serẽmorã, arĩmi Jesu guare.

*Dipaturi Jesu ígũ sĩriburiñere ígũ masa muriaburiñe sãre wereñumi Mr 9.30-32; Lc 9.43-45*

<sup>22</sup> Eropi Galilea yebague gua curicũ, Jesu guare weremi:

—Yũhũ masũ Goãmũ ígũ obeodigũ áhraa. Masa yũre ñeha, gajirãguere yũre wiarãcoma. <sup>23</sup> Eropa yũre erã wiara pũhrũ wejẽrãcoma erã. Eropa erã wejẽdigũ uhrenũ pũhrũ masagũca, arĩmi ígũ guare.

Ígũ eropa arĩ werecũ pee bũrigã bũjawerebũ gua.

*Goãmũ wihi maja wajayeburire serẽpiñuma gajirã*

<sup>24</sup> Eropirã Capernaum macague gua ejacũ, Goãmũ wihi maja wajayeburire wajasea corerã Pedro pohrogue eja, ígũre serẽpiñama:

—¿Mũare buhegũ Goãmũ wihi maja árĩburire wajayeri ígũ? arĩ serẽpima erã.

<sup>25</sup> —Wajayemi ígũ, arĩ yũhrimi Pedro.

Ígũ eropa arĩra pũhrũ wihigue ígũ ñajacũ ta Jesu Pedrorẽ serẽpimũhtami:

—Simo, ¿dohpa arĩ pepiri mũhũ? ¿I yeba majarã oparã ñehmarãpũre waja aĩri mũ pepicũ? ¿Erã mera majarãre wajaseari? ¿O gaji yeba majarãpũre wajaseari? arĩ serẽpimi ígũ Pedrorẽ.

<sup>26</sup> —Gaji yeba majarãpũre wajaseama, arĩ yũhrimi Pedro.

Ígũ eroparĩcũ Jesu weremi:

—Eropigũ opũ ígũ ya yeba majarãre wajaseabirimũririmi. <sup>27</sup> Eropa árĩquerecũ ta wajasea corerãre guacũ iidiabeaa mari. Eropirã wajayerãca. Ditarugue waque. Erogue eja wejericãrore mehyuque. Eropigũ waimũ bamũhtadigure tara suaque. Eropigũ ígũ waimũ disirogue niyerusere bocajagũca mũhũ. Irise queoro wajacũroca. Yũre, mũa sãre Goãmũ wihi maja árĩburire erã wajaseacũ ðaro queoro sihajaroca irise. Irisere bocajagu mari wajamoriñere wajayepehogu waque, arĩmi Jesu Pedrorẽ.

## 18

*Jesu ígũ buherãre erã weca opũ árĩbure wereñumi Mr 9.33-37; Lc 9.46-48*

<sup>1</sup> Irisubure gua Jesu buherã ïgu pohrogue eja serëpibũ ïgure:

—¿Umaro majagu ïgu opu áriroguere gua mera majagu nihino wabocuri áripehrerã weca opu? arĩ serëpibũ gua.

<sup>2</sup> Gua eroparicũ Jesu majigugãre sihubeo, ïgugãre gua watope duhudobomi. Duhudobotuhaja guare arĩmi.

<sup>3</sup> —Diaye muare were purumujugura. Oã majirãgã Goãmure erã opu gohra pepima. Eropirã mua sã erã iro dopa ta pepirã, ðarire gohrotorã umaro majagu opu áriroguere warãca. Erã iro dopa pepibirã opu ïgu áriroguere wasome mua. <sup>4</sup> Eropigu umaro majagu ïgu opu áriroguere eropa pepicãgu, ihĩ majigugã dopa pepigu ta gajirã tauro opu wahami. <sup>5</sup> Eropirã yahare iimorã ðpa áriugugãre gamerã, yu sãre gahmea mua, arĩ weremi Jesu guare.

*Ñerire iicũ guhya ãhraa arĩ wereñumi Jesu*

*Mr 9.42-48; Lc 17.1-2*

<sup>6</sup> Eropigu ðpa werenemomi:

—Ïgã dopa áriugu yare ne umupeogure weregura muare. Yujugu ïgã iro dopa áriugure ñerire iidoredigu ïgu ñetariaro tarigucumi. Gajigure masa ïgu wunugure wuariye utãye mera dirisiu, wuariyague ïgure cóãcũ ñero wabocumi ïgu. Eropigu ïgã dopa áriugure ñerire iidoredigupu wuariyague erã cóãdigu tauro ñero tarigucumi. Ïgu turaro dipuwaja moasugucumi. <sup>7</sup> Masare ñerire iicũ iiri ãhraa. Irire iirã i yeba majarã ñero tarima. Gajirã ñerire iidorema gajirã masare. Erã ñerire iidorenirãpu erã tauro ñetariaro tarirãcoma.

<sup>8</sup> “Mu mojoto mera ñero iigu iri mojtore mu tabe cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Mu mojtore mu cóãcũ iri ðuca dihta cohmoboya. Eropigu mupu epasi áriqueregu ta puhru Goãmu mera áriuguca. Mu pe mojoto mera áriugure peamegue ïgu cóãcũ ñetariaro tariguca. Eropigu iri ñeri iiripãre duhuque. Mu guburu mera ñero iigu iri guburu sãre mu tabe cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Mu guburu mu cóãcũ irisi dihta cohmoboya. Eropigu epasi áriqueregu ta puhru Goãmu mera áriuguca. Mupu pe guburu mera áriugure mure peamegue cóãcũ mu ñetariaro tariguca. Eropigu iri ñeri iiripãre duhuque. <sup>9</sup> Mu cuiru mera ñero iigu irirure mu gorawea cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Mu cuirure cóãcũ iriru dihta cohmoboya. Yujupu cuiru mariquerecũ ta puhru Goãmu mera áriuguca. Mure pe cuiru mera áriugure peamegue mure cóãcũ, mu ñetariaro tariguca. Eropigu iri ñeri iiripãre duhuque, arĩmi Jesu.

*Oveja dederedigũ queorire wereñumi Jesu*

*Lc 15.3-7*

<sup>10</sup> Eropigu gua sãre werenemomi:

—Ne, oã majirãgãre doobiricãque. Muare arigu tiaa. Erãgãre ïhadiburã anyua umarogue yu Pagu pohrogue eropa áriniguima. <sup>11</sup> Yuhu masu Goãmu ïgu obeodigu i yebague dederebonirãre taugu arigu iibu yuhu, arĩ weremi Jesu.

<sup>12</sup> Eropa arĩtuha ðpa arĩ queorire ahmu wereniguimi.

—Ovejare îhadibugũ cien ovejare opagũ yujugũ oveja dederea wacã ïagũ òpa iigũcumi erãre îhadibugũpũ. Gajirã ovejare noventa y nueve ovejare erã bari campogue duhudobo, dederedigũre amagũ wagũcumi. <sup>13</sup> Diaye ta arĩgũ iiaa mũare. Ìgũre bocagũ bãrigã mucubirigũcumi ïgũ. Gajirã noventa y nueve dũhyarã mera mucubiridigũ arĩqueregũ erã tauro ïgũ bocadigũpũre mucubirigũcumi. <sup>14</sup> Eropa ta mari Pagũ ɔmaro majagũ oãgã iro dopa arĩrã sãre erã dederecã gamebeami, arĩmi Jesu.

*Mũ acaweregũ mũre ñero iicã òpa iique, arĩñumi Jesu*  
Lc 17.3

<sup>15</sup> Eropa arĩtuhaja òpa werenemomi Jesu:

—Mũ acaweregũ mũre ñero iicã ïgũ mera weretamugũ waque. Mũa seyaro irire weretamuque. Mũ eropa iicã ïgũ mũre peebocumi. Ìgũ peecũ “Mũre dipaturi ne òpa iisome yũhũ,” ïgũ arĩcã mũ acaweregũre dipaturi wapicũ iigũca mũhũ. <sup>16</sup> Mũre ïgũ peediabiricũ tamerare yujugũ mera wadiagũ, o perã mera wadiagũ, erãre wapicũgã dipaturi ïgũre wereniguigũ waque daja “Erã sã peeporo,” arĩgũ. <sup>17</sup> Eropigũ mũ mera majarã sãre ïgũ peediabiricũ arĩpehrerã Jesu yarã mera gamenere ïgũre weresãque. Eropirã Jesu yarã gamenererã sãre ïgũ peediabiricũ ïarã Goãmũre masibigũ ñegũ arĩro dopa iique ïgũre.

<sup>18</sup> “Diaye ta mũare arĩgũ iiaa. I yeba mũa yaharã yaha dorerire oparãca. Eropirã mũa i yebare iidorebirirare yũ sã ɔmarogũ arĩgũ iidoresome. I yeba mũa iidorerare yũ sã ɔmarogũ iidoregũca.

<sup>19</sup> “Dipaturi mũare ire weregũra daja: Mũa perã Goãmũre serẽrã, yujuro mera pepirã arĩcã, yũ Pagũ ɔmaro majagũ irire mũare ogũcumi. <sup>20</sup> Perã o ɔrerã yaharã yahare iimorã erã gamenerecũ yũ sã erã mera ãhraa, arĩ weremi Jesu.

<sup>21</sup> Pũhrũ Pedro Jesu pohrogue eja serẽpimi:

—Opũ, ɔyũ acaweregũ mũ yagũ ïgũ dinũcusuburi yare ñero iicã ïagũ irire cãdijitugũcuri yũhũ? ɔO siete suburi ïgũ iicã cãdijitugũcuri yũhũ? arĩ serẽpimi Pedro.

<sup>22</sup> Jesu yũhrimi:

—Sietesuburi dihta mũre ïgũ ñero iirare mũ cãdijicũ ero wabeaa. Bajasuburi ïgũ mũre ñero iicã sãre cãdijique, arĩmi ïgũre.

*Pohro majagũ gajigũ ïgũ wajamorare ïgũ cãdijidiabirira queorire wereñumi Jesu*

<sup>23</sup> Eropigũ Jesu òpa werenemomi gũare:

—ɔmaro majagũ opũ arĩri werediacũ òpa ãhraa. Yujugũ opũ ïgũ pohro majarãre erã ïgũre wajamorare wajayepheho dorediarĩñumi. <sup>24</sup> Erã wajamorare ïgũ queonũgacũ, ïgũre mohme corerãpũ wũaro wajamogũre ïgũ pohrogue aĩgãriñuma. Wajamogũpũ wũaro wajamoñumi opũre. <sup>25</sup> Eropigũ ïgũ wajayemasibiricũ ïagũ ïgũ opũ ïgũre, ïgũ marapore, ïgũ porã sãre pohro majarã acu, erãre gajirãre duadiarĩñumi ïgũ wajamoirere wajaseagũ. <sup>26</sup> Ìgũ eropa duadiacũ wũaro wajamogũpũ mereja, ïgũ opũre turaro serẽñumi: “Opũ, gũare gajirãre duabiricãque. Mojomoro ïagũ corenique. Mũre wajayephehogũca,” arĩñumi ïgũ ïgũ opũre. <sup>27</sup> Ìgũ eroparicũ peegũ ïgũre mojomoro ïagũ, ïgũ wajamorare eropa ta cãdijipehocãñumi.

28 “Ígu eropa iira pührü wajamodigupü waha, gajigü pohro majagüre bocañaumi. Ígupü merogã wajamoñumi ígure wajamodigupüre. Eropa boca jagü yojaro mera ñeañumi ígure. “Yüre mü wajamorare wajaye purumujuque duru,” arĩñumi ígu ígu mera majagüre. 29 Ígu eroparĩcũ gajigü pohro majagupü mereja ígure burigã serẽriñumi: “Yüre mojomoro íaque. Merogã corenique. Mure wajayepohogara,” arĩriñumi gajigü pohro majagü ígure. 30 Ígu eropa arĩ serẽquerecũ ta ígu yühribiriñumi. Eropigü ígu gajigü pohro majagupüre peresu iidoreñumi ne ígu wajayepohocũgue. 31 Wñaro wajamodigü ígure merogã wajamogupüre ígu eropa iicũ ñha papũri, gajirã pohro majarãpü erã opüre weresãrã wañuma. 32 Erã eropa arĩ weresãcũ peegü erã opu erãre weresãdigüre sihubeo õpa arĩñumi: “Mũhü ñetariagü ãhraa. Mũhü yure burigã serẽcũ mü wajamorare cãdijipehocãrabugü yũhü mure. 33 Mure yu eropa iiquerẽcũ ta mũpü merogã wajamogupüre cãdijibirayoro mũhü. Mü wajamorare yu cãdijidiro dopa ta ígu sãre mü cãdijicũ ðatariaboya. ¿Duhpigü ígure mojomoro ñabirari ígure eropa iigü mũhü?” arĩñumi ígu opu ígure. 34 Eropa arĩgü burigã guagü, peresu iinñumi ígu pohro majagüre ne ígu wajayepohocũgue, arĩ weremi Jesu.

35 Eropigü õpa arĩ i queorire weretumi:

—Eropa ta iigucumi yu Pagü umaro majagü mũare. Mña árĩpehrerã mña acawererã mũare ñero iirare õaro mña cãdijipehobicũ ígu mũare dipuwaja moagucumi, arĩmi Jesu.

## 19

*Erã marasã nomere erã cóãcũ õabeaa, arĩ wereñumi Jesu*

*Mr 10.1-12; Lc 16.18*

1 Irire ígu eropa arĩ werera pührü ígu Galilea árĩdigü Judea yebague gñare sihu wami. Dia Jordán waicuriya gajipü masegue ejabu. 2 Erogue gña wacũ bajarã masa gñare nurusiagãma. Erã mera majarãre dorecurãre õarã wacũ iimi ígu.

3 Eropi yujurãyeri fariseo masa gña pohro erama. Jesure weresãdiarã, ñero ígu wereniguicũ peediarã, ígure õpa serẽpima:

—¿Mari marapore mari gamero cóãcũ õhari? ¿Mari doreripü eropa ta iidoreri mü pepicũ? arĩ serẽpima erã.

4 Jesu yührimi.

—¿Goãmü yare erã gojarapũgue ne ire buhebiriniari mña? Õpa arĩ gojara ãhraa: “Negohraguere i yebare ñhacñugudigü umü, nomeo sãre iipü,” arĩ gojañumi Moise. 5 Õpa ãhraa ígu arĩ gojanemora: “Eropigü umü ígu pagü sumarãre cohã wiria, ígu marapo mera árĩgucumi. Eropirã erã perã árĩquererã ta yuju dũpü iro dopa ta árĩrãcoma,” arĩ gojañumi. 6 Eropirã erã perã iro dopa árĩbeama. Yuju dũpü iro dopa ta árĩrã iima. Goãmü doreri mera mojoto dirima. Eropirã duhubircãro gahmea erãre, arĩmi Jesu erãre.

7 Ígu eroparĩcũ fariseo masa serẽpima daja:

—Mũhü eropa werequerecũ ta õpa arĩ gojañumi Moisepü: “Mü marapore cóãdiagü paperapũgue irire gojaque. Eropa gojagü iripüre mü marapore mü ora pührü igore cóãmasia mũhü,” arĩ gojañumi



Moise. ¿Mũ arĩro dopa arĩquerecũ ta duhpigu Moisepu eropa arĩ gojayuri? arĩ yũhrama erã ãgũre.

<sup>8</sup> Jesu yũhri gamemi erãre:

—Goãmu dorerire mua ñecu sũmarã erã iidiairicũ ãgũ “Eropa ta wacuraporo,” arĩgũ, “Mua marapore cóãmasia,” arĩ gojañumi Moise. ãgũ eropa arĩ gojara arĩquerecũ ta negohraguere mua marasã nomere cóãcũ gamebiripũ. <sup>9</sup> Mũare arĩgũ tiaa: Masũ ãgũ marapo igo gajigu mera ñero iibiriquerecũ ta igore cóãgũ, gajigo mera marapocũgũ, ãgũ gajigo mera ñero iigu iimi. Eropigu ihĩ cóãdigo mera marapocũgũ sã igo mera ñero iigu iimi, arĩmi Jesu.

<sup>10</sup> ãgũ eroparicũ peerã, gũã ãgũ buherãpu õpa arĩbũ:

—Eropa mũũ ãgũ marapo mera erã game cóãbiricũ, maripũre ne marapo marirã arĩcũ õaboca gũare, arĩbũ gũã.

<sup>11</sup> Jesu yũhrimi gũare:

—Mua arĩro dopa ta arĩpehrerã arĩmasibeama. Goãmu marapocũdorebirinirã dihta eropa arĩmasima. <sup>12</sup> Ũma marapocũmasibirã yujurãyeri ãhrama. Yujurãyeri mũma ero ta poyari masa mata nomere gamebirã masa dehyoama. Gajirã masa erã ãpiritõ diuri erã weanirãpu marapocũmasibeama. Gajirã mũma mũmaro majagũ erã Opũ yare itamudiarã marapocũbeama. Eropirã oã marapocũdiabirã eropa ta pepicãrã, eropa ta erã arĩ ojogorocũcũ õhaa, arĩmi Jesu gũare.

*Majirãgã ya arĩburire Goãmũre serẽbasañumi Jesu*

*Mr 10.13-16; Lc 18.15-17*

<sup>13</sup> Eropi masa majirãgãre Jesure mohmepiñadoremorã Jesu pohrogue aĩ erama. Eropa aĩ erarã, erã Jesure ãgũ mojotore erãgãre mohmepidorediama. Eropirã erãgãre erã õaro arĩburire Goãmũre serẽbasadorediama Jesure. Erã eropa iicũ ãarã gũã ãgũ buherã erãre turiribũ. <sup>14</sup> Gũã eropa turicũ ãgũ, gũare Jesu õpa arĩmi:

—Majirãgã yũ pohrogue ariporo. “Waque,” arĩbiricãque erãgãre. Erãgã Goãmũre erã opu pepima. Eropirã ãgũ mũmaro majagũ ãgũ opu arĩroguere oãgã iro dopa pepirã ãhrama eroguerẽ, arĩmi Jesu.

<sup>15</sup> Eropa arĩtuhaja erã majirãgãre mohmepituhaja waha wami.

*Doberi opagũ Jesu mera weretamuñumi*

*Mr 10.17-31; Lc 18.18-30*

<sup>16</sup> ãgũ eropa iira pũhrũ yujugũ masũ mamũ Jesu pohrogue eraa, serẽpimi ãgũre:

—Ne mũhũ õagũ buhegu ãhraa. ¿Yũ arĩpehrerinũri Goãmũ mera arĩdiagũ, õarire iidiaigũ dinopũre iibocuri yũhũ? arĩmi ãgũ.

<sup>17</sup> —¿Dohpa arĩronore yãre õagũ arĩ piyuri mũhũ? Goãmũ dihta õagũ ãhrimi. Arĩpehrerinũri Goãmũ mera arĩdiagũ ãgũ dorerire iique, arĩmi Jesu.

<sup>18</sup> —¿Di doreripũre arĩgũ iiri? arĩ serẽpinemomi ãgũ.

Jesu yũhrimi:

—Masare wejẽbiricãque. Gajigu marapo mera arĩbita. Yajabita. Gũyabita. <sup>19</sup> Mũ pagũ sũmarãre umupeoque. Mũ basi mahiro dopa ta mũ pohro arĩgũ sãre mahique. I dorerire iiro gahmea, arĩmi Jesu.

<sup>20</sup> —I dorerire ne tarinũgabirimũrabũ yũhũ. ¿Ñeheno dũhyari yũ iinemoburi yũ arĩpehrerinũri Goãmũ mera arĩdiagũ? arĩmi ãgũ Jesure.

21 Īḡu eroparīcũ peegu Jesu werenemomi:

—Mũhũ Goãmũ mera õaro árīdiagũ mũ yare árīpehrerire duagu waque. Eropa duagu árīpehreri niyerure mũ wajatarare mojomorocũrãre oque. Mũ eropa iicũ wũaro mũ ya umaroguere Goãmũ pohroguere árīyuroca. Mũ eropa iira pũhrũ yũ mera majagu árĩbu arique, arĩ weremi Jesu.

22 Īḡu wũaro opagu árĩpũ. Eropigu Jesu ĩḡure eroparīcũ peegu ĩḡu oparire mojomorocũrãre odiabigu, turaro bũjawere suabiri waha wami.

23 Īḡu eropa wacũ Jesu ḡuare ĩḡu buherãre werenemomi:

—Diaye ta mũare arĩḡũ iiaa. Doberi oparã Goãmũre ĩḡu opu árĩroguere erã wadiacũ diasa ãhraa. 24 Mũare werenemogũra: Camellopũ awiru gobegãgue ĩḡu ñajatariwereadiacũ masiya mara ĩḡure. Eropa ta doberi opagu Goãmũ opu ĩḡu árĩroguere wacũ diasataria, arĩmi ĩḡũ.

25 Īḡu eroparīcũ ḡua ĩhamaria wa ḡua basi õpa arĩbũ:

—Yaho. Īḡu arĩro dopa ta diaye árīcũ, ne yujugũ masũre Goãmũ taubiribocumi ĩḡu pohro waborore, arĩbũ ḡua ḡua basi.

26 ḡua eroparīcũ Jesu ḡuare ĩhabeo, õpa weremi:

—Masa erã bocatĩuro erã õaro iira mera Goãmũ pohroguere wamasibeama. Goãmũpũ masare peamegue wabonirãre taumasimi. Īḡu árīpehrerire õaro iimasipehocãmi, arĩmi ĩḡu ḡuare.

27 Īḡu eroparīcũ Pedro ĩḡure arĩmi:

—Peenique. ḡuapũ ḡua ya árīpehrerire apipehocãbũ mũ mera warã. ¿ḡua õpa iirã dohpa árĩrĩre wajatarãcuri ḡua? arĩmi ĩḡũ.

28 —Mũare diaye arĩḡũ tiiãa: Pehrerinũ pũhrũ árīpehreri mama gohrotoroca. Irisubuguere yũhũ masũ Goãmũ ĩḡu obeodigu yũ opu doarõ gosesiro doagũca yũhũ. Yũhũ ero doacũ mũa sã doce gohra árĩnirã oparã árĩri mera doarãca. Eropirã Israe masare doce cururi majarãre beyerãca õarã sãre ñerã sãre. 29 Eropirã mũa árīpehrerã õari buherire yaha árĩburire iimorã, mũa wirire, mũa pagũ porãre, mũa pagũ sumarãre, mũa porãre, mũa poerire apicãnirã wũaro wajatarãca. Eropirã árīpehrerinũri Goãmũ mera õaro árĩrãca. 30 Dohpague bajarã oparã árĩnirã mũra irisubuguere bu árĩrã dujarãcoma. Eropirã dohpague bajarã bu árĩnirã mũra irisubure oparã gohrotorãcoma daja, arĩ weremi Jesu ḡuare ĩḡu buherãre.

## 20

### *Īḡui pohe mohmerã queorire wereñumi Jesu*

1 Eropi dipaturi Jesu queorire weremi daja õpa arĩḡũ:

—Umãro majagu opu ĩḡu árĩri werediãcũ pohe opu iro dopa ãhraa. Īḡu pohe opu boyo pãri merejacũ ĩḡu pohere mohmemorãre sihugu wañumi. 2 “Yujuse niyerusere yujunũ mohmeri wajare wajayegũra yujunũre,” arĩñumi. “Áũ,” arĩñuma mohmemorã. Erã eroparīcũ pohegue mohmedoreḡũ oboñumi ĩḡu erãre. 3 Eropigu umũgue neueve árīcũ doberi duarogue wañumi daja. Eroque eḡagu, gajirã mohmebirãre ĩañumi. 4 Eropa ĩagu erãre arĩñumi: “Mũa sã yaha pohere mohmerã waque. Õaro wajayegũra,” arĩñumi ĩḡũ. 5 Eropirã erã pohegue mohmerã wañuma. Eropi pohe opu goeri boje árīcũ,

ñamicague tres árícũ sãre gajirãre mohmedoreñumi daja. <sup>6</sup> Eropi ñamicague cinco árícũgue doberi duarogue ïgu wañumi daja. Eroque eja gajirã mohmeri moorãre ïañumi. Erãre arĩñumi: “¿Ne gajino ïibiriquererã yujunãre ïaniguineacãri mua?” arĩ serẽpiñumi erãre. <sup>7</sup> “Ne guare mohmeri mara,” arĩ yuhriñuma erã. “Mua sã yaha pohere mohmerã waque,” arĩñumi erãre. Eropirã ïgu arĩdiro dopa ta ïgu ya pohere mohmerã wañuma.

<sup>8</sup> “Eropi ñamicague mohme duhurisubugue árícũ pohe opu ïgu mohmerãre coregure õpa arĩñumi: “Mohmerãre sihuque. Erã eracũ erãre wajayeque. Erã puhrugue mohmedorenirãre wajayemãhtaque. Erãre wajayetuha, gajirã sãre wajayetuha, yu mohmedoremãhtanirãre wajaye ojogorocãque,” arĩñumi ïgu. <sup>9</sup> Eropigu cinco árícũ mohmenuganirãre yujuse niyeruse wajayefñumi. <sup>10</sup> ïgu eropa wajayecũ ïarã, “Guare tauñariro wajayegucumi,” arĩ pepiriñuma ïgu doremãhtanirãpu. Erã sãre yujuropa ta wajayecãñumi. <sup>11</sup> Eropirã erãre niyerure ïgu wajayetuhajacũ erã opu mera papũri ïgure arĩñuma: <sup>12</sup> “Oã gua puhrugue mu mohmedorenirãpu yuju hora ta mohmeama. Guapu yujunã õaro mohmeneacarabu. Nero abe asiami guare. Gua eropa yoari boje mohmequerecũ ta gua puhrugue mohmenuganirã sãre yujuropa wajayecãbu muhu,” arĩ guañuma erã ïgu mera. <sup>13</sup> Erã eroparĩcũ peegu yujugu erã mera majagure pohe opu yuhriñumi: “Ne acaweregu, yujuse niyeruserẽ wajayegura, arĩrabu muare. Yu eroparĩcũ yuhriabu mua. Eropigu yu arĩdiro dopa ta muare wajayeabu yuhu. Queoro wajayeabu muare. Ne yajabirabu muare. <sup>14</sup> Eropigu yu wajayerare aĩ wihigue dujaaque. ïre puhru yu mohmedoredigu sãre muare yu wajayedirope ta wajayegura. <sup>15</sup> Yaha niyeru ãhraa i. Eropigu yu gamero dopa ta i mera wajayegura. ¿Gajirãre tauñariro yu wajayecũ ïhaturiri muhu?” arĩñumi ïgu pohe opu, arĩ weremi iri queorire Jesu.

<sup>16</sup> Eropa arĩgu werenemomi ïgu:

—I queori arĩro dopa ta yaharã árĩmãhtanirãre erã puhru yaharã árĩnirã sãre yujuro mera ogucumi Goãmũ ïgu ya õarire. Eropirã árĩmãhtanirãpu “Guare onemogucumi,” arĩmasibeama, arĩ weremi Jesu.

*Dipaturi Jesu ïgu sãriburiñere ïgu masa mũriaburiñere wereñumi  
Mr 10.32-34; Lc 18.31-34*

<sup>17</sup> Eropi Jerusalengue warã yujuro mera ta waniguirã, guare ïgu buherãre sihubeotuha, gajipugue guare gua seyarore aĩgãmi Jesu. Gua seyaro gua árícũ weremi.

<sup>18</sup> —Peeque yure. Dohpaguere Jerusalengue warã iiaa mari. Eroque yu masare Goãmũ ïgu obeodigure ñeha, gajirãre orãcoma. Pahia oparãre, masare buherã sãre yure orãcoma. Eropirã yure wejedorerãcoma erã. <sup>19</sup> Eropa wejedorerã judio masa árĩbirãre yure orãcoma. Erã eropa ora puhru erãpu yure wereya, tãrarãcoma. Tuhaja, crusague pabiarãcoma yure. Eropigu yu sãrira puhruere uhrenũ waboro gohra masa mũriaguca, arĩ weremi Jesu.

*Santiago, Ñu mera erã pago erãre serẽbasapo Jesure  
Mr 10.35-45*

<sup>20</sup> Eropigo Zebedeo marapo Santiago, Ñu igo porã mera Jesu pohrogue eja, merejapo ïgure serẽbo arigo.

<sup>21</sup> —¿Dohpa yu iicũ gahmeri muhũ? arĩpu Jesu igure.

—Muhũ opu ñajagu yu porã sãre dorerã acuque. Eropa acugu mu pẽuri erãre doboque, arĩ serẽpo igo igo porã mera.

<sup>22</sup> Jesu õpa arĩpu:

—Mua ñero tariborore masibiriquerẽ ta eropa serẽa mua. ¿Dohpaguere yu ñero tariboro dopa ta mua sã ñero tarirã yujuro bojebocuri mua? arĩpu Jesu igo porãre.

—Yujuro bojerãca, arĩ yuhriñorã Santiago Ñu mera.

<sup>23</sup> —Diaye ta ãhraa. Yu ñero taridiro dopa ta ñero tarirãca mua sã. Eropa mua tarimorã árĩquerecũ ta yu mera doremorãre muare yuhũ beyemasibea. Yu Pagupu amutuhami irire. Eropirã ïgu beyenirã dihta yu diayepure, yu copupure doarãcoma, arĩpu Jesu erãre.

<sup>24</sup> Eropirã gua gajirã diez ïgu buherãpu erã oparã árĩburire Jesure serẽcũ Santiago, Ñu sã mera guabu gua. <sup>25</sup> Gua eropa guacũ ïagu Jesu árĩpehrerã ïgu buherãre sihu gameneo, õpa arĩ weremi guare:

—Goãmure masibirã oparãpu masare dorerã, pũriro mera dorema.

<sup>26</sup> Mũapu eropa iisome mua basi. Mua mera majagu opu árĩdiagu, árĩpehrerã ïgu mera majarãre itamugu árĩporo. <sup>27</sup> Eropigu árĩpehrerãre doregu árĩdiagu pohro majagu iiro dopa ta árĩporo.

<sup>28</sup> Eropa árĩgu ta ãhraa yu sã. Masare dorebiragu arigu iibiribu. Yuhũ masũ Goãmũ ïgu obeodigu árĩqueregu ta i yebaguere masare itamugu arigu iibu. Eropigu bajarã masa erã ñero iira dipuwajare sĩribasagu arigu iibu. Eropigu masa peamegue wabonirãre taugu arigu iibu, arĩmi Jesu guare.

*Perã cuiri ïhajabirãre ïacũ iĩnumi Jesu*

*Mr 10.46-52; Lc 18.35-43*

<sup>29</sup> Eropi Jericógue árĩnirã gua wacũ bajarã masa Jesure nurũsiamã.

<sup>30</sup> Eropi Jesu ïgu tarigãcũ perã cuiri ïhajabirã ma tũro doanirã peema. Eropa peerã õpa arĩ gaguiniguinemoma:

—Opu Davi mũru pãrami, masare taubu, guare mojomoro ïaque, arĩ gaguinima.

<sup>31</sup> Erã eropa gaguiniguicũ masapu erãre turima.

—Ejarimaricãque, arĩma masa erãre. Erã eropa arĩquerecũ ta erã gaguiniguidiro tauro gaguiniguinemoma daja.

—Opu Davi mũru pãrami, guare mojomoro ïaque, arĩ gaguiniguima daja.

<sup>32</sup> Erã eroparĩcũ peegu Jesu nuãgaja erãre sihubeo serẽpimi,

—¿Dohpa yu muare iicũ gahmeri? arĩ serẽpimi.

<sup>33</sup> —Opu, guare ïacũ iique, arĩ yuhrimã erã.

<sup>34</sup> Erã eroparĩcũ Jesu erãre mojomoro ïami. Eropa mojomoro ïagu erã cuirire mohmepimi. ïgu eropa mohmepicũ ta erã õaro ïha wama. Eropa ïanirã ïgure nurũsia wahãma.

## 21

*Jerusaléngue ejañumi Jesu*

*Mr 11.1-11; Lc 19.28-40; Jn 12.12-19*

1 Eropi Jerusaléngue gúa ejaboro core Betfagé waïcæri macague ejamuhtanibu gúa Jesu mera. Betfagé utāgu Olivo waïcædigu gubuye árību. Erogue ejagu, guare perāre īgu buherā mera majarāre Jesu īgu core obeomuhtami. 2 Ōpa doremi erāre:

—Si macague waque. Erogue ejarā, mata burrore īgu magugā mera erā dirinugudigure bocajarāca. Erāre boca, īgure diriradarire pāa aīgāribasaque yare. 3 Múa eropa iicū īagu, burro opu “¿Duhpimorā burrore pāri mua?” īgu arīcū peerā ōpa arī yuhrique: “Mari tīgu burrore gamebeoniami dohpa. Eropigu dohparagā wiagucumi īgu,” arī yuhrique īgure, arīdore obeomi Jesu perā īgu buherāre.

4 Eropa iimi Goāmū yare weremuhtadigu īgu arī gojadiro dopa ta. Ōpa arī gojañumi iribojegue:

5 Jerusalén majarāre ōpa arī wereque: “Īaque mua. Múa Opu mua pohrogue ahrimi. Īgu ta masare ōaro iigu āhrimi. Burro magugā weca arigucumi,” arī wereque Jerusalén majarāre, arī gojañumi iribojegure.

6 Jesu īgu obeonirā perā iri macague eja, īgu iidoreldiro dopa ta iīñorā erā. 7 Burragore igo magugā sāre aīgārima. Aīgārituhaja gúa weca maja suhrire tuwea aī, erā weca peobū gúa. Gúa eropa iira pūhrū Jesu īgugā weca mūribejami wabu. 8 Mūribejatuha, īgugā weca Jerusaléngue wami. Īgu eropa aricū īarā masa bajarā īgu wari maha deco erā ya weca maja suhrire tuwea aī, sēopi muhtama Jesure umupeorā. Gajirāpu pūricūri dūpūrire mare apimuhtama “Īgu wari maha ōari maha arīporo,” arīrā. 9 Eropirā īgu core warā, īgu pūhrū nūrsiarā mera ōpa arī gaguiniguima:

—Davi mūru pāramire marire itamubure umupeorā. Ihī Goāmū īgu obeodigu ōaro arīporo. Ūmaro majagure “Turagu āhrimi,” arī umupeorā, arī gaguiniguima masa.

10 Eropirā Jerusaléngue erā eropa ejacū ero majarāpu īhamaria wama.

—Cue, ¿nihino āhriri ihī? arī game serēpima erā basi.

11 Gajirā masa yuhrima:

—Ihī Goāmū yare weremuhtagu Nazare majagu Jesu waïcægu āhrimi, arī werema erā masare.

### *Goāmū wihigue ejañumi Jesu*

*Mr 11.15-19; Lc 19.45-48; Jn 2.13-22*

12 Pūhrū Goāmū wihigue ejami Jesu gúa mera. Iri wihigue eja ñaja wami. Ñajaja masa duadoarāre asūrā sāre bocajagu erāre cohā wiucāmi iri wihigue. Eropigu niyerure game gohroto doarā ya mesarire yomemuju, aī majipi beomūrimi. Bujare duarā erā doari pērori sāre eropa ta iimi. 13 Eropa iigu ōpa arīmi:

—Goāmū yare erā gojarapū ōpa āhraa: Goāmū arīmi: “Yaha wihi Goāmū mera wereniguiri wihi waïcæroca,” arīmi Goāmū, āhraa īgu gojarapū. Mūrapū i wihire Goāmū wihire duadoarā game yajarā iiaa, arīmi īgu erāre.

14 Īgu eropa iira pūhrū cuiri īhajabirā, curimasibirā sā Goāmū wihiguere īgu pohrogue erama. Erā eropa eracū erāre ōarā dujacū iimi īgu. 15 Eropa ōarire īgu iicū īarā, pahia oparā, masare buherā sā guama īgu mera. Eropirā majirāgā sā Jesure, “Davi mūru pārami,

masare itamubu, turagu āhraa m̄h̄h̄,” erā arī umupeoc̄ peerā guanemoma dipaturi erā. <sup>16</sup> Eropa guarā ōpa arīma Jesure:

—¿Erā eroparīc̄ p̄ebeari m̄h̄h̄? Eropa arībiricāporo, arī dorema erā Jesure.

—Erā eroparīc̄ peea. ¿Goām̄ yare erā gojarap̄ure ire ne buhebiriri mua?

Majirāgāre Goām̄re ōaro umupeoc̄ iibu m̄h̄h̄, āhraa Goām̄ yare erā gojarap̄ū, arīmi Jesu erāre.

<sup>17</sup> Eropa arītuha erāre cōāgā, Betania waīc̄uri macague eja, iri ñamire ero arīmi.

*Jesu yucuḡure hīgueraḡure sīridoreñumi*

*Mr 11.12-14, 20-26*

<sup>18</sup> Gajin̄ boyorogue Jerusalēgue gua dujaac̄, oaboami Jesu. <sup>19</sup> Eropa oaboagu, ma t̄uro niguidigu hīgueraḡure īhanijagu, irigu d̄ucare omagu warimi. D̄uca maribu irigup̄. P̄uri dihta arību. D̄uca maric̄ īagu Jesu ōpa arīmi:

—Irigu yucuḡu ne dipaturi d̄ucac̄some, arīmi īgu.

Īgu eroparīc̄ irigup̄ mata ñaidija wab̄. <sup>20</sup> Irigu eropa wac̄ īarā, gua īgu buherā īhamaria wab̄.

—¿Duhpiro mata irigu ñaidija wahári? arī serēpibu Jesure.

<sup>21</sup> Jesu yūhrimi:

—Ire guñaque mua. Goām̄re ōaro guñatura umupeoque. “Diaye ta eropa ta iiḡucumi īgu,” arīrā, “Goām̄ iisome,” arībirā, yūhu irigure iidiro dopa ta iimasirāca mua s̄a. Eropirā irigure yū sīridoreldiro dopa ta tauro diasarire doremasirāca mua Goām̄re guñatura umupeorā. Irigu utāgu s̄are “Dua aī, w̄ariyague cōādigu arīporo,” Goām̄re mua arīc̄ irigu utāgu dija waroca. <sup>22</sup> Goām̄ irigu diague dijac̄ iiḡucumi. Goām̄re mua umupeoc̄,” Yū serēro dopa ta eropa waroca,” mua arī guñac̄, mua serēldiro dopa ta Goām̄ iiḡucumi, arīmi Jesu.

*Jesure dorediḡure serēpiñuma pahia oparā, masare buherā, m̄rā mera*

*Mr 11.27-33; Lc 20.1-8*

<sup>23</sup> Eropi Goām̄ wihiḡue dujaja buhemi īgu. Īgu eropa buhec̄ pahia oparā, masare buherā, m̄rā mera īgu pohrogue eraa serēpima:

—¿Noa doreri mera ire eropa iigu iiri m̄h̄h̄? ¿Noa m̄re Goām̄ wihiḡue arīnirāre cōādoreari? arī serēpima erā.

<sup>24</sup> Erā eroparīc̄ Jesu yūhrimi:

—M̄are yūhu s̄a serēpiḡura. Ōaro mua ȳre yūhric̄ yū s̄a m̄are yūhri gameḡura. <sup>25</sup> ¿Ñu masare īgu waīyec̄ noano īḡure waīyedorem̄riyuri mua pepic̄? ¿Goām̄ doreyuri? ¿O masap̄ dorem̄riyuri mua pepic̄? arī serēpimi Jesu erāre.

Īgu eroparīc̄ erāp̄ erā basi game wereniguima:

—¿Dohpa arī yūhrirāc̄uri mari? “Goām̄ Ñure doreñumi,” mari arīc̄, “¿Goām̄ Ñure īgu dorequerec̄ ta duhpirā īgu wererare p̄ebirari mua?” arībocumi Jesu marire. <sup>26</sup> Oā masap̄ “Diaye ta Ñu Goām̄ yare werem̄htadigu arīmi,” arī pepima erā. Erā eropa pepirā “Ñu īgu waīyec̄ Goām̄ īḡure dorebiriñumi,” mari arīc̄ peerā masap̄ guarācoma mari mera, arīma erā erā basi. <sup>27</sup> Erā eropa arī werenigui amura p̄h̄ru Jesure yūhrima erā.

—Ñure waïyedoredigüre gua masibea, arĩma erã.

Erã eroparĩcũ peegu õpa arĩmi Jesu:

—Irisubu tamerare yu sã mua serẽpirare werebeaa mũare. Yu iirire doregüre werebeaa mũare, arĩmi ĩgu erãre.

*Yujugu porã iira queorire wereñumi Jesu*

<sup>28</sup> ĩgu eropa arĩra pũhrũ Jesu queori moa werenemomi erãre:

—¿Dohpa arĩ pepirãcuri yu õpa arĩ werecũ? arĩmi Jesu erãre. Perã pagu arĩñumi. Tĩgũpũre õpa arĩñumi erã pagu: “Mahgu, pohegue mohmegu waque,” arĩñumi. <sup>29</sup> “Wabeaa,” arĩ yũhririñumi ĩgu magu negohrare. Eropa arĩqueregu ta pũhrũguere pohegue wadiariñe arĩyoro daja ĩgũre. Eropigu wañumi ĩgu. <sup>30</sup> Eropigu erã pagu ĩgu magu duhyagu pohrogue eja, ĩgu tĩgũre ĩgu arĩdiro dopa ta pohegue wadorerĩnumi. “Áũ,” arĩriñumi duhyagũpũ. Eropa arĩqueregu ta wabiriñumi ĩgu. <sup>31</sup> ¿Nihinopũ ĩgu pagu ĩgu dorediro dopa ta iiyuri? arĩ serẽpimi Jesu.

—Ĩgu tĩgũpũ iĩñumi, arĩ yũhrima erã.

Erã eroparĩcũ Jesu weremi:

—Mũare diaye arĩgu tĩaa. “Ñetariarã àhrima,” mua arĩnirãpũ Goãmũ opu ĩgu arĩroguere mua wabodiro arĩquerecũ ta erãpũ warãcoma. <sup>32</sup> Ñu waïyeri masũ buhegu arigu mũare “Õaro iirã arĩque,” arĩ wererimi. Eropa ĩgu werequerecũ ta ĩgũre peebiribũ mua. Eropirã ĩgu dorerire yũhribiribũ. Erã ñerã arĩnirãpũ wajasea corerãpũ, nome ñero iiricũnirãpũ ĩgũre peenirã arĩma. Erã eropa pee gohrotorare ĩabũ mua. Mua eropa ĩaquererã ta mũapũ ne gohrotodiabirabũ. Eropirã peebirabũ mua, arĩmi Jesu pahia oparãre, murã sãre.

*Ñerã mohme corerã queorire wereñumi Jesu*

*Mr 12.1-12; Lc 20.9-19*

<sup>33</sup> Eropi Jesu dipaturi ĩgu pepiri mera õpa arĩ queorire moa erãre buhenemomi:

—Gajisubu mũare werenigui queoriñere yu werecũ peeque daja, arĩmi. Yeba opu arĩñumi. ĩgu ya pohere iguidarire oteñumi. Otetuha, sãrĩrore nugu, iguire erã cũhra bujuburi gobere seañumi. Pohe decogue umari wihigã sãre iĩñumi ĩhadibumaja õaro. Eropigu gajirãre ĩgu ya pohe deco mera apiñumi erã mohme corera waja. Eropigu iri pohere erãre mohme coredoretuhaja gajĩ yebague waha wañumi ĩgu. <sup>34</sup> Iguĩ ñirisubu arĩcũ opu ĩgu pohro majarãre ĩgu ya pohe mohme corerã pohrogue obeoñumi. Pohe maja ĩgu oteri dũcare ĩgu ya sero maja dũcare aĩdoregu obeoriñumi. <sup>35</sup> Eropirã pohere mohme corerãpũ ĩgu pohro majarãre ñero iĩñuma. Yujugure turaro paa, gajigũre wejẽ, gajigũre utã mera deañuma. <sup>36</sup> Pũhrũ pohe opu dipaturi ĩgu pohro majarãre ĩgu obeomũtanirã tauñariro arĩri curu majarãre obeoriñumi daja. Eropirã pohere mohme corerã muraro ta iĩñuma erã sãre daja.

<sup>37</sup> “Eropigu ĩgu obeotudigu ĩgu magu arĩñumi. “Yu magũpũre umupeorãcoma,” arĩgu ĩgũre obeoriñumi. <sup>38</sup> ĩgu eropa arĩ pepiquerecũ ta pohere mohme corerã ĩgu magu ĩgu aricũ ĩarã, õpa arĩñuma: “Pohe opu magu ahrimi ĩgu. ĩgũre wejẽ cóãcãrã mari. Eropiro i pohe mari ya pohe dujaroca,” arĩriñuma erã basi. <sup>39</sup> Eropa arĩrã ĩgũre ñeha

pohe turogue aĩgã, wejẽcãñuma erã ĩgure, arĩmi Jesu erãre. Eropa arĩtuhaja Jesu erãre serẽpimi:

40 —¿Pohe opa arĩgu dohpa iĩgucuri ĩgu ya pohere mohme corerãre? arĩ serẽpimi Jesu pahia oparãre, mura sãre.

41 —Ĩgu gajirãre pohere mohme coremorãre gohrotogucumi. Arĩmũhtanirãre ñetarianirãre wejẽgucumi. ĩgure dũcare queoro wiamorãpũre mohmedoregucumi, arĩ yũhrima erã.

42 Erã eroparĩcũ Jesu werenemomi erãre:

—¿Goãmũ yare erã gojarapũ ire yũre ĩgu arĩ gojarare buhebiriri mũa?

Ihĩ Cristo utãye iro dopa ta aħrimi. Masa Cristore gamebirãcoma. Erã gamebiriquerecũ Goãmũ ĩgure beye opa acumi. Goãmũpũ irire iimi. ĩgu eropa iicũ ĩarã “Ōataria,” arĩ pepia mari, arĩ gojañuma iribojegure.

¿Iri ne buhebiriri mũa? 43 Eropĩgu mũare arĩgu tĩaa yũhũ. Goãmũ ĩgu dorerire iirã ĩgu õari orire opaboya mũa. Mũa iibiricũ ĩha gajirãpũre ogucumi Goãmũ. Gajirã masapũ ĩgu dorero dopa ta iirãcoma. 44 Yũre gamebirãpũ yũ dipuwaja moamorã ñero tarirãcoma, arĩmi Jesu pahia oparãre, mura sãre.

45 Iri pohe opa queorire ĩgu arĩcũ peerã, “Ĩgu iri queori mera ‘Ñerã mohme corerã iro dopa aħrima,’ marire arĩgu weresãgu iicumi ĩgu,” arĩ pepiñorã erã. 46 Eropa arĩ pepirã, ĩgure ñeadiariñorã oparãpũ. Masapũ Jesure umupeo “Goãmũ yare weremuhtadĩgu aħrimi ĩgu,” arĩmũriñorã erã. Erã eropa arĩrã arĩcũ pahia oparã sã masare gũirã, Jesure ñeabiriñorã.

## 22

### *Wũari bosenu queorire wereñumi Jesu*

1 Eropi dipaturi gajĩ queori mera erãre buhenũgami Jesu:

2 —Hmaro majagu ĩgu opa arĩri werediacũ i queori iro dopa aħraa. Yuju yeba majagu tauro opa arĩñumi. Eropĩgu ĩgu magu ya arĩburi bosenu iĩñumi. ĩgu mojoto diriri bosenu arĩyoro. 3 Eropĩgu opa ĩgu pohro majarãre bosenu ĩarã arimorãre sihudoregũ obeoriñumi. Erãpũ aridiabiriñuma. 4 Eropĩgu gajirãre sihudoregũ obeoriñumi daja ĩgu pohro majarãre. “Yũ sihubeorãre õpa arĩ wereque. ‘Mari baburire iituhama. Wecũare, wecũagã õaro diicũrãre wejẽ amutuhajama. Eropiro arĩpehreri bosenu majare iituhajama. Eropirã bosenu majare barã arique,’ arĩ wereque erãre,” arĩ obeoriñumi ĩgu opa ĩgu pohro majarãre. 5 Erã eropa werera pũhũ ĩgu sihubeonirã eropa pepicãñuma. Bosenure ĩarã wabiriñuma. Yujugu ĩgu pohegue waha, wañumi. Gajĩgu ĩgu mohmerire ĩagu wañumi. 6 Gajirãpũ ĩgu pohro majarãre erãre wererã eranirãre ñeha, erãre ñero iĩñuma. Eropii wejẽcãñuma. 7 Erã eropa iicũ peegu, opa gũa gũa. Gua, erã eropa wejẽra dipuwaja dipuwaja moadoregũ ĩgu surarare obeoñumi. Eropirã surara erãre wejẽpehocã, erã ya macare soecãñuma. 8 Erã eropa iira pũhũ, opa ĩgu pohro majarãre õpa arĩñumi: “Bosenu majare amutuharama. Yũ sihumũhtanirã yũ bosenure ĩabonirã aribeama. Ñerã aħrima erã. 9 Eropirã macare wari marigue mũa bocajarãre bosenure ĩamorãre sihuque,” arĩñumi



ĭġu ĭġu pohro majaräre. <sup>10</sup> ĭġu eroparĭcũ ĭġu pohro majarä marigue waha, árĭpehrerä erä bocajaräre, ñeräre, ðaräre wereñuma. Erä eropa sihura pũhrũ ejañuma erä bajarä. Õaro bosenu erä iiri taribure masa ũtuturitaria wañuma.

<sup>11</sup> “Ero erä doacũ opũũ yujugure mojoto diririnũ majañe suhriro sañabigũre ĭañumi. <sup>12</sup> “Ne, acaweregũ, ¿duhpigũ mojoto diririnũ majañe suhrirore sañabiriqueregũ ñajarari mũhũ?” arĭ serẽpiñumi opũ. ĭġu eropa serẽpicũ masũũ werebiriñumi. <sup>13</sup> ĭġu eropa werebiriñũ ĭagũ ĭġu pohro majaräre ðpa arĭñumi opũũ: “ĭre ñeha ĭġu mojtore direique. ĭġu guburi säre dirique. Dirituha aĩ wiria, disiporogue naitarogue ĭgure cóãque. Erogue ĭġu turaro ore, bujawererĩ mera ġũcũri cũridihugũcumĩ,” arĭñumi opũ, arĭ weremi Jesu.

<sup>14</sup> ĭġu eropa arĭra pũhrũ ðpa arĭtumi ĭġu:

—I queorĩ wadiro dopa ta Goãmũ bajarä masa ĭġu sihubeonirä árĭquererä ta bajamerägä ĭġu mera dujarãcoma, arĭ weretumi Jesu.

*Oparä ya wajare wajayeburire gajirä serẽpiñuma Jesure  
Mr 12.13-17; Lc 20.20-26*

<sup>15</sup> ĭġu eropa arĭra pũhrũ fariseo masa waha, ĭgure weresäburire erä basi weretamuñorä erä. Erä ĭgure baja serẽpiri mera eräre ĭġu gajiropa yũhrĩcũ weresãmorä iiriñorä. <sup>16</sup> Eropirä erä mera majaräre, Herode ya curu majarä säre, Jesure serẽpidorerä obeoñorä. Eräpũ ġua pohrogue eraa, Jesure serẽpima:

—Buhegũ, diaye werenigũgũ ġuyari marigũ mũ árĩcũ masia ġua. Eropigũ opũ árĩcũ säre bu árĩgũ ĭġu árĩcũ säre mũhũ yujuropa ĭhaa. Eropigũ Goãmũ yare diaye mũ werecũ säre ġua masia. Masa suacũ säre erä suabirĩcũ säre queoro werea. <sup>17</sup> Eropigũ ġware wereque. ¿Roma majarä árĭpehrerä tauro opũ árĩgure gobierno majare marire wajayero ġahmerĩ mũ pepicũ? ¿Mari doreripũ irire wajayedorerĩ? arĭ serẽpima Jesure.

<sup>18</sup> Jesupũ erä ĭgure ñero weresãdiarire masigũ ðpa arĭ yũhrimi:

—ġuyaricurä ähraa mũa. ¿Duhpirä yũ ñero werenigũcũ peediarĩ mũa? <sup>19</sup> Dohparagä niyerusere oparä yare wajayeburisere aĩrique. Irisere ĭarä, arĭmi ĭġu.

ĭġu eroparĩcũ peerä niyerusere aĩġarima erä. <sup>20</sup> Erä irisere aĩ eracũ ĭagũ ĭġu serẽpimi eräre:

—¿Nihino ġohra masũ waĩcũgũ tuhyari irisere? ¿Noa waĩ tuhyari? arĭ serẽpimi ĭġu.

<sup>21</sup> —César waĩcũgũ masa tauro opũ masũ ĭġu waĩ sã tuhyami iriseguere, arĭ yũhrima erä.

Erä eroparĩcũ peegũ Jesu weremi:

—Irisubũ tamera masa tauro opũ yare ĭgure oque. Goãmũ yare Goãmũpũre oque, arĭmi Jesu.

<sup>22</sup> ĭġu eroparĩcũ peerä, pee ũca wa, waha wama.

*Saduceo masa Goãmũ ĭġu sĭriniräre masurire serẽpiñuma Jesure  
Mr 12.18-27; Lc 20.27-40*

<sup>23</sup> Eropĩ irinũ ta yujuräyerĩ saduceo masa Jesure ĭarä erarä ġua pohrogue erama. Saduceo masa “Goãmũ sĭriniräre masusome,” arĭ pepirä árĩma. Eropirä ðpa arĭma erä ĭgure:

24 —Buhegu, òpa arí gojañumi Moise: “Yujugu ïgu tïgu marapocugu porã mariqueregu ta ïgu sïricũ ïgu pagu magure ïgu tïgu marapo áridigore marapocuro gahmea. Eropigu ïgu tïgu muru ïgu porãcubodiro dopa ta porãcuro gahmea ïgu pagu magure. Eropirã igo porã ïgu tïgu muru porã iro dopa ta árirãcoma,” arí gojañumi Moise, aríma erã saduceo masa.

25 Irire eropa arí weretuha i queorire werenemoma erã Jesure:

—Yujugu porã siete gohra áriñorã. Erã tïgupu marapocu, porã marigu ta sïria wapu. Eropigu gajigu ïgu pagu magu sã ïgu tïgu marapo áridigore marapocupu. 26 ïgu eropa marapocura puhru ïgu sã ïgu tïgu muru iro dopa ta porã mariqueregu ta sïria wapu. Eropigu ïgu pagu magu ïgu tïgu muru iro dopa ta porã mariqueregu ta sïria wapu. Eropia dihta wañorã yujugu porã gohra. Ne porã mariquererã ta sïripehrea wañorã erã. 27 Erã marapo sã erã puhru sïria wapo pare, arí òpa serëpima Jesure: 28 ¿Ne, Goãmu áripehrerãre ïgu sïrinirãre masucũ nihino marapo árigocuri igo? Erã siete áripehrerã igore marapocunirã áriñorã. ¿Eropigo nihino marapo gohra árigocuri igo? arí serëpima erã.

29 Jesu yuhrimi erãre:

—Goãmu yare erã gojarapũ wereniguirire ne masibea masa. Eropirã Goãmu ïgu turari sãre ne masibea masa. Eropiro mua pepiripu ne diaye áribea. 30 Sïrinirã erã masa muriaara puhru erã anyua iro dopa áhrima. Erã uma nome mera marapocubeama erogueru. 31 Sïrinirã mura erã masa muriaboropure weregura. ¿Goãmu iribojegue ïgu arĩrare ne buhebiriri mua? Òpa arĩñumi ïgu: 32 “Yuhu Abrahã, Isaa, Jacobo erã opu áhraa,” arí wereñumi Goãmu iribojegue. Erã sïrira puhrugue “Erã opu ta áhraa,” arí wereñumi Goãmu. Eropirã erã sïrinirã mura ïgu masunirã arĩrã erã ojocarirã áhrima, arĩmi Jesu.

33 ïgu eropa arí buhecũ peerã bajarã masa pee uca wama.

### *Ôatariariñere doreriñere wereñumi Jesu*

*Mr 12.28-34*

34 Eropi saduceo masa Jesure erã yuhrimasibiricũ peerã, fariseo masapu gua pohrogue gamenerema daja. 35 Eropigu erã mera majagu, masare buhegupu Jesu ïgu ñero aricũ peediagu guya serëpirimi ïgure.

36 —Buhegu, ¿Goãmu ya doreri ôatariaro doreripu diñe doreripu áhriri? arí serëpimi ïgu.

37 Jesu ïgure yuhrimi:

—“Burigã mua sïporã mera, mua turari mera, mua òaro guñari mera Goãmure mua Opure mahique,” arĩmi Goãmu. 38 Iñe doreriñe ôatariariñe áhraa. 39 Iñe doreriñe puhru gajiñe doreriñe sã ôataria: “Mu basi mahiro dopa ta mu pohro arĩrã sãre mahique,” arĩmi Goãmu. 40 Iñe peñe doreriñere iirã áripehreri gaji dorerire ipehorã iiaa mari. Goãmu yare weremũtanirã iribojegue erã gojara sãre iirã iiaa mari eropa iirã, arí weremi Jesu.

### *¿Noano acaweregu áhriri Cristo? arí serëpi ïañumi Jesu*

*Mr 12.35-37; Lc 20.41-44*

41 Eropi fariseo masa ero gamenererã erã aricũ Jesu erãre serëpimi:

42 —“Cristo mari Pagu ĩgu obeodigu āhrimi,” arāa m̄ua. ¿Nihino āhriri ĩgu ñecu iribojegue majagu, m̄ua pepicū? arīmi ĩgu.

—Cristo Davi muru p̄arami árĭgucumi, arī yuhrima erā.

43 Jesu weremi:

—¿Daviu Cristo ñecu árĭqueregu ta duhpigu opuc̄turiayuri Cristore? ¿Duhpigu eropa opuc̄doreyuri Esp̄iritu Santo ĩgure? Ōpa arīñumi Davi muru:

44 Goām̄u yu op̄are ōpa arīmi: “Ohō yu diayepu dorebu doaque. Eropigu m̄ure ĩhaturirāre m̄ure tarinugabasagura yuh̄u m̄u pohro majarā dopa árĭmorāre,” arīmi Goām̄u yu op̄are, arī gojañumi Davi muru.

45 Eropa arī gojagu ta Davi muru opuc̄ñumi Cristore. Cristo Davi muru opu āhrimi. ¿Eropigu Davi muru Cristo ñecu árĭqueregu duhpigu opuc̄yuri Cristore? arī weremi Jesu.

46 ĩgu eropa arī werecū erā ĩgure ne yuhrimasibirima. Eropirā iripēta serēpi duhucāma erā ĩgure. Eropirā ĩgure güirā dipaturi serēpi ĩabirima ĩgure pare.

## 23

*Masare buherā, fariseo masa sã erã ñero iirire wereñumi Jesu  
Mr 12.38-40; Lc 11.37-54; 20.45-47*

1 Eropi masa bajarāre gua sãre Jesu weremi daja.

2 —Masare buherā, fariseo masa sã Goām̄u doreri Moiseru ĩgu apirare wererā āhrima erā. 3 Erā eropa wererā árĭcū m̄ure erā dorerare ipehoque m̄ua. Eropa iiquererā ta erāre ĩhacūbircāque m̄ua. Erā buhero dopa ta iibeama erā. 4 Masare baja dorema erā bocatūbiririre. Eropa dorequererā ta erā dorero dopa ta masa erā iimasibiriquerecū ĩarā erāre itamubeama.

5 Masa erā ĩacū dihta ōaro ii ĩhmuma erā. Goām̄u yare erā gojarapūri erā duhsāri comogāre pagañari comogāre erā diaporire dirituma masare erāre ĩadorerā. Erā d̄uca sãre dirituma iri comogāre. Eropirā erā suhri sãre gajirā ya tauro yoari árĭriñe ahmu sañama, “Gua Goām̄ure umupeotaria,” arī ĩadorerā. 6 Eropirā bosen̄ari árĭcū oparā erā doarigue doadiama. Eropirā mari buheri wirigue sãre ōari doari dihtare doadiama erā. 7 Eropirā doberi duarogue gajirā ōaro umupeori mera erāre bocatūri serēcū gahmema erā. Erāre “Buhegu,” arī piyucū gahmema.

8 “M̄uar̄ure “Buhegu,” arī gajirā piyucū iibircāque. M̄ua árĭpehrerā yuju curu majarā āhraa. Eropigu m̄ure buhegu yuh̄u yujugu ta āhraa. 9 Eropirā i yeba majarāre “Mari pagu,” arīrā erāre umupeorā iica. Ne eropa arī iibircāque. Ūmaro majagu dihta mari Pagu āhrimi. ĩgu dihtare umupeoro gahmea marire. 10 Eropirā masure “Op̄u,” arĭbircāque. M̄ua opu yuh̄u Cristo yujugu ta āhraa. 11 Pohro majagu iro dopa m̄ure itamugu ĩgu ta árĭgucumi opu árĭbu. 12 Yujugu opu árĭdiagu docanugaja árĭcorecāro gahmea. Eropigu docanugagu “Bu árĭgu āhraa yuh̄u,” arī pepigu ĩgu ta árĭgucumi opu árĭbu, arī weremi Jesu.

*Judio masare buherā, fariseo masa mera erã ḡuyarire wereñumi Jesu*

13 ĩgu eropa arīra p̄uhr̄u erāre werenemomi:

—Múa masare buherã, fariseo masa sã ñero tarirãca. Gúyaricurã áhraa múa. Gajiropa múa arĩ buhecã peerãpũ Goãmũ ĩgũ opu árĩroguere wasome. Múa sã eroguere wasome. Eropa arĩ buherã eroguere wadiarãre cãhmotaa múa.

14 “Múa masare buherã, fariseo masa sã ñero tarirãca. Gúyaricurã áhraa múa. Wapeweyarã nome erã wajamocũ ĩha erã ya wirire emacãa múa erã nomere. Eropa erãre mojomoro ĩabiriquererã masa erã ĩhuro yoari boje Goãmũre serẽ ĩhmuraa múa masare. Múa eropa iira dipuwaja gajirã tauro dipuwaja moagũcumi mũare.

15 “Múa masare buherã, fariseo masa sã ñero tarirãca. Gúyaricurã áhraa múa. Wũariyague taribuja, yoaro maja macarigue wahaa múa múa dorerire ĩbure omarã. Múa dorerire ĩbure boca, ĩgũre buhea. Múa eropa iicũ ĩgũpũ múa tauro ñero ĩinũgagũcumi. Eropirã ĩgũre peamegũ wabu arĩcũ iiaa múa.

16 “Múa ñero tarirãca. Cuirĩ ĩhajabirã erã ĩhajabiro dopa ta masibirã áhraa múa. Eropa árĩquererã ta gajirãre buheraa múa. Ōpa arĩ buheraa múa: “Goãmũ wihi mera ĩigũra,” arĩ waĩpeogũ ĩgũ arĩdiro dopa ta ĩibiricũ ðaroca,” arĩ buheraa múa. “Goãmũ ya wihi maja oro mera ĩigũra,” arĩ waĩpeodigũpũre ĩgũ arĩdiro dopa ta ĩi ojogorocũro gahmea,” arĩ iri sãre buheraa múa. 17 Cuirĩ ĩhajabirã erã ĩhamasibiro dopa ta masibirã áhraa múa. Pee masibirã áhraa. ¿Dinopũre umupeoro gahmeri? Orore umupeobiricãro gahmea. Goãmũpũ iri orore ĩgũ ya wihi arĩcũ ðari iimi irire. Eropirã ĩgũ ya wihipũre umupeoro gahmea mũare. Eropiro múa buheripũ queoro wabeaa. 18 I sãre buheraa múa: “Goãmũ wihi maja mesa mera ĩigũra,” arĩ waĩpeodigũ ĩgũ arĩdiro dopa ta ĩgũ ĩibiricũ ðacãroca,” arĩ buheraa múa. “Īri mesa weca mari aĩgã apira ta mera ĩigũra,” arĩ waĩpeodigũpũre ĩgũ arĩdiro dopa ta ĩi ojogorocũro gahmea,” arĩ buheraa múa queoro buhebirã. 19 Cuirĩ ĩhajabirã erã ĩhamasibiro dopa ta masibirã áhraa múa. ¿Dipũ iri gohra áhriri múa pepicũ? Goãmũre masũ ĩgũ ora mũra iri gohra árĩbiriñaria. Iri mesa weca Goãmũre ĩgũ ocũ, ðari wahaa iri mesa weca árĩri. Eropiro iri mesa bu árĩri mesa árĩbeaa. Goãmũre erã ora weca tauro ðari mesa áhraa. 20 Eropigũ “Goãmũ wihi maja mesa mera ĩigũra,” yujugũ arĩ waĩpeogũ, iri mesa weca apira mera ĩgũ eropa arĩgũ iicumi. Eropiro múa buheripũ queoro wabeaa. 21 Goãmũ ĩgũ ya wihi majagũ áhrimi. Eropigũ “Goãmũ wihi mera eropa ĩigũra,” arĩ waĩpeogũ diaye ta Goãmũ waĩ mera eropa arĩgũ iicumi. 22 Goãmũ umaro majagũ áhrimi. Eropigũ “Umuro mera ĩigũra,” yujugũ arĩ waĩpeogũ, Goãmũ mera ta eropa arĩgũ iicumi. Eropiro múa buheripũ queoro wabeaa.

23 “Múa masare buherã, fariseo masa sã ñero tarirãca. Gúyaricurã áhraa múa. Bari suricũ ĩirisarire menta, anis, comina waĩcũrisarire aĩ deara pũhrũ diez quẽri iiaa. Eropa iira pũhrũ yujuquẽ ta aĩgã apia Goãmũ wihigue Goãmũ dorerire iimorã. Múa eropa iri dorerire ĩiquererã ta tauro ðaro ĩirire guñabeaa múa. Diaye ĩirire, mojomoro ĩarire, Goãmũre umupeorire ne guñabeaa múa. Dũcare múa aĩrare merogã Goãmũ wihire apicũ ðhaa. Eropa iirã ðpa ĩinemoque: Diaye ĩirire, mojomoro ĩarire, Goãmũre umupeorire ĩique. 24 Cuirĩ ĩhajabirã erã ĩabiro dopa ta diaye majare masibirã áhraa múa. Ōpa iiaa múa.

Mua dorerire iidorerā árīpehrerire ōaro iidiaa yujuñegā duhyaro mariro. Mua eropa iiquererā ñeripure duhubeaa.

<sup>25</sup> “Mua masare buherā, fariseo masa sã ñero tarirāca. Guyaricurā āhraa mua. Mua dorero dopa ta mua soroparire, mua ihriri parire mua coeweaa mua ōarire ii ihmurā. Eropa coequererā ta mua sīporāripure coebeaa. Eropirā mua árīricurire mua pepiripure ne ōarire gohrotobeaa. Gajirā yare yajadiarā, mua basi dihta pagarire aīdiarā árīrā, eropa dihta pepia mua. <sup>26</sup> Cuirī ihajabirā erā ihajabiro dopa ta masibirā āhraa mua fariseo masa. Mua pepirire gohrotomuhtaque mua. Eropirā ōaripure iique. Mua eropa iirā masa erā ihuro säre ōarā gohra árīrāca pare mua.

<sup>27</sup> “Mua masare buherā, fariseo masa sã ñero tarirāca. Guyaricurā āhraa mua. Masa comorore boreri mera erā sūhuma. Eropirā masa iri comorore erā ĩacũ ōari comoro dehyoa. Iri comoro eropa ōaro deyoquerecũ ta, poheca majague ĩgu boara gōariguere ĩaya mara. <sup>28</sup> Eropa ta mua sã masa erā ihabeoro ōarā dehyoa mua. Eropa ōarā deyorā mua árīquerecũ ta mua pepiriguere ñeri guyaricurā árītariacāa boanirā iro dopa, arī weremi Jesu.

*Judio masare buherā, fariseo masa säre ĩgu dipuwaja moaborore wereñumi Jesu*

Eropa arītuhaja ōpa arīnemomi daja:

<sup>29</sup> —Mua masare buherā, fariseo masa sã ñero tarirāca. Guyaricurā āhraa mua. Goāmu yare weremuhtanirā iribojegue majarā erā masa goberire ōaro amuraa mua. Eropirā iribojegue majarāre ōaro iinirā murare erā wéanugunirā murare ōaro amuraa mua. <sup>30</sup> Eropa iirā ōpa arī wereniguiraa mua: “Iribojegue mari ñecu sumará murague erā iidiro dopa guapu iibiriboya. Irisubugue árīnirāre Goāmu yare weremuhtanirāre guapu wejēbiriboya,” arī wereniguiraa mua. <sup>31</sup> Eropa arīrā árīrā, mua ñecu sumará mura Goāmu yare weremuhtanirā murare erā wejēnirā erā árīcũ wererā iica. Erā wejēnirā pāramerā mua árīri säre mua basi weresārā iica mua. <sup>32</sup> Mua ñecu sumará mura iidiro dopa ta ii ojogorocque.

<sup>33</sup> “Añaa iro dopa ñerā āhraa mua. Añaa porā iro dopa āhraa mua. Goāmu mua ñeri dipuwajare ĩgu peamegue ĩgu cóāboro core duhrimasibeeaa mua. <sup>34</sup> Eropigu Goāmu yare weremuhtarāre, gajirā masirāre, gajirā muare buhemorāre mua pohro obeogura. Yu eropa obeocũ muapu yujurāyeri erāre wejērāca. Gajirāre crusague pabiarāca. Gajirāre mua buheri wirigie tārāca. Erāre macari nucu nurusiarāca. <sup>35</sup> Mua eropa iirā árīpehrerā ñeri marirāre mua wejēra dipuwaja dipuwajacurāca. Abel murare Caín ĩgu wejēra dipuwajare dipuwajacurāca muapu. Árīpehrerā ĩgu puhru árīnirāre ōarāre erā wejēra dipuwaja säre dipuwajacurāca mua sã. Eropirā Goāmu wihi pohro waimurāre mua soeburi mesa pohro Zacariare mua acawererā mura wejēñorā. ĩgupu Berequias magu árīpu. Eropirā ĩgu säre erā wejēra dipuwaja dipuwajacurāca mua. <sup>36</sup> Diaye muare weregu ta iiaa. Erā árīpehrerāre erā wejēra dipuwaja dohpague majarā dipuwajacurācoma, arī weremi Jesu.

*Jerusalén majarāre burigā bujawereñumi Jesu*  
Lc 13.34-35

<sup>37</sup> Eropa arĩtuhaja ðpa werenemomi Jerusalén majaräre bujawere ĩagũ:

—Mũa Jerusalén majarã, mũa acawererã mũra Goãmu yare weremũntaniräre wejẽmurinirã árĩma. Eropirã Goãmu obeoniräre, utã mera deamũrinirã árĩma. Cãreña bũro igo igo poräre igo quẽdupũri mera igo coã oyaro dopa ta bajasuburi opadiarabũ mũare. Mũapũ irire ne yũre gamebirabũ. <sup>38</sup> Dohpaguere mũa árĩri maca cóãra maca árĩroca. <sup>39</sup> Diaye mũare arĩgu tĩiaa. Pũhrũgue dujarĩguca daja yũhũ. Eropa yũ dujaricũ ĩarã mũa yũre “Goãmu turari mera arĩgu ðaro arĩporo,” arĩrãca. Yũre mũa irire arĩboro core, dipaturi yũre ĩasome mũa, arĩmi Jesu.

## 24

*Goãmu wihĩ cóãra wihĩ árĩroca arĩñumi Jesu*

*Mr 13.1-2; Lc 21.5-6*

<sup>1</sup> Eropi Goãmu wihire Jesu ĩgu wiriara pũhrũ gua ĩgu buherã iri wihĩ maja wirire ĩarã,

—Ōatariari wiri ãhraa. ĩaque mu sã, arĩbũ gua ĩgũre.

<sup>2</sup> Jesu yũhrimi:

—I wihĩ majare dohpaguere ĩaraa mũa. Mũare weregu tĩiaa. I wihĩ árĩpehreri mũa ĩara i utã sã cohmopehrea waroca. Ne yujuye utãye dujasome, arĩmi ĩgu guare.

*I mũmũ pehreburiñere wereñumi Jesu*

*Mr 13.3-23; Lc 21.7-24; 17.22-24*

<sup>3</sup> Pũhrũ Olivo waĩcũdigũ utãgũgue eja, erogue doami Jesu. Ero ĩgu doacũ gua ĩgu buherã gua seyaro ĩgu pohrogue eja serẽpibũ.

—Wereque guare. ¿Dohpãrĩcũ eropa warocuri mu arĩdiro dopa waro? ¿Pehrerinũ coregã mu dujariboro coregã dohpa wanũgacũ ĩarãcuri gua? arĩ serẽpibũ gua.

<sup>4</sup> Jesu yũhrimi:

—Ōaro iiyuque mũa. Eropirã gajirã mũare erã guyarire peebericãque. <sup>5</sup> Bajarã masa “Cristo ãhraa yũhũ,” arĩ guyarã arĩrãcoma. Erã eropa guyacũ peerã bajarã masa Goãmu yare duhurãcoma. <sup>6</sup> Mũa pohrogã gajirã masa erã gamewejẽcũ peerãca mũa. Eropirã yoarogue majarã erã sã erã gamewejẽcũ peebeorãca. Eropa peequererã ta ne wũaro irire pepibiricãque. Eropa ta wamũhtaroca. Eropa wacũ pehreburiñũ duhyaniroca dohpa. <sup>7</sup> Irisubure yuju yeba majarã gajĩ yeba majarã mera gamewejẽrãcoma. Eropirã yujugũ opu yarã gajĩgu opu yarã mera gamewejẽrãcoma. Eropirã masa bajarã oa mera sirĩrãcoma. Gajirã dorecũ ñero tarĩrãcoma. Eropiro bajasuburi i yeba ñohmeroca. <sup>8</sup> Eropa ñero tariquererã i yeba majaräre tauro erã ñero tariboro duhyaa dohpa. Ñero tarinĩrãcoma dohpa.

<sup>9</sup> “Irisubure gajirã mũare ñeha ñero iidorerã orãcoma mũare gajirã oparäre. Erã eropa ocũ mũare wejẽrãcoma. Yaharã mũa árĩri dipuwaja árĩpehrerã mũare ĩhaturĩrãcoma. <sup>10</sup> Irisubure bajarã yaharã arĩnirã yũre cóãrãcoma. Eropirã erã mera majaräre Jesu yaräre erã ĩhaturĩrãcoma. Eropirã erã mera majarã erã arĩquerecũ ta eräre ñero ĩimoräre eräre orãcoma. <sup>11</sup> Irisubure bajarã “Goãmu yare

weremũhtarã áhraa,” arĩ guyarã árĩrãcoma. Eropirã bajarã masa erã guyarire peerã árĩrãcoma. <sup>12</sup> Irisubure ñetariaro iirãcoma masa. Eropirã erã mera majarãre mahinemosome. <sup>13</sup> Eropirã mũare erã ñero iiquerecũ ta mũare erã ñero iirare yujuro bojerã yare duhubiricũ Goãmu mũare taugũcumi. Eropigu ĩgu pohrogue mũare opagũcumi. <sup>14</sup> Eropiro i ðari buheri árĩpehrerogue i yebaguere erã wereburi buheri árĩroca. Goãmu ĩgu opu árĩrire árĩpehrerãre wererãcoma árĩpehrerã iri buherire erã masiboro dopa. Eropa werera pũru pehrerinũ nũgaroca.

<sup>15</sup> “Ñetariagu Goãmu yare goroweogu aribure weremuriñumi iri-bojegue Daniel mũru Goãmu yare weremũhtadigu. Irisubure ĩgu ñetariagu Goãmu wihigue ĩgu niguicũ ĩarãca mua. (Irire buhegu peeporo.) <sup>16</sup> Ero ĩgu niguicũ ĩarã, Judea yeba árĩrãpu utã yucugue oma duhriporo. <sup>17</sup> Irisubure masa ñero tarirãcoma. Eropirã yojaro mera duhrirã waporo. Irisubure erã wiri weca maja pũrigue árĩrã wihi pohecague erã yare aĩrã ñajabiricãporo. <sup>18</sup> Eropirã irisubure gajirã erã poerigue árĩrã erã ya suhrire wihigue árĩri suhrire aĩrã pihabiricãporo. <sup>19</sup> Irisubure nijiposã nome, erã porãre mihrirãre oparã nome sã mojomorocurã nome dujarãcoma. <sup>20</sup> Eropirã Goãmure ðpa arĩ serẽque: “Puhirõ arĩcũ gua judio masa soorinũ arĩcũ sãre gua oma duhriburinũ árĩbiricãporo,” arĩ serẽque mua Goãmure. <sup>21</sup> Irinãrire masa ñero tarirãcoma. I yebare ĩgu ĩhacũnugura pũru masa ñero tarimuriñuma. Iri eropa árĩquerecũ ta árĩpehreri pũriri erã ñero taridiro tauro ñetariaro tarirãcoma masa pehreburinũ coregãre. Eropa ñero erã tarira pũru, dipaturi eropa ñero tarisome i yeba pare. <sup>22</sup> Eropigu Goãmu irinãrire bajamenurĩgã arĩcũ iigucumi. ĩgu eropa iibiricũ ne yujugu masũ taribiribocumi. Eropigu ĩgu beyenirã erã tariborore bajamenurĩgã ñero tariburinãrire apigucumi Goãmu.

<sup>23</sup> Irisubure gajirãre pee masi ĩaque: “Īaque. Ohõ áhrimi Cristo,” erã arĩcũ erãre peebiricãque. “Ero áhrimi Cristo,” erã arĩcũ sãre peebiricãque. <sup>24</sup> “Cristo áhraa,” arĩ guyarã, “Goãmu yare weremũhtarã áhraa,” arĩ guyarã árĩrãcoma irisubure. Eropirã Goãmu ĩgu beyenirãre guyarã, erã deoro moarire ii ĩhmurãcoma. Goãmu yare erãre cóacũ ĩidiarã iirãcoma erã guyarĩ masa. <sup>25</sup> I árĩpehrerire weryumũhtaa mũare iri eropa waboro core. Eropirã ðaro pee masiyuque mua. <sup>26</sup> Gajirã masa mũare ðpa arĩcũ, “Masa marirogue áhrimi Cristo,” erã arĩcũ eroguerẽ ĩarã wabiricãque. Eropirã erã “Ohõ iri wihigue áhrimi ĩgu,” erã arĩcũ sãre erãre peebiricãque. <sup>27</sup> Yũhũ masũ Goãmu ĩgu obeodigu guñaña mariro dujarigũra. Bupu ĩgu miacũ umarore, abe mũririrogue, abe ñajarogue yojaro mera ĩgu miabeoro dopa ta eropa ta dujarigũra yũhũ. <sup>28</sup> Masa erã ñeri erã ĩniguirogue erogue Goãmu erãre erã ñeri dipuwaja dipuwaja moagũcumi erãre, arĩ weremi Jesu.

*Cristo i yebague ĩgu dujariborore wereñumi ĩgu*

*Mr 13.24-37; Lc 21.25-33; 17.26-30, 34-36*

<sup>29</sup> Eropigu guare werenemomi:

—Masa ñero erã tariranãri pũru abe umũ majagu, ñami majagu sã boyo duhurãcoma. Erã eropa wacũ necã dipu yuri dijariroca. Eropiro

umaro maja sã yeba sã burigã ñohmeroca. <sup>30</sup> Irisubu ta yuhũ masũ Goãmũ ïgũ obeodigũ yũ dehyoacũ masa ïarãcoma. Eropirã árïpehreri cururi majarã orerãcoma. Eropirã yũ turari mera, yũ gosesiriri mera, umaro maja imica curu weca i yebaguere yũ dujaricũ ïarãcoma masa. <sup>31</sup> Corneta busuroca. Eropigũ yaharã anyuare árïpehrero i yebaguere obeogura. Eropirã árïpehreroguere yaharãre yũ beyenirãre erã aĩ gameneorãcoma.

<sup>32</sup> “Higueragu irigũ waricurire masia mũa. Irigũ yucũgũ pũcũcũ ïarã, “Bojori merogã duhyaa,” arĩ masia mũa. <sup>33</sup> Eropa ta irigũ waro dopa ta masique mũa. I árïpehreri yũ arĩra eropa wacũ ïarã, “Cristo dujariboro merogã duhyaa,” arĩ masique mũa. <sup>34</sup> Diaye arĩgũ tiiaa mũare. Irisubu majarã erã siriboro core árïpehreri yũ arĩdiro dopa ta eropa waroca. Umaro i yeba sã pehrea waroca. <sup>35</sup> Yũ wereniguiripũ ne pehresome. Árïpehreri yũ arĩdiro dopa ta eropa waha ojogorocuroca.

<sup>36</sup> “Irinũre yũ dujariburinũre, iri hora sãre masibea yuhũ. Anyua sã irire masibeamã. Masa sã ne masibeamã. Yũ Pagũ dihta irire masimi.

<sup>37</sup> “Noé ïgũ árĩrasubu majarã erã arĩdiro dopa ta i yeba majarã yũ dujariboro coregã eropa ta árĩrãcoma. <sup>38</sup> Yeba miriboro core masa baha, ihri, iĩnumã. Eropirã mojoto diriĩnumã. Noé sã erã wuadiru dohodirugue erã ñajaboro core mũraro ta iimũririĩnumã masa. <sup>39</sup> Mata turaro deco ahri, guñaña mariro yeba miria wayoro. Masa sã miripehrea wañuma. Guñaña mariro ero miridiro dopa ta, yuhũ masũ Goãmũ ïgũ obeodigũ i yebaguere guñaña mariro dujarigũca. <sup>40</sup> Irisubure yũre umupeorãre beye gameneodoregũca. Eropigũ poheguere perã mohmerã árĩcũ yujugũre aĩrãcoma yũ mera árĩbure. Eropigũ gajigũ ero dujagũcumi. <sup>41</sup> Irisubure nome perã nome erã yujuro erã ojudũcare erã biurã árĩcũ yujugore aĩrãcoma. Eropigo gajigo ero ta dujagũcumo.

<sup>42</sup> “Óaro guñamasi coreque. Yuhũ mũa opũ yũ dujariburinũre ne masibea mũa. <sup>43</sup> Ire guñaque. Yajari masũ ïgũ wihigue ïgũ ñajaa ïgũ yajaborore wihi opũ masigũ, iri ñamire ïgũ carĩbiriboñumi yajari masũre coregũ. Eropigũ yajari masũre ïgũ ya wihire ñajaridorebiriboñumi. <sup>44</sup> Wihi opũ ïgũ ya wihire corero dopa ta mũa sã yũ ariburire core árĩque. Yuhũ masũ Goãmũ ïgũ obeodigũ i yebare dujarigũ guñaña mariro arigũca. Eropirã yahare eropa iiniguirã yũre coreque, arĩmi Jesu.

*Yujugũ mohme coregũ ïgũ opũre óaro umupeorire, gajigũ ïgũ óaro umupeobiriri sãre wereñumi Jesu*

*Lc 12.41-48*

<sup>45</sup> Eropi Jesu ópa arĩ queorire moami buhenemobu:

—Mohme coregũ ïgũ opũre umupeogũ pee masigũ ópa ta aħrimi. Opũ curigũ wagũ, mohme coregũre ïgũ wihire apimi. ïgũ apigũpũ doregũ árĩgũcumi. Eropigũ barisubu árĩcũ mohme coregũ gajirã mohmeri masare barire gueremi. <sup>46</sup> Eropigũ opũ ïgũ ya wihi dujarami. ïgũ dujaracũ ïagũ mohme coregũ ïgũ opũ ïgũ dorediro dopa ta iipehogũ árĩgũ, mucubirigũ árĩgũcumi. <sup>47</sup> Diaye mũare arĩgũ tiiaa. ïgũ eropa iicũ ïagũ ïgũ opũ árïpehreri ïgũ yare ïhadibugũ apigũcumi ïgũre. <sup>48-49</sup> Ñegũ mohme coregũpũ ópa ta aħrimi. “Yũ opũ yoja deyobeami,” arĩgũ, gajirã mohme corerãre paa, wũaro



baha, ihri, mererā mera meregucumi. <sup>50</sup> Īgu eropa iirisubu ĭgu opu guñaña mariro dujaragucumi. Īgu dujararinure ne masibeami mohme coregu. <sup>51</sup> Eropa dujaragu ñegū ĭgu iirare pee ĭgure turaro dipuwaja moagucumi. Eropigu gūyaricurā erā warogue ĭgure cóāgucumi. Eroguere ĭgu turaro ore, bujawereri mera ĭgu gūcari cūridihugucumi, arīmi Jesu.

## 25

### *Diez nome ira queori mera buheñumi Jesu*

<sup>1</sup> Eropi Jesu dipaturi ōpa arī queorire weremi buhenemogu daja:

—Ūmaro majagu ĭgu opu arīri diez nome erā wadiro dopa āhraa: Diez nome arīñuma. Yuju ñami erā, erā sihāgori dipuru mera mojoto diridigure bocatīrirā wañuma. <sup>2</sup> Erā mera majarā nome cinco nome pee masibirā nome arīñuma. Gajirā nomepu cinco nome pee masirā nome arīñuma. <sup>3</sup> Pee masibirā nomepu erā sihāgori dipurure uyū dicari dipurure aīquererā erā gohrotoburire aīabiriñuma. <sup>4</sup> Pee masirā nomepu erā sihāgori dipurure dicari dipurure aī gaji uyū dipuru säre erā gohrotoburire aīañuma. <sup>5</sup> Eropirā mojoto diridigu ĭgu yoja deyobiricū erā nome waja pūricū carīa wañuma. <sup>6</sup> Eropiro ñami deco gaguinigu carīñumi: “Peeque, mojoto diridigu arigu carimi. ĭgure bocatīrirā arique,” arī gaguinigu carīñumi. <sup>7</sup> Īgu eroparīcū peerā erā nome wahgā, erā sihāgori dipurure amuñuma. <sup>8</sup> Eropirā pee masibirā nomepu, gajirā nomere pee masirā nomere ōpa arīñuma: “Gua sihāgori dipuru yariro iiaa. Eropirā merogā mua ya uyare oque guare,” arī serēriñuma erā nome. <sup>9</sup> Erā eropa arī serēquerecū ta pee masirā nomepu ōpa yuhriñuma: “Gua ya uyū muare ocū arīpehrerāre sihajabiriboca. Eropirā uyū duarā pohro mua basi asūrā waque,” arī yuhriñuma pee masirā nomepu. <sup>10</sup> Eropirā pee masibirā nome asūrā wañuma. Erā eropa wara puhru mojoto diridigu erañumi. ĭgu eracū ĭha, erā amutuhanirā nome pee masirā nome ĭgure bocatīriñuma. ĭgu mojoto diriri bosenugue ĭgu mera ĭarā wañuma. Eropirā erā bosenu erā iri wihigue ñajara puhru, disiporore biacāñumi. <sup>11</sup> Puhrugue pee masibirā nomepu erariñuma. “Opu, guare pāgūque,” arīriñuma erā nome. <sup>12</sup> “Diaye muare arīgu tiiaa. Muare masibea yuh,” arīñumi ĭgu erā nomere.

<sup>13</sup> Yu dujariburinure iri hora säre ne masibea mua. Eropirā pee masirā nome erā yare ōaro amutuha erā corediro dopa ta ōarā, ñeri marirā āhri coreque mua sā, arī weremi Jesu.

### *Niyeruseri oseri queorire wereñumi Jesu*

<sup>14</sup> Eropa arī weretuha ōpa arī queorire moa buhenemomi daja gua säre:

—Īrisubu ya dujariburinū ĭgu wihi opu iidiro dopa arīroca. Wihi opu arīñumi. ĭgu gajipugue curigu wagū, ĭgure mohme corerāre sihubeoñumi. Eropigu erāre ĭgu yare coredoreñumi. <sup>15</sup> Eropa coredoregu erā dibu masiopē erāre niyeruserire wajapagariserire oñumi. Yujugare cinco mil seri oserire oñumi. Gajigure pe mil seri oñumi. Gajigure yuju mil seri oñumi. Erāre otuha waha wañumi. <sup>16</sup> Eropigu cinco mil seri ĭgu odigu mata iriseri mera gajinore asūñumi. ĭgu asūra mera duagu gaji cinco mil seri wajatanemoñumi

ĩgu. Eropigu diez mil seri mera dujañumi. <sup>17</sup> Eropigu pe mil seri ĩgu odigu mata ĩgu ora pũhrũ ta iriseri mera gajinore asũñumi. ĩgu asũra mera duagu gaji pe mil seri wajatanemoñumi. Eropigu wapicũri mil seri opañumi. <sup>18</sup> Yuju mil seri ĩgu odigupũ gobe seha, iri gobegue dibuñumi iriserire dibugũ.

<sup>19</sup> “Pũhrũ yoara pũhrũ erã opu goerañumi. Eropa eragu ĩgu niyuseri mera erã wajatanemorare queobu ĩgure mohme corerãre sihubeoñumi. <sup>20</sup> Eropigu cinco mil seri ĩgu odigu ĩgu opu pohrogue eja, diez mil seri wiañumi ĩgure. “Cinco mil seri yũre ohabũ muhũ. ĩañatagu. Iriseri mera gaji cinco mil serire wajatanemoabũ,” arĩñumi ĩgure. <sup>21</sup> “Õaro iiaya muhũ. Muhũ ðagu yũ dorediro dopa ta iidigu ãhraa. Eropigu dohpaguere wũaro mũ mohmeborore apigũra. Eropigu yũ mera mucubirique,” arĩñumi ĩgu opu ĩgure. <sup>22</sup> Eropigu pe mil serire aĩdigũ sã ĩgu opu pohrogue eja, wereñumi ĩgure: “Pe mil seri yũre ohabũ muhũ. ĩañatagu. Iriseri mera gajiseri pe mil seri wajatanemoabũ,” arĩñumi ĩgu. <sup>23</sup> “Õaro iiaya muhũ. Muhũ ðagu yũ dorediro dopa ta iigu ãhraa. Merogãre ðaro iiaya muhũ. Eropigu dohpaguere wũaro mũ mohmeborore apigũra. Eropigu yũ mera mucubirique muhũ,” arĩñumi ĩgu opu.

<sup>24</sup> “Eropigu yuju mil serire aĩdigupũ, ĩgu opu pohrogue eja, wereñumi ĩgure: “Opũ, muhũ turaro mohmedoregũ ãhraa. Eropigu gajirãre mohmedorequeregũ oteri moogu arĩqueregũ ta mũ dihta iri ðucare aĩa. <sup>25</sup> Muhũ eropa arĩgu arĩcũ mũre gũiabũ. Eropa gũigu gobe seha, iri gobegue mũ niyuserire dibucãbũ. ĩañatagu. Ohõ ãhraa mũ ya niyuseri,” arĩñumi ĩgu ĩgure. <sup>26</sup> “Muhũ ñegu butagu ãhraa. Yũre, ‘Muhũ gajirãre mohmedorequeregũ mũ dihta iri ðucare aĩa,’ arãa muhũ yũre. <sup>27</sup> ¿Muhũ yũre eropa arĩqueregũ ta, duhpigu yũ óraserire niyeru diburi wihigue dihbirari muhũ? Mũ erogue dibugũ iriseri mera wũaro wajatanemoboaya. Irire muhũ iicũ dujaragu wajatanemoboaya yũhũ,” arĩñumi opu ĩgure. <sup>28</sup> Eropa arĩgu gajirã ĩgure mohme corerãre doreñumi ĩgu: “Niyuserire emaque ĩgure. Diez mil seri opagupũre oque. <sup>29</sup> Arĩpehrerã baja oparãre onemogũra. Moorãpũre merogã erã opaquerecũ ta erãre emapehocãgũra. <sup>30</sup> Ihĩ mohme coregũ duhpibu arĩbeamĩ. Naitĩarogue ñerogue cõacãque ĩgure. Erogue ĩgu turaro ore, bujawereri mera ĩgu gũcũri cũridihugũcumi,” arĩñumi opu, arĩ weremi Jesu.

### *Dipuwaja moaborore wereñumi Jesu*

<sup>31</sup> Eropi Jesu werenemomi:

—Yũhũ masũ Goãmũ ĩgu obeodigu arĩpehrerã anyua mera doregu dujarigũca. Eropa dujarigu opu doarogue yũ gosesiriri mera doagũca. <sup>32</sup> Eropa yũ doacũ, yaharã anyua i yeba majarãre arĩpehrerãre yũ pohro gameneorãcoma. Erãre gameneora pũhrũ pe curu ðaca wagũra erãre. Oveja ĩhadibugũ ĩgu iiro dopa ĩgu cabrare ĩgu ðaca waro dopa ta masare ðaca wa dobogũra. <sup>33</sup> Eropa ðaca wagu oveja dopa arĩrãre ðarãre yũ ðiayepũ dobogũra. Eropigu cabra dopa arĩrãre, ñerãre yũ copupũ dobogũra. <sup>34</sup> Yũ eropa iira pũhrũ yũhũ arĩpehrerã tauro opu yũ ðiayepũ doarãre õpa arĩ weregũra: “Yũ Pagũ mũare ðaro iigũcumi. I yebare ĩhacũnugudigũgue ta mũa ya arĩburire ĩgu opu arĩrore amuyutuhami Goãmũ. Eropirã dohpaguere ĩgu amuyudiroguere arĩrã

arique. <sup>35</sup> Yũ oaboacũ ãarã mũa yũre barire obu. Yũ ñemesibucũ mũa yũre tiabũ. Mũa pohro yũ curicũ yũre ãha masibiriquerẽ yũre ãaro bocatĩribũ mũa. <sup>36</sup> Suhri marigũ yũ áricũ ãarã muarũ yũre suhrire sãbũ. Dorecũcũ mũa yũre ãarã aribũ. Peresu yũ áricũ sãre yũre ãarã aribũ,” arĩgũra ãarãre. <sup>37</sup> Yũ eroparĩcũ peerã ãarãpũ yũre serẽpirãcoma: “Opũ, ¿dohpãricũ mũa oaboacũ mũre barire ori gua? ¿Dohpãricũ mũa ñemesibucũ mũre tiari gua? <sup>38</sup> ¿Dohpãricũ mũre ãha masibiriquerẽ ãaro bocatĩriri gua? ¿Dohpãricũ mũa suhri marigũ mũa áricũ mũre suhri sãri gua? <sup>39</sup> ¿Dohpãricũ mũa dorecũcũ o peresugue mũa áricũ sãre mũre ãarã ejari gua?” arĩrãcoma yũre. <sup>40</sup> Erã eropa arĩ serẽpicũ peegu yũhũ ãpa erãre yũhrigũca: “Diaye mũare arĩgũ tiãaa. Oã yaharã mera majagũ bu arĩgũ arĩquerecũ ta, mũa ãgũre eropa ta ãaro iibũ. Eropa arĩgũre eropa iirã, yũre iiro dopa iirã tiãaa mũa,” arĩ werẽgũra erãre.

<sup>41</sup> “Õarãre yũ eropa arĩ werera pũhrũ, copũpũ arĩrãre ñerãre yũ arĩpehrerã tauro opũ ãpa arĩgũra: “Goãmũ ãgũ dipuwaja moamorã ãhraa mũa. Yũ mera dujabiricãque. Peamegue waque mũa. Iri peame ne yaribea. Watĩ, ãgũ yarã anyua sã erã arĩborore iri peamere iimi Goãmũ. <sup>42</sup> Yũ oaboacũ mũa yũre barire obiribũ. Yũ ñemesibucũ mũa yũre tiabiribũ. <sup>43</sup> Mũa pohro yũ curicũ yũre masibirã bocatĩribũ. Eropa ãacãbũ. Suhri marigũ yũ arĩquerecũ ta, yũre suhri sãbiribũ mũa. Dorecũgũ yũ áricũ, peresu yũ áricũ sãre eropa ãacãbũ mũa yũre,” arĩ werẽgũra erãre ñerãre. <sup>44</sup> Yũ eroparĩcũ peerã erã yũre serẽpirãcoma: “Opũ, ¿mũa oaboacũ, mũa ñemesibucũ, gua masibigũ mũa áricũ, suhri marigũ mũa áricũ, dorecũgũ mũa áricũ, peresugue mũa áricũ, dohpãricũ gũarũ mũre itamubiriri?” arĩ serẽpirãcoma yũre. <sup>45</sup> Erã eropa arĩ serẽpicũ yũhũ erãre ãpa arĩ werẽgũra: “Diaye mũare arĩgũ tiãaa. Oã yaharã mera majagũre bu arĩgũre mũa ne itamubiribũ. Eropa arĩgũre mũa itamubirã, yũre ta itamubeaa mũa,” arĩ werẽgũra erãre. <sup>46</sup> Eropigũ erãre eropa dipuwaja moanigũicãgũcumĩ Goãmũ. Erã eropa dipuwajacũri ne pehresome. Eropirã ãarãpũ umũri nũcũ ãaro arĩrãcoma, arĩ weremi Jesu.

## 26

*Pahia oparã, mũrã mera Jesure wejẽdiañuma*

*Mr 14.1-2; Lc 22.1-2; Jn 11.45-53*

<sup>1</sup> Iri arĩpehrerire ãgũ buhera pũhrũ Jesu gũare ãgũ buherãre weremi:

<sup>2</sup> —Penũ pũhrũ Pascua arĩroca. Irire mũa masia. Irisubure yũhũ masure Goãmũ ãgũ obeodigure ñearãcoma. Ñeha yũre crusague wejẽrãcoma, arĩmi ãgũ gũare.

<sup>3</sup> Irisubu ta pahia oparã, mũrã sã gamenereñorã. Caifa pahia opũ ya wihi gamenereñorã erã. <sup>4</sup> Ero gamenere, erã gũyari mera Jesure ñeha erã wejẽburire game weretamurã iĩñorã.

<sup>5</sup> —Bosenũ áricũ ãgũre ñeabiricãrã. Masa gua ãgũre ñeacũ ãarã gua gamenerenijarã gamequeãbocoma, arĩrã iĩñorã erã erã basi.

*Nomeo poresuri mera Jesure pipeopo*

*Mr 14.3-9; Jn 12.1-8*

<sup>6</sup> Irisubure Simo cami boadigu ya wihi árîmi Jesu. Gûa sã árîbũ. Ígu árîri maca Betania waïcûri maca árîbũ. <sup>7</sup> Iri wihi ígu baro watope yujugo nomeo poresuri aĩgãri, Jesu dipuru weca pipeomo. Iri poresuri alabastro waïcûdiru dicuri deco, igo pipeori deco wajapagari deco árîbũ. <sup>8</sup> Igo eropa pipeocũ íarã gûa Jesu buherã guarã òpa arĩnũgabũ: —¿Duhpigo igo irire eropa iisirimaacãri? <sup>9</sup> Iri poresurire du-aboãũmo. Eropa duago wũaro niyerure wajataboãũmo. Eropa wajatago,mojomorocũrãre iri niyerure oboãũmo, arĩbũ gûa ígu buherã.

<sup>10</sup> Gûa eroparĩcũ íagu, Jesu guare weremi:

—¿Duhpirã eropa arĩri mũa igore? Yũre òaro iigo iimo.

<sup>11</sup> Mojomorocũrãpũ mũa mera eropa árĩniguirãcoma. Eropirã mũa erãpũre omasia. Yũpũ i yebare mũa mera eropa árĩniguisome. <sup>12</sup> Yũre erã yaaboro core yũ dũpũre amuyugo, poresuri mera sũhumo yũre. <sup>13</sup> Eropigu diaye ta mũare arĩgu iiaa. Árĩpehrero i yebaguere òari buherire erã wererogue igo òpa iirare wererãcoma. Erã eropa werecũ peerã masa bajarã igore guñarãcoma, arĩ weremi Jesu guare.

*Juda Iscariote Jesure ìhaturirãre ígu ìhmuburire erã mera wereta-muñumi*

*Mr 14.10-11; Lc 22.3-6*

<sup>14</sup> Irisubure yujugũ gûa mera majagũ Juda Iscariote pahia oparã pohrogue eja. <sup>15</sup> Eja, erãre serẽpipũ.

—¿Jesure mũare yũ ìhmucũ dipẽ wajayerãcuri yũre mũa? arĩ serẽpipũ erãre.

Ígu eroparĩcũ, erã ígure treinta seri plataserire oñorã. <sup>16</sup> Erã eropa ocũ Judapũ Jesure ígu ìhmuburinũre corenipũ.

*Jesu ígu buherã mera ígu baturinũ árĩyoro*

*Mr 14.12-25; Lc 22.7-23; Jn 13.21-30; 1Co 11.23-26*

<sup>17</sup> Eropi bũgabiriri panre erã baburinũ bosenu árĩnũgarinũ árîbũ. Eropirã gûa Jesu buherã ígu pohrogue waha serẽpibũ ígure:

—¿Nohonogue bosenu mari baburire amudoregu obeori mũhu guare? arĩbũ ígure.

<sup>18</sup> Gûa eroparĩcũ ígu guare weremi:

—Jerusaléngue waque. Ero mũa bocagũre òpa arĩ wereque: “Marire buhegu mũre òpa arĩ weredoreami: ‘Yũ ñero tariboro merogã dũhyanijaa. Pascua árĩcũ yũhu, yũ buherã mera mũ ya wihi gûa barãca,’ arĩ weredore obeomi guare,” òpa arĩ wereque iri wihi opũre, arĩ obeomi Jesu guare.

<sup>19</sup> Eropirã guare ígu dorediro dopa ta iirã, Pascua árĩcũ gûa baburire amubũ gûa.

<sup>20</sup> Eropi iri ñamire gûa mera doce ígu buherã mera bagũ árîmi Jesu.

<sup>21</sup> Gûa barisubũ ígu guare weremi:

—Diaye ta mũare arĩgu iiaa. Yujugũ mari mera majagũ ta yũre ìhaturirãre ìhmugũcumĩ yũre, arĩ weremi ígu guare.

<sup>22</sup> Ígu eroparĩcũ peerã gũapũ bũrigã bũjawererã, ígure serẽpinũgabũ gûa yujurãyeri.

—Opũ, ¿yũ àhriri mũre ìhmubu? arĩ serẽpibũ.

<sup>23</sup> Gûa eropa arĩ serẽpicũ ígu yũhrimi:

—Yũ baripare yũ mera yoso bagu ta āhrimi yũre ihaturirāre ihmubu. <sup>24</sup> Iribojegue erā yũre arī gojadiro dopa ta yũhũ masũ Goāmũ ĩgu obeodigu sīrigũca. Yũre ihaturirāre ihmudigũpũ ñetariaro tarigũcumi. Eropiro ĩgũpũre ĩgu masa dehyoabiricũ ōaboya. Ñero taribiriboñumi, arīmi Jesu.

<sup>25</sup> ĩgu eroparĩcũ ĩgũre ihaturirāre ihmubu Juda ĩgũre serēpimi:

—Buhegu, ¿mũre ihmubu āhriri yũhũ? arī serēpimi ĩgu.

—Ū u. Mũhũ ta āhraa, arīmi.

<sup>26</sup> Eropa arī weretuhaja gũa barisubu Jesu panre aĩ, Goāmũre “Ōhaa,” arīmi. Eropa arĩtuha irire nuha gũare ĩgu buherāre gueremi. —Ire aĩ, baque. I yũ dũpũ āhraa, arīmi ĩgu.

<sup>27</sup> Eropa arĩtuha ĩgu ihriripare aĩ, Goāmũre “Ōhaa,” arī, gũare omi.

—Mũa árĩpehrerā ire ihrique. <sup>28</sup> I yũ di āhraa. Bajarā ñero erā iirare cóabu sīrigũca. Eropigũ yũ di cóagũca. Eropa sīrigũ Goāmũ yũ Pagũ “Masare ōaro iigũra,” ĩgu arĩdiro ii ojogorocũgũca. <sup>29</sup> Mũare arĩgu tiiaa. Yũ Pagũ ĩgu opũ arĩrogue mũa mera igui deco mama decore ihrigũca. Mari erogue ihriboro core i igui decore dipaturi ihrinemosome yũhũ, arīmi Jesu gũare.

*Pedro “Jesure masibea,” ĩgu arī gũyaburiñere wereñumi Jesu*

*Mr 14.26-31; Lc 22.31-34; Jn 13.36-38*

<sup>30</sup> Eropirā yujuñe Goāmũre bayariñere bayatuhajarā wiriabu. Ūtāgu Olivo waĩcũdigũgue wabu gũa. <sup>31</sup> Erogue gũa ejacũ Jesupu gũare weremi:

—Dohpagā ñami mũa árĩpehrerā yũre cóagārāca. Mũa yũre cóaborore ōpa ta arī gojañuma Goāmũ yare erā gojarapũ: “Ovejare ihadibugũre erā wejēcũ iigũca. Yũ eropa iicũ oveja ĩgu yarā ĩgũre cohāgā wasiria warācoma,” arī gojañuma. <sup>32</sup> Eropigũ Goāmũ yũre ĩgu masura pũhrũ mũa core Galileague wamũhtagũca, arīmi ĩgu.

<sup>33</sup> ĩgu eroparĩcũ peegu Pedro ōpa arĩrimi:

—Yũ mera majarā árĩpehrerā erā mũre cóagāquerecũ ta yũpũ mũre ne cóāsone, arīmi ĩgu.

<sup>34</sup> Jesu yũhrimi:

—Diaye arĩgu tiiaa mũre. Dohpagā ñami cāreña ĩgu wereboro core uhresubu “Yũhũ Jesure masibea,” arĩgũca mũhũ, arīmi ĩgu Pedroro.

<sup>35</sup> ĩgu eropa arĩquerecũ ta Pedro ōpa arī yũhrimi:

—Mũ mera yũre erā wejēquerecũ ta, “Jesure masibea,” ne arĩsome yũhũ, arī yũhririmi Pedro.

Eropirā gũa sã gajirā ĩgu buherā Pedro ĩgu arĩro dopa ta arĩribũ gũa Jesure.

*Getsemanĩgue Goāmũre serēñumi Jesu*

*Mr 14.32-42; Lc 22.39-46*

<sup>36</sup> Eropi Getsemanĩ waĩcũri gorogue Jesu gũa ĩgu buherā mera waha, erogue eja, gũare arīmi:

—Ohõ doayuque. Mũa ohõ doaropē sohõgue Goāmũ mera wereniguĩgu wagũ iiaa, arīmi ĩgu gũare.

<sup>37</sup> Eropa arĩtuha Pedroro, perā Zebedeo porāre, erā uererāre sihugāmi. Eropigũ ĩgu turaro bujawere, ñero siporācũpũ. <sup>38</sup> Eropa bujaweregu ĩgu mera majarāre ĩgu sihugānirāre arĩpũ:

—Buriḡã ñero sīporācua yuhũ. Yũre turaro pũriro dopa ta pepiḡu iiaa. Sohõñari wanigũ iiaa. Ohõ dujanique mua. Eropirã yũ mera ta tũyũque mua sã, arĩpũ ãḡũ erãre.

<sup>39</sup> Eropa arĩtuha ero core merogã wanemo, yeba mereja, Goãmũre arĩpũ:

—Ahũ, yũ ñero tariburire iidiabigũ iibiricãque. Yũ eropa arĩquerecũ ta yũ gamero dopa iibita. Mũpũ masia. Mũ gamero dopa iique, arĩpũ ãḡũ Goãmũre.

<sup>40</sup> Eropa arĩtuha, urredã ãḡũ buherã pohrogue eranijagũ erã carĩ oyarãre ãpũ. Erãre ãḡũ Pedrose õpa arĩpũ:

—¿Yuju hora gohra yũ mera ta tũyũtamubirari? <sup>41</sup> Ōaro iique mua. Mua pepiri mera õarire iidiaraa mua. Mua seyaro irire iidiaquereã ta irire bocatũbeaa. Eropirã Goãmũre serẽniguique ñero mua iibiriboro dopa, arĩ werepũ Jesu.

<sup>42</sup> Eropa arĩtuha dipaturi waha, Goãmũre serẽpũ daja:

—Ahũ, yũ ñero tariburire iidiagũ iique yũre. Mũ gamero dopa ta iique, arĩpũ ãḡũ.

<sup>43</sup> ãḡũ buherã pohrogue urredã pohrogue dipaturi erapũ daja. Eropa eragũ carĩ oyarãre ãpũ daja. Wũja pũritaricãyoro erãre. <sup>44</sup> Eropigũ dipaturi erãre apicã dipaturi waha, Goãmũ mera wereniguiũ daja. ãḡũ ero core ãḡũ arĩdiro dopa ta arĩpũ. <sup>45</sup> Eropa arĩtuha ãḡũ buherã pohrogue eraa, erãre arĩpũ:

—¿Mua carĩrã soorã iiri dohpa? arĩpũ ãḡũ. Eropa arĩtuha masa erã aricũ ãḡũ õpa arĩpũ:

—Iripẽta ãhraa. Dohparagã yũ masũre Goãmũ ãḡũ obeodigure ñerãre orãcoma yũre. <sup>46</sup> Wahgãque. Ina warã. ãaque. Yũre ãhaturirãre obu ohõ ahrimi, arĩpũ ãḡũ.

*Jesure ãhaturirã ãḡũre peresu iĩnuma*

*Mr 14.43-50; Lc 22.47-53; Jn 18.2-11*

<sup>47</sup> ãḡũ eropa arĩ wereniguirisubũ ḡũa mera majagũ mũrũpũ Judapũ eramĩ. Eropirã masa bajarã ñoserimijiri yucũ dũcari opanirã ãḡũ mera yujuro mera erama. Erã pahia oparã, erã mũrã sã erã obeonirã árĩma. <sup>48</sup> Negohrare Jesure ãhaturirãre wiabu õpa arĩ wereseretuhapũ Juda: “Yuhũ wayuporãre mimigũ ãḡũ ta árĩḡũcumĩ mua ñeabu. ãḡũre yũ mimira pũhrũ ñeaque,” arĩpũ Juda erãre. <sup>49</sup> Eropigũ eragũ Jesu pohrogue mata wapurumujumi.

—Buheḡũ, ¿ãhriri mũhũ? arĩ ãḡũre wayuporã mimimi.

<sup>50</sup> ãḡũ eropa mimicũ Jesu õpa arĩmi:

—Yũ mera majagũ, ¿duhpigũ õḡũere ahriri mũhũ? arĩmi ãḡũre.

Eropirã erã Jesure ñeama.

<sup>51</sup> Erã eropa iicũ ãḡũ Jesu mera majagũ ãḡũ matamijire tuãwea aĩ, pahi opũ pohro majagũre ãḡũ gamirore tabe corodijucãmi. <sup>52</sup> ãḡũ eropa iicũ ãḡũ Jesu ãḡũre weremi.

—Mũ matamijire dibuque. Gajirãre ñosenirã árĩrã, erã ñose gamecũ sĩrirãcoma. <sup>53</sup> Yũ Pagũre yũ itamudorecũ ãḡũpũ bajarã anyuare doce cururire yũ pohro obeobocumi. ¿Irire masibearĩ mua? <sup>54</sup> Eropa itamubodiro árĩquereḡũ ta ãḡũre yũre itamudoresome yuhũ. Yũ eropa doreibircũ Goãmũ yare erã gojarapũ arĩdiro dopa ta eropa waroca, arĩmi ãḡũ.

<sup>55</sup> Eropa arītuha masare weremi ĩġu:

—¿M̄ua ñoserimijiri mera, yucu đucari mera arirā yajari masare iro dopa m̄ua yare ñearā arirā iari? Um̄ari n̄ucu Goām̄u wihigue yuh̄u m̄uare buhe doacū, m̄ua yare ne ñeabirib̄u. <sup>56</sup> Dohpaguere m̄ua yare eropa iirā i arīpehreri Goām̄u yare werem̄htanirā erā arī gojadiro dopa ta iiaa m̄ua, arīmi Jesu erāre.

Īġure eropa ñeacū ĩarā ġua ĩġu buherā arīpehrerā ĩġure cohā omagā wab̄u ġua.

*Judio masa oparā Jesure serēpiñuma*

*Mr 14.53-65; Lc 22.54-55, 63-71; Jn 18.12-14, 19-24*

<sup>57</sup> Eropi ĩġure ñeanirā pah̄i tauro opu Caifa waic̄uġu ya wihigue aĩ ejañorā ĩġure. Iri wihi ta masare buherā, m̄urā s̄a gamenerēñorā.

<sup>58</sup> Pedropu yoarogue erāre ĩhanur̄usiap̄u. Eropa ĩhanur̄usiagu Caifa ya wihire c̄ahmotara s̄arirore eja, iri s̄ariro pohecague ñajaa wap̄u. Ñajaja, iri wihire corerā surara mera doapu. “Jesure duhpiicū ĩagura,” arīġu doapu Pedro.

<sup>59</sup> Eropirā pahia oparā, gajirā oparā mera gamenererā Jesure wejēdorediarā, ġuyari mera erā ĩġure ñero dipuwaja moaborore ġuñamaariñorā. <sup>60</sup> Erā eropa weresāburire ġuñabocabiriñorā. Eropa ġuñabocabiriquererā ta masa bajarā ĩġure eropa weresāmorā amañorā. Eropirā perā ĩġure weresāmorā erañorā. Ōpa arīñorā:

<sup>61</sup> —Ih̄i ōpa arīmi: “Goām̄u wihire cóamasia. Eropa cóaġu uhren̄u puh̄u iri wihire dipaturi iigura,” ĩġu arīcū peeb̄u ġua, arī weresāmaacāñorā Jesure.

<sup>62</sup> Erā eropa arīra puh̄u pahia tauro opu wahġanugaja, Jesure serēpip̄u:

—¿Ōā m̄ure weresāquerecū ta erāre yuh̄ri gamebeari m̄uh̄u? ¿M̄ure erā weresārire dohpa arī yuh̄ri gahmeri m̄uh̄u? arīp̄u opu.

<sup>63</sup> Īġu eroparīcū peequereġu ta Jesu eropa pepicāp̄u. Īġu eropa yuh̄ribiricū ĩagu pahia tauro opu ĩġure dipaturi serēpip̄u daja:

—Goām̄u ojocariniguiic̄uġu mera diaye arīque m̄uh̄u. M̄uh̄u eropa arībiricū m̄ure ĩġu dipuwaja moaġucumi. Wereque ġuare. ¿Cristo Goām̄u magu ta āhriri m̄uh̄u? arī serēpip̄u daja.

<sup>64</sup> Īġu eroparīcūġue ta Jesu yuh̄rip̄u:

—Īġu ta āhraa. M̄uare diaye wereġu tiiaa. Puh̄u yuh̄u masu Goām̄u ĩġu obeodigu Goām̄u yu Pagu turagu pohro ĩġu diayepu doacū ĩarāca m̄ua. Eropirā um̄aro maja imica weca yu dujaricū s̄are ĩarāca, arī yuh̄rip̄u Jesu.

<sup>65</sup> Īġu eroparīcū peegu pahia opu, ĩġu basi ĩġu sañarañe suhrirore yeguecāp̄u gajirāre “Guatariacāmi,” arīdoreġu.

—Īre weresāre gajirāre gamebeaa pare. Īġu basi Goām̄ure ĩġu ñero wereniguiicū peea mari. Eropirā ĩġu ñero iira dipuwajare masituh̄aa mari. <sup>66</sup> ¿Eropirā dohpa iirācuri mari dohpaguere ĩre? arī serēpip̄u ĩġu gajirā oparāre.

—Īġu ñeri dipuwaja wejēcāro gahmea, arī yuh̄riñorā erā.

<sup>67</sup> Erā eropa arīra puh̄u ĩġu diapore disico ehosū, ĩġure pañorā erā.

<sup>68</sup> Gajirā ĩġu cuirire diricāhmota ōpa arī wereyañorā ĩġure:

—¿Noa m̄ure pari? Cristo Goām̄u beyedigu arīġu ĩabiriqueru ta wereque ġuare, arī pañorā erā.

—*Īgure masibea, arī guyañumi Pedro Jesure*

*Mr 14.66-72; Lc 22.56-62; Jn 18.15-18, 25-27*

<sup>69</sup> Eropi iri wihi pohro áriri pũu ðari pũu Pedropũ doarpũ. Īgu eropa doacũ ĩago pahia opũ pohro majago ĩgu pohrogue erago ðpa arĩpo:

—Mũ sã Jesu Galilea majagu mera áhrahũ, arĩpo igo.

<sup>70</sup> Igo eroparĩcũ peegu Pedro ðpa arĩpũ:

—¿Dohpa arĩmaacãgo iiri mũhu? Mũ arĩgure ne masibea yũhu, arĩpũ Pedro arĩpehrerã erã peero.

<sup>71</sup> Igo eropa arĩra pũhrũ iri pũu maja sãriro disiporo pohrogue wapũ Pedro. Ero ĩgu árĩcũ gajigo pohro majago ĩgure ĩago, ero árĩrãre ðpa arĩpo igo sã:

—Jesu Nazare majagu mera áhrami ihĩ, arĩpo igo Pedre daja.

<sup>72</sup> Igo eroparĩcũ peegu Pedro yũhrĩpũ:

—Goãmũ mera diaye arĩgu iiaa. Īgu mũ arĩgure ne masibea yũhu, arĩ yũhrĩpũ Pedro.

<sup>73</sup> Eropi merogã pũhrũ ta ero niguinĩrã Pedro pohrogue waha, ĩgure ðpa arĩñorã.

—Diaye ta áhraa. Jesu mera majarã mera majagu ta áhraa mũ sã. Erã iro dopa ta werenĩguia mũhu, arĩñorã erã Pedre.

<sup>74</sup> Erã eroparĩcũ Pedro yũhrĩpũ:

—Diaye ta Goãmũ mera arĩgu iiaa mũare. Yũ diaye arĩbircũ Goãmũ yũre dipuwaja moaporo. Īgu mũa arĩgure ne masibea yũhu, arĩ yũhrĩpũ ĩgu erãre.

Īgu eroparĩcũ ta cãreña werepũ. <sup>75</sup> Īgu werecũ peegu Jesu ĩgure arĩrãre guñapũ. “Cãreña ĩgu wereboro core ‘Jesure masibea,’ arĩguca mũhu. Ʋhresubu eropa arĩguca mũhu,” Jesu ĩgure arĩrãre guñapũ Pedro. Eropa guñagu iri sãrirore wiria turaro orepũ.

## 27

*Pilato pohrogue Jesure aĩgãñuma*

*Mr 15.1; Lc 23.1-2; Jn 18.28-32*

<sup>1</sup> Eopirã boyodi merero ta pahia oparã, mũrã sã Jesure erã wejẽdoreborore game weretamuñorã. <sup>2</sup> Erã eropa weretamura pũhrũ ĩgure dihri, Pilato waĩcũgu opũ pohrogue aĩgã, ĩgure oñorã Pilatore. Pilatopũ iri yeba majarã opũ árĩmi.

*Juda Iscariote sĩria wañumi*

<sup>3</sup> Eropigu Jesure erã wejẽdorecũ ĩagu Judapũ Jesure ĩgu ĩhmurare guña turaro bũjawerepũ. Eropa bũjaweregu treinta seri niyuserire ĩgu ñearaserire wiagu wagu, pahia pohrogue, mũrã pohrogue eja, ðpa arĩpũ:

<sup>4</sup> —Jesu mũare yũ ĩhmudigu ñeri marigu ĩgu arĩquerecũ ta erã wejẽdoreama ĩgure. Eropigu mũare ĩgure ĩhmugu ñero iigu iiaa yũhu. Eropigu i niyuserire mũare wiagu iiaa, arĩpũ Juda erãre.

Īgu eropa arĩ werera pũhrũ erã yũhriñorã:

—Eropa ta iicuraporo. Mũ eropa arĩri guare duhpiburi arĩbeaa. Mũ dihta eropa arĩ pepia irire, arĩ yũhriñorã erã ĩgure.

<sup>5</sup> Erã eropa arĩ yũhrira pũhrũ erã árĩri wihi Goãmũ wihigue Juda ĩgu niyuserire mehsiripicãpũ. Mehsirituha waha wapũ. Waha, yuradare dirisiu, ĩgu basi ĩgu wũnũgu tuhbiu, buhrimadija, sĩria wapũ pare.



<sup>6</sup> Eropirā pahia oparā niyeruserire aīrā ōpa arīñorā:

—I niyerure Goāmū wihi maja comorogue niyeru diburi comorogue mari apimasibeaa. I niyeru mera ta masure wejēdorema. Eropiro mari doreri marire eropa áriri niyerure dibudorebeaa Goāmū wihigue, arīñorā erā erā basi.

<sup>7</sup> Erā eropa arīra pūhrū, “Ōpa iirā,” erā arī weretamura pūhrū mátasorori mohmegū ya yebare asūrā wañorā. Iriseri mera asūñorā. Gajipū majarā iri macague eranirā sīricū erāre yaaburi yebare asūñorā. <sup>8</sup> Eropirā iri yebare “Di cóari yeba,” arī waīyema masa. Dohpague säre eropa ta waīcua. <sup>9</sup> I árīpehreri eropa wayoro iribojegue majagū Jeremia ĩgū “Eropa waroca,” ĩgū arīdiro dopa ta. ĩgū Goāmū ya weremūhtadigū árīñumi. Ōpa arī gojañumi ĩgū: “Treinta niyeruserire plataserire iripēta wajayerāra gua ĩgure ñeaborore,” arīrācoma Israe masa. <sup>10</sup> Eropirā iriseri mera mátasorori mohmegū ya yebare asūrācoma erā. Ōpa ta yūre iidoremi Goāmū,” arī gojañumi Jeremia iribojegue.

*Pilato Jesure serēpiñumi*

*Mr 15.2-5; Lc 23.3-5; Jn 18.33-38*

<sup>11</sup> Eropi Pilatore erā Jesure ora pūhrū ĩgūpū ĩgure serēpipū:

—¿Diaye ta judio masa erā opa ta āhriri mūhū? arī serēpipū Jesure.

—Mū arīro dopa ta ĩgū ta āhraa, arī yūhrīpū Jesu.

<sup>12</sup> Eropa arī yūhriquerēgū ta, pahia oparā, mūrā sā erā weresācū yūhribiripū. <sup>13</sup> ĩgū eropa yūhribiricū ĩagū Pilato serēpipū:

—¿I árīpehreri erā weresārire peebeari mūhū? arī serēpipū ĩgū Jesure.

<sup>14</sup> ĩgū eropa arī serēpīquerecū ta Jesu ne yuju disiro yūhribiripū. ĩgū eropa yūhribiricū ĩagū Pilato uca wapū.

*Jesure wejēdoreñuma*

*Mr 15.6-20; Lc 23.13-25; Jn 18.38-19.16*

<sup>15</sup> Bojori nūcū Pascua árīcū peresu árīdigūre yujugūre masa “Īgure wiuque,” erā arīgūre Pilato eropa wiubasamūripū. <sup>16</sup> Irisubure Barrabā waīcūgū peresugue árīpū. Īgure masiñorā masa. <sup>17</sup> Eropigu erā gamenerecū Pilato serēpipū erāre:

—¿Nihipūre mūare wiubasacuri yūhū? ¿O Barrabāre o Jesure “Cristo” erā arīgūre wiubasacuri yūhū? arī serēpipū Pilato Jesure wiudianijagū.

<sup>18</sup> Jesure masa erā mahicū ĩarā judio masa oparā ĩgure ĩhaturirā ĩñorā. Eropa ĩhaturirā ĩgure oñorā Pilatore. Irire erā ĩhaturirare masigū Pilato Jesure wiudiaripū.

<sup>19</sup> Eropi Pilato masare ĩgū beyeri pēro ĩgū doacū ĩgū marapo ĩgure quere obeopo: “Dohpagā ñamire Jesure quēgo burīgā ñero pepiabū ĩgure ñero iiburire. Eropigu ĩgure ñeri marigure ne gajiropa ĩbīricāque mūhū,” arī werebeopo ĩgū marapo Pilatore.

<sup>20</sup> Pilato Jesure eropa wiudiaquerecū ta pahia oparā, mūrā sā masare ōpa arīdoreñorā: “Barrabāpūre wiudoreque. Jesupūre wejēdoreque,” arīdoreñorā masare. <sup>21</sup> Eropigu Pilato masare serēpipū daja:

—¿Oā perāre nihipūre mūare wiubasacuri yūhū? arī serēpipū.

—Barrabāpūre wiubasaque guare, arī yūhriñorā.

22 —¿Ihĩ Jesu, “Cristo” erã arĩgũpũre dohpa iigũcuri yũhũ? arĩ serẽpipũ ĩgũ.

—Crusague pabia wejẽque ĩgũre, arĩ yũhriĩnorã masa árĩpehřerã.

23 —¿Ñehenore ñerire iiari ihĩ mũa eroparĩcũ? arĩpũ ĩgũ.

Ĩgũ eroparĩcũ peerã erã turaro mera gaguiniguinemoĩnorã:

—Crusague pabia wejẽque ĩgũre, arĩ gaguiniguiĩnorã daja masa ĩgũre.

24 Erã eropa arĩ gaguiniguicũ peegũ, ĩgũre erã peediabiricũ ĩagũ, “Masa gua gamequeãbocoma,” arĩgũ, yũhřigũ ta õpa iipũ Pilato. Decore aĩgãridoretuhaja masa erã ĩhuro ĩgũ mojo coeřũ. Eropa mojo coegũ õpa arĩpũ:

—Ĩre wejẽra dipuwaja, yaha dipuwaja árĩsome. Mũa ya dipuwaja árĩroca, arĩgũ mojo coeřũ.

25 ĩgũ eroparĩcũ peerã árĩpehřerã masa õpa arĩĩnorã:

—Ĩre gũa wejẽdorera dipuwaja gua porã sã gũa ya dipuwaja ta árĩporo, arĩĩnorã masa.

26 Erã eroparĩcũ peegũ Pilato Barrabãre peresugue árĩdigũre wiu-dorepũ masa erã gamegũre. Eropa iitua Jesupũre yuradari mera tãradore, ĩgũre crusague pabia wejẽdoregũ wiapũ surarare.

27 ĩgũ eropa wiacũ Pilato ya wihigue ĩgũ surara aĩ ejaĩnorã Jesure. Eropirã erã surara árĩpehřerãre Jesu pohrogue gameneoĩnorã.

28 Eropirã ĩgũ suhřire tuwea aĩ, opũ ya suhřiro dopa bejariĩnere Jesure sãĩnorã. 29 Eropa sãtuha, porã berore iitua, ĩgũ dipuru weca duhpeoĩnorã. Eropa duhpeotuha, yucũgũre diayepũ mohsuaĩnorã. Mohsuaĩtuha, õpa arĩ wereyaĩnorã erã ĩgũre ĩgũ pohro merejarã:

—Umupeorã arique. Judio masa opũ õaro árĩporo, arĩ wereyaĩnorã ĩgũre.

30 Eropirã ĩgũre disico ehosũĩnorã. Erã mohsuadigũre ĩgũre tuãwea aĩ, ĩgũ dipurure paĩnorã irigũ mera. 31 ĩgũre eropa wereyara pũhřũ erã sãra suhřirore tuwea aĩ ĩgũ ya suhřiropũre sãĩnorã daja. Eropirã crusague pabia wejẽmorã ĩgũre aĩ wiria waĩnorã.

*Erã Jesure crusague pabia wejẽĩnuma*

*Mr 15.21-32; Lc 23.26-43; Jn 19.17-27*

32 ĩgũre aĩgã, Simo waĩcũgũre Cirene majagũre bocatĩri, ĩgũre Jesu ĩgũ coãra crusare coãtamudorema.

33 Coãgã Gólgota waĩcũrogue ejama. Gólgota arĩro, mari ya mera “Dipu pero” arĩro iiaa. 34 Eropirã vinore suĩri deco mera erã morera decore Jesure orima erã. Iri decore ihrĩña, ihribirimi ĩgũ.

35 Eropirã ĩgũ suhřire tuwea aĩra pũhřũ ĩgũre crusague pabiamã erã. Eropa pabiatuha ĩgũ suhřri mũrãre, “¿Noa yaĩne árĩrocuri ĩĩne?” arĩ masimorã erã basi game deamehtu birama. Eropa iirã Goãmũ yare weremũhtadigũ ĩgũ arĩdiro dopa ta iirã iima erã. Õpa arĩ gojaĩnumi ĩgũ: “Yaha suhřire erã basi aĩmorã, ‘¿Noa yaĩne árĩrocuri ĩĩne?’ arĩ masimorã erã basi game deamehtu birama erã,” arĩ gojaĩnumi iribojeguere. 36 Deabiratuha ĩgũre ĩhãdoacurima erã. 37 ĩgũ dipuru weca crusague õpa arĩ gojarapũre pabia tuma erã ĩgũre weresãra wererapũre. “Ihĩ judio masa tauro opũ áhřimi,” erã arĩ gojarapũre pabia tuma.

<sup>38</sup> Eropirā perā yajari mūrare Jesu pohro gaji crusarigue pabia tuma erā säre. Yujugū ĩgu diayeru, gajigure ĩgu copu pabia tuma erā.  
<sup>39</sup> Crusari pohro tarigārā Jesure ĩha, erā dipure yurerā, ñero arī wereniguima ĩgure:

<sup>40</sup> —“Goāmu wihire cohā, uhrenu pūhru iri wihire amugura daja,” arī wereniguidigu árribu muhu. Goāmu magu árĩgu mu basi dijaque. Eropigu mu basi itamuque. Eropigu tari wereguca muhu, arīma masa.

<sup>41</sup> Eropa ta pahia oparā, masare buherā sā eropa arī wereyama.

<sup>42</sup> —Īgu gajirāre taudigu árĩqueregu ta ĩgu basi taumasibeami. “Israe masa opu āhraa,” arīrimi ĩgu. Eropirā ĩgu basi ĩgu dijaricū ĩarā ĩgure umupeorāca. <sup>43</sup> Īguru Goāmure umupeorimi. Eropigu “Goāmu magu āhraa,” arīrimi ĩgu. Īgu eropa arĩgu árĩcū Goāmurū ĩgure itamuporo, arī wereyama erā.

<sup>44</sup> Yajari mura ĩgu pohro erā pabianirā eropa ta ĩgure wereya ñero wereniguima erā sā.

*Jesu sĩria wañumi*

*Mr 15.33-41; Lc 23.44-49; Jn 19.28-30*

<sup>45</sup> Eropi goeri boje árĩcū uhre hora gohra árĩpehrerogue naitĩa wabu. <sup>46</sup> Eropigu irisubu naitĩa wari subure Jesu turaro gaguinimi:

—Elí, Elí, ¿lema sabactani? arīmi ĩgu. Eropa arĩgu opa arĩgu iimi mari ya mera: “Yu Goāmu, yu Goāmu, ¿duhpigu yure cohāri muhu?” arĩgu iimi.

<sup>47</sup> Īgu eroparĩcū peenirā yujurāyeri ero niguinirā opa arīrima:

—Goāmu ya weremāhtadigure Eliare sihugu iicumi, arīrima erā.

<sup>48</sup> Eropigu yujugu erā mera majagu mimi aĩri yasū mera vino suĩrire yosotuha, aĩ omagā, yucagu ojogorore diritu, Jesure simujumi. <sup>49</sup> Īgu eropa iicū ĩarā gajirā simujugare opa arīma:

—Corenique. Elia ĩgure ĩgu itamucū ĩanirā dohpa mari, arīma erā.

<sup>50</sup> Erā eropa arĩra pūhru dipaturi Jesu turaro gaguinigui sĩria wami.

<sup>51</sup> Īgu sĩricū ta Goāmu wihi majañe suhriro ero erā cāhmotara suhriro deco mera yehguea wayoro. Eropiro yeba sā ñohmecū. Eropa ñohmecū utā sā pagayeri sā wahria wabu. <sup>52</sup> Eropirā masa goberi pāricū, bajarā Goāmu yarā árĩnirā iribojegue sĩrinirā mura masa wiriañorā. <sup>53</sup> Masa wiriarā iri goberire cóacā ōari macague Jerusaléngue wañorā erā. Erogue erā wacū masa bajarā erāre ĩañorā.

<sup>54</sup> Eropirā yeba ñohmecū ĩarā, sĩrinirā mura erā masa wiriacū ĩarā, surara opu ĩgu surara mera uca wama. Erā Jesure crusague árĩgure corerā árĩma. Uca wa, opa arīma:

—Diaye ta āhraa. Ihĩ Goāmu magu ta āhrañumi, arīma erā.

<sup>55</sup> Eropirā Galileague Jesu mera arinirā ĩgure itamunirā nome árĩma. Yoarogue crusague tuyagure ĩhabeo niguibu gua erā mera. <sup>56</sup> Erā nome mera María Magdalena árĩmo. Gajigo María waĩcugo sā árĩmo. Igotu Santiago, José sā pago árĩmo. Gajigo Zebedeo marapo árĩmo.

*Jesu dūpūre masa gobegue apiñumi José*

*Mr 15.42-47; Lc 23.50-56; Jn 19.38-42*

<sup>57</sup> Eropi ñamicague José Arimatea majagu doberi opagu ero árĩmi. Īgu Jesu buhegu árĩmi. <sup>58</sup> Eropigu Pilato pohrogue eja, Jesu dūpūre serēpu. Īgu eropa serēcū peegu Jesu muru dūpūre odorepu Pilato.

<sup>59</sup> Īḡu eropa dorera pũhrũ Josẽpũ Jesu mũrũ dũpũre aĩ, diju, õari suhriro ḡũhrari mariri suhriro mera ĩḡu dũpũre omapũ. <sup>60</sup> Omatuha, Josẽ ĩḡu ya masa gobegue apĩpũ ĩḡu dũpũre. Iri gobe erã utãyegue erã seara gobe mama gobe áriyoro. Iri gobegue apituha, wũariye utãyere taragãpũ iriye mera bihabu. Bihatuha, waha wapũ. <sup>61</sup> Eropirã Marĩa Magdalena, gajigo Marĩa mera iri gobeguere ãhadoo coreñorã.

*Jesure erã apira gobere surara coreñuma*

<sup>62</sup> Eropi gajinũ, Pascua áriburire erã amuranũ pũhrũ Sabado áricũ pahia oparã, fariseo masa sã Pilato pohro gamenereñorã. <sup>63</sup> Gameneretuha õpa arĩñorã erã Pilatore:

—Opũ, irire guñaã gũ. ĩḡu ḡuyaricũḡu Jesu ojocarinigũ õpa arĩpũ ĩḡu: “Uhrenũ pũhrũ masa mũriagũca yũhũ,” arĩpũ ĩḡu. <sup>64</sup> ĩḡu eropa arĩdigũ áricũ ĩḡu buherãpũ ĩḡu dũpũre yajabocoma. Eropa yajarã masare õpa arĩbocoma: “Jesu masa mũriami,” arĩbocoma erã. ĩḡu Jesupũ masare ḡuyagũ iimi. ĩḡu buherã sã “ĩḡu masa mũriami,” arĩrã ḡuyarã iirãcoma. Eropirã Jesu ĩḡu ḡuyadiro tauro erã ḡuyaripũ ñetariaroca. Eropa yajari arĩḡu uhrenũ gohra mũ surarare coredoreque erã ĩḡu mũrũre apidirogue, arĩñorã erã Pilatore.

<sup>65</sup> Pilato yũhrĩpũ:

—Áũ. Yaharã surara coreporo. Eropirã mũã bocatĩuropẽ iri gobere õaro coreque, arĩpũ ĩḡu erãre.

<sup>66</sup> ĩḡu eroparĩcũ erã waha, iri gobere bihariye merague ta pihatuñorã masa erã ñajacũ ãha masimorã. Eropirã surarare iri gobere coredoreñorã.

## 28

*Jesu masa mũriañumi*

*Mr 16.1-8; Lc 24.1-12; Jn 20.1-10*

<sup>1</sup> Eropi judio masa soorinũpũ Sabadonũpũ irinũ taricũ, Domingo áricũ ñamiñarigã áricũ Marĩa Magdalena gajigo Marĩa mera Jesu masa gobere ãarã wañorã. <sup>2</sup> Eropiro mata yeba turaro ñohme purumujuyoro. Eropa ñohmecũ mari Opũ ĩḡu anyu umarogue aridigũ dijari, masa gobere bihariyere utãyere tarabeo iriye weca doapũ. <sup>3</sup> ĩḡu anyu bupu miaro dopa õaro gosesirigũ, ĩḡu suhri yaji poari iro dopa õaro boreri suhricũḡu áriũ. <sup>4</sup> ĩḡu eropa dehyoacũ, surara iri gobere corerã, ucataria wa, naragã, weca gohrare sĩrĩnirã iro dopa wañorã. <sup>5</sup> Eropigũ anyupũ erã nomere õpa arĩpũ:

—Yũre ḡũibiricãque. Crusague erã pabiadigũre Jesure mũã amacũ masia yũhũ. <sup>6</sup> ĩḡu dohpaguere õre marimi. ĩḡu arĩdiro dopa ta ĩḡu masa mũria wami. Erã ĩḡu dũpũre erã apidirore ãarã arique. <sup>7</sup> Tuhaja ĩḡu buherã pohroque umũdiaro waha, õpa arĩ wererã waque: “Ihĩ Jesu sĩridigũ masa mũriami. Eropigũ mũã core Galileague ĩḡu wamũhtagũcumi. Eroque ĩḡure ãarãca mũã,” arĩ wererã waque mũã. I yũ arĩrare guñaque mũã, arĩpũ anyu erã nomere.

<sup>8</sup> ĩḡu eropa arĩra pũhrũ erã nome masa gobegue áriñirã nome yojaro mera wiria, erã ãarare ḡũiquererã ta, mucubiriri mera Jesu buherãre wererã warã, omañorã. <sup>9</sup> Eropa warã nomere Jesu bocatĩripũ:

—¿Noho wahari mũa? arĩ serẽpipũ ãgũ. ãgũre ãha erãpũ ãgũ pohroque eja, ãgũ guburire ãheha ãgũre umupeoñorã.

<sup>10</sup> —Gũibiricãque mũa. Yũ pagũ porãre “Galileague waque,” arĩ wererisa. Erogue yũre ãarãcoma, arĩpũ Jesu erãre.

*Masa gobere corerã surara erã ãarare wereñuma*

<sup>11</sup> Erã nome wererã warisubũ surara watope yujurãyeri masa gobere corenirã surara Jerusaléngue pahia oparãre wererã wañorã. Jesu ãgũ masa gobegue ãgũ mũriarare werepehocãñorã. <sup>12</sup> Erã eropa arĩ werecũ pahia oparã, mũrã mera gamenereñorã. Gamenere weretamuñorã. Eropirã surarare gũyadorerã niyerure wajayeñorã.

<sup>13</sup> —Õpa arĩque mũa masare: “Ñami gũa carĩra pũhrũ, ãgũ buherãpũ masa gobegue eraa, ãgũ dũpũre aĩcãñirã ãhrama,” arĩ wereque masare. <sup>14</sup> Mũa eropa arĩ werecũ Pilatopũ mũa carĩtariarare peecãbocumi. ãgũ eropa peecũ, ãgũre wererãra gũa. “Erãre dipuwaja moabiricãque,” arĩ wererãra gũa ãgũre, arĩñorã erã surarare.

<sup>15</sup> Erã eropa arĩra pũhrũ surarapũ niyerure ãheha, erãre erã gũyadorediro dopa ta masare wererã wañorã erã. “Jesu buherã aĩcãñirã ãhrama ãgũ mũrũ dũpũre,” arĩñorã erã. Eropirã eropa Jesu ãgũ dũpũ aĩrãre wereniguima judio masa. Dohpague sãre eropa ta arĩ werema erã.

*Jesu ãgũ buherãre ãgũ yare ãgũ iidorerã apiñumi*

*Mr 16.14-18; Lc 24.36-49; Jn 20.19-23*

<sup>16</sup> Eropi gũa Jesu buherã once buherã Galileague waha utãgũgue Jesu ãgũ wadoredigũgue wabũ gũa. <sup>17</sup> Erogue eja Jesure ãarã umupeobũ gũa ãgũre. Eropa umupeoquererã ta gũa yujurãyeri “Ihĩ Goãmũ magũ árĩbiribocumi,” arĩ pepiribũ dohpa. <sup>18</sup> ãgũpũ õpa arĩmi gũare:

—I yebaguere, umaro sãre Goãmũ árĩpehrerã tauro turarire omi yũre. <sup>19</sup> ãgũ eropa ocũ mũare õpa iidorea: Árĩpehrero majarãre yahare buherã waque erã yaharã erã waboro dopa. Eropirã mari Pagũ waĩ mera, yũ waĩ mera, Espiritu Santo waĩ mera erãre waĩyeque. <sup>20</sup> Eropirã mũare yũ dorerare erã ipehoburire buheque erãre mũa. Eropirã ire yũ arĩrãre guñaque: Árĩpehrerinũri nũcũ mũa mera árĩgũca ne i umũ pehrecũgue, arĩ weremi gũare Jesu.

## San Marcos

*Ñu waĩyegũ buhenũgañumi*

*Mt 3.1-12; Lc 3.1-9, 15-17; Jn 1.19-28*

<sup>1</sup> Goãmũ magũ Jesucristo ñgũ iirare, ðari buherire wereri ðpa árĩnũgayoro.

<sup>2</sup> Goãmũ yare weremũhtadigũ Isaia ñgũ iribojegue gojadiro dopa ta i wereri áhraa. Òpa arĩ gojañumi ñgũ:

Goãmũ ñgũ magũre ðpa arĩpũ: “Mũ core mũre wereyubure obeogu iiaa. <sup>3</sup> Eropigũ ñgũ masa marirogue árĩgũcumi. Ñgũre peerãre weregũ busũro mera arĩ wereniguĩgũcumi: ‘Mari Opũ ñgũ ariburi mare amuro dopa ñgũ ariboro core ðarã árĩyũque ñgũre peemorã,’ arĩ wereniguĩgũcumi,” arĩpũ Goãmũ, arĩ gojañumi Isaia, Ñu waĩyegũ ñgũ masa dehyoaboro coregue.

<sup>4</sup> Eropigũ Ñu waĩyegũ masa marirogue masare buhemũripũ. Òpa arĩpũ:

—Mũa ñero iirire bujawereque. Dohpaguere ðaripũre gohrotoque. Eropirã waĩyenirã árĩque. Mũa eropa gohrotocũ ñagũ mũa ñero iirare Goãmũ cãdijigũcumi, arĩ buhemũripũ ñgũ. <sup>5</sup> Eropirã árĩpehrero Judea yeba majarã, Jerusalén majarã mera ñgũ pohrogue peerã ejañorã. Eropigũ Ñu erãre waĩyepũ Jordán waĩcũriyague. Erã ñero iirare weretarituhacũ ñha ñgũ erãre waĩyemũripũ.

<sup>6</sup> Eropigũ Ñu camello ya gasiro suhriroro suhricũpũ. Waibũgũ ya gasirore ta tuãdiuridacũgũ arĩpũ. Porerora, mome sã ñgũ bari árĩyoro.

<sup>7</sup> Eropigũ ðpa arĩ buhemũripũ:

—Yũ pũhrũre yũ tauro turagũ arigũcumi. Òtariagũ áhrimi ñgũ. Ñgũ iro dopa ðagũ árĩbeaa yũpũ. Eropigũ ñgũre pepigũ, “Yũ tamera bu árĩgũ áhraa yũhũ,” arĩ pepia yũhũ. <sup>8</sup> Masare waĩyegũ deco mera waĩyeya yũpũ. Ñgũpũ yũ tauro iigũcumi. Mũare Goãmũ yarã iigũcumi ñgũ. Espĩritu Santore masa mera árĩniguicũ iigũcumi, arĩ buhepũ Ñu.

*Ñu Jesure waĩyeñumi*

*Mt 3.13-17; Lc 3.21-22*

<sup>9</sup> Eropi irisubure Jesu Nazaregue, Galilea yeba árĩri maca árĩdigũ, dia Jordán waĩcũriyague ejarũ. Ñgũ eropa ejacũ Ñu waĩyepũ ñgũre.

<sup>10</sup> Ñgũ waĩyetuhajacũ Jesu diague niguidigũ, majanũgaja umarogue ñhamujupũ. Umũsi pãrimaa wayoro. Ero pãrimaacũ ta Espĩritu Santo buja iro dopa bejagũ ñgũ weca dijibejajapũ. <sup>11</sup> Eropiro umarogue wereniguiri busũyoro.

—Mũhũ yũ magũ yũ mahigu áhraa. Mũ mera bũrigã mucubiria, arĩro cariyoro umarogue.

*Satana ñerire iidoreriñumi Jesure*

*Mt 4.1-11; Lc 4.1-13*

<sup>12</sup> Irisubure Espĩritu Santo Jesure masa marirogue wadorepũ.

<sup>13</sup> Eroque ejaũ cuarenta nũri gohra arĩpũ. Eroque ñgũ árĩcũ, Satanapũ Jesu ñgũ ñero iirire ñadiagũ ñerire iidoreripũ ñgũre. Eropigũ Jesu

waimarã nugu majarã watope arĩpu. Eropirã anyuapu igure itamu igure bari oñorã.

*Jesu Galilea yebague buheñumi*

*Mt 4.12-17; Lc 4.14-15*

<sup>14</sup> Eropi Nure erã peresugue erã biha dohora puhru, Jesupu Galileague ñari buherire Goãmu igu opu arĩrire weregũ wapu. <sup>15</sup> Õpa arĩ werepu:

—Dohpaguere õpa ãhraa: Goãmu igu opu arĩboro merogã duhyaa. Mua ñeri iirire bujawereque. Eropirã ñarire gohrotoque. Õari buherire peeque mua, arĩ buhemuripu Jesu.

*Jesu wapicurã wai wejẽrãre igu mera majarã arĩmorãre sihuñumi*

*Mt 4.18-22; Lc 5.1-11*

<sup>16</sup> Eropigu Galilea waĩcuriya turogue ejaqu, Simore igu pagu magu mera bocajapu. Erã wai wejẽdi masa arĩñorã. Erã wejẽdi yucure mehyurã iñorã erã iri ditaru wuuri ditarugue.

<sup>17</sup> Erãre arĩpu Jesu:

—Yu mera majarã arĩmorã arique mua. Yu mera mua aricũ mua waire mua ñeha gameneorã mua iiro dopa ta, Goãmu yarã arĩmorãre sihu gameneomorãre iirã aricũ iigura muare. Yu mera mua aricũ eropa iimorãre apigura muare. Eropirã yu mera arique, arĩpu Jesu.

<sup>18</sup> Igu eroparicũ peerã, erã wejẽdi yucure apicã igu mera waha wañorã.

<sup>19</sup> Eropirã erã merogã tarigã Santiagore igu pagu magu Ñu sãre bocañaorã daja. Erãpu Zebedeo porã arĩñorã. Erã ya dohodirugue erã wejẽdi yucure amurã iñorã. <sup>20</sup> Erã perãre igu sihubeopu. Igu sihubeocũ pee erãpu erã pagure igure itamurã mera dohodirugue apicã Jesu mera waha wañorã.

*Watĩ ñajasũdigu Jesure bocatĩriñumi*

*Lc 4.31-37*

<sup>21</sup> Eropi erã Capernaum waĩcuri macague ejañorã. Eropigu Sabado aricũ judio masa erã buheri wihigue buhegu ñajapu. <sup>22</sup> Eropigu ñaro masipehogu buhegu, judio masare erã buherã iro dopa arĩbiripu igu. Igu eropa buhecũ iri maca majarã pee uca wañorã. <sup>23</sup> Irisubure iri wihire yujugu watĩ ñajasũdigu arĩpu. Eropigu õpa arĩ gaguiniguipu Jesure:

<sup>24</sup> —Muhu Jesu Nazare majagu garibobiricãque guare watẽare. ¿Duhpibu õpa iiri guare? ¿Muhu guare dedecũ iibu iiri? Goãmu magu mu ñagu aricũ gua masia, arĩ gaguiniguipu igu Jesure.

<sup>25</sup> Igu eroparicũ peegu Jesu turipu watĩre:

—Ejarimaricãque. Iguare cohã wiria waque, arĩpu Jesu.

<sup>26</sup> Eropigu watĩ masure yeba mehmereja tũrucũ iipu. Igu gaguiniguicũ ta wiriapu igure. <sup>27</sup> Eropirã arĩpehrerã iri wihi doanirã igu eropa wacũ ñha ucataria waha õpa arĩñorã:

—Yaho. ¿Ñeha buheri ãhriri ii? ¿Mama buheri ta ãhriri? Igu opu iro dopa ta doremi watẽare. Igu dorecũ watẽapu tarinugabeama igure, arĩ wereniguñorã iri wihi doarã erã basi.

<sup>28</sup> Eropirã bajamenurigã puhrugã ta, arĩpehrerã Galilea yeba majarã iirire igu eropa iirare masipehrea wañorã.

*Jesu Simo Pedro mañecore òago iñumi**Mt 8.14-15; Lc 4.38-39*

<sup>29</sup> Eropi Jesu sã judio masa erã buheri wihigue árĩnirã wiria wañorã. Erã eropa wiriara puhru Jesu, Santiago, Ñu mera, Simo ĩgu pagu magu Andre sã ya wihigue ñajapu. <sup>30</sup> Irisubure Simo mañeco nimacuri dorecũgo camague igo oyacũ wereñorã Jesure. <sup>31</sup> Erã eropa werecũ peegu, ĩgu igo pohrogue eja, igo mojotore ñeha, igore tara wahgũ dobopu. ĩgu tara wahgũ dobocũ ta igore nimacuri taria wayoro. Taricũ pepigo igopu wahgã erãre bari ejopo.

*Jesu bajarã dorecũrãre òarã iñumi**Mt 8.16-17; Lc 4.40-41*

<sup>32</sup> Ñamicague abe ñajara puhrugue masa árĩpehrerã dorecũrãre, gajirã watẽa ñajasũnirãre, pũriri dorecũrãre Jesu pohrogue aĩ ejañorã. <sup>33</sup> Eropirã árĩpehrerã iri maca majarã gamenereñorã Jesu áriri wihi disiporore. <sup>34</sup> Eropigu Jesu bajarã dorecũrãre, baja dore oparãre òarã wacũ ĩpu. Masa bajarãre watẽare wiupu. Eropigu watẽa Jesu Goãmũ magu ĩgu árĩrire erã masicũ ĩagu Jesupu erãre irire weredorebiripu.

*Galilea yebague Jesu buheñumi**Lc 4.42-44*

<sup>35</sup> Eropigu ñamiñarigã árĩcũ boyoboro core, ĩgu wahgãra puhru masa marirogue ĩgu Pagu Goãmure serẽgu wapu. <sup>36</sup> ĩgu eropa wacũ ĩarã Simo sã ĩgure amarã ejañorã. <sup>37</sup> Eropirã ĩgure bocatĩri òpa arĩñorã:

—Masa árĩpehrerã mure ahmama, arĩñorã erã ĩgure.

<sup>38</sup> Erã eroparĩcũ peegu òpa arĩpu Jesupu.

—I macare buhegu ahrabu yũhu. Eropirã gaji macari sãre ògã maja macari sãre buherã warã mari. Yũhu iri macari sãre buhegura, arĩpu Jesu.

<sup>39</sup> Eropigu árĩpehrero Galilea yebare buhecupũ. Eropigu macari nucũ erã ya buheri wirigue ñajaja buhepu. Pũriri dorecũrã sãre pũririre cóapu. Watẽare masare ñajanirãre cohã wiupu.

*Jesu cami boagure òagu iñumi**Mt 8.1-4; Lc 5.12-16*

<sup>40</sup> Eropi gajigu cami boagu Jesu pohrogue eja, mereja serẽpu:

—Mũhu yure òagu wacũ iidiagu, yure òagu wacũ iimasia, arĩpu cami boagupu Jesure.

<sup>41</sup> ĩgu eroparĩcũ peegu Jesu ĩgure mojomoro ĩapu. Eropigu Jesu ĩgu mojoto mera mohmeripu. Mohmeripu ta òpa arĩpu:

—Irire iidiaca. Òagu árĩque mũhu, arĩpu Jesu.

<sup>42</sup> ĩgu eroparĩcũ ta ĩgu cami boara yaria wayoro. Òagu wapu ĩgu.

<sup>43</sup> ĩgu eropa wacũ ĩagu Jesu ĩgure turaro mera werẽpu:

<sup>44</sup> —Yũhu mure òpa ĩrare gajirãre ne werebircãque. Eropa werebiqueregu ta mu dũpũre òaro warare pahire ĩhmuqu waque, “Òagu ahrimi,” arĩdoregu. Goãmũ doreri Moiserẽ ĩgu apidiro dopa ta ĩique. Eropigu mirimagũgãre oque pahire mũ òagu warare masare mũ ĩhmuburire, arĩpu Jesu ĩgure. Òpa arĩtuhaja waque, arĩpu ĩgure.



<sup>45</sup> Īḡu eropa masare weredorebiriqerēcũ ta ĩḡuḡu waha árĩpehreri macari majarãre Jesu ĩḡure ðagũ wacũ iirare wereḡu. Īḡu eropa werera puhrũ Jesu masa bajarã erã árĩroguere wamasibiripũ. Eropigũ ĩḡu masa bajamerãgã árĩroguẽ árĩḡu. Erogue ĩḡu árĩcũ baja macari majarã ĩḡu pohrogue ejañorã.

## 2

*Jesu dũḡu buhadigũre ðagũ wacũ iĩñumi*

*Mt 9.1-8; Lc 5.17-26*

<sup>1</sup> Bajamenari puhrũ Jesu Capernaungue dujaa wapũ. Wihigue ĩḡu árĩcũ masa masiñorã. <sup>2</sup> Eropirã masa ero bajarã gamenere iri wihire ujuturia waha disiporogue wirinũgajañorã. Eropigũ Jesu erãre ðari buherire wereḡu. <sup>3</sup> Eropirã gajirã sã Jesu pohro ejariñorã. Erã wapicũrã uma dũḡu buhadigũre aĩ ejañorã. <sup>4</sup> Eropa ejarã masa bajarã árĩcũ ĩarã Jesu pohrogue aĩ ñajamasibiriñorã. Eropirã erã dũḡu buhadigũre aĩ muju wihi weca aĩ weasiri ñajaa Jesu ĩḡu niguiro weca pihri dijuñorã. “Jesu ihĩ ĩḡu dorecũrire taricũ iĩḡucumi,” arĩ pepiñorã erã. <sup>5</sup> Erã eroparĩ pepicũ masigũ Jesupũ dorecũḡure ðpa arĩ wereḡu:

—Mahũ, mu ñero iirare cóãtuhabũ, arĩḡu Jesu dũḡu buhadigũre.

<sup>6</sup> Īḡu eroparĩcũ peerã erogue doarã judio masare buherãḡu erã basi ðpa arĩ pepiñorã: <sup>7</sup> “Ihĩ eropa arĩ wereniguibiricãporo. Goãmũre ñero wereniguigũ iimi ihĩ. Īḡu masũ mari iro dopa árĩḡu aħrimi ĩḡu sã. Eropigũ ĩḡu mari ñero iirare cóãmasibeami. Goãmũ dihta masa erã ñero iirire cóãmasimi,” arĩ pepiñorã erã. <sup>8</sup> Erã eropa arĩ pepicũ ĩagũ, Jesu erã pepirire masigũ ðpa arĩḡu erãre:

—;Duhpirã mua eropa arĩ pepiri? <sup>9</sup> “Mu ñero iirare cóãtuhabũ,” yũ arĩcũ pee “Ḣyariçũḡu aħrimi,” arãa mua yũre masibiriquererã ta. Ihĩ dũḡu buhadigũre “Wahgãñũgajaque,” yũ arĩcũ ĩḡu wahgãñũgajacũ ĩarã yũ arĩra diaye árĩcũ masirãca mua. <sup>10</sup> Yũḡu masũ Goãmũ ĩḡu obeodigũ árĩḡu i yebaguere masa erã ñero iirire cóãmasia yũḡu. Mua irire masiboro dopa ĩḡure wahgãñũgajacũ iĩḡura, arĩḡu Jesu judio masare buherãre.

Eropa arĩtuhaja dũḡu buhadigũre ðpa arĩḡu:

<sup>11</sup> —Mũre arĩḡu iiaa: Wahgãñũgajaque. Curique. Mu pũḡure aĩ waque mu ya wihigue, arĩḡu ĩḡure Jesu.

<sup>12</sup> Īḡu eroparĩcũ peegũ dũḡu buhadigũḡu wahgãñũgaja, ĩḡu pũḡure aĩ árĩpehrerã masa erã ĩhuro wiria waha wapũ. Īḡu eropiicũ ĩarã erã árĩpehrerã ĩhamaria wañorã.

—Goãmũ ðagũ turagũ aħrimi. Ne ðpa iirire ĩabirimũrabũ mari, arĩñorã erã basi.

*Jesu Levĩre ĩḡu mera majagũ árĩbure sihuñumi*

*Mt 9.9-13; Lc 5.27-32*

<sup>13</sup> Eropi dipaturi Jesu ditaru turogue wapũ. Eropigũ masa bajarã ĩḡu pohrogue eja gamenerecũ ĩagũ ĩḡu erãre buherũ. <sup>14</sup> Eropa iituha, erogue árĩdĩḡu wagũ, Levĩre Alfeo magũre ĩḡu mohmeri taribugue bocajapũ. Gajirã mera oparã ya árĩburire wajasea corerã mera árĩḡu Levi. Īḡure bocajagũ ðpa arĩḡu:

—Yũ mera majagũ árĩbu arique mũḡu, arĩḡu Jesu Levĩre.

Īḡu eroparĩcũ peegũ Levĩḡu wahgãñũgaja Jesu mera waha wapũ.

15 Puhru ĩgu ĩgu buherã mera Leví ya wihire mesague ba doacũ bajarã wajasea corerã “Ñero iirã àhrima,” masa erã arĩrã erã mera ba doañorã. 16 Erogue erã doara puhru, gajirã judio masare buherã, fariseo masa sã Jesu ñero iirã mera ĩgu bacũ ãañorã. Eropa ãarã õpa arĩñorã:

—¿Duhpigũ ñero iirã wajasea corerã mera bahari Jesu? arĩ serẽpiñorã judio masare buherã Jesu buherãre.

17 Erã eroparĩcũ peegu õpa arĩ yuhripũ Jesupũ:

—Dorecurã dihta duhturure ahmama. Dorecurã duhturure amaro dopa ta “Ñegu àhraa yuhu,” arĩrã yure amarãcoma. Eropigu “Ñegu àhraa,” arĩrã dihtare erã ñero iirare bujaweredore õaripure gohrotocũ iigu aribũ yuhu. Erã basi “Õarã àhraa gua,” arĩ pepirãpure itamugu aribiribũ, arĩpũ Jesu erãre.

*Ba duhurire serẽpiñuma gajirã Jesure*

*Mt 9.14-17; Lc 5.33-39*

18 Irisubure Ñu buherã, fariseo masa sã Goãmure umupeomorã ba duhumariñorã. Eropirã masa Jesu pohro eraa ĩgure serẽpiñorã.

—Erã Ñu buherã, fariseo masa buherã sã Goãmũ ya árĩburire iirã, ba duhumarama. ¿Duhpirã mũ buherãpũ ba duhubeari? arĩñorã erã Jesure.

19 Erã eroparĩcũ pee Jesu erãre õpa arĩ yuhripũ:

—Õpa àhraa iri: Mojoto diridigu ĩgu bosenure iicũ ĩgu mera majarã bujawererã ba duhurã iibeama. ĩgu mera árĩrã mucubiri barã iima. Eropa ta yũ buherã sã yũ mera árĩrã ba duhumasibeama. 20 Yujunũ Goãmũ yure aĩcãgucumi. Eropa ĩgu aĩgãra puhru yũ buherã mera árĩsome yuhu. Eropirã irisubugue tamerare yũ buherã ba duhurãcoma, arĩpũ Jesu.

21 Erã iribojegue maja buheri mera mama buheri mera erã buhe morediacũ ĩagu õpa arĩ werenemopũ Jesu werenigui queori mera:

—Ne mama gasiro suhri gasiro mera murañe suhrirore seretu masiya mara. Eropiicũ mama gasiro mari coera puhru murañere suhrirore taragameneo, wuatariaro yehgucũ ĩaa. Eropa ta mama buherire mura buheri mera wapi moa buhebiricãro gahmea. 22 Eropirã ne igui decore imisĩri decore waibugũ gasiro ajurore mura ajurore pisãbiricãro gahmea. Eropiro igui deco pahmutarirogue mura ajurore yehgue dija wahaa. Iri ajuro yehgucũ igui deco sã cohmo, ajuro sã cohmoa wahaa. Eropirã igui decore mama ajuro mera pisãro gahmea. Eropiicũ igui deco sã cohmo beaa. Ajuro sã cohmo beaa. Eropa ta mama buheri, mura buheri mera more buhebiricãro gahmea, arĩ buhepũ Jesu erãre.

*Sabado árĩcũ Jesu buherã trigo pororire turĩñuma*

*Mt 12.1-8; Lc 6.1-5*

23 Gajinũ Sabado árĩcũ Jesu sã trigo pohegue ĩha taria wañorã. Erogue tãriarã ĩgu buherãpũ trigo pororire turĩ tari wahgãñorã. 24 Erã eropiicũ ãarã õpa arĩñorã fariseo masa Jesure:

—Peenique guare. ¿Duhpirã mũ buherã Sabadonũ mari soorinũ árĩquerecũ Goãmũ ĩgu mohmedorebiririnũre mohmeri erã? Mari dorerire tarinũgarã iima, arĩñorã erã Jesure.

25-26 Erã eroparĩcũ peegu yu buherã tarinũgarã iibeama arĩgu õpa arĩpu erãre:

—Iribojegue Davi ĩgu mera majarã mera oaboagu Goãmũ wihigue ñaja iri wihi áriri panre Goãmũ ya panre bañumi. Eropĩgu ĩgu mera majarã sãre badoregu iri panre oñumi. Iri panre pahia dihtare badorera árĩyoro. Goãmũ doreri gajirãre iri panre badorebiriyo. Irisubure Abiata waĩcũgu pahia opu árĩñumi. ¿Davi sã irire erã iirare Goãmũ yare erã gojarare buhebirari mũa? Davi iri panre bagu Goãmũre tarinũgagu iibiriñumi. Dohpagãre yu buherã sã i trigo yerire turĩ barã Goãmũre tarinũgarã iibeama, arĩpu Jesu.

<sup>27</sup> Eropã arĩtuhaja õpa arĩnemopũ:

—Goãmũ masare iituhajagu soorinũre doreñumi “Masa sooporo,” arĩgu. Eropã iigu masa inũre iiburire weregu aħrimi. Masapu inũre erã iiburire wererã árĩbeama. <sup>28</sup> Eropĩgu yũhũ masu Goãmũ ĩgu obeodigu inonũ soorinũ sãre masa erã iiburire doremasia, arĩpu Jesu erãre.

### 3

*Mojoto buhadigu õaro wañumi*

*Mt 12.9-14; Lc 6.6-11*

<sup>1</sup> Gaji Sabado árĩcũ Jesu judio masa erã buheri wihigue eja ñajapu daja. Eropĩgu mojoto buhadigu sã ero arĩpu. Eropirã iri wihi árĩrã Jesure ihanũrũñorã ĩgure weresãmorã. <sup>2</sup> Sabado árĩcũ Jesu mojoto buhadigure ĩgu õagu iicũ ĩarã, “Mari soorinũre Jesu mohmegũ iimi,” arĩ weresãdiañorã Jesure. <sup>3</sup> Eropĩgu õpa arĩpu Jesu mojoto buhadigure:

—Wahgãnũgajaque. Arique õgue, arĩpu.

Õpa arĩtuha iri wihi árĩrãre werepu:

<sup>4</sup> —¿Sabado árĩcũ õarire iicũ õabeari? ¿Ñerire iicũpũre õhari mũa pepicũ? Sabado árĩcũ masure masucũ õapũrica. Masure wejẽcũpũre õabeaa, arĩ werepu Jesu erãre.

Ĩgu eropa arĩquerecũ ta yũhribiriñorã. <sup>5</sup> Erã eropa yũhribiricũ ĩagu Jesu erãre ĩhamehtu erã mera guapu. Erã ĩgure peediabiricũ ĩagu Jesu erã mera bujawerepu. Eropĩgu mojoto buhadigure arĩpu:

—Mũ mojtore sĩsirãbeoque, arĩpu ĩgure.

Ĩgu eroparĩcũ peegu ĩgu mojtore sĩsirãbeopũ ĩgu. ĩgu eropiicũ ta õari mojoto wayoro. <sup>6</sup> ĩgu ya mojoto õari mojoto wacũ ĩarã fariseo masa wiria wañorã. Wiria Herode curu majarã mera gamenere, “¿Dohpa ii ihĩ Jesure wejẽrãcuri?” arĩ weretamuñorã erã erã basi.

*Masa bajarã ditaru tũroque árĩñuma*

<sup>7-8</sup> Eropi Jesu ĩgu buherã mera ditaru tũroque wapũ. Erã erogue wacũ ĩarã Galilea majarã masa bajarã erã pũhrũ nũrũsiañorã. Eropirã Judea yeba majarã, Jerusalén majarã, Idumea yeba majarã, Jordán waĩcũriya gajipu masegue majarã, Tiro majarã, Sidón majarã ĩgure ĩarã wañorã ĩgu iirare peenijarã. <sup>9</sup> Eropirã bajarã árĩñorã Jesu pohrore. Tuucãhmota nũgajacãñorã. Eropĩgu Jesu ĩgu buherãre gasirure amuyudorepu ĩgu doaborore. <sup>10</sup> Bajarã dorecurãre ĩgu õarã wacũ iicũ ĩarã gajirã dorecurã sã ĩgure pẽhrediañorã. <sup>11</sup> Eropirã watẽa ñajasũnirã Jesure ĩarã ĩgu pohro mereja arĩñorã:

—Mũhu Goãmu magu ãhraa, arĩ gaguiniguĩnorã erã ĩgure.

<sup>12</sup> Eropigu erãre Goãmu magu ĩgu arĩrire turaro mera gajirãre weredorebiripu Jesu.

*Jesu ĩgu buherãre doce gohra beyeñumi*

*Mt 10.1-4; Lc 6.12-16*

<sup>13</sup> Eropigu Jesu utãgugue maria ĩgu gamerãre sihupu. ĩgu eropa sihubeocũ peerã ĩgu pohrogue ejañorã. <sup>14</sup> Eropigu doce umare ĩgu mera majarãre, ĩgu obeomorãre beyepu. Gaji macarigue ĩgu yare buherã wamorãre beyedobopu Jesu. <sup>15</sup> Eropigu watẽare erã cóãburire apipu erãre. <sup>16-19</sup> Oã arĩñorã doce gohra uma ĩgu beyenirã. Simo, Santiago Zebedeo magu, ĩgu pagu magu Ñu, Andre, Felipe, Bartolomé, Mateo, Toma, Santiago Alfeo magu, Tadeo, Simo celote ya curu majagu, Juda Iscariote, oã nucure Jesu beyedobopu. Jesu Simore Pedro waĩyepu. Santiagore, Ñu mera Boanerges waĩyepu. Boanerges mari ya mera “bupu masa” waĩcuma. Juda Iscariote Jesure ĩhaturirãre ĩhmubu arĩpu. Erãre beyedobotuha Jesu dijaha wihigue ñaja wapu.

*—Jesu watĩ turari opami, arĩ weresãñuma masa*

*Mt 12.22-32; Lc 11.14-23; 12.10*

<sup>20</sup> Eropi ero dipaturi masa bajarã gamenereñorã daja erã pohro. Eropirã ĩgu ĩgu buherã sã ne bamasibiriñorã. <sup>21</sup> Eropirã Jesu acawererã ĩgu iirare peebeñorã. “Jesu goroweregu wagu iimi,” masa arĩcũ peeñorã. Eropirã ĩgu pohrogue eja ĩgure aĩgãridiariñorã.

<sup>22</sup> Gajirãpu õpa arĩñorã:

—Beelzebú ĩgure eropa iicũ iicumi. ĩgu watẽare cóãgu Beelzebú watẽa opu turari mera erãre cohãmi, arĩñorã Jerusalengue arinirã judio masare buherãpu.

<sup>23</sup> Erã eroparĩcũ peegu Jesupu erãre sihubeo werenigui queoriñe mera werepu erãre.

—Watĩ ya turari mera watẽare cóãgu iibea. Watẽa erã basi cóãmasibeama. <sup>24</sup> Eropirã yuju yeba majarã erã basi gamequeãrã iri yeba majarã pehrea wacoma. <sup>25</sup> Eropirã yuju wihi majarã erã basi erã gamequeãrã iri wihi majarã pehrea wacoma. <sup>26</sup> Eropigu ĩgu Satana watẽa opu watẽare yare cóãdoregu, ĩgu basi ta gamequeãgu iibocumi. Eropigu ĩgu pehrea wabocumi.

<sup>27</sup> Õpa ta ãhraa watĩ turagure tarinugari werediacũ: Wihi opu turagure diribigu, yajari masu ĩgu ya wihire ñajaja yajamasibeami. ĩgure ĩgu dirira puhru tamerare ñajaja yajamasimi ĩgure, arĩ werepu Jesu. Eropa arĩ werepu watĩre ĩgu tarinugarare weregu. Watĩ turagu arĩquerecũ ta Jesu ĩgure tarinugami watẽare cohã wiugu.

<sup>28</sup> Eropigu arĩnemopu Jesu:

—Diaye arĩgu iiaa mũare. Arĩpehreri masa erã ñeri iicũ sãre, erã werenigucũ sãre Goãmu cãdijimasimi. <sup>29</sup> Eropa cãdijiqueregu ta Espĩritu Santore erã ñero werenigucũ iri tamerare ne cãdijisome. Erã eropa arĩra waja eropa dipuwajacunigucãrã arĩrãcoma, arĩpu Jesu erãre.

<sup>30</sup> Jesu Espĩritu Santo turari mera mohmequerecũ erãpu “Watĩ turari mera mohmemi,” arĩñorã. Erã eropa arĩra waja Jesu eropa arĩ werepu erãre.

*Jesu acawererã ĩgure sihurã erañuma*

*Mt 12.46-50; Lc 8.19-21*

<sup>31</sup> Eropirã Jesu pagu porã ĩgu pago mera erañorã. Eropa erarã disiporogue niguirã gajirãre sihudoreñorã ĩgure. <sup>32</sup> Eropirã masa ĩgu pohrogue doarã wereñorã ĩgure.

—Mu pago mu pagu porã mera disiporogue sihuma mure erã, arñorã.

<sup>33</sup> Erã eroparĩcũ peegu ðpa arĩpu Jesu erãre buhebu:

—¿Noa àhriri yu pago yu pagu porã sã mua ĩacũ? arĩpu.

<sup>34</sup> Eropa arĩgu ĩgu pohro doarãre ĩagu ðpa arĩpu:

—Oã àhrima yu pago, yu pagu porã dopa árĩrã. <sup>35</sup> Goãmu gamerire iima oã. Eropa ta iirã yu pagu magu, yu pagu mago, yu pago iro dopa àhrima, arĩ buhepu Jesu erãre.

## 4

*Jesu oteri masu queoriñere buheñumi*

*Mt 13.1-9; Lc 8.4-8*

<sup>1</sup> Eropi dipaturi ta daja Jesu ditaru tãrogue buhenugapu. Eropa erogueru buhenugagu masa bajarã ĩgu pohrogue gamenerecũ ĩagu Jesu dohodirugue ñaja buhe payapu. Eropirã masapu yebague ditaru tãrogue niguiñorã ĩgure peemorã. <sup>2</sup> Eropigu Jesu baja werenigui queorire erãre buhepu.

<sup>3</sup> —I queoriñere peeque mua, arĩpu erãre.

—Oteri masu otegu wañumi. <sup>4</sup> ĩgu eropa otecũ gajiyeri ma tãro yurimerejayoro. Ero mehmerejarayerire mirimagu porã ahri bacãñuma. <sup>5</sup> Eropi gajiyeri utãyeri watope yurimerejayoro. Ero utãyeri watope nicu mariñariro árĩquerecũ ta, mata puhriyoro. <sup>6</sup> Eropa puhri ara árĩquero, abe ĩgu burigã asicũ, nuguri mariniyoro ñaiñaja sĩa wayoro. <sup>7</sup> Gajiyeri poracãrogue yurimerejayoro. Porapu puhri tiataria waha oterayeripure wejẽcãyoro. Eropiro iri dũca mariyoro. <sup>8</sup> Gajiyeri ðari yebapu yurimerejayoro. Õaro puhri dũcacũyoro, gajisari treinta yeri, gajisari sesenta yeri, gajisari cien yeri dũcacũyoro, arĩ buhepu Jesu.

<sup>9</sup> —Irire ðaro peeque mua, arĩnemopu Jesu.

*Jesu ĩgu werenigui queorare ĩgu buherãre wereñumi*

*Mt 13.10-17; Lc 8.9-10*

<sup>10</sup> Eropirã puhru erã seyaro árĩrã, doce buherã gajirã Jesu mera árĩrã iri queorañere masidiarã Jesure serẽpiñorã. <sup>11</sup> Erã eropa serẽpira puhru Jesu ðpa arĩ werepu:

—Goãmu masa tauro opu ĩgu árĩrire, iribojegue majarã erã masibirirare mure yu buherãre masicũ iimi Goãmu. Gajirãpũre eropiibeami ĩgu. Eropigu erãre werenigui queori mera buhea. <sup>12</sup> Eropirã erã ĩaquererã, pee masibeama. Eropirã peequererã ta masisome. Erã masirã ðaripũre gohrotoboñuma. Erã eropa gohrotocũ ĩagu erã ñero iirare cóãboñumi Goãmu. Eropa árĩquerecũ ta erãpu ne peediabeama, arĩpu Jesu.

*Jesu oteri masu queoriñere were amuñumi*

*Mt 13.18-23; Lc 8.11-15*

<sup>13</sup> ĩgu eroparĩra puhru, ðpa arĩnemopu erãre:

—¿Iñe queoriñere peenibeari m̄aa? ¿M̄aa iñe queoriñere peebirã dohpa gajĩ queorire peerãcuri m̄aa? arĩp̄u Jesu erãre.

Eropa arĩtuhaja õpa arĩ werep̄u erãre.

<sup>14</sup>—Oteri masu ïgu oteriyeri õari buheri iro dopa ãhraa. <sup>15</sup>Eropiro ma turo mehmerejarayeri, õari buheri iro dopa ta ãhraa. Eropigu masa erã õari buherire erã peecũ ïagũ Satanap̄u iri õari buherire masidorebeami erãre. Mirimagũ porã iriyerire erã dote aĩdiro dopa ta iimi. <sup>16</sup>Eropi utã watope mehmerejarayeri õari buheri iro dopa ta ãhraa. Eropirã masa õari buherire pee, mucubiriri mera mata irire pee aĩma. <sup>17</sup>Eropa pee aĩquererã ta, utã watope arĩrisari, nuguri maririsari iro dopa ta oã masa turabeama. Eropa turabirã yaha õari buherire erã peera waja gajirã erãre ñero iicũ ïarã yahap̄ure duhucãma. Gajirã erãre ñero iicũ irire bocatũbirã yahare duhucãma. <sup>18</sup>Eropi pora watope yurimerejarayeri õari buheri iro dopa ta ãhraa. <sup>19</sup>Eropirã masa õari buherire peequererã, i yeba majare wũaro guñaricũrã niyerure mahima. Gajino sãre baja gamenemoma. Erã eropiicũ irip̄u õari buherip̄ure cãhmotaa. Iri eropa cãhmotacũ masa Goãmũ gamerire iibeama. <sup>20</sup>Eropi õari yeba mehmerejarayeri õari buheri iro dopa ta ãhraa. Eropirã masa õari buherire peerã irire masima. Eropa masirã arĩrã Goãmũ ïgu gamero dopa ta iima erã. Yujurãyeri merogã õarire iima treinta yeri dũcacũro dopa ta. Gajirã wecañari õarire iima sesenta yeri iri dũcacũro dopa ta. Gajirã wũaro õarire iima cien yeri dũcacũro dopa ta, arĩ werep̄u Jesu erãre.

*Jesu sihãgodiru queoriñere buheñumi*

*Lc 8.16-18*

<sup>21</sup>Eropa arĩtuha õpa arĩnemop̄u:

—Ne, sihãgodirure masa sihãgorã m̄atasorobu docague buhapibeama. Irirure sehro doca apibeama. Irirure sihãgorã umarogue duhpeoma õaro boyoweadorerã. <sup>22</sup>Arĩpehrerã masa erã masibirirare pũhrũ masirãcoma. Sihãgodiru boyocũ mari ïhamasiro dopa ta, iribojeque erã masibirirare masirãcoma masa. <sup>23</sup>Irire õaro peeque m̄aa, arĩp̄u.

<sup>24</sup>Eropigu erãre arĩnemop̄u daja:

—Merogã masidiarã merogã masirãca. Wũaro masidiarã wũaro masirãca. Eropirã peerã õaro peenũruque. <sup>25</sup>Õaro peenũrugũ õaro masigũcumi. Peenũrubigu “Merogã peea,” ïgu arĩquerecũ ta, irip̄u dederea waroca ïgure, arĩp̄u Jesu erãre.

*Jesu coye puhri queoriñere buheñumi*

<sup>26</sup>Jesu erãre werenigui queori mera buhep̄u daja:

—Goãmũ ïgu op̄u arĩri werediacũ ojodũcare otera iro dopa ãhraa. Yujugũ coyere ojodũcayeri otemi. <sup>27</sup>Otetuhaja mũraro ta carĩ wahgã ïagũ wamũririmi. Irisubu ïgu oterayeri puhri wiriaca. “¿Dohpa puhri?” arĩ ïha masibeami irire otedigu ïgu basi. <sup>28</sup>Iri otera iri yeba mera iri gamero dũcacua. Erapũgã deyomũhta, puhru dipa poro puhri wiria wahaa. <sup>29</sup>Dũca bũgatuhaacũ ïagũ iri pororire pehami. “Pearisubuno ta ãhraa,” arĩmi. ïgu otera iri bũgarare ïgu masibiridiro dopa ta masa Goãmũ yarã erã dohpa wacũ sãre masibeami masa, arĩ buhep̄u Jesu.

*Mostazayegã queoriñere wereñumi Jesu*

*Mt 13.31-32; Lc 13.18-19*

<sup>30</sup> Eropa arĩtuha buhenemopu:

—¿Goãmũ ĩgu opu árĩri werediacũ ñeheno iro dopa ãhriri mua pepicũ? Iri werenigui queoriñe mera irire weregura. <sup>31</sup> Mostazayegã iro dopa ãhraa Goãmũ ĩgu opu árĩri. Iriyegã ĩgu otecũ miriyegã gohra ãhraa. <sup>32</sup> Eropa arĩquerero iriyegã ðaro puhri wiria. Eropiro yucugũ wuadigu wahaa. Eropirã irigu dupuri paga dupuri bugacũ ĩarã mirimagũ porã iri dupurigue suhri suama. Mostazayegã wuatariadigu bugaro dopa ta umaro majagũ mari Opure masinugarã bajamerãgã erã arĩquerecũ ta, puhruguerẽ erã bajarã warãcoma, arĩpu Jesu.

*Queori mera ĩgu buherire wereñumi Jesu*

*Mt 13.34-35*

<sup>33</sup> Eropigu iri werenigui queori iro dopa baja queorire erã masiropẽ ðari buherire buhepu erãre. <sup>34</sup> Queoriñe mariro werebiripu erãre. Puhru erã seyaro arĩrãre ðaro were amupehocãpu Jesu ĩgu buherãre.

*Jesu miruñere yusudoreñumi*

*Mt 8.23-27; Lc 8.22-25*

<sup>35</sup> Eropi irinu ñamica Jesu ĩgu buherãre ðpa arĩpu:

—Ina sipu masegue, arĩpu erãre.

<sup>36</sup> ĩgu eroparĩcũ peerã, yebague niguirãre goeriseretuhjarã dohodirugue ñajaa, Jesure aĩ taribuja wañorã. Eropirã gajirã gaji gasi mera erã puhru taribujañorã. <sup>37</sup> Erã taribujacũ iriyague miruñe burigã weãyoro. Eropiro miruñe ariro pãguri dohodirure miucãriyoro. Deco turaro ñajayoro. Merogã duhyayoro erã miriboro. <sup>38</sup> Eropa warisubu Jesu dohodiru auturogue suhri pore wecague carĩgu iipu. Eropirã erã ĩgure wahgũñorã.

—Buhegu, ¿mũhã ĩabeari? Mirirari iiaa mari, arĩñorã erã Jesure.

<sup>39</sup> Erã eroparĩcũ peegu Jesu wahgã miruñere, pãguri sãre,

—Yusuque, arĩpu.

Ĩgu eroparĩcũ ta miruñe pãguri sã yusudija pehrea wayoro. Õaro dujayoro. <sup>40</sup> Eropigu Jesu arĩpu ĩgu buherãre:

—¿Duhpirã güimaacãri mua? ¿Mua yure umupeobeari? arĩpu Jesu erãre.

<sup>41</sup> Eropa wacũ ĩarã erã ĩhamaria wañorã.

—¿Ñehmũno masũ ãhriri ihĩ miruñe, pãguri sã yuhrisũgu? arĩñorã erã basi.

## 5

*Watẽa ñajasũdigure ðagu wacũ iĩñumi Jesu*

*Mt 8.28-34; Lc 8.26-39*

<sup>1-2</sup> Eropi erã sipu masegue Gerasa majarã ya yebague taribujajañorã. Eropigu Jesupu dohodirugue sañadigu majanugajapu. ĩgu majanugajara puhru, watẽa ñajasũdigu masa goberi utã goberi watopegue arĩdigu wiriri ĩgu pohrogue aripu. <sup>3</sup> ĩgu watẽa mera goroweregu masa goberi watope arĩgu arĩmuriipu. Gajirãpu ĩgure ñeha comeda wuarida mera dirimasibirimuriñorã. <sup>4</sup> ĩgu burigã gorowerecũ ĩha bajasuburi masa ĩgure guburi diriri berori mera comedari mera dirimuririñorã. Eropigu ĩgupu comedarire nuha

tuātasiricāmuriḡu. Eropirā ĩḡu turagu árĩro mera masapu ĩḡure ñeha dirirā bocatiubiriñorā. <sup>5</sup> Eropiḡu ñami árĩcũ, umu säre masa goberĩ watopegue, utā yucague säre, eropa gaguinigui curicāmuriḡu ĩḡu. Eropiḡu utā mera ĩḡu basi dotemuriḡu. <sup>6</sup> Eropiḡu yoarogue Jesure ĩhabeo ĩḡu pohrogue omagāriḡu. Eraa merejapu Jesu core umuḡeobu.

<sup>7-8</sup> —Watēa, duhuque ĩḡure, arĩḡu Jesu.

ĩḡu ðpa arĩcũ peegu, watēa ñajasũdigu ðpa arĩ gaguiniguiḡu:  
—¿Jesu Goāmu turagu magu, ñehenore iibu iiri muḡu yure? Goāmu ĩḡu ĩaro serēa yuḡu mure. Yure ñero iibiricāque, arĩ gaguiniguiḡu watēa ñajasũdigu Jesure.

<sup>9</sup> —¿Dohpa waĩcari muḡu? arĩḡu Jesu ĩḡure.

—Gua bajarā āhraa. Eropirā “Bajarā watēa” waĩcua, arĩḡu Jesure.

<sup>10</sup> Eropiḡu Jesure turaro serēḡu:

—I yeba árĩrāre gua watēare gajipugue wadorebircāque, arĩñorā watēa masu mera árĩñirā.

<sup>11</sup> Irisubure bajarā yesea árĩñorā erā pohrore. Utāḡu gubuye ahma barā iññorā. <sup>12</sup> Ero erā baniguicũ ĩarā ðpa arĩ serēñorā watēa:

—Soā yesea pohrogue wadoreque guare. Erā mera árĩdoreque guare, arĩ serēñorā watēa masure ñajanirā.

<sup>13</sup> Erā eroparĩcũ peegu yesea pohrogue wadoreḡu Jesu erāre. ĩḡu eropa dorecũ watēa masure duhu yesea dos mil gohra árĩrāpüre ñajañorā. Erā pohrogue erā ejara puḡru yeseapu gorowere árĩpehrerā dipaturugue oma buha, ditarugue yuriñajaa sĩripehrea wañorā.

<sup>14</sup> Yesea erā eropa wacũ ĩarā, erāre ĩhadibunirāḡu güi omagā wañorā. Macague eja, iri maca majarāre campo majarā säre erā ĩarare weresĩripehocāñorā. Erā eropa werecũ peerā masapu bajarā Jesu ĩḡu iirare ĩarā arĩñorā. <sup>15</sup> Eropirā Jesu pohrogue erarā, watēa ñajasũdigure, suhri saña, pee masiḡu ĩḡu ero ðaro doacũ ĩarā ĩha uca wañorā erā. <sup>16</sup> Eropirā watēa ñajasũdigure, yesea säre erā eropa warare ĩanirā gajirāre werepehocāñorā. <sup>17</sup> Erā eropa werepehocũ peerā ero majarā Jesure turaro mera wadoreñorā.

<sup>18</sup> Eropiḡu Jesu ĩḡu dohodirugue ĩḡu ñajacũ ĩagu “Mu mera wadi-aca,” arĩ burigā serēriḡu watēa ñajasũdiguḡu Jesure. <sup>19</sup> ĩḡu eropa arĩquerecũ Jesu ĩḡure wereḡu:

—Yu mera aribita. Mu ya wihigue waha, mu pohro árĩrāre yuḡu mu opu mure ðaro iirare wereḡu waque. Mure yu mojomoro ĩarare wereque erāre, arĩḡu Jesu ĩḡure.

<sup>20</sup> ĩḡu eroparĩcũ pee watēa ñajasũdiguḡu Decapoli waĩcari macague Jesu ĩḡure ðaro iirare werenugapu. ĩḡu eropa arĩ werecũ peerā, masa árĩpehrerā pee uca wañorā.

*Jairo magore ðago ii, ne behrego säre ðago iññumi Jesu*

*Mt 9.18-26; Lc 8.40-56*

<sup>21</sup> Eropi dipaturi ta Jesu gajipu masegue ĩḡu taribujajacũ masa bajarā ĩḡu pohrogue wuuriya turogue gamenereñorā. <sup>22</sup> Eropiḡu judio masa erā buheri wihire ĩhadibuḡu Jairo waĩcugu erapu. Jesure ĩha, ĩḡu guburi pohro mereja ðpa arĩ serēḡu:

<sup>23</sup> —Yu mago sĩrigo iiamo. Eropiḡu igore mu mojoto mera duḡpeogu, igore dore taugũ arique. Muḡu eropiicũ igo masagocumo, arĩḡu ĩḡu Jesure.



<sup>24</sup> Īḡu eroparīcū pee Jesu ĭḡu mera wapu. Īḡu wacū masa bajarā nurusiagāñorā ĭḡure. <sup>25</sup> Eropigo nomeo doce bojori gohra eropa umari nucu behreniguigo ero arīpo. Ero core bajarā duhurtua igore ñero taricū iñorā igore ocoyerā. <sup>26</sup> Eropigo duhurtuare igo niyeru arīpehrerire wajayepituhapo igo ocoyedorego. Erā eropa ocoyequerecū igo muraro ta arīniguicāpo. Eropigo igo ero core igo arīdiro tauro ñero wapo. <sup>27</sup> Igo eropa ñero taririsubu Jesu ĭḡu masare ōarā iirire peerā gajirā wereñorā igore. Eropigo igo Jesu pūhrū ta masa bajarā watope aripo. Ahri Jesu suhrirore mohmepiñapo. <sup>28</sup> “Yuhū ĭḡu suhriro dihtare mohmepiñago ōago dujagoca,” arī pepipo igo. <sup>29</sup> Eropi igo mohmepicū mata igo di wirira purumujudija wayoro. Igo dūpūre ōari dūpū wacū pepipo. <sup>30</sup> Eropiḡu Jesu ĭḡu turari mera dorere ĭḡu taurare masiḡu, masa watope maji ĭapū.

—¿Noa yaha suhrirore mohmepiari? arīpū.

<sup>31</sup> Īḡu eroparīcū peerā ĭḡu buherāpū ōpa arīñorā.

—Cūhñā āhraa. Eropirā masa bajarā mure pēhregāma. “¿Noa yure mohmepiñari?” arīḡu, ¿dohpa arīḡu iiri mūhū? arī serēpiñorā ĭḡure.

<sup>32</sup> Eropiḡu Jesu ĭḡure mohmepidigore amapū. <sup>33</sup> Īḡu amaro watope igopū igo dūpū ōaro wacū pepigo ḡūi, naragā merejapo ĭḡu pohro. <sup>34</sup> Eropigo igo diaye ta werepehopo ĭḡure. Igo eropa arī werera pūhrū Jesu werepū igore:

—Maḡo, mūhū yure umupeori mera ōago dujaa dohpaguere. Mucubiriri mera waque. Dore mariro arīque, arīpū Jesu igore.

<sup>35</sup> Erā ōpa arī wereniguero watope ta Jairo ya wihi majarā erañorā,

—Mū mago sīria wahāmo. Eropiḡu buheḡure sihubita pare, arīñorā.

<sup>36</sup> Erā eropa arīquerecū ta Jesu Jairore ōpa arī werepū:

—Būjawere pepibita. Yure ḡuñaque. Umupeoque iri dihtare, arīpū ĭḡure.

<sup>37</sup> Eropa arītuha, Santiago, ĭḡu pagū magū Ñu, Pedro, erā dihtare “Yū mera arique,” arīpū Jesu. <sup>38</sup> Eropiḡu Jairo ya wihigū ejapū. Iri wihigūere masa bajarā būrigā ñehamere orerā iñorā. Erā eropa orecurā ĭha erāre arīpū Jesu:

<sup>39</sup> —¿Ñero arī ñehamere orebircāque mūa. Igo majigo sīribeamo. Carīgo iimo, arīpū Jesu erāre.

<sup>40</sup> Īḡu eroparīcū peerā erā “Eroparīcāḡu iimi ihī,” arīrā ĭḡure ĭayeñorā. Īḡupū erāre disiporogue wiupehocāpū. Majigo pagū sumarā mera, Jesu ĭḡu mera majarā igo pohrogue sihuñajapū.

<sup>41</sup> Eropiḡu Jesu igo mojotore ñeha arīpū igore:

—Talita cumi, arīpū ĭḡu. Talita cumi mari ya mera “Majigo wahḡaque,” arīdiaro iiaa.

<sup>42</sup> Īḡu eroparīcū ta igo majigo sīridigo mūro wahḡānūgaja curipo. Doce bojori opago arīpo igo. Igore ĭḡu eropa iicū ĭarā ūcataria wañorā.

<sup>43</sup> Eropiḡu Jesu irire ĭḡu iirare weresiridorebiripū. Eropiituha igore bari ejodorepū.

## 6

*Jesu ya maca majarā Nazare majarā Jesure umupeobiriñuma  
Mt 13.53-58; Lc 4.16-30*

<sup>1</sup> Eropigu ero árīdigu waha wa, ĩgu buherā mera ĩgu ya yebague ejaru. <sup>2</sup> Eropigu Jesu Sabado árīcũ judio masa erā buheri wihigue buhenugaru. ĩgu eropa buhecũ masa bajarā ĩgure ĩha masirā ĩgure pee uca wañorā. Őpa arīñorā:

—¿Dohpa ii masiyuri ihĩ i buherire? ¿Dohpa ii ĩgu deyoro moarire ii masiri? <sup>3</sup> Ihĩ taboa mohmeri masu María magu āhrimi. Santiago, José, Juda, Simo, erā tĩgu āhrimi. Eropirā ĩgu pagu porā nome i maca āhrima. Eropigu ĩgu mari iro dopa árĩgu āhrimi, arīñorā erā Jesure peenijarā. Eropirā Jesure umupeobiriñorā. <sup>4</sup> Erā umupeobiricũ ĩagu ōpa arĩpu Jesu:

—Árĩpehrerogue Goãmu yare weremuhtadigure gajirā umupeoma. Erā eropa umupeoquerecũ ta ĩgu ya maca majarā, ĩgu acawererā, ĩgu ya wihi árĩrā dihta umupeobeama ĩgure. Eropirā yure umupeobeaa mua ohõ yuhu masadigu árīcũ ĩarā, arĩpu Jesu erāre.

<sup>5</sup> Eropigu iri maca árĩgu Jesu Goãmu turari mera baja deyoro moarire iimasibiripu. Dorecurā bajamerāgā dihtare ĩgu mohmepi taupu erā dorere. <sup>6</sup> Eropigu ero majarā Jesure erā umupeobiricũ ĩagu, “¿Dohpa árĩrono mera yure gamebeari erā?” arĩgu uca waru ĩgu. Eropigu Jesu ero pohro árĩri macarigue buhegu waha waru.

*Jesu ĩgu buherāre buhedore obeoñumi*

*Mt 10.5-15; Lc 9.1-6*

<sup>7</sup> Eropi Jesu doce ĩgu buherāre sihubeo perāyeri dihta obeopu erāre macariguere buhedoregu. Eropigu ĩgu dorerire opu erāre watēare masa ñajanirāre erā cóāburire. <sup>8</sup> Erāre obeogu gajinore aĩadorebiripu. Doberire, barire, niyerure aĩgādorebiripu erāre. Erā tuari yucu dihtare aĩgādorepu erāre. <sup>9</sup> Eropigu gaji zapaturre aĩadorebiripu erāre. Yujuñe ta suhrirore sañadorepu. Peñe sañadorebiripu erāre. <sup>10</sup> Eropigu ōpa arĩ werepu erāre:

—Árĩpehreri macarigue erā muare carĩro ocũ, iri wihi ta carĩque. Ne warāgue wiriaque iri wihire. <sup>11</sup> Eropirā gaji macari majarā muare erā gamebiricũ, erā mua buherire peediabiricũ ĩha iri macare tari wahgā waque. Eropi warā, mua guburi maja nicure moje siripique mua erā ya dipuwajare masicũ iimorā erāre, arĩpu Jesu erāre.

<sup>12</sup> Eropirā erā doce buherā waha masare buherā, erā ñero iirare bujaweredoreñorā. Őaripure iidoreñorā erāre. <sup>13</sup> Eropirā bajarā watēare masare ñajanirāre cóāñorā. Dorecurāre uyu mera sūrā ōarā wacũ iñorā.

*Ñu waĩyegure gajirā wejēñuma*

*Mt 14.1-12; Lc 9.7-9*

<sup>14</sup> Eropirā Jesu ĩgu ōaro iirare masa bajarā masiñorā. Eropigu opu Herode sã irire peebeopu. Eropi peebeogu ōpa arĩ guñapu ĩgu Jesure:

—Ñu waĩyemuridigu sīridigu muru dipaturi masa dehyoagu iicumĩ daja ihĩ Jesu. Eropi masadigu árĩgu ĩgu turarire opami ĩgu deyoro moarire iigu, arĩ pepiripu Herode. Jesure “Ñu muru ta āhrimi,” arĩ pepiripu ĩgu Ñure wejēdorera puhru.

<sup>15</sup> Gajirā ōpa arĩ pepiriñorā:

—Elia āhrimi, arĩ pepiriñorā. Gajirāpu:

—Goãmũ yare weremũhtadigu iribojegue majarã dopa ãhrimi ĩgu, arĩ pepiñorã Jesure.

<sup>16</sup> Erã eropa arĩ pepiquerecũ, Herodepũ Jesu ĩgu iirare peegu õpa arĩ pepipũ:

—Jesu Ñu mũrũ ta áricumi. Ñu dipurure yũ tabedigu masa dehyoagũ iicumi daja, arĩ pepipũ.

<sup>17-18</sup> Ero core Herode ĩgu pagũ marapo Herodia waĩcũgore ehma ĩgo mera marapocũpũ. ĩgu eropa iicũ Ñu Herodepũre õpa arĩ werenĩguipũ:

—Mũ pagũ magũ marapore marapocũgu Goãmũ dorerire tarinũgagu iiaa mũhũ, arĩpũ Ñu Herodere.

Ĩgu eropa arĩra dipuwaja Herode Ñure ñeadore peresugue acumũripũ. ĩgũre eropa iicũ gamepo ĩgu marapo Herodia. <sup>19</sup> Eropigo Herodiapũ Ñure ĩhaturinijago ĩgũre wejẽdorediaripo. Eropiidiaque-rego ta wejẽdoremasibiripo Herode opũpũ gamebircũ. <sup>20</sup> Herodepũ “Ñu õarire iigu õagũ ãhrimi,” arĩ pepi Ñure gũipũ. Eropigu Herode Ñu werenĩguirire ĩgu peegu guñaturabiripũ. Eropa guñaturabiriqueregũ ta mucubiriri mera ĩgũre peegu wejẽdorebiripũ ĩgu Ñure. <sup>21</sup> Irisubu ta Herodia ĩgo ĩgũre wejẽdorera ejayoro. Irisubure Herode ĩgu masa dehyoaranũ áricũ ĩgu gobierno majarãre, ĩgu surara oparãre, Galilea majarã oparã sãre sihu bosenu iipũ ĩgu. <sup>22</sup> Eropigo ĩgu marapo mago bosenu ĩago erago erã ĩhuro baya ĩhmupo. ĩgo baya ĩhmucũ ĩarã Herode ĩgu sihunirã mucubiriñorã. Erã eropa mucubircũ ĩagũ õpa arĩpũ Herode ĩgore:

—Mũ gamerire serẽque yũre. Eropigu mũ serẽrire mũre ogũra. <sup>23</sup> Goãmũ mera diaye arãa mũre. Mũ serẽropẽ yahare deco mera ogũra mũre, arĩpũ ĩgu ĩgore.

<sup>24</sup> ĩgu eropa arĩcũ peego ĩgo pago pohrogue waha serẽpipõ:

—¿Ñehenore serẽgocuri yũhũ? arĩ serẽpipõ ĩgo pagore.

—Ñu waĩyegũ dipurure serẽque, arĩpo pagopũ.

<sup>25</sup> ĩgo eroparĩcũ peego mũmũdiaro mera opũ Herode pohrogue eja arĩpo:

—Dohparagã Ñu waĩyegũ dipurure tabetadoreque. Eropigu soropa mera ĩgu dipurure oque yũre, arĩpo ĩgo.

<sup>26</sup> ĩgo eroparĩcũ opũ Herode burigã bujawerepũ. ĩgu masa erã peero, “Mũ serẽrire mũre ogũra,” arĩtuhapũ ĩgu. Eropigu ĩgu ĩgu eropa arĩrare gũhyasĩrigũ “Mũre osome,” arĩmasibiripũ ĩgore. ĩgu sihunirã ĩhuro “ĩbeaa,” arĩmasibiripũ. <sup>27</sup> Eropigu mata surarare peresu arĩrãre coregure Ñu dipurure tabeta aĩgãridorepũ. <sup>28</sup> ĩgu eropa dorecũ peegu surarapũ waha, ĩgu dipurure tabeta, soropa mera aĩgãripũ. Aĩgã nómeore ĩgu marapo magore ópũ. Eropigo ĩgo iripare ñeha ĩgo pagore o taupo daja.

<sup>29</sup> Eropirã Ñu buherã irire peenijarã erogue waha, ĩgu dũpũre aĩ masa gobegue aĩgã apiñorã.

*Jesu cinco mil masare barire oñumi*

*Mt 14.13-21; Lc 9.10-17; Jn 6.1-14*

<sup>30</sup> Eropi Jesu ĩgu buhedore obeonirã ĩgu pohrogue dujajañorã daja. Erã iirare erã buherare wereñorã erã ĩgũre. <sup>31</sup> Irisubure masa bajarã

eropa majiniguirã erãre ne baro iibiriñorã. Eropigu òpa arĩpu Jesu ìgu buherãre:

—Masa marirogue mari seyaro soonirã warã, arĩpu erãre.

<sup>32</sup> Eropirã erã seyaro gasiru mera masa marirogue wariñorã. <sup>33</sup> Erã eropa wacũ ìarã masa bajarã erãre masiñorã. Eropa masirã baja macari majarã mague waha, Jesu ìgu ejaborogue omajatuhañorã.

<sup>34</sup> Erã eropa ejacũ Jesu tuhajapa, gasirugue sañadigu majanugajagu ìgu bajarã masare ìapu. Oveja ìhadibugũ moorã iro dopa áriñorã erã Jesu ìgu ìacũ. Eropigu erãre mojomoro ìagu baja buherũ erãre.

<sup>35</sup> Ñamicague doce ìgu buherã Jesu pohrogue eja òpa arĩñorã ìgure:

—Ohõ maca marirogue ãhraa. Ñamicague ãhraa. <sup>36</sup> Ògã áriri macarigue masare wadoreque. Erã baburire asũrã waporu, arĩriñorã erã Jesure.

<sup>37</sup> —Mũa basi ta barire oque erãre, arĩpu Jesu erãre.

Ìgu eroparicũ peerã òpa arĩ yuhriñorã:

—¿Wũaro niyerupũri mera gua dohpa ii asũbocuri panre masa bajarã erã baburire? arĩñorã erã Jesure.

<sup>38</sup> —¿Di nũcu pan ãhriri òguere? Ìarã waque, arĩpu ìgu erãre.

Ìgu eroparicũ erãpu barire boca òpa arĩñorã:

—Cinco dipuru ãhraa pan. Wai perã ãhrima, arĩñorã.

<sup>39</sup> Erã eroparicũ peegu Jesu masare dipa cururi ero taa áriro weca doadorepu masare. <sup>40</sup> Ìgu eroparicũ peerã erã dipa cururi doañorã. Yuju curure cien gohra áriñorã. Gaji curure cincuenta gohra áriñorã. <sup>41</sup> Erã doapehrecũ ìha Jesu cinco dipuru pan dipurure aĩ, erã perã waire aĩ, umarogue ìhamemuju Goãmure “Òhaa,” arĩpu.

Eropa arĩ serẽtuha iri pan dipurure nuha ìgu buherãre òpu masare gueredoregu. Eropigu wai perãre gueredorepu áripehrerãre. <sup>42</sup> Eropirã áripehrerã baha yapia wañorã. <sup>43</sup> Erã ba ðuarare doce pui ri gohra sea gameneo ujutu doboñorã erã wai sãre eropa ta. <sup>44</sup> Eropirã panre banirã ùma dihtare queocã cinco mil gohra áriñorã.

*Jesu deco weca curiñumi*

*Mt 14.22-27; Jn 6.16-21*

<sup>45</sup> Irisubu ta Jesu ìgu buherãre dohodirugue ñajajadore, gajipu masegue Betsaida yebague ìgu core taribuja yudorepu. Eropigu erã taribuja wara puhru Jesupu masare goeriserepu. <sup>46</sup> Goeriseretuhaja utãgugue muria ìgu seyaro Goãmure serẽgu waha wapũ. <sup>47</sup> Puhru ñamicague áricũ dohodirupu ìgu buherã wadiru ditaru deco áriyoro. Erã ero payacũ Jesu yujugu ta erã taribujaridirogue áripu. <sup>48</sup> Miruñe ðururo weã dujuyoro erãre. Eropigu erã ñero tari wejacũ ìhabeopu Jesu erãre. Eropigu boyo muririboro core cãreña wahgãrisubu erã pohro wagu deco weca cuhraphi wahgã wapũ. Erãre ìgu tarigãripũ.

<sup>49</sup> Ìgu tarigãquerecũ ta, ìgu deco weca aricũ ìarã ìha uca wañorã. “Sĩridigu murũ wafĩ ãhrimi,” arĩ pepi gaguiniguñorã. <sup>50</sup> Erã áripehrerã ìgure ìarã ìha burigã uca wañorã. Erã eropa ìha ucacũ ìagu Jesu werepu erãre:

—Ne yũre ìha ucabiricãque. Yũhu ta ãhraa. Güibita, arĩpu erãre.

<sup>51</sup> Eropa arĩtuha ìgu erã mera dohodirugue ñaja wapũ. Ìgu ñajara puhrugã ta miruñe taria wayoro. Eropa wacũ erãpu ucataria

wañorã. <sup>52</sup> Īḡu pan dipurure baja iirare guñabiriñorã erã. Īḡure ðaro masibiriniñorã.

*Jesu Genesare majarãre dorecurãre ðarã wacũ iĩnumi*

*Mt 14.34-36*

<sup>53</sup> Eropi erã taribujaja, Genesare yebague eja, turogãgue payañorã. <sup>54</sup> Eropirã erã dohodirugue árĩnirã erã majacũ ta masapũ Jesure ĩha masiñorã. <sup>55</sup> Eropa ĩha masirã árĩpehrerogue erã ya yebague omaja, dorecurãre erã pũyucũ mera aĩḡãriñorã. “Jesu erogue ãhrimi,” masa erã aricũ pee eroguerẽ aĩ ejañorã. <sup>56</sup> Eropirã árĩpehrero ĩḡu waroguerẽ paga macariguere, mũta macarigãguere, campogue, erã wari mariguere erã masa dorecurãre aĩ apiñorã Jesure coremorã. Eropirã Jesu erã pohro ĩḡu ejacũ mohmepiñadيارã turaro serẽñorã ĩḡure.

—Mũ suhriro ojogoro dihtare mohmepiñadoreque ḡuare, arĩ serẽñorã erã.

Eropirã ĩḡu suhrirore mohmepinirã nũcũ ðarã wañorã.

## 7

*Masa ñerã wacũ iirire wereñumi Jesu*

*Mt 15.1-20*

<sup>1</sup> Eropi Jerusalengue arinirã judio masare buherã, fariseo masa mera Jesu pohrogue gamenereñorã. <sup>2-4</sup> Fariseo masa árĩpehrerã, gajirã ḡua acawererã judio masa mera erã ñecũ sũmarã dorediro dopa ta erã mojotorire coero mariro babirimariñorã. Eropirã doberi duarã pohrogue wanirã dujajarã erã dorerire iimorã, erã mojotorire coero mariro babirimariñorã erã. Eropirã baja gaji erã dorerire erã ñecũ sũmarã iidorerire iimariñorã erã. Tasa parire yujuropa coe, máticasorire coe, comesorire coe, erã iiguaro dopa ta iimariñorã erã judio masa “Goãmũ eropa gahmemi,” arĩrã. Eropirã Jesu pohrogue gamenererã Jesu buherã erã ñecũ sũmarã dorediro dopa ta erã mojo coebiricũ ĩañorã fariseo masa. <sup>5</sup> Eropa ĩatuhajarã Jesure serẽpiñorã:

—Mũ buherã mari ñecũ sũmarã mũra erã dorediro dopa ta erã baboro core erã mojo coebeama. ¿Duhpirã mari dorerire iibeari erã? arĩñorã erã Jesure.

<sup>6</sup> Erã eroparicũ peegũ werepũ Jesu erãre:

—Masa erã ĩabiropũre ñero iicorerã ãhraa mũa. Goãmũ yare weremuhtadigũ Isaia mũare iribojegue diaye ta weremariñumi. Ōpa arĩ gojañumi Goãmũ ya wereniguirire:

Oã masa yũre ðaro wereniguiquererã ne yũre umupeobeama. Erã ya sĩporãripũ gajipũgue ãhraa. Yũre ne mahibeama. <sup>7</sup> Goãmũ ya doreri wereniguibodirore erã ya werenigui dihtare buhema erã. Eropirã yũre umupeo erã sĩbuipeori duhpiburi árĩbeaa yũre, arĩmi Goãmũ, arĩ gojañumi Isaia iribojegue.

<sup>8</sup> Iri diaye ta ãhraa. Goãmũ dorerire iibeaa mũa. Mũa ñecũ sũmarã mũra árĩricũri dihtare iiaa, arĩpũ Jesu erãre.

<sup>9</sup> Eropigũ erãre wereniguinemopũ daja:

—Mũa ñecũ sũmarã mũra árĩricũre iiduhubirã ta Goãmũ yapũre cohãa mũa. <sup>10</sup> Iribojegue ōpa arĩñumi Moise Goãmũ dorerire: “Mũa pagũ sũmarãre umupeoque. Yujugũ ĩḡu pagũ sũmarãre ñero werenigui coredigũ ĩḡu wejẽbu árĩḡucumi,” arĩñumi Moise. <sup>11</sup> Moise

eropa arīquerecũ ta, mũapũ masare õpa arĩ weredorea erã pagũ sumaráre. “Mũare itamumasibea. Mũare yũ oborare Goãmũ ya árĩburire opehocãbũ, arĩque mũa pagũ sumaráre,” arĩ weredorea mũa. <sup>12</sup> Eropa arĩ weredorerã erã pagũ sumaráre erã umupeobiricũ iiaa mũa erãre. <sup>13</sup> Eropirã Goãmũ ĩgũ dorerire tarinũgarã iiaa mũa mũa ñecu sumará ya doreri dihtare iirã. Gajirãre mũa buheri dihtare peedorea mũa. Baja eropa árĩrĩre iiaa mũa, arĩpũ Jesu erãre.

<sup>14</sup> Eropa arĩtuha masare sihubeo õpa arĩpũ daja:

—Mũa árĩpehrerã peeque yũre. Yũ arĩrĩre õaro masique mũa. <sup>15</sup> Mũa disiro ñajaripũ mũa baripũ ñerã wacũ iibea. Mũa disiro wiriripũ, mũa wereniguiripũ mũare ñerã árĩcũ iiaa. <sup>16</sup> Yũre õaro peeque, arĩpũ Jesu.

<sup>17</sup> Eropa arĩtuha Jesu masa pohro árĩdigũ waha wihigue ñajaa wapũ. ĩgũ eropa ñajacũ ĩarã ĩgũ buherãpũ ĩgũ wererare serẽpiñorã. Erã eropa serẽpicũ peegũ õpa arĩpũ Jesu:

<sup>18</sup> —¿Ne peenibeari mũa sã? Mũa bari disiro ñajaripũ mũare ñerã masa wacũ iibea. ¿Irire masibeari? <sup>19</sup> Iri mũa pepirigue ñajabeaa. Mũa parugue ñajaja taria wahaa, arĩpũ Jesu.

Eropa arĩgũ “Árĩpehreri bari õari bari áhrra,” arĩgũ iipũ. <sup>20</sup> Õpa arĩnemopũ:

—Mũa wereniguiripũ, mũa disiro wiriripũ mũa pepiri áhrra. Mũa pepiripũ mũare ñerã masa árĩcũ iiaa. <sup>21</sup> Mũa pepirigue õpa ñeri iinũgaa: Ñero pepiri, nomere gameri, yajari, masare wejẽri, <sup>22</sup> gajigũ marapo mera ñero iiri, gajirã yare turaro uaribejari, ñetariari iiri, gũyari, ñeri uaribejari, gajirã gajinore opacũ ĩhaturiri, ñero quere wereri, gajirãre tarinũgadiari, pee masibiriri iinũgaa. <sup>23</sup> Árĩpehreri i ñeri mũa pepirigue árĩnũgari mũare ñerire iicũ ñerã árĩcũ iiaa, arĩpũ Jesu.

*Judio maso árĩbigõ Jesure umupeoñumo*

*Mt 15.21-28*

<sup>24</sup> Eropigũ Tiro waĩcũri maca pohroque, Sidón waĩcũri maca pohroque wapũ. Eroque ejagũ ero árĩri wihigue ñajaa wapũ. Eropigũ gajirãre ĩgũ árĩri wihire ne weredorebiripũ. ĩgũ eropa duhridiaque-regũ ta duhrimasibiripũ. <sup>25</sup> ĩgũ ejacũ pee mata yujugo nomeo ĩgũ pohro ejapo. Igo mago watĩ ñajasũdigo árĩpo. Gajirã Jesu iira querere peedigo árĩpo. Igo Jesu pohro eja ĩgũ guburi pohro merejapo. <sup>26</sup> Igo judio maso árĩbigõ Grecia majago árĩpo. Siro Fenicia árĩyoro igo masa dehyoara maca. Jesu pohro mereja ĩgũre turaro serẽpo:

—Watĩre wiubasaque yũ magore, arĩ serẽpo igo Jesure.

<sup>27</sup> Igo eroparĩcũ peegũ õpa arĩpũ Jesu igore:

—Negohrare wihi opũ porã bamũhtaporo. Erã porã ya barire diayeare ocũ ero wabeaa. Israe masa yare gaji yeba majarãre yũ omũhtacũ ero wabeaa, arĩpũ Jesu igore.

<sup>28</sup> —Eropa ta áhrra opũ. Eropa arĩquerecũ ta barisubu árĩcũ erã diayeã sã yuhridjarire bacohrema. Gaji yeba majago yũ arĩquerecũ, yũ sãre itamuque mũhũ, arĩpo igo ĩgũre.

<sup>29</sup> —Mũhũ eropa õaro arĩ yũhricũ mũ magore watĩre wiubasatuhabũ. ĩago waque, arĩpũ Jesu igore.

<sup>30</sup> Īḡu eroparīcū peego waha, igo ya wihigue eja, igo magore camague oyagore waŕi moogoguere eja ĩapo.

*Peebigure, wereniguimasibigure ōaḡu wačĩ iĩnumi Jesu*

<sup>31</sup> Irisubure Jesu sã Tiro waĩcūri maca pohrogue árīdigu waha, Sidón waĩcūri macare eja tarigã, Decapoli waĩcūri macare eja tarigã, Galilea waĩcūri ditarugue ejañorã pare. <sup>32</sup> Eropirã peejabigure, wereniguibigure aĩḡarĩñorã gajirã Jesu pohrore.

—Mũ mojoto mera mohmepiñaque ĩḡure, arĩ serēñorã erã ĩḡure.

<sup>33</sup> Erã eroparīcū peegu Jesupũ peejabigure aĩḡã, masa marirogue aĩ ejaḡũ. Erã seyaro arĩñorã. Eropigu Jesu ĩḡu mujusĩri mera ĩḡu gamirire pupũ. Eropigu ĩḡu disico mera ĩḡu nerore mohmepiñaḡũ.

<sup>34</sup> Eropiituhaja ũmaro ĩhamuju sĩ aĩ ōpa arĩḡũ:

—Efata, arĩḡũ Jesu. Efata mari ya mera “Pãḡũque,” arĩro iiaa. Eropa arĩḡũ ĩḡure peedoreḡũ iipũ. Eropigu wereniguidoreḡũ iipũ.

<sup>35</sup> Īḡu eroparīcū ta ĩḡu peejabigu peepũ. Īḡu nero niričũ pepigu ōaro wereniguinḡapũ. <sup>36</sup> Eropigu Jesu irire ĩanirãre gajirãre weredorebiripũ. Eropa weredorebiriqerēcũ, erãḡũ gajirãre burigã werepehocãñorã. <sup>37</sup> Eropirã masa pee ũca waha ōpa arĩñorã:

—Arĩpehreri ōaro iimi. Peejabirã sãre ōaro peecũ iimi. Werenigu-ibirã sãre ōaro wereniguicũ iimi Jesu, arĩñorã masa.

## 8

*Cuatro mil masare bari oñumi Jesu*

*Mt 15.32-39*

<sup>1</sup> Irisubure daja dipaturi masa bajarã erã gamenerera pũhrũ, bari moorã erã árīcũ ĩaḡu Jesu ĩḡu buherãre sihubeopũ:

<sup>2</sup>—Oã masa ũhrenũ gohra yũ mera árĩtuhajama. Erãre bari pehrea waca. Eropigu erãre mojomoro ĩhaa yũhũ. <sup>3</sup> Gajirã erã mera majarã yoarogue arinirã ãhrima. Erã babiriqererã erã ya wirigue dujaacũ gamebirica. Mague warã erã oaboarã turabiribocoma. Eropigu erãre barire odiaca, arĩḡũ Jesu ĩḡu buherãre.

<sup>4</sup> Īḡu eroparīcũ ĩḡu buherã ĩḡure arĩñorã:

—¿Duhpĩ mari ōguere masa mariroguere barire bocabocuri erãre ejomorã? arĩñorã Jesu ĩḡu buherãḡũ.

<sup>5</sup>—¿Di nũcũ dipuru pan dipuru opari mũa? arĩ serēpipũ Jesu erãre:

—Siete pan dipuru ãhraa, arĩñorã.

<sup>6</sup> Eropigu ĩḡu masare taa árĩro weca doadoreḡũ. Tuhajanugu siete pan dipurure aĩ, Goãmure “Ōhaa,” arĩ serēḡũ. Eropa arĩ serētuhaja pan dipurure nuha ĩḡu buherãre óḡũ gueredoreḡũ. <sup>7</sup> Eropirã waigã sãre bajamerãḡã opañorã erã. Eropigu waigãre aĩ Goãmure “Ōhaa,” arĩ serē, ĩḡu buherãre masare gueredoreḡũ. <sup>8</sup> Masa irire barã yapia wañorã. Erã ba duharare siete puiri gohra aĩ gameneo ũḡutu doboñorã. Erã masa cuatro mil gohra arĩñorã. <sup>9-10</sup> Eropiituha Jesu masare goeriserepũ waḡũ. Erãre goeriseretuhaja Dalmanuta waĩcūri maca pohrogue waha waḡũ.

*Fariseo masa deyoro moariñere ĩadiariñuma*

*Mt 16.1-4; Lc 12.54-56*

11 Ero pũhrũ fariseo masa Jesu mera dũyatorã erañorã. Erã Jesure Goãmũ turari mera deyoro moariñere iidoreriñorã. Īgũ ii ĩhmunasibiricũ ĩadiariñorã. Īgũ iimasibiricũ “Goãmũ ĩgũ obeodigu áribeami,” arĩdiariñorã. 12 Erã õpa dorecũ peegũ Jesu turaro bujawere siñaja õpa arĩpũ:

—¿Mũa dohpague majarã duhpirã Goãmũ ĩgũ turari mera deyoro moarire ĩadiari? Diaye arãa mũare. Dohpague majarã mũare ne deyoro moarire ii ĩhmusome yũhũ, arĩpũ Jesu erãre.

13 Õpa arĩtuha waha dohodirugue ñaja gajipũ masegue waha wapũ ĩgũ buherã mera.

*Fariseo masa, Herode ya curu majarã sã erã ñeri buherire wereñumi Jesu*

*Mt 16.5-12*

14 Eropã warã panre cãdijiñorã. Dohodirugure yujuru ta panrure opañorã erã. 15 Eropigũ Jesu guhyaro mera werepũ ĩgũ buherãre:

—Õaro iique. Fariseo masa, Herode ya curu majarã sã erã pan bugacũ iiburire õaro iique. Guhya áhraa iri, arĩ werepũ erãre.

16 Īgũ fariseo masa sã erã buherire eroparĩcũ pee, ĩgũ buherãpũ peewisirã irire erã basi wereniguiñorã.

—Mari panre mari aĩgãribiricũ ĩagũ eropa arĩcumĩ ĩgũ, arĩñorã erã basi.

17 Erã eropa arĩrare masigu õpa arĩpũ Jesu erãre:

—¿Duhpirã mũa pan cãdijirare guñari mũa? ¿Mũa masibeari? ¿Peenibeari mũa dohpa? ¿Peediabeari mũa? 18 ¿Cuiricũrã áriquererã ĩabeari mũa? ¿Gamiricũquererã ta peebeari mũa? ¿Mũa yũ iirare guñabeari? 19 ¿Yũ cinco mil umare cinco dipuru panre yũ nuha orare guñabeari mũa? ¿Erã yapĩ weorare di nũcũ puiri pan dipure mũa ujutura puirire aĩari mũa? arĩ serẽpipũ Jesu erãre.

—Doce puiri, arĩñorã erã ĩgũre.

20 —¿Eropi yũhũ siete pan dipurure cuatro mil masare yũ ora pũhrũ di nũcũ puiri ujutura puiri aĩari mũa? arĩpũ Jesu erãre daja.

—Siete puiri, arĩ yũhriñorã erã.

21 —¿Eropa irire ĩaquererã ta masibeari mũa dohpa? arĩpũ Jesu erãre.

*Jesu cuiri deyobigure ĩacũ iĩñumi*

22 Eropi erã Betsaida waĩcũri macague erã ejacũ ĩarã, masapũ cuiri deyobigure aĩgãriñorã.

—Īgũre mohmepique, arĩ turaro serẽñorã erã Jesure.

23 Eropigũ Jesu cuiri deyobigure mojoto ñeha iri maha tũrogue ĩgũre taragãpũ. Aĩ eja ĩgũ cuirire purimetupũ disico mera. Eropigũ ĩgũ mojoto mera ĩgũre mohmepipũ.

—¿Mũhũ ĩacũ dehyori? arĩ serẽpipũ Jesu ĩgũre.

24 Īgũ eroparĩcũ ĩgũpũ ĩagũ õpa arĩpũ:

—Masare ĩhaa. Erãre ĩaquerecũ erã curicũ yucũ iro dopa dehyoma, arĩpũ ĩgũ cuiri deyobigũpũ.

25 Īgũ eroparĩcũ peegũ Jesupũ ĩgũ mojotori mera ĩgũ cuirire mohmepipũ daja. Īgũ eropa mohmepira pũhrũ cuiri deyobigu ĩgũ turaro ĩacũ õaro deyoyoro pare. Eropigũ áripehrerire õaro ĩapũ ĩgũ.

26 Eropigũ Jesu ĩgũre ĩgũ ya wihigue omedijugũ õpa arĩpũ:



—Macague tamerare wabiricâque. Eropigu maca majaräre i yu iirare gajiräre weresiribiricâque, arîp̄ Jesu îgure.

*Jesu îgu diaye ta Cristo árîrire wereñumi Pedro*

*Mt 16.13-20; Lc 9.18-21*

<sup>27</sup> Eropi Jesu îgu buherä mera Cesarea Filipino waïcuri maca pohro árîri macarigue wanemoñorä. Erogue wagu Jesu serëpiñap̄ îgu buheräre:

—¿Nihino árîcuro yuh̄u masa erä yure pepicü? arî serëpiñap̄ îgu.

<sup>28</sup> Îgu eropa arî serëpiñacü peerä îgu buherä yuhriñorä:

—“Ñu waïyegu ährimi,” arîma mure. Gajirä “Elia ährimi,” arîma. Gajiräp̄ “Goâm̄u yare weremũhtanirä mera majagu ährimi,” arîma, arî yuhriñorä îgu buherä îgure.

<sup>29</sup> Erä eropa arîra p̄hr̄u Jesu serëpinemop̄u eräre:

—¿M̄ap̄u m̄ua pepicü nihino árîcuro yuh̄u? arî serëpip̄u.

Pedrop̄u yuhrip̄u îgure:

—M̄uh̄u Cristo Goâm̄u îgu obeodigu ähraa, arî yuhrip̄u Pedro.

<sup>30</sup> Îgu eroparicü peegu Jesu ðpa arîp̄u:

—Yure “Cristo ährimi îgu,” ne arî weresiribiricâque gajiräre, arîp̄u eräre.

*Jesu îgu sîriburiñere îgu masa m̄uriaburiñe säre weremũhtañumi*

*Mt 16.21-28; Lc 9.22-27*

<sup>31</sup> Eropigu îgu eräre buhenugap̄u ðpa arî weregu:

—Yuh̄u masu Goâm̄u îgu obeodigu ähraa. Eropigu burigä ñero tarigüca. Yure eropa ta waro gahmea. Murä, pahia oparä, marire buherä sä yure gamebirä yure wejërâcoma. Erä yure eropa wejëquerecü, uhrenu p̄hr̄u masa m̄uriaguca, arîp̄u Jesu eräre.

<sup>32</sup> Eropa arîgu erä ðaro peeboro dopa ðaro weregu iip̄u eräre. Îgu eroparicü peegu Pedrop̄u gajip̄u ñarigä Jesure aigä îgure arîp̄u. “Eropa arîbiricâque,” turaro mera arî werep̄u. <sup>33</sup> Îgu eropa arîdorebiricü peegu Jesup̄u îgu buheräre majinugaja, turip̄u Pedroro.

—Satana iro dopa wereniguigu iiaa m̄uh̄u. Eropa arîbiricâque. M̄u pepiri masa ya ähraa. Goâm̄u ya árîbeaa, arîp̄u îgu Pedroro.

<sup>34</sup> Eropa arîtuha masare îgu buherä mera sihubeo ðpa arîp̄u:

—Yujugu yu mera majagu árîdiaḡu îgu gamero iidiarire duhucâgucumi. Eropigu îgu yu mera majagu îgu árîri dipuwaja ñero tarigucumi. Ñero tariqueregu yahare iiniguicâgucumi. <sup>35</sup> Yujugu masu îgu ya árîburi dihtare pepigu îgu dederea wagucumi. Eropigu gajigu yaha árîburi dihtare iigu, ðari buheri säre iigu, árîp̄hrerineri yu mera umarogue ðaro árîgucumi. <sup>36</sup> Yujugu masu i yeba majare árîp̄hrerire opaqueregu, peamegue wagu ðarire wajasome.

<sup>37</sup> Eropigu i yebague opaburi dihtare guñagu, îgu sîrigu waburire guñabigu îgu sîporä mera peamegue dederegucumi. <sup>38</sup> Dohpaguere ñerä Goâm̄ure gamebirä erä ejatuharo iiri árîro iiaa. Eropirä yujuräyeri yure, yu buheri säre masiquererä “Masibea,” arîbocoma guhyasîrirä. Erä eroparicü îagu yu sä eräre guhyasîrigu “Eräre masibea,” arîguca. Yuh̄u masu Goâm̄u îgu obeodigu ðarä anyua mera yu Pagu gosesiriri mera dujarigüca. Yu dujarigu yu waïre arîdia guhyasîrisâniräre guhyasîrisägüca yu sä, arî werep̄u Jesu.

## 9

<sup>1</sup> Eropā arītuḥaja ōpa arīnemopu Jesu:

—Diaye arīgu tiiaa muare. Yujurāyeri mua ōguere árīrā, mua sīriboro core Goāmū ĩgu opu arīroguere yu űajacū ĩarāca, arīpu Jesu.

*Jesu ĩgu dūpūre gohrotoñumi*

*Mt 17.1-13; Lc 9.28-36*

<sup>2</sup> Eropi seis nari puḥru Jesu Pedrose, Santiagore, ĩgu pagu magure űure utāgugue űmadigugue erā dihtare sihu mūriapu. Umarogue erā mūrijara puḥru erā ĩhabeoro ĩgu dūpūre gohrotopu. <sup>3</sup> Eropiro ĩgu suhri gosesiriri suhri ōaro boreriñe wayoro. I yeba majarā nome suhri coerā nome ne eropa borerire iimasibeama. <sup>4</sup> Mata iribojegue majarā Moise muru Elia muru sā dehyoañorā. Eropirā Jesu, Elia, Moise mera weretamucū ĩañorā erā urerā ĩgu buherā. <sup>5-6</sup> Eropirā erā buřigā gūñorā. Eropā gūigu doḥpa arīmasibirinijagu ōpa arīpu Pedro:

—Opu, mari ohō árīcū ōadiaa. Ŭhre wihigā iirā. Mu ya wihigā, Moise ya wihigā, Elia ya wihigā iirā, arīpu ĩgu Jesure.

<sup>7</sup> Eropiro erā weca erāre imica curu cāhmotayoro. Iri eropa cāhmotacū ta imica curu pohecague Goāmū ĩgu wereniguiri busayoro:

—Iñi yu magu yu mahigu āhrimi. Peeque ĩgure, arīri busuro cariyoro.

<sup>8</sup> Eroparīcū peerā Pedro sā maji ĩarā Moiserē, Eliare ĩabiriñorā pare. Jesu dihtare ĩañorā. <sup>9</sup> Eropi utāgugue erā dijarićū Jesu erāre werepu:

—Dohparagā yare eropa warare gajirāre ne werebirićaque. Yuhū masu Goāmū ĩgu obeodigu yu siri masa mūriara puḥru irire gajirāre wereque mua, arī werepu Jesu.

<sup>10</sup> Eropirā erā ĩgu dorediro dopa werebiriñorā gajirāre. Eropirā erā, erā basi ōpa arī serēpi wereniguñorā:

—“Yuhū sīridi masa mūriara puḥru,” ĩgu arīgu ¿duhpigu eropa arīri ĩgu? arī wereniguñorā erā.

<sup>11</sup> Eropirā Jesure ōpa arī serēpiñorā:

—Cristo Goāmū beyedigu ĩgu ariboro core “Eliare arimūhtarō gahmea,” arīma masare buherā. ¿Dohpa arīronore eropa arīri erā? arī serēpiñorā Jesure ĩgu buherā.

<sup>12-13</sup> Jesu yuḥripu:

—Diaye ta āhraa. Eliare arimūhtadoremi Goāmū árīpehrerire amumūhtabure. ĩgu eropa iiborore arī gojayura āhraa Goāmū yare gojarapūgue. Yu säre arī gojayuñuma. Yuhū masu Goāmū ĩgu obeodigu bajasuburi ñero tarīgūca. Gajirā yare gamebirā yare ñero iirācoma. ¿Iri säre masiri mua? Eropigu ōpa arīgura muare: Elia eratuhami. ĩgu eracū erā ĩgure erā gamero dopa ñero iima. Iribojegue erā arī gojayudiro dopa iima ĩgure, arīpu Jesu.

*Jesu majigure ōagu iñumi*

*Mt 17.14-21; Lc 9.37-43*

<sup>14</sup> Eropi dijari ĩgu buherā dujanirā pohrogue eja, bajarā masare ĩapu. ĩgu buherāpu judio masare buherā mera game dūyasorā iñorā. <sup>15</sup> Masa Jesure ĩarā árīpehrerā ĩhamaria wañorā. Eropirā ĩgu pohrogue omagā ĩgu pohrogue eja, “¿Ahrari?” arīñorā ĩgure. <sup>16</sup> “Ahrabu,” arītuḥaja erāre serēpipu:

—¿Ñehenore game wereniguirã iiari mũa eropa dũyasarã? arĩ serẽpipũ ïgu.

<sup>17</sup> ïgu serẽpicũ peegu masa watope niguidigu werepũ ïgure:

—Buhegu, yũ magure watĩ ñajasũdigure mure aĩgãrirabũ. Watĩpũ ïgure wereniguidorebeamĩ. <sup>18</sup> Yũ magure ïgu ñajacũ yebague mehmereja wahamĩ. ïgu disirore sumutua, ïgu gũcũrire cũridihu buha wamurami ïgu. Eropigu mũ buherãre watĩre yũ magure ñajadigure cóãdorerabũ. Erã cóãmasibirama, arĩ werepũ ïgure.

<sup>19</sup> ïgu eroparĩcũ peegu õpa arĩpũ Jesu masare:

—¿Ne yũre umupeobirigohracãri mũa? Yoari boje mũare buherabũ yũhũ. ¿Dipa boje yũhũ mũare yujuro bojebocuri? ïgure aĩgãrique, arĩpũ Jesu.

<sup>20</sup> ïgu eroparĩcũ peerã watĩ ñajasũdigure Jesu pohro aĩgãriñorã. Erã Jesu pohro aĩ ejacũ ta watĩpũ ïgu majigure mehmerejacũ iipũ. ïgu eropiicũ ïgu yebague mehmereja wapũ. Tũru, naragã, buhacũ iipũ. Eropiĩ ïgu disiro sumutua wapũ. Jesu ïgu pagure serẽpipũ:

<sup>21</sup> —¿Dipa boje eropa ãhrari ïgu? arĩ serẽpipũ Jesu majigu pagure.

—Majigugãgue ta ïgu eropa árĩnũgami, arĩ yũhripũ ïgu pagupũ. <sup>22</sup> Eropigu watĩpũ ïgure peamegue, diague sãre cóãmũririmi ïgure wejẽdiagu. Eropigu mũhũ itamumasigu mojomoro ïha itamuque guare, arĩpũ majigu pagupũ Jesure.

<sup>23</sup> ïgu eroparĩcũ peegu õpa arĩpũ Jesu ïgure:

—Mũhũ yũre umupeocũ ïagu Goãmũ árĩpeherrerire iipehocãmasimi mũ ya árĩburire iigu, arĩpũ Jesu ïgure.

<sup>24</sup> ïgu eroparĩcũ majigu pagu õpa arĩ gaguinigupũ:

—Mũre umupeoa yũhũ. Yũ umupeobiricũ ïagu itamuque yũre yũhũ mũare umupeoboro dopa, arĩpũ ïgu.

<sup>25</sup> Eropiicũ masa bajarã erã pohro omagãriñorã. Erã gamenerecũ ïagu Jesu watĩre õpa arĩ turipũ:

—Mũhũ wereniguimasibiricũ iidigu, gamiri bihadigu ïre duhuque. Eropigu dipaturi ïgure garibobiricãque, arĩpũ Jesu.

<sup>26</sup> ïgu eroparĩcũ peegu majigure ñajadigu watĩ gaguinigui, majigure yebague mehmereja, tũru naragãcũ ii duhupũ ïgure. ïgu eropiicũ majigupũ sĩrigũ dopa wapũ.

<sup>27</sup> —ïgu sĩria wami, arĩñorã masa bajarã.

Erã eropa arĩquerecũ ta Jesupũ ïgu mojotore ñeha ïgure tara wahgũ nugupũ. ïgu tara wahgũ nugucũ wahgãnũgajapũ ïgupũ.

<sup>28</sup> Pũhrũ Jesu wihigue ñajajacũ ïarã ïgu buherã erã seyaro serẽpiñorã Jesure:

—¿Duhpirã guapũ majigure watĩ opagure cóãmasibirayuri mũ pepicũ? arĩ serẽpiñorã erã.

<sup>29</sup> —Ïno watĩre cóãdiarã bũrigã Goãmũre serẽro gahmea. Eropirã Goãmũre serẽmorã ba duhuro gahmea mũare, arĩ yũhripũ Jesu erãre.

*Dipaturi ta Jesu ïgu sĩriburiñere ïgu masa mũriaburiñe sãre wereñumi*

*Mt 17.22-23; Lc 9.43-45*

<sup>30</sup> Eropi erogue árĩnirã waha Galilea yebague eja, tarigãñorã. Irisubu Jesu ïgu buherãre buhegu iipũ. Eropigu erã warore gajirã

masicã gamebiripũ Jesu. <sup>31</sup> Erogue e jagũ ãgũ buherãre buhepũ. Õpa arĩ buhepũ:

—Yuhũ masũ Goãmũ ãgũ obeodigu ãhraa. Masa yũre ñeha gajirãguere yũre wiarãcoma. Erã wiara pũhrũ yũre wejẽrãcoma erã. Eropa erã wejẽra pũhrũ uhrenũ pũhrũ masa mũriagũca, arĩpũ Jesu.

<sup>32</sup> ãgũ Õpa arĩcũ ðaro peebiriñorã. Eropirã güirã ãgũre irire serẽpibiriñorã.

*Jesu ãgũ buherãre erã yagũ opũ árĩbure wereñumi*

*Mt 18.1-5; Lc 9.46-48*

<sup>33</sup> Eropi erã Capernaungue ejara pũhrũ wihigue erã árĩcũ Jesupũ serẽpipũ erãre:

—¿Maguere arirã dohpa arĩ dũyaso wereniguirã iari mũa? arĩ serẽpipũ erãre.

<sup>34</sup> ãgũ eroparĩcũ erã yũhribiriñorã. Mague arirã ðpa arĩ dũyaso wereniguiñorã erã basi:

—¿Nihi ãhriri mari árĩpehrerã wecague? arĩ dũyaso wereniguiñorã erã. Eropirã erã eropa arĩrare Jesure werediabiriñorã. <sup>35</sup> Erã eropa yũhribiricũ ãagũ Jesu doaja ãgũ buherãre sihubeo ðpa arĩpũ:

—Árĩpehrerã wecague opũ árĩdiagũ árĩpehrerã ojogoro majagũ árĩro dopa ta erã pohro majagũ árĩro gahmea mũare, arĩpũ Jesu erãre.

<sup>36</sup> Eropa arĩgũ majigugãre erã watope duhudobopũ. Duhudobotuha ãgugãre ãi coã ðpa arĩ werepũ:

<sup>37</sup>—Yahare iidiarã, ãgugãre bu árĩgũre gamerã yũ sãre gahmea mũa. Mũa eropiirã yũre gamerã, yũre obeodigu Goãmũ sãre gahmea mũa, arĩpũ Jesu erãre.

*Marire ñaturibigu árĩgũ mari mera majagũ ãhrimi, arĩ wereñumi Jesu*

*Mt 10.42; Lc 9.49-50*

<sup>38</sup> Ero pũhrũ ãgũ buhegu Ñũ ðpa arĩpũ Jesure:

—Buhegu, yujugũ mũ waĩ mera watẽare cohã wiucũ gua ñhabũ. ãgũ mari mera majagũ ãgũ árĩbiricũ ãarã, ãgũre irire iidorebirimurabũ gua, arĩpũ ãgũ.

<sup>39</sup> ãgũ eroparĩcũ peegu Jesu erãre werepũ:

—Eropa arĩbita mũa ãgũre. Yujugũ yũ waĩ mera deyoro moarire iigu, pũhrũguere yũre ñero wereniguĩmasibeami. <sup>40</sup> Marire ñaturibigu árĩgũ, ãgũ mari mera majagũ ãhrimi. <sup>41</sup> Mũare diaye ta arãa. Yaharã mũa árĩcũ ãarã gajirã mũare itamucũ ãagũ Goãmũ erãre ðaro itamugũcumi. Yuju coaru mera decore mũare erã tĩacũ merogã árĩquerecũ, erãre ðaro iigũcumi Goãmũ erã ðaro iira waja, arĩpũ Jesu.

*Ñerire iicũ guhya ãhraa, arĩ buheñumi Jesu*

*Mt 18.6-9; Lc 17.1-2*

<sup>42</sup> Eropigu Jesu majigugãre ãgũ basi coã ãi erãre werenemopũ:

—ãgã yũre umupeogugãre weregũra mũare: Yujugũ ãgã iro dopa árĩgũre ñerire iidoredigu, ãgũ ñetariaro tarigũcumi. Gajigũre masa ãgũre wũnũgũre wũariye utãye mera dirisiyu, wũariyague ãgũre cóãcũ ñero wabocumi ãgũ. Eropigu ãgã dopa árĩgũre ñerire iidoredigupũ wũariyague erã cóãdigũ tauro ñero tarigũcumi. ãgũ bũrigã dipuwaja moasũgũcumi. <sup>43-44</sup> Mũ mojoto mera ñero iigu, iri mojotore mũ

tabe cóãbodirop dopa iri ñerire duhuque. Irire duhubigu peamegue waguca. Eroguere ne peame yaribea. Eropirã beca sã ùjuquererã ne sãribeama. Mũ mojotore mũ cóãcũ iri dũca dihta cohmoboya. Eropigu mũpũ epasi áriquereru ta pũhrũ Goãmũ mera árigũca. Mũ pe mojoto mera árigũre peamegue igũ cóãcũ ñetariaro tarigũca. Eropigu iri ñeri iiripũre duhuque. <sup>45-46</sup> Mũ guburu mera ñero iigu mũhũ iri guburu sãre mũ tabe cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirã beca ne sãribeama. Mũ guburure mũ cóãcũ irisi dihta cohmoboya. Eropigu epasi áriquereru ta pũhrũ Goãmũ mera árigũca. Mũ pe guburu mera árigũre mũre peamegue cóãcũ mũ ñetariaro tarigũca. Eropigu iri ñeri iiripũre duhuque. <sup>47-48</sup> Mũ cuiru mera ñero iigu irirure mũ gorawea cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirã beca sã ne sãribeama. Mũ cuirure cóãcũ iriru dihta cohmoboya. Yujupũ cuiru mariquereru ta pũhrũ Goãmũ mera árigũca. Mũre pe cuiru mera árigũre peamegue mũre cóãcũ mũ ñetariaro tarigũca. Eropigu iri ñeri iiripũre duhuque.

<sup>49</sup> “I yeba áriã ñero tarirãca mũa. Peamegue mari ùjucũ marire pũriro dopa ta ñero tarirãca mũa. <sup>50</sup> Moa ðaro acaa. Moa acabiricũ usuriri iimasiya mara. Moa acabirop iri moa ne ðabeaa. Iri moa acabiricũ dohpagohra iimasiya mara. Eropirã moa ðaro acarop dopa mũa sũarã árique. Eropirã gajirã mera ðaro mera árique.

## 10

*Erã marasã nomere erã cóãcũ ðabeaa, arĩ wereñumi Jesu  
Mt 19.1-12; Lc 16.18*

<sup>1</sup> Eropigu igũ erogue áridigu waha, Judea yeba pohrogu eja, dia Jordán waicuriya gajipũ masegu ejapũ. Eroguere igũ ejacũ iarã masa bajarã igũ pohrogu gamenererã daja. Erã gamenererã ãgu ero core igũ buhediro dopa ta dipaturi buherũ daja. <sup>2</sup> Igũ eropa buherisubu fariseo masa erañorã. Jesure igũ ñero wereniguicũ peediañorã. Eropã peediañorã erã Jesure ðpa arĩ sererãñorã:

—¿Mari marapore cóãcũ ðhari? ¿Moise doreripũ eropa ta iidone ðabeaa. Iri moa acabiricũ reri mũ pepicũ? arĩ sererãñorã.

<sup>3</sup> —¿Dohpa doreyuri Moise mũare? arĩ yũhrupũ Jesu.

<sup>4</sup> —“Mũ marapore cóãdiagũ paperapũguere irire gojaque. Eropã gojagu iripũre mũ marapore otuhajaniãguere igore cóãmasia,” arĩ gojañumi Moise, arĩ yũhrerãñorã fariseo masa.

<sup>5</sup> Erã eroparicũ peegu ðpa arĩ werepũ Jesu:

—Mũa ñecu sũmarã Goãmũ dorerire iidibiricũ ãgu, “Eropa ta wacuraporo,” arĩgu, “Mũa marapore cóãmasia,” arĩ gojañumi Moise.

<sup>6</sup> Igũ eropa arĩ gojara áriquererã ta, negohraguere Goãmũ mũa marasã nomere cóãcũ gamebiriñumi. I yebare ñacũnugugũ mũa, nomeo sãre iĩnumi. <sup>7</sup> Eropigu mũa igũ pagũ sũmarãre cohã wiria igũ marapo mera árigũcumi. <sup>8</sup> Eropirã erã perã áriquererã ta, yuju dũpũ iro dopa áriãcoma. Eropirã erã perã iro dopa áribeama. Yuju dũpũ iro dopa áhrima erã. <sup>9</sup> Eropirã Goãmũ igũ doreri mera mojotodirima. Eropirã game cóãbiricãro gahmea erãre, arĩpũ Jesu erãre.

10 Eropā arītuha īgu buherā mera wihigue ñajaa wapa. Wihigue ñajajarā erā marasā nomere cōārire serēpinemoñorā daja īgu buherā.  
11 Erā eropa serēpiñacū īgu yuhripū:

—Īgu marapore cōādigu gajigo mera marapocuga, īgu igo gajigo mera ñero iigu iimi. 12 Eropigo nomeo sā igo marapure cōāgo, gajigu mera marapucugo, īgu gajigu mera ñero iigo āhrimo, arīpu Jesu erāre.

*Majirāgā ya arīburire Goāmure serēbasañumi Jesu*  
*Mt 19.13-15; Lc 18.15-17*

13 Eropi majirāgāre Jesure mohmepidoremorā erāgāre Jesu pohrogue aī erañorā. Erā eropiicū īgu buherāpu erāgāre aīgārīrāre bocatīri turiñorā. 14 Erā eropa turicū īagu Jesu papūrigū ōpa arīpu erāre:

—Eropa ĩacāque. Majirā yu pohrogue ariporo. Waque, arībircāque erāgāre. Erā Goāmure erā opure masima. Eropirā Goāmū īgu opu arīroguere oāgā iro dopa pepirā āhrima eroguerē. 15 Diaye arīgu ĩaa mūare. Oāgā Goāmure gamediro dopa ta mūa Goāmure gamebirā īgu pohrogue wasome mūa. Mūa wabiricū mūa opu arīsome īgu, arīpu Jesu.

16 Eropā arītuha Jesu majirāgāre aī cōāgu erāre mohmepi erā ōaro arīburire Goāmure serēbasagu ōpa arīpu:

—Oāgā ōarā waporō, arī serēbasapu Goāmure.

*Doberi opagu Jesu mera weretamuñumi*  
*Mt 19.16-30; Lc 18.18-30*

17 Eropi Jesu īgu mague wacū, yujugu masu omagā wa īgu guburi pohro mereja Jesure serēpipū.

—Mūhu buhegu ōagu āhraa. ¿Yūhu arīpehrerinūri Goāmū mera arīdiagu duhpigucuri? arīpu īgu Jesure.

18 Īgu eroparīcū Jesu īgure yuhripū:

—¿Dohpa arīronore yure “Ōagu” arī piyuri mūhu? Goāmū yujugu ta ōagu āhrimi. 19 Īgu Goāmū dorerire masia mūhu. “Masare wejēbircāque. Gajigu marapo mera arībircāque. Yajabita, gūyabita, gajirā yare gūya aībita, mū pagu samarāre umupeoque,” ire doremi Goāmū. I dorerire iro gahmea mure, arī werepu Jesu īgure.

20 —Buhegu, irire arīpehrerire majigugāgue ta tarinugabirimaribu yua, arīpu īgu Jesure.

21 Jesu īgure ĩhamehtu mahipu. Eropigu ōpa arīpu:

—Merogā duhyaa mure mū iipehoboro. Arīpehrerire mū yare duaque. Eropigu arīpehreri mū watarare mojomorocārāre oque. Mūhu eropiicū baja ōari umarogue Goāmū pohroguerē arīyuroca. Tuhajanugu yu mera majagu arību arique, arīpu Jesu īgure.

22 Wūaro opagu arīpu īgu. Eropigu Jesu īgure eroparīcū peegu īgu oparire mojomorocārāre odiabigu, turaro bujawere, suabiri waha wapa.

23 Īgu bujawere wacū īagu Jesu majinugaja īgu buherāre ĩha ōpa arīpu:

—Doberi oparā Goāmū īgu opu arīroguere erā wadiacū diasā āhraa, arīpu erāre.

24 Īgu eroparīcū peerā erāpu pee uca waha pee masibiriñorā. Eropā arītuha Jesu dipaturi werepu erāre:

—Yũ acawererã, árĩpehrerã “Yũ gamero yũ opari mera ta ðaro tarigũca,” arĩ pepirã Goãmũ ĩgũ opũ árĩroguere erã wacũ diasataria.<sup>25</sup> Camellopũ awiru gobegãgue ĩgũ ñajatariwereadiacũ masiya mara ĩgũre. Eropa ta doberi opagũ ĩgũ Goãmũ mera ðaro árĩgũ ĩgũ opũ árĩroguere ĩgũ wacũ diasã áhraa, arĩ werepũ erãre.

<sup>26</sup> ĩgũ eroparĩcũ peenijarã ĩhamaria wanijarã, erã basi ðpa arĩñorã:

—Yaho. ĩgũ arĩro dopa ta diaye árĩcũ ne yujugũ masure taubiri-bocumi Goãmũ ĩgũ pohro wamorãre, arĩñorã erã erã basi.

<sup>27</sup> Erã eroparĩcũ peegũ Jesu erãre ĩhabeo ðpa arĩpũ:

—Masa erã bocatũuro erã ðaro iiri mera tarimasibeama. Goãmũ pohrogue wamasibeama. Goãmũ dihta masare peamegue wabonirãre taumasimi ĩgũ pohro wamorãre. ĩgũ árĩpehrerire ðaro iimasipehocãmi, arĩpũ Jesu erãre.

<sup>28</sup> ĩgũ eroparĩcũ peegũ Pedro ĩgũre ðpa arĩpũ:

—Peenique. Guapũ árĩpehreri gũa yare apicãbũ mũ mera wamorã, arĩpũ ĩgũ Jesure.

<sup>29</sup> ĩgũ eroparĩcũ Jesu ðpa arĩpũ:

—Diaye arĩgũ iiaa mũare. Árĩpehrerã ðari buherire yaha árĩburire iimorã mũa wirire, mũa pagũ porãre, mũa pagũ sumarãre, mũa porãre, mũa poerire apirã wũaro wajatarãca mũa dohpaguere.<sup>30</sup> Eropirã mũa wirire, mũa pagũ porãre, mũa pagosã nomere, mũa porãre, mũa poerire ero core mũa opadiro tauro dohpaguere baja oparãca mũa ñero tarirã árĩquererã. Eropirã gajirã mũare ñero iirãcoma. Eropirã pũhrũguere árĩpehrerinũri Goãmũ mera árĩrãca.<sup>31</sup> Dohpaguere bajarã oparã árĩnirã irisubure bu árĩrã dujacãrãcoma. Eropirã dohpaguere bajarã bu árĩnirãpũ oparã dujarãcoma daja, arĩ werepũ Jesu erãre.

*Dipaturi Jesu ĩgũ sĩriburiñere, ĩgũ masa mũriaburiñe sãre wereñumi*

*Mt 20.17-19; Lc 18.31-34*

<sup>32</sup> Eropi erã mague majaa, Jerusalengue majarã iĩñorã. Jesu erã coregã mũhtarũ. ĩgũ eropa mũhtacũ ĩarã ĩgũ buherã ĩha uca wañorã. Eropirã erã pũhrũ nũrusiarãpũ gũiro mera ĩgũre nũrusiañorã. Eropigũ Jesu doce ĩgũ buherã seyarore sihubeo, masa ĩgũre iiburire werenũgapũ daja erãre.

<sup>33</sup>—Peeque yũre. Dohpaguere Jerusalengue warã iiaa mari. Eroque masa yũ masure Goãmũ ĩgũ obeodigũre yũre ñeha, pahia oparãre, judio masare buherã sãre yũre orãcoma. Eropirã yũre wejẽdorerãcoma erã. Eropa wejẽdorerã judio masa árĩbirãre orãcoma yũre.<sup>34</sup> Erã eropa ora pũhrũ erã yũre wereya, disico ehosũ tãrarãcoma. Tuhaja yũre wejẽrãcoma. Eropigũ yũ sĩrira pũhrũ uñrenũ pũhrũ masa mũriagũca, arĩ werepũ Jesu.

*Santiago, Ñũ mera Jesure serẽñuma*

*Mt 20.20-28*

<sup>35</sup> Eropi Santiago, Ñũ mera Jesu pohrogã ejarã erã gamerire serẽñorã ĩgũre. Erã Zebedeo porã árĩñorã. Eropirã ðpa arĩñorã:

—Buhegũ, gũa serẽro dopa ta guare iique mũhũ, arĩñorã erã Jesure.

<sup>36</sup>—¿Yũhũ duhpiicũ gahmeri mũa? arĩpũ Jesu erãre.

37—Mũhũ árĩpehřerã wecague opũ árĩgũ guare mũ waĩ mera dorerã acuque. Yujugũre mũ diayerũ, gajigũre copũ doboque guare. Mũ mera oparã gũa árĩboro dopa iique, arĩ serẽñorã erã Jesure.

38 Erã eroparĩcũ peegũ òpa arĩ werepũ Jesu:

—Mũa ñero tariborore masibiriquererã òpa arĩ serẽa mũa yũre. ¿Dohpaguere yũ ñero tariboro dopa ta mũa sã ñero tarirã yujuro bojebocuri mũa? ¿Yũre erã ñero iiboro dopa mũa sãre ñero iicũ yujuro bojemasibocuri mũa? arĩ serẽpipũ Jesu erãre.

39—Yujuro bojerãca, arĩ yũhriñorã.

Erã eroparĩcũ Jesu òpa arĩ werepũ:

—Yũ ñero tariboro dopa ta mũa sã ñero tarirãca. 40 Eropa mũa tarimorã árĩquerecũ ta, yũ mera doremorãre beyemasibeaa yũhũ. Irire yũhũ Pagũ amutuhami. Eropirã ĩgũ beyenirã dihta yũ diayerũ yũ copũ doarãcoma, arĩpũ Jesu.

41 Santiago, Ñũ sã erã oparã árĩburire Jesure serẽcũ gajirã diez buherã peerã, erã mera guañorã. 42 Erã eropa guacũ ĩagũ, Jesu ĩgũ buherãre sihu gameneo òpa arĩpũ:

—Goãmũre masibirã oparãpũ erã masare dorerã, pũriro mera dorema. 43 Mũapũ ne eropa iisome mũa basi. Mũa mera majagũ opũ árĩdiagũ, árĩpehřerã ĩgũ mera majarãre itamugũ árĩporo. 44 Eropigũ árĩpehřerãre doregũ árĩdiagũ, erã pohro majagũ árĩro dopa ta árĩporo. 45 Eropa árĩgũ tiiaa yũ sã. Masare dorebiragũ arigũ iibiribũ. Yũhũ masũ Goãmũ ĩgũ obeodigũ árĩqueregũ ta, i yebaguere masare itamugũ arigũ iibũ. Eropigũ masa bajarã erã ñero iira dipuwajare sĩribasagũ arigũ iibũ. Eropigũ erã peamegue wabonirãre taugũ arigũ iibũ, arĩpũ Jesu erãre.

*Bartimeore, cuiři ĩhajabigũre ĩacũ iĩñumi Jesu*

*Mt 20.29-34; Lc 18.35-43*

46 Eropi erã Jericógue ejañorã. Eropirã iri macague árĩñirã Jesu ĩgũ buherã masa bajarã mera wañorã. Jesu wari maha tũrogue yujugũ masũ cuiři ĩhajabigũ doapũ. ĩgũ Bartimeo waĩcũgũ Timeo magũ arĩpũ. ĩgũ ma tũrogue doagũ mũmũri nũcũ masare niyerure serẽmũripũ. 47 Eropigũ ero doanijagũ masa “Jesu Nazare majagũ ahrimi,” erã arĩcũ peepũ. Eropa peenijagũ òpa arĩ gaguinigũipũ:

—Jesu, opũ Davi mũrũ pãrami masare taubu mojomoro ĩaque yũre, arĩ gaguinigũipũ Jesure.

48 ĩgũ eropa arĩ gaguinigũicũ peerã masa bajarã Bartimeore “Ejarimaricãque,” arĩ turiñorã. Erã eropa arĩ turiquerecũ, ĩgũpũ ĩgũ ero core ĩgũ gaguinigũidiro tauro gaguinigũipũ daja.

—Jesu, opũ Davi mũrũ pãrami masare taubu mojomoro ĩaque yũre, arĩ gaguinigũipũ daja.

49 ĩgũ eroparĩcũ peegũ Jesupũ dujanũgaja:

—Sihubeoque ĩgũre, arĩpũ. ĩgũ eroparĩcũ peerã erãpũ ĩgũ cuiři ĩhajabigũre sihgãñorã.

—Mucubirique. Wahgãnũgajaque. ĩgũ mũre sihumi, arĩñorã erã ĩgũre Bartimeore.

50 Erã eroparĩcũ peegũ ĩgũ omasiariñere tuweapi, buhri tarimagã Jesu pohrogue ejanũgajapũ. 51 Eropigũ Jesu serẽpipũ ĩgũre:

—¿Dohpa yũhũ mũre iicũ gahmeri mũhũ? arĩ serẽpipũ Jesu ĩgũre.



—Yũ opũ, yũre cuiiri ãacũ iique, arĩpũ ãgũ cuiiri ãhajabĩgũpũ.

<sup>52</sup> —Mũ yũre umupeonijagũ ðagũ waha. Eropĩgũ wanisa, arĩpũ Jesu ãgũre.

Ãgũ eroparĩcũ ta cuiiri ãhajabĩgũ ðaro ãha wapũ. Õagũ wanijagũ Jesu mera mague nũrũsia wahgã wapũ.

## 11

*Jerusaléngue ejañumi Jesu*

*Mt 21.1-11; Lc 19.28-40; Jn 12.12-19*

<sup>1</sup> Eropii erã Jerusaléngue ejaboro coregã, Betfagé maca pohrogã, Betania maca pohrogã ejamũhtañorã. Iri macari utãgũ Olivo waĩcũdigũ gubuye árĩyoro. Eroque ejaagũ perãre ãgũ buherãre Jesu obeogũ ðpa arĩpũ:

<sup>2</sup> —Si macague waque. Eroque ejarã mata burrogãre erã dirinugudigũgãre bocajarãca. Gajirã erã peyaya marĩgũ árĩcumĩ. ãgũre bocaia ãgũre diriradarire pãa yũre aĩgãribasague. <sup>3</sup> Mũa eropiicũ ãagũ burrogã opũ “¿Duhpimorã burrogãre pãri?” ãgũ arĩcũ peerã ðpa arĩ yũhriique ãgũre: “Mari tĩgũ burrogãre gamebeoniami dohpa. Eropĩgũ dohparagã wiagũcumĩ ãgũre,” arĩ wereque ãgũre, arĩ weredore obeopũ ãgũ buherã perãre.

<sup>4</sup> ãgũ dorebeonirã waha, wihi pohro árĩri mare burrogãre disiporo erã dirinugudigũgãre bocaiañorã. Bocaia ãgũre erã diriradarire pãñorã. <sup>5</sup> Eropirã ãgũre erã pãcũ ãarã ero niguinirã serẽpiñorã:

—¿Duhpimorã mũa diriradarire pãri burrogãre? arĩ serẽpiñorã.

<sup>6</sup> Erã eroparĩcũ peerã erãpũ Jesu ãgũ arĩdiro dopa ta wereñorã erãre serẽpirãre. Erã eropa arĩ werecũ peerã erã ero niguinirãpũ “Aĩgãque,” arĩñorã erãre. <sup>7</sup> Eropirã erã burrogãre Jesu pohrogue aĩgã wañorã. Erã arĩ ejara pũhrũ suhri ãgũgã weca erã peotuhacũ ãagũ Jesupũ ãgũgã wecague mũribejapũ wabu. <sup>8</sup> Eropirã masa bajarã erã peyari suhrire tuwea arĩ ãgũ wari maha deco sãopi mũhtañorã Jesure umupearã. Gajirãpũ pũricũri dũpũrire poerĩgue erã aĩgãrira dũpũrire apimũhtañorã “Õari maha árĩporo,” arĩrã.

<sup>9</sup> Eropirã ãgũ core warã, ãgũ pũhrũ arirã sã ðpa arĩ gaguiniñorã:

—Ïre umupearã. Ihĩ Goãmũ ãgũ obeodigũ ðaro ariporo. <sup>10</sup> Mari ñecũ Davi mũrũ opũ ãgũ arĩdiro dopa ta ðaro ariporo. “Ûmaro majagũ turagũ ãhrimi,” arĩ umupearã, arĩ gaguiniguiñorã erã.

<sup>11</sup> Eropĩgũ Jesu Jerusaléngue ejaũ. Ejaagũ Goãmũ ya wihigue ñajajagũ, iri wihi majare árĩpehrerire ãapehocãpũ. ãatuhaja “Ñamicague ãhraa. Ûmũñarĩgã ta ãhraa. Ina warã,” arĩpũ Jesu. ãgũ buherã mera Betaniague waha wañorã.

*Jesu hĩgueragũ waĩcũdigũre sĩridoreñumi*

*Mt 21.18-19*

<sup>12</sup> Eropi gajĩnũ erã Betaniague árĩnirã Jerusaléngue dujarĩñorã daja. Eropa dujaricũ Jesupũ oaboa wapũ. Eropa oaboagũ yorogue niguidigũre hĩgueragũre ðaro pũricũdigũre ãanijagũ irĩgũ dũcare amagũ warĩpũ. <sup>13</sup> Dũca mariyoro. Dũcacũrisubu árĩbiriyã. Pũri dihta opayoro. <sup>14</sup> Eropĩgũ dũca maricũ ãagũ ðpa arĩpũ:

—Irĩgũ dũcare masa ne dipaturi babiricãporo. Ne dũcacũbircãporo, arĩpũ Jesu.

Īḡu eroparīcū Īḡu buherāpū peeñorā.

*Jesu Goāmū wihire Goāmū mera wereniguiri wihire iidoreñumi*  
Mt 21.12-17; Lc 19.45-48; Jn 2.13-22

<sup>15</sup> Īḡu eropiira pūhrū erā Jerusaléngue erañorā. Eragū Jesu Goāmū ya wihigue ñajapū daja. Ñajajagū doberi duarāre, asūrāre bocajagū cohā wiucāpū. Eropigū niyerure game gohroto doarā ya mesarire yomemuju aī mehpi behomūripū. Bujare duarā erā doari pērori sāre eropa ta iipū. <sup>16</sup> Eropigū Jesu Goāmū wihiguere gajinore aī ñajadorebiripū masare. <sup>17</sup> Eropigū Jesu ōpa arī buhepū erāre:

—Ōpa āhraa Goāmū yare erā gojarapūgue: “Yaha wihi Goāmū mera wereniguiri wihi waīcuroca. Eropiro árīpehrero majarāgue yū mera erā wereniguiri wihi árīroca,” arī gojañuma Goāmū wereniguirire. Goāmū eropa arīquerecū ta, mūapū i wihire Goāmū wihire duadoarā bu game yajarā iiaa, arīpū Jesu erāre.

<sup>18</sup> Īḡu eropa arī buhecū árīpehrerā masapū pee ūcapehrea wañorā. Eropirā pahia oparā, judio masare buherā mera Īḡure güi árīñorā. Eropirā erā Īḡure wejēburire guñamaañorā. <sup>19</sup> Erā eropiicū ñamicague Jesu Īḡu buherā mera iri maca árīñirā waha wañorā.

*Higueragū sīria wayoro*  
Mt 21.20-22

<sup>20</sup> Eropirā boyo dijaricū mague majarirā higueragure iañorā daja. Irigū nugurigue sīrinuga sīriadigū árīcū iañorā. <sup>21</sup> Irigure iagū Pedropū ōpa arīpū:

—Buhegū, iaque. Irigū higueragupū mū sīridoredigupū sīria waya, arīpū Pedro.

<sup>22</sup> Īḡu eroparīcū Jesu werepū erāre:

—Goāmūre umupeoturaque mūa. <sup>23</sup> Diaye arīḡu tiiaa mūare. Mūa Goāmūre ōaro umupeori mera irigū utāḡure “Dua aī wūariyague cóādigu árīporo,” mūa Goāmūre arīcū, mūa arīdiro dopa ta waroca. “Yū serēro dopa diaye ta eropa iigūcumī,” mūa arī guñacū, “Goāmū iisome,” arībiricū, mūa serēdiro dopa ta Goāmū iigūcumī. <sup>24</sup> Eropigū irire weregura mūare. Goāmū mera wereniguirā, Īḡure serērā, “Yū serēro dopa ta eropa waroca yūre,” arī guñaque. Mūa eropiicū iagū Goāmū mūa serērire ogūcumī. <sup>25</sup> Eropirā Goāmūre mūa serēboro core gajirāre erā mūare erā ñero iirare cādijique. Gajirā erā ñero iicū mūa guarare duhuque. Mūa eropiicū iagū mari Pagū ūmaro majagū mūa ñero iirare Īḡu sā cādijigūcumī. <sup>26</sup> Mūare ñero iirare mūa cādijibiricū Īḡu sā mūa ñero iirare cādijisome, arīpū Jesu erāre.

*Jesure doredigūre Īḡure serēpiñuma pahia oparā, judio masare buherā, mūrā mera*  
Mt 21.23-27; Lc 20.1-8

<sup>27</sup> Īḡu eropa arīra pūhrū erā Jerusaléngue wañorā daja. Eropirā Jesu Goāmū wihigue Īḡu curicū iarā, pahia oparā, judio masare buherā, mūrā mera Īḡu pohroge erarā Īḡure serēpiñorā:

<sup>28</sup> —¿Noa doreri mera irinore iigū iiri mūhū? ¿Noa mūre Goāmū wihi duanirāre cóādoreari? arī serēpiñorā erā Jesure.

<sup>29</sup> Erā eroparīcū Jesu yūhripū:

—Muarure serēpimuhtagura. Ōaro mua yuhricū yu sā muare yuhrigura. <sup>30</sup> ¿Ñu masare igu waīyecū noano igure waīyedoremuriyuri mua pepicū? ¿O Goāmū doreyuri? ¿O masapu doremuriyuri mua pepicū? Yure wereque, arīpu Jesu erāre.

<sup>31</sup> Igu eroparīcū peerā erāpu erā basi game ōpa arī wereniguiñorā:

—¿Dohpa arī yuhriācuri mari? “Goāmū Ñure doredigu árīñumi,” mari arīcū, “¿Goāmū Ñure igu dorequerecū ta duhpirā igu wererare peebirari muaru?” arībocumi Jesu marire. <sup>32</sup> Oā masapu “Diaye ta Ñu Goāmū yare weremuhtadigu árīmi,” arī pepima erā. Erā eropa pepirā, “Ñu igu waīyecū Goāmupu igure doredigu árībiriñumi,” mari arīcū, masapu mari mera guarācoma, arīñorā erā basi.

<sup>33</sup> Eropirā erā Jesure ōpa arī yuhriñorā:

—Ñure waīyedoredigure gua masibea, arīñorā erā Jesure.

Erā eroparīcū ōpa arīpu Jesu.

—Irisubu tamerare yu sā mua serēpirare werebea muare. Yu iirire iidoredigure werebea muare, arīpu Jesu erāre.

## 12

*Ñerā mohme corerā iira queorire wereñumi Jesu buhebu*

*Mt 21.33-46; Lc 20.9-19*

<sup>1</sup> Eropi Jesu queori mera buhenugapu daja erāre.

—Yeba opu árīñumi. Iri yebare igu ya iguidarire oteñumi. Otetuha sārīrore nugu, iguire erā cūhra bujuburi gobere seañumi. Pohe decogue umari wihigā sāre iññumi ihadibuma ōaro. Eropigu gajirāre igu ya pohe deco mera apiññumi erā mohme corera waja. Eropigu iri pohere erāre mohme coredoretuhaja gaji yebague waha wañumi igu.

<sup>2</sup> Puhru igui ñirisubu arīcū pohe opu igu pohro majagure igu ya pohe mohme corerā pohrogue obeoriñumi. Pohe maja igu ya oteri ducare igu ya sero maja ducare aīdoregu obeoriñumi igure. <sup>3</sup> Eropirā pohere mohme corerāpu igu pohro majagure ñeha pañuma. Eropiituha igu ya igui tōrire obiriquererā dujadoreñuma igure. <sup>4</sup> Eropigu pohe opu gajigu igu pohro majagure obeoriñumi daja. Eropirā pohere mohme corerāpu igure igu dipurure cami moa ñero iññuma igu sāre. <sup>5</sup> Gajigu igu pohro majagure obeocū igupure wejēcāñuma. Gajirā sāre bajarāre eropa dihta iññuma. Gajirāre pa gajirāre wejēñuma erā.

<sup>6</sup> Eropigu pohe opu magu dihta duhyañumi. Igu ta igu magu igu mahigu árīñumi. Eropigu igu magure obeoñumi pare erā pohrogue, “Yu magupure umupeorācoma,” arīgu. <sup>7</sup> Igu ōpa arī pepiquerēcū, erā pohere corerāpu igu magu aricū iha, ōpa arī wereniguiñuma: “Pohe opu magu āhrimi. Igure wejēcārā mari. Eropiro i pohe mari ya pohe dujaroca,” arī wereniguiñuma erā erā basi. <sup>8</sup> Eropa arīrā igure ñeha wejē, pohe turogue aīgā cóacāñuma erā igure, arīpu Jesu erāre.

Eropa arītuhaja Jesu erāre serēpipu:

<sup>9</sup> —Ne, ¿pohe opu dujarigu dohpa iigucuri igu ya pohere mohme corerāre? arīpu Jesu. Ōpa iigucumi erāre, arīpu. Igu erāre wejē gajirāpurre pohere mohmedoregucumi, arīpu Jesu erāre. <sup>10-11</sup> ¿Goāmū yare erā gojarapūgue ōpa arīrīre irire buhebiriri mua? Ōpa arī gojañuma:

Ihĩ Cristo utáye iro dopa áhrimi. Masa Cristore gamebirācoma. Erā gamebiriquerecā Goāmũ ĩgũre beye opu acumi. Goāmũpu ire iimi. ĩgũ eropa iicũ ĩarā “Ōataria,” arĩ pepia mari, arĩ gojañuma iribojeguere.

¿Irire ne buhebiriri mũa? arĩpu Jesu erāre.

<sup>12</sup> ĩgũ eroparĩcũ peerā pahia oparā, judio masare buherā, mũrā mera ōpa arĩ pepiñorā: “Jesu i queorire weregũ ‘Erā ñerā mohme corerā iro dopa áhrima,’ marire arĩ weresāgũ iicumĩ,” arĩ pepiñorā. Eropa arĩ pepirā Jesure ñeadiarĩñorā. Eropa ñeadiaquererā, masapu Jesure gamerā mari mera guari, arĩrā masare güi arĩñorā. Eropa güirā ĩgũre cohāgā wañorā.

*Fariseo masa, Herode ya curu majarā mera gobierno maja wajayerire serēpiñuma Jesure*

*Mt 22.15-22; Lc 20.20-26*

<sup>13</sup> Waha, erā mera majarāre yujurāyerire fariseo masare, Herode ya curu majarā säre Jesure serēpiñadore oboñorā daja. Erā Jesure baja serēpiri mera ĩgũ gajiropa yuhricũ weresāmorā iriñorā. <sup>14</sup> Eropirā Jesu pohro eja ĩgũre serēpiñorā:

—Buhegũ, diaye mũ wereniguigu gũyari marigu mũ árĩcũ masia gũa. Eropigu opu árĩcũ säre bu árĩgũ ĩgũ árĩcũ säre mũhũ yujuropa ĩhaa. Eropigu Goāmũ yare diaye mũhũ werea. Masa suacũ säre erā suabiricũ säre queoro werea. Eropigu gũare wereque: ¿Roma majagu árĩpehrerā tauro opu árĩgũre, gobierno majare marire wajayero gahmeri mũ pepicũ? ¿Mari doreripu wajayedoreri mũ pepicũ? arĩ serēpiñorā erā Jesure.

<sup>15</sup> Erā eropa arĩ serēpicũ peegũ erā gũyarire erā ñero iidiarire masigu ōpa arĩ yuhripũ erāre:

—¿Duhpirā yũ ñero wereniguicũ peediari mũa? Dohparagā niyerusere aĩgārique irisere ĩamorā, arĩpu Jesu erāre.

<sup>16</sup> ĩgũ eroparĩcũ peerā yujuse niyerusere aĩgāriñorā. Erā irisere aĩ eracũ ĩagu Jesu serēpipũ erāre:

—¿Nihino gohra masũ tuhyari isere? ¿Noa waĩ tuhyari isere? arĩ serēpipũ ĩgũ.

—César waĩcũgũ masa tauro opu masũ ĩgũ waĩ sã tuhyaa irisegũ, arĩ yuhriñorā erā.

<sup>17</sup> Erā eroparĩcũ Jesu werepũ erāre:

—Irisubu tamerare masa tauro opu árĩgũ yare ĩgũre oque. Goāmũ yare Goāmũpũre oque, arĩpu Jesu. ĩgũ eroparĩcũ pee uca wañorā.

*Saduceo masa Goāmũ ĩgũ sĩrinirā masurire serēpiñuma Jesure*

*Mt 22.23-33; Lc 20.27-40*

<sup>18</sup> Eropi yujurāyeri Saduceo masa Jesu pohroguere erañorā. Saduceo masapu “Goāmũ sĩrinirāre masusome,” arĩ pepirā arĩñorā. <sup>19</sup> Eropirā erā ōpa arĩñorā Jesure:

—Buhegũ, marire ōpa arĩ gojadigu árĩmi Moise: “Yujugu ĩgũ tĩgũ marapocũgũ porā mariqueregũ ĩgũ sĩricũ ĩagu, ĩgũ pagũ magure ĩgũ tĩgũ marapo árĩdigore marapocũro gahmea. Eropigu ĩgũ tĩgũ mũrũ ĩgũ tĩgũ ĩgũ porācũbodiropo dopa ta porācũro gahmea ĩgũ pagũ magure. Eropirā ĩgũ tĩgũ mũrũ porā iro dopa árĩrācoma,” arĩdi árĩmi Moise, arĩñorā.

<sup>20</sup> Ire erã arĩtuhaja i queorire werenemoñorã Jesure.

—Yujugu porã siete árĩñorã. Eropii erã tĩgũpũ marapocũ, porã marigu ta sĩa wapu. <sup>21</sup> Eropigu gajigu ĩgu pagu magu sã ĩgu tĩgu mũru marapo árĩdigore marapocũpũ. ĩgu eropa marapocũra pũru ĩgu sã ĩgu tĩgu mũru iro dopa ta porã mariqueregu ta sĩa wapu. Eropigu ĩgu pagu magu ĩgu ĩgu mũru iro dopa porã mariqueregu ta sĩa wapu. <sup>22</sup> Eropa dihta wañorã yujugu porã. Ne porã mariquerẽ sĩripehrea wañorã. Erã marapo sã erã pũru sĩa wapo pare, erã arĩtuhaja Jesure serẽpiñañorã. <sup>23</sup> ¿Ne, Goãmu árĩpehrerã sĩrinirãre ĩgu masucũ nihino marapo gohra árĩgocuri igo? Erã árĩpehrerã igore marapocũnirã árĩñorã. ¿Eropigo nihino marapopũ árĩgocuri igo? arĩ serẽpiñorã erã Jesure.

<sup>24</sup> Jesu yũhripũ erãre:

—Goãmu yare erã gojarapũ wereniguirire ne masibea mũa. Eropirã Goãmu ĩgu turari sãre ne masibea mũa, arĩpũ Jesu. Eropiro mũa pepiripũ diaye árĩbeaa. <sup>25</sup> Sĩrinirã mũra erã masa mũriara pũru erã anyua iro dopa ãhrima. Erã ũama nome mera marapocũbeama eroguerẽ. <sup>26</sup> Sĩrinirã erã masa mũriaboropũre mũare weregura, arĩpũ Jesu. Irire Moise ðaro werepohocãñumi. Iri yucũgũgãgue ẽjũrisubu árĩgu Goãmu ða wereñumi Moisere: “Yũhũ Abrahã, Isaa, Jacobo, erã opu ãhraa,” arĩ wereñumi Goãmu iribojegue. <sup>27</sup> Erã sĩara pũrugue “Erã opu ta ãhraa,” arĩ wereñumi Goãmu. Eropirã erã sĩrinirã mũra ĩgu masunirã árĩrã erã ojocarirã ãhrima. Eropirã “Sĩrinirã masasome,” arĩ pepirã diaye pepibea mũa, arĩpũ Jesu erãre.

### *Õatariariñere doreriñere wereñumi Jesu*

*Mt 22.34-40*

<sup>28</sup> Eropigu yujugu judio masa erã buherã mera majagu erã pohrogue eraa, erã game wereniguicũ peepũ. Jesu ĩgu ðaro yũhriire peegu serẽpipũ ĩgure.

—¿Goãmu ya doreri õatariaro doreripũ diñe doreripũ ãhriri mu pepicũre? arĩ serẽpipũ ĩgu Jesure.

<sup>29</sup> Jesu ĩgure yũhripũ:

—Iñe doreriñe õatariariñe ðpa ãhraa. “Israe masa peeque. Goãmu mari Opu yujugu ta ãhrimi. <sup>30</sup> Bũrigã mũa sĩporã mera, mũa turari mera, mũa ðaro guñari mera Goãmũre mũa Opũre mahique,” arĩmi Goãmũ. <sup>31</sup> Iñe doreriñe pũru gaji doreriñe sã õataria. “Mũ basi mahiro dopa ta mũ pohro árĩrã sãre mahique,” arĩmi Goãmũ. Iri pe doreri ta árĩpehreri gaji doreri tauro ãhraa, arĩ werepũ Jesu ĩgure.

<sup>32</sup> ĩgu eroparĩcũ judio masare buhegu ðpa arĩ yũhripũ:

—Eropa ta ãhraa, buhegu. Diaye ta arãa mũhũ. Goãmu yujugu ta ãhrimi. Gajigu ĩgu iro dopa árĩgu marimi. Mũ arĩri diaye ta ãhraa. Goãmũre turaro mari sĩporã mera, mari turari mera, mari pepiri mera, mari ðaro guñari mera ĩgure mahiro gahmea. Mari pohro árĩrãre mari basi mari mahiro dopa ta, erã sãre mahiro gahmea marire. <sup>33</sup> Mari Goãmũre umupeomorã waimũrã wejẽ soemujucũ ðapũrica. I tauro Goãmũre masa sãre mari mahicũ õataria, arĩpũ ĩgu Jesure.

<sup>34</sup> ĩgu pee masiri mera yũhricũ ĩha Jesu ĩgure arĩpũ:

—Merogã dũhyaa mũre Goãmũ mũ opũre mũ masiboro, arĩpũ Jesu ĩgure.

Īgure eroparīcū gajirā peerā Īgure gūirā serēpinemodiabiriñorā pare.

*¿Noano acaweregū āhriri Cristo? serēpi ĩañumi Jesu masare  
Mt 22.41-46; Lc 20.41-44*

<sup>35</sup> Eropigū Goāmū wihigūe buhegū ōpa arīpū Jesu:

—“Cristo Davi mūrū pārami arigūcumī,” arī buhema marire buherā. ¿Duhpirā eropa arī buheri erā? Erā ōaro masiboro dūhyania erāre dohpa. <sup>36</sup> Davi Īgū basi Espīritu Santo Īgure dorero dopa ta ōpa arī wereñumi:

Goāmū yū opūre ōpa arāmi. “Ohō yū diayepū yū mera dorebu doaque.

Eropigū mure ĩhaturirāre mure tarinūgabasagūca yūhū,” arīmi Goāmū yū opūre, arī gojañumi Davi mūrū.

<sup>37</sup> Eropa arī gojagū Davi mūrū opūcupū Cristore “Yū opū,” arīgū. Cristo Davi mūrū opū āhrimi. Eropigū Davi mūrū Cristo ñecu árīqueregū opūcūñumi Cristore, arī werepū Jesu.

Īgū eropa arī buhecū bajarā masa mucubiriri mera peeñorā Īgure.

*Jesu masare buherā erā ñero iirire wereñumi  
Mt 23.1-36; Lc 11.37-54; 20.45-47*

<sup>38</sup> Eropigū Īgū buhenemogū ōpa arīpū:

—Masare buherā erā ñero iirire ōaro ĩaque. Eropirā erā iiro dopa iibiricāque. Erā yoari suhri saña erā masa erā ĩhabeoro cuhrima. Doberi duarogue gajirā umupeori mera erāre bocafīri serēcū gahmema erā. <sup>39</sup> Eropirā mari buheri wiriguere ōari doari dihtare doadiama. Eropirā bosenūri árīcū sāre oparā erā doari dihtare gahmema erā. <sup>40</sup> Eropirā erā wapeweyarā nome erā wajamocū ĩha erā ya wirire emacāma erā nomere. Eropa erāre mojomoro ĩabiriquererā erā masa ĩhurore yoari boje Goāmūre serēma, “Gūa Goāmūre ōaro umupeoa,” arī gūyarā. Erā eropa iira dipuwaja gajirā tauro dipuwaja moagūcumī erāre, arīpū Jesu erāre.

*Wapeweyo Goāmūre igo apirare wereñumi Jesu  
Lc 21.1-4*

<sup>41</sup> Eropigū Jesu Goāmū wihi maja erā amuburi niyeru gameneori comoro pohro doapū. Ero masa erā niyeru sácū ĩapū. Doberi oparā iri comorogue niyeru pagari sāa tari wahgāmariñorā. <sup>42</sup> Eropigo wapeweyo būro iri comorogue ahri pesegā sāpo. Pese yuju centavo maja āhraa. <sup>43</sup> Iriserire igo apicū ĩagū Jesu Īgū buherāre sihubeo arīpū:

—Diaye arīgū iiaa mūare. Igo wapeweyo mojomorocugo niyeru sāri comorogue igo yare sāgo gajirā árīpehrerā erā sādīro tauro sāmo igo. <sup>44</sup> Gajirā doberi oparā erā wūaro oquerecū ta erā ya wūaro dūhyaa. Igo pū mojomorocugo árīquerego ta, árīpehreri igo bari asūborare Goāmū ya árīburire opehocāmo, arīpū Jesu.

## 13

*—Goāmū wihi cóāsūroca, arī yuñumi Jesu  
Mt 24.1-2; Lc 21.5-6*

<sup>1</sup> Eropigū Goāmū wihiguere erā wiriacū ĩagū yujugū erā buherā mera majagū ōpa arīpū:

—Buhegu, ñaque. I wihi Goãmu wihi maja wiri utã mera erã iira wiri ðari wiri àhraa, arĩpu ìgu.

<sup>2</sup> Ìgu eroparĩcũ Jesu werepu erãre:

—I wihi maja wiri dohpaguere ñaraa mua. I wihi árĩpehreri mari ñara i utã sã cohmorehrea waroca. Ne yujuye utãye dujasome iri wiri maja, arĩpu Jesu.

*I mũu pehrebore wereñumi*

*Mt 24.3-28; Lc 21.7-24; 17.22-24*

<sup>3</sup> Eropi Jesu Olivo waĩcũdigu utãgugue Goãmu wihi diaye maja arĩdigugue ejapu. Ero doapu. Ero Pedro, Santiago, Ñu, Andre mera erã seyaro arĩrã, erã ìgure serẽpiñorã:

<sup>4</sup> —Wereque guare. ¿Dohparĩcũ eropa warocuri mu arĩdiro dopa waro? ¿Pehreburinu coregãre dohpa wanugacũ ñarãcuri gua? arĩ serẽpiñorã erã Jesure.

<sup>5</sup> Jesu yũhripũ:

—Õaro ii yuque mua. Eropirã gajirã erã guyarire peebiricãque mua. <sup>6</sup> Bajarã masa “Cristo àhraa yũhu,” arĩ gubarã arĩrãcoma. Erã eropa guyacũ peerã masa bajarã Goãmu yare duhurãcoma.

<sup>7</sup> Mua pohrogã gajirã masa erã gamewejẽcũ peerãca. Eropirã yoarogue majarã erã sã erã gamewejẽcũ peebeorãca mua. Eropa peequererã ta ne irire wũaro bujawere pepibiricãque. Eropa wamũhtaroca. Eropa wacũ pehreburinu duhyaniroca dohpa.

<sup>8</sup> Irisubure yuju yeba majarã gaji yeba majarã mera gamewejẽrãcoma. Eropirã yujugu opu yarã gajigu opu yarã mera gamewejẽrãcoma. Eropiro bajasuburi i yeba ñohmeroca. Eropirã bajarã masa oa mera sĩrirãcoma. Eropa ñero tariquerecũ i yeba majarãre tauro erã ñero tariboro duhyaa dohpa. Ñero tarinirãcoma dohpa.

<sup>9</sup> Õpa wacũ ñarã mua basi ðaro iique. Gajirã mũare ñeha ñero iidorerã orãcoma gajirã oparãre. Eropirã mua acawererã judio masa erã buheri wirigue sãre mũare parãcoma. Eropirã macari majarã oparã pohrogue, erã tauro oparã pohrogue sãre aĩgãrãcoma mũare mũare dipuwaja moamorã. Eropirã erã mũare erã pohrogue aĩgãcũ yaha buherire wererãca mua erã sãre. <sup>10</sup> Eropiro pehrerinu arĩboro core árĩpehrerãre ðari buherire weresũroca. <sup>11</sup> Eropirã mũare dipuwaja moadorerã erã oparã pohrogue erã aĩgãcũ, erã oparãre mua wereniguiburire wũaro pepibiricãque. Mũare erã serẽpicũ mua yũhriburire Goãmu mera masirãca. Eropa masirã mua gamero wereniguisome mua. Espĩritu Santopũ mũare wereniguicũ iigucumi. <sup>12</sup> Irisubure erã tĩrã erã pagu porãre Jesu yarã erã arĩcũ ñha erãre wejẽdorerã oparãre wiarãcoma. Gajigupu ìgu tĩgure wejẽdoregu oparãre wiagucumi. Eropi erã pagu sumarã erã porã Jesu yarã erã arĩcũ ñha erãre wejẽdoregu oparãre wiarãcoma. Eropirã erã porãpu erã pagu sumarãre erã Jesu yarã arĩcũ ñha wejẽdorerã wiarãcoma erã oparãre. <sup>13</sup> Yure mua umupeora dipuwaja mũare masa árĩpehrerã ñhaturirãcoma. Eropa mũare erã ñero iiquerecũ ta, mũare erã ñero iire yujuro bojerã, yure duhubiricũ Goãmu mũare taugucumi. Eropigu ìgu pohrogue mũare opagucumi.

<sup>14</sup> “Eropirã ñetariagure Goãmu yare goroweogure ñarãca mua. Goãmu wihigue ìgu niguicũ ñarãca. Ero ìgure arĩbiricãro gahmea.

Iribojegue Goãmũ yare weremuhtayugu Daniel ĩgure were gojañumi. (Irire buhegu peeporo). Ero ĩgu niguicũ ĩarã Judea yebague árĩrãpũ utã yucũgue oma duhriğã waporo. <sup>15</sup> Irisubure masa ñero tarirãcoma. Eropirã yojarõ mera waporo. Irisubure erã wiri weca maja pũarigũe árĩrã wihi pohecaguere erã yare airã wabiricãporo. <sup>16</sup> Eropirã irisubure gajirã erã poerigũe árĩrã erã ya suhrire wihigue árĩri suhrire airã dujabiricãporo. <sup>17</sup> Irisubure nijiposã nome, erã porã mihrirãre oparã nome sã mojomorocurã nome dujarãcoma. <sup>18</sup> Eropirã õpa serẽque Goãmũre: “Puhirõ árĩcũ eropa wabiricãporo,” arĩ serẽque ĩgure. <sup>19</sup> Irinũrire masa ñero tarirãcoma. I yebare ĩgu ĩhacũnugura pũhrũ masa erã ñero tariri árĩmũriyoro. Iri eropa árĩquerẽcũ ta árĩpehreri pũriri erã ñero taridiro tauro masa ñetariaro tarirãcoma pehrerĩnũ coreğãre. Eropa ñero erã tarira pũhrũ dipaturi eropa ñero tarisome i yeba pare. <sup>20</sup> Eropigũ Goãmũ i ñero taririnũrire bajamenũrigã árĩcũ ĩgũcumi. ĩgu eropiibiricũ ne yujugu masũ taribiribocumi. Eropigũ ĩgu beyenirã erã tariborore bajamenũrigã ñero taririre apigũcumi Goãmũ.

<sup>21</sup> Irisubure gajirãre pee masi ĩaque. “Õho ãhrimi Cristo,” erã arĩcũ erãre peebiricãque. “Ero ãhrimi Cristo,” erã arĩcũ sãre peebiricãque. <sup>22</sup> “Cristo ãhraa,” arĩ gũyarã, “Goãmũ yare weremuhtarã ãhraa,” arĩ gũyarã árĩcãrãcoma irisubure. Eropirã Goãmũ ĩgu beyenirãre gũyarã erã deyoro moarire ii ĩhmurãcoma. Goãmũ yare erã cõcũ ĩidiarã ĩirãcoma erã gũyari masa. <sup>23</sup> Ire árĩpehrerire wereyumuhtaa mũare iri eropa waboro core. Eropirã õaro pee masi yuque mũa, arĩpũ Jesu ĩgu buherãre.

*Jesu i yebaguere ĩgu dujariborore wereñumi*

*Mt 24.29-35, 42-44; Lc 21.25-36*

<sup>24</sup> Eropa arĩtuhagũ õpa arĩ werepũ Jesu erãre:

—Irinũri erã ñero tarira pũhrũ, abe mũmũ majagũ, ñami majagũ sã boyo duhurãcoma. <sup>25</sup> Erã eropa wacũ, necã dipuru yuhridijariroca. Eropiro mũmaro maja sã yeba sã bũrigã ñohmeroca. <sup>26</sup> Irisubu ta yũhũ masũ Goãmũ ĩgu obeodigũ arigũca. Eropiro mũmarogue yũ turari mera yũ gosesiriri mera mũmaro maja imica weca i yebaguere yũhũ dujaricũ ĩarãcoma masa. <sup>27</sup> Eropigũ yaharã anyuare árĩpehrero i yebaguere obeogũra. Eropirã árĩpehrerogue waha yaharãre yũ beyenirãre gameneorãcoma yũ pohrogue.

<sup>28</sup> “Higueragũ irigũ waricũrire ĩarã masia mũa. Irigũ yucũgu pũricũcũ ĩarã, “Bojori merogã duhyaa,” arĩ masia mũa. <sup>29</sup> Eropa ta irigũ waro dopa ta masique mũa. I árĩpehreri yũ arĩra iri eropa wacũ ĩarã, “Cristo dujariboro merogã duhyaa,” arĩ masique mũa. <sup>30</sup> Diaye ta arĩgu ĩiaa mũare. Irisubu majarã erã sĩriboro core árĩpehreri yũ arĩdiro dopa waroca. <sup>31</sup> Mũmaro i yeba sã pehrea waroca. Yũ wereniguiripũ ne pehresome. Árĩpehreri yũ arĩdiro dopa ta eropa waha ojogorocũroca.

<sup>32</sup> “Irinũre yũ dujariburĩnũre, iri hora sãre ne masibea yũhũ. Anyua sã irire ne masibea. Masa sã ne masibea. Yũ Pagũ dihta yũ dujariburĩnũre masimĩ.

<sup>33</sup> “Mũa sã irinũre masibea. Eropirã õaro guñatura coreque. Goãmũre serẽque. <sup>34</sup> Õpa coreque mũa. I queoriñe mera irire



mũare buhegura. Wihi opũpũ yoarogue ïgu curiro dopa ta ãhraa i. Ìgu ïgu waboro coregã ïgu pohro majarãre ïgu wihire core-doremi. Yujurãyerire ïgu mohmerire apimi. Yujugure wihi disiporo ïhadibudoregure ðaro coredoremi ïgu dujariborore. <sup>35</sup> Eropigũ wahãmi. Ìgu pohro majarãpũ ïgu dujariburinũre ne masibeama. Ìgu ñamica o ñami deco, cãreña ïgu wererisubu o boyoro ïgu aribocumi. Erã ðaro ïhacorebircũ ïgu guñaña mariro arigũ erãre carĩrãre bocabocumi. Wihi opũre erã ïgu dujariburinũre erã masibiro dopa ta mua sã yũ dujariburinũre masibeaa. Eropirã yũre ðaro guña coreque. <sup>36</sup> Guñaña mariro yũ eraborore masirã, ðaro guña coreque. Yũ dorerire yahare eropa iiniguirã árĩque. Eropirã yũre ðaro coreque. <sup>37</sup> Eropigũ mũare yũ arĩro dopa ta árĩpehrerãre eropa arãa. Òaro guña coreque, arĩpũ Jesu ïgu buherãre.

## 14

*Pahia oparã, Judio masare buherã mera Jesure wejẽdiañuma*  
Mt 26.1-5; Lc 22.1-2; Jn 11.45-53

<sup>1</sup> Eropi irisubure Pascua bosenu core, bugabiriri pan erã baburinu core penũ duhyayoro. Irisubure pahia oparã judio masare buherã mera, Jesure gũyari mera erã ñeha erã wejẽburire game wereniguiñorã.

<sup>2</sup> —Bosenu árĩcũ ïgure ñehabiricãrã. Masa gua ïgure ñeacũ ïarã gua gamenerenijarã gamequeãbocoma, arĩrã iĩñorã erã erã basi.

*Nomeo poresuri mera Jesure pipeoñumo*  
Mt 26.6-13; Jn 12.1-8

<sup>3</sup> Eropi Jesu sã Betaniague Simo cami boadi ya wihigue árĩñorã. Iri wihi erã baro watope, yujugo nomeopũ alabastro mera iidirure poresuri nardo waĩcũri dicũdirure aĩrapo. Igo aĩrara wajacũri árĩyoro. Eropigo igo irirure pãgũ Jesu dipuru weca pipeopo. <sup>4</sup> Igo eropiicũ ïarã gajirã ùrugã gua wañorã.

—¿Duhpigo igo eropa iisirimaacãri? <sup>5</sup> Iri poresurire duaboañumo. Irire duago yuju bojori mohmeri waja wajataboañumo. Eropigo iri niyeruremojomorocũrãre oboañumo igo, arĩñorã erã erã basi. Eropirã igore turiñorã.

<sup>6</sup> Erã eroparĩcũ peegũ Jesu erãre werepũ:

—¿Duhpirã eropa arĩri igore? Garibobiricãque igore. Igo yũre ðaro iimo. <sup>7</sup> Mojomorocũrã mua mera eropa árĩniguicãrãcoma. Eropirã mua gamero erãre omasia. Yũpũ i yebare mua mera eropa árĩniguicãsome. <sup>8</sup> Igo masiopẽ yũre iiamo. Yũre erã yaaboro core yũ dũpũre amuyugo poresuri mera sũhumo yũre. <sup>9</sup> Eropigũ diaye mũare arĩgu iiaa. Árĩpehrero i yebaguere, ðari buherire erã wereroguere igo ðpa iirare wererãcoma. Erã eropa arĩ werecũ peerã masa bajarã igo iirare guñarãcoma.

*Juda Iscariote Jesure ïhaturirãre ïgu ïhmuburire erã mera weretamuñumi*

Mt 26.14-16; Lc 22.3-6

<sup>10</sup> Irisubure Juda Iscariote doce buherã mera majagũ pahia oparã pohro waha ðpa arĩpũ:

—Yũhũ mũare weregura Jesu ïgu áriřore mũa ïgure ñeacũ, arĩpũ.  
 11 Eropirã pahia oparã irire peerã mucubiriñorã.

—Mũre niyerure orãra, arĩñorã erã Judare. Eropigũ Juda Jesure ïhaturirãre ïgu erãre ïhmuburire corenipũ.

*Jesu ïgu buherã mera ïgu baturinũ árĩyoro*

*Mt 26.17-29; Lc 22.7-23; Jn 13.21-30; 1Co 11.23-26*

12 Bũgabiriri panre erã baburinũ bosenu árĩnũgarinũ árĩyoro. Eropiro ovejare Pascua majagu árĩbure erã wejẽrinũ árĩyoro. Irisubure ïgu buherãpũ serẽpiñorã Jesure:

—¿Nohonogue Pascua bosenu mari baburire amudoregu obeori mũhũ guare? arĩñorã ïgure.

13 Erã eroparĩcũ Jesupũ perã ïgu buherã mera majarãre obeopũ.

—Jerusaléngue waque. Eroque mũa ejacũ deco sorobu tuhpeogu mũare bocatĩrigũcumĩ. ïgu bocatĩricũ ïgu mera waque. 14 Eropa warã ïgu sihu ñajari wihigüe ejarã, wihi opũre õpa arĩque: “¿Nohogue yũhũ, yũ buherã mera Pascua maja barire bagũcuri?” arãmi gũa opũ,” arĩque wihi opũre. 15 Mũa eroparĩcũ peegu umaro maja taribure mari gameri árĩpehreri mera erã amura taribure ïhmugũcumĩ wihi opũ. Eroque mari baburire iique, arĩpũ Jesu erãre.

16 ïgu eroparĩcũ erã perã ïgu buherã iri macague wañorã. Erã erogue erã ejacũ ïgu arĩdiro dopa ta wayoro. Eropirã erã Pascua árĩcũ baburire amuñorã.

17 Eropi naidijaririsubu Jesu doce ïgu buherã mera erã bari taribugue erogue ejaapũ. 18 Eropirã erã mesague erã ba doarisubu Jesu erãre werepũ:

—Diaye arĩgu iiaa mũare. Yujugu mũa mera majagu ta yũ mera bagũ ta yũre ïhaturirãre ïhmugũcumĩ, arĩ werepũ Jesu erãre.

19 ïgu eropa arĩ werẽcũ peerã erãpũ burigã bũjawererã ïgure serẽpinũgañorã erã yujurãyeri.

—¿Yũhũ ta árĩbocuri mũre ïhmubu? arĩñorã erã Jesure.

20 —Mũa yũ doce buherã mera majagu ta áhrimi ïgu. Yũ baripare yũ mera yoso bagũ áhrimi yũre ïhaturirãre ïhmubu. 21 Iribojegue erã yũre arĩ gojadiro dopa ta yũhũ masũ Goãmũ ïgu obeodigũ sĩrigũca. Eropigũ yũre ïhaturirãre ïhmudigupũ ñero tarigũcumĩ. ïgupũre ïgu masa dehyoabiricũ õapũricãboya. Ñero taribiriboñumi, arĩpũ Jesu erãre.

22 Eropigũ Jesu erã mera barisubu panre aĩ Goãmũre “Õhaa,” arĩ serẽpũ. Eropa arĩgu ta irire nuha guerepũ erãre õpa arĩgu:

—Ire aĩ baque. I yũ dupũ áhraa, arĩpũ Jesu erãre.

23 Eropa arĩtuha ïgu ihriripare aĩ, Goãmũre “Õhaa,” arĩ serẽpũ. Erãre ïgu ocũ árĩpehrerã erã irire ihrĩñorã.

24 —I yũ di áhraa. Bajarã masa erã ñero iirare cóãbu sĩrigũca. Eropigũ yũ dire cóãgũca. Eropa sĩrigũ Goãmũ yũ Pagũ “Masare õaro iigũra,” ïgu arĩdiro ii ojogorocũgũca. 25 Diaye arĩgu iiaa mũare. Goãmũ ïgu opũ árĩrogue mama igui decore yũ ihriboro core, õre igui decore dipaturi ihrinemosome yũhũ, arĩpũ Jesu erãre.

*Pedro “Jesure masibea,” ïgu arĩ gũyaburiñere wereñumi Jesu*  
*Mt 26.30-35; Lc 22.31-34; Jn 13.36-38*

<sup>26</sup> Eropirā yujuñe erā Goāmū bayariñere bayatuha, utāgū Olivo waīcūdigugue wañorā. <sup>27</sup> Erogue sihu ejaḡu Jesu erāre wererū:

—Dohpagā ñami mūa arīpehrerā yūre cóārāca. Mūa yūre cóāborore ōpa ta arī gojamūhtañuma Goāmū yare erā gojarapūgue: “Ovejare ihadibugure erā wejēcū waro dopa ta iigūca. Yū eropa iicū oveja īḡu yarā īḡure cohāḡā warācoma,” arīmi Goāmū, arī gojañuma. <sup>28</sup> Eropiḡu Goāmū īḡu yūre sīridiḡure masura pūhrū, mūa core Galileague wamūhtagūca yūhū, arīpū Jesu erāre.

<sup>29</sup> Īḡu eroparīcū peegū Pedro ōpa arīripū:

—Yū mera majarā arīpehrerā erā mūre cóāquerecū yūpū mūre ne cóāsōme, arīpū Pedro īḡure.

<sup>30</sup> Jesu yūhripū:

—Diaye arīḡu iiaa mūre. Dohpagā ñamire cāreña pesubu īḡu wereboro core, mū uhresubu “Yūhū Jesure masibea,” arīḡūca mūhū, arīpū Jesu īḡure.

<sup>31</sup> Īḡu eropa arīquerecū Pedro ōpa arī turaro būsuro yūhripū:

—Mū mera yūre erā wejēquerecū ta ne mūre cóāsōme yūhū, arī yūhripū īḡu Jesure.

Pedro īḡu eroparīcū peerā īḡu mera majarā īḡu arīro dopa ta arīriñorā erā sā.

*Getsemaníque Jesu Goāmūre serēñumi*

*Mt 26.36-46; Lc 22.39-46*

<sup>32</sup> Eropii erā Getsemaní waīcūri gorogue wañorā. Erogue ejaḡu ōpa arīpū Jesu:

—Ohō doayuque. Mūa ohō doaropē sohōgue Goāmūre serēniguigu wagu iiaa, arīpū īḡu buherāre.

<sup>33</sup> Eropa arītuha Pedrore, Santiagore, Ñure sihugāpū. Eropiḡu ñero güinugapū Jesu. Eropiḡu ñero sīporācūpū. <sup>34</sup> Eropa ñero pepiḡu īḡu mera majarāre īḡu sihugānirāre arīpū:

—Būrigā ñero yū sīporācūca. Yūre turaro pūriro dopa pepica yūa. Sohōñari wanigu iiaa. Ohō dujanique. Eropirā yū mera ta tūyūque mūa sā, arīpū Jesu erāre.

<sup>35-36</sup> Eropa arītuha īḡu ero core mero wanemo, yebague mereja, Goāmūre arīpū:

—Ahū, mūhū arīpehrerire iimasia. Eropiḡu yū ñero tariburire iidiabigu iibiricāque. Yū eropa arīquerecū ta yū gamero dopa iibita. Mū basi masia. Mū gamero dopa iique, arī serēpū īḡu Goāmūre.

<sup>37</sup> Eropa arītuha ūrerā īḡu buherā pohrogue eranijaḡu erā carī oyarāre īapū. Īha Pedrore arīpū:

—Simo, ¿carīḡu iiri mūhū? ¿Yuju hora gohra yū mera tūyūtamubirari? <sup>38</sup> Ōaro iique mūa. Mūa pepiri mera ōarire iidiaraa mūa. Mūa seyaro irire iidiaquererā ta irire bocatiubea. Eropirā Goāmūre serēniguicāque ñero mūa iibiriboro dopa, arīpū Jesu Pedrore.

<sup>39</sup> Eropa arī weretuha dipaturi waha, Goāmūre serēpū daja. Īḡu ero core īḡu arīdiro dopa ta arī serēpū daja. <sup>40</sup> Serētuhā dipaturi erā pohrogue dujaripū daja. Eropa dujarigū carī oyarāre īapū daja. Wūja pūritaricāyoro erāre. Eropirā erā Jesu “¿Duhpirā carīri mūa?” erāre

arīcū yūhrimasibiriñorā. <sup>41</sup> Eropigu dipaturi īgu Goāmure serēra pūhrū, erā pohro eraa erāre arīpū:

—¿Mūa carīrā soorā iiri dohpa? Iripēta āhraa. Sihajagāriro iiaa. Dohparagā yūre masare Goāmū īgu obeodigūre ñerāre erā oburisubu sihajaa. <sup>42</sup> Wahgāque. Ina warā. Īaque. Yūre īhaturirāre īhmubu ohō ahrimi, arīpū Jesu erāre.

*Jesure īhaturirā peresu ñeañuma*

*Mt 26.47-56; Lc 22.47-53; Jn 18.2-11*

<sup>43</sup> Īgu eropa arī wereniguisubu Juda doce buherā mera majagu erapū. Eropirā masa bajarā ñoserimijirire, yucure opanirā īgu mera yujuro mera erañorā. Erā pahia oparā, judio masare buherā, mūrā sā erā obeonirā árīñorā. <sup>44</sup> Negohrare Jesure īhaturirāre obu, ōpa arītuhapū:

—Yū īgu wayuporāre mimigu īgu ta árīgucumi mūa ñeabu. Īgure yū mimira pūhrū ñeaque. Eropirā īgure ōaro ñeaque īgu duhribiri-boro dopa, arī wereserepū Judapū erāre.

<sup>45</sup> Eropigu Jesu pohrogue eragu mata wa purumujupū:

—Buhegu, ¿āhriri muhū? arī īgure wayuporāre mimipū.

<sup>46</sup> Īgu eropiicū ĩarā erā Jesure ñeañorā.

<sup>47</sup> Erā eropiicū ĩagu īgu pohrogue niguinirā mera majagu īgu matamijire tuāwea aī, pahia opū pohro majagure īgu gamirore tabe corocāpū.

<sup>48</sup> Eropigu Jesu ōpa arīpū:

—¿Mūa ñoserimijiri mera, yucu ducari mera arirā, yajari masure iro dopa mūa yūre ñearā arirā iari? <sup>49</sup> Ūmuri nūcu Goāmū wihigū yūhū mūare buhedoacū, mūa yūre ne ñeabiribū. Dohpaguere mūa yūre eropa iirā i árīpehreri Goāmū yare weremūhtanirā erā arī gojadiro dopa ta mūa yūre iiaa, arīpū Jesu erāre.

<sup>50</sup> Eropirā Jesu buherā árīpehrerā īgure cohā omagā wañorā.

<sup>51</sup> Eropigu yujugu mamū Jesu pūhrū nūrusiaripū. Omasiarīñe dihta omadigu árīpū. <sup>52</sup> Īgu sāre erā ñeadiacū īgu ya omasiarīñere cóācā suhri marigu oma duhrigā wapū.

*Judio masa oparā Jesure serēpiñuma*

*Mt 26.57-68; Lc 22.54-55, 63-71; Jn 18.12-14, 19-24*

<sup>53</sup> Eropii pahia opū pohrogue Jesure aī ejañorā. Iri wihiguere árīpehrerā pahia oparā, mūrā, judio masare buherā sā gamenereñorā.

<sup>54</sup> Eropigu Pedropū Jesu pūhrū yoarogue ĩha nūrusiapū. Eropa nūrusiagu īgu pahia opū Caifa waīcūgu ya wihire cāhmotara sāriro eja, iri sāriro pohecague ñajaa wapū. Eropigu īgu iri wihire corerā surara mera peame tūro sōhma doapū.

<sup>55</sup> Eropirā pahia oparā, gajirā oparā mera gamenererā Jesure wejēdoremorā, gūyari mera erā īgure dipuwaja moaborore guñamaariñorā. Erā eropa weresāburire guña bocabiriñorā. <sup>56</sup> Masa bajarā īgure erā gamero weresāmaacāquererā erā weresāri diaye árībiriyo. Gajigu gajiropa arī, gajigu sā gajiropa dihta arīñorā. <sup>57</sup> Eropirā gajirā erogue eja, Jesure weresāñorā:

<sup>58</sup> —Īhī ōpa arīmi: “Yūhū i wihire masa iira wihire, Goāmū wihire cóāgura. Eropa cóāgu ūhrenū pūhrū iri wihire dipaturi iigura. Iri wihi masa erā iira wihi árīsome,” īgu arīcū gua peebu, arī weresāñorā.

<sup>59</sup> Erã eropa arĩ weresãquerecũ ta iri diaye árĩbiriyo. Gajigu gajiropa arĩ gajigu sã gajiropa arĩpu.

<sup>60</sup> Erã eropa arĩra puhru pahia opu erã watope wahgãnugaja Jesure serẽpipu:

—¿Oã mure weresãquerecũ ta erãre yuhri gamebeari mũhu? ¿Mure erã weresãrire duhpigu erãre yuhri gamebeari mũhu? arĩpu ïgu Jesure.

<sup>61</sup> ïgu eroparĩcũ peequeregu ta Jesu eropa pepicãpu. ïgu eropa yuhribiricũ ïagu pahia opu ïgure dipaturi serẽpipu daja:

—¿Cristo ta àhriri mũhu? ¿Oãgu Goãmu magu ta àhriri mũhu? arĩ serẽpipu daja ïgu Jesure.

<sup>62</sup> ïgu eropa arĩcũgue ta Jesu yuhripu:

—Ïgu ta àhraa. Eropirã yuhu masu Goãmu ïgu obeodigu yu Pagu turagu pohro, ïgu diayeru yu doacũ ïarãca mua. Eropirã umaro maja imica watope yu aricũ sãre ïarãca mua, arĩpu Jesu ïgure.

<sup>63</sup> ïgu eroparĩcũ ta pahia opupu ïgu sañarañe suhrirore ïgu basi yeguecãpu gajirãre “Guataricãmi,” arĩdoregu.

—Ïre weresãrãre gajirãre mari gamebeaa pare. <sup>64</sup> ïgu basi Goãmure ïgu ñero wereniguicũ peea mari. Eropirã ïgu ñero iira dipuwajare masituhaa mari. ¿Eropirã dohpa iirãcuri mari ïre dohpaguere? arĩpu pahia opu gajirã oparãre.

—Ïgu ñeri dipuwaja wejẽcãro gahmea, arĩ yuhriñorã erã árĩpehrerã oparã.

<sup>65</sup> Eropirã erã mera majarã Jesure disico ehosũ ïgu cuireire diricãhmotacã, ïgure pañorã. Patuha òpa arĩñorã ïgure:

—¿Noa mure pari? Ïabiriqueregu guare wereque, arĩ wereyañorã erã.

Eropirã opu yarã surara Jesure pañorã.

—*Ïgure masibea, arĩpu Pedro Jesure*

*Mt 26.69-75; Lc 22.56-62; Jn 18.15-18, 25-29*

<sup>66</sup> Eropigu Pedro iri wihi maja sãriro pohecague ïgu árĩcũ pahia opu pohro majago erapo. <sup>67</sup> Igo Pedro ïgu sòhmacũ ïago ïgu dihtare ïhaniguipo.

—Nazare majagu mera Jesu mera mu sã àhrabu, arĩpo igo Pedore.

<sup>68</sup> Igo eroparĩcũ peegu Pedropu òpa arĩpu:

—¿Dohpa arĩmaacãgo iiri mũhu? Mu arĩgure ne masibea yuhu, arĩpu Pedro igore.

Igo eropa arĩra puhru Pedro iri puu maja sãriro disiporo pohrogue waru. Eropigu ïgu ero niguicũ càreña werepu. <sup>69</sup> Ero ïgu árĩcũ ïago dipaturi werepo daja ero arĩrãre.

—Ihĩ Jesu buherã mera majagu àhrimi, arĩpo igo.

<sup>70</sup> Igo eroparĩcũ peegu Pedro dipaturi arĩpu daja.

—Ïgure masibea yuhu, arĩpu daja.

Eropii merogã puhru ta ero niguirã Pedore òpa arĩñorã daja:

—Diaye ta àhraa. Mũhu Galilea majagu àhraa. Eropigu ïgu mera majagu ta àhraa mũhu, arĩñorã erã ïgure.

<sup>71</sup> Erã eroparĩcũ peegu ïgu erãre yuhripu:

—Diaye ta Goãmũ mera arĩgu iiaa mũare. Yũhu diaye arĩbircũ Goãmũ yũre dipuwaja moaporo. Īgũre mũa arĩgũre ne masibea yũhu, arĩ yũhripũ ĩgu erãre.

<sup>72</sup> Īgu eroparĩcũ ta cãreña werepũ daja. Īgu werecũ peegu Jesu ĩgu arĩrare guñapũ. “Cãreña pesubu ĩgu wereboro core mũhu yũre uħresubu ‘Jesure masibea,’ arĩgũca mũhu,” Jesu ĩgu eropa arĩrare guñapũ Pedro. Eropa guñagũ turaro orepũ.

## 15

*Pilato Jesure serẽpiñumi*

*Mt 27.1-2, 11-14; Lc 23.1-5; Jn 18.28-38*

<sup>1</sup> Eropirã boyorogue mũrã, pahia oparã, judio masare buherã, árĩpehrerã gajirã oparã mera gamenere weretamuñorã erã Jesure iiburire masimorã. Erã basi wereniguituha, Jesure dihri aĩgã Pilato waĩcũgũre opũre oñorã ĩgũre. <sup>2</sup> Erã aĩ ejacũ ĩagũ Pilato ĩgũre serẽpipũ:

—¿Diaye ta judio masa opũ aħriri mũhu? arĩ serẽpipũ ĩgu Jesure.

—Mũ arĩro dopa ta ĩgu ta aħraa, arĩ yũhripũ ĩgũre Jesu.

<sup>3</sup> Eropirã pahia oparã baja weresãñorã ĩgũre. <sup>4</sup> Erã eropa arĩ weresãcũ peegu dipaturi serẽpipũ daja ĩgũre.

—Oã mũre baja weresãrã iima. ¿Erã eropa arĩ weresãquerecũ yũhribeari mũhu? arĩpũ ĩgu.

<sup>5</sup> Īgu eroparĩcũ Jesu yũhribiripũ. Eropigũ Pilato ĩhamaria warũ.

*Jesure wejẽdoreñuma*

*Mt 27.15-31; Lc 23.13-25; Jn 18.38–19.16*

<sup>6</sup> Bojori nũcũ Pascua bosenu árĩcũ peresu árĩdigũre yujugũre masa “Īgũre wiuque,” erã arĩgũre Pilato eropa wiubasamũripũ. <sup>7</sup> Irisubure Barrabá waĩcũgũ peresugũre árĩpũ. Īgu oparãre cóãdiarã mera majagũ masare wejẽrã mera majagũ árĩpũ. <sup>8</sup> Eropirã masa bajarã Pilato pohrogue eja, ĩgũre serẽñorã:

—Bojori nũcũ mũ iidiro dopa ta iique daja gũare. Yujugũ peresugũre árĩgũre gũare wiubasaque daja, arĩñorã erã.

<sup>9</sup> Erã eroparĩcũ Pilato erãre serẽpiñapũ:

—¿Mũa yagũ opũre judio masa opũre wiucuri? arĩ serẽpipũ Pilato erãre Jesure wiudianijagũ.

<sup>10</sup> Jesure masa erã mahicũ ĩarã pahia oparã Jesure ĩhaturirã árĩñorã. Eropa ĩhaturirã ĩgũre wejẽdorerã oñorã Pilatore. Erã ĩhaturirire masigũ Pilato Jesure wiudiaripũ. <sup>11</sup> Īgu eropa wiudiaquerecũ ta pahia oparã Jesu mera masare guacũ iĩñorã. Ōpa arĩdoreñorã erãre: “Barrabáre wiuque. Jesure wejẽdoreque,” Pilatore arĩdoreñorã masare. <sup>12</sup> Eropigũ Pilatore Barrabáre erã wiudorera pũhrũ Pilato erãre serẽpipũ daja:

—¿Ihĩ “judio masa opũ” mũa arĩgũpũre duhpigũcũri yũhu? arĩ serẽpipũ ĩgu.

<sup>13</sup> —Crusague pabia wejẽque ĩgũre, arĩ gaguiniguiñorã masa.

<sup>14</sup> —¿Ñehenore ñerire iiari ihĩ mũa eropa arĩ gaguiniguicũ? arĩpũ ĩgu.

Īgu eroparĩcũ peerã erã gaguiniginemoñorã daja.

—Crusague pabia wejẽque ĩgũre, arĩñorã daja.

<sup>15</sup> Erã eropa arĩ gaguiniguicũ peegu Pilato Barrabáre wiudorepu masare mucubiricũ iidiagu. Eropigu Jesure yuradari mera tãradore, crusare pabia wejẽdoregu wiapu surarare.

<sup>16</sup> Eropi surara ĩgu opu Pilato wihigue pretorio waĩcuri wihigue Jesure aĩ ejañorã. ĩgure aĩ ejatuha erã gajirã surara erã mera majarãre gameneremorã sihubeoñorã. <sup>17</sup> Eropirã erã opu ya suhriro dopa bejariñere Jesure sañorã. Eropa sãtuha pora berore ii ĩgu dipuru duhpeoñorã. <sup>18</sup> Eropiituha õpa arĩ wereyañorã erã ĩgure:

—Umupeorã arique. Judio masa opu õaro árĩporo, arĩ wereyañorã ĩgure.

<sup>19</sup> Eropirã ĩgu dipurure yucugu mera padiu, ĩgure disico ehosũ, gahyadiaro ĩaro dopa ta mereja ĩgure ii birañorã. <sup>20</sup> Eropi ĩgure wereya biratuha, erã sãra suhrirore tuwea aĩ, ĩgu ya suhriropure ĩgure sañorã daja. Eropirã ĩgure crusague pabia wejẽmorã aĩ wiria wañorã.

*Erã Jesure crusague pabia wejẽñuma*

*Mt 27.32-44; Lc 23.26-43; Jn 19.17-27*

<sup>21</sup> ĩgure aĩgã, Simo Cirene majagu pohegue árĩdigu erã pohro ĩgu eracũ ĩarã surarapu ĩgure Jesu ĩgu coãra crusare coãgãbasadoreñorã. Alejandro, Rufo sã pagu árĩpu Simopu.

<sup>22</sup> Waha Gólgota waĩcurogue ejañorã. Gólgota arĩro mari ya mera “dipu pero” arĩro iiaa. <sup>23</sup> Eropirã vinore suĩri deco mera erã morera decore Jesure oriñorã. Iri decore ihribiripu ĩgu. <sup>24</sup> Eropirã ĩgu suhrire tuwea aĩra puhru crusague Jesure pabiañorã. Erã pabiatuhaja ĩgu suhri murare “¿Noa yañe árĩrocuri iñe?” arĩ game deabirañorã.

<sup>25</sup> Jesure erã pabiara puhru uhre hora duhyayoro goeri boje ejaboro. <sup>26</sup> Eropirã crusague õpa arĩ gojarapũre pabia duhtuñorã. “Ihĩ judio masa opu aħrimi,” erã arĩ gojaturapũ árĩyoro. Iri erã gojaturapũ Jesure erã weresãra árĩyoro. <sup>27</sup> Eropirã perã yajari murare Jesu pohro gajimijirigue crusarigue erã pabiatuñorã erã sãre. Yujugu ĩgu diayepu, gajigure ĩgu copu pabiatuñorã. <sup>28</sup> Erã eropiicũ iribojegue Goãmu yare weremuhtanirã gojadiro dopa ta eropa wayoro. Õpa arĩ gojayuñuma: “‘Dorerire tarinugarã mera majagu aħrimi,’ arĩ pepima masa ĩgure,” arĩ gojañuma iribojegure.

<sup>29</sup> Eropirã crusari pohro tarigãrã Jesure ĩha, erã dipurure yurerã, ĩgure ñero arĩ werenĩguñorã.

—Mũhu ta “Goãmu wihire cohã, uhrenu puhru iri wihire amugura daja,” arĩdigu árĩribu mũhu. <sup>30</sup> Mu basi dijaque. Eropigu mu basi tarique. Eropigu tari wereguca mũhu, arĩ wereyañorã erã.

<sup>31</sup> Erã iro dopa ta pahia oparã sã judio masare buherã sã ĩgure eropa wereyañorã. Eropa arĩ wereyarã õpa arĩñorã erã basi:

—ĩgu gajirãre taudigu árĩqueregu ta ĩgu basi tarimasibeami. <sup>32</sup> “Israe masa opu aħraa,” arĩrimi ĩgu. Eropirã ĩgu basi dijaricũ ĩarã ĩgure umupearãca, arĩ wereyañorã.

Yajari mura sã ĩgu pohro erã pabianirã eropa ta ĩgure ñero arĩ wereyañorã.

*Jesu sĩria wañumi*

*Mt 27.45-56; Lc 23.44-49; Jn 19.28-30*

<sup>33</sup> Eropi goeri boje árĩcũ uhre hora gohra árĩpehrerogue naitĩa wayoro. <sup>34</sup> Eropigu irisubure ero naitĩarisubu Jesu turaro gaguiniguipũ:

—Eloi, Eloi, ¿lama sabactani? arĩpũ ãgu. Ire arĩgu mari ya mera õpa arĩgu iipũ: “Yũ Goãmũ, yũ Goãmũ, ¿duhpiqu yũre cohãri mũhũ?” arĩgu iipũ ãgu Pagure.

<sup>35</sup> Ñgu eroparĩcũ peenirã yujurãyeri ero niguinirã õpa arĩñĩorã:

—Goãmũ yare weremũhtadigure Eliare sihugũ iicumi, arĩñĩorã erã.

<sup>36</sup> Eropigu yujugũ erã mera majagu mimi aĩri yasũ mera vino suĩrire yosotuha aĩ omagã, yucũgu ojogoro diritu, Jesure simujuripũ. Eropa iigu õpa arĩpũ:

—Corenique. Elia ãgũre itamucũ ãanirã dohpa mari, arĩpũ ãgu gajirãre.

<sup>37</sup> Ñgu eropa arĩra pũhrũ dipaturi Jesu turaro gaguinigui sĩria warũ.

<sup>38</sup> Ñgu sĩricũ ta Goãmũ wihi majañe suhriro ero erã cãhmotara suhriro gasiro deco mera yehguea wayoro. <sup>39</sup> Ñgu eropa sĩricũ ãagu surara opũ Jesu pohro niguidigu õpa arĩpũ:

—Diaye ta ãhraa. Ihĩ Goãmũ magũ ta ãhrañumi, arĩpũ ãgu.

<sup>40</sup> Eropirã yoarogue ãhaniguinirã nome sã arĩñĩorã Jesure ãhaniguirã. Erã nome mera María Magdalena arĩpo. Gajigo María waĩcũgo sã arĩpo. Igoũ José ãgu pagũ magũ Santiago erã pago arĩpo. Gajigo Salomé waĩcũgo arĩpo. <sup>41</sup> Erã nome Jesu yare õaro peerã nome arĩñĩorã. Erã Galilea yeba ãgu arĩcũ ãgũre itamumũriñĩorã. Erã nome mera bajarã gajirã nome sã arĩñĩorã. Jerusalengue Jesu mera arinirã nome arĩñĩorã.

*Jesu dũpũre masa gobegue apiñuma*

*Mt 27.57-61; Lc 23.50-56; Jn 19.38-42*

<sup>42-43</sup> Eropii irinũ ãgu sĩriranũ Sabado core judio masa soorinũ core majanũ arĩyoro. Eropiro Pascua maja arĩburire erã amurinũ arĩyoro. Irinũ ãamica arĩcũ José Arimatea majagu gũiro mariro Pilato pohrogue ejapũ. Jesu dũpũre serẽgu ejapũ. José oparã mera majagu oparã erã umupeodigu arĩpũ. Eropigu Goãmũ ãgu opũ arĩburire coregu iipũ. <sup>44</sup> Eropigu José Jesu dũpũ murarore ãgu Pilatore serẽcũ Pilatorũ peegu, pee uca warũ. “¿Jesu sirituhayuri?” arĩ pepipũ. Eropigu surara opũre sihu õpa arĩpũ ãgũre:

—¿Jesu sĩria wayuri? arĩ serẽpipũ ãgũre.

<sup>45</sup> Ñgu eroparĩcũ surara opũ yũhrĩpũ:

—Sĩria wami, arĩpũ.

Ñgu eroparĩcũ Pilato Josere odorepũ Jesu dũpũ mũrũre. <sup>46</sup> Ñgu odorera pũhrũ José õariñe suhrirore asũpũ. Asũtuha, Jesu dũpũre aĩ diju, iri suhriro mera omapũ. Omatuhaja erã utãyegue seara gobegue ãgu dũpũre apipũ. Apituha iri gobe pohro arĩriye utãye wũariyere taragã tubiha nugucãpũ. <sup>47</sup> Eropirã María Magdalena, María José pago Jesure ãgu apidĩrore ãañorã.

## 16

*Jesu masa mũriañumi*

*Mt 28.1-10; Lc 24.1-12; Jn 20.1-10*

<sup>1</sup> Eropirã erã soorinũ Sabadonũ taricũ María Magdalena, María Santiago pago, Salomé mera poresurire asũñorã Jesu dũpũre sũmorã.

<sup>2</sup> Eropirã Domingo boyorogã Jesure erã yaara gobegue wañorã erã.

<sup>3</sup> Warã õpa arĩñĩorã:



—¿Iri gobere erã biharayere noa marire pãgũbasarãcuri mari ñajaborobe? arĩñorã erã erã basi.

<sup>4</sup> Iri gobegue ejarã iri gobere biharayere utãyere erã pãgũ nugurayere ñañorã. Wũariye utãyere arĩyoro. <sup>5</sup> Eropa ñarã iri gobegure ñajañorã. Eropa ñajajarã mamũre diayerũ doagure boreri suhricũgure ñañorã. Ñarã ñha uca wañorã. <sup>6</sup> Erã ucacũ õpa arĩpũ ñgũ:

—Ucabricãque. Crusague erã pabiadigure Jesu Nazare majagure amaraa mũa. Masa mũriatuhami. Õre marimi. Erã ñgũ dũpũre apidirore ñaque. Ñatuhaja ñgũ buherãre Pedro sãre õpa arĩ wererã waque. <sup>7</sup> “Ñgũ mũa core Galileague wamũtagũcumi. Eroque ñgũre ñarãca mũa. Ero ñgũ arĩdiro dopa ta mũa ñgũre ñarãca,” arĩ wererã waque, arĩ wererũ mamũ erãre.

<sup>8</sup> Ñgũ eroparĩcũ erã gũĩ, naragã, masa gobe pohro arĩñirã omagã wiria wañorã. Eropa gũirã gajirãre werebiriñorã.

*Jesu María Magdalenare dehyoañumi*  
*Jn 20.11-18*

<sup>9</sup> Eropii Domingo arĩcũ Jesu ñgũ masa mũriara pũhrũ María Magdalenare dehyoamũtapũ. Igo siete watẽa ñajasũdigo arĩpo. Jesu ñgũ sĩriboro core igore watẽare cõãpũ. Eropigũ igopũre dehyoamũtapũ ñgũ ñgũ masa mũriara pũhrũre. <sup>10</sup> Jesu igore dehyoara pũhrũ igo ñgũ mera majarãre werego wapo. Erã ñgũ sĩrirare bujawererã orerã arĩñorã. <sup>11</sup> “Cristo ojocariami. Ñgũre ñabũ,” igo arĩquerẽcũ peediabiriñorã.

*Jesu ñgũ buherãre dehyoañumi*  
*Lc 24.13-35*

<sup>12</sup> Pũhrũ perã Jesu buherã mera majarã campogue wiri marirogue wañorã. Erã eropa wanigũicũ Jesu gajiropa bejagũ gũhyaro dehyoapũ erãre. <sup>13</sup> Ñgũ eropa dehyoara pũhrũ, waha gajirã Jesu yarãre wereñorã. “Gũa Jesure ñabũ,” erã arĩ werecũ erã peediabiriñorã daja.

*Jesu ñgũ yare buhedoregũ obeoñumi ñgũ buherãre*  
*Mt 28.16-20; Lc 24.36-49; Jn 20.19-23*

<sup>14</sup> Pũhrũ once ñgũ buherã mesa pohrogue erã doacũ erãre dehyoapũ ñgũ. Eropigũ ñgũre ñañirã “Jesu masa mũriapũ,” arĩ erã werecũ peediabirirare erãre turipũ Jesu. Ñgũre õaro umupeobiriri dipuwaja erãre turipũ. <sup>15</sup> Erãre turituha õpa arĩpũ:

—I yeba arĩpeherrerogue masare arĩpeherrerãre õari buherire buherã waque. <sup>16</sup> Yũre umupeorãre erã waĩyenirãre erã peamegue wabonirãre taugũcumi Goãmũ. Eropirã yũre umupeobirã Goãmũ ñgũ dipuwaja moamorã, peamegue wamorã arĩrãcoma. <sup>17</sup> Eropirã yũre umupeorã yũ turari mera õpa iirãcoma: Yũ turari mera watẽa masare ñajasũñirãre cõãrãcoma. Eropirã mama disirore wereniguirãcoma. <sup>18</sup> Eropirã añare ñeacũ, arĩpeherrerĩ nimare erã ihricũ pũrisome erãre. Eropirã dorecũrã weca erã mojotorire erã mohmepĩ ñeacũ õarã warãcoma, arĩpũ Jesu ñgũ buherãre.

*Jesu umarogue mũria wañumi*  
*Lc 24.50-53*

<sup>19</sup> Eropa arĩ weretuha mari Opũ Jesu umarogue mũria wapũ. Eroque ejangũ Goãmũ diayerũ doapũ ñgũ mera opũ arĩgũ. <sup>20</sup> Eropirã

ĩḡḡ buherãḡḡ ářĩpehreroguerẽ õari buherire Goãmḡḡ masare ĩḡḡ tauburire buherã wañorã. Erã eropa buhecũ mari Opḡḡ erãre itamupḡḡ. Deyoro moarire ĩḡḡ turari mera ĩimasicũ ĩipḡḡ erãre masare ĩḡḡ ya buherire peedoreḡḡ. “Eropa ta ářĩporo,” arãa yḡḡḡ. Iripẽta ãhraa.

## San Lucas

1-2 Opɔ Teófilo, mɔre ipũre gojabeogu iiaa yɔhɔ. Jesu guɔ mera árinigu ĩgu iirare gajirá gojanɔgamuhtatuhanirá árima. Negohraguere Jesure ĩanirá, ĩgu yare buhenirá erɔ arĩ werediro dopa ta gajirá irire gojanɔgamuhtatuhanirá árima. <sup>3</sup> Eropigu i áripehrerire óaro masipehodiagu yɔ sã erɔ arĩ wererare buhebɔ. Eropigu yɔ sã irire óaro gojadiaa mɔa buheburi áriburire. <sup>4</sup> Jesu yare buherɔ mɔre weretuhanirá árima. “Iri queoro áhraa,” óaro mɔ arĩ masiborore ipũre mɔre gojabeogu iiaa.

*Ñu waĩyeri masɔ ĩgu masa dehyoaburire anyu wererɔ Zacariare Ñu pagɔ áribure*

<sup>5</sup> Herode Judea yeba majarɔ opɔ ĩgu áricɔ, Zacaríá waĩcɔgɔpɔ pahĩ áripɔ. Zacaríá ya curupɔ pahia curu Abías ya curu áriyoro. Zacaríá marapo sã pahĩ Aarón mɔrɔ pãrameo árituriagogue áripo. Igopɔ Elisabet waĩcɔgo áripo. <sup>6</sup> Erɔ perɔ Goãmu dorerire iipehorɔ erɔ áricɔ ĩagu, “Umuri nɔcɔ óarire iirɔ áhrima,” arĩ pepidi árimi Goãmu erɔre. <sup>7</sup> Elisabet ne porɔ marigo áripo. Eropigo igo Zacaríá mera porɔ mari muñucãpo.

<sup>8</sup> Pahia Goãmu wihigue Goãmu ya umupeoburire mohmerɔ umuri nɔcɔ erɔ gohrotomuriñorɔ. “Zacaríá ya curu majarɔ dohpaguere iiporo,” erɔ arĩra pũhrɔ ĩgu pahia erɔ iidiro dopa ta Goãmu ya umupeoburire mohmegɔ arigɔ iipɔ. <sup>9</sup> Pahia erɔ iiguaro dopa ta inciensore soebure beyerɔ irisubure Zacariare beyeñorɔ. Eropigu ĩgu Goãmu wihigue ñajaa wapɔ soegɔ wagɔ. <sup>10</sup> Goãmu wihi pohecague ĩgu áriřisubu, inciensore ĩgu soerisubu áripehrerɔ masapɔ disiporogue Goãmu mera serėniguiñorɔ. <sup>11</sup> Irisubure Goãmu yagu anyu incienso soero diayerɔ dehyoanɔgajapɔ Zacariare. <sup>12</sup> ĩgu anyu eropa dehyoacɔ ĩagu Zacaríá ĩgure ĩha, ɔca wa, guia wapɔ. <sup>13</sup> Eropa ĩgu guicɔ ĩagu anyu ĩgure wererɔ:

—Zacaríá, guibita. Goãmu mɔ serėrare peeami. Eropigo mɔ marapo Elisabet porɔcɔgocumo. Mɔ magɔ masa dehyoagucumi. ĩgu eropa dehyoacɔ Ñu waĩyeque ĩgugãre. <sup>14-17</sup> “ĩgu óagu áhrimi. Turagu áhrimi,” arĩ pepigucumi Goãmu mɔ magure. ĩgu masa dehyoara pũhrɔ vinore, siburire iħrisome. Eropigu ĩgu, ĩgu masa dehyoara pũhrɔ ta Espiritu Santo áriři mera óaro turagu áriřucumi ĩgu. Eropigu bajarɔ Israe masare Goãmu mari Opɔre óaro gamecɔ iigucumi ĩgu. Goãmu yare buhegu Elia Goãmu yare weremũhtadigu mari Opɔ ariborore ĩgu buhediro dopa ta Goãmu ĩgu turari mera mɔ magɔ sã buhegucumi. Eropa buhegu erɔ pagɔ sumarɔ erɔ porɔ mera erɔ óaro game mahi áricɔ iigucumi. Eropigu dorerire tarinɔgarãre óaro erɔ umupeori mera yħricɔ iigucumi. Eropa buhegu mari Opɔ ariboro core ĩgu yarɔ árimorãre amuyugucumi ĩgu. Eropigu ĩgu masa dehyoara pũhrɔ mɔhɔ mucubiriguca. Gajirá sã bajarɔ mucubirirãcoma, arĩpɔ anyu Zacariare.

<sup>18</sup> ĩgu eroparicɔ peegɔ Zacariapɔ serėripɔ anyure.

—Yũhũ, yũ marapo mera guã murã ãhraa. ¿Eropigu mũ arĩra diaye áricũ dohpa masigucuri yũhũ? arĩpũ ĩgu.

<sup>19</sup> ĩgu eroparĩcũ anyupũ ĩgũre werepũ:

—Yũhũ Gabriele waĩcũgu ãhraa. Goãmũ pohro árigũ ãhraa yũhũ. Goãmũ i ðari quererere weredoregũ, mũ pohro yũre obeoami. Yũ werediro dopa ta diaye waroca. <sup>20</sup> Yũ eropa arĩquerecũ ta yũre peediabeaa mũhũ. Eropigu mũhũ dohpaguere wereniguibigu dujagũca. Mũ magũ ĩgu masa dehyoara pũhrũ wereniguigũca daja, arĩpũ anyu Zacariare.

<sup>21</sup> Disiporogue masa Zacariare corerã iĩñorã. “¿Duhpigũ ĩgu Goãmũ wihigue árigũ mata wiriribeari?” arĩ, corerã iĩñorã masa ĩgũre. <sup>22</sup> Eropigu ĩgu i wihigue áridigũ wiria, erã mera wereniguimasibiripũ. “Goãmũ ĩgũre dehyoacumi,” arĩ pepi, masiñorã erã. Eropigu ĩgu wereniguimasibigu árigũ ĩgu mojotori mera masare wereniguipũ.

<sup>23</sup> Goãmũ wihi ĩgu mohmeri pehrecũ, ĩgu dujaa wapũ ĩgu ya wihigue. <sup>24</sup> Pũhrũ ĩgu marapo Elisabet majigũre ne bocagãrigo iipo. Eropigo igo cinco aberi gohra masa pohro wabiripo. <sup>25</sup> Ōpa arĩpo igo: “Dohpaguere yũre Goãmũ itamumi pare. Yũ porã marigo árigũ guhyasiuro taribũ yũhũ. Goãmũ yũ porã maririre cohãmi yũre,” arĩ pepipo igo.

*Jesu ĩgu masa dehyoaburire werepũ anyu Mariare*

<sup>26-27</sup> Elisabet seis aberi igo nijipo áriĩra pũhrũ, Goãmũpũ anyure Gabriele waĩcũgũre nómeo ðago pohrogue obeopũ. Igo Nazare waĩcũri maca Galilea áriĩri yeba áriipo. Eropigo igo María waĩcũgo José mera mojoto diribo áriipo. Josépũ iribojegue majagũ mũrũ Davi mũrũ pãrami áriipũ. <sup>28</sup> María pohrogue ejagũ anyu werepũ:

—María, ¿ãhriri mũhũ? Goãmũ mũ mera árigũ ãhrimi. Eropigu mũre ðaro iigũ iimi. Áripehrerã nome gajirã nome tauro ðaro iimi mũre, arĩpũ anyu igore.

<sup>29</sup> ĩgu eroparĩcũ peego, igo turaro guña pepipo. Anyu ĩgu wererare pepigo “¿Dohpa arĩgũ yũre eropa arĩcũri?” arĩ guñapo igo. <sup>30</sup> Igo eropa arĩ guñacũ ĩagũ anyu werepũ igore:

—María, mũre Goãmũ turaro mahimi. Eropigo gũibita. <sup>31</sup> Peeque. Majigũre bocagoca mũhũ. Eropigu mũ magũ masa dehyoagũcumi. ĩgũre Jesu waĩyegoca. <sup>32-33</sup> ĩgu turatariagũ árigũcumi. Eropirã ĩgũre “Goãmũ umaro majagũ magũ ãhrimi,” arĩrãcoma masa. Eropigu mũ magũ ñecũ mũrũgue Davi mũrũ Israe masa erã opũ ĩgu áridiro dopa ta mũ magũ sãre apigũcumi Goãmũ. Eropigu áripehrerinũri ĩgu Israe masare doregũcumi. Eropiro ĩgu opũ áriĩripũ ne pehresome, arĩpũ anyu.

<sup>34</sup> ĩgu eroparĩcũ Mariapũ serẽpipo:

—¿Duhpi umũ mera áriĩbiriqũregõ ta porãcũbocuri yũhũ? arĩpo igo.

<sup>35</sup> Igo eroparĩcũ anyupũ werepũ:

—Espĩritu Santo mũre porãcũcũ iigũcumi. Eropiro Goãmũ ĩgu turari imica curu iro dopa ta cãhmotaroca mũre. Eropirã “Goãmũ magũ, ñerire iibigu ãhrimi,” arĩrãcoma masa mũ magũre. <sup>36-37</sup> Goãmũ áripehrerire iimasimi. Eropigo mũ acawerego Elisabet bũro áriĩqũregõ ta majigũre bocãmo igo sã. Igo porãcũgocumo

umugäre. Masa igore “Porã marigo ãhrimo,” erã arĩdigo bũro dohpaguere seis aberi wahaa igo majigũre bocara pũhrũ, arĩpũ anyu Mariare.

<sup>38</sup> Īgũ eroparĩcũ María yũhripo:

—Yũre peeque. Mari Opũ Īgũ pohro majago ãhraa yũhũ. Mũ arĩdiro dopa ta yũre eropa waporo, arĩpo igo.

Igo eropa arĩra pũhrũ anyu waha wapũ.

*María Elisabere ĩago wapo*

<sup>39</sup> Irinũrire María utã yucũ árĩri yebague Judea yeba árĩri macague umũdiaro waha wapo. <sup>40</sup> Erogue ejago Zacarĩa ya wihi ñaja, “¿Ahriri?” arĩpo igo Elisabere. <sup>41</sup> Igo eroparĩcũ Elisabet igo peecũ ta, igo magũpũ niji suhrirogue árĩdigũ ñohmepũ. Elisabet Espĩritu Santo árĩri mera õaro pepigo wapo. <sup>42</sup> Eropigo turaro mucubiriri mera wereniguipo.

—Arĩpehrerã nome tauro õaro iimi Goãmũ mũre. Mũ magũ sãre õaro iimi Goãmũ. <sup>43</sup> Cue, yũ Opũ pago yũ pohro aricũ õaro iimi yũre Goãmũ. <sup>44</sup> Mũhũ yũre “¿Ahriri?” arĩcũ, yũ magũpũ niji suhrirogue árĩgũ mucubiriri mera ñohmeacumi yũre. <sup>45</sup> “Goãmũ Īgũ arĩdiro dopa ta iipehogucumi,” arĩgo mucubirigo ãhraa mũhũ, arĩpo Elisabet Mariare.

<sup>46</sup> Igo eroparĩcũ María yũhripo:

Goãmũ õagũ, turagũ ãhrimi, arãa. Yũhũ õaro sĩporãcũa. <sup>47</sup> Goãmũ yũre peamegue wabodigore itamugũ ãhrimi. Eropigũ dohpaguere yũre õaro mucubiriri mera árĩcũ iimi. <sup>48-49</sup> Yũre bu árĩgore Īgũ Īgũ pohro majagore guñadi ãhrami. Goãmũ turatariagũ õari dihtare yũre itamumi. Eropirã “Igore Goãmũ õaro iimi,” arĩpehrerã masa dohpaguere eropa arĩ wereniguirãcoma yũre. Goãmũ ñeri marigũ ãhrimi. <sup>50</sup> Arĩpehrerinũri arĩpehrerã ĩgare umupeorãre ĩgũ mojomoro ĩagũ ãhrimi. <sup>51</sup> Goãmũ ĩgũ turari mera iigũ ãhrimi. “Gajirãre tarinũgaa yũhũ,” arĩrãre tarinũgadi árĩmi ĩgũ. <sup>52</sup> Oparãre erã dorero árĩrare cõadi árĩmi ĩgũ. Eropigũ bu arĩrãpũre ĩgũ oparã iro dopa ta apidi árĩmi. <sup>53</sup> Oaboanirãre ĩgũ õari barire ódi árĩmi. Eropigũ baja opanirãpũre gajino moorã wacũ iidi árĩmi ĩgũ. <sup>54-55</sup> Mari ñecu sumarã mũrare “Masare õaro iigũra,” ĩgũ arĩ werediro dopa ta iipehodi árĩmi Goãmũ. Eropigũ ĩgũ pohro majarã Israe masare ĩgũ itamudi árĩmi. Mari ñecu sumarã mũrare, Abrahã mũrũre arĩpehrerã ĩgũ acawererã ĩgũ pũhrũ arĩrã sãre Goãmũ arĩpehrerinũri eropa mojomoro ĩaniguigũ árĩmũridi árĩmi. “Masare õaro iigũca,” erãre ĩgũ werepirare cãdijibiridi árĩmi Goãmũ, arĩpo María.

<sup>56</sup> Hrerã abe gohra Elisabet mera ãhri, igo ya macague goe dujaa wapo María.

*Ñũ masa dehyoapũ*

<sup>57</sup> Elisabet igo niji wahgũra pũhrũ igo magũ masa dehyoapũ. <sup>58</sup> Eropirã Goãmũ igore ĩgũ eropa õaro iicũ igo ya maca majarã igo acawererã sã igo mera mucubiriñorã. <sup>59</sup> Ocho nũri ĩgũ masa dehyoara pũhrũ, ĩgũ pagũ sumarã ĩgũgãre gasiro merogã wiri aĩdorerã wañorã. Eropa erã ĩirisubu erã mera majarã Zacarĩa waĩyediariñorã ĩgũgãre

ĭgu pagu waĭre. <sup>60</sup> Erā eropa waĭyediaquerecũ ta ĭgu pagoru ōpa arĭpo:

—ĭgu pagu waĭre waĭyebaa. Ńu waĭyerāca ĭguġare, arĭpo ĭgo.

<sup>61</sup> —Mu acawererā ne yujugu Ńu waĭcugu marimi, arĭnorā erā ĭgore.

<sup>62</sup> Eropirā erā mojotori mera werenĭgui Zacariare serēpiñorā erā.

—¿Mũca dohpa waĭyediari mu magure? arĭ serēpiñorā ĭgure.

<sup>63</sup> Erā eroparĭcũ ĭgu pagu gojaburimijire serēbeo, ñeha, gojapu: “Yu magu Ńu waĭcumi,” arĭ gojapu Zacarĭa. ĭgu eropa arĭ gojacũ erāpu ũca wañorā. <sup>64</sup> ĭgu eropa arĭ gojara puhru ĭgure werenĭguicũ ĭpu Goāmũ. Eropigu ĭgu werenĭguimasĭpu daja.

—Goāmũ turagu, ōagu āhrimi, arĭpu ĭgu.

<sup>65</sup> ĭgu eropa arĭ werenĭguicũ peerā ero majarā ũca wañorā. Eropirā ĭ arĭpehrerire Judea yeba majarāre ũtā yuca watope arĭrāre masa weresiriñorā. <sup>66</sup> Arĭpehrerā ĭre peerā guñañorā. “Goāmũ turarire ĭguġa opami. ¿Eropigu ñehmũno arĭgũcuri ĭguġa?” arĭ pepiñorā masa.

### *Zacarĭa Goāmũre umupeoru*

<sup>67</sup> Eropigu ĭgu pagu Zacarĭa Espĭritu Santo arĭri mera ōaro pepigu arĭgu Goāmũ yare wereru:

<sup>68</sup> Mari Israe masa Goāmũre umupeorā. ĭgu yarā āhraa mari. Eropigu mari pohrogue arĭgu, marire itamugu ōaro taumi. <sup>69</sup> Eropigu Goāmũ turagure marire peamegue wabonirāre ōaro taubure obeomi. Marire ōaro taubu ĭgu acaweregu Davi mũru āhrimi. Davipu Goāmũ pohro majagu arĭmũriñumi. <sup>70</sup> Iribojegue ĭgu ya weremuhtanirā mera Goāmũ ĭgu marire taubure obeoburire weryumũripũ. <sup>71</sup> Marire ĭhaturirā marire ñero erā iidacũ ĭagu “Mũare itamugura,” arĭ apiñumi Goāmũ marire. <sup>72</sup> Mari ñecu sũmarā mũrare, “Mũare mojomoro ĭagu itamugura. Mũare yũ wererare guñagura,” arĭ apiñumi Goāmũ mari ñecu sũmarāre. Iribojegue ĭgu eropa arĭdiro dopa ta marire dohpaguere iimi. <sup>73-75</sup> Eropigu Abrahāre ōpa arĭmũriñumi: “Mu acawererā puhru arĭrā erāre ĭhaturirā arĭcũ cōagura. Eropigu mu acawererāre itamugura. Eropirā erā gũibirā ta yũ dorerire iimasima. Eropigu erā ñerire yũ cōācũ, erā yũ ĭhuro ũmũri nũcu ōarā arĭniguirācoma,” arĭ werepimũriñumi iribojegue Goāmũ mari acaweregu Abrahāre, arĭpu Zacarĭa.

Eropa arĭtuha ĭgu magũġare ōpa arĭpu:

<sup>76-77</sup> —Mahgu, mũre ōpa arĭrācoma masa:

“Goāmũ turatariagu yare werenĭguigu āhrimi,” arĭrācoma mũre. Eropigu mũhu mari Opu core wayugũca. Eropa wagu ōpa arĭ wereguca. “Goāmũ mũa ñerire cōagu, peamegue wabonirāre taugũcumi mũare,” arĭ wereguca. Eropa arĭ weregu mari Opu ĭgu arĭborore weremuhtayugu ĭguca mũhu. <sup>78</sup> Goāmũpu marire turaro mojomoro ĭagu marire ōaro ĭgu arĭgu, ĭgu marire peamegue wabonirāre taudiami. Marire taugu arĭgu Cristo mari pohro arĭgũcumi. <sup>79</sup> Arĭpehrerā mari peamegue wabonirāre taudiami ĭgu. Eropigu Goāmũre mari masibirā arĭcũ ĭagu marire masicũ iidiami ĭgu. Eropigu mari ōaro yujuro mera mari arĭborore wereguca marire, arĭpu Zacarĭa.

<sup>80</sup> Eropi Ñu Zacaría magu ðaro bugapu. Eropigu Goãmure turaro mahipu. Eropigu yoari boje masa marirogue árîmuriþu. Te Israe masare buhenugagu sã erogue ta árîmuriþu.

## 2

### *Jesu masa dehyoapu*

#### *Mt 1.18-25*

<sup>1</sup> Irisubure árîpehreri yebari majarã tauro opu Augusto árîpehrerãre queodorepu. <sup>2</sup> Oã masare erã ne queonugarisubu árîcũ Cirenio waicugu Siria yeba majarã opu árîpu. <sup>3</sup> Eropirã árîpehrerã erã ñecusumarã iribojegue majarã ya macarigue erã waire gojapeorã wañorã. <sup>4</sup> José sã Nazaregue Galilea árîri yeba árîri macague árîñirã waha, Judea yebague Belén waicuri macague ejañorã. Opu Davi iribojegue majagu igu masa dehyoadiro árîyoro Belén. José Davi muru párami árîgu Beléngue wapu igu waire gojapeogu wagu. <sup>5</sup> Eropigu igu María igu mojoto diribo árîcũ erogue igo mera igu waire gojapeodoregu wapu. Igonu majigure bocatuhadigogue árîpo. <sup>6</sup> Eropigo Beléngue ejago igo nijí wahgũpo. <sup>7</sup> Erogue masa erã carîri wihi ne sihabiriyoro erãre. Eropirã erã wecua ya wihigue carîrã wañorã. Eropigo igo igu ne dehyoagugãre porãcutuha igugãre suhriro mera oma, wecua erã bari coro weca igure pihripeopo.

### *Anyua ovejare ñhadiburãre dehyoañorã*

<sup>8</sup> Iri ñamire iri maca turogue campogue ovejare ñhadiburã erã yarã ovejare ñhadiburã iññorã. <sup>9</sup> Eropigu Goãmu igu obeodigu anyu erãre dehyoapu. Igu eropa dehyoacũ Goãmu igu gosesiriri erãre boyoweayoro. Eropa wacũ ñarã, ovejare ñhadiburã güia wañorã. <sup>10</sup> Erã eropa wacũ anyu erãre werepu:

—Ñari querere muare weregu ahraa. Árîpehrerã masare mucubiricũ iiroca i quere. Eropirã güibiricãque mua. <sup>11</sup> Dohpagã ñamire opu muru Davi ya macague muare peamegue wabonirãre taubu, Cristo Goãmu igu obeodigu mari Opu masa dehyoatuhami. <sup>12</sup> Eropigu suhriro mera omadigu wecua bari coro weca erã pihripeodigu mua bocagu igu ta árîgucumi, arí werepu anyu erãre.

<sup>13</sup> Igu eroparicũ ta bajarã umaro majarã árîmũhtadigu anyu mera bayapeoñorã. Opa arí bayapeoñorã erã:

<sup>14</sup> Goãmure umaro majagure umupeorã. Eropirã Goãmu igu mahirã güiro mariro gamequeãro mariro ðaro árîporo, arí bayapeoñorã anyua.

<sup>15</sup> Eropa bayatuhaja umarogue erã muru pũhru ovejare ñhadiburãpu erã basi game wereniguiñorã:

—Ire Goãmu igu marire wererare Beléngue ina ñarã warã, aríñorã erã erã basi. <sup>16</sup> Eropa arîrã yojaro mera wañorã erã. Maríare, Josére bocaia, majigugãre wecua erã bari coro weca pihripeodigure ñañorã erã. <sup>17</sup> Ovejare ñhadiburã igure ñatuha anyu majigugãre igu wererare wereñorã gajirãre. <sup>18</sup> Erã eropa arí werecũ ta árîpehrerã erãre pee uca wañorã. <sup>19</sup> Í árîpehrerire Maríapu guña pepipo. <sup>20</sup> Eropirã ovejare ñhadiburãpu anyu igu werediro dopa árîcũ ñañorã. “Goãmu turagu ñhrimi,” arí mucubiriñorã. Eropa arí mucubiri dujaa wañorã.

*Goãmu wihigue Jesu pagu sumará igure aigãñorã*

<sup>21</sup> Yuju semana puhru majigure gasiro merogã wiri aĩrire erã iidoreranu árĩcũ erã igugãre Jesu waĩyeñorã. Jesure ne igo bocaboro core anyupu “Jesu waĩyeque igure,” arĩ werepipu. Eropirã igugãre Jesu waĩyeñorã.

<sup>22</sup> Goãmu doreri Moise igu werediro dopa ta iimorã, José, María mera Jerusaléngue wañorã. Erogue María porãcura puhru òago igo dupu árĩrore ihmurã wañorã. Eropa warã erã Jesure aigã wañorã. Igugãre Goãmure “Ígã mu yagu árĩbu àhrimi,” arĩ ihmurã warã iĩñorã. <sup>23</sup> Òpa iĩñorã Goãmu yare erã gojarapũ dorero dopa ta. “Árĩpehrerã mua porãre ne dehyoarãre Goãmure ihmucue. ‘Ígã mu yagu árĩbu àhrimi,’ arĩ ihmucue,” arĩ doremurĩñumi Goãmu igu yare gojarapũgue. <sup>24</sup> Eropa ihmutuha Goãmu igu dorediro dopa ta mirimagugãre erã asũtuhaja Goãmu wihigue apirã wañorã. Òpa doreñumi Goãmu igu yare gojarapũgue: “Buja borerãre perã oque Goãmure. O erã maricũ buja borewijiğãrãre oque yare umupeomorã,” arĩ doreñumi Goãmũ. Eropirã igu dorediro dopa iĩñorã José María mera.

<sup>25</sup> Jerusaléngue Simeón waĩcugu árĩpu. Igu òagu, Goãmure umupeogu árĩpu. Goãmu Israe masare itamuburire coregu iipũ. Eropigu Simeón Espĩritu Santo igu mera árĩcũ òaro pepigu árĩpu. <sup>26</sup> Eropigu “Mu sĩrĩboro core Goãmũ igu obeobure Cristore iagũca mũhu,” arĩ weremũhtarũ Espĩritu Santo igure Simeore. <sup>27</sup> Eropigu Espĩritu Santo igure dorecũ Goãmũ wihigue ñajaa wapũ. Igu ñajara puhru Jesu pagu sumará igugãre aĩ ñajañorã Goãmũ igu gojarapũ dorera dopa ta iirã. <sup>28</sup> Simeónpu igugãre coã aĩ, Goãmure umupeo, “Õhaa,” arĩ igu mera wereniguipũ. Òpa arĩpu igu Goãmure:

<sup>29-32</sup> Opũ, dohpague tamerare masare peamegue wabonirãre taubure obeoa mũhu. Igu judio masa árĩbirãre buhegu mũre òaro masicũ iigucumi erãre. Masare taubure Israe masare mũhu apiyoro. Mu eropa iirare árĩpehrerã masirã, “Israe masare òaro iimi Goãmũ,” arĩrãcoma masa. Ígã marire taubu àhrimi. Eropigu mu yare arĩdiro dopa igãre iatuhabu. Eropigu dohpaguere òaro mucubirigu sĩrigũca, arĩpu Simeón.

<sup>33</sup> Simeón igugãre arĩrare peerã igu pagu sumarápu pee uca wañorã. <sup>34</sup> Eropigu Simeón erãre “Òaro árĩque mua,” arĩgu igu Jesu pago Mariãre werepu:

—Goãmũ igãre beyedi árĩmi. Igu eropa beyedigu árĩcũ judio masa bajarã igure tarinũgarãcoma. Eropa iirã erã peamegue warãcoma. Eropigu judio masare bajarãre taubure beyedi árĩmi Goãmũ igãre. Igu Goãmũ turarire ii ihmugu igu árĩquerecũ masa bajarã igure ñero arĩ wereniguirãcoma. <sup>35</sup> Erã eropa iicũ gajirã erã ñero guñarire masirãcoma. Eropigo mũhu turaro bajaweregoca, arĩdocaritamupu Simeón Mariãre.

<sup>36</sup> Ero Goãmũ yare wereniguigo Ana waĩcugo árĩpo. Igo Fanuel mago árĩpo. Aser mũru ya curu majago árĩpo. Bũro gohra árĩpo. Igo ero coregue siete bojori dihta igo marapu mera arĩñiripo. <sup>37</sup> Eropigo ochenta y cuatro bojori gohra wapeweyo arĩmaripo igo. Eropigo umare, ñami sãre Goãmũ ya árĩburire iibo, ba duhu, Goãmũ mera



werenigui, Goãmũ wihire ne wiriibiripo. <sup>38</sup> Simeón ïgu wereniguiro watope igo erã pohro erago, mucubirigo Goãmũre, “Õhaa,” arïpo. Eropigo Jerusalén majarãre taubure corerãre igo Jesu dehyoarare wererepõ erã arïpehrerãre.

*José, María mera Jesu mera Nazaregue dujaañorã daja*

<sup>39</sup> Goãmũ ïgu dorero dopa ta iituhaja, erã ya macague Nazaregue dujaañorã. Galilea yeba árïyoro iri maca. <sup>40</sup> Eropigu Jesu ðaro bũga turagu wapũ. Eropigu ïgu ðaro pee masigu árïpũ. Eropigu ïgure Goãmũ ðaro iipũ.

*Jesu mama mahmũa wahãrigũ Goãmũ wihigue buherũ*

<sup>41</sup> Bojori nũcũ Jesu pagũ sũmarã Jerusaléngue Pascua bosenure ïarã wamuriñorã. <sup>42</sup> Jesu doce bojori ïgu opacũ erã iidiro dopa ta erã arïpehrerã Jerusaléngue wañorã. <sup>43</sup> Eropirã bosenu pehrecũ erã erã ya macague dujaa wañorã daja. Erã eropa dujaaquerecũ ta Jesupũ Jerusaléngue dujacãpũ. ïgu pagũ sũmarã ïgu erogue dujarare masibiriñorã. <sup>44</sup> “Ïgu mari mera majarã mera árïcumĩ,” arï pepiriñorã erã. Eropirã erã yujunũ gohra Jesu mariro wañorã mague. Eropirã erã Jesure erã acawererã watope amariñorã. <sup>45</sup> Ne bocabiriñorã. Eropirã Jerusaléngue ïgure amarã dujañorã daja.

<sup>46</sup> Æhrenũ pũhrũ ïgure Goãmũ wihigue bocañañorã. Eropirã Jesure judio masare buherã watope bocañorã. ïgu erãre pee serẽpi doapũ. <sup>47</sup> Erã arïpehrerã Jesure peerã ðaro masigugã ïgu árïcũ ïarã, erã ïhamaria wañorã. <sup>48</sup> ïgu pagũ sũmarã sã eroguere Jesure ïarã ïhamaria wañorã. Eropigo ïgu pago ïgure õpa arïpo:

—Mahgu, ¿duhpigu eropa iiari mũhu guare? Mũ pagũ, yũhũ, “Ïgu dederea wañumi,” arïrã ahmaa gũa mũre, arïpo igo igo magure.

<sup>49</sup> Igo eroparicũ ïgu ïgu pagũ sũmarãre werepũ:

—¿Duhpirã yãre ahmari mũa? Yũ Pagũ yãre ïgu dorediro dopa ta iigu ïaa. ¿Irire masibeari mũa? arïpũ ïgu.

<sup>50</sup> ïgu eropa arïquerecũ erã peemasibiriñorã.

<sup>51</sup> I árïpehreri ïgu iirare Mariãpũ ðaro guñapo. Eropigu Jesu Nazaregue dujaa wapũ. ïgu pagũ sũmarãre ðaro yũhrigu árïmũripũ. <sup>52</sup> Eropigu Jesu bũga, ðaro pee masigu wapũ. Eropirã Goãmũ masa sã “Õagu ahrimi,” arï ïañorã ïgure.

### 3

*Ñũ waïyeri masũ masare Goãmũ yare werepũ*

*Mt 3.1-12; Mr 1.1-8; Jn 1.19-28*

<sup>1</sup> Irisubure erã tauro opũ árïgu Tiberio waïcũgu ïgu opũ árïra pũhrũ quince bojori wayoro. Eropigu Poncio Pilato waïcũgu Judea yeba majarã opũ árïpũ. Eropigu Herode waïcũgu Galilea yeba majarã opũ árïpũ. ïgu pagũ magũ Felipe Iturea yeba majarã, Traconite majarã sã erã opũ árïpũ. Eropigu Lisania waïcũgu Abilinia yeba majarã opũ árïpũ. <sup>2</sup> Eropirã Ana, Caifa mera pahia oparã árïñorã. Oã árïpehrerã erã árïrisubure Ñũ Zacarïa magũ masa marirogue árïgure Goãmũpũ ïgu ïgu yare weredorepũ. <sup>3</sup> Eropigu Jordán waïcũriya turo árïri yeba árïpehrerogue Ñũ õpa arï weregu wapũ:

—Múa ñeri iirire bujawereque. Dohpaguere ðarire gohrotoque. Eropirã waïyenirã árïque. Múa eropa iicũ ïagũ Goãmũ mua ñerire cóãgũcumi, arï weremuripũ ïgũ.

<sup>4</sup> Ñu eropa wereniguigũ Isaia iribojegue majagũ Goãmũ ya weremuhtadigũ ïgũ gojadiro dopa ta iigũ iipũ. Õpa arï gojayuñumi Isaia Ñu iiburire:

Masa marirogue werenigui gaguiniguigũ ðpa arïgũcumi: “Mari Opũ ïgũ ariburi mare amuro dopa ðarã árïyucue mua ïgũre peemorã. <sup>5</sup> Dipa gobericurore mari diaye maja maha iidiro dopa ta, mua ñero iirire duhuque. <sup>6</sup> Múa eropa iicũ Goãmũ muare peamegue wabonirãre ïgũ taucũ ïarãca árïpehreri yeba majarã,” arïgũcumi ïgũ gaguinigui weregũpũ, arï gojamurĩñumi Isaia iribojeguerẽ Ñu ïgũ árïboro coregue.

<sup>7</sup> Masa bajarã Ñu pohro erarã ïgũ erãre waïyecũ gameñorã erã. Eropigũ ïgũ erãre werepũ:

—Múa ñero iiricurã áhrra mua. Goãmure “Gua ñeri dipuwaja moabiricãporo,” arïrã çmua yure waïyedorerã ahriri? <sup>8</sup> ïgũ mua ñero iira dipuwaja moabiricũ ðpa iique mua. Diaye mua ñero iirire bujawererã árïrã, ðarire gohrotorã árïrã, ðarire iique mua. “Abrahã mari ñecu murũ árïmuripũ. Eropirã mari Goãmũ mera ðatuhajaa,” arï pepibiricãque. Muare arïgũ tiiaa. Abrahã pãramerã mua árïri duhpburi árïbeaa. Goãmũpũ gamegũ i utãyeri mera gajirãre iimasimi Abrahã acawererãre. Eropiro Abrahã acawererã mua árïri bu gohra ta áhrra. <sup>9</sup> Õpa áhrra: Mari masa yucũ iro dopa ta áhrra. Goãmũpũ come opagũ iro dopa ta áhrimi. Eropigũ ñeri ducacuri yucũre tabe cóã, iri nuguri sãre tabetagũcumi. Tabetatuhaja, peamegue cóãgũcumi ïgũ iri yucũre iri nuguri sãre. Eropa ta iigũcumi mua sãre ïgũre gamebirãre, arïpũ Ñu masare.

<sup>10</sup> ïgũ eroparicũ peerã masapũ ïgũre serẽpiñorã:

—¿Dohpa iirãcuri gua? arïñorã erã Ñure.

<sup>11</sup> —Peñe suhriro opagũ suhriro moogũre yujuñe oque. Eropirã mua bari oparã gajirã sãre oque, arïpũ Ñu.

<sup>12</sup> Bajamerãgã oparã yare wajasea corerã sã waïyedorerã erañorã. Eropirã Ñu pohro erarã ïgũre serẽpiñorã:

—Buhegũ, çguapũ dohpa iirãcuri? arïñorã.

<sup>13</sup> —Múa oparã erã doreropẽ ta masare niyerure wajaseaque. Gũyari mera aĩnemobita, arï yũhripũ Ñu erãre.

<sup>14</sup> Gajirã surara ïgũre serẽpiñorã daja.

—¿Guapũ dohpa iirãcuri? arïñorã erã ïgũre daja.

—Masare erã niyerure emabiricãque. Eropirã iri niyerure gũya emabiricãque. Múa wajatarire ïarã mucubirique, arï yũhripũ Ñu erãre.

<sup>15</sup> Masa Cristore Goãmũ ïgũ obeobure corerã iñorã. Eropirã ðpa arï pepinũgañorã erã Ñure. “Ihĩ Ñupũ Cristo árïbocumi,” arï pepiriñorã erã. <sup>16</sup> Erã eropa arï pepicũ peegũ Ñu árïpehrerãre werepũ:

—Yũ tauro turagũ arigũcumi. Õatariagũ áhrimi ïgũ. ïgũ iro dopa árïbeaa yũpũ. Eropigũ ïgũre pepigũ, “Yũ tamera bu árïgũ áhrra,” arï pepia yũhũ. Múa ñero iirare bujawerera pũhũ yũpũ muare

deco mera waïyeabũ. Īgũpũ yũ tauro iigũcumi. Espírítu Santore ogũcumi masa mera árĩniguibure. Eropigũ ĩgũ ñerire soewearo dopa ta ĩgũ arigũpũ mua ñerire coeweagucumi. <sup>17</sup> Yũ pũhrũ arigũ trigo gasirire cóãgũ iro dopa àhrimi. Gasiri cóãgũ ĩgũ ya sihburu mera árĩpehreri trigo yeri gasirire sũha weami. Eropa sũha weara pũhrũ trigo yeri gohrapũre ĩgũ diburi wihigue apigũcumi. ĩgũ sũha weara gasiripũre ĩgũ soegũcumi. Eropa ii beyegũcumi yũ pũhrũ arigũ. Ōarire gohrotonirãpũre ĩgũ mera árĩniguicũ iigũcumi. Erã ñero iirare bujawerebirãpũre peamegue yaribiriri peamegue cóãgũcumi, arĩ werepũ Ñũ.

<sup>18</sup> Bajarãre ĩgũ eropa arĩ wereri mera masare ðari buherire werepũ Ñũ. <sup>19</sup> Eropigũ opũ Herodepũ ĩgũ pagũ magũ Felipe marapore ĩgũ emara waja, wũaro ñerire ĩgũ iira waja Ñũ ĩgũ sãre wereripũ. <sup>20</sup> ĩgũ eropa arĩ werecũ Herodepũ Ñure peresu iipũ dipaturi ñerire iigũ daja. Eropa iigũ ĩgũ ñerire iira dipuwajacũgũ árĩnemopũ.

*Ñũ Jesure waïyepũ*

*Mt 3.13-17; Mr 1.9-11*

<sup>21</sup> Ñure erã peresu iiboro core gajirã masare Ñũpũ waïyegũ iipũ. Erãre waïyegũ Jesu sãre waïyepũ. Eropigũ Jesu diague niguigũ Goãmũre ĩgũ sererisubu umũsi pãrimaa waya. <sup>22</sup> Eropa pãrimaara pũhrũ Espírítu Santo buja iro dopa bejagũ Jesu weca dijaripũ. ĩgũ dijaricũ umarogue wereniguiro cariyoro:

—Mũhũ yũ magũ yũ mahigũ àhraa. Mũ mera ðaro mucubiria, arĩro cariyoro umarogue.

*Jesu ñecu sũmarã iribojegue majarã árĩñorã*

*Mr 1.1-17*

<sup>23</sup> Jesu ĩgũ buhenũgarasubure treinta bojori opapũ ĩgũ. “Īgũ José magũ àhrimi,” arĩ pepiriñorã masa. Josépũ Elí magũ árĩñumi. <sup>24</sup> Elí Matat magũ árĩñumi. Matat Leví magũ árĩñumi. Leví Melqui magũ árĩñumi. Melqui Jana magũ árĩñumi. Jana José magũ árĩñumi. <sup>25</sup> José Matatías magũ árĩñumi. Matatías Amós magũ árĩñumi. Amós Nahúm magũ árĩñumi. Nahúm Esli magũ árĩñumi. Esli Nagai magũ árĩñumi. <sup>26</sup> Nagai Maat magũ árĩñumi. Maat Matatías magũ árĩñumi. Matatías Semei magũ árĩñumi. Semei Josec magũ árĩñumi. Josec Judá magũ árĩñumi. <sup>27</sup> Judá Joanán magũ árĩñumi. Joanán Resa magũ árĩñumi. Resa Zorobabe magũ árĩñumi. Zorobabe Salatíe magũ árĩñumi. Salatíe Neri magũ árĩñumi. <sup>28</sup> Neri Melqui magũ árĩñumi. Melqui Adí magũ árĩñumi. Adí Cosam magũ árĩñumi. Cosam Elmadam magũ árĩñumi. Elmadam Er magũ árĩñumi. <sup>29</sup> Er Josué magũ árĩñumi. Josué Eliezer magũ árĩñumi. Eliezer Jorim magũ árĩñumi. Jorim Matat magũ árĩñumi. <sup>30</sup> Matat Leví magũ árĩñumi. Leví Simeón magũ árĩñumi. Simeón Judá magũ árĩñumi. Judá José magũ árĩñumi. José Jonam magũ árĩñumi. Jonam Eliaquim magũ árĩñumi. <sup>31</sup> Eliaquim Melea magũ árĩñumi. Melea Mena magũ árĩñumi. Mena Matata magũ árĩñumi. Matata Natán magũ árĩñumi. <sup>32</sup> Natán Davi magũ árĩñumi. Davi Isai magũ árĩñumi. Isai Obed magũ árĩñumi. Obed Booz magũ árĩñumi. Booz Salmón magũ árĩñumi. Salmón Naasón magũ árĩñumi. <sup>33</sup> Naasón Aminadab magũ árĩñumi. Aminadab Admin

magu árĩñumi. Admin Arni magu árĩñumi. Arni Esrom magu árĩñumi. Esrom Fares magu árĩñumi. Fares Judá magu árĩñumi. <sup>34</sup> Judá Jacobo magu árĩñumi. Jacobo Isaa magu árĩñumi. Isaa Abrahã magu árĩñumi. Abrahã Taré magu árĩñumi. Taré Nacor magu árĩñumi. <sup>35</sup> Nacor Serug magu árĩñumi. Serug Ragau magu árĩñumi. Ragau Peleg magu árĩñumi. Peleg Heber magu árĩñumi. Heber Sala magu árĩñumi. <sup>36</sup> Sala Caina magu árĩñumi. Caina Arfaxad magu árĩñumi. Arfaxad Sem magu árĩñumi. Sem Noé magu árĩñumi. Noé Lame magu árĩñumi. <sup>37</sup> Lame Matusalem magu árĩñumi. Matusalem Enoco magu árĩñumi. Enoco Jared magu árĩñumi. Jared Mahalaleel magu árĩñumi. Mahalaleel Caina magu árĩñumi. <sup>38</sup> Caina Eno magu árĩñumi. Eno Sete magu árĩñumi. Sete Adán magu árĩñumi. Adán Goãmũ iidigu árĩñumi.

## 4

*Watĩ ñerire iidoreripũ Jesure*

*Mt 4.1-11; Mr 1.12-13*

<sup>1</sup> Jesu Espiritu Santo igũ dorero dopa ta iipehogu árĩgu, igũ Jordán waĩcuriyague buharapũ. Igũ eropa buharacũ Espiritu Santopũ igũre masa marirogue wadorepũ. <sup>2</sup> Eroque ejagu cuarenta nũri gohra árĩpũ. Eropigu watĩpũ Jesure ñerire iicũ gameripũ. Eropigu ñerire iidoreripũ igũre. Irinũrire ne Jesu babiripũ. Eropigu irinũri pehrero gohra igũ oaboapũ.

<sup>3</sup> Igũ eropa oaboacũ ñagu watĩ òpa arĩpũ Jesure:

—Mũhũ Goãmũ magu árĩgu òpa ñhmuque. Iyere utãyere bari poyacũ iique, arĩripũ Jesure.

<sup>4</sup> Igũ eroparicũ peegu Jesu gamebiripũ. Òpa arĩ yũhripũ:

—Goãmũ yare erã gojarapũ òpa ãhraa: “Masare bari mera dihta ojocaribiro gahmea. Árĩpehreri Goãmũ ya igũ ya wereniguiiri mera sãre árĩro gahmea,” arĩmi Goãmũ, arĩpũ Jesu watĩre.

<sup>5</sup> Igũ eropa arĩra pũhrũ watĩpũ igũre utãgu wecague aĩ mũriagu merogã pũhrũ igũ árĩpehreri macari majare Jesure ñhmu purumu-jupũ. <sup>6</sup> Eropa ñhmuqu òpa Jesure arĩpũ:

—Árĩpehreri i macari igũ yare ora ãhraa. Eropigu yũ gamegure omasia. Eropigu i macarire, i macari majarã doreri sãre, erã opari mera mũre ogũra. <sup>7</sup> Yũre “Mũhũ yũ opũ ãhraa,” arĩ umupeoque. Mũ eroparicũ i macarire árĩpehreri macarire mũre ogũra, arĩ wereripũ watĩ Jesure.

<sup>8</sup> Jesu òpa arĩ yũhripũ igũre:

—Mũre umupeobeaa. Òpa ãhraa Goãmũ yare erã gojarapũ: “Mũ Opũ Goãmũ dihtare umupeoque. Igũ ya doreri dihtare iique,” arĩ gojañuma Goãmũ yare, arĩpũ Jesu watĩre.

<sup>9-11</sup> Igũ eropa arĩra pũhrũ Jerusalengue watĩpũ igũre aĩgãpũ. Eroque eja Goãmũ wihi wecague aĩ mũriapũ igũre. Aĩ ejatuhaja igũre òpa arĩripũ:

—¿Diaye ta Goãmũ magu gohra ta ãhriri mũhũ? Goãmũ yare erã gojarapũ òpa ãhraa:

Goãmũ igũ yarã anyuare mũre ñhadibudoregũcumi. Eropirã erãpũ mũre ñhadiburãcoma mũgue utãywe weca mehbejari arĩrã, arĩ gojañuma Goãmũ yare erã gojarapũ.

Erã mure eropa ìhadibumorã áricũ mũhũ Goãmũ magũ ta árigũ õgũe buhrimaa dija ìhmuque yũre. Mure erã itamucũ ìhmuñata yũre, arĩrĩpũ watĩ Jesure.

<sup>12</sup> Ìgũ eroparĩcũ peegũ gamebirĩpũ Jesu. Òpa arĩ yũhrĩpũ ìgũre:

—Goãmũ yare erã gojarapũ òpa àhraa: “Mũ opũ Goãmũ ìgũ arĩrare, ‘¿Diaye ta àhriri?’ arĩ masidiarã, Goãmũre ì ìhmdoremaabiricãque,” àhraa Goãmũ yare erã gojarapũ, arĩpũ Jesu watĩre.

<sup>13</sup> Eropĩgũ watĩ arĩpehreri ñerire Jesure iidorerĩpũ. Jesu ìgũ gamebiricũ ìagũ ìgũre merogã duhurũ.

*Galilea yeba Jesu buhenũgapũ*

*Mr 4.12-17; Mt 1.14-15*

<sup>14</sup> Pũhrũ Jesu Galileague dujaa wapũ. Eropĩgũ ìgũ Espĩritu Santo turari mera iipũ. Ìgũ eropĩicũ ìarã ero arĩpehrero majarã masa ìgũ iira quere peeñorã. <sup>15</sup> Judio masa buheri wiri Jesu sã buhemũripũ. Eropĩrã arĩpehrerã masa ìgũre òaro werenĩguiñorã.

*Nazare majarã Jesure ne umupeobiriñorã*

*Mt 13.53-58; Mr 6.1-6*

<sup>16-17</sup> Pũhrũ Nazaregue Jesu ìgũ bugadoirogue ta ejarũ. Erogue eja, Sabado áricũ ìgũ eropa iinĩguiro dopa ta ìgũ judio masa erã buheri wihigue ñajajapũ. Ero ìgũ Goãmũ yare erã gojarapũre buhediagũ niguirũ. Ìgũ eropa niguicũ ìarã ero majarãpũ Goãmũ yare weremuhtadigũ Isaia ìgũ gojarapũre ìgũre oñorã. Iripũre Jesu ì wererire bocagũ buhepũ:

<sup>18</sup> Goãmũ Espĩritu Santo yũ mera árigũ yũre doremi. Ìgũ mojomocurãre òari buherire weredoregũ obeomi yũre. Eropĩgũ ñero sĩporãcurãre òaro mucubiricũ iidoregũ yũre obeomi. Eropĩgũ peresugue árirã sãre erãre ìgũ tauborore weredoregũ obeomi yũre. Cuirĩ ìhjabirã erã òaro ìhjaburire, gajirã erã ñero iibirarãre wiubure yũre obeomi. <sup>19</sup> “Mari Opũ ìgũ yarãre peamegue wabonirãre ìgũ tauburinãri àhraa,” yũre weredoregũ obeomi, arĩ buhepũ Jesu.

<sup>20</sup> Eropa buhetuha Jesu iripũre bihacã, wihi majarãre wiatuha, doapũ. Ìgũ doacũ ìarã ero arĩpehrerã ìgũre ìhanũgũñorã. <sup>21</sup> Erã eropa iicũ ìgũ erãre werenũgapũ:

—Ì dohparagã ta yũ buhediro dopa Goãmũ ìgũ arĩdiro dopa sihajaro iiaa, arĩpũ Jesu.

<sup>22</sup> Ìgũ eropa werenĩguicũ peerã “Ìhĩ òagũ àhrimi,” arĩ pepiñorã. Eropĩrã erã ìgũ òaro werenĩguirire peerã uca wañorã. Eropĩrã òpa arĩñorã erã erã basi:

—Cuenã, ¿José magũ arĩbeari ihĩ? arĩñorã erã erã basi.

<sup>23</sup> Erã eroparĩcũ masigũ Jesu werepũ erãre:

—Iribojegue majarã erã eropa werenĩguidiro dopa ta mũa sã yũre òpa arĩdiarã àhraa: “Mũhũ duhturu árigũ mũ basi ocoyeque mũhũ duhturu arĩrĩre ì ìhmuboro dopa ta. Mũhũ Goãmũ ìgũ obeodigũ árigũ mũ basi ìgũ turari mera ì ìhmuque gũare. Capernaumguere Goãmũ turari mera ì ìhmuayoro mũhũ. Ohõ mũ ya macague sãre gũare ì ìhmuque. Diaye ta mũ Goãmũ ìgũ obeodigũ arĩrĩre gũa masĩboro dopa ì ìhmuque,” arĩdiaa mũa yũre. <sup>24</sup> Ire weregũra mũare. Goãmũ

ya weremuhtagure ĩgu ya yeba majarã umupeobeama. Eropirã yure umupeobeaa mua ohõ yu bugadigu áriquerecũ. <sup>25</sup> Eropigu diaye arĩgu iiaa muare. Iribojegue majarã sãre Goãmu ya weremuhtanirãre erã ya yeba majarã erãre umupeobiriñuma. Eropiro Elia Goãmu yare weremuhtadigu ĩgu áriřasubure uhre bojori gaji bojori deco gohra ne deco aribiriyoro. Eropiro áriřpehrerogue sãre ne bari mariyoro. Irisubure ĩgu ya yeba majarã Israe majarã bajarã wapeweyarã áriquerecũ ta Goãmu erãre Eliare itamudoregu obeobiriñumi. <sup>26</sup> ĩgu ya yeba majarãre itamudorebiriqueregu gaji yeba Sidón yeba áriři maca Sarepta waĩcũri maca majagore itamudoregu Eliare obeoñumi Goãmu. <sup>27</sup> Pũhrũ Goãmu ya weremuhtadigu Eliseo ĩgu ĩgu áriřisubure Israe yebague bajarã cami boarã erã áriquerecũ ta ne yujungũ Israe majagure ĩgu ya yeba majagure õagũ iibiriñumi Eliseo. ĩgu ya yeba majagure õaro iibigu ta gaji yeba majagu Naamán Siria majagu dihtare õagũ iĩñumi ĩgu. Eropigu judio masa erã umupeobirira waja, judio masa áriřirã dihtare itamuñumi Goãmu, arĩpũ Jesu erãre.

<sup>28</sup> ĩgu eroparĩcũ peerã áriřpehrerã iri wihi áriřã guataria wañorã. <sup>29</sup> Eropirã erã wahgãnuğaja Jesure tara wiria, iri maca tũro áriři tũhrũgue ĩgure tumedijudiarĩñorã. <sup>30</sup> Erã eropa iidiaquerecũ ta Jesu erã watope waha wapũ.

*Watĩ ñajasũdigũ Jesure bocatĩripũ*

*Mr 1.21-28*

<sup>31</sup> Pũhrũ Jesu Galilea yeba áriři macague Capernaum waĩcũri macague eja, Sabado áriřcũ masare buhepũ. <sup>32</sup> ĩgu opũ iro dopa ta ĩgu buhecũ peerã masa uca wañorã. <sup>33</sup> Iri wihi watĩ ñajasũdigũ áriřgu turaro gaguĩniguipũ:

<sup>34</sup> —Mũhũ Jesu Nazare majagu guare garibobita mũhũ. ¿Dohpa iibu iiri guare? ¿Mũhũ guare dederecũ iibu iiri? Yũhũ masia Goãmu magu mũ õagũ áriřire, arĩ gaguĩniguipũ Jesure.

<sup>35</sup> ĩgu eroparĩcũ peegu Jesu turipũ watĩre:

—Ejarimaricãque. Duhuque ĩgure, arĩpũ Jesu.

Ĩgu eropa arĩra pũhrũ watĩpũ masure yebague mehmereja tũrucũ iipũ. ĩgu eropa iira pũhrũ wiria wapũ. ĩgu masũpũ õagũ dujapũ. <sup>36</sup> Ero áriřã áriřpehrerã ĩgu eropa wacũ ĩha uca wañorã. Eropirã erã basi õpa arĩ wereniguĩñorã:

—¿Ñeheno buheri áhriri i õpa wacũ iiri? Turaro mera opũ iro dopa ta ihĩ watĩ ñajasũdigũre taumi. Eropirã erã watẽa ĩgu dorero dopa ta masare duhuma, arĩ wereniguĩñorã erã erã basi.

<sup>37</sup> ĩgu eropa iicũ ĩarã iri yeba áriřpehrerogue masa Jesu ĩgu eropa iirare weresiriñorã.

*Jesu Simo Pedro mũñecore õago iipũ*

*Mr 8.14-15; Mr 1.29-31*

<sup>38</sup> Judio masa buheri wihire wiria, Simo ya wihigue ñajajapũ Jesu. Ero Simo mũñeco dorecũgo iipo. Turaro nimacũri áriřyoro. Eropirã erã igo dorecũcũ wereñorã Jesure. <sup>39</sup> Erã werera pũhrũ ĩgu igo pohro eja, nimacũrire taridorepũ. ĩgu eropa taridorera pũhrũ igore nimacũri tahrĩa wayoro. Mata õago wapo. Igo eropa wago wahgã doaja, igo ta erãre barire ejopo.

*Bajarã dorecũrãre ðarã iipũ Jesu*

*Mr 8.16-17; Mr 1.32-34*

<sup>40</sup> Abe ñajara pũhrũ arĩpehrerã masa ïgũ pohro arirã dorecũrãre Jesu pohrogue aĩ ejañorã. Dorecũrã baja gajiropa arĩri dorere opañorã. Eropigũ Jesu ïgũ mojotori mera erã weca ñapeo, arĩpehrerãre erã dorere ðaro taricũ iipũ. <sup>41</sup> Watẽa ñajasũnirã sãre Jesu watẽare wiriadorepũ. Erã wiricũ ðpa arĩ gaguiniguiñorã:

—Mũhũ diaye ta Goãmũ magũ ãhraa, arĩñorã erã Jesure.

Jesu Goãmũ ïgũ obeodigũ ïgũ Cristo arĩcũ watẽa ïgure masiñorã. Eropigũ Jesu irire gajirãre werenidorebiripũ.

*Galilea yeba buherũ Jesu*

*Mr 1.35-39*

<sup>42</sup> Boyomũricũ Jesu iri maca arĩdigũ waha, masa marirogue ejañũ. ïgũ eropiicũ ïarã masa ïgure ahma, bocajarã, ðpa arĩñorã:

—Gũa ya maca dujaque. Wabita, arĩriñorã erã Jesure.

<sup>43</sup> Erã eropa arĩquerecũ ta ïgũpũ erãre ðpa yũhrĩpũ:

—Goãmũ ïgũ opũ arĩrĩre ðari buherire gajĩ macari sãre buhediaa yũhũ. Goãmũ yũre obeomi irire werebure, arĩpũ Jesu erãre.

<sup>44</sup> Eropigũ Galilea yeba maja wiri, judio masa buheri wirigue ïgũ buhe curipũ.

## 5

*Jesu ïgũ buherãre bajarã waire bocacũ iipũ*

*Mt 4.18-22; Mr 1.16-20*

<sup>1</sup> Gajinũ Jesu Genesare waĩcũri ditaru tũrogue ejañũ. Ero ïgũ arĩcũ ïarã bajarã masa Goãmũ yare peediarã ïgure nũrũsia ejañorã. ðaro Ƴjũtũri nũgajañorã masa bajarã. <sup>2</sup> Peeru gasiru imiporo payari gasire Jesu ïarũ. Iri gasi majarã wai wejẽnirã majanũgaja, erã wejẽdi yucure coerã iĩñorã. <sup>3</sup> Eropigũ Jesu Simo yarugue ñajapũ. Ñajatuha iriru dohodirure dia tũro taramujupidorepũ. Eropigũ dohodirugue doa, masare buhebuhe doapũ. <sup>4</sup> Buhetuha, Jesu Simore ðpa arĩpũ:

—Deco ñari siwĩuque. Eropirã mũhũ, mũ wapi mera mũa wejẽdi yucure mehyuque wai ñeamorã, arĩpũ Jesu.

<sup>5</sup> ïgũ eroparĩcũ peegũ Simo Jesure yũhrĩpũ:

—Opũ, wai wejẽbutahmuarabũ gũa dohpagã ñamire. Eropiiquererã ta waire wejẽbiraca gũa. Eropa wejẽbiriquererã ta mũ dorero dopa ta mehyu ïarãra, arĩ yũhrĩpũ Simo.

<sup>6</sup> Eropa arĩtuha erã mehyuñorã. Erã eropa mehyucũ irigũ wejẽdigũre bajarã wai ñajañorã. Bajarã erã ñajacũ wejẽdigũ yehguea wariyoro. <sup>7</sup> Eropa wacũ ïarã erã gajiru majarã erã mera majarãre sihubeoñorã.

—Mũa sã itamuque gũare, arĩ sihubeoñorã Simo sã.

Erã eropa itamura pũhrũ peeru gasiru ðaro mirĩparo bocañorã waire. <sup>8</sup> Simo Pedro eropa wai bajarã ñajacũ ïagũ, Jesu pohro mereja, ïgũre werepũ:

—Yũ opũ, mũ mera arĩbogũ arĩbeaa yũhũ. Ñegũ ãhraa. Eropigũ yũre duhuque, arĩpũ Simo Jesure.

<sup>9</sup> ïgũ arĩpehrerã ïgũ mera majarã sã wai bajarã ñajacũ ïarã, Ƴca wañorã erã sã. <sup>10</sup> Perã Simo mera majarã Zebedeo porã Santiago ïgũ

pagu magu Ñu mera, erã sã ïha uca wañorã. Eropa ucacũ ïagu Jesu Simo Pedrose werepu:

—Güibita. Dohpaguere waire ñeha gameneogu mu áriro dopa ta Goãmũ yarã árimorãre sihu gameneogu áriguca muhu, arĩpu Jesu Simore.

<sup>11</sup> ïgu eropa arĩra puhru erã erã gasire imiporo taramujupicã, erã ya áripehrerire ero ta apicã, Jesu mera waha wañorã.

*Jesu camì boagure òagu wacũ iipũ*

*Mt 8.1-4; Mr 1.40-45*

<sup>12</sup> Jesu gajì maca ïgu áricũ camì boagu ïgu pohrogue erapu. Eropigu ïgu Jesure ïagu mereja turaro serẽpu:

—Opũ, muhu yure òagu iidiagu yure òagu iimasia muhu, arĩ serẽpu.

<sup>13</sup> ïgu eropa arĩra puhru Jesu ïgure mohmepiñagu òpa arĩpu:

—Irire iidiaa. Dohpaguere òagu árique muhu, arĩpu.

ïgu eroparicũ ta ïgu camì boara mura yaria wayoro. <sup>14</sup> Eropigu Jesu ïgure dorepu:

—I yu mure òpa iirare gajirãre ne werebircãque. Mu ya dupure òarare pahire ïhmugu waque, “Òaro àhrimi,” aridoregu. Tuhajanugu Moiserẽ Goãmũ ïgu apidiro dopa ta iique. Eropigu Goãmũ wihigue mirimagure asuwahgã apique mu dore tarirare masa áripehrerã masimaja òaro, arĩpu Jesu camì boadigure.

<sup>15</sup> “Werebita,” ïgu arĩquerecũ ta áripehrerogue masa ïgu iirare weresiripehoñorã. Erã eropa quere peerã masa bajarã Jesu pohrogue ejañorã. Dorecurã òarã wadiarã erã sã ïgu pohrogue ejañorã. <sup>16</sup> Erã eropa ejaquerecũ ta Jesu masa marirogue Goãmũ ïgu Pagure serẽgu waha waru.

*Jesu dupũ buhadigure òagu wacũ iipũ*

*Mt 9.1-8; Mr 2.1-12*

<sup>17</sup> Gajinu Jesu ïgu buhecũ fariseo masa, judio masare buherã sã ero doañorã. Erã áripehrerã Galilea macari majarã, Judea macari majarã, Jerusalén majarã áriñorã. Eropigu Jesu Goãmũ turari mera dorecurãre òarã iipũ. <sup>18</sup> Irisubu bajamerãgã uma dupu buhadigure oyariñe mera coã erañorã. Eropirã ïgure Jesu pohro apidiarã, wihigue aĩ ñajariñorã erã ïgure. <sup>19</sup> Eropa ñajadiaquererã masa bajarã áricũ erã ïgure aĩ ñaja masibiriñorã. Eropirã ïgure wihi wecague aĩ muriya, miri gobe aĩ wea iri gobegue dupu buhadigure oyariñe mera pihri dijuñorã Jesu pohro árirã watope. <sup>20</sup> “Jesu ihĩ ïgu dorecurire taricũ iigucumi,” arĩ pepiñorã erã. Erã eroparĩ pepicũ masigu Jesupu dorecugure òpa arĩ werepu:

—Mahgu, mu ñero iirare yuhu cóãtuhabu, arĩpu dupu buhadire Jesu.

<sup>21</sup> ïgu eroparicũ peerã fariseo masa, judio masare buherã sã erã basi òpa arĩ pepiriñorã: “Ihĩ eropa arĩ wereniguirì mera Goãmure ñero arĩgu iimi. ïgu masu mari iro dopa árigu ïgu masa erã ñerire cóãmasibeami. Goãmũ dihta masa erã ñeri iirire cóãmasimi,” arĩ pepiriñorã erã.

<sup>22</sup> Jesu erã pepirire masigu òpa arĩpu:

—¿Duhpirã eropa arĩ pepirì mña? <sup>23</sup> “Mu ñeri iirire yu cóãtuha,” yu aricũ, “Guyagu àhrimi,” yure arãa mña masibiriquererã ta.



“Wahgānugajaque. Curique,” yu arīcū yu arīra diaye áriri árīcū mata masirāca mūa. <sup>24</sup> Yuhū masu Goāmū īgu obeodigu i yeba majarā erā űeri iirire cóamasia yuhū. Mūa ire masiboro dopa ōpa ta īgu wahgānugacū iigura, arīpū Jesu.

Eropa arītuha dūpū buhadigure ōpa arīpū:

—Mure arīgu iiaa. Wahgānugajaque. Mū oyarañere aīgāque. Mū ya wihigue waque, arīpū īgure.

<sup>25</sup> Īgu eroparīcū ta mata árīpehrerā erā īhuro wahgānugaja, īgu oyarañere aī īgu ya wihigue waha wapū. Eropa wagu īgu Goāmure umupeogu mucubiriri mera ōaro wereniguipū. <sup>26</sup> Īgu eropiicū ĩarā masapu árīpehrerā ĩha űca wañorā. Goāmure umupeorā mucubiriri mera ōaro wereniguiñorā:

—Dohpagāre gajiropa árīrīre ĩabu gua, arīñorā erā.

*Jesu Levire sihupu*

*Mt 9.9-13; Mr 2.13-17*

<sup>27</sup> Eropiituha waha, Levī waīcugure īgu mohmeri taribugue īgu árīgure bocajapu Jesu. Levīpū oparā ya árīburire masare wajasea coregu árīpū. Eropa bocajagu īgure ōpa arīpū:

—Yu mera majagu árību arique, arīpū īgu Levire.

<sup>28</sup> Īgu eroparīcū Levīpū árīpehreri īgu mohmerare duhcā, Jesu mera waha wapū.

<sup>29</sup> Pūhrū Levī ya wihi Jesu ya árīburire bosenu iirā iñorā. Ero bajarā wajasea corerā, gajirā Levī sā mera ba doañorā. <sup>30</sup> Erā mera Jesu īgu doacū ĩarā bajamerāgā fariseo masa, judio masare buherā mera gua ũrugā Jesu buherāre arī dūyasoñorā:

—¿Duhpirā űero iirā wajasea corerā mera bahari mūa? arī turiñorā erā.

<sup>31</sup> Erā eroparīcū peegu Jesu yūhripū erāre.

—Dorecūbirā duhturure amabeama. Dorecūrā dihta duhturure ahmama. Dorecūrā duhturu amaro dopa ta “Ñerā āhraa,” arīrā yure amarācoma. <sup>32</sup> Eropigu “Ñerā āhraa,” arīrā dihtare erā űero iirare bujaweredore, ōaripure gohrotocū iigu arību yuhū. Erā basi “Ōarā āhraa gua,” arī pepirāre itamugu aribirību yuhū, arīpū Jesu.

*Ba duhurire Jesure serēpiñorā gajirā*

*Mt 9.14-17; Mr 2.18-22*

<sup>33</sup> Eropirā bajamerā masa Jesure ōpa arī serēpiñorā:

—űu buherā bajasuburi Goāmū ya árīburire iimorā ba duhuma. Eropi erā bajasuburi Goāmū mera wereniguima. Fariseo buherā sā erā iro dopa ta iima. ¿Duhpirā mū buherāpū Goāmū ya árīburire ba duhubeari erā? arīñorā erā Jesure.

<sup>34</sup> Erā eroparīcū Jesu erāre ōpa arī yūhripū.

—Ōpa āhraa iri: Mojoto diridigu īgu bosenu iicū īgu mera majarā bujawererā ba duhunirā árībeama. Īgu mera árīrā mucubiriri mera barā iima. Eropa ta yu buherā sā yu mera árīrā ba duhumasibeama. <sup>35</sup> Yujunū yure Goāmū aīcāgucumi. Eropa īgu aīra pūhrū yu buherā mera árīsome yuhū. Irisubugue ta yu buherā ba duhurācoma, arīpū Jesu.

<sup>36</sup> Iribojegue maja buheri mama buheri mera erā buhemoresūdiacū ĩagu ōpa arī werenemopū Jesu erāre.

—Ne mama suhrirore miri gasirogã yehgue aĩ, murañe suhrirore seretuma masiya mara. Mari eropa seretura pũhrũ mama gasirore mari coecũ, mura gasiro arĩro tara gamenoe yehgueacũ iiaa. Eropirã mura buheri mama buheri mera wapimoe buhebircãro gahmea. <sup>37</sup> Eropirã ne igui decore imisĩri decore waibũgũ gasiro ajurore, mura ajurore diyebircãro gahmea. Eropa iicũ igui deco pahmuro mura ajurore yehgue dija wahaa. Iri ajuro yehguecũ igui deco iri ajuro sã cohmoa wahaa. <sup>38</sup> Eropirã igui deco mama decore mama ajuro mera diyero gahmea. Eropa ta mama buheri mura buheri mera buhebircãro gahmea. <sup>39</sup> Vino deco mura decore masa erã ihrira pũhrũ mama decore gamebeama erã. Ōpa arĩma masa. “Vino mura deco mama decore òatarinũgaa,” arĩma masa, arĩpũ Jesu erãre.

## 6

*Sabado árĩcũ Jesu buherã trigo pororire tũrĩñorã*

*Mt 12.1-8; Mr 2.23-28*

<sup>1</sup> Gajinũ Sabado árĩcũ Jesu ĩgũ buherã sã trigo pohegue ĩha tariañorã. Eroque tariañã, ĩgũ buherãpũ trigo pororire tũrĩ, gasiri cohro bañorã iriyerire. <sup>2</sup> Erã eropa iicũ ĩarã bajamerãgã fariseo masa erãre serẽpiñorã:

—¿Duhpirã mũa Sabado mari soorinũ árĩquerecũ ta mohmeri? Mari dorerire tarinũgarã iiaa, arĩñorã fariseo masa.

Erã eroparĩcũ peegũ Jesupũ “Yũ buherã iri dorerire tarinũgarã iibeama,” arĩgũ õpa arĩpũ erãre:

<sup>3-4</sup>—Iribojegue Davi ĩgũ mera majarã mera oaboagũ Goãmũ wihigue ñaja, iri wihi árĩri panre bapũ. Eropa bagũ ĩgũ mera majarã sãre badoregũ iri panre ópũ. Iri pan pahia dihtare badorerã arĩriyoro. Goãmũ doreri iri panre gajirãre badorebiriyoro. ¿Davi irire ĩgũ eropa ĩirare Goãmũ yare erã gojarapũgue buhebirari mũa? Davi i panre bagũ Goãmũre tarinũgagũ ĩbirĩñumi. Dohpagãre yũ buherã sã i trigo yerire tũrĩ barã Goãmũre tarinũgarã iibeama. <sup>5</sup> Yũhũ masũ Goãmũ ĩgũ obeodigũ inonũ soorinũ sãre masa erã iiburire doremasia, arĩpũ Jesu.

*Mojoto buhadigũ òagũ wapũ*

*Mt 12.9-14; Mr 3.1-6*

<sup>6</sup> Gajinũ Sabado árĩcũ Jesu judio masa buheri wihigue ñaja buhepũ masare. Ero mojoto diayepũ buhadigũ arĩpũ. <sup>7</sup> Ero arĩrã sã bajamerãgã masare buherã, fariseo masa sã Jesure ĩhanũñorã ĩgure weresãdiarã. Ōpa arĩ pepiñorã: “Sabadonũ árĩcũ ĩhĩ masũre òagũ iibocumi Jesu. ĩgũ eropiicũ ‘Mari soorinũ Jesu mohmegũ ĩimi,’ arĩ weresãrãra,” ari pepiñorã. <sup>8</sup> Jesu erã pepirire masigũ, mojoto buhadigure õpa arĩpũ:

—Wahgãñũgajaque. Ohõ arique, arĩpũ ĩgure.

ĩgũ eropa arĩra pũhrũ mojoto buhadigũpũ wahgãñũgaja, ero nigupũ. <sup>9</sup> Eropigũ Jesu erãre serẽpipũ.

—Muare serẽpigũra: ¿Mari soorinũ árĩcũ òarire iicũ òabeari? ¿Ñerire iicũpũre òhari? ¿Soorinũ árĩcũ masũre masucũ òhari? ¿O soorinũ árĩcũre masũre wejẽcũpũre òhari? arĩpũ Jesu erãre.

<sup>10</sup> Eropa arĩgu Jesu eräre ihametupeho, mojoto buhadigũre õpa arĩpu daja:

—Mu mojtore sĩsirãbeoque, arĩpu ĩgu.

Ĩgu eroparĩcũ ta mojoto buhadigũpu sĩsirãbeo, õari mojoto wayoro.

<sup>11</sup> ĩgu eropa iicũ ĩarã erã ĩgu mera turaro guaĩnorã.

—¿Dohpa iirãcuri mari ĩre? arĩnorã erã basi.

*Jesu ĩgu buherãre doce gohra ĩgu apimorãre beyepũ*

*Mt 10.1-4; Mr 3.13-19*

<sup>12</sup> Irinũrire Jesu utãguue Goãmũre serẽgu mũria wapũ. Eroque arĩgu, ñamire Goãmũ mera werenigui butahmua wapũ. <sup>13</sup> Boyorogue ĩgu buherãre ĩgu pohro sihubeopũ. Sihubeotuha erã mera majarãre doce gohra ĩgu apimorãre beyepũ. <sup>14</sup> Oã arĩnorã Jesu ĩgu beyenirã: Simore Jesu Pedro piyudigu, Simo pagũ magũ Andre, Santiago, Ñu, Felipe, Bartolomé, <sup>15</sup> Mateo, Toma, Santiago arĩnorã. Santiagopũ Alfeo magũ arĩpu. Eropirã Simo celote ya curu majagũ arĩgu, <sup>16</sup> Juda Santiago pagũ magũ sã, Juda Iscariote sã arĩnorã ĩgu beyenirã. Juda Iscariotepũ Jesure ihaturirãre ihmubu arĩpu.

*Jesu bajarã masare buhepu*

*Mr 4.23-25*

<sup>17</sup> Eropii Jesu ĩgu buherã mera utãgu weca arĩnirã dijericũ, bajarã gajirã ĩgu buherã mera õari pũguue niguiĩnorã erã. Gajirã masa sã bajarã arĩnorã. Erã arĩpehrero Judea yeba macari majarã, Jerusalen majarã, Tiro waĩcũri maca majarã, Sidon waĩcũri maca majarã, wũariya tũro arĩri macari majarã ĩgu pohrogue eranirã arĩnorã. <sup>18</sup> Erã Jesu buherire peerã erarã, erã dorecũrire taudorerã erarã arĩnorã. Watẽa ñajasũnirã sã ĩgu pohrogue eraa, õarã waĩnorã. <sup>19</sup> Jesu ĩgu turari mera õarã wacũ iĩpu erãre. Eropirã erã arĩpehrerã ĩgure mohmepiĩnarã eraĩnorã.

*Jesu mucubirire, bujawereri sãre buhepu*

*Mt 5.1-12*

<sup>20</sup> Pũhrũ Jesu ĩgu buherãre ĩha, werepu:

—Mũa mojomorocũrãpu Goãmũ ĩgu opu arĩroguere warãca mũa. Eropirã mũa mucubirirãca.

<sup>21</sup> “Dohpaguere mũa oaboarãpu yapirã arĩrãca. Eropirã mucubirirãca.

“Mũa dohpaguere bujawere oerãpu mucubirimorã aħraa. Eropirã pũhrũguere ĩayerãca. Eropirã mucubirirãca.

<sup>22</sup> “Yũhu masũ Goãmũ ĩgu obeodigu aħraa. Eropirã yaha arĩburire mũa iiri dipuwaja gajirã mũare ihaturicũ mũapũ mucubirirãca. Mũare erã cóãcũ sãre mucubirirãca. Mũare erã ñero wereniguiquerecũ ta, “Ñerã aħrima,” mũare arĩquerecũ ta mũapũ mucubirirãca. <sup>23</sup> Mũare erã eropa iinirãre umarogue mũa ejacũgue Goãmũ mũare wũaro õaro iĩgũcumi. Eropirã turaro mucubirirã arĩque. Oaro sĩporãcũrã arĩque. Mũare ihaturirã ta erã acawererã mũa iribojegue majarã eropa ta ñero iimũriĩnuma Goãmũ yare weremũhtanirãre.

<sup>24</sup> “Eropirã mũa dohpaguere baja oparãpu i yebaguere mũa õaro arĩtuhabũ. Eropirã ñero tarirã arĩrãca mũa.

<sup>25</sup> “Dohpaguere yapirãpu mũa oaboarãca. Mũa eropa arĩrã ñero tarirãca.

“Dohpaguere mũa mucubirirã árĩrãpũ pũhrũguere bujawere or-erãca. Eropirã ñero tarirãca.

<sup>26</sup> “Goãmũ yare weremũhtarã áhrraa,” arĩ guyarãre “Ōarã áhrrima,” arĩriñuma bajarã iribojegue majarã. Mũa mera majarãre eropa ta “Ōarã áhrrima,” arĩbocoma masa. Eropa arĩnirã árĩrãpũ ñero tarirãca mũa sã, arĩ buhepũ Jesu.

*Mũare ñaturirã erã árĩquerecũ erã sãre mahique*  
*Mt 5.38-48; 7.12*

<sup>27</sup> Eropigũ õpa arĩ buhenemopũ Jesu:

—Yũre peediarãre, mũare arĩgu tiiaa. Mũare ñaturirã erã árĩquerecũ erã sãre mahique. Mũare ñaturirãre õaro iique. <sup>28</sup> Mũare ñero árĩdorerẽ erã árĩquerecũ ta õadoreque erãre. Mũare ñero iirã erã árĩquerecũ ta, “Erã sã õaro árĩporo,” arĩ serẽbasaque Goãmũre. <sup>29</sup> Yujungũ mũa wayuporã pacũ, “Gajirũ sãre padiagu paque,” arĩque ñũre. Mũa weca majañe suhrĩrore ñũ emacũ mũa camisa sãre ocãque ñũre. <sup>30</sup> Mũare serẽgũre ñũ serẽropẽ ta oque ñũre. Mũa yare ñũ aicũ ñũre dipaturi serẽpibita irire. <sup>31</sup> Gajirã mũare õaro iicũ gahmea mũa. Erãre mũa õaro iicũ gamero dopa ta õaro iique erã sãre. Erã õaro iibiriquerecũ ta mũapũ erãre õaro iique.

<sup>32</sup> “Mũare umupeorã dihtare mũa umupeocũ iri ne duhpiburi árĩbeaa. Ñerã sã eropa ta iima. <sup>33</sup> Eropirã mũare õaro iinirã dihtare mũa õaro iicũ iri sã ne duhpiburi árĩbeaa. Irire ñerã sã iima. <sup>34</sup> Eropiro gajirãre wayurã “Yũre wiaque,” arĩcũ mũa wayuri sã ne iri duhpiburi árĩbeaa. Ñerã sã gajirãre wayurã ero pũhrũ wiapehodorerã ohoma. <sup>35</sup> Eropirã mũapũ mũare ñaturirãre mahi umupeoque. Eropirã erãre õaro iique. Eropirã mũa yare mahibirã ta wayuque erãre. Mũa eropa iicũ Goãmũ mũare õaro iigũcumĩ. Goãmũpũ ñũre umupeobirã sãre, ñerã sãre õaro iimĩ. Eropa ta iique mũa sã. Mũa eropa iirã mũaro wajatarãca. Eropirã Goãmũ turatarĩgu umaro majagu porã árĩrãca. <sup>36</sup> Mari Pagũ umaro majagu ñũ mojomoro ñadiro dopa ta mũa sã masare mojomoro ñaque.

*Gajirãre “Ñerã áhrrima,” arĩbircãque, arĩpũ Jesu*  
*Mt 7.1-5*

<sup>37</sup> Eropigũ erãre werenemopũ:

—Gajirãre “Ñerã áhrrima,” arĩrã erã iirare werewũabircãque. Mũa eropa arĩ werewũabircũ Goãmũ mũa sãre “Ñerã áhrrima,” arĩsoma. Gajirã mũare erã ñero iirare, erã ñero arĩra sãre cãdijique. Mũa eropa cãdijicũ ñagu Goãmũ mũa sãre mũa ñero iirare cãdijigũcumĩ. <sup>38</sup> Gajinore oparã gajirãre oque. Mũa eropa ocũ Goãmũ mũare ogũcumĩ. Eropa ogũ mũare õaro queoro mũaro ogũcumĩ. Ōaro wajayegũcumĩ. Gajirãre mũa orañepẽ ta mũa sãre Goãmũ ogũcumĩ, arĩpũ Jesu erãre.

<sup>39</sup> Eropa arĩtuha Jesu buhenemogũ õpa arĩpũ werenigui queori mera:

—Cuiri ñhajabirã erã seyaro erã basi game tuagãrã erã perãgue ta mehtuha yuriñaja warãcoma gobegue. Eropa ta erã cuiri ñhajabirã iro dopa ta Goãmũ yare masibirã sã gajirãre buhediarima. Eropirã erã erã buherã sã peamegue warãcoma. <sup>40</sup> Buherã erãre buhegũre masitarĩnugabeama. Eropirã árĩpehrerã buherã erãre õaro buhepehora

pũhrũ erãre buhegu iro dopa ta masirãcoma. Eropirã erãre buherã masibirã árĩbircãporo, arĩpũ Jesu.

<sup>41</sup> Eropa arĩtuha gaji buheri mera buhepũ daja:

—Mari werenigui queori mera buhecũ òpa irĩã àhraa mũa: Mũa acaweregu ìgu cuirugue miri pogañegã mehñajacũ iri pogañegãre òaro ìhaa mũa. Mũ yaru cuirupũre wũarimijiro árĩquerecũ irimi-jipũre ne pepibea mũa. Eropirã miri pogañegãre mũa ìaro dopa ta mũa acaweregu ìgu ñero iiripũre òaro ìhaa mũa. Mũapũ mũa ñero iirire turaro iiquererã ta irire eropa pepicãa. ¿Dohpa árĩrono eropa àhriri mũa? <sup>42</sup> Òpa arĩ wereniguia mũa acawererãre: “Acaweregu, mũ ñerire iigu iica. Eropigu iri ñerire duhucãque,” arĩ wereniguia mũa. Eropa ìgu ñerire duhudorequererã mũapũ iri ñerire iirã duhubeaa. ¿Duhpirã mũa ñerire iiquererã ta irire eropa pepicãri mũa? Masa erã purũpũpũre ñero ii corerã àhraa mũa eropa iirã. Mũa ñero iiripũre duhumũhtaque. Mũa eropa iira pũhrũ mũa acaweregũre “Mũ ñero iirire duhucãque,” arĩ weremasia, arĩ buhepũ Jesu.

*Masa erã wereniguirire peerã erã árĩricũrĩre masia mari, arĩ werepũ Jesu*

*Mt 7.17-20; 12.34-35*

<sup>43</sup> Eropigu buhenemogu òpa arĩ werenemopũ erãre werenigui queori mera:

—Yucũgu òadigu ñerire dũcacũbeaa. Eropiro ñedigu sã òarire dũcacũbeaa. <sup>44</sup> Yucũgu dũcare masirã “Irigũ dũca ta àhraa,” arĩ masia mari. Poracũdigu higuera dipure dũcacũbeaa. Eropiro aña poragu igui tõrĩre dũcacũbeaa. <sup>45</sup> Eropa àhrima masa sã. Òagu ìgu pepiri òari àhraa. Eropigu ìgu òarire wereniguimi yucũgu òadigu irigu òarire dũcacũro dopa ta. Ñegũre ìgu pepirigue ñeri àhraa. Eropigu ìgu ñerire wereniguimi yucũgu ñedigu irigu ñerire dũcacũro dopa ta. Mari pepirigue iri árĩro dopa ta wereniguia mari, arĩpũ Jesu.

*Pe wihi iira queori werepũ Jesu*

*Mt 7.24-27*

<sup>46</sup> Eropigu erãre werenemopũ:

—Mũa yũre “Opũ,” arãa. Eropa arĩquererã ta yũ dorerire iibea mũa. ¿Duhpirã eropa iibeari mũa? <sup>47</sup> Árĩpehrerã yũre gamerã yũ wereniguirire peema. Eropirã yũ dorerire tarinũgabeama. Òpa àhrima yũre tarinũgabitã: <sup>48</sup> Wihi òaro nugudi iro dopa ta àhrima erã. Ìgu ùhcãri goberire seha, wihire nugunũgami. Iri wihi òaro ìgu ùhcãro nugura wihi árĩro dia miricũ turaro deco turaquerecũ iri wihi òaro turanũguia. <sup>49</sup> Eropirã yũ wereniguirire peenirã arĩquererã ta yũ dorerire iibirãpũ wihire òaro nugubigu iro dopa àhrima. Iri wihire wecagã nugu, òaro iinũgabeami. Ìgu eropa iira wihi árĩro dia miricũ deco turacũ iri wihi mata cohro yuhria wahaa. Eropiro iri wihi cohmopehrea wahaa, arĩpũ Jesu.

## 7

*Surara opũ pohro majagũre ìgu dorecũcũ Jesu òagũ iipũ ìgũre*

*Mt 8.5-13*

<sup>1</sup> Iri queori masare weretuha Jesu sã Capernaumgue ejañorã. <sup>2</sup> Ero árĩgu cien surara opũ árĩgu ìgu pohro majagũre turaro mahipũ.

Īgu pohro majagu dorecugu arīgu sīriro pohrogue arīpu. <sup>3</sup> Eropigu Jesu Īgu iirare peegu, judio masa mūrāre sihu Jesu pohrogue obeopu opupu.

—Yu pohro majagure dorecugure ðacū iigu arique, arī weredoregu obeopu opu mūrāre.

<sup>4</sup> Erā Jesu pohrogue ejarā, ðpa arī burigā serēñorā ĩgure:

—Surara opu guare mu pohro obeoami. “Yu pohro majagure dore taubasagu ariporo,” arī weredoregu obeoami. Īgu opu ðagu āhrimi. Īgu eropa arīcū itamuque ĩgure. <sup>5</sup> Mari ya maca majarāre ĩgu mahimi. Eropigu ĩgu gua buheri wihire gua iira waja wajayemi, arīñorā mūrā Jesure wererā.

<sup>6</sup> Erā eropa arī werēcū peegu Jesupu erā mera wapu. Surara opu ya wihi pohro ĩgu ejabu iicū gohra opupu ĩgu mera majarāre Jesure ðpa arī weredoregu obeopu:

—Opu, ðaroca. Aribita. Ōagu arībeaa yuhu. Yaha wihi mure ñajaridorebuno arībeaa yuhu. <sup>7</sup> Eropigu mu pohro wabirabu. Yuju ðiaye ta mu turari mera dorebeoque. Mu eropiicū yu pohro majagu ðagu wagucumi. <sup>8</sup> Yure yu weca arīrā gajirā oparā dorema. Eropigu yu sā surarare dorea. Yujugure “Waque,” yu arīcū ĩgu wahami. Gajigure “Arique,” yu arīcū ĩgu ahrimi. Yu pohro majagure “Ire iique,” yu arīcū irire ĩgu iimi. Eropigu mu sā mu dorero dopa ta ĩgu dorecugu tarigucumi, arī weredorepu surara opu.

<sup>9</sup> Jesu irire peegu, uca wa, bajarā masare ĩgu mera nurusiarāre majinuga werēpu:

—Diaye ta muare arīgu iiaa. Ihī surara opu Israe masu arībiriqueregu Goāmure burigā umupeomi. Īgu pohro majagure yu ðagu wacū iiburire masituhami. Israe masare ne sihī iro dopa umupeorāre ñanibeeaa, arīpu Jesu.

<sup>10</sup> Īgu eropa arīra puhru surara opu Jesu pohro ĩgu obeonirā erā opu ya wihigue dujaa wañorā. Dujaja dorecūdigure ðagu ĩgu arīcū ñañorā erā.

### *Jesu wapeweyo magure masupu*

<sup>11</sup> Puhru ñari Naín waicuri macague Jesu wapu. Īgu buherā bajarā masa sā ĩgu mera wañorā. <sup>12</sup> Iri macare ñajaro pohro ĩgu ejacū sīridigure masa aī wiririñorā yaarā warā. Sīridigu pago wapeweyo arīpo. Yujugu ta arīgu igo magu sīria wapu. Eropirā ero majarā masa bajarā igo mera wañorā. <sup>13</sup> Igo eropa wacū ĩagu Jesu igore mojomoro ĩapu.

—Orebita, arīpu Jesu igore.

<sup>14</sup> Eropa arīgu sīridigu ĩgu masa porere eja mohmepipu. Īgu eropa mohmepicū ĩarā iri porere coārāpu nūgajañorā.

—Mahgu, yuhu mure ðpa arāa. Wahgā doajaque, arīpu Jesu.

<sup>15</sup> Īgu eroparīcū ta sīridigu muru wahgā doaja, wereniguipu. Eropigu Jesu ĩgure ĩgu pagore wiapu. <sup>16</sup> Eropirā erā arīpehrerā güirā warā Goāmure umupeo ðpa arīñorā:

—Goāmu yare weremūtagu masitarigu dohpague tamerare mari watope āhrimi, arīñorā erā.

—Goāmu marire ĩgu yarāre itamugu eratuhami, arīñorā gajirā.

<sup>17</sup> Eropirā árīpehrerā Judea yeba majarāre ero turo áriri macari majarāre Jesu igu iirare masa weresiripehoñorā.

*Ñu waīyeri masu igu buherāre Jesure serēpidorepu  
Mt 11.2-19*

<sup>18</sup> Eropi Jesu igu iirare iarā Ñure peresu árīgure wereñorā igu buherā. Eropa erā werecū peegu perāre igu pohro sihubeo, <sup>19</sup> Jesure serēpidoregu obeopu Ñu. Ōpa arī serēpidorepu:

—“Yu puhru gajigu arigucumi,” ¿Ñu igu arīdigu ta āhriri muhu? ¿O gajigure corerācuri gua? arī serēpidorepu Ñu perā igu buherāre.

<sup>20</sup> Eropi erā Jesu pohro eja, serēpiñorā igure:

—Ñu waīyeri masu mure ōpa serēpidoregu obeoami guare. “Yu puhru gajigu arigucumi,” ¿Ñu arīdigu ta āhriri muhu? ¿O gajigure corerācuri gua? arī serēpiñorā erā Jesure.

<sup>21</sup> Irisubu ta bajarā dorecārāre, watēa ñajasūnirāre, cuiri ihajabirāre ōarā iipu Jesu. <sup>22</sup> Eropigu Ñu igu obeonirāre Jesu yahripu:

—Dohpaguere mua iarare mua peerare Ñure wererā waque: Ōpa arīque: “Jesu mera cuiri ihajabirā ihama. Curimasibirā cuhrima. Cami boanirā ōarā wahama. Peejabirinirā peea wahama. Sīrinirā masa wahama,” arī wereque. Eropirā mojomorocārāre ōari buherire yu wererare wereque igure. <sup>23</sup> Eropa arī weretuhaja ōpa arī wereque Ñure: “Yure peegu ‘Diaye ta āhraa,’ arīgu igu mucubirigu āhrimi, arīmi Jesu,” Ñure arī wererā waque, arīpu Jesu.

<sup>24</sup> Ñu buherā erā wara puhru Jesupu Ñu árīricūre werenūgapu bajarā masare:

—Mua masa marirogue Ñu pohrogue warā, ero majare taare miru weācū iarā ejabiribu mua. <sup>25</sup> Ōari suhricugu sāre iabiribu mua. Ōari suhricurā waja pagarire suhri sañarā oparā ya wirigue āhrima. <sup>26</sup> Masa marirogue ejarā Goāmū yare weremuhtadipure iarā ejabu. Diaye ta Ñu Goāmū yare weremuhtagu āhrimi. Gajirā Goāmū yare weremuhtanirā tauro árīgu āhrimi Ñupu. <sup>27</sup> Iribojegue Goāmū yare erā gojarapū Ñure ōpa arī wereyuyoro:

Mari pagu igu magure ōpa arīpu: “Mu core mure wereyubure obeogu iiaa,” arīmi Goāmū, arī gojañuma iribojegure Ñure.

<sup>28</sup> “Diaye arīgu iiaa. Masa árīpehrerā tauro āhrimi Ñu. Isubure igu eropa árīquerecū ta umaroguere Goāmū igu opu árīroguere árīpehrerā docanūgagupu Ñu tauro árīgucumi, arīpu Jesu masare.

<sup>29</sup> Igu eroparīcū peerā masa, wajasea corerā mera Ñu igu waīyenirā árīrā ōpa arī pepiñorā Goāmure: “Goāmū diaye iigu āhrimi,” arī pepiñorā erā. <sup>30</sup> Fariseo masapu, judio masare buherā sã Ñu igu waīyenirā árīdiabirinirā árīñorā. Eropirā Goāmū erāre igu itamudiarire erā gamebiriñorā.

<sup>31</sup> Eropigu Jesu dipaturi werepu:

—¿Dohpagu majarā masa ñehmarano iro dopa āhriri mua pepicū? <sup>32</sup> Erā majirā iro dopa āhrima. Erā majirā doberi duarogue bira doarā, ōpa arī duyasoma erāgā erā basi: “Mua bayaburire tarisu gua purirabu. ¿Duhpirā mua mucubiri bayarā aribirari? Eropirā gua burigā ñehamere orerabu. ¿Muaru duhpirā gua mera orebirari?”

arīma dūyatorā. Erā majirā arī dūyatorā iro dopa ta iirā ōpa arāa mūa dohpague majarā. <sup>33</sup> Ūu waīyeri masu Goāmū ya arīburire ba duhugu, vinore ihribirimi. Īgu eropa ihribiricū ĩarā “Pee masibigu āhrimi,” arīrabu mūa ĩgure. <sup>34</sup> Yūpu masu Goāmū ĩgu obeodigu arīgu yūhu baha ihria. Yū eropa iicū ĩarā ōpa arāa mūa yūpūre: “Īaque. Ihī wūaro bagu merericūgu sā āhrimi. Wajasea corerā űero iirā erā wapicūgu āhrimi ĩgu,” arāa mūa yūre. <sup>35</sup> Eropa masibiriquererā ta gua iirare ĩarā, Goāmū masirire guā opacū masirāca mūa, arī wereru Jesu erāre.

*Fariseo masu Simo waīcūgu ya wihi arīpu Jesu*

<sup>36</sup> Fariseo masu Simo waīcūgu ĩgu ya wihigue badoregu sihupu Jesure. Īgu eropa sihucū Jesu ĩgu ya wihigue eja, erā bari mesague doajapu. <sup>37-38</sup> Iri macaguere űeri iigo arīpo. Jesu fariseo masu ya wihigue ĩgu arīcū igo peepo. Eropa peego alabastro mera iidirure poresuri dicūdirure aī, Jesu pūrupū eranugara pūhrū orepo. Eropa orego, Jesu guburire igo codeco mera webo, igo poari mera niucūāpo. Īgu guburi bojocū ĩha igo ĩgu guburire miħmi, iri poresuri mera pipepo. <sup>39</sup> Igo eropa iicū ĩagu fariseo masu Jesure sihudigu ĩgu basi ōpa arī pepiripu: “Igo ĩgure mohmepiñago űerire iigo āhrimo. Ihī Jesu Goāmū ya weremūtagu arīgu ĩrre masiboñumi,” arī pepiripu. <sup>40</sup> Īgu eropa arī pepirire masigu Jesu wereru ĩgure:

—Simo, dohpague tamerare mure werediaa, arīpu Jesu.

—Buhegu, ĩyūre dohpa arī werediari mūhu? arī yūhripu Simo.

<sup>41</sup> Īgu eroparīcū Jesupu ōpa arī buhebu yūhripu:

—Opūre perā wajamorā arīñuma. Yujugu wūaro wajamogu quinientos niyuseri wajamoñumi. Gajigupu merogā cincuenta niyuserire wajamoñumi. <sup>42</sup> Eropirā erā wajamorire erā wajayegohrabiricū ĩagu ĩgu erā wajamorire cādijicāñumi. ĩĪgu eropiicū dohpague tamerare nihipu erā opūre mahitarinūgayuri mū pepicū? arī serēripu Jesu.

<sup>43</sup> Simo yūhripu:

—Ōbaa, wūaro wajamodigu merogā wajamodigu tauro ĩgu opūre mahibocumi, arīpu Simo.

—Diaye yūhria mūhu yūre, arīpu Jesu.

<sup>44</sup> Eropa arītuha ĩgure pipeodigore maji ĩha, Jesu Simore werenemopu:

—Īgore ĩaque mūhu. Mū ya wihire yūhu űajarara pūhrū yū guburi coeburi decore obirabu mūhu. Igo pu igo ya codeco mera yaha guburire coemo. Pūhrū igo ya poari mera tucoeamo. <sup>45</sup> Mūpu yūre bocatiri mimibirabu. Igo pu ohō yū doaropē yū guburire miħmimo. <sup>46</sup> Mūpu yū dipurure yū mera pipeobirabu. Igo pu yū guburire poresuri mera pipeoamo. <sup>47</sup> Eropa arīgu mūre weregu ta iiaa. Igo igo űero iira baja gohra āhraa. Eropigu igo űero iirare cādijiabū. Yū eropa iicū igo turaro mahiamo yūre. Erā űero iirare merogā bujawere guñarāpu merogā yūre cādijidorema. Eropirā erā űero iirare merogā cādijisūnirā merogā mahima yūre, arīpu Jesu Simore.

<sup>48</sup> Eropa arītuha ĩgu igore wereru:

—Dohpague tamerare mū űero iirare cohābu, arīpu Jesu.



49 Īḡu eroparīcū peerā Jesu mera doarā erā basi ōpa arī wereniguiñorā:

—Īhī diaye ta “Ñerire cóāḡu iiaa,” arīmi. ¿Dohpa árīḡuño āhriri Īḡu ñero iirire cóāḡu? arīñorā erā erā basi.

50 Eropiḡu Jesu nomeore ōpa arī werepū:

—Yure mū umupeocū mure peamegue wabodigore taua. Güiro mariro waque, arīpū Jesu igore.

## 8

### *Nome Jesure itamuñorā*

1 Pūhrū paga macarigue mūta macarigāgue sāre eja, Goāmū Īḡu opū árīrīre, ōari buherire werepū Jesu. Doce Īḡu buherāpū Īḡu mera árīñorā. 2 Eropirā nome sā watēa ñajasūnirā nome, dorecūnirā nome, Jesu ōarā Īḡu iinirā Īḡu mera árīñorā. María waīcūgo Magdalena erā arī piyudigo Jesu mera curipo. Igo siete watēare Jesu Īḡu cóādigo árīpo. 3 Juana sā Cuza waīcūḡu Herodere itamudigū marapo sā Jesu mera curipo. Susana waīcūgo sā gajirā nome mera baja erā gajino opari mera Īḡure itamuñorā.

### *Jesu oteri masū queorire werepū*

*Mt 13.1-9; Mr 4.1-9*

4 Eropi baja macari majarā Jesu pohrogue gamenereñorā. Erā gamenerera pūhrū Jesu Īḡu werenigui queori mera erāre werepū buhebu:

5 —Oteri masū oteḡu wañumi. Īḡu eropa otecū gajiyeri ma turo yuri merejyoro. Eropirā iriyerire masa caradiuñuma. Eropirā mirimagū porā bajarā ahri iriyerire bañuma. 6 Eropi gajiyeri utā watope yuri merejyoro. Erote yeba deco mariyoro. Eropiro iriyeri puhri wiriri nigui ñañia wayoro. 7 Gajiyeri pora yucū watope yuri merejyoro. Pora yucūpū puhri tiataria wa, oterayeripure wejēcāyoro. 8 Gajiyeri ōari yeba yuri merejyoro. Ōaro puhri ducacūyoro. Eropiro baja ducacūyoro, arīpū Jesu.

Eropa arītuha ōpa arīnemopū:

—Ire ōaro peeque mūa, arīpū Īḡu.

### *Jesu werenigui queori mera Īḡu buherire werepū*

*Mt 13.10-17; Mr 4.10-12*

9 Pūhrū Īḡu buherā iri werenigui queorire masidiarā, Jesure serēpiñorā:

—¿I queori mera dohpa arī buheḡu iiri mūhū? arī serēpiñorā erā.

10 Erā eroparīcū Jesu yūhripū:

—Goāmū Īḡu opū árīrīre iribojegue majarā erā masibirirare mūare masicū iimi Goāmū. Gajirāpūre eropa iibeami Īḡu. Eropiḡu erāre werenigui queori mera buhea. Yū eropa iicū erā yū buherire peequererā masisome, arīpū Jesu Īḡu buherāre.

### *Jesu oteri masū queorire were amupū Īḡu buherāre*

*Mt 13.18-23; Mr 4.13-20*

11 Eropa arītuha erāre werenemopū:

—Ōpa arī werea i werenigui queorire: Oteriyeri ōari buheri iro dopa āhraa. 12 Eropiro ma turo yuri merejariyeripū ōari buheri iro dopa āhraa. Eropiro masa erā ōari buherire peecū Īḡu watīpū

ahri, iri buherire masidorebeami masare. Īḡu eropa iibiricū erā Goāmure umupeoboñuma. Erā eropa umupeocū ĩagū Goāmupū erāre peamegue wabonirāre tauboñumi. <sup>13</sup> Ʋtā weca yuri merejarayeri ōari buheri iro dopa āhraa. Eropirā masa ōari buherire pee, mucubiriri mera irire pee aīma. Eropa pee aīquererā ta Ʋtā weca āriri yucu nuguri mariri yucu iro dopa ta oā masa sā turabeama. Eropa turabirā yaha ōari buherire erā peera dipuwaja gajirā erāre ñero iicū ĩarā yahapure duhucāma. <sup>14</sup> Eropi pora yucu weca yurimerejarayeri ōari buheri iro dopa āhraa. Eropirā masa ōari buherire peequererā ta, i yeba majare wwaro pepirā, niyerure gamerā, i yeba majare gahmema erā. Eropirā iripū ōari buherire cāhmotaa. Iri cāhmotacū masa Goāmū gameripure iibeama. <sup>15</sup> Eropi ōari yeba yurimerejarayeri ōari buheri iro dopa āhraa. Eropirā masa ōari buherire ōaro mera pee peenurucāma. Eropirā duhuro mariro Goāmū ĩḡu gamero dopa ta ōarire iima, arīpū Jesu.

*Jesu sihāgodiru queorire buhepū*

*Mr 4.21-25*

<sup>16</sup> Eropā arītuha gaji queori mera buhepū Jesu.

—Ne sihāgodirure masa sihāgora pūhrū mātatoro doca dibubeama. Eropirā irirure cama doca dibubeama. Ʋmarogue irirure duhpeomi wiñigue ñajarā erā ōaro ĩha ñajama ōaro. <sup>17</sup> Mari iiraguere Goāmure duhmasiya mara. Pūhrūguere ārīpehreri masisūroca. Sihāgodiru ñamire boyoro dopa ta iribojegue erā masibirirare masirācoma masa.

<sup>18</sup> Eropirā mūa peerā ōaro peenurūque. Ōaro peenurūgu, ōaro masigucumi. Peenurūbigū “Merogā peea,” ĩḡu arīquerecū iripū dederea waroca ĩḡure, arīpū Jesu.

*Jesu acawererā ĩḡure sihuñorā*

*Mt 12.46-50; Mr 3.31-35*

<sup>19</sup> Pūhrū Jesu pagū porā erā pago mera ĩḡu pohrogue warā iiriñorā. Masa bajarā árīcū ĩḡu pohro ejabiriñorā. <sup>20</sup> Eropigū yujugū Jesure werepū:

—Mū pago mū pagū porā mera disiporogue niguima. Mure ĩarā ahrañorā, arīpū ĩḡu Jesure.

<sup>21</sup> ĩḡu eroparīcū ōpa arī werepū Jesu árīpehrerāre buhebu:

—Goāmū buherire peerā, irire tarinugabirā erā ta āhrima yū pago yū pagū porā iro dopa árīrā, arīpū Jesu erāre.

*Jesu miruñere yusudorepū*

*Mt 8.23-27; Mr 4.35-41*

<sup>22</sup> Gajinū Jesu ĩḡu buherā mera dohodirugue ñaja

—Īna, taribujarā, arī, erā árīpehrerā iriru mera ditarugue taribuja wañorā.

<sup>23</sup> Eropa taribujagū carīa wapū ĩḡu. Erā eropa taribujarisubu turaro miruñe ariyoro. Miruñe aricū pāgūri wahgā, erāre miucāriyoro. Eropa waro mirimaja ḡuhya árīyoro erāre. <sup>24</sup> Eropa wacū ĩha ũca wa, Jesu pohro waha, ĩḡure wahḡuñorā.

—Buheḡū, mari mirimorā ĩaa, arīñorā erā. Erā eroparīcū Jesupū wahgā, miruñere “Iripēta weā duhuque,” arīpū. Eropa arīḡu pāgūri “Yusuaque,” arīpū. ĩḡu eroparīcū ta miruñe taria wayoro. Eropiro pāgūri sā yusū dija wayoro. <sup>25</sup> Eropa wara pūhrū Jesu erāre ōpa arīpū:

—¿Mua yure umupeobeari?

Erãpũ güi, ìha uca, òpa arĩ wereniguiñorã erã basi:

—Cue, ¿ñehmũno masũ àhriri ihĩ? Miruñe, pãgũri sã ìgũ dorecũ tarinũgabeea ìgũre, arĩñorã erã basi.

*Watẽa ñajasũdigũre òagũ iipũ Jesu*

*Mt 8.28-34; Mr 5.1-20*

<sup>26</sup> Eropirã erã gajipũ masegue Gerasa majarã ya yebague taribu-jajañorã. Iri yeba Galilea yeba diaye árĩyoro. <sup>27</sup> Ero Jesu ìgũ majajanũgarisubu ero majagu watẽa ñajasũdigũ ìgũ pohrogue aripũ. Ìgũ yoari boje goroweregũ suhri marigũ árĩgũ, ìgũ wihiguere ne árĩbirimũripũ. Eropigũ masa goberi utã goberi watope árĩpũ ìgũ. <sup>28-29</sup> Eropirã bajasuburi watẽa ìgũre ñearo mera ìgũ bũrigã gorowerecũ ìha masa ìgũre bihadoboriñorã. Eropigũ ìgũ peresugue árĩgũ ìgũ mojotorire guburire comedari mera erã diridigũ árĩqueregũ, ìgũ iridarire nuapũ. Eropirã watẽapũ ìgũre masa marirogue aigãñorã. Eropigũ ìgũ Jesure ìhametu turaro gaguinigui, Jesu pohro merejarũ. Ìgũ eropa iicũ ìagũ Jesupũ watẽare dorepũ:

—Ìhĩ mera árĩbiricãque. Waque watẽa, arĩpũ.

Ìgũ eroparĩcũ peegũ watẽa ñajasũdigupũ turaro gaguinigui, serẽpipũ Jesure:

—Jesu, ùmaro majagu Goãmũ magũ, ¿ñehenore iibu iiri mũhũ yure? Yure ñero iibiricãque, arĩpũ watẽa ñajasũdigupũ.

<sup>30</sup> Ìgũ eroparĩcũ Jesupũ serẽpipũ ìgũre:

—¿Ñehmũno waĩcũri mũhũ? arĩpũ.

Bajarã watẽa ìgũ mera árĩñorã. Eropigũ òpa arĩpũ erãre opagũ.

—Watẽa bajarã waĩcua gua, arĩpũ watẽa ñajasũdigupũ.

<sup>31</sup> —Èhcãri gobegue guare wadorebita, arĩ, turaro serẽñorã watẽapũ.

<sup>32</sup> Irisubure ero utãgũ gubuye bajarã yesea barã iĩñorã. Erã ero bacũ ìarã watẽa òpa arĩ serẽñorã Jesure:

—Soã yesea pohrogue wadoreque guare. Erã mera árĩdoreque guare, arĩ serẽñorã watẽa masure ñajanirã.

Erã eropa arĩ serẽcũ peegũ Jesu erãre yesea pohrogue wadorepũ.

<sup>33</sup> Ìgũ eropa wadorera pũhrũ watẽapũ masũ mera árĩñirã waha, yesea pohrogue ejañorã. Erã pohrogue erã ejara pũhrũ yeseapũ gorowere dipaturũgue omabuha, ditarugue yuriñaja miri sĩripehrea wañorã.

<sup>34</sup> Yeseare ìhadibunirãpũ yesea eropa miricũ ìarã, güi omagã wañorã. Eropa omagãrã macague eja, iri maca majarãre campo majarã sãre erã ìarare weresiripehocãñorã. <sup>35</sup> Erã eropa werera pũhrũ masa ìarã wañorã. Eropirã Jesu pohro eja, watẽa ñajasũdigũ mũrũ ìgũ suhri sañadigũ pee masigũ ìgũ ero òaro doacũ ìañorã erã. Iri árĩpehrerire ìarã erã güi árĩñorã. <sup>36</sup> Watẽa ñajasũdigũ mũrũ ìgũ òaro árĩcũ ìanirã gajirãre erã ìarare wereñorã. <sup>37</sup> Eropa pee ero majarã Gerasa yeba majarã árĩpehrerã bũrigã Jesure güiñorã. Eropirã ìgũre wadoreñorã. Erã eropa wadorecũ Jesu dohodirugue ñajapũ wabu. <sup>38</sup> Watẽa ñajasũdigũ mũrũpũ Jesu ìgũ waborore ìha turaro ìgũre serẽripũ:

—Mũ mera wadiaca, arĩ serẽripũ.

<sup>39</sup> Ìgũ eroparĩcũ Jesu ìgũre yahripũ:

—Mũ ya macague waque. Eropa wagu Goãmu mũre ðaro iirare wereque gajirãre, arĩpu Jesu.

Ĩgu eropa arĩra pũru ĩgu ya macague ejagu Jesu ĩgure ðaro iirare arĩpehrerãre ĩgu ya maca majarãre werepu.

*Jairo magore ðago iipu. Eropa arĩcũ ne behrego sãre ðago iipu Jesu Mt 9.18-26; Mr 5.21-43*

<sup>40</sup> Sipu masegue Jesu dipaturi ĩgu taribujajacũ ĩarã masa bajarã ĩgure corenirã bocatĩri serẽñorã ĩgure. <sup>41-42</sup> Ero buheri wihi opu Jairo waĩcugu Jesu pohro eja, ĩgu guburi pohro merejapu. ĩgu mago sĩrigo iipo. Igo yujugo ta arĩgo doce bojori opago arĩpo. Eropigu ĩgu ĩgu ya wihigue Jesure sihugãpu. “Áu,” arĩ, ĩgu mera wapũ Jesu sã.

Ĩgu eropa wacũ masa bajarã ĩgure nũrusiarã cãriro iĩñorã ĩgure. <sup>43</sup> Eropigo yujugo nomeo doce bojori gohra duhuro mariro eropa behrego ero arĩpo. Ero corere duhturuare igo ya niyeru mera arĩpehrerire wajayeripo igo ocoyedorego. Erã eropa ocoyequerecũ ta mũraro ta di waniguicãyoro igore. <sup>44</sup> Eropigo igo Jesu pũru ahri, ĩgu suhriro ojogorore igo ñeacũ igore di wiriniguicãra pehrea wayoro. <sup>45</sup> Igo eropa ñeañacũ Jesu pepigu serẽpirũ.

—¿Noa yũ suhrirore mohmepiari? arĩpu ĩgu.

Arĩpehrerã “Mohmepibea,” arĩñorã. Eropirã Pedro sã ðpa arĩ yũhriñorã:

—Buhegu, cãhña ãhraa. Eropirã masa bajarã mũre pẽhrecãma. ¿Duhpigu eropa arĩ serẽpiri mũhu? arĩñorã erã Jesure.

<sup>46</sup> Erã eroparĩcũ Jesu yũhripu:

—Dohparagã yũ turari mera yujugore dore yũhu cóãrare masia. Eropigu yũre igo ñeañarare masia, arĩpu ĩgu.

<sup>47</sup> ĩgu eroparĩcũ peego igo duhrimasibigo, naragãgo Jesu pohro merejapo. Eropigo arĩpehrerã masa erã peero igo arĩpo Jesure:

—Yũhu ñeañabu mũre. “Ĩgure ñeañacũ yũ dore taria waroca,” arĩgo mũre ñeañabu. Yũ mũre eropa ñeañago mata ðago wahabu, arĩpo. <sup>48</sup> Igo eropa arĩtuhajacũ Jesu igore werepu:

—Mahgo, yũre mũ umupeori mera ðago dujaa dohpaguere. Mucubiriri mera waque, arĩpu igore.

<sup>49</sup> ĩgu eropa arĩrisubu Jairo ya wihi arĩgu weregu erapu.

—Mũ mago sĩria wahãmo. Eropigu ihĩ buhegure sihubita pare, arĩpu ĩgu.

<sup>50</sup> ĩgu eroparĩcũ peegu Jairore ðpa arĩ werepu Jesu:

—Bũjawerebita. Yũre umupeoque. Iri dihtare iique. Mũ eropa iicũ ðago wagocumo, arĩpu Jesu.

<sup>51</sup> Eropa arĩtuha Jairo ya wihigue eja, Pedroro, Ñure, Santiagore, dorecugo pagu sũmarãre aĩ ñajapu. Gajirãpũre Jesu ñajadorebiripũ.

<sup>52</sup> Ero arĩpehrerã masa erã ñeamere orerã iĩñorã. Jesu erãre arĩpu:

—Orebiricãque. Igogã sĩribeamo. Carĩgo iimo, arĩpu ĩgu.

<sup>53</sup> ĩgu eroparĩcũ erãpu igo sĩridigo arĩcũ masirã “Eroparĩcãgu iimi ihĩ,” arĩrã Jesure ãyeñorã. <sup>54</sup> Eropigu Jesu igo mojotore ñeha, arĩpu igore:

—Majigo, wahgãque, arĩpu.

<sup>55</sup> Īḡu eropa arīcū igo sīridigo árīquerego igo sīporā goecū masa wapo. Irisubu ta wahgānūgajapo igo. Igo eropa wahgāra pūhrū Jesu igore barire odorepū. <sup>56</sup> Igore eropa Īḡu masacū ĩarā igo pagu sumarā ĩhamaria wañorā. Eropiḡu Jesu ĩrire gajirāre weredorebirpū.

## 9

*Jesu doce ĩḡu buherāre buhedoreḡu obeopū*

*Mt 10.5-15; Mr 6.7-13*

<sup>1</sup> Eropi Jesu doce ĩḡu buherāre sihubeo, ĩḡu turarire ópū ĩḡu erāre. Watēare erā cóāburire, dorecurāre erā ōarā iiburire ópū ĩḡu turarire erāre. <sup>2</sup> Eropā iituha erāre Goāmū ĩḡu opū árĩrire buhedoreḡu, dorecurāre ōarā iidoreḡu obeopū erāre. <sup>3</sup> Ōpa arĩ dorepū Jesu erāre: —Mūa warā gajinore aĩbircāque. Tuadire, ajure, barire, niyerure aĩbircāque. Yujuñe suhriro ta sañaque. Peñe sañabita. <sup>4</sup> Árĩpehrerogue mūare erā carĩro ocū iri wihi ta dujanique. Ne warāḡue wiriaque iri wihire. <sup>5</sup> Gaji macari majarā mūare erā gamebircū ĩarā iri macare tarigā waque. Eropā warā mūa guburi maja nicure moje siripique mūa erāre erā ya dipuwajare ĩhmumorā, arĩpū Jesu.

<sup>6</sup> Īḡu eropa arĩra pūhrū ĩḡu buherāpū waha, árĩpehreri macarigūe masare ōari buherire were curiñorā. Eropirā dorecurāre ōarā wacū ĩiñorā.

*Jesu ĩḡu iirare Herode peepū*

*Mt 14.1-12; Mr 6.14-29*

<sup>7</sup> Eropi Herode Galilea yeba majarā opū Jesu ĩḡu iirare peebeopū. “¿Noa āhriri ĩḡu Jesu?” arĩquereḡu ne masibiripū. Yujurāyeri ōpa arĩñorā Jesure. “Ñu waĩyedi mūrū dipaturi masa deyogū iicumī. Eropiḡu Jesu erā arĩḡu ĩḡu ta āhrimi,” arĩriñorā gajirā. Erā eroparīcū peegū Herode Jesure dohpa arĩ masibiripū. <sup>8</sup> Eropirā gajirā “Īḡu Elia mūrū dohpague dehyoagū iimi,” arĩriñorā. Gajirāpū “Goāmū ya weremāhtanirā mera majagū árĩcumī daja masa mūrīḡu,” arĩriñorā Jesure. <sup>9</sup> Erā eropa arĩ wereniquerēcū ta ōpa arĩ pepipū Herode: “Ñu dipurure tabetadoreḡu wejētuhabū ĩḡupure yuhū. ¿Eropiḡu masa erā werewuagū nihino árĩbocuri ĩḡu?” arĩ pepi ĩḡu Jesure ĩadiaripū.

*Jesu masa bajarāre barire ópū*

*Mr 14.13-21; Mr 6.30-44; Jn 6.1-14*

<sup>10</sup> Eropi Jesu ĩḡu obeonirā ĩḡu pohrogue dujaja, erā iirare wereñorā Jesure. Erā weretuhacū Jesu erā dihtare Betsaidague sihu waripū. <sup>11</sup> Īḡu erā dihtare sihuquerecū erā warare masirā, masa bajarā nurūsiagāñorā. Jesu ĩḡure erā nurūsiajacū ĩagū ĩḡu bocatĩri serēpū erāre. Eropiḡu ĩḡu Goāmū ĩḡu opū árĩrire erāre were, dorecurāre ōarā iipū.

<sup>12</sup> Namicague doce ĩḡu buherā ĩḡu pohrogue eja, Jesure wereñorā:

—Ohō masa marirogue āhraa. Ō majaro maja wirigūe oā masare obeoque. Carĩmorā erā batuburire amadoreque erāre, arĩñorā erā Jesure.

<sup>13-14</sup> Erā eroparīcū Jesu yūhrīpū erāre:

—Mũa basi barire oque eräre, arĩpũ.

Ĩgu eroparĩcũ peerã erã yũhriñorã:

—Cinco pan dipurure, perã ta wai sãre iripêta opaa mari. Oã masa bajarã erã baburire asũmasiya mara marire, arĩñorã ĩgu buherã.

Bajarã masa erã árĩcũ eropa arĩñorã ĩgu buherã. Eroguere cinco mil uma árĩñorã. Eropigũ Jesu werepũ ĩgu buherãre:

—Yujurãyeri cururi cincuenta gohra doadoreque. Gaji curu sãre erã nũcu ta doadoreque, arĩpũ Jesu ĩgu buherãre.

<sup>15</sup> ĩgu eroparĩcũ ĩgu buherã ĩgu dorero dopa ta iĩñorã. Árĩpehrerã masare doadoreñorã. <sup>16</sup> Doadoretuha Jesu cinco pan dipurure, perã wai mera aĩ, ɯmarogue ĩhamemuju, Goãmũre “Ōhaa,” arĩpũ. ĩgu eropa arĩra pũhrũ pan dipurure nuha, ĩgu buherãre masare gueredoregũ ópũ. <sup>17</sup> Eropirã erã árĩpehrerã masa baha yapia wañorã. Erã ba dũharare doce puiri gohra aĩ gameneo ɯjutudoboñorã ĩgu buherã.

*Mũhu Cristo Goãmũ ĩgu obeodigũ ta áhraa, arĩpũ Pedro*  
*Mt 16.13-19; Mr 8.27-29*

<sup>18</sup> Yujunũ Jesu yujugũ ta Goãmũre serẽgũ iipũ. ĩgu wereniguirisubu ĩgu buherã ĩgu pohrogue árĩñorã. Eropigũ Jesu serẽpipũ eräre:

—¿Nihino árĩcuri yũhu, masa erã pepicũ? arĩ serẽpipũ.

Ĩgu eroparĩcũ peerã ĩgu buherã yũhriñorã:

<sup>19</sup> —“Ñu waĩyedigũ mũru árĩbocumi,” arĩma mũre. Gajirã “Elia mũru árĩbocumi,” arĩma. Gajirã, “Goãmũ ya weremuhtanirã mera majagũ iribojegue majagũ masa mũriadi árĩbocumi,” arĩma, arĩ yũhriñorã ĩgu buherãpũ ĩgure.

<sup>20</sup> Erã eropa arĩra pũhrũ Jesu eräre serẽpipũ daja:

—¿Mũrapũ pepicũ nihino árĩcuri yũhu? arĩ serẽpipũ daja.

—Mũhu Cristo Goãmũ ĩgu obeodigũ ta áhraa, arĩ yũhripũ Pedro.

*Jesu ĩgu sĩriburiñere werepũ*  
*Mt 16.20-28; Mr 8.30-9.1*

<sup>21</sup> Eropi Pedro “Cristo áhraa mũhu,” ĩgu arĩrare ne gajirãre Jesu weredorebiripũ. <sup>22</sup> Eropa weredorebirituhagũ ópa arĩpũ:

—Yũhu masũ Goãmũ ĩgu obeodigũ bũrigã ñero tarigũca. Eropa ta tariro gahmea yũre. Eropirã pahia oparã, mũrã, judio masare buherã mera yũre gamebirã wejẽrãcoma. Erã wejẽra pũhrũ ɯhrenũ pũhrũ masa mũriagũca, arĩpũ Jesu eräre.

<sup>23</sup> Pũhrũ árĩpehrerãre ópa arĩ werepũ Jesu:

—Yujugũ yũ mera majagũ árĩdiagũ, ĩgu gamero iidiarire duhucãgũcumi. Eropigũ yahagũ ĩgu árĩri dipuwaja ñero tarigũcumi. Ñero tariqueregũ ta yahare iiniguigũ árĩgũcumi. <sup>24</sup> Yujugũ masũ ĩgu ya árĩburi dihtare pepigũ dederea wagũcumi. Eropigũ yaha árĩburi yũ gameri dihtare iigu árĩpehrerĩnũri yũ mera ɯmaroguere óaro árĩgũcumi. <sup>25</sup> Yujugũ masũ i yeba majare árĩpehrerire opaqueregũ peamegue wagũ óarire bocosome. <sup>26</sup> Yujurãyeri yũ buherire werediarã, “Jesu yagũ áhraa,” arĩdiarã guhyasĩrisãgũca. Erã eropa iicũ ĩagũ yũ sã eräre eropa iirãre guhyasĩrisãgũca. Yũhu Goãmũ ĩgu obeodigũ óarã anyua erã gosesiriri mera, yũ Pagũ ĩgu gosesiriri mera dujarigũ yũre guhyasĩrinirãre guhyasĩrisãgũca yũ sã.

27 Diaye arĩgu tiiãa mũare. Dohpague yujurãyeri mũa õgue árĩrã mũa sĩriboro core Goãmũ ĩgu opa arĩcũgue ĩarãca, arĩpu erãre.

*Jesu dupure gohrotopũ*

*Mt 17.1-8; Mr 9.2-8*

28 Eropi ocho nũri irire ĩgu werera pũhrũ Jesu Pedroe, Nũre, Santiagore erã dihtare sihupũ. Eropi waha, Goãmũ mera werenĩguirã wañorã. Utãgure mũria wañorã erã. 29 Goãmure ĩgu serẽrisubu Jesu ĩgu diapo gohrotoa wayoro. Eropiro ĩgu suhri cuimijuri suhri õaro boreri suhri wayoro. 30 Eropa warisubu perã ũaa ĩgu pohro dehyoañorã. ĩgu mera werenĩguirã iĩñorã. Erã iribojegue majarã Elia mũrũ, Moise mũrũ sã arĩñorã. 31 Erã ũamaro maja gosesiriri mera dehyoañorã. Jesu merogã Jerusalẽgue ĩgu sĩriborore erã Jesu mera werenĩguirã iĩñorã. 32 Pedro ĩgu mera majarã sã wãja meretaria carĩrã iĩñorã. Eropa carĩquererã ta ũaca wahgã, Jesu gosesiriri ĩha, perã ĩgu mera werenĩguirã sãre ĩañorã. 33 Moise Elia mera erã warisubu Pedro Jesure õpa arĩpu:

—Opu, mari õre arĩcũ õadiaa. Uhre wihigã gohra iirã. Mũ ya wihigã, Moise ya wihigã, Elia ya wihigã iirãca, arĩpu Pedro.

Eropa arĩqueregu ta ĩgu arĩrare ne masibiripu. 34 ĩgu eropa arĩ werenĩguirisubu erãre imica curu cãhmotayoro. Eropa cãhmotacũ ĩarã erã gũia wañorã. 35 Eropiro imica curu pohecague Goãmũ ĩgu werenĩguiri busũyoro:

—Ihĩ yũ magu yũ beyedigũ ãhrimi. Õaro peeque ĩgure, arĩri busũyoro imica pohecague.

36 Eropa arĩra pũhrũ Jesu dihtare ĩañorã erã. Pũhrũ erã ĩarare gajirãre werebiriñorã. Ne yujugure werebiriñorã dohpa irisubure.

*Jesu watĩ ñajasũdigure õagu iipu*

*Mt 17.14-21; Mr 9.14-29*

37 Gajinũ erã utãgugue erã dijaricũ bajarã masa Jesure bocatĩriñorã. 38 Eropigu erã mera majagu Jesure piyupu:

—Buhegu, mũre turaro ire serẽdiaa yũhũ. Yũ magu yujugu ta ãhrimi. Eropigu ĩgure ĩabasaque mũhũ. 39 Watĩ ñajasũ gorowereniguicãmi. Iri watĩ ĩgure ñeha, gaguiniguicũ ii, tũru naragãcũ ii, sumutua wacũ iimũraa. Eropigu ihĩ watĩ yũ magure ñero taricũ ii, ne duhudiabeami ĩgure. 40 Mũ buherãre iri watĩre cóãdoregu turaro serẽrabũ. Yũ eropa serẽquerecũ ta erã irire ne cóãmasibirama, arĩpu ĩgu Jesure.

41 ĩgu eroparĩcũ Jesupũ õpa arĩpu ero arĩrãre:

—Dohpague majarã mũa ñerã ãhraa. ¿Yũre ne umupeo-birigohracãri? Yoari boje mũare buherabũ. ¿Dipẽ yoari boje yũre garĩbori mũa? arĩ turipu Jesu.

Eropa arĩtuha watĩ ñajasũdigũ pagure õpa arĩpu:

—Mũ magure aĩgãrique, arĩpu.

42 ĩgu eropa arĩra pũhrũ ĩgu magu Jesu pohrogue ĩgu aririsubu watĩ ĩgure yebague mehmereja, tũru naragãcũ iipu. ĩgu eropa iicũ Jesu watĩre cóãpu. ĩgu eropa cóãcũ watĩ ñajasũdigũ õagu warũ. Eropigu Jesupũ ĩguãre wiapu ĩgu pagure. 43 Arĩpehrerã masa Goãmũ turari mera ĩgu õagu wacũ iirire ĩarã, ũaca wañorã.

*Dipaturi Jesu ĩḡu sĭriburiñere werepũ*

*Mt 17.22-23; Mr 9.30-32*

Masa Jesu ĩḡu iirare ĩha ũca wacũ Jesupũ ĩḡu buherãre õpa arĩ werepũ:

<sup>44</sup> —Dohparagã yũ wereburire cãdijibiricãque mũa. Yũhũ masũ Goãmũ ĩḡu obeodigũ ãhraa. Masa yũre ñeha, gajirãguere yũre wiarãcoma, arĩpũ Jesu.

<sup>45</sup> ĩḡu eropa arĩquerẽcũ ta erãpũ ĩḡu wererire õaro peebiriñorã. ĩḡu wererare erãre masiya mariyoro. Irisubu ta Goãmũ erãre irire masidorebirinipũ. Eropirã erã güirã irire ĩḡure serẽpibiriñorã.

*Jesu buherã erã mera majagũre opũ acudiarĩñorã*

*Mt 18.1-5; Mr 9.33-37*

<sup>46</sup> Pũhrũ Jesu buherã werenigui dũyatorã iĩñorã:

—¿Mari mera majagũ nihinopũ opũ ñajagũcũri? arĩ dũyatorã iĩñorã erã erã basi.

<sup>47</sup> Erã eroparĩcũ Jesupũ erã pepirire masigũ, majigũre ĩḡu pohro aĩunugu, ĩḡu buherãre werepũ:

<sup>48</sup> —Yaha árĩburire iimorã õpa árĩḡugãre bu árĩḡure gamerã yũ sãre gahmea mũa. Eropirã yũre gamerã, yũre obeodigũ sãre gahmea mũa. Mũa mera majagũ mũa pohro majagũ árĩḡũ ĩḡu sã opũ ta árĩḡucumi, arĩpũ Jesu.

*Marire ĩhaturibigũ árĩḡũ mari mera majagũ ãhrimi, arĩ werepũ Jesu*  
*Mr 9.38-40*

<sup>49</sup> Pũhrũ Ñu Jesure õpa arĩ werepũ:

—Buhegũ, mũa waĩ mera wafĩ ñajasũnirãre taricũ iiami yujugũ. ĩḡure gua ĩabũ. ĩḡu mari mera majagũ ĩḡu árĩbiricũ ĩarã ĩḡure irire iidorebirimũrabũ gua, arĩpũ Ñu Jesure.

<sup>50</sup> ĩḡu eroparĩcũ Jesu Ñure gajirã ĩḡu buherã sãre õpa arĩ werepũ:

—Eropa arĩbiricãque mũa ĩḡure. Marire ĩhaturibigũ árĩḡũ, ĩḡu mari mera majagũ ãhrimi, arĩpũ Jesu.

*Jesu Santiagore, Ñu sã erã wererire gamebiripũ*

<sup>51</sup> Irisubure Jesu ĩḡu ũmũsigue ĩḡu waboro coregã “Jerusalẽngue wagũra,” arĩpũ ĩḡu. Eropa arĩḡũ wagũ iipũ. <sup>52</sup> Eropirã Jesu core ĩḡu obeonirã waha, Samaria yeba maja macague eja, ero Jesu ĩḡu ejaborore amuyudiarĩñorã. <sup>53</sup> Jesu Jerusalẽngue wabu iipũ. Erogue ĩḡu wabu árĩcũ peerã, iri maca majarã ĩḡure gamebiriñorã. <sup>54</sup> Irire peerã Ñu, Santiago mera wereñorã Jesure:

—Opũ, mũa gamecũ ũmaro maja peame mera mũre gamebirinirãre wejẽdorerãra Elia mũrũ ĩḡu iidiro dopa ta, arĩñorã erã ĩḡure.

<sup>55</sup> Erã eroparĩcũ maji ĩha turipũ erã perãre:

—Eropa arĩbiricãque. Espĩritu Santo yarã ãhraa mũa. Dohpague mũa pepiro dopa ta ĩḡupũ pepibeami. Yũhũ masũ Goãmũ ĩḡu obeodigũ i yebaguere arĩḡũ peamegue wabonirãre taugũ aribũ. Masare erã dederecũ iigũ aribiribũ, arĩ werepũ Jesu.

<sup>56</sup> Eropa arĩ weretuha gaji macague Jesu sã carĩrã waha wañorã.

*Gajirã Jesu mera wariñorã*

*Mt 8.19-22*

<sup>57</sup> Maha erã wacũ, yujugũ masũ Jesure werepũ:



—Mũ mera yũhu wadiaa noho mũ wadiaro, arĩpu ãgu.

<sup>58</sup> Ìgu eropa arĩra pũhrũ Jesu yũhripũ:

—Yũ mera aricũ diasaa ãhrraa. Nũgu majarã diayeaa erã carĩburi toreri opama. Mirimagũ porã sã erã ya suhri opama. Yũ masure Goãmũ Ìgu obeodigũpũre sooro mara. Ne yaha wihi mara. Eropirã yũ mera arĩrã ñero tarirãca mũaa, arĩ yũhripũ Jesu.

<sup>59</sup> Pũhrũ gajigũre Jesu sihipũ:

—Yũ mera majagũ arĩbu ariique, arĩpu.

Ìgu eroparĩcũ ãgu yũhripũ Jesure:

—Opũ, yũhu yũ pagũ sĩricũ yaanigu wagũra. Pũhrũ mũ mera wagũra, arĩpu ãgu.

<sup>60</sup> Ìgu eroparĩcũ Jesu werepũ:

—Yũre gamebirã sĩrinirã iro dopa ta ãhrrima. Erãpu sĩrinirãre yaaporo. Eropigu mũpu Goãmũ ãgu opu arĩrire òari buherire buhegu ariique, arĩpu Jesu ãgũre.

<sup>61</sup> Eropigu gajigu Jesure òpa arĩpu:

—Opũ, mũ mera wagũra. Yũ acawererãre goeriserenigu wanigũra dohpa, arĩpu ãgu Jesure.

<sup>62</sup> Ìgu eroparĩcũ werepũ Jesu ãgũre:

—Mohmebu mohmediabigu ãgu duhpihu arĩbeami. Ìgu iro dopa arĩgu òpa ãhrrimi: “Goãmũ yare iidiaa,” arĩqueregu irire ne iibeami. Ìgu Goãmũ yagũ arĩbodigu arĩbeami, arĩpu Jesu.

## 10

### *Jesu setenta buherãre buhedoregu obeopũ*

<sup>1</sup> Pũhrũ Jesu gajirã ãgu buherãre setenta buherãre beye, macarigũ ãgu waboro core obeoyupũ. Yujuyeri macarire perã dihta obeopũ ãgu.

<sup>2</sup> Eropaa obeogu òpa arĩ werepũ erãre werenigui queorire buhegu:

—Ojodũca baja iri bũgatuhaacũ baja arĩcũ baja mohmeri ãhrraa. Mohmeri masapũ bajamerãgã ãhrrima. Eropaa ta òari buherire peemorã bajarã arĩcũ wũaro ãhrraa mari mohmeri. Iri eroparĩquerecũ ta mari masare buhemorã bajamerãgã ãhrraa. Eropirã òari buherire buhemorãre gajirãre ãgu obeomorãre Goãmũre serẽque mũaa.

<sup>3</sup> Waque mũaa. Mũare yũ obeogu oveja iro dopa arĩrãre mũare yeea guarã iro dopa ta ñerã arĩrã watopegue obeogu iiaa.

<sup>4</sup> Niyeru ajure, paga aju sãre, zapature aĩbircãque. Mũaa mague curirã gajirãre bocajarã wereniguibircãque. Diaye ta taria waque.

<sup>5</sup> Arĩpehrreri wirire mũaa ñajari wirire i wihi majarãre, “¿Áhrriri mũaa?” arĩmũhtaque.

<sup>6</sup> Iri wihi majarã òaro mera arĩrã gamequeãro mariro erã arĩcũ òadoreque erãre. Òaro mera erã arĩbircũ iri wihi majarãre irire òadorebita.

<sup>7</sup> Yuju wihi ñajanũgarã erã òaro arĩcũ iri wihi ta dujaque. Iri wihi majarã mũare erã ejorire baha ihrituque. Mohmegũre ãgu wajatarire aĩro gahmea. Eropirã mũaa erãre buhera waja erã bari orire aĩque mũaa sã.

Eropirã yuju wihi ta mũaa ejara wihi ta ñajarã, iri macare gajirã ya wirigue arĩcuribircãque.

<sup>8</sup> Macaguere mũaa ejarã ero majarãpu mũare gamerã arĩcũ erã bari ejori arĩcũ baque.

<sup>9</sup> Ero majarã dorecũrãre òarã iique. Eropirã òpa arĩque ero majarãre: “Goãmũ mari Opũ dohpaguere ãgu arĩborore wererã iiaa mũare,” arĩque erãre.

<sup>10</sup> Gaji macague mũaa ejaacũ erãpu mũare

gamebiribocoma. Erã gamebircũ ĩarã iri maca decogue waha, õpa arĩque erãre. <sup>11</sup> “Gua nicu imicare guburi maja imicare wejēsiri cóãrã iiaa mũa guare gamebiriri dipuwaja ĩhmurã,” arĩque. “Eropirã ire guña arĩque,” arĩque. “Goãmũa mari Opũa dohpaguere ĩgu arĩborore mũare wererã arirabũa,” arĩque erãre. <sup>12</sup> Mũaare diaye yũhũa arĩgu iiaa. I mũũa pehrecũguere Sodoma majarã mũa bũrigã dipuwajacurãcoma. Erã eropa arĩquerecũ ta tauro mũare gamebirãpũa dipuwajacurã arĩrãcoma, arĩpũa Jesu.

*Gaji macari majarã Goãmũre tarinũgarã arĩñorã*

*Mt 11.20-24*

<sup>13</sup> Pũhrũa Jesu õpa arĩpũa macari majarãre:

—Corazĩn majarã, mũa ñero tarirãca. Betsaida maca majarã mũa sã ñero tarirãca. Mũa ya macaguere Goãmũa ĩgu turari mera deyoro moarire iirabũa yũhũa. Mũa peebirabũa. Iribojegue Tiro waĩcuri macare, Sidón waĩcuri maca sãre ĩgu turari mera iri deyoro moarire yũ ii ĩhmucũ ĩarã ero majarãpũa erã ñero iirire bũjawereboañuma. Eropa iirã õaripũre gohrotoboañuma. Mata erã bũjawererã erã bũjawereri suhrire saña, erã basi pea witũ mera mohsiripeoboañuma erã ñerire bũjawererire ĩhmumorã. Mũaapũa eropa iibeaa. <sup>14</sup> Eropigũa mũare arĩgu tiiaa. Goãmũa ĩgu dipuwaja moarinũa arĩcũ Tiro majarã mũa, Sidón majarã mũa tauro mũapũre mũa ñeri dipuwaja dipuwaja moagucumi ĩgu. <sup>15</sup> Capernaum majarã, mũa ejatuharo mera Goãmũa pohrogue wadiaribũa. Eropirã mũa Goãmũa yapũre iidiabircũ mũare Goãmũa peamegue cóãgucumi, arĩpũa Jesu.

<sup>16</sup> Eropa arĩtuha ĩgu buherãre wererũa:

—Mũaare peerã yũ sãre peema. Mũaare gamebirã yũ sãre gamebeama. Eropirã yũre gamebirã, erã yũre obeodigũa sãre gamebeama, arĩpũa Jesu erãre.

*Setenta buherã dujarañorã*

<sup>17</sup> Pũhrũa setenta buherã mucubiriri mera dujarañorã:

—Opũa, mũ waĩ mera mũ turari mera watẽare masaguere gua wiridorecũ erãpũa guare yũhriama, arĩñorã erã Jesure.

<sup>18</sup> Erã eroparĩcũ Jesu yũhripũa erãre:

—Õmarogue miariñe دچارو dopa ta watĩ ĩgu دچارicũ ĩabũa. <sup>19</sup> Peeque. Mũaare yũ turarire ohabũa yũhũa. Eropirã añare, corebare, watĩ marire ĩhaturigũre arĩpehreri ĩgu turari sãre mũa tarinũgaburire mũare ohabũa yũhũa. Eropirã erã mũare ñero iimasibeama. <sup>20</sup> Yũ eropa oquerecũ ta watẽa mũare erã tarinũgabircũ ĩarã iri dihtare mucubiribũa. ĩpũre mucubirique. Õmarogue Goãmũa yarã erã waĩre ĩgu gojaturipũgue mũa waĩre ĩgu gojatura arĩcũ masirã, ĩripũre mucubirique mũa, arĩpũa Jesu erãre.

*Jesu mucubiripũa*

*Mt 11.25-27; 13.16-17*

<sup>21</sup> Irisubure Espĩritu Santo Jesure bũrigã mucubircũ ĩpũa. Eropigũa Jesu õpa arĩpũa ĩgu Pagare:

—Ahũa, mũhũa õmaro majarã tauro opũa, i yeba majarã tauro opũa ãhraa. I mũ buherire “Masituhaja gua,” arĩrãre masicũ iibeaa. Mũa yare masipehobirãpũre masicũ ĩabũa mũhũa. Mũa eropa ĩicũ ĩagu

“Ōataria,” arāa yuhū mure. Eropa ta āhraa, ahū. Erā masibirāpūre erā masicū gahmeabū mūhū, arīpū Jesu.

Eropa arītuha gajirāre ōpa arīpū:

<sup>22</sup> —Yū Pagū arīpehrerire yū iiburire apimi yūre. Yū Pagū dihta yūre masimi. Yū dihta īgūre masia. Yū beyenirā sā īgūre masima yū masidorenirā arīrā. Erā nūcū ta yū Pagūre masia gūa, arīpū Jesu.

<sup>23</sup> Īgū eropa arīra pūhrū erā seyaro erā arīcū Jesu īgū buherāre ōpa arīpū:

—I arīpehrerire īarā mucubirā āhraa mūa. <sup>24</sup> Diaye ta āhraa. Ba-jarā Goāmū ya weremūhtanirā, yebari majarā oparā sā dohpague mūa īarire īadiariñorā erā sā. Eropirā mūa peeri sāre peediarīñorā. Erā eropa masidiaquerecū ta Goāmū erāre masidorebiripū irisubugūere, arīpū Jesu.

*Ōagū Samaria majagū queorire werepū Jesu*

<sup>25</sup> Irisubu ta judio masare buhegū Jesu pohro eraa, Jesure īgū ñero wereniguicū iidiaripū:

—Buhegū, ¿yū arīpehrerinūri Goāmū mera arīdiagū dohpa iigūcūri yuhū? arī serēpipū īgū Jesure.

<sup>26</sup> Īgū eroparīcū Jesu yūhripū īgūre:

—¿Dohpa arī irire wereri Goāmū yare erā gojarapūgue? ¿Goāmū īgū arī gojarapūguere īgū mera ōaro arīdiarire dohpa arīri mū pepicū? arīpū Jesu īgūre.

<sup>27</sup> Īgū eroparīcū īgū yūhripū:

—Ōpa arīñūmi Goāmū: “Turaro mū sīporā mera, mū turari mera, mū ōaro guñari mera Goāmūre mahique. Eropigū mū basi mahiro dopa ta mū pohro arīrā sāre mahique,” arī apīñūmi Goāmū marire, arīpū īgū Jesure.

<sup>28</sup> Īgū eroparīcū Jesu yūhripū:

—Diaye ta arābū mūhū. Irire iique. Eropigū arīpehrerinūri Goāmū mera arīgūca mūhū, arīpū īgūre.

<sup>29</sup> Īgū masare buhegūpū “Ihī Goāmū ya dorerire iipehogū āhrimi,” masa īgūre erā arī pepicū gamepū. Eropa gamegū īgū Jesure ōpa arī serēpinemopū:

—¿Noa āhriri Goāmū yūre mahidoregū? arīpū īgū.

<sup>30</sup> Īgū eroparīcū Jesupū ōpa arī yūhripū Samaria majagū īgū iirare weregū:

—Yujunū Jerusaléngue arīdigū Jericógue wagū maha īgū curicū yajari masa īgūre ñeāñorā. Eropa ñearā īgū suhrirore tuwea aī, īgūre turaro pañorā. Eropa parā sīrimerejacū gohra duhuñorā īgūre. <sup>31</sup> Irisubu ta pahi iri mague aripū. Eropa arigū erā padīgūre īaqueregū ta maha gajipū masepū īgūre ihatarīgā wapū. <sup>32</sup> Eropi Goāmū wihi mohmegū sā mojomorocūgū pohro eja īgūre īha gajipū masepū tarīgā wapū. <sup>33</sup> Erā eropiiquerecū Samaria majagūpū ero waha yoañarirogue īha īgūre mojomoro īapū. <sup>34</sup> Eropigū īgū mojomorocūgū pohro eja, igui deco vino uyū mera morera deco mera īgū camire pisūpū. Pisūtuha ja suhri gasiro mera diricāhmotarū īgū camire. Tuhaja, īgūre īgū yagū burro weca duhpeo, carīri wihigū aī ejarū īgūre. Ero arīgū īgū Samaria majagū ōaro ihadibupū īgūre.

<sup>35</sup> Gajinū īgū carīri wihi opūre pese niyerusere oho, ōpa arīpū: “Īre

ĩhadibuque. Iseri sihajabiricũ dipaturi dujarigu wajayepehogura,” arĩpũ Samaria majagu wihi opũre, arĩpũ Jesu.

<sup>36</sup> Eropa arĩtuha judio masare buhegure serẽpipũ Jesu:

—¿Oã urerã ũa mojomorocũgũ pohro tarianirã nihinopũ árĩyuri mojomorocũgũre mahigu? arĩpũ Jesu.

<sup>37</sup> Ĩgũ eroparĩcũ buhegũpũ Jesure yũhripũ:

—Mojomorocũgũre itamudigu árĩĩnumi ĩgũre mahigu, arĩpũ ĩgũ Jesure.

—Mu sã masare eropa ta iigu waque, arĩpũ Jesu buhegure.

*Marta, María sã pohro Jesu curipũ*

<sup>38</sup> Eropi Jesu ĩgũ buherã mera wacũ, gajĩ macague erã curicũ, Marta waĩcũgo erãre igo ya wihi ñajaridorepo. <sup>39</sup> ĩgũ ñajara pũhrũ igo pagũ mago María waĩcũgo ĩgũ guburi pohro doa ĩgũ buherire peepo. <sup>40</sup> Igo eropa icũ ĩago Marta igo mohmeri baja árĩcũ ĩago guapo. Eropigo igo Jesure werepo:

—Opũ, ¿yũhũ yujugo ta mohmecũ yũre yũ pagũ mago igo itamubiricũ ðhari mu ĩacũ? Igo yũre itamudoreque, arĩpo Marta Jesure.

<sup>41</sup> Igo eroparĩcũ Jesu yũhripũ:

—Marta, baja mũre mohmeri árĩcũ wũaro pepia mũhũ. <sup>42</sup> Goãmũ ĩgũ yare peedoremi. María ðarire iibo irire beyemo. Eropigu yũre igo peecũ, “Mohmetamugo waque,” arĩbeaa igore, arĩpũ Jesu Martare.

## 11

*Jesu Goãmũre serẽburire buhepũ*

*Mt 6.9-15; 7.7-11*

<sup>1</sup> Yujunũ Jesu ĩgũ Pagure Goãmũre serẽgũ iipũ. ĩgũ serẽtuhacũ yujugũ ĩgũ buherã mera majagu ðpa arĩpũ:

—Opũ, Ñũ ĩgũ buherãre ĩgũ buhediro dopa ta Goãmũre serẽrĩre gũa sãre buheque mũhũ, arĩpũ ĩgũ Jesure.

<sup>2</sup> ĩgũ eroparĩcũ peegu Jesu erãre werepũ:

—Ōpa arĩ Goãmũre serẽque: “Gũa Pagũ, ũmaro majagu mũhũ ðagu ãhrraa. Dohpaguere árĩpehrerã weca opũ ãhrraa. Ũmaroguere mũ dorero erã iiro dopa ta i yeba majarã sã iiporo. <sup>3</sup> Eropigu ũmũri nũcũ gũa baburire oniguicãque gũare. <sup>4</sup> Gajirã erã gũare ñero iirare gũa cãdijiro dopa ta mu sã gũa ñero iirare cãdijique. Eropigu gũa ñeri iiborare cãhmotaque. Gũa ñeri iiborare tauque,” arĩ serẽque Goãmũre, arĩpũ Jesu erãre.

<sup>5</sup> Pũhrũguere ĩgũ buherãre ðpa arĩ buhepũ werenigui queori mera:

—Yujugũ ñami deco ĩgũ acaweregũ wihigue waha, ĩgũre serẽpũ: “Acaweregũ, ureru pan dipure oque yũre. <sup>6</sup> Gajigũ yũ acaweregũ curigũ aridigũ dohparagã yaha wihi erami. Eropiro ĩgũre yũ oburi mara,” arĩpũ ĩgũ ĩgũ acaweregũre. <sup>7</sup> ĩgũ eroparĩcũ ĩgũ acaweregũ wihi pohecague árĩgũ yũhripũ: “Yũre garibobita. Disiporo bihadiro ãhrraa. Yũhũ, yũ porã mera carigũ iiaa. Wahgãro bejabirica yũre mũre barire obudi,” arĩpũ ĩgũ acaweregũ. <sup>8</sup> ¿Dohpa warocuri serẽgũpũre? Diaye arãa mũare. ĩgũ acaweregũ arĩqueregũ ta barire obudigũ wahgãbiripũ. ĩgũ eropa wahgãdiabiriquerecũ ta bari serẽgũpũ gũhyasĩribigũ ĩgũ yoari boje serẽniguicũ árĩpehreri ĩgũ serẽro dopa

ta pũhrũ wahgã ogũcumi. <sup>9</sup> Eropigũ ire mũare weregũ iiaa: Goãmũre mari Pagũre serẽque. Eropa serẽrã mũa serẽrire bocarãca. Goãmũre eropa serẽnigũicãque. Mũa eropa iicũ ãgũ ogũcumi. <sup>10</sup> Áripehrerã Goãmũre serẽrã aĩrãcoma. Eropirã erã serẽrare bocarãcoma. Eropigũ áripehrerã Goãmũre eropa serẽnigũirãre ãgũ erãre ogũcumi.

<sup>11</sup> “¿Mũa porã mũare erã pan serẽcũ utãyepũre obocuri mũa? Obiriboya. ¿Erã mũare erã waire serẽcũ añapũre obocuri erãre? Obiriboya. <sup>12</sup> ¿Eropirã mũa porã cãreña diuri serẽcũ corebapũre obocuri mũa? Obiriboya. <sup>13</sup> Mũa ñerã áriquererã ta mũa porãre ðarire omasia mũa. Eropigũ Goãmũpũ mũa tauro ðarire ohomi mũare. ãgũ mari Pagũ umaro majagũ ãgũ Espĩritu Santore ogũcumi ãgũre serẽrãre, arĩpũ Jesu ãgũ buherãre.

—*Jesu watĩ turarire opami, arĩ weresãñorã masa*

*Mt 12.22-30; Mr 3.20-27*

<sup>14</sup> Irisubure Jesu watĩre cóãgũ iipũ. Watĩpũ wereniguimasibigũ áricũ iipũ masũre. Eropigũ watĩ masũre Jesu cóãcũ masũpũ wereniguinũgapũ. ãgũ wereniguicũ peerã masa bajarã ãhamaria wañorã. <sup>15</sup> Erã eropa ƚcaquerecũ ta gajirãpũ ðpa arĩñorã:

—*Íhĩ Jesu watẽare cóãgũ Beelzebú waĩcũgũ watẽa opũ ãgũ turari mera cohãmi, arĩñorã gajirã.*

<sup>16</sup> Gajirã “Mũhũ Goãmũ ãgũ obeodigũ áriũgũ Goãmũ turari mera deyoro moarire ii ãhmuque gũare,” arĩñorã. <sup>17</sup> Erã eropa dorecũ peegũ erã pepirire masigũ, erãre ðpa arĩ werenigui queori werepũ Jesu:

—*Watĩ ya turari mera watẽare cóãbeaa yũhũ. Yuju maca majarã erã basi gamequeãrã, iri maca majarã pehrea wabocoma. Eropirã yuju wihi majarã erã basi gamequeãrã, iri wihi majarã pehrea wabocoma. <sup>18</sup> Eropigũ Beelzebú watẽa opũpũ ãgũ turari mera ãgũ watẽare yũre cóãdoregũ ãgũ basi ãgũ yarãre cóãbocumi. Eropirã erã sã wapehrea waboñuma. Mũa yũre ðpa arãa. “Ígũ Beelzebú turari mera watẽare cohãmi,” mũa yũre arĩ weresãa. <sup>19</sup> Mũa mera majarã sã watẽare cohãma. Eropirã erã “Beelzebú ãgũ turari mera erãre cohãa,” arĩbeama. “Goãmũ ãgũ turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye áribiricũ mũa mera majarã wererãcoma. <sup>20</sup> Eropigũ yũpũ watẽare cóãgũ Goãmũ ãgũ Espĩritu Santo turari mera iiaa. Yũ eropa cóãcũ ãrã ðpa arĩ masĩrãca mũa: “Goãmũ ãgũ opũ arĩri i yebaguere árituhaja dohpaguere,” arĩrãca, arĩpũ Jesu.*

<sup>21</sup> —*Watĩ turagũ tarinũgari werediacũ ðpa ãhraa, arĩpũ Jesu. —* Wihi opũ turagũ ãgũ mojo mera ãgũ wihire ãhadibucũ ãgũ yare gajirã aĩmasibeama. <sup>22</sup> ãgũ eropa ãhadibuquerecũ ta gajigũ turatarigũ ãgũre gamequeã, ãgũre tarinũga, ãgũ mojore emacã, ãgũ yare aĩcã gajirãre gueremi. “Watĩ turagũ áriquerecũ yũhũ turatariagũ ãhraa,” arĩgũ iipũ Jesu i queori mera. <sup>23</sup> Yujugũ yũre gamebigũ yũre ãhaturigũ ãhrimi. Yujugũ yũre itamubigũ yũre teboricũcũ ãgũ iimi, arĩ buhepũ Jesu.

*Watĩ dipaturi masũguere ñajara queorire werepũ Jesu*

*Mt 12.43-45*

<sup>24</sup> Eropigũ ãgũ dipaturi werenigui queori mera ðpa arĩ buhepũ:

—Yujugu watĩ masu mera árĩdi waha deco mariri yeba cuhri, ĩgu sooborore amaripũ. Eropã bocabigu õpa arĩ pepipũ: “Masu yũ cõadi mera dipaturi árĩgu wagura,” arĩ pepipũ ĩgu. <sup>25</sup> Eropã arĩgu ĩgu dujaa waha, ĩgu cõadigũre ta masure bocapũ daja. ĩgũre bocaboro core masupũ õagũ ñeri marĩgu árĩpũ. <sup>26</sup> Eropĩgu watĩ gajirã siete watẽare ĩgu tauro ñerãre sihugu wapũ. ĩgu eropã sihucũ erã árĩpehrerã watẽa masu mera árĩñorã. Eropĩgu masupũ ero core yujugu watĩre opagu ñetariagu árĩripũ. Dohpaguepũre bajarã watẽare opagu árĩgu, ero core ĩgu árĩdiro tauro ñegũ dujapũ, arĩpũ Jesu.

*Jesu mucubirire werepũ*

<sup>27</sup> Irire ĩgu eroparĩcũ masa watope árĩgo Jesure arĩpo busuro mera: —Mũre porãcũdigo, mũre mihudigo mucubirigo ãhrimo, arĩpo Jesure.

<sup>28</sup> Igo eropã arĩtuhacũ peegu Jesu igore yũhrĩpũ:

—Goãmũ werenigũirire peerã ĩgu dorerire iirãpũ erã árĩrãcoma mucubirirã, arĩpũ Jesu igore.

*Masa ñerã Jesure Goãmũ turari mera deyoro moarire iidoreriñorã  
Mt 12.38-42; Mr 8.12*

<sup>29</sup> Eropĩ bajarã masa Jesu pohro erã eracũ, ĩgu erãre werenemopũ:

—Dohpague majarã ñerã ãhrima. Yũ diaye arĩgu árĩcũ mũa masidiarã Goãmũ turari mera deyoro moarire iidorerã yũre. Mũa eropã dorequerecũ ta Jona iribojegue majagu ĩgu iira dihtare ii ĩhmugucumi Goãmũ masare. <sup>30</sup> Jona Goãmũ yare weremuhtadigu árĩgu ĩgu Ninive majarãre ĩgu masicũ iidiro dopa ta yũhũ Goãmũ ĩgu obeodigu masicũ iiaa dohpague majarãre. <sup>31</sup> Dipuwaja moarinũ árĩcũ iribojegue majago opo bũro sur majago bũro igo bũro wahgãnũga mũare dohpague majarãre weresãgocumo. Igo Salomo opu ĩgu masirire peediago yoarogue aridigo Salomore peego aripo. Dohpaguere mũa watopere Salomo tauro masigu ãhrraa. Yũhũ mũa mera árĩquerecũ mũa yũ masirire peediabeaa. Mũa eropã peediabirira waja igo opo bũro mũare “Ñerã ãhrima,” arĩ weresãgocumo. <sup>32</sup> Eropã ta dipuwaja moarinũ árĩcũ Ninive maca majarã mũra sã mũare dohpague majarãre “Ñerã ãhrima,” arĩ weresãrãcoma erã. Jona erãre Goãmũ yare ĩgu werecũ peerã, erã ñerire bũjawere, õarire gohrotonirã árĩñorã erãpũ. Dohpaguere mũa watopere Jona tauro árĩgu ãhrraa yũhũ. Yũhũ Goãmũ yare werequerecũ mũa ñero iirare bũjawerebeaa. Eropirã Ninive majarã mũra mũare ñerire bũjawerebirãre weresãrãcoma, arĩ werepũ Jesu.

*Masa erã pepiro dopa iima, arĩ werepũ Jesu*

*Mt 5.15; 6.22-23*

<sup>33</sup> Eropĩgu buhenemogu õpa arĩpũ erãre:

—Masa sihãgodirure sihãgorã dibubeama. Irirure sihãgorã mátasoro docague dibubeama. Irirure umarogue duhpeomi wihigue ñajarirã erã ĩha ñajama õaro. <sup>34</sup> “Mari cuiri mari dupũre sihãgodiru iro dopa ta ãhrraa,” arĩ werediacũ õpa ãhrraa. Mũa pepiro dopa ta iiaa. Mũa õaro mera pepirã árĩrã õarire iiaa. Mũa ñero pepirã árĩrãpũ ñeri dihtare iiaa. <sup>35</sup> Eropirã õaro iique. Mũa pepirigue ñero árĩbircãporo. <sup>36</sup> Tuhaja mũa pepirigue õari árĩcũ, ñeri ne maricũ

õari dihtare pepirāca. Mũa pepirigue õari árĩcũ mũa õarire iirāca, arĩ buhepũ Jesu.

*Fariseo masare, judio masare buherã sãre Jesu tuhri werepũ*

*Mt 23.1-36; Mr 12.38-40; Lc 20.45-47*

<sup>37</sup> Jesu ĩgũ buhetuhajacũ ĩagũ fariseo masũ ĩgũre ĩgũ ya wihigue badoregũ sihupũ. Eropigũ Jesu ĩgũ ya wihigue ñaja, erã baro erã mera doajapũ. <sup>38</sup> ĩgũ eropa doajacũ fariseo masupũ Jesure ĩhanũrugũ judio masa mojo coenigũiro dopa ta ĩgũ mojo coebiricũ ĩagũ õpa arĩ pepirũ: “Cuena. ¿Ihĩ duhpigũ gũa iro dopa mojo coebeari?” arĩ pepirũ. <sup>39</sup> ĩgũ eropa arĩ pepicũ masigũ Jesu ĩgũre werepũ:

—Mũa fariseo masa mũa dorero dopa ta mũa ihririparire, soropari sãre mũa coeweaa mũa õarire iirire ĩ ĩhmudiarã. Eropa coequererã ta mũa sĩporãripure coebeaa. Eropirã mũa árĩricuri mũa pepiripure ne õarire gohrotobeaa. Mũa pepiriguere gajirã yare yajadiarire ñeri dihta āhraa. <sup>40</sup> Pee masibirã āhraa mũa. Goãmũ mũa dũpũre ĩgũ mũare pepiri sãre iipũ. ¿Iirire masibeari mũa? <sup>41</sup> Eropirã mũa Goãmũ ya árĩburire iidiarã mũa pepirire õarire gohrotomũhtaque. Mũa eropa iira pũhrũ õarire iirã árĩrãca.

<sup>42</sup> “Mũa fariseo masa ñero tarirãca. Bari õaro sũriburi sarire aĩ deara pũhrũ diez quẽri iiaa. Tuhaja yujuquẽ ta Goãmũ wihigue aĩgã apia Goãmũ dorero dopa ta. Eropa iri dorerire iiquererã ta diaye iirire, Goãmũre gamerire mũa ne guñabeaa. Dũcare mũa aĩrare merogã Goãmũ wihire apicũ õhaa. Eropa iirã õpa iinemoque: Diaye iirire, Goãmũre gameri sãre iique mũa.

<sup>43</sup> “Mũa fariseo masa ñero tarirãca. Buheri wihigue árĩrã õari doari dihtare gahmea mũa. Doberi duarogue masa mũare õaro umupeori mera bocatĩri serẽcũ gahmea mũa.

<sup>44</sup> “Mũa judio masare buherã, fariseo masa sã mũa gũyaricũrã āhraa. Ñero tarirãca mũa. Masa gobe dibura gobe iro dopa ta āhraa mũa. Iri gobe pohro masa tarigãrã pohecague boanirã árĩcũ masibeama. Eropa ta masa mũa pohro árĩrã mũa pepirigue ñeri árĩcũ masibeama erã, arĩpũ Jesu erãre.

<sup>45</sup> ĩgũ eroparĩcũ peegũ judio masare buherã mera majagũ Jesure werepũ:

—Buhegũ, irire arĩgũ, gũa sãre ñero arĩgũ iica mũhũ, arĩpũ ĩgũ Jesure.

<sup>46</sup> ĩgũ eroparĩcũ Jesu yũhrĩpũ:

—Diaye ta āhraa. Mũa masare buherã sã ñero tarirãca. Mũa gajirãre erã bocatĩubiririre iidorea erãre. Eropa dorequererã mũapũ erãre ne merogã itamubeaa iri dorerire erã iiboro dopa.

<sup>47</sup> “Eropirã mũa ñero tarirãca. Goãmũ yare weremũhtanirã mũra ya masa goberire õaro amuraa mũa erãre umupeoro dopa ta iirã. Mũa eropa iiquerecũ ta iribojegue majarã mũa acawererãpũ erãre wejẽñuma. <sup>48</sup> Erãpũ Goãmũ ya weremũhtanirãre erã wejẽdiro dopa ta mũa sã iiboya. Eropirã dohpaguere erã masa goberire amuraa mũa. Eropa amurã mũa acawererã erãre wejẽrare guñaa mũa. Erã eropa wejẽrare guñarã “Õaro iĩñuma,” arĩraa mũa, arĩpũ Jesu.

<sup>49</sup> “Eropigũ Goãmũ ĩgũ masiri mera õpa arĩ weryuñumi: “Ya-hare weremũhtamorãre yũ buherire buhemũhtamorã sãre obeogura

eräre. Eropirā erā yu obeoräre gajiräre wejē, gajiräre ñero iirācoma,” arīyuñumi Goāmū, arīpū Jesu. <sup>50-51</sup> I yebare Goāmū ñhacūnugura pūhrū Caīnpū Abelre wejēñumi. Ero pūhrū Goāmū yare weremuñtaniräre wejēñuma. Pūhrū Zacariare mua acawererā mura ta ĩgure wejēñuma. Īgū Goāmū wihi pohro Goāmū ya árĩburire waimarā soeburi mesa pohro árĩcū mua acawererā ĩgure wejēñuma. Árĩpehrerā eräre erā wejēra dipuwaja dohpague majarā dipuwajacurācoma. Eropa ta āhraa. Mũare ta arĩgū iiaa. Árĩpehrerā eräre erā wejēra dipuwajare dohpague majaräre Goāmū dipuwaja moagucumi.

<sup>52</sup> “Mũa masare buherā, mua ñero tarirāca. Goāmū masirire ĩgū gojarare opaquererā ta gajiräre werebeaa mua. Mua basi Goāmū yare peebeaa. Eropirā gajirā ĩgū yare erā peediaquerecū ta irire mua eräre peedorebeaa, arīpū Jesu eräre.

<sup>53-54</sup> Īgū eroparĩcū peerā judio masare buherā, fariseo masa sã ĩgū mera guarā ĩgure ñero wereniguiñorā. Eropirā Jesu ĩgū ñero arĩ yūhricū peediarā, erā serēpinuruñorā ĩgure weresādiarā.

## 12

### *Erā gūyarire Jesu werepū*

<sup>1</sup> Eropi Jesu pohro masa bajarā gohra gamenereñorā. Cūhña taricāyoro. Ero Jesu ĩgū buheräre ōpa arĩ werepū:

—Ōaro guña masique mua. Fariseo masa erā pan bugacū iiburire ĩarā ōaro masique. Erā gūyarire weregū iiaa. <sup>2</sup> Masa erā yayasārare pūhrū masirācoma. Erā dibura säre gajirā masirācoma. <sup>3</sup> Eropiro gajirā peebirogue mua wereniguirare ōaro masicū Goāmū weregucumi. Bihara taribugue gajigure erā yayarogā erā arĩrare masa bajarā watope masicū iigucumi Goāmū.

### *Masa erā güibure werepū Jesu*

#### *Mt 10.26-31*

<sup>4</sup> Eropigū Jesu werenemopū eräre:

—Diaye arĩgū iiaa mũare. Masure wejērā wejētuha dipaturi erā wejēdigure ñero iimasibeama. Eropirā mũare wejēdiarāpūre güibiricāque. <sup>5</sup> Dohpaguere mua güibure mua umupeobure weregura. Goāmūpūre güi umupeoque. Īgū mua sīrira pūhrū peamegure cóamasimi mũare. Eropa ta āhraa. Diaye arĩgū tiiaa. Goāmūpūre güi umupeoque.

<sup>6</sup> Cinco mirua waja marima. Eropa waja mariquerecū ta erāgāre Goāmū ñhadibumi. Ne cādijibeami eräre. Mirua tauro Goāmū ñhadibumi mũapūre. <sup>7</sup> Eropigū mua poari säre ne yuju poadagā duhyaro mariro masipehomi Goāmū. Eropa ta mua árĩricuri säre masipehomi. Eropa masigū mũare ñhadibuniguicāmi. Miruare ĩgū mahiro tauro mũapūre mahimi Goāmū. Eropirā ĩgure umupeorā güibiricāque mua, arīpū Jesu.

### *Jesure mua umupeorire wereque masare, arīpū Jesu*

#### *Mt 10.32-33; 12.32; 10.19-20*

<sup>8</sup> Eropi Jesu werenemopū:



—Mũare arĩgu iiaa. Yujugu “Jesu yagu āhraa,” masare ĩgu arĩ werecũ ĩagu yũhu Goãmu ĩgu obeodigu sã “Īgu yahagu āhrimi,” arĩguca Goãmu yarã anyuare. <sup>9</sup> Yujugu masare güigu yũre “Jesucristore masibea,” masare arĩ weregũre yũ sã “Īgũre masibea,” arĩ weregũca anyuare.

<sup>10</sup> “Yũ masure Goãmu ĩgu obeodigũre ñero arĩ erã wereniguicũ iri ñerire Goãmu cãdijimasimi. Eropa cãdijiqueregu ta Espĩritu Santopũre erã ñero arĩ wereniguicũ irire ne Goãmu cãdijisome.

<sup>11</sup> “Mari buheri wirigue oparã pohro gajirã mũare aĩ ñaja weresãrãcoma. Erã eropa weresãcũ mua arĩ cãhmotaburire ne wũaro pepibiricãque. <sup>12</sup> Irisubu ta Espĩritu Santo mua wereburire mũare weregũcumi, arĩpũ Jesu.

*Doberi opũ queorire werepũ Jesu*

<sup>13</sup> Eropi masa watope arĩgu Jesure õpa arĩ werepũ:

—Buhegu, gua pagu ĩgu sĩrira pũhrũ ĩgu ya arĩra guare dujaa. Eropigu yũ tĩgũre irire yũ sãre queoro dũca wadoreque, arĩpũ ĩgu Jesure.

<sup>14</sup> Īgu eroparĩcũ Jesu yũhripũ:

—Ne irinore dũca wabuno arĩbeaa yũhu, arĩpũ Jesu ĩgũre.

<sup>15</sup> Eropa arĩtuha Jesu arĩpehrerãre werepũ:

—Õaro iique mua. Doberire, gajino sãre gametaribiricãque. Baja opaquererã ta iri mera ta mucubirituhajabeaa mari, arĩpũ Jesu.

<sup>16</sup> Eropa arĩtuha Jesu erãre i queori mera werepũ:

—Doberi opũ õari yebare opapũ. Eropiro iri yebare ĩgu oteri õaro dũcacũyoro. <sup>17</sup> Eropigu ĩgu, ĩgu basi õpa arĩ pepiripũ: “Iri dũca yũhu diburi wihire ne sihasome. <sup>18</sup> Dohpague õpa iigũra. I wihi dohpague yũ dibumũhtara wihire cõãcã, dohpague mũra wihi tauro mama wihipũre wũari wihi iigũra. Iri wihire yaha oteri dũcare, arĩpehrerire dibugũra. <sup>19</sup> Yũ eropa iira pũhrũ õpa arĩ pepigũra yũ basi: ‘Yũ arĩpehreri opagu āhraa. Õaro soogũra. Eropigu baha, ihri, mucubirigũra,’ arĩ pepigũra yũ basi,” arĩ pepiripũ ĩgu basi. <sup>20</sup> Īgu eropa arĩ pepiquerecũ Goãmu ĩgũre werepũ: “Mũhu ne pee masibigu āhraa. Dohpagã ñami ta mũhu sĩrigũca. Mũ eropa wacũ mũ ya mũ mahira dederea waroca mũre,” arĩpũ Goãmu ĩgũre, arĩpũ Jesu masare.

<sup>21</sup> Irire arĩgu masare õpa arĩ werepũ Jesu:

—Eropa ta warãcoma doberi oparã erã Goãmũre guñabirã. Baja doberire, niyerure erã ya arĩburi dihtare diburã, Goãmũre guñabirã erã mojomorocũrã iro dopa arĩrãcoma erã Goãmũ ĩgu ĩacũ. Eropigu Goãmũ erãre ĩhasũabeami, arĩpũ Jesu.

*Goãmũ ĩgu porãre ĩhadibumi, arĩpũ Jesu*

*Mt 6.25-34*

<sup>22</sup> Eropi Jesu ĩgu buherãre õpa arĩ werepũ:

—Ire mũare arĩgu iiaa: Mũa barire, suhri sãre wũaro guñaricũbiricãque. <sup>23</sup> Goãmũ mũare deyoro moagu bari dihtare bamorãre suhri sañamorã dihtare iibirĩũmi mũare. Mũa iri dihtare guñacũ gamebeami. <sup>24</sup> Mirimagũ porãre Goãmũ ĩgu ĩhadiburire masique. Erã poeri moorã āhrima. Eropiro erã bari dihburi wiri erãre mara. Goãmũpũ erãre erã baburire ohomi. Mirimagũ porã tauro mũapũre mahĩmi Goãmũ. Eropigu mũa sãre ĩhadibugũcumi

ĭgu. <sup>25</sup> W̄uaro m̄ua pepiri mera iri m̄uare pagarā wacū iibeaa. Eropiro mari w̄uaro pepiri duhpiburi árĭbeaa. <sup>26</sup> ¿Eropirā w̄uaro m̄ua pepiri duhpiburi árĭbiriquerecū ta, duhpirā m̄ua baburire, m̄ua ihriburire, m̄ua sañaburire w̄uaro guña bujawere pepiri m̄ua?

<sup>27</sup> “N̄uga maja gorire pepique. Iri gori ne iiro mariro ðari goricua. Iri gori ðari suhri iro dopa ðari gori dehyoa. Salomo opu m̄uā ðari suhri opagu ĭgu árĭquerecū ta iri goripu ĭgu ya suhri tauro ðari dehyoa. <sup>28</sup> Iri gorire ðari gori gocū iimi Goām̄upu. ĭgu eropa iiquerecū ta iri goripu bajamenurigā árĭra puhru ñaidija pehrea wahaa. Merogā āhri gajinu peamegue soe cóācāma. Iri eropa mata pehrequerecū ta iri gorire iri ðari gori árĭcū iimi Goām̄u. Eropigu Goām̄u iri gorire ĭgu ðari gori árĭcū ĭgu iidiro dopa ta tauro m̄ua s̄are ðaro iigucumi. Suhrire ogucumi. Daberogā Goām̄ure umupeoa m̄ua. <sup>29</sup> Eropirā m̄ua baburire, m̄ua ihriburire w̄uaro guñabiricāque. <sup>30</sup> Goām̄ure masibirāpu i yeba majarāpu irire eropa amaniguicāma. Mari Pagu umaro majagu árĭpehreri m̄ua gamerire masimi. ĭgu eropa masicū m̄ua ya árĭburire w̄uaro guñabiricāque. <sup>31</sup> Goām̄u m̄ua opu ĭgu árĭborore gamem̄htaque m̄ua. M̄ua eropa iira puhru Goām̄upu m̄ua gameri d̄hyacū ogucumi, arĭpu Jesu.

*Ūmarogue mari baja opaa, arĭ masia m̄ua, arĭpu Jesu*  
Mt 6.19-21

<sup>32</sup> Eropigu erāre werenemopu:

—Yu mahirā, bajamerāgā árĭquererā güibiricāque m̄ua. Goām̄u ĭgu opu árĭrore ĭgu mera m̄ua árĭcū gahmemi ĭgu. <sup>33</sup> Eropirā m̄ua yare duapehoque. Irire duacā, iri niyerure mojomorocurāre oque. Eropirā umaro maja Goām̄u ya árĭburire mohmeque. Eropa iirā umaro maja m̄ua w̄ajatarī ne pehresome. Ūmarogue m̄ua ya árĭri ne pehrebeaa. Eroguere m̄ua yare aĩmasibeami yajari masu. Eropirā mega s̄a irire t̄amasibeam̄a. <sup>34</sup> Ūmarogue m̄ua ya árĭcū Goām̄u ya dihtare pepirāca m̄ua, arĭpu Jesu.

*Jesu ĭgu dujariborore coredorepu ĭgu yarāre*

<sup>35-36</sup> Eroparĭtuhaja erāre werenemopu daja:

—M̄ua yare amuyunirā iro dopa árĭrā yahare eropa iiniguirā árĭrā coreque yu dujariborore. Mohme corerā erā opu mojoto diriri bosenugue ĭgu wacū ĭgu dujariborore erā cohrema. Erā eropa corero dopa ta yu dujariborore coreque m̄ua s̄a. Opu ĭgu ya wihigue eraa, disiporore ĭgu dotecū peerā erā mata pāgū acuma ĭgure. <sup>37</sup> Mohme corerā erā opu eracū ĭgu gamero dopa ta iiyurā árĭrā mucubirirā árĭrācoma. Erā eropa iicū ĭagu erā opupu mohme coregu iro dopa gohrotogucumi. Eropigu mohme corerāre doadore, ĭgu erāre barire duhpeogucumi. <sup>38</sup> ĭgu erarisubu ñami deco árĭcū, o boyorogue árĭquerecū mohme corerāpu ĭgu erarisubure ĭgure ðaro corerā árĭrā, mucubirirā árĭrācoma erā. <sup>39</sup> Ire guñaque m̄ua. Wihi opu yajari masu ĭgu eraborore masigu, ĭgu yajari masure coregu ñajadorebiriboñumi. <sup>40</sup> Eropirā m̄ua s̄a coreque. Yuhu masu Goām̄u ĭgu obeodigu guñaña mariro ariguca. Eropirā yahare eropa iiniguirā árĭrā yure coreque m̄ua, arĭpu Jesu erāre.

*Gajigu mohme coregu igu opure igu umupeoru. Gajiguru umpeobiripu, arī werepu Jesu*

*Mt 24.45-51*

<sup>41</sup> Igu eroparīcū Pedropu serēpipu Jesure:

—Opu, ¿i queorire weregu guare arīgu iiri? ¿O arīpehrerāre eropa arīri? arīpu Pedro.

<sup>42</sup> Igu eroparīcū Jesu werenigui queoriñe mera ōpa arī buhepu erāre:

—Mohme coregu igu opure umupeogu pee masigu ōpa ta āhrimi. Opu curigu wagu, mohme coregure igu wihire apimi. Igu apiguru dorega arīgucumi. Eropigu barisubu arīcū gajirā mohmeri masare barire gueremi. <sup>43</sup> Eropigu opu igu ya wihigue dujarami. Igu opu eracū mohme coreguru igu opu igu dorediro dopa ta ipehodigu arīgu, igu mucubirigu arīgucumi. <sup>44</sup> Diaye arīgu iiaa mware. Igu eropa iicū iagu igu opu arīpehreri igu yare ihadibugu apīgucumi igure daja. <sup>45</sup> Negu mohme coreguru ōpa ta āhrimi. “Yu opu yoja deyobeami,” arīmi. Eropa arīgu gajirā mohme corerāre umare, nome sare pami. Eropigu wuaro baha, ihri, meremi. <sup>46</sup> Igu eropa iirisubu guñaña mariro igu opu dujaragucumi. Igu dujararinure ne masibeami mohme coregu. Eropa dujaragu negu igu iirare pee igure ñero dipuwaja moagucumi. Eropigu Goāmure tarinaganirāre igu cóādirogue igure cóāgucumi.

<sup>47</sup> “Eropigu mohme coregu igu opu gamerire masigu arīqueregu ta irire igu iibiricū, igu ōaro igu mohmebiricū, igu opu igure burigā dipuwaja moa pagucumi igure. <sup>48</sup> Gajigu mohme coreguru igu opu gamerire masibigu arīcū igu opu igure daberogā ñari igu eropa arīri dipuwajare pagucumi. Goāmū igu gamerire masicū iimi masare. Eropiro masigure yuhriri gahmea. Eropiro ōaro masigure ōaro yuhriri gahmea, arīpu Jesu.

*Jesu masare game dūca waricū iimi*

*Mt 10.34-36*

<sup>49</sup> Eropa arītuha Jesu erāre werepu daja:

—Peame soewearo dopa ta yuhu i yebare masa erā ñero iirire cóāgu arigu iibu. Dohpague ta masa arīpehreri ñeri marirā arīcū burigā gahmea yuhu. <sup>50</sup> Yuhu ñero tariguca. Yu eropa ñero tariburire coregu, ñero siporācua yuhu. <sup>51</sup> ¿Dohpa arī pepiri mua yure? Yuhu i yebaguere buhegu aricū yu buheri mera “Masa ihatuosome pare,” ¿arī pepiri mua? Eropa arībeaa. Mware arīgu iiaa. Masa yu buherire peerā, pe curu erā basi game dūca warirācoma. Yujurāyeri yu buherire peerācoma. Gajirāpu irire gamebirā erāre ihatuosome. Eropirā yujuro mera arīsome masa. <sup>52</sup> Eropirā yuju wihi majarā sã cinco masa yu buherire peerā, pe curu erā basi game dūca warirācoma. Yuju curu urerā, gajī curu perā arīrācoma. <sup>53</sup> Igu pagu igu magure ihatuosome igu yaha buherire peecū. Gajigu magu sã igu pagure ihatuosome. Eropigo igo pago igo magore ihatuosome. Gajigo mago sã igo pagore ihatuosome. Eropigo igo mañeco igo bepre ihatuosome. Gajigo bepo sã igo mañecore ihatuosome. Eropa warācoma yaha buherire erā peecū, arīpu Jesu.

Jesu “Mña yu iirire ïaquererã yure masibea,” arĩ wererũ Jesu masare

*Mt 16.1-4; Mr 8.11-13*

<sup>54</sup> Eropi Jesu masare bajarãre ðpa arĩ wererũ daja:

—Abe ñajarogue imica cururi ïarã, “Mata deco ariroca,” arãa mña. Mña eropa arĩra pũhrũ deco ahraa. <sup>55</sup> Eropirã surgue miruñe aricũ “Asirinũ árĩroca,” arãa mña. Mña eropa arĩra pũhrũ irinũ asia. <sup>56</sup> Mña gũyaricurã ãhraa. Yebare ïarã, umarore ïarã “Õpa waroca,” arĩ masia mña. Õarinũ árĩborore, ñerinũ árĩboro sãre masia mña. ¿Eropa ðaro masiquererã ta, duhpĩrã dohpague yu Goãmũ turari mera yu mũare ïhmuquerecũ ta ne iirire ðaro masibeari mña? arĩpũ Jesu.

*Mũare ïhaturigũ mera mña gamequeãrare mña basi amuque, arĩ wererũ Jesu*

*Mt 5.25-26*

<sup>57</sup> Eropa arĩtuhaja ðpa arĩ werenemopũ:

—¿Mña diaye iiburire masibeari mña dohpa? <sup>58</sup> Gajigũ mũre weresãgũ wagũ dipuwaja moadoreri wihigue wadorebocumi. Erogue ejaboro core “Dipaturi mũre eropa iisome,” arĩ game amuque. Mũhũ ïgũre amubiricũ mũre ïgũ dipuwaja moadoreri wihigue aĩgãbocumi mũre. Eropigũ dipuwaja moadoregũpũ mũre surarare ïgũ wiacũ, mũre surara peresu iirãcoma. <sup>59</sup> Mũre arĩgũ iiaa. Ne erã wajayedorerare mũ wajayephocũgue wirigũca mũhũ, arĩpũ Jesu.

## 13

*Mña ñeri iirare bujawere, ðarire gohrotoque, arĩ buherũ Jesu*

<sup>1</sup> Irisubure bajamerãgã masa Jesure ðpa arĩ wereñorã:

—Galilea majarã Goãmũre waibũgũre wejẽ, erã soe muju umupe-orisubu Pilatopũ erãre wejẽpũ. ïgũ eropa wejẽcũ waibũgũ di mera masa di morera wayoro, arĩ wereñorã erã Jesure.

<sup>2</sup> Erã eropa weretuhajacũ Jesu yũhrĩpũ:

—¿Galilea majarã Pilato ïgũ wejẽnirã mũrare dohpa arĩ pepiri mña? ¿Erã eropa sĩrirã gajirã Galilea majarã tauro ñerã árĩra dipuwaja sĩriyuri? <sup>3</sup> Árĩbeaa. Mũare arĩgũ tiiaa. Mũapũ ñerire bujawerebirã, ðaripũre gohrotobirã, mña sã sĩrirã peamegue warãca. <sup>4</sup> Eropirã sohõ árĩnirã diez y ocho masa Siloé waĩcũri wihi umari wihi erã weca yuribeja wejẽpehoyoro. ¿Eropa wa sĩrirã gajirã Jerusalén majarã tauro ñerã árĩra dipuwaja sĩriyuri mña pepicũ? <sup>5</sup> Árĩbeaa. Mũare arĩgũ tiiaa. Mña ñerire bujawerebirã ðaripũre gohrotobirã, mña sã sĩrirãca. Eropirã peamegue warãca, arĩpũ Jesu erãre.

*Higueragũ dũca maridigũ queorire wererũ Jesu*

<sup>6</sup> Eropa arĩtuhaja, Jesu i queori mera wererũ erãre:

—Pohe opũ ïgũ pohegue ïgũ higueragũre opapũ. Eropigũ ïgũ irigũ dũcare amagũ waripũ. Bocabiripũ. <sup>7</sup> Bocabirinijagũ ïgũ iri pohe mohmegũre wererũ. “Peeque yũre. ðhre bojori gohra higueragũ dũcare amaraa. Dũca mara. Irigũ dũca maricũ irigũre pa cõãcãque. Irigũ yaha pohe árĩcũ gajigũre otemasibea,” arĩpũ pohe opũ mohmegũre. <sup>8</sup> ïgũ eroparĩcũ peegũ mohme coregũ ðpa arĩpũ: “Opũ, irigũ yuju bojori gohra niguinĩporo. Yũhũ irigũ gubuyere seatu nujatu ïigũra. Tuhaja waibũgũ gũra mera iri gobere yaagũra. <sup>9</sup> Yũ

eropa iira pũhrũ irigũre gaji bojori dũcacũcũ ðaroca. Dũca maricũ mũhũ padoregũca,” arĩpũ mohme coregũ pohe opũre, arĩ werepũ Jesu.

*Sabadonũ Jesu dorecũgore ðago iipũ*

<sup>10</sup> Irisubure Sabadonũ Jesu judio masa buheri wihigue buhegũ iipũ. <sup>11</sup> Ero pũriri dorecũgo diez y ocho bojori gohra pũriri dorecũgo arĩpo. Eropigo opatũ niguigo arĩgo, diaye niguimasibirĩpo. <sup>12</sup> Igo eropa arĩcũ ĩagũ Jesu igore ĩha, piyupũ:

—Noméo, mũ dorecũri pehrea wahabũ, arĩ piyupũ Jesu.

<sup>13</sup> ĩgũ piyura pũhrũ igore ĩgũ mohmepicũ mata igo diaye niguigo wapo. Eropa wago “Goãmũ turagũ, ðagũ aħrimi,” arĩ Goãmũre umupeopo igo. <sup>14</sup> Jesu igore Sabadonũ arĩcũ ĩgũ ðago igore iicũ ĩagũ iri buheri wihi opũpũ ĩgũ mera guarũ. Eropa guagũ ĩgũ masare ðpa arĩpũ:

—Seis nũri aħraa mari mohmerinũri. Eropirã mũa dore ðarã arĩdiarã irinũrire taudorerã arique. Sabadonũre mari soorinũre irire iibiricãro gahmea, arĩpũ wihi opũ.

<sup>15</sup> ĩgũ eroparĩcũ Jesu ðpa arĩ yũhripũ:

—Mũa gũyaricũrã aħraa. Mũa wecũare, burro sãre oparã Sabadonũ arĩquerecũ erã diriradare pã, erãre aĩ buha ihridorea. <sup>16</sup> Dohpague igore Abrahã mũrũ acaweregore watĩ diez y ocho bojori gohra igore dorecũcũ iimi. ¿Sabadonũ arĩcũ igore ðago iidorebeari mũa? arĩpũ Jesu.

<sup>17</sup> ĩgũ eroparĩcũ erãpũ gũhyasiũro wañorã. Eropirã gajirãpu arĩpehreri Jesu iirare ĩha mucubiriñorã.

*Mostaza coye queorire werepũ Jesu*

*Mt 13.31-32; Mr 4.30-32*

<sup>18</sup> Eropigũ Jesu werepũ daja:

—¿Goãmũ masa tauro opũ ĩgũ arĩri werediacũ ñeheno iro dopa aħriri mũa pepicũ? I werenigũ queoriñe mera weregũra yũhũ. <sup>19</sup> Mostazayegã iro dopa aħraa. Iriyegãre oteri masũ yujugũ ĩgũ ya pohegue otemi. ĩgũ otera pũhrũ ðaro puhria. Eropiro yucũgũ wũadigũ wahaa. Eropa wacũ mirimagũ porã bajarã irigũ dũpurigue suhri suama. Eropa ta mũmaro majagũ mari Opũre masirã bajamerãgã erã arĩmũhtaquererã pũhrũguere erã bajarã warãcoma, arĩpũ Jesu.

*Pan bũgari queorire werepũ Jesu*

*Mt 13.33*

<sup>20</sup> Eropigũ dipaturi Jesu werenigũ queoriñe mera buhepũ:

—¿Goãmũ masa tauro opũ ĩgũ arĩri werediacũ ñeheno iro dopa aħriri mũa pepicũ? <sup>21</sup> Pan bũgacũ iiburi iro dopa aħraa. Yujugo nomeo panre ĩgo pan bũgacũ iiburi pohgare merogã moremo trigo pohga mera. Igo eropa iicũ pan bũgacũ iiburi pohga merogã arĩquerero trigo pohgare ðaro seyapehrea wahaa. Eropa ta mũmaro majagũre mari Opũre bajarã masa masirãcoma, arĩpũ Jesu.

*Miri disiporogã queorire werepũ Jesu*

*Mt 7.13-14, 21-23*

<sup>22</sup> Eropi Jesu paga macarigue, mũta macarigãgue buhegã, Jerusaléngue ejabu iipũ. <sup>23</sup> ĩgũ eropa warisubũ masũ Jesure ðpa arĩ serẽpipũ:

—Opu, ¿bajamerāgā dihtare peamegue wabonirāre Goāmū taugūcuri erā ĩgu pohro waboro dopa? arĭpu ĩgu Jesure.

Īgu eroparĭcū Jesu werenigui queoriñere buhegu ōpa arĭ werepu:

<sup>24</sup> —Yū mūare ōpa arāa: Bajarā Goāmū pohrogue wadiaquererā wamasisome. Īgu pohro waburi miri disiporogā ñajaro dopa āhraa. Eropirā mūa i disiporogāre turaro ñajadiarā iro dopa ta ĩgu yare iique. <sup>25</sup> Ōpa iigūcumi Goāmū bajarā masare. Īgu wihi opu iro dopa āhrimi. Wihi opu wahgā, disiporore bihagūcumi. Īgu eropa iicū disiporogue mūa niguirā disiporo biharisere doterāca. Doterā ōpa arĭrāca. “Opū, disiporore pāgūque guare.” Mūa eroparĭcū wihi opu yuhriḡūcumi. “Mūa aridirore masibea yahu. Eropigu mūare masibea,” arĭ yuhriḡūcumi, <sup>26</sup> Īgu eroparĭcū mūa yuhrirāca. “Mū mera gua baha, ihribū. Gua ya maca buhebu mūhu,” arĭrāca mūa. <sup>27</sup> Mūa eroparĭcū ĩḡupu yuhriḡūcumi. “Mūa aridirore masibea. Árĭpehrerā mūa ñeri iinirā yū pohro aribiricāque,” arĭḡūcumi wihi opu. <sup>28</sup> Eropi Abrahāre, Isaare, Jacobore, árĭpehrerā Goāmū ya weremūhtanirāre Goāmū ĩgu opu árĭrore erā árĭcū ĩarā, mūa disiporogue cóanirā árĭrā burigā oerāca. Eropirā mūa turaro bujawererā, mūa ḡūcūre cūridihurāca. <sup>29</sup> Irisubure norte majarā, sur majarā, abe mārĭriro majarā, abe ñajaro majarā Goāmū ĩgu opu árĭroguere eja, mesa pohro doarācoma. <sup>30</sup> Dohpague árĭrā pohro majarā árĭrā irisubure oparā árĭrācoma. Eropirā dohpaguere “Oparā āhraa,” arĭrā irisubure pohro majarā árĭrācoma, arĭpu Jesu.

*Jerusalén majarāre burigā mahipu Jesu*

*Mt 23.37-39*

<sup>31</sup> Irisubure bajamerāgā fariseo masa Jesu pohrogue ejarā, ĩḡure wereñorā:

—Herode mūre wejēdiami. Eropigu gajipu waque mūhu, arĭñorā erā ĩḡure.

<sup>32</sup> Erā eroparĭcū Jesupu yuhripu:

—Herode ḡuyaricūḡu āhrimi ĩgu. Ōpa arĭ wereque ĩḡure: “Jesu watēare cóḡu iimi. Eropigu dorecurāre ōarā iigu iimi. Irire dohpagāre, ñamigā sāre iigūcumi. Eropigu ñamigā core mohmetūḡūcumi,” arĭ wereque Herodere. <sup>33</sup> Eropigu dohpagāre, ñamigāre, ñamigā core sāre Jerusalēngue curigu wagura. Ero yure Goāmū yare weremūhtagure wejērācoma masa. Goāmū yare weremūhtagure erā wejēbupure Jerusalēngue árĭro gahmea. Eropigu yure i maca ta dujaro gahmea.

<sup>34</sup> “Mūa Jerusalén majarā, mūa acawererā mūra Goāmū ya weremūhtanirāre wejēmūrinirā árĭma. Eropirā Goāmū obeonirāre utā mera deamūrinirā árĭma. Cāreña buro igo porāre igo quēdūpuri mera igo coā oyaro dopa ta bajasuburi opadiaribu mūare. Mūapu irire yure ne gamebiribu. <sup>35</sup> Dohpaguere mūa árĭri maca cóāra maca árĭroca. Diaye arĭḡu tiiaa mūare. Pūhrū dujarigūca daja yahu. Eropa yū dujaricū ĩarā mūa yure Goāmū turari mera arḡu “Ōaro arĭporo,” arĭrāca. Yure mūa irire arĭboro core dipaturi yure ĩasome mūa, arĭpu Jesu.

## 14

*Dorecugure ðagu iipũ Jesu*

<sup>1</sup> Gajinũ erã soorinũ Sabadonũ árĩcũ fariseo masa oparã mera majagu ya wihigue Jesu bagu wapũ. Iri wihi árĩrã ĩgure ĩhanũrusiañorã. <sup>2</sup> Eropigu ñigagu bijigu ĩgu pohrogue ejaũ. <sup>3</sup> Eropigu Jesu judio masare buherãre, fariseo masa sãre serẽpipũ:

—¿Mari soorinũre dorecugure ðagu iidoreri Goãmu yare erã gojarapũ? arĩpu Jesu.

<sup>4</sup> ĩgu eropa arĩ serẽpiquerẽcũ ta erã yũhribiriñorã. Erã yũhribircũ ĩagu Jesu ñigagu bijigũre ðagu iipũ. Tuhajanugu, “Waque,” arĩpu ĩgũre. <sup>5</sup> Eropa iituhagu erãre serẽpipũ daja:

—¿Mũa yagu burrore o mũa yagu wecũre gobegue yuhridijadigure mata aĩ wiubeari mũa mari soorinũ árĩquerẽcũ? arĩpu Jesu.

<sup>6</sup> ĩgu eropa arĩquerẽcũ ta erã ĩgu serẽpirire yũhrimasibiriñorã daja.

*Mojoto dirirogue sihubeonirãre werepũ Jesu*

<sup>7</sup> Fariseo masũ ya wihi árĩgu iri wihi majagu ĩgu sihubeonirã oparã doarire erã beyemũhtacũ ĩapu Jesu. Eropa ĩatuha ire werepũ árĩpehrerãre:

<sup>8</sup> —Mojoto diriri bosenu árĩcũ ĩgu mũare sihubeocũ, ĩgu ya wihigue eja oparã doarire beye doabircãque. Mũa tauro gũhyadiarãre sihuboñumi iri wihi opu. <sup>9</sup> ĩgu eropa iicũ mũa oparã doarire doacũ “Oã gũhyadiarãre mũa doarire oque,” mũare arĩbocumi wihi opu. ĩgu eroparĩcũ mũa gũhyasiuro dujarãca. Eropirã bu árĩrã doarire doarã warãca. <sup>10</sup> Eropirã wihi opu mũare sihubeocũ, bu árĩrã doarire doamũhtaque. Mũa eropa iicũ wihi opu mũare oparã doaripũre “Doarã arĩque,” arĩgũcumi ĩgu mũare. Mũa eropa wacũ gajirã ĩgu sihubeonirãpu mũare umupeori mera ĩarãcoma. <sup>11</sup> Yujugu ĩgu basi “Opu ãhraa,” arĩ pepigu bu árĩgu arĩgũcumi. Eropigu gajigu “Bu árĩgu ãhraa,” arĩ pepigu, gajirãre tarinũgadiabigu opu arĩgũcumi, arĩpu Jesu erãre.

<sup>12</sup> Eropa arĩtuha Jesu wihi opũre werepũ:

—Mũhu bosenu iigu mũ pohro árĩrãre, mũ pagu porãre, mũ acawererãre, doberi oparãre sihubircãque. Mũhu erãre sihucũ mũre erã sã sihu gamerãcoma daja. Eropa sihu gamerã mũre erã wajamorire wajayerãcoma. <sup>13</sup> Mũhu bosenu moagu mojomorocũrãre, curimasibirãre, yujupu guburu poyanirãre, cuiiri ĩhajabirãre sihubeoque. <sup>14</sup> Mũ eropa iicũ ĩagu Goãmu mũre ðaro iigũcumi. Erãpu mũre erã sihura wajamorire wajayemasibeamã. Eropigu ðarã sĩrinirã erã masa mũriarisubu árĩcũ Goãmũpu mũre wajayegũcumi, arĩpu Jesu wihi opũre.

*Wũari bosenu iira queorire werepũ Jesu*

<sup>15</sup> ĩgu eroparĩcũ peegu gajigu bari mesa pohro doadigu Jesure werepũ:

—Goãmu ĩgu opu árĩro ĩgu bari mesa pohro doarã turaro mucubirirã árĩrãcoma, arĩpu ĩgu Jesure.

<sup>16</sup> ĩgu eroparĩcũ Jesu i queorire werepũ ĩgũre:

—Wũari bosenu iigu bajarã masare sihubeopũ. <sup>17</sup> ĩgu sihubeora pũhũ bosenu árĩrinũ gohra mohme coregũre ĩgu sihubeonirãre weredoregu obeopũ. “Ma, árĩpehrerire bosenu majã árĩburire

amutuhama. Eropigu mũare sihubeomi,” arĩ weredorepũ mohme coregũre. <sup>18</sup> Mohme coregũ ĩgũ eropa arĩ werequerecũ ta, ĩgũ sihunirãpũ “Wamasibirica,” arĩñorã erã. ĩgũ sihumũtadigũ ðpa arĩ werepũ mohme coregũre. “Dohparagã yebare asũabu. Eropigu iri yebare ĩagũ wabu iiaa. Eropigu wamasibirica. Umupeoque yũre. Yũre masiya mara, arĩque,” arĩpũ ĩgũ sihumũtadigũpũ mohme coregũre. <sup>19</sup> Gajigũpũ ðpa arĩpũ: “Wecũare pe mojtocũ majarã dohparagã ta asũabu. Eropigu wecũare queo ĩagũ wabu iiaa. Eropigu wasome. Yũre wamasiya mara,” arĩpũ ĩgũ sã. <sup>20</sup> Gajigũpũ ðpa arĩpũ: “Yũhũ dohpagã mojoto dihriabũ. Eropigu iri bosenũre wamasibirica,” arĩpũ ĩgũ mohme coregũre. <sup>21</sup> ĩgũ eroparĩcũ mohme coregũpũ dujaa wa, ĩgũ opũre erã arĩrare werepehopũ. ĩgũ eropa arĩ werecũ ĩgũ opũ turaro gua, ðpa arĩpũ mohme coregũre. “Yojaro mera maca árĩri marigue, mojomorocũrã erã árĩri marigue waque. Eropigu mojomorocũrãre, curimasibirãre, cuiiri ĩhajabirãre, poyari masare yojaro mera aĩgãrique erãre,” arĩpũ opũ. <sup>22</sup> Pũhrũ mohme coregũ werepũ ĩgũ opũre: “Opũ, mũ dorediro dopa ta masare sihuabu. Yũ eropa sihuquerecũ ta gajirã sã iri taribure sihajarãcoma,” arĩpũ mohme coregũ. <sup>23</sup> ĩgũ eroparĩcũ opũ ĩgũre dorepũ: “Campogue waque. Ero paga marigue, mũta marigãgue árĩrãre yaha wihigue aridoreque yaha wihi ðaro ũjtũrimaja ðaro. <sup>24</sup> Diaye arĩgũ iiaa mũre. Oã yũ sihumũhtanirã yũ barire ne merogã basome,” arĩpũ opũ, arĩ werepũ Jesu.

*Jesu mera wacũ diasa ãhraa*

<sup>25</sup> Irisubure bajarã masa Jesu mera wañorã. Eropigu Jesu erãre maji ĩha werepũ:

<sup>26</sup>—Yujugũ yũ buhegũ árĩdiagũ gajirã tauro yũpũre mahiro gahmea. ĩgũ pagũre, ĩgũ pagore, ĩgũ marapore, ĩgũ porãre, ĩgũ pagũ porãre ĩgũ basire ĩgũ mahiro tauro yũpũre mahiro gahmea. <sup>27</sup> Yujugũ yũ buhegũ árĩdiagũ yahare eropa iiniguigũ árĩgũcumi. Eropigu ĩgũ yahagũ ĩgũ árĩri dipuwaja ñero tariqueregũ ta yũre pihrisome. Eropã ñero taridiabigũ yũ buhegũ árĩmasisome. <sup>28</sup> Ire masiyuro gahmea mũare. ðpa ãhraa iri: Wihi iigũ ĩgũ ũmari wihi ĩgũ iiboro core wihi wajacũburire queomũhtanimi. Eropã iigũ ĩgũ wihire pehoborore masimi ĩgũ. <sup>29</sup> Wajacũburire queobigũ iri wihire ipehobiribocumi. Eropirã ĩgũre ĩarã wereyabocoma. <sup>30</sup> “Ĩhĩ ĩgũ wihire iigũ bocatiubirañumi,” arĩ wereyabocoma. <sup>31</sup> Opũ sã gajigũ opũ yarã mera erã gamewejẽbororo core, ĩgũ yarã surarare ĩgũ gamewejẽdorebororo core, ĩgũ yarã surarare queogũcumi. “¿Yũhũ diez mil surara mera gajigũ veinte mil surara opagũ mera gamewejẽgũ wagũ bocatiubocuri?” arĩ pepigũ queogũcumi ĩgũ. <sup>32</sup> Eropã queogũ “Bocatiũsome,” arĩgũ, gajigũ opũ ĩgũ surara mera gamewejẽgũ arigũ yoarogue ĩgũ aricũ ta, “Bocatiũsome,” arĩgũpũ “Gamewejẽbiricãrã,” arĩdoregũ obeobocumi ĩgũ pohro majagũre. <sup>33</sup> Eropirã yũ buherã árĩdiarã mũa iiburire mũare masiyuro gahmea. Eropirã mũa gamerire duhudiabirã yũ buherã árĩmasibea mũa, arĩ werepũ Jesu.

*Goãtũ yare iiniguuro gahmea, arĩ werepũ Jesu*  
Mt 5.13; Mr 9.50



<sup>34</sup> Eropigu eräre werenemopu:

—Moa ðaro acari áhraa. Iri moa ñeri wacũ dipaturi ðari iimasiya mara. <sup>35</sup> Iri moa mera duhpimaja masiya mara. Iri eropa árĩcũ iri moare cõaro gahmea. Eropirã mũa Goãmu yare iiniguibirã ne duhpimorã árĩbeaa. Ire ðaro peeque mũa, arĩpu Jesu.

## 15

*Oveja dederedigure bocara queorire werepu Jesu*

*Mt 18.10-14*

<sup>1</sup> Eropa gajinu bajarã wajasea corerã gajirã “Ñerã áhrima,” erã arĩrã mera Jesure peerã ariñorã. <sup>2</sup> Erã eropa iicũ ñarã fariseo masa judio masare buherã sã Jesure ñaturirã ðpa arĩñorã erã basi:

—Ihĩ ñerã mera wapicumi. Eropigu erã mera bahami, arĩ wereniguñorã erã erã basi.

<sup>3</sup> Erã eropa arĩ wereniguicũ Jesu i queori mera ðpa arĩ buhepu eräre:

<sup>4</sup> —¿Cien oveja opu yujugu oveja dederea wacũ ñagu dohpa iigucuri ñgu? Òpa iigucumi. Ñgu noventa y nueve ovejare erã bari campogue api, dederedigure amagu wagucumi. Ovejare bocagugue dujarigucumi. <sup>5</sup> Ñgure bocagu mucubirigucumi. Eropigu ñgure ñgu weca cõãpeo <sup>6</sup> ñgu ya wihigue aĩ dujaa wagucumi. Aĩ dujaja, ñgu pohro árĩrãre, ñgu acawererãre sihu gameneogucumi. “Yu oveja dederedigure bocabu. Eropirã yu mera mucubirique,” arĩgucumi ñgu eräre. <sup>7</sup> Oveja dederedigure ñgu bocadiro dopa ta ðpa arĩgu iiaa mũare. Yujugu ñerire iigu ñgu ñerire bujawerecũ ðaripare gohrotocũ ñarã Goãmu pohro árĩrã burigã mucubirima. Gajirãpu bajarã masa ðpa arĩ pepima: “Ñero iibea yũpu. Eropiro yu ñeri bujawereburi mara,” arĩ pepirima. Erã eropa arĩ pepicũ ñarã umaro majarã Goãmu pohro árĩrã mucubiribeama, arĩpu Jesu.

*Niyeruse dedererare bocara queorire werepu Jesu*

<sup>8</sup> Eropa arĩtuha gaji queori mera werenemopu:

—¿Diez niyeruseri waja pagariseri opago yujuse dederecũ duhpi-bocuri igo mũa pepicũ? Òpa iigocumo igo. Sihãgodirure sihãgo, wihire oha, ðaro amapehogocumo. Irisere bocagogue duhugocumo. <sup>9</sup> Irisere bocatuha, igo pohro árĩrãre, igo acawererãre sihupehogocumo. “Niyeruse yahase dedererasere bocabu. Eropirã yu mera mucubirique,” arĩgocumo igo. <sup>10</sup> Diaye arĩgu iiaa mũare. Eropa ta yujugu ñerire iigu ñgu ñerire bujawerecũ ðarire gohrotocũ Goãmu yarã anyuapu burigã mucubirirãcoma. Ñgu dederebodigu dederebeamu pare. Eropirã turaro mucubirirãcoma, arĩpu Jesu.

*Magu dederedigu pagu pohro dujajara queorire werepu Jesu*

<sup>11</sup> Eropa arĩtuha Jesu gaji queori mera werepu daja:

—Bũgu porã perã árĩñorã. <sup>12</sup> Duhyagupu ðpa arĩpu ñgu pagure: “Ahũ, mũa sĩrira puhru yure mu oburire yure opurumujuque,” arĩpu ñgu ñgu pagure. Ñgu eroparicũ erã pagu perãgue ta ñgu porãre guerepu ñgu oparare. <sup>13</sup> Bajamenurigã puhru duhyagupu ñgu ya árĩpehrere aĩ, yoarogue gaji yebague waha wapũ. Ero eja ñgu ya niyerure iisripehocãpu. <sup>14</sup> Ñgu iisripehora puhru iri yebare ne bari marinugayoro. Eropigu oaboapu. <sup>15</sup> Eropigu iri yeba maja mohmerire

amapu. Igu mohmerire bocacũ Igu opa yesea coregu acupu igure. <sup>16</sup> Eropigu Igu yeseare ejo, erã barire badiaripu Igu sã. Igu eropa badiaquerecũ ta ero majarã igure barire obiriñorã. <sup>17</sup> Eropi igure ero guñari ariyoro pare. “Yu pagure mohme corerãpu pagari barire opacoma. Erã ba duhari sã pagari árica. Erã òaro áririsubu yupu ohõ árigu oaboagu iiaa. <sup>18</sup> Dohparagã yu pagu pohro dujagura. Yu pagu pohrogue ejagu òpa arigura igure: ‘Ahu, Goãmure ñero iiaabu. Mu sãre ñero iiaa. <sup>19</sup> Ñegu ãhraa. Eropigu mu magu diaye dopa ãabita yure pare. Mure mohme corerã dopa ta ãaque yure,’ arigura yu pagure,” arĩ pepipu Igu. <sup>20</sup> Eropa arĩ pepigu wahgãnugaja, Igu pagu pohrogue dujaa wapu. Erogue Igu ejadigu Igu dujaricũ Igu pagupu igure yoarogue Igu áricũ ta Igu magure iha masipu.

“Igu eropa eracũ ãagu Igu magure mojomoro ãapu. Mojomoro ãagu igure oma bocatĩri pabua, Igu wayuporãre mimipu Igu pagu Igu magure. <sup>21</sup> “Ahu, Goãmure ñero iiaabu. Mu sãre ñero iiaa. Ñegu ãhraa yuha. Eropigu mu magu diaye dopa ãabita yure pare,” arĩpu Igu Igu pagure. <sup>22</sup> Igu eroparicũ peequeregu ta Igu pagupu mohme corerãre sihupu. “Yojaru, òariñe suhrirore aigãrique. Eropirã yu magure sãque. Sãtuha Igu mojtore sãri berore sã, Igu guburire zapature sãque. <sup>23</sup> Sãtuha diicugu wecure wejẽque. Bosenu iirã. <sup>24</sup> Ihĩ yu magu sirigu dopa ta waha wami. Eropa waqueregu ta dohpaguere ojocarimi Igu. Dederedigu dopa árdigure dohpaguere bocabu. Eropirã bosenu iirã,” arĩpu Igu pagu. Igu eropa arĩra puhru bosenu iinugañorã erã.

<sup>25</sup> “Irisubure Igu tĩgupu pohegu arĩpu. Pohegu árdiguru dujarigu wihi pohro eragu, erã bayarire peepu Igu. <sup>26</sup> Peegu yujugu mohme coregure sihubeo igure serẽpipu Igu: “¿Dohpa iirã bayarã iiarĩ?” arĩpu Igu mohme coregure. <sup>27</sup> “Mu pagu magu dujarami. Igu òagu dujaracũ mu pagu diicugure wecure wejẽdoreami,” arĩ yuhripu mohme coregu. <sup>28</sup> Igu eropa arĩ werecũ Igu tĩgupu burigã guagu wihigue ñajabiripu. Igu eropa ñajabiricũ ãagu Igu pagu wiriri, “Ñajarique,” arĩ turaro sihuripu Igu magure. <sup>29</sup> “Peeque, ahu. Yuhu yoari boje mure mohme coregu dopa ta itamurabu. Eropigu mu dorerire ne yujusubu tarinugabirimurabu. Yuhu mure mohme corequerecũ ta yupure ne obirabu muhu. Ne yujugu waibugure obeaa muhu yure yu mera majarã mera yu bosenu iicã. <sup>30</sup> Eropigu ihĩ mu magupu ñerã nome mera mu yare iisiripehodigu árimi. Irire iisiripehotuha, Igu wihigue Igu dujaracũ diicugu wecure wejẽabu muhu Igu babure,” arĩpu Igu tĩgu Igu pagure. <sup>31</sup> “Mahgu, muhu yu mera áripheerineri ãhraa. Eropiro áripheereri yaha mu ya dihta ãhraa. <sup>32</sup> Mu pagu magupu siridigu dopa ta wahãmi marire. Eropi Igu dohpaguere ojocarigu ãhrimi. Igu dederedigu dopa ta wahãmi. Igu eropa wara puhru dohpaguere igure bocabu. Eropiro Igu dujaracũ mari bosenu ii mucubiricũ õhaa,” arĩpu Igu Igu magure, arĩpu Jesu erãre iri queorire weregu.

## 16

*Niyeru dibu coregu queorire Jesu werepu*

<sup>1</sup> Eropi i queorire ĩġu buheräre werepü Jesu:

—Doberi opü ya niyerure dibu coreġu niyerure ĩġu ðaro dibubiricü ĩaġu gajigüpu weresäpu doberi opüre. “Īġu mü ya niyerure iisirigü iimi,” arĭ weresäpu ĩġure. <sup>2</sup> Īġu eropa weresäcü pee niyeru dibu coreġure sihubeopü. Eropigü ĩġu eracü ĩaġu ĩġure opü werepü. “Gajigü mü yaha niyerure iisiririre wereami yäre. Eropigü yahare dibugü dohpaguere árĭsome mühu. Eropigü yahare mü iirare werepeho gojaque. Mure cóaġu iiaa,” arĭpu ĩġu opü ĩġure. <sup>3</sup> ĩġu eropa arĭra pührü ðpa arĭ pepipü dibu coreġu ĩġu basi: “Yü opü yäre cóäbu iicumü. Yühu turabeaa. Eropigü turaro mohmerire bocatiubeaa. Eropigü gajiräre niyeru serĕġu guhyasütariaro tarigüca yühu. ¿Eropigü dohpa iigücuri yühu? <sup>4</sup> Dohpague tamerare yu iiburire masia yühu. ðpa yu iicü yu mohmeri maricü erä yu itamurä árĭrācoma. Eropirä erä ya wirigue ñajadorerācoma yäre,” arĭ pepipü ĩġu. <sup>5</sup> Eropa arĭ pepigü ĩġu árĭpehrerä ĩġu opüre wajamoniräre sihubeopü. Sihubeotuha eramuhtagure ðpa arĭ serĕpipü ĩġu. “¿Yü opüre dipĕ wajamori mühu?” arĭpu ĩġu. <sup>6</sup> ĩġu eroparĭcü wajamogüpu yühripü. “Cien tambore uyure olivo waĭcädigü maja uyure wajamoa ĩġure,” arĭ yühripü ĩġu. ĩġu eropa arĭ werecü dibugüpu ðpa arĭ werepü. “Ohö ähraa mü wajamorire gojaturapü. Doaque. Eropigü mü wajamorire deco mera aĭ, deco mera gojatuque,” arĭpu niyeru dibugü wajamogure. <sup>7</sup> Eropa arĭtuhaja gajigü wajamogure serĕpipü ĩġu. “¿Müca dipĕ wajamori?” arĭpu daja. “Cien aju trigo ajure wajamoca yühu,” arĭpu wajamogü dibugure. “Ohö ähraa mü wajamorire gojaturapü. Mü wajamorire ochenta goja amuque,” arĭpu dibugü. <sup>8</sup> ĩġu eropa ðaro guyamehrecü ĩaġu “Īhĭ guyamehregü árĭcumi,” arĭ pepipü ĩġu opü niyeru dibugure. Inu majarä Goämü gamebirä erä yare güya amurare erä niyerure erä diburare Goämü yarä tauro masicoma erä, arĭpu Jesu.

<sup>9</sup> Eropa arĭtuhaja Jesu werenemopü:

—Eropigü müare arĭġu tiiaa. Müa oparire, i yeba majare momorocuräre müa ocü, eräpu müare mahirācoma. Müa eropa iicü müa opara pehrera pührü umusigue müa ejacü erogue müare ðaro mahirācoma.

<sup>10</sup> “Bu árĭrā ya mohmerire queoro iirä oparä ya mohmeri säre queoro iirāca. Bu árĭrā ya mohmerire queoro iibirä oparä ya säre queoro iibirāca. <sup>11</sup> Eropirä i yebague müa opari mera müa ðaro iibirä Goämü müare iidoreri säre ðaro iisome müa. <sup>12</sup> Eropirä gajigü yare müa ðaro iibasabiricü ĩaġu müa ya árĭburire osome müare.

<sup>13</sup> “Yujugü Goämüpare guñagü burigä gohra niyerupüre guñabeami. Niyerupüre burigä guñagü Goämüpare guñabeami. Eropigü niyeru dihtare gameġu árĭġu Goämüpare mucubiricü iibeami. Goämü säre niyeru säre yujuro mera gametarima masiya mara müare. Niyerure gametarigü Goämüpare umupeomasibeami, arĭpu Jesu.

<sup>14</sup> ĩġu eroparĭcü peerä fariseo masapü ĩġure wereyañorä. Eräpu niyerure gametariñorä. Eropirä wereyañorä. <sup>15</sup> Erä wereyacü peegü Jesu eräre werepü:

—Masa erä ĩhurore müa ðaro iiraa. Müa eropa iicü, “Óarä diaye ta iirä ährima,” arĭrima masa müare. Goämüpu müa pepirire masimi.

Masa “Ōatariama,” erā arīrāre Goāmupū gajiropa arī pepimi, arīpū Jesu.

*Goāmū ĭgū dorerire, ĭgū opū árĩrĩre werepū Jesu*

<sup>16</sup> Eropa arītuhaja ōpa werenemopū Jesu:

—Ūu waĩyegū ĭgū eraboro core Moisere ĭgū apira doreri mera Goāmū marire doreami. Goāmū ya weremūhtanirā mura erā gojara sā eropa ta árĩribū marire dorera. Dohpaguepūre Ūu ōari buherire, Goāmū opū ĭgū árĩrĩre buhemi. ĭgū eropa buhecū pee masa erā ejatuharo, erā turari mera Goāmū erā opū árĩcū gahmema.

<sup>17</sup> “Goāmū Moisere ĭgū apira dorerire erā ĭgū yare gojara sāre “Iri duhpiburi árĩbeaa,” ne arīsome. Ūmūsi, yeba sā pehrequerecū Goāmū ĭgū werediro dopa ta iipehogūcumi, arī werepū Jesu.

*Marapore cóārĩre werepū Jesu*

*Mt 19.1-12; Mr 10.1-12*

<sup>18</sup> Eropa arītuhaja ōpa arīnemopū Jesu:

—Masū ĭgū marapore cóāgū, gajigo mera marapocūgū ĭgū igo mera ñero iigū iimi. Tuhaja masū gajigū ĭgū cóādigo mera marapocūgū ĭgū sā igo mera ñero iigū iimi, arīpū Jesu.

*Doberi opū, gajigū Lázaro queorire werepū Jesu*

<sup>19</sup> Eropa i queori werepū Jesu:

—Yujugū doberi opū árĩñumi. Suhri wjacūre sañagū árĩñumi. Eropigū ūmūri nūcū ōari dihtare bagū, baja opañumi ĭgū. <sup>20</sup> Eropigū irisubure gajigū árĩñumi. ĭgū mojomorocūgū Lázaro waĩcūgū árĩñumi. ĭgū ĭgū dūpūre baja camicūgū árĩñumi. Eropirā gajirāpū ĭgūre doberi opū ya wihi disiporo aīgā apimūriñuma. <sup>21</sup> Eropigū mojomorocūgūpū doberi opū ĭgū ba duharire gamemūriñumi. “Ba duhari mera yapigūca yūhū,” arī pepimūriñumi ĭgū. Ero oyarisubu diayea ĭgū pohro eja ĭgū camire neremūriñuma. <sup>22</sup> Eropigū mojomorocūgū sīria wañumi. ĭgū sīria wacū, Abrahā pohrogue paraíso waĩcūrogue anyua ĭgūre aī mūriañuma. Eropigū doberi opū sā ĭgū pūhrū sīria wañumi. ĭgū sīricū ĭgūre yaañuma. <sup>23</sup> Eropiro doberi opūre peamegue ejagū burīgā teboricūñumi. Eropigū peamegue árīgū ūmūsigue árīgūre Abrahāre ĭhamujuñumi. Lázaro mūrū sāre ĭañumi. <sup>24</sup> ĭatuha ĭgū Abrahāre sihubeoñumi. “Ahū, Abrahā, mojomoro ĭaque yare. Peamegue yūhū ñero tarīgū iica. Yū eropa wacū Lázarore yare obeoque. Eropigū ĭgū decore ĭgū mujusīru mera yoso, yū nerore deco mera nehoporo. Irire yasuporo ĭgū,” arīriñumi doberi opū mūrū. <sup>25</sup> ĭgū eroparīquerecū Abrahāpū ĭgūre wereñumi: “Mahū, ojocarīgū árīgū árĩpehrerire ōarire opabū mūhū. Lázaropū ūmūri nūcū ñero tarimi. Dohpaguere mū ñero taricū ĭgūpū ōguere mucubiriri mera árĩcāgū iimi. <sup>26</sup> Eropiro mari watope ūhcāri waya āhraa. Eropirā ōre árĩrā eroguerē wamasibeama. Tuhaja erogue árĩrā ōre aridiaquererā ta ōguere arimasibeama,” arīñumi Abrahā doberi opū mūrū. <sup>27</sup> ĭgū eroparīcū doberi opū ōpa arīnemoñumi: “Acaweregū, turaro serēa mure. Lázarore yū pagū ya wihigū obeoque. <sup>28</sup> Yūhū yuju mojoto majarā pehrerā pagū porācua. Lázaro erāre wereporo. Ōre erā ñero tariroguerē aribiricāporo,” arīñumi ĭgū.

<sup>29</sup> Īḡu eroparīcū Abrahāpū yūhriñumi: “Goāmū dorerire Moise ĩḡu apirare, Goāmū weremūhtanirā erā gojarare opama mū pagū porā. Eropirā mū pagū porā irire ta peeporo,” arīñumi Abrahā. <sup>30</sup> Īḡu eroparīcū doberi opūpū yūhriñumi: “Ahū, Abrahā, irire opaquererā ta ōaro peesome. Lázaro sīridigū masadigū erā pohro ĩḡu ejacū ĩarā erāpū erā ñero iirire bājawere, ōaripūre gohrotorācoma. Eropirā ōarire iirācoma yū pagū porāpū,” arīñumi doberi opū mūgū. <sup>31</sup> Īḡu eroparīcū Abrahāpū wereñumi: “Mū pagū porā Moise ĩḡu apirapū ĩḡu wererare, Goāmū yare weremūhtanirā erā wererare peebirā āhrima. Eropirā Lázaro mūgū sīridigūgue masadigū ĩḡu arīquerecū ta erā Goāmū yare peesome,” arīñumi Abrahā, arī werepū Jesu masare.

## 17

*Ñerire iicū ḡuhya āhraa*  
Mt 18.6-7, 21-22; Mr 9.42

<sup>1</sup> Eropi Jesu werepū ĩḡu buherāre:

—Mūare ñeri iidoreri baja āhraa. Eropirā masa ñerire iima. Iri eropa arīquerecū ta masure ñerire iidoreḡupū ñetariaro tarigūcumi. <sup>2</sup> Gajigūre masa ĩḡu wūnūḡure wūariye utāyere dirisiu, wūariyague ĩḡure cóācū ñero wabocumi ĩḡu. Eropigū oāḡā mera majarāre ñerire iidoredigūpū wūariyague erā cóādigu tauro ñero tarigūcumi. ĩḡure buriḡā dipuwaja moasūḡucumi. <sup>3</sup> Ōaro iique mūa. Mūa acawereḡu ñero ĩḡu iicū ĩarā, “Iibita,” arīque ĩḡure. Eropirā ĩḡu ñero iirire ĩḡu bājawerecū, ōarire gohrotocū mūapū ĩḡu ñeri iirire cādijique. <sup>4</sup> Eropigū mūa acawereḡu yujunū ta siete suburi mūare ĩḡu ñero iibocumi. ĩḡu eropa iicū yujuyerisubure mūare, “Yū ñero iirire bājawerea. Ōarire gohrotogu iiaa,” ĩḡu arīcū iri nūcū suburi ĩḡu ñero iirire cādijique, arīpū Jesu.

*Goāmūre umupeorire werepū Jesu*

<sup>5</sup> Eropi Jesu buherā ĩḡure ōpa arīñorā:

—Goāmūre ḡuare ōaro umupeonemocū iique, arīñorā Jesure.

<sup>6</sup> Erā eroparīcū Jesu yūhripū:

—“Goāmūre diaye ta iigū āhrimi,” mūa arī umupeorā miriyegā mostazaye pēḡā mūa umupeoquererā irigū sicómoro waicūdigūre ōpa iimasia: “Irigū yucūḡu irigū basi tara duhagāporo. Wūariyague yuriñajaporo,” arīmasia mūa. Mūa eroparīcū irigū yucūḡupū mūa dorero dopa ta waroca, arīpū Jesu.

*Mohme coreḡu ĩḡu mohmerire werepū Jesu*

<sup>7</sup> Pūhrū i werenigui queoriñere werepū Jesu:

—Mūare mohme coreḡu poheguere tāra, mohmemi. ĩḡu ovejare ĩhadibumi. ¿ĩḡu eropa mohme ĩḡu dujaracū ĩarā dohpa arībocuri mūa ĩḡure? “Yojaro arique. Mū bari ohō āhraa,” ¿arībocuri mūa? <sup>8</sup> Eropa arībeaa mūa. ĩḡure ōpa arāa mūa: “Yū baburire iique. Eropigū yū baha ihricū yare coreque. Yū pūhrū mū sā baha ihrique,” arāa mūa mohme coreḡure. <sup>9</sup> Mohme coreḡu ĩḡu mūa mohmedorerire ĩḡu iicū ĩḡure “Ōhaa,” arībeaa mūa. ĩḡure mūa dorero dihtare iigū iicumi ĩḡu. <sup>10</sup> Mūa sā ĩḡu iro dopa ta āhraa. Goāmū ĩḡu dorediro dopa ta iipehorā

õpa arĩ pepique mua. “Gua mohme corerã dihta ãhraa. Gware ïgu dorero dihtare iibũ gua,” arĩ pepique mua, arĩpu Jesu ïgu buherãre.

*Diez gohra cami boarãre õarã iipũ Jesu*

<sup>11</sup> Gajinũ Jerusaléngue Jesu wagũ iipũ. Eropa wagũ Samaria yeba, Galilea yeba deco tarigãpu. <sup>12-13</sup> Gaji macague wari mague ïgu curicũ diez cami boarãpu ïgure bocatĩriñorã. Eropirã yoañarirogue niguirã ta piyuñorã:

—Jesu, opu, gware mojomoro ãaque, arĩñorã.

<sup>14</sup> Erã eroparicũ erãre ïha, werepu Jesu:

—Pahire mua dũpũre õaro warare ïhmurã waque, arĩpu erãre.

Ïgu eropa arĩra pũhrũ erã warisubũ erã dũpu õarã wañorã. <sup>15</sup> Eropigũ yujugũ erã mera majagũ ïgu dũpu õari dũpu wacũ ãagu, Jesu pohrogue maji dujariripu. Eropa dujarigũ turaro mera Goãmure umupeopũ. “Goãmũ turagu, õagu ãhrimi,” arĩ umupeopũ ïgu. <sup>16</sup> Eropa arĩgu ïgu Jesu guburi pohro mereja “Õhaa,” arĩpu. Ïgũpu Samaria majagũ arĩpu. <sup>17</sup> Ïgu eropa iira pũhrũ Jesu õpa arĩ werepu:

—Diez ãhrama masa õarã wanirã. ¿Gajirã nueve dũhyarãpu nohogue arĩcuri erã? <sup>18</sup> Ihĩ gaji yeba majagũ dihta Goãmure “Õhaa,” arĩgu dujarami. ¿Duhpirã gajirãpu aribirari? arĩpu Jesu.

<sup>19</sup> Eropa arĩtuha Jesu merejadigũre arĩpu.

—Wahgãnũgajaque. Waque. Mũ Goãmure umupeogu õagu wahabũ mahũ, arĩpu Jesu ïgure.

*Goãmũ ïgu opu arĩborore werepu Jesu*

*Mt 24.23-28, 36-41*

<sup>20</sup> Irisubure bajamerãgã fariseo masa Jesure serẽpiñorã:

—¿Dohparicũ Goãmũ opu arĩnũgagacuri? arĩ serẽpiñorã erã.

Erã eroparicũ Jesu yũhrĩpu:

—Goãmũ ïgu opu arĩnũgacũ mua ïhamasibea. <sup>21</sup> “Goãmũ ïgu opu arĩri ohõ ãhraa,” arĩmasibea. “Sohõgue ãhraa,” arĩmasibea. Goãmũ ïgu opu arĩri masa erã pepirigue ãhraa, arĩpu Jesu fariseo masare.

<sup>22</sup> Eropa arĩtuha Jesu ïgu buherãre õpa arĩ werepu:

—Pũhrũ yũhũ masũ Goãmũ ïgu obeodigu yũ i yebague dujariburire bũrigã gamerãca mua. “Ïgure yujunũ gohra mari ãacũ õaboaya,” arĩ quererã ta yũre ãanisome mua. Eropa mua gamequerecũ ta irisubure arisome yũhũ. <sup>23</sup> Gajirã mũare õpa arĩrãcoma. “Ïgure ãaque. Ïgu Cristo ãhrimi. Sihĩre ãaque. Cristo ãhrimi,” arĩrãcoma mũare. Erã eropa arĩquerecũ ta erãre peebiricãque. <sup>24</sup> Bupu umarore guñaña mariro miaro dopa ta guñaña mariro arigũca yũhũ masũ Goãmũ ïgu obeodigu dujarigũ. <sup>25</sup> Ire yũ iiboro core yũhũ turaro ñero tarigũca. Eropirã yũre dohpague majarã gamesome. <sup>26</sup> Noé ïgu arĩrasubũ majarã erã arĩmũridiro dopa ta yũhũ masũ Goãmũ ïgu obeodigu yũ dujariboro coregã eropa ta arĩrãcoma masa. <sup>27</sup> Noé ïgu arĩrasubure arĩpehrerã masa eropa baha, ihri iĩnũma. Eropirã mojoto dirimũriñũma. Noé wãadiru dohodirugue ïgu ñajaboro core Goãmũ erãre ïgu miupehoboro core iri arĩpehrerire masa mũraro ta iĩnũguicãmũriñorã. Eropa arĩroca yũ dujaricũ sãre. <sup>28</sup> Lote ïgu arĩrasubũ majarã sã erã arĩdiro dopa ta yũ dujaricũ arĩrãcoma masa. Lote ïgu arĩrasubure masa baha, ihri, asũ, dua, ote, wirire iĩnũma.

<sup>29</sup> Erã eropa iirisubu ïgu ya macare Sodoma waïcuri maca Lote ïgu waranu umaro maja peame ãju dijari erãre wejêpehocãyoro. <sup>30</sup> Yuhu masu Goãmũ ïgu obeodigu yuhu guñaña mariro yu dujaricũ eropa ta waroca irisubure.

<sup>31</sup> “Irisubure yujugu ïgu ya wihi weca maja puugue árïgu wihi pohecague ïgu yare aïgu ñajabiricãporo pobero mera duhribo ro dopa. Eropigu pohegue árïgu sã irisubure ïgu ya wihigue piharibiricãporo. <sup>32</sup> Lote marapo igo warare guñaque. <sup>33</sup> ïgu ya árïburi dihtare yujugu guñagu peamegue wagucumi ïgu. Yaha árïburipure yujugu guñagu árïpehrerinãri Goãmũ mera ðaro árïgucumi, arïpu Jesu.

<sup>34</sup> “Yuhu mũare werea. Irisubure yure umupeorãre beye game-neodoregũca. Eropigu eropa wari ñamire yuju camare perã caricũ yujugure yure umupeogure aïrãcoma yu mera árïbure. Gajigu yure umupeobigu ero dujagucumi. <sup>35</sup> Eropa ta nome perã erã ya ojuducare erã biucũ yujugore aïrãcoma. Yujugo ero dujagocumo. <sup>36</sup> Eropigu perã poheguere mohmerã árïcũ yujugure aïrãcoma. Yujugu ero dujagucumi, arïpu Jesu.

<sup>37</sup> ïgu eroparicũ ïgu buherãpu serëpiñorã.

—¿Nohogue eropa warocuri? arï serëpiñorã erã.

Erã eroparicũ Jesu yuhripũ:

—Masa erã ñeri erã iiniguirogue, erogue Goãmũ erãre erã ñeri dipuwaja moagucumi, arïpu Jesu.

## 18

*Wapeweyo igo dipuwaja moadorera queorire werepu Jesu*

<sup>1</sup> Eropi Jesu erãre Goãmũre serëburire weregu ðpa arïpu:

—Mũa Goãmũre serërã coreque ïgu yuhribo rore. Yoari boje corequererã ta bujawerebiricãque. ïgure serërã duhubita, arïpu Jesu.

<sup>2</sup> ïgu eropa arïrare buhebu i queori mera werepu erãre:

—Gaji macague masare dipuwaja moadoregu árïpu. ïgu Goãmũre umupeobiripũ. Eropigu masa sãre umupeobiripũ. <sup>3</sup> Eropigo wapeweyo sã erogue árïpo. Igo ïgu pohrogue duraro curigo ðpa arïpo: “Yure ñaturigure dipuwaja moadoreque mũhu. Yure arï cãhmotaque,” arï serëniuguicãpo igo ïgure. <sup>4</sup> Igo eroparicũ ïgu bajasuburi “Iisome yuhu,” arïripũ igore. ïgu eropa arïquerecũ ta igo bajasuburi ïgure eropa serëniuguicãgo garibotariaro iipo. Igo garibocũ ïagu ðpa arïpu ïgu basi. “Yuhu Goãmũre masa sãre umupeobea. <sup>5</sup> Yu eropa umupeobigu árïquerecũ ta igoru yure garibotaricãmo. Yure eropa garibogo yure gariboreacũ iicumo yure. Igo eropa arï weresãniuguicũ igore ñaturigure dipuwaja moadoregura,” arïpu dipuwaja moadoregu, arïpu Jesu.

<sup>6</sup> Eropa arïgu Jesu erãre werenomoru:

—Eropa arïpu ïgu ñegu dipuwaja moadoregu. ïgu eropa arïrare guñaque mũa. <sup>7</sup> ïgu tauro Goãmũpu ïgu yarãre umuri nucũ ïgure serërãre itamugucumi. <sup>8</sup> Mũare arïgu tiiaa. Goãmũ erãre mata iigucumi erã serërare. ¿ïgu eropa yuhrigu ïgu árïcũ ta yuhu masu Goãmũ ïgu obeodigu i yebague dujarigu, Goãmũre umupeorãre ïgure serërãre bocagucuri yuhu? arïpu Jesu.

*Perã Goãmũ mera erã wereniguira queorire werepũ Jesu*

<sup>9</sup> Eropi gaji queori mera werepũ Jesu. “Guapũ òarã àhraa. Gajirãpũ ñero iirã àhrima,” arĩ pepirãre i queori mera òpa arĩ werepũ:

<sup>10</sup> —Goãmũ ya wihigue perã ɔma Goãmũ mera wereniguirã wañorã. Yujugũ fariseo masũ árĩpũ. Gajigũ wajasea coregũ árĩpũ. <sup>11</sup> Eropigũ fariseo masupũ nuɔgaja, òpa arĩ serẽ niguiupũ Goãmũre: “Yũhu guya yajaricagu, diaye iibigu, nome mera ñero iigu árĩbeaa. Gajirã iro dopa árĩbeaa. Ihĩ wajasea coregũ iro dopa ñegu árĩbeaa. Eropigũ mũre Goãmũre òhaa, arãa. <sup>12</sup> Yũhu semanari nuɔu mũ ya árĩburire iigu pesubu ba duhua. Eropigũ diez niyuserire wajatagu yujuse mũre ohoa,” arĩpũ fariseo masũ Goãmũre. <sup>13</sup> Eropigũ wajasea coregupũ yoarogue niguiũ muhri siunugaja, igũ ñerire bujawere, ɔmarogue iabiripũ. Igũ ñerire bujaweredigu árĩgũ Igũ coretibi pa, wereniguiupũ Goãmũre: “Goãmũ, yũhu ñegu àhraa. Eropigũ mũhu yure mojomoro iaque,” arĩpũ Igũ Goãmũre. <sup>14</sup> Eropigũ mũare arĩgũ iiaa. Ihĩ wajasea coregupũ Igũ wihigue Igũ dujagu Igũ ñerire Goãmũ mera cóadigu dujapũ. Gajigũ fariseo masũ Igũ ñerire cóadigu árĩbiripũ. “Yũhu òagu àhraa,” arĩgũ Goãmũ Igũ iacũ ñegu árĩmi. “Yũhu ñegu àhraa. Eropigũ ya ñerire bujawerea,” arĩgũpũre Goãmũ òagu iigucumi igũre, arĩpũ Jesu.

*Majirãgã ya árĩburire Goãmũre serẽbasapũ Jesu*

*Mt 19.13-15; Mr 10.13-16*

<sup>15</sup> Eropi masa erã porã majirãgãre Jesure mohmepiñadoremorã igũ pohrogue aĩ erariñorã. Erã eropiicũ iarã Jesu buherã erãgãre aĩrarãre turiñorã. <sup>16</sup> Erã eropa turicũ iagu Jesu majirãgãre sihubeopũ igũ pohrogue. Sihubeo òpa arĩpũ igũ igũ buherãre:

—Majirãgã yũ pohrogue ariporo. “Waque,” arĩbita erãgãre. Erãgã Goãmũre erã opũ iro dopa pepĩma. Eropirã Goãmũ igũ opũ árĩroguere oãgã iro dopa pepirã àhrima eroguere. <sup>17</sup> Diaye arĩgũ iiaa mũare. Oãgã Goãmũre erã gamediro dopa ta mũa Goãmũre gamebirã igũ pohrogue wasome mũa. Mũa wabiricũ mũa opũ árĩsome igũ, arĩpũ Jesu.

*Doberi opagu Jesu mera wereniguiupũ*

*Mt 19.16-30; Mr 10.17-31*

<sup>18</sup> Igũ eropa arĩra pũhrũ judio masa oparã mera majagu Jesure serẽpi erapũ.

—Ne òagu, buhegu àhraa mũhu. ¿Yũ árĩpehrerinũri Goãmũ mera árĩdiagũ dohpa iigucuri yũhu? arĩpũ Igũ.

<sup>19</sup> Igũ eroparĩcũ Jesu yũhrĩpũ:

—¿Dohpa arĩronore yure “Òagu,” arĩ piyuri mũhu? Goãmũ dihta òagu àhrimi. <sup>20</sup> I Goãmũ dorerire masia mũhu. “Gajigũ marapo mera árĩbiricãque. Masare wejëbiricãque. Yajabiricãque. Guwabiricãque. Mũ pagũ ɔmarãre umupeoque,” arĩ doremi Goãmũ. Eropigũ irire iique mũhu, arĩpũ Jesu.

<sup>21</sup> Igũ eroparĩcũ igũ Jesure yũhrĩpũ:

—Iri árĩpehrerire majigugãgue ta iibu yũhu, arĩpũ Igũ.

<sup>22</sup> Igũ eroparĩcũ peegu Jesu igũre òpa arĩ werepũ:

—Yujuñe dihta duhyaa mũre mũ iiboro. Árĩpehreri mũ yare duagu waque. Eropa iigu árĩpehreri niyeru mũ wajatarire mojomorocurãre



oꝝue. Mũ eropa iicũ wũaro mũ ya ðari mũhũ opaburire umarogueere Goãmũ pohroguere áriroca. Eropa iituha yũ mera majagu áriũbu arique, arĩpũ Jesu ĩgũre.

<sup>23</sup> ĩgũ eroparĩcũ peegu ĩgũpũ baja doberi opagu áriũgũ irire mojomorocũrãre odiabigu, turaro bujawere waha wapũ. <sup>24</sup> ĩgũ eropa bujawerecũ ĩagu Jesu ðpa arĩ werepũ gajirãre:

—Doberi oparãre Goãmũ ĩgũ opu áriroguere erã wacũ diasataria. <sup>25</sup> Camello waĩcũgũ waibũgũpũ ĩgũpũ awiru gobegãgue ĩgũ ñajacũ masiya mara ĩgũre. Eropa ta doberi opagu Goãmũ mera ðaro áriũgũ ĩgũ opu áriroguere wacũ diasataria, arĩpũ Jesu.

<sup>26</sup> ĩgũ eroparĩcũ ĩgũre peerã ðpa arĩñorã:

—Cue. Mũ arĩro dopa ta diaye áriũcũ, ne yujugu masũre Goãmũ taubiribocumi ĩgũ pohro waborore, arĩñorã erã Jesure.

<sup>27</sup> Erã eroparĩcũ Jesu yũhripũ:

—Masa erã bocatiũro erã ðaro iira mera Goãmũ pohrogue wama-sibeama. Goãmũpũ masare peamegue wabonirãre taumasimi. ĩgũ áripehrerire ðaro iimasipehocãmi, arĩpũ Jesu erãre.

<sup>28</sup> ĩgũ eroparĩcũ Pedro ĩgũre ðpa arĩpũ:

—Peenique. Gũa áripehreri gũa yare apicãbu mũ mera warã, arĩpũ ĩgũ Jesure.

<sup>29</sup> ĩgũ eroparĩcũ Jesu ðpa arĩpũ:

—Diaye mũare arĩgũ iiaa. Áripehrerã mũa Goãmũ yare iimorã mũa wirire, mũa marasã nomere, mũa pagũ porãre, mũa pagũ sumarãre, mũa porãre mũa apinirã mũa wũaro wajatarãca dohpaguere. <sup>30</sup> Mũa apidiro tauro wajatarãca. Eropirã mũa sũrira pũhrũ áripehrerinũri Goãmũ mera áriũrãca mũa, arĩpũ Jesu erãre.

*Dipaturi Jesu ĩgũ sũriburiñere ĩgũ masa mũriaburiñere werepũ  
Mt 20.17-19; Mr 10.32-34*

<sup>31</sup> Eropi doce ĩgũ buherã dihtare aĩgã erãre werepũ:

—Peeque yũre. Dohpaguere mari Jerusalengue warã iiaa. Erogue yũre Goãmũ ĩgũ obeodigũre Goãmũ ya weremuhtanirã iribojegue erã werediro dopa ta eropa waroca yũre. <sup>32</sup> Ero masa yũre ñeha, judio masa áriũbirãre orãcoma yũre. Yũre erã ora pũhrũ erã yũre wereya, ñero arĩ, disico ehosũrãcoma. <sup>33</sup> Eropirã yũre tãratuhaja wejẽrãcoma yũre. Eropigu yũ sũrira pũhrũ uhrenũ waboro masa mũriagũca yũhũ, arĩpũ Jesu erãre.

<sup>34</sup> ĩgũ eroparĩcũ ĩgũ buherã ĩgũ wererire ðaro pee masibiriñorã. Goãmũ irire erãre masicũ iibirinipũ dohpa.

*Cuiri ĩhajabigũre ĩhajacũ ĩpũ Jesu  
Mt 20.29-34; Mr 10.46-52*

<sup>35</sup> Eropi Jesu sã Jericó waĩcũri maca pohrogue ejañorã. ĩgũ wari maha tũrogue yujugu masũ cuiri ĩhajabigũ doapũ. Niyeru serẽgu ĩpũ.

<sup>36</sup> Eropigu masa bajarã ĩgũ pohro aricũ peegu serẽpipũ ero áriũrãre.

—¿Duhpirã masa bajarã tarigãri? arĩ serẽpipũ ĩgũ.

<sup>37</sup> —Jesu Nazare majagu arĩgũ iimi, arĩñorã gajirã ĩgũre.

<sup>38</sup> Erã eropa arĩ werecũ peegu ĩgũ gaguĩnguĩnũgũpũ:

—Jesu, opu Davi mũrũ pãrami masare taubu, yũre mojomoro ĩaque, arĩ gaguĩnguĩpũ Jesure.

<sup>39</sup> Īḡu eroparīcū ĭḡu pohro árīrāpū “Ejarimaricāque,” arī turiñorā ĭḡure. Erā eropa arī turiquerecū ta ĭḡu ero core ĭḡu gaguiniguidiro tauro gaguiniguinemopū daja.

—Opū Davi mūrū pārami, yure mojomoro ĩaque, arī gaguiniguipū ĭḡu.

<sup>40</sup> Īḡu eropa gaguinigucū peegū Jesupū nuḡaja, “Sihubeoque ĭḡure,” arīpū. Īḡu eroparīcū erāpū cuiři ĩhajabigūre sihgāñorā. Erā eropa sihgācū ĭḡu Jesu pohrogue ĭḡu ejacū Jesupū ĭḡure serēpipū:

<sup>41</sup> —¿Dohpa yū ĩcū gahmeri mūhū? arīpū Jesu.

—Yū Opū, yure ĩacū ĩique, arīpū cuiři ĩhajabigū.

<sup>42</sup> —Īaque pare. Yure umupeonijagū, ḡagū wahaa mūhū, arīpū Jesu ĭḡure.

<sup>43</sup> Īḡu eroparīcū ta cuiři ĩhajabigū ḡaro ĩha wapū. Eropa ḡagū wanijagū ĭḡu Jesu mera wapū. “Goāmū turagū āhrimi,” arī umupeopū ĭḡu. Eropirā masa bajarā cuiři ĩhajabiridigū ĭḡu ḡagū wacū ĩarā, “Goāmū ḡagū, turagū āhrimi,” arī umupeoñorā erā sā.

## 19

### *Zaqueo Jesure bocatīripū*

<sup>1</sup> Eropii Jesu Jericógue eja, iri macague tarigābu ĩipū. <sup>2</sup> Doberi opū Zaqueo waīcūḡū wajasea corerā opū ero árīpū. <sup>3</sup> Eropigū ĭḡu Jesure “¿Nihino árīcuri?” arī ĩha masibu Jesure ĩadiaripū. Eropa ĭḡu ĩadiaquerecū ta ĭḡu yebagūḡā árīcū masa bajarā ĭḡugāre cāhmotacāñorā. <sup>4</sup> Eropigū ĭḡu masare omatarigā wa, sicómoro waīcūdigū yucūḡugue mūrībejapū Jesure ĩabu. Pūhrū ñarigā Jesu irigū pohro tarigābu ĩipū. Eropigū Zaqueo irigūgue coreḡū ĩipū. <sup>5</sup> Īḡu eropa corero watope Jesupū irigū gubuye ejanūḡaja, Zaqueore ĩhamuju ĭḡure werepū:

—Zaqueo, dohpaguere mū ya wihi dujagūra. Eropigū duru dijarique, arīpū Jesu.

<sup>6</sup> Īḡu eroparīcū Zaqueopū umūdiaro mera dijari, mucubiriri mera ĭḡu ya wihigue aridorepū Jesure. <sup>7</sup> Īḡu eropa bocatīricū ĩha, masa árīpehrerā erā basi ḡpa arī wereniguiñorā:

—Īhī Jesu ñegū ya wihigue curigū wadiami, arī wereniguiñorā árīpehrerā masa erā basi.

<sup>8</sup> Zaqueopū bocatīrituha ero nigui, Jesure werepū:

—Opū, peeque yure. Árīpehreri yahare deco mera mojomorocūrāre ogūra. Eropigū yūhū ḡajigūre cien niyuserire ḡūya aīdigū árīḡu, cuatro cientos niyuserire wajayenemogūra ĭḡure, arīpū Zaqueo Jesure.

<sup>9</sup> Īḡu eroparīcū Jesupū werepū ĭḡure:

—Dohpagāre mūre mū ya wihi árīrā sāre peamegue wabonirāre Goāmū tautuhami. Mū sā Abrahā mūrū acawereḡū ta āhraa. <sup>10</sup> Yūhū masū Goāmū ĭḡu obeodigū peamegue wabonirāre amagū arigū ĩibū. Eroque wabonirāre ḡaro taugū arigū ĩibū, arīpū Jesu Zaqueore.

### *Niyuseri oroseri queorire werepū Jesu*

<sup>11</sup> Eropi ĭḡure peerāre Jesu queori mera werepū daja. Merogā dūhyayoro Jerusaléngue ĭḡu ejaboro. Eropirā ĭḡure peerā ḡpa arī

pepiñorã: “Goãmũ dohpaguere opu árĩnũgabu iimi,” arĩ pepiriñorã erã. <sup>12</sup> Erã eropa arĩ pepicũ Jesu i queorire õpa werepũ erãre:

—Yujugũ gaji yebague yoarogue wabu iĩñumi. Eroguere ero majagũ erã tauro opu árĩgũ ãgure ãgũ ya maca majarã opũre acucũ wabu iĩñumi. Pũhrũ ãgũ ya wihigue dujarabu iĩñumi. <sup>13</sup> Nere ãgũ waboro corere diez mohme corerãre sihubeoñumi. Eropa sihubeogũ, ãgũ erãre yujurãyerire yujuse niyeruse orosere oñumi. Otuha wereñumi erãre: “Yũ maricũ i niyeru mera mũa wajatanemoburire amaque,” arĩñumi ãgũ mohme corerãre. <sup>14</sup> ãgũ ya yeba majarãpũ ãgure gamebirĩñuma. Eropa gamebirã ãgũ opu árĩbu wara pũhrũ gajirãre ãgure weredorerã obeoñuma. “Mũhũ gũa opu árĩcũ gamebeaa gũa,” arĩñuma erã weredorenirãpũ. <sup>15</sup> Eropa erã gamebiriqerecũ ta pũhrũ erã opu ñajañumi ãgũ. Eropa opu ñajatuha, ãgũ ãgũ ya wihigue dujarĩñumi. Eropa dujaragũ ãgũ mohme corerãre ãgũ niyeru mera erã wajatanemorare masibu, erãre sihubeoñumi. <sup>16</sup> ãgũ eropa sihubeora pũhrũ, eramũhtagũ ãgure wereñumi: “Opu, mũ niyeruse, mũ yũre orase mera diez seri wajatanemoabũ yũhũ,” arĩñumi mohme coregũ ãgũ opũre. <sup>17</sup> “Õaro iabũ mũhũ. Õagũ mohme coregũ ãhraa. Mũ merogã mera yũ dorero dopa iipehogũ árĩgũ dohpague diez macari majarã erã opu árĩbu wagũca mũhũ,” arĩñumi opu mohme coregure. <sup>18</sup> ãgũ pũhrũ eragũ ãgũ mera majagũ õpa arĩñumi: “Opu, mũ niyeruse, yũre mũ orase mera cinco seri wajatanemoabũ yũ sã,” arĩ wereñumi ãgũ opũre. <sup>19</sup> “Cinco macari majarã opu wagũca mũhũ,” arĩñumi ãgũ opu ãgure. <sup>20</sup> ãgũ eropa arĩra pũhrũ gajigũ mohme coregũ eraa werepũ: “Opu, mũ niyeruse ohõ ãhraa. Suhri gasiro mera oma, irisere dihbuabũ. <sup>21</sup> Mũhũ turaro mohmedoregũ ãhraa. Eropigũ gajirãre mohmedoreqereregũ oteri moogũ árĩqereregũ ta mũ dihta iri dũcare aĩa. Eropigũ mũre gũiabũ,” arĩñumi ãgũ opũre. <sup>22</sup> “Mũ yũre eropa arĩgũ ñegũ ãhraa. Yũre mũ eropa arĩri dipuwajare dipuwaja moagũra yũhũ. Yũhũ mũre turaro mohmedoregũ árĩcũ mũhũ yũre masia. Gajirã yare yũhũ aĩcũ yũhũ otebirira árĩqerrecũ iri dũcare yũ aĩgũ árĩcũ masituhabu mũhũ. <sup>23</sup> ¿Yũ eropa árĩcũ ãaqueregũ duhpigũ yũ orasere niyeru diburi wihigue dibubirari mũhũ? Irire erã wayura waja wajatanemoboaya mũhũ. Irire mũ iicũ dujaragũ wajatanemoboaya yũ sã,” arĩñumi erã opu. <sup>24</sup> Eropa arĩtuha ãgũ pohro niguirãre doreñumi: “Niyeruserere emaque ãgure. Diez seri opagure oque,” arĩñumi ãgũ opu. <sup>25</sup> ãgũ eroparĩcũ erãpũ wereñuma ãgure: “Opu, diez seri opagũ baja opatuhami,” arĩñuma erã ãgure. <sup>26</sup> Erã eroparĩcũ opu yũhriñumi: “Mũare arĩgũ iiaa. Árĩpehrerã wũaro oparãre onemogũra. Moorãpũre merogã erã opaquerrecũ ta erãre emagũra. <sup>27</sup> Dohpague tamerare yũre ãhaturirãre yũre erã opu árĩdorebirinirãre yũ pohro aĩgãrique. Eropirã yũ ãaro wejẽcãque erãre,” arĩñumi opu ãgũ mohme corerãre, arĩ werepũ Jesu.

### *Jerusaléngue ejapũ Jesu*

*Mt 21.1-11; Mr 11.1-11; Jn 12.12-19*

<sup>28</sup> Eropa arĩtuha Jesu gajirã core Jerusaléngue wagũ iipũ.  
<sup>29</sup> Jerusaléngue ejaboro coregã Olivo waĩcũdigũ utãgũ gubuyegue ejañorã pe maca árĩrogue. Yuju maca Betfagé gaji maca Betania

waĩcuyoro. Erogue ejaɣu ĩɣu buherã mera majarãre perãre obeogu Jesu ðpa arĩpu:

<sup>30</sup> —Si macague waque. Ero ejarã, burrogãre erã dirinugudigure bocajarãca. Gajirã ĩɣure ne peyanibeama dohpa. ĩɣure bocarã, ĩɣure diriradare pã, aĩgãribasaque yure. <sup>31</sup> Mũa eropa iicũ ĩagupu “¿Duhpirã burrore pãri?” ĩɣu arĩcũ peerã ðpa arĩ yuhrique ĩɣure: “Mari tĩɣu burrore gamebeoniami dohpa,” arĩ wereque ĩɣure, arĩ weredore obeopu ĩɣu buherãre perãre.

<sup>32</sup> ĩɣu eroparĩcũ erã perãpu ĩɣu obeodirogue ejañorã. Erã eropa ejaçũ Jesu arĩpehleri ĩɣu erãre arĩdiro dopa ta eropa wayoro. <sup>33</sup> Eropirã burrogãre erã pãcũ ĩɣugã oparã serẽpiñorã erãre:

—¿Duhpimorã diriradare pãri burrogãre? arĩ serẽpiñorã erã.

<sup>34</sup> —Mari tĩɣu burrogãre gamebeoniami, arĩ yuhriñorã erã.

<sup>35</sup> Eropirã ĩɣugãre burrogãre Jesu pohrogue aĩ ejañorã. ĩɣugãre aĩ ejatuhaja erã weca maja suhrire ĩɣu weca duhpeñorã. Eropirã ĩɣu weca Jesu ĩɣu mũribejacũ itamuñorã erã Jesure. <sup>36</sup> Jesu ĩɣu weca ĩɣu peyagu wacũ erã masa erã weca suhri sañari suhrire tuwea aĩ mague seõpi muhtañorã ĩɣu core. <sup>37</sup> Eropirã Jerusalén pohrogue eja, Olivo waĩcudigũ dijariri mague ejañorã. Erogue ejarã Jesu buherã bajarã arĩpehleri ĩɣu deyoro moarare, ĩɣu ðari ĩɣu iirare erã ĩarare guña mucubiri Goãmure ðaro wereniguinũgañorã. Goãmure “Õagu, turagu aħrimi,” arĩ gaguiniguiñorã. Eropirã burigã gaguinigui Goãmure umupeo ðpa arĩñorã:

<sup>38</sup> —Īre umupeorã. Ihĩ Goãmũ ĩɣu obeodigu, mari Opũ ðaro ariporo. Ũmaro majarã ðaro arĩporo. Goãmũ ĩɣu turagu arĩcũ arĩpehleri masiporo, arĩ umupeoñorã erã.

<sup>39</sup> Erã eroparĩcũ peerã fariseo masa bajamerãgã erã watope arĩrã Jesure wereñorã:

—Buhegu, mũ buherãre ejarimaricãdoreque, arĩñorã erã.

<sup>40</sup> Erãre yuhripũ Jesu:

—Mũare arĩɣu tiiaa. Oã yure umupeorã erã wereniguibiricũ utãyeripũ yure umupeoro dopa ta gaguiniboca, arĩpu Jesu erãre fariseo masare.

<sup>41</sup> Eropa arĩtuha Jesu Jerusalén pohrogue eja, iri macare ĩhabeogu orepu. <sup>42</sup> Őpa arĩpu ĩɣu:

—Jerusalén majarã, dohpague tamerare mũare ðaro arĩburire mũa masicũ ðatariaboya. Eropa arĩquerecũ mũa dohpaguere irire ne peediabirabu. Eropigu Goãmũ mũare irire masidorebirimi. <sup>43</sup> Mũare ĩhaturirã mũa arĩri macare cãhmotarãcoma. Eropa iirã erã mũare wiriaro iisome. <sup>44</sup> Irisubu erã mũa ya macare cõãpehorãcoma. Mũare mũa porã sãre wejẽrãcoma. Mũare ĩhaturirã ðaro weasirirãcoma mũa ya macare. Goãmũ peamegue wabonirãre mũare ĩɣu taubure yure mũa masidiabirabu. Mũa masidiabirira dipuwaja mũare ĩhaturirãre Goãmũ cõãdoregucumi mũa ya macare, arĩpu Jesu Jerusalén majarãre.

*Goãmũ wihigue ejapu Jesu  
Mt 21.12-17; Mr 11.15-19; Jn 2.13-22*

45 Eropi Jerusaléngue ejagu, Jesu Goāmũ wihigue ñaja warũ. Eropigu doberi duarãre iri wihigue bocajagu, erãre cohã wiucãpũ. Ōpa arĩpũ ĩgu erãre:

46 —Goāmũ yare erã gojarapũ ōpa áhraa: “Goāmũ arĩmi: Yaha wihi Goāmũ mera wereniguiwihi waĩcuroca,” arĩñuma ĩgu yare erã gojarapũ. ĩgu eropa arĩquerecũ ta mũapũ i wihire Goāmũ wihire duadoarã bu game yajarã iiaa, arĩpũ Jesu.

47 Īmũri nũcu Goāmũ wihigue Jesu buherũ. Eropirã pahia oparã, judio masare buherã mera, masa oparã sã, ĩgure erã wejẽburire guñamaañorã. 48 Masa arĩpehrerã ĩgure eropa peenigui, ĩgu buherire ōaro peenũrũrã arĩñorã. Erã eropa ōaro peenũrucũ Jesure wejẽdiarãpũ ĩgure erã wejẽburire bocabiriñorã.

## 20

*Jesure doredigure ĩgure serẽpiñorã*

*Mt 21.23-27; Mr 11.27-33*

1 Gajinu Goāmũ wihigue Jesu masare ōari buherire buhegu ĩpũ. ĩgu eropa buhecũ pahia oparã, judio masare buherã, mũrã mera ĩgu pohrogue erarã, ĩgure serẽpiñorã:

2 —Wereque guare. ¿Noa doreri mera eropa iiri mũhũ? ¿Nihino mũre Goāmũ wihigue arĩnirãre cóãdoreari? arĩñorã erã Jesure.

3 Erã eroparĩcũ Jesu yũhripũ erãre:

—Yũhũ mũapũre serẽpimũhtagũra. Wereque yũ sãre. 4 ¿Ñũ masare ĩgu waĩyecũ nihinopũ ĩgure waĩyedoremũriyuri mũa pepicũ? ¿Goāmũ doreyuri? ¿O masapũ doremũriyuri? arĩ serẽpipũ erãre.

5 ĩgu eroparĩcũ erãpũ erã basi game wereniguiñorã:

—¿Dohpa arĩ yũhrirãcuri mari? “Goāmũ Ñure doredigu arĩmi,” mari arĩcũ, “¿Goāmũ Ñure ĩgu dorequerecũ ta duhpirã ĩgu wererare peebirari mũa?” arĩbocumi Jesu marire. 6 Oã masapũ “Diaye ta Ñũ Goāmũ yare weremũhtadigu arĩmi,” arĩ pepima erã. Erã eropa arĩ pepirã maripũ “Ñũ ĩgu waĩyecũ Goãmũpũ ĩgure dorebiridigu arĩmi,” mari arĩcũ masapũ marire utã mera dearãcoma, arĩ wereniguiñorã erã erã basi. 7 Eropã arĩ wereniguituha erã Jesure yũhriñorã:

—Ñure waĩyedoredigure gua masibea, arĩñorã erã.

8 Erã eroparĩcũ Jesu yũhripũ:

—Irisubu tamerare yũ sã yũre doredigure werebeaa mũare, arĩpũ ĩgu erãre.

*Ñerã mohme corerã iira queorire werepũ Jesu*

*Mt 21.33-44; Mr 12.1-11*

9 Eropi Jesu queori moa ōpa arĩ buhenũgapũ masare:

—Yeba opũ arĩñumi. ĩgu ya pohere iguire oteñumi. Otetuha, iri pohere gajirãre deco mera apiñumi erã mohme corera waja. Eropã apigu erãre iri pohere ĩhadibudoretuhaja gaji yebague waha wañumi. Yoari boje deyobiriñumi. 10 Eropigu igui ñirisubu arĩcũ pohe opũ ĩgu pohro majagure pohere mohme corerã pohrogue obeoñumi. Pohe maja ĩgu oteri dũcare ĩgu ya sero majare aĩdoregũ obeoriñumi. Eropirã pohere mohme corerãpũ ĩgu pohro majagure bocatĩri pañuma ĩgure. Eropirã erã ĩgure iguitõrĩre obiriqererã dujadoreñuma ĩgure.

11 Eropigu pohe opu gajigu igu pohro majagure iri pohe maja ducare aïdoregu obeoriñumi daja. Eropirã pohere mohme corerã igu sãre pa ñero iñuma igure. Eropa iitua igu iri ducare obiriquerẽ dujadoreñuma daja. 12 Igure erã eropa iira puhru gajigu pohro majagure obeoriñumi daja. Eropirã mohme corerã daja igure cami moa, iri pohe turo cõacãñuma igure.

13 “Erã eropa iira puhru pohe opu õpa arĩ pepiriñumi: “¿Dohpa iigucuri yuhu? Õpa iigura. Yuhu yu magure yu mahigure obeogura. Erã igure umupeobocoma,” arĩ pepiriñumi pohe opu. 14 Eropirã igu magure igu obeodigu ejacũ ãarã mohme corerãpu erã basi õpa arĩ wereniguiñuma: “Ihĩ pohe opu magu ãhrimi. Igure wejẽrã. Eropiro i pohe mari ya pohe dujaroca,” arĩriñuma erã erã basi. 15 Eropa arĩtuhã pohe opu magure ñehã pohe turo aigã, wejẽcãñuma igure. ¿Ne pohe opu dujaragu dohpa iigucuri igu ya pohere mohme corerãre? arĩpu Jesu.

—Õpa iigucumi erãre. 16 Igũ pohere mohme corerãre wejẽgu, gajirãpũre pohere mohme corecoregucumi, arĩ yuhripũ Jesu igu basi.

Igu eroparĩcũ peerã masapu õpa arĩñorã:

—Marire eropa wabiricãporo, arĩñorã erã.

17 Erã eroparĩcũ Jesupu erãre ãha serẽpipũ:

—¿Goãmu yare erã gojarapũre õpa arĩra dohpa arĩro iiri mũa pepicũ?

Ihĩ Cristo utãye iro dopa ta ãhrimi. Masa Cristore gamebirãcoma. Erã igure gamebiriquerẽcũ Goãmu igure beye erã opu erãre taubu acumi, arĩ gojañuma.

18 Yare gamebirãpu yu dipuwaja moamorã arĩrã ñero tarirãcoma, arĩpu Jesu erãre.

*Oparã ya wajare wajayeburire gajirã serẽpiñorã Jesure*

*Mt 21.45-46; 22.15-22; Mr 12.12-17*

19 Igũ eroparĩcũ peerã judio masa buherã, pahia oparã sã “Jesu iri pohe opu queori mera ‘Erã ñerã mohme corerã iro dopa ãhrima,’ arĩgu marire weresãgu iicumi igu,” arĩ pepiñorã erã.

Eropa arĩ pepirã erã Jesure ñeadiarĩñorã. Eropa ñeadiaquererã ta masa Jesure gamerã mari mera guari arĩrã erã masare güi arĩñorã.

20 Eropa güirã Jesure erã ñeaburisubure corerã igure ãhanũñorã.

Igu ñero arĩ yuhricũ ãadiarã iiriñorã igure weresãmorã. Eropirã Jesure gajino serẽpidorerã obeoñorã guyarãre. Erãre diaye iirã dopa wereniguidoreñorã. Jesu ñero igu werenicũ peerã iri yeba majagu opure peresu iidoremorã iiriñorã. 21 Eropirã erã Jesure serẽpiñorã:

—Buhegu, diaye wereniguigu, guyarĩ marigu mũ arĩcũ gua masia. Eropigu opu arĩcũ sãre igu bu arĩgu igu arĩcũ sãre yujuropa ãhaa mũhu. Mũhu Goãmu yare diaye mũ buhecũ sãre gua masia.

22 Wereque guare: ¿Roma majagu arĩpehrerã tauro opu arĩgure gobierno majare marire wajayero gahmeri mũ pepicũ? ¿Mari doreripu irire wajayedoreri? arĩñorã erã Jesure.

23 Erã eroparĩcũ Jesu erã ñero iidiarire masigu erãre werepu:

—¿Duhpirã yu ñero wereniguicũ peediarĩ mũa? 24 Dohparagã niyerusere arĩque. Irisere ãarã, arĩpu.

Irisere erã arĩ eracũ ãagu õpa serẽpipũ Jesu:

—¿Nihino gohra waicũgu masu tuhyari irisere? ¿Noa waĩ tuhyari? arĩ serẽpipũ Jesu erãre.

—César, masa tauro opu waĩ ĩgu masu sã tuhyami iriseguere, arĩ yuhriñorã erã.

<sup>25</sup> Erã eroparĩcũ Jesu werepũ:

—Irisubu tamerare masa tauro opũre ĩgu yare oque. Goãmu yapũre Goãmũre oque, arĩpũ Jesu erãre.

<sup>26</sup> Eropirã masa erã peero Jesure ñero arĩ wereniguicũ iimasi-biriñorã erã. Eropirã erã Jesu yuhririre peerã erã peemaria wañorã. Eropa peemariarã, ejarimaria wañorã.

*Saduceo masa Goãmũ ĩgu sīrinirã masurire serẽpiñorã Jesure  
Mt 22.23-33; Mr 12.18-27*

<sup>27</sup> Eropi bajamerãgã Saduceo masa Jesu pohrogue erañorã. “Goãmũ sīrinirãre masusome,” arĩ pepirã árĩñorã Saduceo masa. Eropirã erã õpa arĩñorã ĩgure:

<sup>28</sup> —Buhegu, marire õpa arĩ gojañumi Moise: “Yujugu ĩgu tĩgu marapocũgu porã mariqueregu ta ĩgu sīricũ ĩagu ĩgu pagu magure ĩgu tĩgu marapo árĩdigore marapocũro gahmea. Eropa iigu ĩgu tĩgu mũru ĩgu porãcubodiro dopa ta porãcũro gahmea ĩgu pagu magure. Eropirã ĩgu tĩgu mũru porã iro dopa árĩrãcoma,” arĩpũ Moise, arĩñorã erã.

<sup>29</sup> Irire arĩtuha i queorire werenemoñorã erã Jesure:

—Yujugu porã siete árĩñorã. Erã tĩgũpũ marapocũ porã marigu ta sīria wapũ. <sup>30</sup> Eropigu gajigu ĩgu pagu magu sã ĩgu tĩgu marapo árĩdigore ta marapocũpũ. ĩgu eropa marapocũra pũhrũ ĩgu tĩgu mũru iro dopa ta ĩgu sã porã mariqueregu ta sīria wapũ. <sup>31</sup> Eropigu ihĩ pagu magu sã ĩgu tĩgu mũru iro dopa ta porã mariqueregu sīria wapũ. Eropa dihta wañorã yujugu porã gohra. Ne porã mariquererã ta sīripehrea wañorã. <sup>32</sup> Erã marapo sã erã pũhrũ sīria wapo pare, arĩ, Jesure serẽpiñorã: <sup>33</sup> ¿Ne, Goãmũ árĩpeherrerã sīrinirãre ĩgu masucũ nihino marapo gohra árĩgocuri igo? Erã siete árĩpeherrerã igore marapocũnirã árĩñorã. ¿Eropigo nihino marapo gohra árĩgocuri igo? arĩ serẽpiñorã erã.

<sup>34</sup> Erã eroparĩcũ Jesu yuhripũ:

—I yeba majarã ɯma nome mera marapocũma. <sup>35</sup> Erã eropa iiquerecũ ta ɯmũsi majarãpũ eropa árĩbeamã. Dohpaguere masare ɯmare, nome sãre diaye iirãre Goãmũ õarã iigucumi. Erã erã sīrira pũhrũ masa mũriarãcoma Goãmũ pohrogue. Eropirã erã eroguere marapocũbeamã. <sup>36</sup> Eropirã erã anyua iro dopa ta ne sīrisome daja. Erã Goãmũ ĩgu masunirã árĩrã, Goãmũ porã àhrima. <sup>37</sup> Dohpaguere sīrinirã erã masa mũriaboropũre mũare weregura. Irire masia mũa ĩgu Moise ĩgu arĩ gojarare. “Iri yucũgũgãgue ɯjũdigũgue árĩgu Goãmũ õpa arĩ weremi yũre,” arĩ gojañumi Moise. “‘Yũhũ Abrahã, Isaa, Jacobo erã opu ta àhraa,’ arĩ weremi Goãmũ yũre,” arĩ gojañumi Moise. <sup>38</sup> Erã sīrira pũhrũgue “Erã opu ta àhraa,” arĩñumi Goãmũ. Eropirã erã sīrinirã mũra ĩgu masunirã árĩrã erã ojocarirã àhrima. Árĩpeherrerã masa sīriquererã ojocarirã àhrima Goãmũ ĩgu ĩacũ, arĩpũ Jesu erãre.

<sup>39-40</sup> ĩgu eroparĩcũ erãpũ dipaturi Jesure serẽpidiabiriñorã. Eropirã bajamerãgã judio masare buherã õpa arĩñorã:

—Buhegu, mũhũ õaro yuhriabũ, arĩñorã erã ĩgure.

*Cristo Davi mærx opæ åhrimi, arĩ werepæ Jesu*

*Mt 22.41-46; Mr 12.35-37*

<sup>41</sup> Pæhræ Jesu õpa arĩ werepæ masare:

—“Cristo Davi mærx pærami árĩgæcumĩ,” arĩ buherima mæare buherå. ¿Duhpirå erå eropa arĩ buherĩ? <sup>42</sup> Davi mærx ígæ basi Salmo ígæ gojarapũgue õpa arĩ gojañumi:

Goãmæ yæ opære õpa aråmi: “Ohõ yæ diayepæ dorebu doaque.

<sup>43</sup> Eropigæ mære íhaturiråre mære tarinægabasagura yæhæ,” arĩmi Goãmæ yæ opære, arĩ gojañumi Davi mærx.

<sup>44</sup> Eropa arĩ gojagæ Davi mærx opæcũñumi Cristore. ¿Eropigæ Davi mærx Cristo ñecæ mærx árĩqueregæ ta duhpigæ Davipæ Cristore opæcũyuri? Cristo Davi mærx opæ åhrimi, arĩ werepæ Jesu.

*Masare buherå erå ñero iirire werepæ Jesu*

*Mt 23.1-36; Mr 12.38-40; Lc 11.37-54*

<sup>45</sup> Masa bajarå watope Jesupæ ígæ buheråre õpa arĩ werepæ:

<sup>46</sup> —Masare buherå erå ñeri iirire íarå õaro pee masique. Eropirå erå iro dopa iibiricåque. Erå yoari suhri sañama masa eråre íaboro dopa. Doberi duarogue gajirå umupeori mera bocatĩri serẽcũ gahmema erå. Eropirå erå mari buheri wiriguere oparå õari doari dihtare doadiama erå. Eropirå bosenæri árĩcũ sære oparå erå doarigue dihtare doadiama. <sup>47</sup> Erå wapeweyarå nome erå wajamocũ íha erå ya wirire ehmana erå nomere. Eropa eråre mojomoro íabiriquererå erå masa erå íhurore yoari boje Goãmære serẽma, “Gæa Goãmære õaro umupeoa,” arĩ gæyarå. Erå eropa iira dipuwaja Goãmæ eråre gajirå tauro dipuwaja moagæcumĩ, arĩpæ Jesu eråre.

## 21

*Wapeweyo Goãmæ wihigue igo apirare werepæ Jesu*

*Mr 12.41-44*

<sup>1</sup> Eropa arĩ weretuha Jesu Goãmæ wihi maja erå amuburi niyeru gameneori comoro pohrogue íha doapæ. Iri comorogue doberi oparå erå niyeru sãcũ íapæ Jesu. <sup>2</sup> Eropa íagæ wapeweyo mojomorocũgo igo pesegå igo oparaserigåre igo sãcũ sære íapæ. <sup>3</sup> Irire íatuha õpa arĩ werepæ:

—Diaye arĩgæ iiaa mæare. Igo wapeweyo mojomorocũgopæ ii comorogue igo yare sãgo gajirå árĩpehrerå erå sãdiro tauro sãmo igoa. <sup>4</sup> Gajirå doberi oparå erå wuaro oquerecũ ta eråpære erå ya wuaro duhyaa. Igotæ mojomorocũgo árĩquerego ta árĩpehreri igo bari waja árĩborare opehocåmo igoa, arĩpæ Jesu.

*—Goãmæ wihi cóãra wihi árĩroca, arĩpæ Jesu*

*Mt 24.1-2; Mr 13.1-2*

<sup>5</sup> Eropi gajirå Goãmæ wihire íarå õpa arĩñorå:

—Õari utå mera iira wihi, õari wihi åhraa. Masa Goãmæ wihire erå ora sã õari åhraa, arĩ wereniguirå íñorå.

Erå eroparĩcũ Jesu werepæ eråre:

<sup>6</sup> —I wihi majare dohpaguere íaraa mæa. Gajinæ árĩcũ i wihi maja árĩpehreri mari íara, i utå sã cohmopehrea waroca. Ne yujuye utåye dujasome, arĩpæ Jesu eråre.



*I mũu pehreburiñe werepu Jesu*

*Mt 24.3-28; Mr 13.3-23*

<sup>7</sup> Īgu eroparicũ peerã erãpu serẽpiñorã ĩgure:

—Buhegu, ¿dohpãricũ eropa warocuri mũ arĩdiro dopa waro? ¿Pehreburiñu coregãre dohpa wanugacũ ĩarãcuri gũa? arĩ serẽpiñorã erã ĩgure.

<sup>8</sup> Jesu yuhripũ erãre:

—Ōaro iiyuque mũa. Eropirã gajirã mũare erã gũyarire peebericãque. Bajarã masa “Cristo ãhraa yũhũ,” arĩ gũyarã árĩrãcoma. Eropa arĩ gũyarã “Dohpaguere pehreburiñu merogã duhyaa,” arĩrãcoma. Erã eroparicũ erãre peebericãque. <sup>9</sup> Eropirã mũa pohrogã gajirã masa gamewejẽcũ, masa erã oparãre cóacũ peerãca. Eropirã yoarogue majarã sã eropa iicũ peebeorãca. Mũa irire peerã gũibericãque. Pehreburiñu core õpa wamũhtaroca. Eropa wamũhtacũ pehreburiñu duhyaniroca dohpa, arĩpu Jesu.

<sup>10</sup> Eropa arĩtuha õpa arĩ werenemopũ:

—Irisubure yuju yeba majarã gaji yeba majarã mera gamewejẽrãcoma. Eropirã yujugu opu yarã gajigu opu yarã mera gamewejẽrãcoma. <sup>11</sup> Eropero bajasuburi i yeba ñohmeroca. Eropirã masa bajarã oa mera sĩri, árĩpehrero majarã masa dorecurãcoma. Eropirã umaro majare deyoro moarire guhyadiarire masa ĩarã, ĩha uca warãcoma. Eropa wacũ mũapu gũibericãque.

<sup>12</sup> “I árĩpehreri eropa waboro core, yaharã mũa árĩri dipuwaja gajirã mũare ñeha ñero iirãcoma. Eropirã mari judio masa buheri wirigue mũare weresã, peresu iirãcoma mũare. Erã eropa iicũ macari majarã oparã pohrogue erã tauro oparã pohrogue sãre mũare aĩgãrãcoma erã mũare dipuwaja moadorerã. <sup>13</sup> Erã eropa mũare aĩgãcũ mũapu erãre õari buherire wererãca. <sup>14</sup> Erã oparã pohrogue mũare erã aĩgãcũ erã oparãre mũa yuhriborore wũaro guñabiricãque mũa. <sup>15</sup> Yũhu mũare wereniguicũ iigura. Mũare eropa itamugu pee masirire, õari wereniguii sãre mũa iicũ iigura. Mũa eropa iicũ mũare ĩhaturirãpu mũa wereniguirire pee bocatũmasisome. “Iri diaye árĩbeaa,” arĩ yũhrimasisome. <sup>16</sup> Irisuburi mũa yaharã árĩcũ ĩha mũa pagu sumarã, mũa pagu porã, mũa acawererã, mũa mera majarã sã mũare oparãre wejẽdorerã orãcoma mũare. Erã eropa iicũ mũare ĩhaturirã mũa mera majarãre gajirãre wejẽrãcoma. <sup>17</sup> Eropirã yaharã mũa árĩcũ ĩarã, árĩpehrerã mũare ĩhaturirãcoma. <sup>18</sup> Mũare eropa iicũ mũapu ne dederesome. <sup>19</sup> Eropirã erã mũare ñero iiquerecũ ta mũare erã ñero iirare yujuro bojerã yũre duhubiricũ Goãmũ mũare taugucumi. Eropigu ĩgu pohrogue mũare opagucumi.

<sup>20</sup> “Eropirã bajarã surara Jerusalenguere erã cãhmotacũ ĩarã, Jerusalẽre erã cóãborore merogã duhyacũ masirãca mũa. <sup>21</sup> Eropa wacũ ĩarã Judea yeba árĩrãpu utã yucugue oma duhriporo. Eropirã Jerusalẽn árĩrã sã waporo. Eropirã campo árĩrã Jerusalenguere wabiricãporo daja. <sup>22</sup> Irinũri dipuwaja moarinũri árĩpehreri Goãmũ yare erã gojarapũ erã arĩdiro dopa ta eropa waroca. <sup>23</sup> Goãmũ oã masare turaro dipuwaja moacũ árĩpehrerogue i yebaguere ñero tarirãcoma. Eropa wacũ nijiposã nome, erã porãre mihrirãre oparã nome sã mojomorocũrã nome dujarãcoma irisubure. <sup>24</sup> Gajirã i maca majarãre gamewejẽrãcoma. Eropirã gajirã i maca majarãre

árīpehreri yebarigue aĩgã peresu iirãcoma. Eropirã judio masa árībīrã Jerusalénre ñero iirãcoma. Eropirã erã tarinũgarãcoma. Judio masa árībīrãre “Iripēta árīque,” Goãmu ĩgu arĩcũgue Jerusalénre àhri duhurãcoma, arĩ werepũ Jesu.

*Jesu i yebague ĩgu dujariborore werepũ*

*Mt 24.29-35, 42-44; Mr 13.24-37*

<sup>25</sup> Eropigu erãre werenemopũ:

—Irisubure abe umũ majagu, ñami majagu, necã sã guhyaro gohrotoa warãcoma. Árīpehrerã i yeba majarã, “Cue, sīrirãca,” arĩ pepirãcoma. Wũariya turaro busũrire pãgũri sãre turaro gũirãcoma. <sup>26</sup> Irisubure umaro maja sã yeba sã burigã ñohmeroca. Eropa wacũ ĩarã masapũ i yeba pehrebore corerã burigã gũirãcoma dedereri arĩrã. <sup>27</sup> Irisubu ta yũhu masũ Goãmu ĩgu obeodigu Goãmu ĩgu turari mera, ĩgu gosesiriri mera umaro maja imica weca i yebaguere yũ dujaricũ ĩarãcoma masa. <sup>28</sup> Yũ Eropa arĩra wanũgacũ ĩarã gũibiricãque. Eropirã guñatura umarogue ĩhamujuque. Irisubure Goãmu muare ĩgu tauboro merogã duhyaroca, arĩpũ Jesu.

<sup>29</sup> Eropa arĩtuha i queori mera erãre werepũ Jesu:

—Higueragu baja gaji yucũ sã iri yucũ waricũrire pepique mũa. <sup>30</sup> Iri yucũ pũricacũ ĩarã, “Bojori merogã duhyaa,” arĩ masia mari. <sup>31</sup> Eropa ta i árīpehreri yũ arĩra iri Eropa wacũ ĩarã, “Goãmu ĩgu opũ árībũrisubu merogã duhyaa,” arĩ pepirãca mũa. <sup>32</sup> Muare diaye arĩgu iiaa. Irisubu majarã erã sīriboro core árīpehreri yũ arĩra Eropa waroca. <sup>33</sup> Umaro i yeba sã pehrea waroca. Yũ wereniguiripũ ne pehresome. Árīpehreri yũ arĩdiro dopa ta Eropa waha ojogorocũroca. <sup>34</sup> “Yũ dujariburinũre ne masibea mũa. Eropirã õaro árĩyuque. Bosenũrire pagari iiniguibiricãque. Eropirã merebiricãque. I yeba maja ĩburire wũaro pepibiricãque. Muare yũ arĩdiro dopa ta iirã, guñaña mariro i yebaguere yũ aricũ ne ucasome. <sup>35</sup> Yũhu masare beyegu arigu guñaña mariro arigũca. Waibũgu guñaña mariro ĩgu weradague ĩgu mehsihajaro dopa ta irinũ waroca masare árīpehrerã i yeba majarãre. I yeba majarã “Eropa waroca,” erã arībīririnũ Eropa waroca. <sup>36</sup> Mũapũ õaro guñatura coreque. Eropirã Goãmũre ire serēniguicãque: “Pehrerinũ Eropa wacũ yũre itamuque. Turarire oque yũre õaro yũ tariboro dopa. Eropigu Cristore mũ obeogũre gũiro mariro yũhu ĩgũre bocatĩricũ ĩique yũre,” arĩ serēque Goãmũre, arĩpũ Jesu.

<sup>37</sup> Eropi irinũrire Goãmũ wihigue Jesu buhemũripũ. Ñamiri nũcũ buhetuhajagu Olivo waĩcũdigũgue waha irigũgue árībũyotahmuamũripũ. <sup>38</sup> Boyocũ árīpehrerã masa ĩgũre Goãmũ wihigue peerã wamũriñorã.

## 22

*Pahia oparã, judio masare buherã mera wejēdiañorã Jesure*

*Mt 26.1-5, 14-16; Mr 14.1-2, 10-11; Jn 11.45-53*

<sup>1</sup> Eropi irisubure bugabiriri pan erã baburi bosenu merogã duhyayoro. Iri bosenu Pascua waĩcũyoro. <sup>2</sup> Eropirã pahia oparã, judio masare buherã mera Jesure wejēdiarã, erã wejēborore guñamaañorã. Jesure wejēdiaquererã ta masapũre gũĩñorã guari arĩrã.

<sup>3</sup> Eropi Judapɯ watĩ ĩgure ñero iidorecũ yũhripɯ ĩgure. Juda doce Jesu buherã mera majagɯ árĩripɯ. <sup>4</sup> Eropigɯ pahia oparãre, Goãmu wihi majarã surara oparã mera sãre weretamugɯ wapɯ. Erã pohrogue eja, erãre Jesure ĩgɯ ĩhmuborore weretamupɯ erã mera. <sup>5</sup> ĩgɯ erãre eroparĩcũ pee erã mucubiri, “Mũre niyeru wajayerãca,” arĩñorã erã Judare. <sup>6</sup> Erã eroparĩcũ, “Áu, mũare ĩgure ĩhmugɯra,” Juda arĩpɯ. Eropigɯ masa erã ĩabiririsubu Jesure ĩhaturirãre ĩgɯ ĩhmuborore corenĩpɯ.

*Jesu ĩgɯ buherã mera ĩgɯ baturinɯ árĩyoro*

*Mt 26.17-29; Mr 14.12-25; Jn 13.21-30; 1Co 11.23-26*

<sup>7</sup> Bũgabiriri panre erã baburinɯ bosenu árĩnũgarinɯ árĩyoro. Eropiro Pascua majagɯ árĩbure ovejare erã wejẽrinɯ árĩyoro. <sup>8</sup> Irisubu ta Pedro, Ñu sãre Jesu werepɯ:

—Bosenu mari baburire amurã waque, arĩpɯ Jesu erãre.

<sup>9</sup> —¿Nohonogue mari baburire amudoregɯ obeori mũhũ guare? arĩ serẽpiñorã erã.

<sup>10</sup> Erã eroparĩcũ Jesu yũhripɯ:

—Jerusaléngue waque. Eroque mũa ejacũ deco sorobu tuhpeogɯ mũare bocatĩrigucumi. ĩgɯ bocatĩricũ ĩgɯ mera waque. <sup>11</sup> Eropa warã ĩgɯ sihu ñajari wihigue ejarã, wihi opure òpa arĩque: “¿Nohogue yũhũ, yũ buherã mera Pascua maja barire barãcuri?” arãmi buhegu,” arĩque wihi opure. <sup>12</sup> Mũa eroparĩcũ peegu wũari taribure, mũaro maja taribure, mari gameri mera erã amura taribure ĩhmugɯcumĩ wihi opɯ. Eroque mari baburire iique mũa, arĩpɯ Jesu erãre.

<sup>13</sup> ĩgɯ eroparĩcũ erã iri macague wañorã. Eroque erã ejacũ erãre ĩgɯ arĩdiro dopa ta eropa wayoro. Eropirã erã Pascua árĩcũ baburire amũñorã.

<sup>14</sup> Erã barisubu árĩcũ Jesu doce ĩgɯ buherã mera ba doapɯ. <sup>15-16</sup> Eroque erã barogue doagɯ Jesu erãre werepɯ:

—Mũare arĩgɯ iiaa. I Pascua bosenure mari iiaa Goãmu ĩgɯ yarãre ĩgɯ taurare guñarã. Pũhrɯ Goãmu ĩgɯ opɯ árĩrogue ĩgɯ yarãre tautuhagucumi. ĩgɯ eropa tauboro core inũno majare dipaturi basome yũhũ. Eropigɯ dohpaguere yũ ñero tariboro core i Pascua maja barire mũa mera turaro badiabũ, arĩpɯ Jesu.

<sup>17-18</sup> Eropa arĩgɯ Jesu ihriripare aĩ, Goãmure “Õhaa,” arĩ serẽ, erãre werepɯ:

—Mũare arĩgɯ tiiaa. Goãmu ĩgɯ opɯ árĩrogue igui decore ihriboro core ne dipaturi ihrisome yũhũ. Eropirã iri vinore aĩ mũa basi ihrigue, arĩpɯ Jesu.

<sup>19</sup> Eropa arĩtuha panre aĩ, Goãmure “Õhaa,” arĩpɯ. Eropa arĩtuha irirure nuha guerepɯ erãre. Irirure gueregɯ ta erãre werepɯ:

—I yũ dũpɯ ãhraa. Yũ dũpɯ yũre ĩhaturirãre erã oburi dũpɯ árĩroca. Mũa ñeri iira wajare cóãbu sĩriguca yũhũ. Eropirã mũa yũre guñaburire ire baque, arĩpɯ Jesu.

<sup>20</sup> Eropa batuha eropa ta erãre ihriripa sãre ópɯ. Eropigɯ erãre werepɯ:

—Mũa ñeri iirare cóãbu sĩriguca. Eropigɯ yũ dire cóãguca. Eropa sĩrigɯ yũ Pagɯ Goãmu “Masare òaro iigura,” ĩgɯ arĩdiro ii ojogorocugaca.

21 “Dohpaguere peeque mua. Yũre ìhaturirãre ìhmubu yũ mera ohõ doami. 22 Goãmũ ìgũ arĩdiro dopa ta yũhũ masũ Goãmũ ìgũ obeodigu sĩrigũca. Ìgũ eropa sĩridorequerecũ ta yũre ìhaturirãre ìhmudigũpũ ñetariaro tariğũcumi, arĩpũ Jesu.

23 Ìgũ eroparĩcũ erãpũ erã basi õpa arĩ serẽpiñorã:

—¿Jesure ìhaturirãre ìhmubu mari mera majagũ nihino arĩcuriba? arĩ serẽpiñorã erã basi.

*“¿Mari mera majagũ nihinopũ opũ árĩğũcuri?” arĩ wereniguiñorã Jesu buherã*

24 Pũhrũ Jesu buherã õpa arĩ dũyasoñorã:

—¿Mari mera majagũ nihipũ árĩğũcuri opũ? arĩ wereniguiñorã erã basi.

25 Erã eropa arĩ wereniguicũ peegũ Jesu erãre werepũ:

—Goãmũre masibirã oparãpũ erã masare dorerã pũriro mera dorema. Eropirã oparãre “Erã masare õaro itamurã àhrima,” arĩrima gajirã erãre. 26 Mũapũ eropa oparã árĩdiasome mua basi. Mua mera majagũ mua ògũpũ mua pagũ magũ iro dopa árĩporo. Mua mera majagũ opũ árĩdiagũ gajirã itamugũ árĩporo. 27 ¿Nihino àhriri opũ mua pepicũ? ¿Ba doagũpũ opũ àhriri? ¿O barire duhpogũpũ opũ àhriri? Ba doagũ ta árĩcumi opũ. Ìgũ eropa árĩquerecũ ta yũpũ pohro majagũ iro dopa ta mũare itamugũ ahrabũ.

28 “Masa erã yũre ñero iiquerecũ ta mũapũ yũre duhubirabũ. 29 Eropigũ yũ Pagũ ìgũ yũre opũ acudiro dopa ta mua sãre oparãre acugũra yũhũ. 30 Yũ opũ árĩcũ mua sã yũ bari mesa ta baha ihrirãca. Eropirã mua oparã doarire doarãca. Mua ero doarã Israe masare doce cururi majarãre beyerãca õarã sãre ñerã sãre, arĩpũ Jesu ìgũ buherãre.

*Pedro “Jesure masibea,” ìgũ arĩ gũyaburiñere wereñumi Jesu Mt 26.31-35; Mr 14.27-31; Jn 13.36-38*

31 Eropa arĩtuhaja Pedrore Jesu õpa arĩ werepũ:

—Simo Pedro yũre peeque. Watĩ Satana mũare árĩpehrerãre gamegũ Goãmũre serẽrami. Mua yũre duhu ìgũ yare iicũ gamegũ serẽrami. Trigo pohe opũ ìgũ trigo gasirire cóãgũ puri siriro dopa mũare goroweodiami. 32 Ìgũ mũare eropa gamequerecũ yũpũ mũre Goãmũre serẽbasabũ. Yũre mũ umupeo duhubiriburire serẽbasabũ Goãmũre. Eropigũ mũhũ yũ mera majagũ dipaturi árĩgũ mũ acawererãre yaharãre guñaturacũ iique mũhũ, arĩpũ Jesu Pedrore.

33 Ìgũ eroparĩcũ Pedro yũhrĩpũ:

—Opũ, mũre erã peresu iiquerecũ ta, yũhũ mũ mera majagũ árĩniguigũca. Mũre erã wejẽquerecũ ta mũ mera majagũ árĩniguigũca, arĩpũ Pedro.

34 Jesu yũhrĩpũ:

—Pedro, mũre arĩgũ iiaa. Dohpagã ñami cãreña ìgũ wereboro core uhrẽsubu “Jesure masibea,” arĩgũca mũhũ gajirãre, arĩpũ Jesu Pedrore.

*Jesure erã ñero iinũgaboro merogã dũhayoro*

35 Eropa arĩtuha Jesu ìgũ buherãre werepũ:

—¿Sohō árīrasubure m̄aa niyeru aju moorā, suhri diyeri aju moorā, zapatu moorā m̄aare yu obeorasubure gajino d̄uhyari m̄aare? arī serēp̄u Jesu.

—Ne gajino ḡuare d̄uhyabirabu, arī yuhriñorā erā.

<sup>36</sup> —Irisubure m̄aare d̄uhyabiriquerecū ta dohpaguep̄ure suhri diyeri ajure, niyeru aju s̄āre oparā irire aīque. Eropirā m̄aare matamijiri maricū ĩarā m̄aa suhrire duarā irimijire asūque. <sup>37</sup> Ire m̄aare arīgu iiaa. Goām̄u yare erā gojarapū erā arīdiro dopa ta yure eropa waro gahmea. Ōpa arīñuma iripūgue. “Īgu dorerire tarinugarā mera majagu āhrimi, arīrācoma masa,” arī gojañuma yure, arīp̄u Jesu. Erāp̄u arīñorā:

<sup>38</sup> —Īaque op̄u. Pemiji matamijirire opaa ḡua, arīñorā ĩgu buherā.

—Iripēta árīca, arī yuhrip̄u Jesu.

*Getsemanígue Jesu Goām̄u mera wereniguip̄u*

*Mt 26.36-46; Mr 14.32-42*

<sup>39</sup> Eropi Jesu ĩgu ero core ĩgu iiguadiro dopa ta Olivo waīcudigu utāgugue waha wap̄u. Īgu eropa wacū ĩgu buherā ĩgu mera wañorā.

<sup>40</sup> Erogue ejagu ĩgu erāre werep̄u:

—Goām̄ure serēque m̄aa ñerire iibiriboro dopa, arīp̄u erāre Jesu.

<sup>41</sup> Eropa arītuha ĩgu seyaro merogā yujugu ta wanemo, mereja Goām̄u mera wereniguip̄u:

<sup>42</sup> —Ah̄u, yu ñero tariburire iidiabigu iibiricāque. Yu eropa serēquerecū ta yu gamero dopa iibita. M̄ap̄u masia. M̄u gamero dopa ta iique, arī serēp̄u Jesu Goām̄ure.

<sup>43</sup> Īgu eropa arī serēcū amarogue aridigu anyu Jesure dehyoap̄u ĩgure itamugu. <sup>44</sup> Eropigu Jesu ñero s̄iporācu turaro mera Goām̄u mera wereniguip̄u. Eropiro ĩgu ñajasiri guari di wiriro dopa ĩgure wiridijayoro.

<sup>45</sup> Goām̄u mera wereniguituha wahgānugaja, ĩgu buherā pohrogue dujaa wap̄u. Īgu dujajacū ĩgu buherā burigā bujawererā árīrā carīrā arīñorā. <sup>46</sup> Eropigu Jesu erāre ōpa arī werep̄u:

—¿Duhpirā carīri m̄aa? Wahgāque. Goām̄ure serēque m̄aa ñeri iibiriburire, arīp̄u Jesu erāre.

*Jesure ĩhaturirā ĩgure peresu iñorā*

*Mt 26.47-56; Mr 14.43-50; Jn 18.2-11*

<sup>47</sup> Īgu eropa arī wereniguirisubū masa bajarā erañorā. Juda doce buherā mera majagu árīdigu masare m̄uhtagāridigu árīp̄u. Eropigu ĩgu Jesu pohro eraa, ĩgu wayuporāre mimip̄u ĩgure. <sup>48</sup> Īgu eropa mimicū Jesup̄u ĩgure serēp̄u:

—Juda, ¿yu masure Goām̄u ĩgu obeodigure yure ĩhaturirāre ĩhmugu yu wayuporāre mimiri m̄uh̄u? arīp̄u Jesu.

<sup>49</sup> Īgu eropa arīra p̄uhru Jesu buherā masa Jesure erā ñeaburire masirā ĩgure serēp̄uñorā:

—Op̄u, ¿ḡua matamijiri mera erāre gamequeāsi? arīñorā erā.

<sup>50</sup> Erā eropa arīra p̄uhru yujugu Jesu buherā mera majagup̄u pahia op̄u pohro majagure ĩgu matamiji mera ĩgu gamirore diayerp̄u árīri gamirore tabe coro dijucāp̄u. <sup>51</sup> Īgu eropa iicū ĩagu Jesu ōpa arīp̄u:

—Iibita, arīp̄u.

Eropa arītuha pohro majagu gamiro árirañere mohmepipu. Īgu eropa iicū pohro majagupu mūraro ta dujapu daja. <sup>52</sup> Eropa iitua pahia oparāre, Goāmu wihi surara oparāre, murā sāre ĩgure ñeamorāre Jesu serēpipu:

—¿Mua matamijiri mera, yucu ducari mera arirā yajari masure iro dopa ta yure ñearā arirā iiari? <sup>53</sup> Ūmuri nucu Goāmu wihigue mua mera yu árícū, mua yure ñeabiribu. Eropa arīquerecū ta dohpague mua ñerā yanu ta āhraa. Watī ĩgu tarinagaburibusu árīro iiaa, arīpu Jesu.

*“Jesure masibea,” arīpu Pedro*

*Mt 26.57-58, 69-75; Mr 14.53-54, 66-72; Jn 18.12-18, 25-27*

<sup>54</sup> Erā Jesure ñeatuha pahia opu ya wihigue aīgāñorā erā ĩgure. Erā aīgācū Pedro yoarogue erāre ihanurusiapu. <sup>55</sup> Opu ya wihigue ejacū, iri wihire cāhmotara sāiro pohecague ōari goro deco peame dihuñorā gajirā. Erā dihucū ĩagu Pedro peame pohro doarā mera doapu. <sup>56</sup> ĩgu peame boyorogue doacū yujugo pohro majago ĩgure ōaro ihanuru gajirāre ōpa arī werepo:

—Ihī sā ĩgu mera ta āhrami, arīpo igo.

<sup>57</sup> Igo eroparīcū Pedro yuhripu:

—Nomeo, ĩgure ne masibea yuhu, arīripu Pedro. <sup>58</sup> Puhru ñari gajigu Pedrorē ĩha, ōpa arī werepu:

—Mu sā erā mera majagu ta āhraa, arīpu ĩgu.

—Ne, árībeaa, arīripu Pedro.

<sup>59</sup> Yuju hora puhru gajigu gajirāre ōpa arī werepu:

—Diaye ta āhraa. Ihī Galilea majagu āhrimi. Diaye ta Jesu mera āhrami ihī sā, arīpu ĩgu gajirāre.

<sup>60</sup> ĩgu eroparīcū Pedro yuhripu:

—Mu arīgure ne masibea yuhu, arī yuhripu.

ĩgu eropa arī wereniguiribusu cāreña werepu. <sup>61</sup> ĩgu werecū mari Opu Jesu wihi pohro arīdigu Pedrorē maji ĩapu. ĩgu eropa ĩacū Pedropu Jesu ĩgu arīrare guñapu. “Dohpagā ñami cāreña ĩgu wereboro core, uhresubu muhu, ‘Yuhu Jesure masibea,’ arīguca muhu,” Jesu ĩgu arīrare guñapu Pedro. <sup>62</sup> Eropigu Pedro erogue wiriri, turaro orepu.

*Jesure wereya, pañorā erā*

*Mt 26.67-68; Mr 14.65*

<sup>63</sup> Eropirā Jesure corerā surara ĩgure wereya, pañorā. <sup>64</sup> Eropa parā ĩgu cuirire diricāhmota, ĩgure serēpiñorā:

—¿Noa mure pari? ĩabiriqueregu ta wereque guare, arī wereyañorā erā.

<sup>65</sup> Eropirā baja gaji ñero arī wereyañorā erā ĩgure.

*Jesure opu serēpipu*

*Mt 26.59-66; Mr 14.55-64; Jn 18.19-24*

<sup>66</sup> Eropirā boyorogue ta murā, pahia oparā, judio masare buherā sā gamenereñorā. Erā eropa gamenererore gajirā erā pohrouge Jesure aīgāriñorā.

<sup>67</sup> —Wereque guare. ¿Goāmu beyedigu Cristo āhriri muhu? arī serēpiñorā erā Jesure.

Erā eroparīcū Jesu yuhripu:

—Mũare yu werecũ sãre yũre peesome mũa. <sup>68</sup> Mũare yu serẽpicũ yũre yũhrisome mũa. Eropirã yũre wiusome mũa. <sup>69</sup> Mũa yũre wiubiriquerecũ ta pũhrũ ñari mũuri nũcu yũhũ masũ Goãmũ ĩgu obeodĩgu Goãmũ yũ Pagũ turagũ ĩgu diayerũ doagũ árigũca, arĩpũ Jesu.

<sup>70</sup> ĩgu eroparĩcũ erã árĩpehrerã serẽpiñorã daja dipaturi:

—¿Eropa arĩgu “Yũhũ Goãmũ magũ áhrra,” arĩri mũhũ? arĩñorã erã.

—Mũa arĩro dopa ĩgu ta áhrra, arĩ yũhrĩpũ Jesu erãre.

<sup>71</sup> ĩgu eroparĩcũ õpa arĩ erã basi wereniguĩñorã erã:

—Ĩre weresãrãre gajirãre mari gamebeaa pare. Erã nũcu ta sihajama. ĩgu Goãmũre ĩgu ñero wereniguicũ mari basi ta mari peea. Eropirã ĩgu ñero iira dipuwajare masituhaa, arĩñorã erã erã basi.

## 23

### *Pilato Jesure serẽpipũ*

*Mt 27.1-2, 11-14; Mr 15.1-5; Jn 18.28-38*

<sup>1</sup> Eropa arĩtuha erã árĩpehrerã wahgãnũgaja, Jesure Pilato waĩcũgu opu pohrogue aĩgãñorã. <sup>2</sup> Aĩ ejarã Jesure weresãnũgãñorã:

—Ĩhĩ mari ya yeba majarãre ñero iidorecũ peeabũ. Mari opuere Césare ihĩ wajayedorebeami. Eropĩgu ĩgu “Yũhũ opu áhrra. Cristo áhrra yũhũ,” arĩ wereniguimi ĩgu basi, arĩ weresãñorã erã Jesure.

<sup>3</sup> Erã eropa arĩ weresãra pũhrũ Pilato Jesure serẽpipũ:

—¿Diaye ta judio masa opu ta áhriri mũhũ? arĩpũ ĩgu Jesure.

—Mũ arĩro dopa ta ĩgu ta áhrra, arĩ yũhrĩpũ Jesu.

<sup>4</sup> ĩgu eroparĩcũ Pilato pahia oparãre, masa sãre werepũ:

—Ĩre gajino waja dipuwaja mara, arĩpũ ĩgu.

<sup>5</sup> ĩgu eropa arĩquerecũ ta erã turaro weresãnemoñorã:

—Ĩgu, ĩgu buheri mera masare gamequeãcũ iimi. Galilea yeba ĩgu irire iinũgami. Eropa iinũgatuha árĩpehrero Judea yebague irire ĩgu iimi, arĩ weresãñorã erã.

### *Herode waĩcũgu opu Jesure serẽpipũ*

<sup>6</sup> Erã eropa arĩ weresãcũ peegu Pilatopũ serẽpipũ:

—¿Ĩhĩ Galilea majagu áhriri? arĩpũ ĩgu.

<sup>7</sup> —Ero majagu ta áhrimi, arĩ yũhriñorã gajirã.

Erã eropa yũhricũ peegu Pilatopũ Jesu ĩgu árĩri yebare masigu opu Herode ĩgu ya yeba majagu ĩgu árĩcũ masipũ. Irire masigu Jesure Herode pohro obeopũ. Irisubure Herode Jerusalén arĩpũ. <sup>8</sup> Ero core Herode Jesure peemurĩpũ. ĩgu eropa peera pũhrũ ĩgure burigã ñadiarĩpũ. Jesu ĩgu deyoro moarire ĩgu ii ĩhmucũ ñadiarĩpũ ĩgu. Eropĩgu ĩgu Jesure ñagu mucubĩrĩpũ. <sup>9</sup> Eropĩgu baja serẽpipũ Jesure. ĩgu eropa serẽpĩquerecũ ta Jesupũ ne yũhribĩrĩpũ ĩgure. <sup>10</sup> Pahia oparã, judio masare buherã sã Herode pohro nũgaja turaro Jesure weresãñorã. <sup>11</sup> Erã eropa arĩ weresãra pũhrũ Herode ĩgu surara mera werya, Jesure ñero iĩñorã. Eropa weryarã, õariñe suhrĩrore opu yañe dopa bejarĩñere sãñorã erã Jesure. Eropa weryatuha, iri suhrĩrore tuwea aĩ Pilato pohro obeoñorã daja. <sup>12</sup> Irĩnũre Herode,

Pilato mera ôaro erã basi game iinugarã árĩnugañorã. Ero corere erã basi game ihaturirã árĩriñorã.

*Masa Jesure wejẽdoreñorã*

*Mt 27.15-26; Mr 15.6-15; Jn 18.39-19.16*

<sup>13</sup> Eropi Pilato pahia oparãre, gajirã oparãre, masa sãre ĩgu sihubeocũ gamenereñorã. <sup>14</sup> Erã gamenerecũ ĩagu ôpa arĩpu erãre:

—Īre yãre aĩgãrirã, “Īgu masare ñero iidoremi,” arĩraa mua yãre. Dohpague mua ihuro ĩre serẽpipehoabu daja. Yã eropa serẽpira puhru mua ĩgure weresãcũ ñeri dipuwaja mara yã ĩacũ. <sup>15</sup> Herode sã “Īgure ne ñeri dipuwaja mara,” arãmi. Eropa arĩgu dipaturi ĩre ohõ dujuami daja. Eropiro ĩre wejẽdorero mara. Mua sã irire ĩha masia. <sup>16</sup> Eropigu ĩgure tãraradari mera tãradoregũca yũhu. Erã eropa tãrara puhru ĩgure wiugũra, arĩripũ Pilato.

<sup>17</sup> Bojori nũcu Pascua bosenuri nũcu peresu árĩdigure yujugure masa gamegure Pilato eropa wiubasamũripũ. Eropa iiro gameyoro ĩgure. <sup>18</sup> Eropirã Pilato “Jesure wiugũra,” ĩgu arĩcũ peerã árĩpehrerã masa ôpa arĩ gaguiniguñorã:

—Īgu Jesure wejẽque. Gũa yagu árĩbure Barrabãpũre gũare wiubasaque, arĩ gaguiniguñorã masa.

<sup>19</sup> Ero Barrabãpu Jerusalengue oparãre ĩgu cóãdorera dipuwaja, ĩgu gajirãre wejẽra dipuwaja peresu iĩñorã ĩgure. <sup>20</sup> Pilato Jesupũre wiudiaripũ. Eropigu ĩgu masare ĩgu wiabure serẽpi ĩapu daja. <sup>21</sup> ĩgu Jesure eropa wiudiaquerecũ ta erã ĩgure arĩñorã daja:

—Crusague pabia wejẽque ĩgure. Wejẽcãque ĩgure, arĩ gaguiniñorã erã.

<sup>22</sup> Erã eroparĩcũ Pilato uhresubu waro gohra ôpa arĩripũ daja erãre:

—¿Ñehenore ñerire iiari ĩgu mua eropa arĩ gaguiniguicũ? Ne ĩgure ñeri dipuwaja mara. Eropigu ĩgure wejẽdoremasibea. ĩgure tãraradari mera tãradoregũca. Iripẽta iidoregũca. Eropigu ĩgure wiugũca, arĩripũ Pilato.

<sup>23</sup> ĩgu eroparĩcũ ta erã turaro mera gaguininemo, Jesure crusague wejẽdoreñorã. Erã eropa arĩ gaguinicũ peegu Pilato erã gamero dopa ta iidorepu. <sup>24</sup> Eropigu erã arĩro dopa ta Pilato Jesure wejẽdorepu. <sup>25</sup> Eropa doregu masa serẽdigure wiupu. ĩgu peresugue árĩgure, masare gamewejẽcũ iidigure, masare wejẽdigure Pilato Barrabãpũre wiupu. Eropigu masa erã gamero dopa ta Pilato Jesure crusague wejẽdorepu.

*Erã Jesure crusague pabia wejẽñorã*

*Mt 27.32-44; Mr 15.21-32; Jn 19.17-27*

<sup>26</sup> Eropirã erã Jesure wejẽrã warã, aĩgãñorã. Erã eropa warisubu Simo waĩcũgu Cirene majagu pohegue ejadigu erapu. Jerusalengue ĩgu eracũ ĩarã Jesure aĩgãrã ĩgure bocatĩri, ñeha, crusare ĩgure coãtamudoreñorã Jesu puhru.

<sup>27</sup> Eropirã masa bajarã Jesure ĩhanũrusiañorã. Eropirã gajirã nome ĩgure erã eropa iicũ ĩarã turaro ore nurusiañorã. <sup>28</sup> Erã orecũ peegu Jesu erãre maji ĩha ôpa arĩpu:

—Jerusalén majarã nome yãre orebircãque. Mua basi, mua porã ya árĩburire oreque. <sup>29</sup> Gajinuri arĩcũ masa ôpa arĩrãcoma.



“Porā marirā nome dohpaguere mari árīcū ōatariaboaya,” arīrācoma masa. <sup>30</sup> Irisubure utāgure ōpa arī wereniguirācoma masa. “Īgu utāgu gua weca yuri bejaporo. Guare wejēcāporo,” arīrācoma masa. <sup>31</sup> Masa yure dipuwaja marigure erā ōpa iicū, űeri dipuwaja oparāpu űetariaro warācoma, arīpu Jesu.

<sup>32</sup> Gajirā perā dorerire tarinugarā erā árīcū erā sāre Jesu mera erā wejēmorāre aīgāñorā erā. <sup>33</sup> Erā aīgā dipu pero waīcurogue eja crusague Jesure pabiañorā. Eropirā gajirā perā sāre yujugure ĩgu diayepu gajigure ĩgu copu crusariguere pabiañorā. <sup>34</sup> Erā eropa iicū Jesu ōpa arīpu:

—Ahū, oā dohparagā erā űero iirire cādijique erāre. Erā erā eropa iirire masibeamā. Eropigu irire cādijique, arīpu Jesu ĩgu Pagure.

Eropirā surara Jesu suhri murare “¿Noa yañe árīrocuri iñe?” arī game bira wajatañorā. <sup>35</sup> Eropirā masa ero niguirā erā ĩaro judio masa oparā Jesure wereyañorā:

—Īgu gajirā masare sīribonirāre taurapu. Eropigu ĩgu Cristo Goāmū ĩgu beyedigu árīgu ĩgu basi tariporo, arī wereyañorā erā.

<sup>36</sup> Surara sā ĩgure wereyañorā. Jesu pohro ejarā, vino suīrre erā oriñorā. <sup>37</sup> Irire iirā ōpa arīñorā erā:

—Mūhu judio masa erā opu árīgu ta, mū basi tarique, arīñorā erā.

<sup>38</sup> Eropi ĩgu weca ōpa arī gojarapūre pabia tuñorā: “Ihī judio masa tauro opu árīgu āhrimi,” arī gojaturapū árīyoro. Griego ya mera, Roma majarā ya mera, judio masa ya mera gojarapū árīyoro.

<sup>39</sup> Gajigu ĩgu mera erā pabia tudigu ĩgu űero arī wereniguiapu Jesure: —¿Mūhu Cristo árībeari? Mū basi, gua sāre tauque, arīpu ĩgu Jesure.

<sup>40</sup> Īgu eroparīcū peegu ĩgu mera majagupu ĩgure yūhripū:

—Eropa arībircāque. ¿Duhpigū Goāmure umupeobeari mūhu? Marire yujuro mera dipuwaja moama erā. <sup>41</sup> Maripure mari űeri dipuwajare dipuwaja moarā diaye iirā iima erā. Ihīpu űerire iibiriñumi, arīpu gajigu tarinugagupu.

<sup>42</sup> Eropa arīgu ĩgu Jesure ōpa arīpu:

—Jesu, mūhu opu árīroque árīgu yū sāre guñaque, arīpu ĩgu Jesure.

<sup>43</sup>—Mure ire arāa. Dohpagāre yū mera paraíso waīcurogue yū mera árīgūca, arīpu Jesu ĩgure.

### *Jesu sīria wapū*

*Mt 27.45-56; Mr 15.33-41; Jn 19.28-30*

<sup>44</sup> Eropi goeri boje gohra árīcū árīpehrerogue ũhre hora gohra naitīa wayoro. <sup>45</sup> Naitīaro árīrisubu Goāmū wihi majañe suhriro cāhmotara suhriro deco mera yehguea wayoro. <sup>46</sup> Eropigu Jesu turaro gaguinipu:

—Ahū, yū sīporāre mure wiaa mū dibuboro dopa, arī gaguinipu Jesu.

Eropa arītuha sīria wapū.

<sup>47</sup> Eropa wacū ĩagu surara opupu “Goāmū turagu āhrimi,” arī, “Ihī Jesu diaye ta ōagu āhrañumi,” arīpu ĩgu.

<sup>48</sup> Eropirā ero gamenererā iri eropa wacū ĩarā, Jesu ĩgu sīricū ĩarā, erā ya wihigue dujaa wañorā. Dujaa wa, bujawereri mera waha

wañorã. <sup>49</sup> Áriṗehrerã Jesu mera majarã, Galileague ĩḡu mera arinirã nome sã yoarogue Jesure ĩhu niguiñorã.

*Jesu dũpũre masa gobegue apiñorã*  
Mt 27.57-61; Mr 15.42-47; Jn 19.38-42

<sup>50-51</sup> Irisubure José waĩcũḡu ero árĩṗu. Judea yeba Arimatea waĩcũri maca majagũ árĩṗu. Eropigũ ĩḡu ðagũ, diaye iigũ árĩḡu, Goãmu ĩḡu opu árĩnũgaburire coreḡu árĩṗu. Eropigũ ĩḡu judio masa oparã mera majagũ árĩquerẽḡu ta Jesure erã wejẽdorecũ gamebirirĩṗu ĩḡu. <sup>52</sup> Eropigũ Pilato pohrogue eja, Jesu murũ dũpũre serẽṗu. <sup>53</sup> Serẽtuha Jesu dũpũre aĩ diju, ðari suhrĩro mera ĩḡu dũpũre omarũ. Eropa omatuha masa gobegue utãyegue erã seara gobegue apĩṗu ĩḡu dũpũre. Iri gobere ne yujugũ sĩridigũre yaanibiriñorã dohpa. <sup>54</sup> Irinu Sabadonu maja árĩburire erã amuyurinu árĩyoro. Sabado judio masa soorinu árĩboro merogã duhyayoro.

<sup>55</sup> Eropirã Galileague Jesu mera arinirã nome masa gobegue José wacũ ĩarã nũrsiañorã. Masa gobegue eja, iri gobere ĩha, Jesu dũpũre ĩḡu apirare ĩañorã. <sup>56</sup> Pũhrũ erã ya wihigue dujaa wañorã. Poresurire ĩḡu dũpũre sũburire amuñorã erã. Eropirã Sabado árĩcũ Goãmu ĩḡu dorerire Moiserẽ ĩḡu apirare iri dorero dopa ta erã sooñorã.

## 24

*Jesu masa mũriarũ*  
Mt 28.1-10; Mr 16.1-8; Jn 20.1-10

<sup>1</sup> Domingo árĩcũ boyorogue erã nome erã poresuri erã amurare aĩ Jesu masa gobe pohrogue aĩḡañorã. <sup>2</sup> Iri gobegue ejarã, iri gobere biharaye utãyere erã pãḡũ nugurayere ĩañorã. <sup>3</sup> Eropa ĩarã erã iri gobegue ñaja wañorã. Jesu dũpũpũre ne bocajabiriñorã erã. <sup>4</sup> ĩḡu dũpũre bocabirã, “¿Dohpa wayuri?” arĩ pepiñorã erã. Erã eropa arĩ pepi erã werenĩḡu amaro gohra perã ũma gosesiriri suhrĩcũrã erã pohro niguiñorã. <sup>5</sup> Ero erã niguiçũ ĩha, nome ḡũirã merejañorã. Eropirã ũmarũ erãre wereñorã:

—¿Duhpimorã sĩridigũ murũ ĩḡu árĩdirore ahmari mũa? Dohpagure ĩḡu ojocarĩḡu añrimi. <sup>6</sup> ĩḡu ðre marimi. Masa mũriatuhami. ¿Sohõ árĩrasubure Galileague mũa mera árĩḡu ĩḡu arĩrare ḡũari mũa? <sup>7</sup> “Yũ masure Goãmu ĩḡu obeodigũre wiarãcoma ñerãre. Erã yũre crusague pabia wejẽrãcoma erã yũre. Eropigũ yũ sĩrira pũhrũ uhrẽnu pũhrũ masa mũriagũca yuhũ,” ¿mũare ĩḡu arĩrare ḡũari mũa? arĩñorã ũmarũ.

<sup>8</sup> Erã eroparĩcũ peerã, nomeṗu ĩḡu arĩrare ḡũañorã. <sup>9</sup> Erã eropa arĩra pũhrũ erã dujaa wañorã. Once buherãre gajirã sãre irire werepehoñorã. <sup>10</sup> Erã nomeṗu María Magdalena, Juana, María Santiago pago árĩñorã. Erã nome gajirã nome sã árĩñorã Jesu buherãre eropa wererã nome. <sup>11</sup> Erã eropa arĩ werequerecũ ta Jesu buherãṗu “Erã diaye arĩbiribocoma. Eropa arĩcãrã iĩma oã nome,” arĩ pepiriñorã. Eropirã erã nomere peediabiriñorã.

<sup>12</sup> Erã eroparĩcũ peegũ, Pedropũ masa gobegue omagã, ĩagũ warũ. Iri gobegue eja, ĩḡu muhmereja ĩhame acupũ. Jesure erã omara gasiro dihtare ĩarũ. “¿Dohpa wayuri?” arĩ pepigũ ĩḡu wihigue dujaa warũ.

*Emaus waĩcũri maca maja mague Jesu dehyoapũ**Mr 16.12-13*

<sup>13</sup> Irinũre perã Jesu buherã mera majarã Emaus waĩcũri macague warã iĩñorã. Jerusalénre once kilómetros yoaro ãhraa Emaure ejaro.

<sup>14</sup> Emaugue waha, árĩpehreri Jesure eropa warare wereniguigãrã iĩñorã. <sup>15</sup> Erã eropa arĩ werenirisubu Jesupũ erã watope erã mera wapũ. <sup>16</sup> Eropirã ĩgũre ĩaquererã ta erã ĩgũre ĩha masibiriñorã.

<sup>17</sup> —¿Mũa curirã warã dohpa arĩ werenigui bujawererã iiri mũa? arĩpũ Jesu.

Īgũ eroparĩcũ erã dujanũgañorã bujawererã. <sup>18</sup> Eropigu Cleofa waĩcũgũpũ Jesure yũhripũ:

—¿Dohpague Jerusalénre erã iirare mũ dihta masibeari? arĩ serẽripũ ĩgũ.

<sup>19</sup> —¿Dohpa wahári Jerusalénre? arĩpũ Jesu.

Īgũ eroparĩcũ Cleofa yũhripũ:

—Jesure Nazare majagũre erã iirare arĩrã iiaa. Īgũ Goãmũ yare weremuhtagũ árĩrimi. Eropirã ĩgũ wereniguirire peerã, ĩgũ iira sãre ĩarã, “Turagũ ãhrimi,” arĩ pepirima masa. Goãmũ sã eropa arĩ pepicumĩ. <sup>20</sup> Mari pahia oparã, gajirã oparã mera ĩgũre wejedorerã gajirãre ohama. Erã eropa ocũ gajirãpũ ĩgũre crusague pabia wejẽama. <sup>21</sup> “Roma majarãre cóãbu Israe masa opũ árĩbu ãhrimi,” arĩ pepirĩbu gua ĩgũre. Dohpagã mera uhenũ wahaa ĩgũ sĩrira pũhrũ. <sup>22</sup> Bajamerãgã gua mera majarã nome guare ucacũ iiaa. Boyoro Jesu ĩgũ masa gobegue erã eja, <sup>23</sup> ĩgũ dũpũre erã bocabirañorã. Dũpũre bocabiri erã dujara wereama. “Guare anyua dehyoama. Jesu ojocariapũ,” arĩ wereama nomepũ. <sup>24</sup> Erã eroparĩcũ gajirã gua mera majarãpũ iri gobegue eja nome erã arĩdiro dopa ta ĩañorã. Erã sã Jesu mũrũre ĩabirañorã, arĩpũ ĩgũ Jesure.

<sup>25</sup> Īgũ eropa arĩra pũhrũ Jesu werepũ erãre:

—Mũa ne peebirã ãhraa. ¿Goãmũ yare weremuhtanirã mũra erã arĩrãre ðaro peebeari mũa? <sup>26</sup> Cristo opũ árĩboro core ĩgũ umarogue ĩgũ mũriaboro core ĩgũre ñero tariro gahmeabũ. ¿Irire masibeari mũa? arĩpũ Jesu erãre.

<sup>27</sup> Eropa arĩgũ Goãmũ yare erã gojarapũguere erã ĩgũre gojayurare Jesu werepehocãpũ erãre. Moise mũrũ ĩgũ gojarare Jesu werenũgapũ. Eropigu árĩpehrerã Goãmũ yare weremuhtanirã erã gojara sãre erãre werepehocãpũ.

<sup>28</sup> Erã erã wari macague erã ejacũ Jesupũ erãre tarigãgũ dopa iipũ. <sup>29</sup> Īgũ eropa iiquerecũ ta erãpũ ĩgũre wadobiriñorã.

—Gua mera dujaque. Ñamicague ãhraa. Nairo iica, arĩñorã erã Jesure.

Eropigu Jesu erã mera wihigue ñaja wapũ. <sup>30</sup> Pũhrũ ĩgũ erã mera erã bari mesague doaja, panre aĩ, Goãmũre “Õhaa” arĩpũ. Eropa arĩgũ iri panre nuha aĩ erãre ópũ. <sup>31</sup> Īgũ eropa iicũ ĩarã erã Jesure ĩha masiñorã pare. Erã ĩha masira pũhrũ ĩgũ dederea wapũ. <sup>32</sup> Īgũ eropa dederecũ erã erã basi ðpa arĩ wereniguĩñorã:

—Mague ĩgũ marire wereniguirisubu Goãmũ ĩgũ gojarare ĩgũ wereniguirisubu mari sĩporã mera ðaro mucubiriri mera pepiabũ mari, arĩñorã erã basi.

<sup>33</sup> Eropa arĩtuha erã mata Jerusaléngue dujaa wañorã. Eroque eja, once buherãre, gajirã mera gamenererãre bocañorã. <sup>34</sup> Erã ejacũ, once buherã õpa arĩñorã erãpure:

—Diaye ta mari Opũ masa mũriadi ãhrami. Simo Pedro ĩgũre ĩarũ, arĩñorã erã.

<sup>35</sup> Erã eroparĩcũ peerã Emaus wari maha wanirã sã erã ĩarare wereñorã:

—Jesu ĩgũ panre nuha gũare ĩgũ ocũ ĩha masiabũ gũa, arĩñorã gajirãre.

*Jesu ĩgũ buherãre dehyoapũ*

*Mt 28.16-20; Mr 16.14-18; Jn 20.19-23*

<sup>36</sup> Erã eropa arĩ wererisubu mata Jesupũ erã pohro dehyoanũgajapũ.

—¿Ãhriri mua? arĩpũ ĩgũ erãre.

<sup>37</sup> ĩgũ eroparĩcũ erã “Sĩridigũ mũrũre ĩarã ĩaa mari,” arĩ pepi, turaro gũĩñorã. <sup>38</sup> Erã eropa gũicũ ĩagũ ĩgũ erãre werepũ:

—¿Duhpirã gũiri mua? ¿Duhpirã yũre ĩarã “I diaye árĩbeaa, arĩri mua? <sup>39</sup> Yũ mojotorire yũ guburi sãre ĩaque. Mua irire ĩarã, yũre ĩha masirãca. Yũre mohmepĩque. Mohmepirã masirãca mua. Sĩridigũ mũrũ dũpũ moomi. Yũpũ dũpũcua, arĩpũ Jesu.

<sup>40</sup> Eroparĩgũ ĩgũ mojotorire, ĩgũ guburire ĩhmupũ erãre. <sup>41</sup> ĩgũ eropa ĩhmuquerecũ ta erã bũrigã mucubiri uca warã “I diaye árĩbeaa,” arĩ pepiniñorã dohpa. Erã eropa arĩ pepicũ masigũ Jesu erãre serẽpipũ:

—¿Õre bari ãhriri? arĩpũ ĩgũ.

<sup>42</sup> ĩgũ eroparĩcũ waimũ mupudigũre mome imisĩri sãre oñorã ĩgũre.

<sup>43</sup> Irire aĩ erã ĩhuro Jesu bapũ. <sup>44</sup> Batuha Jesu werepũ erãre:

—Sohõ mari árĩrasubu mua mera árĩgũ yũhũ mũare werediro dopa ta dohpaguere yũre eropa wahabũ. Goãmũ doreri Moise marire ĩgũ apira ĩgũ eropa arĩ gojadiro dopa ta yũre eropa wahabũ. Goãmũ yare weremũtanirã, Salmopũre gojanirã sã irĩbojegue erã yũre arĩ were gojayudiro dopa ta dohpague yũre eropa wahabũ. Eropa ta waro gahmeabũ, arĩpũ Jesu.

<sup>45</sup> Eropa arĩtuha Goãmũ yare erã arĩ were gojarare ĩgũ buherãre masicũ ĩpũ Jesu erãre.

<sup>46</sup> —Goãmũ yare erã gojara õpa arĩyoro: “Cristo ñero tarigũcumĩ. Eropĩgũ uñrenũ pũhrũ ĩgũ sĩrira pũhrũre ĩgũ masa mũriagũcumĩ.

<sup>47</sup> ĩgũ masa mũriara pũhrũ árĩpẽhreri yeba ĩgũ yarã Goãmũ yare buherãcoma. ‘Mua ñerire bũjawererã Jesucristo mera mua ñerire cãdijirã árĩrãca,’ arĩ wererãcoma masare. Eropa weremorã Jerusalén werenũgarãcoma,” arĩ gojañumi Goãmũ yare erã gojarapũ, arĩpũ Jesu.

<sup>48</sup> Eropa arĩtuhaja õpa arĩ werenemopũ:

—Mũapũ ĩ árĩpẽhrerire ĩanirã ãhraa. Eropirã gajirãre wererãca. <sup>49</sup> Goãmũ “ĩgũre mũare obeogũra,” ĩgũ arĩdigũre yũpũ mũare obeogũra. Eropirã Jerusaléngue ĩgũ Espĩritu Santo mũare ĩgũ eraburire coreque mua. ĩgũ mũare turarire ogũcumĩ, arĩpũ Jesu ĩgũ buherãre.

*Jesu mũtarogue mũria warũ*

*Mr 16.19-20*

<sup>50</sup> Eropa arĩtuha Jesu erãre Jerusalén árĩrãre Betaniague aĩgãpũ. Eroque eja, Jesu ĩgũ mojotori mera sĩmuju, “Ōaro árĩque,” arĩpũ erãre. <sup>51</sup> Eropa arĩtuha erãre api, ƣmarogue mũria wapũ. <sup>52</sup> ĩgũ mũriara pũhrũ erã ĩgũre umupeo, “Ōagũ, turagũ ãhrimi,” arĩ, Jerusaléngue bũrigã mucubiriri mera dujaa wañorã. <sup>53</sup> Ero ãhri ƣmũri nũcũ erã Goãmũ wihigue Goãmũre serẽmũriñorã. “Mũhũ òagũ ãhraa,” arĩ umupeoniguicãmũriñorã erã ĩgũre. Eropa ta árĩporo. Iripẽta ãhraa.

## San Juan

Ñu waicũgu ipũre gojadigu Jesucristore ïamuriñumi. Jesucristo i yebare buhecũ Ñu ïgu buhegu árĩmuriñumi. Eropigu Jesu sĩridigu masa m̄ria ïgu Pagu pohro m̄riara p̄hrũgue Ñu ipũre gojañumi.

### *Cristo masu ta árĩnugañumi*

<sup>1</sup> Negohraguere i yeba árĩboro coregue ta Cristo mata árĩmũhtamurituhapũ. ïgu Goãmu mera árĩpũ. Eropigu ïgu Goãmu ta árĩcãgu iipũ. <sup>2</sup> Matague ta Cristo Goãmu mera árĩpũ. <sup>3</sup> Eropigu i yebare, umũsire árĩpehrerire ïhacũnugudorepũ Goãmu ïgure. Eropigu masa sãre ïhacũnugudorepũ ïgure. Eropigu irire ïhacũnugupehopũ ïgu Jesucristo. Eropiro irire ïgu ïhacũnugupehobiricũ i ne mariboya. <sup>4</sup> Cristo ojocaririre ogũ àhrimi. Boyocũ mari mari basi ðaro mari ïha masiro dopa ta, ïgu mari Pagure ðaro ïha masicũ iimi marire. Eropigu i yebare eragu mari Pagure masicũ iimi masare. <sup>5</sup> I yeba majarã erã guñaricũri naitĩaro iro dopa ñeri àhraa. Jesucristo boyogoro dopa ta masa pohro eragu erã Goãmu yare masicũ iimi. Eropiro naitĩariñe, boyoriñere ne tarinũgabiro dopa ta Cristore ñeripũ ne tarinũgabiriyoro.

<sup>6-7</sup> Goãmu Ñu waicũgupũre obeomũtapũ Cristore quere aĩgã weremũhtadoregu. ïgu obeodigu Ñupũ eraa guare masare Cristo ïgu ariburire weremi. <sup>8</sup> Ñupũ Cristo árĩbirimi. Eropa árĩbiriqũregũ ta ïgu Cristore masare wereyumũhtagu árĩmi. <sup>9</sup> Cristo boyogoro dopa ta árĩgu árĩpehrerã masare Goãmũre masicũ iibu i yebaguere aridigu árĩmi. Diaye ta àhraa. ïgu masare masicũ iigu ta àhrimi.

<sup>10</sup> Eropigu Cristo i yebare árĩdigu árĩrimi. I yebare ïhacũnugudigu árĩpũ. ïgu eropa árĩquerecũ ta i yeba majarã ïgure ne ïha masibirinirã árĩma. <sup>11</sup> ïgu ya yeba ïgu masa dehyoadigu árĩrimi. ïgu ya yeba ïgu masa dehyoadigu árĩquerecũ ta ïgu ya yeba majarãpũ ïgure ne gamebirinirã árĩma. <sup>12</sup> Erã eropa gamebiriqũrecũ ta árĩpehrerã ïgure gamerãpũre erãre Goãmu ïgu porã árĩcũ iimi. ïgure umupeorãre árĩpehrerã Goãmu ïgu porã árĩcũ iimi. <sup>13</sup> Erã Goãmu porã ta àhrima. Eropirã masa erã gamero Goãmu porã wabeama. Goãmu gamero mera ïgu porã wahama.

<sup>14</sup> Eropigu Cristo ïgu masu ïgu árĩnũgara p̄hrũ mari mera árĩmi ïgu. ïgu eropa árĩcũ ïarã masare mahigu, diaye majare ïgu wereniguigu árĩcũ gua masibu. ïgu dihta Goãmu magu árĩgu turagu árĩmi. ïgu eropa árĩgu árĩcũ gua masibu. <sup>15</sup> Ñu waĩyegu ïgu buherogue Cristo eracũ ïha ðpa arĩ gaguiniguimi guare weregu:

—Sihĩ ahrimi yũ muare weredigu. ïgu yũ p̄hrũ masa dehyoadigu àhrimi. Eropa árĩqueregu ta yũ tauro turagu àhrimi. ïgu yũ masa dehyoaboro coregue árĩtuhapũ. Eropigu ïgu yũ tauro àhrimi. Yũhu muare eropa arĩ weredigu ta àhrimi ihĩ, arĩmi Ñu guare.

<sup>16</sup> ïgu Cristopũ ðagu turaro masare mahigu árĩgu marire árĩpehrerãre ðaro iiniguicãmi. <sup>17</sup> Goãmu dorerire Moisepũ

apimũhtapũ marire. Jesucristopũ Goãmũ masare ïgũ mahirire buhegũ árimi. Goãmũ ïgũ diaye werenĩguiri sãre buhegũ árimi ïgũ. <sup>18</sup> Masa ne Goãmũre ïabeama. ïgũre mari ïabiriquerecũ ta ïgũ magũ ïgũ turaro mahigũ yujugũ ta árĩgũpũ ïgũ Pagũre marire masicũ iimi.

*Gajirã Ñũ waĩyegũre serẽpiñuma*

*Mt 3.11-12; Mr 1.7-8; Lc 3.15-17*

<sup>19</sup> Judio masa oparã Jerusalén árĩrã pahiare, Goãmũ wihi mohmerã sãre Ñũ pohrogue obeoñorã. “¿Nihino ãhriri mũhũ?” arĩ serẽpidorerã obeoñorã erãre. Erã eropa arĩ serẽpirã ejacũ õpa arĩ weremi Ñupũ. <sup>20</sup> Ne yayaro mariro weremi. Diaye ta werepehocãmi gũyaro mariro.

—Yũhũ Cristo Goãmũ ïgũ masare taudoregũ ïgũ obeodigũ árĩbeaa, arĩmi ïgũ.

<sup>21</sup> ïgũ eroparĩcũ erãpũ ïgũre dipaturi serẽpima daja:

—¿Mũhũ Cristo árĩbigũ Eliapũ ãhriri? arĩma.

—Árĩbeaa yũhũ, arĩmi ïgũ.

—¿Gũa coredigũ Goãmũ yare weremũhtagũpũ ãhriri mũhũ? arĩma erã.

—Árĩbeaa yũhũ, arĩmi Ñũ.

<sup>22</sup> ïgũ eroparĩcũ erã ïgũre dipaturi serẽpima daja.

—Gũare serẽpidorenirãre gũa õaro wereboro dopa gũare wereque daja. ¿Nihinopũ ãhriri mũhũ? ¿Dohpa árĩgũno ãhriri mũhũ? arĩma erã Ñure.

<sup>23</sup> Erã eroparĩcũ õpa arĩ yũhrimi:

—Masa marirogue õpa arĩ gaguiniguigũ ãhraa yũhũ. Goãmũ ya weremũhtadigũ Isaia mũrũ ïgũ werediro dopa ta werea yũ sã: “Mari Opũ ïgũ ariboro core õarã árĩyuque ïgũre peemorã,” arĩ masare wereyu gaguiniguigũ ãhraa yũhũ, arĩmi Ñũ erãre

<sup>24</sup> Ñure serẽpirã fariseo masa erã obeonirã árĩma. <sup>25</sup> Eropirã erã Ñure serẽpima daja:

—¿Mũhũ Cristo, Elia Goãmũ ya weremũhtagũ gũa coregũ árĩbiriqueregũ ta duhpigũ masare Goãmũ ya árĩburire waĩyeri mũhũ? arĩma erã.

<sup>26</sup> Erã eroparĩcũ yũhrimi ïgũ.

—Yũ deco mera masare Goãmũ ya árĩburire waĩyera. Gajigũpũ mũa masibigũpũ mũa watope árĩtuhami. <sup>27</sup> ïgũpũ yũ pũhrũ arigũ yũ tauro turagũ ãhrimi. Õatariagũ ãhrimi. ïgũ iro dopa árĩbeaa yũpũ. Eropigũ ïgũre pepigũ, “Bu árĩgũ ãhraa yũhũ,” arĩ pepia, arĩmi Ñũ erãre.

<sup>28</sup> Eropa arĩ wereniguima erã Betaniague, dia Jordán waĩcũriya gajigũpũ masegũ, Ñũ ïgũ masare ïgũ waĩyerogue.

—*Jesu Goãmũ ïgũ obeodigũ cordero iro dopa ãhrimi, arĩ wereñumi Ñũ masare*

<sup>29</sup> Gajinũ Jesu Ñũ pohro ïgũ aricũ ïagũ Ñũ õpa arĩmi gũare:

—Ïaque. Ihĩ Goãmũ ïgũ obeodigũ ïgũ cordero iro dopa ãhrimi. Cordero mari ñeri iira dipuwajare sĩriro dopa ihĩ sĩrigũ i yeba majarãre erã ñero iirare cõãgũcumĩ ïgũ. <sup>30</sup> Ihĩ ta ãhrimi yũ õpa arĩdigũ: “Yũ pũhrũ arigũ yũ tauro turagũ ãhrimi. Yũhũ masa dehyoaboro core ïgũ matague ta árĩtuhapũ. Eropigũ ïgũ yũ tauro turami,” yũ arĩdigũ ihĩ ta ãhrimi. <sup>31</sup> Yũpũ ïre Goãmũ magũ ïgũ árĩrĩre

masibirinibũ. Eropa masibiriqueregu ta deco mera waĩyegu arigu iibu yũ acawererã Israe masa ĩre erã masiborore, arĩmi Ñũ.

<sup>32</sup> Eropa arĩtuha Ñũ werenemomi:

—Espĩritu Santo Ʃmarogue buja iro dopa bejagu Cristo weca dijarimi. Ĩgu weca ĩgu dujanugacũ ĩabũ. <sup>33</sup> Ĩgu weca dujanugajacũ ĩha ĩgure ĩha masibu. Ĩgu yare masare deco mera waĩyedore obeodigu Goãmũpũ òpa arĩ weremuhtatuhami yare: “Espĩritu Santo dijari ĩgu weca dujanugajagu ĩgu ta árĩgucumi. Ĩgũpũ Espĩritu Santore masa mera eropa árĩniguicũ iigu árĩgucumi,” arãmi Goãmũ yare. Ĩgu yare eropa werebircũ ĩha masibiriboya ĩgure. <sup>34</sup> Dohpaguere ĩgure ĩha masituhaa yũhũ. Eropa ĩha masigu “Diaye ta Goãmũ magũ ta àhrimi,” arãa yũhũ mũare, arĩ weremi Ñũ.

*Jesu buherã ĩgu ne sihunuganirã árĩñuma*

<sup>35-36</sup> Gajinũ Ñũ mera gũa perã ĩgu buherã ĩgu mera gũa niguicũ, Jesu gũa pohro tari wahgãgu iimi. Ĩgu eropa tari wahgãcũ ĩagu Ñũ dipaturi òpa arĩmi gũare:

—Īaque. ĩhĩ Goãmũ ĩgu obeodigu cordero iro dopa árĩgu àhrimi, arĩmi Ñũ.

<sup>37</sup> Ĩgu eroparĩcũ gũa perã ĩgu buherãpũ irire peerã Jesure nurusiagãbũ. <sup>38</sup> Gũa eropa nurusiagãcũ ĩagu Jesu gũare maji ĩha, serẽpimi:

—¿Nohogue wahari mũa? arĩmi ĩgu gũare. Ĩgu eroparĩcũ gũa sã ĩgure serẽpibũ.

—Buhegu, ¿nohogue àhriri mũhũ? arĩ serẽpibũ gũa ĩgure.

<sup>39</sup> —Yũ mera arinijarã, ĩarã arique, arĩmi gũare Jesu.

Ĩgu eroparĩcũ gũapũ ĩgu árĩrogue ĩarã wabũ. Irisubu ñamicague cuatro hora árĩbũ. Eopirã iri ñamire ĩgu mera dujabũ gũa.

<sup>40</sup> Gũa perã Ñure peerã, Jesure nurusiagãrã yũ mera majagu Andre mera árĩbũ. Andrepũ Simo pagu magũ arĩmi. <sup>41</sup> Eropigu ĩgu mata ĩgu tĩgure ahma boca, òpa arĩ werepũ ĩgure:

—Mesiare Goãmũ marire taubure Goãmũ ĩgu obeodigure bocabũ gũa, arĩpũ Andre Simore. Mesia ero majarã ya mera arĩrã, Cristo arĩrã iima.

<sup>42</sup> Eropa arĩtuha ĩgu Simore Jesu pohro aĩgãmi. Ĩgu pohro erã ejacũ ĩagu Jesupũ Simore òpa arĩmi:

—Mũhũ Simo waĩcũgu Jona waĩcũgu magũ àhraa. Dohpaguere mũare Cefa waĩyegũra, arĩmi Jesu Simore. Cefa ero majarã ya mera arĩrã, Pedro arĩma. Eropigu Pedro waĩcũmi pare.

*Felipere, Natanae sãre sihuñumi Jesu*

<sup>43</sup> Gajinũ Jesu “Galilea yebague ina warã,” arĩmi gũare. Eropigu erogue eja ĩgu Felipere bocatĩri òpa arĩmi:

—Yũ mera majagu árĩbu arique, arĩmi Jesu.

<sup>44</sup> Felipepũ Betsaida majagu arĩmi. Ĩgu, Andre, Pedro mera yuju maca majarã arĩma. <sup>45</sup> Eropigu Felipe Natanaere ahma, boca òpa arĩ weremi:

—Goãmũ dorerire Moise ĩgu gojarapũgue ĩgu weredigure, gajirã Goãmũ yare weremuhtanirã sã erã weredigure gũa bocabũ. Jesu Nazare majagu Josẽ magũ ĩgu ta árĩcumi, arĩmi ĩgu Natanaere.



46 —Nazareguere ne yujugu ðagu marimi, arĩmi Natanaepu.

—Īagu arique muhu, arĩmi Felipe.

47 Eropi Natanae Jesu pohro ĩgu ejacũ ĩagu Jesupu ðpa arĩmi Natanaere:

—Ihĩ dohpague arigu diaye ta ðagu judio masu gohra aħrimi. Īgure ne guyari mara, arĩmi Natanaepare.

48 Īgu eroparĩcũ peegu Natanae ĩgure serēpimi:

—¿Duhpigu yare ðaro masiri muhu? arĩmi.

—Felipe, ĩgu mure ĩgu sihuboro core, higueraġu doca mu arĩcũ ĩhabu yuhu mure, arĩmi Jesu ĩgure.

49 Īgu eroparĩcũ Natanaepu ðpa arĩmi ĩgure daja:

—Buheġu, diaye ta muhu Goãmu magu ta aħraa. Muhu Israe masa ġua opu arĩbu aħraa, arĩmi Natanae.

50 Īgu eroparĩcũ peegu ðpa arĩ yuħripu Jesu:

—Higueraġu doca yu mure ĩarare masigu yure “Goãmu magu aħraa,” arĩ umupeoa muhu yure. ¿Iri ta mure umupeocũ iiri? Mure yu eropa ĩara tauro Goãmu turari mera yu iicũ ĩaguca muhu, arĩmi Jesu Natanaere.

51 Eropa arĩgu ðpa arĩ werenemomi:

—Diaye ta mure arĩgu iiaa. Yuhu masu Goãmu ĩgu obeodigu aħraa. Ūmarogue Goãmu yarã anyua erã yu weca erã دچارicũ, erã muriacũ sãre ĩaguca muhu, arĩmi Jesu ĩgure.

## 2

*Caná waĩcũri macague erã mojoto diriri bosenuġe Jesu ĩagu waĩumi*

<sup>1</sup> Ūhrenu puħru Caná Galilea arĩri macague mojoto diriri bosenu arĩbu. Eropigo Jesu pago iri wihigue arĩmo. <sup>2</sup> Jesu ġua ĩgu buherã sã erã mojoto dirirogue sihubeonirã arĩbu. <sup>3</sup> Iri bosenu maja vino peħrecũ Jesu pago ĩgure weremo:

—Dohpaguere vino peħrea wahabu erãre, arĩmo igo Jesure.

4 Igo eroparĩcũ peegu Jesu ðpa arĩmi:

—Meho, ¿duhpigo irire yure wereri muhu? Masa erã yure masiboro duhyania dohpa, arĩmi Jesu ĩgu pagore.

5 Īgu eroparĩra puħru ĩgu pagopu mohme corerãre weremo.

—Yu magu ĩgu dorero dopa ta iique mua, arĩmo igo.

<sup>6</sup> Irisubuguere ġua acawererã judio masa Goãmu yare iimorã masare erã dupure eropa coeniguicãdorema. Eropi iri wihi seis gohra máta sorori, deco dicũri sorori arĩbu. Iri deco Goãmu yare iimorã erã coeri deco arĩbu. Iri soroburire ochenta o cien litros siħajabu decore.

<sup>7</sup> Eropigu erã mohme corerãre doremi Jesu:

—I soroburire deco mera pisãnemo uġutu dobopehocãque, arĩmi Jesu.

Īgu eroparĩcũ erãpu ðaro uġutu dobopehocãma iri soroburire.

<sup>8</sup> Erã eropa iira puħru Jesu erãre doremi daja:

—Dohpaguere iri decore waa aĩ, sihu bosenu iigure tĩarã waque, arĩmi.

Īgu eroparĩcũ peerã iri decore waa aĩġã, sihu bosenu iigure tĩama erã.

9 Erā tīacũ ĩḡupũ iri decore vino poyara decore ihriñami. Iri vinore “¿Noho majare aĩḡarayuri erā?” arĩ pepipũ ĩḡũ. ĩḡũ eropa masibiriquerecũ ĩḡũre mohme corerāpũ iri vinore tīanirāpũ masima. Sihu bosenu iigu eropa masibirinijagũ, mojoto diridigũre sihubeo<sup>10</sup> ōpa arĩ weremi:

—Gajirā masa ōari decore vino decore tīamũhtamurima. Masa erā ōaro ihrira pũhrũ ñequeyari vino decopũre tīama erā. Mũpũ ōari vino decore dihbu, pũhrũgue ḡũare tīaa, arĩmi sihu bosenu iigu mojoto diridigũre.

11 Caná Galilea árĩri macague decore vino ĩḡũ poyacũ iira ne Goāmũ turari mera ĩḡũ deyoro moanũgara árĩbũ. Eropa iigu gajirāre ĩḡũ turarire ii ĩhmũmi Jesu. ĩḡũ eropa ii ĩhmura pũhrũ ḡũa ĩḡũ buherā ĩḡũre umupeqobũ.

12 Pũhrũ Jesu, ĩḡũ pago, ĩḡũ pagũ porā, ḡũa ĩḡũ buherā mera Capernaungue sihugā wami. Eroque ejarā bajamenũrigā dujabũ ḡũa.

### *Jesu Goāmũ wihiguere ejañumi*

13 Pascua árĩcũ ḡũa judio masa bosenu árĩboro merogā dũhyanijabũ. Eropigu Jesu ḡũa mera Jerusalengue wami. 14 Eroque ejaḡũ ĩḡũ Goāmũ wihigue ñajajagũ, wecuare, ovejare, bujare duarāre bocajami. Eropigu niyeru gohrotorā erā mesarigue erā doacũ bocajami. 15 Eropa bocajagũ yuradari mera tārariidari ii, erāre árĩpehrerāre disiporogue tāraru wiumi. Eropigu niyeru gohrotorā erā ya mesarire yomemuju mehpicāmi. Erā niyeru turi sāre mehsiripicāmi. 16 Eropa iitua bujare duarāre ōpa arĩmi:

—Mũa yarā bujare aĩḡāque. Yũ Pagũ ya wihire doberi duari wihi iibiricāque, arĩmi Jesu erāre.

17 ĩḡũ eropa iicũ ĩarā ḡũa ĩḡũ buherāpũ Goāmũ ya gojarapũ erā arĩrare ḡũñabũ. Ōpa arĩ gojanirā árĩma. “Goāmũ, mũ wihire turaro mahia. Eropa mahigu mũ wihire ñero erā iicũ ĩagũ turaro bujawerea yũhũ,” arĩ gojarare ḡũñabũ ḡũa Jesu ĩḡũ buherāpũ.

18 Jesu ĩḡũ eropa iira pũhrũ judio masa oparā ĩḡũre serēpima:

—¿Duhpigũ mũhũ oāre Goāmũ wihigue árĩrāre cohā wiuari? Goāmũ irire mũre iidoreḡũ árĩcũ Goāmũ turari mera ii deyoro moaque ḡũa ĩaburire, arĩma erā Jesure.

19 Erā eroparĩcũ Jesu yũhrimi:

—I wihire mũa cóācũ, uhrenũ pũhrũ tuhajagũca yũhũ, arĩmi Jesu erāre.

20 —Uhrenũ i wihire iisome mũhũ. Cuarenta y seis bojori gohra erā iira wihi āhraa i wihi, arĩ yũhrima erā Jesure.

21 Jesu ĩḡũ eropa arĩrare erā ōaro pee masibirima. Jesu i wihire arĩḡũ ĩḡũ dũpũ waburire arĩḡũ iirimi. 22 Eropi ĩḡũ sĩrira pũhrũ, ĩḡũ masa muralara pũhrũ ḡũa ĩḡũ buherāpũ ĩḡũ eropa arĩrare ḡũñabũ. Goāmũ yare erā gojarapũre, Jesu ĩḡũ werera sāre ḡũña, “Iri diaye ta āhraa,” arĩbũ ḡũa.

### *Árĩpehrerā erā ḡũñarire Jesu masiñumi*

23 Pascua bosenu árĩcũ Jesu Jerusalengue arĩmi. Ero ĩḡũ árĩcũ masa bajarā Goāmũ turari mera ĩḡũ deyoro moarire ii ĩhmucũ ĩarā ĩḡũre umupeoma. 24 Erā eropa umupeoquerecũ ta Jesu masa erā ḡũñarire ōaro masigu, “Yũre eropa umupeoniguicārācoma,” arĩ pepibiridi

árími. <sup>25</sup> Īḡu masa erā guñarire ðaro masími. Eropa masiḡu masa ĩḡure erā pepirire serēpibirimi.

### 3

#### *Jesu Nicodemo mera weretamuñumi*

<sup>1</sup> Iri maca majagū Nicodemo waĩcūḡu, judio masa oparā mera majagū árími. Īḡu fariseo masa ya curu majagū árími. <sup>2</sup> Eropiḡu ĩḡu yuju ñami ĩḡu Jesu pohro ahri ĩḡu mera weretamupū:

—Buheḡu, mūhū Goāmū ĩḡu buhedorediḡu ĩḡu obeodigū mū árĩcū ḡua masia. Goāmū mūre ĩḡu itamubiricū mupū ĩḡu turari mera ne deyoro moarire ne iibiriboaya. Mūhū bajasuburi Goāmū turari mera ii ĩhmua, arĩpū Nicodemo Jesure.

<sup>3</sup> Īḡu eroparĩcū Jesu werepū:

—Diaye mūre arĩḡu iiaa. Ne masa dehyoagū iro dopa dipaturi masa dehyoagū dihta Goāmū yagū árĩmasimi. Mū sā eropa ta árĩmasia, arĩpū Jesu.

<sup>4</sup> —Yaho. ¿Būḡupū dohpa ii dipaturi masa dehyoabocuri ĩḡu? Īḡu pago niji suhriroguere ñajaa, dipaturi masa dehyoa masiya mariboca ĩḡure, arĩpū Nicodemo.

<sup>5</sup> Īḡu eroparĩcū Jesu yūhriḡu:

—Diaye ta arĩḡu iiaa mūre. Ne masa dehyoagū iro dopa ta deco mera, Espĩritu Santo ĩḡu turari mera dipaturi masa dehyoagū dihta Goāmū yagū árĩmasimi. <sup>6</sup> Nome nijipo sā nome árĩrā, majirāḡāre masa dehyoacū iima. Espĩritu Santopū masare Goāmū porā árĩcū iimi. <sup>7</sup> “Ne masa dehyoagū iro dopa ta dipaturi masa dehyoagū dihta Goāmū yagū árĩmasimi,” yū arĩcū ne pee gorowerebita. <sup>8</sup> Espĩritu Santo masare Goāmū porā ĩḡu iicū iiri miruñe iro dopa āhraa. Miruñe iri arirogue ahraa. Iri ariro caricū mari peea. Eropa peequererā ta iri aridirore, iri waro sāre ne masibea. Eropa ta iimi Espĩritu Santo masare Goāmū porā iigū, arĩpū Jesu Nicodemore.

<sup>9</sup> —Mū eropa arĩrire ðaro masibea, arĩpū Nicodemo.

<sup>10</sup> Īḡu eroparĩcū peegū ðpa arĩpū Jesu:

—¿Mūhū judio masare buheḡu árĩquereḡu ta, duhpigū yū arĩrire peebeari? <sup>11</sup> Diaye mūre arĩḡu iiaa. ḡua masirare, ḡua ĩarare ḡua werea. ḡua eropa werequerecū ta ne mūa ḡua acawererā judio masa ne peediabiribū. <sup>12</sup> I yeba majare yū wereniḡu queoñaquerecū ta “Diaye ta āhraa,” arĩbeaa mūa. Eropa arĩbirā Goāmū yare yū werecū sāre “Diaye ta āhraa,” arĩsome mūa.

<sup>13</sup> “Ne yujugū ũmarogue Goāmū pohrogue wagū ne dipaturi dujarisome. Yūhū Goāmū ĩḡu obeodigū yū dihta ũmarogue árĩdigū i yebaguere aribū. Eropiḡu yū dihta Goāmū yare mūare weremasia. <sup>14</sup> Iribojeguere masa mariroguere Moise mūrū añare come mera erā wéadigūre yucūḡu erā nugudigūḡue duhsiupū. Yucūḡuḡue ĩḡu duhsiudio dopa ta yare Goāmū ĩḡu obeodigūre eropa ta yū sāre duhsiurācoma. <sup>15</sup> Yūre erā eropa iicū árĩpehrerā yūre umupeorā árĩpehrerinuri Goāmū mera árĩñiḡuirācoma, arĩpū Jesu.

*Goāmū árĩpehrerāre mahimi, arĩ gojañumi Ñū*

<sup>16</sup> Eropa arĩtuha ðpa arĩnemopū Jesu:

—Goāmũ árĭpehreri yeba majaräre turaro mahimi. Eropigũ yũre ĩgũ magũre yujugũ ta árĭgũre Goāmũ obeomi árĭpehrerä yũre umupeorä peamegue erä wabiriborore. Eropirä árĭpehrerinũri Goāmũ mera árĭrãcoma erä. <sup>17</sup> Goāmũ yũre ĩgũ magũre masare dipuwaja moadoregũ oebobirimi i yebaguere. Eropigũ masare peamegue waboniräre taubure yũre obeomi.

<sup>18</sup> “Yũre Goāmũ magũre umupeoräre ne dipuwaja moasome Goāmũ. Yũre umupeobirãpũre Goāmũ dipuwaja moadoretuhami. Masa yũre Goāmũ magũre yujugũ ta árĭgũre erä umupeobirira dipuwaja, dipuwaja moagũcumi Goāmũ eräre. <sup>19</sup> Yũhũ Goāmũ magũ i yebaguere arigũ boyoriñe ðaro ĩha masicũ iro dopa ta Goāmũ yare ðaro masicũ ĩaa masare. Yũ eropa masicũ ĩicũ ĩarä yũre umupeobirã yũre gamebeama. Erä ñerire iiripũre turaro gahmema. Erä eropa gameri dipuwaja eräre dipuwaja moagũcumi. <sup>20</sup> Árĭpehrerä ñerire ĩirä erä ñero ĩirire duhudiabeama. Eropirä boyoro ĩiriñe deyoro moaro dopa ta erä ñero ĩirare deyoro moari arĩrã yũre gamebeama. <sup>21</sup> Ōarire ĩirãpũ yũre, yũ buheri sãre gahmema. Goāmũ yare erä ĩirire yũ ðaro deyoro moacã guhyasĩrabeama erä. Eropiro yũre boyoro iro dopa árĭgũre gahmema, arĩ werepũ Jesu.

*Dipaturi Ñũ waĩyegũ Jesure wereñumi*

<sup>22</sup> Pũhrũ Jesu guare ĩgũ buheräre Judea yebague sihugã wami. Eroque ejaqu ero majarã mera bajamenũrigã duja, Goāmũ ya árĭburire waĩyemi eräre. <sup>23</sup> Ñũ sã masare waĩyegũ ĩipũ Enón waĩcũri macague. Enón waĩcũri maca Salim waĩcũri maca pohro árĭbũ. Ero wũaro dia árĭbũ. Ero eropa árĭcũ ero majarã masare waĩyegũ ĩipũ Ñũ. <sup>24</sup> Erä ĩgũre peresu ĩiboro core Enóngue masare waĩyegũ ĩipũ Ñũ.

<sup>25</sup> Irisubure Ñũ buherã mera majarã bajamerãgã judio masa mera waĩyerire wereniguirã dũyasoñorã. <sup>26</sup> Tuhaja erä Ñũ pohrogue eja ĩirire wereñorã.

—Buhegũ, dia Jordán waĩcũriya gajipũ masegue mũ mera árĭdigũ “Īgũ ta Cristo ta árĭgũcumi,” mũ arĭdigupũ dohpague masare waĩyegũ ĩimi. Īgũ eropa ĩicũ árĭpehrerä ĩgũ pohrogue wahama pare, arĩñorã erä Ñure.

<sup>27</sup> Erä eroparĩcũ peegũ Ñũ yũhripũ:

—Īgũ dorerire ĩgũ opacã Goāmũ ĩgũre odi árĭmi. <sup>28</sup> “Cristo árĭbeaa yũhũ,” yũ arĩcũ mũa peeabũ. Eropã Cristo árĭbiriqũregũ ta ĩgũ core wereyubure Goāmũ ĩgũ obeodigũ ãhraa yũhũ. <sup>29</sup> Ōpã ãhraa ĩri: Mojoto diridigo ĩgo marapũ mera árĭgo wahamo. Mojoto diridigũ mera majagupũ diridigũ ĩgũ marapocũcũ ĩagũ ĩgũ werenicũ peegũ turaro mucubirimi. Eropigũ mojoto diridigũ mera majagũ ĩgũ mucubiridiro dopa ta yũ sã Cristo mera masa erä wacũ ĩagũ ðaro mucubiria. <sup>30</sup> Cristopũre umupeoro gahmea masare. Yũpũre umupeobiricãro gahmea masare, arĩ yũhripũ Ñũ.

*Goāmũ magũ ũmarogue aridigũ ãhrimi, arĩ wereñumi Ñũ*

<sup>31</sup> Eropã arĩtuhagũ ðpã arĩnemopũ Ñũ.

—Ūmarogue aridigũ árĭpehrerä nemoro turagũ ãhrimi. Mari masa i yeba majarã ãhraa. Eropirã i yeba majare wereniguia mari.

Ɛmarogue aridiguᵑu árĩpehrerã nemoro turagu àhrimi. <sup>32</sup> Īgu ĩarare, ĩgu peerare ĩgu weremi. Īgu eropa werequerecũ ta masa ĩgure ne peediabeama. <sup>33</sup> Ɛmarogue aridigu ĩgu wererire masa peerãᵑu, “Goãmu diaye árĩgu tiimi,” arĩrã iima erã. <sup>34</sup> Ihĩ Cristore Goãmu ĩgu oboedigure Espĩritu Santo ya turarire opehoñumi Goãmu. Eropigu ĩgu Goãmu ya wereniguirire wereniguimi. <sup>35</sup> Goãmu ĩgu magure turaro mahimi. Eropigu árĩpehrerire, árĩpehrerã sãre erã opu árĩdoremi Goãmu ĩgu magure. <sup>36</sup> Goãmu magure umupeorãᵑu umuri nucu Goãmu mera árĩniguicãrãcoma. Īgu magure tarinugarãᵑu Goãmu pohro wasome. Eropirã umuri nucu umaroguere árĩsome. Eropigu Goãmu erãre turaro dipuwaja moagucumi, arĩᵑu Ñu masare.

## 4

### *Jesu Samaria majago mera weretamuñumi*

<sup>1</sup> Jesu Ñu nemoro bajarã ĩgu buherã ĩgu opacũ, Ñu nemoro masare ĩgu waĩyecũ fariseo masa peenõrã. <sup>2</sup> Erã eropa peebeoquerecũ ta Jesupu ĩgu basi masare waĩyebirimi. Gua ĩgu buherãᵑu masare waĩyebu. <sup>3</sup> Fariseo masa erã eropa masicũ peegu Jesupu Judea yeba árĩdigu Galilea yebague sihu dujaa wami guare.

<sup>4</sup> Galileague warã gua “Samaria yebare tarigã warãca,” arĩbu gua. <sup>5</sup> Eropa tarigã Samaria yebague árĩri macague Sica waĩcari macague ejabu. Iri maca pohro iribojegue Jacobo muru ĩgu magu José murure ĩgu ora yeba árĩyoro. <sup>6</sup> Ero Jacobo muru ĩgu deco ihrira gobe árĩbu. Eropigu Jesupu yoarogue aridigu, ĩgu oẽtaria wagu iri gobe pohro doajami. Irisubu ĩgu ero doajarisubu goeri boje gohra árĩbu. <sup>7-8</sup> Gua ĩgu buherãᵑu macague gua barire asurã wara puhrũ yujugu ta ĩgu erore dujadoami. Eropigo Samaria majago iri gobegue igo deco waago eracũ Jesu igore deco serẽᵑu:

—Deco oque yure, arĩᵑu.

<sup>9</sup> —Mũhu judio masũ àhraa. Yuru Samaria majago àhraa. ¿Duh-pigu yure decore serẽri mũhu? arĩᵑo igo Jesure. Judio masa Samaria majarãre game ïadiabirã árĩñõrã. Eropigo igo eropa arĩᵑo Jesure.

<sup>10</sup> Igo eropa arĩra puhrũ Jesu igore wereᵑu:

—Mure Goãmu ĩgu itamudiarire masigo árĩgo, mure decore serẽgure masigo árĩgo, mupu yurure serẽboaya. Mu eropa serẽcũ gaji decore oboaya yũhu mure. Iri decõᵑu ojocaríniguicãcũ ĩiri àhraa, arĩᵑu Jesu igore.

<sup>11</sup> Īgu eroparĩcũ peego igo yuhriᵑo ĩgure:

—Ne mure sorobu mara. I gobe sã uhcãri gobe àhraa. ¿Eropigu i ojocaricũ ĩiri decore nohogue waabocuri mũhu? <sup>12</sup> Gua ñecu muru Jacobo iribojegue majagu muru i gobere guare apimuripu. Īgu, ĩgu porã, ĩgu ejorã sã i decore ihrimuriñõrã. “Gaji decore oboaya yũhu,” mu arĩgu, ¿Jacobu tauro turagu àhriiri mũhu eropa arĩ pepigu? arĩᵑo igo.

<sup>13</sup> Igo eroparĩcũ Jesu yuhriᵑu:

—Árĩpehrerã i decore ihrirã dipaturi ñemesiburãcoma. <sup>14</sup> Yaha decõᵑure ihrirã ne dipaturi ñemesibusome. Eropirã yaha decore ihrirã Goãmu mera eropa árĩniguicãrãcoma. Maũ dipagãgue eropa deco wiriniguuro dopa ta yaha deco ne pehresome, arĩᵑu Jesu.

15 Īḡu eroparīcũ nomeopu ðpa arīpo:

—Ne dipaturi yu ñemesibubiriboro dopa iri decore oque yare. Eropigo dipaturi õguere ne deco waasome, arīpo igo.

16 Igo eroparīcũ Jesu igore werepũ:

—Irisubure tamerare mu marapũre sihugo waque. Sihutuha õgue arique ĩḡu mera, arīpu Jesu igore.

17 —Marapũ marigo āhraa yũhu, arīpo igo.

—Diaye ta arāa mũhu. 18 Mũhu cincosuburi marapũcutuharibũ. Eropigu dohpague mu mera arĩḡu mu marapũ gohra arĩbeami. Eropigo “Marapũ marigo āhraa,” arĩgo, diaye ta arāa mũhu, arīpu Jesu igore.

19 Īḡu eroparīcũ peego ðpa arīpo igo:

—Ne, Goāmũ yare weremũhtagũ āhraa mũhu yu pepicũ. 20 Gũa ñecu sũmarā mũra irigu utāḡugue Goāmũre umupeomũriñorā. Eropirā mũapũ judio masa “Jerusalẽngue masare Goāmũre umupeoro gahmea,” arĩmũribũ mũa judio masa, arīpo igo.

21 Igo eroparīcũ Jesu yũhripu:

—Nomeo, yũpũre peenique. Pũhrũguere irigu utāḡugue, Jerusalẽngue sãre mari Pagũre umupeosome mũa. 22 Mũapũ mũa umupeorire masibea. Masare taubupũ judio masũ āhrimi. Eropirā gũa judio masapũ gũa umupeogũre masia. 23 Dohpague pũhrũgue sãre Goāmũre diaye umupeorā erā õaro pepiri mera ĩḡure umupeorācoma. Eropa mari umupeocũ gahmemi Goāmũ. 24 Goāmũ dũpũ marigu ta ĩḡu arĩcũ masa ĩḡure ĩabeama. Eropiro ĩḡure umupeori mera erā õaro pepiri mera ĩḡure õaro diaye umupeoro gahmea masare, arīpu Jesu igore.

25 Īḡu eroparīcũ igo yũhripo:

—Mesia, “Cristo,” erā arĩḡupũ, masare taubu ĩḡu ariburire masia yũhu. Īḡu arigu marire arĩpehrerire buhepehogũcumi, arīpo igo.

26 —Yũhu ta āhraa Cristo, arīpu Jesu igore.

27 Īḡu eropa arĩ weretamurisubũ guapũ ĩḡu buherãpũ erabũ. Jesu nomeo mera ĩḡu wereniguicũ ĩarã uca wacarabũ. Eropa ucaquererã ta “¿Dohpa gahmeri mũhu? ¿Dohpa arĩri mũhu igore?” arĩ serẽpiñabiribũ. 28 Eropigo nomeo igo sorobure ero duhudobocã, macague waha wamo. Eja masare werego ðpa arīpo:

29 —Yu iirare werepehogũre ĩarã arique mũa. ¿Īḡu diaye ta Cristo arĩbocuri? ĩarã arique mũa, arīpo igo.

30 Igo eroparīcũ iri maca majarã Jesure ĩarã arimorã iima.

31 Irisubure gũa Jesu buherã ĩḡure turaro badoreribũ.

—Buhegu, baque, arĩribũ gũa.

32 —Gajiropa arĩri barire opaa yũhu. Irire mũa masibea, arĩmi ĩḡu guare.

33 Īḡu eroparīcũ peerã gũa basi ðpa arĩ wereniguibũ:

—¿Gajirã ĩḡure barire otuhayuri? arĩbũ gũa basi. Gũa eroparīcũ Jesu weremi:

34 —Masapũ basũama. Yũre obeodigu ĩḡu gamerire iigu sũaa yũpũ.

35 “Wapicũrã aberi duhyaa mari dũca aĩboro,” pohe opu ĩḡu arĩ pepimĩ. Mũapũ “Goāmũ yare gũa masare wereboro duhyania,” arĩ pepibircãque. Diaye arĩḡu ĩiaa mũare. Dohpague tamerare masare

wererã waque. Masare ãaque. Dohpague tamerare yu buherire masa erã peeburisubuno árĩro tíiaa. <sup>36</sup> Dũcare aĩrãre erã wajayero dopa ta, yaharã árĩmorãre aĩnirãre yahare buhenirãre wajayegura yũhũ. Erã eropiĩra waja õaro wajayegura erãre. Erã eropa buhecũ peerã yu buherire peenirã yaharãpu Goãmu mera umuri nucũ árĩrĩcomã. Eropirã erãre buhemũhtanirã, puhru yaharã árĩcũ iirã sã yujuropa mucubirima. <sup>37</sup> “Yujugu otemũhtagu ãhrimi. Gajigupu dũcare aĩgu ãhrimi,” arĩmuriñorã iribojeguere. Iri diaye ta ãhrraa. Erã eropa arĩdiro dopa ta yujurãyeri yahare weremũhtarã ãhrima. Gajirã yahare buhe yaharã árĩcũ iirã ãhrima. <sup>38</sup> Pohe opu ĩgure mohmerã erã otebirinirã árĩquerẽcũ ta erãre dũcare aĩdoregu obeomi. Eropa ta masare buhemũhtabirinirã mũa árĩquerẽcũ ta erã yũre umupeocũ iidoremorãre obeoa mũare. Gajirãpu erãre buhemũtatuhama. Erã buhenirãguere dipaturi buhenemorã, yaharã árĩcũ iirãca mũarũ. Eropirã buhemũhtarãpu erã itamuro mera gajirãre yaharã árĩcũ iirãca, arĩmi Jesu guare.

<sup>39</sup> Irisubure Samaria majago, “Yu iira mũrare ĩgu werepehoami,” igo arĩcũ peerã Samaria majarã bajarã Jesure umupeoma. <sup>40</sup> Eropirã Samaria majarã Jesu pohro ejarã, “Gũa mera dujanique,” arĩma ĩgure. Erã eroparĩcũ gũa penũ ĩgu mera ero dujanibũ. <sup>41</sup> Gajirã sã bajarã Jesure peerã umupeoma. <sup>42</sup> Őpa arĩma masa nomeore:

—Nere mũ arĩrãre peerã Jesure umupeonũgarabũ. Dohpague tamerare ĩgu wereniguirire gũa basi peerã ĩgure õaro umupeoa. Eropirã ĩgũpũre peerã i yeba majarãre peamegue wabonirãre taubu diaye ta ĩgu árĩcũ, dohpague gũa masia, arĩma masa Samaria majagore.

*Opu magũre dorecũgure õagu wacũ iĩhumi Jesu*

<sup>43</sup> Penũ puhru Jesu guare Galileague sihu wami daja. <sup>44</sup> Neguere õpa arĩmũrimi guare Jesu: “Goãmu ya weremũhtagure ĩgu ya yeba majarã ĩgure umupeobeama,” arĩmũrimi Jesu. <sup>45</sup> Eropirã gũa Galileague ĩgu mera ejacũ ero majarã ĩgure õaro bocatĩrima. Ero core Jerusalengue bosenu árĩcũ Jesu ĩgu iirare ĩanirã árĩma erã.

<sup>46</sup> Eropi Canã Galilea arĩri macague ĩgu decore vino wacũ ĩgu iira macague waha wabũ gũa ĩgu mera daja. Canã pohro arĩri maca Capernaum waĩcũri maca opu magũ dorecũgu iipũ. <sup>47</sup> Eropigu Jesu Judea árĩdigũ ĩgu Galileague ejari querere peepũ. Irire peegu Jesu pohrogue erami.

—Yu magũ sĩrigũ iiami. Eropigu ĩgure õagu wacũ iigu ariqũe, arĩ yojaro mera sihumi ĩgure.

<sup>48</sup> ĩgu eroparĩcũ peegu Jesu yũhrimi:

—Goãmu turari mera yu deyoro moarire ĩabirã, ne yũre umupebeaa mũa, arĩmi Jesu.

<sup>49</sup> ĩgu eroparĩcũ peegu opu opu õpa arĩmi:

—Opu, yu magũ ĩgu sĩriboro core ariqũe, arĩmi ĩgu Jesure.

<sup>50</sup> —Dujaaque. Mũ magũ ojocarigũcumi, arĩmi Jesu.

ĩgu eroparĩcũ peegu, “ĩgu arĩdiro dopa ta ojocarigũcumi yu magũ,” arĩgu opu dujaa wami. <sup>51</sup> Eropa dujaniguigũre ĩgu pohro majarã ĩgure bocatĩri wereñorã.

—Mũ magũ masa wahãmi, arĩ wereñorã erã ĩgure.

52 —¿Noho gohra abe árĩcũ òagũ wahári ĩgu? arĩ serēpipũ ĩgu pohro majarāre.

—Cārũre goeri boje pũhrũgā ta nimacũri tahriabũ ĩgũre, arĩñorā erā ĩgũre.

53 Erā eroparĩcũ òpa arĩ pepipũ ĩgu: “Jesu yũre ‘Mũ magũ masa wahámi,’ arĩ werera pũhrũ ta nimacũri tahria waya,” arĩ pepipũ opũrũ. “Diaye ta arāñumi yũre,” arĩgũ, ĩgu árĩpehrerā ĩgu acawererā mera Jesure umupeoñorā.

54 Jesu Judea árĩdigũ Galileague ĩgu ejara pũhrũ opũ magũre ĩgu òagũ wacũ ĩgu iira mera mari queocũ pesubu Goãmũ ĩgu turari mera ii ĩhmúmi Jesu.

## 5

### *Curimasibigũre òagũ wacũ iĩñumi Jesu*

1 Pũhrũ judio masa Goãmũre gũa umupeori bosenu árĩcũ gũa Jesu mera Jerusaléngue ejabu daja. <sup>2</sup> Ero maca ñajari disiporo oveja waĩcũri disiporo pohro guhari gobe árĩbũ. Gũa judio masa ya mera Betesda waĩcũri gobe árĩbũ. Iri deco gobe pohro cinco gohra tiaya mariri tari dipabu árĩbũ. <sup>3</sup> Iri tari dipabugue bajarā dorecũrā oyarāre ĩabu. Cuiiri ĩhajabirā, curimasibirā, gõari marirā, erā iri gobe pohro oyama. Deco ñohmeborore corerā iĩñorā. <sup>4</sup> Erogue دچارĩgu iri gobe maja decore yujuyerisuburi ñohmecũ ĩpũ anyu. Iri gobe maja deco ĩgu ñohmera pũhrũ ñaja guhamũhtagupũ òagũ wapũ. Dohpa árĩri dorere opagũ òagũ wapũ. <sup>5</sup> Eropĩgu ero yujugũ dorecũgũ oyami. ĩgu treinta y ocho bojori gohra dorecũgũ árĩpũ. <sup>6</sup> Ero ĩgu oyacũ ĩagũ ĩgu eropa yoari boje ĩgu dorecũcũ masimi Jesu ĩgũre. Eropa masĩgu ĩgũre serēpimi:

—¿Õari dũpũ dore marĩgu árĩdiari mũhũ? arĩmi Jesu ĩgũre.

<sup>7</sup> ĩgu eroparĩcũ dorecũgũrũ yũhrimi:

—Iri deco ñohmecũ yũre decogue aĩ acugũ marimi. Iri decogue yũ ñajadiaquerecũ ta gajirāpũ yũ core yuu ñajamũhtama, arĩmi ĩgu Jesure.

<sup>8</sup> —Wahgānũgajaque. Mũ omasiariñere aĩ, mũ guburi mera cũhrapi wahgā waque, arĩmi Jesu ĩgũre.

<sup>9</sup> ĩgu eroparĩcũ ta dorecũgũrũ wahgānũgaja ĩgu omasiariñere aĩ waha wami. Irĩnũ Sabado gũa judio masa soorĩnũ árĩbũ. <sup>10</sup> ĩgu eropa òagũ wadĩgu ĩgu omasiariñere aĩgācũ ĩarā judio masa gũa oparāpũ dorecũdigũre òpa arĩ wereñorā:

—Dohpagāre Sabadonũ mari soorĩnũ árĩquerecũ mũ yañe omasiariñere aĩ wahgāa mũhũ. Eropa ĩĩgu mari dorerire tarĩnũgagũ ĩaa, arĩñorā erā ĩgũre.

<sup>11</sup> —Yũre yũ dorecũrĩre taudĩgũrũ òpa arāmi yũre, arĩpũ dorecũdigũrũ. “Mũ omasiariñere aĩ, mũ guburi mera cũhrapi wahgāque,” arāmi yũre, arĩ yũhrĩpũ dorecũdigũ mũrũpũ erāre judio masa oparāre.

<sup>12</sup> —¿Iriire mũre eropa arĩdigũrũ nihino āhriri ĩgu? arĩ serēpiñorā erā ĩgũre.



13 Ero bajarã masa erã árĩcũ ĩagu Jesupũ waha wadigu árĩmi. Eropigu dorecudigupũ ĩgure ðagu wacũ iidigu ĩgu waĩre masibiripũ.  
14 Pũhrũ Goãmu wihigue gũa ĩgure bocatĩricũ Jesu ĩgure weremi:

—Peenique mũhu yũre. Dohpaguere ðaro dũpũcũa mũhu. Ñerire iinemobiricãque. Dipaturi iinemogu mũ dorecudiro tauro wagũca, arĩmi Jesu ĩgure.

15 ĩgu eropa arĩra pũhrũ dorecudigu judio masa oparã ĩgure serẽpinirã pohrogue eja, werepũ erãre:

—Jesu waĩcũgu yũre ðagu wacũ iiami, arĩ werepũ ĩgu.

16 Eropi Sabado árĩcũ Jesu dorecũgure ĩgu dorere ĩgu taucũ masirã judio masapũ ĩgure ñero iinũgañorã. Eropirã erã ĩgure wejẽdiariñorã.

17 Eropa ñero erã iidiarire masigu Jesupũ weremi erãre:

—Yũ Pagũ dohpaguere mohmenimi. Yũ sã eropigu mohmenigu iiaa, arĩ weremi ĩgure ñero iidiarãre.

18 ĩgu eroparĩcũ judio masa gũa oparã ĩgu mera turaro guarã, ero core erã arĩdiro tauro ĩgure wejẽdiañorã. Sabadonũre erã soorinũre ĩgure ðagu iicũ ĩarã erã guañorã. Eropa guarã Goãmũre ĩgu “yũ Pagũ,” ĩgu arĩcũ peerã erãpũ tauro guañorã. “‘Yũ Pagũ,’ arĩgu Jesu ĩgu basi ‘Goãmũ mera yujuro mera ãhraa,’ arĩ guñacumi ĩgu,” arĩ pepiñorã judio masa gũa oparã.

*Jesu “Goãmũ ĩgu obeodigu ãhraa yũhu,” arĩ masare wereñumi*

19 Eropi Jesu erãre weremi:

—Diaye mũare arĩgu iiaa. Yũhu Goãmũ magũ yũ gamero iigu iibeaa. Yũ Pagũ ĩgu iirare ĩagu irire iiaa. 20 Yũ Pagũ yũre ĩgu magũre mahimi. Eropigu ĩgu iirare yũre ii ĩhmupehomi. I dohpaguere ĩgu turari mera yũ iira tauro ĩgu gajire iidoregũcumi yũre. ĩgu eropa iidorecũ ĩgu turari mera ii ĩhmũcũca ĩgure yũhu. Eropa yũ ii ĩhmucũ ĩha ũcarãca mũa. 21 Yũ Pagũ sĩrinirãre ĩgu masuro dopa ta yũ sã yũ gamerãre masugũra. 22-23 Ne yũ Pagũpũ masa erã ñeri iira dipuwaja, ĩgu basi dipuwaja moagu moabeami. Yũpũre irire erã ñeri iira dipuwaja dipuwaja moabure apimi. Erã ĩgure umupeodiro dopa ta yũ sãre umupeoborore eropa apimi. Eropirã yũre ĩgu magũre umupeobirã yũ Pagũ sãre umupeobeaa mũa. ĩgu ãhrimi yũre obeodigu, arĩmi Jesu.

24 Eropa arĩtuha ðpa arĩ werenemomi:

—Diaye mũare arĩgu iiaa. Yũ wereniguirire peerã yũre obeodigũre umupeorã ũmũri nũcũ ũmarogue eropa árĩniguicãrãcoma. Eropigu erãre dipuwaja moasome yũhu. Eropirã erã peamegue wabonirã tarirãcoma. 25 Diaye ta mũare arĩgu iiaa. Peamegue wamorã yũre Goãmũ magũre erã peeburisubũ dohpague ãhraa. Pũhrũ sãre erã yũre peerãcoma daja. Eropa peerã peenũrũrãpũ Goãmũ mera eropa árĩniguirãcoma. 26 Goãmũ yũ Pagũpũ erãre eropa árĩniguicũ iigu ãhrimi. Eropigu yũre ĩgu magũre erãre eropa árĩniguicũ iibure árĩdoremi ĩgu yũre. 27 Eropigu yũhu masũ Goãmũ ĩgu obeodigu árĩcũ ĩgu masare dipuwaja moadorerire apimi yũre. 28 Ire peerã, pee ũcabiricãque mũa. Gajinũguere arĩpehrerã sĩrinirã masa goberigue arĩrã yũ wereniguicũ peerãcoma. 29 Eropa pee wahgãrã ðarire iinirã mũra ũmũri nũcũ Goãmũ mera árĩmorã masa mũariãcoma. Ñeri

iinirã m̄rapu ñerire erã iira dipuwaja peamegue warãcoma, arĩ weremi Jesu.

<sup>30</sup> Eropa arĩtuha õpa arĩ werenemomi:

—Yu gamero ne gajinore iibeaa. Ne yu basi yu gamero iibeaa. Yure obeodigu ïgu gamero dopa ta iiaa. Eropigu ïgu arĩdiro dopa ta dipuwaja moaa. Eropigu masare yuhũ dipuwaja moagu diaye ta iiaa. <sup>31</sup> “Yuhũ Goãmu magu ïgu obeodigu ãhraa,” yu basi arĩ werecũ, “Mu wereniguri ne diaye arĩbeaa,” arĩboca mua. <sup>32</sup> Gajigu ãhrimi yure weregu. ïgu Goãmu ãhrimi. ïgu yure werera diaye ta ãhraa. Irire yu õaro masia. <sup>33</sup> Mua gajirãpũre Ñure yure serẽpidore obeobũ. Eropigu ïgu sã diaye ta weremi muare. <sup>34</sup> Masare yure “Goãmu ïgu obeodigu ãhrimi,” arĩ weremorãre amabeaa yũpũ. Eropa amabiriqueregu ta Ñu masu ïgu arĩquerecũ ta “Yure diaye ta weremi,” arãa. Mua yure umupeoburire, mua peamegue wabonirã mua tariburire yure ïgu werera “Diaye ta ãhraa,” arĩ weregu iiaa. <sup>35</sup> Ñu muare buhemũtagu bajamenurigã buhemi muare. ïgu eropa buhecũ peerã bajamenurigã mucubiriribũ mua. <sup>36</sup> Ñu yu arĩricurire weremi muare. ïgu wereri mera yu arĩricurire masiquererã yu iirire ãarã tauro masirãca. Goãmu yu Pagu ïgu turari mera ïgu yure iidorerare dohpague iigu iiaa. Ire yu iicũ ãarã diaye ta Goãmu ïgu obeodigu yu arĩcũ masirãca mua. <sup>37</sup> Eropiro yu Pagu yure obeodigu ïgu basi yuhũ ïgu obeodigu arĩrĩre arĩ weremi muare ïgu yare erã gojarapũgue. ïgu eropa arĩ werequerecũ ta ïgu wereniguirire ne peebeaa mua. Eropi mua ïgure ne ãabeaa. <sup>38</sup> Yure Goãmu ïgu obeodigũre mua ne peediabeaa. Eropirã mua ne Goãmu yare gamebeaa. <sup>39</sup> Goãmu yare erã gojarapũre mua õaro buhea. Eropa buherã “Gua ipũre buherã umuri nũcu Goãmu mera eropa arĩniguirãca,” arãa mua. Iripũ ta yure werea. <sup>40</sup> Iripũ yure werequerecũ ta m̄rapu yure gamebeaa. Umuri nũcu Goãmu mera mua arĩniguirire yuhũ ogu arĩquerecũ yure gamebiribũ mua, arĩ weremi Jesu erãre.

<sup>41</sup> Eropa arĩtuha õpa arĩnemomi:

—Yure masa erã umupeorire amabeaa yuhũ. <sup>42</sup> Eropa amabiriqueregu ta Goãmure mua mahibiricũ masia yuhũ. <sup>43</sup> Goãmu yu Pagu ïgu dorero dopa ta yu ariquerecũ ta mua yure gamebeaa. Gajigũpũre Goãmu ïgu obeobiridigu ïgu arĩquerecũ ta ïgũpũre gamerãca mua. <sup>44</sup> Gajirã masa muare erã umupeocũ gahmea mua. Goãmu mua mera ïgu mucubiririre gamebeaa mua. ïgu dihta Goãmu gohra ãhrimi. Eropa gamebirã yure peebeaa mua. Yure umupeobeaa mua. <sup>45</sup> Muare yu Pagũguere ne weresãsome yuhũ. Irire pee masique mua. Moise ïgu gojarapũpũ muare weresãroca. “Iripũ maja dorerire iipehorã, Goãmu pohro warãca mua,” arĩripũpũ muare weresãroca. <sup>46</sup> Moise ïgu gojarapũ yũpũre weremũhtayoro. Eropirã iripũre õaro umupeorã yu sãre umupeoboaya mua. <sup>47</sup> Moise ïgu gojarapũre mua õaro peebirã, yaha wereniguri sãre peesome mua, arĩmi Jesu erãre.

## 6

*Cinco mil umare masare bajarã gohrare bari oñumi Jesu  
Mt 14.13-21; Mr 6.30-44; Lc 9.10-17*

<sup>1</sup> Eropa ĩġu buhera pũhrũ Galilea waĩcũri ditaru gajipũ masegue gũa Jesu mera taribuja wabũ. Galilea ditaru ta Tiberia waĩcũbũ. <sup>2</sup> Ero core Galilea yeba Jesu dorecarũre ĩġu õarã ĩġu iicũ masa ĩanirã árĩma. Erã eropa ĩanirã árĩrã Jesu ĩġu taribujacũ ĩarã masa bajarã ĩġure nũrsia taribujama. <sup>3</sup> Eroque eja, gũa ĩġu buherã ĩġu mera utãġugue mũria, doabũ. <sup>4</sup> Iriũ Pascua waĩcũri bosenu árĩboro judio masa bosenu árĩboro merogã duhyabũ. <sup>5</sup> Eroque doagũ, Jesu masa bajarã ĩġu pohro erã aricũ ĩhabeomi. Eropa ĩhabeogũ Felipere serẽpimi Jesu:

—¿Oã masa erã baburire nohogue asũrãcũri mari? arĩ serẽpimi.

<sup>6</sup> Jesu ĩġu basi ĩġu iiburire masiqueregũ ta Felipere serẽpi ĩami, “¿Dohpa yũhrigũcũri?” arĩġũ. <sup>7</sup> ĩġu eropa serẽpicũ Felipepũ yũhrimi: —Doscientos niyerupũri waja mera mari asũquerecũ ta, masare yujurãyerire mũtarigã barire mari guerequerecũ ta ne sihajasome, arĩmi Felipe Jesure.

<sup>8</sup> Gũa mera majagũ Andrepũ Simo Pedro pagũ magũpũ Jesure weremi.

<sup>9</sup> —Cinco pan dipuru, perã wai ihĩ majigũ ohõ opami. Iri pan dipurugã ĩġu opaquerecũ ta masapũ bajarã gohra àhrima. Eropiro i merogã bari ne sihajasome, arĩmi Andre.

<sup>10</sup> —Masare doadoreque mũa, arĩmi Jesu gũare ĩġu buherãre.

Ero mũtarigã taacũro árĩbũ. Gũa doadorecũ masa árĩpẽhrerã doajapehrea wama taa weca. Ñma dihtare queocũ cinco mil gohra árĩma. <sup>11</sup> Erã eropa doajacũ ĩagũ Jesupũ panre aĩ Goãmũre “Õhaa,” arĩmi. Eropa arĩtuha gũare ĩġu buherãre gueredoremi. ĩġu eropa gueredorecũ gũapũ erã doarãre guere wahgãbũ. Perã wai sãre aĩ guere wahgãbũ. Árĩpẽhrerãre erã sihajaro barire guerebũ. <sup>12</sup> Eropirã masa erã yapicũ ĩagũ Jesu gũare doremi:

—Erã ba duharire aĩque. Eropirã iri barire ne dedeosome, arĩmi.

<sup>13</sup> ĩġu eroparĩcũ gũapũ cinco pan dipuru duhyarare gũa gameneocũ doce puiro gohra wiribũ. <sup>14</sup> Eropirã masa Jesu Goãmũ turari mera iri deyoro moariñere ĩġu iicũ ĩarã õpa arĩma:

—Diaye ta àhraa. Ihĩ Goãmũ ya wereniguigũ i yebague aridigũ mari coredigũ ta àhrimi, arĩma erã.

<sup>15</sup> Eropirã erã Jesure erã opũ árĩbũre acudiarima. Jesu irire masigũ dipaturĩ yujugũ ta utãġugue waha wami.

*Jesu deco weca curiñumi*

*Mt 14.22-27; Mr 6.45-52*

<sup>16</sup> Ñamicague gũa ĩġu buherã dihta ditarugue buhabũ. <sup>17</sup> Eroguere buhaja dohodirugue ñaja, Capernaum waĩcũri macague taribujabũ. Gũa eropa taribujacũ ñamigue árĩbũ. Eropigũ Jesu gũa pohrogue arinibirimi dohpa. <sup>18</sup> Mirũñe turaro aricũ gũa taribujariyaguere pãgũri wahgãbũ. <sup>19</sup> Cinco kilõmetros gohra gũa taribujara pũhrũ Jesu gũa pohrogue arimi. Deco weca nigui wahgãricũ ĩabũ gũa ĩġure. Eropa gũa pohro ĩġu aricũ ĩarã gũa gũibũ. <sup>20</sup> Gũa gũicũ ĩagũ ĩġu gũare weremi:

—Ne yũre ĩha ãcabiricãque. Guñaturarã árĩque. Yũhũ ta àhraa, arĩmi Jesu.

<sup>21</sup> ĩġu eroparĩcũ peerã gũa ĩġure mucubiriri mera bocatĩri ñajadorebũ. ĩġu ñajara pũhrũgã gũa wara yebaguere taribujabũ.

*Masapu Jesure amañuma*

22-24 Gajinu masa ero dujanirãpu gamenerenugañorã daja Jesure corerã. Iri ñamire gwa yaru mera gwa dihta taribujacũ ñanirã árĩma erã. Jesu gwa mera igu wabiricũ sãre ñanirã árĩma erã. Eropa gamenererã Jesure bocabiriñorã. Bocabiri ero pohro Tiberiague ariri gasi tuhajacũ ñañorã. Jesu Goãmure “Õhaa,” arĩ, masare igu bari guerediro pohroñarigüe árĩyoro. Eropirã Jesu gwa sã maricũ ñarã, iri gasigüe ñaja, Capernaumgue gware nurusia taribujajama. Jesure ahma nurusiagãrã iima erã.

*Yuhu ojocaririre ogu, bari iro dopa árĩgu ãhraa, arĩ wereñumi Jesu masare*

25 Ditarure taribuja, gwa árĩroque eja, Jesure bocajanjarã erã serẽpima igure:

—Buhegu, ¿dohpãricũ ahrari muhu õguere? arĩ serẽpima erã igure.

26 Erã eropa arĩ serẽpicũ, Jesu erãre weremi:

—Diaye arĩgu iiaa muare. Deyoro moarire yu iiquerecũ ta yurure umupeobea mwa. Yure umupeobiriquererã ta yure ahmaa mwa. Yu mera pagari baha, mwa yapinirã árĩrã yure amagãrirã iiaya daja. 27 Bari ne árĩniguibeaa. Puhru pehrea wahaa iri. Eropirã irire eropa amaniguibiricãque. Gaji bari gajiropa árĩri baripure amaque mwa. Iri barire amarã umuri nucu Goãmu mera árĩrãca. Eropiro iri bari tamera ne pehrebeaa. Iri barire yuhu masu Goãmu igu obeodigu muare ogura. Goãmu yu Pagu yure irire odoregu ãhrimi. Igũ obeodigu yu árĩrere ihmutuhami muare, arĩmi Jesu.

28 Igũ eroparicũ erã serẽpima igure:

—¿Goãmu iidorerire iimorã dohpa iirãcuri gwa? arĩ serẽpima erã.

29 —Ire Goãmu muare iidoremi: “Yure igu obeodigure umupeoque,” arĩ doremi Goãmu, arĩmi Jesu.

30 Igũ eroparicũ peerã erã õpa arĩma:

—Goãmu igu obeodigu mu arĩgu igu turari mera ii ihmuque gware mure gwa õaro umupeoborore. ¿Ñehenore iibocuri muhu?

31 Mari necu sumarã murague iribojegue majarã masa marirogue mana waicuri dipurare bamuriñorã. Goãmu yare erã gojaripugue õpa arĩ wereyoro: “Igũ erãre umaro maja dijuri barire omuripu erã baburire,” arĩ gojañuma Goãmu yare erã gojarapugue. ¿Igũ eropa iidiro dopa ta iigu iri mu sã? arĩma erã.

32 Erã eroparicũ Jesu weremi erãre:

—Diaye muare arĩgu iiaa. Moiseru iri umaro maja barire mwa acawererãre obiriñumi. Yu Paguru umaro maja barire diaye maja barire muare ogu ãhrimi. 33 Goãmu igu bari umaro dijari árĩpehreri yeba majarãre ojocaririre omasia, arĩmi Jesu.

34 —Oru, umuri nucu iri barire oque gware, arĩma erã.

35 Erã eroparicũ peegu Jesu weremi erãre:

—Yuru ojocaririre ogu bari iro dopa árĩgu ãhraa. Mari ya barire barã matagã ta oboa wahaa mari. Ihriri sãre mari ihrira puhrugã ta ñemesibua daja. Yure gameguru, yure umupeoguru, ne oaboabigu ñemesibubigu iro dopa igu õaro árĩri ne pehresome igure. 36 Muru yure ñaquererã ta umupeonibeaa dohpa. Irire ta muare wererabu yuhu. 37 Árĩpehrerã yu Pagu yarã árĩmorãre igu añirãpu yure

gamerãcoma. Eropigu yure gamerãre ne cóasome yũhũ. <sup>38</sup> Ūmarogue arigu yũ gamero iigu arigu iibiribũ. Yure obeodigu igũ gamero dopa ta iigu aribũ. <sup>39</sup> Ita árĩbũ yure obeodigu igũ gameri gohra: Árĩpehrerã yaharã árĩmorã yure igũ onirãre yũ dedeobiricũ gahmemi. Yure obeodigu pehrerinũ árĩcũ erãre yũ masucũ gahmemi. <sup>40</sup> Árĩpehrerã yure Goãmũ magure ãarã, yure umupeorã umuri nũcũ igũ mera erã árĩcũ gahmemi yũ Pagũ. Eropigu pehrerinũ árĩcũ erãre masugũra, arĩmi Jesu.

<sup>41</sup> “Yũhũ umarogue ariri bari iro dopa árĩgũ ãhraa,” igũ arĩcũ peerã judio masa gũa oparãpũ igũ mera guarã, erã basi Jesure ñero arĩ wereniguima.

<sup>42</sup> —¿Ihĩ Jesu José magũ árĩbeari? Ìgũ pagũ, igũ pago sãre mari masia. ¿Eropa árĩquerẽgũ ta duhpigu “Ūmarogue aribũ,” arĩ wereniguiri igũ? arĩ guama erã.

<sup>43</sup> Erã eroparĩcũ peegũ Jesu weremi erãre:

—Mũa basi yure ñero arĩ wereniguibiricãque. <sup>44</sup> Yũ Pagũ yure obeodigũpũ masare yure gamecũ iimi. Ìgũ eropiibiricũ masapũ yaharã árĩmasibiriboñuma. Pehrerinũ árĩcũ yaharãre masugũca yũhũ. <sup>45</sup> Goãmũ ya weremũhtanirãpũ õpa arĩ gojañuma: “Goãmũ erãre buhegũcumi,” arĩ gojañuma. Árĩpehrerã yũ Pagũ igũ buherire peerã igũre yãhrirã yure gahmema. Eropirã yaharã ãhrima.

<sup>46</sup> “Yũ Pagũre ne yujugũ masũ ãabeami. Yũhũ Goãmũ igũ obeodigu dihta yũ Pagũre ãabũ. <sup>47</sup> Diaye arĩgũ iiaa mũare. Yure umupeogũ árĩpehrerinũri yũ Pagũ mera árĩniguigũcumi. <sup>48</sup> Yũpũ ojocaririre ogũ bari iro dopa árĩgũ ãhraa. <sup>49</sup> Mũa ñecũ sumarã mũrague masa marirogue manare bamuriñorã. Eropa irire baquererã ta sĩria wañorã. <sup>50</sup> Ūmarogue ariri baripũre masũ bagũ ne sĩrisome. <sup>51</sup> Yũhũ umarogue ariri bari ojocaririre ori bari iro dopa árĩgũ ãhraa. I barire bagũ umuri nũcũ yũ Pagũ mera eropa árĩniguigũcumi. I bari ojocaririre ori bari iro dopa árĩri yũ dũpũ ta ãhraa. Árĩpehreri yeba majarã Goãmũ mera eropa erã árĩniguiburire yũ dũpũre ogũra. Eropa ogũ sĩrigũca, arĩmi Jesu.

<sup>52</sup> Ìgũ eroparĩcũ peerã judio masapũ õpa arĩ wereniguima erã basi:

—¿Ihĩ dohpa ii igũ dũpũre baburi ogũcuri? arĩma erã erã basi.

<sup>53</sup> Erã eroparĩcũ peegũ Jesu weremi:

—Diaye arĩgũ iiaa mũare. Yũhũ Goãmũ igũ obeodigu ãhraa. Yũ dũpũre babigu, yũ dire ihribigu Goãmũ mera árĩsome. <sup>54</sup> Yũ dũpũre bagure, yũ dire ihrigũre, pehrerinũ árĩcũ masugũra. <sup>55</sup> Yũ dũpũ diaye ta bari gohra iro dopa ãhraa. Yũ di diaye ta ihriri gohra iro dopa ãhraa. <sup>56</sup> Yũ dũpũre bagũ yũ dire ihrigu yũ mera mucubiriri mera árĩniguigũcumi. Eropigu yũhũ igũ mera mucubiriri mera árĩniguigũca. <sup>57</sup> Yũ Pagũ yure obeodigu eropa árĩniguicãmi. Eropa árĩniguigu yũ sãre eropa árĩniguicũ iimi. Eropirã yure eropa árĩniguigũre masa barã, Goãmũ mera umaroguere eropa árĩniguirãcoma erã sã. <sup>58</sup> Ita ãhraa umarogue ariri bari. Mari ñecũ sumarã mũra erã bara mũra iro dopa árĩbeaa i bari. Erãpũ iri barire baquererã ta sĩria wañorã. I baripũre bagũ umaroguere eropa árĩniguicãgũcumi, arĩmi Jesu.

<sup>59</sup> Capernaum judio masa gwa buheri wihi Jesu buhegu, eropa weremi.

*Jesu igu buherire peerã umarogue eropa árñiguirãca mari, arĩ gojañumi Ñu*

<sup>60</sup> Igu eropa wereniguicũ peerã bajarã gwa watope árĩrã Jesure gamerã, igure nurusianirã õpa arĩ wereniguima:

—I buheri diasa ãhrra. Eropirã mari peediabiriñaria, arĩ wereniguima erã erã basi.

<sup>61</sup> Erã eroparĩcũ Jesupu erã wereniguirire masimi. Eropa masigu igu erãre serẽpimi:

—¿I buherire peerã guari mua? <sup>62</sup> ¿Yuhu masu Goãmu igu obeodigu umarogue dujaa wacũ dohpa wabocuri mua? <sup>63</sup> Masu igu siporãre opagu ojocarimi. Igu dupupu igure ojocaricũ iibea. Masure igure igu siporã ojocaricũ iro dopa ta yu buheripu mware Goãmu mera eropa árñiguicũ iia. <sup>64</sup> Gajirã mua mera majarã ne yure umupeobeama, arĩmi Jesu.

Negohraguere Jesu igure umupeobiribonirãre masituhajapu. Igure ñaturirãre wiabu sãre mata masituhapu. Eropa masigu “Gajirã mua mera majarã yure umupeobeama,” arĩmi Jesu guare.

<sup>65</sup> Eropa arituhaja õpa werenemomi:

—Õpa arĩ wererabu mware. “Yu Pagupu masare yure gamecũ iimi. Igu eropa iibiricũ masapu yaharã árĩmasibiriboñuma,” mware arĩrabu, arĩmi Jesu.

<sup>66</sup> Igu eropa arĩ buhecũ peerã bajarã Jesure gamenirã mura igure cohã, igu mera dipaturi wabirima. <sup>67</sup> Erã eropa iicũ ñagu Jesu guare doce igu buherãre serẽpimi:

—¿Mua sã yure cóacãrãcuri? arĩ serẽpimi guare.

<sup>68</sup> Igu eroparĩcũ Simo Pedro yuhrimi igure:

—Opu, guare gajigu buhegu marimi. Mu buherire peerã Goãmu mera eropa árñiguirãca gwa. Mu buheri dihta irire werea guare. <sup>69</sup> Eropirã gwa mure umupeoa. Eropa muhu õagu, Goãmu magu igu obeodigu mu arĩcũ gwa masia. Eropirã mure cóasome gwa, arĩmi Simo Pedro Jesure.

<sup>70</sup> Igu eroparĩcũ peegu Jesu weremi guare:

—Yupu mware doce majarãre beyebu. Yujugu mua mera majagu watĩ yagu árĩbu ãhrimi, arĩmi guare igu buherãre.

<sup>71</sup> Eropa arĩgu Judare Simo Iscariote magure arĩgu iimi. Judapu doce gwa mera majagu Jesure ñaturirãre wiabu arĩmi.

## 7

*Jesu pagu porã igure peediabiriñuma*

<sup>1</sup> Puhru gwa mera Jesu Galilea yeba curigu wami. Judea yeba majarã judio masa igure wejediañorã. Erã eropa wejediacũ masigu igu iri yebare wabirimi. <sup>2</sup> Judio masa mta wirigã gwa iiburinu bosenu merogã duhyabu. <sup>3</sup> Eropirã Jesu pagu porã igure werema:

—Judeague bosenure ñagu waque. Ero mu yarãre deyoro moarire ii ñmugũ waque muhu. <sup>4</sup> Masare deyoro moarire ii ñmudiagu mure dibubiricãro gahmea. Deyoro moarire iigu arĩgu arĩpehrerã erã ñhuro iique, arĩma erã.

<sup>5</sup> Īḡu pagu porā árīquererā ta Jesure “Goāmū magu āhrimi,” arībirima. Eropirā eropa arīma erā ĭḡure. <sup>6</sup> Erā eropa arīra pūhrū Jesu weremi erāre:

—Masa yure erā ōaro masiburisubu duhyania dohpa. Muapu bosenure ĩadiarā waque. <sup>7</sup> Ero majarā muare ĩhaturibeama. Yūpūre erā űeri iirare yu werecū yure ĩhaturima. <sup>8</sup> Mūa seyaro bosenu árīcū waque. Yūpūre yu waburisubu duhyania dohpa. Eropigū yūpū bosenure ĩaḡu wanibea dohpa, arīmi Jesu erāre.

<sup>9</sup> Eropa arīḡu ĭḡu Galilea dujami.

*Mūta wirigā erā iirinūri bosenu árīcū wañumi Jesu Jerusaléngue*

<sup>10</sup> Bosenuḡue Jesu ĭḡu pagu porā erā wara pūhrū Jesu sā ḡua mera erā pūhrū wami. Eropa wagu masa erā ĩabiririsubu wami. <sup>11</sup> Bosenu árīrā judio masa ḡua oparā ĭḡure amañorā:

—¿Nohogue árīcūri ĭḡu? arī serēpiñorā.

<sup>12</sup> Eropirā masa bajarā Jesure werewuñorā. Gajirā, “ĭḡu ōaḡu āhrimi,” arīñorā. Gajirāpū, “ĭḡu ñeḡu āhrimi. Masare ḡuyagu āhrimi,” arī werewuñorā.

<sup>13</sup> Eropa arīquererā judio masa ḡua oparāre ḡuirā, masa erā ĩabirogue Jesure werewuñorā.

<sup>14</sup> ḡua erogue ejara pūhrū bosenu deco Jesu Goāmū wihigue ñajaja buhemi. <sup>15</sup> ĭḡu eropa buhecū judio masa uca wa ōpa arīma:

—¿ĭhī buherogue buhebigū árīquereḡu ta duhpigū ōaro masipehori ĭḡu? arīma erā ĭḡure.

<sup>16</sup> Erā eroparīcū Jesu weremi erāre:

—Yu buheri yaha werenigūri árībeaa. Yure obeodigū ya werenigū-iripū āhraa i buheri. <sup>17</sup> Goāmū gamerire ĩidiarā yu buherire “Goāmū werenigūri ta āhraa,” arī masirācoma. Yu buheri yaha werenigūri dihta árībiricū sāre masirācoma. <sup>18</sup> Yujugū ĭḡu gamero ĭḡu masiri mera buheḡu árīḡu “Yu dihtare umupeoque,” arīḡu āhrimi ĭḡu. Yure obeodigūpūre mūa umupeocū ḡahmea yūpū. Yu eroparīcū peerā, “Diaye ta werenigūmi ĭḡu. Ne ḡuyabeami,” arī masirāca mūa.

<sup>19</sup> “Goāmū dorere Moise murūpū apimūriñumi muare. ĭḡu eropa apiquerēcū ta mūa árīpehrerā iri dorere ne yūhribeaa. ¿Duhpirā yure wejēdiari mūa? arīmi Jesu judio masare.

<sup>20</sup> —Mū gorowereḡu āhraa. Mūre wejēdiarā marima, arī yūhrima erā Jesure. Erā eroparīcū Jesu yūhrimi:

<sup>21</sup> —Yūhū soorinū yujusubu Goāmū ĭḡu turari mera dorecūḡure ĭḡu dorere yu cóacū mūa ĭha uca wabū. <sup>22</sup> Mari ñecū sumarā iribojegue majarāpū erā dūpūre merogā gasiroḡare wiri aĩrā erā árīdiro dopa ta Moise wiridoreñumi. ĭḡu eropa dorecū majirāḡare ocho nūri erā masa dehyoara pūhrū soorinū árīquerecū ta erā dūpūre merogā erā gasiroḡare wiri aĩmūria mūa. <sup>23</sup> Mari soorinū árīcū majirāḡare erā dūpūre merogā gasiroḡare wihria mūa Moise doreri iimorā. ¿Mūa sā soorinū irire ĩiquererā ta irinū dorecūḡure yu taucū duhpīrā yu mera ḡuari mūa? <sup>24</sup> Yu iirare mūa ōaro masibiriboro core, yure ñero pepibiricāque. Mūa ōaro masira pūhrū yure mūa ñero pepicū diaye ta árīroca, arīmi Jesu.

*Jesu negohraguere ĭḡu aridirore wereñumi*

25 Īḡu eropa arī werera pūhrū bajamerāḡā Jerusalén majarā ōpa arī wereniñorā:

—¿Ihī mari oparā erā wejēdiagū árībeari? 26 Eropigū ĩḡure erā wejēdiaquerecū ta árīpehrerā masare buhegu iimi ĩḡu. Eropirā ĩḡure wejēdianirā árīquererā ta eropa ĩacāma. Eropā ĩacārā ĩḡure “Īḡu diaye ta Cristo Goāmū ĩḡu obeodigū āhrimi,” ¿arī pepibocuri oparāpū? Maripū masia. Cristo árībiribocumi. 27 Ihī Jesu ĩḡu aridirore gūa masia. Cristopū ĩḡu árīcū ĩḡu aridirore masiya mara. Eropigū Cristo gohra árībeami Jesu, arī werewuañorā erā Jerusalén majarā.

28 Erā eropa arīrare masigū, Jesu ōpa turaro busuro werenigui buhemi Goāmū wihi:

—Yure ōpa arī pepia mūa: “Īḡure masia gūa. Eropirā ĩḡu aridiro sāre masia,” arī pepiraa mūa yure. Mūa eropa arī pepiquererā ta yū gamero aribirabū. Yure obeodigū gohrare masibea mūa. Yure obeodigū diaye árīḡu, diaye iigū āhrimi. 29 Īḡu ta yure obeomi. Eropigū ĩḡu pohrogue arībū. Eropigū yūhū ĩḡure masia, arīmi Jesu judio masare.

30 Īḡu eroparīcū peerā ĩḡure ñeadiarima. Erā eropa ñeadiaquerecū ta Jesu ĩḡu ñero tariburisubū árībiriyoŕo dohpa. Eropirā erā ĩḡure ñeamasibirima. 31 Gajirā masapū bajarā ĩḡure umupeoma. Ōpa arīma:

—“Cristo bajasuburi Goāmū turari mera deyoro moarire ii ĩhmugūcumi,” erā arī werediro dopa ta ihī Jesupū bajasuburi Goāmū turari mera ii ĩhmumi. Árīpehrerā gajirā tauro Goāmū turari mera ii ĩhmumi ĩḡu. Eropigū Cristo Goāmū ĩḡu obeodigū ta āhrimi Jesu, arīma Jesure ne umupeonḡarāpū.

#### *Fariseo masa Jesure peresu iidoreñuma*

32 Masa Jesure eropa arī wereniguičū peerā pahia oparā, fariseo masa mera Jesure ñeadorerā obeoriñorā surarare.

33 Eropigū Jesu masare ōpa arīmi:

—Bajamenarīgā mūa mera árīnigūca. Eropigū pūhrūñarīgā yure obeodigū pohro wagūca. 34 Yū árīborore mūa wamasibea. Eropirā yure amaquererā ta ne bocasome mūa, arīmi Jesu masare.

35 Īḡu eroparīcū peerā erā judio masa ōpa arī wereniguiñorā:

—¿Ihī eropa arīḡu nohogue wagūcuri mūa pepicū? ¿Griego masa pohrogue judio masa wasirinirā pohrogue erā árīri macarigue Griego masaguere buhegu wabocuri ihī? 36 “Yū árīborore mūa wamasibea. Eropirā mūa yure amaquererā ta ne bocasome,” ĩḡu arīḡu ¿dohpa arīronore ĩḡu eropa arīri? arī wereniguiñorā judio masa erā basi.

#### *Ojocaricū iiriyarire wereñumi Jesu*

37 Bosenu ojogorocurinū irinū ḡuhyadiarinū gohra árīro iibu. Irinū Jesu ero nigui, turaro mera weremi masare:

—Ñemesiburā decore turaro gamero dopa árīrā ũmuri nūcū Goāmū mera turaro árīdiarā yure serēque. Mūa eropa serēcū ĩḡu yarā árīdoreḡura mūare. 38 Yure umupeorāre ōpa arī gojañuma Goāmū yare erā gojarapūgue: “Erā sīporāriguere ojocaricū iiri deco eropa árīniguičāroca,” arī gojañuma, arī turaro weremi Jesu masare.

39 “Erā sīporāriguere ojocaricū iiri deco eropa árīniguičāroca,” arīḡu “Yure umupeorā Espiritu Santore oparācoma” arīḡu iimi Jesu.



Īḡu ɯmarogue ĩḡu mɯrianibiricũ dohpa Espiritu Santopɯ arinibirimi dohpa erãre.

*Judio masa dɯca wariñuma pe curu*

<sup>40</sup> Jesu ĩḡu eroparĩcũ peerã, masa bajarã õpa arĩ wereniguima:

—Ihĩ diaye ta Goãmu yare weremɯhtagu mari coredigu ta àhrimi, arĩ wereniguima.

<sup>41</sup> Õpa arĩma gajirã sã:

—Ihĩ Cristo marire taubu àhrimi, arĩma.

Gajirãpɯ õpa arĩma:

—Cristo árĩḡu Galilea majagu árĩsome ĩḡu. Ihĩ Jesupɯ ero majagu ta àhrimi. <sup>42</sup> Cristo Davi mɯru pãrami gajisubu majagu arĩḡu árĩbocumi. Eropigu Davi ya maca mɯraro Belén waĩcɯri maca masa dehyoagɯcumi Cristopɯ. Eropa ta arĩ werea Goãmu yare erã gojarapũ. Ihĩ Jesupɯ Belén macague masa dehyoabiripɯ. Eropigu ĩḡu Goãmu ĩḡu obeodigu Cristo gohra árĩbeam, arĩrima erã.

<sup>43</sup> Eropirã Jesure peenirã gajirã umupeo gajirãpɯ umupeobirã árĩnĩjarã game dɯca warima pe curu. <sup>44</sup> Eropirã bajamerãgã Jesure ñeadiarima. Eropa ñeadiaquererã ta ĩḡure ñeabirima.

*Judio masa oparã Jesure ne umupeobiriñuma*

<sup>45</sup> Eropirã surara pahia oparã pohrogue fariseo pohrogue dujaa wañorã daja. Erã dujajacũ ĩarã erã surarare serẽpiñorã:

—¿Duhpirã Jesure ñeagãribirari mɯa? arĩñorã.

<sup>46</sup> —Īḡu õatariaro wereniguigu àhrami. Gajirã ĩḡu iro dopa wereniguirã ne marima, arĩ yãhriñorã surara erãre.

<sup>47</sup> Erã eroparĩcũ fariseo masapɯ õpa arĩ wereñorã:

—¿Mɯare ĩḡu guyacũ, “Diaye ta arĩḡu iimi,” arãri mɯa sã? <sup>48</sup> Mari oparã Jesure ne umupeobeama. Gua sã eropirã ĩḡure umupeobeaa. <sup>49</sup> Oã masa Goãmu dorerire Moiserẽ ĩḡu apirare masibeama. Eropa masibirã árĩrã Jesure umupeoma. Erã eropa umupeori dipuwaja mari Pagu Goãmu erãre dipuwaja moagucumi, arĩñorã fariseo masa.

<sup>50</sup> Nicodemũ fariseo masu Jesure weretamugũ ejadigu ero árĩpɯ erã mera. Erã eroparĩcũ peegu õpa arĩpɯ ĩḡu erãre:

<sup>51</sup> —Jesu ĩḡu ñero iirare masibeaa mari. Eropa masibirã ĩḡu marire wereboro core ĩḡure dipuwaja moamasibeaa mari. Eropa masibiriquererã ta ĩḡure dipuwaja moarã, mari ya dorerire tarinugãrã iiaa mari, arĩpɯ Nicodemo erãre.

<sup>52</sup> ĩḡu eroparĩcũ peerã õpa arĩ yãhriñorã erã:

—¿Mɯ sã ĩḡu iro dopa ta Galilea majagu ta àhriri? Goãmu ya erã gojarapũre buhepehoque. Eropa buhegu, “Goãmu yare weremɯhtagu ne yujugu Galilea majagu marimi,” arĩ masiguca mɯhu, arĩ yãhriñorã erã Nicodemore.

<sup>53</sup> Erã eropa arĩra pɯhrũ erã ya wirigue dujaa wañorã.

## 8

*Èmɯ mera ñero iidigore judio masa oparã dipuwaja moadiariñuma*

<sup>1</sup> Jesupɯ ĩḡu seyaro ɯtãḡugue Olivo waĩcudigugue waha wami.

<sup>2</sup> Gajinũ Goãmu ya wihigue gua wabu daja. Jesu ejacũ ĩarã masa bajarã ĩḡu pohro gamenerema. Erã gamenerẽcũ ĩḡupɯ doanijagu erãre buhenugapɯ. <sup>3</sup> ĩḡu eropa buhero watope judio masa buherã, fariseo

masa mera iri wihigue nomeore aĩ ñajajama. Igo marapucquerego gajigu mera igo ñero iicũ bocañaorã erã igore. Eropa bocajarã igore Goãmũ wihigue aĩ ñajama erã igore dipuwaja moadorerã. Aĩ ñajatuha árĩpehrerã gũa iarõ igore duhu nuguma. <sup>4</sup> Duhunugu õpa arĩma Jesure.

—Buhegu, igo marapucũgo árĩquerego gajigu mera ñero iigo iicũ bocajabu. <sup>5</sup> Moise dorerire õpa ãhraa: “Umũ mera ñero iidigore utã mera dea wejẽcãque,” arĩyoro Goãmũ doreri. ¿Mũca dohpa arĩ pepiri ire? arĩ serẽpima erã Jesure.

<sup>6</sup> Jesu igũ ñero wereniguicũ peediarã iirima erã igure weresãmorã. Erã eropa serẽpiquerecũ ta Jesupũ muhmusiu dija, yebague igũ mujusĩru mera gojami. <sup>7</sup> Eropigu erã eropa serẽpiniguicũ peegu Jesupũ wahgã doaja, erãre weremi:

—Mũa mera majagu ñero iibigu árĩgu igore utã mera deanugaporo, arĩmi Jesu.

<sup>8</sup> Eropa arĩtuha dipaturi muhrisiu dija, yebague gojami daja. <sup>9</sup> Irire peerã igore aĩ ñajarinirãpu erã ñeri iurare guñarã, erã tĩrãpu wiria wamũhtama. Erã pũhrũ erã mera majarã sã wiriapehrea wama. Eropigo nomeo dihta Jesu pohro dujanugamo. <sup>10</sup> Eropigu Jesu wahgã doaja, igore serẽpimi.

—¿Nohogue ãhriri erã? ¿Mũre dipuwaja moadianirã mariri dohpaguere? arĩmi igore.

<sup>11</sup> —Marima, opũ, arĩ yũhrimo igo.

—Yũ sã dipuwaja moabeaa mũre. Waque. Eropigo ñerire iinemo-biricãque, arĩmi Jesu igore.

*Jesu i yeba majarãre boyoro iro dopa Goãmũre masicũ iimi, arĩ gojañumi Ñu*

<sup>12</sup> Dipaturi Jesu iri wihigue árĩrãre weremi:

—Boyoro iro dopa yũhũ i yeba majarãre Goãmũre masicũ iiaa. Yũre umupeogu Goãmũ mera eropa árĩniguicãgũcumi. Eropigu igũ boyorogue árĩgu dopa ta õarire guñagũcumi. Eropigu igũ ñerire guñadiabeami, arĩ weremi Jesu.

<sup>13</sup> Igũ eroparĩcũ peerã fariseo masapũ õpa arĩma.

—Mũhũ mũ basi mũ árĩricũre eropa arĩ wereniguimaacãgu iiaa. Mũ õpa arĩ wereniguiiri ne waja mara, arĩma erã Jesure.

<sup>14</sup> Erã eroparĩcũ Jesu yũhrimi:

—Yũhũ, yũ aridirore masia. Yũ waboro sãre masia. Mũapũ ne irire masibeaa. Eropigu yũ basi yũ árĩricũre werequeregu iri yũ werera diaye ta ãhraa. <sup>15</sup> Mũa sihajaro mũa sã ãara dihtare masia mũa. Eropirã mũa yũre werewũaa. Yũhũ mũa iro dopa ta werewũabeaa. <sup>16</sup> Masa erã árĩricũre iãgu yũhũ yujugu ta ihamasibeaa. Yũ tamera yũre obeodigu mera masia. Eropigu yũhũ masa erã árĩricũre diaye ta iha masia. <sup>17</sup> Mũare doreri erã gojarapũ õpa arĩ werea: “Masa perã erã yujuro mera erã werecũ erã wererĩ diaye ta ãhraa,” arĩ were gojañuma. <sup>18</sup> Yũre weregu mera gũa perã ãhraa. Yũhũ, yũ árĩricũre werea. Eropigu yũ Pagũ sã weremi yũre. Igũ ta ãhrimi yũre obeodigu, arĩmi Jesu.

<sup>19</sup> —¿Nohogue ãhriri mũ Pagũ? arĩ serẽpima erã.

—Yũre mũa masibeaa. Yũ Pagũ sãre masibeaa. Yũre masirã, yũ Pagũ sãre masiboaya, arĩ yũhrimi Jesu erãre.

<sup>20</sup> Jesu erãre buhegu eropa arĩ wereniguimi Goãmu wihigue erã niyeru apiri comoro pohro. Īgu ñero tariburisubu ejabiribũ dohpa. Eropirã erã mera ĩgu árĩquerecũ ta ĩgũre ñeabirima.

*Yũ waboroguere mũapũ wamasisome, arĩñumi Jesu*

<sup>21</sup> Dipaturi masa mera gũa árĩrisubu Jesu erãre weremi daja:

—Yũ aridirogue wagũca. Yũ wara pũhrũ yũre amarãca mũa. Yũ waboroguere mũapũ wamasisome. Eropirã mũa ñeri dipuwajacurã sĩrirãca, arĩ weremi Jesu.

<sup>22</sup> “Yũ waboroguere mũapũ wamasisome,” ĩgu arĩcũ peerã,

—¿Ihĩ ĩgu basi wejẽ sĩrigũcuri eropa arĩgu? arĩma judio masa erã basi.

<sup>23</sup> Erã basi erã eroparĩcũ Jesu weremi erãre:

—Mũapũ i yeba majarã ãhraa. Yũpũ umaro majagu ãhraa. I yeba dehyoanirã ãhraa mũapũ. Umarogue aridigu ãhraa yũpũ.

<sup>24</sup> Mũare yũ árĩricũre yũ werecũ “Diaye árĩbeaa,” mũa arĩrã, mũa ñeri dipuwajacurã sĩrirãca mũa. Eropigu “Mũa ñeri dipuwajacurã sĩrirãca,” arĩrabũ mũare, arĩmi Jesu erãre.

<sup>25</sup> —¿Noano ãhriri mũhũ? arĩ serẽpima erã.

—Neguere yũ mũare arĩdiro dopa ta ãhraa yũhũ. <sup>26</sup> Mũare yũ wereburi wũaro duhyania. Eropiro mũa ñeri dipuwajare mũare yũ wereboro wũaro duhyaa dohpa. Eropigu yũre obeodigũre yũ peerare i yeba majarãre werea. Īgu werera diaye ta ãhraa, arĩmi Jesu erãre.

<sup>27</sup> “Yũre obeodigu,” ĩgu arĩcũ peerã “Mari Pagũ árĩcumi,” arĩ pepibirima erã. <sup>28</sup> Erã eropa arĩ pepibiricũ ĩagu Jesu weremi erãre:

—Yũre masure Goãmu ĩgu obeodigũre mũa crusa mera pabia aĩ wahgũ nugurãca. Mũa eropa iirã, “Īgu Goãmu ĩgu obeodigu ta ãhrimi,” arĩ masirãca yũre. Eropirã yũ gamero dopa ta iibigu yũ árĩrire masirãca. Eropirã yũ Pagũ ĩgu yũre ĩgu buhera dihtare weregu yũ árĩcũ sãre masirãca mũa. <sup>29</sup> Eropigu yũre obeodigũpũ yũ mera ãhrimi. Īgu gamerire umuri nũca iiniguia. Eropigu ĩgu yũre ne cóãbeami, arĩmi Jesu.

<sup>30</sup> Īgu eroparĩcũ peerã masa bajarã ĩgũre umupeoma.

*Goãmu porãre, ñerire iirã sãre wereñumi Jesu*

<sup>31</sup> Eropirã gajirã judio masa Jesure umupeoma. Eropigu Jesu erãre weremi:

—Yũ dorerire ipehorã árĩrã, diaye ta yũ buherã ãhraa mũa.

<sup>32</sup> Eropirã diaye ta masirãca mũa. Diaye árĩrire masirã, ñero iirire duhumasirãca. Eropirã pohro majarã wiunirã iro dopa árĩrãca mũa, arĩmi Jesu erãre.

<sup>33</sup> Īgu eroparĩcũ peerã erã õpa arĩ yũhrima daja:

—Gũapũ iribojegue majagu mũurũ Abrahã pãramerã árĩturiarãgue ãhraa. Eropirã ne gajirã pohro majarã árĩbeaa gũa. Eropigu “Pohro majarã wiunirã iro dopa árĩrãca,” arĩgu ¿dohpa arĩgu eropa arĩri mũhũ? arĩ serẽpima erã Jesure.

<sup>34</sup> Erã eroparĩcũ peegu Jesu õpa arĩmi erãre:

—Diaye mũare arĩgu iiaa. Árĩpehrerã ñerire iirãpũ erã ñeri iirire duhumasibeamã. Eropiro iri ñeripũ erãre dorea. Eropa árĩrã árĩrã

pohro majarã iro dopa ãhrima erã. <sup>35</sup> Pohro majaguru ïgu opu magu iro dopa árïbeami. Doreri opabeami. Iri wihi majagu maguru umuri nucu diaye ta ïgu pagu doreri opami. <sup>36</sup> Yuhu Goãmu magu ãhraa. Eropigu ïgu doreri opaa. Eropirã mua ñerire yu duhucã iinirã árïrã diaye ta ñerire duhunirã árïrãca mua. <sup>37</sup> Abrahã muru pâramerã árïturiarã mua árïcũ masia. Eropa árïquererã ta yu wereripure peediabeaa mua. Eropirã yure wejëdiaa mua. <sup>38</sup> Yu Pagu ïgu yure masicũ iirare werea muare. Yu eropa werequerecũ ta mua pagu ïgu doreripure iiaa mua sã, arïmi Jesu erãre.

<sup>39</sup> —Abrahã muru iribojegue majagu gua pagu muru árïmuripu, arï yuhrima erã.

Erã eroparïcũ Jesu yuhrimi:

—Abrahã muru porã árïrã ïgu iidiro dopa ta iiboaya mua. <sup>40</sup> Goãmu yure diaye ïgu wererire muare yu werequerecũ ta yure wejëdiaa mua. Abrahã mururu ne eropa iibiridi árïmi. <sup>41</sup> Mua pagu ïgu iidiro dopa ta iiaa mua, arïmi Jesu erãre.

Ïgu eroparïcũ erã yuhrima:

—Mojoto diribiridigo porã árïbeaa gua. Yujugu ta ãhrimi gua pagu. Ïgu ta ãhrimi Goãmu, arïma erã.

<sup>42</sup> Erã eroparïcũ Jesu yuhrimi:

—Goãmu mera majagu árïdigu ta õguere aribu yuhu. Eropirã Goãmu mua Pagu ïgu árïcũ yure mahiboaya mua. Yu gamero aribiribu yu tamera. Yu Pu Goãmu ïgu obeocũ aribu õguere. <sup>43</sup> ¿Duhpirã yu wereniguirire peebeari mua? Yu wererire yujuro bojebeaa mua. Eropirã peebeaa mua. <sup>44</sup> Mua paguru watï ãhrimi. Eropirã watï ïgu gameripure iidiaa mua. I yeba negohraguere árïnugacũgue, dohpague sãre ïgu masare wejëgu ãhrimi. Ïgure diaye maja ne mara. Eropigu ïgu ne diaye majare wereniguibeami. Ïgu negohraguere guyanugadigu árïmi. Eropigu ïgu eropa guyaniguigu árïgu, guyarire weremi. <sup>45</sup> Yuru diaye majare werea muare. Eropa yu werecũ peebeaa mua. <sup>46</sup> “Muhu ñero iigu ãhraa,” arïmasibeaa mua yure. ¿Diaye muare yu werequerecũ ta duhpirã peebeari mua? <sup>47</sup> Goãmu porãpu ïgu wereniguirire peema. Ïgu porã árïbirã ïgu wereniguirire peebeama, arïmi Jesu erãre.

*Abrahã muru ïgu árïboro core Cristo árïmuhtatuhanumi*

<sup>48</sup> Ïgu eroparïcũ peerã judio masa ïgure õpa arïma:

—“Muhu Samaria majagu ãhraa. Eropigu watï mera goroweregu ãhraa muhu,” gua arïra diaye ta ãhraa, arïma erã Jesure.

<sup>49</sup> Erã eroparïcũ peegu õpa arï yuhrimi Jesu:

—Goroweregu árïbeaa yuhu. Yu Pagure umupeoa. Muru yure umupeobea. <sup>50</sup> Yure masa erã umupeorire amabeaa yuhu. Yu Paguru yure umupeocũ gahmemi masare. Ïgu tamera yu árïricurire õaro ñha masigu eropa ta umupeodorem. Eropigu yu Pagu erã yure gamebiriri dipuwaja, dipuwaja moagucumi. <sup>51</sup> Diaye muare arïgu iiaa. Yu dorerire iigu umuri nucu Goãmu mera eropa árïniguicãgucumi, arïmi Jesu.

<sup>52</sup> Ïgu eroparïcũ peerã õpa arïma erã:

—Dohpague tamerare mu watï mera goroweregu árïcũ gua õaro masia. Abrahã muru sïria wañumi. Goãmu yare weremuhtanirã

sã sîria wañuma iribojegue. Eropigu “Yu dorerire iigu umuri nucu Goãmũ mera eropa árînguigucumi,” arîgu, ¿dohpa arîgu eropa arîri mũhu? <sup>53</sup> ¿Gua ñecu muru tauro turari mũhu? İgu, Goãmũ ya weremũhtanirã sã sîria wañuma iribojegue. ¿Murũ nihino ahriri eropa arî wereniguigu? Mũ eropa arîro dopa árîbeaa mũhu, arîma erã.

<sup>54</sup> Erã eroparîcũ peegu Jesu werenemomi:

—Yũhu yũ basire umupeodoreri duhpiburi árîbeaa. Yu Pagũpũ yũre umupeodoregu ahrimi İgu. “Gua Pagũ” mũa arîgũpũ yũ Pagũ ta ahrimi. <sup>55</sup> Mũapũ yũ Pagũre ne masibea. Yũhu İgũre masia. “İgũre masibea,” arîgu mũa iro dopa ta gũyaricũgu árîboaya yũhu. Diaye ta İgũre masia. Eropigu İgu dorerire iia. <sup>56</sup> I yebaguere yũ árîboro coregue mari ñecu muru Abrahã muru masimũhtatuhãmũriñumi yũre. Eropa masigu İgu mucubirimũriñumi, arîmi Jesu.

<sup>57</sup> İgu eroparîcũ erã yũhrima:

—Abrahã muru iribojegue majagu ahrimi. Mũpũ cincuenta bojori opanibea. ¿Eropigu mũhu İgu murũre duhpigu İha masiboyuri? arîma judio masa İgũre.

<sup>58</sup> —Diaye mũare arîgu iia. Abrahã İgu árîboro core yũpũ árîmũhtatuhabu, arîmi Jesu erãre.

<sup>59</sup> İgu eroparîcũ peerã erã utãyerire aĩ İgũre deadiarima. Erã eropa deadiaquerecũ ta Jesupũ Goãmũ wihigue árîdigũ duhri wiria wami.

## 9

### *Cuirĩ İhajabigũre õaro İagu wacũ iĩnũmi Jesu*

<sup>1</sup> Jesu gũa İgu buherã mera mague tariarã gajigũre cuiri İhajabigũre bocajabu. İgu ne masa dehyoagũgue ta cuiri İhajabigu árîpu. <sup>2</sup> Gua sã İgũre İarã serẽpibu Jesure.

—Buhegu, ¿ihĩ duhpigu cuiri İhajabigu masa dehyoayuri? ¿Ñerire iimũriyuri eropa wagu? ¿O İgu pagũ sũmarã erã ñero iira dipuwaja eropa wayuri İgu? arĩ serẽpibu gũa Jesure.

<sup>3</sup> Gua eroparîcũ peegu õpa arĩ yũhrimi:

—İhĩ İgu pagũ sũmarã sã erã ñerire iira sã İgũre cuiri İhajabiricũ iibea. Goãmũpũ İgũre cuiri İhajabiricũ iimi. İgũre İacũ iibu masare İgu turarire ii İhmuburire apimi Goãmũ. <sup>4</sup> Yũre obeodigu İgu apirare yũre iiro gahmea dohpaguere. Ñamiguere mari mohmemasibiro dopa ta pũhrũgue yũre obeodigu İgu apirare iimasibea yũhu. <sup>5</sup> I yebaguere i yeba majarãre Goãmũre masicũ iia, arîmi Jesu.

<sup>6</sup> Eropa arĩtuha yebague disico ehõepimi. İgu disico ehõepirare nicu mera mohmore nijagu, cuiri İhajabigũre İgu cuirire sũmi. <sup>7</sup> Eropa sũgu õpa arĩmi Jesu:

—Siloé waĩcũri gobegue mũ cuirire coegu waque, arĩmi Jesu. Siloé ero majarã ya mera arĩrã obeora gobe arĩrã iima.

Jesu İgu cuiri coedoredigũpũ waha, coetuhaja, cuiri İagũgue dujajapũ İgu ya wihigue. <sup>8</sup> İgu dujajacũ ero majarã İgũre İañorã. Ero core niyeru serẽdigũ İgu árîcũ İanirã İgũre õpa arĩñorã erã basi:

—¿İhĩ sohõ árîdigũ niyeru serẽdoadigu árîbeari? arĩñorã erã.

<sup>9</sup> —İgu ta ahrimi, arĩñorã gajirã.

—Īgu áríbeami. Eropa áríbiriqueregu ta ĩgu iro dopa ta bejagu áhrimi, aríñorá gajirá.

Erá eroparícū peegu cuiiri ĩhajabiridigupū ōpa arípū:

—Īgu ta áhraa yuhū, arípū erāre.

<sup>10</sup> Īgu eroparícū masa ĩgure serēpiñorā:

—¿Cuiiri ĩhajabiridigu árídigu dohpa ii ĩhari mūhū? arí serēpiñorā erā ĩgure.

<sup>11</sup> —Jesu waícūgu disicore nicu mera mohmore yū cuirire sūami. Yure sūtuhaaja “Siloé waícūri gobegue mū cuirire coegu waque,” arāmi yure. Īgu eroparícū coegu ejabu yuhū. Eropa yū coera pūhrū yū cuiiri ōaro dehyoabu yure, arí werepū ĩgu masare.

<sup>12</sup> —¿Mūre eropa iidigu nohogue árícūri ĩgu? aríñorā erā.

—Ūba. Noho árīgu árícūmi, arípū ĩgu

*Cuiiri ĩhajabiridigure fariseo masa serēpiñuma*

<sup>13</sup> Eropa arí wereniguituha erā cuiiri ĩhajabiridigure fariseo masa pohrogue aī ejañorā. <sup>14</sup> Irinū Jesu dihta nicure mohmore cuiiri ĩhajabigure ōagu iiranū Sabadonū árībū. Irinū gua soorinū árībū.

<sup>15</sup> Eropirā fariseo masapū ĩgure serēpiñorā daja.

—¿Dohpa ii ĩhari mūhū? arí serēpiñorā erā.

—Nicu mera yū cuirire sūami. Eropigu yū cuirire coera pūhrū ĩhaa yuhū, arí werepū ĩgu erāre.

<sup>16</sup> —Īgu mari soorinū mari mohmedorebiririnūre mohmeami. Eropigu ĩgu Goāmū yagu áríbeami, aríñorā gajirá fariseo masa.

Gajirāpū ōpa aríñorā:

—Nerire iigu árīgu ōpa ĩre ōagu wacū iimasibeami. Eropigu ĩgu ōagu árībocūmi, aríñorā gajirá Jesure.

Eropirā erā, erā basi pe curu dūca wariñorā. <sup>17</sup> Eropirā dipaturi erā cuiiri ĩhajabiridigure serēpinemoñorā daja.

—¿Mūre mū cuirire ōaro iidigure dohpa arí pepiri mūhū Jesure? aríñorā erā ĩgure.

—Īgu diaye ta Goāmū yare weremūhtagū áhrimi, arípū cuiiri ĩhajabiridigupū.

<sup>18</sup> Negohraguere judio masa ōpa arí pepiriñorā. “Ihī cuiiri ĩhajabiridigu áríbeami,” arí pepiriñorā. Eropa arí pepirā cuiiri ĩhajabigu pagū sumarāre sihubeoñorā erā. <sup>19</sup> Sihubeo ĩgu pagū sumarāre serēpiñorā fariseo masa oparā.

—¿Ihī diaye ta mū magū áhriri? ¿Mata ĩgu cuiiri ĩhajabigu masa dehyoari? ¿Diaye ta cuiiri ĩhajabiridigu áríqueregu dohpa ii ĩhari dohpaguere? arí serēpiñorā erā ĩgu pagū sumarāre.

<sup>20</sup> —Ihī gua magū ta áhrimi. Eropigu mata cuiiri ĩhajabigu masa dehyoami ĩgu. <sup>21</sup> Irire masiquererā ta ĩgu ĩarare, ĩgure ĩacū iidigu sāre masibea gua. Gua magure serēpique. Bugū áhrimi ĩgu. Īgu basi weremasimi ĩgu, aríñorā ĩgu pagū sumarā.

<sup>22</sup> Judio masa oparā ero coreguere ōpa arítuhañorā:

—“Jesu ta Cristo mari taubu áhrimi,” arírāre mari buheri wirigue ñajadoresome gua, arímuriñorā judio masa gua oparā.

Erā eroparícū peenirā cuiiri ĩhajabigu pagū sumarāpū judio masa oparāre güi aríñorā. <sup>23</sup> Eropa güirā “Bugū áhrimi ĩgu. ĩgure ta serēpique,” aríñorā erā judio masa oparāre.

24 Puhru judio masa oparā dipaturi cuiri ihajabiridigure sihubeoñorā. Sihubeo òpa arĩñorā ìgure:

—Goāmu mera diaye wereque muhu. Jesure ìgu ñeri iigu ìgu árĩcũ gua masia. Eropigu diaye wereque guare, arĩñorā judio masa cuiri ihajabiridigure.

25 Erā eroparĩcũ peegu òpa arĩ yuhripu ìgu:

—Jesure ìgu ñeri iigu ìgu árĩcũ masibirica yuhu. Yujuñe ta masia yuhu. Iribojeguere cuiri ihajabigu árĩmuriyu yuhu. Dohpaguepüre ihaa yuhu. Iri dihtare masia yuhu, arĩ yuhripu cuiri ihajabiridigupuru eräre.

26 —¿Dohpa iari ìgu mure? Mu cuirire ihajadoregu dohpa iari ìgu mure? arĩ serēpiñorā erā daja.

27 —Irirete ta muare weretuharabugu yuhu. Yu eropa arĩ werequerecũ ta muare ne peediabea yure. ¿Dohpa iidiarā yu dipaturi werecũ peediarĩ muare? ¿Mua sã ìgu buherã árĩdiari? arĩpu ìgu eräre.

28 ìgu eroparĩcũ peerã erã ìgure turiñorã.

—Muhu Jesu buhegu ahraa. Guapu Moise buherã ahraa. 29 Diaye ta Goāmu Moiserē wereniguimuriñumi. Jesure obeodigure gua masibeaa, arĩñorã erã cuiri ihajabiridigure.

30 Erã eroparĩcũ yuhripu ìgu:

—¿Ìgure obeodigure muare masibiricũ, yure ìacũ iidigu árĩgu Goāmu ìgu obeodigu árĩbiribocuri ìgu? 31 Goāmu ñeri iigure ìgu serērire peebeamĩ. Iri tamerare mari masia. Ñerire iigure peebiriqueregu ta Goāmure umupeogure, ìgu dorerire iigure ìgu serērire peemi Goāmu. 32 Negohraguere i yeba árĩnugacũguere, mata masa dehyoagugue ta cuiri ihajabigure ne yujugupüre ihajacũ iigu marimuriyu. 33 Eropigu Jesu Goāmu ìgu obeodigu árĩbigu yure ìacũ iibiriboñumi, arĩpu ìgu eräre.

34 Erãpu òpa arĩ yuhriñorã:

—Muhu mata ñegu árĩmuriya. ¿Eropa árĩqueregu ta guare buheri muhu? arĩñorã judio masa oparã.

Eropa arĩtuha erã ìgure cohã wiuñorã.

*Jesu yare gamebirã cuiri ihajabirã iro dopa ahrima, arĩ wereñumi Jesu*

35 Eropigu cuiri ihajabigure erã cohã wiurare Jesu peemi. Eropa peegu cuiri ihajabiridigure gua bocajacũ, ìgure serēpimi.

—¿Masure Goāmu ìgu obeodigure umupeori muhu? arĩmi Jesu.

36 —Opu, ¿noa ahriri ìgu? ìgure masigu umupeogura, arĩmi cuiri ihajabiridigupuru Jesure.

37 —Ìgure ihatuhabu muhu. Dohpaguere mu mera wereniguigu ìgu ta ahraa yuhu, arĩmi Jesu cuiri ihajabiridigure.

38 —Opu, mure umupeoa yuhu, arĩmi cuiri ihajabiridigupuru.

Eropa arĩgu ìgu Jesu pohro mereja ìgure umupeomi.

39 ìgu eropa umupeocũ ìagu òpa arĩmi Jesu masare:

—Òarã, ñerã sã erã iirare masicũ iibu aribu yuhu. Cuirĩ ihajabirã erã ìabiro dopa ta yu Pagure masibirã ahrima. Eropa masibirãre yu Pagure masicũ iigu aribu yuhu. “Gua òaro masia,” arĩ pepinirã sãre òaro erã masibirirare masicũ iigu aribu yuhu, arĩmi Jesu.

40 ìgu eroparĩcũ peerã bajamerãgã fariseo masa ìgure òpa arĩma:

—“Cuirī ihajabirā erā ihamasibiro dopa ta masibea m̄ua s̄a,” ¿arīri m̄uh̄u guare? arīma fariseo masa Jesure.

<sup>41</sup> Erā eroparīcū Jesu ōpa arīmi:

—“Cuirī ihajabirā erā iha masibiro dopa ta diaye ōaro masibea ḡua,” m̄ua arīcū dipuwaja mariboya. “Ḡua ōaro masirā āhraa,” m̄ua arīrā āhraa. Eropirā yare peediabirira dipuwaja m̄uare dipuwaja āhraa dohpaguere, arīmi Jesu erāre.

## 10

### *Oveja ihadibuḡu queoriñere wereñumi Jesu*

<sup>1</sup> P̄hr̄u queoriñe mera werenigui queoḡu buhebu ōpa arīmi Jesu guare gajirā masa s̄are:

—Diaye arīḡu iiaa m̄uare. Oveja diburi s̄ariro disiporo ñajabiḡup̄u gajip̄uḡe ñajaḡup̄u yajari masa āhrimi. <sup>2</sup> Disiporo ñajaḡup̄u ovejare ihadibuḡu āhrimi. <sup>3</sup> Disiporo coreḡu disiporo p̄ḡūmi ovejare ihadibuḡu īḡu ñajariborore. Ovejare ihadibuḡu eracū īḡu wereniguirire peerā āhrima īḡu oveja. Erāre sihuḡu, erā waī mera sihubeomi īḡu. Eropiḡu erāre s̄ariroḡu arīrāre sihu wiuniguimi disiporogue. <sup>4</sup> Īḡu yarāre arīpehrerāre sihu wiu erāre m̄uhtan̄gajami. Ovejap̄u īḡu wereniguirire masirā, īḡure n̄rusiama. <sup>5</sup> Gajiḡure erā masibiḡure n̄rusiabeama erā. Eropirā gajirā erā wereniguirire peerā, ḡui omagā wahama, arīmi Jesu masare.

<sup>6</sup> Iri īḡu werequerecū ta irire peerā masibirima erā.

### *Jesu ovejare ōaro ihadibuḡu iro dopa īḡu yarāre ōaro ihadibumi*

<sup>7</sup> Eropiḡu dipaturi Jesu erāre ḡua s̄are weremi daja:

—Diaye m̄uare arīḡu iiaa. Ovejare diburi s̄ariro disiporo iro dopa āhraa yuh̄u. <sup>8</sup> Arīpehrerā yu core arinirā guyarire buherā yajari masa iro dopa āhrima. Erā eropa arīquerecū ta oveja iro dopa arīrā yaharāp̄u gajirāre ne pee wahḡabeama. <sup>9</sup> Yu ovejare diburi s̄ariro disiporo iro dopa āhraa. Iri disiporo ñajarā iro dopa ta āhrima yare umupeorā. Eropiḡu erāre peamegue wabonirāre taugura. Ovejare cāhmotari s̄ariro erā cāhmotaro dopa ta yu taunirāre cāhmotaḡuca. Eropirā erā gamerire oparācoma, arīmi Jesu.

<sup>10</sup> Eropa arītuha ōpa arīnemomi:

—M̄uare ḡuya buherā ovejare yajari masa iro dopa āhrima. Gajirā yajadiarā wejēdiaḡarima. Oveja iro dopa arīrā yaharā arīpehrerin̄ri Goām̄u mera arīcū īiḡu arib̄u yur̄u. Eropiḡu yaharā um̄ri n̄uc̄u erā ōaro arīcū iibu arib̄u yur̄u. <sup>11</sup> Ovejare ōaro ihadibuḡu iro dopa arīḡu āhraa yuh̄u. Ovejare ōaro ihadibuḡu s̄iribu arīquereḡu ta īḡu ovejare cāhmotaniguiḡucumi. Yaharā Goām̄u mera erā eropa arīniguiburire s̄iriḡuca. <sup>12</sup> Īḡu mohmeri mas̄up̄u ōaro ovejare ihadibuḡu arībeami. Eropirā oveja īḡu yarā arībeama. Eropiḡu n̄uḡu majaḡu diaye ovejare ñeaḡu īḡu arīcū īaḡu īḡu mohmeri mas̄up̄u ovejare cōacā ḡui omagā wahami. Īḡu eropa cohāpiḡara p̄hr̄u, n̄uḡu majaḡu diaye īḡu ovejare īḡu ñeacū iarā ovejap̄u omasirigā wahama. <sup>13</sup> Īḡu mohmeri mas̄up̄u īḡu wajatari dihtare gahmemi. Eropiḡu īḡu ovejare ōaro ihadibudiabeami, arīmi Jesu.

<sup>14</sup> Eropa arītuha ōpa arīnemomi queoriñe mera:



—Ovejare ðaro îhadibugũ iro dopa âhraa yũhũ. Eropigu yaharâre masia yũhũ. Eropirã yaharã sã yũre masima. <sup>15</sup> Eropa ta yũ Pagu sã yũre masimi. Eropigu yũ sã yũ Pagure masia. Yaharã Goãmu mera erã árĩniguiburire sĩrigũca. <sup>16</sup> Gajirã oveja gaji sãriro majarã iro dopa árĩrã gajirã masa sã yaharã árĩrãcoma. Erã sãre aĩgũca. Eropirã yũ wereniguirire pee wahgãrãcoma erã sã. Eropirã yaharã árĩpehrerã yuju curu ta árĩrãcoma. Eropigu yũ dihta yaharâre îhadibugũca, arĩmi Jesu.

<sup>17</sup> Eropa arĩtuha ðpa arĩnemomi daja:

—Yaharã Goãmu mera erã árĩniguiburire sĩrigũca yũhũ. Yũ sĩrira pũhrũ masa mũriagũca. Yũ eropa iibu árĩcũ yũ Pagu yũre mahimi. <sup>18</sup> Yũ wejẽdorebircũ yũre wejẽmasibiriboñuma erã. Yũ gamero mera yũre wejẽrãcoma. Eropigu yaharã Goãmu mera erã ya árĩburire sĩrigũca. Sĩrimasia yũhũ. Eropigu masa mũriamasia. Yũ Pagu yũre irire ta iidoremi, arĩmi Jesu.

<sup>19</sup> Ĩgu eroparĩcũ peerã judio masa pe curu dũca warima daja. Gajirã gajiropa pepi, gajirã sã gajiropa pepinirã árĩma.

<sup>20</sup> —Ĩgu watĩre opami. Eropigu goroweregu âhrimi. ¿Duhpirã ĩgũre dipaturi peeri mũa? arĩma gajirã bajarã judio masa.

<sup>21</sup> Gajirãpũ ðpa arĩma:

—Watĩ mera goroweregu árĩgu eropa ðaro arĩ wereniguibiriboñumi. Cuirĩ îhajabĩgũre ïacũ iimasibiriboñumi watĩre opagu. Eropa árĩgu árĩgu ĩgu watĩre opabeami, arĩma gajirã judio masa.

### *Judio masa Jesure gamebiriñuma*

<sup>22</sup> Gajinũ Jerusalengue bosenu iirã iima dipaturi judio masa. Goãmu wihire erã Goãmu ya árĩburire erã apiri bosenu árĩbũ. Irisubu yura wahgũro árĩbũ. <sup>23</sup> Irinũ Salomo waĩcũri taribugue Goãmu wihigue árĩri taribudie Jesu gũa mera îhacurigu iimi. <sup>24</sup> Iri taribugue ĩgu árĩcũ ïarã judio masa ĩgu pohrogue gamenere ĩgũre serẽpima daja:

—Yoatariari boje guare ðaro werebeaa mũhũ. Diaye guare ðaro were purumujuque. ¿Cristo Goãmu ĩgu obeodigu ta âhriri mũhũ? arĩma erã ĩgũre.

<sup>25</sup> Erã eroparĩcũ peegu ðpa arĩ yũhrimi Jesu:

—Mũare weretuhabu yũhũ. Yũ eropa werequerecũ ta yũre peebeaa mũa. Yũ Pagu ĩgu dorero dopa ta ĩgu turari mera ii ĩhmurabu mũare. Eropa iigu yũ Cristo árĩrĩre ta mũare ĩhmuũgũ iirabu. <sup>26</sup> Yũ eropa ii ĩhmuquerecũ ta yũre peebeaa mũa. Mũapũ yaharã árĩbeaa. Eropirã gajigu yarã oveja iro dopa árĩrã yũpũre peebeaa mũa. <sup>27</sup> Oveja erãre îhadibugũre erã peediro dopa ta yaharã yũre peema. Eropigu erãre masia yũhũ. Eropirã erã yũ mera wahama. <sup>28</sup> Eropigu umũri nũcu Goãmu mera árĩcũ iiaa erãre. Eropirã erãpũ peamegue wasome. Eropigu yaharâre yũ îhadibucũ gajirãpũ ne yũre emamasibeama erãre. <sup>29</sup> Yũ Pagu yaharâre yũre odigu yũ tauro turami. Eropirã yũ Pagu sã yaharãre ĩgu îhadibucũ gajirã ĩgu sãre ne emamasibeama. <sup>30</sup> Yũhũ, yũ Pagu mera yujugũ ta âhraa, arĩmi Jesu judio masare.

<sup>31</sup> Ĩgu eroparĩcũ peerã judio masapũ ĩgũre deaburi utãre dipaturi aĩma daja. <sup>32</sup> Erã eropa iicũ ïagũ Jesu erãre serẽpimi:

—Yũ Pagu ĩgu turari mera baja deyoro moarire ii ĩhmurabu mũare. ¿Ñehenore iira dipuwaja utã mera deadiari mũa yũre? arĩ serẽpimi.

<sup>33</sup> Īḡu eroparīcũ peerã õpa arĩma erã:

—Goãmu turari mera mu ii ĩhmuri dipuwaja mre utã mera dea wejẽdiabeaa gua. Goãmure mu ñero wereniguiri dipuwaja mre utã mera dea wejẽdiaa gua. Masu árĩquereḡu ta muhu “Goãmu ãhraa yũhu,” mu arĩri dipuwaja mre utã mera dea wejẽdiaa gua, arĩ yũhrima erã.

<sup>34</sup> Erã eropa arĩ yũhricũ peegũ Jesu erãre weremi:

—Mua sãre “Goãmarã,” arĩ piyumi Goãmu. Eropa ta arĩ gojañuma ĩḡu dorerire erã gojarapũḡue. <sup>35</sup> Goãmu yare erã gojarapũ queoro árĩcũ mari masia. “Ḡuyari ãhraa,” iripũre arĩmasibeeaa mari. Eropigu ĩḡu yare pepirãre diaye ta ĩḡu “Goãmarã,” arĩ piyumi. <sup>36</sup> Goãmu yare beyenijagu i yebaguere obeomi. Eropigu “Yũhu Goãmu magũ ãhraa,” yũ arĩra dipuwaja “Goãmure ñero wereniguigu iimi Jesu,” arãa mua yure. ¿Duhpirã yare eropa arĩri mua? <sup>37</sup> Yũ Pagũ ĩḡu gamero dopa ta ĩḡu turari mera yũ ii ĩhmubiricũ tamerare yũ buherire “Diaye ta ãhraa,” arĩbiriboya mua. <sup>38</sup> Yũ Pagũ ĩḡu turari mera yũ ii ĩhmuquerecũ ta yũpũre umupeodiabiriboca mua. Eropa umupeodiabiriquererã ta ĩḡu turari mera yũ ii ĩhmucũ ĩarã yũ iirare “Diaye ta ãhraa,” arĩque mua. Mua eropa arĩrã, yũ Pagũ mera gua yujuro mera árĩcũ masirãca mua. Eropirã yũhu, yũ Pagũ mera yujuro mera yũ árĩcũ masirãca mua. Eropirã peerãca mua, arĩmi Jesu erãre.

<sup>39</sup> Īḡu eroparĩcũ erã ĩḡure dipaturi ñeadiarima. Erã eropa ñeadiacũ ĩḡu duhri wiria wami.

<sup>40</sup> Eropa wiriadiguḡue ta Ñũ masare ĩḡu waĩyemũhtadirogue Jordán waĩcũriya sipũ majasegue gua dipaturi wabũ daja. Eroḡue dujacãbu.

<sup>41</sup> Eropirã masa bajarã ĩḡure ĩarã erama. Őpa arĩma erã erã basi:

—Ñũ waĩyegũpũ Goãmu turari mera deoro moarire ii ĩhmubirimi. Eropa ii ĩhmubiriquerẽcũ ta árĩpehreri Jesure ĩḡu wererapũ diaye ta ãhraa, arĩma masa erã basi.

<sup>42</sup> Eropirã masa erogue bajarã umupeoma Jesure.

## 11

### *Lázaro waĩcũḡu sĩria wañumi*

<sup>1</sup> Eropi Judea yebague Betania waĩcũri maca majagu Lázaro waĩcũḡu arĩmi. Iri maca ĩḡu pagũ porã nome María, Marta mera arĩma.

<sup>2</sup> Marĩapũ Jesure poresuri mera sũbo, igo poari mera ĩḡure tucoe-bodigo arĩmo. Igo tĩḡu Lázaropũ dorecũḡu iipũ. <sup>3</sup> Eropirã erã nome gajirãre Jesure weredorerã obeoñorã.

—Opũ, mu mahigu dorecũḡu iimi, arĩ weredorerã obeoñorã Lázaro pagũ porã nome.

<sup>4</sup> Erã gua pohrogue eraa, iri querere werẽcũ peegũ õpa arĩmi Jesu guare.

—Dohpaguere Lázaro ĩḡu dorecũri sĩriburi árĩbeaa. Goãmu turarire masare ĩhmuburire dohpaguere ĩḡu dorecũmi. Eropirã yũ turari opagu árĩcũ sãre masa ĩarãcoma, arĩmi Jesu.

<sup>5</sup> Jesu Martare, igo pagũ mago, Lázaro sãre turaro mahĩmi. <sup>6</sup> Eropigu Lázaro ĩḡu dorecũri peequereḡu ta ero Jesupũ penũ dujanimi.

<sup>7</sup> Penũ pũhrũ Jesu õpa arĩmi guare ĩḡu buherãre.

—Dipaturi Judea yebague dujaa warã daja, arĩmi guare.

<sup>8</sup> —Buhegu, cārūgā ta mure judio masa utā mera dea wejēdiama. ¿Duhpigū dipaturi dujadiari mūhu? arību gua īgure.

<sup>9</sup> Gua eroparīcū peegu īgu erā wejēmasibirirare weregu, werenigui queori mera guare ōpa arīmi:

—Wuaro guñaricūbiricāque. Yujunre doce horari gohra āhraa. Abe umu majagu árīcū ōaro īhaa mari. Eropirā umure curirā ne cohresome mari. <sup>10</sup> Naitīaro curirā cohrema. Abe umu majagu maricū ōaro īabeama erā, arīmi Jesu.

<sup>11</sup> Eropa arīgu guare werenemomi.

—Mari mera majagu Lázaro carīgu iicumi. Īgu eropa carīquerecū ta yūhu īgure wahgūgu wagura, arīmi guare.

<sup>12</sup> —Opū, Lázaro carīgu árīgu tarigucumi, arību gua.

<sup>13</sup> Gua eropa arīquerecū ta Jesupū “Carīgu iicumi,” arīgu, “Sīria wami,” arīgu iidigu árīmi. Īgu “Lázaro carīgu iicumi,” arīcū peerā “Lázaro soogu iicumi,” arī pepiribu guapu. <sup>14</sup> Gua eropa arī pepicū masigu Jesu guare diaye weremi.

—Lázaro sīria wañumi. <sup>15</sup> Yu mariro īgu sīricū ōapūricāa. Eropirā mūa yure umupeonemorāca. Ina ta. Mari iarā warā īgu pohrogue, arīmi Jesu.

<sup>16</sup> Toma sūhruadigu erā arīgupu ōpa arīmi guare:

—Mari sā Jesu mera warā. Īgure wejērā mari sāre wejēporo, arīmi Toma.

*Jesu “Eropa árīniguicācū iigu masare masugu āhraa,” arīñumi*

<sup>17</sup> Eropi gua erogue ejara pūhrū ero majarā ōpa arī werema Jesure:

—Wapicurīnū taria Lázaro mūrure masa gobegue erā apira pūhrū, arī werema īgure.

<sup>18</sup> Betaniapū Jerusalén pohrogā ūhre kilómetros yoaro dujabū. <sup>19</sup> Eropirā judio masa bajarā Martare, María sāre ñehamere orerā eranirā árīma Lázaro īgu sīrira pūhrū. <sup>20</sup> Eropigu Jesu mera gua ejaboro pohro árīcū peego Martapū guare bocatīrigo eramo. Igo bocatīrigo wacū Mariapū igo ya wihi dujadigo árīmo. <sup>21</sup> Eropa bocatīrigo Marta ōpa arīmo Jesure:

—Opū, yū tīgu īgu sīriboro core mūhu ohō árīcū īgu sīribiriboañumi. <sup>22</sup> Dohpague sāre Goāmure mū serēcū īgu mū serēro dopa ta iigucumi, arīmo Marta Jesure.

<sup>23</sup> —Mū tīgu masagucumi, arīmi Jesu igore.

<sup>24</sup> —I yeba pehrerīnū īgu masa mūriaborore masia yūhu, arīmo igo.

<sup>25</sup> Igo eroparīcū Jesu weremi daja:

—Yūhu sīrinirāre masacū iigu āhraa. Masare yū mera eropa árīniguicū iigu āhraa. Yure umupeogu sīriqueregu ta eropa árīniguicāgucumi. <sup>26</sup> Eropirā arīpehrerā Goāmū mera árīniguirā yure umupeorā peamegue wasome. ¿Ire masiri mūhu? arīmi Jesu igore.

<sup>27</sup> —Opū, masia yūhu. “Cristo Goāmū magu i yebague arigucumi,” erā arīdigū mū árīcū masia yūhu, arīmo Marta Jesure.

*Lázaro īgu masa gobe pohro Jesu oreñumi*

<sup>28</sup> Marta eropa arītuha igo pagū magore Mariāre sihugo wamo.

—Marire buhegu mari ya macare eranijagu iiami. Mure sihuami, arī yayarogā arī werepo Mariāre.

<sup>29</sup> Igo eroparĩcũ peego María pobero mera wahgãñugaja, gũa pohrogue árimo Jesure ïago arigo. <sup>30</sup> Erã ya macague ejanibiricarabũ dohpa. Marta guare igo bocatĩridirogue árinibũ gũa. <sup>31</sup> Judio masa iri wihi Mariare ñehamere orerã iinirã árima. Eropirã igo pobero mera wahgã wacũ ïarã erã igore nũrsiagãñirã árima. “Igo ïgũ mũrũre erã apira gobegue orego wago iicumo igo,” arĩ pepinirã ářřima erã. Eropa arĩ pepirã igore nũrsiagãñirã ářřima.

<sup>32</sup> Eropigo María gũa pohrogue erago, Jesure ïha, ïgũ guburi pohro merejamo.

—Opũ, yũ tígũ ïgũ sĩriboro core mũhũ ohõ ářřcũ ïgũ sĩribiriboañumi, arĩmo igo ïgũre.

<sup>33</sup> Eropigũ igo judio masa igo mera arinirã sã erã orecũ ïagũ Jesupũ turaro bajawere ñero siporãcumi.

<sup>34</sup> —¿Lázaro mũrũre nohogue opari mũa? arĩ serẽpimi Jesu.

—Opũ, ïagũ arique, arĩ sihugãma erã.

<sup>35</sup> Erã eroparĩcũ peegu Jesu oremi.

<sup>36</sup> ïgũ orecũ ïha judio masa õpa arĩma erã basi:

—Lázaro mũrũre Jesu burigã mahirañumi, arĩma.

<sup>37</sup> Gajirãpũ õpa arĩma:

—Cuiiri ïhajabigũre ïacũ iigu ãhrimi ihĩ Jesu. ¿Eropigũ Lázaro ïgũ sĩriboro core masumasibiriboayuri? arĩma gajirã.

#### *Lázarore masuñumi Jesu*

<sup>38</sup> Eropigũ Jesu dipaturi turaro bajaweremi. Eropirã ářřpehrerã Lázaro mũrũ masa gobegue ejabũ. Utãyegue ářřiri gobegue ïgũ dũpũ mũraro erã sĩ acura gobegue ářřibũ. Eropi iri gobegue wũariye utãye mera erã bihara gobegue ářřibũ.

<sup>39</sup> —Utãyere aĩ weaque, arĩmi Jesu.

ïgũ eroparĩcũ peego Marta sĩridigũ mũrũ pagũ mago õpa arĩmo:

—Opũ, dohpague wapicũrinũ wahaa ïgũ sĩrira pũhrũ. Eropiro ïgũ dũpũ mũraro wĩ arĩca, arĩmo Jesure.

<sup>40</sup> —“Yũre umupeogo Goãmũ turarire ïagoca,” mũre arĩrabũ, arĩmi Jesu Martare.

<sup>41</sup> ïgũ eropa arĩra pũhrũ erã utãyere aĩ weama. Erã eropa aĩ weara pũhrũ Jesu umarogue ïha Goãmũre õpa arĩmi:

—Ahũ, yũre mũ peetuhabũ. Irire mũ iicũ masigu mucubiria mũre.

<sup>42</sup> Yũre mũhũ wũmuri nũcũ peniguia. Irire masia. Eropa masiqueregũ ta yũhũ mũ obeodigũ ářřcũ õre niguirã erã masiburire mũre eropa arĩgũ iiaa.

<sup>43</sup> Eropa arĩtuha Jesu turaro gaguiniguimi:

—Lázaro, arique, arĩ gaguiniguimi ïgũ.

<sup>44</sup> ïgũ eroparĩcũ sĩridigũ mũrũpũ ïgũ mojotorire ïgũ guburi sãre suhri gasiri mera erã diridigũ, ïgũ dipurure suhri gasiri mera erã omadigũ masa gobegue wiririmi.

—ïgũre dirirare pãque ïgũre, arĩmi Jesu

#### *Judio masa oparãpũ Jesure ñeadiariñuma*

*Mt 26.1-5; Mr 14.1-2; Lc 22.1-2*

<sup>45</sup> ïgũ eropa masucũ ïarã bajarã judio masa mera majarã María mera ářřinirã Jesure umupeoma. <sup>46</sup> Gajirãpũ erã mera majarã fariseo

masa pohrogue eja, Jesu ĩḡu iirare wereñorã erãre. <sup>47-48</sup> Eropirã pahia oparã, fariseo masa oparã sã gamenere, erã basi õpa arĩ wereniguiñorã.

—Jesu bajasuburi deyoro moarire ii ĩhmumi. ĩḡu eropa iicũ, “Irire iibita,” mari arĩbircũ árĩpehrerã masa ĩḡure umupeo, ĩḡu mera wabocoma. Eropirã Roma majarã oparã Goãmũ wihire cõadorerã obeerãcoma erã yarã surarare. Mari ya yeba sãre emarãcoma erã. Mari ya yeba majarã Jesure erã opu erã apicũ ĩarã Roma majarã oparã guarã ñero iirãcoma marire. ¿Eropa iirã dohpa iirãcuri dohpaguere? arĩ wereniguiñorã erã erã basi.

<sup>49</sup> Erã eropa arĩquerecũ ta gajigũ Caifa waĩcugu iri bojorire pahia opu árĩḡu erãre werepũ.

—Mũapũ ne masibea. <sup>50</sup> Judio masa árĩpehrerã mari ya árĩburire yujugũ masũ ĩḡu sĩricũ õhaa. ĩḡu sĩribircũ mari árĩpehrerã judio masa pehrea waboca. Irire mũa masibea, arĩmi Caifa erãre.

<sup>51</sup> Eropa arĩḡu ĩḡu gamero eropa arĩbiriñumi. Pahia tauro opu ĩḡu árĩcũ judio masa ya árĩburire Jesu ĩḡu sĩriborore Goãmũpũ Caifare eropa arĩ weredoreñumi. <sup>52</sup> Jesu ĩḡu sĩrigũ judio masa ya dihta sĩribiriñumi. Sĩrigũ árĩpehrerã Goãmũ porã i yeba árĩpehrero árĩrã sãre erã ya árĩburi sãre sĩriñumi Jesu. Erã yuju curu árĩboro dopa sĩriñumi. <sup>53</sup> Caifa eroparĩcũ peerã erã “¿Jesure dohpa ii wejẽracuri mari?” arĩ wereniguirã ĩḡure wejẽmorã iñorã.

<sup>54</sup> ĩḡure erã wejẽdiacũ masigũ Jesu bajarã judio masa watope dipaturi curigũ wabirimi. Eropigũ masa marirogã Efraín waĩcũri macague guare sihu wami. Guare iri maca sihu dujanimi Jesu.

<sup>55</sup> Irisubure Pascua bosenu gũa judio masa bosenu árĩboro merogã duhyabũ. Eropirã bosenu core masa bajarã gajĩ macari majarã masa Jerusalengue gamenerema. Pascua majare erã baboro core Goãmũ ya árĩburire erã basi coemorã ejanirã árĩma. <sup>56</sup> Eropirã erã Jesure amarã iñorã. Erã eropa amacũ ĩarã Goãmũ wihigue árĩrã õpa arĩ wereniguiñorã:

—¿Bosenure ĩagũ aribiribocuri Jesu mũa pepicũ? arĩ wereniguiñorã erã basi.

<sup>57</sup> Eropirã pahia oparã, fariseo masa sã õpa arĩ weredoreñorã masare:

—Jesu ĩḡu árĩrore mũa masirã wereque guare. ĩḡure ñeamorã iiaa gũa, arĩñorã oparã masare.

## 12

*María Jesu guburire poresuri mera pipeoñumo*

*Mt 26.6-13; Mr 14.3-9*

<sup>1</sup> Pascua bosenu seis nũri gohra duhyacũ Jesu gũa ĩḡu buherã mera Betaniague ejabũ. Lázaro Jesu ĩḡu masudigũ iri maca majagũ arĩmi. <sup>2</sup> Gũa ejara pũhrũ Jesu sã gũa ya bari árĩburire iima gajirã. Eropirã Lázaro, Jesu, gũa mera mesare dojabũ. Gũa eropa dojara pũhrũ Marta barire peomo guare. <sup>3</sup> Eropigo María poresuripure nardo waĩcũri goripure yuju kilo deco aĩgãri, Jesu guburire pipeomo. Pipeotuha igo poari mera tucoemo. Igo eropa pipeora pũhrũ iri wihi õaro poresu sehya wabũ. <sup>4</sup> Igo eropa iicũ ĩha gũa mera majagũ, Jesure ĩhaturirãre wiabu Juda Iscariotepũ õpa arĩmi:

<sup>5</sup> —¿Duhpigo iri poresuri eropa iisiriri igoa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocuräre oboañumo igo, arimi igu.

<sup>6</sup> Judapu mojomorocuräre itamudiabiriñumi. Igu gua ya niyeru dibugu ariqueregu ta yajaricugu arimi. Eropigu igu gua ya niyeru sare yujuyerisuburi aimurimi. Eropigu iri niyerure aidiagu arigu, eropa arinñumi igu Mariare.

<sup>7</sup> Igu eroparicu peegu opa arimi Jesu:

—Eropa aribita igore. Igo poresurire yare igo durare yare pipeoamo yare era yaaboro core yu dure amuyugo. Mojomorocurapu mua mera eropa ariniguicarcama. Eropira mua gamero erare omasia mua. <sup>8</sup> Yupu i yebaguere eropa ariniguicarsome, arimi Jesu.

#### *Pahia opara Lazarore wejediañuma*

<sup>9</sup> Eropira Jesu igu Betaniague aricu peerä judio masa bajarä igure iarä arima. Igu dihtare iarä aribirima. Lazaro siridigu Jesu igu masudigure igu sare iarä arirä iima. <sup>10</sup> Era iarä ejarare pahia opara masira Lazarore wejediañora. <sup>11</sup> Lazaro siridigu Jesu igu masudigu aricu iarä bajarä masa Jesure umupeoma. Igu eropa masucu iarä bajarä judio masa era pahia era buheripure coama. Era eropa coacu iarä pahia oparapu guataria wa, Lazaro sare wejediañora.

#### *Jerusalengue ejañumi Jesu*

*Mt 21.1-11; Mr 11.1-11; Lc 19.28-40*

<sup>12</sup> Pascua bosenu era icu bajarä masa Jerusalengue iarä wanira arima. Gajinu Jerusalengue Jesu igu waburire masa peenira arima. <sup>13</sup> Eropira bejepure aiga, igure bocatirira wama. Eropa bocatirira opa arı gaguiniguima era.

—Ire umupeora. Ihi Goamu igu obeodigu oaro ariporo. Ihi judio masa mari opu ta ahrimi, arı gaguiniguima era.

<sup>14</sup> Jesu burroga igu bocadigu weca peyami. Igu eropiigu Goamu yare era gojarapu werediro dopa ta iimi. Opa arı gojanumi Goamu yare weryumhtadigugue.

<sup>15</sup> Jerusalen waicuro majara guibiricaque mua. Iaque. Mua opu burroga weca peyagarimi, arı weremhtañumi Goamu yare era gojarapugue.

<sup>16</sup> Irire gua igu buherä oaro masinibiribu. Eropa masibiriquerera ta umarogue Jesu igu murara puhru gua era gojara murare guña boca pee masibu. Opa arı pepibu: “Goamu yare era gojarapugue Jesure weremhtañuma. Eropiro Goamu yare era gojarapu arıdiro dopa ta sihajabu Jesure,” arı pepibu gua basi.

<sup>17</sup> Lazarore era apira gobegue arigure Jesu igu piyucu igure igu masucu ianirapu weresiriniginira arima masare. <sup>18</sup> Eropira Lazarore Jesu igu masurare era peenira arira masa bajarä Jesure bocatirira wama. <sup>19</sup> Era Jesure eropa umupeocu iarä fariseo masa era basi opa arinora.

—Arıpehrera Jesu yara dihta wara iima dohpaguere. Eropira mari dohpa iimasibea erare, arinora fariseo masa era basi.

#### *Bajameraga Griego masa Jesure amagarinuma*

<sup>20</sup> Eropi bosenu Goāmũ wihigue Goāmũre umupeorã eranirã mera majarã bajamerãgã griego masa arĩñorã. <sup>21</sup> Eropirã erã Felipe pohrogue erañorã. Felipepũ Betsaida waĩcuri maca Galilea yeba arĩri maca majagũ arĩmi. Eropirã ĩgu pohrogue erarã õpa arĩñorã ĩgure:

—Jesure ĩadiaca gua, arĩñorã erã.

<sup>22</sup> Erã eroparĩcũ peegu Felipe Andreguere weregu wapũ. Eropirã erã perã Jesure werema. <sup>23</sup> Erã werera pũhrũ Jesu guare weremi:

—Yũhũ masũ Goāmũ ĩgu obeodigu añraa. Yũre arĩpehrerã umupeoburisubu arĩro iiaa dohpaguere. Dohpaguere yũ sĩriburisubu arĩro ta iiaa. <sup>24</sup> Diaye mũare arĩgu iiaa. Oteriyere yebague yaabiricũ, iriyere otebiricũ yujuye ta dujaroca. Eropiro iriyere mari otera pũhrũ bajayeri ducasiua. Eropa ta yũ sĩrira pũhrũ yũre erã yaara pũhrũ bajarã masare Goāmũ mera eropa arĩniguimorãre iigũca yũhũ. <sup>25</sup> I yeba mũa arĩrire wũaro pepibõca mũa. Eropa pepirã Goāmũre guñabirã peamegue warãca mũa. I yeba mũa arĩrire eropa pepicãrã, Goāmũ mera eropa arĩniguirãca. <sup>26</sup> Yahare iidiarã, yũ buherire õaro peeque mũa. Mũa eropa iirã mũa sã yũ arĩboroguere arĩrãca. Yahare ĩigure yũ Pagupũ umupeogũcumĩ, arĩmi Jesu guare.

*Jesu ĩgu sĩriburiñere wereñumi*

<sup>27</sup> Õpa arĩnemomi guare.

—Dohpaguere yũhũ ñero sĩporãcua. ¿Yũ Pagure dohpa arĩgũcuri yũhũ? “¿Ahũ, yũ ñero tariborore tauque,” ¿arĩbocuri yũhũ? Irire arĩbeaa yũhũ. Ñero taribu ta i yebaguere aribũ. Eropiro yũ ñero tariburisubu dohpaguere añraa, arĩ weremi Jesu guare ĩgu buherãre.

<sup>28</sup> Eropigu õpa arĩmi ĩgu Pagure:

—Ahũ, mũ turagu arĩrire dohpaguere ĩhmuque masare, arĩmi Jesu ĩgu Pagure.

ĩgu eroparĩcũ umarogue wereniguiro caribũ.

—Turagu yũ arĩrire masare ĩhmutuhabũ. Dohpaguere eropiigu dipaturi ĩhmuğũca masare, arĩro caribũ.

<sup>29</sup> Eroparĩcũ peerã ero niguirã masa bajarã õpa arĩma:

—Bupu arĩcumĩ eropa busugu, arĩma masa.

—Anyu Jesure weregu iiami, arĩma gajirã masa.

<sup>30</sup> Õpa arĩmi Jesupũ:

—Umarogue yũre peedorero eropa busubiro carabũ. Mũapũre peedorero eropa carabũ. <sup>31</sup> Dohpaguere i yeba majarã erã ñeri iira dipuwaja dipuwajacũrãcoma. I yeba majarã erã opũre watĩre Goāmũ cóãgũcumĩ. <sup>32</sup> Eropigu crusague yũre erã aĩ wahgũ nugucũ bajarã masare yaharã arĩmorãre iigũca yũhũ, arĩmi Jesu.

<sup>33</sup> Eropa arĩgu crusague ĩgu sĩriborore weregu iimi Jesu masare.

<sup>34</sup> ĩgu eroparĩcũ peerã masapũ ĩgure õpa arĩma:

—Goāmũ yare erã gojarapũ õpa arãa: “Cristo arĩpehrerinũri arĩgũcumĩ,” arĩ gojañuma. ¿ĩgu eropa arĩ gojacũ mũre masũre Goāmũ ĩgu obeodigure dohpa arĩronore mũre wejẽ crusague aĩ wahgũrãcuri masa? ¿Goāmũ ĩgu obeodigu noa añriri ĩgu? ¿Cristo arĩbeari mũhũ? arĩ serẽpima erã Jesure.

<sup>35</sup> Erã eroparĩcũ õpa arĩ yũhrimi Jesu:

—Boyoriñe iro dopa arĩgu masare Goāmũ yare õaro masicũ iiaa yũhũ. Pũhrũñarigã mũa mera arĩsome yũhũ. Mũare yũ buhecũ

dohpaguere peeque ñerire maa iibiriburire, Goãmũ mera maa eropa árĩnguiburire. Yũ buherire peebirã naitĩaro curirã iro dopa erã waborore masibeama. <sup>36</sup> Eropigũ boyoriñe iro dopa ta árĩgu yũhũ ta áhraa. Eropigũ mware buhegu Goãmũ yare óaro masicũ iiaa mware. Dohpaguere yũ waboro core yũre umupeoque. Eropa umupeorã yaharã árĩrãca maa, arĩmi Jesu.

Eropa arĩ weretuha waha wami erãre duhri wahgãgu.

*Judio masa Jesure umupeobiriñuma*

<sup>37</sup> Bajasuburi Goãmũ turari mera erãre Jesu ĩgu deyoro moarire ii ĩhmuquerecũ ta judio masa bajarã ĩgũre ne peediabirima. <sup>38</sup> Goãmũ yare erã gojarapũ Isaia murgũ ĩgu gojadiro dopa ta eropa iirã iima erã. Ópa arĩ gojañumi Isaia:

Goãmũ, mũ buherire gũa werecũ masa peediabeama. Mũ turarire erãre mũhũ ii ĩhmuquerecũ ta irire “Diaye árĩbeaa,” arĩma erã, arĩ gojañumi Isaia Goãmũ yare gojarapũgue.

<sup>39</sup> Erã eropa peediabiricũ ĩagu Goãmũ erãre masibiricũ iĩñumi. Iri sãre Isaia ópa arĩ gojañumi daja:

<sup>40</sup> Cuirĩ ĩhajabirã iro dopa árĩcũ iidi árĩmi Goãmũ erãre. Eropigũ ĩgu yare masibiricũ iidi árĩmi erãre. Eropirã ĩgu turarire erã ĩaquererã ta erã ĩarare masibirinirã árĩma erã. Eropirã ĩgu buherire peequererã ta irire masibirinirã árĩma erã. Goãmũ yare masirã erã ñerire cóadoreboñuma. Eropigũ erãre tauboñumi ĩgu, arĩ gojañumi Isaia Goãmũ yare erã gojarapũgue.

<sup>41</sup> Isaia Cristo turarire masiyudigu eropa arĩ gojamũhtañumi.

<sup>42</sup> Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare güirã gajirã masare Jesure erã umupeorire werebirinirã árĩma. Irire erã werecũ peerã gũa judio masa buheri wihigue erãre ñajadorebiriboñuma fariseo masapũ. <sup>43</sup> Goãmũre mucubiricũ iidiaquererã ta erã tauro masapũre mucubiricũ iidianirã árĩma erã. Eropirã erã Jesure ne umupeorã “Jesu yarã áhraa,” arĩ gajirãre werediabirinirã árĩma.

*Jesu wererire erã peediabiriri dipuwaja masa dipuwajacũrãcoma, arĩ wereñumi Jesu*

<sup>44</sup> Masa bajarã gũa pohro gamenerenirãre Jesu turaro busũro mera weremi:

—Yũre umupeogu yũ dihtare umupeobeami. Yũre obeodigu sãre umupeomi ĩgu. <sup>45</sup> Eropirã yũre masirã yũre obeodigu sãre masima. <sup>46</sup> Yũhũ boyoriñe iro dopa ta árĩgu yũhũ Goãmũ yare buhegu ahraa i yebaguere. Eropigũ Goãmũ yare mware masicũ iiaa. Yũre umupeogu naitĩaro wagũ iro dopa ñerire iiniguisome. Yũre umupeogu diaye pepigũcumĩ. <sup>47</sup> Gajirã yũ wererire peequererã ta irire yũhribeama. Erã eropa yũhribiriquerecũ ta, erã yũhribirira dipuwaja moasome yũpũ dohpa. I yebaguere dipuwaja moagu arigu aribiribũ yũhũ. I yeba majarãre peamegue wabonirãre taugu arigu aribũ yũhũ. <sup>48</sup> Yũre gamebigure yũ wererĩ sãre gamebigure dipuwaja moari árĩroca. ĩgu yũre peebirira dipuwaja i mũũ pehrecũ dipuwajacũgũcumĩ. <sup>49</sup> Yũhũ yũ gamero werebeaa. Yũ Pagũ yũre obeodigupũ yũre weredoremi. Eropiro yũ wereripũ ĩgu ya werenigui ĩhraa. <sup>50</sup> ĩgu ya wereniguirire



peerã Goãmũ mera eropa árĩniguirãca mũa. Eropigũ yũ Pagũ ĩgu weredoreldro dopa ta werea mũare, arĩmi Jesu gũare.

## 13

### *Jesu ĩgu buherãre guburire coeñumi*

<sup>1-3</sup> Eropi Pascua bosenu coregã árĩbũ. Iri ñamire Jesu gũa ĩgu buherã mera iri bosenure babu árĩmi. Eropigũ i yebare ĩgu wriaborore ĩgu Pagũ pohro waburire merogã dũhyacũ masidigũ árĩmi Jesu.

Gũa barisubu Judare watĩ doretuhadigũ árĩmi ĩgu pepirigue. Eropigũ ĩgure Simo Iscariote magũre Jesure ĩhaturirãre iri ñamire ĩgu wiaburire doretuhadigũ árĩmi. Jesu ĩgu yarãre i yeba árĩrãre burigã mahidigũ árĩmi. Eropigũ ĩgu mahirare ĩhmubu gũa guburire coemi. ĩgu Goãmũ pohrogue ĩgu arirare, pũhrũ ĩgu umarogue ĩgu mũriaburi sãre masidigũ árĩmi. ĩgu Pagũ Goãmũ ĩgure árĩpehrerã weca opu ĩgu apira sãre masidigũ árĩmi. <sup>4</sup> Eropa masiqueregu wahgãnuğaja, ĩgu suhriro weca majañere tuwea suhriro gasiro mera ĩgu paru yũjũre dirimi. <sup>5</sup> Dirituha soropa mera decore pisã, gũare ĩgu buherãre gũa guburire coenuğami. Gũare coetuha ĩgu dirira gasiro mera tucoemi gũa guburire.

<sup>6</sup> Gajirã buherãre coegã, Simo Pedroguere ejami. ĩgu guburire ĩgu coeboro core, Pedropũ ĩgure ðpa arĩmi:

—Opũ, ¿yũ guburire coebu iiri mũhũ? arĩmi Jesure Pedro.

<sup>7</sup> —Dohparagã yũhũ mũre iiburire masibea mũhũ. Eropa masibiri-queregu ta pũhrũ masigũca, arĩmi Jesu ĩgure.

<sup>8</sup> —Yũ guburire ne coesome mũhũ, arĩmi Pedro.

—Mũre yũ coebircũ yahagũ árĩsome mũhũ, arĩmi Jesu.

<sup>9</sup> —Opũ, yũ guburi dihtare coebircãque. Yũ guburire, yũ mojotorire, yũ dipuru sãre coeque, arĩmi Pedro.

<sup>10</sup> ĩgu eroparĩcũ Jesu ðpa arĩmi:

—Yujugũ masũ guhagũ ĩgu dũpũre ðaro tucoepehomi. Eropiro ĩgure dipaturi tucoema masiya mara. ĩgu guburi dihtare coero gahmea. Árĩpehrerã mũa ñeri iirare coenirã mũa árĩquerecũ ta yujugũ mũa mera majagũ ĩgu ñerire coeya marigũ aħrimi, arĩmi Jesu.

<sup>11</sup> Jesu ĩgure ĩhaturirãre wiabure masituhãñumi. Eropa masigũ “Yujugũ mũa mera majagũ ĩgu ñerire coeya marigũ aħrimi,” arĩñumi ĩgu.

<sup>12</sup> Gũa guburire coetuha, suhrirore sañatuha, doajami daja ĩgu doadiro ta. Tuhaja ðpa arĩmi gũare:

—¿Dohparagã yũhũ mũare iirare masiri mũa? <sup>13</sup> Mũa yũre “Buhegu,” arĩ piyurã, “Opũ,” arĩ piyurã diaye ta arĩrã iiaa yũre. Mũare buhegu, mũa opu diaye ta aħraa yũhũ. <sup>14</sup> Eropirã yũhũ mũare buhegu, mũa opu árĩqueregu ta mũa guburire yũ coecũ mũa sã mũa mera majarãre guburire coeque. <sup>15</sup> Dohparagã mũa iiburire mũare ĩhmuabũ. Mũa mera majarãre mũa itamuburire mũare ĩhmuabũ. Mũare yũ iidiro dopa ta mũa sã iique. <sup>16</sup> Diaye mũare arĩgu ta iiaa. Mũa yũ pohro majarã dopa árĩrã yũ tauro árĩbeaa. Mũare buhedore yũ obeorã aħraa mũa. Eropirã yũ tauro árĩbeaa mũa. Eropa iigu ta “Yũ iidiro dopa ta iique,” arãbũ yũhũ mũare. <sup>17</sup> Ire mũa masirã, yũ dorerire iirã, mucubirirã árĩrãca mũa.

18 “Mũare árípehreräre eropa aríbeaa. Yũ beyeniräre masia yũhũ. Goãmũ yare erã gojarapũ arídiro dopa ta eropa waroca. “Yũ mera bagũ ta yũre wejẽdiami,” arĩ gojañuma Goãmũ yare erã gojarapũgue. 19 Ĩgũ yũre eropa wiaboro core ire weryugũ iiaa mũare. Yũre ĩgũ eropa iira pũhrũ “Jesu ta Cristo Goãmũ ĩgũ obeodigũ àhrimi,” mũa arĩburire ire mũare weryugũ iiaa yũhũ. 20 Diaye ta mũare arĩgũ iiaa. Yũ obeoniräre gamegũ yũ sãre gahmemi ĩgũ. Eropigũ yũre gamegũ yũre obeodigũ sãre gahmemi ĩgũ, arĩmi Jesu gũare ĩgũ buheräre.

*Juda Jesure ìhaturiräre ĩgũ wiaborore wereñumi Jesu*

*Mt 26.20-25; Mr 14.17-21; Lc 22.21-23*

21 Eropa arĩ weretuha Jesu turaro bujaweremi. Eropa bujaweregũ òpa arĩ weremi ĩgũ gũare.

—Diaye mũare arĩgũ iiaa. Yujugũ mũa mera majagũ yũre ìhaturiräre wiagũcumi, arĩmi Jesu.

22 Ĩgũ eroparĩcũ peerã Jesure wiabure masibirã, gũa game ìhamehtubũ. 23 Yũhũ ĩgũ buherã mera majagũ Jesu ĩgũ mahigũpũ ĩgũ pohro doabũ. 24 Eropigũ Simo Pedro yũre ĩgũ mojoto mera sĩpu serẽpidoremi Jesure ĩgũre wiabure: 25 Eropigũ yũpũ Jesu pohro doadigũ serẽpiñabu ĩgũre:

—Opũ, ¿nĩhire arĩgũ iiri mũhũ? arĩbũ yũhũ.

26 —Iru panrure mohwa aĩ, yũhũ yoso ogũ ĩgũ ta àhrimi yũre wiabu, arĩmi Jesu.

Eropa arĩtuha iriru panrure ĩgũ mohwarañere yosotuha Judare Simo Iscariote magure omi. 27 Eropigũ panre ĩgũ ora pũhrũ watĩpũ Judare ñero iidoredigũ arĩmi. Eropigũ Jesu ĩgũre òpa arĩmi:

—Mũ iiburire yojaro mera ii purumujuque mũhũ, arĩmi Jesu Judare.

28 Ĩgũ eroparĩcũ peerã gũa mesague doanirã Jesu Judare ĩgũ arĩrare masibiribũ. 29 Yujurãyeri gũa òpa arĩ pepiribũ: “Juda gũa niyerure dibugũ àhrimi. Eropigũ bosenu gũa baburire asũdoregũ obeoami Jesu Judare. Mojomocuräre niyerure odoregũ iiami Jesu,” arĩ pepiribũ gũa yujurãyeri. 30 Eropigũ Juda iri panre ñeatuha wiria wami. Ĩgũ wiriarasubure ñami arĩbũ.

*Mama doreriñere wereñumi Jesu ĩgũ buheräre*

31 Ĩgũ wiriara pũhrũ gũare òpa arĩmi Jesu:

—Dohpague tamerare yũhũ masũ Goãmũ ĩgũ obeodigũ yũ turagũ arĩrĩre ìhmugũcumi Goãmũ masare. Eropigũ Goãmũ ĩgũ turagũ arĩrĩre ìhmugũca yũpũ. 32 Eropigũ Goãmũ turarire yũ ìhmucũ ĩgũ yũ turari sãre dohparagã ìhmu purumujugũcumi. 33 Yũ porã, yũre peeque. Bajamenũrigã mũa mera arĩnigũca. Yũre amarãca mũa. Eropigũ judio masare yũ arĩdiro dopa ta mũa sãre arãa. “Yũ waborore mũapũ wamasibea,” eräre yũ arĩdiro dopa ta mũa sãre werea. 34 Mama doreriñere mũare weregũra. Mũa mera majaräre mahique mũa. Mũare yũ mahidiro dopa ta mũa mera majaräre mahi umupeoque. 35 Eropirã mũa mera majaräre mũa mahicũ ìha gajirã yaharã mũa arĩcũ ìha masirãcoma, arĩmi Jesu.

*“Jesure masibea,” Pedro ĩgũ arĩburire wereñumi Jesu*

*Mt 26.31-35; Mr 14.27-31; Lc 22.31-34*

36 Ĩgũ eroparĩcũ Simo Pedro Jesure serẽpimi:

—Opɛ, ¿nohogue wagɛcuri mɛhɛ? arĩmi Pedro. Īgɛ eroparĩcũ Jesu yɛhrimi:

—Yɛ waboroguere dohpaguere yɛ mera wamasibeaɛ mɛhɛ. Dohpaguere wamasibiriqueregɛ ta pɛhrɛ yɛ pohro wagɛca, arĩmi Jesu Pedrore.

<sup>37</sup> Pedro arĩmi:

—Opɛ, ¿duhpigɛ dohpaguere mɛ mera wamasibiribocuri yɛhɛ? Yɛre erã wejẽdiaquerecũ yɛhɛ mɛre duhusome. Itamugɛca, arĩmi Pedro Jesure.

<sup>38</sup>—¿Mɛ eropa arĩgɛ diaye ta yɛre itamugɛcuri? Diaye mɛre weregu iiaa. “Jesure masibeaɛ,” arĩgɛca mɛhɛ gajirãre. Ʋhresubu eropa arĩgɛca cãreña Īgɛ wereboro core, arĩmi Jesu Pedrore.

## 14

*Jesu Goãmɛ pohrogue wari maha iro dopa ãhraa yɛhɛ, arĩ wereñumi*

<sup>1</sup> Pɛhrɛ Jesu gɛare õpa arĩ weremi:

—Ne bujawere wɛaro guñaricubiricãque. Goãmɛre “Diaye ta iigɛ ãhrimi,” arĩ umupeoque. Eropirã yɛ sãre eropa umupeoque. <sup>2</sup> Yɛ Pagɛ Īgɛ arĩroguere baja wiri ãhraa. Mɛa arĩborore amuyugɛ wagɛra. Iri diaye ta ãhraa. Eropigɛ mɛare irire werea. <sup>3</sup> Eropigɛ mɛa arĩborore amutuha, dujarigɛra yɛhɛ. Eropigɛ yɛ pohrogue mɛa arĩmorãre aĩgɛ arigɛra yɛhɛ daja. <sup>4</sup> Eropirã yɛ waburi mare masia mɛa, arĩmi Jesu gɛare Īgɛ buherãre.

<sup>5</sup>—Opɛ, mɛ waborore masibeaɛ gɛa. ¿Eropirã dohpa ii mɛ waburi mare masirãcuri gɛa? arĩ serẽpimi Toma Jesure.

<sup>6</sup> Īgɛ eropa arĩ serẽpicũ Jesupɛ yɛhrimi:

—Goãmɛ pohrogue wari maha iro dopa arĩgɛ tiiɛa yɛhɛ. Eropigɛ diaye arĩrĩre weregɛ arĩcãgɛ tiiɛa yɛhɛ. Eropigɛ umaroguere ojocarĩnigucũ iigɛ arĩgɛ tiiɛa yɛhɛ. Eropirã yɛre umupeorã dihta yɛ Pagɛ pohrogue warãcoma. <sup>7</sup> Nere yɛre masirã arĩrã, yɛ Pagɛ sãre masiboaya mɛa. Dohpaguere ĩgɛre ĩhaa mɛa. Eropirã ĩgɛre masituhabɛ mɛa, arĩmi Jesu.

<sup>8</sup> Īgɛ eroparĩcũ Felipe õpa arĩmi:

—Opɛ, mari Pagɛre ĩhmuque gɛare. Iripẽta gahmea gɛa, arĩmi ĩgɛ.

<sup>9</sup> Īgɛ eroparĩcũ Jesu weremi:

—Felipe, ¿yoari boje yɛ mera arĩqueregɛ ta, mɛ masinibeari yɛre? Yɛre ĩagɛ yɛ Pagɛ sãre ĩatuhami. “Eropigɛ mari Pagɛre ĩhmuque gɛare,” ¿duhpigɛ eropa arĩri mɛhɛ yɛre? <sup>10</sup> Yɛ Pagɛ mera yujugɛ ta ãhraa yɛhɛ. Irĩre “Diaye arĩbeaa,” ¿arĩgɛ meje iiri mɛhɛ? Mɛare weregɛ yɛ gamero weregɛ iibeaɛ. Yɛ Pagɛre werebasagɛ iiaa. Eropigɛ ĩgɛ yɛ mera arĩgɛ ĩgɛ turari mera ii ĩhmumi. <sup>11</sup> Yɛhɛ, yɛ Pagɛ mera yujugɛ ta ãhraa. Yɛ eroparĩcũ irĩre “Diaye ta ãhraa,” arĩ pepique mɛa. Irĩre “Diaye ta arĩbeaa,” arĩdiarã, Goãmɛ turari mera deyoro moarĩre yɛ ii ĩhmurĩre ĩaque. Eropa ĩara pɛhrɛ yɛ Pagɛ mera yɛ yujugɛ ta arĩrĩre “Diaye ta ãhraa,” arĩ pepique mɛa. <sup>12</sup> Diaye mɛare arĩgɛ iiaa. Yɛre umupeogɛ yɛ iidiro dopa ta iigɛcumi. Eropigɛ ĩgɛpɛ yɛ tauro iigɛcumi. Yɛ Pagɛ pohrogue wabu iiaa dohpaguere. Eropigɛ yɛre umupeogɛ yɛ tauro Goãmɛ turari mera ii ĩhmugɛcumi. <sup>13</sup> Eropigɛ yɛre umupeorãre erã yɛ waĩ mera serẽropẽ ta iigɛra. Eropa

iigu yu Pagu İgu turarire ii İhmuğuca. <sup>14</sup> Yure umupeorã mũa áricũ mũa serëropë ta iigura, arĩmi Jesu.

*Espíritu Santore mũaare obeogura, arĩ wereñumi Jesu*

<sup>15</sup> Eropa arĩtuha guare ðpa arĩnemomi:

—Yure mũa mahirã, yu dorerire iipehorãca. <sup>16</sup> Yu Pagure serëgura. Yu eropa serëcũ yu Pagupu gajigure mũaare itamubure mũaare obeogucumi. Eropigu İgu mũaare itamubupu umari nucu mũa mera árigucumi. <sup>17</sup> İgu diaye majare weregu Espíritu Santo aħrimi. I yeba majarãpu Espíritu Santore masibeama. Eropirã İgure opamasibeama. İgu ta mũa mera árigucumi. Eropirã mũa İgure oparãca. Eropirã İgure masia mũa. <sup>18</sup> Mũaare cóasome yuhu. Mũa mera árĩbu dujariguca yuhu daja. <sup>19</sup> Merogã duhyaa yu waboro. Yu wara puhru i yeba majarã yure umupeobirininã yure dipaturi İasome. Mũapu yure İarãca. Yu ojocaricũ mũa sã umari nucu Goãmu mera ojocarirãca. <sup>20</sup> Irinu yu dujariburinure yuhu, yu Pagu mera yujugu ta yu áricũ masirãca mũa. Eropirã yu mera mũa áricũ mũa mera yu áricũ sãre masirãca mũa. <sup>21</sup> Yu dorerire iigu yure mahigu ta aħrimi. Eropigu yure mahigure yu Pagupu mahigucumi. Eropigu yu sã İgure mahiguca. Eropigu İgure yure ðaro masicũ iiguca, arĩmi Jesu guare İgu buherãre.

<sup>22</sup> Gua mera majagu gajigu Juda waicugu arĩmi Iscariote árĩbigu. Òpa arĩmi İgu Jesure.

—Opu, ¿dohpa iigucuri mũhu guare eropa arĩgu? ¿I yeba majarãre mure masicũ iibigu dohpa iigucuri mũhu gua dihtare mure masicũ iigu? arĩ serëpimi Juda.

<sup>23</sup> İgu eroparicũ Jesu yuħrimi:

—Yure mahirã yu dorerire ðaro iima. Erã eropa iicũ yu Pagupu erãre mahigucumi. Eropirã erã mera árĩrã árĩrãca gua. <sup>24</sup> Yure mahibigu yu dorerire iibeami. Eropiro yu wereri mũa peerapu yu wereniguri árĩbeaa. Yure obeodigu ya wereniguiripu aħraa. İgu yu Pagu ta aħrimi.

<sup>25</sup> Mũa mera árĩnigu ire mũaare wereniguigu iiaa. <sup>26</sup> Puhru yu serëcũ yu Pagu Espíritu Santore obeogucumi mũaare. Eropigu Espíritu Santopu mũaare itamubu árigu, mũaare buhepehogucumi İgu. Eropigu mũaare yu wererare guñacũ iigucumi İgu.

<sup>27</sup> Mũaare ðaro áricũ iiguca yuhu. Yuhu ðaro árĩdiro dopa ta ðaro áricũ iiguca mũaare. I yeba majarã erã iidiro dopa iisome yuhu. Yu tamera diaye ðaro áricũ iiguca mũaare. Bujawere wuaro guñaricubiricãque mũa. Eropirã güibiricãque mũa. <sup>28</sup> “Yuhu waguca. Eropigu mũa mera árĩbu dujariguca daja,” mũaare yu eropa arĩ werecũ peetuhabu mũa. Irire masirã árĩrã mucubiriboaya mũa. Yure mũa diaye mahinirã árĩrã mucubiriboaya mũa. Yu Pagupu yu tauro turami. Eropirã İgu pohroge yu waborore mũa masira puhru yure mahirã mucubiriboaya mũa. <sup>29</sup> Yure mũa umupeoburire yu waborore wereyugu iiaa mũaare.

<sup>30</sup> “I yeba majarã opu watĩ doregu iimi dohpaguere. Eropigu İgu eropa dorecũ yuhu mũa mera wereniguituboro merogã duhyaa. İgupu yure tarinugamasibeami. <sup>31</sup> Yure yu Pagu İgu dorero dopa ta iiaa

yuhũ. Eropa ta iiaa yuhũ yũ Pagure yũ mahirire i yeba majarã erã masiburire.

“Wahgãnũgajaque. Ina warã, arĩmi Jesu guare ïgu buherãre.

## 15

*Jesu iguiru iro dopa ãhraa, arĩ wereñumi*

<sup>1</sup> Eropigu werenigui queori mera buhegu guare õpa arĩmi Jesu:

—Yuhũ iguiru diaye majaru iro dopa arĩgu ãhraa. Yũ Pagupũ iguirure ïhadibugũ iro dopa arĩgu ãhrimi. <sup>2</sup> Iguirure iri dũpũri gamesũriro dopa ta mua yaharã yũ mera ãhraa. Dũca mariri dũpũri iguirure ïhadibugũ ïgu peha cõãro dopa ta yũ Pagũ ïgu gamerire iibirãre cohãmi. Dũcacũri dũpũri iguirure ïhadibugũ ïgu amuro dopa ta yũ Pagũ ïgu gamerire iirãre itamugũcumĩ ïgu “Yũ gamerire iinemoporo,” arĩgu. <sup>3</sup> Yũ wererire peerã, “Diaye ta ãhraa,” arãa mua. Eropigu yũ Pagũ mua ñeri iirare cõãtuhami. <sup>4</sup> Yũre gamesũriro dopa ta yũ mera majarã arĩque mua. Eropigu mua mera arĩguca. Iguiru dũpũri iguiru mera gamesũriro arĩro iri dũpũripũ dũca mara. Eropa ta yũ mera majarã õaro arĩbirã sã yũ Pagũ gamerire iimasibea mua.

<sup>5</sup> Iguirure iri dũpũri gamesũriro dopa ta mua yaharã yũ mera ãhraa. Iri dũpũri iguirure õaro gamesũriro arĩro dũcacua. Mua sã yũre õaro gamesũrirã yũ Pagũ gamerire iiaa. Yũre gamesũrirã arĩbirã ïgu gamerire iimasibea mua. <sup>6</sup> Ñeri dũpũri turira dũpũre ïgu cõãboro dopa ta yũ mera majarã arĩbirãre yũ Pagũ cõãgũcumĩ. Iri dũpũri ñaicũ ïha iguirure ïhadibugũ iri dũpũri aĩ gameneo peamegue soecãgũcumĩ. Eropa ta iigũcumĩ Goãmũ yũ mera majarã arĩbirãre.

<sup>7</sup> “Yũ mera majarã arĩrã yũ buherire cãdijibiriboca mua. Eropa cãdijibirã mua gameropẽ ta yũre serẽque. Eropigu mua serẽropẽ ta ogura. <sup>8</sup> Yũ Pagũ gamerire mua iirã arĩcũ ïarã, “Oã Jesu yarã ãhrima,” arĩ masirãcoma gajirã masa. Eropirã muare ïarã yũ Pagure umupeorãcoma. <sup>9</sup> Yũ Pagũ ïgu yũre mahidiro dopa ta yũ sã muare mahia. Eropirã yũ mahiri mera arĩque mua. <sup>10</sup> Yũ Pagũ ïgu dorerire iiaa yuhũ. Eropigu ïgu mahigu arĩniguiã yuhũ. Eropa ta mua sã yũ dorerire iirã yũ mahirã arĩniguiãcãrãca mua.

<sup>11</sup> “Ire muare wereabu yũ mera mua õaro mucubiriborore. Eropirã turaro mucubirirãca mua. <sup>12</sup> Õpa dorea muare: Muare yũ mahidiro dopa ta mua mera majarãre mua sã mahique. <sup>13</sup> Yujugu masũ ïgu mera majagu yañe arĩborañe sĩrigũ ïgu mera majagure burigã mahiami gajirã mahidiro tauro. <sup>14</sup> Eropirã yũ dorerire iirã yũ mera majarã ãhraa mua. <sup>15</sup> Diaye ta mua yũ mera majarã gohra ãhraa. Mua eropa arĩrã arĩcũ arĩpehrerire yũ iirare werea muare. Pohro majagu ïgu opu iiburire masibeamĩ ïgu. Eropigu “Yũ pohro majarã bu arĩrã ãhraa mua,” arĩbea muare. Yũ Pagũ ïgu yũre wererare muare werepehoabu. Eropa weregu “Yũ mera majarã ãhraa mua,” muare arãa dohpaguere. <sup>16</sup> Muapũ yũre beyebiribu. Yũpũ muare beyebu yũ Pagũ gamerire mua iimorãre. Mua eropa iicũ mua eropa iiri ne yuju diaye gohra arĩsome. Mua eropa iicũ yũre mua umupeocũ yũ Pagũ mua serẽropẽ ta muare ogũcumĩ. <sup>17</sup> Ire muare dorea yuhũ: Mua basi game mahi umupeoque, arĩmi Jesu.

*Jesure ïgu yarã sãre i yeba majarã ïhatuurire wereñumi Jesu*

18 Eropigu guare werenemomi daja:

—I yeba majarā muare erā ihaturicū iarā ire guñaque mua: “Guare eropa ihaturiboro core Jesupure ihaturinugatuhama erā,” arī guñaque. 19 I yeba majarā gohra mua árīcū, erā mera majarāre erā mahidiro dopa ta mua säre mahiboañuma erā. I yeba majarā mera mua árīnicū muare beyebu. Eropirā dohpaguere i yeba majarā gohra árībeaa mua. Mua eropa árībircū iarā i yeba majarā muare ihaturima. 20 Mua yaharā árīrā “Yu tauro árībeaa,” muare yu arīrare guñaque mua. Eropa yu mera majarā árīrā yu ñero tariboro dopa ta ñero tarirāca mua sã. Yure ñero iinirā ta mua säre ñero iirācoma. Yu buherire yuhrinirā ta mua buheri säre yuhrirācoma. 21 I yeba majarā yure obeodigure masibeama. Eropirā yure umupeorā mua árīcū ñero iirācoma erā muare.

22 “Eräre yu buhegu aribircū erā yure gamebirira dipuwaja mari-boaya. Dohpaguere eräre yu buhera puhru “Ñeri dipuwaja mara guare,” arīmasibeama erā. 23 Yure ihaturigu yu Pagu säre ihaturimi. 24 Goãmu turari mera gajirā erā ne iibirirare ii ihmubu. Eropiro eräre irire yu ii ihmubircū erā peebirira dipuwaja mariboaya. Goãmu turari mera yu ii ihmurare erā iara puhru yure yu Pagu säre ihaturima erā. 25 Eropa ihaturirā Goãmu yare erā gojarapū matague ta erā arī gojadiro dopa ta iirā iima erā. Ōpa arī gojañuma: “Eräre yu ñero iibiriquerecū ta yure ihaturima erā,” arī gojañuma matague ta Goãmu yare erā gojarapūgue, arīmi Jesu.

26 Eropigu werenemomi daja:

—Yu puhruque muare itamubu, yu Pagu mera árīgu muare yu obeobu Espiritu Santo ta āhrimi. Īgu diaye majare weregu ta āhrimi. Eropigu ĩgu arigu yu árīricurire weregucumi muare. 27 Muare yu buhenugacūgue mua sã yu mera umari nucū árībū. Mua sã yu árīricurire wererāca, arī weremi Jesu guare.

## 16

1 Eropa arītuha guare ōpa arī werenemomi:

—Puhru yu buherire yu säre mua cóābiriburire ōpa weregura muare. 2 Mari buheri wirigue mua ñajadiacū ñajadoresome muare yaharā mua árīri dipuwaja. Eropirā muare gajisubu wejē “Goãmu gamerire iirā iiaa,” arī pepirācoma gajirā. 3 Yu Pagure, yu säre erā masibeama. Eropa masibirā muare ñero iirācoma erā. 4 Eropirā muare erā ñero erā iicū iarā, “Erā ōpa iiboro core ta Jesu guare weremūhtayutuhami,” arī guñarāca mua. Mua eropa arī guñaburire dohpaguere ire weremūhtagu iiaa muare, arī weremi Jesu.

*Espiritu Santo ĩgu iiburire wereñumi Jesu*

Eropa arītuha ōpa arī werenemomi:

—Neguere mua mera árīgu ire muare werebiribu. 5 Dohpaguepure yure obeodigu pohroque waguca. “¿Nohogue wagucri muhu?” arī ne yuju yure serēpibeaa mua yure. 6 Eropa serēpibiriquererā ta yu waborore muare werecū mua ñero siporācuca. 7 Mua ñero siporācuquerēcū muare ōpa diaye ta werea: Yu wara puhru muare ōacāroca. Yu umarogue wabircū muare itamubupū aribiribocumi. Eropa wagu eja muare ĩgure obeoguca yuhū. 8 Yu eropa obeocū ĩgu arīgucumi. Eropa eragu i yeba majarāre ñerire iirā erā árīcū masicū

iigucumi ĩgu. Eropigu ōaro árĩricuburire buhegucumi ĩgu. Eropigu Goãmu ĩgu dipuwaja moaborore weregucumi masare itamubupu. <sup>9</sup> Yũre umupeobirã áhrama i yeba majarã. Eropigu itamubupu masa erã ñero iiricũre erãre masicũ iigucumi. <sup>10</sup> Yũ Pagũ pohrogue waguca. Yũ eropa wara puhru masa yũre ĩanisome. Eropigu itamubupu arigu ōaro árĩricuri sãre buhegucumi. <sup>11</sup> I yeba majarã opũre watĩre Goãmu dipuwaja moadoretuhami. Eropigu Goãmu masare ĩgu dipuwaja moaburi sãre weregucumi itamubupu.

<sup>12</sup> “Wũaro áhraa mũare yũ wereburi. Yũ eropa werenemodiquerecũ ta ire yũ werecũ dohparagã masisome mua. <sup>13</sup> Yũ eropa werenemobiricũ Espĩritu Santopũ irire werenemogu arigucumi. ĩgu ĩgu gamero mũare weresome. Yũ Pagũ ĩgu weredorerare mũare weregucumi. Eropigu mũare diaye majare werepehogucumi. Eropiro puhrugue waburire mũare masicũ iigucumi ĩgu. <sup>14</sup> Eropigu ĩgu yare mũare weregucumi. Eropa weregu yũre umupeocũ iigucumi mũare. <sup>15</sup> Árĩpehreri yũ Pagũ ya sã yaha áhraa. Eropigu “Espĩritu Santo yahare weregucumi,” arãbu mũare, arĩ weremi Jesu.

*Bũjawererã árĩquererã ta puhru mucubirirãca mua, arĩ wereñumi Jesu*

<sup>16</sup> Eropa arĩtuha ōpa arĩ werenemomi guare daja:

—Bajamenuri yũre ĩasome mua. Eropirã puhrugã ta daja mua yũre ĩarãca, arĩmi Jesu.

<sup>17</sup> ĩgu eroparicũ peerã, guapũ bajamerãgã ōpa arĩ wereniguibu gua basi:

—“Bajamenuri yũre ĩasome mua. Eropirã puhrugã ta daja mua yũre ĩarãca,” arĩgu ¿dohpa arĩgu eropa arãri marire? Eropigu “Yũ Pagũ pohrogue waguca,” ¿dohpa arĩronore eropa arãri ĩgu? <sup>18</sup> “Bajamenuri puhru,” arĩgu ¿dohpa arĩgu eropa arãri ĩgu? ĩgu wererare ōaro pee masibea mari, arĩbu gua basi.

<sup>19</sup> Gua eropa arĩ wereniguicũ Jesu ĩgure gua serẽpidiarire masigu guare ōpa arĩ weremi:

—“Bajamenuri yũre ĩasome mua. ¿Eropirã puhrugã ta yũre ĩarãca daja,” yũ arĩrare serẽpidiari mua? ¿Irire yũ arĩrare masibeari mua?

<sup>20</sup> Diaye mũare arĩgu iiaa: Yũhu sĩricũ ĩarã mua orerãca. Eropirã burigã bũjawererãca. Yũre umupeobirininrãpũ mucubirirãcoma. Mũapũ bũjawerenirã árĩquererã puhru mucubirirãca mua. <sup>21</sup> Őpa áhraa iri: Nomeo niji wahgũgo igo ñero tariburisubũ áhraa. Eropigo igo turaro bũjaweremo. Eropa bũjawerequerego, igo magugã dehyoacũ ĩago mucubirimo. Eropigo igore pũrirare guñabeamo igo pare. <sup>22</sup> Eropa ta mua dohpaguere bũjawererãca. Puhru mua yũre ĩarãca daja. Eropirã mua turaro mucubirirãca. Mũa eropa mucubiririre gajirã mũare bũjawerecũ iimasisome.

<sup>23</sup> “Irinũ yũre mua ĩarinũre yũre serẽpisome mua. Yũ Pagupũ mua serẽrire ogucumi. Diaye ta mũare arĩgu iiaa. Yũre mua umupeocũ ĩagũ yũ Pagure yũ waĩ mera mua serẽrire ĩgu mũare ogucumi.

<sup>24</sup> Yũ ōpa waboro core mua yũre waĩpeo Goãmure serẽnibiribu mua. Dohpaguere yũre waĩpeo Goãmure serẽque. Mũa eropa serẽcũ mũare ĩgu ogucumi mua turaro mucubiriburire, arĩmi Jesu guare.

*Ñerãre Jesu ĩgu tarinũgarire wereñumi ĩgu buherãre*

<sup>25</sup> Eropa arĩtuha ðpa arĩnemomi:

—Werenigui queori mera m̄are weremurabu. Eropa werequeregu ta p̄hr̄u m̄are werenigui queori mera weresome pare yūh̄u. Yu Pagupure mua ðaro peeboro dopa weregura m̄are. <sup>26</sup> Irinure mua ya árĩburire m̄are serēbasasome yūh̄u. Yure umupeorā yaha waĩ mera mua basi ĩgure serērāca. <sup>27</sup> M̄a yure mahirā āhraa. Eropirā yu Pagu pohrogue yu aridigu árĩcũ “Diaye ta āhraa,” arāa mua. Eropa arĩrā mua árĩcũ ĩagu, yure mahirā mua árĩcũ ĩagu yu Pagu sã m̄are mahimi. ĩgu eropa mahicũ mua ĩgure serērāca. <sup>28</sup> Yu Pagu pohro árĩdigu árĩgu i yebaguere aribu yūh̄u. Eropigu dohpaguere i yebague árĩdigu árĩgu yu Pagu pohrogue dujaguca daja, arĩmi Jesu.

<sup>29</sup> ĩgu eroparĩcũ gua ĩgu buherā ðpa arĩbu:

—Dohpague tamerare werenigui queori mariro wereniguigu ðaro diaye wereniguigu iiaa m̄hu ḡare. <sup>30</sup> M̄hu ðaro masipehogu m̄ árĩcũ gua dohpague ta ðaro masia. Eropirā gajirā m̄re buhemasi-beama. Eropirā irire gua dohpaguere ðaro masia. Gua irire ðaro masirā árĩrā Goām̄ pohrogue m̄ aridigu árĩcũ “Diaye ta āhraa,” arāa, arĩbu gua Jesure.

<sup>31</sup> Gua eroparĩcũ Jesu yūhrimi ḡare:

—Dohpaguere “Diaye ta āhraa,” ¿arĩri mua pare? <sup>32</sup> P̄hr̄uñari mua ya wirigue wasirirā yure cóārāca mua. M̄a eropa cóāquerecũ ta yu Pagupu yu mera āhrimi. Eropigu yūh̄u yujugu ta árĩbeaa. <sup>33</sup> Ire m̄are wereyubu yure mua guñaturari mera mua ðaro árĩboro dopa. I yeba árĩrisubu Goām̄re gamebirā pohrogue mua árĩcũ m̄are ñero iirācoma erā. Erā eropa iiquerecũ ta guñaturaque mua. I yeba majarā erā ñero iirare tarinugagu āhraa yūh̄u. Eropirā yure guñatura mucubirique mua, arĩmi ḡare ĩgu buherāre.

## 17

*Jesu ĩgu buherā ya árĩburire ĩgu Pagure Goām̄re serēbasañumi*

<sup>1</sup> Eropa arĩ weretuha Jesu umarogue ĩhamuju ðpa arĩ wereniguimi Goām̄re ĩgu Pagure:

—Ah̄u, dohpaguere m̄ werediro dopa ta yure erā ñero iiburisubu ejanijaro iiaa. Yure m̄ magure erā masare umupeocũ iique. M̄ eropa iicũ masare m̄re umupeocũ iigura yu sã. <sup>2</sup> Árĩpehrerā tauro opu aribu m̄hu yure. Eropigu m̄ yure onirāre m̄ mera eropa árĩniguicũ iiguca m̄hu. <sup>3</sup> M̄ dihta Goām̄ gohra āhraa. Yūh̄u Jesucristo m̄ obeodigu āhraa. Eropirā árĩpehrerā m̄re masirā, yu sãre masirā mari mera umaroguere eropa árĩniguicārācoma, arĩmi.

<sup>4</sup> Eropa arĩgu ta ðpa arĩnemomi Goām̄re:

—I yebaguere m̄ iidorerare iipehoabu yūh̄u. Eropa iigu masare m̄ turagu árĩr̄ire ĩhmuabu yūh̄u. <sup>5</sup> I yeba árĩboro core m̄ mera yu árĩcũ ðaro turari opabu. Eropigu dohpaguere m̄ árĩrogue irire yu ðaro turagu árĩr̄ire ĩhmuque.

<sup>6</sup> “I yeba árĩr̄are yure m̄ onirāre m̄re masicũ iiab̄u. M̄ onirā m̄ yarā āhrima. Eropigu erāre ohab̄u m̄hu yure. Eropirā m̄ dorerire iiaa erā. <sup>7-8</sup> Yure m̄ wererare erāre buheabu. Yu buhecũ peerā yu buherire gahmeama erā. Eropirā diaye ta m̄ pohro aridigu yu árĩcũ



masima erã. Eropirã m̄ obeodigu yũ árĩcũ sãre “Diaye ta ãhraa,” arĩ pepima erã.

<sup>9</sup> “Erã ya árĩburi m̄re serẽgũ iiaa. Gajirã ya árĩburipure serẽgũ iibea yũhũ. Yũre m̄ onirã m̄ yarã ãhrima. Eropigũ erã ya árĩburire serẽgũ iiaa m̄re. <sup>10</sup> Erã árĩpehrerã m̄ yarã ãhrima. Eropirã m̄ yarãpũ yaharã ãhrima. Yũre umupearã yũ turagũ árĩrire ãhmuma erã masare.

<sup>11</sup> “Dohpaguere i yebaguere dujasome yũhũ. M̄ pohro wabu iiaa. Yũ eropa waquerecũ ta dohpaguere yũre m̄ onirã i yebaguere dujama. Ahũ, m̄hũ ðagũ ãhraa. Yũre m̄ onirãre m̄ turari mera ãhadibuque. M̄ eropa dibucũ mari yujugũ ta árĩdiro dopa ta yuju curu ta árĩrãcoma erã sã. <sup>12</sup> Erã mera árĩgũ m̄ turari mera erãre ðaro ãhadibuabũ. Yujugũ tamera peamegue wagucumi m̄ yare erã gojarapũ werediro dopa ta.

<sup>13</sup> “Dohpaguere m̄ pohrogo wabu iiaa. Eropigũ i yeba i árĩpehrerire m̄ yarãre werea yũ mera erã ðaro mucubiriborore. <sup>14</sup> M̄ yare wereabũ erãre. Erã yũ iro dopa ta i yeba árĩwajamorã árĩbeama. Eropirã i yeba majarãpũ erãre ãhaturima. <sup>15</sup> “I yeba árĩrãre, yaharãre ãñaque,” arĩbeaa. Eropa arĩbiriqerẽgũ erãre ðaro ãhadibuque watĩ ñerire iidoreri erãgue arĩgũ. <sup>16</sup> I yeba majagũ árĩbeaa. Erã sã yũ iro dopa ta i yeba árĩwajamorã árĩbeama. <sup>17</sup> Yaharãre m̄ buheri mera ðarã árĩcũ iique erãre. M̄ wereripũ diaye ta ãhraa. <sup>18</sup> I yebaguere yũre m̄ obeodiro dopa ta yãpũ yaharãre m̄ yare buhedoregũ obeoa. <sup>19</sup> M̄ gamerire iibu árĩgũ, s̄ribu árĩgũ erã ya árĩburire s̄ribu ãhraa. Eropa s̄ribu ãhraa yũhũ yaharã sã m̄ gamerire diaye erã ðaro iiburire.

<sup>20</sup> “Yaharãre dohpague árĩrã dihtare itamuque,” arĩ serẽbeaa yũhũ. Yaharã gajirãre erã buhera pũhrũ gajirã sã yũre umupearãcoma. “Erã sãre itamuque,” arãa yũhũ. <sup>21</sup> Yaharã árĩpehrerã erã yuju curu árĩboro dopa itamuque. Yũhũ m̄ mera yujugũ ta ãhraa. Mari yujugũ árĩdiro dopa ta erã mari mera yuju curu ta árĩporo. Yujuro mera ta árĩporo m̄ obeodigu yũ árĩrire árĩpehrerã masa “Diaye ta ãhraa,” erã arĩburire. <sup>22</sup> Yũre m̄ ora turarire yaharãre ohabũ. Iri turarire oparã yujugũ ta mari árĩdiro dopa ta erã sã yuju curu ta árĩrãcoma. <sup>23</sup> Yũhũ erã mera ãhraa. Eropigũ m̄hũ yũ mera ãhraa. Mari eropa árĩrã árĩcũ mari yarã diaye ta ðaro yuju curu ta árĩrãcoma. Yuju curu erã árĩcũ ãarã m̄ obeodigu yũ árĩrire i yeba majarã masirãcoma. Eropirã yũre m̄ mahidiro dopa ta yaharã sãre m̄ mahirire masirãcoma masa.

<sup>24</sup> “Ahũ, i yeba árĩboro core yũre mahibũ m̄hũ. Eropa mahigũ yũ turagũ árĩrire ãhmubũ m̄hũ. Eropigũ yũre m̄ onirã yũ mera erã árĩcũ gahmea yũ turagũ árĩrire erã masiboro dopa. <sup>25</sup> Ahũ, m̄hũ ðagũ ãhraa. I yeba majarã ñerã m̄re masibeama. Yãpũ m̄re masia. Eropirã yũhũ m̄ obeodigu árĩcũ masima yaharãpũ. <sup>26</sup> M̄re erãre masicũ iiabũ. Pũhrũ sãre m̄re erãre masicũ iigũca yũre m̄ mahidiro dopa ta gajirãre erã mahiburire. Eropigũ yaharã mera árĩgũca, arĩmi Jesu mari Pagure.

## 18

*Jesure peresu iĩnuma*

*Mt 26.47-56; Mr 14.43-50; Lc 22.47-53*

<sup>1</sup> Īḡu eropa arīra pūhrū Jesu ḡua sã ĩḡu buherã Cedron waĩcūriyare taribuja, Olivo waĩcūri gorogue ejaḡu. <sup>2</sup> Bajasuburi iri gorogue Jesu mera ḡua gameneremūribū. Eropiḡu Juda Jesure ĩhaturirãre wiabu iri gorore masĩmi. <sup>3</sup> Eropa masiḡu pe curu surara mera aridi árĩmi ĩḡu. Yuju curu surara gohra árĩma. Gaji curu surara Goãmu wihire corerã árĩma. Pahia oparã, fariseo masa erã obeonirã árĩma surara. Eropa arirã sihãri dipurure, eropárĩcũ yucu mojócoma erã. <sup>4</sup> Iri gorogue ḡua pohrogue erã erara pūhrū Jesu ĩḡu ñero tariborore masiḡu, erãre bocatĩri serēpimi:

—¿Noare amarã iiri mua? arĩmi Jesu.

<sup>5</sup> —Jesu Nazare majagure ahmaa, arĩ yūhrima erã.

—Īḡu ta āhraa yūhu, arĩmi Jesu.

Judapū Jesure ñeadoreḡu erã mera árĩmi. <sup>6</sup> Eropirã Jesu “Īḡu ta āhraa yūhu,” ĩḡu arĩcũ erãpū ũca wa yebague dusirimaagã mehmereja wama. <sup>7</sup> Erã eropa wacũ ĩagū dipaturi serēpimi Jesu:

—¿Noare amarã iiri mua? arĩmi.

—Jesu Nazare majagure amarã iiaa ḡua, arĩ yūhrima erã daja.

<sup>8</sup> —Īḡu ta āhraa, arĩrabuḡu yūhu muare. Eropirã yure ñearã oãre yū mera majarãre peresu iibiricãque, arĩmi Jesu.

<sup>9</sup> Eropa ḡuare mahiḡu ne yujugure dederecũ iibirimi. Eropa iigū ero core Goãmure ĩḡu arĩdiro dopa ta iigū iimi ĩḡu. “Yure mu onirãre ne yujugure dedeobiribū,” ĩḡu arĩdiro dopa ta iigū iimi Jesu. <sup>10</sup> Eropi Simo Pedro matamijire opagū irimijire tuãwea aĩ, pahia opu pohro majure Malco waĩcūgure ĩḡu gamirore pacoro medijucãmi. Diayepū maja gamirore pacoro medijucãmi <sup>11</sup> Īḡu eropa pacorocũ ĩagū Jesu ōpa arĩmi:

—Mu matamijire dibuque. Yū Pagū ĩḡu yure ñero taridorero dopa ta ñero tarigura, arĩmi Jesu Pedore.

*Pahia tauro opu pohrogue Jesure aĩḡãñuma erã*

*Mt 26.57-58; Mr 14.53-54; Lc 22.54*

<sup>12</sup> Īḡu eropa arĩtuhacũ ta surara, erã opu mera, Goãmu wihire corerã surara sã Jesure ñeha ĩḡure dirima. <sup>13</sup> Dirituha Ana waĩcūḡu pohrogue aĩḡãmũhtama erã. Anapū Caifa muñecū árĩmi. Caifapū iri bojorire pahia tauro opu árĩmi. <sup>14</sup> “Judio masa ya arĩburire yujugū masū sĩricũ ōhaa,” arĩdigū árĩmi ĩḡu Caifapū.

*—Jesure masibea, arĩñumi Pedro*

*Mt 26.69-70; Mr 14.66-68; Lc 22.55-57*

<sup>15</sup> Eropiḡu yūhu Simo Pedro mera Jesure yoañarirogue nūrusiabū. Yūpū pahia opu ĩḡu ĩha masiḡu árĩbū. Eropiḡu Jesu pūhrū, opu árĩri wihi árĩri sãiro pohecague ñajaa wabū. <sup>16</sup> Pedropū disiporo dujanagajami. Eropiḡu maji wiriri disiporo coregore serēbasabū Pedore aĩ ñajabu. Yū eropa serēpiñacũ igo Pedore ñajaridoremo. Igo ñajaridorera pūhrū yūhu Pedore aĩ ñajaa wabū. <sup>17</sup> Yū eropa aĩ ñajajacũ ĩago disiporo coregopū Pedore serēpimo:

—¿Jesu buherã mera majagū arĩbeari muhu? arĩmo igo Pedore.

—Árĩbeaa yūhu, arĩ yūhrimi Pedropū.

<sup>18</sup> Ero core ero majarã pohro majarã, surara mera erã sōhmaburi peamere dihunirã árĩma. Yūsaa árĩbū. Eropirã erã iri peame turo sōhma niguima. Erã sōhmacũ ĩagū Pedro sã sōhmagū wami.

*Pahia tauro opa Jesure serēpi ĭañumi*

*Mt 26.59-66; Mr 14.55-64; Lc 22.66-71*

<sup>19</sup> Eropi pahia tauro opa arĭgu Jesu ĭgu buherire, gwa ĭgu buherā sāre serēpi ĭapu Jesure. <sup>20</sup> ĭgu eropa arĭ serēpicū Jesupa yuħripu ĭgure:

—Arĭpehrerāre buhegu erā core niguibu. Eropa buhegu mari buheri wiri Goāmu wihi sāre masa gamenererogue eropa buhe niguicābu. Duhrinijagu ne buhebirabu yahu. <sup>21</sup> ĭDuhpigu yare serēpiri muhu? Serēpidiagu yare peenirāre serēpique. Yu wererare erā masima, arĭ yuħripu Jesu.

<sup>22</sup> ĭgu eroparĭcū surarapu ero niguidigu ĭgu mojoto mera Jesure paru.

—Eropa arĭbiricāque pahia tauro opure, arĭpu surara Jesure.

<sup>23</sup> ĭgu eroparĭcū Jesu opa arĭpu:

—Ñero arĭ yu wereniguirare wereque yare. ĭDiaye majare yu mware werequerecū duhpigu pari muhu yare? arĭpu Jesu surarare.

<sup>24</sup> Puħru Ana Jesure erā diridigure Caifa pahia tauro opa pohrogue obeopu.

*—Jesure masibea, dipaturi arĭñumi Pedro*

*Mt 26.71-75; Mr 14.69-72; Lc 22.58-62*

<sup>25</sup> Eropi Simo Pedro peame turo sōhma niguigu iimi. Eropa ĭgu sōhma niguicū ĭarā ero majarā ĭgure serēpima.

—ĭMu sā Jesu buherā mera majagu arĭbeari? arĭ serēpima erā Pedore.

—Arĭbeaa yuhu, arĭ yuħrimi Pedro.

<sup>26</sup> Eropigu pahia tauro opa pohro majagupu Pedro ĭgu gamiro pacorodigu acaweregupu Pedore serēpimi:

—ĭJesure erā ñearasubu yu arĭcū mu sā erā mera arĭsabū? arĭ serēpimi ĭgu Pedore.

<sup>27</sup> —Yuhu ĭgu mera arĭbirabu, arĭ yuħrimi Pedro. ĭgu eroparĭcū ta cāreña weregu carimi.

*Jesure Pilato serēpiñumi*

*Mt 27.1-2, 11-14; Mr 15.1-5; Lc 23.1-5*

<sup>28</sup> Ñamiñarigā arĭcū Caifa ya wihigue arĭnirā Jesure aĭ wiria, iri maca majarā opa Pilato ya wihigue aĭgā wama erā. Eropa waquererā ĭgu ya wihiguere ñajabirima. Pascua arĭcū erā bamorā arĭrā opa arĭma: “Judio masu arĭbeami Pilato. Eropirā mari i wihigue judio masu arĭbigu arĭri wihire ñajarā, mari dorerire tarinugarāca. Eropirā mari ñajacū ĭarā ñerā dopa ĭabocoma marire. Eropirā marire bosenu barire marire badorebiribocoma,” arĭma. Eropa arĭrā opa ya wihire ñajabirima Jesure aĭgānirāpu. <sup>29</sup> Erā ñajabiricū ĭagu Pilato erā pohrogue wihi disiporogue wiriranugaja, erāre serēpimi:

—ĭÑehenore ĭre weresādiari mu? arĭ serēpimi Pilato erāre.

<sup>30</sup> —Ihĭ oagu ĭgu arĭcū mure ĭgure obiriboaya. Ñegu aħrimi ĭgu, arĭ yuħrima erā.

<sup>31</sup> Erā eroparĭcū Pilato opa arĭmi:

—Mu basĭ ĭgure aĭaque. Eropirā mu ya doreri arĭro dopa ta ĭgure dipuwaja moaque, arĭmi Pilato erāre.

—Gua judio masapu masare wejẽdoremasibeeaa, arĩma erã Pilatore. Eropa arĩrã Jesure wejẽdoremorã iima.

<sup>32</sup> Erã eropa wejẽdorecũ Jesupu crusague ĩgu sĩriborore ero core ĩgu werediro dopa ta eropa wabu. <sup>33</sup> Erã eropa arĩra puhrũ Pilatorũ wihigue maji ñaja, Jesure sihubeo ĩgure serẽpipũ:

—¿Judio masa erã opu ta ahriri mũhu? arĩ serẽpipũ.

<sup>34</sup> Jesu yuhripũ ĩgure.

—¿Mũ guñaro yure eropa arĩ serẽpiri mũhu? ¿O gajirã mũre erã wererare peenijagu yure serẽpigũ iiri mũhu? arĩpu Jesu Pilatore.

<sup>35</sup> —Judio masũ árĩbeaa yũhu. Mũ ya yeba majarã, pahia oparã sã, mũre wiama yure. ¿Ñehenore ñero iiri mũhu erã eropa mũre dipuwaja moadiacũ? arĩpu Pilato.

<sup>36</sup> —Yũ opu árĩri i yeba maja árĩbeaa. Yũhu i yeba majarã opu árĩcũ, yaharã yure itamuboñuma judio masare ñeadorebirã. Yũ opu árĩri i yeba maja árĩbeaa, arĩpu Jesu Pilatore.

<sup>37</sup> —¿Eropigu opu ahraa arĩri mũhu eropa arĩgu? arĩpu Pilato.

—Mũ arĩro dopa ta opu ta ahraa. Masa opu árĩbu masa dehyoabu yũhu. Eropigu i yebague arigu erã opu árĩbu aribũ. Diaye majare weregũ aribũ. Árĩpehrerã diaye árĩrire peediarã yũ wererire peema, arĩpu Jesu.

<sup>38</sup> —¿Ñeheno ahriri diaye árĩri? arĩpu Pilato.

### *Judio masa Jesure wejẽdoreñuma*

*Mt 27.15-31; Mr 15.6-20; Lc 23.13-25*

Eropa arĩtuha Pilato judio masa pohro maji dujaa wa erãre weremi:

—Ĩre ne gajino dipuwaja mara. <sup>39</sup> Bojori nũcu Pascuanũ árĩcũ yujugu peresu arĩgure mũa wiudorea. ¿Eropigu ĩre Jesure ta mũa opu árĩbupũre mũare wiubasacuri yũhu? arĩmi Pilato judio masare.

<sup>40</sup> ĩgu eroparĩcũ peerã erã judio masa õpa arĩ gaguiniguima:

—Ĩgure wiubiricãque. Barrabãpũre gũare wiubasaque, arĩ gaguiniguima judio masa Pilatore. Barrabãpu yajaricugu árĩdigũ arĩpu.

## 19

<sup>1</sup> Erã eropa arĩ gaguiniguira puhrũ Pilato Jesure tãradorepu. Eropirã ĩgu yarã surarapu ĩgure tãrañorã. <sup>2</sup> Tãratuha pora bero iitua, Jesure ĩgu dipuru weca duhpeoñorã. Duhpeotuha, oparã ya suhrirore ĩgure sañorã. <sup>3</sup> Eropirã ĩgu pohro nũgaja õpa arĩñorã erã õpa arĩ wereyarã:

—Õaro árĩporo. Judio masa opu õaro árĩporo, arĩ wereya erã mojotori mera ĩgure pañorã.

<sup>4</sup> Eropigu Pilato dipaturi waha, judio masare weremi:

—Peeque mũa. ĩre ñeri dipuwaja mara. Eropigu irire mũa masiburire ĩgure mũa pohro aĩgãribu iiaa, arĩmi Pilato.

<sup>5</sup> ĩgu eropa arĩra puhrũ Jesu pora berore peyadigu, oparã ya suhrirore sañadigu wihigue árĩdigũ wiririmi. ĩgu wiriricũ Pilato õpa arĩmi:

—Ĩaque. Ihĩ ta ahrimi ĩgu, arĩmi Pilato.

<sup>6</sup> ĩgu eropa arĩtuha cũ peerã pahia oparã, surara Goãmũ wihi ĩhadibu corerã sã Jesure ĩarã gaguiniguima:

—Crusague wejêque ïgure. Crusague pabia wejêque ïgure, arï gaguiniguima erã.

—Ïgure ne ñeri dipuwaja mara. Eropirã mua basi ta ïgure aïgãque. Eropirã mua basi ta ïgure crusague pabia wejêque, arïmi Pilato erãre.

<sup>7</sup>—Ïgu, ïgu basi “Goãmũ magũ àhraa,” arïmũrami. Ïgu eropa arïra waja gua doreripũ ïgure wejêdorea, arïma erã Pilatore.

<sup>8</sup> Erã eroparĩcũ peegũ ucataria Pilatorũ. <sup>9</sup> Eropigũ dipaturi ïgu wihigue Jesure aï majiñajagũ Jesure serêpipũ daja:

—¿Nohogue majagũ àhriri mũhũ? arïpũ Pilato Jesure.

Ïgu eropa arï serêpiquerecũ ta Jesu ïgure ne yũhribiripũ:

<sup>10</sup> Ïgu yũhribiricũ ïagũ Pilato ïgure serêpinemopũ:

—¿Yũre yũhribeari mũhũ? Yũhũ mũre peresu árĩgure wiumasia. Eropigũ mũre crusague pabia wejêdoremasia yũhũ. ¿Irire masibeari mũhũ? arïpũ Pilato Jesure.

<sup>11</sup> Ïgu eroparĩcũ Jesu yũhripũ daja:

—Goãmũ mũre dorebiricũ ne iimasibiriboaya mũhũ. Eropigũ yũre ïhaturirãre wiadigupũ mũ tauro ñero dipuwajacugũcumi, arïpũ Jesu Pilatore.

<sup>12</sup> Ïgu eroparĩcũ peegũ Pilatorũ ïgure wiudiaripũ. Ïgu eropa wiudiaquerecũ ta dipaturi judio masapũ gaguiniguima:

—Jesu “Opũ àhraa,” arĩgũ mari tauro opũ árĩgure Roma majagure ïhaturigũ iimi ïgu. Eropigũ ïgure wiugũ mũ sã mari tauro opũ árĩgure ïhaturigũ àhraa, arï gaguiniguima judio masa Pilatore.

<sup>13</sup> Erã eroparĩcũ peegũ Jesure wihigue árĩgure aï wiriri, ïgu dipuwaja moadoregũ ïgu doari përo doajami Pilatorũ. Ïgu dipuwaja moadorero judio masa ya mera gabata waĩcuro empedrado waĩcũbũ. <sup>14</sup> Irinũ Pascuanũ bosenu árĩcũ gua baburi gua amurinũ árĩbũ. Irisubũ goeri boje core árĩbũ. Doajatuha Pilato masare õpa arï weremi:

—Ihĩ ta àhrimi mũa opũ, arïmi ïgu.

<sup>15</sup> Ïgu eroparĩcũ peerã judio masa gaguiniguima daja:

—Sĩriporo ïgu. Sĩriporo ïgu. Crusague pabia wejêque ïgure, arï gaguiniguima erã.

—¿Mũa opũ árĩquerecũ ta ïgure crusague pabia wejêdiari mũa? arïmi Pilato erãre.

Ïgu eroparĩcũ õpa arï yũhrima pahia oparã:

—Mari árĩpehrerã tauro opũ Roma majagũ àhrimi. Gajigũ opu marimi marire, arï yũhrima pahia oparã.

<sup>16</sup> Erã eropa arï wereniguira pũhrũ Pilato Jesure crusague pabia wejêdoregũ wiami erãre pare.

*Jesure pabia wejêñuma erã*

*Mt 27.32-44; Mr 15.21-32; Lc 23.26-43*

Eropirã surara Jesure aï wiriama. <sup>17</sup> Erã aï wiriacũ Jesupũ crusare ïgu basi aï coã, dipu pero waĩcurogue ejami. Gũa judio masa ya mera Gólgota waĩcũbũ. <sup>18</sup> Eroque eja erã Jesure crusague pabiamã. Eropirã gajirã perã sãre yujugũ ïgu diayepũ, gajigure ïgu copũ pabiamã erã. Eropigũ Jesu erã deco árïmi. <sup>19</sup> Pilato taboamijire goja, crusague Jesu weca pabia tuodorepũ ïgu gojaramijire. Õpa arï gojara árĩbũ: “Ihĩ Jesu Nazare majagũ, judio masa tauro opũ àhrimi,” arï gojara árĩbũ irimijire. <sup>20</sup> Irimijire gojagũ judio masa ya mera, Roma majarã

ya mera, Griego ya mera gojara árĩbũ. Eropiro Jesure crusague erã pabianugudiro maca pohrogã árĩbũ. Eropirã bajarã judio masa Pilato ïgũ gojarare ïha buhema. <sup>21</sup> Eropirã pahia oparã iri buhetuhaja òpa arĩrã wañorã Pilatore:

—“Ihĩ judio masa opũ àhrimi,” arĩ gojabita. Gũa opũ árĩbeami ïgũ. Eropigũ òpa arĩ goja amuque mũhũ. Ihĩ “Judio masa opũ àhraa,” arĩ yujugũ ta ïgũ basi ta eropa arĩ pepigũ àhrimi, arĩ goja amuque, arĩñorã pahia oparã.

<sup>22</sup> Pilatopũ yũhripũ erãre:

—Yũ gojarare ne yũ goja amusome, arĩpũ Pilato erãre.

<sup>23</sup> Jesure erã pabiara pũhrũ wapicũrã surarapũ Jesu suhri mũrãre erã basi game gueremorã iima. Erã eropa guerediaquerecũ ta ïgũ suhriro yoari suhriro dohori mariri suhriro árĩbũ. Iri suhriro suara suhriro árĩbũ. <sup>24</sup> Iri suhriro eropa árĩcũ ïarã òpa arĩma erã basi:

—Iñe suhrirore yeguesiribircãrã. Yujugũ dihta aĩporo. Eropirã iñe suhriro aĩbure masimorã deabirãrã mari, arĩma erã basi.

Eropa deabirãrã Goãmũ yare erã gojarapũ erã gojadiro dopa ta eropa iirã iima erã. “Yũ suhrirore erã basi guerema. Eropirã yaha suhrirore aĩbure masidiarã deabirama erã,” arĩ gojañuma Goãmũ yare erã gojarapũgue. Erã gojadiro dopa ta eropa iima erã.

<sup>25</sup> Jesu pago, Jesu bũamo María Cleofa marapo, María Magdalena mera Jesu crusa pohrogã ïha niguĩma. <sup>26</sup> Eropigũ ïgũ pago, yũhũ ïgũ mahĩgũ sã ïgũ pohrogã gũa niguĩcũ ïagũ ïgũ pagore yũre weremi:

—Dohpaguere ihĩ mũ magũ árĩbu àhrimi, arĩmi Jesu ïgũ pagore.

<sup>27</sup> Eropa arĩtuha yũre òpa arĩ weremi ïgũ:

—Dohpaguere igo mũ pago árĩbo àhrimo, arĩmi Jesu yũre.

Ïgũ eropa arĩra pũhrũ Jesu pagore yaha wihĩgue aĩ opamũribũ.

### *Jesu sĩria wañumi*

*Mt 27.45-56; Mr 15.33-41; Lc 23.44-49*

<sup>28</sup> Ïgũ eropa arĩ werera pũhrũ árĩpehreri Goãmũ ïgũre mohmedoregũ ïgũ apirare iipehogũ árĩgũ masipũ Jesu. Eropa masigũ Goãmũ yare erã gojarapũ iribojegue erã arĩ wereyudiro dopa ta òpa arĩmi Jesu:

—Ñemesibuca yũre, arĩmi Jesu.

<sup>29</sup> Ero vino sũiri deco dicũri sorobu ero doabũ. Eropirã ero árĩrã Jesu eroparĩcũ pee mimi aĩri yũsure deco mera erã yosora yũsure yucũgũ hisopo waĩcũdigũ ojogoro dirituma. Eropirã aĩ muju Jesu disiro sĩtuma. <sup>30</sup> Iri decore Jesu mimituha òpa arĩmi:

—Iripẽta árĩca, arĩgũ ta ïgũ dipurure muhmusiudija sĩria wami.

### *Yujugũ surara Jesu patore gubuye gohra ñoseñumi ñoserimiji mera*

<sup>31</sup> Irinũ Pascua bosenu core árĩbũ. Iri bosenu gũa baburire gũa amurinũ árĩbũ. Eropirã gajinũ Sabado árĩcũ iri òari bosenu árĩcũ crusarigue sĩrinirãre judio masa apidiabirima. Irinũ ta bosenu gũa judio masa bosenu wũari bosenu árĩro iibu. Eropirã erã sĩrinirã mũra irinũ crusarigue árĩcũ gamebirima. Eropirã pabianirã mũrãre erã ñĩgagũ gũarere panuadorerã judio masa serẽñorã Pilatore erãre sĩri purumjudorerã. Erã eropa iira pũhrũ erã ðũpũ mũrãre aĩdijumorã iima. <sup>32</sup> Erã eropa dorecũ surarapũ crusari pohrogue eja, yajaricũgũre copũ árĩgũ ñĩgagũre panuama: Gajipũ árĩgũ sãre eropa ta iima

erā. <sup>33</sup> Eropa iiquererā Jesu ñigagure panuabonirā ĩgu pohro eja ĩgu sĭridigu árĭcũ ĩha panuabirima.

<sup>34</sup> Eropa panuabirā yujugu surara ĩgu patore gohra gubuye ĩgure ñosemi. ĩgu eropa ñosecũ mata ĩgu di, deco mera wiribũ. <sup>35</sup> ĩgu eropa wacũ ĩabũ yũhũ. Yũhũ ipũre gojagu diaye muare werea. Diaye yũ wereri árĭcũ masia yũhũ. Muare irire werea mua sã Jesure mua umupeburire. <sup>36</sup> Goãmũ yare erā gojarapũ werediro dopa ta eropa wabũ. “ĩgu gõare ne yuju gõare panuabirima,” erā arĭ gojadiro dopa ta Jesu ñigagũ gõare ne yuju gõa panuabirima. <sup>37</sup> Eropiro gajipũ sã Goãmũ yare erā õpa arĭ gojayudiro dopa ta wabũ: “ĩgure erā ñosedigu murũre ĩarãcoma erā,” erā arĭ gojadiro dopa ta gua Jesure erā ñosedigu murũre ĩabũ.

*Jesu dũpũre masa gobegue yaañuma*

*Mt 27.57-61; Mr 15.42-47; Lc 23.50-56*

<sup>38</sup> ĩgu sĭrira pũhrũ José Arimatea majagu Jesu dũpũ murarore arĭ dijubu Pilatore serẽgu ejapu. Josẽpũ gajirã judio masare gũigu, Jesure umupeogu ĩgu arĭrĩre werebiridigu árĩmi. Eropiгу ĩgu dũpũ murarore ĩgu serẽra pũhrũ Pilatopũ ĩgu dũpũre aĩdorepũ. ĩgu aĩdorecũ José crusa pohro eraa Jesu dũpũ murarore aĩgã wami. <sup>39</sup> Nicodemo sã ĩgu poresurire mohmorere treinta kilo nũcũrĩre aĩgãrimi Jesu dũpũ ĩgu amuburire. Yucũgu di pohga, mirra waĩcũri poresuri, yucũgu pohga mera arĩyoro ĩgu mohmorera. ĩgu Jesu mera ñami weretamudigu árĩmi. <sup>40</sup> Eropirã erā perã Jesu dũpũ murarore aĩma. Judio masa sĭrinirãre yaaro dopa ta ĩgu dũpũ murarore poresuri sũra pũhrũ suhri gasiri mera omama. <sup>41</sup> Crusague Jesure erā pabia wejẽdiro pohro pohe árĩbũ. Iri pohegue masa gobe utãyegue erā seara gobe árĩbũ. Iri gobere ne yujugu sĭridigũre cõañibirima dohpa. <sup>42</sup> Pascuanũ bosenu maja gua judio masa baburire amurinũ árĩbũ. Eropirã iri gobe pohrogã crusa árĭcũ ero apima erā Jesu dũpũ murarore.

## 20

*Jesu masa mũriañumi*

*Mt 28.1-10; Mr 16.1-8; Lc 24.1-12*

<sup>1</sup> Domingo ñamiñarigã árĭcũ, boyoboro coregã María Magdalena Jesu masa gobegue ejapo. Eroque ejago iri gobere erā biharayere gajipũ tunuguraye árĭcũ ĩapo igo. <sup>2</sup> Eropa ĩadigo árĩgo gua pohrogue omagãrimo igo. Simo Pedro mera perã árĩbũ gua. Eraa õpa arĭ weremo guare igo.

—Mari Opũ dũpũ murarore aĩcãnirã ãhrama. Eropirã ĩgure erā apidirore mari masibea, arĩmo igo guare.

<sup>3</sup> Igo eroparĩcũ peerã, yũhũ Pedro mera gua perã masa gobegue ĩarã wabũ gua. <sup>4</sup> Eropa ĩarã warã gua perã omagãabũ. Eropa omarã, yũhũ Pedore omatarigãgu masa gobegue ejamũhtabũ. <sup>5</sup> Eroque ejagu muhmunereja ĩha acubũ iri gobere. Eropa ĩha acugu ĩgure erā omara gasiro seyare ĩabũ. Eropiгу iri gobere ñajabiribũ. <sup>6</sup> Yũ eropa ĩara pũhrũgue Simo Pedro sã erami. Eraa masa gobegue ñajaa, ĩgu dũpũ murarore erā omara suhri gasirire ĩami ĩgu. <sup>7</sup> Eropiгу Jesu dipurure erā omara gasiro sãre ĩami daja. Iri gasiro boje oyaro, yeguerã gasiro árĩbũ. <sup>8</sup> Eropiгу yũ sã masa gobegue ñajabũ. Jesu ĩgu maricũ ĩagu

“Diaye ta Jesu masa mǎriañumi,” arĩ pepibũ yũhũ. <sup>9</sup> Iri gobegue gũa waboro core Goãmũ yare erã gojarapũ Cristo sĩriburire erã wererare ðaro gũa masinibiribũ. Dohpaguepũre iri gobere yũ ïara pũhrũ, “Diaye ta Jesu masa mǎriañumi,” arĩ pepibũ yũhũ. <sup>10</sup> Eropa ïatuhajarã gũa wihigue dujaa wabũ.

*Jesu María Magdalenare dehyoañumi*

*Mr 16.9-11*

<sup>11</sup> Eropi masa gobe disiporo María niguigo ore niguipo. Eropa orequerego ta muhmunereja igo ïhame acupo masa gobere. <sup>12</sup> Eropa ïhame acugo perã anyuare boreri suhricurãre Jesu ïgũ oyadiro murarogue erã doacũ ïapo igo. Yujugũ ïgũ dipuru oyadiro doapũ. Gajigũ ïgũ guburi oyadiro doapũ. <sup>13</sup> Erãre igo ïacũ erãpũ igore serẽpiñorã:

—Nomeo, ¿dohpa árĩronore orego iiri mũhũ? arĩñorã erã.

—Yũ Opũ dũpũ murarore aĩcãñirã ãhrama. Eropigo erã apidirore masibea yũhũ, arĩpo igo.

<sup>14</sup> Eropa arĩtuha, majinũgaja nijago Jesure ero niguigure ïapo igo. Eropa ïaquerego ta Jesure ïha masibiripo igo.

<sup>15</sup> —Nomeo, ¿dohpa árĩrono orego iiri mũhũ? ¿Noare amago iiri mũhũ? arĩpũ Jesu igore.

“Ihĩ i pohere ïhadibugũ ãhrimi,” arĩ pepiripo igo Jesure. Eropa arĩ pepigo ðpa arĩpo igo:

—Mũhũ ïgũ dũpũ murarore aĩdigũ árĩgũ wereque mũ apidirore yũre. Mũ werera pũhrũ aĩgora ïgũ dũpũ murarore, arĩpo igo ïgũre.

<sup>16</sup> Igo eropa arĩra pũhrũ Jesu ðpa arĩpũ:

—María, arĩpũ.

Ïgũ eropa piyucũ peego, majiñabeo igo Hebreo ya mera ðpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegu,” arĩma.

<sup>17</sup> Jesu arĩpũ:

—Yũ Pagũ pohrogue mǎrianibea dohpa yũhũ. Yũ eropa mǎrianibiricũ yare mohpiñabiricãque. Eropigo gajirã yaharã pohrogue waque. Erã pohrogue ejago ðpa arĩ wereque: “Jesu ðpa arĩdoremi mũare: ‘Yũ Pagũ pohrogue wabu iiaa. Mũa Pagũ sã ãhrimi ïgũ. Goãmũ pohrogue wabu iiaa. Mũa yagũ Goãmũ sã ãhrimi ïgũ,’ arãmi Jesu,” arĩ wereque erãre, arĩpũ Jesu Marĩare.

<sup>18</sup> Ïgũ eropa arĩra pũhrũ María Magdalena guare Jesu buherã pohrogue eraa weremo guare:

—Mari Opũre ïabũ yũhũ, arĩ Jesu igore guare weredorerare weremo igo.

*Jesu ïgũ buherãre dehyoañumi*

*Mt 28.16-20; Mr 16.14-18; Lc 24.36-49*

<sup>19</sup> Irinũ soorinũ ñamicague gũa Jesu buherã gũa acawererãre judio masare güirã, gũa ya wihigue biha ñaja doabũ gũa. Gũa eropa doacũ Jesu gũa watope dehyoanũgaja ðpa arĩmi:

—¿Ãhriri mũa? arĩmi.

<sup>20</sup> Eropa arĩtuha ïgũ mojotorire, ïgũ patore sãre guare ïhmúmi. Eropirã gũa ïgũre gũa opũre masa mǎriadigure ïarã mucubiribũ.

<sup>21</sup> Dìpaturi Jesu guare ðpa arĩmi daja:



—Ōaro áriŋque mua. Yu Pagu ĩgu yure obeodiro dopa ta yu sã muare obeoa, arĩmi guare.

<sup>22</sup> Eropa arĩtuhaja guare ĩgu purisãmi. Eropa purisãgu Espĩritu Santore gua ñeaburire ihmugu iimi. Īhmutuhaja ōpa arĩmi:

—Dohpaguere Espĩritu Santore ñeaque mua mera arĩbure.  
<sup>23</sup> Masa erã ñeri dipuwajare bujawerecũ ĩarã, “Mua ñero iirare cohã,” arĩmasia mua erãre. Erã bujawerebircũ ĩarã, “Mua ñeri iirare cóãbiribu,” arĩmasia mua, arĩmi Jesu guare ĩgu buherãre.

*Jesure masa murĩadĩgure Toma ĩañumi*

<sup>24</sup> Jesu gua watope ĩgu dehyoacũ Toma suhrũadĩgu erã arĩgu gua mera marimi irisubure. <sup>25</sup> ĩgu eropa maricũ gua ĩgu mera majarã ĩgure werebu.

—Mari Opure gua ĩabu, arĩ wereribu gua ĩgure.

Gua eropa arĩ werequerecũ ta ōpa arĩmi Toma:

—Īgu mojotorire erã pabiara giberire ĩabĩgu iri giberire yu mujusĩru mera puñabĩgu “Diaye ta masa murĩañumi,” ne arĩsome. Eropĩgu ĩgu patore gubuyee arĩri gobere yu mojoto mera sĩ acubĩgu, “Diaye ta masa murĩañumi,” ne arĩsome yuhũ ĩgure, arĩmi Toma.

<sup>26</sup> Yuju semana puhru gua ĩgu buherã gua ya wihigue arĩbu. Irisubure Toma gua mera arĩmi. Iri wihi bihara wihi arĩbu. Bihara wihi arĩquerecũ ta Jesu ñaja, gua watope dehyoanũgaja ōpa arĩmi:

—¿Āhriri mua? arĩmi.

<sup>27</sup> Eropa arĩtuha ĩgu Tomare weremi:

—Īaque yu mojotorire. Eropi mu mujusĩru mera yu mojotorire erã pabiara giberire puñaque. Eropĩgu mu mojoto mera yu patore gubuyee arĩri gobere sĩ acũaque. “Diaye arĩbeaa,” arĩbircãque. “Diaye ta āhraa,” arĩque muhu, arĩmi Jesu Tomare.

<sup>28</sup> ĩgu eropa arĩra puhru Toma yuhrimi:

—Muhu yu Opũ āhraa. Muhu yahagu Goãmu āhraa, arĩmi Toma Jesure pare.

<sup>29</sup> —Yure mu ĩara puhru yure “Diaye ta āhraa,” arãa. Gajirãpu yure ĩabiriquererã ta “Diaye ta āhraa,” arĩ umupeorãcoma. Eropirã erã turaro mucubirirã arĩrãcoma, arĩmi Jesu Tomare.

*Jesure masa erã masiburire ipũre gojañumi Ñu*

<sup>30</sup> Eropĩgu baja gaji sãre Goãmu ĩgu turari mera ii ihmũmi Jesu gua mera arĩgu. Irire ĩgu iirare ipũre gojapehobirabu yuhũ. <sup>31</sup> Eropa gojapehobiriqueregu ta ipũ yu wererare gojagu, “Jesu ta Cristo Goãmu ĩgu obeodĩgu āhrimi. ĩgu diaye ta Goãmu magu āhrimi,” mua arĩ masiburire gojabu. Eropirã mua ĩgure umupeorã Goãmu mera mua eropa arĩnĩguiburire gojabu ipũre.

## 21

*Jesu siete ĩgu buherãre dehyoañumi*

<sup>1</sup> Puhru Tiberia waĩcũri ditaru tũro dipaturi guare ĩgu buherãre dehyoami daja. Guare dehyoagu ōpa iimi ĩgu daja. <sup>2</sup> Simo Pedro, Toma suhrũadĩgu erã arĩgu, Natanae Galilea yeba arĩri maca Canã waĩcũri maca majagu, gua perã Zebedeo porã, gajirã sã perã gua ōa nũcu gamenere arĩbu.

<sup>3</sup> Gaa eropa gamenerera pũhrũ Simo Pedro õpa arĩmi:

—Wai wejẽgu wagũ iiaa, arĩmi ĩgu.

—Gaa sã mũ mera warãra, arĩbu gaa ĩgure.

Eropã arĩtuha buha wabũ. Eropirã dohodiru mera wabũ. Iri ñamire gaa õaro boyotahmuquererã ne yujugũ waimũre wejẽbircarabũ.

<sup>4</sup> Boyodiji merejacũ Jesu imiporo ĩgu niguicũ ĩarĩbu gaa. Eropã ĩaquererã ĩgure ĩha masibircarabũ gaa. <sup>5</sup> Eropigu gũare õpa arĩ serẽpimi:

—Ne, ¿wai wejẽari mũa? arĩmi Jesu.

—Ne wejẽbirabũ, arĩ yũhribũ gaa.

<sup>6</sup> —Dohodiru diayepũ wejẽdire mehyuque. Iripũ mehyurã wai wejẽrãca, arĩbeo niguimi gũare. ĩgu eroparĩcũ peerã ĩgu arĩdiro dopa ta mehyubũ. Gaa mehyura pũhrũ bajarã wai ñajama. Bajarã wai ñajacũ ĩarã wejẽdigũre dohodirugue aĩsã turabircarabũ gaa.

<sup>7</sup> Eropigu yũhu Jesu ĩgu mahigu Pedrore werebũ:

—Mari Opũ aħrimi sihĩ imiporo niguigu, arĩbu Pedrore.

Yũ eroparĩcũ Jesu ĩgu arĩcũ masigu, Simo Pedro ĩgu suhrirore sañami. Wai wejẽbu ĩgu suhrirore tuweadigu arĩmi. ĩgu suhrirore sañatuha diague yuriñajami. <sup>8</sup> Eropirã gajirã gaa buherã dohodirugue arĩbũ. Cien metro yoaro diaguere payabũ gaa. Eropirã wejẽdigũre wai bajarã ñajadigũre dohodiru mera taramajaabũ gaa. <sup>9</sup> Tũrogue tuhajarã pea niti dihta gose oyari peame weca waire ĩgu mupunugupidigũre ĩabũ gaa. Panru sãre ĩabũ gaa.

<sup>10</sup> Gaa eropa ĩacũ Jesu gũare õpa arĩmi:

—Dohparagã mũa wejẽnirãre bajamerãgã aĩgãrique, arĩmi gũare.

<sup>11</sup> ĩgu eroparĩcũ Simo Pedro Jesu mera arĩgu ĩgu sã dohodirugue ñaja, wejẽdire tara majaami imiporogue. Pagarã wai ñajanirã ciento cincuenta y tres wai arĩma. Bajarã wai ñajaquererã wejẽdire ne yehguebirima.

<sup>12</sup> —Banirã arique, arĩmi Jesu gũare.

—¿Noano aħriri mũhu? arĩ serẽpiñabiribũ gaa ĩgure. Gaa Opũ ĩgu arĩcũ masibũ gaa. <sup>13</sup> Eropigu Jesu peame pohrogue eja, panre aĩ gũare gueremi. Wai sãre gueremi.

<sup>14</sup> Eropigu Jesu ĩgu masa mũriara pũhrũ imiporo dehyoagu uħresubu gũare ĩgu buherãre dehyoagu iimi.

*Jesu Simo Pedro mera weretamuñumi*

<sup>15</sup> Gaa bara pũhrũ Jesu Simo Pedrore serẽpimi:

—Simo, Jona magũ, ¿õãre mũ mahiro tauro yũre mahiri mũhu? arĩmi Simo Pedrore.

—Opũ, mũre mahia yũhu. Mũre yũ mahire masia mũhu, arĩ yũhrimi Simo Pedro.

Jesu arĩmi:

—Eropigu ovejagãre mari ejodiro dopa ta yaharãre buheque mũhu, arĩmi Jesu.

<sup>16</sup> Eropã arĩtuha dipaturi ĩgu Simo Pedrore serẽpimi daja:

—Simo, Jona magũ, ¿yũre mahiri mũhu? arĩmi Jesu.

—Opũ, mũre mahia yũhu. Mũre yũ mahicũ masia mũhu, arĩ yũhrimi Simo Pedro.

Jesu arĩmi daja:

—Ovejare ìhadibuḡu ovejare ìḡu òaro ìhadiburo dopa ta yaharāre òaro ìhadibuḡe, arĩmi Jesu Pedrose.

<sup>17</sup> Eropa arĩtuha dipaturi Simo Pedrose serēpimi:

—Simo, Jona magu, ¿diaye ta yare mahiri muḡu? arĩmi Jesu daja.

Ʋhresubu ìḡu eropa serēpicũ peḡu Simo Pedro turaro bujoweremi.

—Opu, muḡu masipehoa. Mure yu mahicũ masia muḡu, arĩmi Simo Pedro.

—Ovejare mari ejodiro dopa ta yaharāre buheḡe muḡu. <sup>18</sup> Diaye mure arĩḡu iiaa. Muḡu mamu arĩḡu mu suhrire saña, mu gamerogue curimaribu muḡu. Eropa arĩdi arĩquereḡu ta puhru muḡu buḡu arĩcũ, mu mojotorire sibeocũ gajigu mure mu suhrire saḡucumi. Eropigu mu wadiabirogue mure aḡḡucumi, arĩmi Jesu Simo Pedrose.

<sup>19</sup> Eropa arĩḡu Simo Pedro dohpa wa ìḡu sĩriborore wereyugu iimi. Eropigu Simo Pedro sĩrigu Goāmure, “Ōagu, turagu āhraa,” masa erā arĩcũ ìḡu iiborore wereyugu iimi. Eropigu Pedro mera weretamutuhagu òpa arĩmi Jesu ìḡure:

—Diaye ta yu buhediro dopa iique muḡu, arĩmi Jesu Pedrose.

*Jesu ìḡu mahigu ipũre gojadigu arĩmi*

<sup>20</sup> Ìḡu eroparĩcũ Pedropu yare Jesu ìḡu mahigure erāre yu nurusiacũ ìami ìḡu. Yuḡu ìḡu ìagupu ero core Jesu pohrogā badoagu ìḡure òpa arĩdigu arĩbu. “Opu, ¿mure ìhaturirāre wiabupu nihino arĩcuri ìḡu?” arĩ Jesure serēpidi arĩbu yupu. Eropa yare ìagu Pedro serēpimi Jesure:

<sup>21</sup> —Opu, ¿ihĩ Ñupu dohpa wagacuri? arĩ serēpimi:

<sup>22</sup> —Ire mure werebeaa. I yebaguere yu dujariboro core ìḡure arĩniguicũ yu iicũ irire masibea muḡu. Eropigu ìḡu waborore guñabita muḡu. Diaye ta yu buhediro dopa iique mupu, arĩmi Jesu Pedrose.

<sup>23</sup> Irire ìḡu yare Ñure wererare peerā arĩpehrerā Jesu yarā weresiririma. Irire weresirirā òpa arĩrima erā: “Jesu ìḡu mahigu buheḡu sĩrisome,” arĩ weresiririma yare Jesu yarā erā basi. Erā eropa arĩquerecũ ta “Ìḡu sĩrisome,” arĩḡu iibirimi Jesu. “I yebaguere yu dujaricũ ìḡure arĩniguicũ yu iicũ irire masibea mupu,” arĩmi Jesu Pedrose.

<sup>24</sup> Jesu buheḡu ire wereḡu, ipũre gojagu āhraa yuḡu. Eropirā i wereri diaye ta arĩcũ masia mari.

<sup>25</sup> Baja gaji sāre Jesu iimi. Ìḡu iirare mari gojapehocũ iripũri gojarapũri baja tariari pũri waboya. Eropiro iripũrire mari dibucũ sihajabiriboya i yeba. Ʋjuturia waboya yu pepicũ. Iripēta āhraa.

## Jesu buhedore ĩgu apinirã erã iirare wereripũ ãhraa

—*Espíritu Santo arigucumi, arĩñumi Jesucristo ĩgu buherãre*

<sup>1-2</sup> Teófilo, ero core yu gojamũhtarapũ mera Jesu ĩgu iirare, ĩgu buherare mure weretuhabu. Te umarogue ĩgu m̃riarare weretubu. Jesu ĩgu m̃riaboro core ĩgu Espiritu Santo turari mera dorepu ĩgu apinirãre. Erã ĩgu beyenirã arĩñorã. <sup>3</sup> Eropi Jesu ĩgu crusague ĩgu s̃irira puhru yujuyerisuburi dupucugu dehyoapu ĩgu apinirãre. Cuarenta nuri puhru dehyoatupu. Eropigu ĩgu ĩgu basi ojocarigu arĩrire ihmupu erãre. Eropa dehyoagu Goãmu mari Pagu ĩgu opu arĩrire ðari buherire werepu erãre.

<sup>4</sup> Gajisubu Jesu ĩgu apinirã mera arĩgu ðpa arĩ erãre werepu:

—Jerusalén ta arĩnique dohpa. “Espiritu Santore m̃are obeogura,” yu Pagu ĩgu arĩdigure corenique. Iire ĩgu eropa arĩrare m̃are wereabu yahu. <sup>5</sup> Ñu m̃are waĩyegu deco mera m̃are waĩyemi. Yupu ĩgu iira tauro iigura m̃are. Espiritu Santo m̃a mera ĩgu arĩniguicãcũ iigura m̃are, arĩpu Jesu.

*Jesu umarogue m̃riara*

<sup>6</sup> Eropi gajisubu utãgugue Olivo waĩcudigugue Jesu erãre dehyoacũ erã serẽpiñorã ĩgure:

—Opu, ¿i Israe yebare mari ya yebare dohpãricũ guare dipaturi doreburire apibocuri m̃hu guare? ¿Dohpãricũ mari acawererã gohrare opu acugucuri m̃hu? arĩñorã ĩgure. <sup>7</sup> Erã eropãricũ peegu Jesu ðpa arĩpu:

—Mari Pagu dihta irinurire m̃a ya yebare m̃a ðaro arĩborore apimasimi. Irinurire m̃are masiya mara. <sup>8</sup> Eropirã m̃are Espiritu Santo ĩgu eracũ Goãmu ya turarire oparãca m̃a. Iri turarire m̃a oparã Jerusalén majarãre, arĩpehrerã Judea majarãre, Samaria majarãre, arĩpehreri yeba majarãre ðari buherire buherãca m̃a yaha arĩburire. Yu s̃irirare, yu masa m̃riarare erãre buherãca m̃a, arĩ werepu Jesu erãre.

<sup>9</sup> Eropa arĩ weretuhaja, Jesu umarogue m̃ria wapu. Erã ĩgure erã ãhanurusia mujucũ imica cururi pohecague ñaja dedere m̃ria wapu.

<sup>10</sup> Eropirã erã Jesu ĩgu m̃riagure erã ãhanurusia mujurisubu perã anyua boreri suhricurã Jesu ĩgu apinirã pohro dehyoanugajañorã.

<sup>11</sup> Eropirã erãre ðpa arĩñorã:

—M̃a Galilea majarã, ¿duhpirã ãhamuju niguirã iiri m̃a? Ihĩ Jesu umarogue m̃riagu, ĩgu m̃riadiro dopa ta dipaturi arigucumi daja, arĩ wereñorã anyua.

*Jesu ĩgu apinirã Judare gohrotobure beyeñorã*

<sup>12</sup> Eropiira puhru Jesu yarã utãgugue Olivo waĩcudigugue arĩñorã dijari, Jerusalengue dujajañorã. Irigu utãgu yuju kilómetro wecañari Jerusalén ejaboro pohro arĩyoro. <sup>13</sup> Dujaja erã umarogue erã arĩri taribugue m̃ria wañorã. Oã arĩñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda arĩñorã.

Santiagoꝝ Alfeo magꝝ árĩꝝ. Simopꝝ celote waĩcũri curu majagꝝ árĩꝝ. Judapꝝ Santiago acawereꝝ árĩꝝ. <sup>14</sup> Eropirã bajasuburi oã árĩpehrerã, nome mera, María Jesu pago mera, Jesu pagꝝ porã mera ðaro gamenere, turaro mera Goãmũre mari Pagũre serẽmuriñorã.

<sup>15</sup> Eropi irinũrire masa bajarã ciento veinte ejaboro gohra gamenereñorã. Eropigꝝ Pedropꝝ igꝝ mera majarã Cristo yarã watope nuꝝaja, wereꝝ erãre.

<sup>16</sup> —Yũ acawererã, Goãmũ iribojegue igꝝ arĩdiro dopa ta eropa wahaa. Irire Espĩritu Santo Davire weredoreñumi Juda mũꝝ eropa warare. Juda Jesure ñeha wejẽmorãre ihmudi árĩmi. <sup>17</sup> Juda mũꝝ mari mera Jesu yare ii, gũa mera majagꝝ ta árĩrimi. <sup>18</sup> Judapꝝ igꝝ Jesure ihmura wajare iri niyerure igꝝ wiara pũhrũ igꝝ basi wejẽ sĩripũ. Eropigꝝ yuhridija wa, igꝝ gũramisida yehguea sĩria wapũ. Igꝝ wiara niyeru mũra mera gajirã merogã yebare asũñorã. <sup>19</sup> Eropirã árĩpehrerã ohõ Jerusalén majarã masipehrecãma Juda mũꝝ igꝝ ñero warare. Eropa masirã igꝝ niyeru mera erã asũra yebare Acéldama di cóari yeba waĩcũa, arĩma iri yebare. <sup>20</sup> Iribojegue erã arĩ gojadiro dopa ta eropa wahãmi Juda mũꝝ. Salmo waĩcũripũgue õpa arĩ gojañuma:

Ígũ arĩdirore cóãdiro árĩporo. Eropirã gajirã igꝝ arĩdirore arĩbircãporo, arĩ gojañuma.

Ohõ sãre õpa arĩ gojañuma:

Gajigꝝ igꝝ mohmerare gohrotogꝝ árĩgũcumi, arĩ gojañuma Salmogue, arĩꝝ Pedro.

<sup>21-22</sup> “Eropirã mari yujugꝝ beyerã Juda mũꝝre gohrotobure. Ñũ waĩyegũ igꝝ masare buherasubu arĩdigũre, Jesu mera mari mera arĩdigũre beyero gahmea mari mera majagꝝ árĩbure. Jesu masa mũriacũ sãre ñadigũre beyero gahmea. Eropa beyera pũhrũ Jesu igꝝ masa mũriarare mari mera buhegũcumi, arĩ wereꝝ Pedro igꝝ acawererãre Cristo yarãre. <sup>23</sup> Ígũ eroparĩcũ peerã perãre beyedoboñorã erã. Yujugꝝ José Justo waĩcũgure beyeñorã. Ígũ Barsabá erã arĩ piyugꝝ árĩꝝ. Eropirã gajigũre Matia waĩcũgure beyeñorã. <sup>24-25</sup> Erã perãre beyedobotuhaja, erãre Goãmũre õpa arĩ serẽñorã:

—Mũhu gũa Opũ árĩpehrerã masa erã pepirire masia. Oã ãhrima gũa perã beyerã. Juda mũꝝre gohrotobure nihi mũ gamegũre beyeque. Juda mũꝝ Jesure cóãdigũ peamegue wadigũ árĩmi. Eropigꝝ igũre gohrotogꝝ Jesu igꝝ apidigũ árĩgũcumi. Eropigꝝ gũa mera ðari buherire buhegũcumi, arĩñorã erã Goãmũre.

<sup>26</sup> Eropa arĩrã ta utã mera deamuriñorã beyemorã. Matia yañe ðaro wiricũ, Matiapũ Jesu igꝝ apinirã once apinirã mera majagꝝ dujapũ.

## 2

### *Espĩritu Santo igꝝ yarã mera arĩnuꝝapũ*

<sup>1</sup> Eropii Pentecoste waĩcũrinũ arĩũ erã yujuro mera árĩpehrerã yuju wihi gamenereñorã. <sup>2</sup> Irisubure ta miruñe bũrigã ariro dopa ta ãmarogue busũro cariyoro. Ero eropa busũro caricũ peeñorã árĩpehrerã iri wihigue gamenere arĩrã. <sup>3</sup> Eropiro peame porãrigã dopa bejari erã árĩpehrerã dipu wecare dehyoayoro. Iri peame porãrigã nediru dopa bejari dehyoayoro. <sup>4</sup> Eropigꝝ Espĩritu Santo

erapu eräre ĩgu turarire ogu arıgu. Eropirā Espírıtu Santo eräre ĩgu itamuropē erāpu gajirā yare ōaro werenıguınuġañořā.

<sup>5</sup> Irınurire Jerusalén bajarā judio masa eranirā árıñořā. Goāmure umupeorā erarā árıñořā. Erā macari nucu majarā árıñořā. <sup>6</sup> Eropirā umarogue busucū peerā masa bajarā Jesu buherā pohroge gamenere wahġañořā. Masa nucu yare Jesu buherā erā werenıguıcū peeñořā. Erā eropa werenıguıcū peerā, erā pee uca wañořā.

<sup>7-8</sup> —Yaho, ¿Duhpirā oā Galilea majarā árıquererā ōaro mari yare werenıguiri? Erā mari masa dehyoadirogue árınirā iro dopa ta werenıguirā iima, árıñořā erāpu. <sup>9-10</sup> Árıpehrerā mari yare dohpaguere werenıguirā iima. Partia majarā, Media majarā, Elam majarā, Mesopotamia majarā, Judea majarā, Capadocia majarā, Ponto majarā, Asia majarā, Frigia majarā, Panfilia majarā, Egipto majarā, Africa majarā, Cirene majarā, Romague arirā āhraa mari. Yujurāyeri judio masa āhraa mari. Gajirā judio masa árıbirā judio masa ya buherıpare buherāgue āhraa mari. <sup>11</sup> Creta majarā Arabia majarā sā mari mera āhrıma. Eropirā oā mari yare erā werenıguıcū peea mari. Erā mari ya mera Goāmu turari mera ĩgu ōaro iirare wererā iima, arı werenıguıñořā masa erā basi.

<sup>12</sup> Erā eropa arırā uca wañořā. Erā ĩarare erā peerare ōaro masıbirıñořā.

—¿Dohpárırono oā gajirā ya mera Goāmu yare eropa ōaro werenıguiri mua pepicū? arı game serēpiñořā erā erā basi.

<sup>13</sup> Eropirā gajirā wereyañořā.

—¿Dohpa oā siburi ihrınıjarā mererā iiri? arı wereyañořā gajirā erā basi.

### *Pedro masare werepu*

<sup>14</sup> Eropıgu Pedro once Jesu ĩgu apınirā mera wahġanugaja, masare werepu:

—Mua Judea majarā, árıpehrerā Jerusaléngue arırā, ire yu werecū ōaro peeque mua. <sup>15</sup> Mua pepiri diaye árıbeaa. Dohpaguere nueve āhraa. Ũmugue āhraa. Eropirā oā merebeama. <sup>16</sup> Oā Goāmu irıbojegue ĩgu weredıro dopa ta iirā iima. Irıre Joere Goāmu ya weremahtadıgure ire weredoreñumi Goāmuru.

<sup>17</sup> Ojogorocurınu árıcū ōpa árıroca: Yuhu Espırıtıre masare árıpehrerāre obeogura. Eropirā mua porā Goāmu yare wererācoma. Eropirā mua mera majarā mamarā Goāmu deyoro moarire ĩarācoma. Eropirā mua mera majarā murāpu quērire quērācoma. <sup>18</sup> Eropıgu yu pohro majarāre yu Espırıtıre obeogura. Eropirā erā yahare wererācoma. <sup>19</sup> Eropıgu yu turari mera iıguca umısıgue. Yebague sāre yu turari mera irıre ĩhmuguca. Eropıgu di mera, peame mera, imıca mera ĩhmuguca yu turarire. <sup>20</sup> Yu eropiıcū abe umu majagu naitıa wagucumi. Nami majagu abe diagu guhyaro wagucumi. Őpa waroca Cristo mua opu ĩgu dujarıburınu, yu arıranu core. Irınu ĩha uca warāca mua. Eropro irınu guhyarınu árıroca. <sup>21</sup> Eropro ōpa árıroca: Árıpehrerā masa Cristore erā ñerıre cóadore serēnırāre ĩgu eräre peamegue wabonırāre taugucumi Goāmu, arı gojañumi Joe, arıpu Pedro masare.

22 “M̄ua Israe masa yuh̄u werecũ peeque, arĩp̄u daja. Jesu Nazare majagup̄u Goãm̄u ĩgu obeodiḡu árĩmi. Jesure “Goãm̄u obeodiḡu àhrimi,” masa erã arĩ masiboro dopa Jesu Goãm̄u turari mera deyoro moarire masare ii ĩhmucũ iidi árĩmi Goãm̄u Jesure. M̄ua irire masia. 23 M̄ua Jesure wejẽdorecũ Goãm̄u iribojegue ĩgu “Eropa waroca,” ĩgu arĩdiro dopa ta eropa wahabũ. Eropirã m̄ua Jesure crusague wejẽdorera wiabũ ĩgure masa ñerãre. 24 Goãm̄up̄u Jesu s̄iridigure masuami. Eropiḡu dipaturi ne s̄irisome ĩgu. ĩgu s̄iri wajabeami. Eropa ojocarinigucãbu àhrimi. 25 Õpa arĩñumi Davi iribojegue majagu Cristo ĩgu arĩbodiropo dopa ta:

Yũ Op̄u, yũ mera àhraa m̄uhũ. Ëmuri nuc̄u Goãm̄u yũ Op̄u yũ pohro m̄uhũ árĩcũ ĩamurabũ yuh̄u gũibiriboro dopa. 26-27 M̄uhũ Goãm̄u yũ s̄iporãre s̄irinirã erã árĩroguere ne cóasome. Yũre m̄u mahigure ñerogue yũ s̄iporãre cóasome m̄uhũ. Yuh̄u m̄u pohro majagu m̄ure umupeogu àhraa. Yũ dũp̄ure boadoresome m̄uhũ. Eropiḡu b̄urigã mucubiria. Mucubiriri mera wereniguia. Eropiḡu m̄ure Goãm̄ure b̄urigã umupeogu árĩgu gũiro mariro ðaro árĩcãa. 28 Yũre dipaturi ojocaricũ iiguca m̄uhũ. Yũ mera m̄uhũ árĩcũ b̄urigã mucubiria, arĩ gojañumi Davi Cristo ĩgu arĩbodiropo dopa ta, arĩp̄u Pedro.

29 “Acawerera, ðpa ðaro weregura m̄ure Davire mari acaweregũ m̄urere, iribojegue majagure, arĩnemop̄u daja Pedro. ĩgu Davi s̄iria wañumi. Eropiḡu ĩgure erã yaara gobe dohpaguere árĩnia. Eropiḡu “Yũ dũp̄ure boadoresome m̄uhũ,” arĩ gojagu ĩgu basi waĩpeo weregũ iibiriñumi. 30-31 Iribojegue Goãm̄u Davire ðpa arĩñumi: “Diaye ta arĩgu iiaa. M̄u p̄ãramerã árĩturiarã mera majagu m̄u iiro dopa ta i maca majarã weca op̄u árĩgucumi,” arĩñumi Goãm̄u Davire. Davi Goãm̄u yare wereyugu arĩñumi. Eropiḡu Cristore Goãm̄u ta op̄u acuborore masigu, Cristo ĩgu masa m̄uriaborore werem̄htatuhãñumi Davip̄u. Õpa arĩ wereñumi ĩgu: “ĩgu s̄irinirã erã árĩroguere árĩwajosome. ĩgu dũp̄u ero boasome,” arĩñumi Davi. 32 ĩre Jesucristore Goãm̄u masuami. ĩgu masudigure ḡua árĩpehrerã ĩabũ. 33 Eropiḡu Cristo umarogue mari Pagu diayerp̄u árĩcumi doregu árĩgu. Eropiḡu ĩgu Pagu “Esp̄iritu Santore yebague obeogura,” arĩp̄u ĩgure. Eropiḡu Cristop̄u Esp̄iritu Santore dohpaguere obeomi ḡuare. Eropirã Esp̄iritu Santore ĩgu ḡuare obeorare ĩarã iiaa m̄ua. Eropirã m̄ua peea. 34 Davip̄u Jesu ĩgu m̄uriadiropo dopa ta umaroguere m̄uriabiriñumi. Eropiḡu ĩgu ĩgu basi ðpa arĩñumi:

Goãm̄u arĩmi yũ Op̄ure: “Ohõ yũ diayerp̄u doaque m̄uhũ.

35 Eropiḡu m̄ure ĩaturirãre m̄ure tarinugabasagura yuh̄u m̄u pohro majarã dopa árĩmorãre,” arĩmi Goãm̄u yũ Op̄ure, arĩ gojañumi Davi.

36 “Eropirã árĩpehrerã Israe masa ire ðaro masique m̄ua. ĩh̄i Jesure m̄ua crusague wejẽdiḡure m̄ua op̄u acuami Goãm̄up̄u. ĩgure m̄ure taubure Cristore ap̄iami Goãm̄u, arĩ werep̄u Pedro masare.

37 ĩgu eroparĩcũ peerã b̄urigã b̄ujawere, gũirã masap̄u Pedro sãre serẽpi ĩañorã:

—Ḡua acawerera, ¿dohpa iirãcuri ḡua? arĩ serẽpi ĩañorã erã.

38 Erã eropa arĩ serẽpi ĩacũ yuhrip̄u Pedro sã.

—Mua ñero iirire bujawererã áríque. Óarire gohrotoque. Eropirã Jesu waí mera waíyenirã áríque mua árípehrerã. Mua eropa iicũ mua ñerire cãdijigucumi Goãmu. Mua eropa iicũ Espiritu Santo mua mera árigucumi. Goãmu ígu Espiritu Santore eropa ocãgucumi muare. <sup>39</sup> Muare, mua porãre, mua pãramerã árturiarãre yoarogue majarãre, árípehrerã Goãmu marí Opu ígu beyenirãre “Diaye ta itamugura muare,” arí apiñumi Goãmu, arípu Pedro masare.

<sup>40</sup> Eropa arítuhaja baja werenemopu Pedro. Eropigu turaro mera werepu erãre.

—I yeba majarãre erã ñero iira dipuwaja dipuwaja moagucumi Goãmu. Eropirã muapu Goãmu yarã áríque. Mua eropa áricũ ígu muare dipuwaja moasome, arípu Pedro masare.

<sup>41</sup> Ígu eroparícũ peerã bajarã ígu wereniguirire ðaro peeñorã. Eropigu ígu sã erãre waíyepu. Eropirã Goãmu yarã mera majarã tres mil masa wanemoñorã. <sup>42</sup> Eropirã erã masa Cristo ígu apinirã mera umuri nucu árimuriñorã. Eropirã erã buherire umuri nucu peemuriñorã. Erã barire game guere, Goãmure serẽ, Cristo ígu apinirã mera ðaro áricãñorã erã.

*Jesu yarã ne ártinugarã erã árticurire werepu Luca*

<sup>43</sup> Eropii Goãmu ígu turari mera deyoro moarire ii ihmuniñorã ígu apinirã. Erã eropa iicũ íarã masa árípehrerã íha uca wañorã. <sup>44</sup> Eropirã árípehrerã Jesure umupeorã gamenere, ðaro áricãñorã. Eropirã erã yare game gueremuriñorã. <sup>45</sup> Erã yare dua, árípehrerãre gajinore moorãre erã nucu omuriñorã erã. <sup>46</sup> Eropirã umuri nucu erã Goãmu wihigue gameneremuriñorã. Árípehrerã yujurãyeri erã wirigue yujuyeri cururi mucubiriri mera gamenere bamuriñorã. <sup>47</sup> Erã eropa gamenererisubu “Goãmu ðagu áhrimi,” arí umupeomuriñorã. Eropirã gajirã masa erãre gametarimuriñorã. Eropigu umuri nucu Goãmu gajirãre ígu yarã wacũ iimuripu.

### 3

*Curimasibigu ðagu wapu*

<sup>1</sup> Ñamicague tres áricũ Goãmure serërisubu áricũ Pedro, Ñu mera Goãmu wihigue warã iñorã. Iri wihi disiporo yujugu umu doapu. <sup>2</sup> Umuri nucu iri wihi disiporo ðari disiporo waicuri disiporo gajirã ígure aígãri duhudoboñorã. Ígu umupu ne masa dehyoagugue ta curimasibigu arípu. Eropigu ígu iri disiporo pohro doagu niyerure serëmuripu iri wihire ñajarãre. <sup>3</sup> Eropii Pedro, Ñu iri wihigue erã ejanugajacũ curimasibigupu erãre íha, niyerure serëpu. <sup>4</sup> Eropirã erã Pedro, Ñu mera ígure íha, Pedropu ðpa arípu:

—Guare íaque muhu, arípu Pedro ígure.

<sup>5</sup> Ígu eroparícũ peegu erãre íha “Niyerure orãcoma yure,” arí pepiripu. <sup>6</sup> Ígu eropa arí pepiquerecũ ta Pedro ígure ðpa arí werepu: —Niyerure opabeaa yuhu. Opabiriqueregu ta ire iigura yuhu mare. Jesucristo Nazare majagu ígu turari mera curique muhu, arípu Pedro curimasibigure.

<sup>7</sup> Eropa arígu ta ígu mojtore diayeru maja mojtore ñeha, ígure tarawahgũ nugupu. Irisubu ta curimasibigu ígu guburire, ígu ñigarire turari ñajayoro. <sup>8</sup> Iri eropa ñajara puhru ígu wahgãnugajapu. Eropigu



ĭgu waha buhrima m̃aria “Goãmu turagu ðagu ãhrimi,” ĭgu arĭ mucubiridiro mera erã mera Goãmu wihigue ñajaapu pare. <sup>9</sup> ĭgu eropa curicũ, “Goãmu ðagu ãhrimi,” arĭ gaguiniguicũ masa arĭpehrerã ĭgure ĩañorã. <sup>10</sup> Eropirã masa ĭgure ĩha masiñorã. “Ihĭ iri wihi maja disiporo ðari disiporo pohro ĭgu niyerure serẽ doagu ãhrimi,” arĭñorã erã. Eropirã ĭgu eropa curicũ ĩarã ĩhamaria wañorã.

*Pedro Goãmu wihigue masare buhepu*

<sup>11</sup> Eropii curimasibiridigu Pedro sãre ĭgu duhubirisubu, masa arĭpehrerã ĩhamaria warã Pedro sã pohro omagã, gamenereñorã. Erã Goãmu wihigue arĭrã Salomo waĩcuripugue arĭñorã. <sup>12</sup> Erã eropa gamenerera puhru Pedropu werepu erãre.

—M̃ua Israe masa, ¿duhpirã ĩre ĩha ucari? ¿Duhpirã guare m̃ua ĩhanurari? Guapu gua ya turari mera, Goãmure gua umupeori mera, gua ejatuharo ĩre curicũ iibirabu gua. Jesu irire iiami. <sup>13</sup> Mari ñecu sumarã mura Abrahã, Isaa, Jacobo mura Goãmure umupeomuriñorã. Erã umupeodigupu Goãmupu ĭgu magure Jesure turagu, ðagu ĭgu arĭcũ ĩhmumirimi. M̃ua Jesure ĩhaturirãre ohabu. Eropigu Pilato ĭgure ĭgu peresugue wiudiacũ m̃uapu ĭgure ĭgu wiucũ gamebirabu. Pilatore Jesure ohabu m̃ua. <sup>14</sup> Pilato ĭgure wiudiamari. M̃uapu Jesure ðagure, ðaro iigure gamebirã gajigure masa wejẽdigupure wiudoreabu m̃ua. <sup>15</sup> Eropirã Jesure mari ojocaricũ iigure wejẽabu m̃ua. ĭgu sĭricũ Goãmu ĭgure masuami. ĭgure masudigure gua ĩabu. <sup>16</sup> Eropirã gua ĭgure umupeorã ãhraa. Gua eropa umupeocũ ĩagu ĩre m̃ua dohpague ĩagure m̃ua ĩha masigure Jesupu ĭgu turari mera ĭgu curicũ iiami.

<sup>17</sup> “Yũ acawererã, mari oparã mera Jesure ðaro masibiriqererã ĭgure wejẽabu m̃ua. Irire masia yũhu. <sup>18</sup> Iribojegue majarã Goãmu yare werem̃htanirã Goãmu erãre ĭgu weredoreldiro dopa ta wereñuma erã sã. “Cristo ñero tarigucumi,” arĭ wereyuñuma erã. Erã eropa arĭ wereldiro dopa ta eropa wabu dohpaguere. <sup>19</sup> Eropirã dohpaguere m̃ua ñero iirare bujawererã arĭque. Ōaripure gohrotoque. Cristore umupeoque. M̃ua eropa iicũ m̃ua ñerire cãdijigucumi Goãmu. Eropigu m̃uare mucubiririnurire apigucumi ĭgu. Eropirã ðaro sĭñajarãca. <sup>20</sup> Eropigu Goãmu Cristore ĭgu beyedigure m̃uare obeogucumi daja. Cristo Jesu ta ãhrimi. <sup>21</sup> ĭgu Jesu Goãmu pohroque arĭcumi dohpa. Iribojegue Goãmu ĭgu yare werem̃htanirãre wereyudoreñumi ĭgu iiburire. ĭgu wereldiro dopa ta arĭpehrero amugu iicumi. ĭgu amutuhaja Cristore obeogucumi daja. <sup>22</sup> Moise irire weregu ðpa arĭñumi: “Mari mera majagure mari acaweregure Goãmu yare werem̃htagure Goãmu mari Opu obeogucumi m̃uare. Yure ĭgu obeoldiro dopa ta obeogucumi ĭgu sãre. Eropirã m̃uare ĭgu werecũ peephehrecãrãca m̃ua. <sup>23</sup> Ōpa arĭroca. Arĭpehrerã ĭgure peebirã, ĭgu dorerire iibirã ĭgu cõanirã arĭrãcoma. Goãmu yarã mera majarã arĭsome erã,” arĭmuriñumi Moise iribojeque.

<sup>24</sup> “Arĭpehrerã Goãmu yare werem̃htanirã nucu, Samue ĭgu puhru arĭrã sã i dohpague warire wereyuñuma. <sup>25</sup> Mari ñecu sumarãre iribojegue majarãre “Masare ðaro iigura,” arĭ weremuriñumi. ĭgu

eräre werediro dopa iimi marire dohpaguere. Eropigu Abrahäre ĩgu arĩdiro dopa ta mari säre arĩ weregu iĩñumi. Ōpa arĩ wereñumi Goãmũ Abrahäre: “Árĩpehreri yeba majaräre ðaro iigura. Ōpa irire iigura: Mũ acaweregu pũhrũ árĩgũpũ masare ðaro iibasagũcumĩ yũre,” arĩñumi Goãmũ Abrahäre. <sup>26</sup> Maripũre Goãmũ Jesure ĩgu magũre ĩgu masudigũre mari pohrogue obeomũhtami mari ñero iirare cóábure. Eropa ĩgu ĩgu mũare ðaro iiami, arĩpũ Pedro eräre.

## 4

### *Pedro, Ñu mera oparäre weretamuñorã*

<sup>1-3</sup> ĩgu eropa wereniguisubu pahia, Goãmũ wihire corerã surara opũ, saduceo masa sã eräre peeñorã. Ōpa buherũ Pedro Ñu mera masare:

—Jesu ĩgu sĩrira pũhrũ masa mũria wami. ĩgu eropa masa mũriacũ ĩarã, pũhrũ mari sã ĩgu yarã mari masa mũriaborore masia mari, arĩ werepũ Pedro sã. Erã eroparĩcũ peerã, oparãpũ erã mera guañorã. Eropa guarã naimerecũ ĩarã erã Pedrore, gajirã Jesu apinirã säre ñeha, peresu iĩñorã. <sup>4</sup> Oparã eropa gamebiriqũrecũ ta masa bajarã Goãmũ yare Pedro sã buherire peerã “Diaye ta ãhraa,” arĩ pepiñorã erã. Eropirã Jesu yarã bajarã wañorã. Erã ¼ma dihtare queocũ Jesure umupeorã cinco mil masa árĩñorã.

<sup>5</sup> Eropii gajinũ iri maca majarã mũrã, oparã, judio masa buherã mera Jerusalengue gamenereñorã. <sup>6</sup> Eropigu pahia opũ Ana waĩcũgu ero árĩpũ. ĩgu acawererã sã árĩñorã. Caifa, Ñu, Alejandro, gajirã mera Ana acawererã árĩñorã.

<sup>7</sup> Eropirã erã Pedro säre eräre gamebeocũ, surarapũ peresugue eräre aĩwiu oparã watopegue eräre aĩ ejañorã. Erã eropa iira pũhrũ oparã serẽpi ĩañorã Pedro säre.

—¿Noa ya turari mera mũa curimasibigũre ðagũ iari? ¿Noa ãhriri mũare irire iidoregu? arĩ serẽpi ĩañorã erã.

<sup>8</sup> Erã eroparĩcũ peegu Espĩritu Santo ĩgu itamurire ðaro opagu werepũ Pedro eräre.

<sup>9</sup> —Mũa oparã, mũa mũrã, ¿gũa curimasibigũre gũa ðagũ iirare serẽpi ĩarã iiri mũa gũare? <sup>10</sup> Ire masique mũa árĩpehrerã, Israe masa. Ire Jesucristo eropa iiami. Jesu Nazare majagu, mũa crusague wejẽdigũ, Goãmũ masudigũ, ĩgũpũ ihĩ curimasibigũre ðagũ wacũ iiami. Eropirã ĩre dohpaguere mũa ĩhuro ĩgu curicũ ĩhaa mũa. Ōpa ãhraa Goãmũ yare erã gojarapũgue Cristore wereyuro: <sup>11</sup> “Ihĩ Cristo utãye iro dopa ta Goãmũ beyedigũ ãhrimi. ĩgu Goãmũ beyedigũ árĩqũrecũ masa ĩgũre gamesome. ĩgũre erã gamebiriqũrecũ Goãmũ ĩgũre opũ acuami árĩpehrerãre dorebure,” arĩ gojañumi iribojegue. <sup>12</sup> Ne gajigu masare peamegue wabonirãre taugũ ne marimi. I yebaguere Jesu dihta masare taugũ ãhrimi. Ne gajirã ĩgu iro dopa árĩrã ne marima, arĩ werepũ Pedro eräre.

<sup>13</sup> ĩgu eropa arĩ werera pũhrũ, Pedro Ñu mera buheya marirã erã árĩcũ ĩarã, gũiro mariro erã buhecũ ĩarã, mũrã, oparã, judio masa buherã mera pee ¼ca wañorã. Eropirã Jesu iro dopa erã buhecũ ĩarã, Ōpa pepiñorã erã. “Pedro, Ñu sã diaye ta Jesu mera majarã ta ãhrima oã,” arĩ pepiñorã erã. <sup>14</sup> Eropigu curimasibiridigu Pedro

sã mera árĩpũ. Ígũ, ígũ òagũ árĩcũ Ìañořã mũřã, oparã, judio masa buherã mera. Eropirã erã Pedro sãre “Ñero iirã iiaa,” arĩ weresãmasibiriñořã. <sup>15</sup> Eropã weresãmasibirã oparã erã gamenereri taribugue árĩrãre Pedro sãre wiriadoreñořã. <sup>16</sup> Erã wiriara pũhrũ erã basi weretamuñořã.

—¿Oãre dohpa iirãcuri mari? arĩ wereniguiñořã erã.

Õpa arĩ wereniguinemoñořã:

—Pedro, Ñu mera Goãmũ turari mera curimasibigũre curicũ iinirã ãhrama. Eropirã Jerusalén majarã árĩpehrerã erã eropa òaro iirare masiama. Eropirã maripũ “Eropa iibirama erã,” arĩmasibeaa mari. <sup>17</sup> Eropirã Jesu ígũ buherare gajirãre buhedorebircãrã erãre gajirã erã buherire gameri arĩrã, arĩ wereniguiñořã erã erã basi.

<sup>18</sup> Eropã arĩ wereniguituha Pedro sãre sihubeo òpa arĩñořã:

—Jesu ígũ buherare ne buhebircãque gajirãre. Irire ne werenigui-  
bircãque, arĩrãrã erãre.

<sup>19</sup> Erã eroparĩcũ peerã Pedro Ñu mera òpa arĩñořã erãre:

—Mũa òpa arĩcũ mũare yũhrirã Goãmũpũre tarinũgãrã iiboca gũa. ¿Nihĩ yapũre gũa werecũ gahmeri mũa? ¿Mũa yapũre gũa iicũ gahmeri mũa? ¿Goãmũ yapũre gũa iicũ gahmeri mũa? <sup>20</sup> Gũapũre gũa Ìarare, gũa peerare gũare yayasãma masiya mara masare, arĩ yũhrĩpũ Pedro Ñu mera.

<sup>21</sup> Erã eroparĩcũ peerã oparãpũ dipaturi doreriñořã daja erãre.

—Jesu ígũ buherare mũa buherã ñero tarirãca mũa, arĩrãrã oparã erãre.

Erãre “Ñu, Pedro mera ñero iirã iima,” arĩmasibiriñořã erã. Eropirã masapũ curimasibiridigũ ígũ òagũ wacũ Ìarã, “Goãmũ diaye ta òagũ ãhrimi,” arĩñořã masa. Erã eroparĩcũ peerã oparãpũ Pedro sãre dipuwaja moamasibiri, erãre wiuñořã. <sup>22</sup> Curimasibigũ òagũ erã iidigã cuarenta bojori opagũ árĩpũ.

### *Jesu yarã erã gũibiriburire serẽñořã Goãmũre*

<sup>23</sup> Eropii, Pedro Ñu mera erã mera majarã pohrogue eja, pahia oparã, mũrã erãre erã arĩrãre wereñořã. <sup>24</sup> Erã eroparĩcũ peerã erã árĩpehrerã yujuro mera mari Pagũre Goãmũre serẽñořã.

—Gũa Opũ, mũhũ ãmarore, yebare, diarire iigũ, árĩpehrerãre ojocaricũ iigũ ãhraa mũhũ. <sup>25</sup> Mũ Espĩritu Santo gũa ñecũre Davi mũrũre mũ pohro majagũre òpa weredoreyoro mũ arĩdiro dopa ta:

¿Duhpirã judio masa árĩbirã guari? Pee masibirã ãhrima masa.

<sup>26</sup> Baja macari majarã oparã gamenere, mari Opũ Goãmũre, ígũ opũ acudigũ Cristo sãre Ìhaturi, ñero iidiana erã, arĩ weredoreyoro mũhũ Davire iribojegũere.

<sup>27</sup> Eropã ta ãhraa, arĩ serẽnemoñořã Goãmũre. I macare Herode, Poncio Pilato, judio masa árĩbirã, judio masa mera mũ beyedigũre Jesure òagũ mũ pohro majagũre wejẽdia gamenereama. <sup>28</sup> Irisubu mũ gamediro dopa ta “Eropã waroca,” mũ arĩdiro dopa ta iiaa erã. Mũ masiri mera eropa wereyoro mũhũ. <sup>29</sup> Eropigũ, gũa Opũ, erã gũare “Mũa buheri waja ñero tarirãca,” erã arĩrãre guãaque mũhũ. Gũare itamuque. Eropigũ gũare mũ pohro majarãre gũiro mariro mũ buherire weredoreque gũare. <sup>30</sup> Mũhũ mũ turari mera dorecũrãre òarã iique. Eropigũ mũ buherire gũiro mariro werecũ iique gũare.

Eropigu m̄u deyoru moarare Jesu m̄u pohro majagu ĩgu turari mera ii ĩhmudoreque guare. Eropigu dorec̄ur̄are ðar̄a gua wadorec̄u m̄u turari mera itamuque guare, ar̄i ser̄eñor̄a er̄a mari Pagure.

<sup>31</sup> Er̄a eropa ar̄i ser̄era p̄hr̄u, er̄a gamenereri wihi ñohmemaa wayoro. Ero eropa ñohmec̄u ta Esp̄iritu Santo ĩgu turari mera guñaturar̄a wac̄u ĩp̄u er̄are. Eropa war̄a, Esp̄iritu Santo ĩgu dorediro dopa ta iñor̄a. Güiro mariro Goãmu yare wereñor̄a er̄a.

### *Jesu yar̄a er̄a yare d̄uca wañor̄a*

<sup>32-33</sup> Eropir̄a Goãmu ĩgu turari mera er̄a Jesu ĩgu apinir̄a ðpa ar̄i wereñor̄a masare: Jesure Goãmu masudigure gua ĩabu, ar̄i wereñor̄a er̄a masare. Eropigu Goãmu er̄a ár̄ipehrer̄are ðaro itamum̄ur̄ip̄u. Eropir̄a Jesure umupeor̄a bajar̄a ár̄iñor̄a. Er̄a yujuropa ta pepir̄a ár̄im̄ur̄iñor̄a. Eropir̄a er̄a er̄a yare er̄a doberire “Yaha dihta ãhraa,” ne ar̄ibiriñor̄a. Er̄a ár̄ipehrer̄a er̄a yare gajinore moor̄are er̄a mera majar̄are d̄uca wam̄ur̄iñor̄a. <sup>34</sup> Eropir̄a er̄a mera majar̄a mojomoroc̄ur̄a marim̄ur̄iñor̄a. Er̄a mera majar̄a yeba opar̄a, wiri opar̄a er̄a yare duam̄ur̄iñor̄a. <sup>35</sup> Eropa duar̄a er̄a wajasearare er̄a aĩḡari, Jesu ĩgu apinir̄are om̄ur̄iñor̄a. Eropir̄a er̄apu irire er̄a mera majar̄are d̄uca wam̄ur̄iñor̄a. Ár̄ipehrer̄a opabir̄are d̄uca wañor̄a. <sup>36</sup> Irisubure yuju gu er̄a mera majagu José waĩc̄ugu ár̄ip̄u. Jesu ĩgu apinir̄a Josere Bernabé waĩyeñor̄a. ĩgu waĩ Bernabé “Masare mucubiric̄u ĩigu ãhrimi,” ar̄ima Griego ya mera. ĩgu Leví ya curu majagu Chipre nuğuro majagu ár̄ip̄u. <sup>37</sup> Eropigu ĩgu poeri opagu ár̄iḡu irire duapu. Eropigu ĩgu wajasearare Jesu ĩgu apinir̄are ðpu ĩgu gajir̄are gueredoregu.

## 5

### *Ananía ĩgu marapo Safira mera guyar̄u*

<sup>1</sup> Gajir̄a s̄a Bernabé iro dopa iim̄ur̄iriñor̄a. Er̄a Ananía waĩc̄ugu, ĩgu marapo Safira waĩc̄ugo ár̄iñor̄a. Eropigu Ananía er̄a ya poerire duapu ĩgu. <sup>2</sup> Eropa duaqueregu ta ĩgu wajasearare ĩgu basi aĩpu. ĩgu marapo s̄a ĩgu eropa iirare masipo. Eropigu er̄a wajasea d̄uharare aĩḡari, Jesu ĩgu apinir̄are ðpu Ananíapu. Eropa ogu, “Opehogu iiaa,” ar̄ir̄ip̄u ĩgu. <sup>3</sup> ĩgu eropa iic̄u ĩagu Pedro ĩgure werepu.

—Ananía, wat̄i m̄ure guadorec̄u m̄uhu guayabu Esp̄iritu Santore. Eropigu m̄ua ya poerire dua, m̄u wajasearare m̄u basi aĩbu ãhrabu m̄uhu. <sup>4</sup> M̄u duaboro core m̄ua ya poeri ár̄ir̄ibu. Eropiro m̄u duara p̄hr̄u m̄u ya wajatar̄i ta ãhrabu. ¿Eropigu dohpa ár̄ironore eropa guyar̄i m̄uhu? M̄uhu gua dihtare guayabaa. Goãmu s̄are guayabu m̄uhu, ar̄ip̄u Pedro ĩgure.

<sup>5</sup> ĩgu eropar̄ic̄u peegu ta, Ananíapu mehmereja, s̄iria wap̄u. Eropir̄a ár̄ipehrer̄a ĩgu eropa warare masir̄a, b̄ur̄iḡa güiñor̄a. <sup>6</sup> ĩgu s̄irira p̄hr̄u mamar̄a ahri, ĩgu d̄ur̄ure suhri mera oma, disiporogue aĩḡa, yaañor̄a ĩgure.

<sup>7</sup> Eropii uhre hora p̄hr̄u Ananía m̄uru marapo ĩgu s̄irirare masibigo Pedro pohrogue ñajapo. <sup>8</sup> Eropigu Pedro igore ðpa ar̄ip̄u:

—¿Maa ya poerire duanijarā dipē wajatari maa? arīpū īgū. Eropigo igo igo marapū mūrū īgū arīrañepē ta, “Iripēta wajatabū gūa,” arī wereripo igo sã. <sup>9</sup> Eropigū Pedro igo wererū:

—¿Duhpirā maa yujuro mera Goāmū Espiriture gūya ihadiari maa? Peeque dohpaguere. Mū marapū mūrūre yaanirā ta ahrima daja. Mū sãre mū dūpūre aīrā ahrima, arīpū Pedro.

<sup>10</sup> Īgū eropa arī werecū ta igo mehmereja, sīria wapo. Eropirā mamarā iri wihire ñajarā, igo ya dūpū mūrarore aī wiria wañorā. Aīgā, igo marapū mūrū dipaba yaañorā. <sup>11</sup> Eropirā Jesu yarā arīpehrerā gajirā irire peerā sã, gūitariacāñorā.

*Jesu īgū apinirā Goāmū turari mera ii ihmuñorā*

<sup>12</sup> Eropirā masa watope Jesu īgū apinirā bajasuburi Goāmū turari mera deyoro moarire ii ihmumūriñorā. Eropirā erā Salomo waicūri taribugue ōari taribugue gameneremūriñorā. <sup>13</sup> Eropirā gajirā erāre gūirā, erā pohrogue wabiriñorā. Eropā gūiquererā erāre Jesu īgū apinirāre, “Ōarā āhrima oā,” arīñorā masa. <sup>14</sup> Eropirā ūma, nome bajarā Jesure umupeonūgañorā. <sup>15</sup> Eropirā erā dorecūrāre aīgāri, omasiariñe mera pūtāpi apigāñorā Pedro waburi mague erāre. Eropirā dorecūrāre ōarā wacū gamerā Pedro erāre īgū ñapeocū gameñorā erā aīgānirāpū. Erāre īgū ñapeobiricū Pedro erā weca īgū watī merejariñe dihtare gameñorā erā. Iri dihtare gameñorā erā erā ōarā waboro dopa. <sup>16</sup> Eropirā Jerusalén pohro arīri macari majarā sã, dorecūrāre, watēa ñajasūnirā sãre aīgāriñorā. Eropirā erā arīpehrerā erā dūpū ōaro wañorā.

*Oparāpū Jesu īgū apinirāre ñero iidoreñorā*

<sup>17</sup> Īgū eropa iicū iarā pahia opū, īgū mera majarā mera Pedro sãre peyocūpū. Pahia opū mera majarā saduceo masa arīñorā. <sup>18</sup> Pedro sã iirare peerā erā guatarirā Jesu īgū apinirāre ñehadore, peresu iīñorā. <sup>19</sup> Eropiira puhūri iri ñami ta Goāmū Īgū anyu pāgūpū erāre peresugue arīrāre. Tuhajanugu erāre wiriridore ōpa arī wererū anyu:

<sup>20</sup> —Goāmū wihigue waque. Iri wihigue arīrā Goāmū masare īgū tauburire, iri ōari buherire wereque masare, arīpū anyu erāre.

<sup>21</sup> Īgū eroparīcū peerā ñamigā ñari Goāmū ya wihigue ñaja, masare buheñorā erā.

Irinū ta pahia opū, īgū mera majarā, Israe masa oparā mera gamenere, Jesu īgū apinirāre peresugue arīrāre aīgāridoreripū surara oparāre. <sup>22</sup> Eropirā surara oparā peresugue doarāpūre aīgārirā wariñorā. Erāre bocabiriñorā. Bocabiri dujaa wañorā daja. <sup>23</sup> Dujaja wereñorā erā oparāre.

—Peresugue arīri disiporori bihara disiporori āhrabū. Eropirā erā iri disiporori pohro peresu iinirāre corerā niguiama. Eropā iabū gūa. Eropirā gūa disiporore pāgūcū, masa marabū, arī wereñorā erā.

<sup>24</sup> Erā eroparīcū peerā, surara Goāmū wihire corenirā opū, pahia oparā mera irire pee ūca wa, “¿Dohpa waha ojogorocūrācuri erā eropa iirā?” arī pepiñorā erā. <sup>25</sup> Eropigū erā pohrogue gajigū ahri, erāre wererū.

—Maa peresu iinirā Goāmū wihigue āhrama. Īarā waque bu. Iri wihigue masare buherā iama erā, arī wererū.

<sup>26</sup> Īḡu eroparīcū pee, surara opu, Īḡu surara mera waha, Jesu Īḡu apinirāre dipaturi ñeagāriñorā daja. Eropa ñearā erāre surara turibiriñorā. Eropirā erāre pabonirā árīquererā, masare güirā pabiriñorā erāre. “Oāre mari pacū gajirā masapu utā mera dearācoma marire,” arī pepiñorā erā surarapu. <sup>27</sup> Eropirā erāre aīgāri, oparā core duhudoboñorā erāre. Erā eropa aī eraa dohocū pahia opu erāre turipu.

<sup>28</sup> —Muare gua weretuhabu. Jesu yare buhebiricāque, arīrabu gua muare. Gua eropa arīquerecū ta muapu árīpehrerā Jerusalén majarāre buhea mua. Jesu Īḡu sīrira waja, guare dipuwajacucū iidiarā iica mua, arīpu pahia opu.

<sup>29</sup> Īḡu eroparīcū peegu Pedropu gajirā Jesu Īḡu apinirā mera yuhripu.

—Goāmu Īḡu dorerapure iimuhtarāra. Eropirā puhru Goāmu gamecū masa erā dorerire iirāra. <sup>30</sup> Goāmu mari acawererā iribojegue majarā opu Jesure masudi árīmi. Īḡu ta āhrimi mua crusague pabia wejēdigu. <sup>31</sup> Jesure masura puhru Goāmu Īḡure “Ōagu āhrimi,” arī, Īḡu diayepu doadoremi Jesure Īḡu Pagupu. Eropigu Jesu masa opu, masare masugu árīḡu, Israe masare erā ñeri iirare bujawererā árīdoregu, erā ñerire cóādiami Jesu. <sup>32</sup> Eropirā guapu Jesu Īḡu iirare ĩanirā árīrā irire werea gua. Espiritu Santo irire ĩhmuḡu árīḡu weremi Īḡu sā. Īḡure Espiritu Santore Goāmu obeoami. Árīpehrerā Goāmu dorerire iirāre Īḡu Espiritu Santore ohomi, arī werepu erāre.

<sup>33</sup> Īḡu eroparīcū peerā oparāpu guatariacāñorā. Eropirā erā Jesu Īḡu apinirāre wejēdiariñorā. <sup>34</sup> Irisubure erore Gamalie fariseo masu ero árīḡu erāre wejēdoregu iibiripu. Īḡu oparā mera majagu, dorerire buhegu Īḡu árīcū, masa erā umupeogu árīpu. Eropigu Īḡu Jesu Īḡu apinirāre merogā coredoregu gajipugue erāre aīgādorepu surarare. <sup>35</sup> Erā eropa aīgāra puhru Īḡupu werepu masare.

—Mua Israe masa, oāre mua iiburire ōaro pepique muague wejēri arīrā. <sup>36</sup> Guñaque Teuda mūrure. Īḡu, Īḡu basi “Masare tarinugagu āhraa yahu,” arīmi masare. Eropirā masa bajarā cuatrocientos masa Īḡu mera majarā dujama. Eropirā gajirāpu Īḡure wejēnirā árīma. Īḡu sīricū ĩha Īḡu buherire buhenirāpu wasiria wanirā árīma. Eropirā erā dohpaguere marima. <sup>37</sup> Puhru masare erā queorisubu árīcū Galilea majagu Juda waīcugu masare Īḡu buhecū Īḡu mera masa bajarā dujama. Īḡu sā sīria wadi árīmi. Eropii Īḡu yarā árīpehrerā wasiria wanirā árīma erā sā. <sup>38</sup> Eroparīḡu dohpaguere muare ire arīḡu iiaa. Eropa ĩacāque oāre Jesu yare wererāre. Eropii i buheri oā erā ya buheri Goāmu ya buheri árībiro, pehrea waroca. <sup>39</sup> Goāmu ya buheripu árīro, ne pehreesome. I buheri Goāmu ya árīcū ne ire ne dederecū ĩmasibea mua. Mua ire dederecū iidiarā Goāmu mera gamequeārā iiboca mua, arīpu Gamalie erāre.

Īḡu eropa arī werecū peerā, “Diaye ta āhraa,” arī, peeñorā oparā. <sup>40</sup> Eropirā erā Jesu apinirāre sihubeo, erā eracū ĩarā erāre tārañorā. “Jesu yare buhebiricāque mua,” arītuhaja, erāre wadoreñorā.

<sup>41</sup> Eropa wadorecū peerā erā oparā pohrogue árīnirā waha wañorā. Jesu ya árīburire ñero tarirā burigā mucubiriñorā Jesu Īḡu apinirā.

42 Eropirã umuri nucu erã ya wirigue, Goãmũ wihigue sãre Jesucristo yare buhe weremuriñorã erã.

## 6

### *Siete itamumorãre beyeñorã Jesu yarã*

<sup>1</sup> Irinũre Jesure umupeorã bajarã wañorã. Eropirã griego masa judio masa mera gameturiñorã erã Jesu yarã dihta árĩquererã. Griego masa wapeweyarã nomere umuri nucu erã barire ðaro erã guerebircũ ïarã judio masare turiñorã. <sup>2</sup> Eropirã Jesu igũ apinirã, docerũ Jesure umupeorãre árĩpehrerãre erã pohrogue sihubeo, ðpa arĩ wereñorã:

—Gua Goãmũ yare buherã ãhraa gua. Barire gueremorãno árĩbeaa gua. <sup>3</sup> Eropirã mua gua acawererã, siete umare, gajirã “Ëarã,” erã arĩrãre, Espĩritu Santo oparãre amaque. Erãpũre barire gueredoreque mua. <sup>4</sup> Eropirã guapũ umuri nucu Goãmũre serẽ Goãmũ yare buherãca, arĩñorã Jesu apinirã erã Jesure umupeorãre.

<sup>5</sup> Erã eroparĩcũ peerã, “Aũ, eropa ta iirã,” arĩñorã erã árĩpehrerã Jesure umupeorã. Eropirã Estebanre Cristore umupeogure, Espĩritu Santo turarire wũaro opagure beyeñorã erã. Gajirã sãre beyeñorã. Felipere, Prócorore, Nicanore, Timore, Parmenare, Nicolare bari gueremorãre beyeñorã erã. Nicolapũ judio masũ árĩbigũ Antioquía majagũ judio masa buherire gamegũ erã mera ñajadigũ árĩpũ. <sup>6</sup> Erã beyenirãre Jesu igũ apinirã pohro aĩ erañorã gajirã Jesu yarãpũ. Erã eropa aĩ eracũ ïarã erã Goãmũre serẽbasañorã. Eropirã erã beyenirã weca erã mojotorire duhpeoñorã Goãmũ turarire orã.

<sup>7</sup> Eropirã iri yeba majarã Goãmũ yare masipehrenijarã iĩñorã. Eropirã Jerusalengue árĩrã Jesure umupeorã bajarã wanemoñorã daja. Eropirã pahia sã bajarã Jesu yarã wañorã.

### *Gajirã Estebanre ñeañorã*

<sup>8</sup> Eropigũ Esteban Goãmũ turarire opagũ árĩpũ. Igũ Goãmũ ðaro iigũ árĩpũ. Eropigũ igũ Goãmũ turarĩ mera deyoro moarire ii ïhmupũ masa erã ïaro. <sup>9</sup> Judio masa erã buheri wihi majarã igũre ïhaturiñorã. Eropirã igũ mera game ðuyasonũgañorã. Erã Liberto waĩcurã árĩñorã. Eropirã erã Cirene majarã, Alejandría majarã, Cilicia majarã, Asia majarã mera bajarã árĩñorã erã Esteban mera ðuyasorã. <sup>10</sup> Esteban masigũ dopa ta, Espĩritu Santore wũaro opagũ ta igũ wereniguicũ peerã erã yujuro bojebiriñorã igũre. <sup>11</sup> Eropa yujuro bojebirã erã gajirãre ahma guyardore, wajayeñorã erãre. Erã eropa guyardorecũ ðpa arĩ weresãñorã erã Estebanre:

—Ihĩ Goãmũre igũ ñero wereniguicũ, Moiserẽ igũ ñero wereniguicũ sãre gua peeabũ, arĩ weresãriñorã erã guyarãpũ gajirãre.

<sup>12</sup> Erã eroparĩcũ peerã masa, judio masa buherã, murã sã igũ mera guañorã. Eropirã erã Estebanre ñeha erã oparã pohro aĩgãñorã igũre. <sup>13-14</sup> Eropirã erã gajirãre guyanemodoreñorã. Õpa arĩñorã erãpũ:

—Ihĩ umuri nucu Goãmũ wihire, igũ doreri sãre ñero wereniguigũ ãhrimi. Peeabũ gua igũre igũ ðpa arĩcũ. “Jesu Nazare majagũ Goãmũ wihire cõagucumi. Eropigũ igũ Moise dorerare marire igũ wererare gohrotogucumi Jesu,” arãmi Esteban gua peecũ, arĩ guya weresãriñorã erã. <sup>15</sup> Eropirã árĩpehrerã ero doarã Estebanre ðaro ïhamehtu, igũ diapore ïañorã erã. Anyu iro dopa deyoyoro igũ diapo.

## 7

*Esteban Jesu yare wererę*

<sup>1</sup> Eropii pahia opę serępipę Estebanre.

—¿Oã erã arĩri diaye ta áhriri? arĩ serępipę ĩęu Estebanre. <sup>2</sup> ĩęu eroparıcũ peegę, Estebanpę erãre õpa arĩ wererę:

—Acawererã, murã, gęa pagę sęmarã, peeque. Abrahã mari ñecu męra iribojegue majagę Mesopotamiague ĩęu árĩcũ, Harángue ĩęu árĩboro core, Goãmę turagę gosesiriro dopa ĩęure Abrahãre dehyoañumi. <sup>3</sup> Eropã dehyoagę Goãmę wereñumi ĩęure. “Mę ya yebare mę acawererã mera árĩbircãque. Eropigę gajĩ yebague waque. Mę eropa wacũ męre iri yebare ĩhmugęra yęhę,” arĩpę Goãmę Abrahãre. <sup>4</sup> ĩęu eroparıcũ peegę Abrahã sã Caldea majarã ya yeba árĩrã wañuma. Pę Harángue ejañuma. Erogue eja árĩñuma. Eropigę ĩęu pagę ĩęu sĩrira pęhrę i yeba dohpague męa árĩri yeba Goãmę ta árĩdoreñumi Abrahãre. <sup>5</sup> ĩęure eropa árĩdorequeregę Goãmę Abrahã ĩęu árĩri yebare õaro gohra apibirimęriniñumi ĩęure. Ne merogã apibiriniñumi. Eropigę Abrahã ĩęu porã marigę árĩquerecũ ta Goãmępę ĩęure õpa arĩ wereñumi. “Męre mę pãramerã gajĩ turi majarãguere i yebare ogęra,” arĩñumi Goãmę Abrahãre. <sup>6</sup> Eropã arĩęu ta õpa arĩ werenemoñumi Goãmę Abrahãre. “Mę pãramerã gajĩ turi majarãgue gajĩ yebague waha, erogue gajirã pohro árĩrã erã pohro majarã árĩrãcoma erã. Eropirã cuatrocientos bojori gohra ero majarã ñero iirãcoma mę pãramerã arĩturiarãguere. <sup>7</sup> Eropigę ero majarãre erã eropa iira waja dipuwaja moagęra yęhę. Yęhę eropiira pęhrę mę pãramerã i yeba erarãcoma daja. Eropirã i yeba yę dorerire iirãcoma erã,” arĩñumi Goãmę Abrahãre. <sup>8</sup> Eropã arĩęu Goãmę “Yę arĩdoro dopa ta iigęra,” arĩęu Abrahã ĩęu guñaburire õpa apiñumi ĩęure. Merogã gasirogãre ĩęu dępęre wiri aĩdoreñumi ĩęure, ĩęu eropa arĩ wereraguere guñadoregę. Eropiira pęhrę Abrahã Isaare porãcũñumi. Ocho nęri pęhrę merogã gasirogãre wiri aĩñumi Isaa dępę sãre. Pęhrę Isaa Jacobore ĩęu porãcęra pęhrę wiri aĩñumi ĩęu dępę sãre. Eropigę Jacobo doce gohra porãcũñumi. Erã docepę mari cururi nęcę oparãgue árĩmęriñuma.

<sup>9</sup> “Eropirã erã Jacobo porã mari ñecu sęmarã męra Josere erã pagę magęre peyocęmęriñuma. ĩęure cohã, duacãñuma Egiptogue warãre. Eropigę Josere Goãmę itamumęriñumi. <sup>10</sup> ĩęu ñero taricũ ĩagę Goãmę ĩęure itamumęriñumi. ĩęu eropa itamucũ Josępę õaro pee masigę wañumi. Eropigę faraõ Egipto majagę opępę Josere ĩęu gamecũ iĩñumi Goãmępę. ĩęu eropiicũ faraõpę Josere Egipto majagę opę, ĩęu ya wihi majagę opę apiñumi.

<sup>11</sup> “Eropii irisubure ta Egiptogue, Canaa waĩcęri yeba sã ne deco aribiriyoro. Eropirã ero majarã ñero tariñuma. Eropirã Canaague árĩrã Jacobo porã mari ñecu sęmarã męra bari bocabirimęriñuma. <sup>12</sup> Eropigę Egiptogue trigo árĩcũ peegę, Jacobo ĩęu porãre erogue bari asũdoregę ne obeogę iĩñumi. <sup>13</sup> Pęhrę Egiptogue erã ejacũ Josę ĩęu tĩrãre wereñumi. “Męa pagę magę ta áhrra yęhę,” arĩñumi erãre. Eropigę Josę acawererãre ne ĩagę iĩñumi opę faraõ waĩcęgę. <sup>14</sup> Pęhrę Josę ĩęu tĩrãre erã pagę Jacobore sihudoregę obeoñumi. ĩęu acawererã setenta y cinco masa árĩñuma irisubu. <sup>15</sup> ĩęu magę ĩęu



sihubeocũ peegu Jacobo Egiptogue wañumi ñgu magu pohrogue. Ñgu magu pohro añri, puhru síria wañumi pare. Eropirã ñgu porã mari ñecu sumará mura erogue síripehrea wañuma erã sã. <sup>16</sup> Eropirã Siquẽ waïcari yebague erã ñupure aĩ, masa goberigüe seatuha yaañuma erã ñupure. Abrahã ñgu asũra yebague árĩyoro iri yeba erãre yaara yeba. Ero core Abrahã iri yebare Hamor porãre asũyuñumi niyeru mera.

<sup>17</sup> Eropigu Goãmu Abrahãre “I yebare ogura mure,” arĩmuriñumi. “Iri yebare ogura,” ñgu arĩrasubu ejacũ Abrahã pãramerã Israe masa bajarã masa wañuma. Egiptogue árĩñuma. <sup>18</sup> Egipto yeba erã árĩnicũ, gajigu opu ñajañumi. Eropigu ñgu opu opu José murure masibiriñumi. <sup>19</sup> Eropigu ñgu mari acawererãre ñero iidia, erã porãre wejẽdia, erã porãre wejẽ cóacãdoreñumi erãre. Eropigu mari ñecu sumarãre ñero iĩñumi opu faraõpu. <sup>20</sup> Ñgu eropiiirusubu Moise árĩbupu masa dehyoañumi. Ñgu õagu, Goãmu õaro ñhasuagu arĩmuriñumi. Eropirã ñgu pagu sumará urerã abe gohra õaro ñhadibuñuma ñguãre. <sup>21</sup> Moiserẽ dibunemomasibiricũ ñgure erã cóara puhru opu mago ñgure boca aĩ majaa, igo magu iro dopa ta dibuñumo ñgure. <sup>22</sup> Eropirã Egipto majarã õaro masirã yare buheñuma Moiserẽ. Eropigu güiro mariro wereniguigu opu iro dopa iigu árĩñumi Moise.

<sup>23</sup> “Eropigu Moise cuarenta bojori ñgu opaboro core ñgu acawererãre Israe masare ñadiagu erã pohrogue curigu wañumi. <sup>24</sup> Eropa curigu ejagu Egipto majagu Moise acaweregure ñgu ñero iicũ Moise ñañumi. Eropa ñagu ñgu acaweregure itamuñumi Moise. Ñgu acaweregure itamugu Egipto majagupure pa wejẽcãñumi ñgu. <sup>25</sup> Eropirgu Moise õpa arĩ pepiriñumi. Yu acawererã erã acaweregure yu itamucũ ñarã, ‘Goãmu marire õaro taricũ iidoregu obeoñumi ñre,’ yu acawererã yure arĩ pepirãcoma,” arĩ pepiriñumi Moise. Erãpu ne eropa pepibiriñuma. <sup>26</sup> Gajinu Moise ñgu acawererãre perã erã basi gamequeãrãre ñapu. Eropigu ñgu erãre bosariñumi. “¿Mua basi árĩquererã gamequeãri mua?” arĩñumi Moise erãre. <sup>27</sup> Ñgu eroparicũ peegu yujugu ñgu acaweregure ñero iigu Moiserẽ tuubeoñumi. “Mũhu gua opu árĩbeaa. Guare doregu árĩbeaa mũhu. <sup>28</sup> ¿Carũre Egipto majagure mu wejẽdiro dopa ta yu sãre wejẽdiagu iiri mũhu?” arĩñumi ñgu Moiserẽ. <sup>29</sup> Ñgu eroparicũ pee uca wa Moise oma duhriã waha wapũ. Madián waïcari yebague waha wañumi. Erogue nomeore boca perã porãcũñumi.

<sup>30</sup> “Eropii Moise cuarenta bojori gohra ero ñgu arĩra puhru Sinaí waïcudigu utãgu pohro masa marirogue ñgu árĩcũ anyu ñgure dehyoañumi. <sup>31</sup> Eropa irigugã ñjucũ ñagu Moise ñha uca wañumi. Iri peamere pohrogã õaro ñgu ñagu wacũ gohra Goãmu ñgure wereñumi. <sup>32</sup> “Goãmu añraa yũhu. Mu ñecu sumará, Abrahã, Isaa, Jacobo erã Goãmu añraa yũhu,” arĩñumi Goãmu Moiserẽ. Ñgu eroparicũ peegu Moiserũ naragãñumi. Ne ñha wahgũbiriñumi. <sup>33</sup> Eropigu Goãmu wereñumi ñgure. “Dohparagã yu pohro niguigu iiaa mũhu. Eropigu guhyadiaro mera mu zapature tuweaque. <sup>34</sup> Yaharã masa Egiptogue erã ñero taricũ ñabũ. Erã síwererire peeabũ. Eropigu erãre itamugu ahrãbe. Erã eropa wacũ ñagu waque mu sã. Egiptogue mure obeogura erãre itamudoregu,” arĩñumi Goãmu Moiserẽ.

<sup>35</sup> “Erãpu mari acawererã Israe masa Moiserẽ gamebirituhajañuma. “Mũhu gua opu árĩbeaa. Mũhu guare doregu árĩbeaa,” Moiserẽ

eropa arĩrã gamebirã iituhajañuma. Eropa erã Moisere gamebiri-  
querecũ Goãmũ ĩgũre Egiptogue oboeñumi mari acawererãre, Israe  
masare itamubure, erãre dorebure. ĩgũ eropa oboegũ anyupũre  
ĩgũre yucũgũgũ dehyoadigure itamudoreñumi ĩgũre. <sup>36</sup> Moise ta  
mari acawererãre Israe masare Egiptogue árĩrãre wiudigũ árĩñumi.  
Eropigũ Egiptogue eja, ihĩ Moise Goãmũ turari mera ii ĩhmunũgañumi.  
Eropigũ wũariya diariyague eropa ta iiñumi daja. Pũhrũguere  
masa marirogue sãre cuarenta bojori gohra Goãmũ turari mera  
deyoro moarire ii ĩhmumũriñumi ĩgũ erãre. <sup>37</sup> Ihĩ Moisepũ mari  
acawererãre Israe masare weremũriñumi. “Yũ iro dopa ta Goãmũ  
yare weremũhtabure Goãmũ oboegũcumĩ. Eropigũ ĩgũ mũa mera  
majagũ mũa acaweregũ árĩgũcumĩ. ĩgũ eropa eracũ ĩgũre ðaro  
peeque mũa,” arĩmũriñumi Moise erãre. <sup>38</sup> Moise masa marirogue  
mari acawererã Israe masa mera árĩmũriñumi. Eropigũ mari ñecu  
sumarã iribojegue majarã mera árĩñumi ĩgũ. Eropa árĩgũ Sinaĩ  
waĩcũdigũ utãgũgũgũ ĩgũre weredigũ anyu mera árĩñumi. Eroque  
Goãmũ ĩgũ dorerire aĩdigũ árĩñumi Moise.

<sup>39-40</sup> “Iri dorerire utãgũgũgũ Moise waha aĩrisubu mari ñecu sumarã  
mũra Egiptogue dujadarã Moisere tarinũgañuma. Erã ĩgũre game-  
biriñuma. Eropa gamebirã Aarõre Moise tĩgũre ðpa arĩñuma: “¿ĩgũ  
Moise marire Egiptogue aĩgãridi dohpa wayuri ĩgũ? Masibirica  
mari. Eropigũ goãmarã wéanirãre iique mari yarã árĩmorã. Eropirã  
mũ wéanirã marire doreri mari wadiari maha marire aĩgãrãcoma,”  
arĩñuma erã. <sup>41</sup> Eropa arĩra pũhrũ erã wecũre oro mera wéañuma.  
Eropa iituhaja, erã waimũrãre wejẽ, erã wéadigũ pohro aĩgãri  
umupeoñuma ĩgũre. Eropirã erã erã iĩdigũre wecũre ĩarã, mucubiri,  
bosenu iĩñuma. <sup>42</sup> Eropigũ Goãmũ erã wéadigũre erã umupecũ ĩagũ,  
erãre cóãcãriñumi. “Erã yũre cóãrã gajirã umaro majarãpũre umupeco  
curaporo,” arĩgũ cohãgã wariñumi. Goãmũ yare weremũhtanirã ðpa  
arĩ gojañuma Goãmũ werenĩguirire:

Mũa Israe masa, yũre ñe ñero iĩabũ. Masa marirogue cuarenta  
bojori gohra árĩrã waimũrãre mũa wejẽnirãre mũa soenirãre  
yũre mũa obodiro dopa ta umupecorabũ mũa. Eropirã yũpũre  
umupecobirabũ mũa. <sup>43</sup> Eropirã mũa Molo waĩcũgũre umupecorã  
árĩrã, ĩgũre umupecori wihire iĩabũ mũa. Eropirã “Refa gũa goãmũ  
ãhrimi,” arĩrã ĩgũ necãmũ mũa wéadigũre mũa umupecoabũ daja.  
Erã wéanirãre mũa iĩnirãre mũa umupecoabũ. Mũa eropa iira waja  
mũare Babilonia sipũgue cóãbeogũra yũhũ, arĩñumi Goãmũ ĩgũ ya  
weremũhtanirã mera.

<sup>44</sup> “Eropirã masa marirogue Goãmũ masa mera ĩgũ árĩri wihire  
waimũrã gasiri wihire opamũriñuma mari ñecu sumarã iribojegue  
majarã. Iri wihĩ Goãmũ masa mera ĩgũ werenĩguiri wihĩ árĩyoro.  
Iri wihĩgũ Goãmũ dorerire ĩgũ gojara mijiri utã mijiri árĩyoro. Iri  
wihire Goãmũ ĩgũ werediro dopa ta Moisere ĩgũ ĩhmũdiro dopa ta  
ii ĩhacũdoreñumi Goãmũ Moisere. <sup>45</sup> Pũhrũgue majarã mari ñecu  
sumarã Josué mera iri wihire aĩgãriñuma mari árĩri yebague erarã.  
Erã iri yebagũre Goãmũ ĩgũ apira yebagũre erã eraboro core iri yeba  
majarã mũrãre Goãmũ cóãcãñumi. Irisubure Goãmũre umupecori  
wihire waimũrã gasiri wihire opamũriñuma mari ñecu sumarã. Ne  
Davi mũrũ ĩgũ árĩcũgũre opatuñuma iri wihire. <sup>46</sup> Eropigũ Davi

muru Goãmure mucubiricũ iĩñumi. Eropigu Goãmũ ya wihi árĩburire iidiagu Davipu sereriñumi Goãmure. <sup>47</sup> Īgu eropa serēquerecũ ta Salomopũ Davi magupũ Goãmũ ya wihire iĩñumi. <sup>48</sup> Īgu eropa iiquerecũ ta Goãmupũ masa erã iira wihiguere árĩbeami. Ōpa arĩñumi Goãmũ wereniguirire weremũhtadigu:

<sup>49</sup> Ūmarogue yũ doaro āhraa. Ero doagu dorea yũhũ. Eropiro yebapũ yũ guburire duhpeoro iro dopa ta āhraa. Yũhũ turatariagu āhraa. Yaha wihi árĩborore iimasibea mũa. Goãmũ yũ árĩcũ yũ árĩburi wihire mũa iimasibea. <sup>50</sup> Yũ basi i yebare árĩpehrero iabũ yũhũ, arĩmi Goãmũ, arĩ gojañumi Goãmũ yare weremũhtadigu, arĩpũ Esteban.

<sup>51</sup> Eropigu ōpa werenemopũ Esteban erãre:

—Mũa ne yũhridibirã āhraa. Goãmũ yare peequererã, ĩgure yũhridiabeaa. Espĩritu Santore tarinũgataria mũa. Mũa ñecũ sũmarã erã iidiro dopa ta iiaa mũa. <sup>52</sup> Mũa ñecũ sũmarã árĩpehrerã Goãmũ ya weremũhtanirãre ñero iĩñuma. Erã Goãmũ yare weremũhtanirãpũ “Pũhrũ ōagu Goãmũ yare weremũhtagũ arigucumi,” arĩ erã wererã árĩcũ peeñuma mũa ñecũ sũmarã mũa. Eropa arĩ werenirã mũrare wejẽmuriñuma. Eropirã “Ōagu,” erã arĩgure mũa sã dohpaguere ĩgu ya curu majarã árĩquererã ta ĩgure wejẽabũ. <sup>53</sup> Goãmũ dorerire anyuapũ wereriñuma mũare. Eropirã mũa iri dorerire opariyoro. Eropirã iri dorerire tarinũgabũ mũa, arĩ wereniguitupũ pare Esteban.

*Erã Estebanre utãyeri mera dea wejẽñorã*

<sup>54</sup> Īgu eroparĩcũ peerã erãpũ burigã guañorã. Eropa turaro guarã, gũhyarã wañorã. <sup>55</sup> Erã eropa guaquerecũ ta ĩgu Espĩritu Santo ĩgu dorero dopa ta iipehogũ árĩgu, ĩgu turarire ōaro opagu árĩgu, ūmarogue ĩhamemuju Goãmũ gosesiririre ĩapũ Esteban. Jesu Goãmũ diayerũ ĩgu niguicũ ĩapũ ĩgu. <sup>56</sup> Eropa ĩagu ōpa arĩpũ

—Ūmarogue merogã ero tuweamaacũ Jesu Goãmũ obeodigu Goãmũ diayerũ ĩgu niguicũ ĩhaa yũhũ, arĩpũ Esteban.

<sup>57</sup> Īgu eroparĩcũ peerã ta erã burigã gaguinigui, erã gamirire bihacã, yujuro mera ĩgu pohrogue omagã, ĩgure ñeañorã. <sup>58</sup> Ñehatuhaja, ĩgure aĩgã, iri maca tũro pohrogue cóañorã ĩgure. Eropirã utãyeri mera dea wejẽcãñorã erã ĩgure. Erã eropa wejẽboro core ĩgure utãyeri mera deamorã erã weca maja suhrĩre tuwea, mamũre Saulo waĩcũgure iri suhrĩre opabasadoreñorã erã.

<sup>59</sup> Eropigu Esteban erã ĩgure utãyeri mera dea wejẽrisubu ōpa arĩpũ.

—Jesu yũ Opũ, yũ sĩporãre aĩque, arĩpu.

<sup>60</sup> Eropigu ĩgu mereja ōpa arĩpũ:

—Opũ Jesu, oã dohpague ñero erã yũre iirire erãre dipuwaja moabita mũhũ, arĩpũ Esteban.

Eropa arĩtuhajagu ta sĩria wapũ ĩgu.

## 8

<sup>1</sup> Eropigu Esteban ĩgu sĩricũ ĩagu, “Ōhaa,” arĩpũ Saulo.

*Saulopũ Jesu yarãre ñero iipũ*

Eropirã irinũre ta Jesu yarãre Jerusalengue árĩrãre ñero iinũgañorã Jesure gamebirãpũ. Erã eropa ñero iicũ Jesu yarã Judea yebague,

Samaria yebague yoarogue duhrisirigā wañorā. Jesu ĩḡu apinirā dihta wabiriñorā. <sup>2</sup> Eropirā gajirā Goāmure umupeorā Esteban dũpũ m̄rarore yaa, bũrigā oreñorā erā. <sup>3</sup> Saulopũ Jesu yarāre ñetariaro iimũriripũ. ĩḡu erā ya wirigũe ñaja, umare, nomere ñeha, peresugue bihadobomũriipũ.

*Samariague Jesu yare buhepũ Felipe*

<sup>4</sup> Eropirā yoarogue wasirininirā Jesu yarāpũ Jesu yare buheñorā. <sup>5</sup> Eropigũ Felipe Samaria waĩcũri macague eja, Jesu yare buhepũ iri maca majarāre. <sup>6</sup> ĩḡu eropa buhecũ ero majarā ðaro peeñorā. Eropirā Goāmũ turari mera deyro moarire ĩḡu ii ĩhmucũ ĩañorā erā. Eropa ĩarā ĩḡure ðaro peeñorā erā. <sup>7</sup> Bajarā watēa ñajasũnirāre ĩḡu pohro erā eracũ ĩagũ watēapũre wadorepũ ĩḡu. Watēapũ bũrigā gaguĩngui, duhugā waha wañorā erāre. Eropigũ bajarā dũpũ bũhanirāre, curimasibirāre dũpũ ðarā iimũriipũ. <sup>8</sup> ĩḡu eropa iicũ ĩarā iri maca majarā bajarā masa mucubiriñorā.

<sup>9</sup> Irisubure Simo waĩcũḡu iri maca majagũ yee arĩpũ, Eropigũ yeea erā iirare ii ĩhmumũriipũ Samaria majarāre. ĩḡu eropa ii ĩhmucũ ero majarā ĩha uca wa ĩḡure ḡũhyadiaro mera ĩarā arĩñorā.

—Yũhũ masipehogũ āhraa, arĩpũ Simopũ erāre.

<sup>10</sup> ĩḡu eropa iicũ ĩarā masapũ ðpa arĩmũriiriñorā:

—Īhĩ Goāmũ ya turari opagũ āhrimi. Goāmũ iro dopa turagũ āhrimi, arĩmũriiriñorā masa erā oparā mera. Erā arĩpehrerā ðaro peeñorā ĩḡure.

<sup>11</sup> ĩḡu yeea erā iiri ĩḡu purisiriri mera yoari boje ii ĩhmumũriipũ erāre. ĩḡu eropa ii ĩhmucũ ĩarā erā uca wamũriñorā. Eropirā erā ĩḡure umupeomũriñorā. <sup>12</sup> Felipepũ erā ĩḡure eropa umupeoquerecũ Goāmũ ĩḡu opũ arĩrire, Jesucristo yare ðari buherire werepũ. ĩḡu eropa werecũ erā ĩḡure ðaro peeñorā. Erā eropa ðaro peecũ ĩagũ ũma, nome mera waĩyerũ Felipe. <sup>13</sup> Eropigũ Simo ĩḡu yee sã Felipe ðaro peepũ. Eropigũ ĩḡu sãre waĩyerũ. ĩḡu eropa iira pũhrũ Felipe mera dujapũ ĩḡu. Felipepũ Goāmũ turari mera ii ĩhmucũ ĩagũ, dorecurā ðarā ĩḡu iicũ ĩagũ Simo ĩha uca wamũriipũ.

<sup>14</sup> Eropirā Samaria majarā Goāmũ yare erā bũrigā gamecũ peebeomũriñorā Jerusalengue arĩrā Jesu ĩḡu apinirāpũ. Erā eropa peebeorā Pedrorẽ, Ñũ sãre obeoñorā Samariague. <sup>15</sup> Erogue erā ejara pũhrũ Pedro sã Goāmure serēbasañorā. “Oã Samaria majarā m̄re umupeorā m̄ Espĩritu Santore opaporo,” arĩ, serēbasañorā erā Goāmure. <sup>16</sup> Erā Samaria majarā Jesucristo waĩ mera waĩyesũnirā arĩñorā. Iri dihtare masiñorā erā. Eropirā Espĩritu Santore opabiriniñorā dohpa. <sup>17</sup> Eropigũ Pedro Ñũ mera Samaria majarāre erā mojotorire erā weca duhpeora pũhrũ Espĩritu Santore opanũgañorā erā.

<sup>18</sup> Eropigũ Pedro sã erā ya mojotori mera erā duhpeora pũhrũ Espĩritu Santo eracũ ĩapũ Simo yeepũ. Eropa ĩagũ arĩḡu, erā turarire gameḡu niyeru mera wajayediariipũ. <sup>19</sup> Òpa arĩripũ Simo:

—Yũ sãre oque i turarire. Yũ sã yũ mojotori mera masa weca duhpeodiaca Espĩritu Santore erā ñeaboro dopa. Eropigũ i yũ iiburi wajare wajayediaa, arĩripũ Simo erāre.

20 Īḡu eroparīcū peegu Pedro ōpa arīpū.

—Mū niyeru mera Goāmū ya turarire mū asūdiara waja mū niyeru mera ta peamegue waque mūhū. 21 Goāmū mū pepirire masimi. Mūhū ñegu árīnia. Eropirḡu ire ḡua iirire iimasibea mūhū. I mū iirino árībeaa. 22-23 Buriḡā peyocua mūhū. Eropiḡu mū ñeri iirire ne duhumasibea mūhū. Eropiḡu ire mūhū ñero iirare bujawereque mūhū. Goāmure mū ñero pepirire ero diaye ta serēque mūhū. Mūhū eropa iicū ĩaḡu ĩḡu mū ñerire cādijibocumi, arī werepū Pedro ĩḡure.

24 Īḡu eroparīcū peegu Simo yūhripū ĩḡure.

—Yure serēbasaque mūa Goāmure mū arīdiro dopa yū wabiriboro dopa. Iri waja peamegue wadiabeaa yūhū, arīpū Simo ĩḡure.

25 Ero pūhrū Pedro Ńu mera Goāmū yare wereñorā. “Jesu ĩḡu masa mūriacū ĩabu ḡua,” arī, Samaria yeba árīri macari majarāre ōari buherire buheñorā. Erāre Goāmū yare buhetuhaja Jerusaléngue dujaa wañorā.

### *Felipe Etiopía yeba majagure buherpū*

26 Eropii Goāmū ĩḡu obeodigū anyu Felipere werepū:

—Dohpaguere ōdoca surgue waque. Jerusalén pohro árīri mague Gazague warī mague waque, arī werepū anyu Felipere. Iri maha masa marirogue árīyoro.

27 Īḡu eroparīcū peegu ĩḡupū iri mague waha wapū. Pūhrū iri mague yujugū masure bocatīribu iipū. ĩḡu bocatīribu árīpū Etiopía yeba majagū opu. Eropiḡu Candace waĩcūgo Etiopía majago opo būro yare niyerure árīpehrerire ĩhadibugū árīpū. Eropiḡu ĩḡu Jerusaléngue mari Pagure umupeogu ejadi árīpū. 28 ĩḡu ya macague tūrudiru mera dujaagu irirugue waquereḡu ta buheḡu iipū. Goāmū yare weremuhtadigū Isaia ĩḡu gojarapūre buheḡu iipū.

29 Eropiḡu Espiritupū Felipere ōpa arī werepū.

—Sihī tūrudirugue wagū pohrogue waque, arīpū Espiritu Santo ĩḡure.

30 ĩḡu eroparīcū peegu, Felipepū tūrudiru pohrogue omagā, Isaia ĩḡu gojarare Etiopía majagū ĩḡu buhecū peerū. Eropa peegu Felipe serēpipū ĩḡure.

—¿Mū buherire masiri mūhū? arīpū ĩḡu.

31 ĩḡu eroparīcū peegu Etiopía majagū ōpa arī yūhripū:

—Gajigū yure weretaugū maricū ōaro masibea yūhū. Ohō yure weredoagu arique yūhū dipaba, arī yūhripū ĩḡu Felipere.

—Áu, arī, doajapū ĩḡu pohro. 32 Eropii Goāmū yare Etiopía majagū ĩḡu buheripū ōpa árīyoro:

Ovejare erā ñeha wejēdiro dopa ta ĩḡu sāre ñeha wejērācoma masa. Eropiḡu ovejagāre ĩḡu poare erā seacū ĩḡu gaguiniguibiro dopa ta ĩḡu masū sã ejari mariro árīḡucumi. 33 ĩḡure erā wereyarācoma. Eropirā ĩḡu ĩḡu ñero iibiriquerecū ta erāpū ñero iirācoma ĩḡure. ĩḡu i yebague ĩḡu árīcū erā ĩḡure wejērācoma. Eropiḡu ĩḡu porā marigū sīria wagucumi, arī gojara árīyoro.

34 Iripū eroparīcū ĩaḡu, Etiopía majagū Felipere serēpipū:

—Wereque yũre. ¿Ōpa Isaia ĩgu arĩgu nihino árĩcuri ihĩ? ¿Isaia ĩgu basi weregu iicuri? ¿O gajigũre weregu iicuri? arĩ serẽpipũ Etiopía majagu.

<sup>35</sup> ĩgu eropa serẽpi ĩacũ peegu Felipe iripũre ĩha, Jesu yare werepu Etiopía majagũre. <sup>36</sup> Eropirã erã iriru mera waha, maugãgue ejañorã.

—Īaque. Ohõ maugã åhraa. I maugãgue yũre waĩyeque, arĩpu Etiopía majagu.

<sup>37</sup> —Jesure mũhu õaro umupeocũ ĩagu mũre waĩyegũra, arĩpu Felipe ĩgũre.

—Jesure umupeoa yũhu. ĩgu Cristo Goãmu magu åhrimi. Irire õaro masia yũhu, arĩpu Etiopía majagu.

<sup>38</sup> Eropa arĩgu ta ĩgu túrudiru autugũre yaudorepu. Iriru yusũmerejara pũru wiriañorã erã. Wiria waha, iriyagãgue eja, ñumu wiri nũgajañorã. Ero ñumunũgaja, Felipepu ĩgũre waĩyerũ.

<sup>39</sup> Waĩyetuhaja erã majajanũgajacũ Goãmu ĩgu Espĩritu Felipepe aĩgã wapu. ĩgu eropa wara pũru Etiopía majagu õaro mucubirigu ĩgu ya yebague dujaa wapu. ĩgu eropa iira ujutuyacũ ne dipaturu Felipepe ĩabiripu. <sup>40</sup> Felipepu eropa iituhaja Azotogue ejarũ. Eropigu baja macarĩre õari buherire buherũ masare. Pũ Cesareague buhetumũripũ.

## 9

### *Saulo Jesucristore ĩagu ĩgũre umupeonũgapũ*

<sup>1</sup> Irisubure Saulo Jesu yarãre ĩhaturigu, “Erãre wejẽgũra,” arĩgu, ĩgu opu pohrogue wapu. <sup>2</sup> Eroque ejaqu ĩgu gojarapũrĩre serẽpu pahia opũre. Ōpa arĩpu:

—Damasco maca maja wirigue mari buheri wirigue Jesu yarãre, umare, nomere yũhu erãre bocaia, ñeha dihri, Jerusalengue aĩgarigũra. Iri wirigue árĩrãre yũ erãre ñeaburipũre paperapũre yũre goja oque, arĩ serẽpu pahia opũre.

<sup>3</sup> Iripũre aĩtuhaja, waha, ĩgu Damasco pohro ĩgu ejabu iicũ gohra umaro maja goesiri medijuyoro ĩgũre. <sup>4</sup> Eropa goesiri medijucũ ta ĩgu yebague mehmerejagu, wereniguicũ peepũ.

—Saulo, Saulo, ¿duhpigu mũhu yũre ñero iiri? arĩro cariyoro.

<sup>5</sup> —Opu, ¿nihino åhriri mũhu? arĩpu Saulo.

—Yũhu mũ ñero iigu ta åhraa arĩpu Jesu. Mũhu yũ mera guagu yũre yũhribigu, mũ basi ta ñero tariaa, arĩpu Jesu Saulore.

<sup>6</sup> ĩgu eroparĩcũ Saulo gũiri mera naragãnijagu õpa serẽpipũ:

—Opu, ¿dohpa yũhu iicũ gahmeri mũhu? arĩpu Saulo.

ĩgu eroparĩcũ õpa arĩpu Jesu ĩgũre:

—Wahgãnũgajaque mũhu. Macague waque. Iri macague ejacũ ero majagu mũ iiburire weregucumi mũre, arĩpu Jesu Saulore.

<sup>7</sup> ĩgu eroparĩcũ Saulo mera majarãpu ĩgu wereniguirĩ dihtare peẽnorã. Jesupũre ĩabiriñorã. ĩgu eropa wacũ ĩarã gũirã erã wereniguimasibiriñorã. <sup>8</sup> Eropigu Saulo yebague oyadigu wahgãnũgaja, ĩgu ĩacũ ĩgu cuiri deyobiriyoro. Eropirã erã ĩgu mojotore ñeha, Damascogue tũã wahgã wañorã erã ĩgũre. <sup>9</sup> Eropigu ĩgu uñrenũ gohra ne ĩabiri, babiri, ne ĩhribiripu.

<sup>10</sup> Eropii Jesu ĩġu buheġu Ananía waĩcuġu Damasco árĩpũ. Eropiġu Jesu dehyoapũ Ananiare. Eropa dehyoagu piyupũ ĩġure:

—Ananía, ¿ähriri? arĩpũ Jesu ĩġare.

—Åhraa yũ, arĩ yũhriřũ Ananía ĩġare.

<sup>11</sup> ĩġu eroparĩcũ Jesu ĩġure werepũ.

—Diaye waĩcũri mague waque. Eropa wagũ Juda ya wihigue Tarso majagure Saulo waĩcuġure amaque. ĩġu Goãmure serēniguigu iicumi.

<sup>12</sup> Eropiġu quēro dopa ta ĩġu ĩarare ĩagu iicumi erogueru. Őpa árĩřire ĩagu iicumi. Muħũ mu mořotore ĩġu weca duħpeo, ĩġu cuiři đaro wacũ ĩagu iicumi ĩġure dehyoarare, arĩpũ Jesu Ananiare.

<sup>13</sup> ĩġu eroparĩcũ peegu Ananiapũ őpa arĩpũ:

—Opũ, ĩġu mu yaräre đaräre Jerusalén majaräre ñero iiapũ. Bajarã masa yũre eropa arĩ wereama. <sup>14</sup> Eropiġu őre ĩġu árĩpehřerã mure umupearäre peresu iigu arigu iiapũ. Pahia oparã ĩġure eropa iidoreaňorã, arĩpũ Ananía Jesure.

<sup>15</sup> ĩġu eropa arĩquerecũ Jesupũ werepũ ĩġure.

—ĩġu Saulopũ yũ beyedigu åhřimi. ĩġu yaha buherire baja macari majaräre, oparäre, Israe masa sãre buheġucumi. <sup>16</sup> Eropiġu bajasuburi yahare ĩġu buheri waja ĩġu ñero tariguġcumi. Irire ĩġure masicũ iigũra. Eropiġu waque muħũ, arĩpũ Jesu Ananiare.

<sup>17</sup> ĩġu eropa arĩra pũhrũ Ananiapũ, waha eja, Saulo ĩġu árĩři wihigue ñaja wapũ. Ñajaja, ĩġu mořotore Saulo weca duħpeo, werepũ ĩġure:

—Acawereġu Saulo, mari Opũ Jesupũ mague mure dehyoadigu yũre obeoami mu cuiři mu ĩaboro dopa. Espĩritu Santore mu opaboro dopa, ĩġu doređiro dopa mu iiboro dopa yũre obeoami mu pohrogue, arĩ werepũ Ananía Saulore.

<sup>18</sup> ĩġu eroparĩcũ ta ĩġu cuiřire wai nutũri dopa bejarire ĩġu cuiřire cohrodijacũ ĩapũ pare Saulo. ĩġu eropa ĩatuhara pũhrũ ĩġu wahġãnuġajacũ ġajiguřũ waĩyerũ ĩġure. <sup>19</sup> Eropiġu ĩġũ, ĩġu bara pũhrũ turagu wapũ.

### *Saulo Damascogue Jesu yare buhenũġapũ*

Eropii bajamenũri Damascogue Jesu yarã mera árĩmũriřũ Saulo. <sup>20</sup> Eropiġu irisubure ta ĩġu judio masa buheri wiri árĩġũ, Jesu yare buheřũ masare. “Jesu Goãmũ magũ ta åhřimi,” arĩ werepũ Saulo.

<sup>21</sup> ĩġu eropa werecũ ĩarã árĩpehřerã ĩġure peerã uca waňorã.

—Iħĩ Goãmũ yaräre Jesure umupearäre ñero iidigu åhřimi. Eropiġu ĩġu erãre ñeha, diħri, pahia oparäre odiadigu árĩřimi. Eropiidiagu őġuere aridigu árĩřimi, arĩňorã masa ĩġure peerã.

<sup>22</sup> Erã eroparĩquerecũ Saulo ġũiro mariro turaro mera buhenũġapũ. Judio masare Damasco majaräre đaro werepũ. “Iħĩ Jesu diaye ta Cristo marire taubũ åhřimi,” ĩġu arĩ werecũ erãpũ ĩġure “ġuyagu iimi iħĩ,” arĩmasibiriňorã ĩġure.

### *Saulo duħri wahġãpũ judio masare*

<sup>23</sup> Eropirã bajanũri pũhrũ judio masa ĩġure wejēdiaňorã. Eropirã erã basĩ gamenere ĩġure erã wejēburire wereniguiňorã. <sup>24</sup> Eropirã ĩġure wejēdiarã, iri maca maja disiporire umure ñami sãre coremũriňorã. Saulo wiricũ ĩha wejēmora coreňorã. Erã eropa wejēdiaquerecũ Saulo erã wejēdiarire masipũ ĩġu mera majarã mera.

<sup>25</sup> Eropirā ñamigue Saulo buherā ĩgure puibu wuari puibu mera aĩsā, iri maca maja sāriri puwupugue duhudijucāñorā ĩgure.

*Saulo Jerusalén árĩpu*

<sup>26</sup> Eropigu Saulo Jerusaléngue ejagu, erogue Jesu yarā mera ĩgu árĩdiaripu. ĩgu eropa árĩdiacũ erā ĩgure “Jesure umupeogu árĩbeami ihĩ,” arĩñorā. ĩgure güi arĩñorā. <sup>27</sup> Erā eropa güiquerecũ ta Bernabépu ĩgure aĩgāpu Jesu ĩgu apinirā pohrogue. Eropigu Saulo mague Jesure ĩgu ĩarare, Jesu mera ĩgu wereniguirare, Damascogue güiro mariro Jesu yare ĩgu buhenugarare werepu Bernabépu. <sup>28</sup> ĩgu eropa werera puhrũ Saulo erā mera ñajagu, Jerusaléngue erā mera árĩmuriipu. <sup>29</sup> Eropigu ĩgu güiro mariro Jesu yare buhepu. Eropigu ĩgu judio masare Jesu yare weretarinugagu iipu. Erā judio masa griego masa ya wereniguirā arĩñorā. Eropirā Saulo ĩgu eropa weretarinugari waja ĩgure wejediañorā. <sup>30</sup> Erā eropa wejēdiacũ ĩarā, Saulo mera majarā Jesu yarāpu ĩgure Cesareague aĩduhrigā waha wañorā. Erogue ĩgure sihu árĩniguiriri Tarsogue oboeñorā erā ĩgure.

<sup>31</sup> Eropi árĩpehrerogue Judea yebague, Galilea yebague, Samaria yebague Goāmu yarā ōaro árĩmuriñorā. Irisubure ne masa ñero iibirimuriñorā erāre. Eropirā ōaro buheñorā erā. Eropirā erā Goāmure guhyadiaro ĩañorā. Espiritu Santo erāre ĩgu itamucũ erāpu Jesure umupeorā bajarā wañorā.

*Pedro Eneare ōagu wacũ iipu*

<sup>32</sup> Eropii Pedro árĩpehreri macarigue wagu, Jesu yarā Lida majarā pohrogue sare ejaru ĩgu. <sup>33</sup> Erogue ejagu Enea waĩcugure bocajapu. Enea dupu buhadigu árĩgu, ocho bojori gohra erā pũtāpidi oyamuriipu.

<sup>34</sup> Eropigu Pedropu ĩgure ōpa arĩpu:

—Enea, Jesucristo ōagu árĩcũ iimi mure. Wahgānugajaque. Mure pũtāpira gasirore amuque, arĩpu Pedro ĩgure.

ĩgu eroparĩcũ ta ĩgu wahgānugaja waha wapu. <sup>35</sup> Eropirā árĩpehrerā Lida majarā, Sarón majarā ĩgure ĩarā, erā erā ñeri iirare duhu, Jesure umupeonugañorā.

*Dorca waĩcugore masupu Pedro Jesu turari mera*

<sup>36</sup> Eropii Jope waĩcũri macague Jesure umupeogo Tabita waĩcugo árĩpo. Igo waĩ Tabita griego ya wereniguiriri mera Dorca āhraa. Igo ōarire iigo baja omuriipo masare. <sup>37</sup> Eropigo irisubure igo dorecu wahgũ, sĩaria wamuriipo. Igo sĩaricũ ĩarā, erā igo dupu mũrarore ōaro coe, umaro maja taribugue apiñorā igore. <sup>38</sup> Lida waĩcũri maca Jope pohrogue árĩyoro. Ero eropa árĩcũ Jesure umupeorā Jope maca majarā Pedro Lidague ĩgu árĩcũ peebeñorā. Eropu peebeorā perā umare oboeñorā Pedro pohrogue. ĩgu pohrogue ejarā wereñorā Pedrorerā erā.

—Yojaro mera waque gua árĩrogue, arĩ wereñorā erā.

<sup>39</sup> Erā eroparĩcũ peegu erā mera waha wapu ĩgu. Erogue ĩgure erā aĩ ejara puhrũ umaro maja taribugue sĩridigo pohro aĩmũria wañorā ĩgure. Pedro árĩcũ ĩha árĩpehrerā wapeweyarā nome orerā ĩgu pohro ejanugamuriñorā. Tabita erā mera árĩnigogue baja suhrire iibasamuriipo. Eropirā erā igo eabasara suhri mũrare ĩhmuñorā Pedrorerā. <sup>40</sup> Pedro erāre iri taribugue árĩrāre wiriadorepu. Erā wiriara



pũhrũ ĩũ mereja, Goãmũre igore serēbasapũ. Eropigũ igo dũpũ mũrarore maji ĩha,

—Tabita, wahgãque, arĩpũ ĩũ.

Ĩũ eroparĩcũ ta igopũ ĩha wahgũ, Pedrore ĩha, wahgã doajapo. <sup>41</sup> Igo eropa wahgã doajacũ ĩha, ĩũ igo mojotore ñeha tarawahgũ nugupũ igore. Eropigũ ĩũ ero majarãre Jesu yarãre, wapeweyarãre sihubeo, igore ojocarigore wiapũ erãre. <sup>42</sup> ĩũ eropa iira pũhrũ árĩpehrerã Jope majarã irire masirã bajarã masa Jesure umupeonũgañorã. <sup>43</sup> Pũhrũ Jopegue Simo waimurã gasirire amugũ mera bajanuri Pedro ĩũ mera árĩpũ.

## 10

*Pedro Corneliore Jesu yare werenũgapũ*

<sup>1</sup> Irisubure Cesareague Cornelio waĩcũgũ árĩgũ. ĩũ cien surara opũ árĩpũ. Erã surarapũ erã ya curu Italiano waĩcũyo ro. <sup>2</sup> Cornelio ĩũ ya wihi majarã mera mari Pagure umupeorã, gũhyadiaro ĩarã árĩñorã. Eropigũ ĩũ judio masa mojomorocurãre itamugũ baja gajinore omũripũ. Eropigũ ĩũ umuri nũcũ mari Pagure serēmũripũ. <sup>3</sup> Eropii ñamicague tres árĩcũgue Goãmũ yagũ anyu ĩgure dehyoapũ. Eropa dehyoagũ Cornelio pohrogue ñajajapũ.

—Cornelio, arĩ piyupũ anyu ĩgure. <sup>4</sup> Eropigũ Cornelio ĩgure ĩha gũigũ òpa arĩpũ:

—Opũ, ¿ñehenore gahmeri? arĩpũ ĩũ.

—Masare mũ orare, mari Pagure mũ serēniguirare Goãmũ peeami.

<sup>5</sup> Eropigũ Jopegue mũ umare oboeque. Eroque Simo Pedro waĩcũgũ àhrimi. ĩgure aĩgãridoreque mũ umare. <sup>6</sup> ĩũ gajigũ Simo waimurã gasiri amugũ pohro, wũariya tũro árĩri wihi ta àhrimi, arĩpũ anyu Corneliore.

<sup>7</sup> Anyu eropa arĩtuhaja, wiria waha wapũ. ĩũ wiriara pũhrũ Cornelio perãre ĩgure itamurãre yujugũ ĩũ surara mera majagure sihupũ. Surarapũ Goãmũre umupeogũ árĩgũ, umuri nũcũ Corneliore itamudigũ árĩpũ. <sup>8</sup> Eropigũ Cornelio erãre werepeho, Jopegue obeopũ erãre.

<sup>9</sup> Eropi gajinũ Jopegue erã warisubu goeri boje gohra árĩcũ Pedropũ wihi wecague Goãmũre serēgũ wapũ. <sup>10</sup> Eropigũ ĩgure oa pũricũ badiapũ. Eropigũ gajirã barire erã moarisubu ĩgũpũ dehyoacũ ĩapũ. <sup>11</sup> Umãrore pãrimaacũ, wũari gasiro wapicũrisubu pepũri ojogorori dirira gasiro dijaricũ ĩapũ. <sup>12</sup> Iri gasiro pohecague bajarã waimurã nũgũ majarã, yebague paha curirã, mirimagũ porã majarã árĩñorã. <sup>13</sup> Irire ĩũ ĩara pũhrũ, Pedrore wereniguiro caricũ peepũ.

—Pedro, wahgãnũgajaque. Oãre wejẽ baque, arĩro cariyoro ĩgure.

<sup>14</sup> ĩũ eroparĩcũ peequeregũ ta Pedro òpa arĩpũ:

—Opũ, ne erãre babeaa yũhũ. Ñerãre, Goãmũ ĩũ badorebirinirãre ne babirimũrabũ yũhũ, arĩpũ Pedro.

<sup>15</sup> Eropigũ Pedro dipaturi wereniguiro caricũ peepũ.

—Goãmũ, “Òarã àhrima,” ĩũ arĩnirãre “Ñerã àhrima,” arĩbiricãque mũhũ erãre, arĩro cariyoro Pedrore.

<sup>16</sup> Eropii umhresubu eropa arĩ wereniguiro pũhrũ iri gasiro umarogue mũria wayoro daja. <sup>17</sup> Eropigũ Pedro burigã guña “¿Dohpa arĩdiari iiri

yure eropa dehyoaro?” arī pepirū īgu īgu basi. Īgu eropa pepirisubu Cornelio ūma īgu obeonirāpū Pedro ya wihigue ejañorā. “¿Simo ya wihi nohogue āhriri?” arī, erā serēpira pūhrū īgu ya wihigue ejañorā erā. <sup>18</sup> Eropirā erā serē ĩha purumujuñorā. “¿Simo Pedro waicūgu i wihire āhriri?” arī serēpi ĩañorā erā.

<sup>19</sup> Eropigu Pedro īgu pepirisubu Espiritu Santo īgure werepū:

—Īaque. Ūrerā ūma mure amarā iima. <sup>20</sup> Wahgānūgajaque. Dijaque. Erā mera waque. “¿Dohparīri?” arī pepibigu ta waque ōaro mera. Yūpū erāre ōguere obeoabū, arīpū Espiritu Santo Pedrose.

<sup>21</sup> Īgu eroparīcū peegu Pedro erā pohrogue dija wa,

—Īaque. Ohō āhraa yūhū mūa amagārigū. ¿Duhpirā arirā iiari mūa yū pohro arirā? arīpū Pedro erāre.

<sup>22</sup> Īgu eroparīcū ta erāpū ōpa arīñorā.

—Cornelio cien surara opū, ōarire iigu, mari Pagure guhyadiaro mera umupeogu, arīpehrerā judio masa “Ōagu” erā arīgu mure sihugāridoregu obeoami guare. Goāmū ōagu anyu Corneliore mure sihudoreapū. Ōpa arāpū: “Pedrose mūa ya wihigue aīgāridoreque mū ūmare. Eropii īgu mure weregucumi,” arī, sihudoreapū anyu Corneliore, arī wereñorā Cornelio Pedrose īgu sihudorenirāpū.

<sup>23</sup> Erā eroparīcū Pedropū erāre ñajaridore, bari oho, īgu ya wihigue carīdorepū erāre. Eropigu gajinū Pedro wahgā, erā mera waha wapū. Eropirā gajirā Cristo yarā Jope majarā Pedrose wapicūgāñorā.

<sup>24</sup> Gajinū erā Cesareague ejañorā. Eropigu Corneliopū īgu acawer-erāre, īgu mera majarā sāre sihu gameneo, Pedrose corepū. <sup>25</sup> Eropigu Pedro Cornelio ya wihi pohrogue īgu aricū ĩagu Corneliopū īgure bocatīri wiria, īgu guburi pohro merejapū. <sup>26</sup> Īgu eropa iicū Pedropū īgure aī wahgūnugupū.

—Niguique mūhū. Yū sā mū iro dopa ta arīgu āhraa. Goāmū arībeaa, arīpū Pedro īgure.

<sup>27</sup> Īgu eropa arītuhajara pūhrū Cornelio īgure aīñaja wapū īgu ya wihigue. Erogue ñajajagu masa bajarā iri wihigue gamenere īgure corerāre ĩapū Pedro. <sup>28</sup> Eropigu Pedro erāre werepū:

—Judio masū arīqueregu ta gaji curu majarā mera arīgu guā dorerire tarinūgagu iiaa yūhū. Īrire ōaro masia mūa. Eropigu gaji curu majarāre “Ñerā āhrima,” arīdorebiramī Goāmū. Ōpa arī wereami īgu yure. <sup>29</sup> Īgu eroparīcū peegu ōguere mūa pohroguere ahrabū. Mūa yure sihubeocū “Ne wasome,” arībirabū. ¿Dohpa arīronore yūhū ōgue aricū gahmeari mūa? arīpū Pedro erāre.

<sup>30</sup> Īgu eroparīcū peegu Corneliopū ōpa arīpū:

—Tres arīcū i horano gohra ta mari Pagū yagu anyu yure dehyoami. Wapicūrinū wahaa īgu yure dehyoara pūhrū. Irinū ta mari Pagure yū serēniguirisubu cuimijuri suhricūgu yū pohro dehyonūgajami. <sup>31</sup> Eropigu īgu yure ōpa arāmi: “Cornelio, mūhū mari Pagū mera mū serēcū īgu peeami. Eropigu mojomorocūrāre erā gamerire mū ocū ĩagu mari Pagū mū mera mucubirigu itamugucumi. <sup>32</sup> Eropigu Jopegue mū ūmare obeoque Simo Pedro waicūgure mū pohrogue erā aīgāricū. Īgu gajigu Simo waimurā gasiri amugu ya wihi, wūariya turo pohro arīri wihi āhrimi īgu. Īgu mū pohro eragu mure weregucumi,”

arĩ wereami ĩgu yũre. <sup>33</sup> ĩgu eroparĩcũ peegu yũ umare mũre aĩgãridoregu obeoabu yũhũ. Eropigu õaro iigu ahrya mũhũ gũa pohroguere. Eropirã gũa árĩpehrerã õre mari Pagũ ĩgu ĩhabeoro árĩrã iiaa gũa. Árĩpehrerire mari Pagũ Goãmu mũre ĩgu weredorera peediarã, cohreabu gũa, arĩpu Cornelio Pedrore.

*Pedro Jesu yare werepu Cornelio ya wihĩ majarãre*

<sup>34</sup> ĩgu eroparĩcũ peegu, Pedro õpa arĩ werepu:

—Dohpague masia pare. Diaye ta aħraa. Goãmu yujuropa ta õaro iimi marire. <sup>35</sup> Eropigu árĩpehreri macari majarã Goãmure guhyadiaro erã ĩacũ, õarire erã iicũ, Goãmũpu erãre mucubirimi. <sup>36</sup> Goãmu gũa judio masa pohro Jesucristore obeomi. Masa Goãmu mera õaro erã árĩboro dopa Jesupu õari buherire weremi. Iri buherire mũa masia. Jesucristopũ árĩpehrerã masa opu aħrimi. <sup>37</sup> Ñu waĩyegu “Mũa ñerire bujawereque. Eropirã waĩyenirã árĩque,” masare ĩgu eropa arĩ werera pũhrũ Galileague õari buherire Jesupu werenũgami. Pũhrũ Judea yebague iri buherire werepohomi. <sup>38</sup> ĩhĩ Jesu Nazare majagure Goãmũpu ĩgu turarire, Espĩritu Santo mera ĩgu iimasiburire odi árĩmi Jesure. Eropigu Jesu õaro iigu wami. Eropa wagũ watẽa ñajasũnirãre, ñero tarirãre, árĩpehrerãre õarã wacũ iimi. Mari Pagũ Jesu mera árĩdi árĩmi. <sup>39</sup> Judea yeba, Jerusalén sãre árĩpehreri ĩgu iirare gũa ĩabu. Pũhrũ erã crusague pabia wejẽma ĩgure. <sup>40</sup> Eropigu uhrenũ waboro Goãmu ĩgure masudi árĩmi. Eropigu Jesure ĩgu masura pũhrũ gajirãre dehyoacũ iidigu árĩmi mari Pagũ. <sup>41</sup> Irisubu Jesure árĩpehrerã ĩabirima. Guare bajamerãgãre dehyoami. Mari Pagũ ĩgu gamerãre, Jesure ĩamorãre iribojegue Goãmu guare beyepũ. Guapũ Jesu ĩgu sĩridi masara pũhrũ ĩgu mera baha, ĩhribũ. <sup>42</sup> Eropigu ĩgu guare doremi õpa arĩgu: “Masare wereque. Yũhũ Jesu árĩpehrerã ojocarirãre, sĩrinirãre erãre dipuwaja moabu yũ árĩcũ iiami yũre Goãmu. Eropirã irire wereque,” arĩ doremi Jesu guare. <sup>43</sup> Árĩpehrerã Jesure erã umupeocũ ĩagu Goãmu erã ñerire cãdijigũcumi. Irire árĩpehrerã Goãmu ya weremuħtanirã iribojegue majarã wereyuũma, arĩ werepu Pedro.

*Judio masa árĩbirã Espĩritu Santore opanũgañorã*

<sup>44</sup> Iri árĩpehrerire ĩgu eropa arĩ wererĩsubu, árĩpehrerã irire peerã mera Espĩritu Santo árĩnũgamũripũ. <sup>45-46</sup> Eropirã erã judio masa árĩbirã peeyamariri werenigũiri mera mucubiriri mera wereniguĩnũgañorã. Erã ya werenigũiri mera “Goãmu turagu, õagu aħrimi”, arĩrã iĩñorã. Erã eroparĩcũ peepũ Pedro ĩgu acawererã judio masa mera. Eropirã Espĩritu Santo judio masa árĩbirã mera ĩgu árĩnũgacũ ĩarã judio masapũ uca wañorã. Eropigu Pedro õpa arĩ werepu judio masare:

<sup>47</sup> —Mari iro dopa ta Espĩritu Santore opama oã sã. Erã eropa opacũ ĩarã oãre waĩyedoremasia mari, arĩpu Pedro erãre.

<sup>48</sup> Eropa arĩtuhaja Jesu waĩ mera judio masa árĩbirãre waĩyedorepu Pedro. Erã eropiĩra pũhrũ “Gũa mera bajamenũrigã dujanique,” arĩñorã erã Pedro sãre.

# 11

*Pedro Jerusalén majaräre Jesu yaräre werepü*

<sup>1</sup> Eropii judio masa árĩbirã sã Goãmu yare erã ðaro gamecũ Jesu ĩgu apinirãpü erã acawererã Judeague árĩrã mera peebeoñorã. <sup>2</sup> Eropirã Pedro Jerusaléngue ĩgu dujajacũ ĩarã judio masa Jesu yarã bajamerãgã ĩgure ðpa arĩñorã: <sup>3</sup>—¿Judio masa árĩbirã pohro duhpigü ejari mũhu? ¿Dohpa árĩronore erã mera bahari mũhu? arĩ turiñorã erã Pedrorre.

<sup>4</sup> Erã eroparĩcũ peegü Pedro ĩgu iirare werepehopü erãre. <sup>5</sup> ðpa arĩ werepü:

—Yũhu Jopegue árĩgu Goãmure serëgu iibu. Eropigü yure ðpa dehyoabu. Yũhu ĩacũ wuuri gasiro wapicarisubu pepuri dirira gasiro umarogue yũ pohrogue dijaricũ ĩabu. <sup>6</sup> Eropigü iri gasirore ðaro ĩabu “¿Ñeheno iri gasiroguere ähriri?” arĩbu. Eropigü ĩabu iri gasiroguere árĩrãre. Waimurã nuğu majaräre, yebague paha curirãre, mirimagü porã majaräre ĩabu. <sup>7</sup> Eropigü Goãmu ĩgu yure wereniguirire peebeu. “Pedro, wahgãnugaque. Wejë baque oãre,” arĩgu carimi yure. <sup>8</sup> ĩgu eroparĩcũ peegü ðpa arĩbu yũhu. “Opü, ne erãre babeaa yũhu. Ñerãre Goãmu badorebirinirãre ne babirimurabu yũhu,” arĩbu yũpü. <sup>9</sup> Eropigü umarogue yure dipaturi wereniguigu carimi daja. “Goãmu ĩgu ‘ðarã ährima,’ ĩgu arĩrãre ‘Ñerã ährima,’ arĩbircãque mũhu,” arĩgu carimi yure. <sup>10</sup> Eropigü uhresubu ĩgu eropa arĩ wereniguira pũhrü iri gasiro dipaturi muria wabu daja. <sup>11</sup> Yũ eropa ĩarisubu ta urerã uma gua árĩri wihigue ejanirã árĩma. Erã Cesarea majagu ĩgu obeonirã árĩnirã árĩma. <sup>12</sup> Eropigü Espĩritu Santopü yure erã mera wadoregu “‘Erã ñerã ährima,’ arĩbircãque erãre,” arĩ weremi ĩgu yure. Eropirã oã seis mera yũ acawererã mera Cesarea majagu ya wihigue ñajajabu gua. <sup>13</sup> Eropigü ĩgu guare ðpa arĩ weremi. “Anyu yaha wihi dehyoacũ ĩabu yũhu. ðpa weremi yure. ‘Jopegue Simo waĩcugure aĩgãridoreque. <sup>14</sup> ĩgu mũre mũ acawererã mera mũare árĩpehrerãre peamegue wabonirãre mũa tariborore weregucumi,’ arĩmi anyu yure,” arĩ weremi yure Cesarea majagu. <sup>15</sup> Eropii yũhu erãre wereniguirisubu Espĩritu Santopü erã mera árĩnugami marire ĩgu iimuhtadiro dopa ta. <sup>16</sup> Eropigü Jesu ĩgu wererare guñabu yũhu. ðpa arĩ weremi ĩgu: “Ñu mũare waĩyegü deco mera waĩyemi. Yũpü iri tauro ĩgara mũare. Pũhrü Espĩritu Santore mũa mera árĩniguicũ ĩigura,” arĩ weremi. <sup>17</sup> Eropigü Jesucristo mari Opüre mari umupeocũ ĩagu Goãmu ĩgu Espĩritu Santore ohãmi marire. Eropigü Goãmu marire ĩgu Espĩritu Santore ĩgu odiro dopa ta judio masa árĩbirã sãre ĩgu ohãmi. Goãmu ĩgu eropa iicũ ĩagu ĩgure tarinugamasibea yũhu, arĩpü Pedro erãre judio masare Jesu yaräre.

<sup>18</sup> ĩgu eroparĩcũ peerã, erã ĩgure ne arĩnemobiriñorã. ĩgure erã turimasibiriñorã. Eropirã erã Goãmure mucubirirã,

—Goãmu ðagu, turagu ährimi, arĩñorã.

ðpa arĩnemoñorã erã:

—Judio masa árĩbirã sã erã ñerire bujawererã árĩrã Goãmu ĩgu taunirã árĩrãcoma. Eropa ĩgu taunirã árĩrã erã sã umuri nũcũ ĩgu mera árĩniguirãcoma, arĩnemoñorã erã.

*Antioquia gajirã Jesu yarã árĩñorã*

<sup>19</sup> Eropii Estebanre erā wejēra pūhrū masa Jesu yarāre ñero iĩñorā. Erā eropa iicū ĩarā Jesu yarā duhrisirigā wañorā. Eropirā erā Feniciague, Chipregue, Antioquíague waha, judio masa dihtare Goāmū yare wereriñorā erā. <sup>20</sup> Gajirāpū Jesu yarā mera majarā Chipre majarā, Cirene majarā Antioquíague eja, judio masa árĩbirāre Jesu yare buheñorā Goāmū erāre ĩgū tauboro dopa. <sup>21</sup> Eropigū mari Opū erāre itamupū. Eropirā masa bajarā Jesure umupeo, ōaripūre gohrotoñorā.

<sup>22</sup> Eropii “Antioquía majarāgue Jesure gamecoma,” arĩ peebeoñorā Jerusalén majarā Jesu yarā. Erā eropa peebeora pūhrū Jerusalén majarā Bernabé waĩcūgure Antioquíague oboeñorā. <sup>23</sup> Eropigū ĩgū Antioquíague ejagū, Goāmū itamuri mera judio masa árĩbirā ĩgū yarā erā wacū ĩagū, b̄arigā mucubiripū. Eropigū ĩgū ero majarāre ōpa arĩ werepū:

—Jesure eropa umupeoniguicāque. ĩgū yare ne duhubiricāque, arĩ werepū ĩgū árĩpehrerāre erāre.

<sup>24</sup> Bernabé ōagū árĩgū, Espĩritu Santore w̄aro opagū árĩgū, Jesu dorediro dopa iigū árĩgū Jesure ōaro umupeodigū árĩpū. Eropirā ĩgū buhera pūhrū bajarā masa Jesure umupeoñorā.

<sup>25</sup> Pūhrū ĩgū Tarso waĩcūri macague Saulore amagu wapū. <sup>26</sup> Eroque ĩgūre bocajapū. ĩgū bocajara pūhrū Antioquíague aĩgāpū Saulore. Eroque erā ejara pūhrū yuju bojori gohra erā Goāmū yarā mera gamenere, bajarā masare buhemuriñorā erā. Eropirā Antioquíague Cristo yarā Cristiano waĩcūnugañorā.

<sup>27</sup> Irisubure Goāmū ya weremūhtarā Jerusalén árĩnirā waha, Antioquíague ejañorā. <sup>28</sup> Eropigū erā mera majagu Agabo waĩcūgū Jesu yarā watope niguigū, Espĩritu Santo ĩgū turari mera werepū erāre. “Árĩpehreri yebagure b̄arigā oanū waroca,” arĩ wereyupū ĩgū. Irisubure bari maririsubu árĩcū árĩpehrerā weca opū Claudio árĩpū. <sup>29</sup> Eropirā Jesu yarā árĩpehrerā erā oparopē erā acawererāre odiarā erā basi game wereniguĩñorā. “Judea yeba majarāre Jesu yarāre niyerure oboerā,” arĩñorā erā basi. <sup>30</sup> Erā eropa arĩra pūhrū Bernabé Saulo mera erā iri niyerure aĩgābasañorā. Eroque ejarā Judea majarāre Jesu yarāre wiañorā iri niyerure.

## 12

### *Pedrore peresu iĩñorā*

<sup>1</sup> Irisubu opū Herode yujurāyerire Jesu yarāre ñero iinūgapū. <sup>2</sup> Eropigū ĩgū Ñu tĩgure Santiagopūre matamiji mera ĩgū wejēdorecū gajigapū ĩgūre wejēpū. Santiagore ĩgū wejēcū judio masa mucubiriñorā. <sup>3</sup> Erā mucubiririre Herode masigū, “Eropa dihta iicū gahmema erā,” arĩgū Pedro s̄are peresu iipū. Irinurire b̄ugabiriri pan erā bari bosenu Pascua árĩyoro. <sup>4</sup> Eropigū Herode Pedrore ñeha, peresu iipū. Eropigū diez y seis surarare ĩhadibudorepū ĩgūre. Wapicūrā surara ĩgūre ĩhadibuñorā. Pūhrū wapicūrā erā gohrotonirā ĩgūre ĩhadibumuriñorā. Eropā ta iĩñorā erā diez y seis surara. Herodepū Pascua pūhrū Pedrore peresugue árĩgūre masa core duhudobodiaripū ĩgūre wejēdorebu. <sup>5</sup> Eropigū Pedro peresugue

árĩpũ. Ĩgu erogue árĩcũ ta Jesu yarãpũ Goãmure burigã serẽbasañorã ĩgure.

*Goãmũ peresugue árĩgure Pedroke wiupũ*

<sup>6</sup> Iri ñamire ta Pedro comedari peda mera erã diridigu perã surara watope carĩgu iipũ. Eropirã perã surara disiporo coreniguiñorã ĩgure. Eropigu iri ñami boyoro Herode Pedroke judio masa core duhudobodiaripũ ĩgure wejẽdorebu. <sup>7</sup> Eropigu Goãmũ anyupũ Pedro carĩgu pohro ĩgu niguicũ ĩgu peresu árĩri taribu boyopehrea wayoro. Eropigu anyu Pedro pohro niguigu ĩgu patorere puucarepũ ĩgure.

—Duru wahgãque, arĩpũ ĩgu Pedroke. Ĩgu eroparĩcũ ta ĩgu mojotorire erã dirira comedari pãrisiri dija wayoro. <sup>8</sup> Eropigu anyu ĩgure werepũ:

—Mũ ya suhrire sañaque. Mũ zapatu sãre sañaque, arĩpũ ĩgu.

Ĩgu eroparĩcũ Pedropũ ĩgu arĩro dopa ta iipũ.

—Mũ weca majañe suhrirore saña, yũ mera arique, arĩpũ anyu.

<sup>9</sup> Ĩgu eroparĩcũ iri taribugue árĩdigũ wiria anyu pũhrũ waha wapũ ĩgu. Eropa waqueregu ta õpa arĩ pepiripũ ĩgu. “¿I diaye árĩbircuri? ¿O quẽgu iicuri yũhũ?” arĩ pepiripũ ĩgu. <sup>10</sup> Eropirã erã ĩgu árĩri taribu pohro niguirã surarare tarigã, gajirã yoañariro niguirã sãre tarigã, wũari disiporogue ejañorã. Iri disiporo macague wari mare cãhmotayoro. Iri biharise irise basi pãricũ erã wiriañorã. Wiria wa erã mague waha wañorã. Anyupũ waha wapũ. Eropigu Pedro yujugu ta dujapũ. <sup>11</sup> Eropa ĩgu anyu ĩgu wara pũhrũ ĩgu iirare Pedro masipũ pare. Õpa arĩ pepiripũ ĩgu. “Anyu Goãmũ ĩgu obeodigu peresugue árĩgure yũre wiugũ erami. Dohpague irire masia ĩgu eropa iirare. Judio masapũ yũre erã ñero iidiarare Goãmupũ erãre iidorebirami. Eropigu yũre Herode ĩgu peresu iidigũre wiuami,” arĩ pepiripũ Pedro.

<sup>12</sup> Ĩgu eropa arĩ pepira pũhrũ María Ñu pago ya wihigue ejapũ Pedro. Ñupũ Marco waĩcũgu arĩpũ. Iri wihigue masa bajarã gamenere, Goãmure serẽrã iĩñorã. <sup>13</sup> Eropigu Pedro disiporore eraa dotepũ. Rode waĩcũgo pohro majago ĩgu dotecũ peego, ĩago ejapo igo. <sup>14</sup> Eropigo Pedro igore piyucũ peego ĩgu wereniguirire pee masi, burigã mucubiri disiporore pãgũbiripo. Eropa mucubirigo ĩgure pãgũbodio cãdija wapo. Pedro ero niguicũ ta igo majinũgaja oma ñaja wapo.

—Pedro disiporogue erami, arĩ werego ñajapo. <sup>15</sup> Eropirã iri wihi árĩrã igo eroparĩcũ peerã,

—Eropa arĩmaacãgo iiaa mũhũ, arĩñorã erã igore.

—Diaye ta aħraa. Diaye ta arĩgo iiaa, arĩpo igo. Igo eroparĩcũ peerã,

—Ĩgu árĩbircumi. Ĩgu sĩporã mũraro eraro iica, arĩñorã erãpũ.

<sup>16</sup> Erã eropa arĩrisubu Pedro disiporore eropa ta doteniguicãpũ. Ĩgu eropiicũ peerã, erã disiporore pãgũ, ĩgure ĩha, uca wañorã. <sup>17</sup> Eropigu Pedro ĩgu mojoto mera “Ejarimaricãque,” arĩgu, Goãmũ peresugue ĩgure ĩgu wiurare werepũ erãre.

—Ire wereque Santiagore gajirã Jesu yarã sãre, arĩpũ Pedro.

Eropa arĩ weretuhaja, ĩgu gajipũgue tarigã waha wapũ.

<sup>18</sup> Eropii boyodijiricũ surara Pedroke ĩhadibunirã ĩgu dohpa ii wiriarare ne masibiriñorã. Eropa masibirã uca wañorã. <sup>19</sup> Eropigu Herode Pedroke amadoreripũ. Eropigu ĩgu surarare peresu corerãre

Īḡu serēpira pūhrū erāre wejēdorepū Herodepū. Eropii Herode Judeague árīdīḡu waha Cesareague árīḡu waha wapū.

### *Herode sīria wapū*

<sup>20</sup> Ero pūhrū Tiro waīcūri maca majarā mera Sidón waīcūri maca majarā mera sāre Herode guapū. Īḡu eropa guacū ĩarā iri macari majarāpū Herode mera amurā wañorā. Īḡu erā mera ĩḡu guarare wereniguirā wañorā. Ejaa Herodere ĩaboro core Herode itamugū Blasto waīcūḡu mera weretamuñorā. Eropirā erā ĩḡu Blasto ĩḡu itamuri mera Herode pohro ejañorā. Īḡu pohro ejarā ōpa arīñorā:

—Mari ōaro árīrā. Mari basi ĩhaturibiricārā, arī serēñorā erā Herodere.

Erā ya yeba majarā Herode ya yeba barire bocamuriñorā. Eropirā Herode erāre ĩhaturicū gamebiriñorā erā. <sup>21</sup> Eropiḡu Herode erā ĩḡure ĩarinū ĩḡu queoranū árīcū, opū ĩḡu sañari suhri ōari suhrire sañamūriḡu ĩḡu. Eropiḡu ĩḡu ĩḡu doaro doanijagū, masare werenigui ĩhmumūriḡu. <sup>22</sup> Īḡu eropa werenigui ĩhmucū peerā masapū gaguiniguñorā:

—Īhī wereniguigū masū árībeami. Goāmū āhrimi, arī gaguiniguimūriñorā erā Herodere.

<sup>23</sup> Erā eropa arīra pūhrū Goāmū ĩḡu anyu Herodere dore ópū. “Goāmū árībeaa yūhū,” ne arībiripū Herode. Īḡu eropa arībirira dipuwaja anyu ĩḡu dorecucū iipū. Īḡu eropa dorecucū ĩḡure beca ba wejēcāñorā.

<sup>24</sup> Eropii Jesu yarā masa bajarāre Jesu ya buherire buheñorā.

<sup>25</sup> Eropirā Bernabé, Saulo mera Jesu yarāre itamupehotuhaja Jerusaléngue árīnirā Antioquíague dujaa wañorā. Eropirā Ñure Marco waīcūḡure erā aīḡāñorā erā mera.

## 13

### *Jesu yarā Bernabére Saulo mera Goāmū yare buhedore oboeñorā*

<sup>1</sup> Irisubure Antioquíague Jesu yarā gamenererā mera majarā, Goāmū yare weremūhtarā árīñorā. Masare buherā ta árīñorā erā sā. Bernabé, Simo Negro waīcūḡu, Lucio Cirene majagū, Manaén, Saulo mera erā árīñorā. Manaénpū opū Herode mūḡu mera erā perā yujuro mera ta masanirā árīñorā. <sup>2</sup> Eropirā erā Goāmū yare erā buherisubu, erā ba duhurisubu, Espírītu Santopū werepū erāre:

—Bernabére, Saulo mera apique yū gamero dopa iimorāre. Irire iimorāre beye apīḡu iiaa erāre, arīpū Espírītu Santo.

<sup>3</sup> Īḡu eroparīcū erāpū ba duhu Goāmūre serē, Bernabé weca Saulo weca erā mojotorire duhpeñorā. Eropa duhpeorā erāre buhedorerā oboeñorā.

### *Chīpregue Jesu ĩḡu apinirā buheñorā*

<sup>4</sup> Eropirā erā Espírītu Santo ĩḡu obeonirā árīrā, Seleuciague eja, iri macare tarigā, Chīpre waīcūri nūḡurogue ejañorā erā. <sup>5</sup> Eropirā Salamina waīcūri peramague ejañorā. Iri maca judio masa buheri wirigue Goāmū yare werenūgañorā erā. Eropiḡu Ñu Marco sā erā mera waha, erāre itamupū.

6 Eropirã erã iri nuguro ojogoro maja. Pafo waĩcũri macague ejarã, yeere bocañaorã erã. Īgu judio masu Barjesu waĩcũgu árĩpu. Barjesu griego ya mera Elima erã arĩ piyugu árĩpu. “Goãmu yare weremuhtagu ahraa yuhu,” arĩ masare gũyaniguicãgu árĩpu ĩgu. 7 Eropigu ĩgu Sergio Paulo waĩcũgu mera majagu árĩpu. Sergio Paulopu iri nuguro majarã opu masipehogu árĩpu. Eropigu Goãmu yare peediagu erãre Bernabé, Pablo mera bocatĩripu ĩgu. 8 Eropigu Elima yeepu erãre buhedorebiriripu. Īgu Sergio Paulo Jesu yare ĩgu umupeocũ gamesãbiriripu yeepu. Sergio Paulore Goãmu yare ĩgu peecũ cãhmotadiaripu. 9-10 Īgu eropa buhedorebiriqerrecũ ta Saulo, Pablo waĩcũgu Espĩritu Santore ðaro opagu árĩgu yeere ðaro ĩadihupi ĩgure werepu:

—Muhu gũyaricũgu, ñegu, watĩ ĩgu dorerire iigu, ðarire ĩhaturigu ahraa muhu. ¿Duhpigu mari Opu yare “Ñeri ahraa. Gũyari ahraa,” eropa arĩniguicãri muhu? 11 Muhu eroparĩra waja Jesu mari Opu mure ĩgu pẽhrecũ cuiri ĩhajabigu árĩgũca muhu. Eropigu bajamenurigã muhu inũrire ĩarisome, arĩpu Pablo.

Īgu eroparĩcũ ta ĩgu yeepu imica iro dopa árĩrire ĩamuhtagu, naitĩaro dihtare ĩapu ĩgu. Eropigu ĩgure tuã curibure amapu ĩgu. 12 Īgu eropa wacũ ĩagu, Sergio Paulopu Jesu yare “Diaye ta ahraa,” arĩ masipu. Mari Opu yare ĩgu pee, uca wa, Jesure umupeonũgapu.

*Pablo Bernabé mera Antioquía Pisidia yebague árĩri macague árĩñorã*

13 Eropi Pablo sã Pafogue arĩnirã dohodiru mera waha, Pergegue ejañorã. Perge Panfilia yebague ahraa. Eroque eja, Ñu Marcopu erãre cohã wahgã, Jerusalengue waha wapu. 14 Erãpu Pergegue arĩnirã waha, Antioquíague ejañorã. Antioquía Pisidia yebague ahraa. Eroque ejarã, Sabadonũ árĩcũ erã judio masa buheri wihigue ñajaja, erogue doañorã. 15 Eropirã iri wihi majarã oparã Goãmu dorerire, Moisegue marire ĩgu apirare, Goãmu yare weremuhtanirã erã gojarare erã buhera pũhrũ erã sihubeoñorã Pablo sãre.

—Acawererã, ¿masare mua werediarã iiri? Irire werediarã wereque dohparagã, arĩñorã iri wihi majarã oparã.

16 Erã eroparĩcũ peegu, Pablo wahgãnũgaja, “Wereniguibiricãque,” arĩgu ĩgu mojoto mera paatupu. Erã ejarimaricũ ĩha, ĩgu ðpa arĩpu:

—Israe masa, mua mari Pagure umupeorã, peeque. 17 Mari ñecu sumarã mura Goãmure umupeomũriñuma. Erã murare Goãmu beyemũriñumi. Eropirã erã mari ñecu sumarã yoari boje Egiptogue arĩmũriñuma gajirã arĩqererã. Eroque erã árĩcũ Goãmu ðaro iimũriñumi erãre. Eropirã bajarã masa pore arĩñuma erã. Ōpa iĩñumi erãre. Erãre Egiptogue arĩrãre ĩgu turari mera aĩ wiuñumi Goãmu. 18 Īgu eropa wiura pũhrũ erã cuarenta bojori gohra masa marirogue curimũriñuma. Eroque ĩgure erã tarinũgacũ Goãmu eropa ta pepicãñumi. 19 Eropigu Canaa waĩcũri yebaguere siete cururi majarãre cõatuhaja, Goãmu iri yebare oñumi Israe masapũre. 20 Iri yebare otuhaja cuatrocientos cincuenta bojori gohra masare doremorãre apimũriñumi Goãmu Israe masare.

—“Goãmu ĩgu apinirã Samue ĩgu árĩcũgue arĩtumũriñuma. Samuepu Goãmu yare weremuhtagu arĩmũriñumi. 21 Samue



árĩrisubu Israe masapu erã opu árĩbure amamuriñuma. Eropirã Goãmure serẽmuriñuma. Erã eropa serẽcũ ĩagu Goãmũ Saulore apimuriñumi. Saulo Cis magu árĩñumi. Benjami ya curu majagu árĩñumi. Eropigu cuarenta bojori gohra erã opu árĩbure apiñumi Goãmũ ĩgure. <sup>22</sup> Eropigu Goãmũ Saulore ĩgu cóara puhru Davire apimuriñumi ĩgu. Ōpa arĩñumi Goãmũ Davire. “Davi Isaí magure bocabu yũhũ. ĩgure mucubiria yũhũ. ĩgu ya gamerire ipehogucumi,” arĩñumi Goãmũ. <sup>23</sup> Ihĩ Davi ĩgu pãrami árĩturiagu àhrimi Jesu. Goãmũ Jesure apidigu árĩmi Israe masare itamubure. “Masare òaro iiguca,” arĩñumi Goãmũ. ĩgu arĩdiro dopa ta iidi árĩmi ĩgu Jesu. <sup>24</sup> ĩgu eropa iiboro core Jesu ĩgu ariboro core Ñu waĩyegu ōpa arĩ buhepu: “Mũa ñerire bujawereque. Ōaripure gohrotoque. Eropirã waĩyesũnirã árĩque,” arĩ buhepu Ñu árĩpehrerã Israe masare. <sup>25</sup> Eropigu Ñu ĩgu buhetuboro core, ĩgu sĩriboro core ōpa arĩ weremuripu. “¿Ni-hino àhriri yũhũ mũa pepicũ? Iribojegue majagu Goãmũ yare weremũhtadigu árĩbeaa yũhũ. Cristo árĩbeaa yũhũ. Gajigu àhraa. Cristo yũhũ árĩbiriqerẽcũ yũ puhru yũ tauro turagupu arigucumi. ĩgupu òatariagu àhrimi. ĩgu iro dopa árĩbeaa yũhũ,” arĩ werepu Ñu masare, arĩpu Pablo.

<sup>26</sup> “Acawererã, Abrahã pãramerã, árĩpehrerã mari Pagure guhyadiaro ĩarã, marire i ĩgu tauboro wereri buherire obeodi árĩmi mari Pagu. <sup>27</sup> Jerusalén majarã erã oparã mera Jesu erãre taugu ĩgu árĩcũ masibirinirã árĩma. Sabadonari árĩcũ Goãmũ yare weremũhtanirã erã gojarare buhequererã ta Jesure masibirinirã árĩma. Eropa masibirã Jesure wejẽdoreñorã. Eropa iirã Goãmũ yare weremũhtanirã erã gojadiro dopa ta iirã iĩnorã. <sup>28</sup> ĩgure erã wejẽboro core erã Jesure weresãriñorã. ĩgu ñerire iibiriquerẽcũ ta erã Pilatore Jesure wejẽdoremorã serẽñorã. <sup>29</sup> Eropirã iribojegue majarã erã gojadiro dopa ta Jesure iituhaja, ĩgure crusague árĩgure aĩdiju, masa gobegue utãyegue erã seara gobegue apiñorã erã ĩgure. <sup>30</sup> Eropa erã ĩgure wejẽquerecũ ta Goãmũ masudi árĩmi ĩgure. <sup>31</sup> Eropirã Galileague arinirã Jerusaléngue ĩgu mera ejanirã bajanuri ĩgure sĩri masa deyodigure ĩañorã. Eropirã dohpaguere ĩgure erã ĩarare masare werema erã.

<sup>32-33</sup> Eropa masare wereniguigu ōpa arĩ werenemopu daja Pablo:

—Eropirã òari buherire werea gua mũare. Goãmũ mari ñecu sumarãre “Masare òaro iiguca,” iribojegue ĩgu arĩdiro dopa ta dohpaguere marire erã acawererãre iiami. Irire ĩgu wererare ōpa iiami ĩgu. Goãmũ Jesure masudi árĩmi. Eropirã Jesure ĩgu masurare werea gua mũare. Salmopũgue iribojegue ĩgu ōpa arĩ gojadiro dopa eropa wayoro Jesure: “‘Mũhũ yũ magu àhraa. Dohpagãre mũare dehyoacũ iiabũ,’ arĩmi Goãmũ ĩgu magure,” arĩ gojañumi iribojegue. <sup>34</sup> Eropigu Goãmũ Jesure ĩgu masuburire dipaturi ĩgu sĩribiriboro weregu ōpa arĩ were gojadoreñumi Salmopũgue: “Davire yũhũ mojomoro ĩadiro dopa ta diaye ta òaro iigura mũa sãre,” arĩ gojadoreñumi. <sup>35</sup> Eropigu gaji Salmo sãre ōpa ta arĩ wereñumi: “Goãmũ mũ òagu ĩgu dũpũre boadorebirabũ mũhũ,” arĩ gojañumi. <sup>36</sup> Eropigu Davi Goãmũ ĩgu gamediro dopa ta ĩgu árĩrasubu majarãre itamumuriñumi. Puhru ĩgu sĩria wañumi. ĩgu sĩrira puhru ĩgu pagu sumarãre erã iidiro

dopa ta yaañuma ïgu sãre. Eropigu ïgu boa wañumi. <sup>37</sup> Eropigu ihĩ Jesu Goãmũ ïgu masudigupũ ne boabiridi árĩmi. <sup>38</sup> Eropirã mũa, yũ acawerã, ire masique: Goãmũ mũa ñerire ïgu cóãborore mũare ire werea gũa. Jesupũ mũa ñerire cóãbu ãhrimi. <sup>39</sup> Eropigu ïgure umupeorãre erã ñero iirare cãdijicãgucumi ïgu. Moisere ïgu apira dorerire mũa iira mera Goãmũ pohrogue wasome mũa. Eropigu iri dorerire iiri mera taridiarãre erã ñerire cóãsome Goãmũ. <sup>40</sup> Eropirã òaro iique. Mũa òaro iibiricũ Goãmũ ya weremuhtanirã erã gojadiro dopa ta mũare waroca. Òpa arĩ gojañuma:

<sup>41</sup> Peeque mũa queoricurã. Yũre ïhaturirã ãhraa mũa. Yũ òpa iicũ güique mũa. Eropirã peamegue waque. Mũa árĩrinurire mũare ii ïhmugura. Yũ eropa ii ïhmucũ ïaquererã “Diaye ta ãhraa,” arĩsome mũa. Gajigu irire mũare ïgu òaro werequerecũ ta “Diaye ta ãhraa,” arĩsome mũa, arĩ gojañumi Goãmũ yare weremuhtadigu, arĩ werepũ Pablo erãre.

<sup>42</sup> ïgu eropa arĩ werera pũhrũ judio masa buheri wihigue erã wiriara pũhrũ judio masa árĩbirãpũ erãre serẽñorã.

—Gaji semanage Sabado árĩcũ ire buheba daja guare, arĩ serẽñorã erã Pablöre.

<sup>43</sup> Eropirã iri wihigue árĩnirã wiria, judio masa bajarã, judio masa árĩbirã sã Pablo, Bernabé sã mera wañorã. Judio masa árĩbirã judio masa yare buherã árĩñorã. Erã erã mera wacũ Pablo Bernabé mera òaro wereñorã erãre. “Goãmũ mũare mahimi. Eropirã ïgure umupeorã árĩniguicãque,” arĩ buheñorã erã.

<sup>44</sup> Eropirã gaji semanare Sabado árĩcũ árĩpehrerã Jesu yare peediarã gamenereñorã. <sup>45</sup> Eropirã judio masapũ bajarã masa Jesu yare peediarã gamenerecũ ïarã guañorã. Eropa guarã, erã gajiropa arĩ werenigui, Pablöre ñero quere goroweoñorã. “Mũare ïgu buheri diaye árĩbeaa,” arĩñorã erã. <sup>46</sup> Erã eroparĩcũ peerã, Pablo, Bernabé mera erãre quere goroweonirãre güiro mariro wereñorã.

—Goãmũ ïgu doreldiro dopa ta mũare judio masare buhemũhtarabũ gũa. Mũapũ irire gamebirituhabũ. Òmuri nũcu Goãmũ mera árĩniguicũ sãre gamebirituhabũ mũa. Eropirã guapũ judio masa árĩbirãpũre buhenugarãca. <sup>47</sup> Òpa ta doreñumi mari Opũ guare:

Mũa judio masa árĩbirãre buherã erãre Goãmũ yare òaro masicũ iirãca mũa. Eropigu mũa yoarogue árĩrãre mũa buhecũ peerãre erãpũre peamegue wabonirãre taugũca yũhũ, arĩ wereñumi Goãmũ guare ïgu yare gojarapũgue, arĩ werepũ Pablo, Bernabé mera.

<sup>48</sup> Erã eroparĩcũ peerã judio masa árĩbirãpũ mucubiriñorã. “Mari Opũ yapũ òari ãhraa,” arĩñorã erã. Eropirã Goãmũ ïgu gamenirã, òmuri nũcu ïgu mera erã árĩniguiborore ïgu odianirã Jesure umupeoñagãñorã. <sup>49</sup> Eropirã mari Opũ Cristo yare iri yebague werepehoñorã. <sup>50</sup> Erã eropa iicũ ïarã judio masa suabiria wañorã. Eroque mari Pagũre umupeorã nome, òarã nome árĩñorã. Eropirã judio masa Pablo sãre ñero wereniguiñorã. Erã eropa werenigucũ peerã erã nome Pablo mera Bernabé mera guañorã. Eropirã iri maca majarã oparã sã erã mera guañorã. Eropa quarã ero majarã ñero iĩñorã Pablo sãre. Erã eropiira, pũhrũ Pablo sãre erã ya yebague árĩrãre cohã wiucãñorã. <sup>51</sup> Erã eropa iicũ ïarã, Pablo Bernabé mera erã guburi maja nicure pasiripiñorã iri maca majarã erã ñeri wajare ïhmurã. Eropa

iituhaja erã Iconiogue waha wañorã. <sup>52</sup> Eropirã erã Jesu yarã wũaro mucubiri, Espiritu Santo wũaro igũ dorediro dopa iirã iĩñorã.

## 14

### *Pablo Bernabé mera Iconiogue árĩñorã*

<sup>1</sup> Eropirã Iconiogue árĩrã Pablo Bernabé mera judio masa buheri wihigue ñaja, Jesu yare wereñorã. Eropirã judio masa bajarã Jesure umupeonũgañorã. Eropirã judio masa árĩbirã sã Jesure umupeoñorã. <sup>2</sup> Judio masa Jesu yare peediabirãpũ judio masa árĩbirãre Jesu yarã mera erã guacũ iĩñorã daja. Erã eropa iicũ judio masa árĩbirã ñero pepiñorã Jesu yarãre. <sup>3</sup> Erã eropa pepicũ ñarã Jesu yarãpũ Pablo sã erogue yoari boje árĩrã, gũiro mariro mari Opũ yare ðari buherire buheñorã. Goãmũ masare igũ mahirire buheñorã. Erã eropa buherisubũ Goãmũ turari mera deyoro moarire ii ñmuñorã, “I buheri ðiaye ta ãhraa,” arĩ ñhmurã. <sup>4</sup> Eropirã iri maca majarã deco mera judio masa yare gamerã dujañorã. Deco mera ta Jesu yare gamerã sã dujañorã. Erã pe curu ðuca wariñorã. <sup>5</sup> Eropirã Jesu yare gamebirãpũ judio masa sã árĩbirã, judio masa sã erã oparã mera gamenere Jesu igũ apinirãre ñero iidiariñorã. Utã mera dea wejediariñorã erãre. <sup>6</sup> Erã eropa iidiarire masirã, Pablo, Bernabé mera Licaonia yebague duhriã waha wañorã. Iri yeba árĩri macari tari wahã Lистра waĩcũri macare Derbe waĩcũri maca sãre ejañorã. <sup>7</sup> Erogue ejarã, ðari buherire buheñorã daja erã.

### *Listrague Pablöre utã mera deañorã*

<sup>8</sup> Eropii Listrague curimasibigu doapũ. Igũ ne masa dehyoagugue ta curimasibiridigu árĩpũ. <sup>9-10</sup> Eropigu igũ Pablo igũ buhecũ peepũ. Igũ peerisubũ Pablopũ igũ dihtare ñapũ. Igũre ñanũrũ ðpa arĩ pepipũ: “Iñĩ Jesure umupeomi. Eropigu ‘Jesu yare ðapũ ðacũ iimasimi,’ arĩ pepigu iicumi,” arĩ pepipũ Pablo curimasibigũre. Eropa pepigu turaro mera ðpa arĩpũ Pablo igũre:

—Wahgãnũgajaque, arĩpũ Pablo igũre.

Igũ eroparĩcũ peegu ta curimasibigũpũ buhrimanũgaja, wapũ. <sup>11</sup> Pablo igũ eropa iicũ ñarã masa gaguiniguĩñorã. Erã Licaonia ya mera ðpa arĩ gaguiniguĩñorã:

—Goãmarã masa dopa bejarã umarogue árĩrã mari pohrogue dijarama, arĩ gaguiniñorã erã.

<sup>12</sup> Eropirã erã Bernabére “Mari goãmũ Zeus ãhrimi,” arĩ piyuñorã. Eropirã Pablo buhemũtadigu opũ iro dopa igũ árĩcũ ñarã “Mari goãmũ Hermes ãhrimi,” arĩ piyuñorã erã igũre. <sup>13</sup> Eropirã Zeure umupeorã ya wihi iri maca tũro pohro árĩyoro. Eropigu Zeus yarã erã pahipũ iri wihigue árĩgũ macague ñajariri disiporo pohrogue wecuare, gori amurare aĩgãripũ. Iri mera Pablöre Bernabére “Mari goãmarã ãhriima,” arĩ umupeodiariñorã. Eropirã erã wecuare soemuju Pablöre, Bernabére umupeodiariñorã. <sup>14</sup> Erã eropa iidiacũ ñarã Pablo, Bernabé mera erã basi erã ya suhrire yehguenũgañorã erã bujawererire masare ñhmurã. Erã yehguenũgara pũhrũ masa watope omagã, gaguiniguĩñorã erã.

<sup>15</sup> —Mũa ðpa iibiricãque. Gũa sã mũa iro dopa ta masa ãhraa. Mũa ðpa iiri ne duhpiburi árĩbeaa. Eropirã mũare ðarire buherã

ahrabu. Ōpa iirire duhudorerā arirā iiabū. Oā m̄ua goām̄arāre m̄ua wéanirāre ñerāre cóacāque. Eropirā Goām̄ure ojocarigup̄ure umupeoque. Goām̄ur̄u am̄arore, yebare, w̄uariyare, ár̄ipeh̄erire, ár̄ipeh̄rero majarāre iigu āhrimi. <sup>16</sup> Eropigu ĩgu iribojegue ár̄ipeh̄reri macari majarā erā gamero iirare eropa ĩacāñumi. <sup>17</sup> ĩgu eropa ĩacāqueregu ĩgu ár̄īc̄urire ĩhmumi marire. ĩgu masare ōarire ii, deco aricū ii, d̄ucare oo, masare barire oniguimi. ĩgu eropa ocū masa mucubirima. Eropa ta ĩgu ár̄īc̄urire ĩhmumi masare, ar̄īp̄u Pablo, Bernabé mera.

<sup>18</sup> Eropirā erā eropar̄icū peequererā ta masa wecuare wejē soemuju erāre umupeodiariñorā. Eropa erā umupeodiacū ĩarā erāre eropa iidorebiriñorā Pablo s̄a. Erā eropa iirire duhudiabiriquererā duhuñorā.

<sup>19</sup> Eropii gajirā judio masa Antioquía majarā, Iconio majarā s̄a Listrague ejañorā. Erogue ejarā, Pabl̄ore ñero wereniguiñorā ero majarāre. Erā eropa wereniguicū peerā masa ĩgu mera guan̄agañorā. Eropa guarā masap̄u utā mera deañorā Pabl̄ore. Utā mera ĩgure deatuhaja, “Īh̄i s̄iria wah̄ami,” ar̄irā, iri maca turo pohrogue ĩgure taragā mehpicā, waha wañorā. <sup>20</sup> Erā eropiiquerecū Jesu yarā Pablo pohro erā gamenerenugajacū gohra Pablo masa wah̄gānugaja, erā mera macague waha wap̄u. Eropirā gajinu ĩgu Bernabé mera Derbegue wap̄u.

<sup>21</sup> Eropirā erā erogue erā ōari buherire bajarā masare erā werera p̄hr̄u, erā Listrare eja daja iri macare tarigā, Iconiore eja daja iri macare tarigā, Antioquía Pisidia yebague ár̄iri macare ejañorā daja. <sup>22</sup> Iri macarigue ejarā, ero majarā Jesu yarāre ōari buherire wereñorā daja. Erāre ōaro s̄īporācucū iñorā. Eropirā Jesure umupeodoreniguicārā ōpa ar̄i wereñorā erāre.

—Goām̄u ár̄īroguere mari wadiarā, b̄urigā marire ñero tariro gahmea, ar̄i wereñorā erā.

<sup>23</sup> Eropirā macari n̄uc̄u majarāre Jesu yarāre erā oparā ár̄imorāre apiñorā Pablo Bernabé mera. Eropirā erā ba duhura p̄hr̄u Goām̄ure serēñorā.

—Op̄u, oā m̄u yarāre ĩhadibuque, ar̄i serēbasañorā erā Goām̄ure erā umupeogure.

*Pablo Bernabé mera Antioquíague erā ár̄īm̄uhtara macague dujaa wañorā*

<sup>24</sup> Erā eropa iira p̄hr̄u erā Pisidia yebague tariara p̄hr̄u waha wañorā Panfilia yebague. <sup>25</sup> Eropirā Pergeguere erā buhetuhaja Atalia waic̄uri macague buha wañorā. <sup>26</sup> Eropirā iri macague eja, Antioquíague dujaarā, dohodiru mera waha wañorā. Iri maca coregue erā ár̄īnicū Jesu yarā Goām̄u yare buhedorerā Pablo s̄are obeoñorā. Eropa obeorā Goām̄ure ōpa serēñorā:

—Goām̄u, m̄u mahiri mera oāre ĩhadibuque, ar̄i serē, obeoñorā erā.

Eropirā erā buhedorerare buhepehonirā ár̄irā Pablo Bernabé mera dujaniñorā iri macare. <sup>27</sup> Eropirā erā Antioquíague erā dujajara p̄hr̄u Goām̄u yarā mera gamenere, Goām̄u ĩgu turari mera erā iirare werepehoñorā erā. Judio masa ár̄ībirā s̄a Goām̄u yarā erā warare wereñorā erā. <sup>28</sup> Eropirā Pablo s̄a erogue Jesu yarā mera yoari boje ár̄īc̄am̄uriñorā.

## 15

*Jerusaléngue Jesu yarã gamenereñorã*

<sup>1</sup> Eropi Judea yeba majarã bajamerãgã Antioquíague ejarã, Jesu yarãre õpa arĩ buhenũgañorã erã.

—Goãmũ ìgũ dorerire Moisere apigũ õpa arĩ apimuriñumi. Árípehrerã erã dũpũre miri gasirogã erã wiri aĩborore were apimuriñumi Moisere. Mũa irire iibiricũ Goãmũ mũare tausome, arĩ buheñorã erã ero majarãre.

<sup>2</sup> Erã eropa arĩ buhecũ peerã Pablo Bernabé mera gamebiriñorã. Iri buherire bũrigã game dũyasoñorã Judea yeba majarã mera. Erã eropa game dũyasora pũhrũ Jesu yarãpũ Pablõre, Bernabé, gajirã ero majarã sãre Jerusaléngue obeoñorã. Judea yeba majarã erã buherire Jesu ìgũ apinirãre Jesu yarã oparã sãre serẽpi ìadorerã obeoñorã Pablo sãre.

<sup>3</sup> Eropirã Jesu yarã erãre erã obeocũ waha, Fenicia yebare eja tarigã, Samaria yebague ejañorã. Iri macarigue ejarã, judio masa áribirã Goãmũ yare erã gemenũgarare wereñorã erã ero majarãre. Erã eropa werecũ peerã ero majarã Jesu yarã bũrigã mucubiriñorã.

<sup>4</sup> Eropirã erã Jerusaléngue ejacũ ìarã ero majarã Jesu yarã Jesu ìgũ apinirã, ìgũ yarã oparã mera mucubiriri mera õaro bocatũriñorã erãre. Eropirã Pablo, Bernabé gajirã mera Goãmũ ìgũ turari mera erã iirare wereñorã Jerusalén majarãre. Judio masa áribirã Jesu yarã erã wara sãre wereñorã erã. <sup>5</sup> Erã eropa werequerecũ erogue fariseo masa Jesu yarã bajamerãgã áriñorã. Eropirã erã eroguerẽ wahgãñugaja, õpa wereñorã.

—Erãre judio masa áribirãre erã dũpũre miri gasirogãre wiriro gahmea. “Goãmũ Moisere ìgũ dorerare iique mũa sã,” arĩro gahmea erãre, arĩñorã erã fariseo masa.

<sup>6</sup> Erã eroparicũ pee, Jesu ìgũ apinirã, Jesu yarã oparã mera irire amudiarã, gamenereñorã. <sup>7</sup> Eropirã erã yoari boje erã wereniguira pũhrũ Pedro wahgãñugaja, werepũ erãre.

—Acawererã, iribojegue yũhũ mũa mera árigũre Goãmũ õpa iidoregũ yũre apimi. ìgũ yũre õari buherire judio masa áribirãre weredoregũ apimi. Erãre Jesure umupeodoregũ yũre erãre buhedoremi. <sup>8</sup> Eropigũ Goãmũ masa erã pepirire masimi. Eropigũ ìgũ judio masa áribirãre ìgũ yarãre ìgũ iirare ìhmubu ìgũ Espiritu Santore ohãmi erãre marire ìgũ iidiro dopa ta. <sup>9</sup> Eropa ogũ ìgũ marire erã sãre yujuropa ta õaro iimi. Erã ìgũre umupeocũ erã ñerire cadijimi ìgũ. <sup>10</sup> Maripũ Moise dorerire yujuro bojebeaa. Mari ñecũ sũmarã mũra sã irire yujuro bojebirimuriñuma. ¿Eropa mari yujuro bojebiriquerã duhpĩrã Jesu yarãre judio masa áribirãre irire Moise dorerire iidorediari mũa? ¿Duhpĩrã Goãmũ judio masa áribirãre ìgũ yarã wacũ ìgũ iirare “Ero wabeaa,” arĩri mũa? <sup>11</sup> Eropa arĩbirã mari õpa pepia. Dohpague judio masa áribirã iro dopa ta mari sãre mari Opũ Jesu mahiri mera Goãmũ taugũcumi, arĩpũ Pedro erãre.

<sup>12</sup> ìgũ eroparicũ peerã arĩpehrerã ejarimaria wañorã. Eropirã Pablo Bernabé mera judio masa áribirã watope Goãmũ turari mera erã ii ìhmurare wereñorã erãre. <sup>13</sup> Eropa erã weretuhajara pũhrũ Santiago sã werepũ.

—Acawererā, peeque yure. <sup>14</sup> Goāmū judio masa árībirāre īgu yarā árīmorāre īgu ne iirare weretuhajami Pedropū. <sup>15</sup> Iribojegue Goāmū ya weremuhtanirā erā werediro dopa ta eropa wahabu judio masa árībirāre. Ōpa arī Goāmū wereniguirire gojañuma erā iribojeguerē:

<sup>16</sup> Iribojegue Davi mūrū ya curu majarā erā oparā árīra pehrea wabū. Pūhrū dujarīgūca yūhū. Eropīgū dipaturi īgu ya curu majagure opu acugūca. <sup>17</sup> Yū eropa acura pūhrū árīpehrerā judio masa árībirā yure erā opure gamerācoma erā. “Yaharā árīque,” yū arī sihubeorāpū yure gamerācoma. <sup>18</sup> Eropa ta arīmi mari Opū. Iribojegue īgu ire masare weremūripū, arī gojañuma Goāmū ya weremuhtanirā.

<sup>19</sup> “Eropīgū ōpa pepia yūhū, arīpū daja Santiago. Judio masa árībirāre Goāmū yare ne gamenugarāre baja iidorebiricārā mari. <sup>20</sup> Eropirā erāre goja, obeerā mari. Ōpa arī gojabeorā. “Goāmarā wéanirāre erā umupeora barire babiricāque. Eropirā nome mera ñero iibiricāque. Nome sā ūma mera ñero iibiricāque. Eropirā wūñūgū mohwejenirāre waimūrāre babiricāque. Dire ihribiricāque,” iripēta arī were gojabeorā. Iri doreri Moise apira doreri sā āhraa. <sup>21</sup> Yoari boje judio masa buheri wirigūe Sabado árīcū Goāmū Moisere īgu apira dorerire buhemūrima masa. Eropiū árīpehreri macarigūe Moise dorerire buhemūrima masa. Eropirā yū arīdiro dopa ta judio masa árībirāre Jesu yarāre were gojabeocū, judio masapū pee, “Gua iiguari ta āhraa,” arīrācoma, arīpū Santiago.

*Judio masa árībirāre erā gojarapū obeñorā*

<sup>22</sup> Eropirā Jesu īgu apinirā, Jesu yarā oparā árīpehrerā Jesu yarā mera Santiago arīrare peerā, “Eropa ta iirā,” arīñorā. Tuhajanugu erā mera majarāre beyeñorā erā obeomorā. Antioquíague Pablo, Bernabé mera erā wamorāre erā beyeñorā. Eropirā erā Judare, Sila mera beyeñorā erā obeomorā. Judapū Barsabá peñe waicpū. Erā beyerā acawererā Jesu yarā erā umupeonirā árīñorā. <sup>23</sup> Erāre erā beyera pūhrū Jesu yarā gojabeorapūre obeñorā erā mera. Ōpa arī gojañorā erā:

—Jesu īgu apinirā, Jesu yarā oparā, mūa acawererā Jesu yarā mera gua ōadorea mūare. Árīpehrerā judio masa árībirā Antioquíague, Siriague, Ciliciague árīrāre mūare Jesu yarāre ōadorea gua. <sup>24</sup> Gua mera majarā mūa pohrogue ejarā, mūare baja dorerire iidoreañorā. Eropirā mūare gariboañorā. Erā Goāmū dorerire Moisere īgu apiraguerē, mūa dūpū merogā gasirogāre wiriri sāre iidoreañorā. Guapū erāre irire buhedorerā obeobirabū. <sup>25-26</sup> Eropirā gua árīpehrerā mūa pohrogue obeomorāre gua beyeabū. Mari mera majarāre, mari mahirāre, Pablo, Bernabé mera Cristo Jesu mari Opū yare güiro mariro erā buhecū bajasuburi gajirā erāre wejēbocuriñorā. Erā eropa wejēbocuricū merogā mera tarimūriñorā erā. Erā Pablo, Bernabé mera gua beyenirāre dohpaguere obeoa. <sup>27</sup> Eropirā Juda, Sila mera mūa pohrogue obeoa. Gua gojabeorare erāpū mūare wererācoma. <sup>28</sup> Espiritu Santo īgu guñaro dopa ta gua sā pepia. Ōpa āhraa iri: Gaji doreriguerē apibea mūare. I doreri dihtare apirāca mūare. <sup>29</sup> Goāmarā wéanirāre erā umupeora barire babiricāque. Dire ihribiricāque. Wūñūgū mohwejenirāre waimūrāre babiricāque.

Eropirā nome mera ñero iibiricāque. Nome sã uma mera ñero iibiricāque. I gua eropa dorera iibirā ñarire iirā iica mña. Iripēta āhraa mñare gua werediari, arī gojabeñorā Jesu yarā Jerusaléngue árīrā.

<sup>30</sup> Iripūre gojatuhaja, wiañorā Antioquíague warāre. Erā wiara pñhrũ waha, Antioquíague ejañorā. Erā erogue ejara pñhrũ bajarā masare gameneredore, erā gojarapūre wiañorā erāre. <sup>31</sup> Iripūre erā buhera pñhrũ, iri ñarire erā werebeorare peerā, ñaro mucubiriñorā. <sup>32</sup> Juda, Sila mera Goāmũ yare weremñhtarā árīñorā. Eropirā yoari boje Jesu yarāre Goāmũ erāre ĩgu weredorerare wereñorā. Erā eropa werecũ peerā, Jesu yarāpũ mucubiri ñaro siporācũñorā. <sup>33</sup> Eropirā Juda, Sila mera erogue bajamenurigā erā árīra pñhrũ erā dujaricũ, ero majarā erā goeriserecũ, “Ñaro waque mña,” arīñorā Antioquía majarā. Eropirā Juda sãre obeñirāre ñadorebeñorā. Erā eropa arīra pñhrũ Juda waha wapũ. <sup>34</sup> Silapũ dujapũ Antioquíague. <sup>35</sup> Eropirā Pablo Bernabé sã bajamenuri dujañorā iri maca ta daja. Eropirā erā gajirā bajarā mera Jesu yare buhe wereñorā.

*Dipaturi Pablo ñari buherire buhecurigu wapũ daja*

<sup>36</sup> Eropii bajamenuri pñhrũ Pablo werepũ Bernabére.

—Ina, árīpehrerāre mari buhenuganirāre ĩhacurirā warā daja, arīpũ Pablo.

<sup>37</sup> Eropigu Bernabépũ Ñure erā mera aĩgādiaripũ. Ñu Marco peñe waĩcũpũ. <sup>38</sup> Pablopũ ĩgure aĩgādiabiripũ. Ero core ĩgu erā mera Panfliague ejagu erāre cohā dujaa wapũ. Eropigu ĩgu erā iirire yujuro bojebiri dujaa wapũ. ĩgu eropa yujuro bojebiricũ ĩagu Pablo dipaturi ĩgure aĩgādiabiripũ. <sup>39</sup> ĩgu aĩgādiabiricũ ĩagu Bernabé Pablo mera erā basi perā burigā arī game erā basi purumujucāñorā. Erā eropa arīra pñhrũ Bernabépũ Chipre waĩcũri nũgurogue Marcore aĩtaribuja wapũ. <sup>40</sup> Pablopũ Sila mera waha wapũ. Eropirā erā buherā waboro core Jesu yarā erāre obeorā, “Goāmũ mñare ñaro ĩhadibuporo,” arīñorā. Erā eropa arīra pñhrũ, Pablo Sila mera waha wapũ. <sup>41</sup> Eropa warā, Siria yeba, Cilicia yeba sãre eja, erogue Jesu yarāre ñaro siporācũ iri erā mucubiricũ iñorā erā.

## 16

*Timoteo Pablo Sila mera wapicũgãpũ*

<sup>1</sup> Erā eropa iira pñhrũ Pablo sã Derbegue, Listrague ejañorā. Erogue ejagu Timoteore bocajapũ. Timoteo Jesu yagu árĩgu, judio maso magu árĩpũ ĩgu. ĩgu pago sã Jesu yago ta árĩpo. ĩgu pagapũ Griego masu árĩpũ. <sup>2</sup> Eropirā Listra majarā, Iconio majarā, Jesu yarā Timoteore masa “Ñagu āhrimi,” arī weremñriñorā. <sup>3</sup> Eropigu Pablo Timoteore aĩgādiapũ. Eropirā iri yeba majarā judio masapũ Timoteo pagu griego masu ĩgu árĩcũ masiñorā. Eropigu Pablo judio masare guarĩ arĩgu, Timoteo dũpũre miri gasirogā wiri aĩpũ. Judio masa doreri iri arĩro dopa ta iipũ ĩgure. <sup>4</sup> ĩgu eropa iira pñhrũ waha erā ejari macari majarāre erā gojabeorapũ majare wereñorā. Iripũ Jesu ĩgu apinirā, Jesu yarā oparā mera Jerusaléngue árīrā erā gojabeorapũ árĩyoro. Eropirā erā iri dorerire ñaro wereñorā ero majarā Jesu yarāre. <sup>5</sup> Erā

eropa werecũ peerã, Jesu yarãpũ Jesure umupeonemoñorã. Eropirã Jesu yarã umuri nũcũ bajarã waniguicãñorã.

*Pablo quẽroque Macedonia majagũre ãapũ*

<sup>6-7</sup> Eropigũ Asia yebaguepũre ðari buherire buherã wadorebiripũ Espĩritu Santo erãre. Eropirã erã Frigia yebare taria, Galacia yebare taria, Misia yeba tũro pohro ejañorã. Bitinia yebapũ wadiariñorã erã. Eropigũ Espĩritu Santopũ erãre eroguere wadorebiripũ. <sup>8</sup> Ĩgũ eropa dorera pũhrũ erãpũ Misia yebare tarigã, Troague erañorã. <sup>9</sup> Eroque ĩgũ erara pũhrũ iri ñamire ðpa quẽpũ Pablo. Macedonia yeba majagũ ĩgũ pohro niguicũ ãapũ ĩgũ. “Guare Macedonia yeba majarãre itamugũ arique,” arĩ, sihupũ ĩgũ Pablõre. <sup>10</sup> ĩgũ eropa quẽra pũhrũ wahgã, gũa yare amutuhaja, Macedoniague waha wabũ gũa. “Goãmũ iri yebare ðari buherire buhedoregũ iimi marire,” arĩ pepibũ gũa.

*Pablo, Sila mera Filipogue áriũpũ*

<sup>11</sup> Eropirã gũa Troague áriũ dohodiru mera Samotracia waĩcũri nũguroque taribujajabũ gũa. Eropirã gajinũ Neápoligue wabũ gũa. <sup>12</sup> Iri macare taria, Filipogue Roma majarã ya macague ejabũ gũa. Iri maca Macedonia yeba áriũ maca áriũ. Guhyadiari maca áriũ iibũ. Eroguere bajamenũrigã gũa áriũ. <sup>13</sup> Eropirã Sabado áricũ gũa iri maca tũro pohroque, dia weca pohroque ejabũ. Ero Goãmũ mera erã werenigũiro áriũ. Ero doarã ero gamenererã nome mera weretamubũ gũa. <sup>14</sup> Yujugo guare peego Tiatira majago Lidia waĩcũgo áriũ. Eropigo igo ðari suhri wajacũri suhrire duago áriũ. Mari Pagũ Goãmũ sãre umupeogo áriũ. Eropigũ Pablo ĩgũ wererire ðaro peecũ iimi Goãmũ igore. <sup>15</sup> Eropii igore igo ya wihi majarã mera waĩyemi Pablo. ĩgũ eropa waĩyera pũhrũ ðpa arĩmo igo:

—“Jesu yago áhrra,” arãa mua sã yũre. Eropirã yaha wihi ñajarinique mua. Yũ mera dujanique, arĩmo igo guare.

Igo eroparĩcũ peerã igo ya wihi dujanibũ gũa. <sup>16</sup> Gajinũ Goãmũ mera erã werenigũiroque gũa wacũ watĩ ñajasũdigo bocatĩrimo guare. Igo gajirã pohro majago áriũ. Eropigo igo masare “Ōpa waroca mũare,” arĩ wereyugo áriũ. Irire masare werego wũaro wajatabasamo igo oparãre. <sup>17</sup> Eropigo Pablo mera gũa wacũ, guare nũrusia, gaguiniguimo igo.

—Oã Goãmũ turatarigũ ĩgũ itumurã áhrrima. Mari sĩrira pũhrũ Goãmũ marire ĩgũ ðaro taubõrore werema erã, arĩ gaguiniguimo igo.

<sup>18</sup> Bajanũri eropa arĩ garibomo Pablõre. Igo eropa arĩ gaguiniguicũ daja Pablo gamebigũ maji ĩha, ðpa arĩmi watĩre:

—Jesucristo turari mera dorea mũre. Igore duhuque. Wanisa mũhũ, arĩmi Pablo.

Ĩgũ eroparĩcũ ta watĩpũ waha wapũ.

<sup>19</sup> Watĩ igore eropa wara pũhrũ igo ðago dujago masa erã waburire werego áriũbirimo pare. Eropirã igo oparãpũ niyerure igo wajatabigo igo wacũ ãarã, erã Pablo Sila mera ñeama. Ñehatuhaja, erãre taragãma iri maca decogue oparã pohroque. <sup>20</sup> Eropa aĩgãrã, dipuwaja moadorerã pohroque erãre apima erã ðpa arĩrã:

—Oã judio masa mari ya macare gariborã iima. <sup>21</sup> Erã mari dorerire cóãdorerã, gaji buherire buherã iima. Mari ya dorerire tarinũgacũ iidiarã iima. Mari Roma majarã áriũrã oã erã wereripũre iimasibea



mari. Eropirã erã buherire mari gamebeaa, arĩma igo oparã dipuwaja moadorerãre.

<sup>22</sup> Erã eroparĩcũ peerã masa bajarã Pablo sã mera guatariacãma. Eropirã dipuwaja moadorerãpũ Pablo Sila sã ya suhrire erã yehgue cóara pũhrũ mũa yucugã mera tãradorema erãre. <sup>23</sup> Bũrigã erã tãrara pũhrũ peresu iima erãre. Erã eropa peresu iira pũhrũ peresure coregure ôaro ïhadibudoreñorã erã. <sup>24</sup> Erã eropa dorera pũhrũ erãre coregũpũ iri wihi poheca maja taribugue erãre api, taboamiji goberigue sĩhacu erã guburire bihacãpũ. <sup>25</sup> Ñami deco Pablo, Sila mera Goãmũre serẽ ïgũre bayapeoñorã. Erã eropa bayacũ peeñorã gajirã peresugue árĩrã. <sup>26</sup> Erã eropa bayacũ ta iri wihi bũrigã ñohmeyoro. Ero eropa ñohmecũ yujuro mera árĩpehreri disiporori pãrimaapehrea wayoro. Peresugue árĩrãre erã diriradari sã pãisiri dija wayoro. <sup>27</sup> Eropa wacũ ïagũ, iri wihire coregũpũ wahgã, ïgũ ñoserimijire aĩbeo, ïgũ basi ñosediaripũ. <sup>28</sup> ïgũ eropa iicũ ïagũ Pablo ïgũre bũrigã gaguinigui ôpa arĩpũ.

—Mũ basi ñero iibiricãque. Árĩpehrerã ôre ãhraa gua, arĩpũ ïgũ erãre coregure.

<sup>29</sup> ïgũ eroparĩcũ peegu erãre coregũpũ sihãgodore, erã pohrogue omagã Pablo, Sila guburi pohrogue naragã merejapũ ïgũ. <sup>30</sup> Eropigũ ïgũ erãre iri taribugue árĩrãre aĩ wiria, serẽpipũ erãre.

—¿Dohpa iigũcuri yũhũ Goãmũ ïgũ yũre taucũ gamegũ? arĩ serẽpipũ ïgũ.

<sup>31</sup> —Jesucristore umupeoque mũhũ. Mũ acawererã sã ïgũre umupeoporo. Mũa eropa iicũ Goãmũ mũare taugũcumĩ ïgũ pohro mũa waboro dopa, arĩ wereñorã erã.

<sup>32-33</sup> Erã eropa arĩrisubu ñami deco pũhrũgã árĩyoro. Erã eropa arĩra pũhrũ erãre coredigũ ïgũ ya wihigue aĩgãpũ erãre. ïgũ ya wihigue aĩja, erã camire coepũ ïgũ. ïgũ eropa coetuhajara pũhrũ ïgũ acawererã mera Goãmũ yare buhepũ Pablo sã. Erãre ïgũ buhera pũhrũ waĩyepũ. <sup>34</sup> Erãre waĩyetuhajara pũhrũ erãre coredigũ Pablo sãre bari peopũ. Eropirã ïgũ ïgũ acawererã mera ôari buherire erã peera pũhrũ bũrigã mucubiriñorã. Goãmũre masinũgañorã.

<sup>35</sup> Boyodiji merēcũ ïarã oparãpũ erã surarare peresugue obeoñorã Pablo sãre wiudorerã. <sup>36</sup> Erã eropa wiudorera pũhrũ iri wihire coregũpũ Pablo sãre werepũ.

—Oparã mũare wiudoreañorã. Eropirã gũiro mariro wirique, arĩpũ ïgũ Pablo sãre.

<sup>37</sup> Eropa erã wiudiaquerecũ ta Pablo werepũ surarare:

—Gũa ñero iibirabũ. Eropirã gua ne dipuwaja mara. Bu gohra ta erã oparãpũ masa bajarã erã ïhurore yucũ mera tãrama gũare. Gũa Roma majarã gua árĩquerecũ ta gũare tãrama. Tãratuhaja peresu iinama gũare. Eropirã dohpaguere masa erã ïabiro wiudiana gũare, gũare erã ñero iirare guhyasiuro tariri, arĩrã. Oparã erã basi ta ahri aĩ wiurã ariporo gũare, arĩpũ Pablo surarare.

<sup>38</sup> ïgũ eropa arĩ werecũ peerã dujaa wereñorã oparãre surarapũ. Erã eropa arĩ werera pũhrũ Pablo Sila mera Roma majarã erã árĩcũ masirã oparãpũ gũĩ árĩñorã. <sup>39</sup> Eropirã erã Pablo sã pohro ejarã, ôpa arĩñorã:

—Ñero iiaɓu ɓua muare. Ne eropa dipaturi iisome, arĩñorã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiridoreñorã. <sup>40</sup> Eropirã Pablo Sila mera peresugue árĩnirã wiri, Lidia waĩcugo ya wihigue eja, Jesu yarãre bocatĩriñorã. Eropirã erã Jesu yarãre ðaro wereñorã. ðaro sĩporãcucũ iĩñorã erãre. Erã eropa iira pũhrũ Pablo Sila mera waha wañorã.

## 17

### *Tesalónica majarã guañorã Jesu yarã mera*

<sup>1</sup> Eropirã erã Anfipoligue eja taria, Apoloniague eja taria, Tesalónicague ejañorã erã. Ero judio masa buheri wihi árĩyoro. <sup>2</sup> Eropigu Pablo iri buheri wihigue wapũ ãgu iiguaro dopa ta gaji macarigue árĩgu. Erogu eja, uñre semana gohra erã soorinũrire Sabadonũrire Goãmu yare iribojegue erã gojarare masare buhe, irire erã mera wereniguipũ Pablo. <sup>3</sup> Eropigu ãgu Goãmu yare werepũ ðpa arĩgu:

—Judio masa, muã Opũ muã coregu Cristo árĩpũ masa ya árĩburire ñero taribu. Eropigu ãgu sĩaria waha masa mũriapũ. Eropigu ihĩ Jesu yũhu arĩ weregu, ãgu Cristo gohra ta aħrimi marire taubu. ãgu ta aħrimi muã coregu. Eropa ta werea Goãmu yare erã gojarapũ, arĩ werepũ Pablo.

<sup>4</sup> ãgu eroparĩcũ peerã bajamerãgã ero árĩrã “Diaye ta aħraa,” arĩñorã. Eropirã erã Pablo sã mera wañorã. Eropirã gajirã sã griego masa bajarã Goãmure umupeorãpũ, Pablore peerã erã mera majarã nome sã, bajarã oparã nome sã, ãgure peerã Jesu yarã dujañorã. Eropirã Pablo sã mera wañorã. <sup>5</sup> Judio masapũ erã eropa iicũ ãrã erãre ãhaturĩñorã. Eropirã erã ñerãre mohmebirãre bajarãre sihu gameneo, ðpa arĩdoreñorã: “Pablo ãgu mera majarã mera ñero iirã iima,” arĩ gaguiniguidoreñorã erãre iri maca majarãre. Eropa gaguiniguirã árĩpehrerã iri maca majarãre guacũ iĩñorã Pablo sã mera. Eropirã erã judio masa Jasõ ya wihigue ñaja Pablo sãre amariñorã erãre masaguere omorã. <sup>6</sup> Eropa amarã erãre bocabiriñorã. Eropirã Jasõre, gajirã Jesu yarã sãre ñeha tarawiriañorã erãre. Oparã pohrogu aĩ eja, ðpa arĩ weresãñorã erã.

—Pablo sã masare árĩpehreroguerẽ garibotariañorã. Eropirã dohpaguere mari ya macaguere eratuħajama. <sup>7</sup> Eropigu ihĩ Jasõ erãre ãgu ya wihigue ñajaridoreami. Erã árĩpehrerã mari weca opũ Roma majagu ãgu dorerire tarinũgama. “Gajigu muã opũ aħrimi. Jesu ãgu ta aħrimi,” erã erĩcũ mari opũ César dorerire tarinũgama erã, arĩ weresãñorã judio masa erã oparãre.

<sup>8</sup> Erã eropa arĩ weresãcũ peerã, árĩpehrerã masa, oparã sã gua “¿Dohpa wahari?” arĩ pepiñorã. <sup>9</sup> Eropirã oparã Jasõre, ãgu mera majarã sãre niyerure wajayedore, wiucãñorã.

### *Pablo Sila mera Bereague ejañorã*

<sup>10</sup> Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Erogu eja judio masa buheri wihigue ñaja wañorã. <sup>11</sup> Judio masa Berea majarãpũ Tesalónica majarã tauro Goãmu yare ðaro peerã árĩñorã. Eropirã erã Jesu yare erã peera

pũhrũ “¿Diaye ta áhriri?” arĩ masidiarã, umuri nũcu Goãmũ yare erã gojarapũre eropa buheniguicãñorã erã. <sup>12</sup> Eropirã erã bajarã Jesure umupeoñorã. Griego masa sã, uma, oparã nome mera Jesure umupeoñorã. <sup>13</sup> Eropirã Pablo Bereague Goãmũ yare igũ buhecũ sãre peebeo Tesalónica majarã judio masa Bereague ejañorã. Erogue ejarã, Berea majarãre quere goroweoñorã. Pablo sã mera guacũ iĩñorã erã. <sup>14</sup> Erã eropa iicũ ïarã Jesu yarã Pablure yojaro mera wũariya tũrogue obeoñorã. Eropigu Sila, Timoteo mera Bereague ta dujañorã. <sup>15</sup> Eropirã gajirã Pablure Atenague aĩgã soñorã. Igũre sotuhaja maji dujaa wañorã. Erogue ejarã,

—Yojaro mera waha, wapicurã waque Pablure, arĩ wereñorã Silare, Timoteo sãre. Eropa arĩ weredorepũ Pablo erãre.

### *Pablo Atenague áripũ*

<sup>16</sup> Eropigu Pablo Atenague coregũ iipũ Sila, Timoteo sãre. Eropigu Atena majarã erã goãmarã wéanirãre bajarã erã opacũ ïagũ Pablo bũrigã bujawerepũ erã mera. <sup>17</sup> Eropa bujaweregũ judio masa buheri wihigue judio masa mera dũyaso wereniguipũ igũ. Eropigu daja judio masa áribirã mera sãre wereniguipũ igũ. Erã yujurãyeri Goãmũre umupeorã arĩñorã. Eropigu Pablo iri maca deco umuri nũcu igũ pohrogue eropa curimaji ñajarã mera wereniguipũ. <sup>18</sup> Gajirã epicũreore yare buherã, estoico yare buherã sã Pablo mera wereniguiñorã.

—¿Ihĩ wereniguiiri pehrebũ dohpã arĩ wereniguiũ iiri igũ? arĩñorã erã.

Pablo Jesu yare, igũ masa mũriarare igũ werecũ peerã õpa arĩ pepiriñorã erã masa. “Igũ gajirã goãmarãre weregũ iicumi,” arĩ pepiriñorã erã. <sup>19</sup> Erã peera pũhrũ erã wereniguirogue Areópago waĩcurogue Pablure aĩgãñorã.

—I buheri, mama buherire mũhũ dohpague wererare masidiaa gũa. <sup>20</sup> Mũ buheri gajiropa áhrra. Eropirã gũa irire masidiaa, arĩñorã erã Pablure.

<sup>21</sup> Áripheerã Atena majarã umuri nũcu mama buherire wereniguidiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo igũ wererire peediañorã erã.

<sup>22</sup> Eropigu Pablo Areópago waĩcuro wahgãnũgaja õpa arĩ werepũ:

—Atena majarã, bajarã goãmarã wéanirãre mũa bũrigã umupeocũ masia yũhũ. <sup>23</sup> I maca mũa ya macare goãmarã wéanirãre mũa umupeori gororire ïhacuriabũ yũhũ. Eropa ïhacurigu yũ sã yuju gorogue mũa goja apirare buheabũ. “Goãmũ, mari masibigu yare umupeori goro áhrra,” arĩ gojarare buheabũ mũa irire apiroguere. Mũa igũre masibiriquerã igũre umupeoabũ mũa. Igũre ta mũa masibigure weregũ iiaa yũhũ mũare.

<sup>24</sup> “Goãmũ áripheerri yebare, yeba maja sãre deyoro moañumi. Igũ mũarore, yebare opũ árigũ igũ masa erã iira wiri áribeami. <sup>25</sup> Eropigu igũ mari áricũrũre ogũ mari itamurire gamebeamĩ. Igũ mojomorocũgũ áribeamĩ.

<sup>26</sup> “Igũ yujugũ mũa mera áripheerri yeba majarãre masare iĩñumi. Eropigu áripheerri yebaguere marire apiñumi igũ. “Ipẽ yoari boje õguere áriñãcoma,” arĩgũ queo apiñumi marire. <sup>27</sup> “Erã amarã

yure bocarâcoma,” arî pepiñumi Goãmũ. Eropigu Goãmũ yoarogue árîbeamî. Mari mera ta âhrimi. Őpa arî gojañumi gajigu. <sup>28</sup> “Marire árîcũ iimi ïgu. Ïgu maricũ mariboya mari sã. Eropigu masa nũcure eropa árînicũcãmî ïgu,” arî gojañumi. Mũa mera majarã iribojegue majarã bayarire ôaro gojarã erã gojara âhraa iri. “Mari sã Goãmũ porã âhraa,” arî gojañorã erã. <sup>29</sup> Eropirã mari ïgu porã árîrã, goãmarã wéanirãre, oro, plata, ıtã mera mũa gamero mũa iinirãre “Goãmũ âhrimi,” arî pepibiricãque mũa. <sup>30</sup> Iribojegue masa masibirã erã árînicũ erã ñero iiquerecũ ta Goãmũ eropa ïacãniñumi. Eropa iiqueregu dohpaguepũre árîpehreri yeba majarãre erã ñerire bujaweredoremi Goãmũ. <sup>31</sup> Pũhrũ ïgu queorinũ árîpehreri yeba majarãre diaye ta beyegũcumi Goãmũ ôarãre, ñerãre. Ïgu beyedore ïgu apidiro dopa Jesupũ beyegũcumi. Jesure sîridigũguere masupũ ïgu. Eropa masugũ “Ihî yũ apidigu âhrimi,” arî, ïhmugũ iipũ Goãmũ masare, arî werepũ Pablo Atena majarãre.

<sup>32</sup> Ïgu eroparîcũ sîrinirã masa mũriarare ïgu werenigũcũ peerã gajirã ïgure wereyañorã.

Gajirãpũ ôpa arîñorã:

—Dipaturi ire mũ werecũ gua peediaa daja, arîñorã erã Pablöre.

<sup>33</sup> Erã eropa arîra pũhrũ Pablo waha wapũ. <sup>34</sup> Eropirã bajamerãgã ïgu mera árîrã Jesure umupeonũgañorã. Dionisio Areópago majagũ oparã mera majagũ Jesure umupeonũgapũ. Dãmari waïcũgo sã, gajirã mera Jesure umupeonũgapo.

## 18

### *Pablo Corintogue árîpũ*

<sup>1</sup> Eropigu Pablo Atenague árîdigũ waha Corinto waïcũri macague ejarũ. <sup>2</sup> Eroque ejaquũ judio masũ Aquila waïcũgũre bocajapũ ïgu. Árîpehrerã weca opũ Claudio waïcũguũ judio masare Romague árîrãre ïgu cóacũ Aquilapũ ïgu marapo Priscila mera waha, Corintogue ejarũ. Aquilapũ Ponto waïcũri yeba masa dehyoadigu árîpũ. Eropirã erã Corintogue árîcũ Pablo erã pohroque ejarũ. <sup>3</sup> Aquila sã suhri wirire iirã arîñorã. Pablo sã suhri wirire iigu ta árîpũ. Eropigu ïgu erã mera mohme ero dujarũ. <sup>4</sup> Eropigu Pablo Sabado árîcũ semanari nũcũ judio masa erã buheri wihigue judio masare, judio masa árîbirã sãre Goãmũ yare werepũ.

—Ihî ïgu werenigũri diaye ta âhraa, arîñorã masapũ erã peera pũhrũ.

<sup>5</sup> Eropigu Sila, Timoteo mera Macedoniague árîñirã Pablo pohroque ejañorã. Eroque erã ejara pũhrũ, Pablo suhri wiri mohmerire duhucã ımũri nũcũ judio masare buhemũripũ.

—Jesucristo marire taubu mari coredigu ta âhrimi, arî werepũ erãre.

<sup>6</sup> Ïgu eropa arî buhequerecũ ta judio masapũ ïgure peediabiriñorã. Eropirã erã ñero quere goroweñorã ïgure. Erã eropa iicũ Pablo erãre ïgu turibodiro dopa ta, ïgu suhri maja mera pasiri mehpiũ.

—Mũa ya dipuwaja peamegue warãca. Goãmũ ïgu dorediro dopa ta mũare buherabũ yũhũ. Mũarũ yure peediabirabũ. Dohpagueere yũpũ judio masa árîbirãre buheguũ wagura, arîpũ Pablo judio masare.

7 Īgu eropa arīra pūhrū ĭgu erogue árīdigū waha, Tito Justo waĩcūgu ya wihigue ejapū. Justo Goāmure umupeogu árīpū. Īgu ya wihipū judio masa buheri wihi pohro árīyoro. 8 Eropirā Crispo waĩcūgu iri buheri wihi opū, ĭgu marapo, erā porā mera mari Opū Jesure umupeoñorā. Eropirā gajirā Corinto majarā bajarā Goāmū yare peerā, Jesure umupeoñorā. Erā eropa umupeorā árīcū erāre waĩyerū. 9-10 Yuju ñami Goāmū quēroque werepū Pablöre. Īgure ōpa arīpū:

—Mū mera āhraa. I macare yaharā bajarā āhrima. Eropirā gajirā masa mure ñero iimasibeama. Eropigū güibita mūhū. Eropigū yahare burigā wereque. Eropa pepibircāque, arī werepū Goāmū Pablöre.

11 Eropigū yuju bojori ōaro gaji bojori deco gohra ero majarāre Goāmū yare buhe, árīmūripū Pablo.

12 Īgu eropa árīrisubu Galiō waĩcūgu Acaya yeba majarā opū ĭgu árīcū, judio masa árīpehrerā yujuropa ta Pablöre ñero weresārā erañorā. Īgure ñeha dipuwaja moadorerā pohroque aĩgāñorā erā Galiō pohroque. 13 Aĩgā ōpa arī weresāñorā ĭgure:

—Ihī masare Goāmure umupeodoregū i yeba maja doreripūre cóādoremi, arī weresāñorā judio masa dipuwaja moadorerāre.

14 Erā eropa arī weresācū peegū Pablopū erāre werediaripū. Eropigū Galiō opūpū judio masare werepū.

—Ihī ñerire iidigū árīcū gūa Romano majarā ya dorerire tarinūgagu árīcū, mūare yūhriboaya yūhū. 15 Mūa ya doreripūre ihī tarinūgagu ĭgu árīcū mūa basi ire amuque. Ire masibea yūhū mūa mera, arī werepū ĭgu judio masare.

16 Eropa arīgu ta erāre Pablöre weresāñirāre ĭgu ya taribugue árīrāre cohā wiucāpū ĭgu. 17 Īgu eropa cohā wiura pūhrū árīpehrerā iri wihi árīrā Sóstenere judio masa buheri wihi opūre Jesu yagure ñeha, dipuwaja moadorerā pohroque pañorā ĭgure. Erā eropa pacū ĭagu Galiō eropa ĩacāpū.

### *Pablo Antioquíague dujaa wapū daja*

18 Eropigū Pablo Corintogue yoari boje árīdigū “Wagu iiaa,” arī goeriserepū ĭgu Jesu yarāre.

Īgu eropa arīra pūhrū ĭgu Priscila, Aquila mera Siria yebague árīri macague taribuja wapū. Cencrea waĩcūri macague erā taribujara pūhrū Pablo Goāmure “Ōpa mure iibasagūra,” ĭgu arīrare iituhajagu árīpū. Eropigū eropa iigu judio masa erā iiro dopa ta ĭgu poarire wūapehocādorepū. 19 Eropirā erā Efeso waĩcūri macague eja, Priscilare, Aquila säre apipū Pablopū. Erāre ero api, ĭgūpū judio masa erā buheri wihigue wapū. Iri wihigue eja, Goāmū yare werepū. Eropa weregū judio masa mera dūyaso werenigūipū. 20 Īgu eropa werera pūhrū ĭgure erā mera dujadoreriñorā erā. Erā eroparīquerecū,

—Dujabeaa mūa mera, arīpū Pablo erāre. 21 Eropa arīgu ta,

—Jerusaléngue yūre waro gahmea. Bosenure ĭagu wabu iiaa. Eropigū wagu iiaa. Goāmū gamecū dipaturi dujariboca, arīpū erāre.

Īgu eropa arītuhaja Efesogue árīdigū taribuja wapū. 22 Eropigū Cēsareague taribujaja tarigā, Jerusaléngue ejapū. Eroque eja, ero majarā Jesu yarāre “¿Ne āhriri mūa?” arī, erāre ĩha taria Antioquíague ejapū daja. 23 Ero bajamenūri árīpū. Ero árīdigū tariapū. Galacia yeba

áriri macarigue, Frigia yeba áriri macarigue dipaturi eja, iri macari majaräre Jesu yaräre buhe ðaro mucubiricũ iipũ.

*Apolo waĩcũgu Efesogue buhepũ*

<sup>24</sup> Irisubure, judio masũ Apolo waĩcũgu, Alejandría maca majagu Efesogue ejapũ. Īgu ðaro weremehregũ árĩpũ. Eropigu ĩgu Goãmũ ĩgu gojarare ðaro masipũ. <sup>25</sup> Gajigu ĩgure Goãmũ yare weretuhamuripũ. Eropigu ĩgu Ñũ waĩyegũ ĩgu buheri dihtare masipũ. Eropa árĩqueregu ĩgu burigã mucubiriri mera Jesu yare ðaro buhepũ. <sup>26</sup> Eropigu judio masa erã buheri wihigue ĩgu güiro mariro erãre buhenũgapũ. Īgu eropa buhecũ erã peera pũhrũ Priscila Aquila mera ĩgure erã mera aĩgãñorã. Goãmũ yare ðaro diaye ðaro ĩgu werepehobiricũ ĩarã diaye werepehocãñorã erã ĩgure. <sup>27-28</sup> Eropigu ĩgu Apolopũ Acaya yebague ĩgu wadiacũ Jesu yarã ĩgure “Ōaro waque,” arĩ, erã gojarapũrire oñorã ĩgure. Iripũri Acayague árĩrã Jesu yaräre Apolore ðaro bocatĩridoreripũri árĩyoro. Eropigu Apolo erogue ejagu ero majaräre Jesure umupeoräre Goãmũ mahiri mera ðaro itamupũ. Judio masare iri maca árĩrãre ðpa arĩ werepũ:

—Goãmũ ĩgu obeodigu mũa coredigu àhrimi Jesu. Cristo gohra àhrimi, arĩ werepũ judio masare gajirã masa erã ĩaro.

Īgu eroparĩcũ, Goãmũ wereniguiiri gojarapũre ðaro queroro wrecũ erã pee “Diaye árĩbeaa,” arĩmasibiriñorã erã. Eropigu Jesu mahiri mera Jesure umupeoräre ĩgu ðaro itamupũ erãre Apolo.

## 19

*Pablo Efesogue warũ*

<sup>1</sup> Corintogue Apolo ĩgu árĩrisubu, Pablopũ utã yucũgue mũri taria, Efesogue ejapũ. Erogue eja, yujurãyeri Jesu yaräre bocajapũ. <sup>2</sup> Erãre ĩgu bocajara pũhrũ ĩgu erãre serẽpi ĩapũ.

—¿Mũa Jesure umupeora pũhrũ mũapũ Espĩritu Santore opanũgari? arĩ serẽpi ĩapũ Pablo.

Īgu eroparĩcũ peerã ĩgure ðpa arĩ wereñorã erã:

—“Espĩritu Santo àhrimi,” arĩ ne werebirama guare, arĩ wereñorã erã.

<sup>3</sup> Erã eropa arĩ werera pũhrũ Pablo erãre serẽpi ĩapũ daja:

—¿Noa ya buherire mũa peera pũhrũ waĩyeari mũare? arĩpũ ĩgu daja.

—Ñũ ya buherire gũa peera pũhrũ waĩyeama guare, arĩ wereñorã erã.

<sup>4</sup> Erã eroparĩcũ peegu ðpa arĩpũ Pablo:

—Masa erã ñeri iirare erã duhucũ ĩagu waĩyerũ Ñũ. Eropiro ĩgu waĩyeripũ erã ñeri iirare erã duhurare masare ĩhmuburi árĩyoro. Eropigu gajino sãre werenemopũ Ñũ. “Yũ pũhrũ aribure ĩgure umupeoque mũa,” arĩpũ Ñũ masare. Eropa arĩgu Jesure ta umupeodoregu iipũ, arĩ werepũ Pablo erãre.

<sup>5</sup> Īgu eroparĩcũ erã peera pũhrũ, Jesu waĩ mera waĩyerũ erãre.

<sup>6</sup> Eropigu Pablo erã yujurãyeri weca ĩgu mojtoreire ĩgu duhpeocũ, Espĩritu Santopũ erapũ erãguere. Īgu eropa erara pũhrũ erãpũ

peeyamariri yare werenigui, Goāmũ yare wereñorã. <sup>7</sup> Erã árĩpehrerã doce ʘma erã árĩñorã.

<sup>8</sup> Pũhrũ Pablo judio masa erã buheri wihigue ñaja, ʘrerã abe gohra güiro mariro Goāmũ ĩgu opũ árĩrare were, wereniguiũ erã mera. ĩgũre erã eropa peera pũhrũ “I diaye ta áhraa,” arĩñorã erã. <sup>9</sup> Gajirãpũ peediabiriñorã. Eropirã erã masa erã peeuro iri õare buherire ñero arĩ werenigui ĩhmuñorã. Erã eroparĩcũ peeũ Pablopũ Jesu yarãre sihu wiria, gajipũgue waha wapũ. Waha, Tirano waĩcũgu ya buheri wihigue ʘmũri nũcu masare Goāmũ yare werepũ ĩgu. <sup>10</sup> Pe bojori gohra buhepũ erãre. ĩgu eropa buhecũ árĩpehrerã Asia yeba majarã judio masa, judio masa árĩbirã mera mari Opũ Jesu yare peeñorã. <sup>11</sup> Eropigũ Goāmũ turari mera Pablo bajasuburi deyoro moarire ii ĩhmupũ. <sup>12</sup> Pablo ĩgu suhri gasirore, ĩgu suhrirore ĩgu dupũ pẽhrera gasirore dorecurãre aĩgãñorã gajirãpũ. Masa dorecurã iri suhrire pẽhrerã õarã wañorã. Eropirã watẽa ñajasũnirã iri suhrire erã pẽhrera pũhrũ watẽa wiria wañorã erãre.

<sup>13-14</sup> Gajirã judio masa eropa curiniguirã watẽare cóãrã judio masa yeea árĩñorã. Eseva waĩcũgu siete ĩgu porã árĩñorã. Esecvapũ judio masũ pahia opũ árĩpũ. Eropirã erã Pablo ĩgu iidiro dopa ta Jesu turari mera watẽare cóãdiariñorã. Eropirã watẽa ñajasũdigũre boca watẽare doreriñorã erã.

—Jesu Pablo ĩgu weregũ ĩgu turari mera dorea mũare. Duhuque ĩre, arĩñorã erã. <sup>15</sup> Watẽare erã wadorera pũhrũ, watẽapũ masũguere õpa arĩñorã erãre.

—Jesure masia. Pablo sãre masia. Mũapũre masibea, arĩñorã watẽa erãre.

<sup>16</sup> Erã eroparĩcũ ta watẽa ñajasũdigũpũ burigã erãre ñehamaa wapũ. Eropigũ erãre ñetariaro iipũ. ĩgu eropa iira pũhrũ suhri marirã, camicurã oma wiriañorã erã iri wihire watẽa cóãdiarãpũ. <sup>17</sup> Erã eropa iira pũhrũ árĩpehrerã Efeso majarã, judio masa, judio masa árĩbirã mera irire pee, güitariacãñorã erã. Eropirã mari Opũ Jesu yare wereyaro mariro wereniguiñorã masapũ.

<sup>18</sup> Eropirã masa bajarã Jesure umupeorã erã ñero iirare wererã arĩñorã. <sup>19</sup> Erã mera majarã bajarã yeea árĩñorã. Eropirã erã erã gojarapũrire purisiriri wereripũrire erogũ aĩgãri, masa erã ĩaro iripũrire soe cóãcãñorã erã. Iripũri wajacũrare erã queocã, árĩpehreripũri cincuenta mil plata árĩripũri wajacũriyoro iripũri. <sup>20</sup> Eropirã Goāmũ yare gamerã bajarã wañorã. Goāmũ turari mera ĩgu yarã wañorã.

<sup>21</sup> Erã eropa wara pũhrũ Pablo õpa arĩ pepipũ: “Macedonia yeba ejamũhta, iri yebare taria Acaya yebagũre ejagũra. Iri yebare yũ ejara pũhrũ Jerusalengũ wagũra. Iri macare yũ ejara pũhrũ Romagũ ĩagũ wagũra,” arĩ pepipũ Pablo. <sup>22</sup> Eropigũ perãre ĩgũre itamurãre ĩgu core obeomũhtapũ Macedonia yebagũ. Timoteo Erasto sã árĩñorã erã. Eropigũ Pablopũ yujugũ ta dujapũ Asia yebagũ.

### *Efesogue masa gua gaguiniguñorã*

<sup>23</sup> Irisubure Efesogue Jesu yare gajirã gamebirã Pablo sãre ĩhaturiñorã. <sup>24</sup> Yujugũ platare mohmegũ Demetrio waĩcũgu árĩpũ. ĩgu plata mera erã goãmo Artemisa waĩcũgo umupeori wihi wẽara wirire mũta wirigãre ĩgu árĩpũ. Eropigũ ĩgu gajirã plata mohmerã mera erã

wéaniräre wuaro dua wajatamuriñorã erã. <sup>25</sup> Eropigu Demetrio gajirã plata mohmeräre sihu gameneo, werepu eräre.

—Peeque mua. I mohmeri mera mari wéanirã mera wuaro mari wajatarare masia mua. <sup>26</sup> Ihĩ Pablo igu iirare igu buhera sãre masia mua. Ōpa arĩ buhemi igu: “Goãmarã wéanirã masa erã iinirã ojocarirã árĩbeama,” arĩ weremurami igu. Igu eroparicũ peerã, Efeso majarã, árĩpehrero Asia yeba majarã sã igu buherare “Diaye ta ãhraa,” arãñorã irire. <sup>27</sup> Eropa arĩrã mari mohmerire mari wéarare masa gamesome. Eropirã mari goãmo wuago Artemisa ya wihire cóãbocoma. Eropirã árĩpehrerã Asia yeba majarã, árĩpehreri yeba majarã igore umupeosome pare. Eropirã masa igore masibirã mari wéarare asũsome, arĩpu Demetrio eräre.

<sup>28</sup> Igu eroparicũ peerã burigã gua, gaguiniguñorã:

—Artemisa Efeso majarã yago goãmo turago ãhrimo, arĩ gaguiniguñorã erãpu.

<sup>29</sup> Erã eropa gaguiniguicũ Efeso majarã árĩpehrerã sã gaguiniguitarria wa pee masiri pehrea wañorã. Eropa warã Gayore, Aristarco sãre ñeha, masa erã gamenererogue eräre taragãñorã. Gayo, Aristarco mera Macedonia majarã árĩñorã. Pablo mera curirã árĩñorã. <sup>30</sup> Eräre ñeacũ iha Pablopũ masa pohro weregu wadiaripũ. Jesu yarãpu igure wadobiriñorã. <sup>31</sup> Eropirã gajirã sã iri yeba majarã oparã, Pablo mera majarã árĩrã erã pohro majaräre weredoreñorã Pablore:

—Masa erã gamenererogue wabiricãque, arĩ weredoreñorã oparã Pablore.

<sup>32</sup> Eropirã ero gamenererã mera majarãpu bajarã “¿Duhpimorã mari gamenererã iiri?” arĩ masibiriñorã. Eropirã erã gaguiniguinemoñorã. Ipuque árĩrã gajiropa arĩ gaguiniguĩ, gajirã sã gajiropa arĩ gaguiniguñorã. <sup>33</sup> Eropirã judio masapu Alejandro waicugure masare weredoreriñorã. Eropigu Alejandro “Ejarimaricãque,” arĩgu igu mojoto mera paatupu. “Oã guare judio masare turirã iima,” arĩ pepigu judio masare cãhmotadiagu wereniguiripũ. <sup>34</sup> Igu eropa wereniguidiaquerecũ judio masu igu árĩcũ ñarã masa árĩpehrerã yujuro mera pe hora gaguiniguñorã.

—Artemisa, Efeso majarã yago mari goãmo turago ãhrimo, arĩ, gaguiniguñorã erã.

<sup>35</sup> Erã eropa arĩ gaguiniguicũ ñagu Efeso majarã oparäre itamugu masare “Ejarimaricãque,” arĩ, werepu eräre.

—Mua Efeso majarã peeque. Mari Efeso majarã turago Artemisa ya wihi corerã mari árĩcũ árĩpehreri yeba majarã masima. Eropirã igo wéarare umarogue dijaridigore diburã mari árĩcu sãre masima masa. <sup>36</sup> Eropirã “I diaye árĩbeaa,” arĩmasibeama. Eropirã guabiricãque mua. Ōaro pepique mua. <sup>37</sup> Oã mua ñeagãrirã mari goãmore ñero arĩ wereniguibirama. Eropirã erã goãmarã ya wiriguere ñaja, yajabirama. Eropirã ñaro iique mua. <sup>38</sup> Demetrio, plata mohmerã mera oãre mua ñearäre weresãdiarã, dipuwaja moaropure wereporo erã. Erã oparäre oãre weresãmasima. <sup>39</sup> Mua gajino iidiarã, ñaro mera irire gamenere iique. Mua iiro dopa iinemobiricãque. <sup>40</sup> Dohpagãre mua gua, gaguinirare mari oparã peerã, erã marire weresãbocoma. “Marire cóãrã icoma,” arĩ pepirãcoma oparã marire. Eropirã mari arĩ gaguiniguirare eräre ñaro diaye weremasibeaa mari,



arĩpũ oparãre itamugũpũ masare. <sup>41</sup> Eropa arĩ weretuhaja, “Iripẽta ãhraa. Waque,” arĩpũ ãgũ masare.

## 20

*Macedonia yebague sãre, Grecia yebague sãre Pablo ejapũ*

<sup>1</sup> Erã eropa wara pũhrũ, Pablopũ Jesu yarãre sihu gameneo wererũ. Weretuhaja, mojoto ñeha, goerisererũ. Goeriseretuhaja, Macedoniague waha wapũ. <sup>2</sup> Eroque eja were, ero majarã Jesu yarãre mucubiricũ iipũ ãgũ. Erãre weretuhaja, Greciague ejapũ ãgũ. <sup>3</sup> Erore ãgũ urerã abe gohra árĩpũ. Ero árĩgũ Siria yebague taribuja wadiaripũ. Eropirã judio masa duhri, ãgũre ñeadiariñorã. Irire pee Pablo gaji mague Macedonia wari mague waha wapũ. <sup>4</sup> Eropa wagũ Asiague ta ejapũ. Ero Berea majagũ Sópater waĩcũgũ Pablоре wapicũgãpũ. Eropirã Tesalónica majarã Aristarco, Segundo sã ãgũre wapicũgãñorã. Eropirã Asia majarã Tíquico, Trófimo sã Asiague ãgũre wapicũgãñorã. Derbe majagũ Gayo waĩcũgũ Timoteo sã ãgũ mera wañorã. <sup>5</sup> ãgũ mera majarã ãgũ core waha, Troa waĩcũri macague ãgũre coreñorã. <sup>6</sup> Erã eropa corecũ bugabiriri panre bari bosenu pũhrũ guapũ Filipogue árĩnirã dohodiru mera waha, cinco nũri taribujarã Troague gua ejabũ. Siete nũri gohra árĩbũ gua eroguere.

*Troague Pablo curigũ wapũ*

<sup>7</sup> Soorinũ árĩcũ Jesu yarã gamenere panre duhpeoñorã Goãmũ yare bocatĩrimorã. Erã eropa iiboro core Pablo erãre buhepũ. Eropigũ Pablo gajinũpũre wabu árĩgũ yoari boje ãgũ buhepũ. Ñami deco mera buhe duhubu iiripũ. <sup>8</sup> Eropirã erã umaro maja taribugue baja dipu sihãgori dipu árĩri taribugue gamenereñorã. <sup>9</sup> Pablоре erã peerisubu mamũ Eutico waĩcũgũ ventana weca mũribejaja doapũ. Eropigũ Pablo erãre yoari boje buhenemocũ ãgũ mamũre wũja ariyoro. Eropigũ ãgũ carĩa wa uñre caya wecague doadigũ majimadija wapũ. ãgũ eropa yuhridijara pũhrũ erã ãgũre sĩriadigũguere aĩwahgũ doboñorã. <sup>10</sup> Erã eropa iicũ ãgũ Pablo dijari, mamũre papeopũ. ãgũ eropa iira pũhrũ Jesu yarãre wererũ ãgũ.

—Sĩporã ñebiricãque. Sĩribeami ihĩ. Ojocarimi, arĩpũ Pablopũ.

<sup>11-12</sup> ãgũ eroparĩcũ mamũpũ sĩridigũpũ masa wapũ. ãgũ masacũ ñha erã mucubiritaria wañorã. Eropa mucubirirã umaro maja taribugue mũria, panre duhpeoñorã bocatĩrimorã. Erã eropa iira pũhrũ yoari boje Pablo erãre buhepũ daja. Boyoboro coregã erãre buheduhupũ. Buhetuhajacã waha wapũ Pablo.

*Pablo Troague árĩdigũ waha, Miletogue ejapũ*

<sup>13</sup> Pablo core dohodiru mera Asogue guapũ ejamũhtabũ. Pablopũ mague wadiami. Pablo ãgũ arĩdiro dopa ta Asogue ãgũre gua bocatĩribũ. <sup>14</sup> ãgũre gua bocatĩricũ, gua mera ñajami dohodirugue. Iriru mera waha, Mítilenegue gua ejabũ. <sup>15</sup> Eroguere eja taria gajinũ Quíore tariabũ gua. Gajinũ Samogue ejabũ gua. Gua carĩra pũhrũ gajinũpũre Miletogue ejabũ pare gua. <sup>16</sup> Pablo Pentecostenũ gohra Jerusalenguere ejadiami. Eropigũ Asia yebague yoari boje árĩdiabirimi. Eropigũ Efesore diaye taria, Miletogue ejatuhajabũ gua.

*Pablo Efeso majarã Jesu yarã oparãre wererũ*

17 Eropigu Pablo Miletogue árĩgu, Goãmu yarã Efeso majarã Jesu yarã oparãre sihubeomi ĩgu. 18 Eropa ĩgu sihubeora puhru erã Pablo pohroge erama. Erã eracũ ĩagu erãre Pablo weremi.

—Asiague ne eragu mua mera ya ĩrare masia mua. 19 Mua mera árĩgu ne gajiropa arĩro mariro Jesu mari Opũ yare ĩmũribũ yũhũ. Eropigu mũare mojomoro ĩabũ. “Mũare tarinũgaa,” arĩbirimũribũ yũhũ. Judio masa erã yare ñero ĩquerecũ ta Goãmu yare ĩmũribũ yũhũ. 20 Eropigu mua ðaro waburi dihtare mũare buhepehocãbũ yũhũ. Masa erã ĩaro mua wirigue sãre buhebũ yũhũ. 21 Eropigu judio masare, judio masa arĩbirã sãre yujuropa ta buhebũ yũhũ. “Mua ñerire bujawereque. Goãmu yare gohrotoque. Eropirã Jesu mari Opũre umupeoque,” arĩ weremũribũ yũhũ. 22 Eropigu Espĩritu Santo ĩgu dorediro dopa ta dohpaguere Jerusalengue wagu ĩaa. Yũ erogue wagu yũ gajiropa waborore masibea yũhũ. 23 Őpa arãmi Espĩritu Santo yũre: “Jerusalengue mũhũ ñero tarĩguca. Eropirã mũre peresu ĩirãcoma,” arãmi Espĩritu Santo yũre. Dohpaguere yũ ejara macari nucũgue eropa arĩ wereama yũre. Jerusalengue wagu Espĩritu Santo ĩgu werera dihtare masia. 24 Eropigu ðari buherire, Goãmu ĩgu mahiri buherire werebu ãhraa yũhũ. Jesu mari Opũ ĩgu ya arĩburire ĩpehodiaa yũhũ. Ire ĩgu árĩgu, yũ sĩriborore gũibeaa yũhũ.

25 “Eropigu mua mera árĩgu Goãmu ĩgu opũ arĩrare weremũribũ yũhũ mũare. Mua yũ eropa arĩ buhenĩrãre ne dipaturi mũare ĩasome yũhũ. Ire masia yũhũ. 26-27 Eropa masigu dohpagãre ire werea mũare. Arĩpehreri Goãmu yare werebũ yũhũ mũare. Eropirã arĩpehrerã mua mera majarã Goãmu yare gamebirã erã arĩcũ yaha dipuwaja arĩbeaa. 28-29 Mua basi ðaro ĩique. Eropirã mua Jesu yarãre Espĩritu Santo mũare ĩgu ĩhadibudorerare ĩhadibuque. Ovejare ĩhadiburã ovejare erã ĩhadiburo dopa ta Goãmu yarã sãre ĩhadibuque mua. Goãmu magũ ĩgu sĩrigũ ĩgu di cóaro mera Goãmu erãre ĩgu yarã arĩmorã ĩidi arĩmi. Yũhũ ðre wara puhru gajirã ñerãpũ mua pohro ahri erã buheri mera mũare goroweo dũca waricũ ĩirãcoma. Eropirã Jesu yarãre ðaro ĩhadibuque. 30 Puhruquere gajirã mua mera majarã ta Jesu yarãre guya, gaji buherire peedorerãcoma. Erã eropa peedorecũ erã peerãcoma. 31 Eropirã ðaro ĩique mua. Őmuri nucũ, ñamiri nucũ mojomoro ĩari mera buhemũribũ yũhũ mũare. Őhre bojori gohra ðaro buhebũ mua arĩpehrerãre. Iire yũ buhera ðaro guñaniguicãque mua.

32 “Dohpaguere yũ wara puhru Goãmu mũare ĩhadibugũcumi. ĩgu mahiri buherire mua buherã ðaro arĩrãca mua. Goãmu ĩgu buheri mera mũare ĩgu yarãre ðaro itamumasimi. Eropigu ĩgu yarã dihtare ĩgu ĩidiadiro dopa ta mua tamerare ðaro ĩigũcumi. 33 Mua niyeru oparire, mua suhri opari sãre “Yũre oque,” arĩbirimũribũ. 34 Yũ basi mohme wajatabũ yaha arĩburire. Eropigu yũ gamerire, yũ mera majarã erã gameri sãre yũ mohme wajatara mera aĩmũribũ. Yũhũ eropa ĩrare masia mua. 35 Mari ðpa burigã mohmerã gajino moorãre itamuro gahmea marire. Ire mũare ĩi ĩhmumũribũ yũhũ. Jesu mari Opũ ĩgu arĩrare guñaque mua. “ĩgu ocũ ñeadigũ tauro odigũpũ mucubirimi,” arĩpũ Jesu ĩgu basi, arĩ weremi Pablo Jesu yarãre.

36 Eropa arĩtuhaja Pablo erã mera mereja, Goãmũre serẽma. 37 ĩgu eropa serẽtuhajacũ erã arĩpehrerã Pablore pabua wayuporã mimi ore

goeriserema. <sup>38</sup> “Mũare dipaturi ïasome yũhũ,” ïgũ arĩcũ peerã bũrigã bũjowerema erã. Eropirã erã ïgũre tuunũrusia buhama peramague. Eroguẽ ïgũre ïhanũrusiama gũa wacũ.

## 21

### *Pablo dipaturi Jerusalẽngue wapũ*

<sup>1</sup> Jesu yarãre “Wagũ iiaa,” arĩ, dohodiru mera, Cos waĩcũri nũgũrogue diaye waha taribujajabũ gũa. Gajinũ Roda waĩcũri nũgũrogue taribujaja, taria, Pátara waĩcũri macague ejabũ gũa. <sup>2</sup> Pátara árĩrã, Feniciague waburidirure dohodirure bocajabũ gũa. Eropirã iriru mera wabũ gũa. <sup>3</sup> Eropa warã Chipre waĩcũri nũgũrogue diaye ta ïha tariabũ gũa. Copũ dujabũ iri nũgũro. Iri nũgũrore taria, Siria waĩcũri yebague ejabũ gũa. Eropirã dohodiru maja doberire dohodiru majagũ Tiro waĩcũri maca ïgũ durimujucũ, ero payanibũ. <sup>4</sup> Ero Jesu yarãre ïarã, siete nũri gohra dujanibũ gũa iri maca ta. Eropirã ero majarã Jesu yarã Espĩritu Santo ïgũ werediro dopa ta erã Pablore Jerusalẽngue wadorebiririma. <sup>5</sup> Erã eropa arĩquerecũ iri macare siete nũri gũa árĩra pũhrũ, waha wabũ daja. Gũa waboro coregã árĩpehrerã Jesu yarã, erã marasã nome mera, erã porã mera, maca tũro pohro gũare ïhadujarã wama. Eropirã árĩpehrerã gũa imiporogue eja, mereja Goãmũre serẽbũ. <sup>6</sup> Gũa eropa serẽra pũhrũ, “Warã iiaa,” arĩ, erãre pabuatuhaja goeriseretuhaja waha wabũ gũa. Gũa wacũ ïhanũrusia, erãpũ majaa wama erã ya wirigũe.

<sup>7</sup> Tiro waĩcũri macare maja tariabũ gũa. Eropirã Tolemaidague tuhajabũ gũa. Ero ta wũariyare watubũ. Iri macare eja, Jesu yarãre “Acawererã, ¿ãhriri mũa?” arĩ, yujunũ erã mera árĩribũ. <sup>8</sup> Eropirã iri maca ma buharo arĩcũ gajinũ daja Pablo mera mague wabũ gũa Cesarea waĩcũri macague warã. Eroguẽ eja, õari buherire weregũ Felipe waĩcũgũ ya wihigũe ejabũ. Eropirã ïgũ mera dujabũ gũa. Felipe Jesu yarã erã siete beyenirã mera majagũ árĩmi. <sup>9</sup> Eropigũ ïgũ wapicũrã nome pagũ árĩmi. Erã nomepũ Goãmũ yare wererã nome árĩma. <sup>10-11</sup> Eroguẽ gũa bajamenũri gũa árĩra pũhrũ, Agabo waĩcũgũ Goãmũ yare weremũhtagũ Judeague árĩgũ gũare ïagũ erami. Eropigũ ïgũ Pablo yadare tũãdiuridare aĩ, ïgũ basi ïgũ guburire, ïgũ mojotorire diri ïhmu wereyũmi.

—Õpa arĩmi Espĩritu Santo. “Idare opagũ Jerusalẽngue ïgũ ejacũ, judio masa eropa ta dirirãcoma ïgũre. Dirituhaja, judio masa árĩbirãre orãcoma erã ïgũre,” arĩmi Espĩritu Santo, arĩ wereyũmi Agabo.

<sup>12</sup> ïgũ eroparĩcũ peerã, gũa Cesarea majarã mera Pablore bũrigã mahibũ. ïgũre “Jerusalẽngue wabiricãque,” arĩribũ. <sup>13</sup> Gũa eroparĩcũ Pablopũ yũhrimi:

—¿Dohpa arĩ orerã iiri mũa? Yũpũre bũjowerecũ iiaa mũa. Erã yũre peresu ïicũ õaroca. Yũhũ Jerusalẽngue Jesu mari Opũ yare yũ ïira waja yũ sĩricũ õaroca, arĩmi Pablo gũare.

<sup>14</sup> “Wabeaa,” ïgũ arĩcũ peediarã iiribũ gũa. ïgũ “Wagũra,” ïgũ arĩcũ, eropa pepicãbũ gũa. Õpa arĩbũ:

—Mari Opũ ïgũ gamero dopa ta iiporo, arĩbũ gũa.

<sup>15</sup> Irire weretamutu, gũa yare ahmu, waha wabũ daja Jerusalẽngue warã. <sup>16</sup> Eroguẽ gũa wacũ bajamerãgã Cesarea majarã Jesu yarãpũ

gũa mera wama. Eropirã Jerusaléngue eja erã mera majagũ Mnasón waĩcũgũ ya wihigue ejabũ gũa. Mnasón Chipre majagũ ĩgũ yoari boje Jesu buhegũ árĩmi. Eropirã ĩgũ ya wihi gũa árĩguri wihi árĩbũ. Eropirã Jerusaléngue ejabũ gũa.

*Pablo Santiagore ĩagũ wapũ*

<sup>17</sup> Jerusaléngue gũa ejacũ, ero majarã Jesu yarãpũ “¿Erarari?” arĩ, mucubiriri mera bocatĩrima gũare. <sup>18</sup> Gajinũ Pablo gũa mera Santiagore ĩagũ ejami. Gũa erogue ejacũ ero árĩpehrerã Jesu yarã oparã árĩma. <sup>19</sup> Eropigũ Pablo erãre ĩgũ mojoto ñeara pũhrũ judio masa árĩbirãre ĩgũ buherare werepehomi. Goãmũ ĩgũ itamuri mera ĩgũ iirare werepehomi Pablo Jesu yarãre. <sup>20</sup> ĩgũ eropa arĩ werecũ peerã,

—Goãmũ õagũ, turagũ ãhrimi, arĩ umupeoma erãpũ. Eropa arĩtuhaja erã Pablore õpa arĩ werema.

—Acaweregũ, dohpaguere bajarã judio masa Jesure umupeorã ãhrima. Mũhũ irire masia. Eropirã erã õpa arĩ pepima: “Goãmũ ĩgũ dorerire, Moisegue marire ĩgũ apirare marire iipehoro gahmea,” arĩrã iima. <sup>21</sup> Õpa arĩnemoma erã. “Gajipũgue árĩrãre judio masa árĩbirã watope árĩrãre judio masare Goãmũ Moiserẽ ĩgũ apirare ‘Ibircãque,’ arĩ doremi Pablo,” arãma õ majarã judio masa mũre. “Pablo judio masa porãre mari dorero dopa mirĩ gasirogãre wiri aĩdorebeami,” arãma erã mũre. “Judio masa erã iidorerire Pablo duhudoremi,” arĩ i sãre werewũama mũre. <sup>22</sup> Eropirã mũhũ õre eracũ peerã erã gamenererãcoma mũre turimorã. Eropigũ õpa iiro gahmea mũre. <sup>23</sup> Mũre gũa dorero dopa ta iique. Dohpague õre wapicũrã mũma Goãmũre umupeorã “Õpa iirãra,” arĩrã ãhrima. <sup>24</sup> Erã mera waque. Eropirã Goãmũ Moiserẽ ĩgũ dorediro dopa ta erã basi Goãmũ yare iiburire iimorã erã ñeri iirire coerã iima. Mũ sã eropa ta iique. Eropa iigũ erã eropa iira wajare wajayeque mũpũ. Mũhũ eropa wajayera pũhrũ erã poarire wũadoremasima erã. Mũ eropa iicũ ĩarã masa mũre erã arĩra iri gũyara árĩcũ masirãcoma erã árĩpehrerã. Goãmũ Moiserẽ ĩgũ apira dorerire iigũ mũ árĩcũ masirãcoma erã. <sup>25</sup> Judio masa árĩbirã Jesu yarãpũre gũa gojarapũre obeotuhajabũ. Õpa arĩ gojabũ gũa. “Goãmarã wéanirãre umupeora barire, dire, wũnũgũ mohwejenirã waimũrãre babircãque mũa. Eropirã nome mera ñero iibircãque. Nome sã mũma mera ñero iibircãque,” arĩ were gojabũ gũa gojarapũre, arĩma erã Pablore.

*Goãmũ wihigue judio masa Pablore ñeañorã*

<sup>26</sup> Erã eropa arĩ wereniguira pũhrũ gajinũ Pablopũ wapicũrã mũma mera erã basi Goãmũ yare iimorã erã ñeri iirire coemorã, Goãmũ wihigue ñaja wañorã. Iri wihigue ñajajagũ, erãre werepũ Pablo: “I nũcũ nũri dũhyaa mũa coeboro,” arĩ werepũ ĩgũ wapicũrãre. Eropirã erã coeturinũ erã nũcũ Goãmũre waimũrãre erã oburinũ árĩbũ.

<sup>27</sup> Eropii erã coepehodiro merogã dũhyacũ gohra Goãmũ wihigue Pablo ĩgũ árĩcũ Asia yeba majarã judio masapũ ĩañorã ĩgũre. Eropa ĩarã gajirãre iri wihi árĩrãre Pablo mera guacũ iĩñorã erã. Eropa guarã judio masa Pablore ñeha õpa arĩ gaguinũgũĩñorã:

<sup>28</sup> —Mũa gũa acawererã Israe masa gũare itamurã arique. Ihĩ ãhrimi. Moise dorerire i wihi sãre cõãdore buhemi árĩpehrerãre.

Eropigu ĩgu Goãmu wihiguere judio masa árĭbirã sãre aññajadi ãhrami. Eropigu i wihire ñeri mariri wihire ĩgu goroweoadi ãhrami, arĭ gaguinigiñorã judio masa Asia yeba majarã ero majarãre.

<sup>29</sup> Ero core Jerusalén Pablo Tróximo mera ĩgu árĭcũ judio masa ĩañorã. Tróximo Efeso majagu judio masu árĭbiridigu árĭmi. ĩgu eropa árĭcũ masirã opa arĭ pepiñorã erã: “Pablo Tróximo Goãmu wihire aññajagu iicumi,” arĭ pepiñorã judio masa.

<sup>30</sup> Masare erã eropa arĭ were erã gaguiniguira puhrũ iri maca majarã árĭpehrerã burigã guañorã. Bajarã omagãri, Goãmu wihi árĭgure Pablora ñeha tarawiria wañorã. Tuhajanugu iri wihi disiporore bihañorã erã ĩgugue ñajariri arĭrã. <sup>31</sup> Eropirã erã ĩgure wejẽmorã iiriñorã. Erã eropa iicũ ĩarã gajirãpu wererã wañorã surara opuere. “Árĭpehrerã Jerusalén majarã gamenere gua, gaguiniguirã iama,” arĭ wererã wañorã surara opuere. <sup>32</sup> Erã eroparĭcũ peegu opuẽpu ĩgu surarare, erã dorerã sãre gameneo, erã mera Pablora wejẽdiarã pohrogue omagã ejañorã. Surara erã ejacũ ĩarã Pablora panirã pa duhañorã. <sup>33</sup> Eropigu surara opu Pablo pohrogue eja, ĩgure ñeha, peda comeda mera diridorepu. Erã dirituhajacũ ĩha, opu Pablora serẽpipũ masare:

—¿Nihino ãhriri ihĩ? ¿Ñeheno dipuwaja ĩgure eropa iiri muã? arĭ serẽpipũ ĩgu erãre.

<sup>34</sup> ĩgu eropa serẽpicũ peerã masapu “Opa iiami ĩgu,” arĭ, gajirã sã gajiropa arĭ, gaguiniguiri wereñorã surara opuere. Erã eropa gaguiniguicũ surara opu ðaro peebiripũ. Eropigu ĩgu surara ya wihigue Pablora aĩgãdorepu. <sup>35</sup> Iri wihigue eja, Pablo mũriariñere ĩgu mũriacũ masapu ĩgure padiarã cãhmotañorã. Erã eropa iicũ surarapu ĩgure aĩcoã mũria wañorã. <sup>36</sup> Masa bajarã erãre nurũsia, gaguiniguiri nurũsiañorã.

—ĩgure wejẽcãque, arĭ gaguinigiñorã erã Pablora.

*Pablo “Ne masare ñero iibea yũhu,” arĭ werepu*

<sup>37</sup> Eropii Pablora iri wihigue erã peresu iiboro core, Pablora opuere serẽpipũ.

—Yũhu mu mera weretamudiaca, arĭ serẽpipũ Pablo.

—¿Mũhu griego masa yare wereniguiri? <sup>38</sup> ¿Sohõ árĭdigu, Egipto majagu árĭbeari mũhu? ĩgu masare ĩgu oparãre cóãdoregu, cuatro mil masa gamewejẽrãpuere masa marirogue aĩgãapu. ¿ĩgu árĭbeari mũhu? arĭpu opu Pablora.

<sup>39</sup> ĩgu eroparĭcũ peegu Pablo yũhripũ.

—ĩgu árĭbeaa yũhu. Judio masu ãhraa. Tarso Cilicia yeba árĭri maca masa dehyoabũ yũhu. Bu árĭri maca majagu árĭbeaa yũhu. Yũhu oã masa mera wereniguiddiaa, arĭpu Pablo ĩgure.

<sup>40</sup> ĩgu eroparĭcũ peegu opuẽpu wereniguiddorepu masa mera. Eropigu Pablo mũriariñegue nigui, ĩgu mojotori mera “Ejarimaricãque,” arĭpu masare. ĩgu eropa iicũ ĩarã, ejarimaripehrea wañorã. Erã ejarimaripehrecũ ĩha, Pablo judio masa ya mera werepu erãre.

## 22

<sup>1</sup> Yũ acawererã, yũ iirare weregura muare. Yũhu werẽcũ peeque muã, arĭpu Pablo.

<sup>2</sup> Īḡu eroparīcū Pablo judio masa ya mera ĭḡu wereniguicū peerā masa ejarimariro dujañorā. Eropiḡu Pablo erāre werepu:

<sup>3</sup> —Yuhū judio masu ta āhraa. Tarso waīcūri maca, Cilicia yeba áriri maca masa dehyoabu yuhū. Eropiḡu i maca ta Jerusalén ta masabu yuhū. Eropiḡu yure Gamalie waīcūḡu buhemūrimi yure. Eropiḡu yuhū mari ñecu sūmarā mura dorerire ōaro buhebū. Dohpaguere Goāmure mūa umupeoro dopa ta yu sā umupeoniguia. <sup>4</sup> Eropiḡu Jesure umupeorāre ñero iimūricarabu yuhū. Yujurāyeri erāre wejēcāmūricarabu yuhū. Ūmare, nome sāre ñeha, peresu iimūribu yuhū. <sup>5</sup> Pahia opu, murā mera yu eropa ariri “Diaye ta āhraa,” arī weremasima mure. Erā gojaripūrire Jesu yarāre ñeadoreburipūrire yure gojabasama. Mari acawererāre Damasco majarāre iripūre ĩhmubu iiribu Jesu yarāre ñeabu. Erāre ñeha, aīḡāri peresu iibu iiribu. Jerusaléngue erāre aīḡādiaribu erāre dipuwaja moabu, arīpu Pablo.

*Pablo Jesu yagū ĭḡu warare werepu*

<sup>6</sup> Eropa arītuhaja ōpa werenemopu:

—Jesu yarāre ñeari masu wadiḡu árīquereḡu goeri boje árīcū, Damascogue yu ejaboro pohro gohra árīcū ūmarogue goseleri medijub yure. <sup>7</sup> Ero eropa wacū yebague mehmerejacularabu yuhū. Yu mehmerejara puhrū wereniguicū carimi yure. “Saulo, ḡduhpigū yure ñero iiri mūhu?” arīḡu carimi yure. <sup>8</sup> “Opu, ḡnihino āhriri mūhu?” arī serēpibu yuhū. “Yuhū Jesu Nazare majagu, mū ñero iigu ta āhraa yuhū,” arī yuhrimi ĭḡu yure. <sup>9</sup> Yu eropa wacū yu mera majarā boyorore ĩama. Eropirā yu mera ĭḡu wereniguicū peebirima erā. <sup>10</sup> “Opu, ḡdohpa iigūcūri yuhū?” arī serēpibu Jesure. “Wahḡānūgajaque. Damascogue waque. Ero mūhu wacū, mure árīpehreri yu iidoreburire gajigu wereḡucumi mure,” arīmi ĭḡu yure. <sup>11</sup> Burigā ero cuimijuro wacū yu cuiiri boboa wacarabu yuhū. Eropirā yu mera majarā yu mojotore ñeha, Damascogue tuā wahḡāma yure.

<sup>12</sup> “Ero Ananía waīcūḡu, Goāmure umupeogu, marire Goāmu dorerire iipehogū árīmi. Ero majarā judio masa árīpehrerā erā umupeogu árīmi. <sup>13</sup> Eropiḡu ĭḡu yu pohro eranūgara yure weremi. “Acawereḡu Saulo, ĩaque dipaturi daja,” arīmi ĭḡu. ĭḡu eropa arīra puhrū dipaturi ĩabu yuhū daja. Eropiḡu ĭḡure ĩabu yuhū. <sup>14</sup> Yu eropa ĩacū ĭḡu Ananía yure weremi. “Mari Pagū ĭḡu gamerire ōaro masibure iribojegue beyetuhapu mure. Eropiḡu ‘Yu magu ōagure ĩha peegucumi,’ arī weremūtapu mure mari Pagū iribojegue mū árīboro core. ĭḡu āhrimi mari ñecu sūmarā mura erā umupeodi. <sup>15</sup> Eropiḡu mū ĩarare mū peerare wereḡuca árīpehrerāre. <sup>16</sup> Eropirā dohpaguere yoari boje árībircārā. Wahḡānūgajaque. Eropiḡu waīyedigu árīque. Jesure mū serēcū mū ñerire cóḡḡucumi,” arīmi ĭḡu yure, arīpu Pablo.

*Pablo judio masa árībirāre ĭḡu buherare werepu*

<sup>17</sup> ĭḡu eropa arītuhaja Pablo masare werenemopu:

—Eropa iituhaja yuhū Jerusaléngue dujari, Goāmu wihigue Goāmure serēḡu ejabu. <sup>18</sup> Yuhū ero árīcū yu Opu Jesu yure dehyoami. Eropa dehyoagu yure weremi. “Jerusalén majarā yahare mū werecū peediabeama. Eropiḡu duru gajipague waque,” arīmi yu Opu Jesu yure. <sup>19</sup> ĭḡu eroparīcū peegu werebu ĭḡure: “Opu, mū yarāre

judio masa buheri wiri árîrâre yu ñeha para sâre, peresugue erâre iimûrirare masima Jerusalén majarâ. <sup>20</sup> Eropigu mu yare weregure Estebanpûre erâ wejêcû ïagu ôaro iirâ wejêma, arîribu. ïgure erâ wejêcû erâ ya suhrire opabasabu yuhû. Iri sâre masima i maca majarâ,” arî werebu yuhû Jesure. <sup>21</sup> Yu eroparîcû peegu yu Opû yare weremi: “Yoarogue judio masa árîbirâre buhebure obeogura mure. Eropigu waque muhû,” arîmi yare yu Opû, arîpû Pablo masare.

*Surara opû Pablo mera weretamupû*

<sup>22</sup> ïgu weremuhtara dihtare ôaro peeriñorâ masa. Eropa peequererâ judio masa árîbirâ pohro Jesu Pablora ïgu obeoburire ïgu werecû peerâ erâ gua gaguiniguinûgañorâ daja.

—Ihî dohpague tamerare sîricuraporo, arî gaguiniguinûorâ erâ.

<sup>23</sup> Eropirâ erâ gaguiniguinemo, guari mera erâ suhrire wejêsiribeo, nicu mera deañorâ. <sup>24</sup> Erâ eropa iicû ïha surara opû surara ya wihigue Pablora aññajadorepû ïgu surarare. Eropigu surara opû “¿Duhpirâ Pablo mera gua eropa siari gaguiniguirâ iiri masa?” arî serêpidiaripû. Pablora irire serêpibu, yuradari mera târadoreripû ïgure. <sup>25</sup> ïgu târadorequerecû ïgure erâ dirira pûhrû, ïgu pohro árîgure surarare wereru Pablo.

—Yuhû Roma majagu âhraa. Eropirâ “Ñero iigu âhrimi,” yare arîmasibea mûa. Eropirâ yuradari mera târamasibea mûa, arîpû Pablo ïgure.

<sup>26</sup> ïgu eroparîcû surara ïgu opure weregû warû.

—Ihî Roma majagu âhrimi. Eropigu ôaro iique ïre, arî wereru ïgu ïgu opure.

<sup>27</sup> ïgu eropa arîra pûhrû surara opûpû Pablora serêpigû warû.

—¿Diaye ta muhû Roma majagu âhriri? Wereque yare irire, arîpû ïgu.

—ïgu ta âhraa yuhû, arî yuhripû Pablo.

<sup>28</sup> ïgu eroparîcû peegu opûpû ïgure wereru.

—Yuhû Roma majagu árîdiagû niyeru wûaro wajayebu, arîpû ïgu.

—Yuhû Roma maja macague masa dehyoabu. Eropigu Roma majagu âhraa, arîpû Pablo.

<sup>29</sup> ïgu eroparîcû peerâ ïgure târabonirâ waha wañorâ. Eropigu Pablo Roma majagu ïgu árîcû masigu, ïgure comedari mera erâ dirirare guñagu, guî arîpû surara opû.

*Pablo judio masa opure wereru*

<sup>30</sup> Eropigu surara opû judio masa Pablora erâ weresârare ôaro masidiarû. Eropa masidiagu gajinûgue comedarire ïgure ïgu pãdorera pûhrû pahia oparâre, judio masa erâ mûrâ mera gamenedorepû surara opû. ïgu eropa gamenedorerera pûhrû ïgu erogue Pablora aigâ, erâ core duhudobopû ïgure.

## 23

<sup>1</sup> Eropigu Pablo judio masa mûrâ oparâre ïabocatîunûgaja wereru: —Acawererâ, Goâmû ïgu ïaro umûri nûcu ôaro iiniguicâbu yuhû, arîpû Pablo.

<sup>2</sup> Īḡu eroparīcū peegu árīpehrerā pahia weca árīḡu opu Ananíapu Pablo disirore padorepu. <sup>3</sup> Īḡu pohro niguirāre padorepu. Īḡure erā para pūhrū Pablo Ananíare turīpu.

—Masa erā ĩaro dihtare ōaro iḡu āhraa mūhu. “Goāmū dorerire tarinūgagu iiaa,” yure arīquereḡu ta yure padorea mūhu. Eropa padoreḡu mūpu dorerire tarinūgagu iica, arīpu Pablo ĩḡure.

<sup>4</sup> Īḡu eroparīcū peerā Pablo pohro niguirā ōpa arīñorā ĩḡure:

—Goāmū ĩḡu beyedīḡu pahia opuere ñero werenīguibiricāque mūhu, arīñorā erā Pablöre.

<sup>5</sup> Erā eroparīcū peegu Pablo arīnemopu:

—Acawererā, ĩḡu, ĩḡu pahia weca opu ĩḡu árīrīre masibirabu yūhu. Eropīḡu eroparīmaacābu yūhu. Goāmū ya erā gojarapū ōpa arī werea ĩḡure: “Mūa maca majarā opuere ñero arī werenīguibiricāque,” arī gojara āhraa, arīpu Pablo erāre.

<sup>6</sup> Eropirā ero pe curu majarā árīñorā. Yuju curu saduceo masa árīñorā. Gaji curupu fariseo masa árīñorā. Pe curu erā árīcū masīḡu, Pablo erāre busuro mera werepu:

—Acawererā, yūhu fariseo masu āhraa. Fariseo masu magu ta āhraa yu sā. “Sīrīnirā masa mūriarācoma,” yu arī wereri dipuwaja yure ñero iidiaa mūa, arīpu Pablo.

<sup>7</sup> Īḡu eroparīcū peerā fariseo masa, saduceo masa erā basi gameturiñorā. Eropirā erā basi pe curu dūca wariñorā. <sup>8</sup> Saduceo masa ōpa arīrā árīñorā: “Sīrīnirā masa mūriosome. Espiritua anyua sā ne marima,” arīrā árīñorā. Eropirā fariseo masapu erā arīro dopa arībiriñorā. Eropirā Pablo “Sīrīnirā masa mūriarācoma,” ĩḡu arīcū erā erā basi gameturiñorā. <sup>9</sup> Eropa gameturirā, būrigā gaguinīguīñorā. Eropirā fariseo masa mera majarā judio masa buherā wahgānūgaja, tuhri, wereñorā:

—Īhī Pablo ñero iibirami. Eropīḡu Espiritu, o anyu diaye ĩḡu mera werenīguīḡu árībocumi. Eropirā ĩḡure dipuwaja moarā Goāmure ĩhaturirā árīboca mari. Eropiibiricāque, arīñorā erā.

<sup>10</sup> Erā eropa arīra pūhrū erā árīpehrerā gameturi, būrigā guañorā. Erā eropa būrigā guacū ĩha gūisāpu Pablöre surara opuḡu. “Pablöre patasiricārācoma,” arīḡu ĩḡu ya wihīgue aīḡaridoreḡu ĩḡu masa watope ĩḡu surarare obeopu.

<sup>11</sup> Gaji ñami Jesu mari Opu Pablo pohro dehyoa, werepu ĩḡure:

—Gūibiricāque. Dohpague ōre Jerusalēngue yaha buherire wereabu mūhu. Eropīḡu Romague säre ōpa ta iḡu waque, arīpu mari Opu Pablöre.

### *Judio masa Pablöre wejēdiariñorā*

<sup>12</sup> Gajīnū ñamiñarīgā árīcū judio masa bajamerā gamenereñorā.

—Ōpa iirā, arīñorā. Pablöre wejēcārā. Eropirā ĩḡure mari wejēboro core ihribiricārā. Babiricārā. ĩḡure wejēbirā oa mera sīrīrā. ĩḡure mari wejēbiricū Goāmū marire wejēporo, arīñorā erā.

<sup>13</sup> Erā eropa arīrā cuarenta weca ñari judio masa árīñorā. <sup>14</sup> Erā eropa arī werenīguira pūhrū erā pahia oparāre, murā säre wererā wañorā:

—Pablöre gua wejēboro core barire babeaa gūa. <sup>15</sup> Eropirā mūa, mari murā mera ōpa arī sihubeoque. “Pablöre dipaturi serēpidiaca,”



aribeoque surara opure. Mua eropa arira puhru surara opure aigãridoreque Pablore. Eropirã Pablo igu õre igu eraboro pohro gohra aricũ igure wejêrãca gaa, arĩnorã erã pahia oparãre.

<sup>16</sup> Eropigu Pablo tigo magu erã eropa arĩ wereniguicũ peepu. Erã eroparicũ peegu waha, surara ya wihigue Pablore weregu ñajapu. <sup>17</sup> Igu eropa werera puhru Pabloru yujugu surarare sihubeo, wereru igure.

—Ihĩ mamure mu opu pohroque aigãque. Ihĩ mu opure werediagu iimi, arĩpu Pablo.

<sup>18</sup> Igu eroparicũ peegu surarapu Pablo tigo magure igu opu pohroque aĩ eja, wereru.

—Peresugue arĩgu Pabloru yare sihubeo, ire mamure mu pohroque aigãridoreami. Ihĩ mure weregu arigu iiami, arĩpu surara igu opure.

<sup>19</sup> Igu eroparicũ peegu opu ru mamure igu mojtore ñeha tuãgã, masa marirogue igure serẽpi iapu.

—¿Dohpa arĩbu iari mũhu yure? arĩpu igu Pablo tigo magure.

<sup>20</sup> Igu eropa serẽpicũ peegu opa arĩ wereru.

—Judio masa yujuro mera, “Õpa iirã,” arĩ, wereniguiama. Ñamigãre judio masa oparã pohroque mure Pablore aigãdorerãcoma. “Murã dipaturi Pablore serẽpidiama,” arĩ gũyarãcoma. <sup>21</sup> Eropirã cuarenta weca ñari masa igure wejêdiarã mague duhrinijarã corerãcoma. Erã igure wejêboro core barire basome. Eropirã ihrisome. “Iguare mari wejêbircũ, Goãmu marire wejêporo,” arãma erã erã basi. Eropirã dohpaguere mure Pablore aigãridorerã erãpu duhri coretuhajama Pablore wejêmorã. Eropigu erã wererã eracũ erãre yuhribita mũhu, arĩ wereru mamu surara opure.

<sup>22</sup> Igu eroparicũ peegu surara opu opa arĩpu:

—Yure mu wererare gajirãre werebircãque, arĩ wereru mamure. Eropa arĩtuhaja mamure “Wahanisa,” arĩpu.

### *Pablore opu Feli waĩcũgu pohroque obeoru*

<sup>23</sup> Eropigu surara opu perã igu surarare sihugã, erãre dorepu:

—Doscientos surarare, setenta cabayu peyarãre, doscientos ñoseri mijiri oparãre Cesareague wamorãre erã yare amudorerã waque. Eropirã dohpagã ñami nueve aricũ mua waborore coreque. <sup>24</sup> Eropirã Pablore cabayuare igu peyamorãre amubasaque. Opu Feli pohroque, Cesareague ñaro sorã waque igure, arĩpu surara opu.

<sup>25</sup> Eropa arĩtuhaja papera gojapu. Õpa arĩ gojapu igu: <sup>26</sup> “Yuhu Claudio Lisia mure turagu opu Felire ñadoreã. <sup>27</sup> Judio masa ire ñeha, wejêrama. Eropigu igu Roma majagu igu aricũ masigu, yu surara mera igure itamugu ejabu. <sup>28</sup> Eropigu igure erã weresãrãre masidiagu judio masa oparã pohro aigãbu igure. <sup>29</sup> Eropigu igu judio masa ya doreri dihtare igu tarinugacũ, mari ya dorerire igu tarinugabircũ iagu, igure peresugue apidiabirabu. Ñeha dipuwaja sĩriro mara igure. <sup>30</sup> Eropigu judio masa igure wejêdiarã, erã duhri corecũ iagu gajigu wereami yure. Igu eropa werera puhru Pablore dohpaguere mu pohro obeogu iiaa. Eropigu igure weresãnirãre igu ñero iirare mure weredoretuhajabu yuhu,” arĩ gojapu surara opu.

<sup>31</sup> Eropirā surara erā opu ĩgu doreldro dopa ta iĩnorā. Iri ñamire Antĩpatri waĩcũri macague Pablora aĩ ejaĩnorā. <sup>32</sup> Gajĩnu gajirā surara cabayua weca peyabirā iri maca ta dujariĩnorā erā ya macague. Gajirā surara cabayua peyarā dihta ĩgure aĩ tarigāĩnorā. <sup>33</sup> Pu Cesareague aĩ ejaĩnorā Pablora. Eropirā surara opu ĩgu obeorapũre opu Felire wiaĩnorā. Eropirā Pablora aĩ ejaĩnorā opu pohrogue. <sup>34</sup> Erā eropa wiara pũru iripũre ĩgu ĩara pũru ĩgu gajirāre serēpi ĩapu:

—¿Di yeba majagu āhriri ihĩ Pablo? arĩ serēpi ĩapu.

—Cilicia yeba majagu āhrimi, arĩ wereĩnorā ĩgure.

<sup>35</sup> Erāre serēpituhaja, Feli Pablora werepu:

—Mũre weresānirā õre erā eracũ mu wererire peegura, arĩpu Feli Pablora.

ĩgu eropa arĩra pũru Herode ya wihigue ĩgure apipu. Eropigu ĩgu umare ĩgure coredorepu ĩgu opu.

## 24

*Pablo “Ñero iibirabu,” arĩ werepu Felire gajirā weresāra pũru*

<sup>1</sup> Cinco nũri pũru Ananĩa pahia opu, judio masa erā mũrā, dorerire weremehregũ Tértulo waĩcũgu mera Cesareague ejaĩnorā. Eropirā erā Pablora weresādiarā, opu Feli pohrogue ejaĩnorā. <sup>2</sup> Eropigu Pablora erā gamenererogue erā aĩ ejara pũru Tértulo ĩgure weresānũgapu. Eropa weresānũgagu õpa arĩpu Felire:

—Mũhu õaro masigu, gua opu mũhu õaro dorecũ gua i yeba majarā õaro árĩcāa gua gamequeāro mariro. Mu doreri mera õaripũre gohrotoro iiaa i yeba. <sup>3</sup> Eropirā gua õaro árĩcārā mucubiria. Eropirā mu mera õaro mucubiria. <sup>4</sup> Dohpague merogā mũre garibogura yũhu. Merogā mu mera weretamudiaca. Guare peenique dohpa. <sup>5</sup> Ihĩ guare garibotariami. Árĩpehreri yebari majarāgue judio masare erā gua gaguĩguicũ iimi ihĩ. Eropigu masa erā basi gameturicũ iimi ihĩ. “Oparāre cóārā,” arĩrā mera majagu āhrimi ihĩ. Eropigu nazareno waĩcũri curu opu āhrimi. <sup>6</sup> Eropigu Goāmu wihire ñero ĩgu iidiacũ ĩarā gua ñeabu ĩre. Gua ñeara pũru gua ya dorerire ĩgu tarinũgagu árĩcũ ĩgure dipuwaja moadiarabu gua. <sup>7</sup> Eropa moadiaquerecũ surara opupu Lisia waĩcũgu ĩgure guare turaro mera emacāmi. <sup>8</sup> Pũru ĩgure weresānirāre mu pohrogue wadoreami Lisia. ĩgu eroparĩcũ peerā ahrabu gua. Mu tamera ĩre serēpigũ, árĩpehrerire ĩgu ya dipuwajare masiguca mũhu, arĩpu Tértulo Felire.

<sup>9</sup> ĩgu eropa arĩra pũru gajirā judio masa Tértulo ĩgu arĩdro dopa ta “Diaye ta āhraa,” arĩĩnorā erā sã. <sup>10</sup> Erā eropa arĩ weresāra pũru opu Feli Pablora weredorepu. Õpa arĩ werepu Pablo:

—Baja bojori i yeba majarāre mu dorerare masia yũhu. Eropigu yũ iirare mũre weregu mucubiria. <sup>11</sup> Doce nũri ta wahaa Jerusalēngue Goāmure yũ umupeora pũru. Mũhu i diaye árĩcũ masidiagu gajirāre serēpi ĩaque. <sup>12</sup> Judio masa yũre Goāmu wihiguere boca erā ñeacũ masare arĩ gaguĩguigu iibirabu. Eropigu “Oparāre cóaque,” arĩgu iibirabu. Eropigu judio masa buheri wirire, erā ya maca sãre ne ñero iibirimũrabu. <sup>13</sup> Eropirā yũre weresānirāpu erā weresārare “Õpa iiami ihĩ,” arĩ weremasibeama mũre. <sup>14</sup> Dohpague yũ iirare weregura mũre. Matague ta gua ñecu sumarā erā umupeodiro dopa ta Goāmure

umupeoa yu sã. Eropigu Goãmu yare iiaa Jesu ya ðari buheri iri arĩro dopa ta. Oã “Jesu ya guyabirari àhraa,” arĩ wereniguima oã judio masa. Eropigu Goãmu doreri, Moiseguere İgu apirare iri sãre umupeoa yuhu. Eropigu Goãmu ya weremuhtanirã erã gojara sãre umupeoa yuhu. <sup>15</sup> Oã gajirã judio masa mera ta “Goãmu arĩpehrerã masare sĩrinirãre ðarã, ñerã mera erã masa mũriacũ iigucumi,” erã arĩ pepiro dopa ta yu sã eropa ta arĩ pepia. <sup>16</sup> Eropigu dipuwaja mara yuhu. Goãmu irire masimi. Eropirã masa sã irire masima. Eropigu diaye ta werea yuhu mure.

<sup>17</sup> “Gaji bojorire gajipugue yuhu curigu arĩgu dujarabu Jerusalengue. Yu acawererã Jerusalén majarã mojomorocurãre niyeru ogu arigu iibabu. <sup>18</sup> Dujara, Goãmure umupeqbu İgu ya wihigue ejarabu. Eropigu Goãmu İgu coedorero dopa yu basi İira puhru waibugure odiarabu Goãmure umupeqbu. Erogue yu arĩcũ oã judio masa yure bocama. Erã bocacũ gajirã yu mera majarã marama. Gua gaguiniguirã marama. <sup>19</sup> Eropirã gajirã judio masa Asia yeba majarã ero àhrama. Erã yu ñero iicũ İanirã arĩrã weresãrã ariporo õguere. <sup>20</sup> Oã õgue arĩrãpu judio masa oparã gamenererogue yu arĩcũ İanirã yu erogue ñero İirare masirã, erã sã weresãporo. <sup>21</sup> Gaji tamerare yure erã weresãmasima: Erã mera arĩgu õpa arĩ burigã gaguiniguibu yuhu: “‘Sĩrinirã masa mũriarãcoma,’ yu arĩra waja dipuwaja moaa maa,” arĩbu erãre, arĩ wereru Pablo Felire “Ñero iibiribu,” arĩgu.

<sup>22</sup> İgu eropa arĩ werera puhru Feli õpa arĩ wereru Pablore:

—Dohpaguere iripõta àhraa. Surara opu Lisia İgu erara puhru mure yu İiborore masigũca yuhu, arĩpu Feli Pablore. Felipu Jesu yarã erã İirare ðaro masipehogu arĩpu.

<sup>23</sup> Eropa arĩtuhaja, Pablore coregure surarare Feli õaro İhadibudorepu peresugue arĩgu duhriri arĩgu. Eropa İhadibudorequeregu õaro iidorepu İgure. Eropigu merogã opu İgu curiborore. Pablo mera majarãre İgure peresugue arĩgure İtamudoregu eropa dorepu Feli.

<sup>24</sup> Bajamenuri puhru Feli İgu marapo Drusila waĩcũgo mera ahri, Pablore sihuñorã daja. Feli marapopu judio maso arĩpo. Pablore erã sihura puhru, Jesucristore İgu umupeqore Pablopun wereru erãre. <sup>25</sup> Eropa weregu, ðarire, ðaro guñamasirire, ñerire gamebiririre, pehrerĩnu arĩcũ masare Goãmu dipuwaja moaborore wereru Pablo. İgu eropa arĩ wereru pegu Feli güigu, Pablore wereru:

—Dohpaguere waque. Puhru yare mohmeri maricũ sihugura daja, arĩpu Pablore.

<sup>26</sup> Eropa arĩgu, Pablo İgure niyeru ocũ gameripu Feli. Eropigu İgu niyerure gamegu, bajasuburi Pablore sihu, İgu mera wereniguimuripu Feli. Niyerure İgu wajayecũ ta Pablore wiuboñumi gajisubu arĩgu. <sup>27</sup> Pe bojori puhru Porcio Festo waĩcũgu Felire gohrotogu arĩpu. Eropigu Felipu opu arĩgu judio masare mucubiricũ iidiapu. Eropigu İgu Palore peresu arĩdorepu dohpa.

## 25

*Festore Pablo İgu İirare wereru*

<sup>1</sup> Eropii Festo iri yebague uhrenu igu opu najara puhru, Cesareague aridigu waha, Jerusalengue ejapu. <sup>2</sup> Ero igu ejacu iha pahia opara, judio masa opara mera Pablore era weresarare wereñora Festore. <sup>3</sup> Pablo igu mague wacu iri mague igure cohre, wejediariñora igure era. Jerusalen mague aricu gameriñora igure wejemorã. Eropira era opa Festore uputu sereriñora:

—Pablore õguere Jerusalengue obeoque, ari sereriñora era Festore Pablore wejediara.

<sup>4</sup> Era eroparicu peegu, Festo werepu erare:

—Dohpaguere Pablo Cesareague peresu ahrimi. Dohpaguere yahu erogue wabu iaa. <sup>5</sup> Pablo igu ñero iigu aricu, mua opara Cesareague yu mera waha, igure weresaque, aripu Festo.

<sup>6</sup> Eropigu Festo ocho o diez nuri era mera igu arira puhru Cesareague dujaa wapu. Gajinu igu dipuwaja moadoreri wihi doagu, Pablore aigãridorepu. <sup>7</sup> Eropira Pablo Festo pohrogue igu eracu, judio masa Jerusalengue arinirapu Pablo pohro nigui, igure buriga weresanugañora. Eropa weresãquerera “Ihi igu ñero iicu iabu,” ari weresãmasibiriñora. <sup>8</sup> Era eropa ari weresara puhru Pablo igu iirare werepu:

—Judio masa era dorerire, Goãmu wihi maja dorerire, Roma opu igu dorerire ne tarinugabirabu, aripu Pablo.

<sup>9</sup> Festopu judio masare mucubiricu iidiagu, Pablore sereripu.

—¿Jerusalengue wadiari muhu? Mu iirare yare erogue wereguca muhu, aripu Festo Pablore.

<sup>10</sup> Igu eroparicu Pablo yuhripu:

—Aripehrera weca opu igu ya wihi dipuwaja moadoreri wihi ahraa dohpaguere. I wihino ta ohõ sa ahraa. Eropigu yu iirare ohõ ta amu purumujuque. Judio masare yu ñero iibirirare ñaro masia muhu. <sup>11</sup> Nerire iigu dorerire tarinugagu arigu “Yure wejebiricãque,” aribiriboaya. Eropigu oã weresaripu gayari iri aricu yure weresanirare yure omasibea muhu. Yu iirare aripehrera weca opure Césare weregu wadiaca yuhu, aripu Pablo.

<sup>12</sup> Igu eroparicu peegu Festopu ñaro masi wererare serepituhaja, werepu Pablore.

—Muhu aripehrera weca opure mu iirare mu werediacã, igu pohrogue Romague obeorãra mare, aripu Festo Pablore.

*Pablo opu Agripare igu iirare werepu*

<sup>13</sup> Festo opu najara puhrugue opu Agripa, Berenice waicugo mera Cesareague Festore iarã ejañora.

—¿Ne, erarari mu sa? arinora era Festore bocatiri serera. <sup>14</sup> Ero bajamenuriga era arira puhru Festo werepu Agripare Pablore era iirare.

—Ore Feli igu peresu iidigu ahrimi. <sup>15</sup> Eropira Jerusalengue yu wacu judio masa era pahia opara, era murã mera ire weresama. “Igu ya dipuwajare wejẽque igure,” ari serẽama era yure. <sup>16</sup> Era eroparicu peegu yu opa wereabu: “Gua Roma majarapu peresu era iinirare masare eropa ta ocãbirimuribu. Eropigu igure osose muare. Gua ñeadigure igure weresanira guare wereniguiboro core igure dipuwaja moamasibea gua. Igu basi sa igu iirare igu werenibiricu

ĭgure dipuwaja moamasibeeaa gwa,” arābū erāre. <sup>17</sup> Eropigū ōre erā weresārā eracū ĭagu yoari boje iibirabū yūhū. Eropigū gajinure masa dipuwaja moadoreri wihi yū doagu, erā weresādigure sihubeoabū. <sup>18</sup> Eropirā iri wihi ĭgū eracū iarā ĭgure ĭhaturirā wahgānugajama. Erā eropa wahgānugajacū ĭagu űetariaro arī weresārācoma arī pepirabū yūhū erāre. ĭgure weresādiaquererā weresāmasibirama erā. <sup>19</sup> Eropirā ĭre Goāmū yare ĭgū werera dipuwaja judio masa ĭgure ĭhaturiyama. “Jesu waĭcugū ĭgū sĭridigū masa mūriadi árĭmi,” arī ĭgū werera waja weresāma ĭre. I dihtare weresāma. <sup>20</sup> Ire masibigū ĭgure ōaro serēpi ĭabū. “ĶJerusaléngue wadiacuri yū mera? Eroque wereque mū iirare yūre,” arĭrabū ĭgure. <sup>21</sup> Yū eroparĭcū peegu ĭgūpū wadiabirami. “Yū iirare árĭpehrerā weca opūre werediaca,” arāmi ĭgū yūre. ĭgū eropa arĭra pūhrū ohō ta ĭgure coredoreabū árĭpehrerā weca opū pohro ĭgure yū obeoboro core, arĭpū Festo Agripare.

<sup>22</sup> —Yū basi peediaca ĭgure, arĭpū Agripa Festore.

—űamigā ta ĭgure peegūca mūhū, arī yūhrĭpū Festo.

<sup>23</sup> Eropirā gajinū árĭcū Agripa, Berenice mera masa dipuwaja moadoreri wihigue eja, “Oparā āhraa gwa,” arĭrā gūhyadiaro ii ĭhmuñorā erā, surara oparā, iri maca majarā oparā mera. Eropa ii űajarā iri wihiguere űajañorā. Erā űajajara pūhrū Pablōre sihubeopū Festo. <sup>24</sup> Eropigū Festo ōpa werepū:

—Opū Agripa, mūa árĭpehrerā i wihire gamenererā peeque. Ōre ihĭ bajarā judio masa erā weresāgū āhrimi. Jerusaléngue Cesareague sāre erā ĭgure weresāma. “ĭgure wejēque,” eropa arĭniguicārā iima erā. <sup>25</sup> Erā eropa arĭquerecū ta ōpa arī pepia yūhū. Ihĭ ne űero iidigū árĭbeami. Ķűehe dipuwaja mari wejēbocuri ĭgure? Eropigū árĭpehrerā weca opūre César Augustore ĭgū iirare ĭgū werediacū árĭpehrerā opū pohroque obeogura ĭre. <sup>26-27</sup> Eropigū ihĭ ĭgū iirare masibirinica yūhū dohpa. Eropa masibirinigū mari opūre were gojamasibirica. Eropigū muare ĭgū werecū peedoregū iiaa dohpaguere. Opū Agripa, dohpague tamerare ihĭ āhrimi mū serēpi ĭabu. Mū serēpi ĭatuhaja mari masira pūhrū ĭre erā weresārare ōaro were gojagura. Ihĭ ĭgū űero iirare yū masibiriqueregū ta opū pohroque ĭgure yū obeocū ōabeea. Eropigū dohpaguere erā weresārare ōaro masidiagu iiaa, arĭpū Festo erāre.

## 26

*Pablo Agripare ĭgū iirare werepū*

<sup>1</sup> ĭgū eropa arĭra pūhrū Agripa Pablōre arĭpū:

—Mū basi ta wereque, arĭpū ĭgū Pablōre. ĭgū eropa arĭra pūhrū Pablōpū, “Ejarimaricāque,” arĭgū ĭgū mojotorire aĭ wahgūbeo, ĭgū iirare werenugapū:

<sup>2</sup> —Opū Agripa, yūre judio masa erā weresārare, yū iirare mūre weregū, dohpaguere ōaro sĭporācūa. <sup>3</sup> Gwa judio masa gwa ĭiricūrire, gwa buheri sāre mūhū ōaro masicū tamerare mucubiria yūhū. Eropigū mūhū yūre ōaro peeque, arĭnugapū Pablo.

*Pablo Jesu yagu ĭgū árĭbōro core ĭgū árĭricūrare werepū*

<sup>4</sup> Eropa arĭtuhajagu ōpa arĭnemopū ĭgū:

—Mamu áriḡu yu áriřicurare áriřehrerā judio masa masima. Ŭmuri nucu yu masa dehyoara puhru yaha yebaguere, Jerusaléngue säre yu áriřare masima erā. <sup>5</sup> Negohraguere fariseo masu áriřibu. Eropiḡu fariseo masa erā dorerire, erā iirinore yuhu ipehodigū áriřū erā masima. Erā mure werediārā, irire weremasima erā. <sup>6</sup> I dipuwaja ta yure weresāmurima. Gua ñecu sumaräre “Sīriniräre masugura,” Goāmū iḡu arī apirare “Diaye ta āhraa,” yu arīri waja oā yure weresāmurima. <sup>7</sup> Yu acawererā judio masa, áriřehrerā doce cururi majarā Goāmū masare iḡu masuborore mucubiri cohrema. Eropirā Goāmure umupeoniguicāma. Eropa corerā áriřā yu iiro dopa ta iima erā sā. Opū Agripa, eropa yujuropa gua iirā áriřuerecū ta erāpu yuhu iḡu masuborore ii coreri waja yure weresāmurima judio masa. <sup>8</sup> ¿Duhpirā sīriniräre Goāmū iḡu masuborore peediabeari mūa judio masa? arī werepū Pablo.

*Pablo Jesu yaräre iḡu ñero iirare werepū*

<sup>9</sup> Eroparītuhaja ōpa werenemopū:

—Jesu Nazare majagure ĩanibigū dohpa ñeri dihtare iidiaribu yuhu iḡu yaräre. <sup>10</sup> Eropiḡu Jerusaléngue eropa iimuriribu yuhu. Pahia oparā yure erā dorera puhru bajarā Jesu yaräre peresu iimuribu yuhu. Eropiḡu oparā eräre erā wejédorecū, wejēmuribu yu sā. <sup>11</sup> Bajasuburi áriřehreru judio masa erā buheri wirigue Jesu yaräre ñero iidoremuricarabu. Eropiḡu Jesu yarā Jesure erā cóacū iidiaribu yuhu. Erā mera burigā guabu yuhu. Eropiḡu gajī macarigue säre eräre ñero iigū ejamuricarabu yuhu, arī werepū Pablo.

*Pablo Jesu yagu iḡu warare werepū*

<sup>12</sup> Eropa arītuhaja ōpa werenemopū:

—Eropiḡu Damascogue Jesu yaräre ñero iidiagu ejaribu. Eräre yuhu ñero iidiacū ĩarā pahia oparā yure wadorema. <sup>13</sup> Ōpa áriřu, opū Agripa: Goeri boje áriřū gohra mague yu wacū umaro maja gosesiriri, abe umu majagu tauro yure yu mera warā säre gosesiribu. <sup>14</sup> Gua áriřehrerā yebague mehmerejabu. Judio masa ya mera yure iḡu wereniguicū peebu. “Saulo, Saulo, ¿duhpiḡu mūhu yure ñero iiri? Mūhu yu mera guagu yure yuhribigū, mū basi ñero taria,” arīmi yure. <sup>15</sup> “Opū, ¿nihino āhriri mūhu?” arī serēpibu yupu. “Yuhu Jesu ta āhraa mū ñero iigū. <sup>16</sup> Wahgānugajaque mūhu. Yu pohro majagu mure iibu dohpague dehyoa yuhu. Dohpagāre mūhu yure ĩarare, puhru mure yu ihmuburi säre gajiräre weredorebu apigūca mure. <sup>17</sup> Judio masare, judio masa áriřirā säre mure buhedoregū obeogura. Erā pohro mū áriřū, mure erā ĩhaturicū mure itamugura. <sup>18</sup> Yahare eräre masicū iique mūhu. Eropiḡu erā ñerire duhucū iique mūhu. Ōaripure gohrotocū iique eräre. Watire eräre gamebircū iique mūhu. Eropiḡu Goāmū yapure iicū iique mūhu eräre. Mūhu eropa iicū erā yure umupeorācoma. Erā eropa umupeocū ĩagu erā ñeri iirare cādijigūca. Eropirā erā Goāmū iḡu beyenirā mera majarā mera áriřācoma. Iḡu oburire opamorā áriřācoma erā,” arīmi Jesu yure, arī werepū Pablo.

*Pablo iḡu iirare iḡu mohmerire werepū*

<sup>19</sup> Eroparītuhaja ōpa werenemopū:

—Opɔ Agripa, ɔmaro maja yɔ peerire tarinɔgabiribɔ. <sup>20</sup> Damascogue buhemɔhtabɔ. Pɔhrɔ Jerusalén buhebɔ daja. Pɔhrɔ Judea yeba, judio masa áribirá pohrogue sáre masare erá ñero iirare bujaweredore, Goámɔ yare gamedorebɔ. “Óarire mɔa iicɔ íará mɔa ñeri iirare mɔa bujawererare gajirá masirâcoma,” arígɔ, erâre óarire iidoregɔ buhebɔ. <sup>21</sup> Goámɔ ya wihi yɔ áricɔ yɔ eropa arí wereri waja judio masa yare ñeha wejêdiarima. <sup>22</sup> Eropigɔ ɔmuri nɔcɔ Goámɔ ígɔ itamuro mera eropa buheniguicâa. Eropigɔ dohpaguere mɔa áripheerâre oparâre bu arírâ sáre ígɔ yare weregɔ iiaa. Iribojegue majarâ Goámɔ yare weremɔhtanirâ Moise mera erá wereyudiro dopa ta werea yɔ sâ. Ópa arí wereyuñorâ erâ: <sup>23</sup> “Cristo Goámɔ ígɔ obeodigɔpɔ ñero tarigɔcumí. Eropigɔ sírigɔ masa muriamɔhtagɔ árigɔcumí ígɔ. Eropigɔ masare ígɔ itamuborore judio masare judio masa áribirâ sáre masicɔ iigɔcumí,” arí wereyu gojamuríñuma iribojegue majarâ. Yɔ sâ erá werediro dopa ta werea, arí werepɔ Pablo Agripare.

*Pablo Agripare Jesu yagɔ iidariɔpɔ*

<sup>24</sup> Ígɔ eropa arí werera pɔhrɔ Festo ígure burigá gaguinigui wereniguipɔ:

—Pablo, mɔhɔ goroweregɔ áhrraa. Mɔhɔ baja buhegɔ goroweregɔ wahaa, arí gaguiniguipɔ Pablora.

<sup>25</sup> Ígɔ eroparícɔ peegɔ ópa yúhripɔ Pablo Festora:

—Opɔ, goroweregɔ áribéaa yúhɔ. Yɔ wereri diaye ta áhrraa. Eropigɔ yúhɔ ire guhyadiaro mera arâa. <sup>26</sup> Opɔ Agripapɔ i yɔ wererire óaro masimí. Eropigɔ yúhɔ ígure güiro mariro werea. I wererire áripheerâ masa masima. Eropigɔ áripheereri ire yɔ arírare opɔ Agripa ígɔ masicɔ masia yúhɔ, arípɔ Pablo Festora.

—Ígɔ eropa arítuhaja ópa arípɔ Agripare:

<sup>27</sup> —Opɔ Agripa, Goámɔ ya weremɔhtanirâ erá wererare peea mɔhɔ. Erá wererire mɔ peecɔ masia yúhɔ, arípɔ Pablo Agripare.

<sup>28</sup> —¿Ire yare weregɔ merogá mɔ wereri Jesu yagɔ yɔ wacɔ iidiaɔgɔ iiri mɔhɔ? arípɔ Agripa Pablora.

<sup>29</sup> Ígɔ eroparícɔ Pablo yúhripɔ.

—Merogá wereniguigɔ o yoari boje wereniguigɔ mɔa áripheerâre yúhɔ árro dopa ta Jesu yarâ áricɔ gahmea. Irire serêbasaa Goámure. Eropigɔ yɔ iro dopa ta peresugue mɔa áricɔ tamerare gamebeaa yúhɔ, arípɔ Pablo.

<sup>30-31</sup> Ígɔ eropa aríra pɔhrɔ Agripa, Festo, Berenice áripheerâ gajirá mera wahgânuga wiria, erá basi wereniguíñorâ:

—Íhí ígɔ iira waja ne peresu iimasibeaa mari. ¿Eropirâ mari ñeheno dipuwaja ígure wejêbocuri? arí wereniguíñorâ erá erá basi.

<sup>32</sup> —Íhí “Áripheerâ weca opure yɔ iirare werediaca,” ígɔ aríbiricɔ mari wiuboaya ígure peresugue árigure, arípɔ Agripa Festora.

## 27

*Pablo ígure weresârare Romague weregɔ warɔ*

<sup>1</sup> Pablora Italiague áripheerâ weca opɔ pohrogue dohodiru mera obeorâ, ígɔ mera gajirá peresu arírâ sáre obeoñorâ. Eropirâ Julio

waĩcũgure erāre ĩhadibudorerā obeoñorā erā. Julio cien surara opũ árĩpũ. Ĩgũ ya curu Augusto yarā surara waĩcũñorā. <sup>2</sup> Yũ sã Pablöre wapicũgãbũ. Eropirã Adramitio waĩcũro majaru dohodiru mera ñajabũ gũa. Iriru Asiague waburiduru árĩbũ. Ñajatuhaja, iriru mera wabũ. Aristarco Tesalónica waĩcũri maca majagũ gũa mera wami. Tesalónica Macedonia yeba árĩbũ. <sup>3</sup> Gajinũ gũa Sidóngue ejabũ. Erogue ejagũ Julio Pablöre ðaro iimi. Eropigũ Pablöre ĩgũ mera majarã pohrogue ĩagũ wadoremi. Eropigũ Pablo mera majarã ĩgure ĩgũ gamerire erā ocũ “Õaroca,” arĩmi Julio. <sup>4</sup> Dohodirugue ñajarã daja gũa taribujacũ bũrigã miruñe gũare gajipũgue weãtaribujubũ. Eropirã Chipre waĩcũri nũgũro cãhmotarogue diayepũ wabũ gũa. <sup>5</sup> Pũ Ciliciare taria, Panfilia sãre taria, Mira waĩcũri macague Licia yebague árĩri macague tuhajabũ gũa.

<sup>6</sup> Erogue ejarã, Alejandriague aridirure, Italiague wadirure dohodirure bocabũ. Eropigũ surara opũ gũare irirugue wadoremi. <sup>7</sup> Bajanũri dabero waro waha, “Ñe yeboca,” arĩ, waha, Gnido waĩcũri maca diaye ejabũ gũa. Erogue eja taria, miruñe bũrigã weã, gũa wadiadirore gũare weãbeobiribũ. Eropirã gũa copũgue majipa wabũ. Eropirã Creta waĩcũri nũgũro iri nũgũro cãhmotari masepũ gũa taribuja waha, Salmón waĩcũri ñorore tariabũ gũa. <sup>8</sup> Erogue tari, iri nũgũro pohro waha, “Ñe yeboca,” arĩ waha, “Õari peramaha” waĩcũrogue tuhajabũ. Peramaha Lasea waĩcũri maca pohrogue árĩbũ.

<sup>9</sup> Erogue gũa yoari boje árĩra pũhrũ, gũa waboropũ gũhyataribũ. Eropiro erã ba duhurinũ bosenu tarira pũhrũ, Pablo dohodiru majarãre weremi.

<sup>10</sup> —Peeque mũa. Ba duhurinũ bosenu pũhrũ mari wacũ marire mirimaja gũhyataria. Iru dohodiru, dohodiru maja, mũa doberi sã mari mera majarã sã mari dedereboca warã, arĩrimi Pablo.

<sup>11</sup> Ĩgũ eroparĩquerecũ surara opũ dohodiru opũpũre peegũ, autugũ sãre peegũ, Pablo ĩgũ wereripũre peediabirimi wadiagu. <sup>12</sup> Erã payari peramaha puhiró árĩcũ ðari payari peramaha árĩbiribũ. Ero eropa árĩri peramaha árĩcũ dohodiru majarã bajarã wadiarã, Fenicegue mũriadiarima puhiró waboro core. Fenice Creta waĩcũri nũgũro maja peramaha árĩro, miruñe ero aridirogue abe mũririroguepũ copũgue diayepũgue sãre ĩhabeo miruñe aricũ ðaro cãhmotari maca árĩbũ. Ero eropa árĩri peramaha árĩcũ masirã erã erogue yuju puhibũgũ árĩrisubu árĩdiarima.

*Wũariyague miruñe, deco wũaro ariyoro*

<sup>13</sup> Eropii docapũ surgue daberogã miruñe arinũgabũ. “Dohpagãre ðarinũ mari waburinũ ãhraa,” arĩ pepiriñorã erã. Miruñe ero aricũ erã comeyere tarawahgũ, Creta nũgũro pohrogã mũriabũ gũa. <sup>14</sup> Eropii pũhrũñari miruñe gohroto noreste waĩcũri miruñe bũrigã weãbũ. <sup>15</sup> Eropiro dohodirure miruñe bũrigã weã erabũ. Miruñe ero weãbeoro wamasibiri, majipa, miruñe mera wabũ gũa. <sup>16</sup> Clauda waĩcũri nũgũrogã pohrogue docapũgue waha, iri nũgũrogã gũare merogã cãhmotabũ. “Marire yebo ãhraa,” arĩrã erore dohodiru majaru miridirugã gasirure ðaro tarapeo diribũ gũa. <sup>17</sup> Irirure dohodirugue gũa tarasã diripehora pũhrũ wũarida mera erã waĩñea peoma. Libia yeba tũro pohro árĩri imipororire “Iriru gasiru dohodiru



iri mehtuhajari,” arĩrã güi árĩma erã. Eropirã erã miru ñeari suhrire erã aĩdjura pũhrũ dohodiru dihtare miruñe weãbeobũ. <sup>18</sup> Miruñe, deco mera burigã aribũ. Gajinũ sãre miruñe muraro ta daja aricũ ïarã erã erã doberire diague duhrimeyura pũhrũ taribujabũ gũa. <sup>19</sup> Gajinũ dohodiru majare diague cóãma erã erã basi. <sup>20</sup> Bajanũri ñĩpirinũri árĩcũ, abe umũ majagũ necã sã ne deyobirima. Eropiro burigã miruñe aribũ. Eropirã “Miria wahaa mari. Eropirã sĩria warãca,” arĩ pepiribũ gũa.

<sup>21</sup> Eropigũ Pablo yoari boje erã ba duhura pũhrũ ïgũ erã core nũgaja, weremi erãre.

—Muare yũ wercẽ peebirabũ mũa. “Cretague árĩrã mari wacũ gũhya árĩca,” yũhũ arĩcũ peebirabũ mũa. Yũre peerã, iru maja árĩpehrerire dedeobiriboaya mũa. <sup>22</sup> Eropigũ dohpague muare werea. Guñaturaque. Eropirã güibiricãque. Árĩpehrerã mari tarirãca. Iru dohodiru dihta marire wahribasaroca. <sup>23</sup> Dohpagã ñamire Goãmũ anyu yũre dehyoami. Goãmũ yagũ ãhraa yũhũ. Eropigũ ïgũre umupeoa yũhũ. Anyupũ yũ pohro arigũ wereami. <sup>24</sup> “Pablo, güibita. Árĩpehrerã weca opũre mũ iirare mure werero gahmea. Goãmũ õagũ ãhrimi. Eropigũ ïgũre mũ serẽro dopa ta dohpague mũa mera majarã sãre itamugũcumi,” arãmi yũre anyu. Eropirã güibirãta mũa. <sup>25</sup> Anyu yũre ïgũ arĩdiro dopa ta eropa waroca. Goãmũre umupeoa yũhũ. Eropigũ ïgũ werediro dopa ta “Diaye ta ãhraa,” arĩ pepia yũhũ. <sup>26</sup> Marire nũgũrogue miruñe weãbeo cóãroca, arĩ weremi Pablo erãre.

<sup>27</sup> Yuju ñami pe semana pũhrũ wũariya Adria waĩcũriya miruñe gũare burigã weãbũ. Irisubure ñami deco dohodiru majarã umapũ “Tũrogue ãhraa mari,” arĩ pepima erã. <sup>28</sup> Erã eropa arĩ pepirã yurada nũcũdiru comerure dihiri, duhmiumediju queoñama. Treinta y seis metro gohra ãhcãbũ. Mero ta waha, queoma daja. Irisubure veintisiete metro gohra ãhcãbũ. <sup>29</sup> Eropirã utãre mehtuhajari arĩrã dohodiru auturogue wapicũriye comeyerire dirimiu dijuma erã diague daberu wacũ gamerã. Eropirã “Yojaru boyoporo,” arĩrã, burigã serẽma erã. <sup>30</sup> Dohodiru majarã umapũ erã dihta duhririma. Erã miridirugãre dohodiru majarure diague taradijupo dohodiru ïguiru come dipure erã dijudiro dopa ta iirima erã miridirugã marire ïhari arĩrã. <sup>31</sup> Erã eropa duhridiaquerecũ Pablo erã eropa iicũ masigũ surara opũre, ïgũ surara mera weremi:

—Oã, umã miridirugã mera erã wacũ mũa árĩpehrerã sĩrirãca, arĩmi Pablo.

<sup>32</sup> ïgũ eroparĩcũ peerã surarapũ miridirugãre diriridarire wirita, irirure cóãcãma.

<sup>33</sup> Boyoboro coregã Pablo erãre badoremi.

—Pe semana gohra mũa ne babeaa. <sup>34</sup> Eropirã dohpaguere barã arique. Eropigũ muare badorea. Mũa ojocaridiarã baque. Árĩpehrerã mũa tarirãca, arĩmi Pablo erãre.

<sup>35</sup> ïgũ eropa arĩra pũhrũ Pablo panre aĩ, árĩpehrerã erã pohro Goãmũre “Õhaa,” arĩ, duhpeo, irire bami ïgũ. <sup>36</sup> ïgũ eropa bacũ ïha erã sĩporã turarã waha, árĩpehrerã erã sã bama. <sup>37</sup> Gũa árĩpehrerã doscientos setenta y seis masa dohodirugue árĩbũ gũa. <sup>38</sup> Eropirã erã árĩpehrerã yapia waha “Iru dohodiru nũcũ árĩca,” arĩ, baja trigo barire diague cóãma daja.

*Dohodiru imiporogue mehbejayoro*

<sup>39</sup> Boyocã dohodiru majarã uma nũgurore ãarã, “Õpa waĩcũri nũguro ãhraa i nũguro,” arĩ ãha masibirima. Eropirã erã dipatũgure imiporo áricũ ãarã, “Mari iritũgugue warã, erogue mehmejaboca imiporogue,” arĩma erã. <sup>40</sup> Eropa arĩrã, come dipure diriridarire wirita medijucãma erã. Erã eropa iira pũhrũ dohodiru ãguiru maja suhriro aĩ wahgũ nuguma diaye miruñe weãbeocũ gamerã. <sup>41</sup> Eropiro dohodirupũ ãguirupũ imiporogue sĩmaja merejamasibiribũ. Eropiro auturore bũrigã pãgũri pamehtucũ iriru auturo wahria wabũ.

<sup>42</sup> Eropa wacũ ãarã õpa arĩma surara.

—Iru miricũ mari peresu iinirã tũrogue baatuhaja duhricãrãcoma. Eropirã erãre wejẽpehocãrã, arĩrima surara.

<sup>43</sup> Eropigu surara opupũ Pablora wejẽdiabigu áripheerã peresu áripheerã wejẽdorebirimi. Eropigu áripheerã baamasirãre surara opũ mata tũrogue baatujadoremi. <sup>44</sup> Eropirã gajirã dohodiru maja wahrira mijiri mera yuuriñaja, iri mijiri weca peya baa majama. Gũa eropa iirã gũa áripheerã tũrogue tuhajabũ õaro.

## 28

*Pablo Malta waĩcũri nũguro áripũ*

<sup>1</sup> Eropii iri nũgurogue gũa áripheerã majajanũgajara pũhrũ iri nũguro waĩre masibũ. Malta waĩcũri nũguro áripũ. <sup>2</sup> Iri nũguro majarã masa õarã áripã, õaro iima gũare. Eropirã deco gũa weera pũhrũ yusatariabũ gũare. Eropirã ero majarãpũ peame dihutuhaja, gũare sõhmadorema. <sup>3</sup> Pablo peare aĩgãri aĩtĩami. ãgu aĩtĩara pũhrũ iri pea pohecague áridigu aña coñorpore wirigu, Pablo mojoto curĩtuhajami yahawearo mariro. <sup>4</sup> ãgu curĩtuhajacũ ãarã, iri nũguro majarã erã basi wereniguima:

—Ihĩ masa wejẽdigu áribocumi. Eropigo mari turago dipuwaja moago umaro majago ãgure dipuwaja moago, ojocaridorebeamõ. ãgu wũariyague mirigu tarituhajadigu áripãmi. Dohpaguere igopũ ãgure ojocaridorebeamõ, arĩrima erã basi.

<sup>5</sup> Eropigu Pablo añare peamegue wejẽsiri mehpeomi. ãgu aña pũribirimi. <sup>6</sup> “Bijiroca,” arĩrã, corerima erã. Ne bijibiribũ ãgure. “ãgu sĩria wagucumi,” arĩrã erã ãha corerima. ãgure pũribirimi. Yoari boje ero bijibiricũ ãarã, ãgure pũribiricũ ãarã, gajiropa pepirima erã. “Ihĩ goãmarã mera majagu áribocumi,” arĩrima erã.

<sup>7</sup> Erã baa tuhajadiro pohro Publio waĩcũgu ya poeri áripũ. ãgu iri nũguro majagu opũ áripũ. Eropirã ãgu gũare õaro iicũ uhrenũ gohra ãgu ya wihigue áripũ gũa. <sup>8</sup> Publio pagũ yojorocũ, nimacuricũgu áripũ. Eropigu ãgu camague oyami. Eropigu Pablo dorecũgu ya taribugue ñaja, Goãmure serẽ, ãgu mojotorire ãgu weca duhpeo, õagu wacũ iimi ãgure. <sup>9</sup> ãgu õagu wacũ ãarã áripheerã gajirã iri nũguro majarã dorecũrãre Pablo pohrogue aĩgãrima. Erã eropa aĩ eracũ ãagu Pablo erãre õarã wacũ iimi erã sãre. <sup>10</sup> Pũhrũ erã baja sãre waja mariro oma. Gũa waboro coregã áripheerã gũa gamerire, gũa warã gũa baburire dohodirugue durisãbasama erã.

*Pablo Romague ejapũ*

<sup>11</sup> Ɔrerā abe iri nuɣurogue gwa árira pũru dohodiru mera wabu gwa daja. Iruru dohodiru iɣuiru perā goāmarā Cástro, Pólux waĩcũrā erā wéanirā niguima. Alejandríague ariduru árĩbu iruru. Puhirópē iri nuɣurogue iruru dohodiru payabu. <sup>12</sup> Waha, Siracusa waĩcũri macague ejarā, Ʃhrenũ gohra iri macare árĩbu gwa. <sup>13</sup> Iri macare wiri waha, Regio waĩcũri macague ejabu gwa. Gajinũ surgue miruñe ahri ɣuare weābeobũ. Penũ pũru Puteoli waĩcũri macague ejabu. <sup>14</sup> Eroque Jesu yarā bajamerāgā ɣuare bocatĩrima.

—Yuju semana gohra gwa mera dujaque, arĩma erā ɣuare.

Erā eroparĩcũ peerā yuju semana gohra erā mera dujanibũ. Pũru mague majaa, Romague ejabu gwa pare. <sup>15</sup> Ero majarā Jesu yarāpũ gwa ejarare peerā, Apio waĩcũroque doberi duarogue ɣuare bocatĩrima. Gajirā Jesu yarā “Ɔhre wihi” waĩcũroque ɣuare bocatĩrima erā sã. Erā eropa bocatĩricũ iagũ Pablo mucubiriri mera Goāmũre “Ōhaa,” arĩ, ōaro sĩñaja wami. <sup>16</sup> Romague gwa ejara pũru erā peresu erā iinirāre ero majagũ peresu corerā opũre weremi. Eropirā Pablopũre yujugũ ta apima ero majarā oparā. Eropigũ iɣure yujugũ surara coremi.

### *Pablo Romague buhepũ*

<sup>17</sup> Ɔhrenũ pũru Pablo judio masa buherā mera gamenerebu, erāre sihumi. Erā gamenerera pũru iɣu erāre weremi:

—Acawererā, mari acawererāre, mari ñecũ sumarā erā iimũrirare, marire erā buhera sãre tarinũgabirimũrabũ yũhũ. Yũ eropa tarinũgabiriquerecũ ta Jerusalén yũre ñehama Asia majarā judio masa. Erā eropa iira pũru Roma majarāre yũre peresu iidorema erā. <sup>18</sup> Erā eropa iicũ Roma majarā yũre serēpi, yũhũ ñero iibigu yũ árĩcũ yũre “Dipuwajacũgũ āhrimi,” arĩmasibirama. “¿Ñehe dipuwaja dipuwaja wejēbocuri mari iɣure?” arāma erā yũre. Eropirā yũre serēpirāpũ yũre wiudiarama. <sup>19</sup> Judio masapũ yũre wiudorebirama. Eropigũ yũ acawererāre judio masare weresādiabiriqueregũ ta, “Árĩpehrerā weca opũre yũ iirare diaye werediaca yũhũ,” arĩ serēabũ. Judio masa yũre erā wiudorebiricũ iagũ “Roma majagũ opũre weregũ waro gahmea yũre,” arābũ. <sup>20</sup> Eropii mũare ire werediagũ sihuabũ. Cristo marire taubu judio masa erā coredigũ iɣu yare yũ wereri waja yũhũ peresugue āhraa. Eropigũ irire mũare werebu sihuabũ, arĩmi Pablo judio masa oparāre.

<sup>21</sup> Iɣu eroparĩcũ peerā erāpũ iɣure werema.

—Judio masa mũare quere wereripũrĩre ɣuare ne obeobirama. Eropirā erogue arinirā sã gwa acawererā ɣuare mũ eropa warare werebirimũrama. Erā “Iɣu ñero iigu āhrimi,” arĩ mũare werebirimũrama. <sup>22</sup> Mũa ya curure árĩpehrerogue masa erā ñero wereniguicũ gwa masia. Eropa masirā mũ buherire mũ werecũ peediaa gwa, arĩma erā iɣure.

<sup>23</sup> Eropa arĩtuhaja, “Gajinũ árĩrā,” arĩma erā. Gajinũgue Pablo mera gameneremũhtanirā tauro masa bajarā iɣu árĩroguere erama. Ñamiñarigā Goāmũ iɣu opũ árĩrare ōari buherire iɣu buhenũga, pũ ñamigue buhe duhúmi. Goāmũ dorerire Moisegue iɣu apirare, pũ Goāmũ ya weremũhtanirā erā gojarare buhemi. Eropa buhegũ, erāre Jesure masicũ iidiagũ iirimi Pablo. <sup>24</sup> Yujurāyeri iɣu buherire gamema. Eropirā gajirāpũ peediabirima. <sup>25</sup> Eropirā erā basi pe curu game dũca

wari wama. Erã wiriaboro core Pablo Isaia ĩġu wereniguirare weremi. Őpa arĩmi erãre:

—Isaia Goãmu yare weremuhtadigu ĩġu werera diaye ta ãhraa. Mari ñecu sumarãre wereġu árĩġu Espĩritu Santo Isaiare ōpa arĩ were gojadoreñumi:

<sup>26-27</sup> Ire oãre wereġu waque: “Dipu burĩrã ãhraa mua. Eropirã yahare peediabeaa mua. Gamiri toyobirã dopa ta peediabeaa mua. Eropirã yahare peequererã peesome mua. Mua eropa árĩbirã ōaro peeboaya mua. Eropirã ōarĩpũre gohrotoboaya mua. Eropĩġu mũare peame wabonirãre tauboaya yũũ,” arĩmi Goãmu, arĩ gojañumi Isaia, arĩmi Pablo erãre.

<sup>28</sup> ĩġu eropa arĩra pũhrũ Pablo werenemomi:

—Ire masĩque mua. Goãmu buherire masare ĩġu ōaro taurire judio masa árĩbirãre buherãca ġua. Erãpũ peerãcoma, arĩmi Pablo judio masare.

<sup>29</sup> ĩġu eroparĩcũ peerã judio masa irire erã basi burĩgã game dũyaso wiriama.

<sup>30</sup> Pe bojori gohra Pablo ĩġu eropa wajayeniguirĩ wĩhigue árĩpũ. Ero árĩġu, árĩpehrerã ĩġu ya wĩhigue warãre mucubiriri mera bo-catĩrimũripũ ĩġu. <sup>31</sup> Eropĩġu ĩġu ġũiro mariro Goãmu ĩġu opũ árĩrre, mari Opũ Jesucristo ya sãre buhemũripũ. ĩġu eropa buhequerecũ ta ne ġajirã ĩġũre “Buhebirĩcãque,” arĩbirĩñorã.

## Romanos

*Pablo Roma majarãre Jesu yarãre gojabeoñumi*

<sup>1</sup> Yũhũ Pablo mũare Roma majarãre gojabeoa. Yũhũ Jesucristo pohro majagu ãhraa. Eropigu ðari buherire buhedoregu apimi igũ yũre.

<sup>2</sup> Iri ðari buherire iribojegue Goãmũ “Õpa masare ðaro iigũra,” arĩ weryuñumi igũ yare weremuhtanirã merague. Erã irire gojañuma.

<sup>3</sup> Iri buheri ta igũ magure wereri ãhraa. Igũ Jesucristo masa dehyoagu arĩgu Davi mũru pãrami arĩturiagu arĩdigũ arĩmi. <sup>4</sup> Igũ ta Goãmũ magũ igũ arĩrire ihmudigu arĩmi Goãmũ igũ Espĩritu Santo mera. Eropigu igũ Jesu sĩrira pũhrũ Goãmũ igũ turari mera igũre masa mũriacũ iidigu arĩmi. Eropigu Jesucristo diaye ta Goãmũ magũ igũ arĩrire ihmudigu arĩmi masare. Igũ Goãmũ magũ ta mari Opũ Jesucristo ãhrimi. <sup>5</sup> Igũ ta guaremojomoro ãagu guau magure wereri ãhraa. Igũ Jesucristo masa dehyoagu arĩre igũ yare buhedoregu obeomi arĩpehrero majarãre igũ yare pee masi, Jesucristore erã umupeocũ iimorãre. <sup>6</sup> Eropirã mũa sã Jesucristo yarã arĩmorã igũ beyenirã ãhraa.

<sup>7</sup> Mũare Goãmũ igũ mahirãre, igũ yarã arĩmorãre iidi arĩmi igũ mũare. Eropigu mũare Romague arĩrãre ipũre gojabeoa. Eropigu Goãmũ mari Pagũ mari Opũ Jesucristo mera mũare ðadorea. Igũ itamuri mera ðaro arĩque mũa.

*Pablo Romaguere ãagu wadiarica, arĩ gojañumi*

<sup>8</sup> Ire weremuhtagũra mũare. Arĩpehrerogũre Jesucristore mũa umupeora querere werema. Erã eropa arĩ werecũ peerã “Õhaa,” arĩ serẽa yũhũ Goãmũre. Jesucristo igũ itamuro mera eropa arĩ serẽbasaa. <sup>9</sup> Goãmũre serẽgu mũa ya arĩburire arĩpehrerinũri serẽbasaniguicãa. Mũa ya arĩburire eropa yũ serẽbasaniguicũ Goãmũ masimi. Igũ dorerire turaro mohmea igũ magũ ya buherire buhegu. <sup>10</sup> Eropa serẽgu Goẽrã judio masa arĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yũhũ. Eropa bajasuburi wadiaqueregu ta wamasibirimũrabũ yũhũ. <sup>11</sup> Goãmũ yare mũare buhediacã Jesure mũa umupeonemoburire. Eropigu mũare bũrigã ãdiaca yũhũ. <sup>12</sup> Jesucristore umupeorã ãhraa mari. Eropigu mũare ãdiaca Jesucristore mari umupeori mera pepũri majarã mari game mucubiricũ iiborore. <sup>13</sup> Yũ acawererã, ire mũa masicũ gahmea. Gajipũgue ðari buherire yũ buhera pũhrũ gajirã mũa acawererã judio masa arĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yũhũ. Eropa bajasuburi wadiaqueregu ta wamasibirimũrabũ yũhũ. <sup>14</sup> Arĩpehrerãre ðari buherire buhero gahmea yũre. Wũari macã majarãre, noho gamero arĩrãre, masirãre, masibirã sãre buhebu arĩgu iiaa yũhũ. <sup>15</sup> Eropa arĩgu, arĩgu mũa sãre Roma majarãre ðari buherire bũrigã buhediacã.

*Õari buherire masa peerã Jesure umupeonũgama, arĩ gojañumi Pablo*

16 Ōari buherire peerā masa Jesure umupeonugama. Eropigu árīpehrerāre Jesure umupeorāre Goāmũ ĩgu turari mera erā peamegue wabonirāre tuami. ĩgure umupeorā ōaro waborore masigu ĩri buherire ōari buherire buhegu gahyasiuro taribeaa. Iri buherire judio masapure buhemāhtanirā árīma. Pũhrũ judio masa árībirā sāre gua buheabu. 17 Iri buheri ōpa werea: Jesucristore umupeiorāre “Ñeri marirā ōarā āhrima,” arī ĩhami Goāmũ. Jesucristore umupeorā dihtare eropa arī ĩhami Goāmũ. ĩgu eropa arī ĩarire iribojegue erā arī gojadiro dopa ta arāa: “ ‘Ōarā āhrima,’ arī ĩgu ĩarā Goāmũre ‘Diaye ta ĩgu āhrimi,’ arī umupeorā āhrima. Eropa umupeorā árīpehrerinũri Goāmũ mera árīrācoma,” arī gojañuma.

*Masa erā ñero ĩri mera dipuwajacurā āhrima, arī were gojañumi Pablo*

18-19 ĩgu árīricurire masare ōaro masicũ ĩpu Goāmũ. Eropirā ĩgure ĩgu árīrere masicũ diasabeaa masare. ĩgu árīrere masare masicũ ĩiquerecũ masapu erā ñerire ĩrā Goāmũre masidiabeama. Erā ĩri ñeri ĩri mera gajirāre Goāmũ yare peebiricũ ĩima erāpu. Eropigu Goāmũ umarogue árīgu masa árīpehrerā erā ĩgure tarinugarire, eerā ñero ĩri sāre ĩagu eerā eropa ĩri dipuwaja guami. Eropa ĩgu guarire masicũ ĩimi erāre. 20 Goāmũ umaro majagu ĩgu árīrere turagu ĩgu árīrere mari ĩabiriquerecũ ta, ĩgu basi ĩgu árīrere masicũ ĩimi ĩgu marire. I yebare ĩgu ĩira pũhrũ árīpehrerire ĩgu ĩhacũnugurare ĩarā, “Goāmũ ĩgu ĩira ta āhraa. ĩgu turagu ta āhrimi,” arī guñama masa. Eropirā “Goāmũ āhrimi,” arī masima masa árīpehrerā. Eropirā masa “Goāmũ āhrimi,” arī masiquererā eropa ñerire ĩiniguicāra, dipuwajacuma. “Mũre masibirabu. Eropigu ñerire ĩiabũ,” masa arīmasisome Goāmũre. 21 Goāmũ ĩgu árīricurire masiquererā ta erā ĩgure umupeobeama. “Mũhũ Goāmũ, turagu ta āhraa,” arībeama. Eropirā ĩgu erāre ōaro ĩiquerecũ ta “Ōhaa,” arībeama ĩgure. Eropirā pee masibirā árīrā, ñeri dihtare pepima erā. 22 “Pee masirā āhraa,” arīquererā ta pee masibirā wahama erā. 23 Eropa warā Goāmũre eropa árīniguigure ōagure umupeobeama. Eropa umupeobirā “Goāmũ āhrimi,” erā arīrāpũre erā wéanirāpũre umupeonugama erā. Eropirā masare, mirimagũ porāre, pĩruare, waimũrāre wéanugu umupeoma erā, “Mari Goāmũ āhrimi,” arīrā.

24 Erā eropiicũ ĩagu “Erā gamero dopa ta ĩi curaporo,” arīgu Goāmũ erāre cohāmi. ĩgu eropa cóara pũhrũ, erā ñeri dihtare uaribejarā erā basi ñeri dihtare ĩiniguicāma. 25 Eropirā Goāmũ yare peebiri, guyaripũre ōaro peema. Goāmũ yapũre guyarĩ iro dopa ta wacũ ĩima erā. “Diaye ta Goāmũre árīpehrerāre ĩidigure umupeoro gahmea,” mari arīquerecũ erāpu ĩgure umupeobeama. Eropa Goāmũ gohrare umupeobirā ĩgu ĩirapũre umupeoma erā.

26 Erā eropiiniguicācũ ĩagu “Erā gamero ñerire ĩi curaporo,” arīgu Goāmũ cohāmi erāre. Eropirā erā mera majarā nome marapũcurā nome iro dopa árībeama. Eropirā erā nome seyaro ñero ĩima erā basi. 27 Erā iro dopa ta árīrā uma sā nomere gamebirā erā basi ta erā dũpurire uaribejarā āhrima. Eropirā erā basi ta erā ñero ĩira dipuwaja erā dũpũre ñero goroweoma.

<sup>28</sup> Eropa Goãmure masidiabirã ĩgure gamebirira dipuwaja Goãmũ “Erã gamero ii curaporo,” arĩgu erãre cohãmi. ĩgu eropa cóãcũ erãpũ ñerire guñanigui, ñerire Ɂaribejarire iiniguicãma. <sup>29</sup> Eropirã erã buriã ñero iiniguima. Nome mera ñero iiniguirã, erã ñerire Ɂaribejaniguirã, gajirã yare gametarirã, gajirãre ñero iiniguirã, gajirã gajinore opacũ ĩhaturirã, masare wejẽrã, game duyasarã, guyaricurã, masare ĩhaturirã, ñeri quere iirã àhrima erã. <sup>30</sup> Gajirã erã iibiriquerecũ ta ñero arĩ werewuarã, Goãmure ĩhaturirã, gajirãre papũro yuhrirã, “Gua tamera gajirãre tarinugarã õarã àhraa,” arĩ pepirã, gajirãre eropa arĩ weremaacãrã, gajirã ñerire iinugarã, erã pagu sumarãre tarinugarã àhrima. <sup>31</sup> Pee masibirã àhrima. Erã werediro dopa ta iibirã, masare ne umupeobirã, erãre ñero iirare ne cãdijibirã, ne gajirãre mojomoro ĩabirã àhrima. <sup>32</sup> Eropa árĩrãre Goãmũ erãre dipuwaja moa peamegue cóãgucumi ĩgu erãre. Eropa ĩgu cóãburire masiquererã erã ñerire iiniguicãma. Eropirã gajirã erãre ĩhacũcũ, erã iiro dopa ta ñero iicũ ĩarã “Gua iiro dopa ta iima,” arĩ mucubirima.

## 2

*Masare erã ñero iira dipuwaja moadoregu irire diaye ta iigucumi Goãmũ, arĩ were gojañumi Pablo*

<sup>1</sup> Erã eropa ñerire iicũ ĩarã gajirã õpa arĩbocoma: “Erã ñetariarã àhrima. Goãmũ erãre dipuwaja moaporo,” arĩbocoma. Eropa arĩrãre õpa arĩ werediaca. Mũa sã erã iiro dopa ta iiaa. Eropirã “Erã ñetariarã àhrima,” gajirãre arĩ werewuabiricãro gahmea mũare. Eropa arĩ wererã mũa basi ta erã ñerire iiro dopa ta iirã dipuwajacurãca. Iri ñerire masiquererã iirã mũa ñero dipuwajacurãca. <sup>2</sup> “Goãmũ diaye ta dipuwaja moagu àhrimi,” arĩ masia mari. Árĩpehrerãre ñerire iirãre dipuwaja moagucumi. <sup>3</sup> Eropigu mũa ñero iira dipuwaja árĩcũ mũa sãre dipuwaja moagucumi. “Gajirã dipuwajacurãcoma,” arĩ werewuarã, “Guapãre dipuwaja moasome,” arĩ pepiboca mũa. Árĩbeaa. Mũa sãre mũa ñero iira puhru dipuwaja moagucumi. <sup>4</sup> Goãmũ mũare mojomoro ĩagu mata dipuwaja moabeami. Eropirã “Goãmũ yũ mera guabeami,” arĩ pepiboca mũa ñerire iira puhru. Árĩbeaa. Goãmũ mũare mojomoro ĩagu mata mũa ñero iira puhru dipuwaja moabeami. Mũa ñero iirire bujawerecũ ĩadiagu, ĩgure mũa yuhricũ gamegu mata dipuwaja moabeami. <sup>5</sup> Eropa mata dipuwaja moabiriqueregu. mũa Goãmure peebiriniguicãcũ, mũa ñero iirire bujawerebircũ ĩagu dipuwaja moagucumi. Mũa eropa ñero iiniguirãre ĩgu dipuwaja moarinũ árĩcũ buriã dipuwaja moagucumi mũare Goãmũ. Irinũre Goãmũ masare dipuwaja moacũ árĩpehrerã ĩarã “Diaye ta erã ya dipuwaja àhraa,” arĩ masirãcoma. <sup>6</sup> Eropigu árĩpehrerã nũcu erã ñero iira dipuwajare dipuwaja moagucumi Goãmũ. Eropigu erã õarire iirã sãre õarire erãre ogucumi. <sup>7</sup> Yujurãyeri õarire iima. Erã õarã árĩdiarã, Goãmũ ĩgu gamero dopa iidiarã Ɂmuri nũcu Goãmũ mera árĩdiarã àhrima. Erã tamerare Ɂmuri nũcu ĩgu mera erã árĩborore iigucumi Goãmũ. <sup>8</sup> Gajirãpũ erã iro dopa árĩbeama. Erã erã gamero iirã árĩcãma. Diaye majare gamebirã ñerire iiniguirã àhrima. Goãmũ erã mera turaro guagucumi. <sup>9</sup> Árĩpehrerã ñerire iirã ñero tarirãcoma. Judio masare eropa wamũhtaroca. Eropirã judio masa

árībirā sāre eropa ta waroca. <sup>10</sup> Árīpehrerā ōarire iirāpūre “Ōaro mūa iiaa,” arī ĩagūcumī Goāmū. Eropirā erāpū Goāmū mera ōaro mera árīrācoma. Judio masare eropa ta wamūhtaroca. Eropiro judio masa árībirā sāre eropa ta waroca.

<sup>11</sup> Goāmū mari iirare ĩagu queoro beyemi árīpehrerāre. Judio masare, judio masa árībirāre Goāmū yujuropa ĩhami marire. <sup>12</sup> Gajirā Moise dorerire erā mooquerecū erā űerire iicū erāre dipuwaja moagūcumī Goāmū. Iri doreri oparāpū űerire erā iicū erā dorerire erā tarinūgari waja dipuwaja moagūcumī Goāmū erā sāre. <sup>13</sup> Moise dorerire peequererā ta yūhribirāre “Ōarā āhrima,” arībeami Goāmū. ĩgu dorerire iirāpūre “Ōarā āhrima,” arī ĩhami Goāmū. <sup>14</sup> Judio masa árībirā Moise dorerire mooquererā erā pepiro mera ōarire iirā Goāmū dorerire iirā iima. Eropirā Moise dorerire gojarapūre mooquererā erā, erā pepirigue iri dorerire opama. <sup>15</sup> Eropirā Goāmū dorerire erā pepirigue diaye opama. Eropa oparā űerire ii mata erā űero iirare masima erā basi. Eropigu űerire iidigu, “¿Duhpigū űerire iayuri yūhū?” arī pepimi ĩgu. Eropigu ōari sāre ĩgu iirare masimi ĩgu. <sup>16</sup> Eropigu Goāmū Jesucristore ĩgu obeocū masa erā iirare ĩagūcumī. Masa erā iiricūrire gajirāre werebirirare erā duhrare Jesucristo masipehogū ĩgu erā iiricūrare ĩagūcumī. Eropa ta ĩha beyegūcumī, arī buhea yūhū ĩgu ya ōari buherire buhegu.

*Goāmū Moiserē ĩgu apira dorerire were gojañumi Pablo*

<sup>17</sup> Mūapū judio masa árīrā, Goāmū Moiserē ĩgu apira dorerire umupeorā árīrā, “Goāmū yarā āhraa gūa,” arī pepiraa mūa. <sup>18</sup> Eropirā Goāmū dorerire masirā árīrā, ĩgu gamerire masia mūa. Eropa masirā árīrā “Ōarire gūa iiborore beyemasia,” arī pepiraa mūa. <sup>19</sup> Eropa arī pepirā ōpa arī pepinemoa mūa judio masa: “Gajirā ne masibirāre ōaro masicū iiaa gūa. Erāre gūa buhebiricū ne Goāmūre masibiriboñuma. Eropirā űerire ne duhubiriboñuma,” arī pepiraa mūa. <sup>20</sup> Eropirā “Pee masibirāre ōarire buhea gūa judio masa. Majirāgā sāre buherā āhraa gūa,” arī pepiraa mūa. Eropirā “Goāmū dorerire oparā diaye árīrire masipehoa gūa,” arī pepiraa mūa. <sup>21</sup> ¿Mūa eropa arī pepirā árīquererā ta duhpirā mūapū mūa buhediro dopa ta iibeari? ¿Gajirāre yajadorebiriquererā duhpirā mūapū yajari? <sup>22</sup> ¿Gajigu marapo mera űero iidorebiriquererā duhpirā mūapū gajigu marapo mera űero iiri? “Goāmū āhrimi,” erā arī wēanirāre umupeorire doorā árīquererā ¿duhpirā Goāmū gohrapūre ōaro umupeobeari mūapū? <sup>23</sup> “Goāmū Moiserē ĩgu apira dorerire opaa guapū,” arīrā árīquererā ta ĩgu dorerire tarinūgaa mūa. Eropa tarinūgarā Goāmūre erā umupeobiricū iirā iica mūa gajirāre. <sup>24</sup> Eropa ta werea Goāmū yare erā gojarapūgue: “Judio masa árībirāpūre űero Goāmūre wereniguicū iiaa mūa judio masapū,” arī gojañuma Goāmū yare erā gojarapūgue.

<sup>25</sup> Mūa judio masa Goāmū dorerire iiniguirā árīrā gasiro merogā wiri aīsūnirā circuncisión iinirā árīcū ōapūrica. ĩgu dorerire iibiricū mūa judio masa árīricūri duhpiburi árībeaa. <sup>26</sup> Eropiro judio masa árībirā merogā gasirogāre wiri aīsūbirinirā erā árīquerecū ta Goāmū dorerire erā iirā árīcū ĩagu, “Yaharā masa ta āhrima,” arī ĩabocumi Goāmū erāre. Judio masapūre ĩgu eropa arī ĩadiro dopa ta judio masa árībirā sāre eropa ta arī ĩabocumi. <sup>27</sup> Bajarā judio masa Goāmū



yare gojarapũre Moise dorerire opaquererã irire iibeama erã. Eropirã gajirã judio masa áribirãpũ Moise dorerire opabiriquererã gasiro merogã wiri aĩsũbirinirã áriquerera Goãmu dorero dopa ta iima. Eropa iirã árirã judio masare erã ñero iirire masicũ iirã iima. <sup>28</sup> “Gua judio masa Goãmu yarã áhrraa,” arĩ pepiraa mua. Eropigu Goãmu yagu gohra árigure weregura muare. Igu dupũpũre merogã gasirogãre wiri aĩsũdigũ áriquereru ta Goãmure umupeobigu árigũ diaye ta Goãmu yagu áribeami. Judio masu gohra áribeami. <sup>29</sup> Espiritu Santore opagupũ, igure yũhrigu Igu ta judio masu gohra Goãmu yagu gohra áhrimi. Eropirã Goãmu yarã gasiro merogã wiri aĩsũnirã dihta áribeama. Erã Espiritu Santo mera erã pepirigue õari mera gohrotorã áhrrima Goãmu yarã. Eropa árirãre “Õarã áhrrima,” arĩ ñhami Goãmu. Masa erãre eropa arĩ ñabiriquererã ta eropa arĩ ñhami Goãmupũ erãre.

### 3

<sup>1</sup> Yũ eropa arĩquerecũ judio masa erã árricuri, gasiro merogã wiri aĩsũnirã erã árriri õapũricãa. <sup>2</sup> Judio masa erã árriri yuju diaye gohra áribeaa. Goãmu Igu wereniguiri judio masare were apimũhtatuhañumi. Erã Igu yare erã gojarapũre opamũhtañuma. Eropirã judio masa erã áricũ õapũricãa erãre. <sup>3</sup> Eropirã bajarã judio masa Goãmure erã pebiriquererã ta Igu werera diaye ta áhrraa. Eropigu Igu arĩ werediro dopa ta iigucumi Igu. <sup>4</sup> Eropa ta áhrraa. Áripehrerã masa erã gũyaricurã erã áriquererã ta Goãmupũ ne gũyabeami. Igu yare gojarapũgue eropa ta arĩ gojara áhrraa: Diaye ta eropa ta arĩ wereniguigu áhrraa muhũ Goãmu. Eropirã masa mure ne weresãmasibeama, arĩ gojañuma iribojeguerẽ.

<sup>5</sup> Masa erã pepiri mera õpa arĩ pepimaacãbocoma: “Mari ñeri iiri áricũ, Goãmu Igu õari iiripu deserea. Eropiro mari ñeri iiri mera Goãmu Igu õaro iiri deserecũ Igu marire mari ñeri iiri dipuwaja moagu queoro iibeami,” arĩ pepimaacãbocoma. <sup>6</sup> Eropa áribeaa. Mari ñeri iirapũ õari áricũ Goãmu mari ñeri iira waja dipuwaja moamasibiriboañumi.

<sup>7</sup> Masapũ gũyaricurã áhrrima. Goãmupũ ne gũyari marigu áhrimi. Gũyari marigu Igu áricũ õaro masia mari. Eropirã masa yujurãyeri õpa arĩ pepirima: “Gua gũyari mera Goãmu Igu diaye árripũ deserea. Eropiro gua gũyaripũ õha áhrraa. ¿Eropiro gua gũyari õacũ duhpigu gua gũyari waja dipuwaja moabocuri guare Goãmu?” arĩ pepimaacãma yujurãyeri erã basi. <sup>8</sup> Eropirã õpa arĩ gũyama yujurãyeri guare: “Mari ñerire iiri mera Goãmu Igu õagu árripũ deserea. Eropirã ñerire iiro gahmea,” arĩma. “Pablo sã eropa ta arĩ buhemi,” arĩ gũya weresãma erã guare. Erã eropa arĩ gũyari dipuwaja Goãmu erãre dipuwaja moagucumi. Eropa ta iiporo erãre.

*Áripehrerã ñeri iira dipuwajacurã áhrraa mari, arĩ gojañumi Pablo*

<sup>9</sup> ¿Eropirã dohpa pepiri mua? ¿Mari judio masa gajirã tauro õarã áricuri? Áribeaa mari. Judio masa, judio masa áribirã sã áripehrerã dipuwajacurã áhrraa mari. Eropa ta áhrraa yũ áripehrerãre arĩ buhediro dopa ta. <sup>10</sup> Eropa ta arĩ gojara áhrraa Goãmu yare erã gojarapũgue sã. Õpa arĩ gojañuma:

Ne yujugu masu òagu marimi. <sup>11</sup> Mari árípehrerã masa peedi-abirã dihta àhraa. Eropirã árípehrerã mari masa Goãmure ne guñabeaa. <sup>12</sup> Eropirã mari Goãmu yare gamebirã árípehrerã ñerire iirã àhraa. Ne yujugu òarire iigu marimi. <sup>13</sup> Mari wereniguirã, ñeri dihta wiria mari disirore. Barigã guyaricua. Eropa wereniguirã aña gacurire iigu pûriri wiuro dopa ta pûriro mera wereniguiwiua mari. <sup>14</sup> Eropirã mari gajirãre ñero wereniguirã, papûro wereniguirã àhraa. <sup>15</sup> Eropirã mata guarã masare mata wejêa mari. <sup>16</sup> Eropirã noho mari waro, masare ñero ii, ñero taricũ iiaa mari gajirãre. <sup>17</sup> Eropirã gajirã masa mera òaro áríbeaa mari. <sup>18</sup> Eropirã Goãmure ne umupeobeaa, arĩ gojamuriñuma iribojeguerẽ mari masare. <sup>19-20</sup> Eropirã òpa masia mari: “Mari masa ñerã àhraa,” eropa arĩ gojarã judio masa sãre Moise doreri iirã sãre arĩ wereniguimuriñuma. Eropirã árípehrerã mari judio masa sã “Gua tamera ñeri dipuwaja mara guare,” arĩmasibeaa. Goãmure doreripure mari masa ne iibeaa. Eropirã iri dorerire iibirã Goãmure mera òamasibeaa mari. Iigu dipuwaja moamorã àhraa. Eropiro mari ñerã árírire iigu doreripu masicũ iiaa marire. Iri dorerire masirã “Gua iiricuri ñeri àhraa,” arĩ masia.

*Jesucristore òaro umupeocũ Goãmure marire “Òarã àhrima,” arĩ ñhami, arĩ gojañumi Pablo*

<sup>21</sup> Dohpaguerẽ Jesucristore umupeorãre “Dipuwaja moorã, òarã àhrima,” arĩ ñhami Goãmure pare. Iigu eropa arĩ ñaborore Goãmure yare weremuhtanirã Moise sã weremuhtañuma. Eropigu masare erã ñero iira wajare iigu taurare weremi marire Goãmure. Moise dorerire mari iira mera mari ñerire taubeami. Òpa àhraa: <sup>22</sup> Árípehrerã Jesucristore umupeorãre, iigu yare peerãre, “Òarã àhrima,” arĩ ñhami Goãmure. Erã ñero iira dipuwajare taumi. Eropa iigu árípehrerãre yujuropa òaro iimi. <sup>23</sup> Mari masa árípehrerã ñerire iirã àhraa. Eropirã Goãmure iigu gamero dopa ne iibeaa mari. <sup>24</sup> Mari eropa iiquerecũ Goãmure árípehrerã masare iigu mojomoro ñadigu arĩmi. Eropigu Jesucristo mari masa ñeri iirare wajayebasadi arĩmi. Iigu eropa iira puhru “Dipuwaja moorã àhrima,” arĩ ñhami Goãmure Jesure umupeorãre. Waja gamero mariro mari ñerire cohãmi. <sup>25</sup> Iribojegue majarã erã ñero iirare ñagu Goãmure mata dipuwaja moabiriñumi erãre. Iigu eropa dipuwaja moabigu erã ñero iirare bu gohra pepicãgu iibiriñumi. Eropigu erã ñerire cãdijibu iigu Jesucristore obeodigu arĩmi árípehrerã masa erã ñeri dipuwajare siribasabure iigu di cóãbure. Eropigu mari masa Jesucristore umupeocũ Goãmure mari ñeri iirare cãdijigucumi. Eropa iigu “Iigu diaye iigu àhrimi,” marire arĩ masicũ iidi arĩmi. <sup>26</sup> Iigu magure obeodigu arĩmi dohpague majarã sã erã ñeri iira dipuwajare wajayebasabure. Eropiidigu arĩmi “Iigu òaro diaye iigu àhrimi,” mari masa arĩ masiborore. Jesure umupeorãre “Òarã àhrima,” iigu arĩ ñaborore eropiidi arĩmi.

<sup>27</sup> Eropirã dohpaguerẽ mari ejatuharo “Òarã àhraa mari,” ne arĩmasibeaa mari. “Moise dorerire iirã òarã àhraa,” iri sãre arĩmasibeaa mari. Òpa arĩmasia mari: “‘Diaye ta yu ñerire iigu cohãmi,’ mari Jesucristore arĩ umupeocũ, ‘Òarã àhrima,’ arĩ ñagucumi

marire Goām̄p̄u,” arīmasia mari. <sup>28</sup> Ōpa masia mari: Moise dorerire mari iiquerecū, iri mera “Ōarā āhrima,” Goām̄u arī ĩabeami marire. Jesucristore mari umupeocū ĩaḡu marire “Ōarā āhrima,” arī ĩhami ĩḡu.

<sup>29</sup> Goām̄u judio masa op̄u dihta arībeami. Judio masa arībirā op̄u sã āhrimi. <sup>30</sup> Eropa arīḡu Goām̄u yujuḡu ta arīḡu, arīpehrerā wecague op̄u āhrimi. Eropa arīḡu judio masa Jesure erā umupeocū, “Erā dipuwaja moorā āhrima,” arī ĩaḡucumi. Eropiḡu judio masa arībirā sãre Jesure erā umupeocū, erā sãre “Dipuwaja moorā āhrima,” arī ĩaḡucumi Goām̄u. <sup>31</sup> ¿Eropirā Jesucristore umupeoturarā Goām̄u Moisere ĩḡu dorerire cóārā iibocuri mari? Irire cóãbeaa mari. Jesure umupeorā tamera Goām̄u dorerire diaye ta iirā iiaa mari.

## 4

### *Abrahã Goãm̄ure ĩḡu umupeorare were gojañumi Pablo*

<sup>1</sup> Mari ñec̄u arīm̄uhtadiḡu Abrahã Goãm̄ure “Diaye iiḡu āhrimi,” arī umupeom̄uriñumi ĩḡu sã. ĩḡu eropa umupeori mera ðañumi Goãm̄u mera. <sup>2</sup> Abrahã ðaro ĩḡu iiquerecū “Ōaḡu āhrimi,” arī ĩanibirim̄uriñumi Goãm̄u ĩḡure. ĩḡu Goãm̄ure umupeocū tamerare “Ōaḡu āhrimi,” arī ĩam̄uriñumi ĩḡure. Eropiḡu ĩḡu ejatuharo ðarire iiquereḡu ta ñeḡu arīniḡu “Ȳu tamera ðaḡu āhraa,” arīmasibiriñumi Abrahã Goãm̄u ĩḡu ĩac̄u. <sup>3</sup> Goãm̄u yare gojarap̄u ðpa āhraa: “Abrahã Goãm̄u ĩḡure arīr̄are ðaro ĩḡu peec̄u, ĩḡure ĩḡu umupeocū ĩha Goãm̄u ĩḡure ‘Ōaḡu ñeri iira dipuwaja mooḡu āhrimi ĩḡu,’ arī ĩañumi ĩḡure,” arī gojara āhraa. <sup>4</sup> Ōpa āhraa: Mari masare yuju diaye wajayebeama. Mari ðaro mohmera waja marire wajayema. Goãm̄p̄u eropa iibeami. <sup>5</sup> Mari gamero ðarire iiro mariro mari Jesucristore umupeocū ĩha marire yuju diaye ĩḡu ðarire ocãmi. Eropiḡu marire “Ōarā āhrima,” arī ĩhami marire Jesucristore umupeorãre. Ñerire iinirãre erã ñeri iira dipuwaja maricū iiḡu āhrimi. Eropirã masa Jesucristore umupeocū ĩaḡu “Dipuwaja moorã āhrima,” arī ĩhami Goãm̄u erãre. <sup>6</sup> Masa erã gamero mera ðaro iirare Goãm̄u ĩabeami. Erã ĩḡure umupeocū tamerare ĩhami. ĩḡure umupeorãre “Ōarã āhrima,” arī ĩhami. ĩḡu eropa arī ĩadiḡap̄u ĩḡu mucubiririre ðpa arī gojañumi Davi m̄uru iribojegue majaḡu:

<sup>7</sup> Erã ñerire ĩḡu cãdijinirã tauro mucubirima.

<sup>8</sup> “Ōarã āhrima. Erã ñero iirare guñasome ȳuh̄u,” arīmi Goãm̄u erãre. Eropirã burigã mucubirima, arī gojañumi Davi.

<sup>9</sup> Judio masare merogã gasirogãre wiri aĩs̄unirã dihtare erã ñero iirare cãdijibeami Goãm̄u. Judio masa arībirã sãre erã ñero iirare cãdijimi ĩḡu. Dipaturi Abrahãre guñaque m̄ua. ĩḡu Goãm̄ure umupeocū ĩaḡu ĩḡu ñero iirare cãdiji, “Ōaḡu āhrimi,” arīñumi Goãm̄u. <sup>10</sup> ¿Dohp̄ar̄ic̄u eropa arīyuri Goãm̄u Abrahãre m̄ua pepic̄u? ĩḡu merogã gasirogãre ĩḡu wiri aĩboro coregue ta ĩḡure “Ōaḡu āhrimi,” arī ĩañumi Goãm̄u. Eropiḡu gasirogãre wiri aĩḡu ĩḡu ñerire cóãtuhadiḡuḡu wiri aĩñumi. <sup>11</sup> Eropiḡu gasiro merogã wiri aĩboro coregue Goãm̄ure umupeon̄gatuhãñumi Abrahã. ĩḡu eropa umupeocū “Ōaḡu āhrimi,” arī ĩañumi Goãm̄u ĩḡure. Eropa ĩḡu

umupeorire, ĩġu yagų ĩġu árĩrĩre ĩhmudoreġu Goāmų ĩġu dųpųre merogā gasirore wiri aĩdoreņumi. Eropiġu Abrahā ĩġu gasirogā wiri aĩboro core Goāmųpų “Ōagų āhrimi,” arĩ ĩatuhaņumi ĩġure. Eropiġu Abrahā Goāmųre “Diaye ta iġų āhrimi,” ĩġu arĩ umupeodiro dopa ta árĩpehřerā Goāmųre eropa arĩ umupeorāre “Ōarā āhrima,” arĩ ĩhami Goāmų. Eropiġu judio masa árĩbirāre gasirogā wiri aĩsųya marirā sāre “Ōarā āhrima,” arĩ ĩhami Goāmų. Eropirā erā Abrahā pāramerā iro dopa ta dujama. <sup>12</sup> Erā iro dopa ta judio masa sā gasirogā wiri aĩsųnirā sā, Goāmųre erā umupeorā árĩrā Abrahā pāramerā diaye ta āhrima. ĩġu gasirogā wiri aĩboro coreġue, Goāmųre umupeo ĩġu mera ōaņumi. Eropirā ĩġu umupeodiro dopa Goāmųre umupeorā ōaro āhrima Goāmų mera.

*Goāmų Abrahāre ĩġu werepira diaye ta árĩcų masiņume Abrahā, arĩ gojaņumi Pablo*

<sup>13</sup> Iriboġeġu ōpa arĩņumi Goāmų Abrahāre: “I yebare mųre, mų pāramerā árĩturiarā sāre ogųca,” arĩ werepiņumi Goāmų Abrahāre. Moise dorerire Abrahā ōaro iira waja eropa arĩbiriņumi Goāmų ĩġure. Abrahāpų Goāmųre “Diaye ta iġų āhrimi,” arĩ umupeora pųhrų eropa arĩ werepiņumi. ĩġu eropa arĩ umupeocų ĩagų Goāmų ĩġure “Ōagų āhrimi,” arĩ ĩaņumi. <sup>14</sup> Goāmų oburire Moise dorerire iirā dihta aĩbeama. Erā dihta aĩcų mari Goāmųre umupeori ñehe árĩburi árĩbiriboya maripųre. Eropiro Goāmų ĩġure umupeorāre “Mųare ogųra,” ĩġu arĩ werepira duhpiburi árĩbiriboya. <sup>15</sup> Goāmų Moiserre ĩġu apira dorerire iirā bocatųbeaa mari. ĩġu dorerire mari pee tarinųgara waja, dipuwaja moasųmorā āhraa mari. Iri doreri maricų tamera ĩġu dorerire tarinųgaro mariboya.

<sup>16</sup> Eropirā Goāmųre umupeorā dihta ĩġu oburire aĩrācoma. Abrahā Goāmųre “Diaye ta iġų āhrimi,” arĩ umupeomųriņumi. Eropirā árĩpehřerā Abrahā Goāmųre umupeodiro dopa ta umupeorā ĩġu pāramerā iro dopa dujama. Eropiġu “Ire mųre mų pāramerā sāre ogųca,” Goāmų Abrahāre arĩġu árĩpehřerāre ĩġure umupeorāre arĩġu iĩņumi. Eropirā Moise dorerire iirā dihta Goāmų ĩġu oburire aĩsome. Árĩpehřerā Abrahā iidiro dopa Goāmųre umupeorā erā ĩġu oburire waja mariro aĩrācoma. <sup>17</sup> Iřire Abrahāre ĩġu arĩdiro dopa ta arĩ gojaņuma iriboġeġure: “ ‘Baja yebari majarā ñecų árĩbu apibų mųre,’ arĩ, apipų Goāmų Abrahāre,” arĩ gojaņuma iriboġeġue ta. Eropiġu ĩġu Goāmųre “Diaye ta iġų āhrimi,” arĩ umupeomųriņumi. ĩġu eropa umupeocų Goāmųre umupeorā ñecų iĩņumi Goāmų ĩġure. Goāmųpų sĩrinirāre masųġ, árĩpehřerire ĩhacųnugudigų āhrimi.

<sup>18</sup> “Baja macari majarā mų pāramerā árĩturiarā árĩrācoma,” arĩmųriņumi Goāmų Abrahāre. Goāmų ĩġu eroparĩcų Abrahāpų porā marigų árĩġuereġu, “Diaye ta āhraa,” arĩ pepimųriņumi. <sup>19</sup> Eropiġu cien boġori opagų árĩġuereġu, ĩġu marapo sā buro ne porā marigo árĩġuerecų, “Porācųsome ġua,” arĩ ne pepibiriņumi Abrahā. Eropiġu Goāmų ĩġure arĩ werepira “Diaye ta āhraa,” arĩ pepiņumi Abrahā. <sup>20</sup> “Goāmų ĩġu arĩdiro dopa ta ne iisome,” arĩ ne pepibiriņumi Abrahā. Eropiġu ĩġu Goāmų ĩġure werepirare ōaro peeņumi. ĩġu eropa arĩřare peenijagų, “Goāmų turagų āhrimi,” arĩ umupeogų iĩņumi. Eropiġu Goāmųre “Diaye ta iġų āhrimi,” arĩ umupeonemoņumi ĩġu.

21 “Goāmũ ĩġu arĩdiro dopa ta ðaro iigũcumi,” arĩ pepi ðaro masiñumi Abrahã. 22 ĩġu eropa masicũ, Goãmũre ĩġu umupeocũ ĩha Goãmũpũ “Dipuwaja moogũ ãhrimi,” arĩ ĩañumi Abrahãre. Eropa ta arĩ gojañuma Goãmũ yare erã gojarapũgue.

23 Abrahã Goãmũre ĩġu umupeora pũhrũ Goãmũ ðaro ĩañumi ĩġure, arĩ gojañuma. Eropa gojarã “Mũa sãre Goãmũre umupeorãre ðaro ĩagũcumi,” arĩ mari sãre gojajuñuma. 24 Irire mari masiburire gojañuma. Eropigũ Goãmũre “Diaye ta iigũ ãhrimi,” mari arĩ umupeocũ “Dipuwaja moorã ãhrima,” arĩ ĩagũcumi Goãmũ mari sãre. ĩġu tamera mari Opũ Jesu ĩġu sĩricũ masudigũ ãhrimi. 25 Jesupũ mari ñeri iira dipuwaja sĩridigũ árĩmi. ĩġu sĩrira pũhrũ masa mũriadigũ árĩmi ĩġu Goãmũ marire “Dipuwaja moorã, ðarã ãhrima,” arĩ ĩġu marire ĩaburire.

## 5

*“Dipuwaja moorã ãhrima,” Goãmũ ĩġu arĩ ĩacũ ðpa waroca marire, arĩ gojañumi Pablo*

1 Jesucristore mari umupeoturacũ ĩagũ “Dipuwaja moorã, ðarã ãhrima,” arĩ ĩhami Goãmũ marire. ĩġu eropa arĩ ĩacũ Goãmũ mera mari ðaro árĩcũ iimi marire mari Opũ Jesucristo. 2 Eropirã mari ĩġure umupeocũ ĩagũ Goãmũ marire mahigũ, marire aĩmi ĩġu mera mari ðaro árĩboro dopa. Goãmũ tamera ðatariagũ ãhrimi. Eropigũ ĩġu iro dopa ta ðarã árĩcũ iigũcumi ĩġu marire. ĩġu eropiiburire ðaro masia mari. Eropirã mucubiria. 3 Eropirã ñero tariquererã mucubiria mari. Ñero tarirã irire yujuro bojemasia mari. Eropa yujuro bojerã ñero tariquererã ðaro Goãmũre guñaturarã wahaa mari. Eropirã Goãmũ yare duhubeaa mari. 4 Mari eropa árĩcũ ĩagũ, “Óaro iiabũ mũa,” arĩġũcumi Goãmũ marire. ĩġu marire eroparĩcũ, marire ĩġu tauborore ðaro masia mari. Eropirã ñero tarirã sã mucubirimasia mari. 5 Eropigũ Goãmũ marire Espĩritu Santore obeomi mari mera árĩdoregũ. Eropigũ Espĩritu Santopũ mari mera árĩġũ Goãmũ marire eropa mahinigũicãrire masicũ iimi. Eropirã “Goãmũ ðaro taugũcumi marire,” arĩ “ĩġu mera árĩnigũicãrãca,” arĩ masia mari.

6 Eropigũ ero core mari ñeri iirare mari basi mari cóãmasibiricũ ĩagũ, ĩġu queodiro sihajacũ mari ñerã árĩra dipuwaja Cristo sĩripũ. 7 Mari masa gajigũ ya árĩburire sĩribasadiabeaa. Óagũ árĩġure yujugũ sĩribasabocumi gajisubu arĩġũ. 8 Maripũ ñerã mari árĩquerecũ Jesucristo sĩribasadi árĩmi mari ya árĩburire. ĩġu eropiicũ Goãmũ turaro marire ĩġu mahirare masia mari. 9 Mari ya árĩburire ĩġu sĩricũ, ĩġu di cóãcũ, Goãmũpũ marire “Dipuwaja moorã ãhrima,” arĩ ĩhami. ĩġu eropa arĩ ĩara pũhrũ dohpaguepũre marire peamegue wabonirãre taumi Jesucristo. Eropigũ ĩġu yarã marire ĩġu iira pũhrũ marire dipuwaja moasome Goãmũ. 10 Eropirã Goãmũre gamebirã mari árĩquerecũ ta ĩġu magũ sĩrigũ mari ñeri iira dipuwaja wajayebasadigũ árĩmi. Eropa wajayebasagũ ĩġu Pagure Goãmũre guabiricũ iimi ĩġu mari mera. Eropirã ĩġu yarã wahaa mari. Dohpague tamerare tauro ðaro iigũcumi marire. ĩġu yarã mari árĩcũ, Jesu ĩġu masa mũriara mera marire peamegue wabonirãre ðaro taugũcumi

ĭġu. <sup>11</sup> Pũhrũgue mari tariborore mucubiria mari. Goãmũpũre guña mucubiria. Mari Opũ Jesucristo mari ñeri dipuwaja ĭġu sĭrira pũhrũ Goãmũ yarã áhrea mari. Eropirã mucubiria.

*Adánre Cristo sãre wereñumi Pablo Roma majarãre*

<sup>12</sup> Jesucristo taunirã árĩrã õpa masia mari: Adán ĭġu ñerire iinũgarasubugue i yebare ñeri árĩnũgayoro. Ñeri árĩnũgacũ masa sĭrinũgañuma. Mari árĩpehrerã ñerire iiaa. Eropirã árĩpehrerã mari ñerã árĩri waja sĭrirãca. <sup>13</sup> Goãmũ ĭġu dorerire Moisere apiboro core diaye ta i yeba majarã ñerire iimũriñuma. Eropa ñerire iiquerecũ iri doreri maricũ ĭġu doreri tarinũgari waja dipuwaja moamasibiriñumi dohpa. <sup>14</sup> ĭġu eropa dipuwaja moamasibiriquerecũ ta Adánpũ ĭġu pũhrũ árĩrã iri doreri mariquerecũ ta sĭrimũriñuma. Moise ĭġu árĩboro core iri doreri mariquerecũ ta masa sĭrimũriñuma. Gajirã ñerire iirã Adán ĭġu ñero iimũridiro dopa gohra iibirimũriñuma. Eropiibiriquererã erã sã sĭrimũriñuma. Eropiġũ Adán ñerire iinũgadigũ árĩñumi i yebare. Yoara pũhrũgue i yeba arigũ Jesucristopũ õarire iinũgadigũ árĩmi.

<sup>15</sup> Adán ĭġu iira Jesucristo iira dopa árĩbeaa. Adán yujugũ ta ĭġu ñeri iira dipuwaja bajarã masa sĭrinũgañuma. Goãmũpũ marire mahiġũ Jesucristore obeodigũ árĩmi. Eropiġũ Jesucristopũ ĭġu yujugũ ta mari ya árĩburire sĭribasagũ mari bajarã ĭġu yarã Goãmũ mera ımũri nucũ árĩniguiBORORE iidi árĩmi. <sup>16</sup> Eropiġũ Goãmũ masare ĭġu mojomoro ĩadiro Adán ĭġu Goãmũre tarinũgadiro dopa árĩbeaa. Adánpũ ĭġu yujugũ ta ñerire ĭġu iira dipuwaja árĩpehrerã masa dipuwaja opama. Erã eropa dipuwaja opaquerecũ, masa wũaro erã ñerire iiquerecũ dohpaguere masare mojomoro ĩagũ Goãmũ erã ñerire cohãmi. Eropa cóãġũ “Dipuwaja moorã, õarã áhřima,” arĩ ĩhami ĭġu Jesucristo sĭrira mera. <sup>17</sup> Adán yujugũ ta ĭġu dipuwaja mera ta árĩpehrerã masa sĭrimorã dihta wañuma. Goãmũ ĭġu iirañepũ õataria. Dohpaguere masare mojomoro ĩagũ Jesucristo ĭġu yujugũ sĭrira mera iri ñeri dipuwaja cóãġũ marire “Õarã áhřima,” arĩ ĩhami. Eropirã árĩpehrerã ĭġu eropa arĩ ĩanirã ĭġu mera õaro árĩniguiCãrãcoma.

<sup>18</sup> Yujugũ Adán ĭġu ñerire iinũgacũ árĩpehrerã ñerire iinũgañuma. Erã eropiicũ ĩagũ Goãmũ erãre “Dipuwajacurã áhřima,” arĩ ĩañumi. Gajigũ Jesupũ ĭġu õarire ĭġu iicũ masa erã ñeri iira dipuwaja sĭribasacũ, árĩpehrerã mari ñeri dipuwaja cóãdigũ árĩmi Goãmũ. Mari ñerire ĭġu cóãnirã árĩcũ “Õarã áhřima,” arĩ ĩagũcumi Goãmũ marire. Eropirã árĩpehrerinũri ĭġu mera árĩniguiCãrãca mari. <sup>19</sup> Yujugũ Adán Goãmũre tarinũga nũgañumi. ĭġu eropiicũ bajarã masa ñerire iiricurã wañuma. Jesucristopũ Goãmũ ĭġu dorediro dopa ĩpũ. ĭġu eropiicũ bajarã masa ĭġu ñerire cóãnirã warãcoma. Erã eropa wacũ “Õarã áhřima,” arĩ ĩagũcumi Goãmũ erãre. <sup>20</sup> Goãmũ ĭġu dorerire Moisere apiñumi árĩpehrerã masa erã ñero iirare erã masiburire. Mari masa bũrigã ñerire mari iiquerecũ Goãmũpũ marire bũrigã mahimi. Eropa mahiġũ Jesucristo sĭrira mera mari ñerire cóãdigũ árĩmi. <sup>21</sup> Ero core mari árĩpehrerã mari ñeri iira dipuwaja sĭrimorã árĩmũribũ. Goãmũ marire turaro mahiġũ mari Opũ Jesucristore ĭġu obeocũ ĭġu marire ñeri dipuwaja marirã wacũ

iimi dohpaguere. Eropirã erã “Dipuwaja moorã ährima,” Goãmũ İġu marire arĩ İacũ mari árĩpehrerinuri İġu mera eropa árĩniguicãrãca.

## 6

*Cristo yarã ñerire iiniguibeamã, arĩ gojañumi Pablo*

<sup>1</sup> ¿Goãmũ eropa marire mahicũ İarã dohpa iirãcuri mari mũa pepicũ? ¿Goãmũre marire mahicũ iinemodiarã ñerire iinemorãcuri mari? <sup>2</sup> Árĩbeaa. Ñerire iibiricãrã mari. Jesucristo marire sĩribasadi árĩmi mari ñerire cóãġũ. Eropirã Cristo yarã árĩrã marire ñerire iibiricãro gahmea. <sup>3</sup> Eropa ta Jesucristo yarã mari árĩrãre masa erã İha masiborore deco mera waĩyesũbu. Jesu mari ñeri iira dipuwaja sĩridigũ árĩmi. Eropirã İġu yarã árĩrã, waĩyesũnirã árĩrã mari ñeri iirare duhucãbu. <sup>4</sup> Mari waĩyeri õpa İhmua: Jesucristo sĩrira mera mari ñerã árĩdiro pehrea. Eropa wacũ mari Pagũ İġu turari mera Jesucristo sĩridire masudiro dopa iri turari mera marire õaripũre gohrotomi. Eropirã õarire iirã wahaa.

<sup>5</sup> Eropirã Cristo yarã árĩrã Cristo sĩrira mera mari ñerã árĩdiro pehrea. Eropirã mari ñeri iirare duhua mari. Eropirã Cristo yarã árĩrã İġu masa mũriara mera õaripũre gohrotorã ähraa mari. Iri diaye ta ähraa. <sup>6</sup> Jesucristo crusague sĩrigũ mari ñerã árĩrãre pehrecũ iidĩ árĩmi. Mari ñeri uaribejarire duhumasicũ iidĩ árĩmi dipaturi mari ñerire iibiriboro dopa. <sup>7</sup> Mari ñeri uaribejarare cóãnirã árĩrã ñerire iiniguirã árĩsome pare mari. Irire mari masia. <sup>8</sup> Eropirã mari gohrotonirã árĩrã mari Jesucristo mera õarire iinũgarã árĩrãca. “Iri diaye ta ähraa,” arĩ pepia mari. <sup>9</sup> Ire mari masia: Cristo İġu sĩri, masa mũriara puhũ dipaturi sĩrisome. İġu sĩribodirore tarituhadigũ árĩmi. <sup>10</sup> Eropigũ Cristo yujusubu sĩrigũ, masa ñerire cóãġũ sĩrimi. İġu masa mũriadigũ dohpaguere Goãmũ gamerire iigũ ährimi. <sup>11</sup> “İġu iidiro dopa ta yũ sã ähraa,” arĩ pepique mũa: “Jesucristo mari ñerire cóãdiro dopa ta mari sã mari ñerire cohãa. Ñerire iibirã Jesu yarã árĩrã Goãmũ gamerire iimorã árĩrã tũaa mari,” arĩ pepique mũa sã.

<sup>12</sup> Eropirã ñeri iiniguirã árĩbiricãque. Eropirã ñerire uaribejabiricãque. <sup>13</sup> Ñerire iirã árĩbiricãque. Mũa peamegue wabonirãre Jesucristo İġu taunirã ähraa. İġu eropa iinirã árĩrã õpa arĩque Goãmũre: “Mũhũ, yũ Opũ ähraa. Eropigũ yũhũ mũ gamero dopa iigũ, mũ dorerire iiniguicãġũca uũuri nũcu pare,” arĩque Goãmũre. Eropirã õarire iirã Goãmũ İġu gameri dihtare iirã arĩque mũa. <sup>14</sup> Dohpaguere Goãmũ mera õaro árĩborore Moise doreri mũare dorebeaa. Jesucristo mũa ya árĩburire sĩribasara mera Goãmũ mera õarã ähraa. Eropiro mũa ñeripũ mũare dorebeaa pare. Eropirã ñerire iiniguisme pare mũa.

*Mũa ñerire iiniguicũ iri ñeri mũa opũ iro dopa ähraa, arĩ gojañumi Pablo*

<sup>15</sup> ¿Yũ eroparicũ dohpa arĩ pepiri mũa? ¿Jesucristo yarã árĩrã, Moise dorerire umupeobirimorã árĩrã, ñerire iiniguibocuri mari? Ñerire iiniguibiricãrã. <sup>16</sup> Mũare doreġũ mũa opũ ährimi. Eropirã İġu pohro majarã ähraa mũa. Eropa ta ñerire iiniguirã mũa árĩcũ iri ñeri mũa opũ iro dopa ähraa. Eropirã ñerire duhumasiya mara mũare. Eropirã peamegue wamorã ähraa mũa eropa iirã. Goãmũre õaro

yuhirirã árîrã tamera îgu pohro majarã âhraa. Eropirã îgu yarã ôarire iirã âhraa mua. Irire masia. <sup>17</sup> Iribojegue ñerire iiniguirã mua árîcũ, iri ñeri muae doremuriyoro. Dohpaguepare ôari buherire peerã, Jesure umupeorã, Goãmũ dorerire ôaro iirã wahabũ mua. Eropa árîrã Goãmũre “Ôhaa,” arîro gahmea. <sup>18</sup> Eropa warã dohpaguere ñerire doresürã árîbeaa mua. Eropirã Goãmũ doresürã árîrã ôarire iiaa. <sup>19</sup> Irire muae ôpa arî gojaa mua ôaro peeboro dopa. Iribojegue ñerire iipehorã, ñerire iiniguicãrã mua árîdiro dopa ta dohpaguepare ôarire iiniguicãrã árîque mua. Eropirã Goãmũ gameri dihtare iirãca mua.

<sup>20</sup> Iribojeguerẽ ñeri dihtare iirã árîrã, ôaripure iibirimuriyoro mua. <sup>21</sup> Irisubure ñerire iira waja ôarire bocabiriyoro mua. Iri mua ñeri iirare guñarã dohpaguere guhyasirica mua. Iri ñerire mua iira dipuwaja peamegue wabonirã árîribũ. <sup>22</sup> Dohpaguepare Jesucristo muae ñeri doresünirãre wiucãmi pare. Eropirã Goãmũ dorerire iirã wahabũ mua. Eropirã Goãmũ gameri dihtare iirã árîrãca. Eropirã árîpehrerinuri Goãmũ mera árîrãca. <sup>23</sup> Ñerire mari iira dipuwaja peamegue wabonirã âhraa mari masa árîpehrerã. Mari eropa árîquerecũ Goãmũpũ mari Opũ Jesucristore mari umupeocũ îagu, árîpehrerinuri îgu mera árîcũ iigucumi. Waja mariro marire eropa iigucumi.

## 7

### *Moise dorerire were gojanemoñumi Pablo*

<sup>1</sup> Yũ acawererã, Goãmũ Moiserẽ îgu dorerare ôaro masia mua. Masure iri doreri îgu ojocaribusu dorea. Îgu sîrira pũhrũ îgure dorebeaa iri. Iri sãre masia mua. <sup>2</sup> Ôpa âhraa: Nomeore igo marapũ mera dihta árîdorea Moise îgu doreripũ. Iri eropa dorequerecũ ta igo marapũ sîrira pũhrũ igopũ gajigũ mera marapũcumasimo. Eropa ta arî werea iri doreri. <sup>3</sup> Eropigo igo marapũ árîquerecũ ta gajigure marapũcũgo, ñero iigo iimo igoa. Igo marapũ îgu sîrira pũhrũgue ta gajigure marapũcũgo, Moise dorerire tarinũgabeamo igo. Eropigo ñero iigo iibeamo igo.

<sup>4</sup> Eropa ta mua sã yũ acawererã, Jesucristo sîrira mera Jesu yarã warã, iri doreri iiri mera Goãmũ yarã wabeaa mua. Eropirã sîrinirã murare iri doreri mera dorebiro dopa ta mua sãre iri doreri dorebeaa. Mua Cristo ya curu majarã âhraa. Eropirã dohpaguere îgu yarã âhraa mua. Îgũpũ îgu sîrira pũhrũ masa muriadigũ árîmi Goãmũ gamerire mari iiboro dopa. <sup>5</sup> Jesucristo yarã árîbirirasubuguere ñerire mari uaribejarire iimuribũ. Eropirã Moise dorerire mari masira pũhrũ iri dorerire tarinũgadiaribũ. Eropa tarinũgã ñerire iirã, mari peamegue wamorã ta árîmariribũ. <sup>6</sup> Dohpaguere Cristo yarã árîrã iri doreri docague árîbeaa pare mari. Goãmũ îgu mera ôaro mari árîborore iri dorerire iidorebeami pare. Espiritu Santo mari mera árîgu marire ôarire gohrotocũ iimi. Eropirã Goãmũ gamerire iirã mari iribojegue maja doreri gojara mera árîmasibeaa pare.

### *Mari ñeri iidiarire were gojañumi Pablo*

<sup>7</sup> ¿Eropirã Goãmũ Moiserẽ îgu dorerare dohpa arî pepibocuri mari? ¿Iri doreri ñeri árîcuri mua pepicũ? Árîbirica. Iri îgu doreri ta ñerire yũre masicũ iibu. Eropirã îgu doreri maricũ ñerire mari



iirare masibiriboya mari. Īḡu doreri ōpa arāa: “Gajirā yaguere turaro ʘaribejabiricāque,” arāa Moise doreri. Iri eroparībiricū, gajirā yare ʘaribejarīñe iri ñeri árīcū masibiriboya mari. <sup>8</sup> Eropigū iri dorerire yʘ masira pūhrū gajirā yare bʘrigā ʘaribejamūribū. Iri dorerire masibirinigū gajirā yare bʘrigā yʘ ʘaribejara iri ñeri árīcū masibiriboya yūhū. <sup>9</sup> Īḡu dorerire yʘ masiboro core eropa pepicānibū dohpa. Dipuwajacūborore guñabiriribū. Eropigū Īḡu dorerire yʘ masira pūhrū yʘ ʘaribejari ñeri árīcū masibū yūhū. Eropigū yʘ dipuwajacūborore masibū. <sup>10</sup> Iri doreri mera mari Goāmū mera ōaro árībonirā árīquerēcū mari iri doreri mera dipuwajacūrā dederebonirā árīribū. <sup>11</sup> Īḡu Goāmū Moiserē dorerare masira pūhrū tarinūgadiaribū. Ñerire ʘaribejagū árīcū iri ñeri yʘre goroweobū. Ñerire iirā iri dorerire tarinūgara waja dipuwajacūmorā árīribū mari. Eropirā iri doreri tarinūgari mera peamegue dederebonirā árīribū.

<sup>12</sup> Eropiro Moise doreri Goāmū ya ōari āhraa. Eropiro queoro árīro iiaa. <sup>13</sup> ¿Eropa árīquerero iri ōari doreripū peamegue marire wacū iiri mʘa pepicū? Wadorebeaa. Mari ñeri iiri dipuwaja marire peamegue ñero wacū iiaa. Īḡu dorerire mari masira pūhrū iri dorerire tarinūgarā, “Ñerire iiaa mari,” arī masia. Eropirā mari ñerā árīrere masirā mari peamegue waboro sāre masia mari. Eropirā Īḡu dorerire masirā, mari tarinūgara iri ñeri árīcū masia mari.

<sup>14</sup> Moise doreri Goāmū Īḡu apira iri árīcū masia mari. Irire masiquererā maripū ñeri ʘaribeja iirā i ōaripūre iibeaa. Eropirā ñerire iiniguirā āhraa. <sup>15</sup> Mari ōarire iidiaquererā iibeaa mari. Eropirā mari ñerire iidiabiriquererā ta iiniguicāa. Eropirā mari iirire pee masibeaa mari. <sup>16</sup> Eropirā ñerire iidiabiriquererā ñerire iiaa mari. Iri ñerire iidiabirā Moise Īḡu dorerire “Ōari doreri āhraa,” arīdiarā iiaa. <sup>17</sup> Eropirā “Yʘ basi ñerire dipaturi iisome pare,” arīquererā ta ñerire iiniguia. Mari pepirigue árīripū ñerire marire iicū iiaa. <sup>18</sup> Ōarire turaro iidiaquererā ta, ne bocatūbirica. Eropirā ōpa masia. Ñeripū marire goroweomūraa. Mari pepirigue ñeri dihta āhraa. Ne ōari mara. <sup>19</sup> Ōari mari iidiaripūre ne iibeaa. Ñerire mari iidiabiriripūre iiaa. <sup>20</sup> Eropirā “Yʘ basi ñerire dipaturi iisome pare,” arīquererā ta ñerire iiaa daja. Mari pepirigue árīripū marire ñerire iicū iiaa.

<sup>21</sup> Eropiro ōpa wahaa marire. Ōarire mari iidiaquerēcū ta mari ʘaribejari mari pepiri ñeri āhraa. Eropirā ōaripūre iibeaa mari. <sup>22</sup> Goāmū dorerire mari turaro yūhridiarica. <sup>23</sup> Eropirā mari ire masia: Goāmū dorerire gamequererā mari ñeri pepiri mari ʘaribejari āhraa marire. Mari ñeri pepiri tarinūgaa mari ōari iidiaripūre. Eropirā mari ñerire duhumasibeaa.

<sup>24</sup> Eropa ñerire duhumasibirā ñero dujaa mari. ¿Mari ñeri ʘaribejarire duhuboro dopa, mari ñeri pepiri marire dorebiriboro dopa noa marire taugūcuri? <sup>25</sup> Jesucristore mari guñaturacū Īḡupū mari ñerire iibiriboro dopa taugūcumi. Īḡu mari Opū mari ñeri ʘaribejarire tautuhajadi árīmi. Īḡu eropiicū Goāmūre “Ōhaa,” arāa mari. Eropirā dohpaguere mari Goāmū dorerire yūhridiarā āhraa. Eropa yūhridiaquererā ta mari pepirigue ñero pepiri āhraa dohpa. Mari eropa árīrāre Jesucristo marire taumi.

## 8

*Espíritu Santore opará erã árîricurire were gojañumi Pablo*

<sup>1</sup> Dohpaguere Jesucristo yarãre erã dipuwajacuboro mara. Erã ñerire erã ñaribejarire iiniguibeama. Eropirã Espíritu Santo ïgu dorero dopa ta iiniguicãma erã. <sup>2</sup> Eropigu Jesucristo yarã mari árîcũ Espíritu Santo ñero iirire duhucũ iimi marire. Eropigu Espíritu Santo árîpehrerinuri Goãmũ mera árîcũ iimi marire. Ñerire marire duhucũ ïgu, marire peamegue wabonirãre taumi. <sup>3</sup> Moise dorerire mari gamero iirã ne bocatiusome. Eropirã iri doreri mera mari Goãmũ mera ðaro árîmasibiribũ. Mari eropa árîrã árîquerecũ ta ðpa Goãmũ marire ðarã árîcũ iidigu árîmi. Irire mari ñeri dipuwajare wajayebasabure ïgu magure obeodigu árîmi. ïgu magu mari iro dopa ta ðwacudigu árîmi. Eropigu wajayebasagu mari pepirigue ñeri árîrîre cóadigu árîmi. <sup>4</sup> Marire eropa ta iidigu árîmi Goãmũ ïgu dorerire ðarire ïgu turari mera mari iiboro dopa. ïgu dorerire iirã árîrã mari ñaribejarire iibeaa mari. Eropirã Espíritu Santo ïgu itamuri mera ïgu dorero dopa ta iiaa mari.

<sup>5</sup> Erã gamero ñerire iidiarã, ñeri dihtare ñaribejama. Espíritu Santo ïgu dorero dopa ta iiniguirãpu ðari dihtare iidiana erã. <sup>6</sup> Erã gamero ñeri dihtare iidiarã, iri dihtare ñaribejarã peamegue warãcoma. Espíritu Santo ïgu gamerire turaro iidiarãpu árîpehrerinuri Goãmũ mera árîrãcoma. Eropirã erã ðaro árîcãrãcoma. <sup>7</sup> Erã gamero iirã Goãmũre gamesuribirã àhrima. Erã Goãmũ dorerire ne yuhribeama. ïgu dorerire ne yuhrimasisome erã. <sup>8</sup> Eropirã erã gamero iirã Goãmũre ïhasuacũ iimasibeama.

<sup>9</sup> Mũapũ mũa gamero iibeaa. Espíritu Santo mũa mera árîcũ ïgu gamerire iiaa. Eropirã Espíritu Santore moorãpu Cristo yarã árîbeama. <sup>10</sup> I mũmũre masa ñerire iira dipuwaja mari árîpehrerã sîrimorã dihta àhraa. Mũa sîrimorã árîquererã ta Cristo yarã mũa árîrã ïgu mera eropa árîniguirãca mũa. Goãmũ mũare “Òarã àhrima,” ïgu arî ïacũ ïgu mera eropa árîniguirãca mũa. <sup>11</sup> Goãmũ Jesure masudigu árîmi. Eropa masudigu árîgu, Espíritu Santo mũa mera ïgu árîniguicũ mũa sîrîra puhru Goãmũ mũa sãre masugucumi. Eropa masugu ðaro árîcũ iigucumi mũare. Jesure ïgu masudiro dopa ta eropa masugucumi mũare.

<sup>12</sup> Yũ acawererã, “ïgu eropa ta iigucumi,” arîrã mari gamero iibiricãrã. <sup>13</sup> Mari gamero ñerire iirã, peamegue wamorã árîcãrã tiiaa mari. Espíritu Santo ïgu itamuri mera mari ñeri iiricurire duhurã, árîpehrerinuri Goãmũ mera árîrãca.

<sup>14</sup> Árîpehrerã Espíritu Santore yuhrirã Goãmũ porã ta àhrima. <sup>15</sup> Espíritu Santo mari mera ïgu árînugacũ Goãmũ porã árînugabũ mari. Eropigu ïgu porã árîcũ marire dipuwaja moasome. Peamegue wadoresome. Eropirã güibeaa mari iribojeguere mari güidiro dopa. ïgu porã árîrã, Espíritu Santo ïgu itamuri mera dohpaguere “Ahũ,” arãa mari Goãmũre mari Pagure <sup>16</sup> Eropigu Espíritu Santo mari pepirigue ðpa masicũ iimi: “Diaye ta Goãmũ porã àhraa mari,” marire arî masicũ iimi ïgu. <sup>17</sup> Eropirã ïgu porã árîrã, Goãmũ árîpehrerire ïgu porãre “Ogũra,” ïgu arîrare maripũ oparãca. Jesucristo mera irire oparãca mari. Cristo yare mari iira waja gajirã mera ñero tarinirã

árírã, mari ïgu mera  marogue  aro  r c r ca. Eropir  Go m  ïgu por re “Ogura,” ïgu ar rare opar ca mari.

<sup>18</sup> Dohpaguere i yebare  ero taria mari. P hruguerere  maroguere  aro  r c r ca. Eropir  dohpaguere  ero tarir  w aro bujawere pepibiric que. Mari  ero tarirap  pehrea waroca. P hr   aro  r c r ca Go m  pohrogue. Eropir  mucubirir ca mari. Iri mucubiririp  ne pehresome marire. <sup>19</sup> Eropir  Go m  por  Go m  pohroguerere  aro  r r coma. Mari eropa wac ,  r pehreri Go m  ïgu  hac nugura s  mama dihta gohroto pehrea waroca. <sup>20</sup> Dohpaguere ïgu  hac nugura  r pehreri  ero taria. Iri gamero eropa wabiriyoro. Ad n  eri iinugara p hr  Go m  ïgu  hac nugurare  ero wac  iinumi. Eropig  Go m  ïgu  hac nugurare eropa ta  ero  r doreni umi dohpa. P hr  ïgu  hac nugurare  arip re gohrotogucumi daja ïgu. <sup>21</sup> Eropig  Go m  ïgu  hac nugura boapehreaborare  arip re gohrotogucumi. Go m  por re  ar  er  gohrotoro dopa ta, i  m  maja ïgu  hac nugura s re  r pehrerire  ari dihta gohrotogucumi. <sup>22</sup> Ire mari masia:  erire masa iinugara p hr   r pehreri Go m  ïgu  hac nugura  eri wayoro. Eropiro Go m   arire ïgu gohrotoborore corero iiaa. <sup>23</sup> Marip  Esp ritu Santore opar   hraa. ïgu yar  mari wac  Go m  Esp ritu Santore mata omi marire. ïgu  hac nugura iro dopa ta mari s   ero taria. Eropir   arip re gohrotoborore burig  gamer  cohrea. Eropir  ïgu por  mari ïgu pohro waboro s re burig  gamer  cohrea mari. Mama d p re ïgu marire ïgu oboro s re burig  gamer  cohrea. <sup>24</sup> Mari eropa corer   r c , ïgu ta marire peamegue wabonir re taugucumi. ïgu pohrogue  r nir   r r  ïgu pohrogue mari waborore corebiriboya mari. Marire ïgu tautuhara p hr   r c  irire corenemobiriboya. <sup>25</sup> Eropir   biriquerer  ta dohpa, Go m  marire ïgu tauborore corer  eropa corenigua  aro yojaro mariro.

<sup>26</sup> Eropir  mari Go m re  aro gu aturabir  ïgu gamerire  aro masibir   r c   ha Esp ritu Santo marire itamumi. Eropir  Go m re queoro ser masibiriquerer  Esp ritu Santop  mari ya  r burire Go m re ser basami. Marire mojomoro  agu mari ya  r burire Go m re ser basami. <sup>27</sup> Go m  ïgu gamero dopa ta, mari Jesu yar   r borore ser basami ïgu Esp ritu Santo. ïgu eropa ar  ser basac  Go m  mari pepirire masipehogu  r gu Esp ritu Santo ïgu ser rare masimi.

*Cristo ya turari mera  eri iirire tarinugar ca mari, ar  goja umi Pablo*

<sup>28</sup> Ire masia:  r pehrer  Jesure mahir  mari  r c  ïgu gamerire iimor re beyep  ïgu marire. Eropa beyeg  Go m  eropa  hadibuniguic ami marire. Eropig  mari  ero taric   agu Go m p  marire  aro wac  iigucumi. <sup>29</sup> Go m  marire ïgu yar   r mor re matague ta mari ne masa dehyoaboro coregue ta gu atuhap . Eropa gu agu ïgu magu ïgu  agu  r ro dopa ta marire  ar   r rare gu ap . ïgu magu iro dopa marire  r dorep  bajar  masa ïgu magure mari t gucuborore. Eropig   r pehrero marire eropa wara mera marire  ar  gohrotoc  iimi. <sup>30</sup> Matague ta ïgu yar  ïgu  r dorener  mari  r c , ïgu por  mari  r mor  s re beyep  marire. Eropig  marire

ĩgu beyenirãre “Dipuwaja moorã, ðarã ãhrima,” arĩ ìhami. Marire ĩgu eropa “Òarã ãhrima,” arĩ ĩagu ĩgu mera umaroguere ðaro áricũ iigucumi.

<sup>31</sup> Irire masirã ðpa pepia mari: Goãmũ marire ĩgu mahinirãre, ne gajirã ìhaturirã bocatiubeama. <sup>32</sup> Goãmũ mari ya dipuwaja sĩribure ĩgu magure obeodigu árimi. “Yũ magure mahia. Eropigu ĩgure obeobeaa,” arĩbiridi árimi. Eropigu mari ya áriburire ĩgu magure obeodigu árigũ Jesucristo mera áripehrerire ðari dihtare ogucumi ĩgu marire. <sup>33</sup> Goãmũ beyenirã mari áricũ, ĩgu marire “Dipuwaja moorã, ðarã ãhrima,” arĩ ìhami. Mari ĩgu eropa arĩnirã áricũ, gajirã marire “Ñerã ãhrima,” ne arĩ weresãmasibeama. <sup>34</sup> Cristo mari ya dipuwajare sĩrira pũhrũ masa mũriadi árimi. Eropigu Goãmũ diayepũ dohpaguere ĩgu ãhrimi dorebu. Eropigu ĩgu mari ya áriburire diaye ta umuri nũcũ serẽbasagu iimi Goãmũre. Eropirã gajirãpũ ne marire “Erã ñeri iira dipuwaja moaque,” arĩmasibeama. <sup>35</sup> Cristo marire ĩgu burigã mahicũ gajirãpũ “Erãre ne mahibiricãque,” arĩmasisome ĩgure. Eropigu mari ñero tariquerecũ ta, mari guiquerecũ ta, gajirã marire erã ñero iiquerecũ ta, mari oaboaquerecũ ta, suhri marirã mari áriquerecũ ta, gũhyaro marire áriquerecũ ta, marire erã wejẽquerecũ ta, Cristo marire eropa mahiniguicãgucumi. <sup>36</sup> Goãmũ yare erã gojarapũ marire eropa waburire werero ðpa arĩ werea:

Goãmũ, mũ yarã gua áriiri waja erã wejẽsumorã ta arĩniguirã tiiaa gua. Oveja erã wejẽmorã erã áriiro dopa ta, gua sãre eropa ta wahaa, arĩ gojañuma Goãmũ yare erã gojarapũgue.

<sup>37</sup> Eropirã mari ñero tariquererã ta, Cristo marire mahigu ĩgu itamuri mera, turaro mera ñerire tarinũgarãca mari. <sup>38-39</sup> Goãmũ marire ĩgu mahirare ìhmudi árimi mari Opũ Jesucristo mari ya áriburire sĩricũ. Eropigu ĩgu marire burigã mahigu ne duhusome. Mari sĩricũ sãre, mari ojocaricũ sãre mahi duhusome. Dohpaguere, pũhrũgue sãre, marire ĩgu ne mahi duhusome. Eropirã anyua, watẽa oparã umaro majarã, i yeba majarã oparã, ñerã deyobirã sã marire Goãmũre “Mũ yarãre mahibiricãque,” arĩrã, bocatiusome. Eropiro ne yujugũ ne yujuñe ĩgu ìhacũnugura marire ĩgũpũre mahi duhudereri ne mara. Marire ĩgu ne mahi duhusome.

## 9

*Judio masa Goãmũ ĩgu beyenirã ãhrima, arĩ gojañumi Pablo*

<sup>1-2</sup> Yũ acawererã Israe masare guñagu burigã bujawerea. Cristore gamebeama erã. Eropigu ñero sĩporãcu pepia yũhũ. Iri yũ eropa arĩri diaye ta ãhraa. Yũhũ Cristo yagu ãhraa. Eropigu mũare diaye arĩgu iiaa. Espĩritu Santo yũ mera áricũ dohpaguere yũ acawererãre yũ arĩri iri diaye áricũ ðaro masia yũhũ. ĩgu yare irire ðaro masicũ iimi. <sup>3</sup> Israe masa yũ acawererã, yaha curu majarã Jesucristore gamebirã peamegue warãcoma, arĩ guñaricua. Eropigu yũhũ erãre peamegue wamorãre taumasigu ðpa arĩboya Goãmũre. “Erã ya dipuwajare yũpũre peamegue wadoreque,” arĩboya. Eropigu “Erã ya dipuwajare yũpũre cóãporo Cristo,” arĩboya. Yũ eropa arĩborãñe wajaye masi ya mara erã ya dipuwajare. <sup>4</sup> Erã yũ acawererã Goãmũ yare ðarire mata opamũhtanirã árima. Israe mũrũ pãramerã árituriarã ãhrima.

Eropigu Goãmũ ĩgu porã erã árĩburire mata apiñumi Goãmũ erãre. Eropigu Goãmũ ĩgu goesiriri mera erã watope árĩñumi. Eropiro árĩpehrerire ĩgu masare ðaro iiburire weremuriñumi erãre. Eropigu Moiserẽ ĩgu dorerare mata apimũhtañumi Israe masare. Eropirã Goãmũre umupeoburi wihire iimũhtañuma erã. Eropigu erãre ĩgu ðaro itamuborore weremuriñumi Goãmũ. <sup>5</sup> Gũa ya cururi gohra doce cururi ãhraa. Eropirã gũa ñecũ sumará Abrahã sã murgue, erã pãramerã árĩturiarãgue ãhraa gũa Israe masa. Eropigu Cristo masa dehyoanijagu gũa acaweregu Israe masũ gohra árĩmi Cristo. ĩgu Goãmũ ta ãhrimi. Eropigu ĩgu árĩpehrerã weca opu ãhrimi. Árĩpehrerinuri ĩgure ðaro umupeorã mari. Eropa ta iirã.

<sup>6</sup> Israe mũrũ ĩgu pãramerã árĩturiarã árĩquererã árĩpehrerã Goãmũ yarã gohra árĩbeama. Eropirã árĩpehrerã Goãmũ ðaro oburire opamorã árĩbeama. Eropirã Israe masare “Õaro iigũra,” arĩdigũ árĩqueregu Goãmũ erãre árĩpehrerãre ðaro iibiricũ ĩarã “Goãmũ ĩgu arĩdiro dopa ta iibeami,” arĩ pepibiricãro gahmea. <sup>7</sup> Õpa ãhraa: Gajirã Israe masa Abrahã pãramerã árĩturiarã erã árĩquerecũ ta, “Abrahã pãramerã gohra yaharã gohra ãhrima,” arĩ ĩabeami Goãmũ erãre. Eropigu õpa arĩñumi Goãmũ Abrahãre. “Mũ magũ Isaa pãramerã árĩturiarã erã tamera diaye ta mũ pãramerã árĩturiarã árĩrãcoma,” arĩmuriñumi Goãmũ Abrahãre. <sup>8</sup> ĩgu eropa arĩ werecũ ire masirãca mari: Árĩpehrerã Abrahã pãramerã erã masa dehyoara pũhrũ, mata Goãmũ porã wasome erã. Goãmũ ĩgu arĩ werepirare ðaro peerã ĩgure umupeorãpũ erã dihta árĩrãcoma Goãmũ porã. Eropirã erã ta ãhrima Abrahã pãramerã árĩturiarã gohra. <sup>9</sup> Õpa arĩñumi Goãmũ Abrahãre: “Gaji bojori inosubu ta yũ dujaricũ mũ marapo Sara majigũgãre opagocomo mũ magũre,” arĩñumi Goãmũ Abrahãre. Eropa ta arĩ werepiñumi ĩgure Abrahã magũ Isaa masa dehyoaborore. Eropigu ĩgu magũ Isaa masa dehyoañumi. <sup>10</sup> Pũhrũ Isaa Rebeca mera marapocũcũ igo uma perã suhrũanirã porãcũñumo. Erã pagũ Isaa gũa ñecũ mũrũ árĩñumi. <sup>11-12</sup> Eropirã erã porã erã masa dehyoaboro core, ðarire, ñeri sãre erã iibiricũ ta Goãmũ erã pago árĩbore õpa arĩmuriñumi: “ĩgu pagũ magũpũ ĩgu tĩgure doregũcumi. Eropigu ĩgu opu árĩgũcumi,” arĩmuriñumi igore igo porãcũborõ core. Goãmũ ĩgu gamero dopa ta beyemi ĩgu. Eropa árĩgũ, árĩgũ ĩgu dehyoaboro core Jacobore Esaũ pagũ magũ árĩgũre opu árĩbure beyemuriñumi. Eropigu masa erã iirire ĩaboro core ĩgu gamero dopa ta ĩgu yarã árĩmorãre beyemi. <sup>13</sup> Eropa ta arĩ gojañuma ĩgu yare erã gojarapũgue: “Jacobopũre mahimũribũ. Eropigu Esaũpũre mahibirimũribũ,” arĩmi Goãmũ, arĩ gojañuma iribojegũre.

<sup>14</sup> ¿Iire peerã dohpa arĩ pepibocuri mari? “¿Erã iiricũrĩre ĩaboro core yujugũre eropa beyegũ Goãmũ queoro iibeami,” ¿arĩ pepibocuri?” Árĩbeaa. Queoro iigu ta ãhrimi. <sup>15</sup> Õpa arĩñumi Goãmũ Moise sãre: “Yũ gamegũ dihtare mojomoro ĩagũra,” arĩmuriñumi ĩgu Moiserẽ. Eropigu yujugũre ĩgu gamero beyegũ queoro iigu iimi Goãmũ. <sup>16</sup> Eropirã mari gamero Goãmũre marire mojomoro ĩadoremasibeeaa mari. Eropirã mari ðarire iira waja sãre ne mojomoro ĩabeami ĩgu. ĩgu gamero dopa ta mojomoro ĩhami. <sup>17</sup> Eropigu eropa ta ĩgu gamero dopa iĩñumi Egipto majarã opu sãre. Õpa arĩñumi Goãmũ ĩgure

faraõre: “Egipto majarã opu áribure apigu iibu mure yu turarire áripehrerãre íhmubure. Eropigu áripehreri yeba majarãre, yure erã masiborore opu acugu iibu yuhu mure,” arĩñumi Goãmu ígure, arĩ gojara áhrra Goãmu yare erã gojarapũgue. <sup>18</sup> Eropigu ígu gamerãre mojomoro íhami ígu mari masare. Eropigu ígure erã gamebircã íagu ígu gamero erãre yuhribircã iimi ígu. Eropigu Goãmu ígu gamero dopa ta iimi.

<sup>19</sup> Ígu eropiigu áricã íarã õpa arĩboca mua: “¿Goãmu erãre ígure yuhribircã iidigu duhpigu ero puhru erã ígure yuhribirira dipuwaja moayuri erãre?” arĩ papũri serẽpiboca mua. <sup>20</sup> Eropa arĩbircãque. Mari masa bu árirã áhrra. Goãmu mera papũrimasibea. Mátasoro wéagore “¿Duhpigo yure eropa iiri muhu?” iri soro arĩ serẽpimasibea. Eropa ta mua sã Goãmure ígu gamero iigure “¿Duhpigu eropa iiri muhu?” arĩ serẽpimasibea. <sup>21</sup> Mátasoro wéago máta mera igo gamero dopa iimo. Eropigo õarire dibuburi sorore iimasimo igo. Iri máta mera ta bu árirã dibuburi soro sãre iimasimo igo. Igo iiro dopa ta Goãmu sã ígu iidiaro dopa ta iimi.

<sup>22</sup> Eropigu Goãmu peamegue ígu cóãmorãre erã ñero iirare íha guagu, erãre dipuwaja moadiaqueregu ta yoari boje erã ñeri iirire eropa íacãnimi. Áripehrerãre ígu turarire íhmubu, mata erãre dipuwaja moanibirimi. <sup>23</sup> Eropa ta iimi marire ígu mojomoro íarãre, ígu õatariagu ígu áririre, ígu turari sãre marire masidorebu. Matague ta marire, “Erãre mojomoro íagura yuhu. Yu õarire ogura erãre,” arĩ apiñumi Goãmu marire. <sup>24</sup> Eropirã maripu ígu beyenirã árirã iia. Eropirã ígu beyenirã judio masa dilta áribeama. Judio masa áribirã sã áhrima ígu beyenirã. <sup>25</sup> Eropa ta áhrra judio masa áribirãre Goãmu yare Osea waicugu ígu õpa arĩ gojadiro dopa ta:

Ero coregue yaharã áribirinirãre puhru erãre “Yaharã áhrima,” arĩgura. Eropigu ero coregue yu mahibirinirãre puhrugue erãre “Yu mahirã áhrra mua,” arĩgura, arĩpu Goãmu. <sup>26</sup> “Yaharã áribea mua,” Goãmu ígu arĩra yeba majarã Goãmu ojocaríniguicãgu porã ta árirãcoma, arĩ gojamũhtamũriñumi Osea iribojeguerẽ.

<sup>27-28</sup> Eropigu iribojegue majagu Isaia Israe masare õpa wereñumi: “Mari Opu i yeba majarãre bajarã masare yojaro mera diaye ta dipuwaja moa purumujugucumi. Eropirã wũariya maja imipayerĩ iro dopa Israe masa bajarã gohra erã áriquerẽcũ ta bajamerãgã tarirãcoma erã,” arĩmũriñumi Isaia. <sup>29</sup> Eropigu dipaturi ta wereyugu õpa arĩ gojañumi Isaia:

Mari Opu áripehrerã weca opu bajamerãgã mari mera majarãre taubigu, marire judio masare áripehrerãre dederecũ iiboñumi ígu. Sodoma majarãre, Gomorra majarã sãre ígu dedeopehocũ iidiro dopa ta mari sãre dederecũ iiboñumi ígu, arĩ gojamũriñumi Isaia.

*Judio masa õari buherire gamebirima, arĩ gojañumi Pablo*

<sup>30</sup> Eropa ta áhrra. Eropirã ire masique mua: Judio masa áribirãpu Goãmure amabiriquerẽre ígure bocama. Jesucristore erã umupeocũ, “Õarã áhrima,” arĩ íhami Goãmu erãre. <sup>31</sup> “Goãmu dorerire Moisere ígu apirare mari icũ ígu marire õarã íagucumi,” arĩriñorã judio masapu. Eropa ígu dorerire erã iiquerẽcũ ta

Goãmũ ìha sũabirimũripũ erãre. Eropirã ðarã árdiaquererã bocatũbirimũriñorã. <sup>32</sup> Erã Jesucristore umupeoro mariro erã gamero Moise dorerire iidiarima Goãmũ mera ðaro árdiarã. Eropirã Cristore erã ñeri irare cóãbure gamebirã Goãmũ pohrogue ne ejasome. <sup>33</sup> Eropa ta arĩ gojamũhtañuma Goãmũ ìgũ magure weweyurire:

Ûtãye iro dopa árgũre, yũ beyedigũre dohpague Jerusaléngue apigũ iiaa. Ìgũre umupeobirã, ìgũre tarinũgarã yũ pohrogue ne ejasome. Eropirã ìgũre umupeorãpũ ìgũ mera ðaro mucubirinigu-irãcoma. Yũ pohro warãcoma, arĩmi Goãmũ, arĩ gojañuma Goãmũ yare erã gojarapũguere.

## 10

<sup>1</sup> Yũ acawererã, Israe masare Goãmũ ìgũ tauborore bũrigã gahmea yũhũ yũ sĩporã mera. Eropigũ Goãmũ erãre ìgũ tauburire serẽbasaa yũhũ. <sup>2</sup> Diaye ta erã Goãmũ gamerire iidiarima. Eropa iidiaquererã ta ìgũ gamerire masibeama. <sup>3</sup> Eropirã Goãmũ erãre ðacũ iiburire masibeama. Eropa masibirã erã gamero ðarire iiquererã bocatũbirima. Erã eropiicũ, erã Goãmũ Jesucristore umupeodorediro dopa erã iibiricũ, ìgũpũ erãre “Õarã àhrima,” arĩ ìabirimi. <sup>4</sup> Cristore umupeorãre “Dipuwaja moorã, ðarã àhrima,” arĩ ìhami Goãmũ. Eropirã “Mari ñeri iira dipuwaja Goãmũ tauboro dopa Moise dorerire iiro gahmea daja,” arĩ pepibiricãro gahmea. Cristore umupeorã ìgũ mera taria.

<sup>5</sup> Moise iribojegue majagũ ðpa arĩ gojañumi: “Goãmũ dorerire mari dũhyaro mariro iipehocũ Goãmũ marire ‘Dipuwaja moorã, ðarã àhrima,’ arĩ ìagũcumĩ,” arĩ gojañumi ìgũ. <sup>6</sup> Ìgũ eropa arĩ gojaquerecũ ta dohpaguere masa Cristore erã umupeocũ Goãmũ erãre “Õarã àhrima,” arĩ ìhami. Iri buheri “Cristore umupeoque,” i arĩ buheri ðpa arĩ werea: “Õpa arĩ pepibiricãque mũa: ‘¿Noa Cristore umaroguere árgũre aĩdijugũcuri marire ìgũ buhecũ daja?’ arĩ pepibiricãque mũa. Cristo eratuhadigũ árimi marire taugũ eragũ i yebaguere. <sup>7</sup> Eropirã daja ‘¿Noa sĩrinirã pohroguere Cristore masu aĩgãribocuri?’ arĩ pepibiricãque mũa. Ìgũ sĩridigũ masa mũriadigũ árimi,” arĩ werea i buheri. <sup>8</sup> Eropiro ðpa arĩ werea Goãmũ yare erã gojarapũgue: “Goãmũ ya buherire mari amacũ ìgũ buheri ohõ àhraa. Ìgũ buherire masituhaa mũa. Eropirã ìgũ buherire wereniguimãrabũ,” arĩ gojañuma. Iri buherire “Cristore umupeoque,” arĩ buherire masare werea gũa. <sup>9</sup> Iri buheri ðpa arĩ werea: “Jesu yũ opũ àhrimi,” arĩ mari disiro mera werecũ, “Goãmũ Jesure sĩridigũre diaye ta masũumi,” arĩ mari pepicũ ìha Goãmũ marire peamegue wabonirãre taugũcumĩ. <sup>10</sup> Jesure mari umupeocũ ìha Goãmũpũ marire “Õarã àhrima,” arĩ ìagũcumĩ. Eropigũ gajirãre “Yũhũ Jesucristore umupeoa,” mari arĩ werecũ ìha ìgũ marire peamegue wabonirãre taugũcumĩ.

<sup>11</sup> Õpa arãa Goãmũ yare erã gojarapũ: “Ìgũre umupeorã, ìgũre erã umupeorare ne bũjaweresome. ‘Ìgũre umupeobiricũ ðaboya yũre,’ ne arĩsome,” arĩyoro Goãmũ yare erã gojarapũgue. <sup>12</sup> Judio masare, judio masa áribirã sãre Goãmũ yujuro mera ta itamũmi. Mari Opũ áripehrerã tauro opũ àhrimi ìgũ. Eropigũ áripehrerãre ìgũre serẽrãre itamugũcumĩ ìgũ. <sup>13</sup> Eropa ta arĩ gojañuma Goãmũ

yare gojarapũgue õpa arĩ gojarã: “Yũ ñerire cóãque. Eropigu yũre tauque,’ masa erã serẽcũ erãre peamegue wabonirãre mari Opũ taugũcumi,” arĩ gojañuma. <sup>14</sup> Eropirã masa Cristore “Diaye ta marire taugũ ãhrimi,” arĩ umupeobirã ãgure eropa serẽmasibeama erã. Eropirã ãgu buherire Jesucristo erãre tauburi buherire pee-birã ãgure umupeomasibeama. Eropirã ãgu buherire erãre weregu maricũ Goãmure erã masisome. <sup>15</sup> Eropirã ãgu buherire weremorãre erã obeobiricũ ãgu buherire weremasibeama. Õpa arĩ gojañuma Goãmũ yare erã gojarapũgue: “Õari buherire marire ðarã wacũ iiburi buherire weremorã erã eracũ ãarã ðaro mucubiria mari,” arĩ gojañuma iribojegure.

<sup>16</sup> Eropa arĩquerecũ ta masa bajarã Jesucristo yare ðari buherire peediabeama. Eropa ta arĩ gojamũriñumi Isaia: “Opũ, erãre mari wererare ne peediabeama,” arĩ weremũriñumi Isaia Goãmure. <sup>17</sup> Eropirã masa Jesucristo yare ðari buherire peerã peeñarã Cristore umupeoma.

<sup>18</sup> Eropigu ire serẽpidiaca mũare: ¿Israe masa Jesucristo yare peebiriyuri mũa pepicũ? Yuju diaye ta erã peemũririñuma. Eropa ta ãhraa Goãmũ yare erã gojarapũ sãre:

Goãmũ yare wererã árĩpehrerogure weresirirã wama. Eropirã árĩpehrero majarãge ãgu yare poema, arĩ gojañuma iribojegue.

<sup>19</sup> Dipaturi mũare serẽpidiaca daja: ¿Israe masa peequererã ðaro masibiriyuri mũa pepicũ? Masiriñuma. Masiquererã Jesucristore umupeodiabiriñuma. Erã eropa peediabiricũ gaji yeba majarã Goãmũ yarã wahama. Irire werenemogu Moise ãgu arĩrare weremũtagura: Õpa arĩ gojañumi ãgu:

Õpa arĩ weremi Goãmũ Israe masare: “‘Bu árĩrã ãhrima,’ mũa arĩ ãanirãre yaharã árĩmorã iigura. Yũ eropiicũ mũarũ erãre ãhaturirãca. Eropigu mũare erã mera guacũ iiguca yũhũ, arĩ weremi Goãmũ,” arĩ gojañumi Moise.

<sup>20</sup> Isaia sã doyarõ mariro õpa arĩmũriñumi:

Õpa arĩmi Goãmũ: “Yũre amabirãpũ yũre bocama. Eropigu yũre masibirãre erãre yũre masicũ iibũ yũhũ,” arĩmi Goãmũ, arĩ gojañumi Isaia. Judio masa árĩbirã Goãmũ yarã erã waburire weregu eropa ari gojañumi.

<sup>21</sup> Israe masa pũre õpa ari gojañumi Isaia: “Õpa arimi Goãmũ: ‘Mũa ñeri iirare bũjawereque yaharã wamorã, arimũrribũ erãre. Erãpũ yũre tarinũgarã yũre yũhribirimũrima,’ arimi Goãmũ,” arĩ gojañumi Isaia.

## 11

*Yujurãyerire Israw masare taugũcumi Goãmũ, ari gojañumi Pablo*

<sup>1</sup> ¿Eropigu Israe masare Goãmũ igu beyenirãre erã tarinũgacũ erãre cóãpehocãyuri ãgu mũa pepicũ? Árìbeaa. Erãre cóãbirimi ãgu. Yũ sã Israe masũ, Abrahã pãrami árĩturiagu ãhraa. Eropigu Benjami ya curu majagu ãhraa. <sup>2</sup> Iribojegue Goãmũ Israe masare beyemũriñumi. ãgu eropa beyenirãre cóãbeami. Goãmũ yare erã gojarapũ Elia ãgu iirare werea. Iripũ Israe masare Elia Goãmure ãgu arĩ weresãrare masica mũa. Õpa arĩ weresãñumi ãgu: <sup>3</sup> “Opũ, erã Israe masa mũ yare weremũtanirãre wejẽpehocãma. Eropirã



mære umupeori mesarire cóãpehocãma. Eropigu erã watope yu dihta mu yagu dujaa dohpaguere. Yu eropa árĩcũ ïarã yu sãre wejẽdiana dohpaguere,” arĩñumi Elia Goãmure. <sup>4</sup> Ñgu eroparĩcũ peegu õpa arĩ yuhriñumi Goãmũ Eliare: “Mũhu yahagu yujugu ta árĩbeaa. Siete mi mũa yaharã áhriima dohpaguere. Erãre dihbuabu yũhu. Erã sã yure õaro umupeoma. Baal waĩcũgu wéadĩgure ne umupeobirimũrama erã sã. Eropigu güibita mũhu,” arĩñumi Goãmũ Eliare iribojeguere. <sup>5</sup> Irisubure Elia ñgu árĩrisubure ñgu yarã árĩmorãre Goãmũ ñgu dibudiro dopa ta dohpague sãre bajamerãgã Israe masare ñgu yarã árĩmorãre dihbumi. Goãmũ erãre mojomoro ñagu dihbumi. <sup>6</sup> Õarire erã iicũ ñagu dibubirimi. Erãre mojomoro ñagu dibugu beyemi. “Õarire mũa iira pũhrũ mære beyegura,” arĩgu, ñgu diaye ta erãre mojomoro ñagu iibiriboñumi. Õarire erã iira pũhrũ erãre ñgu beyecũ erãre wajatari árĩboya. Õarire erã iibiriquerecũ ta erãre diaye ta mojomoro ñagu Goãmũ beyemi erãre. <sup>7</sup> Eropa iri õpa áhrraa: Israe masare Goãmũ erãre, “Õarã áhriima,” ñgu arĩ ñacũ gamequererã ta erã yujuro bojebeama. Goãmũ ñgu basi ñgu beyenirãpu õarã wahama ñgu mera. Ñgure yujuro bojebirãpu ñgu yare peediabeama. <sup>8</sup> Eropa ta arĩyoro Goãmũ yare erã gojarapũ: “Goãmũ ñgure gamebirãre ñgu yare peebiricũ iimi. Eropigu diaye árĩrĩre erã peequererã erãre õaro peebiricũ iimi Goãmũ. Eropa ta árĩnigüicãma dohpague sãre,” arĩ gojañuma iribojeguere.

<sup>9</sup> Eropigu õpa arĩñumi Davi mũru iribojegue majagu Goãmure:

Erã Israe masa erã bosenuri mucubirirĩnuri iirã ñero iima erã. Erã eropa iicũ ñagu dipuwaja moaque mũhu erãre. <sup>10</sup> Erãre õaro peebiricũ iique mũhu. Eropirã eropa dipuwajacurã árĩnigüicãporo erã. Eropirã eropa bũjawerenigüicãrãcoma, arĩñumi Davi Goãmure.

*Judio masa árĩbirãre peamegue wabonirãre taugũcumi Goãmũ, arĩ gojañumi Pablo*

<sup>11</sup> ¿Judio masa Cristore erã gamebiricũ ñagu Goãmũ erãre cóãcãyuri mũa pepicũ? Cóãgohracãbirĩñumi. Eropa erã Cristore erã gamebiricũ dohpaguere judio masa árĩbirãpu Goãmũ ñgu taumorã wahama. Dohpaguere ñgu yarã iimi Goãmũ erãre. Ñgu eropiicũ ïarã yujurãyeri judio masapu erãre ñhacũ erã sã Jesucristore umupeodiana. <sup>12</sup> Judio masa erã Goãmure tarinugacũ judio masa árĩbirãpu Goãmũ ñgu õari buherire peema. Eropirã árĩpehrero majarã judio masa árĩbirã Goãmũ taumorã wañorã õaro warã. Pũhrũ judio masapu Cristore erã umupeonũgara pũhrũ tamerare i yeba majarãre õatariaro waroca.

<sup>13</sup> Dohpaguere mære judio masa árĩbirãre werebu iiaa. Cristo apimi yure mære judio masa árĩbirãre buhebure. Eropa buhegu bu gohra iigu iibeaa. <sup>14</sup> Yure eropa buhedoredigu árĩgu masare weremũra. Yu acawererãre judio masare mũa Jesucristo umupeorare ñhacũcũ iidiagu werea. Goãmũ taunirã mũa árĩcũ ïarã erã sã Cristore gahme ñgu taumorã wabocoma, arĩgu werea. <sup>15</sup> Dohpaguere judio masare Goãmũ boje apigu, gajirãguere õari buherire Goãmũ weredoremi ñgu mera erã õaro árĩmorãre. Eropiro judio masare ñgu boje apicũ õaro wahabu i yeba majarãre judio masa árĩbirãre. Ñgu eropiidiro tauro judio masa sãre ñgu yarã árĩmorãre ñgu iicũ tamerare õatariaro waroca i yeba majarãre. Goãmũ mera erã õaro árĩcũ bajarã masa Jesure

umupeoräre peamegue waboniräre taugucumi. <sup>16</sup> Ōpa āhraa: Abrahā gūa ñecu mūru Goāmū mera ōaro īgu árīdiro dopa ta īgu pāramerā árīturiarāgue sã Goāmū mera ōaro árīrācoma Cristore umupearā árīrã.

<sup>17</sup> Yujurāyeri erã eropa árīrã árīquerecū ta gajirã erã acawererāpūre judio masare Goāmū boje apinimi dohpa. Judio masa Goāmū īgu beyemuhtanirã olivo waīcudigu otedigu dūpuri iro dopa āhrima. Mūa judio masa árībirã īgu beyemuhtanirã árībirã nuḡu majagu dūpuri iro dopa āhraa. Olivo otedigu dūpūre yujuyeri dūpuri īgu tabe cóãdiro dopa ta gajirã judio masapūre Goāmū cóãmi. Eropa cóãḡu īgu yarã árībirã wacū iimi eräre. Īgu cóãra dūpūre gaji dūpūre nuḡu majagu dūpūre gohroto tuhboro dopa, Goāmū judio masare judio masa árībirã mera gohrotomi. Eropa gohrotogu mūare judio masa árībiräre īgu yarã wacū iimi. <sup>18</sup> Mūare īgu eropa gohrotocū, “Judio masa tauro ōarã āhraa pare gūa,” arī pepibiricāque. Ire guñaque: Judio masapūre beyemuhtapū Goāmū. Mūapū erã pūhrū Goāmū yarã árīrã mūa sã Goāmū ōari oburire opaa. Eropirã “Judio masa tauro ōarã āhraa,” arī pepibiricāque.

<sup>19</sup> Mūa judio masa árībirāpū ōpa arīboca: “Yujurāyeri dūpūre īgu cóãdiro dopa ta Goāmū judio masare cóãmi yujurāyerire. Eropa cóãḡu īgu gaji dūpūre gohroto īgu tuhdiro dopa ta īgu yarã mari wamoräre apimi,” arīboca mūa judio masare tarinūgadiarã. <sup>20</sup> Ōpa āhraa. Erã Jesure umupearira dipuwaja cóãpū Goāmū eräre. Eropigu mūa sãre Jesure mūa umupearicū īgu yarã árīmoräre mūare apibiriboañumi. Eropirã “judio masa tauro ōarã āhraa gūa,” arī pepibiricāque mūa. Eropa arībirã ta Goāmūre ōaro umupearo. <sup>21</sup> Muhtari dūpuri iro dopa judio masa Goāmū yarã árīmuhtañuma. Iri gohroto tuhra dūpuri iro dopa ta erã pūhrū mūa Goāmū yarã wabū. Eropigu Goāmū īgu yarã árīmuhtanirã īḡure umupearicū īagu cóãpū eräre. Īgu eräre eropiidiro dopa ta mūa sãre cóãḡucumi mūa īḡure umupearicū. Eropirã Goāmūre ōaro umupearo mūa. <sup>22</sup> Goāmū mūare ōaro iḡu īgu árīcū masique mūa. Eropirã ḡuhyadiaro mera, īgu dipuwaja moagu īgu árīcū sãre masique mūa. Īḡure umupeariräre īgu dipuwaja moagucumi. Eropa árīquereḡu ta mūa īḡure umupearoniguicū mūare ōaro iḡucumi īgu. Īḡure umupearicū ñeri dūpūre īgu tabe cóãdiro dopa ta mūa sãre cóãḡucumi Goāmū. <sup>23</sup> Masapū erã tabe cóãra dūpūre tuhumasibeamã daja. Goāmūpū árīpehrero iimasigu āhrimi. Eropigu judio masa īgu cóãnirã Cristore erã umupearicū Goāmū īgu yarã árīcū iḡucumi daja eräre. <sup>24</sup> Mūa judio masa árībirã Goāmū yarã árībirimūriyoro. Eropa árībirã mūa árīquerecū ta Goāmū mūare īgu yarã arīcū iḡucumi. Eropigu īgu beyemuhtanirã mūa árībiriquerecū ta īgu yarã árīcū mūare iidiami īgu. Eropigu judio masare īgu beyemuhtanirāpūre īgu yarã árīcū īgu tauro iidiaḡucumi.

*Pūhrū Israe masare taugucumi Goāmū, arī gojañumi Pablo*

<sup>25</sup> Yū acawererã, ire masa erã masibirirare mūare weregura. Mūa ōpa arīboca: “Dohpaguere gūa dihtare beyemi Goāmū. ḡuapū masipehocã,” mūa arī pepiboca. Mūa irire arī pepibiriboro dopa ire weregura mūare. Ōpa āhraa masa erã masibirira: Dohpaguere

bajarã judio masa Goãmure peediabirã àhrima. Eropirã bajarã judio masa árìbirãre Goãmũ ìgu queodiropẽ ìgu yarã wacã iigucumi. Ero pãhrũ judio masapũ ìgure gamerãcoma daja. <sup>26</sup> Erã eropa gamecũ árìpehrerã Israe masare Goãmũ taugucumi erã peamegue wabonirãre. Goãmũ yare erã gojarpũgue eropa ta arĩ gojañuma:

Jerusalén waicuri macague judio masa ya macague erãre taubu arigucumi. Eropigũ Jacobo murũ pãramerã árìturiarãre erã ñerire ìgu cóãgucumi. <sup>27</sup> Eropigũ erãre taugũ iribojegue yũ arĩ erãre werepirare iigucumi, arĩmi Goãmũ, arĩ gojamũhtañuma Goãmũ yare erã gojarapũgue.

<sup>28-29</sup> Dohpaguere erã judio masa Cristo yare umupeobirã Goãmure gamebeama. Erã eropiicũ dohpaguere mũapũ judio masa árìbirãpũ Cristore umupeonũgabũ. Judio masapũre Goãmũ beyemũhtañumi. Goãmũ ìgu arĩ werepidiro dopa ta masare ìgu beyediro dopa ta diaye iimi ìgu. Eropigũ judio masa ñecũ sũmarã mũra ìgu beyenirã erã árìcũ dohpague erã árìturiarã sãre ìgu mahimi. <sup>30</sup> Iribojegue mũa sã Goãmure tarinũganirã árìriyoro. Dohpaguere judio masa Goãmure erã tarinũgacũ ìagu ìgu mũapũre mojomoro ìagu taumi. <sup>31</sup> Dohpaguere judio masa ìgure tarinũgarã àhrima. Erã eropa árìquerẽcũ ta Goãmũ dohpamasapũre Goãmũ beyemũhtañumi. Goãmũ ìgu arĩ werepidiro dopa ta masare ìgu beyediro dopa ta diaye iimi ìgu. Eropigũ judio masa ñecũ sũmarã guere mũare mojomoro ìadiro dopa ta erã sãre pãhrũ mojomoro ìagucumi. <sup>32</sup> Òpa àhraa: Árìpehrerã masare Goãmũ ìgure erã tarinũgara waja yujuro mera dipuwajacudoremi. Eropigũ árìpehrerã erã dipuwajacurã erã árìcũ ìha árìpehrerãre yujuro mera mojomoro ìagucumi ìgu.

<sup>33</sup> Òatariagu àhrimi mari Goãmũ. Turatariagu àhrimi. Òaro masipehogũ àhrimi ìgu. Eropiro ìgu guñarire, ìgu iiburire marire òaro masiya mara. <sup>34</sup> Òpa arĩ gojañuma Goãmũ yare erã gojarapũgue: “Goãmũ mari Opũ ìgu guñarire ne masa òaro masibeama. Eropirã masa ìgure ‘Òpa iique,’ arĩ weremasibeama. <sup>35</sup> Eropirã masa Goãmure erã gajino ora pãhrũ ‘Ìgu marire wajamomi,’ arĩ masiya mara masa,” arĩ gojañuma iribojeguerẽ. <sup>36</sup> Goãmũ árìpehrerire iidi arĩmi. Eropigũ ìgu turari mera árìpehrerire árìcũ iidoredi arĩmi ìgu. Eropiro árìpehreri ìgu iiburi àhraa. Eropirã árìpehrerinuri ìgure umupeorã mari. Eropa ta iirã mari.

## 12

### *Goãmũ gamerire marire iinigucãdoreñumi Pablo*

<sup>1</sup> Goãmũ marire turaro mojomoro ìhami. Ìgu eropa mojomoro ìagu árìcũ ìarã, yũ acawererã, mũa basi ta Goãmũ gamerire iinigucãrã árìque. “Mũhũ yũ opũ àhraa,” arìque ìgure. Eropirã òaripũre gohrotonirã, ñeri marirã árìque. Eropa ta iiro gahmea marire Goãmure umupeorãre. Mũa eropa árìrã árìcũ ìgu mucubirigucumi. Eropigũ mũare irire burigã iidorea. <sup>2</sup> I yeba majarã erã gamero dopa ta pepibircãque mũa. Eropirã mũa pepiriguere Goãmũ gamerire gohrotoque mũa. Eropirã òaripũre gohrotonirã árìrãca mũa. Eropa gohrotorã Goãmũ mũare ìgu iidorerire masirãca mũa.

<sup>3</sup> Goãmũ yũre mojomoro ãagũ mũare buhedoregũ beyemi yũre. Eropigũ árĩpehrerãre mũare õpa dorea yũhũ. “Õatariagũ ãhraa yũhũ,” arĩ pepibiricãque. Eropa pepicãque. Jesucristore mũa umupeorã “Goãmũ yũre ãgũ itamuro mera iimasia yũhũ ãgũ yare,” arĩ pepique. <sup>4</sup> Õpa arĩ werenemogũra yũhũ: Mari mojotori, guburi, cuiĩri, árĩpehreri mari dũpũ árĩri baja ãhraa. Mari dũpũ árĩri sã yuju dũpũ árĩquerero gajiropa árĩri mohmeri opaa. Mari dũpũ mari Jesu yarã iro dopa ãhraa. Cristo dũpũ iro dopa árĩrã yuju curu ta ãhraa mari. <sup>5</sup> Mari eropa árĩcũ ãagũ gajiropa árĩri dihta mohmerire apimi Goãmũ marire. Eropirã bajarã masa árĩquererã ta Cristore umupeorã árĩrã ãgũ dũpũ iro dopa yuju curu ãhraa mari.

<sup>6</sup> Eropigũ marire mari nũcũre gajiropa árĩri mohmerire mari iimasiburire ãgũ turari mera apidigũ árĩmi. ãgũ eropiicũ maripũ ãgũ apirare õaro iiro gahmea. Eropirã Jesu yarã õpa game itamuporo: Yujurãyerire Goãmũ ãgũ yare weretaumasimorãre apidi árĩmi. Eropirã erã Cristore erã masiropẽ ãgũ yare õaro weretauporo gajirãre. <sup>7</sup> Gajirãre Goãmũ yarãre erã itamumasimorãre apidi árĩmi. Eropirã erãpũ masare õaro mera itamuporo. Gajirãpũre Goãmũ yare buhemorãre apidi árĩmi. Eropirã erã masare õaro buheporo. <sup>8</sup> Gajirãre masare mucubiricũ iimorãre apidi árĩmi. Eropirã irire õaro iiporo. Gajirãre erã ya erã gamerire omorãre apidi árĩmi. Eropirã gajinore orã, õaro mera mucubiriri mera oporo. Eropirã gajirãre doremasicimorãre apimi. Erã dorerã õaro mera doreporo. Eropigũ daja mojomorocũrãre itamumasimorãre apidi árĩmi. Erãre itamurã mucubiriri mera itamuporo, arĩ werea mũare.

*Jesu yarã árĩrã õpa iirã ãhrima, arĩ gojañumi Pablo*

<sup>9</sup> Gajirãre mahi umupeorã, diaye ta mahi umupeoque. Eropirã ñero iirire doorã árĩque mũa. Eropirã õaripũre gameniguicãque. <sup>10</sup> Mũa pagũ porãre mũa umupeoro dopa ta Jesu yarã mũa mera majarã sãre umupeoque. Eropirã mũa mera majarã erã gameripũre itamumũhtaque. Pũhũ mũ yare iique.

<sup>11</sup> Goãmũ gamerire iirã ne tebiricãque. Eropirã mari Opũ ãgũ dorediro dopa ta õaro mucubiriri mera iique.

<sup>12</sup> Goãmũ mũare peamegue wabonirãre ãgũ taunirã ãhraa mũa. Irire masirã mucubirique mũa. Eropirã ñero tarirã Cristo yare duhuro mariro yujuro bojeque mũa. Eropirã Goãmũre eropa serẽniguicãque.

<sup>13</sup> Gajino Jesu yarãre duhyacũ ãarã oque erãre. Eropirã mũa ya wirigue masa erã ejacũ õaro siporãcũ erãre bocafirique.

<sup>14</sup> Mũare ñero iirãpũre erã õaro árĩburire serẽque Goãmũre. Eropa õadorerã erãre ujapeobiricãque.

<sup>15</sup> Gajirã mucubiricũ ãha erã mera mũa sã mucubirique. Gajirã orecũ ãha erã mera oreque.

<sup>16</sup> Mũa mera majarã mera õaro árĩque mũa. Eropirã “Gajirã tauro õagũ ãhraa,” arĩ pepibiricãque. Bu árĩrã mera sãre õaro árĩque. Eropirã “Masitarinũgarã ãhraa gũa,” arĩ pepibiricãque.

<sup>17</sup> Gajirã mũare ñero iiquerecũ ta, erãre ñero ii gamebiricãque. Eropirã õarire iique. Eropirã õarã mũa árĩrĩre árĩpehrerã masa ãha masirãcoma. <sup>18</sup> Mũa masiropẽ turaro mera õarire iique árĩpehrerã mera mũa õaro árĩcãboro dopa. <sup>19</sup> Mũa yũ mahirã, yũ acawererã,

gajirã m̄are erã ñero iiquerecũ ta erã iro dopa ñero ii gamebircãque. “Erã ñero iira dipuwaja Goãm̄p̄ dipuwaja moaḡcumi,” arĩ guñarã ñero ii gamebircãque erãre. Goãm̄ yare erã gojarapũgue eropa ta arĩ gojañuma: “Yũp̄ masa erã ñero iira dipuwaja moaḡ ãhraa. Eropigũ diaye ta dipuwaja moaḡura, arĩmi mari Op̄,” arĩ gojara ãhraa. <sup>20</sup> Eropirã õpa iique m̄a: M̄are ñaturidigũ ñgu oaboacũ ñarã ejoque ñgure. ñgu ñemesibucũ deco ñtaque ñgure. Eropa iirã m̄are ñaturidigũ ñgu ñero iirare gũhyasĩricũ iirãca. <sup>21</sup> Eropirã gajirã m̄are erã ñero iiquerecũ m̄ap̄ erãre ñero ii gamebircãque. Eropirã erãre õaro iique. Eropa iirã ñerip̄are tarinũgarã iirãca m̄a.

## 13

<sup>1</sup> Áripehrerã oparãre Goãm̄ dihta apimi. Eropigũ m̄a tauro oparã sãre Goãm̄ ta beye apidigũ arĩmi. ñgu eropa apinirã erã arĩcũ ñarã arĩpehrerã m̄a erãre yũhrique. <sup>2</sup> Mari tauro oparã arĩrãre tarinũgarã Goãm̄ ñgu apinirãre tarinũgarã iirãca mari. Eropa tarinũganirãre Goãm̄p̄ dipuwaja moaḡcumi. <sup>3</sup> Óarire iirãre güicũ iimorã arĩbeama oparã. Ñerire iirãp̄are güicũ iirã ãhrima oparã. Eropirã õarire iique m̄a oparãre m̄a güibiriburire. Eropa iirã güisome m̄a. Óarire m̄a iicũ, op̄p̄ “Óarire iiabũ,” arĩḡcumi m̄are. <sup>4</sup> Oparã Goãm̄re itamurã ta ãhrima m̄a õaro arĩcãborore. Erã eropa arĩquererã ta erã dorerire tarinũgarãp̄are dipuwaja moamorã ta ãhrima. Áripehrerã ñerire iinirãre dipuwaja moadoregũ Goãm̄ erãre apidi arĩmi. <sup>5</sup> Eropirã mari oparãre yũhrique. Goãm̄ ñgu dipuwaja moaborore güiro mera yũhrique. Eropirã umupeori mera “Óaro iiro gameca yare,” arĩ pepiri mera õaro yũhrique erãre. <sup>6</sup> M̄a oparãre iri mohmerire apidi arĩmi Goãm̄. Eropirã iri mohmerire erã iicũ ñarã m̄a oparã ya arĩburire wajaseabasaa m̄a erãre.

<sup>7</sup> Áripehrerãre m̄a oparãre õaro yũhrique. Eropirã oparã erã wajaseadorerare wajayeque m̄a. Eropirã oparã gajire wajayedorecũ sãre wajayeque. Eropirã arĩpehrerã oparãre umupeoque, arãa yũh m̄are.

<sup>8</sup> Gajirãre wajamobircãque. Erãre mahi umupeoro gahmea. ñgu pohro arĩḡare mahigũ Goãm̄ dorerire iipehocãgũ ãhrimi. Eropirã m̄a pohro arĩrã sãre mahiro gahmea. <sup>9</sup> Ópa arãa Goãm̄ doreri: “Gajigũ marapo mera ñero iirã arĩbircãque. Masare wejẽbircãque. Yajabircãque. Gajirãre ḡya ñeri quere iibircãque. Gajirã yare turaro ãaribejabircãque,” arĩ werea ñgu doreri. Gaji ñgu doreri sã ãhraa. Iri eropa arĩquerecũ ta yujuñe doreriñere m̄are werebu iiaa. Ópa ãhraa: “M̄a basi mahiro dopa ta m̄ pohro arĩrãre mahique,” arĩ werea ñgu doreri. M̄a pohro arĩrãre mahirã Goãm̄ dorerire arĩpehrerire yũhrirã tiiaa. <sup>10</sup> Gajirãre mahirã erãre ñero iisome. Eropirã erãre mahi umupeorã Goãm̄ dorerire yũhripehorã ãhraa m̄a.

<sup>11</sup> Eropa gajirãre mahique õpa masirã: Jesu marire ñgu dujariboro merogã dũhyanijaa. ñgure mari ne masinũgarã õpa arĩ pepiribũ: “Yoara pũhũgue marire taugũ arĩḡcumi Jesu,” arĩ pepiribũ. Mari eropa arĩ pepiquerecũ ta merogã dũhyaa Jesu marire ñgu taugũ ariboro. Eropirã carĩrã iro dopa arĩbircãque. ñgu yare

ðaro guñanuræque. Jesu ariboro corere ðaro pee masi yuque. <sup>12</sup> Dohpaguere ñerã erã iirinuri áriro iiaa. Cristo ĩgu aririnũ iri ñeri pehreroca. ĩgu ariboro merogã duhyaa. ĩgu ariboro merogã duhyacũ ĩarã ñerire iibiricãrã mari. Eropirã Goãmũ gameripure iirã mari. Eropa Goãmũ yare iirã ñeripure duhcãrãca mari. <sup>13</sup> Eropirã ðaripure iirã. Eropa iirã bosenuri áricũ mari ñaribejarire ñeri iibirabiricãrã. Eropirã merebiricãrã. Eropirã nome mera ñero iibiricãrã. Gajirã mera game ĩhaturirã áribiricãrã. Nome sã ¼ma mera ñero iibiricãporo. <sup>14</sup> Eropirã mari Opũ Jesucristo ĩgu itamuri mera ĩgu gamero dopa ta ðaro áricãque. Eropirã mũa ñaribejarire ñerire ne iibiricãque.

## 14

*Mũa acawererãre Jesu yarãre “Ñero iirã iima,” arĩ werewuabiricãque, arĩ gojañumi Pablo*

<sup>1</sup> Jesure umupeogure, Jesu gamerire ĩgu ðaro masinibiricũ dohpa, ĩgure ðaro bocatĩrique. Eropa bocatĩrirã Jesu gamerire ĩgu masinibiricũ ĩarã ĩgu masibiririre duyasobiricãque ĩgure. <sup>2-3</sup> Gajirã “Goãmũ áripehrerire badoremi marire,” arĩ pepima. Eropirã gajirãpũ ðaro masinibirã “Waibũgu dihipure bacũ Goãmũ gamebeamĩ,” arĩ pepima. Eropirã oteri dihtare bahama. “Dihire bamasia,” arĩrã, “Dihire bamasibea,” arĩrã sã erã Jesucristore umupeorã áricũ ĩha Goãmũ ðarã ĩhami erãre. Eropirã “Áripehrerire Goãmũ badoremi,” arĩrãpũ “Iri dihire bamasibea,” arĩrãre ĩhaturibiricãporo. Eropirã dihire babirãpũ dihire barãre “Ñero iirã iima,” arĩ werewuabiricãporo. <sup>4</sup> Mũa Jesure umupeorã yujugũ dorero doca áhraa mũa. Mũa eropa áricũ ĩarã mũa basi game werewuamasibea. Jesucristo mũa Opũ ĩgu gamerire mũa iibiricũ ĩagũ ĩgu dihta irire weresãmasimi. Mũa ðaro ĩicũ sãre irire ĩgu weremasimi muare. Eropigũ ĩgu dorerire iirãre ðarire bocatĩucũ iigucumi mari Opũ.

<sup>5</sup> Yujurãyeri yujunare “Irinũ dihta soorinũ gamenere Goãmure umupeorinũ áhraa,” arĩ pepima. Gajirãpũ “Umuri nũcu gamenere Goãmure umupeoro gahmea,” arĩ pepima. Eropigũ ðpa werea muare yũhũ: Mũa nũcu mũa pepirire “¿Dinũ áhriri mari gamenere umupeorinũ? ¿Dinũ áribeari?” arĩ pepi masique mũa. <sup>6</sup> Gajigũ yujunã iimi ĩgu Goãmure umupeoburinãre. Eropigũ umuri nũcu gamenere umupeobiriqueregũ, Goãmure ðaro umupeomi ĩgu sã. Eropigũ áripehrerire bagũ sã “Õhaa,” arĩ serẽmi Goãmure. Eropigũ ĩgu sã Goãmure umupeogu ta áhrimi. Eropigũ gajinore babi sã ĩgu sã umupeomi Goãmure. Eropigũ ĩgu sã Goãmure “Õhaa,” arĩ serẽmi.

<sup>7</sup> Mari gameri dihtare iirã árimasibea mari. Cristo áhrimi mari Opũ. Eropigũ mari ojocaricũ, mari sĩricũ mari Opũ áhrimi ĩgu. <sup>8</sup> Dohpaguere mari ojocaripõ Cristo yare iimorã dihta áhraa mari. ĩgu yarã áhraa. Mari sĩrira pũhrugue sãre ĩgu yarã áriniguicãrãca. Eropigũ mari ojocaricũ mari sĩricũ sãre Cristo mari Opũ ta áhrimi. <sup>9</sup> Eropa ta áhraa. Cristo sĩri, masa mũria, ojocarimi sĩrinirã sãre erã opũ áribu.

<sup>10</sup> ¿Duhpirã mũa acaweregure Jesu yagure “Ñero iigu iimi,” arĩ werewuadiari mũa? ¿Duhpimorã mũa acaweregure curadiupidiari

mua? Mari árĩpehrerã Cristo core mari niguicũ ĩgũpũ mari iirare masipehogũ, mari iirare ĩagũcumĩ. ĩgũ eropa ĩabu ĩgũ árĩcũ mua acaweregure “Ñerire iigu āhrimi,” arĩ werewuabiricãque. <sup>11</sup> Goãmũ yare erã gojarapũgue õpa arĩ gojañuma:

Õpa arĩmi mari Opũ: “Yũhũ ojocarigu āhraa. Iri diaye ta āhraa. Eropirã árĩpehrerã yũre gamerã, gamebirã sã yũ core merejarãcoma. Eropirã árĩpehrerã ‘Mũhũ turagu gũa Goãmũ ta āhraa,’ arĩ, yũre umupeorãcoma,” arĩmi mari Opũ, arĩ gojañuma.

<sup>12</sup> Eropigu mari árĩpehreri mari iirare Goãmũ serẽpigũcumĩ. ¿Duhpirã eropa iiri? arĩ serẽpigũcumĩ. ĩgũ eropa serẽpicũ yũhrirãca mari.

*Mua acaweregu ñero dujacũ iibiricãque mua, arĩ gojañumi Pablo*

<sup>13</sup> Eropirã mari mera majarã sãre “Ñerã āhrima,” arĩ werewuabiricãrã. Eropirã mari acaweregure Jesu yagure ñero dujacũ iibiricãrã. ĩgũ Goãmũ yare duhucũ iibiricãrã. <sup>14</sup> Yũhũ Jesucristo yagu āhraa. Eropigu õpa õaro masia yũhũ: “Árĩpehreri Goãmũ ĩgũ badorera āhraa,” arĩ masia. Gajigũpũ eropa arĩmasibeami. ĩgũpũ gajinore bagũ “Ñero iigu iiaa,” arĩ pepimi. Eropiro ĩgũ irire arĩ pepiqueregu bagũ diaye ta dipuwajacũgu dujami. <sup>15</sup> Iri diaye ta āhraa. Mua dihire mua bacũ mua acaweregu “Iri Goãmũ badorebirira āhraa,” arĩgũpũ ĩhacũbocumi mũare. Eropigu irire bagũ, “Ñero iigu iica yũhũ,” arĩ wũaro guñaricũbocumi ĩgũ. Eropirã mua bari mera ĩgũ ñero pepicũ ĩha irire dipaturi babiricãro gahmea mũare. Mũhũ mũraro ta bagũ mũ acaweregure umupeosome. Mua acaweregu yañe árĩborañe sãre sĩridi arĩmi Jesucristo. Eropirã mua irire badiaquererã mua acaweregure Goãmũ yare duhucũ iibiricãque. Eropirã irire babiricãque. <sup>16</sup> “Ire gũa eropa iicũ õapũricãca,” mua arĩ pepiquerecũ gajirã mũare ĩha werewuabocoma. Erã eropa werewuacũ ĩarã dipaturi irire iinemobiricãque guare werewuari arĩrã. <sup>17</sup> Goãmũpũ mari opu āhrimi. ĩgũ eropa árĩcũ, mari badiari mari ihridiari sã eropa árĩcãro iiaa. Bu gohra āhraa. Eropiro mari Opũ ĩgũ dorerire õarire mari iicũ iri õari gohra árĩro tiiaa. Eropiro gajirã mera mari õaro árĩcãcũ õari gohra árĩro iiaa. Eropiro Espĩritu Santo ĩgũ itamuri mera mari mucubiricũ õari gohra árĩro iiaa. <sup>18</sup> Eropa ta Cristo yare õarire iicũ ĩarã Goãmũ sã, masa sã “Õaro iibu mũhũ,” arĩrãcoma.

<sup>19</sup> Eropa ta iirã mari tamera mari õaro árĩcãborore, mari basi mari game itamuburire. Eropa iiricũrã Jesure umupeonemorãca. <sup>20</sup> Eropirã mua bari mera Jesu yarãre Goãmũ yare duhucũ iibiricãque. Gajigu Jesu yagu “Goãmũ badorebirira bari āhraa,” ĩgũ arĩra barire mua bacũ ĩagu ĩgũpũ Goãmũ yare duhubocumi. Eropirã irire babiricãque. Diaye ta árĩpehreri bari Goãmũ ĩgũ badorera bari āhraa. Iri eropa árĩquerecũ gajigu “Iri barire Goãmũ badorebeami,” arĩ pepimi. Eropigu mua iri barire bacũ ĩagu ĩgũpũ ĩhacũ babocumi ĩgũ sã. Eropa bagũ “Ñero iigu iiaa,” arĩ pepi Goãmũ yare duhubocumi. Eropirã marire ĩgũ ĩhacũ bacũ iirã mari sã ñero iirã tiiaa. Eropirã iri barire babiricãro gahmea marire. <sup>21</sup> Waimũrã dihire mua bacũ vinore mua ihricũ ĩagu, gajigu Jesu yagu ĩabocumi. Eropa ĩagu ĩhacũ babocumi

daja. “Irire bagu ñero iigu iica yuha,” arĩ pepibocumi. Eropa arĩ pepigu tamera bagu ñero iigu iimi. Eropirã İgu ñero İgu iibiriborore waimurã dihire, vino sãre m̄ar̄u ba duhucũ ðacãroca. Jesure İgu umupeo duhubiriborore iibiricãro gahmea marire. <sup>22</sup> Eropirã m̄a baburire, ihiburire game duyasobiricãque. “Arĩpehreri barire Goãmu marire badoredigu arĩmi,” arĩ pepirã irire Goãmu dihtare wereque. “Ñerire iibigu, ðaro iigu iica,” İgu pepirigue arĩ masigu mucubirigu ahrimi. <sup>23</sup> Gajiguru iri barire bagu, “Ñero iigu iiboca yuha,” arĩ pepigu arĩqueregu iri barire bagu, dipuwajacugu ahrimi İgu. İgu ta “İre bagu diaye ta ðarire iigu iiaa,” İgu pepirigue arĩmasibeami. Eropa arĩmasibigu irire bagu, İgu bara waja dipuwajacumi İgu. “Ðarire iigu iiaa,” arĩmasibirinijagu irire iigu dipuwajacugu ahrimi.

## 15

*Mari pohro arĩrãre ðaro umupeorã, arĩ gojañumi Pablo*

<sup>1</sup> Eropirã Jesucristore ðaro mari umupeorãu, ðaro umupeotura-birãre itamuro gahmea. Eropirã mari ya arĩburi dihtare iibiricãro gahmea. <sup>2</sup> Mari pohro arĩrãre erã gamero dopa ta iiro gahmea erã ðaro arĩcãborore. Goãmure erã ðaro guñaturanemoburire iiro gahmea. <sup>3</sup> Jesucristo sã İgu ya dihtare iibiridi arĩmi. Eropa ta arãa Goãmu yare erã gojarapũ. Őpa arĩ gojañuma: “Cristo ðpa arĩmi Goãmure: ‘M̄ur̄e ñero wereniguibonirã yur̄e ñero wereniguima,’ arĩmi Cristo Goãmure,” arĩ gojañuma iribojegure. <sup>4</sup> Iribojegue erã Goãmure yare gojañuma mari ðaro buheborore. Eropirã iri erã gojarapũre buherã siporã turarã wahaa mari. Eropa buherã ñero tarirã yujuro bojerãca. <sup>5</sup> Goãmure m̄are turacũ iigu siporã turacũ iigu m̄are game ðaro arĩcãcũ iiporo Jesucristo İgu gamediro dopa ta. <sup>6</sup> Eropa ta iiporo İgu m̄a arĩpehrerã yujuro mera Goãmure umupeoborore, mari Opu Jesu Pagure “Őagu ahrimi. Turagu ahrimi,” m̄a arĩborore.

*Judio masa arĩbirãre ðari buherire werenugama, arĩ gojañumi Pablo*

<sup>7</sup> Cristo İgu m̄are iidiro dopa ta m̄a mera majarãre ðaro game bocatĩrique. M̄a eropiicũ İarã “Diaye ta Goãmure ðagu masa yujuro mera ðaro arĩcãcũ itamugu ahrimi,” arĩ İarãcoma masa. <sup>8</sup> M̄are ire arĩgu iiaa: İgu Pagu İgu arĩ werediro dopa diaye ta iigu İgu arĩcũ İhmugu, judio masare itamubu aridigu arĩmi Cristo i yebaguere. Eropigu Goãmure Abrahã sãre arĩ werediro dopa ta iigu aridigu arĩmi. <sup>9</sup> Masare Cristo İgu itamucũ İgu Pagu Goãmuremojomoro İagu iidigu arĩmi erãre. İgu eropamojomoro İacũ İarã judio masa arĩbirã sã Goãmure “Őagu ahrimi. Turagu ahrimi,” arĩ umupeoma dohpaguere. Erã sãre İgu yarã arĩcũ iigu aridigu arĩmi Cristo. Goãmure yare erã gojarapũgue eropa ta arĩ gojañuma:

Cristo ðpa arĩmi İgu Pagure: Judio masa arĩbirã watope mure umupeogura. “Goãmure ðagu ahrimi,” arĩgura. Eropigu erã watope bayagu m̄u ya arĩburire bayagura, arĩmi Cristo İgu Pagure, arĩ gojañuma iribojegure.

<sup>10</sup> Eropirã ðpa arĩ gojañuma daja:

Goãmure İgu beyenirã mera judio masa mera game mucubirique m̄a sã judio masa arĩbirã, arĩ gojañuma iribojegure.



11 Eropirā ōpa arī gojañuma daja:

Judio masa árībirā árīpehrerā Goāmure umupeoporo. Eropirā árīpehrero majarā ĩgure “Ōagu āhrimi. Turagu āhrimi,” arī umupeoporo, arī gojañuma.

12 Eropigu Isaia mura sā ōpa arī gojañumi:

Davi pagu Isai mura pārami árīturiagu arigucumi. Eropa arigu judio masa árībirā tauro opa árīgucumi ĩgu. Eropirā erāpu ĩgure umupeorā erāre peamegue wabonirāre ĩgu taaborore masirācoma, arī gojajuñumi iribojegure.

13 Goāmu marire taugu árību ōaro mware mucubiricā iiporo. Eropigu Jesure mua guñaturacā mware ōaro árīcācā iiporo ĩgu. Mware ĩgu eropiicā “Īgu pohro mari warāca,” arī mucubiri masinemorāca mua Espiritu Santo ĩgu turari mera, arāa yahu mware.

14 Yu acawererā, ōaro mera mware guñaa. Mua ōarā āhraa. Eropirā Jesu yare ōaro masia. Eropa masirā mua mera majarāre game ōaro were, buhemasia. 15 Mua eropa masirā mua árīquerecā ta ipūguere mware güiro mariro irire ōaro werepehobu yahu erāgue cādijiri arīgu. Goāmu yure mahigu mware buhedoregu apimi yare. Eropigu ĩgu apidiro dopa ta mware guñacā iigu iiaa. 16 Yure ĩgu apicā Jesucristo yare ōari buherire judio masa árībirāre buhea yahu. Eropa buhecā peerā judio masa árībirā Jesure umupeorācoma. Erā eropa umupeocā ĩagu Goāmu erāre “Ōarā āhrima,” arī ĩagucumi. Eropigu erāre gamegucumi. Eropigu Espiritu Santopu Goāmu yarā wacā iigucumi erāre.

17 Eropigu Jesucristore umupeogu arīgu Goāmu yure buhedore apirare mucubiriri mera werea masare. 18-19 Judio masa árībirāre Cristo itamuri mera erāre yu buhecā peerā, Cristore umupeoma. Eropirā masa árībirāre buhea yahu. Eropa buhecā peerā judio masa árībirā Jesure umupeorāco yu ōaro iiricurire ĩarā, Goāmu turari mera yu deyoro moarare ĩarā, Espiritu Santo ĩgu turari mera erā Cristore umupeoma. I árīpehrerire mware diaye werediaca. Gajirā erā iirare werebeaa. Jerusaléngue ne yu buhenugara puhru árīpehreri macarigue buhe curibu. Yoarogue, Iliria yebague sāre Jesucristo ya buherire ōari buherire buhegu ejabu. 20 Eropigu Cristo yare masibirā dihtare ōari buherire turaro buhediabu. Yu mera majarā erā buhenirāguere buhediabiribu. 21 Eropa arī gojañuma Goāmu yare erā gojarapūguere. Ōpa arī gojañuma:

Iribojegue ĩgure ne masibirinirā ĩgure masirācoma. Eropirā ĩgure ne peebirinirā ĩgu yare ōaro peerācoma, arī gojañuma Goāmu yare erā gojarapūgue.

*Pablo Romague ĩgu waborore wereñumi*

22 Eropigu árīpehrero majarāre buhegu arīgu bajasuburi mua pohro wadiaqueregu ta wamasibirimurabu. 23 Dohpaguere i yebaguere a árībirā Jesure umupeorācoyu mohmeri pehrea wahaa. Eropa pehrecā ĩagu baja bojori mua pohro wadianiguigu arīgu, mua pohrogue wagura. 24 Eropigu Españague wagu mware ero ĩhatari wahgāgura. Eropigu mua mera mucubirigura. Eropigu mua mera árīdigu wagu mua yure itamuri mera wagura daja. 25 Dohpaguere Jerusaléngue wanibu iiaa. Ero majarāre yu acawererāre Jesu yarāre niyeru sonigu

wagu iiaa. <sup>26</sup> Macedonia majarā, Acaya majarā, ōaro mera Jesu yarā Jerusaléngue árírāre mojomorocūrāre niyerure obeoama erāre itamurā. Eropigu erāre obeerare sogu wagu iiaa. <sup>27</sup> Iri niyerure orā ōaro mera ohāma. Erā eropiicū ōapūrica yu pepicū. Erāre judio masa árībirāre, gua judio masapu Goāmū yare buhemāhtabū. Eropirā erāre ĩgu tauboro sāre buhemāhtabū gua judio masa erāre. Gua eropa buhecū ĩagu, Macedonia majarā, Acaya majarā mera judio masapure Jerusalén majarāre itamucū ōapūrica yure. Erāre erā buhera waja āhraa iri niyeru yu pepicū. <sup>28</sup> Eropigu Jerusalén majarāre iri niyerure yu ora pūhrū Españague wagūca. Erogue wagu mūare ĩhatari wahgāgūra. <sup>29</sup> Eropigu mūa pohrogue yu wacū Cristo yare yu mūare buhecū Cristo marire ōaro sīporācācū ĩgucumi.

<sup>30</sup> Mūa, yu acawererā, mari Opure Jesucristore umupeoa. Eropirā Espírítu Santo ĩgu turari mera gajirāre umupeoca mūa. Mūa eropiirā árírā yu sāre turaro serēbasaque Goāmure. <sup>31</sup> Ōpa arī serēbasaque: Judea yeba majarā Jesure umupeobirā yure erā ñero iidiacū Goāmū yure itamuboro dopa serēque. Eropirā Jerusalén majarāre iri niyerure yu ocū erā irire mucubiriri mera erā ñeaboro dopa serēque. <sup>32</sup> Mūa eropa serēcū Goāmū gamecū mucubiriri mera mūa pohrogue wagūca. Eropigu mūa mera árīgu mucubiriri mera soogūra. <sup>33</sup> Goāmū marire ōaro árīcāgu ĩgu mūa mera árīporo. Eropa ta ĩporo.

## 16

### *Pablo ōadoreñumi*

<sup>1</sup> Mari acawerego Febe waīcūgo mūa pohrogue wabo iimo. Igo Cencrea waīcūri macague Jesu yarāre itamugo āhrimo. <sup>2</sup> Eropigo bajarāre yu sāre itamugo āhrimo igo. Eropirā mūa igo mera yujuro mera mari Opure umupeorā āhraa. Eropirā igore ōaro mera bocatīrique. Eropa ta ĩiro gahmea marire Jesu yarāre. Eropirā igore igo gamerire gajino duhyacū igore oque mūa.

<sup>3</sup> Aquila, ĩgu marapo sā Priscila sā ōaporo. Jesucristo yare yu buhecū erā sā yu mera mohmeama. <sup>4</sup> Erāre mero wejēbocurima gajirā erā yure wejēdiacū itamuri waja. Eropigu erā mera mucubiria yuhū. Eropirā judio masa árībirā Jesu yarā árīpehrerā erā sā erā mera mucubirima. <sup>5</sup> Eropirā Aquila ya wihi gamenererā sā Jesu yarā ōaporo. Yu mahigu Epenéta sā ōaporo. ĩgu Asia majagu ero árīgu Cristore umupeomāhtadigu árīmi. <sup>6</sup> María sā ōaporo. Igo mūa mera turaro mohmeapo. <sup>7</sup> Yu acawererā Andrónico, Junia sā ōaporo. Peresu yu árīcū erā ta yure wapicūnirā āhrama. Eropirā yu core Cristore umupeonūgañorā erāpū. Gajirā Jesu ĩgu apinirāpū erāre “Diaye ta ōarā āhrima,” arī wereniguima.

<sup>8</sup> Amplia sā yu mahigu Jesu yagu āhrimi. ĩgu ōaporo. <sup>9</sup> Eropigu Urbano sā ōaporo. ĩgu sā mari mera Cristo ya árīburire mohmeami. Eropigu yu mahigu mera majagu Estaqui ōaporo. <sup>10</sup> Eropigu Apele sā ōaporo. ĩgu diaye ta ōaro Jesucristore umupeomi. ĩgu iiricūrire ĩarā irire masia mari. Eropirā Aristóbulo ya wihi majarā árīpehrerā ĩgu marapo ĩgu porā sā ōaporo. <sup>11</sup> Yu acaweregu Herodión ōaporo. Eropirā Narciso ya wihi majarā Jesu yarā ōapehrecāporo. <sup>12</sup> Eropirā Trifena, Trifosa sā ōaporo. Erā nome mari Opū Jesu mohmerire ĩiama.

Mari mahigo Pérsida sã õaporo. Igo mari Opũ Jesucristo yare turaro mohmemo. <sup>13</sup> Eropigũ Rufo mari Opũ Jesure õaro umupeogũ, ĩgũ yare õaro iigũ õaporo. ĩgũ pago sã õaporo. Igo yũ pago iro dopa ta árigo áhrimo. <sup>14</sup> Asíncrito, Flegonte, Herma, Patroba, Herme, gajirã Jesu yarã erã mera majarã sã õaporo. <sup>15</sup> Eropirã Filólogo, Julia, Nereo, ĩgũ pagũ mago sã Olimpa, gajirã erã mera majarã sã Jesu yarã õaporo.

<sup>16</sup> Eropirã mũa mera majarãre bocatĩrirã mucubiriri mera mojoto ñeaque. Árĩpehrerã Jesu yarã árĩpehrero majarã mũare õadorema.

<sup>17</sup> Yũ acawererã, mũa mera yujurãyeri mũare game ĩhaturicũ iirã game dũca waricũ iirã árĩcoma. Eropirã mũare Jesu ya buherire goroweoma. Eropirã eropa iirãre õaro iique goroweori arĩrã. Eropa arĩrãre wapicubiricãque. <sup>18</sup> Eropa iirã mari Opũ Jesucristo yare iibeama. Ñerire erã uaribejari dihtare iima. Eropirã õaro wereniguirã iro dopa gũyama masibirãre erã. Erã eropa gũyacũ erãre õaro peenũrama. Eropirã erãre wapicubiricãque mũa. <sup>19</sup> Mũapũ Jesure õaro yũhrirã áhraa. Irire árĩpehrerã masima. Eropa õaro mũa yũhrirã mũa árĩcũ pee mucubiria yũhũ. Eropigũ õaro mũa iiborore masicũ gahmea yũhũ. Eropigũ ne ñeri sãre mũa iibiricũ gahmea yũhũ. <sup>20</sup> Eropigũ Goãmũ marire õaro árĩcãcũ iigũ merogã pũhrũ watĩre tarinũgagũ iibasagũcumi mũare. Mari Opũ Jesucristo õaro mũare itamuniguicãporo.

<sup>21</sup> Timoteo yũ mera majagũ mũare õadoremi. Yũ acawererã Lucio, Jasõ, Sosípate mũare õadorema.

<sup>22</sup> Yũhũ Tercio ipũre gojabasagũ áhraa Pablore. Yũhũ Jesu yagũ árĩgũ mũa Jesu yarãre õadorea.

<sup>23</sup> Gayo ya wihi árĩcãgũ iiaa yũhũ Pablo. ĩgũ ya wihigue Jesu yarã gamenerema Goãmũre umupeomorã. ĩgũ sã mũare õadoremi. Eropigũ Erasto i maca majarã oparãre niyeru dibubasagũ mũare õadoremi. Mari acaweregũ Jesu yagũ Cuarto sã mũare õadoremi.

<sup>24</sup> Mari Opũ Jesucristopũ mũare árĩpehrerãre õaro iiporo. Eropa ta iiporo.

*Pablo Goãmũre umupeori mera gojatuñumi*

<sup>25-27</sup> Mari Opũ Jesucristo ya buheri mera õari buheri mera Goãmũ mũare ĩgũre guñaturanemocũ iimasimi. Iribojegue iri õari buheri ne masa masibiriri buheri árĩriyoro. Dohpaguere Goãmũ yare weremũhtanirã erã gojara mera iri buherire masidoregũ iimi. Yũ sã irire buhea. Iri buherire árĩpehrero majarã dohpaguere masima. Goãmũ eropa árĩniguicãgũ dorero dopa ta erã masima. Iri buherire ĩgũ ta weredorepũ masa ĩgũre erã yũhrĩborore, ĩgũre erã umupeoboro sãre. Eropirã ĩgũre “Diaye ta õagũ, turagũ áhrimi,” arĩ umupeorã. ĩgũ yujugũ ta Goãmũ õaro masipehogũ áhrimi. Jesucristo ĩgũ itamuri mera Goãmũre eropa umupeoniguicãrã mari. Eropa ta iirã. Iripẽta áhraa.

# 1 Corintios

*Pablo Goãmu yarãre Corinto majarãre gojabeoñumi*

<sup>1-2</sup> Yũhũ Pablo, Jesucristo yare ïgu buhedore apidigu ãhraa. Goãmu ïgu gamero dopa ta Jesu ïgu apibure yãre beyepũ ïgu. Sostene Jesu yagũ mari acaweregũ mera mũare Goãmu yarãre Corinto majarãre gojabeoa gũa. Jesucristo mera majarã mũa áricũ Goãmu yarã árimorãre beye aĩdi árimi Jesucristo mũare. Eropirã áripehrero majarã gajirã mari Opũ Jesucristore serẽrã árirã, erã sã Goãmu yarã ta áhrima. Jesucristopũ erã opũ mari Opũ sã áhrimi. <sup>3</sup> Eropirã Goãmu mari Pagũ, mari Opũ Jesucristo mera mũare ðadoreã. ïgu itamuri mera ðaro áriñque mũa.

*Jesucristopũ mũare ðaro iibasadigu árimi Goãmure, arĩ gojañumi Pablo*

<sup>4</sup> Jesucristo mũare ðaro iibasadigu árimi Goãmure. ïgu eropa iicũ ïagũ, Goãmure yũ mahigure, Ôhaa,” arãa yũhũ umuri nũca. <sup>5</sup> Cristo yarã mũa áricũ ïagũ Goãmupũ mũare ðaro áricũ iimi. Eropigu ïgupũ ïgu yare mũare gajirãre weremorãre iimi ïgu. Eropigu ïgu, ïgu yare ðaro masicũ iimi mũare. <sup>6</sup> “Cristo mũare ðaro iigũcumi,” mũare gũa arĩ werediro ta wahabũ mũare Cristo yarã mũa wacũ. <sup>7</sup> Eropigu áripehreri ïgu ya áriburire mũa iimasicũ iimi Goãmũ mũare. Eropiro ne duhyabeesa mũare. Mari Opũ Jesucristo i yebague ïgu dujari-borore mũa corerisubu Goãmupũ mũare eropa itamuniguicãgũcumi. <sup>8</sup> Eropigu Jesucristopũ mũa ïgure umupeoniguicũ iigu áhrimi. ïgu eropa áriñgu áricũ mũapũ i umũ pehrecũ mũa ñeri iira dipuwaja moorã áricũ iigũcumi. <sup>9</sup> Goãmu “Ôpa iigũra,” ïgu arĩdiro dopa ta ïgu iimi. Eropigu ïgu, ïgu magũ mari Opũ Jesucristo mera yujuro mera árimorãre marire beyedi árimi.

*Jesu yarã Corinto majarã erã game dũca warirare Pablo arĩ gojañumi*

<sup>10</sup> Yũ acawererã, mari Opũ Jesucristo ïgu dorero mera mũare burigã serẽbu iiaa: Mũa basi game dũyasobiricãque. Eropirã mũa basi game dũca waribiricãro gahmea. Yuju curu ta áriñque mũa. Eropirã yujuropa ta ðaro áriñiguicãque. Eropa iirã mũa iiburire pepirã, yujuropa iique mũa. <sup>11</sup> Yũ acawererã, mũa basi game dũyatorã iiayoro mũa. Eropa arĩ wereama Cloé ya wihi majarã yãre. <sup>12</sup> Gajirã mũa mera majarã ðpa arãñorã: “Pablo ya curu majarã áhraa gũa,” arĩ wereniguiayoro gajirã mũa. Eropirã gajirã “Apolo ya curu majarã áhraa gũa,” arãyoro gajirã. Eropirã gajirãpũ daja, “Pedro ya curu majarã áhraa gũa,” arãyoro mũa. Eropirã gajirãpũ daja, “Gũa tamera Cristo ya curu majarã áhraa gũa,” arãyoro mũa. <sup>13</sup> Mũa eropa arĩquerecũ ta yũhũ ðpa werea mũare: Cristo ya curu majarã yuju curu ta áhraa mari. Eropirã mari basi yujurãyeri dũca warimasibeesa mari. Yuju curu ta árirã iiaa mari. Yũhũ Cristo áribeaa. ïgu iidiro dopa mũa ya dipuwajare crusague siridigu áribeaa. Eropigu mũare gajigu waĩyegũ yaha waĩ mera waĩyebeari. Cristo ya waĩ mera waĩyecumi mũare. <sup>14</sup> Mũare mũa mera majarã sãre waĩyebiribũ yupũ.

Crispore, Gayo säre erä dihtare waïyebu yuhu. “Pablo waïyenirä dihta ähraa,” arïmasibeeaa mua. Eropigu gajiräre waïyebiridigu yu arïgu “Öhaa,” arï pepia Goãmure. <sup>15</sup> Bajarä masare waïyedigu yu arïcû “Pablo ya waï mera ïgu waïyemi guare,” arïboaya mua. Eropa arïrä Jesucristore umupeobirä mua yupure umupeoboaya. Eropigu irire gamebirabu. <sup>16</sup> Estéfana ya wihi majarä säre waïyebu yuhu. Erä nucu ta waïyebu yuhu. Gajirä yu waïyeniräre guñabirica. <sup>17</sup> Cristo yure obeogu, gajiräre waïyebure apibirimi ïgu yure. Öari buherire werebupure apimi ïgu yure. Iri öari buheri “Cristo ïgu crusague sïriñumi,” arï buheri masare gohrotori buheri ähraa Goãmü yare erä iiburire. Eropigu yuhu irire buhegu gajigu öaro masitarigu iro dopa buhebeaa. Masa erä masiri mera buhebeaa. Yuhu eropa yu ejatuharo mera buhecû mua öari buheripure umupeobiriboaya.

*Goãmü ïgu turarire ïgu masiri säre opagu ährimi Cristo, arï gojañumi Pablo*

<sup>18</sup> Peamegue dederemoräpü iri buheri “Cristo crusague ïgu sïridi arïmi,” arï buherire peerä öpa arïma: “Pee masibirä ya buheri ähraa,” arïmaacäma. Maripü Cristo ïgu taumorä arïrä öpa aräa: “‘Crusague ïgu marire sïridi arïmi,’ arï buheri tura ähraa. Iri buheri mera Goãmü marire gohrotomi,” aräa mari. <sup>19</sup> Eropa ta arïñumi Goãmü ïgu yare erä gojarapügue:

Eropirä i yeba majarä masare “Öaro masirä ähraa,” erä basi arïräre erä masiripü duhpiburi arïbeaa, arï ïhmuçca yuhu, arïñumi Goãmü.

<sup>20</sup> Eropirä i yeba majarä öaro masirä duhpimorä arïbeama. Erä pepiro dopa buherä sä duhpimorä arïbeama. Dohpaguere werenigumehrerä sä duhpimorä arïbeama. I yeba majarä “Öaro masirä ährima,” arïñirä erä arïquerecû ta “Pee masibirä erä ährima,” arï ïhmumi Goãmü eräre. <sup>21</sup> Goãmü tamera öaro masigu ährimi. ïgu eropa arïcû i yeba majarä erä ya masiri mera Goãmü yare ne masisüya mariroca eräre. Goãmü “Erä masiri mera yure masisome,” ïgu arïdiro dopa ta eropa wahabu eräre. Öpa arïñumi: “Yaha öari buherire werecû masa yure masiräcoma,” arïñumi. Eropigu “Iri buheri pee masibirä ya buheri ähraa,” gajirä arïquerecû, gajiräpüre erä öari buherire peeräpüre Goãmü taumi. Cristore erä umupeocû ïagu “Eräre peamegue waboniräre taugura,” arïmuhtapü.

<sup>22</sup> Judio masa deyoro moarire ii ïhmudorema erä iri buherire umupeoboro core. Eropirä griego masa judio masa arïbirä arïräpü erä pepiro dopa buhecû gahmema. <sup>23</sup> Maripü “Jesucristo mari ñeri iira dipuwaja crusague sïridi arïmi,” arï buherire buhea mari. Iri buherire peerä judio masapü gamebeama. Eropirä iri buherire judio masa arïbiräpü “Pee masibirä ya buheri ähraa,” arïma. <sup>24</sup> Goãmü ïgu yarä arïmorä ïgu beye añiräpü iri buherire pee öpa arï masima: “Goãmü masipehogu turagu ährimi. Cristo marire sïribasara mera marire peamegue waboniräre Goãmü taumi,” arï masima. Erä judio masa, judio masa arïbirä sä eropa arï masima Jesu yarä arïrä. <sup>25</sup> Goãmü öaro masipehogu ährimi. “Goãmü pee masibigu ährimi,” masa arï pepiquerecû ta i yeba majarä tauro öaro masipehogu ährimi. Eropigu “Turabigu ährimi,” masa arï pepiquerecû ta erä wecague

turatarinugagu āhrimi ĩgu. <sup>26</sup> Yũ acawererā, Goāmũ mũare ĩgu beyeboro core mũa árĩmũhtarare guñaque. I yeba majarā “Ōaro masirā āhrima,” erā arĩnirā watopegue Goāmũ mũare bajamerāgā dihtare beye aĩdi árĩmi. Eropirā masa tĩrā oparā sã árĩnirā bajamerāgā āhrra mũa Jesu yarā. <sup>27</sup> I yeba majarā “Pee masibirā āhrima,” erā arĩnirā watopepũre mũare Goāmũ beye aĩdi árĩmi. Eropa beyedi árĩmi “Ōaro masirā āhrima,” erā arĩnirā erā masibirā dujaboro dopa. Eropigu i yeba majarā “Turabirā, doyarā āhrima,” erā arĩnirāre Goāmũ aĩdigũ árĩmi doyarĩrũpũ erā doyarā dujaro dopa. <sup>28</sup> Masa erā ĩadiabirāre “Duhpimorā árĩbeama,” arĩma. Erā eropa arĩnirāre bu árĩrāre Goāmũ ĩgu yarā árĩmorāre aĩdigũ árĩmi mũare. Eropa aĩgu i yeba majarā oparāre, guhyadiarāre, “Guapũ bu árĩrā āhrra,” erā arĩcũ iigu iimi Goāmũ erāre. <sup>29</sup> ĩgu eropa iicũ i yeba majarā ne yujugũ ĩgu gamero mera “Yũ tamera turagu, ōaro masigu āhrra,” arĩ tarinugamasibeami Goāmũ ĩgu ĩacũ. <sup>30</sup> Goāmũpũ marire Jesucristo yarā árĩcũ iimi. ĩgu yarā árĩrā mũmũri nũcũ Goāmũ mera árĩrāca mari. Jesucristopũ Goāmũre ōaro masicũ iimi marire. Eropigu mari ñerire cóāgu marire ōarire gohrotocũ iigu āhrimi. Eropigu marire peamegue wabonirāre taubu āhrimi. <sup>31</sup> ĩgu eropa iicũ Goāmũ yare erā gojarapũ ĩgu arĩ gojadiro dopa ta eropa wahaa. Ōpa arĩ gojañuma: “Yũ gamero masipehogũ āhrra,” arĩgu irire arĩbiricāporo. Ōpa arĩporo: ‘Mari Opũpũ masipehogũ ta āhrimi,’ arĩporo ĩgu,” arĩ gojañuma Goāmũ yare erā gojarapũgue.

## 2

*Cristo crusague ĩgu sĩrira buheri āhrra i, arĩ gojañumi Pablo*

<sup>1-2</sup> Yũ acawererā, mũa pohro wabu ōpa arĩ pepibũ yũpũ: “Erā mera árĩgu Jesucristo crusague sĩridigu waĩpeo ĩgũre erā masiburi dihtare buhegũra erāre,” arĩ pepibũ mũare. Eropigu mũa pohro árĩgu Goāmũ yare mũare buhebũ. Goāmũ yare mũare buhegu, weretarinugagu iro dopa “Masitarigu āhrra,” arĩ buhegu iibiribũ. <sup>3</sup> Eropigu mũa mera árĩgu bu árĩgu iro dopa árĩbũ yũhũ. Eropigu yũre umupeori arĩgu doyañariro dopa buhebũ yũhũ. <sup>4</sup> Eropigu Goāmũ yare buhegu “Masipehoa yũhũ,” arĩgu weretarinugagu iro dopa buhebiribũ. ĩgu yare buhecũ Espĩritu Santo ĩgu turari mera mũare iri buherire umupeocũ iimi. <sup>5</sup> Eropa ta arĩ buhebũ yũhũ mũare masa erā gamero erā ya masirĩpũre mũa gamebiriboro dopa. Goāmũpũre mũa umupeobũre eropa arĩ buhebũ yũhũ “Goāmũ turagu āhrimi,” mũa arĩboro dopa.

*Espĩritu Santopũ Goāmũ ĩgu árĩricũrĩre buhemi marire, arĩ gojañumi Pablo*

<sup>6</sup> Eropirā Goāmũ ya buherire Jesure ōaro umupeorāguere werea gũa. Iri buheri masiri ta āhrra. I mũmũ maja masa erā gamero erā masiri iro dopa árĩbeaa i mũare gũa buheri. I yebare dorerā ya masiri sã árĩbeaa. Erā masiri i mũmũ mera pehrero iiaa. <sup>7</sup> Goāmũ ya masirĩpũre werea. Iribojegue i buherire ne masisũya mariyoro. Negohraguere mari ōaro árĩborore Goāmũ arĩ pepituhajamũrĩpũ. Marire peamegue wabonirāre ĩgu tauborore, ĩgu mera mari árĩboro

sãre “Masare eropa ta iigura,” arĩ pepiyupu. <sup>8</sup> Īgu masare ðaro arĩ pepirare i umure dorerã masibiriñuma. Irire ðaro masirã, mari Opure Goãmu magu gohrare crusague pabia wejêbiriboañuma erã. <sup>9</sup> Erã eropa masibirare Goãmu yare erã gojarapũgue ðpa ãhraa:

Árĩpehrerã Goãmure mahirã ya árĩburire Goãmu ðaro amubasayutuhapu. Iri ĩgu amubasarapure masare masima masiya mara. Ne gajino iro dopa ãaya mara irire, arãa Goãmu yare erã gojarapũgue.

<sup>10</sup> Iri eropa arĩquerecũ ta Espĩritu Santopu Goãmu yare, masisũya marirare masicũ iimi marire. Árĩpehreri Goãmu yare ĩgu pepira sãre Espĩritu Santo masipehomi. Eropa masigu ĩgu marire irire masicũ iimi.

<sup>11</sup> Ne gajirãpu masu ĩgu pepirire masibeama. Masupu ĩgu seyaro ĩgu guñarigue ĩgu pepirire masimi. Eropa ta masa Goãmu ĩgu pepirire ne masibeama. Espĩritu Santo dihta ĩgu pepirire masimi. <sup>12</sup> Eropirã mari Jesu yarã árĩrã erã i umu majarã Jesu yarã árĩbirã erã pepiro dopa pepibea. Goãmu ĩgu Espĩriture ohomi maripure ĩgu pepiro dopa mari pepiburire. ĩgu marire ðaro ĩgu orare masicũ iimi Espĩritu Santopu. <sup>13</sup> Eropirã Goãmu yare mure buherã, masa ya masiri mera gua gamero buhebea gua. Espĩritu Santo ĩgu gamero dopa ĩgu guare wereniguidoreripure mure buhea. Eropa buherã Espĩritu Santo gamero dopa Goãmu yare ðaro buhea gua ĩgu yarãre.

<sup>14</sup> Espĩritu Santore opabirãpu irire Espĩritu Santo yare erãre buhecũ, “Pee masibirã wereniguii ãhraa,” arĩma erã. Eropirã gamebeama. Espĩritu Santo ĩgu itamuro mariro ĩgu yare masima masiya mara masare. Eropirã erã ĩgu yare ne masibeama. <sup>15</sup> Espĩritu Santore oparãpu Goãmu yare ðaro masima. Gajirãpu erãre “Pee masibirã ãhrima,” arĩmasibeama Espĩritu Santore oparãre. <sup>16</sup> Òpa arãa Goãmu yare erã gojarapũgue: “Ne yujugu ĩgu gamero mera mari Opu ĩgu guñarire masigu ne marimi. Eropirã ĩgure masa ne buhemasibeama,” arãa ĩgu yare erã gojarapũgue. Maripu Cristo yarã árĩrã, Cristo iro dopa masia.

### 3

*Jesu yarã yujuro mera Goãmu mohme corerã ãhrima, arĩ gojañumi Pablo*

<sup>1-2</sup> Yu acawererã, mure buhegu Espĩritu Santore ðaro yuhirãre yu buhediro dopa buhemasibiribu mupure. Mua pepiri Espĩritu Santo opabirã pepiro dopa árĩbu. Cristo yarã mua árĩquererã ta ĩgure ðaro yuhirã árĩbirã majirãgã erã pee masibiro dopa ta Goãmu yare ðaro pee masibiribu mupu dohpa. Eropa mua pee masibiricũ ĩagu Goãmu yare ðarire buhenemomasibiribu mure. Eropigu majirãgãre apĩco dihtare mari oro dopa ta diasabiriri buheri dihtare buhebu daja mure. Dohpague sãre muraro ta masinibea dohpa mua. <sup>3</sup> Òpa iirã iiaa mua Espĩritu Santore yuhirã. Mupu mua mera majarãre ãdiabirã, erã gajinore opacũ ĩhaturirã, mua basi yujurãyeri cururi Yu acawererã, mure buhegu Educa warirã iiaa. Eropirã Espĩritu Santore opabirã Cristore gamebirã iro dopa iirã iiaa mua. Eropirã Goãmu yare ðaro peebea mua. <sup>4</sup> Òpa ãhrayoro mua. “Pablo ya curu majarã ãhraa

gua,” arāyoro mua yujurāyeri. Eropirā gajirā mua mera majarāpu “Apolo ya curu majarā āhraa gua tamera,” arāyoro mua. Eropa arī dūyatorā Espiritu Santore opabirā iro dopa arī wereniguia mua.

<sup>5</sup> ¿Yūhū Pablo, Apolo mera duhpimorā āhriri gua mua pepicū? Árībeaa. Goāmure mohme corerā āhraa gua. Guare īgu iidorero dopa iimorā āhraa. Eropirā gua muare buhecū peerā Jesucristore umupeonugabū mua. <sup>6</sup> Ōari buherire buherā pohegue mohme corerā iro dopa āhrima mari werenigui queori mera buhecū. Pohegue īgu otemūhtadiro dopa ta yūhū muare Goāmū yare buhemūhtabū. Eropigu gajigu īgu pohere īhadiburo dopa ta Apolopū yū pūhrū muare buhenurūsiami. Gua eropa buhequerecū ta pohe maja yucure iri buḡacū īgu iidiro dopa ta Goāmūpū muare īgu yare masinemocū iimi. <sup>7</sup> Eropigu yū buhemūhtadi árīqueregu ta bu árīgu āhraa. Eropigu Apolo yū pūhrū buhenemodi sā bu árīgu ta āhrimi. Goāmū tamera ḡagu āhrimi. Īgūpū muare īgu yarā árīcū īgure masinemocū iimi. Eropirā Goāmūpūre umupeoro gahmea muare. <sup>8</sup> Otemūhtagu pūhrū pohere īhadibugū yujuro mera mohme corerā āhrima erā. Eropirā erā nūcū erā mohmediropē ta wajatama erā. Eropa ta āhraa gua Apolo mera. <sup>9</sup> Eropirā gua Goāmū yare mohme corerā āhraa. Eropa gua mohme corerā Apolo yū mera majagu āhrimi. Mūapū Goāmū ya pohe iro dopa ta āhraa. Mua eropa árīcū Goāmū ya pohe iri maja yucure īgu buḡanemocū iidiro dopa ta muare īgu yare masinemocū iimi īgu.

Eropigu Goāmū muare īgu yarāre ḡarā árīcū iigu iimi. Eropirā mua Goāmū mohmeri wihi iro dopa āhraa mua gaji werenigui queori mera werediācū. <sup>10</sup> Yūre Goāmū īgu itamuro mera yūpū wihi iimehregū borari īgu nugumūhtaro dopa ta Jesucristo yare muare buhemūhtabū. Eropigu iri weca gajigu īgu peoturā mūriaro dopa ta gajigu yū pūhrū buhenemogu iimi. Eropa buhenemogu ḡaro guhyadiaro mera Goāmū yare buhero gahmea īgure. Queoro buhero gahmea. <sup>11</sup> Wihire iirā borarire nugumūhtabiricū wihi iima masiya mara. Eropa ta Cristore buhebiricū īgu yarā wacū iima masiya mara. Cristo mari ya dipuwajare sīribasarare muare buhetuhajabū. Eropirā mua Jesucristore umupeorā Goāmū yarā watuhajabū. Mua eropa árīrāguere gaji buherire buhema masiya mara mua Goāmū yarā wamorāre. <sup>12-15</sup> Goāmū yarāre buhenemorā āhrima. Erā watope gajirā queoro buhema. Gajirā queoro buhebeama. Queoro buheri oro, plata, waja pagari utāyeri iro dopa āhraa. Queoro árībiriri buheripū yucū, taa, űnaira pūri iro dopa āhraa. I űmū pehrerinūri árīcū Jesucristo dujarigu mari buhera queoro árīcū ihmugūcumi. Mari buherare soeñagu iro dopa ta queoro árīcū ihmugūcumi. Eropiro oro, plata, waja pagari utāyeri soecū űjūbiro dopa ta mari buhera queoro ta árīro dujaroca īgu ĩacū. Eropa mari queoro buhenirā mari árīcū ḡaro mari buhera waja wajayegūcumi. Eropa ta yucū, taa, űnaira pūri soecū űjūpehrero dopa ta mari buhera queoro árībiro pehreroca īgu ĩacū. Eropigu queoro buhebirinirā mari árīcū ĩagu marire wajayesome. Erā eropa árīrā erā wajatabiriquerecū Goāmū erāpūre taugūcumi. Eropirā eropa queoro ḡaro buhebirinirā merogā mera tarirācoma. Eropirā wihi űjūrisubū tariro dopa tarirācoma.

<sup>16</sup> Mua Jesu yarā mera Espiritu Santopū mua mera āhrimi. Eropirā mua Goāmū ya wihi iro dopa āhraa. ¿Irire masibeari mua? <sup>17</sup> Eropirā



mua Goãmu ya wihi árîro dopa árîrã ïgu yarã gohra âhraa. Eropigu ïgu yarãre yujugu ïgu goroweocã Goãmu peamegue dedeogucumi ïgãpãre.

<sup>18</sup> Irîre ôaro masique mua. Mua basi pee wisibiricãque. I umu maja buherire opagu “Masitarinugagu âhraa,” arî pepibocumi. Eropa arî pepigu mua mera majagu árîgu, “Yuhu Goãmu masiri mariro pee masibigu âhraa,” arî pepiporo ïgu. ïgu eropa arî pepigu diaye ta ôaro masigu wagucumi. <sup>19</sup> I umu maja masa erã gamero erã basi masiri “Bu gohra ta âhraa,” arî pepimi Goãmu. Eropa ta werenemoa Goãmu yare erã gojarapũ. Ôpa arî gojara âhraa: “Erã gamero masirã erã pepiri mera ‘Ôpa iirãra,’ erã arîrare gajiropa wacũ Goãmu iimi,” arãa Goãmu yare erã gojarapũ. <sup>20</sup> Eropi gajipũgue ôpa arãa daja: “Masa erã gamero ‘Masipehorã âhraa,’ erã arî pepiri duhpiburi árîbiricã masimi mari Opũ Goãmupũ,” arãa Goãmu yare erã gojarapũgue. <sup>21-22</sup> Eropirã “Pablo ya curu majarã âhraa gũ,” arîrã, “Apolo ya curu majarã âhraa gũ,” arîrã, “Pedro ya curu majarã âhraa gũ,” arîrã arîbiricãque mua pare. Gũ arîpehrerã mua ya árîburire iirã dihta âhraa. Goãmu arîpehreri mua ya árîburire otuhjadigu árîmi. ïgu ïhacũnugurare mua ya árîburire odigu árîmi muare. Muare ojocaricã iimi mua ya árîburire. Eropigu sîricũ sãre iigucumi mua ya árîburire. Dohpague mua árîrîre, pũhrugue mua árîburi sãre ogucumi. Eropirã arîpehreri mera âhraa. <sup>23</sup> Eropirã muapũ Cristo yarã âhraa ïgu ya árîburire iimorã. Eropigu Cristopũ Goãmu yagu âhrimi ïgu ya árîburire iibu. Eropirã “Gũa tamera Pablo ya curu majarã âhraa,” arîbiricãque mua pare.

## 4

*Cristo ïgu yare ïgu buhedoregu ïgu apinirã erã mohmerire werepũ Pablo*

<sup>1</sup> Ôpa arî pepique mua yure, Apolo sãre: Eropa ta erã Cristore mohme corerã âhrima. Eropirã “Masa erã masibirirare Goãmu yare buhedore ïgu apinirã âhrima,” arî pepique mua. <sup>2</sup> Yujugu ïgu ya árîburire iidore apinirãre ïgu gamero dopa ta ii corero gahmea erãre. Yũ sãre eropa ta ii corero gahmea Cristo ïgu gamerire. <sup>3</sup> Mua yure werewuquerecũ eropa pepicãa yuhu. Gajirã masa erã yure werewuacũ sãre eropa pepicãa yuhu. Yũ iirire ïarã “I ôari âhraa. I ñeri âhraa,” arî beyemasibea mua yure. Yũ basi árîqueregu yũ iirire ôaro beyemasipehobea yũ sã. <sup>4</sup> Ôpa arî pepia yuhu. “Mari Opũ yure ïgu apidiro dopa ïgu gamerire ipehorabũ yuhu,” arî pepia yuhu. Yũ ôpa arî pepiquerẽ ta yũ arî pepiri diaye árîbiriboca. Mari Opũ Cristo dihta yũ iiricũrîre ïagũ ôaro masimi yũ ïgu yare ôaro iicã. <sup>5</sup> Eropirã mari Opũ ïgu dujariboro core masare erã iirare arî werewuabiricãque. ïgu dujarigu masa erã iirare iribojegue gajirã erã masibirirare Cristo deyoro moagucumi. Eropirã mari iidiarare ïgu masicũ iigucumi gajirã masare. Irisubu ta mari nũcũre ïgu yare mari iidiro dopa ta “Irîre ôaro iiabũ,” arîgucumi Goãmu marire.

<sup>6</sup> Yũ acawererã, yuhu Apolo mera gũ arîricũrîre werebũ yuhu mua buhebu. Eropa werebũ Goãmu ïgu yare ïgu gojarapũ ïgu arîdirore mua tarinugabiriboro dopa. Eropa tarinugabirã árîrã mua

yujurāyerire umupeobiricāque. Mũa eropa iibirā árītarinugadiarā iiaa. <sup>7</sup> Mũa eropa iibiriboro dopa gua iirare werebu mũare. Mũa eropa tarinugadiaquererā mũapu gajirā tauro ðarā árībeaa mũa. Goāmu mũare ĩgu ora dihtare opaa mũa. Eropirā ĩgu mũare masicū iira dihtare masia mũa. ¿Mũa gamero oparā, mũa bocañuro masirā árībiriquererā ta, duhpirā “Masipehorā āhraa,” arīri mũa? Eropa arīrā “Goāmu guare obirimi. Eropigu guare masicū iibirimi,” arīdiarā dopa ta iiaa mũa.

<sup>8</sup> Mũapu “Árīpeherrerire opaa gua. Guare ñehe duhyabeaa,” arīraa mũa. Eropirā gua mũa pohro árībiricū ða arī pepiraa: “Oparā iro dopa masirā āhraa gua,” arī pepiraa mũa. Diaye ta oparā iro dopa mũa masipehorā árīcū mũare ðatariaboya. Mũa eropa árīcū mũa mera gua sã oparā iro dopa masipehorā árīboya. “Masirā āhraa gua,” arī pepirā, ¿ðaro arī pepiri mũa? Òaro pepibea yu ĩacū. <sup>9</sup> Òpa arī pepia yu tamera: Goāmu guare Jesu ĩgu yare buhedore apinirā doca maja curu apimi guare. I yeba majarā masa, anyua sã gua ñero taricū guare ĩamurima eropa wacū. <sup>10</sup> Cristo yare gua buhecū ĩarā, “Pee masibirā āhrima,” arīma masa guare. ¿Mũapu Cristo yare ðaro pee masirā āhriri mũa? “Turabirā, bu árīrā āhrima,” arīma masa guare. ¿Mũapu ðaro turarā āhriri mũa? Mũa basire umupeoa. Guapure masa ne umupeobea. <sup>11</sup> Guapu dohpaguere ñero tarirā, oaboarā, ñemesiburā, ñeri suhricurā, wiri moorā āhraa. Eropirā guare gajirā umupeobirā, guare pabiramurima. <sup>12</sup> Eropirā gua buheniguiquererā teboricurā árīrā gua árīburi majare gua baburi sãre mohmea. Eropirā gajirā guare erā ñero wereniguiquerecū ta guapu Goāmure ðaro erā árīburire serēbasaa. Eropa iirā gajirā guare ñero iimorā erā nuruquerecū ta eropa pepicāa gua. <sup>13</sup> Eropirā “Ñero iirā āhrima,” guare erā werewuquerecū ta guapu erāre ðaro wereniguia erā ðaro árīburire. Eropirā erā burigā dohoma guare. Iribojegue eropa iinugama. Dohpague sãre muraro ta iima guare.

<sup>14-15</sup> Mũare ðari buherire buhemuhtabu. Eropa buhecū mũa peecū Jesucristo mũare ĩgu yarā wacū iidi árīmi. Eropa mũare buhedigu mũa pagu iro dopa ta wahabu yuhu. Bajarā mũare Cristo yare buherā erā árīquerecū ta mũare buhemuhtagu yuhu yujugu ta āhraa. Eropigu yuhu yujugu ta mũa pagu iro dopa āhraa. Eropigu mũare guhyasīricū iibu ire gojagu iibea. Yu porā yu mahirāre mũare werebu ire gojaa yuhu. <sup>16</sup> Eropigu ire turaro mũare werebu iiaa yuhu. Yure ĩnacūque mũa sã.

<sup>17</sup> Mũa eropa iicū gamegu mũa pohro Timoteore obeogu iiaa. ĩgu yu magu iro dopa yu mahigu mari Opu Jesucristo yagu āhrimi. Eropigu Cristo gamero dopa iiniguigu āhrimi ĩgu. Timoteo mũa pohro ejagu Jesucristo yare yu iidiro dopa mũare guñacū ĩgucumi mũa sã eropa iiboro dopa. Jesu yarā pohrogu noho wagu Jesucristo yare erā iiburire buheniguiicā. <sup>18</sup> Yujurāyeri mũa mera majarā oparā árīdiarā ða arāñorā: “Pablo mari pohroguere arísome,” arī pepirañorā erā. <sup>19</sup> Goāmu gamecū mũa pohrogu dohparagā ta ejaguca. Eropa ejagu erā oparā árīdiarā mũa mera majarā erā eropa arīrāre ĩagura. Eropigu erā Goāmu turari opacū ĩagura yuhu. <sup>20</sup> Goāmu mari Opu āhrimi. Mari arī weretarinugaquerecū ta ĩgu yare mari iibiricū mari

werenigui ri duhpiburi árĩbeaa. Īgu turari mera Īgu gamero dopa iicũ gahmemi. <sup>21</sup> ¿Mũa pohrogue mũa ya dipuwaja dipuwaja moagu yũ wacũ gahmeri mũa yũre? ¿O mũa ðaro iira waja mucubiriri mera waro gahmeri mũa yũre?

## 5

### *Corinto majarã erã ñeri iirare werepũ Pablo*

<sup>1</sup> Gajirã ðpa arĩ querecũma guare: Yujugu mũa mera majagu Īgu buamore ta marapocu waĩcũmi. Eropa ta arĩ werema masa guare. Erã eroparĩcũ peemaria wahu. Gajirãpũ Goãmure masibirã arĩquererã erãpũ eropa iirã árĩbeama. <sup>2</sup> Mũa mera majagu Īgu eropa iiquererã ta muapũ “Ōatarĩarã ãhraa gua,” arĩ pepiraa. ¿Duhpirã Īgu eropa ñeri iirare masiquererã ta guhyasĩrisãbeari mũa Īgure? Eropa ñero iigure mũa Jesu yarã mera majagure cóãcãque mũa. <sup>3-4</sup> Yũhũ mũa mera árĩbiriqueregu ta yũ guñari mera mũa mera árĩgu iro dopa ãhraa yũhũ. Eropigu mũa mera árĩgu yũ árĩbodiropo ta ñero iigure Īgu eropa ñero iira dipuwaja, dipuwaja moadoretuhaa yũhũ. Jesucristo Īgu dorero mera ta eropa iidorea. Eropa mũa Jesu yarã gamenererã yũ guñabeori merague yũhũ mũa mera árĩcũ, mari Opũ Jesu Īgu turari mera <sup>5</sup> Īgure ñero iigure cóãque. Watĩ mera Īgu ñero tariborore apique. Eropa ta cóãque Īgure Īgu ñero tariri mera ñerire Īgu ñaribejarire Īgu gohrotoboro dopa. Mari Opũ Jesucristo Īgu dujaririnũ ñero iidigu mũa Jesu mera Īgu ðaro tariboro dopa dohpaguere Īgure eropa apinique, arãa yũhũ.

<sup>6</sup> “Ōaro ãhraa gua,” mũa arĩquererã ta ñero iirã iica mũa. Ñero iigu Īgu ñerire mũa eropa ãcãrã, árĩpehreri ñeri muare ii ihmucũ árĩpehrerã ñero iirãca. Eropiro árĩpehreri ñeri sehya wa mũa árĩrogue. Panre bugacũ iiri pohga ðaro seyanugajaro dopa ta iri ñeri ðaro seyaroca muaguere. ¿Irire masibeari mũa? <sup>7</sup> Yũ acawererã judio masa Pascua árĩcũ ovejare wejẽmurima erã ñeri iira dipuwajare Goãmure cãdijidorerã. Oveja sĩridiro dopa ta Cristo mari ñeri dipuwajare sĩribasadi arĩmi. Īgu eropa sĩribasarañe mera mũa ñerire cóãñirã ãhraa. Irire guñarã muapũ ñero iigure mũa mera majagure cóãque ñeri mũa watope mariboro dopa. <sup>8</sup> Iribojegue ñerire ãhacũ iinirã árĩribũ mari. Eropirã dohpaguere mari ñerire cóãñirã árĩrã mari ñerire ñaribejaro mariro, ñero iiro mariro árĩrã. Iribojegue mari ñerire iimuridiro dopa ta iibiricãrã. Eropirã diaye maja ðaro werenigui ri mera, ðaro iiricũri mera árĩrã pare.

<sup>9</sup> Muare yũ gojabeorapũre nome mera ñero iirã, ñerire iima-jiñajarã mera ne wapicũdorebiriribũ. <sup>10</sup> Eropa arĩgu “Jesu yarã árĩbirã mera árĩbiricãque,” arĩbiribũ. Eropigu “Nome mera ñero iirã mera, gajinore turaro gamenemocãrã mera, yajaricũrã mera, goãmarã wéanirãre umupeorã mera árĩbita,” arĩbeaa. I yebare eropa árĩrã mariro Jesure gamebirã mariro mari dihta arĩmasibeeaa. Árĩpehrerogue ãhrima erãpũ ta. <sup>11</sup> Eropigu muare gojabeogu ðpa arĩ doreribũ: “Mũa mera majarã Jesu yarãpũ erãpũ ñerire iicũ ĩha erãpũre wapicũbiricãque,” arĩ goja doreribũ. Eropirã mũa mera majagu “Jesu yagu ãhraa,” Īgu arĩgu árĩqueregu ta nome mera ñero iigu, gajinore turaro gamenemogu, goãmarã wéanirãre umupeogu,

ñero quere moa coregũ, merericũgũ, yajaricũgũ ïgũ árĩcũ ïgũpũre wapicũbircãque. Eropirã eropa iigũ mera ne babircãque. <sup>12-13</sup> Jesu yarã árĩbirãpũre Goãmũpũ dipuwaja moagũcumi. Eropigũ Jesu yarã árĩbirãre erã ñero iiri dipuwaja moadoregũ árĩbeaa yũhũ. Eropa iibircãro gahmea yũre. Eropa arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mũa Jesu yarãpũ mũa mera gamenererã mũa basi mũa iirare ïha masiro gahmea mũare. Eropirã yujugũ mũa mera majagũ ïgũ ñero iicũ ïarã ïgũre dipuwaja moadorero gahmea mũare. Eropirã Goãmũ yare gojarapũgue arĩdiro dopa mũaapũ mũa mera majagũre ñero iigũre dipuwaja moaro dopa iirã ïgũre cóãque.

## 6

### *Jesu yarãre weresãrare werepũ Pablo*

<sup>1</sup> ¿Mũa basi game dũyatorire duhpĩrã Jesu yarã árĩbirã pohrogue amudorerã wahari mũa? Jesu yarãre mũa mera majarãre weresãdiarã gajirã Jesu yarãre irire werero gahmea mũare. Eropirã Jesu yarãpũ amubasaporo. <sup>2</sup> Pehrerinũ árĩcũ mari Jesu yarãpũ mari árĩpehrerã masa erã iirare beyerãca. ¿Irire masibeari mũa? Eropirã pehrerinũ árĩcũ masa árĩpehrerãre beyemorã árĩrã, dohpague sãre amumasia mari. Eropirã dohpague gajiropa wacũ sãre amumasia mari. <sup>3</sup> Anyua erã iira sãre beyerãca mari. ¿Irire masibeari mũa? Mari eropa anyuare beyemorã árĩrã diaye ta dohpague sãre Jesu yarã erã iirare ïarã beyemasica mari. <sup>4</sup> ¿Eropirã duhpĩrã mũa mera majarãre weresãdiarã Jesure gamebirã, “Bu árĩrã” mũa arĩrã pohrogue amudorerã wahari mũa? <sup>5</sup> Ire arĩgũ iiaa mũa guhyasiuro mũa tariborore. Mũa dũyatorire werebu ôaro masigũ árĩcumi mũa watopere, yũ arãa. <sup>6</sup> ïgũ eropa árĩquerecũ ta mũa mera majagũ Jesu yagũ gajigũ ïgũ acaweregure weresãdiagũ Jesu yarã árĩbirãre beyedoregũ wahami.

<sup>7</sup> Masare beyegũ pohrogue mũa acawererãre weresãrã Goãmũ gameripũre tarinũgarã iiaa mũa. Gajigũ mũa mera majagũ mũare ñero ïgũ iicũ eropa ïacãboaya mũa. Jesu yarã árĩbirãre mũa weresãbiriborore mũa acaweregure mũare ïgũ ñero iirare mũa eropa ïacãcũ ôatariaboaya. Jesu yagũ mũare ïgũ yajacũ ïgũre mũa weresãboro core ïgũ mũare yajarare mũa eropa ïacãcũ ôaboaya. <sup>8</sup> Mũa eropiibeaa. Gajirãre ñero iirã ãhraa mũa sã. Yajarã ta ãhraa mũa sã. Jesu yarã mũa acawererã erã arĩquerecũ ta erãre ñero iirã, yajarã iiaa mũa.

<sup>9</sup> Eropa iirã Goãmũ ïgũ opũ árĩroguere wamasibeamã. ¿Irire masibeari mũa? Pee wisibircãque mũa. Ôpa iirã Goãmũ pohroguere wasome: Gajirã nome mera ñero iirã, goãmãrã wãnirãre umupeorã, gajigũ marapore marapocũrã, gajigũ marapũ mera ñero iirã nome, uma seyaro erã dũpũri mera ñero iirã, nome sã eropa ta iirã, <sup>10</sup> yajarã, gajinore turaro gamenemorã, merericũrã, gajirã masare ñero quere moa corerã, gũyari mera yajarã ne Goãmũ ïgũ opũ árĩroguere wamasibeamã. <sup>11</sup> Iribojeguere mũa yujurãyeri eropa iirã árĩyoro. Eropa iinirã mũa arĩquerecũ ta dohpague mũa ñero iirare cóãtuhami Jesucristopũ. Eropa ïgũ taunirã mũa árĩcũ ïgũ yarã árĩmorã iimi Goãmũ mũare. Eropa iigũ “Ôarã ãhrima,” arĩ ïhami ïgũ

mũare. Eropa ta iimi mũare mari Opũ Jesucristo mera, Espĩritu Santo mera.

*Mari dũpũ ðarire iiburi dũpũ árĩro iiaa, arĩ gojañumi Pablo*

<sup>12</sup> “Goãmũ iidorebirira árĩpehreri iimasiri āhraa yũre,’ arĩmi Pablo,” arāa mũa yũre. Yũ iimasipehoqueregũ ta, yũ iiri yũre gajirā sāre itamubiricũ ĩha irire iibeaa. Eropa ta árĩpehreri iimasiri āhraa yũre. Eropa iimasiqueregũ ta yujuyerisuburi irire eropa iipogũ duhumasibiriboca, arĩgũ irire iisome yũhũ. <sup>13</sup> Mari bari mari paru maja árĩburi ta āhraa. Eropiro “Mari paru bari dicuburidiru paru āhraa,” arāa mũa yujurāyeri. Mũa eropa arĩquerecũ ta pũhũ Goãmũpũ mari barire mari paru sāre iri pehrea wacũ iigũcumi. Eropirā mũa yujurāyeri “Mari dũpũpũ mari ƚaribejari iiburi dũpũ āhraa,” arĩraa mũa. Eropa árĩbeaa. Mari dũpũ ƚaribejari iiburi dũpũ árĩbeaa. Mari dũpũpũ mari Opũ ya árĩburire iiburi dũpũ āhraa. Eropigũ mari Opũpũ mari mera āhrimi mari ĩgũ yare ðaro iiboro dopa. <sup>14</sup> Eropigũ Goãmũ ĩgũ turari mera mari Opũ Cristo dũpũ mũararore masupũ. Eropa ĩgũre masudiro dopa ta mari dũpũ sāre masugũcumi ĩgũ.

<sup>15</sup> ¿Mũa ya dũpũ Cristo ya dũpũ árĩri iro dopa árĩcũ masibeari mũa? ¿Cristo ya dũpũ árĩri iro dopa árĩrā nomeo ñero iiricũgo mera mari árĩcũ ðhari mũa pepicũ? Õabirigohracāca. <sup>16</sup> Ñego mera yujugũ igo mera árĩcũ ĩgũ dũpũpũ igo ya dũpũ mera árĩro yuju dũpũ iro dopa ta āhraa. ¿Irire masibeari mũa? Eropa arĩ gojara āhraa Goãmũ yare erā gojarapũgue. Õpa arāa: “Nomeo mũa mera árĩrā perā arĩquereerā yuju dũpũ iro dopa wahama,” arĩ gojamũriñumi. <sup>17</sup> Mari Opũ ĩgũ yarā mera āhrimi. Eropigũ yujugũ ĩgũ mari Opũ mera perā arĩquereerā yujugũ iro dopa āhrima erā guñari mera.

<sup>18</sup> Eropirā nome mera ñero iirire, ƚma mera ñero iirire ƚaribejabiricāque. Irire mũa ƚaribejabiriboro dopa ta irire duhrigā waque. Gaji ñerire mari iira mari dũpũrere mari goroweobea. Nomeo mera ñero iigũpũ ĩgũ dũpũre ñetariaro goroweomi. <sup>19</sup> Espĩritu Santore marire ohomi Goãmũ. Eropigũ mari dũpũ mera wihicũmi Espĩritu Santo. ¿Irire masibeari mũa? Eropirā mũa dũpũ mũa ya dũpũ gohra árĩbeaa. Goãmũ ya dũpũ āhraa. <sup>20</sup> Mũa ĩgũ yarā árĩmorāre mũa ñeri dipuwajare wajayedigũ arĩmi Cristo. Eropirā ĩgũ yarā árĩrā mũa dũpũ mera Goãmũ ĩgũ gamero dopa ta iique. Eropa iirā Goãmũre umupeorā iiaa mũa. Eropirā gajirā sāre ĩgũre umupeocũ iirā iiaa.

## 7

*Mojoto diririre werepũ Pablo*

<sup>1</sup> Dohpaguere mũa yũre serēpi gojarare yũ sā mũare yũhrigũra. Masũ marapo maricũ sāre ðhaa yũ ĩacũ. <sup>2</sup> Iri eropa arĩquerecũ ta ero mũa árĩro baja ƚaribejari āhraa. Eropirā ƚma erā nũcũ nome marapocũporo gajirā nome mera erā ñero iibiriboro dopa. Eropirā nome sā erā nũcũ marapocũporo gajirā ƚma mera erā ñero iibiriboro dopa. <sup>3</sup> Eropigũ marapocũgũre ĩgũ marapore ðaro iiro gahmea. Igo marapũ sāre eropa ta iiro gahmea. <sup>4</sup> Marapocũgo igo dũpũ igo ya dihta árĩbeaa. Igo marapũ ya sā āhraa ĩgũ ĩhadiburo dopa. Igo marapũ sāre ĩgũ dũpũ ĩgũ ya dihta árĩbeaa. ĩgũ marapo ya sā āhraa igo

ĩhadiburo dopa ta. <sup>5</sup> Mũa perã árĩburire “ĩbircãrã,” arĩbita. Gajisuburo mũa perã Goãmũ mera mũa wereniguidiarã “I nũcũ nũri duhunicã dohpa, Goãmũ mera wereniguirã dohpa,” yujuro mera eropa arĩrã duhumasia mũa. Mũa eropa duhura puhũgã mũa dipaturi mũa eropa árĩniguidiro dopa ta árĩque daja watĩ ñero mũaare iidorebiriboro dopa. “Gajirã mera ñero iiboca,” arĩrã mũa basi duhubita. Mũa árĩmũhtadiro dopa ta árĩniguiçãque daja.

<sup>6</sup> Ire mũaare dohpague yũ arĩrare arĩgu mũaare dore gohrari mera dorebeaa. Eropã weregu iiaa mũa iiburire mũa masima ðaro. <sup>7</sup> “Uma marapocũporo,” arĩquerecũ, árĩpehrerã mũa yũ iro dopa ta marapo marirã mũa árĩcũ ðaboaya yũre. Mũa eropa árĩcũ gamequerecũ ta Goãmũ mari árĩpehrerãre yujuropa iimasiburire apibeami. Yujurãyerire marapocũmasiburire marapocũmasiburire apimi Goãmũ. Eropigu ĩgu gajirãpũre marapocũmasibiriburire marapocũmasibiriburire apimi.

<sup>8</sup> Eropigu marapo marirãre, marapũ marirãre, wapeweyarãre ðpa arãa: Marapo marirã, marapũ marirã mũa árĩmasirã, yũ arĩro dopa árĩcũ ðhaa. <sup>9</sup> Eropã árĩmasibirã turaro nomere gahmema. Irire turaro ƣaribejarã diaye ta marapocũcãporo. Nome sã marapocũporo. Mũa eropa ƣaribejarã mũa marapocũcũ ðapũricãa. Eropiro marapocũcũ sãre ðapũricãa.

<sup>10</sup> Mũa marapocũrãre, marapocũrã nomere ðpa dorea: Yaha doreri gohra árĩbeaa i. Mari Opũ Cristo ire doredi árĩmi. Mũa nomepũ mũa marapũ sumarãre cóãbircãque. <sup>11</sup> Mũa marapũ sumarãre cóãrã, marapũ marirã dujaque. Dipaturi mũa marapũ árĩdigũ mera ahmu ðaro árĩbircũ daja marapũ marirã dujaque. Eropirã mũa ƣma sã mũa marasã nomere cóãbircãque.

<sup>12</sup> Eropigu mũa sãre gajirã sãre ðpa arãa yũhũ. Mari Opũ ĩgu dorediro árĩbeaa i. Yũhũ ĩgu apidigũpũ ðpa arãa mũaare: Yujurãyeri mũa mera majarã Jesu yarãpũ Jesure umupeobirã nomere marapocũrã ãhraa. Eropigu ðpa arĩ werea mũaare: Mũa marasã nome mũa mera erã dujadiacũ erã nomere cóãbircãque mũaapũ. <sup>13</sup> Eropirã yujurãyeri mũa mera majarã nome Jesu yarã nome Jesure umupeobirã mera marapocũrã nome ãhraa. Mũa marapũ sumarã mũa mera erã dujadiacũ erãre cóãbircãque. <sup>14</sup> Mũa marapũ sumarã Jesure umupeobirã erã árĩquerecũ ta Jesu yarã nomere erã marapocũcũ, Goãmũ ðarã ƣma iro dopa ĩhami erãre. Eropirã mũa ƣmarapũ Jesu yarã mũa árĩcũ mũa marasã nome Jesure umupeobirã nome árĩbocoma. Erã eropa árĩquerecũ ta mũa mera erã nome marapocũcũ Goãmũ ðarã nome iro dopa ĩhami erãre. ĩgu eropa ĩabircũ mũa porã Jesure umupeobirã porã iro dopa árĩboñuma. Eropigu mũa porã sãre ðarã iro dopa ĩhami Goãmũ. <sup>15</sup> Eropirã mũa ƣmarapũre mũa marasã nome Jesure umupeobirã nome erãpũ mũaare cóãcũ ðaroca. Mũa nome sãre mũa marapũ sumarã Jesure umupeobirã erãpũ mũaare cóãcũ ðaroca. Mari ðaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeami Goãmũ. Eropirã mũa erã marasã nome erã marapũ sumarã árĩbeaa pare. <sup>16</sup> Mũa ƣma mũa marasã nome mũa mera dujaquerecũ erã peamegue wabiriborore Jesure umupeocũ iimasibiriboca. Mũa nome sã eropa ta Jesucristore

umupeocũ iimasibiriboca mũa marapũ sũmarãre. Eropirã erã mũare cóadiacũ ðaroca.

<sup>17</sup> Ōpa ta iiro gahmea mũare: Árĩpehrerã mũa mari Opũ Cristo mũare ĩgu áridorero dopa ta árĩque. Goãmũ mũare ĩgu apirare iique mũa. Irire árĩpehrero Jesu yarã gamenererãre eropa doreniguica yũhũ. <sup>18</sup> Jesu yarã mũa árĩboro core circuncisión iinirã gasiro mero wiri aĩnirã árĩrã eropa ta dujaque. Eropirã Jesu yarã mũa árĩboro core gasiro merogã wiri aĩbirinirã árĩrã mũa árĩro dopa ta dujaque. <sup>19</sup> Dohpaguere gasiro mero wiri aĩnirã mũa árĩcũ duhpiburi árĩbeaa. Irire iibirinirã mũa árĩcũ sãre gajiropa wasome. Goãmũ dorerire mari iicũpũre iri tamera ðhaa. <sup>20</sup> Eropirã Goãmũ Jesu yarã mũare ĩgu aĩcũ irisubu mũa árĩmũhtadiro dopa ta dujaque.

<sup>21</sup> Goãmũ mũare Jesu yarã aĩboro core gajirã pohro majarã mũa árĩcũ ðaroca. Eropa ta dujanique. Mũa Opũ ĩgu mũare wiudiacũ wirique mũa. Mũa wiricũ sãre ðaroca mũare. <sup>22</sup> Ōpa arĩ pepique mũa: “Yũhũ masũ pohro majagũ wiribiriqueregũ ta dohpaguere Jesu yagũ árĩgũ, ĩgu wiudigũ iro dopa ãhraa ĩgu yare iiboro dopa,” arĩ pepique. Eropa ta gajirã Goãmũ Jesu yarãre aĩcũ masa pohro majarã mũa árĩbiriquererã ðpa arĩ pepique: “Dohpaguere Jesu pohro majagũ ãhraa yũhũ,” arĩ pepique. <sup>23</sup> Mari ñeri dipuwajare mari ĩgu yarã árĩmorãre wajayetuhadi árĩmi Cristo. Eropirã ĩgu dorero dopa iique. Mũa iiburire masa dorebircãporo. <sup>24</sup> Eropirã yũ acawererã, Jesu yarã árĩmorã Goãmũ mũare ĩgu aĩcũ irisubu mũa árĩmũhtadiro dopa ta dujaque. Eropa dujarã Goãmũ mera ðaro árĩque.

<sup>25</sup> Dohpaguere marapo marirãre, marapũ marirã sãre werediaa mũare. Yũ wereburi mari Opũ weredorediro gohra árĩbeaa. Eropa árĩbiriquerecũ yũhũ ĩgumojomoro ĩadigũ, ĩgu itamudigũ árĩcũ mũa yũ wererire ðaro mera peerãca. Ōpa werea mũare. <sup>26</sup> Dohpaguere mari ñero tarirã iica. Eropirã mũa árĩro dopa mũa dujacũ ðhaa yũre. <sup>27</sup> Eropirã mũarapũ marapocũrã, marapũcũrã sã eropa ta dujaque. Erãre cóabiricãque. Marapo marirã, marapũ marirã sã mũa árĩrã eropa ta dujaque. Marapore o marapũre amabita. <sup>28</sup> Eropa yũhũ mũare arĩquerecũ “Marapocũgũra,” arĩcũ gajiropa árĩbeaa umare. Eropirã mũa nome sãre marapũcũdiacũ ðaroca. Ōpa ãhraa. Irisubu ñero taririsubu marapocũrã, marapũcũrã mũare teboricũburi dujaroca. Eropigũ mũare eropa teboricũri arĩgũ, marapo marirã, marapũ marirã dujaque, arãa yũhũ.

<sup>29</sup> Yũ acawererã, eropa arĩgũ ðpa arĩdiagũ iiaa. Mari ñero tariboro merogã duhyaa. Eropirã dohpaguere marapo marirã Goãmũ yare erã ðaro mohmemasiro dopa ta, ðaro mohmero gahmea marapocũrã sãre. Eropirã marapũcũrã nome sãre eropa ta Goãmũ yare ðaro mohmero gahmea. <sup>30</sup> Eropirã mari ñehamere orequererã Goãmũ yare mohmeboropũre guñaro gahmea. Bosenu árĩrã mucubiriquererã Goãmũ yare mohmeboropũre guñaro gahmea. Mari asũrãre opaquererã irire guñabiricãro gahmea. Goãmũ yare mohmero gahmea. <sup>31</sup> I yeba dohpague árĩro dopa pehrero iiaa. Eropirã i yeba majare iiburire wũaro guñabiricãro gahmea.

<sup>32</sup> Mũa gajinore wũaro mũa guñaricũcũ gamebeaa yũhũ. Marapo marigũ Jesu yagũ árĩgũ mari Opũ Jesu yare ĩgu gamerire guñaniguimi. <sup>33</sup> Marapocũgũpũ Jesu yagũ i yeba maja sãre ĩgu marapo gamerire

guñami. <sup>34</sup> Eropigu peñe guñami. Marapũ marigo mari Opũ Jesu yare iiburire guñaniguimo. Eropa guñago igo igo dũpũ, igo pepiri mera ta mari Opũ yago ðaro árĩdiamo. Marapũcũgorũ i yeba majare igo marapũ gameripũre burigã iidiamo.

<sup>35</sup> Ire mũare arĩgu iiaa mũare itamubu. Teboricũri dorerire mũare cãhmotadiabeaa. Eropa cãhmotadiabiriqueregu ta ðaro mua iicũ gahmea. Eropigu baja guñaricũro mariro Jesu mari Opũ ĩgu gameri dihtare mua turaro iidiacũ gahmea yũhũ.

<sup>36</sup> Mua mera majagu ĩgu mago igo buro wacũ ĩagu marapũcũdoreporo ĩgu igore. “Igre ðaro iibea. Marapũcũro gahmea igore,” arĩ pepigu ĩgu arĩdiro dopa ta nomesoporo. Eropigo igo marapũcũmasimo. Eropa igore marapũcũdoregu ñero iibeami. <sup>37</sup> Gajigupũ ĩgu magore “Marapũcũbiricãporo,” arĩbocumi. Yujugu amũre wereyudiro mariro, yujuñe ta pepigu arĩgu, “Igo marapũcũbiricãporo,” arĩgu ðaro iimi. <sup>38</sup> Eropigo ĩgu mago marapũcũdoredigo ðaro wagocumo. ĩgu mago marapũcũdorebiridigopũ gajigo tauro ðaro wagocumo dohpaguere ñero taririsubu árĩcũ.

<sup>39</sup> Marapũcũgore igo marapũ mera árĩniguicãdoremi Goãmũ. Igo marapũ sĩrira pũhrũ igo gajigu mera igo gamegu mera marapũcũmasimo daja. Jesure umupeogũre marapũcũro gahmea igore. <sup>40</sup> Igo marapũ marigo dujago tauro ðaro mucubirigo arĩgocumo igo. Eropa ta arĩ pepia yũpũ. Eropa arĩgu Espĩritu Santo ĩgu gamero dopa ta arĩgu iiaa.

## 8

*Goãmarã wéanirãre erã umupeomorã waimurã wejẽ erã apira barire Jesu yarã asũ baburire werepũ Pablo*

<sup>1-4</sup> “Gua tamera ðaro masia,” arĩ pepiraa mua. Eropa arĩ pepirã mua masiri mera gajirãre masitarinũgadiarã iiaa mua. Eropa iirã gajirãre itamubeaa mua. Gajirãre umupeori mera mahirãpũ erãre itamua erã Jesucristore umupeonemoboro dopa. “Masipehocãa yũhũ,” arĩbiricãro gahmea marire. Eropa arĩrã ðaro masibea mari. Eropirã “Oaro masinibirica dohpa,” arĩ pepiro gahmea marire. Mari Goãmũre mahirãpũre marire masicũ iimi.

Eropigu goãmarã wéanirãre umupeorã erã pohro apira barire “¿Mari bamasicuri?” arĩ weregũra mũare: Goãmarã wéanirã ne duhpimorã árĩbeama. Diaye ta erã wéanirãre ne sĩporãri mara. Eropigu Goãmũ yujugu ta àhrimi. Gajirã goãmarã marima. Ire mari masia. <sup>5</sup> Gajirã masa õpa arĩma. “Mari goãmarã bajarã àhrima. Erã mari oparã àhrima,” arĩ pepirima. “Umũsiguere, i yeba sãre goãmarã àhrima,” erã arĩquerecũ ta maripũre yujugu ta Goãmũ gohra àhrimi. <sup>6</sup> ĩgu mari Pagũ arĩpehrerãre, arĩpehrerire arĩdoredigu àhrimi. Eropirã ĩgu ya arĩburire iimorã àhraa mari. Eropigu mari Opũ Jesucristo yujugu ta àhrimi. ĩgu arĩpehrerire mari Pagũre ĩhacũnugubasadigu àhrimi. ĩgu yarã arĩmorãre iipũ ĩgu marire. Eropirã ĩgu mera eropa arĩniguirãca mari.

<sup>7</sup> Yũ arĩdiro dopa ta eropa arĩquerecũ gajirã Jesu yarã irire masibeama. Iribojegue erã goãmarã wéanirãre umupeorã “Oã goãmarã



ojocarirã ährima,” arĩ pepimuriñorã. Irisubuguere eropa arĩponirã árirã dohpague sãre erã wéanirãre erã apira barire barã “Goãmarãre umupeorã iiaa,” arĩ pepirima. Eropirã iri barire barã, “Mari ñero iirã iiaa,” arĩ pepirima ðaro masibirã. Eropirã “Ñerire iirã iiaa,” arĩ pepiquererã erã irire iicũ erã pepiri gajiropa waca. <sup>8</sup> Eropigu òpa arĩ werea muare: Iri barire mari bacũ mari babiricũ sãre Goãmũ mera ðaro áricũ iibeaa marire. Irire mari babirã ñero iibeaa. Mari irire barã sã gajirã tauro ðarã áribeaa mari, arĩ werea yũhũ. <sup>9-10</sup> Eropa muare werequerecũ ðaro iique mũa. Iri barire barã mũa áricũ gajirã Jesu yarã muare ïabocoma. Muare ïarãpũ ðaro masinibirã “Iri barire barã Goãmũre umupeobeama,” arĩ pepirã árirãcoma. Eropa arĩ pepiquererã muare ïhacũ erã sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mũa. Eropirã ðaro iique. <sup>11</sup> Muapũ masirã árirã, “Gua iri barire gua bacũ ðaroca,” mũa arĩ pepirã árirã gajirã ðaro masibirinirãre ñero iicũ iiboca mũa muare erã ïhacũcũ. Erã ya áriburi sãre síridi árimi Cristo. Eropirã mũa bari mera mũa Cristo yarãre mũa acawererãre ñero iicũ iirã erãre goroweoboca mũa. <sup>12</sup> Òaro masibirãre mũa acawererãre erã arĩ pepiro dopa iibiricũ erã pepiri gajiropa wacũ iiboca mũa. Eropa iirã Cristo sãre ñero iirã iiaa mũa. <sup>13</sup> Eropigu wéanirãre erã ora barire yũ bagũ yũ acaweregũre ñero iicũ iiboca yũhũ. Jesu yarã erã ñero iicũ gamebeaa. Eropigu yũhũ “¿Erãre ñero iicũ iiri?” arĩgũ, iri barire ne dipaturi basome yũhũ.

## 9

### *Pablo Jesu ïgũ apidigu ïgũ árirare werepũ*

<sup>1</sup> Jesu ïgũ yare buhedore ïgũ apidigu ähraa. Eropigu gajirã ïgũ apinirã erã iiro dopa ta iimasia yũ sã. Jesu ïgũ apidigu ta ähraa yũ sã. Mari Opũ Jesure ïadigu ta ähraa yũ sã. Eropirã Jesu yare yũ buhecũ muapũ irire ðaro peenirã árirã ïgũ yarã wahabũ mũa. Mũa eropa ïgũ yarã wara pũhrũ Jesu ïgũ apidigu yũ árirare masituhabũ mũa. <sup>2</sup> Gajirã yũre werewuarã “Ïgũ Jesu ïgũ apidigu áribeami,” arĩbocoma. Erã eropa arĩquerecũ ta muapũ eropa arĩmasibeaa. Muare yũ buhera pũhrũ Jesu yarã warã, “Jesu ïgũ apidigu ährimi,” arĩ yũre masituhaa mũa. Eropirã gajirã erã werewuaquerecũ ta muapũ ïgũ apidigu yũ árirãcũrĩre mũa masia.

<sup>3</sup> Yũre werewuarãre òpa ta arĩ yũhrigura. <sup>4</sup> Muare yũ buheri waja yũ baburire, yũ ihriburire yũre oro gahmea muare. <sup>5</sup> ¿Eropigu marapocũgũ árigũ yũ marapo Jesu yago igo áricũ igo mera aĩ curimasibiribocuri yũhũ mũa pepicũ? Gajirã Jesu ïgũ apinirã, Jesu pagũ porã, Pedro sã erã marasã nome mera erã curiro dopa ta yũ sã curimasiboaya. Yũ eropa curicũ yũ marapocũgũ áricũ, igo sãre barire oboaya mũa. <sup>6</sup> Yũhũ Bernabé mera muare ðari buherire gua buhequerecũ ta gũare ne gajinore obeaa mũa. Eropirã gua basi ta gua baburire mohme wajatabũ gua. Gajirã Jesu apinirãpũre erã buheri waja oayoro mũa. ¿Gua dihta eropa buherã, waja mariro buhero gahmeri mũa pepicũ? <sup>7</sup> Yujugũ surara ïgũ mohmecũ ïgũ oparã ïgũ áriburire wajayemũrima. Yũ basi wajayebeami. Barire otegũ sã ïgũ otera dũcacũcũ irire ta tea aĩ bamasimi. Eropigu ovejare ïhadibugũ ïgũ ejorã apĩcore aĩmasimi ihribu ïgũ sã. <sup>8</sup> Eropa arĩgũ masa erã

doreri dihtare m̄uare werebeaa. Goãm̄u ĩgu dorerigue ĩgu arĩra sãre m̄uare weregu iiaa. <sup>9</sup> ĩgu dorerire erã gojarapũgue õpa arĩ werea: “Wecu trigo yerire ĩgu guburi mera ĩgu suhri wearisubu ĩgu badiacũ ĩgu disirore cãhmotabĩcãque,” arĩyoro Moise dorerigue. Goãm̄u eropa doregu wecuare ĩhadiburire arĩgu iibiriĩumi. <sup>10</sup> Eropa doregu guare Goãm̄u yare buherãre itamudorerore weregu iĩumi marire buhebu. Pohere sãanirã sã iri dũcare aĩnirã sã erã mohmera pũhũ, dũcacũrisubu iri dũca wajataborore cohrema. Eropa mohmerãre barire oro gahmea marire. <sup>11</sup> M̄uare Goãm̄u ya buherire õari buherire buhebu gua. ¿Gua eropa buheri waja m̄uapũre guare barire obiro gahmeri m̄ua pepicũ? Oro gahmea m̄uare. M̄ua ocũ õaboaya guare. Eropa arĩquerecũ m̄ua obirimũribũ guare. <sup>12</sup> Eropa guare obirã arĩquererã ta gajirã buherã m̄uare irire odorecũ m̄ua erãpũre ohayoro. Erã m̄uare odorecũ guapu erã tauro odoremasiboaya m̄uare turaro gua buheri waja.

Eropa dorebonirã arĩquererã ta guapu “Gũare oque,” ne arĩbiribũ. “Cristo ya buherire gamebiribocoma gua dorecũ,” arĩrã guare dũhyaquerecũ ta m̄uare ne odorebiribũ. <sup>13</sup> Masa Goãm̄ure umupeorã Goãm̄u wihigue bari aĩ apima. I wihi mohmerã iri barire aĩ bahama. Eropirã Goãm̄ure erã umupeori mesa pohro mohmerã waibũgure erã soedĩgure masa erã aĩ apidĩgure merogã aĩ bahama erã sã. ¿Irire masibeari m̄ua? <sup>14</sup> Eropa erã iidiro dopa ta õari buherire buherãre erã buhera waja oro gahmea erã baburire. Eropa ta iidorepũ mari Opũ Jesu. <sup>15</sup> Eropigu m̄uare serẽbodi arĩqueregu ta yũhũ gajinore ne serẽbiribũ m̄uare. Eropigu ire dohpaguere gojagu gajinore waja gamebu gojagu iibea. M̄uare ne waja seadiabeaa. Sĩribũ arĩqueregu ne waja gamesome yũhũ m̄uare. Waja mariro buhegu sũaa. Eropigu m̄uare iri buhera waja ne wajata basome.

<sup>16</sup> Õari buherire buhedoregu apimi yũre Goãm̄u. Irire buheri masũ arĩgu tiiaa yũhũ. Õari buherire buhebigũ ñero waboaya yũhũ. Eropigu iri buherire buhegu “Gajirã masitarinũgagu ãhraa,” arĩbidigu ne arĩbeaa yũhũ. <sup>17</sup> Õari buherire yũ gamero buhegu yũ buheri waja wajaseaboaya yũhũ. Yũ gamero buhebeaa. Goãm̄u ĩgu yare buhedoregu apimi yũre. <sup>18</sup> Õari buherire buhegu m̄uare yũ buhera waja serẽmasiboaya yũhũ. Eropa serẽmasiqueregu ne gajinore serẽbigũ waja mariro iri buherire buhea m̄uare. Yũhũ eropa iigu arĩgu “Õaro wajatagũca Goãm̄u mera,” arãa. Iri ta ãhraa yũ wajatari.

<sup>19</sup> Eropigu yũhũ masare buhegu erã yũ buherire peediacũ õpa iigu iiaa Jesu yarã erã waboro dopa. Ne masa pohro majagu arĩbiriqueregu ta arĩpehrerãre pohro majagu iro dopa iiaa yũhũ erã yũ buherire peediacũ iigu. <sup>20</sup> Eropigu yũ acawererã judio masa mera arĩgu, judio masa iiro dopa ta iiaa yũhũ yũ buherire erã peediacũ iigu. Goãm̄u ĩgu dorera Moisere ĩgu apira yũre iri dorebiriquerecũ ta, iri doreri dihtare umupeorã mera arĩgu erã dorerire umupeogu iro dopa ta ãhraa yũ sã. Eropa ta iiaa yũhũ erã yũ buherire erã peediacũ iigu Jesu yarã erã waboro dopa. <sup>21</sup> Moise dorerire umupeobirã mera arĩgu iri dorerire umupeobigu iro dopa ta iiaa. Yũ buherire erã peediacũ eropa ta iigu iiaa yũhũ erã Jesu yarã erã waboro dopa. Eropa iiqueregu Goãm̄u dorerire umupeonĩguia. Cristo dorerire iiaa. <sup>22</sup> Eropigu õaro

masibirā mera árīgu erā iro dopa ta āhraa. “Masipehogu āhraa,” ne arībeaa yūhu erāre. Eropa ta iiaa yūhu erā sã Jesu yarā erā waboro dopa. Eropigu árīpehrerā masa erā árīricuro dopa ta iiaa yūhu erāre yū buherire peediacū iigu. Yujurāyeri Jesu taurā erā waboro dopa iiaa.<sup>23</sup> Eropa iiaa ōari buherire árīpehrerā erā ōaro peeburire. Erā eropa peera puhru Jesucristo erāre peamegue wabonirāre taumi. Eropigu yūhu erā mera ōaro mucubiriborore eropa iiaa.

<sup>24</sup> Mũare werenigui queori mera ōpa werea. Omabirarā erā omarā árīpehrerā omama. Erā eropa omapehrequerecū ta buringā omaturagupu omajamũhtami. Eropa ejamũhtagu wajatami. Eropirā erā buringā omadiro dopa ta mũa sã Goãmũ gamerire buringā iique mũa wajataboro dopa. <sup>25</sup> Árīpehrerā omamorāpu yū dupure gajiropa iiri arirā gajinore duhucāma erā omaboro core. Eropa ta iima erā pūri berore erā wajataboro dopa. Iri pūri bero erā dipuru peyama masa erā wajatarare ĩaboro dopa. Eropiro erā eropa ii erā wajatara bero mata pehrea wahaa. Mari sã Goãmũ yare ōaro buhemorā gajinore duhucārā mari wajataboro dopa. Iri mari wajatari tamera ne pehrebeaa. <sup>26</sup> Eropigu omabiragu ĩgu noho gamero omaro dopa iibeaa yupu. Yū gamero iimaacābeaa. Goãmũ gamerire masigu iiaa gajirāre itamuboro dopa. <sup>27</sup> Eropigu yū gamero dopa iibeaa. Yū ũaribejari yure dorebeaa. Masa erā Goãmũ mera taricū itamuburi dihtare iiaa. Eropa iibigu gajirāre Goãmũ yare buhedigu yū árīquerecū ta Goãmũ yure “Ōaro iibũ,” arĩbiribocumi.

## 10

*“Goãmũ āhrimi,” erā arĩ goãmarā wéanirāre umupeodorebiripu Pablo*

<sup>1</sup> Eropirā yū acawererā, ire masique mũa. Mari ñecu sũmarā mũra iribojegue majarā árīpehrerā mũrague mera Goãmũ árĩmuriñumi. ĩgu imica curu mera erāre wamũhtañumi. Erā ĩgure eropa nũrsia wahgārā wũariya deco diariya waĩcũriya eja ōaro taribuja wañuma. <sup>2</sup> Erā árīpehrerā imica curu doca árĩnirā wũariya taribujanirā Moise yarā wañuma. <sup>3</sup> Eropirā erā árīpehrerā ũmaro maja dijuri barire bamuriñuma. Goãmũ ĩgu orire bamuriñuma. <sup>4</sup> Eropa barā erā árīpehrerā Goãmũ ĩgu ori deco sãre ihrimuriñuma. Irisubuguere erā ihriburi decore Goãmũ ĩgu apira utāyegue iri decore wiridoreñumi. Erā iri deco ihridiro dopa Cristo iri utāye iro dopa ĩgu ta erāre ojocariro odi árĩñumi. ĩgu erā mera árĩmuriñumi. <sup>5</sup> Erā eropa wanirā erā árīquerecū ta erā mera majarā bajarā ñero erā iicū ĩagu Goãmũ erāre ĩhasuabiriñumi. Eropigu erāre masa marirogue boacū iĩñumi Goãmũ.

<sup>6</sup> Erāre eropa wara marire gũisāburi āhraa erā iidiro dopa ta mari ñerire ũaribejabiriborore. <sup>7</sup> Eropirā goãmarā wéanirāre erā umupeodiro dopa iibita mũa. Wecare erā wéadigure erā umupeodirore Goãmũ yare erā gojarapũ werero ōpa arāa: “Masa erā ba doaja ihrituha, wahgānũgaja, bosenu iĩñuma,” arĩ gojamuriñumi iribojeguere. <sup>8</sup> Puhru gajirā erā mera majarā nome mera ñero iĩñuma. Erā iidiro dopa iibiricāro gahmea marire. Erā eropa ñero iira dipuwaga yujunũ ta erā veintitrẽ mil gohra masa sĩria wañuma. <sup>9</sup> Gajisubugue gajirā erā yujurāyeri Goãmũ erā gamero dopa iicū gamerā ōpa ĩgure

arĩ turiñuma. “Mari Opu itamumasibeami marire,” arĩñuma Goãmure turirã. Eropã arĩ turirã ĩgure guacũ iĩñuma. Erã iidiro dopa iibiricãro gahmea marire. Erã eropa iira dipuwaja Goãmũ erãre añaã mera cũri wejẽdoreñumi. <sup>10</sup> Gajisubu daja erã mera majarã gajirã ñerã erã basi Goãmũ iirare dũyasocũ anyu masare wejẽgũpũ erãre wejẽñumi. Eropirã erã iidiro dopa iibiricãro gahmea.

<sup>11</sup> Eropã iĩñumi Goãmũ marire buhebu. Maripũ pehrerinũ coregã árĩrã ãhraa. Mari eropa árĩrã árĩcũ iribojegue majarã erã eropa warare Goãmũ gojadoreñumi marire gũisãgũ. <sup>12</sup> Eropirã mũapũ “Yũ tamera õaro iiaa yũhũ,” arĩ pepirã árĩrã õaro iique ñerire iiri arĩrã. <sup>13</sup> Mari árĩpehrerã yujugũ dũhyaro mariro yujuyerisuburi ñerire guñaã. Eropã guñarã iri ñerire iidiaa. Mari eropa iidiaquerecũ ta Goãmũpũ marire itamuniguicãgũ iimi. ĩgũ arĩdiro dopa iigũ ãhrimi. Eropigũ marire iri ñerire iidiarare tarinũgacũ itamumi. Marire guñaturacũ iimi. Eropã guñaturarã warã iri ñerire iidiasome. Eropirã árĩpehreri ñeri iidiaquererã iri ñerire tarinũgarãca.

<sup>14</sup> Eropirã mũa yũ mahirã yãre peeque. Ne merogã goãmarã wéanirãre ne umupeobiricãque. <sup>15</sup> Mũa õaro pee masirã mũa árĩcũ mũare werea. Eropirã yũ arĩri diaye árĩcũ masique mũa. <sup>16</sup> Mari gamenere bocatĩrirã Goãmure “Õhaa,” arĩra pũhrũ iri vino deco dicũripare ihrĩa mari. Eropã ihrirã “Cristo mari ya ñero iira dipuwajare ĩgũ di cóãra mera ĩgũ mera árĩrã ãhraa mari,” arĩ masia. Eropirã panrure mari Cristo yarã nuha barã iiaa mari. Eropã barã “Mari ya árĩburire ĩgũ dũpũ crusague sĩrira mera mari ĩgũ mera árĩrã yuju dũpũ iro dopa ãhraa mari,” arĩ masia. <sup>17</sup> Eropirã mari yujuru panrure nuha baro dopa árĩpehrerã mari Cristo yarã yuju dũpũ iro dopa ãhraa. Eropirã yuju curu ta ãhraa.

<sup>18</sup> Moise dorerire iirã erã iirire guñaque mũa. Goãmũ wihigue erã waibũgure wejẽ soema Goãmure umupeomorã. Erã eropa wejẽ soera pũhrũ erã soedigũre bahama. Eropã barã yuju curu ta Goãmũ yarã árĩrã ta iima. <sup>19</sup> Őpa ta arĩgũ goãmarã wéanirã diaye ãhrima, arĩbeaa. Goãmarã marima, arãa. Eropirã goãmarã wéanirã eropãrĩcãrã iima. Eropiro goãmarã wéanirã pohrogue erã apira baripũ bu gohra ta ãhraa. Iri bari bacũ marire gajiropa iibeaa, arãa yũhũ. <sup>20</sup> Yũhũ eropa arĩqueregũ ta iri barire mũa bacũ gamebirica. Őpa ãhraa iri: Jesu yarã árĩbirã goãmarã wéanirã pohrogue waibũgure wejẽburire apirã Goãmure umupeobeama. “Gũa goãmarãre umupeorã iiaa,” arĩrã watẽapũre umupeorã iima erã. Erã eropa umupeocũ erã umupeorĩ wihigue erã mera mũa batamurã watẽa mera árĩrã iro dopa iirã iica mũa. Mũa eropa iicũ tamerare ne gamebeaa. <sup>21</sup> Bocatĩrirã vino deco dicũripare ihrirã panrure nuha barã “Cristo mera ãhraa,” arãa mari. Mari eropa iirã árĩrã, watẽa yapũre ihri, bamasibeeaa mari. Eropirã goãmarã wéanirã pohro apira barire erãre umupeorã mera iri barire batamumasibeeaa mari.

<sup>22</sup> Mari Opũ ĩgũ yarãre mahimi. Eropirã eropa barã watẽa yarã iro dopa iirã ĩgure guacũ iirãca. ĩgũ guacũ mũa turabeeaa ĩgũ dipuwaja cãhmotaboro dopa.

*Goãmũ ĩgũ gameri dihtare iique, arĩ gojañumi Pablo*

<sup>23</sup> “Goãmũ iidorebirira árĩpehreri iimasiri àhraa yure,” arĩboca mũa. Mũa iiri ñeri iri árĩbiriquerecũ ta irire iirã gajirãre itamubiriboca mũa. Eropirã Jesure umupeonemocũ iibiriboca mũa gajirãre. <sup>24</sup> Mari ya ðaro árĩburi dihtare iibiricãro gahmea. Gajirã ya árĩburi sãre ðaro itamuque mũa.

<sup>25-26</sup> Eropirã gajirãre itamuburire òpa iique: Bari duaroguere barire asũrã warã “¿I bari goãmarã wéanirã pohrogo erã apira bari àhriri?” arĩ, serẽpiñabiricãque. “¿Ñerire iiri?” arĩrã, serẽpiñaboca mũa. Goãmũ yare gojarapũgue òpa àhraa: “I yeba árĩri árĩpehreri Goãmũ ya àhraa,” arĩ gojañuma. Eropirã iri barire “Goãmũ badorebirira bari àhraa,” arĩbiricãque.

<sup>27</sup> Jesure umupeobigu mũare badoregu ìgu sihucũ wadiarã waque. Eropa warã mũare ìgu egorire baque. “¿I bari goãmarã wéanirã pohro erã apira bari àhriri?” arĩ serẽpiñabita. <sup>28</sup> Gajigu ero arĩgu òpa arĩbocumi mũare: “I bari goãmarã wéanirãre erã wejẽ apira dihi àhraa,” arĩbocumi ìgua. Ìgu eropa arĩ werecũ iri bari tamerare babita. Mũare eropa arĩ weredigu “Iri barire barã ñerire iirã iica,” arĩ pepibocumi. Ìgu eropa arĩ pepibiriboro dopa “Babita,” arãa yũhũ mũare. <sup>29</sup> Eropa arĩgu mũa ya árĩburire weregu iibea. Mũare iri barire weredigu ya árĩburipure arĩgu iiaa mũare. Irire mũa bacũ ìha mũare ìhacũ ìgu sã babocumi. Ìgũpũ eropa bagũ “Ñero iigu iiaa,” arĩ pepibocumi. Eropirã “¿Eropa iibocuri ìgu?” arĩ iri barire babita.

“Babita,” yũ arĩcũ òpa arĩ yũhriboca mũa yure: “¿Dohpa árĩrono gajigu gajiropa pepiri arĩrã gũa gamero iimasibiribocuri gũa? <sup>30</sup> Goãmũre gũa ‘Òhaa,’ gũa arĩra pũhrũ gũa bacũ gajigu irire gũa barare gũare weresãmasibeami,” arĩboca mũa yure. Yũpũ òpa yũhria. <sup>31</sup> I árĩpehrerire mũare yũ wererare weregu òpa arĩgu iiaa mũare: Ëmũri nũcũ mũa mohmerã, barã, ihrirã, árĩpehrerire iirã irire Goãmũ ya árĩburi dihta iique. Eropirã árĩpehrerã masa Goãmũre “Òagũ, turagu àhrimi,” erã arĩ umupeoboro dopa iique. <sup>32</sup> Ne mũa iiri mera judio masare, judio masa árĩbirãre, Goãmũ yarã sãre goroweobiricãque. <sup>33</sup> Òpa iiaa yũpũ. Masa árĩpehrerã erã suaboro dopa iiaa árĩpehreri mera. Eropigu yũ gamero dopa iiniguicãbea yũ. Gajirã masa ya árĩburipure ðaro iiaa. Erãre Jesucristore umupeoborore eropa iiaa. Erã ìgũre umupeora pũhrũ erãre peamegue wabonirãre taugucumi.

## 11

<sup>1</sup> Cristo gajirã ya árĩburire árĩpehrerire iimi. Eropirã Cristore yũ ìhacũdiro dopa ta mũa sã yũ iidiro dopa ta yure ìhacũque.

*Corinto majarã erã gamenererogue nome erã iiborore werepũ*

<sup>2</sup> Mũare yũ árĩpehrerire buherare, buhe turiarare guñapeo waĩcũabũ. Eropa guñarã mũare yũ arĩrãre yũ iidorediro dopa ta ii waĩcũabũ mũa. Eropa iirã ðaro iiaa mũa. <sup>3</sup> Dohpague i sãre mũa masicũ gahmea: Árĩpehrerã ƿma opũ Cristo àhrimi. Eropigu nomeo opũ ƿmũ àhrimi. Eropigu Cristo opũ, ìgu Pagũ Goãmũ àhrimi. <sup>4</sup> Mũa Goãmũre umupeo gamenecũ yujugũ Goãmũre serẽgu dipuru bũa serẽgu ðaro ìgu opũre umupeogu iibeami. Goãmũ yare weretaugu sã dipuru buagu ìgu opũre umupeobeami ìgu sã.

Eropirā ɯmarɯ Goāmure serērā dipu buabiricāporo. <sup>5</sup> Eropigo nomeopɯ dipuru buabigo Goāmure serēgo igo marapure umupeogo iibeamo. Goāmɯ yare werego sã dipuru buabigo eropa ta igo sã umupeobeamo. Eropirā nomepɯ Goāmure serērā dipu buaporo. Dipuru buabigo igo poarire erã õaro wuapehodigo iro dopa ta åhrimo igo. <sup>6</sup> Dipuru buadiabigore igo poarire seapehoporo. “Yɯ poarire sea wuapehodiabeaa. Guhyasiriboca,” arigo igo dipurure buaporo. <sup>7</sup> Mɯa ɯmarɯ Goāmɯ iro dopa oparã åhraa. Eropirã Goāmɯ õagɯ, turagɯ, igɯ árivicarire ihmuma erãpɯ. Eropirã erã dipu buabiricāporo. Nomepɯ “Gɯa oparã ɯma åhrima,” arĩ ihmuma. Eropirã erãpɯ dipure buaporo. <sup>8</sup> Goāmɯ ɯmure iigɯ, nomeo ya dɯpɯ mera ɯmure iibirĩnumi. Nomeopure iigɯ, ɯmɯ ya dɯpɯ mera igore iĩnumi. <sup>9</sup> Eropigu ɯmure iigɯ sã nomeo yagɯ árĩbure iibirĩnumi. Nomeopure iigɯ ɯmɯ yago árĩbore iĩnumi Goāmɯ igore. <sup>10</sup> Eropirã mɯa Goāmure umupeorã gamenerecũ nome dipure buaporo anyua sã erã ihasuaboro dopa. Eropã buarã “ɯma gɯa oparã åhrima,” arĩ ihmurã iima. <sup>11-12</sup> Goāmɯ nomeore iigɯ, ɯmɯ dɯpɯ maja mera iĩnumi. Dohpaguere ɯma masa dehyoarã nome dɯpugue masa dehyoama. Eropiro ɯmɯ igɯ árĩmũhtabiricũ nome mariboñuma. Eropi nome maricũ ɯma sã mariboñuma. Eropirã erã Jesu yarã árĩrã, ɯma seyaro nome seyaro árĩmasibeama. Goāmɯpɯ árĩpehrerire apidi árĩmi. I yeba árĩrere i yeba iiburire apidi árĩmi.

<sup>13</sup> ¿Mɯa basi dohpa pepiri? ¿Nomeo igo dipuru buabigo, Goāmure igo serēcũ õhari mɯa pepicũ? Õabeaa. <sup>14</sup> Eropirã ɯmɯ igɯ poa ñapo igɯ ómacũ iha masa werewuama. Árĩpehrerã masa irire masima. <sup>15</sup> Nomeopɯ poa ñapo ómago árĩcũ õapũrica. Igo poari igo dipuru buari iro dopa ta åhraa. Iri sãre árĩpehrerã masima. <sup>16</sup> Mɯa mera majagɯ ire yɯ wererare dɯyasodiagɯ õpa masiporo igɯ: Irire yɯ arĩdiro dopa ta eropa dihta iiniguicãa mari. Gajirã Jesu yarã sã erã gamenererogue eropa dihta iiniguicãma.

*Bocatĩrirã erã barisubu goroweõnorã Corinto majarã*

<sup>17</sup> Dohpaguere muare gajinore werebu, “Õaro iirã åhraa,” arĩbeaa yɯhɯ muare. Mɯa gamenererã õaro iirã iibeaa. Eropirã mɯa gamenererogue goroweorã iiaa. <sup>18</sup> Õpa arĩ weremuhtagura muare: Mɯa gamenererogue eropa game dɯyasorã mɯa basi yujurayeri cururi dɯca wariayoro mɯa. Gajirã yure irire erã eropa arĩ werecũ “Diaye ta árĩca,” arĩ pepia yɯhɯ. <sup>19</sup> Eropã dɯca warirã õpa arĩca mɯa: “Dɯca wari wiriaro gameca marire Jesu yarã gohra árĩrãpure ihmuborore,” arĩca mɯa basi. <sup>20</sup> Mɯa basi gamenere barã mɯa yujuro árĩbirã mari Opɯ Jesucristo dorediro dopa diaye ta bocatĩrirã iibeaa. <sup>21</sup> Mɯa gamenere barã yujurãyeri mɯa seyaro bamũhta, ihrimũhta gajirãre corero mariro. Mɯa eropiicũ gajirã oaboã wahama. Gajirãpɯ mereã wahama. <sup>22</sup> ¿Mɯa seyaro badiarã duhpirã mɯa ya wirigue babeari? ¿Eropirã duhpirã dohpaguere Goāmɯ yarã gamenererore “Duhpiburi árĩbeaa,” arĩdiari? ¿Eropirã duhpirã Jesu yarãre mojomorocũrãre bari moorãpũre mɯa guhyasiuro taricũ iiri? ¿Dohpa arĩ weregucuri yɯhɯ muare? Õaro iirã iiaa mɯa, arĩbeaa yɯhɯ.

*Goāmɯ yare bocatĩrirã diaye erã iiburire werepɯ Pablo*

<sup>23</sup> Goãmũ yare bocatĩriburire mari Opũ Jesu weremi yũre. Eropa ĩgu wererare yũpũ mũare irire werebũ. Iri õpa áhraa: ĩgũre ĩhaturirãre Juda ĩgu sihurisubu iri ñami ta mari Opũ Jesucristo panrure aĩ, <sup>24</sup> Goãmũre “Õhaa,” arĩpũ. ĩgu eropa arĩra pũhrũ iriru panrure nuha, ĩgu buherãre guerepũ. Eropa gueregu õpa arĩpũ: “I yũ dũpũ áhraa. Mũa ya áriburire sírigũca. Yũre mũa guñaburire yũhũ dohpaguere mũare ĩhmuro dopa aĩ baque,” arĩpũ Jesu mari Opũ. <sup>25</sup> Erã bara pũhrũ ĩgu panrure aĩdiro dopa ta ihriripare aĩgu õpa arĩpũ: “Mũa ñeri iirare cóãbu sírigũca. Eropa iigu yũ dire cóãgũca. Yũ di cóãra mera Goãmũ masare ‘Mũa mera amugura,’ ĩgu arĩdiro ojogorocũroca. Ipa dicũrire ihrirã yũ di cóãrare guñarãca. Ire ihrirã mũa yũre guñaburire yũhũ mũare ĩhmudiro dopa iique,” arĩpũ Jesu. <sup>26</sup> Yũ werediro dopa ta iru panrure mũa barã, ihririre ihrirã, Jesu mari Opũ mari ya áriburire ĩgu sírirare ĩhmurã iiaa mũa. Eropa ĩhmuniguirãca mũapũ ne ĩgu i yebague ĩgu dujaracũgue.

*Goãmũ yare bocatĩrimorã õpa iique, arĩ gojañumi Pablo*

<sup>27</sup> Mũa Goãmũ yare bocatĩrimorã gamenere baha, ihrirã, umupeoro mariro gũhyadiaro mariro iirã dipuwajacũrãca. Eropa iirã mari ya áriburire Jesucristo ĩgu dũpũre ĩgu di cóãra sãre wereyaro dopa iirã iiaa mũa. <sup>28-29</sup> Õpa arĩ guñaro gahmea: “Mari Jesu yarã gamenererã yuju curu yuju dũpũ iro dopa áhraa. Mari Jesucristo yarã áhraa,” arĩ guñaro gahmea. Irire queoro guñabirã, mari iri panrure baha, ihriripare ihrirã queoro iibirã mari dipuwajacũmorã áfirãca. Eropirã mari bocatĩriboro core mari áricũrire guñamũhtarõ gahmea ñero iiri arĩrã. Eropa iira pũhrũ bocatĩri ihri bamasia mari. <sup>30</sup> Eropa guña amubirira waja bajarã mũa mera majarã dorecũrã áricõma. Erã yu-jurãyeri turabirã áricõma. Eropirã gajirã erã eropa iira dipuwaja síria wañuma. <sup>31</sup> Erã baha, ihriboro core erã áricũrire õaro guña, erã ñeri iirire duhunirã, erã ñeri dipuwajare dipuwajacũbiriboñuma. <sup>32</sup> Mari Opũpũ marire ĩgu yarãre dipuwaja moagu mari ñeri iirire duhucũ iigu iimi. Jesure gamebirãre ĩgu dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpaguere marire dipuwaja dabero moami mari Opũ.

<sup>33</sup> Eropirã yũ acawererã, bocatĩrimorã gamenererã, mũa basi corenique. <sup>34</sup> Eropirã mũa mera majarã oaboarã, erã ya wihigue bamũhtaporo. Eropirã bocatĩrimorã õaro gamenere baque mũa ñero dipuwajacũrã wabiriborore. Gajinore werediarabũ mũare. Pũhrũ yũ basi ejagu mũare weregura irire.

## 12

*Goãmũ ya áriburire mari mohmeburire apigu marire irire iimasicũ iimi Espĩritu Santo, arĩ gojañumi Pablo*

<sup>1</sup> Yũ acawererã, õpa mũare weregu ire mũare masicũ gahmea. Goãmũ ya áriburire mari mohmeburire apigu marire áripehrerãre irire iimasicũ iimi Espĩritu Santo.

<sup>2</sup> Mũa Jesu yarã árinibirã gajiropa áriiri buherire pee nũrũrã árirã, mũapũ goãmũrã wéanirãre umupeoyoro. Noho mũa bocarãre werenigũbirãre umupeoyoro. Irire masia mũa. <sup>3</sup> Eropa árinirã mũa áricũ dohpaguere õpa arĩ werediacã mũare. Espĩritu Santo

itamuri mera wereniguirã “Jesu ñero waporu,” ne arĩmasibeama. Eropirã Espíritu Santo itamuri mariro wereniguirãpũ “Jesu árĩpehrerã wecague opũ mari Opũ áhrimi,” arĩmasibeama.

<sup>4</sup> Goãmũ ya árĩburire mohmemasiburi baja áhraa. Irire marire iimasicũ iigũpũ yujugũ ta áhrimi. Ígu Espíritu Santo áhrimi. <sup>5</sup> Eropiro Goãmũ ya árĩburire iimasiri mera mari mohmeburi baja áhraa. Irire mari iiburire doregũ yujugũ ta mari Opũ Jesu áhrimi. <sup>6</sup> Mari ígũ yarã ígũ ya árĩburire iimasiri mera mari mohmeri yujuropa ta árĩbeaa. Iri mohmeri ðaro wacũ iigu yujugũ ta Goãmũ áhrimi. <sup>7</sup> Espíritu Santo marire Jesu yarã ñucũre mari iimasiburire apigũ Goãmũ turarire íhmuũ iimi. Ópa ta iimi ígũ Jesu yarãre árĩpehrerã mari ðaro mohmeboro dopa. <sup>8</sup> Yujurãyerire ðaro masiri mera werecũ iimi Espíritu Santo ta. Eropigu gajirãre Goãmũ yare ðaro buhecũ iimi ígũ Espíritu Santo. <sup>9</sup> Eropigu gajirãre “Mari Goãmũ mera ðaro iimasia,” arĩ Goãmũre guñaturacũ iimi Espíritu Santo ta. Eropa iigu gajirãre turarire Espíritu Santo ta ohomĩ ígũ. Iri turarire ígũ ocũ erãpũ dorecũrãre ðarã wacũ iima. Espíritu Santo yujugũ ta árĩgũ iri turarire ohomĩ. <sup>10</sup> Eropigu ígũ gajirãre deoro moarire iimasicũ iimi ígũ. Eropa iigu Goãmũ yare ðaro weretaumasicũ iimi ígũ gajirãre. Eropa iigu gajirã Jesu yarãre buherire ðaro beyemasicũ iimi ígũ. Eropa masirã watĩ ya buheri árĩcũ masima erã. Espíritu Santo gohra ya iri buheri árĩcũ sãre masima erã. Eropigu gajirãre erã peeyamarirã yare wereniguimasicũ iimi ígũ. Eropigu peeyamarirã yare erã wereniguicũ gajirãre weretaumasicũ iimi. <sup>11</sup> Iri árĩpehrerire iimasirire apigũ ta Espíritu Santo ta yujugũ ta áhrimi. Ígu gamero dopa ta marire yujurãyerire mari mohmeburire apimi.

*Cristo yarã árĩrã yuju curu ta áhraa mari, arĩ gojañumi Pablo*

<sup>12</sup> Werenigui queori mera mũare weregura: Mari dũpũ yuju dũpũ árĩquerecũ ta, mojotori, cuiiri, guburi, gamiri, iri tamera baja áhraa mari dũpũre árĩri. Eropa áhraa mari Cristo yarã. Bajarã árĩquererã ta yuju dũpũ iro dopa ta yuju curu ta áhraa ígũ mera. <sup>13</sup> Eropirã Cristo yarã árĩrã ígũ dũpũ iro dopa yuju curu ta áhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugũ árĩgũ ígũ dũpũ iro dopa yuju curu ta áhraa mari. Espíritu Santo yujugũ ta árĩgũ ígũ turari mera waĩyesũnirã marire yuju curu Cristo yarã árĩcũ iimi. Eropirã mari árĩpehrerã yujugũ Espíritu Santore opaa Cristo ya curu majarã árĩrã.

Eropirã mari Cristo yarã yuju dũpũ iro dopa áhraa. <sup>14</sup> Mari dũpũ yuju dũpũ árĩquerecũ ta mojotori, cuiiri, guburi, gamiri iri mari dũpũ árĩri baja áhraa. <sup>15</sup> Mũ guburo wereniguiiri guburo árĩro ópa arĩboya mũre gajiropa arĩro: “Mũ mojoto árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa arĩquerero ta mũ dũpũ maja árĩro ta iiaa. <sup>16</sup> Mũ gamiro wereniguiiri gamiro árĩro ópa arĩboya mũre: “Mũ cuiuru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquerero ta mũ dũpũ maja gamiro árĩro ta iiaa. <sup>17</sup> ¿Mari dũpũ cuiuru dihta árĩcũ dohpa peebocuri mari? Masiya mara. ¿Eropirã mari dũpũ gamiro dihta árĩcũ dohpa ii wĩji pepibocuri mari? Masiya mara. <sup>18</sup> Eropa árĩbeaa mari dũpũ. Ópa áhraa. Mari dũpũ árĩrinore árĩpehrerire Goãmũ



ĩgu gamero dopa ta apidi árĩmi mari dũpũre. <sup>19</sup> ¿Mari dũpũ árĩri maricũ dohpa waboyuri mari dũpũ? Mariboya. <sup>20</sup> Mari dũpũ õpa ãhraa: Yuju dũpũ árĩquerecũ ta mari dũpũ árĩri baja ãhraa. Eropa ta mari Jesu yarã yuju dũpũ iro dopa árĩquererã bajarã ãhraa mari basi game itamumorã.

<sup>21</sup> Eropiro mũ cuirupũ mũ mojtore “Mũ itamucũ gamebeaa,” arĩmasibeaa. Eropiro mũ dipuru mũ guburire “Mũ itamucũ gamebeaa,” arĩmasibeaa. <sup>22</sup> Gaji mari dũpũ árĩrire “Bu árĩñariri ãhraa,” mari arĩripũre ƣpũtu gahmea mari. <sup>23</sup> Eropirã gaji mari dũpũ árĩrire “Bu árĩñariri ãhraa,” arĩ pepia. Eropirã irire õaro deyoporo arĩrã õaro ahmua. Eropirã gaji mari dũpũ árĩrire mari guhyasĩrisãrire õaro ahmua õaro árĩboro dopa. <sup>24</sup> Gaji mari dũpũ árĩrire mata õari deyoripũre eropa amubeaa mari. Goãmũ mari dũpũ árĩri yujuũe gajiũnere gamebiricũ iibiridi árĩmi. Ĩgu mari dũpũ árĩrire árĩpehrerire õaro amudigu árĩmi yuju dũpũ õaro dũpũcuburire. Eropa iigu “Bu árĩñariri ãhraa,” mari arĩripũre mari õaro gamecũ iimi. Eropa ta ne yujugũre Jesu yagũre “Bu árĩgu ãhrimi,” arĩmasibeaa mari. <sup>25</sup> Eropa ta árĩdoredi árĩmi Goãmũ mari dũpũ árĩri yujuro mera iri basi game itamuboro dopa. <sup>26</sup> Mari dũpũ árĩri yujuũe ñero taricũ gaji mari dũpũ árĩri sã ñero taria. Eropiro mari dũpũ árĩri yujuũe õaro árĩcũ mari dũpũ árĩpehrero õaro pepia.

<sup>27</sup> Eropa arĩgu õpa arĩdigũ iiaa mũare: Mũarũ Cristo ĩgu dũpũ iro dopa árĩrã yuju curu ta ãhraa. Eropirã árĩpehrerã mua ĩgu dũpũ árĩri iro dopa ãhraa ĩgu yarã árĩrã. <sup>28</sup> Eropigu Jesu yarã gamenererã watope mari game itamuburire apidigu árĩmi Goãmũ marire. Õpa apipũ ĩgu marire: Yujurãyeri guare buhedoregu Cristo apimũhtadigu árĩmi. Ero pũhrũ gajirãre ĩgu yare weretaumorãre apidi árĩmi. Ero pũhrũ gajirãre Jesu yarãre buhemorãre apidi árĩmi. Eropigu gajirãre deyoro moarire iimorãre, gajirãre dorecurãre erã taricũ iimorãre, erã pũhrũ gajirãre masare itamumorãre, gajirãre oparã árĩmorãre apidi árĩmi. Ero ojogoro peeyamarirã yare wereniguimorãre apidigu árĩmi marire. <sup>29</sup> Eropa ĩgu apicũ árĩpehrerã yujuropa iimorã árĩbeaa mari. Mari árĩpehrerã Jesucristo yare buhedore ĩgu apinirã árĩbeaa mari. Eropirã Goãmũ ĩgu yare weretaurã mari árĩpehrerã árĩbeaa. Eropirã árĩpehrerã masare buherã árĩbeaa. Eropirã mari árĩpehrerã deyoro moarire iimasirã árĩbeaa mari. <sup>30</sup> Eropirã mari árĩpehrerã dorecurãre taumasirã árĩbeaa mari. Eropirã mari árĩpehrerã peeyamarirã yare wereniguimasimorã árĩbeaa. Eropirã gajirã erã wereniguirire were-taumasimorã mari árĩpehrerã árĩbeaa. <sup>31</sup> Eropirã Goãmũ ya árĩburire mohmemasiburiũnere gamerã õaripũre turaro gameque mũa. Eropigu árĩpehreri yũ arĩra tauro õaro mũa iiburire dohpaguere weregũra yũhũ.

## 13

*Gajirãre erã õaro mahiburire, umupeoburire wereñumi Pablo*

<sup>1</sup> Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã árĩbiriboya mari. Eropiro mari wereniguirĩ sã eropa busũmaacãboaya mari gajirãre mahibirã árĩrã. <sup>2</sup> Goãmũ yare õaro weremũhtamasiquererã ta gajirãre

mahibirā bu árīmaacārā árīboya mari. Eropirā masa erā masibirirare Goām̄ yare árīpehreri masiri masipehoquererā ta gajirāre mahibirā, bu árīmaacārā árīboya mari. Goām̄re ōaro umupeatariri mera utāgu “Gajipugue waporō,” arīrā wadoremasiquererā, mari gajirāre mari mahibirā bu árīrā árīboya. <sup>3</sup> Mari yare árīpehrerire mojomorocurāre oquerecū ta erāre mahibiricū iri mari ora duhpiburi árībiriboya. Eropirā Goām̄ ya árīburire mari iira dipuwaja mari dupure gajirāpu soequerecū ta, gajirāre mari mahibiricū iri duhpiburi árībiriboya.

<sup>4</sup> Gajirāre mahirā mata guabeaa erā mera. Erāre mahirā ōaro iiaa. Eropirā gajirāre mahirā erā marire opanemocū ihaturibeaa. Eropirā mari mahigu mera árīrā “M̄ tauro árīgu āhraa yuh̄,” arīrā iibeaa mari. Gajirāre mahirā, “Erāre masitarinugaa,” arī pepibeaa. <sup>5</sup> Eropirā gajirāre mahirā erāre umupeiōri mera queoro iiaa mari. Gajirāre mahirā mari ya árīburi dihtare guñabeaa. Erā ya ōaro árīburi sāre guñaa. Eropirā erāre mahirā disitīri wereniguibeaa mari. Eropirā marire erā ñero iicū sāre erā mera guawajabeaa mari. <sup>6</sup> Gajirāre mahirā erā ñero iirre mucubiribeaa mari. Diaye majapure erā iicū iarā burigā mucubiria erā mera. <sup>7</sup> Gajirāre mahirā erā ñero iicū gajirāre ne quere moabeaa. Eropirā gajirāpu erāre erā werewuacū peequererā ta irire peediabeaa mari. Ōari dihtare peediaa mari. Gajirāre mahirā “Ōarire iirācoma,” arī cohrea mari erāre. Gajirāre mahirā erā iira mera mari ñero tariquererā ta erāre mahi duhosome mari.

<sup>8</sup> Gajirāre game mahiri ne pehresome. Goām̄ yare weretauripu p̄hr̄ duhpiburi árīsome. Peeyamarirā ya wereniguiri sā pehrea waroca. Goām̄ yare masitariri wajamariroca p̄hr̄gue. Mari masipehora p̄hr̄gue duhpiburi gohra árīsome iri. <sup>9</sup> Dohpaguere Goām̄ yare mari merogā masia. Eropirā mari igu yare wererā mari merogā weremasia. <sup>10</sup> P̄hr̄gue ta mari masipehorāca. Eropiro mari merogā masira duhpiburi árīsome. Irisubugue masipehorāca.

<sup>11</sup> Iri ōpa āhraa: Majigu árīgu majigu dopa wereniguirib̄ yuh̄. Eropigu majigugā dopa pepirib̄. Eropigu bugu wagu majigu iro dopa árīr̄are duhcāb̄. Eropi ta p̄hr̄guere mari dohpaguere merogā masirare duhura p̄hr̄ masipehorāca. <sup>12</sup> Diuru ōaro masure deyocū iibiro dopa ta dohpaguere ōaro masipehonibeaa dohpa mari. P̄hr̄ Goām̄re mari ōaro ihamasirāgue mari masipehorāca. Dohpaguere mari merogā dihta masia dohpa. Goām̄ marire igu masipehodiro dopa ta p̄hr̄ mari sā ōaro masipehorāca.

<sup>13</sup> Eropirā dohpaguere mari iimasiburi uhreñe dujaroca. Goām̄re “Diaye ta árīgu āhrimi,” arī umupeoniguirāca. Eropirā marire igu mera ōaro árīniguiburire mucubiri coreniguirāca. Eropirā gajirāre game mahiniguirāca. Goām̄re umupeiōri, igu mera árīborore mucubiri coreri tauro āhraa game mahirip̄.

## 14

*Peeyamarirā yare wereniguirire wereñumi Pablo*

<sup>1</sup> Eropirā gajirāre game mahirā árīque m̄aa. Eropirā Goām̄ ya árīburi m̄aa mohmemasiburire Espiritu Santo igu apirare turaro gameque. Goām̄ yare m̄aa weremasiburi tamerare burigā gameque m̄aa. <sup>2</sup> Peeyamarirā yare wereniguigu Goām̄ dihta peeborore

wereniguimi. Eropa arĩ wereniguigu masa peeborore wereniguigu iibeami ĩgu. ĩgu eropa arĩ wereniguicũ peerã masapu ne peebeama ĩgure. Masa erã masibirire Espĩritu Santo ĩgu turari mera wereniguigu iimi ĩgu. <sup>3</sup> Goãmu yare weretaugupu masapu peeburire weremi. Eropa weregu ĩgu masare itamugu iimi ĩgu. Eropigu erãre Jesucristore umupeonemocũ iimi. Eropigu ĩgu erã ñero taricũ ĩgu erãre ðaro sĩporãcucũ iimi. <sup>4</sup> Peeyamarirã yare wereniguigu ĩgu basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmu yare weretaugupu gajirãre Jesu yarã gamenererãre Jesucristore umupeonemocũ itamumi ĩgu.

<sup>5</sup> Peeyamarirã yare arĩpehrerã mua wereniguicũ ðaboya yu pepicũ. Eropa arĩquerecũ ta Goãmu yare mua weretaucũ tamerare turaro gahmea. Goãmu yare weretaugupu peeyamarirã yare wereniguigu tauro ðagu àhrimi. Eropa arĩquerecũ ta peeyamarirã yare wereniguigu ĩgu wereniguirire gajigu ĩgu weretaucũ ĩgu sã ðagu dujami. ĩgu wereniguirire weretaugu Jesu yarã gamenererãre Jesucristore umupeonemocũ iimi. <sup>6</sup> Eropigu, yu acawererã, yũhu mua pohrogue peeyamarirã yare wereniguigu wagu muare itamumasibiriboya yũhu. Goãmu ĩgu yare wererare weregu itamua. ĩgu yare Espĩritu Santo yare masicũ iirare buhegu muare itamugu iiaa.

<sup>7</sup> Peeyamarirã ya wereniguigu ĩgu wereniguiri mari peebiro ðpa iro dopa àhraa. Tarusure purirã, mari buamutẽriñere irire mari queoro iibiricũ, iri bayarire gajirãre masima masiya mara. <sup>8</sup> Eropigu cornetare purigu surara arĩgu erã gamewejẽboro corere queoro ĩgu puribiricũ gajirã surarapu masisome erã gamewejẽboro gamenererore. Eropirã erã gamewejẽboro core erã wejẽburi mojore amuyubirã àhrima erã. <sup>9</sup> Eropa ta mua sã peeyamarirã yare wereniguicũ peerã gajirã irire peebeama. Eropa peebiricũ mua wereniguiri duhpiburi arĩbeaa erãre. <sup>10</sup> I yebare baja wereniguiri arĩca. Eropirã irire wereniguirã erã basi erã eropa wereniguirire ðaro peema. <sup>11</sup> ĩgu ya wereniguirire yu peebiricũ ñagu irire wereniguigupu “Gajirã yare wereniguimi,” arĩ pepicumi yare. Eropigu yu sã eropa ta arĩ pepica ĩgure. <sup>12</sup> Eropirã mua peeyamarirã yare wereniguirã, Espĩritu Santo ĩgu yare mohmemasi apira mera turaro mohmediaraa mua. Irire eropa iidiarã Jesu yarã gamenererãre ðaro itamuburipure burigã mohmediaque mua.

<sup>13</sup> Eropigu peeyamarirã yare wereniguigu “Yu wereniguirire gajirãre ðaro weretaumasiburire itamuque yare,” Goãmure arĩ serẽporo ĩgu. <sup>14</sup> Peeyamarirã ya mera Goãmure serẽgu yu pepiri mera serẽgu iiaa. Eropa serẽgu yu pepirire masibigu yu wereniguirire masibea. Eropa iigu gajirãre itamubea yũhu. <sup>15</sup> Ire masirã, ðpa iirãca mari: Espĩritu Santo ĩgu turari mera peeyamarirã ya mera Goãmure serẽrãca. Eropirã gajisubu ðaro masi pepirã gajirã erã ðaro peeboro dopa erã ya mera Goãmure serẽrã iri sãre serẽrãca mari. Espĩritu Santo ĩgu turari mera peeyamarirã ya mera Goãmu yare bayarãca. Eropirã gajisubu ðaro masi pepi gajirã erã ðaro peeboro dopa erã ya mera Goãmure bayarãca. <sup>16</sup> Mari eropa iibiricũ peeyamarirã ya mera wereniguirã Espĩritu Santo ĩgu turari mera Goãmure, “Ñagu turagu àhrimi,” mari arĩquerecũ ta gajirã ne peebeama. Erã eropa

peebirā “Diaye ta āhraa,” arīmasibeama. <sup>17</sup> Peeyamarirā ya mera Goāmure “Ōhaa,” arīmasia mari. Mari eropa arīri ōaro árīquerecū ta gajirā peebeama. Eropirā erāre Jesucristore umupeonemocū itamubeaa mari. <sup>18</sup> Árīpehrerā mua tauro yurū peeyamarirā yare wereniguia. Eropigu Goāmu yare eropa wereniguimasigu ūgu iicū ūgure “Ōhaa,” arāa yuhū. <sup>19</sup> Eropa wereniguiguru yā árīquerecū Jesu yarā gamenererā watope peeyamarropa peebirā “Diaye ta āirā ya mera yoari boje yā wereniguiquerecū duhpiburi árībeaa erāre. Yuhū masa erā ōaro peemasiboro dopa buhegu merogā yā buhequerecū ta iri tamera ōapūrica erāre.

<sup>20</sup> Yū acawererā, majirāgā pee masibirāgā iro dopa árībircāque mua. Murā erā pee masirā árīro dopa árīque mua. Eropirā ne masa dehyoarā erā űeri iirire erā masibiro dopa ta árīque mua. <sup>21</sup> Goāmu yare erā gojarapū ōpa āhraa Goāmu wereniguirire: “Gajirā ya queo wererāre oā masare yahare weredoregura. Eropigu gaji yeba majarā masare ōarire yahare weredoregura oā masare. Yū eropa weredorequerecū ta erā yare peesome yā wererire,” arīmi Goāmu mari Opū, āhraa Goāmu yare erā gojarapūgue. <sup>22</sup> Peeyamarirā yare wereniguiri Goāmure umupeobirāre erāre űhmuri āhraa. Eropiro peeyamarirā yare wereniguiri Jesu yarāpūre Goāmu turarire űhmuri árībeaa. Eropiro Goāmu yare wereripū Jesure gamebirāre Goāmu turarire űhmuri árībeaa. Goāmu yare wereripū Jesu yarāpūre Goāmu turarire űhmuri āhraa. <sup>23</sup> Eropirā mua Jesu yarā gamenerecū, peeyamarirā yare mua árīpehrerā wereniguicū, Goāmu yare masibirā gajirā Jesure umupeobirā sā űajari peebocoma. Mua eropa wereniguicū peerā, erā muare “Cue, goroweorā wahama,” arībocoma erā. <sup>24</sup> Árīpehrerā mua Goāmu yare mua werecū tamera Goāmu yare masibigu, Jesure umupeobigu sā űajari peegu, ūgu űero iirare masigucumi ūgu. Eropigu ūgu űeri iirare bujawerebocumi ūgu. <sup>25</sup> Eropigu ūgu árīricurire ūgu pepiri sāre guűagucumi ūgu. Eropigu mereja Goāmure “Yū opu āhrimi,” arīgu umupeogucumi. Eropigu “Goāmu diaye ta mua mera āhrimi,” arīgucumi ūgu muare Goāmu yare werecū peegu.

*Mua gamenererā ōaro iique goroweoro mariro, arī gojañumi Pablo*

<sup>26</sup> Eropigu, yā acawererā, muare ire arīgu iiaa: Mua gamenerecū yujurāyeri mua mera majarā Goāmu yare bayadiala. Eropirā mua gajirā buhediala. Eropirā gajirā Goāmu muare ūgu wererare werediala. Eropirā mua gajirā peeyamarirā yare wereniguiddiala. Eropirā mua gajirā iri wereniguirire weretaudiala. Mua eropa iirā gajirāre erā Jesucristore umupeonemoboro dopa irire iique. <sup>27</sup> Eropirā peeyamarirā yare mua wereniguirā mua perā o urerā, erā nucu ta wereniguique mua gamenererisubu. Eropirā yujurāyeri wereniguique. Mua eropa wereniguicū, yujugu mua mera majagu mua wereniguirire gajirāre weretauporo. <sup>28</sup> Mua wereniguirire weretaubu maricū mua gamenererogue peeyamarirā yare wereniguibircāque. Eropirā mua seyaro peeyamarirā yare Goāmu mera wereniguique. <sup>29</sup> Eropirā Goāmu yare werediarā perā o urerā iripēta wereque mua. Mua eropa werecū gajirā muare peerā mua wererire Goāmu ya árīcū ōaro masiporo. Eropirā Goāmu ya árībircū sāre ōaro masiporo. <sup>30</sup> Eropigu Espiritu Santo Goāmu yare gajigure ero doagure ūgure

wereri ocã, ĩgu sã Jesu yarãre werediami. ĩgu werediacũ ĩha Goãmu yare weremũhtagupu werenigui duhuporo. <sup>31</sup> Eropirã mua áripehrerã Goãmu yare wererã, yujurãyeri wereque mua áripehrerã gajirã erã ðaro peeboro dopa, erã ðaro mucubiriboro dopaa. <sup>32</sup> Eropirã Goãmu yare wererã árirã, ðaro pee masirã, ðaro peeñanugu wereniguirã áriŕque. <sup>33</sup> Goãmu ĩgu yarã erã gamenererogue erã game wisicũ gamebeamĩ ĩgu. Goroweoro mariro erã ðaro áricũ gahmemi ĩgu. Eropirã ðaro iique mua áripehrerogue Jesu yarã gamenererã.

<sup>34</sup> Áripehrero Jesu yarã gamenererore nomere wereniguibiricãro gahmea. Erã nomere maripu wereniguidorebeaa. Goãmu yare erã gojarapũ sã arĩro dopa ta nomere mũare ðaro yũhrirã nome arĩro gahmea. Eropirã mua gamenererore nome masare werebiricãporo. <sup>35</sup> Jesu yarã erã gamenererore nome erã wereniguicũ ðabeaa. Eropigo gajinore masidiago nomeo igo ya wihigue ta igo marapũre serẽpiporo.

<sup>36</sup> Ire yũ wereburi ðaro masique mua. Goãmu yare weremũhtarã áribeaa mua. Eropirã ĩgu yare peenirã mua dihta áribeaa. Gajirã sã ĩgu ya buherire opama. <sup>37</sup> Mua mera majagu “Yũ tamera Goãmu yare weregu áhraa,” arĩ pepibocumi. Eropã arĩ pepigu i yũ mũare gojarare “Goãmu doreri ta áhraa,” arĩ masiporo ĩgu. Eropigu gajigu, “Espĩritu Santo iimasiburire ĩgu apirare ðaro opaa yũhũ,” arĩ pepibocumi. Eropã arĩ pepigu ĩgu sã i yũ mũare gojarare “Goãmu ya doreri ta áhraa,” arĩ masiporo. <sup>38</sup> Irire ĩgu masidiabiricũ yũ gojarare “Diaye áribeaa,” ĩgu aricũ ĩgure duhucãque. Peebiricãque ĩgure.

<sup>39</sup> Eropirã yũ acawererã, Goãmu yare weremasiburire burigã gameque mua. Eropirã mua mera majarã mua gamenererogue peeyamarirã ya erã wereniguidiacũ, “Wereniguibiricãque,” arĩbiricãque erãre. <sup>40</sup> Eropã iirã ðaro iique. Eropirã gamenererã ðaro game, goroweoro mariro iique mua.

## 15

### *Cristo ĩgu masa mũriarare werepu Pablo*

<sup>1</sup> Dohpaguere yũ acawererã, ðari buherire yũhũ mũare wererare mũare guñacũ iidiaca. Iri buherire ðaro peebu mua. Eropã peerã iri buherire umupeonijarã ðaro áhraa mua. <sup>2</sup> Mua eropã umupeocũ irire mua cóãbiricũ Cristo mũare peamegue wabonirãre taugucumi. Mua eropã peera pũhrũ Cristo yare mua duhucãcũ iri mua peera duhpiburi áribiriboya.

<sup>3</sup> Őpã arĩ weremũtagura mũare. Bu gohra áribeaa. Mũare buhegu yũre Cristo ĩgu wererare ũpã arĩ werebu: Goãmu yare erã arĩ gojayudiro dopa ta mari ñeri wajare Cristo sĩripũ. <sup>4</sup> Eropigu Goãmu yare erã arĩ gojayudiro dopa ta Cristo ĩgu sĩrira pũhrũ gajirã ĩgure erã yaara pũhrũ uħrenũ waboro ĩgu masa mũriapũ. <sup>5</sup> ĩgu eropã masa mũriara pũhrũ Pedrore dehyoapũ. ĩgu eropã dehyoara pũhrũ ĩgu buherãre doce mera majarãre dehyoapũ daja. <sup>6</sup> Erãre dehyoara pũhrũre yujusubu ta quinientos weca árirãre ĩgu yarãre dehyoapũ daja. Gajirã ĩgure ñanirã sĩrituhañorã. Gajirã ĩgu ñanirã bajarã erã mera majarã árinirã dohpaguere árinima. <sup>7</sup> Pũhrũ Cristo Santiagore dehyoapũ daja. Eropã ĩgu dehyoara pũhrũ áripehrerã ĩgu buhedore apinirãre dehyoapũ daja.

<sup>8</sup> Árīpehrerā gajirāre īḡu dehyoara pūhrū yū sāre dehyoami daja. Majīgūgā queoro masa deyobīgūgā īḡu masa dehyoanurūsiadiro dopa ta yū sā Jesure umuḡe nūrusiagū āhraa. Yū eropa árīcū erā pūhrure dehyoami Jesu yū sāre. Yūre ta īḡu dehyoatumi pare. <sup>9</sup> Ero coregue Jesu yarāre űero iiribū. Eropā iidīgū árīḡū gajirā Jesu īḡu apinirā árīpehrerā erā docague gohra āhraa yūhū. Eropīgū dohpague sāre Jesu īḡu buhedore īḡu apibodīgū árībiriribū yūhū. <sup>10</sup> Eropā árīquereḡū ta Goāmū īḡu yūre mahicū dohpaguere Jesu īḡu apidīgū āhraa yū sā. Eropīgū īḡu yūre mahicū dohpaguere īḡu gamerire iipehoa. Eropīgū īḡu yūre mahicū īḡu yagū eropa árīcāḡū iibea. Árīpehrerā gajirā īḡu apinirā tauro yūpū turaro mohmeabū. Eropā mohmeḡū yū gamero iri mohmerire iibirabū. Goāmū yūre mahīgū yūre itamuami. <sup>11</sup> Yūhū mūare ōari buherire buheḡū yū árīcū erā mūare buherā árīcū sāre yujuropa āhraa. ḡapū ire buherā árīquererā ta bu gohra árīrā iiaa. ḡua buheripū bu árīri árībeaa. Eropirā mūapū i buherire ōaro peeabū.

*Sīrinirā mūra erā masa mūriaborore werepū Pablo*

<sup>12</sup> Cristo īḡu sīrira pūhrū īḡu masa mūriarare ḡua buhequerecū “Sīrinirā mūra ne masa mūriabeama,” arīma mūa mera majarā yujurāyeri. ¿Dohpa arīrono eropa arīri erā irire? <sup>13</sup> Ōpa masiporo erā. Sīrinirā mūrare Goāmū masa mūriacū iibīgū Cristo sāre ne masa mūriacū iibiriboñumi. <sup>14</sup> Eropīgū Cristo īḡu masa mūriabiricū ōari buherire ḡua werera ne waja mariboya. Mūa īḡure umuḡeori sā waja mariboya. <sup>15</sup> Masa mūriari maricū ḡapū Goāmū yare wererā ḡuyarā iiboya. Sīrinirā mūra erā masa mūriabiricū Goāmūpū Cristore masa mūriacū iibiriboñumi. īḡu eropa iibiricū ḡua “Goāmū Cristore masa mūriacū iipū,” arīrā ḡuyarā iiboya. <sup>16</sup> Sīrinirā mūrare Goāmū masubīgū, Cristo sāre īḡu masubiriboñumi. <sup>17</sup> Eropiro Cristo īḡu masa mūriabiricū īḡure mūa umuḡeori waja mariboya. Eropiro mūa űeri dipuwajacurā árīboya dohpa peamegue wamorā. <sup>18</sup> Masa mūriariñe maricū Cristo yarā mūra sīrimūhtanirā mūra peamegue wamorā árīboñuma. <sup>19</sup> Cristore mari umuḡeora pūhrū mari sīrirāḡue mari masa mūriamasibirimorā árīrā árīpehrerā masa tauro mojomorocurā árīboya maripū. Eropirā īḡure umuḡeorā bu gohra árīrire umuḡeorā iiboya mari.

<sup>20</sup> Eropā árībeaa. Diaye ta Goāmū Cristore ōaro masa mūriacū iicādi árīmi. Cristo īḡu masa mūriara pūhrū mari sā sīrirāḡue masa mūriamorā ta āhraa. īḡu eropa masa mūriagū, Cristo masa mūria gubuyecūñumi marire. <sup>21</sup> Ōpa ta āhraa i: Adán masū árīmūhtadīgū īḡu űerire iinūgara pūhrū masa sīrinūgañuma. Eropīgū gajīgū masū Jesucristo ōarire īḡu iira pūhrū sīrinirā mūra masa mūriamasima. <sup>22</sup> Adán yarā arīnūrusiarāḡue mari árīpehrerā sīrirāca. Eropā ta Cristo yarā mari árīcū mari sīrira pūhrū marire masa mūriacū iḡucūmi Goāmū. <sup>23</sup> Yujurāyeri cururi marire Goāmū sihurisubū masa mūriarāca. Cristo marire árīmūhtadīgū masa mūriamūhtapū. Pūhrū īḡu i yebague dujaricū īḡu yarā sā masa mūriarācoma. <sup>24</sup> Irisubū ta i umū pehrerinū árīroca. Eropīgū árīpehrerā űerā oparāre, dorerāre, turarāre Cristo cóḡḡucūmi. īḡu eropa iira pūhrū árīpehrerā weca opū īḡu árīrare wiagūcūmi Goāmūre mari Paḡure. <sup>25</sup> īḡu wiaboro

core mari Pagu Cristore ñhaturiräre ñgu tarinugapehoboro core Cristo tamera árĩpehrerã weca opu árĩgucumi. Eropa iibu ta árĩro gahmea ñgure. <sup>26</sup> ñgure ñhaturiräre ñgu cóara puhru sĩririñe sãre pehrecũ iigucumi ñgu. <sup>27</sup> Goãmu yare gojarapũgue òpa ãhraa: “Árĩpehrerã weca dorebure apipu Goãmu Cristore. Árĩpehreri sãre apipu ñgure.” Eropa ta arãa Goãmu yare erã gojarapũgue. “Árĩpehrerã weca dorebure apipu Goãmu Cristore,” arĩ gojagu, “Goãmu weca doregu Cristo ãhrimi ñgu,” arĩdiabiriñumi. Goãmupũ Cristore eropa apiñumi. <sup>28</sup> Árĩpehrero Goãmure ñhaturiräre ñgu cóara puhru árĩpehrerã weca doregu Cristo Goãmu magu ñgu árĩtuhagu ñgu opu árĩrare Goãmure ñgure apidigupure wiagucumi. Eropiigucumi “Goãmupũ árĩpehrerã weca opu árĩpehreri opu gohra ãhrimi,” árĩpehrero árĩpehrerã arĩmasiboro dopa.

<sup>29</sup> “Sĩrinirã masa muriasome,” arĩma gajirã. ¿Erã arĩri diaye árĩcũ duhpimorã gajirã masa sĩrinirã mura ya árĩburire erã waĩyebasanirã ãhriri mua pepicũ? Sĩrinirã mura masa muriabiricũ erã ya árĩburire gajirã waĩyebasara duhpiburi árĩbiriboya.

<sup>30</sup> Guapu gua buheri dipuwaja umuri nucũ gajirã guare erã ñero iidiacũ guhya ãhraa gua sãre. Guare eropa guhyaquerecũ ta masa muriari árĩcũ masirã eropa buheniguicãa gua. <sup>31</sup> Mari Opu Jesucristo yarã mua árĩcũ ñgure umupeonemorã mua wacũ yapũ turaro mucubiri pepia yũhu mũare. Iri diaye ta ãhraa. Eropigu “Yure noho erã gamerĩnũ wejẽmaja guhya ãhrima,” yũ arĩcũ iri sã diaye ta ãhraa. <sup>32</sup> Efeso majarã guarã õari buherire yũ buhera waja yure pama. Masa muriariñe maricũ Jesu yagu yũ árĩbiricũ, yũ ñero tarira waja duhpiburi árĩbiriboya. Sĩrinirã mura erã masa muriabiricũ òpa arĩboya mari: “Puhruñari sĩrirãca. Dohpa wasome mari. Eropirã bania, ihrirã, mari gamero dopa iirã,” arĩboya mari.

<sup>33</sup> Eropa arĩ guyarire pepibiricãque mua. “Ñerãre wapicũrã, õarire mua iirare cãdjirãca mua,” arĩma masa. Iri diaye ta ãhraa. <sup>34</sup> Õarire pepirã árĩque mua. Eropirã õarire iirã árĩque daja. Eropirã ñerire iinemobiricãque daja. Gajirã mua mera majarã ne Goãmure masibeama. Mua guhyasĩburire mũare eropa arãa.

### *Sĩrinirã mura erã masa muriaborore werenemopũ Pablo*

<sup>35</sup> Eropi mua mera majagu òpa arĩ serẽpibocumi yure: “¿Dohpa ii sĩrinirã mura masa muriarãcuri? ¿Dohpa bejari dupũcũrã masa muriarãcuri? arĩ serẽpibocumi yure. <sup>36</sup> Eropa arĩ serẽpigũ pee masibigu ãhrimi. Oteriyere mari oterã iriye boacũ gohra puhri wiria. Boabiricũ ne puhri wirimasibeaa. Irire masia mua. <sup>37</sup> Puhritaridigu yucũguquere otebeaa mari. Dipayeri dihtare otea mari. Iriyeri trigo yeri árĩro ãhri, o gajiyeri árĩro árĩca. <sup>38</sup> Iriyerire mari otera puhru Goãmupũ ñgu gamediro dopa ta iriyerire buga muriacũ iimi. Eropigu ojodũcayerire ojodũcañũ wacũ iimi ñgu. Trigo yerire trigo sari wacũ iimi. Eropa ta puhridoremi Goãmu. <sup>39</sup> Árĩpehrerã dupũcũri yujuropa deyobeaa. Masa dupũpũ yujuropa ta ãhraa. Waimurã dupũ sã gajiropa ta dehyoa. Mirimagũ porã dupũ sã gajiropa ta dehyoa. Eropirã wai sã gajiropa ta dupũcũma. <sup>40</sup> Eropirã umaro majarã sã ãhrima. Eropirã i yeba majarã sã ãhrima. Eropirã umaro majarã

dupu gajiropa dehyoma. Eropiro i yeba majarã umaro majarã iro dopa árĩbeama. <sup>41</sup> Ōpa ta āhraa. Abe umu majagu gosemi. Eropi ñami majagu sã boje āhrimi igu sã. Yuju diaye ta boyomi. Eropirã necã sã gajiropa bejari gosesirima. Necã majarã sãre mari ñacũ gaji dipu daberogã gosesiriri dipu dehyoa. Eropiro gaji dipu turaro gosesiriri dipu dehyoa. <sup>42</sup> Eropa ta āhrima sīrinirã mura erã masa mūriacũ. Masu igu dupure mari yaara puhru igu dupu boa waroca. Eropiro gaji dupu gajiropa árĩri dupu umuri nucu ojocariburi dupu masa mariaroca. <sup>43</sup> Igu dupure mari yaacũ sīridigu dupu ñeri dupu āhraa. Goãmu igure masucũ igu dupu ðatariari dupu árĩroca. Eropiro igu dupu mari yaara dupu turari mariri dupu āhraa. Eropiro Goãmu igure igu masucũ dupu turatariari dupu árĩroca. <sup>44</sup> I yeba maja dupure mari yaarãca. Igu sīridigu muru igu masa mūriacũ igu dupu umaro maja dupu ta árĩroca. I yeba maja dupure mari opaa dohpaguere. Puhru umaro maja dupu sãre oparãca.

<sup>45</sup> Eropa ta arĩ werea Goãmu yare erã gojarapũgue: “I yeba árĩmuhtadigu Adán waĩcugu Goãmu igure iicũ ojocarigu wañumi,” arĩ gojañuma. Adán iro dopa árĩgupu ñjutuyagupu Cristopu ojocaririre ogu āhrimi. <sup>46</sup> I yeba maja dupu árĩmuhtara dupu āhraa. Puhrugue umaro maja dupu árĩroca. <sup>47</sup> Ōpa ta āhraa: Árĩmuhtadigu Adánpu i yeba maja nicu mera Goãmu igu iira dupure dupucũumi. Igu puhru aridigupu Cristopu umaro majagu árĩpu. <sup>48</sup> Nicu mera dupucumuhtadigu Adán árĩdiro dopa ta mari árĩpehrerã nicu mera iira dupucurã āhraa mari. Eropirã umarogue aridigu Jesucristo igu árĩdiro dopa ta igu yarã árĩpehrerã igu iro dopa dupucurãca mari. <sup>49</sup> Mari Adán iro dopa ta dupucurã árĩrã puhru Cristo iro dopa dupucurãca.

<sup>50</sup> Yu acawererã, mware ire werediaa: I yeba maja dupu di mera diro mera árĩri dupu Goãmu igu opu árĩroguere umaroguere ne wasome. Mari dupu boaburi dupu āhraa. Eropiro umarogue umuri nucu mari árĩboroguere i dupu wasome. <sup>51-52</sup> Iribojegure masa erã masibirirare dohpaguere mware werediaa: Mari mera majarã yujurãyeri sīrisome. Eropirã mata erã dupure gohrotorã árĩrãcoma. Corneta igu puriturinu eropa ta waroca marire. Ōpa waroca: Corneta busura puhru sīrinirã murare Goãmu masugucumi umuri nucu erã árĩmorãre. Eropirã dupure gohrotonirã árĩrãca mari sã. <sup>53</sup> Dohpaguere mari dupu boaburi dupu āhraa. Eropigu mari Goãmu mera árĩniguicãburire mari dupure gohrotogucumi Goãmu. Eropigu mari sīriburi dupure gohrotogucumi mari ne sīribiriburi dupupure. <sup>54</sup> Mari dupure ne boabiriburi dupure gohrotogucumi. Eropigu marire sīribiriburi dupure eropa árĩniguiburi dupure gohrotogucumi. Iri eropa marire gohrotocũ iribojegue Goãmu yare gojarapũgue arĩ gojadiro dopa ta eropa waroca: Goãmu sīririñere cóacãmi. <sup>55</sup> Dohpaguere ne dipaturi sīrisome. Eropiro sīririñe mera dipaturi mari ñero tarisome. <sup>56</sup> Mari ñeri iira waja árĩcũ tamera sīririñe mera ñero tarirãca. Eropiro Goãmu doreri mari imasibirira waja dipuwajacua mari. Eropa dipuwajacurã peamegue mari masa wamorã āhraa. <sup>57</sup> Mari eropa árĩquerecũ ta mari Opu Jesucristopu marire peamegue wabiricũ iimi. Igu eropa iigu árĩcũ masirã Goãmu mera



mucubiri “Ōhaa,” arãa mari.

<sup>58</sup> Eropirã yu acawererã, yu mahirã, Cristore mua umupeorire duhubiricãque. Eropirã gajirã muare òari buherire erã còadorecũ ne còabiricãque irire. Eropirã umuri nucu mari Opu Jesucristo igu iidorerare òaro iiniguicãque mua. Mari Opu Jesucristo yare mari iicũ bu gohra ta ne árĩbeaa. Ire masirã igu iidorerire òaro iiniguicãque mua.

## 16

*Gajirãre Jesu yarãre Corinto majarã niyeru erã oburire werepu Pablo*

<sup>1</sup> Dohpaguere gajirãre Jesu yarãre mua niyeru oburire weregura muare. Galacia yeba majarãre Jesu yarãre yu dorediro dopa ta mua sã iique. <sup>2</sup> Semanari nucu soorinu árĩcũ árĩpehrerã mua Jesu yarãre gajirãre mua oburi niyerure merogã gameneoque. Merogã oparã merogã oque. Eropirã wuañariro oparã wuañariro oque. Semanari nucu mua eropa iique mua pohrogue yu ejacũ mua obeoburi niyeru opayutuhaboro dopa. Eropigu erogue ejagu iripẽ niyeru wahasõ arĩripũre gojabasagura. <sup>3</sup> Eropigu iripũre iri niyeru aĩgãmorãre mua beyenirãre ogura. Eropa otuhagu Jesu yarãre mua obeoburi niyerure aĩgãmorãre erãre obeogura Jerusalengue. <sup>4</sup> Iri macaguere yu iiburi árĩcũ yu sã waguca. Yu eropa wacũ yu mera ta erã sã warãcoma iri niyeru orã warã.

*Ígu erogue curiborore werepu Pablo*

<sup>5</sup> Macedonia yeba majarãre íhatari wahgãguca yuhũ erãre. Tariagu mua pohro Corintogue ejaguca. <sup>6</sup> Erogue ejagu mua mera bajamenuri árĩboca yuhũ gajisubu igu. Yoañariri boje puhiró dihta mua mera árĩboca yuhũ. Eropirã gajipugue yu wacũ mua sã yure itamubeomasia. <sup>7</sup> Muare bajamenurigã íadiabirica yuhũ. Eropigu Goãmu gamecũ yoañariri boje mua mera árĩguca yuhũ. <sup>8</sup> Eropa árĩdiaqueregu ta pentecoste bosenu árĩcũgue Efeso árĩniguca dohpa. <sup>9</sup> Ohõ Efesogue dohpague mari Opu Jesu yare pe diarã bajarã áhrima. Erã eropa árĩrã árĩcũ erãre werea. Yuhũ erãre eropa werẽcũ yare íadiabirã bajarã áhrima. Eropigu Efesogue árĩniguca dohpa.

<sup>10</sup> Timoteo yu iro dopa ta mari Opu yare iimi. Ígu eropa iigu árĩcũ mua pohrogue igu ejacũ òaro mera ígure bocatĩri, ígu mera òaro mucubiriri mera árĩque mua. <sup>11</sup> Eropirã ígure tarinugabiricãque mua. Eropirã ígu muare goeriserecũ òaro mera ígure itamuque ígu yu pohrogue dujaricũ. Gajirã Jesu yarã mera gũa ígure corerã iiaa. Eropirã òaro mera itamubeoque ígure.

<sup>12</sup> Apolo mari acaweregu Jesu yagu muare ígu íagu wacũ turaro gamerabu. Eropigu ígure wadorerabu gajirã Jesu yarã mera ígu waborore. Yu eropa wadorequerecũ ta ígu dohpaguere wadiabeami. Eropigu puhũ ígure iiri maricũ mua pohrogue wagucumi ígu daja.

*Pablo òadoretupu*

<sup>13</sup> Ōaro pee masiyurã árĩque mua. Cristore umupeorã duhubiricãque. Ōaro guñaturarã árĩque. Eropirã Goãmu ya turari mera turarã árĩque mua. <sup>14</sup> Árĩpehrerore iirã gajirãre mahiri mera irire iique.

<sup>15</sup> ¿Estéfana ígu ya wihi majarã mera guñari mua? Erã Acaya yeba majarã òari buherire peemuhtarã, iri yebare Cristore umupeomuhtanirã árîma erãpũ. Eropirã gajirãre mari acawererãre Jesu yarãre erã òaro itamuniguicãma. <sup>16</sup> Eropigũ erã iro dopa árîrãre, gajirãre Cristo yare itamurãre mua òaro yãhricũ gahmea yũhũ. <sup>17</sup> Ígu Estéfana, Fortunato, Acaico sã yũ pohrogue eratumama. Ohõ erã árîcũ wũaro mucubiria yũhũ. Mua maricũ mua mera mucubirimasibiribũ yũhũ. Eropigũ erã eracũ mucubiria yũhũ. <sup>18</sup> Erã mera árîgu òaro sîporãcugu wahabũ yũhũ. Mua sãre eropa ta mucubiricũ iiañuma yũ pepicũ. Mua pohrogue erã dipaturi wacũ daja erãre òaro umupeoque mua. Eropirã gajirãre erã iro dopa árîrã sãre umupeoro gahmea mua.

<sup>19</sup> Asia majarã Jesu yarã muaire òadorema. Eropirã Aquila, Priscila, erã ya wihi gamenererã mera Cristo ígu mahiri mera muaire wũaro òadorema. <sup>20</sup> Õ majarã Jesu yarã árîpehrerã muaire òadorema. Mua mera majarãre bocatîrirã òaro mera mojoto ñeaque.

<sup>21</sup> Yũhũ Pablo, yũ basi i dihtare gojaa. Muaire òadorea.

<sup>22</sup> Mari Opũ Jesucristore gajigũ ígu mahibiricũ, Goãmu ígure dipuwaja moaporo. Mari Opũ duru dujariporo.

<sup>23</sup> Mari Opũ ígu mahiri mera muaire òadorea. <sup>24</sup> Muaire árîpehrerãre buriã mahia Jesucristo mera. Eropa ta árîporo. Iripêta ãhraa.

## 2 Corintios

*Ōpa gojabeoñumi Pablo Corinto majarãre*

<sup>1</sup> Yuhũ Pablo Jesucristo yare ĩgu buhedore ĩgu apidigu ãhraa. Mari Pagũ ĩgu gamero dopa ta apimi yũre Jesu. Yuhũ, mari acaweregũ Timoteo mera mũare Goãmũre umupeorãre Corinto majarãre gojabeoa. Árĩpehrerã Jesucristo yarãre Acaya majarãre mua sãre gojabeoa. <sup>2</sup> Eropirã Goãmũ mari Pagũ, mari Opũ Jesucristo mera mũare ðadorea. ĩgu itamuro mera ðaro árĩque mua.

*Pablo ĩgu ñero tarirare ðpa arĩ wereñumi*

<sup>3</sup> Mari Opũ Jesucristo Pagũ Goãmũ marire mojomoro ĩhami. Eropigu ĩgu dihta marire árĩpehrerinũri ðaro sĩporãcũcũ iimi. “Ōatariagu ãhrimi ĩgu,” arãa mari. <sup>4</sup> Mari ñero taricũ ĩagu marire ĩgu yarãre itamumi ĩgu gajirãre mari itamuboro dopa. Eropirã gajirã erã ñero taricũ erãpũre itamuro gahmea marire. Goãmũ marire ĩgu itamuro dopa ta mari sã erãre itamurã. <sup>5</sup> Cristo yarã mari árĩrã ĩgu ñero taridiro dopa ta mari sã burigã ñero taria. Mari ñero taridiro dopa ta ĩgu itamurire wũaro opaa. <sup>6</sup> Guapũ mũare itamurã ñero taria. Eropirã Cristo mera mua ðaro árĩbororo dopa gua mũare werera dipuwaja gajirã ñero iima guare. Gua ñero tariquerecũ Cristo guare itamumi. Eropirã Cristo guare itamucũ guapũ mua sãre itamumasia. Eropirã gua ñero taridiro dopa ta mua sã ñero tarirã ðaro mera yujuro bojerãca. <sup>7</sup> Ōaro mera mua yujuro bojerã árĩborore gua masia. Gua ñero taridiro dopa ta ñero taria mua sã. Eropirã Goãmũ ĩgu itamuri mera gua yujuro bojediro dopa ta mua sã yujuro bojerãca.

<sup>8</sup> Gua acawererã, dohpaguere ire mua ðaro masicũ gua gahmea. Asia yebaguere ñetariaro taribũ gua. Gua gamero iirã ne bocatũbiriboya. Ōpa arĩ pepiribũ gua: “Ne bocatũsome mari. Eropirã mari sĩrirãca,” arĩ pepiribũ gua. <sup>9</sup> Eropirã “Marire wejẽcãrãcoma,” arĩ pepiribũ gua. Gua eropa ñero taribũ Goãmũ dihtare gua guñaturaboro dopa. ĩgupũ sĩrinirãre masugũ ãhrimi. Eropa ĩgure guñaturarã gua gamero gua bocatũbirirare masia. “Goãmũ ta marire itamumi,” arãa pare. <sup>10-11</sup> Guare guhyaquerecũ ta ĩgu itamuro mera taribũ. Pũhrũgue sãre dipaturi guare taugũcumi. Mua sã guare itamumorã mua Goãmũre serẽbasacũ sãre ĩagu ĩgu guare taugũcumi. “ĩgu ta guare taugũcumi,” arĩ masia mari. Eropirã ĩgu guare taucũ ĩarã, ĩgure “Ōhaa” arĩrãca mũapũ. Mua bajarã serẽrare ĩgu yũhricũ ĩarã “Ōhaa, diaye ta ãhraa,” arĩrãca mua bajarã Goãmũre.

*Pablo Corintogue ĩgu wadiarare wereñumi*

<sup>12</sup> Eropirã gua iirare guñarã mucubiriri mera ðpa arĩ pepia gua: I yebare Goãmũ ĩgu itamuro mera ñeri mariro ðari mera masare wapicũ buhebũ. Mua sãre ðaro wapicũ buhebũ. Ōpa iirã gua masiri mera iibiribũ. Goãmũ guare ĩgu mahicũ ĩgu turari mera eropa iibũ gua. <sup>13-14</sup> Eropirã ðaro were mũare gojabeorã diaye ta werebũ mũare ðaro mua masiburire. Dohpague guare ðaro masinibea mua. Gua árĩricũre mua turaro masicũ gahmea gua. Eropirã mari Opũ

Jesucristo dujaricũ gua mera mucubirirãca mũa. Mũa mera gua mucubiridiro dopa ta mũa sã gua mera mucubirirãca.

15-16 Eropa arĩ pepigu Macedonia yebague wagu mũa pohrogue wamũtadiarabũ. Eropigu mũare ñhatariwahgãboya. Eropigu erogue ejadigu dujarigu dipaturi mũa mera bajamenurigã árĩboya yũhũ. Eropirã pesubu mũa mera yũ árĩcũ ñarã turaro mucubiriboya mũa. Mũa pohrogue yũ árĩcũ ñanirã Judea yebague yũ wacũ ñarã yũre itamuboya mũa. 17 “Wagura,” yũ arĩcũ peenirã árĩrã, yũ wabiricũ ñarã “Pablo Jesure umupeobirã iro dopa gũyagu iĩnumi,” ¿arĩ pepiri mũa? “‘Wagura,’ arĩqueregũ ñgu gamero mari pohro aridiabirĩnumi ñgu,” ¿arĩ pepiri mũa yũre? “Ígu arĩdiro dopa iibeami,” ¿arĩ pepiri mũa? 18 Eropa arĩ gũyagu iibeaa yũhũ. Eropigu “Ígura,” arĩgu yũ arĩdiro dopa ta diaye ta iiaa yũhũ. Irire masimi Goãmũ. 19 Yũhũ, Sila, Timoteo mera Jesucristo Goãmũ magu yare mũare werebũ. Ígu Jesucristo “Ígura,” arĩgu, diaye ta iigu ãhrimi. Goãmũ ñgu arĩdiro dopa ta Cristo iimi. 20 Árĩpehreri ñgu Pagu ñgu masare “Õpa ðaro iigura,” arĩ wererare Cristo iipehocãdi árĩmi. Ígu eropa iigu árĩcũ gua ñgu yare gajirãre werea Goãmũre erã umupeoboro dopa. 21 Cristo yarã marire árĩnguicũ iigu Goãmũ ta ãhrimi. Eropigu ñgu yare weremorãre marire apimi ñgu. 22 Eropigu ñgu yarã mari árĩcũ ñagu irire marire masicũ iimi ñgu. Eropigu ñgu Espĩritu Santore mari mera arĩdoremi ñgu. Mari mera árĩcũ ñha Goãmũ ñgu marire ðaro iiburire masia mari.

23 Dohpaguere yũhũ mũa pohro wabirirare diaye ta weregura mũare. Yũ wereri diaye árĩcũ Goãmũ masimi. Ígu ta yũ pepirire masimi. Mũa ñero iira dipuwaja turidiabigu mũa pohroguere wadiabiribũ. Erãre bajawerecũ iiri, arĩgu mũa pohroguere Corintoguere wabiribũ. 24 Eropirã “Mũare dorerã ãhraa gua,” arĩrã iibeaa. Eropirã “Õpa Cristore umupeoro gahmea mũare,” arĩrã iibeaa gua. Mũa Cristore ðaro umupeotuhabũ. Mũare umupeonemocũ iirã mũa ðaro mucubirirã árĩcũ iidiaca gua.

## 2

1 Wabigu ðpa arĩ pepibũ: “Dipaturi erãre bajawerecũ iidiabeaa. Eropigu dohpaguere wabeaa,” arĩ pepibũ. 2 Mũare bajawerecũ iidiabeaa. Mũa bajawerecũ ñagu yapũ mucubiribiriboya. Eropirã yũre mucubiricũ iimorã árĩbiriboya mũa sã. 3 Eropigu mũa pohrogue wabiribũ. Wabigu mũa árĩricũre amuboro dopa mũare gojabeobũ. Mũa yũre mucubiricũ iibonirã árĩquererã ta yũre bajawerecũ iiboya mũa mũa pohrogue yũ wacũ. Mũa mera yũ mucubiricũ mũa sã yũ mera mucubirirãca. Irire masia yũhũ. Eropigu mũa mera bajawerediabigu “Wabeaa,” arĩ, carta gojabeobũ. 4 Eropigu mũare gojagu wũaro pepigu ñero sĩporãcũgu, turaro co deco wiriri mera mũare gojabeobũ. Eropa gojagu mũare bajawerecũ iidiabiribũ. Mũare yũ burigã mahirare mũare masicũ iidiagu mũare eropa gojabeobũ.

*Erã mera majagu ñgu ñero iirare cãdijidoreñumi Pablo Jesu yarãre*

5 Mũa mera majagu ñgu ñero iira mera yũre bajawerecũ iimi ñgu. Mũare ñgu turaro bajawerecũ iidiro dopa ta yũ sãre wũaro bajawerecũ iimi ñgu. Ígu marire eropa burigã bajawerequerecũ ta wũatariaro dipuwaja moadorebeaa dohpaguere. 6 Bajarã mũa mera

majarã ĩgu ñero iira dipuwaja moatuhañorã. Iripëta dipuwaja moa duhuro gahmea ĩgure. <sup>7</sup> ĩgure mua dipuwaja moaniguicũ burigã bujawerebocumi ĩgu. Eropigu Cristo yare duhubocumi. Eropirã ĩgu ñero iirare cãdijique mua. ĩgure itamuque ĩgu ðaro siporãcũboro dopa. <sup>8</sup> Eropirã ĩgure ðaro iique mua ĩgure mua mahirare ĩgu masiboro dopa. Mua eropa iicũ burigã gahmea yũhũ. <sup>9</sup> Ero core muare gojabeogu “¿Diaye ta yure yuhirãcuri?” arĩ pepigu gojabeobũ muare. Yure mua yuhricũ ĩadiagu gojabeobũ. <sup>10-11</sup> Dohpaguere ĩgu ñero iirare mua cãdijicũ ĩagu yũ sã ĩgu ñerire cãdijigura. Yure ñero iibirimi ĩgu. Muapure ñero iidi arĩmi. ĩgu eropa iidigu arĩquerecũ ta ĩgu ñero iirare cãdijia yũ sã. Muare ðaro itamudiagu Cristo ĩgu ĩhabeoro ĩgu ñero iirare cãdijia. Irire cãdijia Satana marire ĩgu tarinugabiriboro dopa. ĩgu mari ñerire iicũ gahmemi. Irire ðaro masia. Eropirã Jesu yarã erã ñeri iirare guñaniguibea mari Satana yapure iiri arĩrã.

*Troa waĩcũri maca arĩgu Titore bocabigu wũaro bujawere pepĩnumi Pablo*

<sup>12</sup> Eropigu Troa waĩcũri macague Cristo yare buhegu ejaribũ. Erogu yũ ejacũ bajarã masa ðari buherire peediarã arĩma. Mari Opũ ĩgu itamuri mera ĩgu yare yũ buherire peerã bajarã masa arĩma. <sup>13</sup> Eropa arĩquerecũ ta mari acaweregu Titore bocatĩribirinijagu wũaro bujawere pepigu erore arĩmasibiribũ, Eropigu ero majarãre goeriseretuhagu Macedonia yebague waha wabũ ĩgure amagu.

*Goãmu marire tarinugacũ iimi, arĩ gojañumi Pablo*

<sup>14</sup> Goãmure mucubiriri mera “Õhaa,” arãa. Goãmu ñerire arĩpehrerire tarinugagu aħrimi. Cristo yarã mari arĩcũ ĩagu marire tarinugacũ iimi. Poresudiro poresu sehyaboro dopa ta aħraa mari. Poresu sehyaro dopa ta Goãmu dorero mera arĩpehreroguerẽ Cristore masicũ iiaa mari. Eropa ĩgure masirã erã ðaro pepima. <sup>15</sup> Cristo yarã arĩrã masare Cristore guñacũ iiaa mari. Mari eropiicũ ĩha Goãmu mucubirimi. Masare Cristore guñacũ iicũ erã ĩgu arĩrere masima. Goãmu ĩgu taumorã Cristo arĩrere masima. Gajirã erã peamegue wamorã sã Cristo arĩrere masima mari mera. <sup>16</sup> Cristo arĩrere masirã erã peamegue wamorãpũ peamegue erã waborore masima erã. Goãmu ĩgu taumorãpũ arĩpehrerinũri ĩgu mera erã arĩburire masima. Eropirã ire Cristo yare mari mari gamero mera buhe ojogorocũmasibea. Goãmu ĩgu itamuri mera ta mari ĩgu yare buhe ojogorocũmasia. <sup>17</sup> Bajarã gajirã Goãmu yare buhemaacãma niyerure wajatadiarã. Guapũ erã iro dopa ta iibeaa. Guayaro mariro Cristo ĩgu turari mera ĩgu yare buhea gua. Goãmu guare ĩgu obeorã arĩrã ĩgu ĩhurore ðaro buhea gua.

### 3

*“Õpa iigura,” Goãmu ĩgu arĩ werepirare mama buherire wereñumi Pablo*

<sup>1</sup> ¿Dipaturi gua arĩricũrere muare wererã iiri gua mua pepicũ? Gajirã muare erã buheboro core erã buheri queoro arĩrere masidiarã erã gojarapũre serẽmũhtabu mua erãre. ¿Guare masituhakererã ta iripũnore serẽri mua guare? ¿O gajirã pohrogue gua buherã warã iripũnore guare aĩgãro gahmeri mua pepicũre? <sup>2</sup> Iripũnore gamebeaa

gua. Muapure òari gohrotonirāre árīpehrerā gajirā ĩarā muare gua òaro buherare masirācoma. Muare gua buhecũ Cristore umupeorā ĩgu yarā árīnugabu mua. <sup>3</sup> Cristo yarā mua árīcũ ĩarā masa muare Goāmũ ya buheri gohrare gua queoro buherare masituhama. Muare buherā Goāmũ yagu Espĩritu Santo ĩgu itamuri mera buheabu. ĩgu Goāmũ ojocarĩgu gohra āhrimi. Gua eropa buhecũ peerā Cristore òaro gahmeabu mua. Eropa gamerā mua árīcũ gajirā muare ĩarā Cristo yarā mua árīrĩre òaro masima. Eropa masirā muare Goāmũ ya buheri gohrare gua queoro buherare masima masa.

<sup>4</sup> Eropa wacũ masia gua Goāmũre guñaturari mera. Cristo ĩgu itamuri mera eropa guñaturaniguia mari. <sup>5-6</sup> “Gua gamero i mohmerire iiaa gua,” arĩmasibea. Goāmũ ĩgu itamuri mera ire iiaa gua.

Eropĩgu dohpaguere ĩgu wererire òari buherire Goāmũpu òaro guare buhemicũ iimi. Eropa buherā iribojegue ĩgu doreri Moisere ĩgu apira dorerire buhebeaa. Espĩritu Santo mera mari Goāmũ mera òaro árĩburĩpũre buhea gua. ĩgu dorerare mari gamero mera ne bocatĩubeaa. Eropa mari bocatĩubirira dipuwaja peamegue waboya mari. Espĩritu Santopũ mari Goāmũ mera árīpehrerĩnũri òaro árĩniguicũ iimi. Òari buheri buhecũ peeñanirāre òaro árĩniguicũ iimi.

<sup>7</sup> Goāmũ ĩgu dorerire utāmĩjirigue gojanĩyagu Moisere apĩñumi. ĩgu eropa apira pũhrũ ĩgu árĩro goesiriri dehyoamũriyoro Moisere “Goāmũ ĩgu apira òari āhraa,” arĩro dopa. Eropĩro Moise diapo bũrigā goesiriyoro. Cuimĩju árĩyoro. Pũhrũ ĩgu goesiriri pehrerĩsubu ĩgu árĩquerecũ ta masa ĩgũre ne ĩamehtumasibirĩñuma. Iri dorerire ĩgu apira pũhrũ iri dorerire iibirā masa dipuwajacũrā peamegue wamorā wañuma. Eropĩro iri doreri masare peamegue wadorequerero ta, Goāmũ ĩgu árĩro goesiriri mera árĩnũgayoro. <sup>8</sup> Iri doreri tauro òari buheripũ “Jesucristo masare taumi,” arĩ buheri òataria. Iri buherire gajirāre mari buhecũ erā òaro peecũ Goāmũ ta erā mera árĩgũcumĩ ĩgu Espĩritu Santo mera. Eropĩro iribojegue maja doreri tauro Cristo ya buheripũ òataria. <sup>9</sup> Goāmũ Moisere apira doreri iribojegue maja masare peamegue wadoreyoro. Eropa dorequerero Goāmũ ĩgu goesiriri mera árĩnũgayoro. Iri tauro òari buheripũ Goāmũ ĩgu turari mera āhraa. Iri buheri mera òarā wahama masa Goāmũ ĩgu ĩacũ. <sup>10</sup> Iribojegue Goāmũ ĩgu doreripũ turari árĩquerero dohpaguere bu gohra ta āhraa. Òari buheripũ iri tauro turatariari āhraa. Iri buheri mera umaroguere mari wamasia. <sup>11</sup> Iribojegue Goāmũ ĩgu doreri Moisere ĩgu apira doreri Goāmũ goesiriri mera árĩnũgaquerero ta pehreburi árĩyoro. Òari buheripũ “Jesu marire taugũcumĩ,” arĩ buheripũ árĩniguicāroca. Eropĩro “Iri doreri tauro òari buheripũ òataria,” arĩ masia mari.

<sup>12</sup> Irĩre eropa masirā, gũiro marĩro òari buherire òaro werepehocāa gua. <sup>13</sup> Moise gua iro dopa árĩbirĩñumi. ĩgũre Goāmũ ĩgu goesiriri pehrerore yũ acawererā masirĩ arĩgu dopa ĩgu diapore suhri gasiro mera cāhmotacāñumi Moise. <sup>14</sup> Moise ĩgu diapore ĩgu cāhmotacũ Goāmũ goesiririre ĩgu òarĩre erā ñecũ sumarā ĩhamasibirĩdiro dopa ta erā dohpaguere òari buherire òaro masibeama. Goāmũ wererire iribojegue erā gojarapũrĩre erā buherā ne masibeama erā Israe masapũ. Cristore gamebirā masisome erā. ĩgũre umupeorā

tamera ĩḡu yare masirācoma. <sup>15</sup> Dohpague säre Israe masa Goāmũ dorerire Moiserere ĩḡu apirare buhequererā, eräre cāhmotaro dopa ta ne masibeama erā. <sup>16</sup> Erā mari Opure Jesucristore erā gamecũ ĩḡu ta eräre masicũ iimi. Iri cāhmotariñere aĩro dopa ta mari Opũ marire ĩḡu yare ōaro masicũ iimi. <sup>17</sup> “Mari Opũ,” arĩrā Espĩritu Santore arĩrā iiaa. Mari Opũ ĩḡu Espĩritu Santo mari mera ĩḡu árĩcũ ĩḡu yarā āhraa. Eropa árĩrā “Iribojegue maja dorerire iiro gahmea Goāmũ yarā árĩmorā,” arĩbeaa mari. <sup>18</sup> Eropirā Jesu yarā árĩrā, Jesucristo ĩḡu ōarire ĩhmurā iiaa mari. Eropigũ mari Opũ Espĩritu Santo marire gohrotocũ iimi. ĩḡu eropa iicũ Cristo ōagu árĩdiro dopa ta ōarā warā iiaa mari sã.

#### 4

<sup>1</sup> Goāmũ guare mojomoro ĩagu, ōari buherire weremoräre apimi guare. ĩḡu eropa apicũ masirā ĩḡu yare buherā duhudiabeaa. <sup>2</sup> Masa ĩabiro ñerire iicoreri guhyasĩuri āhraa. Irere guapũ ne iibeaa. ĩḡu yare buherā guyarire buhebiribũ. Eropirā gua Goāmũ yare ne gohrotobeaa. Eropa iibirā ōari buherire ōaro diaye buhea gua Goāmũ ĩḡu ĩhuro árĩrā. Gua eropa árĩricũre arĩpehrerā ōaro masima guare ĩarā gohra. <sup>3</sup> Gua iri buherire ōari buherire werea. Gua irire buhequerecũ ta gajirā masibeama. Eropa masibirāpũ peamegue wamorā āhrima. <sup>4</sup> Satana ñegũ i yeba majarā opũ eräre Goāmũ yare masibiricũ iimi. Cuiiri ĩhajabirā erā ĩhajabiro dopa ta masibirā wacũ iimi eräre. Ōari buherire Cristo ĩḡu turarire erā masibirā wacũ iimi ĩḡu eräre. Cristo Goāmũ ĩḡu árĩricũre opami. ĩḡu Cristo Goāmũ gohra ta āhrimi. <sup>5</sup> Gua buherā “Guapũre umupeoque,” arĩ buhebeaa. Ōpa arĩ buhea gua: “Jesucristopũ āhrimi mari Opũ,” arĩ buhea gua. Guapũ Jesure yũhrirā āhraa. Eropirā mũare itamurā āhraa gua. <sup>6</sup> Negohraguere ōpa arĩ dorepũ Goāmũ i mũũ naitĩaro árĩcũ: “Boyoro árĩque,” ĩḡu arĩcũ boyoa wayoro. Eropigũ dohpaguere ĩḡu ta iri turari mera marire masicũ iimi boyoro árĩro dopa. Eropa marire masicũ iigu ĩḡu ōaro árĩricũre marire masicũ iimi. Jesucristore masirā ĩḡu Pagu ĩḡu ōaro árĩricũre masia mari.

#### *Cristo turari mera mari āhraa, arĩ gojañumi Pablo*

<sup>7</sup> Eropa masirā árĩrā, Goāmũ ĩḡu turarire gajiräre masicũ iiaa. Eropa iirā arĩquererā ta turabirā āhraa guapũ. Mátasoro mata wahrirasoro iro dopa ta gua sã turabirā āhraa. Gua eropa turabirā arĩquererā ta gua masare Goāmũ yare werecũ ĩarā, gua gamero mera iimasibirirare ĩarā ōpa arĩ masirācoma erā. “Goāmũ turari mera eropa arĩ wereniguima marire,” arĩrācoma masa. Eropirā Goāmũpũre umupeorācoma. <sup>8</sup> Árĩpehrerā gajirā guare ñero iiquererā ta Goāmũ guare taucũ erā guare tarinũgabeama. Eropirā gua gariborequererā ta ne Goāmũ yare buhe duhudiabeaa. <sup>9</sup> Guare erā ñero iiniguquerecũ ta Goāmũ guare eropa itamuniguicāmi. Guare erā pamehpiquerecũ ta ĩḡu itamuri mera sĩribeaa gua. <sup>10</sup> Erā wejēsũmorā árĩcārā tiiaa gua Cristo i yebaguere ñero ĩḡu taridiro dopa ta. Erā wejēsũmorā arĩquererā eropa árĩniguirā tiiaa gua sã Cristo ĩḡu ojocaririre ĩhũmorā. <sup>11</sup> Eropirā mũuri nũcũ gajirā guare wejēmaja guhya āhrima Cristo yarā gua árĩri dipuwaja. Ōpa ta ñero tariquererā

áriniguia gúa Cristo ígu ojocaririre íhmumorã. <sup>12</sup> Eropirã mware gúa buheri dipuwaja gware gajirã wejẽmaja guhya áhrrima. Gúa buherire mwa peenirãpũ umuri nũcũ Goãmũ mera árĩmorã áhrraa.

<sup>13</sup> Goãmũ yare erã gojarapũ opa áhrraa: “Goãmũre umupeobũ. Eropigu ígu yare werebũ,” arĩ gojañumi iribojegue majagũ. Gúa sã yujuropa ta áhrraa. Goãmũre umupeorã ígu yare werea. <sup>14</sup> I sãre ðaro masirã ígu yare werea gúa. Cristo ígu sĩrira pũhrũ Goãmũ ígũre masudi árĩmi. Eropigu Cristo yarã mari árĩcũ íagu ígu mari sãre masugũcumi. Ígu eropa masura pũhrũ ígu pohrogue aĩgãgũcumi marire. <sup>15</sup> Eropirã mware itamudiarã ñero taria gúa. Eropirã Cristo yarã mwa bajarã warã, bajarã mwa Goãmũre mucubiriri mera umupeorãca. Ígũre “Ôhaa,” arĩrãca.

<sup>16</sup> Mwa eropa umupeocũ íarã, gúa ñero tariquererã ta bujawerebeaa. Eropirã Cristo yare were duhubeaa. Gúa dũpũ umuri nũcũ turabiri wahgãro iiaa. Eropã turabiri wahgãquererã ta ðaro sĩporãcua Jesucristore guñaturari mera. <sup>17</sup> Dohpaguere ñero tariquererã ta pũhrũ ñero tarisome. Eropirã Cristo yare were duhubeaa. Iri ñero mari tariri pehrea waroca. Eropirã marire merogã ñero tariro gahmea. Eropã mari ñero tarinirã árĩrã, pũhrũgũere wũaro mucubiriri mera árĩniguirãca Goãmũ mera. Eropirã mari ñero taridiro tauro burigã mucubiriri mera eropa árĩniguirãca. <sup>18</sup> Eropirã mari íarire dohpaguere mari warore guñanũrubeaa. Mari íabiriripũre pũhrũ mari Goãmũ mera árĩniguiburire guñanũrua. Mari dohpaguere íari pehrea waroca. Mari íabiriripũ árĩniguirãca.

## 5

<sup>1</sup> I sãre masia mari: Wihire mari cóãdiro dopa ta mari dũpũre cóãrãca. Eropigu mama wihi iibodiro dopa ta Goãmũ mama dũpũre iigũcumi. Eropigu iri dũpũre marire ogũcumi. Eropirã umaroguere eropa árĩniguirãca iri dũpũ mera. Irire masirã ñero tariquererã Goãmũ yare duhubeaa. <sup>2</sup> Eropirã iri dũpũre umaro maja dũpũre turaro gamerã, mari eropa coreniguirã iiaa. <sup>3</sup> Suhrirore turaro mari sañadiaro dopa ta iri dũpũre turaro gahmea mari. Eropã ta cohrea mari iri dũpũ marirã arĩdiabirã. <sup>4</sup> Dohpaguere maja dũpũre cóãdiabiriquererã umuri nũcũ Goãmũ mera mari árĩburi dũpũre burigã gahmea mari. Eropirã i mari dũpũ sĩriburi dũpũ iri árĩcũ masirã, mama dũpũ mera Goãmũ mera eropa árĩniguidiaa mari. <sup>5</sup> Mari ígu mera árĩniguiborore amuyudi árĩmi Goãmũpũ. Eropã amuyugũ ígu Espĩritu Santore omũhtami marire. Eropigu ígu Espĩritu Santo mari mera árĩcũ íha marire Goãmũ ígu iiborore, “Diaye ta áhrraa,” arĩ masia mari.

<sup>6</sup> Eropirã Goãmũ mera sĩporã turarã áhrraa. Güiro mariro áhrraa mari. I sãre mari masia. I dũpũ mari árĩmũhtara dũpũ mera árĩrã, mari Opũ pohro árĩnibeaa. <sup>7</sup> Umãro majare Goãmũ sãre mari íabiriquererã ta “Ígu diaye ta áhrrimi,” arĩ masia mari. Eropirã ígũre umupeoa. <sup>8</sup> Eropirã mari Goãmũ pohro waborore masia. Mari dũpũre i yeba maja dũpũre cóãrã mari Opũ mera umarogue mari árĩdiaa. <sup>9</sup> Eropirã Cristore mucubiricũ iidiaa mari. I yeba maja dũpũ mera árĩrã ígũre mucubiricũ iidiaa mari. Umãroguere árĩrã sã ígũre mucubiricũ iidiaa. <sup>10</sup> Árĩpehrerã Cristo pohrogue mari wacũ íagu ígu mari iirare



beyegucumi. Eropiro mari iira masisũroca. Eropigu marire ðarire mari iira wajare ogucumi. Ñerire mari iira waja sãre ogucumi. Īgu eropa beyegu áricũ masirã ĩgure mucubiricũ iidiaa mari.

*Goãmure mari mera ðaro áricũ iimi Cristo, arĩ gojañumi Pablo*

<sup>11</sup> Eropirã guhyadiaro mera mari Opure umupeoro gahmea marire. Īgu marire eropa beyeburire masirã, Cristo yare masicũ iiaa gua masare. Erãre gũisãrã, ĩgure umupeocũ iidiaa gua. Gua ðarã ářĩrire Goãmũ ðaro masimi. Gua eropa iĩrire mũa sãre ðaro masicũ gahmea yũhũ. <sup>12</sup> Dipaturi gua ðarã ářĩrire mũare wererã iibea. “Gajirãre tarinũгаа,” arĩmaacãnirãre mũa wereburire eropa wererã iiaa gua mũare. Erã basi eropa arĩ pepirãpũ erã pepiriguere ñerã, guyaricũrã ářĩquererã ta masa erã ĩhuro dihtare ðarã iro dopa iirima. Eropirã mũa guare mucubiriboro dopa, “Óaro iirã iima,” gajirãre mũa guare arĩ cáhmetoburire i ářĩpehrerire mũare were gojarã iiaa. <sup>13</sup> ¿Gua ðpa arĩ wererã pee masibirã áhriri gua mũa ĩacũ? Masa guare ĩarã pee masibirã iro dopa ĩhama guare. Goãmũ yare gua werecũ ĩarã eropa ĩabocoma guare. Erã eropa arĩ ĩabonirã ářĩquererã ta pee masirã ta áhraa gua mũare eropa itamumorã. <sup>14</sup> Cristo ĩgu guare mahicũ ĩarã masare eropa itamua. Īgu eropa mahicũ ĩarã ĩgu yare eropa buheniguia gua. Marire mahigu yujugu ta Cristo mari ářĩpehrerã ya ñeri dipuwajare sĩridi ářĩmi. Eropigu ářĩpehrerã mari ñeri dipuwajare sĩrimorã ářĩnirãre sĩribasadi ářĩmi. Irire guñarã ĩgu yare iiniguia gua. <sup>15</sup> Ářĩpehrerã mari ñeri dipuwajare sĩridi ářĩmi ĩgu mari gamero dopa mari iibiriboro dopa. Eropigu ĩgu gameripure iidoregu sĩridigu ářĩmi ĩgu. Maripure Goãmũ pohrogue mari ejaborore eropa sĩridi ářĩmi. Īgũpũ mari ya ářĩburire sĩrira pũhũ masa mũariadi ářĩmi. Eropirã mari gamero dopa mari ñaribejarire iibirã ĩgu yare iiro gahmea pare marire. <sup>16</sup> Eropirã dohpaguere Jesure gamebirã gajirã erã ářĩricũre ĩha werewũaro dopa ne arĩ ĩabeaa gua. Iribojeguere gua Cristore eropa ĩaquererã dohpaguere ĩgure ðaro masia. <sup>17</sup> Eropirã ářĩpehrerã Cristo yarã warã ðaripũre gohrotoa mari. Iribojegue mari gamero mari ářĩrare duhucãa mari. Dohpaguepũre ðaripũre corerã iiaa mari.

<sup>18</sup> Goãmũpũ marire ðarire gohrotocũ iimi. Iribojegue mari Goãmũ mera ðaro ářĩbirimũřiribũ. Eropigu Jesucristo mari ñeri iira dipuwaja sĩribasara mera Goãmũ marire ĩgu mera ðaro ářĩcũ iidi ářĩmi. Eropa iigu guare ĩgu yare buhedoregu apimi. Eropa buherã, gajirãre Goãmũ mera erã ðaro ářĩcũ iiaa gua sã. <sup>19</sup> Ópa arĩ masare weredoremi Goãmũ guare: “Mari masa ĩgu mera ðaro ářĩbirinirã ářĩquerecũ Goãmũ Cristo sĩrira mera marire ĩgu mera ðaro ářĩcũ iimi. Eropigu Cristore mari umupeocũ ĩagu mari ñeri dipuwajare dipuwaja moabeami Goãmũ marire,” arĩ weredoremi Goãmũ guare. <sup>20</sup> Eropirã Cristo yare weremorã ĩgu obeonirã áhraa gua. Goãmũ ĩgu basi mũare ĩgu werebodiropo ta guapũ mũare ðpa arĩ werea: Cristore werebasarã iiaa. Eropirã mũare werea. Goãmure mũa ĩhaturirare iripẽta duhuque. <sup>21</sup> Cristo ĩgu ñerire iibiriquerecũ ta Goãmũ ĩgure mari ñeri dipuwajare sĩridoredi ářĩmi. Eropa iigu mari ñeri dipuwajare dipuwaja moadi ářĩmi Goãmũ ñeri dipuwajare dipuwaja moabeami

Goãmũ marire,” arĩ Jesucristore. Īgu eropa iidi árĩmi Cristo yarã mari wacũ, Goãmũ iro dopa òarã mari árĩboro dopa.

## 6

<sup>1</sup> Goãmũ eropa iigu ĩgu mũare ĩgu òaro mojomoro ĩarare ĩhmumi. Eropirã Goãmũ yare mohmebasarã árĩrã ire turaro mũare iidorea gua. Goãmũ òaro iirare òari buherire mũa peediro dopa ta iique mũa. Mũa peediro dopa ta mũa iibiricũ mũa peera duhpiburi árĩbeaa. <sup>2</sup> Ōpa arĩmi Goãmũ ĩgu yare erã gojarapũgue:

beamĩ Goãmũ marire,” arĩ Mũare yũ òaro iiburinũri árĩcũ mũa serẽrire pee yũhrigũra. Eropĩgu mũare peamegue wabonirãre yũ tauburinũri árĩcũ itamugũra, arĩmi ĩgu.

Peeque mũa. Dohpaguere Goãmũ masare ĩgu òaro iiburinũri ãhraa. Dohpaguere masa Jesucristore umupeoburinũri ãhraa Goãmũ erãre tauboro dopa. Eropirã dohpaguere ĩgũre umupeoro gahmea, arĩ werea gua.

<sup>3</sup> “¿Ōari buheripũre gamebiribocuri?” arĩrã, ne merogã gajirãre ñero iibeaa gua. Gajirãre ne ñero arĩ wereniguibeaa. <sup>4</sup> Irire iibirã Goãmũ pohro majarã gua árĩrire mũare masicũ iidiaa. Eropirã ĩgu yare buherã òpa ãhraa gua: Ñero tarirã gajino moorã bocatĩua. Gũare erã ñero iiquerecũ ta guaro mariro ãhraa. <sup>5</sup> Ōpa ñero taribũ gua: Masa gũare pacũ, peresu erã iicũ, masa bajarã gũare wejẽdiarã erã gaguĩnguicũ peerã ñero taribũ gua. Gua turaro mohme oẽarã sã, wũja pũriquerẽcũ ta carĩbirã sã, oaboarã sã ñero taribũ. <sup>6</sup> Eropirã òaro árĩricũri mera diaye buhebũ. Eropirã Goãmũ yare buherã òaro masiri mera buhebũ mũare. Eropirã ne guabiribũ gua. Eropirã òaro mera buhebũ gua mũare. Eropã iirã Goãmũ pohro majarã gua árĩrire ĩhmurã iibũ gua mũare. Espĩritu Santo ĩgu itamuri mera eropa ta Goãmũ pohro majarã gua árĩrire ĩhmurã iibũ gua mũare. Eropirã diaye mũare gua mahicũ ĩarã ĩgu pohro majarã gua árĩrire masia mũa. <sup>7</sup> Eropirã òari buherire diaye mũare werecũ ĩarã, Goãmũ turari mera gua iicũ ĩarã, ĩgu pohro majarã gua árĩrire masia mũa. Ōaripũ árĩpehreri gua iira gua mojo iro dopa ãhraa gua òaro cãhmotaboro dopa. Iri òarire iirã gua watĩre cãhmotarã iiaa. Eropirã iri òari gua iira mera gua ĩgũre tarinũgaa. <sup>8</sup> Eropã iirã gajirã gũare umupeoma. Gajirãpũ gũare umupeobeama. Gajirã òaro wereniguima gũare. Gajirãpũ ñero arĩ wereniguima gũare. Diaye gua werequerecũ ta “Gũyarã ãhrima,” arĩ weresãma gajirã gũare. <sup>9</sup> Gajinũrire gũare masirã dopa iima. Gajinũrire gũare masibirã dopa iima. Gũare erã wejẽdiaquerecũ ta ojocarinia gua. Erã burigã panirã árĩquererã ta ojocaria gua. <sup>10</sup> Gua yujuyerinũri bujawererã árĩquererã ta, eropa mucubirinũgia. Mojomorocũrã árĩquererã ta erãre òari buherire buherã erãre wũaro doberire gua obodiro dopa ta iirã iiaa erãre. Gajino moorã árĩquererã ta, diaye ta Goãmũ yare opapehocãa gua.

<sup>11</sup> Corinto majarã, yũ acawererã, mũare òaro mera werepeho gojabũ gua mũare. Mũare turaro mahirã eropa werebũ. <sup>12</sup> Gũapũ mũare mahi duhubirabũ. Mũapũ gũare mahibiriñaria. <sup>13</sup> Eropĩgu yũ porãre yũ werebodiro dopa ta mũare weregũra: Mũare gua pepidiro dopa ta mũa sã eropa ta òaro pepique gũare. Eropirã gũare mahique mũa.

*Cristore umupeobirãre wapicudorebiriñumi Pablo*

<sup>14</sup> Eropirã Cristore umupeobirã mera eropa wapicuniguibiricãque. Erã mera majagu árĭbita. Yujuro mera árĭbeaa mũa. Ōarire iigu, ñerire iigu mera ōaro árĭmasibeami. Boyoro iro dopa árĭrã Goãmure gamerã áhřima. Naitĭaro iro dopa árĭrã Goãmure gamebirã áhřima. Eropirã erã perã game wapicumasibeama. <sup>15</sup> Eropigu Cristo watĭ mera yujuro pepibeami. Eropigu Cristo yagu, Cristore umupeobigu mera ōaro game wapicumasibeami. <sup>16</sup> Goãmure umupeori wihigue goãmarã wéanirãre mari apicũ queoro wabeaa. Eropa ta Cristo yarã Cristore gamebirã mera wapicuniguicũ queoro wabeaa. Erã pe curu majarã yujuro mera erã árĭmasibeama. Goãmũ wihi iro dopa áhřaa mari. Īgu wihi árĭro dopa ta mari mera áhřimi ĩgu. Ōpa arĩñumi Goãmũ ĩgu yare erã gojarapũgue:

Erã mera ta árĭgura yũhũ. Eropigu erã watope ta eropa árĭniguigũra. Yũhũ Goãmũ erã opu árĭgura. Eropirã erãpu yaharã masa árĭrãcoma, arĩñumi ĩgu.

<sup>17</sup> Eropigu ōpa arĩnemoñumi ĩgu mari Opu:

Erã ñerã mera ne dujabitã. Eropirã erãre wapicubita. Yũre gamebirã yare ñerire ne iibiricãque. Eropigu yũpu mũare wapicũgura.

<sup>18</sup> Eropigu mũa pagũ árĭgura. Mũapu yũ porã árĭrãca, arĩñumi mari Opu turatariagu.

**7**

<sup>1</sup> Yũ acawererã, yũ mahirã, mũare ire weregura: I árĭpehrerire Goãmũ marire ĩgu eropa arĩ werecũ ĩarã árĭpehrerire mari dũpũre goroweorire duhurã. Eropirã mari pepiri sãre goroweorire duhurã. Eropirã Goãmure ōaro umupeori mera ñero iiro mariro árĭrã mari.

*Pablo mucubiriri mera wereñumi Corinto majarãre*

<sup>2</sup> Ōaro guare mahique. Ne merogã mera ñero iibiribũ gua mũare. Eropirã gua buheri mera mũare ñero iicũ ne iibiribũ gua. Ne yujugure mũa mera majagure gayari mera waja gamebiribũ. <sup>3</sup> Eropa arĩgu “Dipuwajacurã áhřaa mũa,” arĩgu iibeaa mũare. Mũare mahia gua. Irire mũare weretuhabu. Ojocarirã yuju curu ta áhřaa mari. Mari sĭrira pũhrũgue sãre yuju curu ta árĭrãca mari. <sup>4</sup> Ōaro mũa iirare masia yũhũ. Eropigu mũare guñabeogu mucubiria. Eropirã gua ñero taririsubure mũa ōaro iira querere pee burigã mucubiribũ yũhũ.

<sup>5</sup> Eropi Macedonia yebague gua ejara pũhrũ, erogue ejarã ne soobiribũ gua. Eroguere ñero taribũ gua. Gajirã gua mera game dũyasoma. Eropirã “Cristo yare duhubocoma,” arĩrã Cristo yarãpũre wũaro guñaricubũ gua. <sup>6</sup> Gua eropa ñero taricũ Goãmũpu guare ōaro sĭporãcũcũ iimi. Īgu marire bũjawererãre mucubiricũ iigu áhřimi. Eropigu Tito gua pohrogue ĩgu dujariro mera guare mucubiricũ iimi Goãmũ. <sup>7</sup> Tito ĩgu eracũ ĩarã mucubiribũ. Iri dihtare mucubiribiribũ. Mũare ĩgu ōari quere werecũ sãre turaro mucubiribũ. Yũre mũa ĩadjarare weremi guare. Yũre mũa bũjawerera sãre weremi ĩgu. Yũre “Goãmũ yare iigu arĩ Pablo,” mũa gajirãre arĩ werera sãre weremi ĩgu. Īgu eropa arĩcũ peegu turaro mucubiribũ yũhũ.

<sup>8</sup> Ero core yũhũ mũa ñero iirare were gojabeorapũ mera mũare merogã bũjawerecũ iiribũ. Eropa iidigu árĭqueregu ta “Iri carta mera

ñero iibu,” aríbeaa. Iripüre maa buhera pührü bujawereyoro maa. Eropigu ne gojabeora pührü ta “¿Ñero iiri yühü?” arí pepiribu. Eropa aríqueregu ta “Ñero iibu,” aríbeaa dohpaguere. <sup>9</sup> Dohpague tamerare mucubiria yühü. Maa bujawererare peegu mucubiribeaa. Maa bujawererä ðaripüre gohrotorapüre peegu mucubiria yühü. Maa ñero iirare bujawerecü íagu Goãmü müare ðarire gohrotocü iidi árimi. Eropirä müare bujawerecü iirä ñero ii goroweorä iibiribu gua müare. <sup>10</sup> Eropirä Goãmü ígu gamero dopa ta bujawererä, mari ñerire bujawere ðaripüre gohrotoräca. Eropa ta mari bujawerecü íagu mari peamegue waboniräre taumi Goãmü. Eropiro mari eropa bujawerecü òha ähraa marire. Cristore gamebiräpü erä bujawerequererä erä ñerire duhubirä peamegue wamorä árinima. <sup>11</sup> Müapü Goãmü ígu gamero dopa ta bujawereayoro. Maa eropa bujawererä òpa iirä waícüabu maa: Dohpaguere ñerire iiräre eropa íacäbirä waícüabu maa. Ne iri ñerire gamebirigohracäyoro maa. Erä ñeri iira mera guayoro. Eräre ñerire iirire duhudorerä waícüabu maa. Eropirä erä ñerire güirä waícüabu maa erä iro dopa iiri arirä. Eropirä yure mahirä yure íadiayoro maa. Eropirä ñeri iigüre dipuwaja moayoro. Iri áripehrerire maa iira mera iri ñeri dipuwaja marirä maa áririre íhmuabu maa guare. <sup>12</sup> Iribojue ñero iigüre müare were gojabeoqueregu ta ígüre itamubu eropa arí gojabeobiribu yühü. Ígu ñero iidígu säre itamubu eropa arí gojabeobiribu. Müapüre itamubu iripüre gojabeobü. Goãmü ígu íhurore guare ðaro umupeoa maa. Irire maa umupeorare maa ðaro gunäboro dopa iripüre gojabeobü müare. <sup>13</sup> Eropirä Tito maa iira quere guare werecü peerä bürigä mucubiria gua.

Tito sä maa mera turaro mucubiricü íha gua sä mucubiribu. Ígüre maa ðaro mera bocatiricü peerä, maa mera ígu mucubirirare peerä, gua sä ðaro mucubiribu. <sup>14</sup> Negohraguere maa pohro ígu waboro corere maa mera yu mucubirirare, ðarä maa árirare werebü ígüre. Eropirä yu arídiro dopa ta ðaro iiayoro maa ígüre. Eropigu ígüre yu arirare guhyasiribirabu. Titore müare gua werera diaye ta áríbu dohpaguere ígu íadiro dopa ta. <sup>15</sup> Maa pohrogue ígu ejacü umupeori mera bocatiriayoro maa. Eropirä guhyadiaro mera íarä tarinügaro mariro maa yührirä áricü íapu ígu. Eropigu müare mahinemogu iimi ígu. <sup>16</sup> Dohpaguere ðaro yührirä Goãmü ígu gamero dopa ta maa ðaro maa iipehorä áricü ðaro masia yühü. Eropa masígu bürigä mucubiria.

## 8

*Cristo yarä árírä gajiräre eropa ocäro gahmea marire, arí gojañumi Pablo*

<sup>1</sup> Gua acawererä, ire müare masicü gahmea gua. Cristo yarä Macedonia yeba majarä Goãmü mahiri mera ígu mojomoro íari mera erä iirare müare weregura. <sup>2</sup> Erä ñero tariquererä ta, niyeru moorä áríqueregu ta mahiro mariro eropa ocäma gajiräre. Cristo mera turaro mucubirirä árírä, erä gajiräre ðaro mera erä oparire eropa ocäma. <sup>3</sup> Müare arígu iiaa. Erä erä oparopë orä, tauñariro oma. Erä gamero oma erä. <sup>4</sup> Goãmü yaräre mojomorocaräre turaro itamudiarä, eräre erä obeerire aídorema guare. <sup>5</sup> “Ípë oräcoma erä,” arí gua pepidiro

tauro oma erã. Õpa iima erã: Negohraguere niyerure erã oboro core mari Opũ Ĩgu gamerire iidiarã árituhama. Eropirã Goãmũ Ĩgu gamero dopa ta gua sãre umupeori mera yuhrinirã árĩma. Eropa iirã árĩrã erã niyeru sãre oma. <sup>6</sup> Erã eropa ocũ ĩarã Titore guapũ òpa arĩbũ: “Erãre mũ buhenugadiro dopa ta Corinto majarã sãre erã mojomorocurãre oburire wereque,” arĩbũ gua ĩgure. Mũa sã gajirãre mojomoro ĩarã mũa itamuboro dopa eropa arĩbũ ĩgure. <sup>7</sup> Eropirã mũapũ árĩpehrerire òaro iirã árĩtuhaa. Cristore diaye ta òaro umupeoa mũa. Eropirã ĩgu yare òaro werea. Eropirã Goãmũ yare òaro masia mũa. Eropirã Goãmũ ĩgu gamero dopa ta turaro iidiaa. Eropirã guare mahia mũa. Eropa ta òaro iirã árĩtuhaa mũa. Mũa eropa òaro iirã árĩquerecũ ta merogã duhyania mũa iipehoburi. Mojomorocurã tamerare mũa mojomoro ĩacũ gahmea gua. Eropirã erãre mũa òaro mera wũaro ocũ gahmea gua.

<sup>8</sup> Eropa arĩgu mũare doregohragũ iibeaã yũhũ. Eropa arĩ weregu iiaa mũare. Gajirã mojomorocurãre erã turaro itamura mũare weregu iiaa. ¿Mũa diaye ta gajirãre mojomoro ĩhari? arĩ masidiagu iiaa. <sup>9</sup> Mari Opũ Jesucristopũ marire ĩgu mojomoro ĩarare masia mũa. Iri diaye ta àhraa. Ĩgu mũaroguerẽ wũaro opagu árĩqueregu ta i yebaguere arigu mojomorocuro wapũ. Eropigu mũa ya árĩburire sĩrigũ sã mojomorocuro wapũ. Õpa ta wapũ mũapũ mũa wũaro opaboro dopa, ĩgu mera mũa òaro árĩniguicãborore.

<sup>10</sup> Mũare weregu iiaa. Õpa pepia yũpũ: Yuju bojori wahaa mũa mojomorocurãre odiara puhũ. Mũapũ mojomorocurãre odiamũhtaribũ. Eropirã erãre omũhtabonirã árĩbũ mũa. <sup>11</sup> Eropirã mũa odiarare dohpaguere oho ojogorocũque. Mũa odiamũhtadiro dopa ta dohpaguere òaro opehoque. Eropirã pagari oparã árĩrã wũaro oque. Merogã oparã árĩrã merogã oque. <sup>12</sup> Bũrigã mũa odiari mera irire mũa orare Goãmũ mucubirigũcumĩ. Eropirã òaro mũa omasiopẽ oque. Mũa oropẽ ta mucubirigũcumĩ. Mũa opabirirare mũa ocũ gamebeami ĩgu.

<sup>13</sup> “Mojomorocurãre oque,” arĩgu erãre wũaro opadoregu iibeaã. Eropigu mũapũre mojomorocurã dujacũ iidiabeaa. <sup>14</sup> Mũare yujuro mera opadoregu eropa arĩgu iiaa. Dohpaguere mũapũ wũaro opaa. Eropa oparã gajinore moorãre omasia mũa. Puhũ mũare gajino moocũ erã sã mũare omasima. Mũa eropa game orã yujuropa oparãca árĩpehrerã Cristo yarã. <sup>15</sup> Eropa ta àhraa Goãmũ yare erã gojarapũ: “Wũaro aĩgu sã gajigu tauro opabeami. Merogã aĩgu sãre ne merogã duhyabeaa,” arãa Goãmũ yare erã gojarapũ.

*Tito ĩgu mera majarã mera Corintogue wañumi*

<sup>16</sup> Eropi mũare yũ itamudiro dopa ta Tito sã mũare itamudiami. Goãmũpũ ĩgu itamudiacũ iimi ĩgure. Ĩgu eropa iicũ ĩagu “Õhaa,” arãa Goãmũre. <sup>17</sup> Titore gua mũa pohrogue wadorecũ ĩgu òaro mera yũhriami. Eropigu ĩgure mũa pohrogue gua wadoreboro coregue ta mũa pohroguere “Wagũra,” arĩ guñatuhadi àhrami ĩgu.

<sup>18</sup> Ĩgu gajigu Jesu yagu mera wapimoa obeobũ gua. Tito mera majagu árĩpehrerã gajirã Jesu yarã erã umupeogu àhrimi. Òari buherire òaro ĩgu mohmegũ árĩcũ ĩarã ĩgure òaro umupeoma. <sup>19</sup> Eropirã Jesu yarã ĩgure ta gahmeama gua mera curibure. Iri niyerure mojomorocurã pohrogue gua aĩcũ gua mera curibure gahmeama ĩgure.

Iri niyerure m̄ua gameneorare ḡua mojomoroc̄ur̄are or̄a wac̄ũ ĩar̄a mojomoroc̄ur̄ap̄u “Marire mari Op̄u itamuḡu iimi,” ar̄ĩr̄acoma. <sup>20</sup> Eropir̄a i niyerure w̄uaro Jesu yar̄a er̄a odorerare ḡua air̄a ōaro ĩhadibur̄aca er̄a orare ḡuare weres̄ari ar̄ĩr̄a. <sup>21</sup> Mari Op̄u ĩḡu ĩhabeoro diaye ōaro iidiaa ḡua. Eropir̄a masa er̄a ĩhuro s̄are ōaro iidiaa.

<sup>22</sup> Eropa iimor̄a gajiḡure mari acawereḡure obeor̄aca Tito s̄a mera. Ḡua ĩḡu mera obeoḡure bajasuburi gajir̄are ĩḡu ōaro itamuc̄ũ ĩabu ḡua. Eropiḡu dohpaguere m̄uap̄u gajir̄are m̄ua itamudiac̄ũ ĩaḡu ero core ĩḡu iidiro tauro ōaro m̄uare itamudiami. <sup>23</sup> Tito s̄are m̄uare wereḡura. ĩḡu ȳu mera majagu āhrimi. M̄uare ȳu itamuc̄ũ ĩḡu ȳu mera mohmeḡu āhrimi. Gajir̄a ĩḡu mera wamor̄a Jesu yar̄a er̄a beyenir̄a er̄a obeor̄a āhrima. Er̄a Cristo yare iima gajir̄a Cristore er̄a umupeoboro dopa. <sup>24</sup> Er̄a eropa ar̄ĩr̄are mahiri mera ōaro er̄are bocat̄ĩrique m̄ua. M̄ua eropa iic̄ũ ĩar̄a gajir̄a Jesu yar̄ap̄u ōar̄a m̄ua ar̄ĩric̄urire masir̄acoma. Mari obeonir̄are “Ōaro mera bocat̄ĩr̄ir̄acoma Corinto majar̄a,” ar̄ĩ weretuhabu ḡua mera majar̄are. M̄ua eropa ōaro bocat̄ĩric̄ũ ĩar̄a ḡua werera diaye ar̄ĩc̄ũ ĩha masir̄acoma gajir̄a Jesu yar̄a.

## 9

*Jesu yar̄are mojomoroc̄ur̄are er̄a oburire wereñumi Pablo*

<sup>1</sup> Eropir̄a Goam̄u yar̄are m̄ua itamuborore m̄ua oburire masituhaa m̄ua. <sup>2</sup> Gajir̄are m̄ua itamudiarire masia ȳu s̄a. Eropa masiḡu Macedonia majar̄are ōpa ar̄ĩ wereb̄u: “Corinto majar̄a Jesu yar̄ap̄u gajir̄are itamudiatuhama. Yuju bojori taria er̄a itamudiado,” ar̄ĩ weretuhabu er̄are m̄uare. M̄ua eropa itamudiac̄ũ peer̄a bajar̄a er̄a s̄a mojomoroc̄ur̄are itamudiana. <sup>3</sup> M̄ua mojomoroc̄ur̄are oborare gajir̄are werequereḡu “Iri niyerure gameneobiribocoma ȳu ejaboro core,” ar̄ĩ pepia m̄uare. Eropiḡu dohpaguere ōare mari acawerer̄are m̄ua pohrogue obeom̄htaḡu iiaa. Mojomoroc̄ur̄are m̄ua oburire gameneo m̄ua opayuboro dopa ōare obeom̄htaḡu iiaa. <sup>4</sup> Er̄are obeobiḡu Macedonia yeba majar̄a mera m̄ua pohrogue ȳu ejagu, m̄ua oburire m̄ua opabiric̄ũ ĩaḡu guhyas̄ĩris̄āboya ȳuh̄u m̄uare. “Mojomoroc̄ur̄are or̄acoma,” ȳuh̄u m̄uare ar̄ĩra puh̄ru m̄ua obiric̄ũ ĩaḡu guhyas̄ĩris̄āboya ȳuh̄u m̄uare. M̄ua s̄a guhyas̄ĩriboya. <sup>5</sup> Eropiḡu m̄ua pohrogue ȳu ejaboro core er̄are mari acawerer̄are obeom̄htaḡu iiaa. “Mojomoroc̄ur̄are w̄uaro or̄aca,” m̄ua ar̄ĩrare m̄ua opayuboro dopa er̄are obeom̄htaḡu iiaa. M̄ua oburire m̄ua gameneoc̄ũ er̄ap̄u m̄uare wereserer̄acoma. Eropiḡu ȳup̄u eja m̄ua oburire m̄ua opayutuhac̄ũ ĩha mucubiriri mera m̄ua odiarare masiḡura. M̄uare ḡua odorera ar̄ĩsome iri.

<sup>6</sup> Eropir̄a ire guñaque m̄ua: Bajameyeriḡa otediḡu bajameḡa d̄ucare aĩḡucumi. Bajayeri otediḡu baja d̄uca Eropiḡu m̄ua pohrogue ȳu ejaboro core er̄are mari acawerer̄are obeom̄htaḡu iiaa. “Mojomoroc̄ur̄are w̄uaro orre aĩḡucumi. Eropa ta āhraa mojomoroc̄ur̄are mari oc̄ũ. Meroḡa mari oc̄ũ, Goam̄u meroḡa oḡucumi marire. W̄uaro mari oc̄ũ w̄uaro marire oḡucumi. <sup>7</sup> Eropir̄a yujur̄ayeri m̄ua “Ip̄e oḡura,” ar̄ĩ oque. Mahiñari obiric̄aque. “Marire odoreama,” ar̄ĩro mariro oque. Mucubiriri mera or̄are gahmemi Goam̄u. <sup>8</sup> ĩḡur̄u m̄ua gameri tauro m̄uare oḡucumi. Eropir̄a ar̄ĩpehrerire m̄ua

gameri duhyarire opapehorāca. Eropirā gajirāre mua oburi sā ōaro sihajaroca mua opari. <sup>9</sup> Eropa ta āhraa Goāmū yare erā gojarapū:

Mojomorocūrāre wuaro ohomi ĩḡu. Ōaro mera masare itamuniguimi ĩḡu, āhraa ĩḡu yare erā gojarapū.

<sup>10</sup> Eropiro oteri ducacura puhrū oteri masu ĩḡu oteburi coyere ohomi Goāmū. Puhrū ĩḡu oterare ducacucū iimi ĩḡu baburire. Mojomorocūrāre mua wuaro ocū oteri masure ĩḡu coyere oro dopa ta mua sāre wuaro ogucumi Goāmū. Eropa ta muare ogucumi mojomorocūrāre mua onemoboro dopa. <sup>11</sup> Eropa ta āhraa. Wuaro ogucumi gajirāre wuaro mua eropa oniguicāboro dopa. Eropirā mua iri niyerure odorerare gua ocū erā ñearāpū mucubiriri mera Goāmure “Ōhaa,” arīrācoma. <sup>12</sup> Eropirā mojomorocūrāre Goāmū yarāre orā, erāre itamurā iiaa mua. I dihtare iibeaa mua. I sāre iirā iiaa mua. Mua eropa orā bajarā masa Goāmure mucubiriri mera “Ōhaa,” arīcū iirāca mua. <sup>13</sup> Eropa mua gajirāre itamucū ĩarā, Goāmure umupeori mera wereniguirācoma masa. Eropirā erāre gajirā sāre wuaro mua ocū ĩarā Goāmure “Ōatariagu āhrimi,” arīrācoma masa. Eropa arīrācoma Cristo ya buherire ōari buherire mua ōaro yuhrīcū ĩarā. <sup>14</sup> Eropirā Goāmū ĩḡu mojomoro ĩadiro dopa ta mua sā erāre mojomoro ĩacū erāpū muare gamerācoma. Eropa gamerā muare serēbasarācoma Goāmure. <sup>15</sup> Goāmū marire ōatariaro iigucumi. ĩḡu eropa iiborore masirā “Ōataria,” arāa mari ĩḡure.

## 10

### *Jesu ĩḡu apidigu ĩḡu árĩrĩre wereñumi Pablo*

<sup>1</sup> Dohpaguere yuhū Pablo muare weregura. Cristopū ne guabigu, masare ōaro iigū árĩñumi. ĩḡu iidiro dopa ta yu sā muare werediaa ōari mera. Yujurāyeri mua mera majarā ōpa arāyoro yure. “Mari mera árĩḡu eropa pepicāḡu bu árĩḡu iro dopa árĩmi Pablo. Eropa árĩḡuereḡu ta gajipugue árĩḡu marire doyaro mariro turibeomī,” arāyoro mua yujurāyeri yure. <sup>2</sup> Eropigu muare ire burigā dorea: Mua pohrogue yu ejacū ōaro iique mua, “¿Pablo guare turiri?” arīrā. Yujurāyeri yure ōpa arāyoro: “Ĭḡu, ĩḡu gamero, Goāmū dorebiriquerecū iimi,” arāyoro mua yure yujurāyeri. Eropa arīrā tamerare turiboca yuhū. <sup>3</sup> Gua sā i yeba majarā ta árĩrā iiaa. Eropa árĩquererā ta i yeba majarā erā gamero iiro dopa ta iibeaa gua. <sup>4</sup> Surara erā tarinugaro dopa ta guapū ñerire tarinugadiaa. Surara erā mojo oparo dopa ta gua sā mojo opaa. Gua mojo i yeba majarā erā masiri, erā wereniguitarinugari, erā turari árĩbeaa. Gua mojo Goāmū ya turaripū āhraa. Iri turari mera masa Goāmure erā umupeodorebirirare duhucū iiaa gua. Eropirā erā gamero erā masirire iri duhpiburi árĩbiricū masicū iiaa gua iri turari mera. <sup>5</sup> Eropirā árĩpehrerā erā gamero pepirare Goāmure erā masidorebirirare duhucū iiaa gua. Eropirā iri turari mera Goāmure gamebirāre Cristore ōaro yuhrirā erā árĩcū iiaa gua. Cristo ĩḡu gamero dopa ta erāre pepicū iiaa gua. <sup>6</sup> Eropirā gajirā mua mera majarā Cristore tarinugacū ĩarā erāre dipuwaja moamorā árĩrāca gua. Mua ōaro yuhrira puhrū Cristore tarinugarāpūre eropa dipuwaja moamorā árĩrāca gua.

7 Yũ árĩricuri dihtare masia mũa. Yũ pepiripure ne masibea mũa. “Cristo yarã áhraa,” arĩrã árĩrã õpa masique mũa: Gũa sã mũa iro dopa ta Cristo yarã ta áhraa.”<sup>8</sup> “Mari Opũ ya buherire õari buherire buhedoregũ apimi guare,” arĩgũ bajasuburi muare iri dihtare eropa arĩ werequeregũ ta guhyasĩrĩbeaa yũhũ. Guare eropa buhedoregũ muare itamumorãre apimi guare. Muare goroweomorãre apigũ iibirimi guare.<sup>9</sup> I yũ gojabeoripũre mũa ãha ¼cacũ gamebeaa yũhũ.<sup>10</sup> Yujurãyeri mũa mera majarã õpa arãyoro: “Pablo gojabeogũ pũriro dihta gojabeomi marire. Eropa árĩqueregũ ta mari mera árĩgũ eropa árĩcãgũ áhrimi. Bu árĩgũ iro dopa áhrimi. Eropiro ãgũ marire wereniguri duhpiburi árĩbeaa,” arãyoro mũa yujurãyeri.<sup>11</sup> Eropa arĩrãre õpa arĩ weregura: Mũa arĩdiro dopa ta iibeaa gũa. Muare gũa arĩ gojabeodiro dopa ta eropa ta arĩ wererãca mũa pohro árĩrã. Eropirã “Õpa iirãca,” gũa arĩ gojabeodiro dopa ta eropa ta iirãca mũa pohro árĩrã sã.

<sup>12</sup> Yujurãyeri mũa mera majarã “Õaro masipehorã áhraa gũa,” arĩ wereniguimaacãma erã basi. Erã game ãha bocatĩrirã “Maripũ õatariarã áhraa,” arĩma erã. Eropa arĩmaacãrã “¿Gajirã õarã iro dopa áhriro mari?” arĩbeama erã basi. Guapũ erã iro dopa iisome.<sup>13</sup> Goãmu guare ãgũ buhedore ãgũ apira dihtare werea guapũ muare. Gajirã erã mohmerare “Iĩbũ guapũ,” arĩrã iibeaa. Goãmu mũa sãre buhedoregũ guare apimi.<sup>14</sup> Eroparĩrã gũyarã iibeaa gũa. Õari buherire Cristo yare muare buhemãhtarã ta ejabu gũa. Eropirã Goãmu guare buhedore ãgũ apira dihtare wererã iiaa muare.<sup>15</sup> Eropirã gajirã muare itamucũ ãha “Guapũ irire iibũ,” ne arĩbeaa gũa. Cristore mũa umupeonemocũ iiburipure gahmea gũa. Eropa gamerã muare buhenemodiaa gũa. Eropa gũa buherã Goãmu ãgũ apirañe pẽta buhediaa gũa muare.<sup>16</sup> Eropa buhediaa mũa ya yeba core majarãre õari buherire peebirãre õari buherire wererã waboro dopa. Eropa warã gajirã erã buhera pũhrũ ejarã, “Guapũ erãre buhemãtabũ,” arĩsome gũa.

<sup>17</sup> Goãmu yare gojarapũgue õpa áhraa: “Mari iirire ãarã mucubiribircãro gahmea. Mari Opũ ãgũ iiripure ãarã mucubiriro gahmea. Iripure gajirãre werero gahmea,” arĩ gojara áhraa.<sup>18</sup> Masa erã basi “Guapũ iiabũ,” erã arĩcũ ãha mucubiribeami Goãmu. Mari Opũ Cristo Goãmure “Oã õaro iima,” ãgũ arĩrãpũre suami Goãmu.

## 11

*“Jesu ãgũ apinirã áhraa gũa,” arĩ gũyarãre wereñumi Pablo*

<sup>1</sup> Yũ basi yũ árĩricurire weregũ pee masibigũ iro dopa weregũ iiaa, arĩ pepia. Yũ árĩricurire muare weregũ guhyasĩriñaria. Yũ eropa arĩ werecũ peenique mũa yare dohpaguere.<sup>2</sup> Goãmu muare ãgũ mahiro dopa ta turaro mahia yũ sã muare. Nõmeo gajigũ umũ mera igo ñero iibigo igo yujugure ta gamedigo iro dopa mũa Cristo dihtare gamecũ gamerabũ yũhũ muare.<sup>3</sup> Eropa gamequeregũ “Erã Cristo yare cóãbocoma,” arĩ guñaricua muare. Gajirã ñerã muare gũyarã, gajiropa arĩri buherire gamecũ iibocoma muare. Pĩru ãgũ masiri mera Evare gũyacũ igo Goãmure tarinũgañumo iribojegure. ãgũ eropa iidiro dopa ta dohpaguere ñerã muare gũyarã, Cristore mũa õaro umupeorire goroweobocoma. Eropigũ muare gũisãa.<sup>4</sup> Erã gũa muare



buhediro dopa ta buhebiriquerecũ mũa peeraa. Eropirã erã “Õpa árdi árĩmi Jesu,” erã gamero gajiropa arĩ werequerecũ ta peea mũa. Watĩ ĩgu pepiro dopa arĩ erã werequerecũ ta peea mũa. Muare gũa weregu Espĩritu Santo gohra áhrimi. ĩgũpure erã werebiriquerecũ ta muare gũa buherãre peea mũa. Erã gajiropa árĩri buherire erã buhecũ õari buherire erã buhebiriquerecũ ta irire peea mũa. <sup>5</sup> Erã “Jesu ĩgu apinirã áhraa,” arĩnirã yũre masitarinũgabeama. “Erãre doca merebeaa,” arĩ pepia yũhu. <sup>6</sup> Õaro weretarinũgagũ árĩbiriboca yũhu. Õaro weretarinũgabiriqueregu Goãmũ yare õaro masia. Yũ eropa masirire bajasuburi muare masicũ iibu.

<sup>7</sup> Õari buherire Goãmũ yare muare buhegu ne waja gamebiribu. Muare itamudiagu waja gamebiribu. Bu árĩgu iro dopa árĩbu yũhu. ¿Yũ eropa waja gamebiricũ õabeari mũa pepicũ? <sup>8</sup> Muare yũ buhecũ gaji macari majarã Jesu yarã yũre itamuma. Erã eropa orare ñeabu muare itamubu. Mũa yũre oborare erãpũ yũre oma. <sup>9</sup> Mũa mera árĩgu gajino yũre duhyaquerecũ ta muare niyerure ne serẽbiribu. Mari acawererã Macedonia yeba majarã Jesu yarã árĩpehrerã yũ gamerare aĩ erama yũre. Iribojeguere muare ne garibobiribu yũhu. Pũhrũgue sãre muare ne garibosome. <sup>10</sup> Cristo diaye ĩgu werediro dopa ta yũ sã muare dohpaguere diaye weregu iiaa. Árĩpehrero Acaya yeba árĩrãre i muare yũ serẽbirirare eropa wereniguĩgũra. <sup>11</sup> ¿Muare yũ serẽbirirare gajirãre yũ eropa wereniguicũ peerã dohpa pepiri mũa? “Pablo guare eropa arĩ weregu guare umupeobigu iimi,” ¿arĩ pepiri mũa? Árĩbeaa. Muare umupeoa. Goãmũ irire masimi.

<sup>12</sup> Waja mariro yũ muare buhenũgadiro dopa ta buhe ojogorocũgũra. “Jesu ĩgu apinirã áhraa,” arĩ gũyanirãre yũre tarinũgacũ iibiriboro dopa waja mariro buheniguĩgũra. Erãpũ “Gũa sã Pablo iro dopa Jesu yare buherã áhraa,” arĩma. Eropa árĩbeama. Yũpũ waja mariro buhea. Erãpũ waja gamerã buhema. <sup>13</sup> Erã diaye ta Jesu ĩgu apinirã gohra árĩbeama. Erãre ne apibiriñumi ĩgu. “Jesu ĩgu apinirã áhraa,” arĩ gũyarã gũa iro dopa árĩrima erã. <sup>14</sup> Erã eropa iicũ ĩagu ĩhamariabeaa yũhu. Satana sã anyu Goãmũ yagu õagu iro dopa dehyoacumi masare. <sup>15</sup> Eropigu erã Satanare itamurã õarã Goãmũre itamurã iro dopa erã iicũ ĩagu, ĩhamaria wabeaa yũhu. Dohpaguere erã eropa iiquerecũ ta pehrerinũ árĩcũ árĩpehreri erã ñero iira dipuwaja dipuwaja moagũcumi Goãmũ erãre.

### *Ĩgu ñero tarirare wereñumi Pablo*

<sup>16</sup> Dipaturi muare ire weregũra. Ne “Pee masibigu áhrimi,” yũre arĩbiricãque. Yũ eropa arĩdorebiriquerecũ ta yũre mũa eropa arĩ pepicũ õaroca yũre. “Pee masibigu áhrimi,” arĩ yũre pepiquererã ta peenique mũa yũre. Merogã yũ árĩricũrĩre yũ basi werecũ peenique mũa. <sup>17</sup> Muare eropa weregu guhyasĩriñaria yũhu. Pee masibigu iro dopa iigu iiaa, arĩ pepia. Mari Opũ Jesu yũre irire “Eropa wereque,” arĩbirimi. <sup>18</sup> ĩgu eropa arĩbiriquerecũ ta ire weregũra muare. Erã gamero “Õarã áhraa,” arĩmaacãrã erã árĩcũ ĩagu yũ sã yũ árĩricũrĩre muare weregũra. <sup>19</sup> Mũapũ eropa arĩmaacãrãre peerã mucubiriri mera ĩhaa mũa erãre. ¿Õaro masirã áhriri mũapũ eropa peerã? <sup>20</sup> Muare erã pohro majarã moacũ, mũa yare erã emacũ eropa ĩacãa

mũa. Eropirã mũaare erã docapicũ mũa wayuporãre erã pacũ eropa pepicãa mũa. <sup>21</sup> ¿Ōapũricãri mũaare erã eropiicũ? Cue, ¿turatariarã àhriri erã? Gũapũ erã iro dopa turarã áríbeaa. Eropirã erã iro dopa ñerire iibeaa.

Erã iro dopa árĩbiriqweregũ ta erã “Ōpa árĩrã àhraa,” erã arĩcũ peegũ yũ sã eropa arĩ wereboca. Dipaturi guhyasĩriqweregũ ta ōpa arĩgũra mũaare. <sup>22</sup> Erã “Hebreo masa àhraa,” arĩma gajirãre tarinũgadiarã. Hebreo masũ ta àhraa yũ sã. “Israe masa mari Pagũ ïgũ beyenirã àhraa,” arĩma daja erã. Erã iro dopa ta ïgũ beyedigũ ta àhraa yũ sã. “Abrahã pãramerã àhraa,” arĩma daja erã gajirãre tarinũgadiarã. Erã iro dopa ta Abrahã pãrami ta àhraa yũ sã. <sup>23</sup> “Cristo yare itamurã àhraa,” arĩma daja erã. Yũ sã Cristo yare itamugũ ta àhraa. Erã tauro Cristo yare ōaro iiaa yũhũ. Eropa yũ basi arĩ wereniguigũ guhyasĩriñaria yũhũ. Pee masibigu iro dopa wereniguigũ iiaa, arĩ pepia yũ basi. Erã tauro mohmebũ yũhũ Cristo yare iigũ. Bajasuburi erã tauro Cristo yagũ yũ árĩri dipuwaja peresu iima yũre gajirã. Erã tauro bajasuburi tãrama masa yũre. Erã tauro Cristo yare yũ iira dipuwaja masa yũre wejẽdiarima. Eropigũ merogã mera taribũ yũ sĩribodirore. <sup>24</sup> Cinco suburi judio masa yũre ñeama. Yũre erã ñeari nũcũ suburi treinta y nueve suburi yũre tãrama. <sup>25</sup> Ũhresubu gajirã yũre ñeama. Eropa ñearã erã tamera yũre ñero yucũgũ mera pama. Gajisubu yũre gajirã utã mera deama. Ũhresubu dohodiru mera utãyegue mehtuhaja miribũ. Eropigũ yujunũ, yuju ñami taboamiji wecague wũariya decoguere baa payabũ. <sup>26</sup> Bajasuburi macariguere buhe curigũ ejabũ. Yũ eropa buhe curicũ guhyatariacãbũ yũre. Yũre mirimaja guhya árĩbũ. Yũre yajamaja guhya arĩma. Yaha yeba majarã judio masa, judio masa árĩbirã sã yũre ñero iimaja guhya arĩma. Macarigue, masa marirogue, wũariyague sãre yũre sĩrimaja guhya árĩbũ. “Mũ mera majarã àhraa,” arĩ gũyarã sã yũre ñero iimaja guhya arĩma. <sup>27</sup> Cristo yare iibu bũrigã mohmebũ. Eropa mohmegũ ñero wabũ. Bajasuburi wũja yũre ñero pũriquerẽcũ ta eropa mohmeniguicãmũribũ. Ñero oaboamũribũ. Eropiro yũre ñemesibumũribũ. Bajasuburi barire bocabirimũribũ. Yũhũ yũsaro sãre pepimũribũ. Suhri sañaburi sã ne marimũribũ yũre.

<sup>28</sup> Eropa ñero tarigu ta umuri nũcũ gajirã Cristo yarãre, mũa sãre bũrigã guñaa. <sup>29</sup> Eropigũ Cristo yagũ ïgũ turabiricũ ïagũ bujawerea yũhũ. Gajirã Cristo yagure ñero iidorebocoma. Erã eropa iicũ ïagũ Cristo yagure guhyasĩrisãgũ, erã ñero iidorerã mera guaa yũhũ. <sup>30</sup> Werediabiriqweregũ ta yũ árĩricũrire weregũ, yũhũ turabigu yũ árĩrire mũa masiboro dopa mũaare weregũra. <sup>31</sup> Goãmũ mari Opũ Jesu Pagũ umuri nũcũ mari umupeobu ïgũ ta mũaare yũ gũyabiricũ masimi. Ire mũaare diaye weregũra. <sup>32</sup> Damasco waĩcũri macague yũhũ Jesucristo yare buhecũ ïagũ árĩpehrerã masa tauro opũ Areta waĩcũgũ ïgũ doca arĩgũ opũ yũre ñeadiaripũ. Eropa ñeadiagũ iri maca maja sãriro disiporori nũcũ surarare coredoreripũ. <sup>33</sup> Erã eropa corero watope ta yũ mera majarã wũari puibugue yũre duhusã ïri sãriro pũrũpũgue yuju gobegue yũre duhu dijuma. Erã eropa duhu dijura pũhrũ duhrigã wabũ.

## 12

### *Cristo ĩgure ĩhmurare wereñumi Pablo*

<sup>1</sup> Yũ árĩricũrire mucubiriri mera yũ werecũ duhpiburi árĩbeaa. Duhpiburi árĩbiriqwerecũ ta werenemogura mũare. Mari Opũ Jesu ĩgu yũre ĩhmurare ĩgu yũre masicũ iirare weregũra mũare. <sup>2</sup> Őpa ĩhmunũgami ĩgu yũre: Catorce bojori gohra wahaa yũre Cristo yagure umarogue ĩgu aĩ mũriara pũhrũ. Ŭmarogue necã wecague yũre aĩ mũriami. Yũ sĩporã dihtare ĩgu aĩgãcũ masibea yũhũ. O yũ dũpũ sãre ĩgu aĩgãcũ sãre ne masibea yũhũ. Goãmũ dihta irire masimi. <sup>3-4</sup> Eropigũ paraíso waĩcũrogue yũre aĩ mũrijami. Irire masia yũhũ. Yũ sĩporã dihtare ĩgu aĩgãcũ masibea yũhũ. O yũ dũpũ sãre ĩgu aĩgãcũ masibirica. Goãmũ dihta irire masimi. ĩgu eropa aĩ mũriacũ ejagu eroguerẽ ĩgu wererire peebũ. Iri yũ peerare masa ne masibeama. Iri wererire gajirãre weredorebirimi yũre. <sup>5</sup> Eroguere ĩgu yũre eropa wererare mũare weregu, “Yũhũ yujugu ta gajirãre tarinũgagu ãhraa,” arĩboya yũhũ. Eropigũ irire werebeaa yũhũ. Yũ masibirira dihtare yũ turabirira dihtare mucubirigũ mũare weregũra. <sup>6</sup> “Gajirãre tarinũgaa yũhũ,” mũare arĩ werediãcũ yũ arĩra diaye árĩboca. Eropigũ eropa arĩ weregu eropa arĩmaacãbiriboya yũhũ. Eropa árĩbiriqweregu ta “Őpa gajirãre tarinũgaa,” arĩ weresome yũhũ mũare, guhyadiaro yũre ĩhari arĩgu. Yũ árĩro tauro mũa yũre umupeocũ gamebeaa.

<sup>7</sup> Cristo õatariarire umaroguere ĩgu yũre ĩhmucũ ĩadigũ árĩgu, “Gajirãre tarinũgaa yũhũ,” arĩboca yũpũ. Eropa yũ arĩbiriboro dopa Satana ĩgu yũre dore moacũ ĩagu “Őaroca,” arĩ apidi árĩmi Goãmũ. Eropigũ yũ ñero tariboro dopa yũre dore moadi árĩmi Satana. Iri dore poraru ñajaro dopa ta yũre pũribũ. <sup>8</sup> Iri dore yũre taridoregu serẽmũrĩribũ mari Opũre. Ŭhresubu serẽribũ. <sup>9</sup> Yũ eropa serẽquerecũ ta i dore tamerare yũre taricũ iibirimi ĩgu. Őpa arĩ yũre yũhrimũrimi ĩgu: “Mũre mahĩa. Yũ mahiri mera õaro árĩgũca mũhũ. Pũrinigũicãũgu, turabigũ árĩgu yũ turarire õaro ĩhmugũca mũhũ. Turarã tauro mũhũ yũ turarire masare masicũ iigũca,” arĩ yũhrimũrimi Goãmũ yũre. ĩgu eroparĩcũ peegu turabigũ yũ árĩrãre masigũ mucubiria. Eropigũ yũ turabirirare masare mucubiriri mera weregũra. Eropa arĩ wereguca Cristo ĩgu turaripũre yũhũ gajirãre õaro masicũ iiboro dopa. <sup>10</sup> Eropigũ Cristo yagu yũ árĩri dipuwaja yũre pũriro árĩquerecũ ta, gajirã ñero yũre werenigũquerecũ ta, ñetariaro tariqueregu ta, yũre erã ñero erã iinigũquerecũ ta, yũre bujawerecũ erã iiquerecũ ta mucubiria yũhũ. Eropa ñero tariqueregu ta, eropa turabigũ árĩqueregu ta Cristo turari mera bocatĩua ĩgure guñaturagu. Eropigũ mucubiria.

### *Corinto majarãre Cristo yarãre wũaro guñaricũñumi Pablo*

<sup>11</sup> Yũ árĩricũrire yũ basi weregu guhyasĩriñaria yũhũ. Pee masibigu iro dopa weregu iiaa, arĩ pepia yũhũ. Yũ eropa werequerecũ ta iri mũa ya dipuwaja ãhraa. Mũapũ yũ árĩricũrire gajirãre õaro werecũ yũ basi werebiriboaya. Yũhũ bu árĩgu árĩqueregu ta “Jesu ĩgu apinirã ãhraa,” arĩ guyarãre doca merebeaa yũhũ. <sup>12</sup> Diaye ta ñero tarigũ árĩqueregu mũare Goãmũ turari mera deyoro moarire ii ĩhmuribũ. Eropa ii ĩhmugũ Cristo ĩgu apidigũ yũ árĩrĩre ĩhmugũ iiribũ mũare.

13 Gaji macari majaräre Jesu yaräre mua säre yujuro mera ihmuribu yuhu. Muapüre gajiropa ñari iiribu. Mua dihtare garibobiribu. Mua dihtare gajinore yaha árîburire serêbiribu. ¿Yuhu muare itamurire serêbiricü ñehe árîri muare? Iri ñeri árîcû irire cãdijique mua yure.

14 Ire peeque mua. Pesubu mua pohrogue yu ejara puhru dipaturi wadiaa daja. Erogue ejagu muare garibosome yuhu. Gajinore serêsome yuhu muare. Mua yare gamebeaa yuhu. Cristo yapüre mua yuhrirã árîcû gahmea yuhu. Masa porãpü erã pagu sumaräre erã gamerire obeama. Erã pagu sumarãpü erã porã gamerire ohoma. Eropa ta mua yu porã iro dopa árîrã yu gameripüre osome mua.

15 Eropigu yu tamera yu oparipüre odiaa muare itamubu. Mua pohro majagu iro dopa árîdiaa muare itamubu. Muare yu turaro mahiquerecü ta muapü yure daberogã mahia yu pepicü.

16 Eropigu mua mera árîgu muare garibobiribu. ¿Eropa ta iiri yuhu mua pepicü? Eropa iiquerecü ta yujurãyeri mua mera majarã õpa arîrãcoma: “Pablo gajinore marire aïdiagu guyami,” arîrãcoma.

17 ¿Eropa arîro dopa ta iigu árîgu dohpa irire iiboyuri yuhu? ¿Mua pohrogue yu obeonirã ñehenore yure guyabasayuri erã muare mua ñacü? 18 Sohõ árîrasubugue Titore mua pohrogue wadoretuhabu ñgure. Eropigu gajigüre Jesu yagüre ñgu mera obeobu. ¿Tito muare gajinore guya aïri mua ñacü? Ñgu yu iro dopa ta Goãmu ñgu gameri dihtare iigu àhrimi. ¿Eropigu yu iro dopa ta iibiriri ñgu mua ñacü?

19 ¿Ipü mera gua basi arî cãhmotarã iiri gua mua pepicü? Árîbeaa. Cristo yarã àhraa. Eropirã Goãmu ñgu ñhuro muare wererã iiaa. Yu acawererã, yu mahirã, muapüre eropa arî werea muare itamudiarã.

20 Yu erogue ejacü yu gamero dopa iirã árîbiriboca mua. Eropigu muare turaro guñaricua. Eropigu mua gamero dopa iigu árîbiriboca yu sã erogue ejagu. Gajiropa mua iicü ñagu weregüca muare. Erogue yu ejacü muapü mua basi game duyatorã, gajino erã opacü ñarã ñhaturirã, mata guarã, mua gamero gajiräre tarinugadiarã, gajiräre ñero wereniguirã, ñeri quere moarã, “Gua tamera gajiräre tarinugaa,” arîrã, mua gamenerere goroweorã árîboca mua. Mua eropa iicü bocaboca arîgu, guñaricua yuhu muare. 21 Erogue yu ejacü muare yure guhyasirisãcü iibocumi Goãmu yure. Eropigu árîpehrerã iribojegue ñero iinirãre erã ñerire bujawerebiricü ñagu turaro bujaweregüca yuhu. Nome mera ñero iirãre, ñerire uaribejaräre ñagu bujaweregüca yuhu.

## 13

### *Pablo weretuñumi*

1 Dohpaguere mua pohrogue wagu uhresubu ejagüca erogueri. Pesubu ero coreguere ejatuhabu. Eropigu muare ire weregüra. Õpa àhraa Goãmu yare erã gojarapü: “Yujugüre mari dipuwaja moaboro core perã, urerã ñgure weresãro gahmea. Erã eropa weresãra puhru dipuwaja moamasia mari,” àhraa Goãmu yare erã gojarapü.

2 Iribojegueri ñero iirã mua árîcû muare árîpehrerã gajirã ñero iirã säre dipaturi guhyadiaro mera weregüra. Yujusubu ejadi mua pohro dipaturi ejagu muare ire werebu. Dohpaguere mua mera árîbigu dipaturi muare ire werebeogu iiaa daja: Dohpaguere mua pohrogueri ejagu, ñero iirãre diaye ta dipuwaja moagüra yuhu. 3 Yu eropa

iicũ ĩarã, Cristo ĩgu apidigu ĩgu turari mera yu buhecũ masirãca masidiarã. Cristopũ muare doregũ turatariagu aħrimi. Eropigu ĩgu turarire ĩhmumi muare. <sup>4</sup> Mari iro dopa dupucugu, ĩgu turabigu arĩgu, crusague siripu. Eropa siriquereru ta Goãmu ĩgu turari mera ojocarimi ĩgu dohpaguere. Gũa sã ĩgu iidiro dopa ta turabirã aħraa. Eropa turabirã arĩquererã Cristo mera ojocarirã Goãmu ya turari mera arĩrãca muare itamumorã.

<sup>5</sup> Eropi muapu mua basi opa arĩ pepique. “¿Diaye ta Cristore umupeogu aħriri yuħu?” arĩ pepique mua. Diaye ta Cristo mua mera majagu ĩgu arĩbiricũ ĩgu yarã gohra arĩbeaa mua. <sup>6</sup> ¿Mua guapure “Jesu yarã ĩgu apinirã arĩbeama,” arĩ pepiri? ĩgu yarã gohra aħraa gũa. Irire mua masicũ gahmea yuħu. <sup>7</sup> Eropigu mua ñero iibiriboro dopa Goãmure serẽbasaa muare. Eropa serẽbasaa gũa mua oarire mua iiboro dopa. Mua Goãmu itamuri mera eropa oarire iicũ ĩarã opa arĩboca: “Guapu erãre oarã wacũ iibu,” arĩboca gũa gajirãre guare umupeocũ iimorã. Eropa arĩ umupeodorebeaa gũa. Iri duhpiburi arĩbeaa. Eropirã muare eropa Goãmure serẽbasarã mua ya arĩburire serẽbasarã iiaa. Oarire mua iicũ tamerare gahmea gũa. <sup>8</sup> Eropa dihta gahmea gũa. Goãmu ya diaye arĩrere goroweomasibeaa gũa. <sup>9</sup> Eropirã mua oarire iicũ gamerã turabirã iro dopa arĩquererã gũa mucubiria. Oarire iirãpu muapu turarã arĩcũ oħaa. Eropirã mua oarã waborore Goãmure serẽbaniguicãrãca gũa muare. <sup>10</sup> Eropigu mua mera arĩbigu muare ipũre gojabeoyugu iiaa. Mua pohrogue ejagu mua ñero iirã arĩcũ ĩagu muare dipuwaja moagũca. Cristo yure ĩgu dorediro dopa ta muare dipuwaja moagũca. Yu eropa dipuwaja moabiriboro dopa ipũre muare gojabeoyugu iiaa. Mua oarire gohrotocũ ĩadiagu gojabeoyugu iiaa. Cristo ĩgu dorediro dopa muare itamudiaca. Muare dipuwaja moadiabeaa.

<sup>11</sup> Dohpaguere yu acawererã, muare oadoreã. Cristore guñaturanemoque. Eropa iirã oarã arĩque. Muare yu wererare oaro peenãque. Mua mera majarã mera yujuro mera pepique. Mua basi oaro mera arĩque. Mua eropa arĩcũ ĩagu mua mera Goãmu arĩgũcumi. ĩgu marire game mahicũ iigu, marire oaro mera arĩcũ iigu aħrimi. <sup>12</sup> Eropirã mua mera majarãre bocatĩrirã erãre oaro mera mojoto ñeaque mua. <sup>13</sup> Arĩpehrerã o majarã Goãmu yarã muare oadoreã.

<sup>14</sup> Mari Opũ Jesucristo mera muare arĩpehrerãre oadoreã. Eropigu Goãmu ĩgu mahiri mera arĩpehrerã muare oadoreã. Eropigu Espĩritu Santo arĩpehrerã mua mera oaro aħrimi. Eropa ta arĩporo. Iripẽta aħraa.

## Gálatas

*Pablo Galacia majarãre Jesu yarãre gojabeopu*

<sup>1-2</sup> Yuhu Pablo mua Galacia majarãre ipũre gojabeogu iiaa. Yuhu Goãmu yare buhedore Jesucristo igu apidi ãhraa. Masa ne yure buhedore apibirima. Jesucristopu igu Pagu Goãmu mera yure apimi. Goãmu ãhrimi Jesucristo sãridire masudigu. Eropigu yuhu yu mera majarã mera Jesucristo yarã mera muare ðadorea. <sup>3</sup> Goãmu mari Pagu mari Opu Jesucristo mera muare ðadorea. Igu muare itamuri mera ðaro árĩque mua. <sup>4</sup> Jesucristo, igu Pagu Goãmu gamediro dopa ta iigu, igu basi mari ñeri iira dipuwaja sãribasadigu árĩmi. Eropiidi árĩmi i umu majarã ñero árĩricurire mari iibiriboro dopa. <sup>5</sup> Igu eropiicũ ñha mari Goãmure “Muhu ðagu ðaro iiaa,” umuri nucu arĩro gahmea. Eropa ta iirã.

*Jesucristo masare igu tauburi yujuñe ta buheriñe ãhraa, arĩ werepu Pablo*

<sup>6</sup> Mua mata Goãmu yare duhurã iica. Goãmu muare igu yarã árĩmorãre aĩdigu árĩmi Jesucristo igu marire sãribasara mera. Igu muare eropa aĩquerecũ muapu igure duhu gajirã ya buherire peenugarã iica. “Gaji ãhraa marire tauburi buheri,” erã arĩ werecũ peerã iica mua gajirãre. Mua eropiira querere peegu pee uca wahaa yuhu. <sup>7</sup> Opa waro iica mua árĩrore. Gajirã mua pohro eja muare were goroweorã iicoma. “Jesucristo marire taumi,” arĩ buherire gohrotodiarã, “Gaji ãhraa marire tauburi buheri,” arĩ buherã iicoma muare. Eropigu muare ire werediaca. Gaji buheri marire tauburi buheri marica. <sup>8</sup> “Gaji buheri ãhraa mari tauburi buheri,” muare arĩ were goroweorãre Goãmu burigã dipuwaja moagu peamegue wadoreporo. Yu basi ta were goroweocũre Goãmu yu sãre dipuwaja moaporo. Anyu umaro majagu igu eropa buhecũ igu sãre dipuwaja moaporo. <sup>9</sup> Gua gajisubu arĩrare dipaturi yuhu werea daja muare. Yujugu muare ðari buherire gajiropa buhecũ, gua muare buhediro dopa werebigure igure Goãmu burigã dipuwaja moaporo. Peamegue wadoreporo.

<sup>10</sup> Yuhu masare buhegu Goãmu gamero dopa ta diaye majare buhea. Masa peesuacũ, peesuabiricũ sãre buhea. Eropigu dohpaguere yuhu masa peediari dihtare wereniguibea. Cristo gamero dopa ta buhediacã. Igu pohro majagu ðagu árĩdiagu eropa buhea yuhu.

*Pablo igu Jesucristo yare buhebure apirare werepu*

<sup>11</sup> Opa weregura muare: Yuhu muare ðari buheri eropa arĩ buhera masa ya pepiri árĩbeaa. <sup>12</sup> Ne yujugu masu iri buherire yure weredorebirimi. Ne yujugu masu yure buhebirimi iri buherire. Jesucristo igu basi yure irire masicũ iimi.

<sup>13</sup> Iribojegue yu árĩricurare yuhu judio masa buherire peenururasubu yu iirare mua peetuhabu. Yuhu Jesucristo yarãre burigã ñaturigu nurusamuribu erãre ñero iibu. Eropigu Jesu yarãre burigã ñero iigu erãre wejẽpehocãdiaribu. <sup>14</sup> Eropigu gua judio masa

ya buherire yu mera masanirã tauro umupeomuricaribũ. Gũa ñecu sũmarã árĩricurire burigã iimuricaribũ. <sup>15</sup> Yu eropa iirisubu õpa wabũ yũre. Goãmũ ãgu õaro mahiri mera yũre sihumi pare. ãgu yũ dehyoaboro coregue beyetuhapũ yũre. <sup>16</sup> Eropigu ãgu magũre Jesucristore yũre masicũ iimi. ãgũre masicũ iigu yũre judio masa árĩbirãre buhebure apimi. “Jesucristo marire taumi,” arĩ buherire werebure apimi yũre. Eropa Goãmũ yũre masicũ iira pũhrũ gajirãre serẽpigũ wabiribũ. <sup>17</sup> Jerusaléngue árĩrãre yũ core Jesu ãgu apinirã sãre serẽpigũ wabiribũ. Erote eropa wabigu Arabia yebaguepũre diaye wabũ. Pũhrũguere Damascogue dujaa wabũ.

<sup>18</sup> Æhre bojori pũhrũ Jerusaléngue wabũ. Pedrore ãagu wabũ. Pe semana ta árĩbũ ãgu mera. <sup>19</sup> Gajirã Jesu ãgu apinirãre ne ãabiribũ irisubure. Mari Opũ Jesucristo pagũ magũ Santiago dihtare ãabũ. <sup>20</sup> Yũhũ mũare eropa arĩgu diaye weregu iiaa. Yu õpa arĩrere Goãmũ masimi. Eropa arĩgu õpa arĩdiaca mũare. Jesucristo dihta yũre masicũ iimi ãgu buherire.

<sup>21</sup> Jerusaléngue árĩra pũhrũ Siria yebague Cilicia yebague ejabũ. <sup>22</sup> Irisubu Judea yeba majarã Jesucristo yarãpũ yũre ãha masibirima dohpa. <sup>23</sup> Yũhũ Jesucristo yagu árĩri querere peenirã árĩma. “ãgu Pablo marire Jesu yarãre ñero iidianũrũ curidigu dohpaguere Jesucristo yare buhegu ãhrimi. Mari Jesucristore umupeorire dedeodidigu dohpaguere irire Jesucristore umupeoburire buhegu wahami,” gajirã erãre eropa arĩ werecũ peenirã árĩma Judea yeba majarã. <sup>24</sup> Eropa peerã Goãmũ mera mucubiriñorã.

## 2

### *Gajirã Jesucristo ãgu apinirã gameñorã Pablo buherire*

<sup>1</sup> Catorce bojori pũhrũ Jerusalénguere wabũ daja. Bernabé wami yũ mera. Tito sãre aĩgãbũ. Goãmũ yũre wadoremi Jerusaléngue. Eropigu erogue wabũ. <sup>2</sup> Eropigu erore eja Jesure umupeorã gamenererogue yũhũ erã oparãre boje sihuu werebũ erãre. Judio masa árĩbirãre Jesucristo marire tauburi buherire yũ buherare werebũ oparãre. Eropa weregu erã yũ buherire õaro masicũ erãre “Õapũrica,” arĩcũ iidibũ erãre. Erã yũ buherire gamebirã yũ buheri sãre “Waja mariri ãhraa,” arĩbocoma, arĩ pepirabũ yũhũ. Erã gamema. <sup>3</sup> Eropirã erã Titore ãgu judio masũ árĩbiriqũregũ ãgu Jesure umupeogu arĩcũ ãha erã judio masa dorero dopa iidorebirima ãgũre. Eropirã ãgũre gasiro merogã wiri aĩdorebirima ãgũre. <sup>4</sup> Gajirãpũ Jesure umupeorã gamenererogue ñajajanirãpũ ãgũre circuncisiõn gasiro merogã wiri aĩcũ gamerima. Erã Jesure umupeorã gohra árĩbirima. Erã gũa sihubiriquerecũ gũa pohrogue peedurirã ñajajanirã árĩma. Gũare weresãdiama. “Erã Jesu yarã Moise dorerire iibirã ãhrima,” arĩdiama gũare. “Goãmũ pohro wadiarã gũa dorerire iiro gahmea marire,” arĩ dorediarima daja. Gũa Jesucristo yarãpũre Jesucristo tautuhajami gũa Goãmũ mera õaro árĩborore. <sup>5</sup> Eropirã erã eropa gũare dorecũ ãarã erãre ne yũhrĩbiribũ. Erãre yũhrirã iri Jesucristo marire tauburi buherire queoro buhemasibiriboaya mũare. Eropirã erã dorediarire cãhmotacãbũ.

<sup>6</sup> Eropirā Jesu yarā oparā yu buherire erāre weretuhajara puhru “Mū buheri ōhaa,” arīrā, yu buherire yure gohrotodiabirima. Gūa judio masa dorerire iiburi sāre buhedorebirima. Erote erā oparāre masa umupequerecū erā iiro dopa iibiribu. Goāmū árīpehrerāre oparā árīrā sāre bu árīrā sāre yujuropa ta ihami. “Erāre beyediro dopa ta yu sāre Goāmū beyemi,” arī pepibu. <sup>7</sup> Eropirā oparā yu buherire gohrotodiabirā judio masare árībirāre yu buhe curirare peema. Eropirā yūhū Jesucristo īgu yare buhebure apidigu árīcū iha masima yure. Eropirā ōpa arīma yure: “Īgu Goāmū judio masare iri ōari buherire buhebure īgu Pedrore apidiro dopa ta mū sāre apiñumi. Judio masa árībirāpūre iri buherire buhebure mūre apiñumi,” arīma yure. <sup>8</sup> Eropigu īgu Goāmū Pedrore judio masare buhebure obeodigu ta yu sāre obeomi judio masa árībirāre buhebure.

<sup>9</sup> Eropirā erā oparā urerā Santiago, Pedro, Ńu mera yure iha masima. Goāmū īgu mahiri mera īgu yure beyedigu yu árīcū masima. Eropirā yure Bernabé sāre ōaro bocatīrima. “Eropa ta iirā mari. Mari yujuro mera buherā. Mūapū judio masa árībirā pohrogue buherā warāca. Gūapū judio masare buherā warāca,” arīma yure Bernabé sāre. <sup>10</sup> “Iri dihta iiro gahmea,” arīma gūare. “Mojomorocūrāre itamuniguicāro gahmea,” arīma. “Eropa ta iiaa,” arībū gūa erāre. Eropigu eropa ta yu buhe curirogue Jesu yarā mera niyerure gameneo erā mojomorocūrāre ohaa dohpa.

*Antioquíague Pablo Pedrore werepū īgu ōaro iibirirare*

<sup>11</sup> Ero puhru gūa Antioquía macague árīcū Pedro curigu erami gūa árīrore Jesure umupeorā gamenererogue. Erogue erara puhru Pedro queoro iibiricū iha īgu eropa iira dipuwaja bārigā werebū īgure Jesure umupeorā peeuro. <sup>12</sup> Eropigu Pedro Antioquíague ne eragu gamenere bamūrimi judio masa árībirā Jesure umupeorā mera. Irisubu gajirā judio masa Santiago obeonirā erama. Erā eranirā ōpa arī pepirā arīma. “Árīpehrerā Jesure umupeorā judio masa árībirā sā gūa dorerire iiro gahmea Goāmū erāre ōaro iaborore. Eropirā árīpehrerā judio masa iiro dopa gasiro merogā wiri aīro gahmea. Eropa árībirā mera babiricāro gahmea,” arīrā arīma eranirāpū. Eropigu Pedro erā eracū iha judio masa árībirāre dūca wami. Erā gasiro merogā wirisūbirinirā árīcū erāre dūca wami erā eranirā weresārire gūigu. Erā mera babirimi pare. <sup>13</sup> Īgu eropiicū iha ero majarā gajirā judio masa erā sā dūca wama judio masa árībirāre. Bernabé sā erā iiri queoro árībiricū masiqueregu erāre ihacū īgu sā dūca wami erāre. <sup>14</sup> Erā eropiicū iha gamebirigohracābū yūhū. Erā judio masa árībirāre dūca warā “Jesu dihta marire taumi,” arī iħmubirima. “Moise doreri sāre umupeoro gahmea,” arī iħmurima erā judio masa árībirāre. Eropigu yūhū árīpehrerā Jesure umupeorā peeuro bārigā arībū Pedrore. “Mūhū judio masū árīqueregu ōguere ne eragu judio masa árībirā mera yujuro mera bagū gūa judio masa árīricūrire guñabirabū. ¿Duhpigū mūhū dohpaguere gohrotodiari? ¿Eropigu duhpigū dohpaguere erā judio masa árībirāpūre gūa árīricūrire iidorediari?” arī werebū īgure īgu queoro iibirira waja.

*Árīpehrerā Jesure umupeocū Goāmū taumi erāre, arī werepū Pablo*



<sup>15</sup> Gaa judio masa porã áhraa. Eropa árĩrã gajirã Moise dorerire tarinugarã iiro dopa árĩbeaa. <sup>16</sup> Eropa árĩbiriquererã gaa Jesure umupeorã dohpaguere òpa masirã áhraa. Yujugũ Moise dorerire iicũ Goãmũ pohro waburi árĩbeaa. Ígu Jesucristore umupeonijagu ígu ñeri iira dipuwajare cãdijisũdigũ wahami. Iri mera dihta òhami Goãmũ mera. Eropirã gaa judio masa árĩquererã Goãmũ mera òaro árĩmorã Jesucristore umupeobũ. Goãmũ mera òaro árĩmorã Moise dorerire iibiribũ. Ígu mera òaro árĩmorã gaa dorerire umupeorã Goãmũ mera òaro árĩbiriboaya. Eropirã Jesucristore umupeobũ gaa ñeri iira dipuwaja pehrebro dopa.

<sup>17</sup> Eropirã gaa Jesucristore umupeori mera gaa Goãmũ mera òaro árĩrãca. Eropa Jesucristore umupeorã Moise dorerire iibiriquererã Goãmũ dorerire tarinugarã iibea. Jesucristo sã Goãmũ dorerire tarinugadoregũ ne árĩbeami. <sup>18</sup> Eropigũ masare òpa arĩ buhea yũhũ. Goãmũ mũare “Òarã áhrima,” ígu arĩ ïaboro dopa Jesucristopũre umupeoro gahmea. Eropigũ “Mũa Goãmũ mera òaro árĩdiarã Moise doreri sãre umupeoro gahmea,” arĩbeaa. Yũhũ Moise dorerire doregũ Goãmũ dorerire tarinugagũ árĩboya. <sup>19</sup> Ero corere Moise dorerire iimũriribũ Goãmũ mera òaro árĩdiagũ. Eropa iiqueregũ dipuwajacũgũ árĩmũriribũ. Dohpaguere Jesucristo mera dipuwajacũbeaa. Eropigũ “Iri Moise dorerire iiro gahmea,” arĩbeaa pare. Eropigũ yũhũ Goãmũ ígu dorero dopa ta iigũ iiaa. <sup>20</sup> Jesucristo crusague sĩrigũ yũ ñegũ árĩrare gohrotodigũ árĩmi. Eropigũ yũ ero coregue árĩdiro dopa árĩbeaa pare. Cristo yũ mera árĩgũ yũre ígu dorerire òaro iimasicũ iimi. Eropigũ yũ árĩricũrare iibea. Jesucristo yapũre iiaa. Ígu Jesucristo yũre mahitarigũ yũre yũ ñero iira dipuwaja sĩribasadi árĩmi. Eropigũ ígũre guñaturagũ ígu dorerire iiaa. <sup>21</sup> Goãmũ mera òaro árĩmorã mari ñecũ sumarã árĩricũrire, Moise dorerire iicũ Jesucristo mari ñero iira dipuwaja sĩribasara wajamariboya. Eropigũ ne umupeogũ duhosome “Jesucristo marire taumi,” arĩ buherire.

### 3

*Jesucristore umupeori mera Goãmũ marire “Òarã áhrima,” arĩ ïhami, arĩ werepũ Pablo*

<sup>1</sup> Mũa pee masibirã áhraa dohpaguere. Mũare Jesucristo ígu basi mari ñeri iira dipuwajare sĩribasarare mũare werecũ mũa òaro ïha masiribũ. ¿Mũa eropa òaro masicũ noa mũare goroweoari dohpaguere iri diaye maja mũa umupeoborañere? <sup>2</sup> Eropigũ òpa serẽpidiaca mũare. ¿Mũa Moise dorerire umupeori mera Espĩritu Santo mũare eranugari? Erabirimi. Mũa “Jesucristo marire taumi,” arĩ buherire peecũ Jesucristore umupeocũ ígu Espĩritu Santo mũare erami. Ígu yarã mũa árĩmorã árĩcũ erami. <sup>3</sup> ¿Mũa duhpĩrã pee masibirã iiro dopa wahari dohpaguere? Mũa ne Jesucristore umupeorã Espĩritu Santo itamuri mera ígu yare iimũribũ. ¿Eropirã duhpĩrã dohpaguere mũa turari mera iidari? <sup>4</sup> ¿Mũa Jesucristo yarã árĩnugarã mũa Jesucristore umupeora waja mũa ñero tarirare guñabeari? ¿Mũa eropa umupeora “Bu gohra áhraa,” arĩ pepiri mũa dohpaguere? <sup>5</sup> Òpa òaro guñaro gahmea. Goãmũ mũare ígu Espĩritu Santore odigũ árĩmi. Espĩritu Santo mũa mera árĩgũ mũa watope

deyoro moarire m̄are ðarire iimi. Īḡu eropiḡu Moise dorerire m̄a umupeori mera eropa iibeami. M̄a “Jesucristo marire taumi,” arī buherire ðaro pee Īḡure umupeocū eropa iimi.

<sup>6</sup> Ḡa judio masa ñecū Abrahāp̄u Goām̄re “Diaye ta árīḡu āhrimi,” arī ðaro umupeoñumi. Īḡu eropa umupeocū ĩha Goām̄u Īḡure “Ñeri dipuwaja mariḡu ðaḡu āhrimi,” arī ĩañumi. <sup>7</sup> Eropirā ðpa masique m̄a. Goām̄u ðpa arīmi: “Árīpehrerā masa judio masa árībirā s̄a Abrahā umupeodiro dopa ta ȳre umupeorā Abrahā p̄amerā āhrima. Eropirā yaharā āhrima,” arīmi Goām̄u. <sup>8</sup> Iribojegue irire Goām̄u arī weryutuhañumi. Īḡu wewepira ðpa āhraa Īḡu yare gojarap̄gue: “Árīpehrerā masa judio masa árībirā s̄a ȳre umupeorāre ‘Ōarā āhrima,’ arī ĩaḡuca. Ñero iira dipuwaja marirā ĩaḡuca erāre,” arīñumi. Eropiḡu iri ðari buherire Abrahāre arī weryuñumi. “Árīpehrerā masa m̄h̄u ȳre umupeoro dopa ta ȳre umupeocū ‘Ōarā āhrima,’ arī ĩaḡuca ȳh̄u erāre. Erāre ðaro iiḡuca,” arīñumi Goām̄u Abrahāre. <sup>9</sup> Abrahā Goām̄re Īḡu umupeocū Goām̄u ðaro iñumi Īḡure. Eropiḡu árīpehrerā masa mari s̄a Īḡure umupeocū Goām̄u ðaro iiḡucumi mari s̄are.

<sup>10</sup> Gajirā ðpa arīrā āhrima. “Moise dorerire ðaro iicū Goām̄u ‘Ōarā āhrima,’ arī ĩaḡucumi marire,” arīrima. Eropa arīrā dipuwajacurā āhrima dohpa. Goām̄u yare gojarap̄gue ðpa arī werea. “Moise dorerire iirā erā iri dorerire árīpehrerire queoro iipehobirā dipuwajacurā āhrima,” arī gojara āhraa. Eropirā iri dorerire iipehomasibirira waja dipuwaja moasūmorā āhrima árīpehrerā. <sup>11</sup> Ne yujugare iri dorerire ipeho masiya mara. Eropirā Moise dorerire iiri mera Goām̄u mera ðamasibeama. Ōpa arī gojañuma Goām̄u yare gojarap̄gue. “Īḡure umupeorāre Goām̄u ‘Ōarā āhrima,’ arī ĩhami. Ñero iira dipuwaja marirā ĩhami. Eropirā erā ðaro árīniguicārācoma Goām̄u mera,” arī gojañuma. Eropirā mari masia. Ne yujugare iri dorerire Īḡu iiri mera Goām̄u Īḡure “Ōaḡu āhrimi,” arī ĩabeami. Goām̄re umupeoḡu dihta ðaro árīḡucumi Īḡu mera. <sup>12</sup> Goām̄re umupeoḡup̄, “Goām̄u ȳre ȳ ñero iira dipuwaja maricū iiḡucumi,” arīmi. Moise dorerire iiḡup̄ “Ȳu basi iri dorerire iiḡu ñero iira dipuwaja mariro ðaro árīḡuca,” arīrimi. Eropiḡu Īḡu iri dorerire iipehomasibiḡu árīḡu ñero iira dipuwajacuḡu dujami.

<sup>13</sup> Eropirā mari árīpehrerā iri doreri mera ñero iira dipuwajacurā dujam̄iririb̄u. Mari eropa árīcū ĩha, Jesucristo mari ñero iira dipuwaja Īḡu basi wajayemi Īḡu crusague s̄iriḡu. Goām̄u yare gojarap̄gue ðpa werea: “Īḡu yucuḡugue dirisiudiḡu Goām̄u Īḡu ñero iira dipuwaja moadiḡu āhrimi,” arī gojañuma iri bojegue. Eropiḡu Jesucristore crusague dirisiudiḡure mari ñero iira dipuwajap̄re Goām̄u Īḡure dipuwaja moadiḡu árīmi. Eropirā marip̄u ñero iira dipuwaja marirā dujaa pare. <sup>14</sup> Jesucristo eropiicū Goām̄u Abrahāre ðaro ĩadiro dopa ta judio masa árībirā s̄are ðaro ĩanuḡami. Eropiḡu Īḡu arīdiro dopa ta Īḡu obeodiḡu Esp̄ritu Santop̄u erami marire Jesucristore umupeorāre.

*Īḡu buherare werenemop̄u Pablo*

15 Mari masa mari iiro dopa ta weremuhtagura mware. Perã “Ōpa iirãca,” erã arĩ weretamura pũhrũ gajĩgũ gohrotomasibeami. 16 Eropigũ Goãmũ Abrahã mera weretamura pũhrũ Abrahãre ĩgũ arĩrare gohroto masiya mara. Ōpa arĩ werepiĩnumi ĩgũre: “Mũ pãrami arĩturiagũ mera arĩpehrerã masare ðaro iigũra,” arĩ wereĩnumi. Eropa arĩgũ ĩgũ pãramerã arĩturiarãgũ mera arĩgũ iibiriĩnumi. Yujugũ ta ĩgũ pãrami arĩturiagũ dihtare arĩgũ iĩnumi. Eropa arĩgũ ĩgũ pãrami arĩturiagũ Jesucristo ariburire arĩ wereyugũ iĩnumi. 17 Eropigũ ðpa arĩ werea mware: Iribojegue Goãmũ Abrahã mera weretamugũ masare ĩgũ ðaro iiburire wereĩnumi. ĩgũ eropa weretamura pũhrũ yoari boje pũhrũ cuatrocientos treinta bojori arĩturiagũ mera arĩpehrerã masare ðaro iigũra,” arĩ wereĩnumi. Eropa arĩgũ ĩgũ pãramerã arĩturiarãgũ mera arĩgũ iibiriĩnumi. Yujugi pũhrũ Moiserẽ ĩgũ doreri apiĩnumi. Moise doreri arĩnũgaquerecũ Goãmũ Abrahãre werepira pehrecũ iibiriyoro. 18 Goãmũ Abrahãre mahĩgũ ðpa ĩgũre arĩ weretuhãnumi. “Arĩpehrerã masare mũ yãre umupeoro dopa ta yãre umupeorãre ðaro iigũca,” arĩ weretuhãnumi. Eropiro Moise doreri arĩnũgaquerecũ Goãmũpũ iri dorerire iiri mera masare taubeami. Moise doreri iiri mera mari taricũ Goãmũ mware “Waja mariro ðaro iig mera arĩgũ iibiriĩnumi. Yujugũca,” ĩgũ arĩrapũ duhpiburi arĩbiriboaya.

19 ¿Eropigũ duhpiburire iri dorerire Moiserẽ apiyuri Goãmũ? Masa erã ñerire masiborore apiĩnumi iri dorerire erã ñero iira dipuwaja masiborore. Abrahã pãrami arĩturiagũ Jesucristo ĩgũ eracũgũe arĩtuya iri doreri. Eropigũ Jesucristo ĩgũ eracũ Goãmũ Abrahãre ĩgũ werediro dopa ta masare ðaro iĩnumi. Goãmũ iri dorerire apigũ anyuare weremuhtaĩnumi. Erã anyua wereĩnuma Moiserẽ. ĩgũ Moisepũ masare wereĩnumi. 20 ĩgũ masare ðaro iiburire Goãmũ ĩgũ basi ta werepiĩnumi Abrahãre. Gajirã mera werebeobiriĩnumi ĩgũ iri dorerire apidiro dopa ta. Eropigũ ĩgũ Abrahãre werepirapũ Moise doreri tauro ðhaa.

### *Moise dorerire werepũ Pablo*

21 Goãmũ Moiserẽ ĩgũ dorerire apigũ, ero coregue Abrahãre ĩgũ arĩrare “Yũ arĩdiro dopa iisome pare yũhũ,” arĩgũ iibiripũ ĩgũ. Abrahãre ĩgũ arĩmuhtadiro dopa iibu iipũ. “Masare ðaro iigũca,” ĩgũ arĩrare iibu iipũ dohpa. Moise dorerire iiri mera mari Goãmũ mera ðaro arĩmasirã mari iri dorerire ðaro iirã ñero iira dipuwaja opabiriboaya. 22 Eropa arĩquerecũ Goãmũ yare gojarapũgũe ðpa ãhrraa: “Masa arĩpehrerã erã ñero iira dipuwaja opama, arĩ gojara ãhrraa. Eropa dipuwajacũrãre erã Jesucristore umupeocũ Goãmũ ðaro iigũcumĩ erãre. ĩgũ Abrahãre werediro dopa ta iigũ erãre ñero iira dipuwaja marirã ĩagũcumĩ.

23 Jesucristore umupeori mera masare tauburi arĩboro core gũa Moise doreri doca arĩmũribũ. Eropa Moise dorerire iirã peresugue arĩro dopa arĩmũribũ. Jesucristo gũare tauboro core eropa arĩmũribũ. 24 Ōpa sã arĩburi arĩbũ Moise doreri: Moise doreri mera Jesucristore mari masiburi erabũ. Mari porãre erã buherogue soro dopa ta Moise doreri marire Jesucristore masicũ iibũ. Eropirã mari Jesucristore umupeocũ ĩgũ marire taumi. Mari ñero iira dipuwaja maricũ iimi. 25 Eropirã dohpaguere mari Jesucristore umupeorãre Goãmũ “Ōarã

ãhrima,” arĩ ìhami. Gua Jesucristore masirã Ìgure umupeorã árĩrã dohpaguere Moise doreri doca árĩbeaa pare.

<sup>26</sup> Mũa sã árĩpehrerã Jesucristore umupeorã Ìgu yarã árĩrã Goãmũ porã àhraa. <sup>27</sup> Eropirã mũa árĩpehrerã Jesucristore umupeorã Ìgu waĩ mera waĩyesũnirã árĩrã Jesucristo Ìgu iro dopa ta àhraa. Jesucristo Goãmũ magũ árĩro dopa ta mũa sã Goãmũ porã àhraa. <sup>28</sup> Eropirã árĩpehrerã Jesucristo yarã yujuro mera àhraa. Yujugu porã iro dopa àhraa. Eropigu gua judio masare mũa judio masa árĩbirã sãre Goãmũ yujuropa ta ìhami. Masa pohro majarãre erã oparã sãre yujuropa ta ìhami. Ùmare nome sãre yujuropa ta ìhami. <sup>29</sup> Eropirã mũa Jesucristo yarã árĩrã Abrahã pãramerã sã àhraa. Eropigu Goãmũ Abrahãre “Mũre òaro iigura,” arĩrare mũa sãre iimi. Cristo yarã mũa árĩcũ Ìagu mũare òaro iigucumi.

## 4

<sup>1</sup> Mari iri doreri doca árĩbiriborore mari Jesu yarã árĩborore weregura daja. Yujugu majigu Ìgu pagu yare wũaro opapehobu árĩqueregũ majigu árĩgu pohro majagu iro dopa àhrimi. Gajirã dorero doca àhrimi dohpa. <sup>2</sup> Gajirã Ìgu pagu apinirã Ìgu ya árĩburire ìhadibuma dohpa. Ìgu pagu gameranũ árĩcũgue Ìgu basi Ìgu yare doremi pare. <sup>3</sup> Ìgu majigu gajirã dorero doca Ìgu árĩro dopa ta mari masa mari ñecu sũmarã árĩricuri doreri doca árĩmũrĩribũ. Pohro majarã iro dopa ta árĩmũrĩribũ. <sup>4</sup> Mari eropa árĩnirãre mari Pagu Goãmũ Ìgu gameranũ ejacũ Ìgu magure Ìgu pohro árĩdigũre obeodigu árĩmi. Ìgure obeocũ Ìgu nomeoguere dehyoadigu árĩmi. Eropa dehyoagu judio masũ árĩdigũ árĩmi Moise dorerire iigu. Eropigu Goãmũ obeodigu árĩmi Ìgu magure. <sup>5</sup> Gua iri doreri doca árĩrãre taubure obeodigu árĩmi Ìgu magure. Ìgu marire taugu mari pohro majarã iro dopa árĩnirãre wiugu Ìgu porã árĩcũ iimi.

<sup>6</sup> Eropiituhaja mũa sã Ìgu porã árĩcũ Ìgu Jesucristo mera Espĩritu Santore obeomi mũare. Eropirã Espĩritu Santo marire Ìgu itamuri mera Goãmũre mari Pagure “Ahũ,” arãa mari pare. <sup>7</sup> Eropirã mũa Goãmũ porã ta àhraa. Ìgu porã árĩrã mũa ñecu sũmarã doreri doca, pohro majarã iro dopa árĩbeaa pare. Goãmũ magũ Jesucristo wiunirã àhraa. Mũa eropárĩrã Ìgu porã árĩrã Goãmũ oburire oparãca mũa árĩpehrerire.

### *Pablo Galacia majarã Jesu yarãre guñaricũru*

<sup>8</sup> Mũa ero core Goãmũre masibirã árĩrã gajirã goãmarãre umu-peonũrĩribũ. Eropirã erã pohro majarã iro dopa árĩmũrĩrabũ. Goãmũ gohrare umupeobĩrĩmũrĩribũ. <sup>9</sup> Eropa árĩquererã ta dohpaguere Goãmũre masia. Goãmũru mũare ìha masimi. ¿Ìgu eropa masiquerecũ ta duhpirã i yeba majarã erã pepirire gahmeri daja? ¿Duhpirã iribojegue mũa ñecu sũmarã doreri mũa iidiro dopa ta mũraro ta Cristo mariro dopa ta iidiari daja? ¿Eropirã duhpirã dohpaguere Moise dorerire mũa iinũgarã, pohro majarã iro dopa árĩdiari daja mũa? <sup>10</sup> Judio masa erã bosenũri iro dopa mũa sã iica Goãmũ mera òadiarã. Soorĩnũri nũcũ, aberi nũcũ, bosenũrĩre eropiica. Bojori nũcũ bosenũrĩre òaro iica. Mũa eropiiri queoro árĩbeaa. <sup>11</sup> Mũa eropiicũ

pee ñero sīporācūca yūpū. Mũare yū turaro buhequerecū ta “Iri waja mariboca,” arī pepia.

<sup>12</sup> Eropigū yūhū mũare buriḡā ōpa arī werea. Mari Jesucristore umupeoturadiro dopa ta umupeoque daja. Yū Jesucristore umupeogū guā judio masa doreri yūre taubiricū ĩha irire umupeobiribū pare. Eropirā mũa sã Jesucristore umupeorā iri dorerire umupeobiricāro gahmea Goāmū mera ōaro árīmorā. Yūhū mũa pohro ne árīcū mũa ne ñero iibiribū yūre. <sup>13</sup> Mũa masia yūhū mũa pohro ne árīdirore. Yūhū Jesucristo marire tauburire ne mũare buhegū ejagu dorecūgu árībū. <sup>14</sup> Yū dorecūgu ñero taribū. Yū eropa dorecūgu árīquerecū mũa yūre doobiribū. Yūre ōaro umupeo ōaro bocatīribū. Goāmū obeodigū anyu árīro dopa yūre ĩabū. Yūre Jesucristore iiro dopa ōaro iibū. <sup>15</sup> Yūre buriḡā gamebū. Yūre buriḡā gamerā yū serēropē ta árīpehrerire omorā árībū yūre. ¿Mũa eropa árīcū dohpa wahari dohpaguere? Mũa negohraguere yūre mucubiridiro dopa ta dohpaguere mucubiribea. <sup>16</sup> ¿Mũare diaye majare yū werera waja mũa ĩhaturigū wahari dohpaguere?

<sup>17</sup> Mũa pohrore gajī buherire buherā mũare ōaro umupeocoma. Erā eropa umupeoquererā mũare sīporā mera mahibiricoma. Mũa yūre yū buheri sãre gamebiricū gahmema erā. Mũa erāpūre umupeocū gahmema. Eropirā mũare umupeocoma. <sup>18</sup> Masare umupeocū ōapūrica. Erā weca dihta umupeocū ōabeaa. Yū árīcū dihtare umupeocū ōabeaa. Árīpehrerāre yujuropa ta ōari mera umupeoniguičāro gahmea. <sup>19</sup> Mũa yū porā iro dopa āhraa. Eropigū mũare guñaricua. Mũaare buriḡā guña teboricua. Yujugo porācūbo teboricuro dopa ta yū sã teboricua mũare guñagu. Igo magū ōaro dehyoacū gamego teboricūmo. Mũa Goāmū porā ōaro árīcū gamegū teboricua yū sã. Mũa Jesucristo árīricurire ōaro opacū gahmea. <sup>20</sup> Mũa pohro buriḡā wadiarica. Yū mũa mera árīgu yū basi mũare ōaro weremasiboya gojaripū gojaro mariro. Eropigū mũare dohpaguere ĩabigū mũa Jesucristore ōaro umupeoturanemoborore masibirica.

*Agar Sara mera erā árīrare werequeogu mari Goāmū porā árīrare werepū Pablo*

<sup>21</sup> ¿Mũa Goāmū mera ōaro árīmorā Moise dorerire iiniguicādiarā mũa Moise arī gojarare masibeari? <sup>22</sup> Ōpa arī gojañumi Moise: Abrahā porā ũma perā árīñuma. Īgu marapo pohro majago Agar waīcūgo yujugū porācūñumo. Pūhrū Abrahā marapopū Sara waīcūgo gajigū porācūñumo. <sup>23</sup> Īgu pohro majago magū mari masa iro dopa ta masa dehyoañumi ĩgu. Abrahā igore porā moara pūhrū mata nijipo āhri porācūñumo. Īgu marapopū mata porā bocamasibiriñumo. Eropigū Goāmū ĩgu arīdiro dopa ta igore porā bocacū iñumi. <sup>24-25</sup> Erā perā nome iribojegue eropa warare ōpa buhegura mũare. Goāmū Abrahāre wererare iirā Sara árīro dopa āhrima. Gajirā Moise dorerire iirā Agar iiro dopa āhrima. Agar igo porā sã gajirā dorero doca árīmuriñuma. Pohro majarā árīmuriñuma. Erā árīdiro dopa āhrima Moise dorerire iirāpū. Eropirā Moise doreri doca árīmuriñuma. ĩhri pohro majarā iro dopa árīrā. Iri dorerire iirā “Goāmū mera ōaro árīrāca,” arīmuriñuma. Iri dorerire Goāmū Moiserē apīñumi Sinaí waīcūdigū utāḡugue Arabia yebague. Dohpaguere iri dorerire

Jerusaléngue judio masa umupeoma. Eropirã iri doreri doca âhrima. <sup>26</sup> Ōpa âhrima Goãmũ Abrahãre wererare iirãpũ. Erã Jesucristore umupeorã âhrima. Sara árĩdiro dopa âhrima. Sarapũ pohro majago árĩbirimuriñumo. Mari Jesucristore umupeorã “Moise doreri mera taribea,” arãa. Jesucristo marire taucũ Goãmũ porã árĩrã mama Jerusalén maca majarã âhraa. <sup>27</sup> Eropirã Jesucristore umupeorã Goãmũ porãpũ bajarã árĩrãcoma. Moise dorerire iirãpũ bajamerã árĩrãcoma. Eropa ta arĩ werea Goãmũ yare gojarapũgue:

Mũhũ ne porã opabigo, porãcũri pũririñe pepibigo ðaro mucubirique. Gajigo igo marapũ mera árigo igo porã árĩquerecũ igo pãramerã árĩturiarã bajamerã árĩrãcoma. Mũpũre dohparagã mũ porã mariquerecũ mũ pãramerã árĩturiarã tauro bajarã árĩrãcoma. Eropigo mucubirique, arĩñumi Goãmũ.

<sup>28</sup> Isaa Abrahã magũ árĩdiro dopa mari Goãmũ porã âhraa. Isaa Abrahã magũ dehyoagũ Goãmũ ĩgũ werediro dopa ta dehyoañumi. Mari Goãmũ porã árĩrã Goãmũ ĩgũ werediro dopa ta ĩgũ porã âhraa.

<sup>29</sup> Eropirã Abrahã porã perã arĩñuma. Pohro majago magũ Ismael árĩpehrerã masa iro dopa dehyoañumi. Isaapũ ĩgũ pago igo porã bocamasibiricũ Espĩritu Santo itamuri mera porãcũñumo. Erã dehyoara pũhrũ Ismaerũ pohro majago magupũ Isaare Abrahã marapo magũre ĩgũ ñero taricũ iimuriñumi. ĩgũ iidiro dopa dohpagũere eropa wahaa. Erã Moise dorerire iidorerãpũ marire ñero taricũ iima. Mari Espĩritu Santo itamuri mera Goãmũ porã âhraa. Mari eropa árĩrãre marire ñero taricũ iima. <sup>30</sup> Eropa wacũ Goãmũ yare gojarapũgue irire dohpa arĩrere buherãca. Ōpa Goãmũ arĩñumi Abrahãre. “Mũ pohro majago magũ mũ oparire ne opasome, arĩñumi. Mũ marapo magũ dihta opapehogũcumi. Eropigũ mũ pohro majago igo magũ mera cóãque mũ pohrore,” arĩ wereñumi Goãmũ Abrahãre. <sup>31</sup> Eropirã, yũ acawererã, mari Goãmũ porã árĩrã pohro majago magũ iro dopa árĩbeaa. ĩgũ pagũ oburire opamasibiriñumi. Maripũ mari Pagũ Goãmũ ĩgũ oburire opamasirãca. Marire ĩgũ mera ðacũ iimi.

## 5

*Cristo marire ĩgũ taura pũhrũ turarã árĩro gahmea marire, arĩ gojapũ Pablo*

<sup>1</sup> Eropigũ marire mari ñecũ sũmarã árĩricũri dorero doca árĩnirãre Jesucristo tautuhajami. Mari ñero iira dipuwajare Jesucristo ĩgũ basi wajayebasami mari Goãmũ mera ðaro árĩboro dopa. Eropirã mari Goãmũ porã árĩrã Jesucristore guñaturaniguicãro gahmea. Eropirã peebiricãro gahmea erã Moise dorerire iidorerãre.

<sup>2</sup> Ōaro peeque yũre. Yũhũ Jesucristo ĩgũ apidigũ âhraa. Eropigũ mũare ōpa werea. Mũa Goãmũ mera ðaro árĩmorã mũa gasiro merogã wiri aĩcũ Jesucristo mũare ĩgũ sĩribasara waja mariboya. <sup>3</sup> Eropigũ guhyadiaro mera werea daja. Goãmũ mera ðaro árĩborore erã gasiro merogã wiri aĩrã Moise dorerire árĩpehrerire iiro gahmea erãre.

<sup>4</sup> Eropirã mũa “Goãmũ marire taugũcumi Moise dorerire iicũ,” mũa arĩdiarã, mũa Jesucristore cóãrã iiboca. Mũa eropiirã Goãmũ ĩgũ mera ðaro árĩburire mũare ðaro ĩgũ iiburire cóãrã iiboca. <sup>5</sup> “Maripũ Goãmũ mera ðhaa,” arĩmasia Jesucristore umupeori mera, Espĩritu Santo ĩgũ

itamuri mera. “Goãmũ guare ‘Ñero iira dipuwaja mariro òarã àhřima,’ arĩ ïagũcumĩ,” arĩmasia. <sup>6</sup> Eropiro gasiro merogã wiri aĩnirã árĩcũ sãre, wiri aĩbirinirã árĩcũ sãre ïabeami. Mari Jesucristore umupeorã árĩcũ gajirãre mari mahi umupeocũ ïhami Goãmũ.

<sup>7</sup> Mũa ne Jesucristore umupeorã ïgũ yare òaro diaye iimuribũ. Eropirã dohpaguere mũa Jesucristo yare diaye majare òaro iibiricũ gajirã mũare cãhmotañorã. <sup>8</sup> Goãmũrũ eropa iibirimi. ïgũ mũare Jesucristo yarã árĩmorãre beyegũ àhřimi. <sup>9</sup> Eropigũ òpa werea mũare. Yujugũ masũ ïgũ gũyarire buhenugacũ peerã masa árĩpehrerã ïgũre peerã gũyarire umupeorã wahama òaripũre peediabirã. <sup>10</sup> ïgũ mũare eropa gũyarire buhenugaquerecũ òpa arĩ pepia. “Erã Jesucristore umupeorire oparã erã iri gũya buherire umupeosome,” arĩ pepia yũhũ mũare. Mũare goroweocoregũre noho árĩgũre ïgũ eropa iira dipuwajare Goãmũ dipuwaja moagũcumĩ ïgũre.

<sup>11</sup> Òpa arĩ werewũañorã gajirã yũpũre: “‘Mari Goãmũ mera òaro árĩmorã mari gasiro merogã wiri aĩro gahmea,’ arĩ buhemi Pablo,” arãñorã yũre. Yũhũ eropa arĩ ne buhebeaa. Yũhũ dohpaguere “Gasirogã wiri aĩro gahmea,” yũ arĩ buhecũ irire iidorerãpũ yare ñero taricũ iibiriboañuma. Yũ òpa arĩ buhea: “Mari ñero iira dipuwajare Jesucristo wajayebasadi árĩmi crusague sĩrigũ. Eropirã mari Goãmũ mera òaro árĩmorã Jesucristore umupeoro gahmea,” arĩ buhea yũhũ. Yũ eropa arĩ buhecũ judio masa pee guama. Yũre ñero taricũ iima. <sup>12</sup> Erãpũ mũare goroweorãpũ gasiro merogã wiri aĩdorerãpũ erã basi wiri aĩpehocãporo.

<sup>13</sup> Mũapũre Goãmũ mũa ïgũ porã árĩmorãre aĩgũ mũa Moise dorerire iimorãre beyebiripũ. Mũare iri dorerire iidorebiriquerecũ mũa mũa ñaribejarire iibiricãro gahmea. Òpa iiro gahmea. Mũa árĩpehrerãre òaro mahi umupeorã erãre itamuniguicãro gahmea. Mũa gajirãre umupeorã Moise dorerire árĩpehrerire iirãca. <sup>14</sup> Eropa ta arĩ gojara àhřaa: “Mũ basi mahiro dopa ta mũ pohro árĩrãre mahique,” arĩ gojara àhřaa. <sup>15</sup> Eropirã mũa game ïhaturicũ, papũri, mũa disitĩri wereniguicũ mũa basi òaro mũa game umupeoro pehreboca. Eropirã mũa basi òaro árĩro gahmea.

*Masa erã gamerire iirire Espĩritu Santo ïgũ gameri sãre werepũ Pablo*

<sup>16-17</sup> Òpa arĩ werediaca mũare. Mari Jesucristo yarã árĩcũ mari pepirigue òpa àhřaa. Mari ñeri ñaribejari àhřaa. Espĩritu Santo ïgũ gameri sã àhřaa. Mari ñaribejari Espĩritu Santo ïgũ gameri mera yujuro mera árĩbeaa. Eropiro marire masiya mariro wahaa. Eropirã mũa Espĩritu Santopũre yũhrirã mũa ñaribejaripũre iisome. Eropirã Espĩritu Santo ïgũ gamerire iiniguicãque. <sup>18</sup> Eropirã Espĩritu Santo gamerire iirã árĩrã “Moise doreri mera mari tarirãca,” arĩ pepibeaa mũa.

<sup>19</sup> Masa erã ñeri ñaribejarire erã iicũ òaro ïhamasica mari. Òpa iima erã ñaribejarire iirã: ðma gajirã nome mera ñero iima. Nome sã gajirã ñma mera ñero iima. Diayea iiro dopa iiricũma. Ñerire pepima. Ñerire wereniguima. <sup>20</sup> Eropirã goãmãrã wãnanirãre umupeorã “Mari goãmũ àhřimi,” arĩ umupeoma. Gajirãre dojama. Eropirã masare doho àhřima. ïhaturima. Disitĩri wereniguima.

Gajiräre doéma. Mata guama. Gajiräre tarinugadiama. Yujuro mera árdiabeama. Yuju curu majarã gají curu majaräre ìhaturima. <sup>21</sup> Eropirã gajiräre gajinore erã opacũ ìhaturima. Gajiräre wejèdiarã wejèma. Merericurã àhrima. Mererã ñerire ùaribejama. Eropa iirã gajino ñeri sãre iima. Eropigũ yuhũ muare werediro dopa ta werea daja guhyadiaro mera. Iri ñerire iiniguigu Goãmũ ìgu opu áríroguere ejamasisome.

<sup>22</sup> Espíritu Santo yapũ òpa àhraa. Eräre òpa iirã áricũ iimi. Árípehreräre mahi umupeoma. Mucubirima. Güiro mariro àhrima. Gajirã eräre ñero iiquerecũ erã mera guabeama. Mojomoro ìhama. Duhuro mariro Goãmũ ìgu gamerire òaro iima. Erã mohmediarire erã mohmediabiriri sãre òaro iima. <sup>23</sup> Eropirã nijiyajaro mera iima. Erã ñero iidiaquererã iibeama. Eropa ta iima Espíritu Santore yùhrirã. Eropa iiräre “Eropa iibiricãque,” ne aríbeamí gajigu. <sup>24</sup> Eropirã mari Jesucristo yarã árírã mari ñero árdiurore duhucã mari gamerire mari ùaribejarire iiniguicãbeaa. <sup>25</sup> Eropirã mari Espíritu Santo itamuri mera iirã árírã ìgure yùhriniguicãro gahmea.

<sup>26</sup> Eropirã mari “Yuhũ gajiräre tarinugaa,” arí pepibiricãrã. Eropirã gajiräre game ìhaturicũ iibiricãrã. Gajirã erã òari oparire obobiricãrã.

## 6

### *Mua mera majaräre itamuque, arí werepũ Pablo*

<sup>1</sup> Acawererã, mua mera majagũ Jesu yagũ ìgu ñerire iicũ ìha ìgure itamuro gahmea mua Espíritu Santo dorerire iirãpũre. ìgu iri ñerire duhucũ òaro mera werero gahmea. Eropa itamurã mua òaro pee masique mua sã ñerire iiri arírã. <sup>2</sup> Eropirã mua basi game itamuque árípebrero. Mua eropa itamurã Jesucristo dorediro dopa ta iirãca.

<sup>3</sup> Yujugu “Yũpũ òarire iigu àhraa,” arí pepigu, ìgu òarire iibiri-quererũ òpa arígu ìgu basi guyagũ iimi. <sup>4</sup> Eropirã marire òpa iiro gahmea. Mari basi mari iiricũrre òaro queoñanũrusiario gahmea. Eropa ìara pũhrũ mari áríricũri òari áricũ ìha “Yuhũ òarire iiaa,” arímasia. Eropirã mari òari áríricũri mera mucubirimasia gajirã áríricũrre ìaro mariro. <sup>5</sup> Eropigũ mari áríricũrre Goãmũ beyegucumi. Eropirã mari gajirã erã iiricũrre ìhanũrubiricãro gahmea. Eropirã mari yujurãyeri iiripũre ìaro gahmea.

<sup>6</sup> Eropirã Jesucristo yare òari buherire peerãpũ eräre buherãpũre erã gamerire itamuporo árípehrerire òarire.

<sup>7</sup> Eropirã “Goãmũ yũ ñerire iira dipuwaja dipuwaja moasome yũre,” arí pepi masiya mara. Òpa arí pepirã mua diaye arí pepibirica. Eropiro Goãmũre guya masiya mara. Eropirã mari dohpaguere iira waja pũhrũge bocarãca. <sup>8</sup> Eropirã mari ùaribejarire iiniguirã iri ñeri iira waja dipuwajacũrãca. Eropirã peamegue warãca. Mari Espíritu Santo gameripure iirã òaro wajatarãca. Eropirã Goãmũ mera ùmuri nũcũ òaro áriniguirãca. <sup>9</sup> Eropirã mari Espíritu Santo gamerire iiniguicãrã. Gariborebiricãrã. Goãmũ gamerinũ mari wajatarãca òarire duhubirã. Eropirã òarire iiniguicãro gahmea. <sup>10</sup> Eropirã árípehrerisubure òaro umupeoro gahmea árípehreräre. Eropirã Jesucristore umupeoräre bũrigã mahi umupeoro gahmea yujugũ porã iro dopa.

*Pablo ìgu weretura*



<sup>11</sup> Īata. Ƴu basi mʉare gojagu pagari deyori mera gojagu iiaa. <sup>12</sup> Eropigu ōpa werea mʉare. Erā mʉare gasiro merogā wiri aīdorerāpu ōpa gahmema. Erā dorerire mua iicū ĩha gajirā judio masa erā mera ōaro árĭbocoma. Eropirā erāre ñero taricū iĭbiribocoma daja erā Jesucristo yare umupeoquerecū. <sup>13</sup> Erā basi gasiro merogā wiri aīquererā Moise dorerire gajire iibeama. Erā eropa iĭbiriquererā, mʉapure erā dorerire iidorerā mua gasiro merogā wiri aīcū gahmema erā. Eropa gahmema gajirā judio masare ōpa erā arĭboro dopa mucubiriri mera. “Gua dorero mera Galacia majarā judio masa árĭbirā mari árĭricurire iama,” erā arĭboro dopa mʉare erā dorerire iicū gahmema. <sup>14</sup> Ƴu tamera erā eropa mucubiridiaro dopa ta ne mucubirissime. Mari Opu Jesucristo iira mera dihta mucubiria. Īgu mari ñero iira dipuwajare wajayebasadigu árĭmi crusague sĭrigu. Iri dihtare mucubiria. Jesucristo eropa iira mera yuhu ĩgu taudigu árĭgu masa erā ʉaribejarire guñabeaa pare. I umu maja masa erā ʉaribejari sã doremasibeaa yure. <sup>15</sup> Eropiro gasiro merogā wiri aīcū, wiri aĭbircū sãre Goãmũ ĩabeami. Masa Jesucristo mera ōari mera gohrotorā árĭcū ĩhami. <sup>16</sup> Erā eropa gohrotonirā árĭpehrerā iri buherire Jesucristo yare yuhrirāre “Erā ōaro árĭporo,” arĭ serēa Goãmure. “Erāre mu ya curu majarā gohra árĭrāre mojomoro ĩaque,” arĭ serēbasaa yuhu Goãmure.

<sup>17</sup> Ƴuhu Jesucristo dorediro dopa ta iigu ĩgu yare buhera dipuwaja gajirā yure ñero taricū iima. Erā eropa iira cami mura āhraa yure yu dʉpure. Eropigu ōpa gahmea: Iripēta yure bujawerecū iiporo Jesucristo yarāre goroweorā.

<sup>18</sup> Mʉare árĭpehrerāre ōaro árĭcū gahmea. Mari Opu Jesucristo mʉare árĭpehrerāre ōaro iiporo. Eropa ta iiporo. Iripēta āhraa.

## Efesios

### *Efeso majarãre gojabeoñumi Pablo*

<sup>1</sup> Yuhu Pablo Goãmũ ĩgu gamero dopa ta Jesucristo yare ĩgu yare buhedore apidigu aħraa. Eropigu mũare Efeso majarãre gojabeoa. Mũare Jesucristore õaro umupeorãre gojabeoa yuhu. <sup>2</sup> Goãmũ mari Pagu mera Jesucristo mari Opu mera mũare õadoreã. ĩgu mũare itamuri mera õaro arĩque mua.

*Cristo yarã mari arĩcũ ĩagu Goãmũ õaro iimi marire, arĩ gojañumi Pablo*

<sup>3</sup> Goãmũ mari Opu Jesucristo Pagu marire õaro iiniguicãmi. Arĩpehreri ĩgu ya õari mera ĩgu mari pepirire õarire ohomi mari ĩgu pohro arĩro dopa. Marire sĩporã turacũ iimi. Cristo yarã mari arĩcũ ĩagu eropa marire õaro iimi. Gua ĩgu eropĩcũ ĩha õaro umupeoa. ĩgure õaro wereniguia. <sup>4</sup> Őpa iipũ ĩgu marire ĩgu yarãre: I yeba arĩboro coregue ĩgu yarã arĩmorãre beyemuħtapu ĩgu marire. Eropa beyegu ĩgu marire ĩgu ĩarore ñeri iiro marirã mari arĩmorãre iipũ. Eropigu ĩgu marire “Ñerã aħrima, arĩsome. <sup>5</sup> Marire mahigu mojomoro ĩagu iribojegue õpa arĩmuħtapu ĩgu marire: “Yu magu Cristo ĩgu itamuro mera erã yu porã õaro arĩrãcoma,” arĩ apipu marire iribojegue ta. ĩgu gamediro dopa ta eropa iipũ ĩgu marire. <sup>6</sup> Marire ĩgu eropa õaro iicũ ĩarã umupeoa. ĩgure õaro wereniguia. ĩgu magu ĩgu mahigu Jesucristo yarã mari arĩcũ ĩagu, õaro iimi ĩgu marire. <sup>7-8</sup> Eropigu ĩgu magu Jesucristo ĩgu di cõagu sĩrigu mari ñeri iira dipuwajare wajayebasadi arĩmi. ĩgu eropa wajayebasacũ mari ñeri iirare cãdijidi arĩmi Goãmũ. Eropigu marire turaro mahigu, marire mojomoro ĩagu eropa iipũ Goãmũ. Eropigu marire peamegue wabonirãre taudi arĩmi. ĩgu õaro masipehori mera eropĩpu ĩgu. Eropirã ĩgure õaro wereniguia. <sup>9-10</sup> Eropigu ĩgu marire ĩgu iiborore marire masicũ iimi. Iribojegue majarãre irire masicũ iibirimurĩpu ĩgu. Őpa aħraa marire ĩgu iiboro. ĩgu gamediro dopa ta ĩgu pepidiro dopa ta arĩpehrerãre Cristo dorero doca arĩcũ iigucumi. Eropigu arĩpehrerire ĩgu ya arĩcũ iigucumi. ĩgu queorasubu arĩcũ umaro majarãre, i yeba majarã sãre ĩgu dorero doca arĩcũ iigucumi ĩgu. Eropigu umaro maja sãre i yeba maja arĩcũ sãre ĩgu ya dihta arĩcũ iigucumi. Eropigu Jesucristopu arĩpehrerã weca opu arĩgucumi. Eropiro arĩpehreri ĩgu ya dihta arĩroca. Eropa arĩbure arĩdorepu Goãmũ ĩgure.

<sup>11</sup> Eropi Cristo yarã mari arĩborore masiyugu Goãmũ marire beyetuhapu ĩgu yarã arĩmorãre. I arĩpehrerire apipu ĩgu, ĩgu pepidiro dopa ta ĩgu gamediro dopa ta iibu. <sup>12</sup> ĩgu eropĩpu ĩgu yare gua iiborore. ĩgu yare gua õaro iicũ ĩarã gajirã sã ĩgure umupeorã “Turagu aħrimi,” arĩrãcoma. Guapu judio masa Cristore gamenuganirã arĩrã ĩgure umupeomuħtanirã arĩbu. <sup>13</sup> Mua sã diaye wereniguirire, õari buherire peeabu. Iri buheri mera ta Goãmũ pohrogue warãca mua. Irire peerã ĩgure umupeoa. Eropirã ĩgu yarã

wahabu m̄ua. Ōpa ar̄ip̄u Cristo: “Ȳure umupeor̄are Esp̄iritu Santore obeoḡura,” ar̄i werepip̄u. Eropiḡu ĩḡure m̄ua ũa iiborore. ĩḡu yare ḡua ōaro iic̄ũ ĩar̄ã gajir̄ã s̄ã ũmupeoc̄ũ ĩaḡu ĩḡu Esp̄iritu Santore odiḡu ar̄imi m̄uare. Eropiḡu ĩḡure m̄ua opac̄ũ, “Jesucristo yar̄ã āhraa,” ar̄i masic̄ũ iimi ĩḡu m̄uare. <sup>14</sup> Goām̄u marire taric̄ũ iiami. Eropiḡu p̄uhr̄ũ ĩḡu pohrogue aĭaḡucumi marire ĩḡu oburire marire obu. Marire aĭaboro core Esp̄iritu Santop̄u mari mera āhrimi. ĩḡu mari mera ar̄ic̄ũ Goām̄u mera mari ar̄iborore ōaro masia. Goām̄u marire ĩḡu eropiic̄ũ ĩar̄ã ĩḡure umupeori mera, “Ōaḡu āhrimi,” ar̄ãa mari.

*Pablo Goām̄ure serēbasañumi Jesu yar̄are*

<sup>15-16</sup> Eropiḡu Jesucristore umupeor̄ã m̄ua ar̄ic̄ũ peebeo, ar̄ipehrer̄ã ĩḡu yar̄are m̄ua umupeo mahirire peebeoḡu Goām̄ure “Ōhaa,” ar̄ãa. Eropiḡu ũm̄uri n̄ucu serēbasaa m̄uare Goām̄ure. <sup>17</sup> Mari Paḡu ũmaro majaḡu ĩḡu yare m̄uare ōaro masic̄ũ iidoreḡu serēbasaa. Eropiḡu ĩḡure m̄ua ōaro masinemoboro dopa serēbasaa. ĩḡu Goām̄u Jesucristo mari Op̄u Paḡu āhrimi. <sup>18</sup> Eropiḡu m̄ua ōaro masiboro dopa m̄uare serēbasaa Goām̄ure. ĩḡu m̄uare tauḡu, ĩḡu yar̄ã ar̄imor̄are iimi ĩḡu m̄uare. Eropiḡu m̄uare ĩḡu yar̄are ĩḡu pohro ōaro wac̄ũ iiḡucumi. Irire m̄ua ōaro masiboro dopa serēbasaa ȳuh̄u Goām̄ure. Eropiḡu ĩḡu marire oburi s̄ãre “Ōataria āhraa,” iri m̄ua ar̄i m̄ua masiboro dopa serēbasaa. Ōpa m̄ua masiboro dopa serēbasaa m̄uare Goām̄ure. <sup>19</sup> Mari Jesucristore umupeor̄are ĩḡu itamuḡu, ĩḡu turari mera ĩḡu iimi. ĩḡu gajir̄ã tauro turaḡu āhrimi. M̄uare iri s̄ãre ōaro masiboro dopa serēbasaa mari Paḡu Goām̄ure. <sup>20</sup> ĩḡu turari mera Cristo s̄iridiḡure masudiḡu ar̄imi. Eropiḡu ĩḡu turari mera ũmarogue ĩḡu diayep̄u Cristo ĩḡu doac̄ũ iidi ar̄imi Goām̄u ar̄ipehrer̄are ĩḡu doreboru dopa. <sup>21</sup> Ero doaḡu ar̄ipehrer̄ã ũmaro majar̄ã opar̄ã weca, ar̄ipehrer̄ã dorer̄ã weca āhrimi Cristo. Eropiḡu i ũm̄u majar̄ã weca op̄u, gajip̄u majar̄ã s̄ã weca op̄u, ar̄ipehrer̄ã dohpague majar̄ã, gajisub̄u majar̄ã s̄ã, p̄uhr̄ugue majar̄ã s̄ã er̄ã weca op̄u ar̄ibu ta āhrimi ĩḡu. <sup>22</sup> Eropiḡu ar̄ipehrer̄ã weca, ar̄ipehreri weca apip̄u Goām̄u Cristore. Eropiḡu ar̄ipehrerire op̄uc̄uc̄ũ iip̄u ĩḡure. Eropiro Cristo yar̄ã yuju curu ar̄ir̄ã er̄ã op̄u ar̄ibure acup̄u ĩḡure. Er̄ã dipuru iro dopa ar̄iḡu āhrimi ĩḡu. <sup>23</sup> Cristo yar̄ã yuju curu ar̄ir̄ã ĩḡu dap̄u iro dopa ar̄ir̄ã āhraa mari. Cristo ar̄ipehrerogue ar̄iniguimi. Eropiḡu mari ĩḡu yar̄ã mera ar̄iniguigu marire itamuniguic̄ãmi.

## 2

*Goām̄u marire mahiḡu, mojomoro ĩaḡu taup̄u marire, ar̄i gojañumi Pablo*

<sup>1</sup> ũeri dipuwajac̄ubonir̄ã peamegue dederebonir̄ã ar̄iquerec̄ũ ta Goām̄u m̄uare taumi. <sup>2</sup> Iribojegure i yeba majar̄ã Goām̄u tarinuḡar̄ã iro dopa iim̄ur̄inir̄ã ar̄ir̄ib̄u m̄ua. Eropir̄ã wat̄i ĩḡu gamero dopa ta iim̄ur̄inir̄ã ar̄ir̄ib̄u m̄ua. ĩḡu wat̄i i yeba doreḡu Goām̄ure tarinuḡar̄ã op̄u āhrimi. <sup>3</sup> Iribojegue ar̄ipehrer̄ã mari ōpa dihta iinir̄ã ar̄ir̄ib̄u. Mari ũeri dihtare ũaribejar̄ib̄u. Mari ejatuharo mari pepiro dopa iim̄ur̄ir̄ib̄u. Erop̄a ar̄ir̄ã gajir̄ã ar̄ipehrer̄ã iro dopa ta mari s̄ã ũer̄ã ar̄im̄ur̄ir̄ib̄u. Mari ar̄ipehrer̄ã masa mera eropa ar̄ir̄ã ar̄ic̄ũ ĩaḡu

Goãmũ mari mera guagu dipuwaja moadiaripu. <sup>4</sup> Eropa iidiaqueregu ta marire turaro mahigu mojomoro ïapu. <sup>5</sup> Eropa mahitarigu mari ñeri iira waja peamegue dederebonirã mari árïquerecũ ta marire ïgu mera árïniguimorã árïcũ iimi. Jesucristo ïgu sïribasara mera mari ïgu yarã árïcũ marire iimi. Marire mojomoro ïagu taumi ïgu marire. <sup>6</sup> Goãmũ Jesucristo sïridire masugu ïgu pohro apidigu árïmi árïpehrerãre dorebu. Eropigu ïgu mari sãre ïgu yarãre Cristo dorerire opacũ iimi. Eropirã ïgu pohro ïgu mera árïrãca mari. <sup>7</sup> Eropiimi ïgu pũhrugue majarã marire ïgu mojomoro ïarare erã masiboro dopa. Jesucristo marire ïgu ðaro itamura mera ïgu masare turaro ïgu mahirire ïhmumi. <sup>8</sup> Cristore mari umupeocũ Goãmũpu marire taricũ iimi. Marire mahigu ïgu pohro ejaçũ iigucumi. Mari gamero ðaro iiricuri mera Goãmũ pohro ejadiarã ejamasisome. Mari iibiriquerecũ apimi mari ïgu pohro ejaburire. Eropiro waja mariro umuri nucũ ïgu mera mari árïburire ohomi marire. <sup>9</sup> Mari basi tarimasibirica. Mari iiri mera mari gamero mera tarirã mari “Gua basi taria,” arïboca. Goãmũpu marire taumi ïgu pohro mari wamorãre. <sup>10</sup> Jesucristo yarã árïcũ iimi marire Goãmũpu. Eropigu Jesucristo yarã mari árïcũ ïagu ðarire iirã dihta wacũ iimi marire. Iribojegue ïañumi marire ðarire iimorãre.

*Cristore oparã ðaro añraa, arï gojañumi Pablo*

<sup>11</sup> Eropirã mua ero coregue árïricurare dohpague sãre guñaque. Mũare judio masa árïbirãre gua judio masapu ïhaturimuribu. Gua circuncisión iinirã gasiro merogã wiri añirãpu mũare gasiro merogã wiri aïbirãre “Goãmũ yarã árïbeaa mũapu,” arïmuribu mũare. <sup>12</sup> Irisubure mua Cristo yarã árïbirã boje majarã árïmuribu. Goãmũ beyenirã judio masa iro dopa árïbirimuribu mũapu. Mua eropa árïnirã ïgu beyenirã mera pepuri majarã ïhaturirã árïmuribu. Goãmũ mũare “Masare ðaro iigura,” ïgu arï apinirã árïbirinirã árïribũ mua. Mua ñeri dipuwaja peamegue wabonirã árïrã árïribũ mua. Goãmũ moorã árïnirã peamegue dederebonirã árïnirã árïribũ. <sup>13</sup> Dohpaguepũre Jesucristo yarã añraa pare mua. Iribojegue boje majarã árïnirã árïquererã, dohpaguere ïgu yarã añraa pare mua. Cristo mua ñeri dipuwaja crusague ïgu di cóara pũhrũ Goãmũ yarã árïcũ iimi mũare. <sup>14</sup> Eropigu judio masare mua ïhaturirã árïcũ Cristo marire bosadigu árïmi. Masare bosagu añrimi ïgu. Judio masa, judio masa árïbirã mera pe curu mari árïcũ ïagu ïgu marire yuju curu ta árïcũ iidi árïmi. Mari ïhaturiri duhucũ ðaro mera árïcũ iimi ïgu marire. <sup>15-16</sup> Õpa iimi ïgu marire. Mari ñeri dipuwaja crusague sïrigũ, marire peamegue wabonirãre taugu iimi. Eropa taugu ïgu yarã ïgu iimi marire. Eropigu mari ïgu yarã wacũ pe curu mari árïquerecũ ta yuju curu ta mama curu iimi marire. Eropigu iribojegue mari game ïhaturinirã árïquerecũ ta marire crusague sïribasagu bosadigu árïmi. Eropigu judio masa doreri pehrecũ iimi ïgu. Erã doreri marire duca wayoro pe curu majarã wacũ. Eropigu yuju curu ta árïcũ iimi pare. Eropigu Cristo Goãmũ yarã árïcũ iimi marire.

<sup>17</sup> Eropigu marire bosagu arigu ðari buherire Goãmũ mera ðaro árïburire weregũ aridi árïmi. Mua judio masa árïbirã Goãmũre opabirã boje majarã árïnirã árïribũ. Mua eropa árïcũ ïagu mũare ðari buherire weregũ aridi árïmi. Gua judio masa sãre Goãmũ yare oparã

sāre weregū aridi árīmi. Eropigu árīpehrerāre marire bosagū aridi árīmi ĩgū. <sup>18</sup> Dohpaguere árīpehrerā gūa judio masa árībirā sā mari Pagū mera ōaro árīmasia mari. Espírītu Santo ĩgū itamuri mera Cristopū marire eropa árīcū iimi. <sup>19</sup> Eropirā dohpaguere mūa boje majarā árībeaa. ĩgū ya curu majarā ta āhraa. Goāmū yarāre ĩhaturirā árībeaa. Goāmū yarā mera majarā āhraa pare. <sup>20</sup> Goāmū yare weremuhtanirā iribojegue majarā ĩgū ya wereniguirire goja, masare weremuriñuma. Gūa sā ĩgū yare buhedore apinirā Jesucristo ya ōari buherire werea masare. Gūa árīpehrerā eropa werēcū peerā Cristore umupeonugabū mūa. Cristopū āhrimi mari árīpehrerāre ĩgū yarā árīcū iigū. ĩgū eropa iibiricū mari ĩgū yarā árīmasibiriboya. <sup>21</sup> Eropigu ĩgū turari mera marire ĩgū yarāre yuju curu ta árīcū iimi ĩgū marire. Eropirā ĩgū turari mera ōarā wahaa mari. Mari eropa árīcū ĩagū ĩgū mari Opū ta mari mera āhrimi. <sup>22</sup> Eropirā Cristo yarā árīrā árīpehrerā gajirā mera ĩgū yarā mera yuju curu wahabū mūa sā. Mūa eropa wacū Goāmū ĩgū Espírītu Santo mūa mera āhrimi.

### 3

#### *Judio masa árībirāre ōari buherire wereñumi Pablo*

<sup>1</sup> Mūa judio masa árībirā eropa ĩgū ya curu majarā árīburire yū werera dipuwaja peresugue āhraa yūhū. <sup>2</sup> Mūare judio masa árībirāre Jesucristo yare buhebure Goāmū yūre apimi. Yūre mojomoro ĩagū, yūre mahigū ōari buherire yūre weredoregū, yūre apimi. Irire peetuhabū mūa. <sup>3</sup> Iribojegue masa erā masibirirare Goāmū dohpaguere yūre masicū iimi. Ire merogā were mūare gojabeotuhabū. <sup>4</sup> Yū eropa gojabeorare buherā Cristo ĩgū yare yū masirare masirāca mūa sā. <sup>5</sup> Iri ĩgū wererare iribojegue majarāre ĩgū erā masipehocū iibiripū. Dohpaguepūre gūare Jesu ĩgū apinirāre Goāmū yare weremuhtarā sāre irire masipehocū iimi Goāmū. ĩgū Espírītu Santopū gūare masicū iibasami. <sup>6</sup> Ōpa āhraa ĩgū werera gajirā masibirira: Judio masa dihtare Goāmū itamubeami. Judio masa árībirā sāre ĩgū itamumi. Ōari buherire erā ōaro peecū itamugūcumi ĩgū erāre. Eropirā gūa judio masa, mūa judio masa árībirā mera yuju dūpū iro dopa yuju curu ta āhraa mari. Eropirā mari árīpehrerā Jesucristo yarā árīrā yujuro mera Goāmū ĩgū masare “Ōaro iigūra,” ĩgū arī werepirare oparāca mari.

<sup>7</sup> Goāmū mojomoro ĩagū yūre mahigū ire ōari buherire werebure yūre apimi. ĩgū masiri mera apimi ĩgū yūre. <sup>8</sup> Árīpehrerā gajirā Jesucristo yarā erā doca árīrā erā docague majagū gohra āhraa yūhū. Yū eropa árīquerēcū ta judio masa árībirāre ōari buherire werebure apimi Goāmū yūre. Iri buheri Cristo ōatariagū ĩgū árīrīre, ōatariari ĩgū oparire, ōaro ĩgū oburire werebure apimi yūre. <sup>9</sup> Yūre eropa apigū Goāmū “Ōpa masare taugūca,” arīgū, árīpehrerā masare dohpā ĩgū itamuborore ōaro werepehobure apimi yūre ĩgū. Goāmū árīpehrerire ĩhacūnugudigū āhrimi. Iribojegue majarāre irire masare ĩgū tauborore masare werepehobirinipū Goāmū. Dohpaguere yūre iri ōari buherire weredoregū apimi masare ĩgū ōaro tauborore masicū iibu. <sup>10</sup> Eropirā iri buheri mera masa ĩgū yarā wahama. Erā eropa wacū ĩha ūmaro majarā oparā anyua Goāmū masipehogū ĩgū

árīricūre masima. Erā eropa masicū gamepū Goāmū. <sup>11</sup> Eropigu i yeba árīboro coregue ta “Masare peamegue wabonirāre taugura,” arītuhaḡū Goāmū. Eropa arīdigū árīgū dohpague mari Opū Jesucristo īgū síriro mera īgū arīdiro dopa ta marire taudi árīmi. <sup>12</sup> Īgū eropa taucū dohpaguere Cristore umupeorā īgū yarā wahaa mari. Īgū yarā árīrā güiro mariro Goāmū mera wereniguimasia mari. Eropirā güibiricāque mūa. <sup>13</sup> Eropirā ōari buherire yū wereri waja dohpaguere peresugue árīgū yū ñero taricū ĩarā bujawerenijarā Goāmū yare duhubiricāque. Ōari buherire yū werecū peerā Goāmū yarā wahabū mūa. Yūhū eropiira dipuwaja peresugue āhraa. Eropa árīgū mūa īgū yarā árīburire ñero tarigū iiaa. Eropigu turaro mucubiridorea mūare.

*Cristo masare turaro mahimi, arī gojañumi Pablo*

<sup>14</sup> Eropigu i árīpehrerire mari Opū Jesucristo Pagū Īgū iirare guñagu mereja ĩgure serēbasaa mūare. <sup>15</sup> Árīpehrerā Īgū yarā Pagū āhrimi. Īgū árīpehreri cururi majarā Īgū yarā Īgū pohrogue árīrā i yeba árīrā sā erā Pagū āhrimi. <sup>16</sup> Īgū masipehogū āhrimi. Turatarigū āhrimi. Eropigu ĩgure ōpa serēbasaa mūare. Mūare síporā Īgū masiri mera ōaro turacū iiboro dopa serēbasaa mūare. Eropigu Espiritu Santo Īgū itamuri mera eropa iigūcumī. <sup>17</sup> Eropigu Cristore “Diaye iigū āhrimi,” mūa arī umupeonemoboro dopa ĩgū mūa mera ōaro árīboro dopa serēbasaa mūare. Eropigu gajirāre ōaro mahirā mūa árīboro dopa, Cristo ĩgū turaro mahirire mūa masiboro dopa serēbasaa mūare. <sup>18-19</sup> Mūa árīpehrerā gajirā Goāmū yarā mera “Cristo ĩgū marire turaro mahimi,” mūa arīmasiborore serēbasaa mūare. Īgū mari masare turaro mahigū āhrimi. Īgū mahiri eropa ōatariari árīcū mūa ōaro masiboro dopa serēbasaa mūare. Eropigu ĩgū mahirire mūa masicū gahmea Goāmū mūa mera ĩgū ōaro árīboro dopa. Eropigu iirere serēbasaa mūare Goāmūre.

<sup>20</sup> Eropirā Goāmūre wūaro umupeori mera “Īgū turagu āhrimi,” arīrāca. Īgū turari mera ōaripure gohrotomasimi ĩgū marire. Marire ōarā árīcū iimasimi. Mari serēra tauro iimasimi ĩgū. Mari gamerire, mari pepira tauro iimasimi ĩgū. <sup>21</sup> Jesucristo yarā mari árīcū ĩha Cristo ĩgū árīricūri sāre ĩha árīpehrerinre. Eropigu ĩgū mahirire mūa masicū gahmea Goāmū mūa mera ĩgū ōaro árīboro dopa. Eropigu iirere serēbasaa mūarūri árīpehrerā Goāmūre umupeoporo. Eropa ta iiporo.

## 4

*Cristo yarā árīrā yuju curu ta āhraa mari, arī gojañumi Pablo*

<sup>1</sup> Mari Opūre yū itamuri waja peresugue árīgū mūare turaro werea yūhū. Goāmū ĩgū yarā árīmorāre mūare beyepū. Eropirā ĩgū beyenirā árīrā ĩgū árīdoreldiro dopa ta ōarā árīque mūa. Iirere mūare werea yūhū. <sup>2</sup> Ōpa iirā ōarā árīque mūa: “Gajirāre masitarinūgaa yūhū,” arī pepibiricāque. Gajirāre ōaro mera iique. Eropirā guabiricāque. Mūa mera majarā mūare gariboquerecū ta erāre umupeori mera yuju diaye ĩacāque. <sup>3</sup> Eropirā Espiritu Santo ĩgū itamuri mera ōaro mera yujuro mera árīniguique mūa. Eropirā gamequeāro mariro árīcāque

m̄aa. <sup>4</sup> Yuju d̄up̄u iro dopa yuju curu ta āhraa mari. Eropigu Espiritu Santo yujuḡu ta āhrimi marire. Eropigu Goām̄u ĩgu yarā árĩmorāre marire beyem̄urip̄u marire itamubu. Eropirā ĩgu itamuborore masia mari. Iri mari masirañe yujuñe ta āhraa. <sup>5</sup> Mari Op̄u Cristo mari umupeoḡu yujuḡu ta āhrimi. ĩgu buheri sã yujuñe ta āhraa. ĩgu yarāre waĩyeriñe sã yujuñe ta āhraa. <sup>6</sup> Eropigu Goām̄u yujuḡu ta āhrimi. ĩgu árĩpehrerā Paḡu āhrimi. Eropigu árĩpehrerā weca mari Op̄u āhrimi. Eropigu árĩpehrerāre marire itamumi ĩgu. Árĩpehrerā mari mera āhrimi ĩgu. Eropigu árĩpehreroḡue āhrimi ĩgu.

<sup>7</sup> Yuju curu mari árĩquerecũ ta árĩpehrerā marire yujurāyerire mari mohmemasiburire apidi árĩmi marire Cristo. ĩgu eropa apidiro dopa ta mohmemasia mari. ĩgu marire eropa apigu gajĩnore ĩgu eropa ocābodirop̄u dopa ta apidi árĩmi ĩgu marire. <sup>8</sup> Eropa ta āhraa Goām̄u yare erā gojarapũgue sã:

Goām̄ure ihaturirāre ĩgu tarinũgara p̄uhr̄u ĩgu dipaturi m̄aria waḡucumi. Eropigu masare baja eropa ocāḡucumi, arĩ gojañuma irilbojegue Jesucristo ĩgu eraboro coreguere.

<sup>9</sup> Erā eropa arĩ gojarā òpa werediarā iiriñuma: Jesucristo um̄usiḡue m̄aria wadigu árĩgu ĩgu ero coreguere dijarim̄uhtadigu árĩmi. I yebaguere dijaridigu árĩmi. <sup>10</sup> Eropigu ĩgu dijaridi m̄aria wadi ta árĩmi Goām̄u pohroḡue. Árĩpehrero weca m̄aria wadi árĩmi ĩgu árĩpehreroḡue árĩbu. <sup>11</sup> Eropigu ĩgu yarāre baja eropa ocāḡu erā Goām̄u ya árĩburire mohmemasiburire apidigu árĩmi. Erā mohmema-siburire òpa apidigu árĩmi ĩgu yarāre. Yujurāyerire Cristo ĩgu buherare buhemorāre apidi árĩmi. Gajirāre Goām̄u yare weretaumorāre apidigu árĩmi. Ōari buherire buhe curimorāre gajirāre apidi árĩmi. Cristo yarā gamenererā oparā árĩmorāre erāre òaro buhemorāre apidi árĩmi gajirāre. <sup>12</sup> Eropa dihta apidigu árĩmi marire gajirā ĩgu yarāre mari game itamuboro dopa. Eropa apidigu árĩmi marire ĩgu yarāre, ĩḡure mari umupeonemoboro dopa, s̄iporā turarā mari waboro dopa. <sup>13</sup> Eropirā mari árĩpehrerā òaro mera, yujuro mera árĩrāca. Eropa ta árĩro gahmea marire Cristore umupeorā árĩrāre. Eropirā mari árĩpehrerā Goām̄u maḡure Jesucristore òaro masirāca. Eropirā Cristo turaḡu, pee masigu ĩgu árĩro dopa ta, mari sã pee masia warāca. <sup>14</sup> Mari eropa warā majirāgã iro dopa árĩsome mari. Majirāgã iro dopa ta árĩrã òaro pee masinibeama dohpa. Eropirā gajirā ḡuyarā erāre buherā eracũ “I diaye āhraa,” erā arĩcũ erā peema. P̄uhr̄u gajirā gajiropa árĩri buherire buherā eracũ erā sãre peema. Erā iro dopa árĩsome mari. <sup>15</sup> Eropa árĩbirā mari mera majarā mera game mahirā diaye ta wererire game wererāca mari. Eropirā majirāgã erā buga erā pee masirā erā waro dopa ta mari sã Goām̄u yare pee s̄iporā turarā Goām̄u yare òaro masirā warāca. Cristo ĩgu árĩro dopa ta warāca. ĩgu āhrimi mari dipuru. <sup>16</sup> ĩgu yarā árĩrã ĩgu d̄up̄u iro dopa yuju curu ta āhraa mari. Mari bajarā árĩquererā ta yujuro mera òaro árĩrã iiaa. Mari eropa árĩborore Cristo itamumi. Eropirā mari yuju d̄up̄u iro dopa òaro gamesurirā mari òaro itamua gajirāre Cristo yarāre. Eropirā mari mera majarāre Cristo yarāre òaro mahirā, erāre òaro itamurā, turarā, Cristore umupeonemorā árĩrāca mari.

*Cristo yarã warã mari ñerire duhu, ðaripure gohrotoa mari, arĩ gojañumi Pablo*

<sup>17</sup> Eropi mari Opu Cristo ñgu dorero mera ðpa werea muare. Goãmure gamebirã gohra iiro dopa iibiricãque mua. Erã, erã pepiripu ñeri dihta ãhraa. Eropiro erã pepiri duhpiburi árìbeaa. <sup>18</sup> Eropigu watipu Goãmu yare erãre peebiricã iimi. Eropirã Goãmu yapure peebirigohracãma. Peediabeama erã. Eropirã Goãmu ñgu ðaro árìdoreldiro dopa ta árìbeama erã. <sup>19</sup> Eropirã erã ñerire iirã ne guhyasiribirigohracãma. Eropirã ne bujawerebeama. Ñerire erã uaribejari dihtare iiniguicãma. Árìpehreri ñerire erã iirire ne duhudiabirã iinemoniguicãma. <sup>20-21</sup> Muapu diaye ta ñgu yare peerã mua árìcã, Jesucristo yare ðaro masirã mua árìcã muapure erã ñero iiro dopa iidorebeami Goãmu. <sup>22</sup> Iribojegue ñerire iiniguicãrã mua árìcã iri ñeripu muare goroweoro iidiro árìbu. Iri ñeri iiri mera mucubiridiaquererã ta ne mucubirimasibirimuribu mua. Eropirã “Iribojegue mua árìrare duhucãque,” yu muare arĩ buhecã peebu mua. <sup>23</sup> Eropirã mua pepiripure ðaripure gohrotooro gahmea muare. <sup>24</sup> Ero core mua ñero iirare duhucãque. Eropirã ðaripure gohrotonirã árìque mua. Goãmu ñgu ðagu árìldiro dopa muare ðarã árìcã iimi. ñgu eropa iinirã árìrã ðarire iiniguicãrãca. Eropirã ñerire gamebirãca.

<sup>25</sup> Mari yuju dupu iro dopa yuju curu majarã ta árìrã iiaa. Eropirã mua basi guyabita. Mua mera majarãre diaye wereque guyarero mariro.

<sup>26</sup> Gajirã mera guarã, erãre ñero iibiricãque. Mata irinu ta amucãque gua wajoro mariro. <sup>27</sup> Yoari boje guarã watì ñgu gamero dopa iirã iiaa. Eropa iibiricãque.

<sup>28</sup> Gajirã mua mera majarã Jesu yarã erã árìboro core yajari masa árìldirã árìñorã. Dipaturi yajabiricãporo. Eropirã dohpaguere ðaro mohmeporo. Mojomorocurãre oburire mohmeporo.

<sup>29</sup> Ne ñero wereniguibiricãque. ðarire wereniguirã gajirãre itamua mua. Erã bujowererã erã árìcã ñarã eropa ta mucubiricã iicãque erãre. Eropirã ðari dihtare wereniguique. <sup>30</sup> Ñerire iirã Espiritu Santore bujawerecã iirã iiaa mua. Eropa iibiricãque. Dohpaguere ne i umu pehrerinu core, Cristo marire ñgu aigãboro core, Espiritu Santo marire ñhadibumi. Ñerire mari iibiriboro dopa ñhadibumi. Eropigu Cristo yarã mari árìldire masicã iimi ñgu marire. Eropirã ñgure bujawerecã iibiricãque mua.

<sup>31</sup> Eropirã ne papuriniguibiricãque. Guanemobiricãque. Game duyasonemobiricãque. Erãre ñero arĩ gaguiniguibiricãque. Gajirãre quere moanemobiricãque. Gajirãre ñhaturinemobiricãque. <sup>32</sup> Eropi mua mera majarãre ðaro mera ðaro iique. Cristo yarã mua árìcã ñagu mua ñerare cãldijicãmi Goãmu. Eropa ta mua sã gajirã muare erã ñero iicã ñarã erã ñerire cãldijicãque.

## 5

*Goãmu porãre ðpa árìro gahmea, arĩ wereñumi Pablo*

<sup>1</sup> Eropirã Goãmu porã ñgu mahirã árìrã ñgure ñhacũque mua. <sup>2</sup> Eropirã gajirãre mahi umupeoniguicãque. Cristo marire mahigu, mari ñeri iira waja siripu. Eropa sirigu Goãmure mucubiricã ipu ñgu. Eropirã marire ñgu mahidiro dopa ta mua sã gajirãre game mahique.



<sup>3</sup> Eropirã Goãmũ yarã árĩrã ne nome mera ñero iibiricãque. Nome sã uma mera ñero iibiricãque. Gaji ñerire eropa árĩrĩre ne iibiricãque. Gajinore gametaribiricãque. Ne eropa iibiricãro gahmea Goãmũ yarã árĩrãre. <sup>4</sup> Eropirã guhyasiuro wereniguibiricãro gahmea muare. Pee masibirã iro dopa wereniguibiricãro gahmea muare. Eropirã ñero arĩ wereyabiricãro gahmea. Ipure iiro gahmea muare: Goãmure serẽro gahmea muare. Eropa serẽrã ãgure, “Ôaro iibũ mũhũ guare,” arĩro gahmea. <sup>5</sup> Gajinore gametarirã goãmarã wéanirãre erã umupeoro dopa iirã iiaa mari irire. Eropirã nome mera ñero iirã, ñeri dihtare pepirã, gajinore gametarinugarã Goãmũ Cristo mera ãgu opu árĩroguere ne wasome erã. Irire ôaro masia mari. <sup>6</sup> Ôpa iirãre erã iira dipuwaja, turaro dipuwaja moagucumi ãgure tarinuganirãre. Eropirã gajirã muare gajiropa arĩmaacãcũ erã guyarire peebiricãque. <sup>7</sup> Eropirã eropa ñerire iiniguicãrãre wapicubiricãque.

<sup>8</sup> Cristo yarã mua árĩboro core mua sã eropa ta iinirã árĩribũ. Dohpaguepure ãgu yarã árĩrã, Goãmure ôaro masia mua. Goãmũ yarã ôarire iima. Eropirã eropa ta iiro gahmea muare. <sup>9</sup> Eropirã Cristo yarã árĩrã ôarire, Goãmũ gamerire, diaye maja árĩrĩre iirãca mua. <sup>10</sup> Ôarire mari iicũ ãgu mari Opu Cristo mucubirimi. Eropa ôarire iiburire ôaro masique mua. Eropa masirã irire iique. <sup>11</sup> Cristore gamebirã ñeri erã iimaacãri ñeri gohra áhrraa. Eropa erã iiro dopa ta mũarũ iibiricãque. Ôari buherire Cristo yare wereque erãre. Eropirã erã ñeri iirare erãre masicũ iique. <sup>12</sup> Masa erã ãbĩro erã ñero iicorema. Erã eropa iirare mari wereniguirã guhyasĩriboca. Eropirã ñetariaro iirã iima erã. <sup>13</sup> Eropirã erãre ôari buherire mari wererã, ñetariarã erã árĩricurire erãre masicũ iirã iiaa mari. Erã ñeri iirire erãre masicũ mari iicũ erã ñeri iirire bujawerebocoma. Eropirã ôaripure gohrotobocoma. <sup>14</sup> Iri diaye ta áhrraa. Eropirã ôpa wereñorã Goãmũ yare wererã:

Ne, yure peediabirã, yure peeque. Mua ñero iirare bujawereque. Irire ñero iirire duhuque. Eropigu Cristo mua ñeri iirire masicũ iigu, muare ôarire masicũ iigucumi, arĩñorã.

<sup>15</sup> Eropirã mũari mũcu ôaro iique mua. Pee masibirã iro dopa árĩbiricãque. Pee masirã árĩque. <sup>16</sup> Dohpague majarã masa ñetariaro iiniguima. Eropirã mũarũ ôarire, Cristo yare mua iiniguirã mata erã Cristo yarã árĩcũ itamuque. <sup>17</sup> Eropirã pee masibirã árĩbiricãque. Goãmũ ãgu gamerore ôaro masique. Eropirã irire iique. <sup>18</sup> Eropirã ne merebiricãque. Mererã erã basi ñero goroweoma. Eropirã merediabirã, Espĩritu Santopure burigã gameque. ãgure ôaro yãhrirã árĩque. <sup>19</sup> Eropirã mua basi Goãmure umupeori bayarire game bayaque. Eropirã Salmo gojaripure, Goãmũ yare bayarire, gaji ãgure umupeori bayari sãre ãgure bayapeoque. Ôaro guña umupeori mera bayapeoque. Eropirã mari Opure “Ôagu áhrimi,” arĩ ôaro umupeoque. <sup>20</sup> Goãmũ mari Pagu árĩpehrerire muare ãgu ôaro iirire guñaniguicãque mucubiriri mera. Mari Opu Jesu yarã árĩrã ãgure “Ôhaa,” arĩniguicãque mua.

*Mua yuju wihi majarã Jesu yarã árĩrã, ôpa iique, arĩ wereñumi Pablo*

<sup>21</sup> Mua mera majarãre game umupeo yãhrĩque. Mua eropa game umupeo yãhrirã Cristo sãre umupeo yãhrirãca.

<sup>22</sup> Mña marasã nomere weregura dohpaguere. Mari Opure Cristore mari yuhriro dopa ta mña marapu sumarãre ðaro yuhrique. <sup>23</sup> Jesucristo marire taudigu árîmi ïgu ya curu majarã mari árîboro dopa. Eropirã mari ïgu ya curu majarã árîcũ mari Opu ïgu árîro dopa ta mña marapu sumarã mña marasã nomere weca oparã àhrama. <sup>24</sup> Eropirã Cristo yarã árîrã ïgure yuhria. Eropirã mari Cristore yuhriro dopa ta mña marapucurã nome mña marapu sumarãre ðaro yuhriã nome árîque.

<sup>25</sup> Mña marapu sumarã sãre weregura dohpaguere. Cristo marire ïgu yarãre mahigu mari ya árîburire sîridigu árîmi. Eropirã marire ïgu mahidiro dopa mña sã mña marasã nomere eropa mahiniguicãque. <sup>26</sup> Cristo marire ïgu yarã árîcũ iibu sîripu mari ñeri marirã árîcũ iibu. Eropigu mari ñerire coweadi árîmi ïgu wereniguiri mera deco mera ïgu waïyeri mera. <sup>27</sup> Eropa coweadi árîmi ïgu marire ïgu yarã ðarã árîmorãre iigu. ïgu eropiicũ ñeri dipuwaja marirã árîrãca ïgu ïacũ. Ne merogã eropa árîri ñeri árîsome marire. Eropirã ðarã Cristo iro dopa árîrãca. <sup>28</sup> Eropirã mña marasã nomere mahi umupeorã, mñu basi mñu dũpũre mñu umupeoro dopa ta mña mñu marapore umupeoqe. ïgu marapore umupeogu ïgu basi umupeogu iimi. <sup>29-30</sup> Ne mari dũpũre ñero wacũ gamebeaa mari. Mari basi mari ya dũpũre ïhadibua. Cristo yarã árîrã ïgu dũpũ iro dopa àhraa. Eropigu marire ïgu ðaro ïhadibumi. Eropirã Cristo marire ïgu ðaro iidiro dopa ta mari sã mari dũpũre ðaro iiaa. Mari marasã nome sãre eropa ta ðaro iiro gahmea marire. <sup>31</sup> Eropa ta àhraa Goãmu yare erã gojarapũgue: Õpa gojara àhraa: “Eropi umu ïgu pagu sumarãre wirigu, ïgu marapo mera árîcãgucumi. Eropirã erã perã árîquererã ta yuju dũpũ iro dopa árîrãcoma,” arï gojañumi iribojegue. <sup>32</sup> I gojarare ðaro peebirinirã árîma. Eropigu irire ðaro weregura mñare. Õpa werero iica: Cristo ïgu yarã mera yuju dũpũ iro dopa ta yuju curu ta àhrama. <sup>33</sup> Eropigu mñare õpa arï werenemogura daja: Mñu basi mñu mahiro dopa ta mñu marapo sãre mahi umupeoqe. Eropirã nomepu mña marapu sumarãre ðaro gũhyadiaro mera umupeoqe mña.

## 6

<sup>1</sup> Dohpaguere majirãre weregura: Mari Opu Cristo yarã árîrã mña pagu sumarãre ðaro yuhriãrã árîque. Mña eropiirã ðaro iirã iiaa. <sup>2-3</sup> Õpa arïñumi Goãmu doregu: “Mña pagu sumarãre ðaro umupeoqe,” arï doreñumi ïgu. I doreriñe mera Goãmu werenemoñumi. Õpa arïñumi: “Mña pagu sumarãre umupeorã i yebaguere yoari boje mucubiriri mera árîrãca mña,” arï wereñumi. Eropa arïgu iñe doreriñe mera, “Mña eropa iirã ðaro árîrãca,” arï weremũhtañumi Goãmu. Eropirã ïgu arïdiro dopa mña pagu sumarãre umupeoqe mña.

<sup>4</sup> Dohpaguere erã pagu sumarãre weregura. Mña porãre eropa turiniguibiricãque guacũ iiri arîrã. Mari Opu Cristo ïgu mahiri mera ïgu itamuri mera erãre ðaro mera masuque. Eropirã erãre masurã ðaro wereque.

<sup>5</sup> Dohpaguere pohro majarãre weregura. Gũhyadiaro mera umupeori mera i yeba majarãre mña oparãre ðaro yuhriãrã árîque. Gũyaro mariro ðaro yuhriãrã árîque. Cristore mña yuhribodiro dopa ta

yuhrique eräre mua. <sup>6</sup> Erã ihuro dihtare yuhriřã árĩbircãque yure ihasuaporo arĩřã. Erã ihurore mua yuhriro dopa ta erã iabiro sãre ôaro iirã árĩque. Cristo iġu pohro majarã mua árĩbodiropo dopa ta mua oparã sãre eropa yuhriņiġicãque. Eropirã Goãmu iġu gamero dopa ta ôaro mucubiriri mera mua oparãre ôaro yuhriřã árĩque. <sup>7</sup> Eropirã “Cristopure yuhriřã iiaa,” arĩ pepirã mucubiriri mera yuhrique mua oparãre. <sup>8</sup> Eropirã ire guñaque: Árĩpehrerã mari árĩpehreri ôarire mari iicũ iagũ Goãmu ôaro iigucumi marire. Pohro majarãre, pohro majarã árĩbirã sãre ôaro iigucumi iġu.

<sup>9</sup> Eropiġu oparã sãre wereġura: Mua pohro majarãre ôaro iique. Erãre ôaro yu iidorediro dopa ta iique erãre ôaro. Ôpa masique. Umusi majagu Goãmu diaye ta erã opu aħrimi. Mua yagu opu aħrimi iġu. Eropirã mua árĩpehrerã iġu pohro majarã dihta aħraa. Eropiġu iġu yujuropa iħami mũare árĩpehrerãre. Eropirã turibircãque mua pohro majarãre.

*Cristo yarã watĩre erã cãhmotarire wereñumi Pablo*

<sup>10</sup> Ôpa weretugura mũare. Ôaro guñaturarã árĩque mua. Mari Opu Cristo mua mera aħrimi. Eropirã iġu ya turari mera guñaturarã árĩque. <sup>11</sup> Watĩ marire iġu pepiri mera guyaga ñero iidoremi marire. Mari Jesucristore umupearire goroweodiami. Goãmuru marire cãhmotami ñerire mari iibiriboro dopa. Marire iġu cãhmotaro surara iġu cãhmotari suhriro come suhriro iro dopa aħraa. Eropirã iri suhri mera erã cãhmotaro dopa ta Goãmu iġu yare iirã cãhmotaque watĩ iġu ñero iidorerire. <sup>12</sup> Jesu yarã mari árĩcũ marire goroweodiarã masa gohra árĩbeama. Erã bajarã umaro majarã, ñerã, turarã, oparã erãpu aħrima. Watĩ iġu mera majarã mera i mũmu majarãre Jesucristo yarã árĩbirãre dorema erã. Eropirã erã mari Jesucristo yarã árĩcũ marire goroweodiana. <sup>13</sup> Eropirã erã marire goroweobircũ dohpaguere Goãmu yare opapehoque mua cãhmotaborore. Eropirã watĩ mũare ñero goroweodiacũ, mũare iġu ñero iidorecũ iġure cãhmotarãca. Eropirã tarinugarãca. Eropã iġure tarinugarã, turarã dujarãca mua. <sup>14-17</sup> Eropirã turarã árĩque Goãmu ya mera. Surara gamewejërã warã erã come suhri sañarã erã dupure ôaro cãhmotama. Erã coretiħbi cãhmotama erã come suhriro sañarã. Come zapatu sañama. Erã diapore cãhmotama comese mera. Come sãpea peyama. Noserimijire opama erã cãhmotaboro dopa. Erã surara cãhmotaro dopa ta mua watĩre ôaro cãhmotapehoborore ôpa Goãmu yare iique. Diaye majare Goãmu yare ôaro peeque. Eropirã Goãmu gamero dopa ôarire iinigiucãque mua watĩre cãhmotamorã. Jesucristo ya ôari buherire peerã ôaro aħraa. Eropirã iri ôari buherire ôaro wererã waque gajirãre. Watĩ mũare ñero iidorediarimi. Eropirã iġure cãhmotamorã Jesucristore “Diaye iġu aħrimi,” arĩ umupeonigiucãque. Cristopu marire peamegue wabonirãre taumi. Mua iġu taunirã arĩřã watĩ ñero iidorerire yuhribircãque. Eropirã watĩre tarinugamorã Goãmu yare ôaro masique mua Espĩritu Santo iġu itamuri mera. <sup>18</sup> Eropirã mua watĩre cãhmotarã Goãmure eropa mũmuri nucu serēnigiucãque. Espĩritu Santo iġu itamuri mera serēnigiucãque. Eropirã ôaro guña masique. Eropã serērã gariborebircãque. Árĩpehrerã Goãmu yarãre eropa serēbasanigiucãque. <sup>19</sup> Eropirã yu sãre serēbasaque Goãmure.

Õpa arĩ serēbasaque: Õari buherire iribojegue masa erã ðaro masibirirare ðaro erãre masicã yu iiborore serēbasaque. Eropirã güiro mariro yu wereboro dopa serēbasaque yare. <sup>20</sup> Cristo ïgu yare weredoregu yare obeomi. Yu eropa werera waja peresugue ãhraa dohpaguere. Yuhu ohõ árĩqueregu ta güiro mariro ïgu yare yu wereboro dopa serēbasaque yare. ïgu yare werebu árĩgu tiiaa.

*Pablo ðadoretuñumi*

<sup>21</sup> Tíquico yu mera majagu mua pohrogue ejagu yu árĩricurire muare werepohogucumi. ïgu mari acaweregu mari mahigu ãhrimi. Eropigu mari Opu yare ðaro itamugu eropa árĩniguicãmi. <sup>22</sup> Gna árĩricurire muare weredoregu ïgure obeogu iiaa mua pohrogue mua ðaro mucubiriboro dopa.

<sup>23</sup> Goãmu mari Pagu mari Opu Jesucristo mera muare árĩpehrerãre gna acawererãre ðadorea. Cristore mua ðaro umupeori mera mua game mahiboro dopa Goãmure serēbasaa muare. <sup>24</sup> Árĩpehrerã mari Opu Jesucristore eropa mahiniguicãrãre Goãmu mera ðadorea. Eropa ta árĩniguicãporo. Iripëta ãhraa.

## Filipenses

### *Peresugue árġgu ipūre gojabeopu Pablo*

<sup>1</sup> Għa Pablo Timoteo mera Jesucristo pohro majarā āhraa. Eropirā árġpehrerāre mware oarāre Jesucristo yarāre Filipino majarāre gojabeoa għa. Mwa oparā sāre mware itamurā sāre gojaa. <sup>2</sup> Eropirā Goāmū mari Pagū mari Opū Jesucristo mera mware oadorea. Īgu itamuri mera oaro árġque mwa.

### *Pablo Jesu yarāre Goāmūre serēbasapu*

<sup>3-6</sup> Goāmū mware oaripure gohrotocū iigu iimi. Eropigu mware ĩgu iinugadiro dopa ta ii ojogorocugcumī. Eropirā Jesucristo i yebaguere ĩgu eracūguere űeri marirā árġrāca mwa. Negohraguere Jesu yarā mwa wara pūhrū, dohpague sāre itamua mwa yure oari buherire yū buhecū. Mwa eropa iirā árġcū Goāmūre “Ōhaa,” arāa yūhu. Mware guñagu opra dihta arāa yūhu. Mware Goāmūre serēbasagu mucubiriri mera serēbasaa. <sup>7</sup> Eropigu mware yū oaro mera eropa pepicū oapūrica. Ōari buherire “Diaye ta āhraa,” oparāre yū arġtarinugacū mwa yure itamubū. Iri buherire diaye ta iri árġriri masare yū werecū itamubū mwa. Peresu yū árġcū sāre itamubū. Eropa mwa itamucū mari yujuro mera Goāmū itamurire opaa. Eropigu yū sġporā mera turaro mahia yūhu mware. <sup>8</sup> Jesucristo ĩgu mahiri mera burigā mware guñaa yūhu. Yū eropa guñacū Goāmū irire masimi. <sup>9</sup> Mware opra arġ serēbasaa yūhu Goāmūre. Goāmū yare oaro masiri mera oaro pee masipehori mera Goāmūre masa sāre mwa mahinemoburire serēbasaa yūhu Goāmūre. <sup>10</sup> Ōarire mwa masiburi sāre serēbasaa mware. Mwa eropa masirā Cristo i yebague ĩgu dujaricū oarire iinirā árġrā, dipuwaja marirāca mwa. <sup>11</sup> Eropa oarire iirā Goāmū gamerire iirāca mwa. Eropa iimorā wacū iigucumi Jesucristopū mware. “Goāmū oagu, turagu āhrimi,” árġpehrerā ĩgure erā arġ umupeoburire ĩgu gamerire mwa iicū iigucumi mware.

### *Pablo Jesucristo yagu ĩgu warare werepu*

<sup>12</sup> Yū acawererā, ire mwa masicū gahmea. Yū dohpaguere peresu yū árġquerecū ta oari buheripū eropa muhtaniguicāa. <sup>13</sup> Eropigu Cristo yagu yū árġri waja peresu yū warare masipehrema opū ya wihi majarā surara. Árġpehrerā gajirā sā oire irire masima. <sup>14</sup> Eropirā peresu yū árġcū ĩarā, bajarā mari acawererā Jesu yarā mari Opure Jesure umupeonemoma. Eropa umupeorā güiro mariro oari buherire gajirāre buhema erā.

<sup>15</sup> Yujurāyeri Cristo yare buhebonirā árġquererā yure ĩhaturima. Cristo yare buherā erāpūre masa ĩhasuacū gahmema. Gajirāpū oaro mera Cristo yare buhema. <sup>16-17</sup> Ōari buherire yū werenigui turaburire Goāmū yure ĩgu apirare oaro masima. Oāpū eropa masirā yure umupeorā Cristo yare buhema. Gajirāpū yure ĩhaturirā masare erāpūre ĩhasuacū gamerā Cristo yare buheama. Eropirā yū peresu árġcū erā yure bujawerecū iidiana. <sup>18</sup> Ōaroca. Cristo yare ta buherā

iima. Erā yūre umupeobiriquererā Cristo yare buhema. Gajirāpū ōari mera buhema. Árīpehrerā erā ĩḡu yare buhecā mucubiria.

<sup>19</sup> Eropigū mucubiriniguicāḡuca yūhū. Goāmure mūa yūre serēbasara mera, Jesucristo ĩḡu Espiritu Santo itamuri mera Goāmū yūre ōaro taricū itamugūcumi. Irire masia. <sup>20</sup> Ōpa ta būrigā iidiaa yūhū dohpa. Ne yū iirare űero pepidiabeaa. űero pepibigū árĳḡu doyaro mariro árĳḡupū masare Cristore ōaro umupeocū būrigā iidiaa. Ŭmuri nūcū yū iidiro dopa ta dohpague sāre erā Cristore “Ōaḡū, turagū āhrimi,” erāre arĳ umupeocū iidiaa. Ojocarigū gohra eropa ta iidiaa. Erā yūre wejēdiaquerecū ta eropa ta iidiaa. <sup>21</sup> Ojocariniguigu gohra Cristo yare iiniguica dohpa. Sĳrigugue tamera ojocarirā tauro ōaro dujagūca yūhū. <sup>22</sup> Ojocariniguigu Cristo yare yū iinemoboro dopa ojocariniguicādiaca. Eropa iidiaquereḡu ta sĳriri sāre gahmea. ¿Dipure yū gamebocuri? Masibirica yūhū. <sup>23</sup> Yū ōpa arĳ wereniguicū masisūya mara yūre. Cristo mera būrigā árĳdiaa. Eropigū dohpaguere ĩḡu pohroḡue wadiaca. Ojocariri tauro sĳriripū ōatarinugacāroca. <sup>24</sup> Eropa árĳquerecū ta mūare yū itamuboro dopa ojocarinemoro gahmea yūre. <sup>25</sup> Irire masigū ohō mūa mera yū árĳborore masia yūhū. Eropa árĳniguicāḡuca yūhū mūa Cristore umupeonemoboro dopa, iri umupeoturari mera mūa mucubiriborore. <sup>26</sup> I yebague árĳnigū mūa pohroḡue dipaturi yū wacū mūa mucubirirāca. Eropa yūhū mūa pohro ejacū Cristo Jesu yūre ĩḡu itamurire masirā, “Turagū āhrimi ĩḡu,” arĳ umupeorāca mūa ĩḡure.

<sup>27</sup> Dohpaguere i dihtare iique. Cristo ya buheri iri arĳro dopa ta árĳricūque mūa. Guñaturarā árĳque. Eropirā game dūca wariro mariro ōari buherire yujuro mera būrigā buheque. Eropa ta yū mūa pohro wabiricū sāre yū wacū sāre mūa eropa iicū gahmea. Eropa mūa yujuro mera árĳrā árĳcū peebeodiaa yūhū. <sup>28</sup> Mūare ĩhaturirāre gūibiricāque. Mūa eropa gūibiricū ĩarā Goāmū yarā mūa árĳcū masirācoma erā. Eropa masirā erā peamegue waboro sāre masirācoma. Eropirā Goāmū ĩḡu tauboro sāre masirācoma. Ōpa ta masicū iimi Goāmū masare. <sup>29</sup> Cristore mūa umupeobure Goāmū apidi árĳmi. I sāre apidi árĳmi. “Cristo yare mūa werera waja űero tarirāca,” arĳ apidi árĳmi Goāmū mūare. <sup>30</sup> Eropirā Cristo yarā mūa árĳri waja gajirā mūare űero iima. Mūare erā iidiro dopa ta yū sāre űero iima erā. Mūa mera yū árĳcū yūre erā eropiicū ĩabu. Dohpague sāre erā yūre eropiicū pee waĳcūa mūa. Eropirā mari yujuropa ta űero taria.

## 2

*Cristo bu árĳḡu iro dopa eradigū árĳpehrerā weca opū árĳbu wapū, arĳ gojañumi Pablo*

<sup>1-2</sup> Cristo mūare ōaro sĳporācūcū iinirā, Cristo ĩḡu mahiri mera mūa mucubirirā, yūpūre ōaro mucubiricū iique. Eropirā Espiritu Santo árĳpehrerā mūa mera ĩḡu árĳcū gajirāre mahirā, mojomoro ĩarā árĳrā, yūre ōaro mucubiricū iique mūa. Ire mūa iicū mucubirigūca. Yujuropa ta ōaro sĳporācūque mūa. Eropirā mūa basi game mahique. Ōari mera árĳricūque. Eropirā árĳpehrerā yuju diaye ōaro árĳque. <sup>3</sup> Gajirāre tarinugadiarā árĳbiricāque. Eropirā eropa ta pepi árĳcāque.

Eropirā gajirāre ōaro umupeo ōpa arī pepique: “Erāpū yū tauro ōarā āhriima,” arī pepique. <sup>4</sup> Gajigū gajirāre itamudiabiribocumi. Īgū iro dopa iibiricāque. Gajirā sāre itamuque.

<sup>5</sup> Jesucristo ĩgū eropa pepicādiro dopa ta mūa sā eropa ta pepicāque. <sup>6</sup> Īgūpū Goāmū gohra árīqueregū ta “Goāmū yū árīrire ne duhosome yūhū,” arībiripū ĩgū. <sup>7</sup> Eropigū ĩgū Goāmū ĩgū árīrare duhu, masū ta masa dehyoadigū pohro majagū iro dopa árīnūgapū i yebagure. <sup>8</sup> Eropigū ĩgū masū dāpūcūgū bu árīgū gohra árīnūgapū. Eropa árīnūgagū “Crusague wejēque ĩgure,” erā arīcū ĩgū Goāmūre yūhriḡu tarinūgabiripū. Crusague ta gūhyasīuro mera sīribu árīqueregū ta ĩgū tarinūgabiripū ĩgū Pagure. <sup>9</sup> Eropigū ĩgū eropiicū ĩha mari Pagū árīpehrerā masa erā umupeobure apipū Jesure. Eropigū árīpehrerā gajirā weca opū acupū Goāmū ĩgure. <sup>10</sup> Eropirā árīpehrerā ūmaro majarā, i yeba majarā, sīrinirā mūra sā Jesu waīre peerā erā mereja muju ĩgure umupeorācoma pare. <sup>11</sup> Eropa ĩgure opū acugūcumī mari Pagū árīpehrerā Jesucristore “Mari Opū āhrimi,” erā arībure. Eropa arīrā mari Pagū Goāmūre umupeorācoma.

*Cristo yarā ōarire wererā masare masicū iima*

<sup>12</sup> Eropirā, yū mahirā, mūa mera yū arīcū mūa yūhridiro dopa ta, dohpaguere yū yoarogue arīcū sāre ōaro yūhriḡe yūre. Eropirā peameḡue wabonirā mūa Goāmū taunirā arīrā Cristo ĩgū itamuro mera ĩgū gamero dopa ii purumujuque. Eropirā umupeori mera biraro mariro Goāmū yare iique. <sup>13</sup> Goāmū ōaripūre mūare gamecū iigū iimi. Īgū eropa gamero dopa ta mūa iiborore iimi. Eropigū irire mūa ĩgū yare ōaro iiborore itamuniguicāmi Goāmū. Īgū eropa iicū irire yū arīdiro dopa ta iique mūa.

<sup>14</sup> Árīpehrerire iirā turiro mariro, mūa basi gajinore werericūro mariro iique. <sup>15</sup> Eropiique mūa űeri dipuwaja marirā, űerire iibirā Goāmū porā ōaro mūa árīmorā. Eropiique mūa masa gūyarā, űerā watopere goroweoro mariro mūa árīmorā. Erā űerā watope mūa árīrā ōari buherire buherā masicū iiaa mūa i yeba majarāre. <sup>16</sup> Iri buherire mūa peeñanirā Goāmū mera eropa árīniguimorā wabū mūa. Iri buherire i yeba majarāpūre mūa eropa buhecū ĩagū mūa mera mucubirigūca yūhū. Eropigū yū mūare buherare guñagū, “Bu gohra ta mūare buhebiriya yūhū,” arīgūca yūhū. Eropigū Cristo ĩgū i yeba ĩgū dujaricū mūa mera mucubirigūca yūhū. Eropigū gūhyasīuro tarisome yūhū. <sup>17</sup> Cristore mūa umupeoturacū Goāmū mūare ĩhasuagūcumī. Īgū eropa ĩhasuacū ĩagū mūare Cristo yare yū buheri waja yūre erā wejēdiaquerecū ta mucubirigūca. Eropirā mari árīpehrerā yujuropa ta mucubirirāca. <sup>18</sup> Eropa ta mūa sāre yū mera mucubiriro gahmea pūhru yū sīricū ĩarā.

*Timoteore, Epafrodito sāre werepū Pablo*

<sup>19</sup> Mari Opū Jesu ĩgū gamecū yojaro mera Timoteore mūa pohrogue obeodiaa yūhū mūa árīricūrire masību. Eropa masigūḡue ta mucubirigūca. <sup>20</sup> Īgū Timoteo mūa ōaro árīborore diaye ta burigā guñami mūare. Gajigū ĩgū iro dopa ta árīgū marimi yūre. <sup>21</sup> Gajirāpū árīpehrerā erā gameri dihtare iidia, Jesucristo ĩgū gameripūre iidiabeama. <sup>22</sup> Timoteopū ĩgū ōaro iirire masia mūa. Yū magū iro

dopa ta árĩgu ĩgu yu mera ðari buherire weremurimi. Eropirã guu yujuropa ta Cristo yare buhemurabu. <sup>23</sup> Eropigu ð majarã oparã yure erã duhpiburire masira puhru, Timoteore mua pohrogue obeodiaraa. <sup>24</sup> Eropigu mari Opu Jesu ĩgu itamuri mera yojaro mera yu sã mua pohrogue waguca.

<sup>25-26</sup> Yure itamudorerã mua Epafroditore obeoabu yu pohrogue. ĩgu yu acaweregu, yu mera mohmegu, yu wapi, Goãmu yare buheturagu ahrimi. ĩgu muare turaro guñabeomi. Eropigu ĩgu dorecurare mua peecũ masigu ĩgurpu “Erã yure guña bujawerecoma,” arĩ guñaricumi. Eropa ĩgu wuaro guñaricucũ ĩagu ĩgure mua pohrogue omedujuro gahmea yure, arĩ pepia yuhu dohpaguere. <sup>27</sup> Árĩro ta ĩgu turaro dorecuami. Mero sĩribocuri tariami ĩgu. ĩgu eropa dorecuquerecũ ta, Goãmu ĩgure mojomoro ĩagu taricũ iiami. ĩgu sĩricũ yurpu burigã bujawereboaya. Eropigu yu sãre Goãmu mojomoro ĩami ĩgure taricũ iigu. <sup>28</sup> Eropigu dohpague tamerare yojaro mera ĩgure mua pohrogue obeodiaa dipaturi mua ĩgure ĩha sñajaboro dopa. Mua eropa mucubiricũ peegu yu sã mucubirigara. <sup>29</sup> Eropirã ĩgure Epafroditore mari Opu yagure ðaro mucubiriri mera bocatĩrique. Eropirã gajirãre ĩgu iro dopa árĩrãre umupeoque. <sup>30</sup> ĩgu Cristo yare itamudiagu sĩrirami. Murpu yare itamumasibiricũ ĩgurpu yare itamubasamurami. Eropigu dorecu sĩrirami ĩgu.

### 3

#### *Òaro árĩri gohrare wereñumi Pablo*

<sup>1</sup> Dohpague tamerare ire weregura. Mari Opu mera mucubirique. I buherire ero coregue yu wererare dipaturi ðpa arĩ gojabeogu mucubiria yuhu. Eropigu ire werenemogu itamugu iiaa muare. <sup>2</sup> Gorowerebirã ta árĩque mua. Ñerire iiniguicãrã, diaye iro dopa ta árĩrã, ñerã, gasiro merogã wiri aĩdorerã mua ya dupure wiridiama. Eropa iidorerã árĩcũ ĩha “Queoro buheri árĩbeaa,” arĩrã ðaro iique mua. <sup>3</sup> Erã circuncisiõn gasiro merogã aĩdoreciarã “Deyoro maja mera Goãmure umupecũ ðhaa,” arĩrima. Maripu eropa arĩbeaa. Espĩritu Santo ĩgu itamuri mera diaye ta Goãmure umupeoa mari. Mari deyoro maja iiri mera mucubiribea. Jesu yarã mari árĩri mera mucubiria mari. <sup>4</sup> Eropa mucubiriqueregu ta, yu iirare erã iro dopa arĩdiagu, erãre docapicãboya yu sã. Gajigu ðpa ta arĩ tarinugacãdiami. Yurpu ĩgu tauro eropa arĩboaya. <sup>5</sup> Òpa iigu arĩribu yuhu: Ocho nuri yu masa dehyoara puhru gasiro merogã wiri aĩnirã arĩma yure. Israe masu árĩgu Benjami ya curu majagu ahraa yuhu. Yu pagu sumarã hebreo masa erã árĩcũ diaye ta hebreo masu gohra ta masa dehyoabu. Moise dorerire diaye ta iipehodiagu fariseo curu mera ñajaribu yuhu. <sup>6</sup> “Goãmũ ya arĩsaca,” arĩgu ðaro iiribu yuhu. Eropigu Jesu yarãpũre ñero iimuricarabu yuhu. Diaye ta Moise dorerire iigu irire tarinugaro mariro ipehomuriribu yuhu. <sup>7</sup> Iribojeguere “Iri ðari arĩsaca,” arĩ pepimuriribu. “Iri yu eropa arĩ pepira iribojegue yu eropa arĩra duhpiburi arĩbirigohracãdiro arĩbu,” arĩ pepia dohpaguere. Òpa ta arĩ pepinugabu yuhu Cristore umupeonugagu. <sup>8</sup> Jesucristo yu Opure yu masicũ tamerare ðataria. Eropigu gaji doreripũre duhpiburi arĩbeaa, arĩ pepia yuhu. Iri arĩpehrerire coãcãbu Cristo yapure iibu. Eropigu



iribojegue yu iirare cóãgu “Ñeri gohra àhraya,” arĩ pepia. Cristo yare ðaro masibu ïgu mera majagu áribu eropa pepia. <sup>9</sup> Eropigu yu ejatuharo ðaro yu iira waja “Óagu àhrimi,” arĩ ïabeami Goãmũ. Eropiro Goãmũ dorerire Moiserẽ ïgu apirare yu iira waja sãre “Óagu àhrimi,” arĩ ïabirami. Cristore yu umupeora puhru “Óagu àhrimi,” arĩ ïami pare ïgu yure. Goãmũpũ marire dipuwaja marirã áricũ iimi ïgure mari umupeocũ. <sup>10</sup> Eropigu ero coregue yu árimũhtarare duhcãbũ Cristore ðaro masigu wabu. Goãmũ ïgu turari mera Cristo masa mũriapũ. Iri turari mera árdiaca yũhũ. Eropigu iri turari mera ðarire iidiaa. Cristo crusague sĩripũ mari ñeri iirare cóãbu. Eropigu ïgu yare iigu ïgu iidiro dopa ta ñero taridiaa yu sã. <sup>11</sup> Eropigu Cristo ïgu masa mũriadiro dopa ta, yu sã masa mũriadiaca.

<sup>12</sup> I áripehleri eropa arĩgu “Cristo iro dopa ñeri marigu árituhajaa,” arĩ pepibeaa. Yu eropa arĩ pepibiriquerecũ ta Cristo ïgu yagu áribure ðagu áribure iiami yure. Eropigu ïgu yare ïgu sãre ðaro masinemodiagu turaro mera ïgu yare iidiaa yũhũ. <sup>13</sup> Yu acawererã, yũhũ mũare eropa arĩgu, “Jesucristore ðaro masipehotuhajaa yũhũ,” arĩgu iibeaa. Eropa arĩbiriqueregu ta i tamerare iiaa. Yu iribojegue iirare cãdijigu dohpaguere “¿Goãmũ dohpa iicũ gahmeri yure?” arĩgu burigã irire iidiaa. <sup>14</sup> Omabiragu pohbegu ejamũhtadi ïgu wajatadiaro dopa ta burigã iiaa yũhũ yu wajataborore yu ñeaboro dopa ta. Cristo ïgu yagu yu áricũ ïagu yũhũ wajataborore obu umarogue sihubeomi yure.

<sup>15</sup> Ópa yu arĩro dopa ta pepique mua sã Cristore ðaro masirã árirã. Eropirã mũare yu wererare mua peediabiricũ gajiropa mua pepicũ Goãmũ mũare ðaro masicũ iigucumi. <sup>16</sup> Eropirã ïgu yare mari masirare ðaro ii ojogorocurã.

<sup>17</sup> Yu acawererã, mua áripehleri yure ïhacũque. Eropirã gajirã guu iiro dopa iirãre ïhanũũque mua erã sãre mua ïhacũboro dopa. <sup>18</sup> Bajasuburi gajirãre ñerãre wereabu yũhũ mũare. Dohpague sãre burigã bujaweregu erãre ta werea mũare daja. Erã ñero iiri mera “Cristo crusague ïgu sĩridi árimi,” arĩ buherire ïhaturirã àhrima. <sup>19</sup> Erã peamegue wamorã ta àhrima. Erã uaribejaripure burigã gahmema. Eropirã iri mũare guhyasĩrisãborare erãpũ “Mari iiri ðari àhraa,” arĩma erã. I mũmũ maja dihtare pepima erã. <sup>20</sup> Maripure mari ejaburi maca umarogue ta àhraa. Eropigu erogue ta marire taubu mari Opũ Jesucristo dujarigucumi. Eropirã ïgu dujariborore corerã iiaa mari. <sup>21</sup> ïgu dujarigu mari dupure bu árii dupure gajiropa árii dupure gohrotogucumi ïgu. Eropigu ïgu ya dupũ iro dopa ta ðari turari dupure gohrotogucumi marire ïgu turari mera. Áripehleri opũ ñajami ïgu iri turari mera. Eropigu áripehleri Opũ àhrimi ïgu iri turari mera.

## 4

*Ћтери нѣси Мари Опѣ мѣра мѣубирике, арĩ gojañumi Pablo*

<sup>1</sup> Eropirã yu acawererã, yu mahinirã, burigã yu guñarã, yure mucubiricũ iirã, mua guñaturadiro dopa ta mari Opũre burigã guñaturaniguique mua.

<sup>2</sup> Ire weregura mũare Evodiare, Síntique sãre: Jesu yarã nome ãhraa mũa. Eropirã mũa game dũyazorire duhu ðaro mera áríricũ áríque mũa basi. <sup>3</sup> Mũpũ diaye ta yũ wapi gohra ãhraa. Mũ sãre weregura: Erã nome yũ mera, Clemente mera, gajirã yũ wapicũrã mera mohmeama ðari buherire gũa buhecũ. Goãmũ erã waĩ sãre gojatutuhãnumi ãgũ yapũgue. Ʋmũri nũcũ ojocariburire ãgũ onirã waĩre ãgũ gojaturipũgue gojatutuhãnumi erã waĩ sãre. Eropigũ erã nomere bosaque mũhũ.

<sup>4</sup> Mũa árípehrerã Ʋmũri nũcũ mari Opũ mera mucubirique. Dipaturi ta weregura daja: Mucubirique. <sup>5</sup> Ʋaro iiniguicãque mũa ðaro iinirã árírare árípehrerã masa ãhamasiborore. Mari Opũ Cristo ãgũ ariboro merogã dũhyaa.

<sup>6</sup> Mũa áríricũre ne bũjawere guñaricũbiricãque. Mũa guñaricũ bũjawererire Goãmũre ðaro werepehocãque. Eropirã ãgũre ðaro serẽque. Eropirã mũa serẽrã ãgũre “Ōhaa,” arĩque ãgũre. <sup>7</sup> Mũa eropiicũ, ðaro áricũ guñaricũro mariro iigũcumi Goãmũ mũare. ãgũ eropa iiri ðataria. I mari ðaro áríri ðataria. Eropiro Jesucristo yarã mari áricũ marire ðaro áricũ iigũcumi Goãmũ. Marire ðaro sĩporãcũcũ iigũcumi. Eropigũ bũjawererire guñaniguicãcũ iisome ãgũ marire mari ãgũre serẽra pũhrũ.

*Ōarire pepique, arĩ gojañumi Pablo*

<sup>8</sup> Acawererã, ire weretubu iiaa mũare. Queoro árírire, masa erã umupeorire, ðaro iirire, ñero marirore, suarire, masa “Ōari ãhraa,” erã arĩrire pepique mũa. Ōatariari iri áricũ iripũre pepique. Masa ðarire ãrã erã mucubiririre mũa sã mucubiri pepique. Iri árípehrerire guñaque irire mũa iiboro dopa.

<sup>9</sup> Mũare yũ buhediro dopa ta eropa ta iiniguicãque mũa. Eropirã yũre ãhacũque mũa. Mũa eropa iicũ Goãmũ mũare ðaro áricũ iigu mũa mera árigũcumi.

*Filipo majarã Pablõre erã orare wereñumi ãgũ*

<sup>10</sup> Dohpague tamerare yoara pũhrũgue mũa dipaturi yũre guñarã mũa itamurare mucubiria. Eropa mucubirigũ mari Opũ Cristore “Ōhaa,” arãa. “Yũre cãdijia wabũ mũa,” arĩbeaa yũhũ. Iribojegũere yũre itamudiaquererã itamumasibirinirã áribũ mũa. <sup>11</sup> Yũre mũa itamurare weregũ “Yũre dũhyaa dohpa,” arĩ werebu iibea yũhũ. Mũare gajinore gamegũ eropa arĩgũ iibea. Yũ opari mera árímasia yũhũ. <sup>12</sup> Gajinore moogũ sã ðaro árímasia yũhũ. Eropigũ baja opagũ sã ðaro árímasia yũhũ. Ʋmũri nũcũ oaboagũ sã oare nũgapoa waca. Yapigũ arĩgũ sã ðaro árípoa waca. Dabero opagũ sã árípoa waca. Yũre gajino maricũ sãre ðaro árípoa waca. <sup>13</sup> Cristo yũre turacũ iigu mera árípehrerire yũ eropa warire ii bocatũmasia yũhũ. <sup>14</sup> Yũ eropa árípoadigũ arĩquerecũ ta yũ ñero taricũ mũa itamurã yũre ðaro iiabũ mũa.

<sup>15</sup> Ōari buherire yũ buhediacũ Macedonia yeba mũa ya yeba áridigũ yũ wacũ gajĩ maca majarã Jesu yarã yũre itamubirama. Mũa dihta yũre itamuabũ. Irire masia mũa. Mũare yũ buhecũ yũpũre mũa itamucũ mari yujuropa ta Cristo yare iirã iiabũ. <sup>16</sup> Eropirã Tesalõnicague yũ árínicũ ãrã yũre itamubeobũ. Yujuyerisuburi

yure dũhyacũ ĩha yũ gamerire obeoabũ mũa. <sup>17</sup> Gajinore serẽgũ eropa arĩgũ árĩbeaa. Gajirãre mũa itamucũ Goãmũ mũaare ðaro itamugũcumi. Ĩgũre mũa itamuri waja Goãmũ mũaare ĩgũ ðaro iicũ gahmea yũhũ. Mũa eropa itamurã guñaturarã wacũ sãre gahmea yũhũ. Eropigũ yure mũa itamurare guñacũ iiaa mũaare. <sup>18</sup> Dohpaguere yure ðaro opehoabũ mũa. Yũ gamera tauro ohabũ mũa yure. Yũre Erafrodito mera mũa obeora pũhrũ gajino ne dũhyabeaa yure. Mũa yure ora Goãmũre ora iro dopa ãhraa. Yũre mũa ora Goãmũre ðaro sũacũ iiaa. <sup>19</sup> Jesucristo marire ðaro iidi árĩmi. Eropigũ árĩpehrerire mũaare dũhyarare ogũcumi mari Pagũ mũaare. Ōatariari ĩgũ oparire ogũcumi. <sup>20</sup> Ũmũri nũcũ mari Pagũre Goãmũre umupearã. Eropa ta iiporo.

*Pablo ðadorepũ*

<sup>21</sup> Árĩpehrerã Goãmũ mera árĩrã Jesucristo yarã ðaporo. Mari acawererã Jesu yarã yũ mera majarã sã mũaare ðadorema. <sup>22</sup> Árĩpehrerã õ majarã ðarã Jesu yarã ðadorema. Roma majarã weca opũ ya wihi majarã tamera bũrigã ðadorema.

<sup>23</sup> Mari Opũ Jesucristo mera mũaare ðadorea. Eropa ta árĩniguicãporo. Iripẽta ãhraa.

## Colosenses

### *Colosa majaräre gojabeoñorã Pablo sã*

1-2 Yũhũ Pablo Jesu yagũ mari acaweregũ Timoteo mera mũare Colosa majaräre gojabeoa gũa. Jesucristo ïgũ yare buhedoregũ ïgũ apidigũ ta ãhraa yũhũ. Goãmũ ïgũ gamero dopa ta Jesucristo yure ïgũ yare buhebure apimi. Eropirã mũare gũa acawereräre Cristore umupeoräre gojabeoa. Eropirã mari Pagũ Goãmũ mera mũare òadorea. Eropirã ïgũ mera òaro árĩque mũa.

### *Jesu yaräre Pablo serēbasapũ Goãmũre*

3-8 Mũa ya árĩburire Goãmũre serērã mucubiriri mera eropa serēbasaniguicãa gũa. ïgũ mari Opũ Jesucristo Pagũ ãhrimi. Árĩpehrerinũri mũa ãmũsigue òaro árĩcũ iigucumi Cristopũ. ïgũ eropa iibu árĩcũ mũa mucubirimũhtarã waĩcũa. “Jesucristo diaye iigũ ãhrimi,” arĩ ïgũre umupeorã waĩcũa mũa. Eropirã ïgũ yaräre mahi waĩcũa mũa. Mũa eropa árĩrã árĩcũ Goãmũre “Õhaa,” arĩ mucubiriri mera serēbasaa gũa. Árĩpehrerogũere Jesu yarã diaye árĩri buherire òari buherire erã werecũ peerã masa òaripũre gohrotoma. Goãmũ yare masinemorã wahama. Õpa ta mũa sãre Epafra òari buherire weredi árĩmi. ïgũ gũa mera Cristore mohme coregũ ãhrimi. Iri mohmerire duhubeami ïgũ. Mũare ïgũ eropa werecũ peerã, mata Goãmũ yare òaro iiniguicãmũrayoro mũa. Eropirã Goãmũ mũare mahirire diaye ta masirã mata òaro iiaayoro mũa. Mũa eropa iirare ïagũ Epafra weremi gũare. Espĩritu Santo itamuri mera Jesu yaräre mũa mahirare weremi ïgũ gũare. ïgũ eropa arĩ werecũ peerã “Õhaa,” arãa gũa Goãmũre.

<sup>9</sup> Eropirã mũare guñarã eropa Goãmũre serēbasaniguicãa. Goãmũ ïgũ gamerire mũa masipehoboro dopa serēbasaa gũa. ïgũ yare òaro masirã mũa árĩboro sãre serēbasaa gũa. <sup>10</sup> Õpa ta serēbasaa gũa mari Opũ Cristo ïgũ gamero dopa ta òaro mũa iiburire. Mũa eropa iicũ ïagũ ïgũ mũare suagũcumĩ. Eropa ta mũa árĩpehrerire òarire mũa iiburire serēbasaa. Goãmũre mũa masinemoboro dopa serēbasaa. <sup>11</sup> I sãre serēbasaa gũa. Goãmũ ïgũ òaro turari mera mũa òaro sĩporã turarã árĩboro sãre serēa. Eropa ta serēa ñero tariquererã mũa Goãmũ mera yujuro bojeboro dopa. Ñero tariquererã mũa eropa pepicãburire mũa mucubiriri mera eropa árĩniguĩborõ sãre serēbasaa daja gũa. <sup>12</sup> Goãmũ ïgũ yarã árĩcũ marire iimi. Eropa iigũ ïgũ orire mari opamorã mari árĩcũ sãre iimi ïgũ. ïgũ árĩrogũe òarogũe mari árĩborore amutuhajami ïgũ. ïgũ eropa iicũ ïarã mucubiriri mera mari Pagũre “Õhaa,” mũa arĩborore serēbasaa gũa mũare. <sup>13</sup> ïgũ ta marire peamegue waboniräre taricũ iidi árĩmi. Iribojegue ñerire duhumasibiriribũ mari. Ñegũpũ marire doredi árĩnirimi. Eropigũ Goãmũpũ marire taudi árĩmi. ïgũ magũ ïgũ mahigũre opũ acugũ ïgũ dorero dopa marire árĩcũ iimi. <sup>14</sup> ïgũ magũ mera marire peamegue

wabonirāre taudi árīmi Goāmũ. Īgu magu Īgu sīrirañe mera mari ñeri iirare cādijidi árīmi Goāmũ.

*Masa Goāmure gamebircũ ĩha Cristo amupu, arĩ gojañumi Pablo*

<sup>15</sup> Goāmure mari Pagure ĩaya mara. Cristo Īgu magu Īgu Pagu Īgu árīricũire ĩhmudigu árīmi masare. Īgu ĩgu magu árīpehrerā core, árīpehreri core árītuhadigu árīmi. Eropigu tauro opu āhrimi Īgu. <sup>16</sup> Goāmũ Īgu dorecũ Īgupu Īgu Pagu mera árīpehrerire ĩhacũnuguñumi. Ũmũsigue árĩire i yebague árĩri sāre ĩhacũnuguñumi. Mari ĩarire mari ĩabiriri sāre ĩhacũnuguñumi. I yeba majarāre, ũmũsi majarā oparāre, árīpehrero dorerāre, mari ĩarāre, mari ĩabirā sāre, árīpehrerāre ĩhacũnuguñumi. Īgu árīpehrerire, árīpehrerāre ĩhacũnuguñumi. Eropirā árīpehrerā Īgu iinirā āhrima. Árīpehrerigue ta ĩgu iira āhraa. <sup>17</sup> Árīpehrerā core árīpehreri core Cristo árĩmũhtañumi. Eropiro Īgu turari mera árīpehrerā dohpaguere árĩrā iima. Árīpehreri sā árĩro iiaa. <sup>18</sup> Mari Īgu yarā árīpehrerā Īgu ya curu majarā árĩrā Īgu dũpu wacũa. Eropigu Īgupu mari dipuru āhrimi. Īgu sīrigu masa mũriamũhtadigu árīmi árīpehreri weca árīpehrerā weca árĩbu. <sup>19</sup> Cristo mari Pagu Goāmũ mera yuju dũpu ta árĩro dopa ta āhrimi. Īgu eropa árĩcũ ta gamepu mari Pagupu. <sup>20</sup> Árīpehrerā masa erā Īgure gamebirimũricũ ĩagu erā Īgu mera amubure Cristore obeopu. Īgure eropa obeogu Īgu Cristo crusague sīri Īgu di cóara mera amupu. Eropigu ũmũsi majarāre, i yeba majarā sāre Īgu mera ōaro árĩcũ iipu. Ũmũsi maja i yeba árĩri sā ōaro árĩcũ iipu. Eropigu ĩgu guñadiro dopa iipu.

<sup>21</sup> Mũa sāre eropa ta Īgu mera ōaro árĩcũ iidi árīmi. Mũa sā ñerire iiniguinirā Goāmure boje majarā árĩrā mũa pepiri mera ĩgure gamebirinirā árĩmũriribu. <sup>22</sup> Mũa eropa árĩnirāre Cristo sīriro mera Īgu Pagure mũa Īgu mera ōaro wacũ iipu ĩgu. Eropa iipu Īgu mũa Īgu yarā ōarā ñeri marirā, dipuwaja marirā mũa árĩboro dopa. Mũa eropa árĩcũ Īgu árĩroguere mũa árĩborore eropa iipu. <sup>23</sup> Eropa ta iigucumi Īgu mũa Īgure duhuro mariro umupeoturaniguicācũ. Mũa ōari buherire mũa Goāmũ mera árĩniguiborore mũa cādijibircũ, Īgu mera mũa árĩcũ iigucumi mũare. Iri mũa peera buherire ōari buherire árīpehrerā i yeba majarā peenirā árĩma. Eropigu yũhũ Pablo sā iri ōari buherire weregu ta āhraa.

*Jesu yarāre itamubure apipu Goāmũ Pablore*

<sup>24</sup> Cristo mari Īgu yarā árĩborore crusague sīrigu ñero taripu. Eropigu yũ sā mũa Īgu yarā árĩburire ñero tarigu mucubiria. Eropa ñero tarigu Cristo marire Īgu apirare ii ojogorocugu iiaa. Eropigu mucubiria. Cristo yare mari iira dipuwaja mari ñero tarinemoboro dũhyania dohpa. Eropigu ĩgure mũa guñaturaborore ñero tari mucubiria yũhũ. Īgu dũpu iro dopa árĩrā Īgu ya curu majarā āhraa mũa. <sup>25</sup> Jesu yarāre itamubure apimi Goāmũ yũre. Mũa ya árĩburire iibure yũre apimi Īgu. Īgu yare mũare werepehobure apimi Īgu yũre. <sup>26</sup> Iri ĩgu yare iribojeguere baja cururi majarāre erā masipehocũ iibirimũriñumi mari Pagu. Dohpaguere dohpague majarāre Īgu yarāre irire ōaro masipehocũ iimi pare. <sup>27</sup> Eropigu “Judio masa árĩbirā sāre yaha buheri ōataria,” arĩ ĩgu yarāre irire

weremi. Iribojegue erã masibirirare weremi Goãmũ. Ōpa ãhraa dohpaguere ĩgũ werera: Cristo ĩgũ yarã mera ãhrimi. Ĩgũ eropa árĩcũ ĩgũ yarã umũsiguere ðatariaroguere árĩrãcoma. Iri ãhraa iribojegue erã masibirira mari Pagũ ya.

<sup>28</sup> Cristore ta werea. Árĩpehrerãre gũisãgũ erãre werea yũhũ. Ōaro masiri mera buhea yũhũ ðaro Cristore masare masicũ iibu. Eropa buhea yũhũ erã ĩgũ yare ðaro iirã erã árĩcũ iibu. <sup>29</sup> Iri ta ãhraa yũ mohmeri. Jesucristo ĩgũ ya turari mera yũre ĩgũ ora turari mera turaro mohmea yũhũ ĩgũ yare buhegũ.

## 2

<sup>1</sup> Ire mũa masicũ gahmea. Mũa ya árĩburire, Laodicea majarã ya árĩburire, árĩpehrerã ya árĩburire turaro mohmea yũhũ. Árĩpehrerã masa yũre ĩabirã ya árĩburi sãre turaro mohmea yũhũ. <sup>2</sup> Ōpa ta mohmea yũhũ mũa árĩpehrerã ðaro sĩporãcũborore. Mũa mera majarãre mũa yujuro mera game umupeoburi sãre eropa mohmea yũhũ. Iribojegue majarãre Goãmũ werebirira Cristore masicũ iiri ãhraa. Ĩgũ yare masirã Cristore umupeoa mũa. Mũa ĩgũre ðaro masiborore mũa ĩgũ mera ðaro árĩborore burigã itamua yũhũ mũare. <sup>3</sup> Cristo dihta masipehocãmi gajirã masibirirare. Ĩgũ árĩpehrerire ðaro masigũ ãhrimi. Ĩgũ masiri ðatariaro ãhraa. <sup>4</sup> Irire werea mũare gajirã mũare peesuari werenigũiri mera gũyari arĩgũ. <sup>5</sup> Yũhũ mũa watope árĩbiriqueregũ yũ guũari mera mũa watope arĩgũ dopa ãhraa. Erogue árĩbiriqueregũ Cristore mũa ðaro umupeonigũirare mũa ðaro iirare peegũ mucubiria yũhũ.

<sup>6</sup> Eropirã mari Opũ Jesucristore opamorã ĩgũre mũa umupeonũgadiro dopa ta umupeonigũicãque. “Eropa ta yũre itamugũcumi,” arĩrã umũri nũcũ ĩgũ mera ðaro árĩnigũicãque. <sup>7</sup> ĩgũre ðaro masirã árĩque mũa. Eropirã umũri nũcũ ĩgũre masinemoque gajirã erã ero core mũare erã buhediro dopa ta. Eropirã Cristore mucubirirã “Ōhaa,” arĩnigũicãrã árĩque mũa.

*Cristo yarã árĩrã ðaripũre gohrotoa mari, arĩ gojañumi Pablo*

<sup>8-10</sup> Ōaro pee masique mũa. Masa erã gamero erã buherire erã gũyarire peebiricãque. Erã iribojegue majarã árĩricũrare buhema. Masa erã pepiro dopa pepirã árĩrã i doreri dihta buhema. Cristo yapũre buhebeama. Cristo mari Pagũ árĩro dopa ta arĩgũ Goãmũ gohra ta ãhrimi. Eropigũ Jesucristo Goãmũ arĩgũ i yebague masa dehyoadigũ Goãmũ ta árĩmi. Eropirã ĩgũ yarã árĩrã Goãmũ mera ðaro árĩnigũia mari. Ĩgũ ta árĩpehrerã deyobirã oparã tauro opũ arĩgũ ãhrimi. Umũsi majarãre i yeba majarãre árĩpehrero majarãre doremi. Eropirã gũyari buherãre peebiricãque. <sup>11</sup> Eropirã Cristo yarã árĩrã circuncisiõnre iinirã gasiro merogã wiri aĩnirã iro dopa árĩrã ãhraa mũa. Masa erã dupũre merogã gasirogãre erã wiri cóãro árĩbiriya. Mũa pepiripũre Cristopũ mũa ñeri uaribejarire cóãmi. <sup>12</sup> ĩgũ yarã árĩra pũhrũ waĩyesũnirã árĩnirã árĩbũ mũa. Eropa waĩyesũnirã árĩrã ōpa ĩhmurã iinirã árĩbũ mũa: Iribojegue mũa ñero iirare duhurare ĩhmurã iibũ mũa. Jesucristo sĩridigũ mera mũa uaribejarare cóãnirã árĩbũ mũa. Eropirã Jesucristo sĩridigũ masa mũriara mera ðaripũre

gohrotonirã árĩbũ mũa. Ĩgũ Goãmũpũ Cristore masudigũ árĩmi. “Ĩgũ turagũ àhrimi,” arĩrã ĩgũre umupeorã árĩrã òaripũre gohrotonirã árĩbũ mũa. <sup>13</sup> Iribojegue mũa ñerã árĩra dipuwaja peamegue wabonirã árĩriyoro mũa. Eropa wabonirã árĩriyoro mũa Goãmũ yarã árĩbirã. Ĩgũ dorerire opabirã árĩriyoro mũa. Dohpaguere mari Pagũ marire ĩgũ mera eropa òaro árĩniguimorã iimi. Cristo ĩgũ sĩridiro mera eropa iimi ĩgũ marire. Eropa iigũ mari árĩpehreri ñeri iirare cãdijicãdi árĩmi ĩgũ. <sup>14</sup> Goãmũ ĩgũ dorerire gojarare mari tarinũganirã mari árĩquerecũ ta ĩgũ marire dipuwajacũdorebeamĩ. Cristo crusague ĩgũ sĩridiro mera Goãmũpũ mari ñeri dipuwajare cãdijipehocãdi árĩmi. <sup>15</sup> Ĩgũ Cristo crusague sĩricũ watẽa ya dorerapũre Goãmũpũ tarinũgacãpũ. Eropirã bu árĩrã dujacãñorã erã watẽapũ. Eropa iigũ erãre gũhyasiuro wacũ iipũ erã ĩhuro.

*Ƨmũsi majare Goãmũ yare gameque, arĩ gojañumi Pablo*

<sup>16</sup> Eropirã gajirã erã dorerire dorediaricoma mũare. “Mũare irire barã, irire ihrirã ñerire iirã iiaa mũa,” arĩ werewũama mũare. Erã eropa arĩ werewũacũ eropa ĩacãque erãre. Bojori nũcũ árĩrinũri, aberi nũcũ árĩrinũri, semanari nũcũ árĩrinũri, bosenũri mũa iidia-biricũ werewũama. Erã eropa werewũacũ eropa pepicãque erãre. <sup>17</sup> Erã mũare doreri iri bojegue Goãmũ apira doreri Jesucristo mari ñeri iira dipuwaja sĩriburire ĩhmumũhtarañe árĩyoro. Dohpaguere Cristo arĩmi marire. Eropirã ĩgũre umupeorã iri doreripũre umupeobeaa pare. <sup>18</sup> Erã dorerire iidorerã mũare dipuwajacũrã dujacũ iidiana erã. Erã eropiicũ eropa ĩacãque erãre. “Gajiropa dehyoarire ĩabũ gũa,” arĩmaacãrã erã anyuare umupeorima Goãmũre umupeoboro dopa. Erã eropa pepicãrã iro dopa iirima. Gajirã masa iro dopa erã ñeri ãaribearire pepirima erã. Eropa pepirã árĩrã “Masipehocãa gũa,” arĩ pepirima erã. <sup>19</sup> Eropa iirã árĩrã Cristopũre umupeobeama. Cristo dihta ĩgũ yarãre doregũ àhrimi. Cristopũ mari ĩgũ yarã dipuru àhrimi. Ĩgũ yarãpũ ĩgũ ya curu majarã árĩrã ĩgũ dũpũ waĩcũa. Mari dipuru mari dũpũre gamesũriro dopa ta àhrimi Jesucristo ĩgũ yarãre. Ĩgũ yarãre ĩtamugũ marire ĩgũre umupeonemocũ iimi. Goãmũ gamero dopa ta ĩgũ yarãre ĩgũre masinemocũ iimi.

<sup>20</sup> Marire ñero iira dipuwajacũnirãre Cristo taudigũ árĩmi crusague sĩrigũ. Eropirã Cristore umupeorã ĩgũ yarã àhraa. Mũa eropa árĩrã i yeba maja buherire anyuare umupeori buherire gamebiro gahmea mũare. ¿Duhpirã gajino buherã erã dorerire iidari mũa? <sup>21</sup> Őpa arĩ dorema erã basi erã gamero: “Irinore babiricãque. Irinore pẽhrebiricãque,” arĩma. ¿Erã eropa arĩdorecũ duhpirã yũhriri mũa? <sup>22</sup> Erã doreriñe bari iro dopa ta pehrea waroca. Erã doreriñe i mũa maja dihta àhraa. Masa erã suaro erã buheri dihta àhraa i buheri. Eropiro duhpihuri árĩbeaa. <sup>23</sup> Erã dorerire iirã Goãmũre umupeorã iro dopa árĩrima. Eropirã eropa pepicãrã iro dopa ii ĩhmuma. Erã dũpũre ñero taricũ iirã “Goãmũre umupeorã iiaa,” arĩrima. Erã eropa iirã erã doreripũ masipehorã ya doreri iro dopa iirima. Eropa árĩbeaa. Erã dorerire ĩquererã erã ñeri ãaribearire duhubeama. Eropiro erã doreripũ duhpihuri árĩbeaa.

### 3

<sup>1</sup> Eropirā Cristo yarā āhraa mũa. Eropirā mũa ero core mũa ñeri iirare duhunijarā ðaripũre gohrotonirā āhraa mũa. Eropa gohrotorā árĩrā umusi majare Cristo yare gameque mũa. Erogue Cristo ĩgu Pagu diayepũ doagu árĩpehrerore doregu āhrimi. <sup>2-3</sup> Mũa uaribejari cóānirā árĩrā Cristo gamerire opaa. ĩgu Cristo mũa ðaro iiborore ðaro ĩhadibumi. Eropirā iri ñerire guñabeaa mũa. Eropirā umusi majare Goāmũ yare guñamũhtaque. I yeba majare guñaniguibiricāque. <sup>4</sup> Eropirā umusigue Cristo marire eropa árĩniguimorāre aĩgu ĩgu aricũ ĩgu mera warāca. Eropa warā ĩgu mera umusigue Goāmũ yare oparāca.

*Cristo yarā árĩbirā ñerire iiribũ mari, arĩ gojañumi Pablo*

<sup>5</sup> Eropi i yeba maja ñerire duhucāque. Ne yujugu mojoto diribiriqueregu nomeo mera árĩbiricāque. Ne yujugo mojoto diribiriquerego umũ mera árĩbiricāque. Eropa ñeri mũa iirire iripẽta duhucāque. Ñeri uaribejarire iibiricāque. Mũa opaburire gajinore gametaribiricāque. Mari gajinore burigā gamerā goāmarā wéanirāre erā umupeoro dopa iirā iiaa mari irire. <sup>6</sup> Iri ñerire iirā Goāmũre tarinugarā āhrima. Erā eropa árĩcũ ĩagu ĩgũpũ erāre gamebeamĩ. Eropigu erāre burigā dipuwaja moagucumi. <sup>7</sup> Iribojeguere mũapũ iri ñerire iinirā mera majarā árĩriya mũa. <sup>8</sup> Dohpaguere i ñerire duhupehrecāque mũa. Guarire, disitĩri wiarire, gajirāre ñero arĩ pepirire, gajirāre ñero quere wereniguirire, ñero wereniguirire iri árĩpehrerire duhucāque. <sup>9-10</sup> Mũapũ Jesu yarā warā ñerā mũa árĩdiro dopa ta iri ñeri uaribejarire duhutuhajanirā árĩbũ. Eropirā ðaripũre gohrotonirā āhraa mũa. Mũare ðaripũre gamecũ ĩigu iimi Goāmũ. ĩgu árĩro dopa mũa árĩboro dopa eropa iimi. Eropa ta iimi ĩgu mũa ĩgare ðaro masiboro dopa. Eropirā ĩgu eropiicũ mũa mera majarāre gũyabiricāque. <sup>11</sup> Cristo yarā mũa árĩrā judio masa, judio masa árĩbirā sã yujuropa dihta āhraa mũa Goāmũ ĩgu ĩacũ. Gasiro merogã wiri aĩnirā, irire aĩbirinirā sã Cristo yarā árĩrā yujuropa āhraa Goāmũ ĩgu ĩacũ. Gaji yeba majarā sã, masibirā sã, mũa ya yeba majarā sã Cristo yarā árĩrā yujuropa āhraa Goāmũ ĩgu ĩacũ. Pohro majarā, erā pohro majarā árĩbirā sã, Cristo yarā árĩrā yujuropa ta āhrima Goāmũ ĩgu ĩacũ. Jesucristo tamera árĩpehrerā ĩgu yarā mera āhrimi. ĩgu yarā erā ĩacũ bu árĩgu árĩbeamĩ ĩgu.

<sup>12-13</sup> Eropi Goāmũ ĩgu beyenirā, ðarā, ĩgu mahirā árĩrā ðpa árĩque mũa: Gajirāre mojomoro ĩarā, gajirāre ðaro iirā árĩro gahmea. Mũare ñero iiquerecũ ta eropa pepicārā árĩro gahmea mũare. Mũa mera majarā mera guarā, erāre quere iirā árĩbiricāro gahmea mũare. Eropirā “Yũhũ bu árĩgu āhraa,” arĩ pepique. Mari Opũ mũa ñeri iirare cãdijimi. ĩgu eropa cãdijidiro dopa ta mũa sã mũa mera majarā erā ñero iirare cãdijique. <sup>14</sup> I doreri tauro ðpa arĩ dorea mũare: Gajirāre mahi umupeoque. Mũa eropa iirā árĩpehrerā gajirā mera yujuro mera árĩrāca. <sup>15</sup> Cristo marire ðaro árĩcũ iimi gajinore mari wereniguibiriboro dopa. ĩgu eropa iicũ ðaro árĩque mũa. Mari ĩgu yarā yuju curu ta āhraa. Mari eropa árĩrāre mari Pagu marire ðaro árĩmorāre ta apimi. ĩgu eropa iicũ ðaro árĩque mũa mũa basi. Eropirā Goāmũre “Õhaa,” arĩ mucubirirā árĩque mũa Goāmũ mera.



<sup>16</sup> Cristo ya buherire ðaro guñaniguicãque mua. Òaro pee masiri mera igu yare gajirãre buheque. Guhyadiaro irire wereque. Eropirã Salmo gojaripũre, Goãmũ yare bayarire, gaji igũre umupeori bayarire igũre bayapeoque. Òaro guña umupeori mera bayapeoque. Eropa bayarã igu yare ðaro guñaque mua. Eropirã Goãmũre “Õhaa,” arĩ mucubirirã arĩque mua Goãmũ mera. <sup>17</sup> Arĩpehreri mua iirire ðaro sĩporãcũ iique mari Opũ Jesu igu mucubiriboro dopa. Mua wereniguirã igu ya arĩburi dihtare wereniguique. Eropirã Cristo igu itamuri mera Goãmũ mari Pagũre serẽrã “Õhaa,” arĩ mucubirique igũre.

*Jesu yarãre yujuro mera arĩburi doreri ðpa ãhraa, arĩ gojañumi Pablo*

<sup>18</sup> Mua marapucurã nome, mua marapu sumarãre ðaro yuhrique. Eropa ta iiro gahmea mari Opũ yarã Cristo yarã nome arĩrã. <sup>19</sup> Mua marapocurã, mua marasã nomere mahi umupeoque. Igore turibiricãque. <sup>20</sup> Mua erã porã sã mua pagu sumarãre tarinugabirã dihta arĩque. Mua eropa iicũ ãagu mari Opũ ðaro sũagu arĩgucumi. <sup>21</sup> Mua erã pagu sumarã sã mua porãre eropa turiniguibiricãque bujawerecũ iiri arĩrã. <sup>22</sup> Mua pohro majarã, mua oparãre i yeba arĩrãre eropa yuhrirã arĩque. Erã ihurore erã dorero dopa ta mohmeque. Erã maricũ sãre mohmeque. Mari Opũre Cristore guhyadiaro mua ãadiro dopa ta ðaro mera yuhrique mua oparã sãre. <sup>23</sup> Diaye ta Cristo yarã arĩrã ðaro yuhrirã ãhraa mua igũre. Eropirã mua oparãre ð majarã sãre yuhrirã, Cristore mua yuhriro dopa ta yuhrique mua. Eropirã mua oparã erã dorero dopa ta turaro mera mohmeque “Cristo ya doreri ãhraa,” arĩrã. <sup>24</sup> Mua eropa iicũ Cristo mũare wajayegucumi. Mũare igu oburire mũare ogucumi mari Opũ. Irire masia mua. Mari Opũ Cristo igu pohro majarã ãhraa mua. Eropigu igupũ mua Opũ gohra ãhrimi. <sup>25</sup> Igũre tarinugarãre dipuwaja moagucumi mari Opupũ. Arĩpehrerã tarinugarãre ne yujugu duhyaro mariro yujuro mera dipuwaja moagucumi igu. Eropa yũre iiri arĩrã ðaro yuhrique mua.

## 4

<sup>1</sup> Mua oparãpũ, mua pohro majarãre diaye ta ðaro iique erãre. Mua sã opu opaa. Mua opupũ mũusi majagu Goãmũ ãhrimi.

<sup>2</sup> Mua arĩpehrerã mũuri nũcũ Goãmũre serẽniguique. Òaro guña pee masi serẽniguique. Eropirã mari Pagu ðaro iirare guñaque. <sup>3-4</sup> Gũa ya arĩburipũre serẽque daja. Cristo yare iribojegue majarã erã masibirirare buherã iiaa gũa. Masare gũa ðaro buheboru dopa serẽbasaque mari Pagũre. Yuhũ Goãmũ yare werenigui waja dohpaguere peresugue ãhraa. Eropigu mua eropa serẽcũ gahmea igu yare yũ ðaro iiboro dopa. Cristo igu dorediro dopa ta yũ wereburire serẽque.

<sup>5</sup> Jesu yarã arĩbirã mera arĩrã ðaro iique mua. Cristo yare wereque erãre. Erã mera mua arĩropẽ ta eropa ta ðaro iique erã Jesu yarã arĩboru dopa. <sup>6</sup> Gajirã mera weretamurã ðaro sũaro mera weretamuque. Òari dihtare wereniguique. Mua eropiirã gajirã erã Jesucristo yare mũare serẽpicũ ðaro masiri mera yuhrirãca erãre.

*Õadoretupũ Pablo*

<sup>7</sup> Tĩquico mari acaweregu Jesu yagu añhrimi. Īgu yũ árĩricũre mũare weregũcumi. Īgu mari mahigu añhrimi. Cristo yare buhegu, guã mera mohmegũ añhrimi. Ne iri mohmerire duhubeami ĩgu. <sup>8</sup> Mũa pohrogue ĩgũre obeogu iiaa yũhũ guã árĩricũre mũa masiboro dopa. ĩgũre obeogu iiaa yũhũ mũare mucubiricũ iibure. <sup>9</sup> Onésimo mari acaweregu mera wapimoa obeogu iiaa. Īgu sã Cristo yare ne duhubeami. Mũa mera majagu añhrimi. Erã perã yũ dohpa tarirare wererãcoma mũare.

<sup>10</sup> Aristarco peresugue árĩgu yũ mera majagu mũare õadoremi. Marco sã õadoremi. Īgu Bernabé pagũ magũ añhrimi. Mũa pohrogue ĩgu ejacũ õaro mera ĩgũre bocatĩrique yũ mũare werebeodiro dopa ta. <sup>11</sup> Jesu waĩcũgu “Justo,” erã arĩ piyugu õadoremi ĩgu sã. Oã ta yũ mera mohmerã judio masa gohra añhrima. Judio masa gohra erã dihta Goãmũ yare yũ mera buhema. Őpa buhea guã Goãmũ yarã masa waboro dopa. “Jesucristo yũ Opũ añhrimi,” erã arĩboro dopa buhea guã. Erã yũre õaro itamunirã añhrima. <sup>12</sup> Epaфра mũa mera árĩdigũ mũare õadoremi. Īgu Jesucristo dorerire õaro iigu añhrimi. Goãmũre serẽgu, turaro mũa ya árĩburire serẽbasaniguicãmi ĩgu. Goãmũre õaro guñaturaniguimorãre, ĩgu gamero dopa iimorã mũa arĩboro dopa eropa Goãmũre serẽbasaniguicãmi ĩgu. <sup>13</sup> Īgu mũa ya árĩburire turaro serẽbasami. Laodicea majarã ya árĩburire, Hierapoli majarã ya árĩburi sãre ĩgu turaro serẽbasami. Īgu eropa iigu árĩcũ ĩagu mũare weregu iiaa. <sup>14</sup> Duhturu Luca waĩcũgu mari mahigu mũare õadoremi. Demã sã õadoremi.

<sup>15</sup> Őaporo mari acawererã Laodicea majarã. Ninfa sã õaporo. Jesu yarã igo pohro gamenererã sã õaporo. <sup>16</sup> Ipũre yũ gojabeorapũre buhetuha Laodicea majarã sãre obeoque. Eropirã erãre Laodicea majarãre yũ gojabeorapũre mũa sã buheque. <sup>17</sup> Eropirã õpa arĩque Arquipore: “Mari Opũ Jesu yagu mũ arĩcũ ĩgu mohmerire apidi árĩmi mũre. Īgu eropa apicũ iri mohmerire õaro mohme ojogorocũque mũhũ,” arĩque ĩgũre.

<sup>18</sup> Yũhũ Pablo, yũ mojoto mera ire gojaa. Mũare õadorea yũhũ. Peresugue yũ árĩrĩre guña serẽbasaque Goãmũre. Őaro arĩque mũa. Goãmũ ĩgu mahiri mera mũare õadorea. Iripeta añhraa.

# 1 Tesalonicenses

*Pablo gojañumi Jesu yaräre Tesalónica majaräre*

<sup>1</sup> Yu Pablo, Silvano, Timoteo mera ipüre müare gojabeoa. M̄ar̄u Tesalónica majarã mari Pagu Goãm̄u yarã árĩrã mari Op̄u Jesucristo yarã sã ähraa m̄ua. Eropiḡu Goãm̄u mari Pagu, Jesucristo mari Op̄u mera müare ðadorea. İgu itamuri mera ðaro árĩque.

*Jesu yarã Tesalónica majarãpu Jesure erã ðaro umupearare wereñumi Pablo*

<sup>2</sup> Goãm̄ure sererã m̄ua árĩpehreräre guña mucubiriri mera. M̄ua Jesure umupearire guñarã “Ôatariari ähraa,” arĩ serêniguicãa ḡua Goãm̄ure. <sup>3</sup> M̄ua Jesucristore “Diaye iigu ährimi,” arĩ umupeoniguicã waĩcua. Eropa umupeoniguicãrã Jesucristo ya árĩburire ðaro iirã waĩcua. Jesucristore, gajirã sãre m̄ua ðaro mahi umupearã waĩcua. Eropa mahirã Jesucristo ya árĩburire burigã iirã waĩcua m̄ua. Eropirã Jesucristo İgu itamurire corerã waĩcua m̄ua. İgure eropa corerã İgu yare iirã duhubirã waĩcua. Eropa iirã m̄ua Goãm̄u mari Pagu İacũ ðaro iiaa. Goãm̄ure ḡua sererã irire m̄ua eropa ðaro ii waĩc̄urare guñaniguicãa. <sup>4</sup> Ḡua acawererã, ðpa peeque. Müare Goãm̄u mahimi. Eropiḡu müare İgu yarã árĩmoräre beyep̄u. Irire masia ḡua. <sup>5</sup> Ḡua sohõ árĩrasubu m̄ua mera árĩrã ðari buherire müare ḡua wererã ḡua pepiri mera werebirab̄u. Espiritu Santo İgu doreri mera İgu yare wereab̄u ḡua müare. Eropa werecũ iri buheri diaye ta árĩr̄ire ðaro masiab̄u m̄ua.

<sup>6</sup> Eropa masirã m̄ua iri ðari buherire ðaro pee ñeab̄u m̄ua mucubiriri mera. Eropirã m̄ua eropa peecũ İha gajirã gamebirã müare ñero iima. Erã müare ñero İiquerecũ ta m̄ua Espiritu Santo itamuri mera ðaro mucubiriab̄u. Eropirã ḡua m̄ua watope árĩrã ḡua ðaro árĩric̄urire masiab̄u m̄ua. Eropirã m̄ua ḡua diaye maja iirare İarã ḡuare İhacũbu. Eropirã Jesu mari Op̄u İgu İidiro dopa ta İiab̄u m̄ua.

<sup>7</sup> M̄ua eropiicũ pee Jesu yarã Macedonia yeba majarã, Acaya yeba majarã sã m̄ua eropa ðaro iirare peeañorã. Eropa peerã erãpu m̄ua İidiro dopa ta İiañorã erã sã. <sup>8</sup> Eropirã müaguere Jesucristo mari Op̄u yare peesüyoro. Goãm̄ure m̄ua umupearare Macedonia majarã Acaya majarã sã peeañorã. Erã dihta peebirañorã. Árĩpehrero majarã m̄ua umupearare peeañorã. Eropirã ḡua m̄ua umupearare gajirã masituhajacũ İha werebirica erãre ḡuar̄u. Erãpu ḡuare werema.

<sup>9</sup> Öpa arĩma ḡuare m̄ua iirare wererã. “Tesalónica majarã müare ðaro bocatĩr̄iorã m̄ua eroḡue ejacũ. Erã Jesucristo yare pee erã goãmarã wéanirãre umupeonirã árĩrã gohrotoañorã. Gohrotorã Goãm̄u gohra ojocarigure diaye igure umupeonugañorã. Eropirã dohpague Goãm̄u yare iirã İiañorã. <sup>10</sup> Eropirã Goãm̄u maḡu Jesucristo İgu um̄usigue ariburĩne ðaro corerã ährañorã,” arĩ werema ḡuare. Jesure s̄iridiḡure Goãm̄u masup̄u. Eropiḡu Jesup̄u marire ñetariaro dipuwajac̄ubonirãre taudiḡu ährimi.

## 2

*Pablo Tesalónicague ïgu buherare wereñumi*

<sup>1</sup> Mña pohro gña árfirã eropa árficãrã iibirabũ. Muare ðaro itamurã árfimurabũ gña. Irire ðaro masia mña, gña acawererã. <sup>2</sup> Ero core Filipo maca gña árfirã ñero taribũ. Guare ñero erã iirare masia mña. Guare erã eropa ñero iiquerecũ ta Goãmu itamuri mera güiro mariro Goãmu yare ðari buherire wereniguirã gña ejabũ mña pohroguere. Mña árfiro sãre guare masa bajarã erã ihaturiquerecũ ðari buherire buheabũ gña muare. <sup>3</sup> Eropirã mña pohro árfirã muare gña werera ðaro diaye majare buheabũ gña muare. Eropã wererã muare ñero iidiarã árfibirimurabũ gña. Muare gnyadiarã buhebirimurabũ gña muare. <sup>4</sup> Goãmu gamero dopa ta buhea gña. Õari buherire buhemorãre Goãmu beyemi guare. Eropã beyegu ïgu ya buherire guare weredoremi. Eropirã masa guare erã ihasuaburire buherã iibea gña. Goãmupũ guare ïgu ihasuaburire ïgu yare buhea gña. Goãmu mari pepirire dohpa mari iidiarire ðaro masimi. <sup>5</sup> Eropirã gña muare ðari buherire wererã gajinore amarã ejabirimurabũ. Eropirã werenigui gnyarã iibirimurabũ gña muare. Eropirã gña buherã muare niyerure aïmorã iibirimurabũ. Irire gña mña pohro eropa ðaro iirare mña masia. Goãmu sã irire masimi. <sup>6</sup> Gña eropa buherã mña guare umupeoburire dorebirimurabũ. Gajirã sãre eropa ne dorebirimurabũ. <sup>7</sup> Gña Cristo ïgu apinirã árfirã muare doremasiboaya. Ne eropa dorebirabũ gña. Gña dorebirã majirãre nijisoro dopa ta muare ðaro iimurabũ mahiri mera. <sup>8</sup> Eropirã muare ðaro gamerã Goãmu yare ðari buherire weremurabũ gña muare. Gña basi ta árfipehrero gña iimasiburire muare itamumurabũ. Gña mahirã mña árficũ eropa itamuabũ muare. <sup>9</sup> Eropirã muare mahirã burigã itamumurabũ. Irire guñaa mña, gña acawererã. Goãmu yare ðari buherire wererã árfirã, mña oparire serẽ garibobirimurabũ muare. Eropirã gña basi mohmemurabũ gña baburire wajatamorã. Eropirã umure, ñamigue sãre mohmemurabũ gña.

<sup>10</sup> Eropirã ðaro Goãmu gamero iirã ñeri dipuwaja mariro diaye ta iimurabũ muare Jesu yarãre. Eropirã gña mña mera eropa queoro árfirare masia mña. Goãmu sã irire masimi. <sup>11</sup> Eropirã erã pagũ ïgu porãre ïgu ðaro were ïgu mucubiricũ iidiro dopa ta gña mña sãre árfipehrerãre wererã mucubiricũ iiabũ muare. Irire masia mña. <sup>12</sup> Goãmu muare ïgu opu árfirogue ïgu ðatariaro árfirogue mña árfimorãre beyedigũ árfimi. Eropirã mña ïgu yarã árfirã ïgu árfiro dopa ta ðaro iiniguicãro gahmea, arimurabũ.

<sup>13</sup> Eropirã Goãmu yare muare gña wererare mña peerã ðpa pepibũ mña: “Masa erã pepiri mera iri buheri árfibeaa. Goãmu ya buheri ta áhraa,” arĩ pepibũ mña. Irire mña eropa pepicũ masirã mucubiria gña. Eropirã Goãmure sererã, “Õhaa,” arãa gña ïgure. Eropã ta áhraa. Muare gña buheri, Goãmu wereniguri diaye ta árfiri áhraa. Eropigu mña Goãmu yare ta peecũ ïgu ya buheri mera ðaripure gohrotocũ iimi muare. <sup>14</sup> Eropirã Jesucristo yarã mña árficũ ïarã i yeba majarã Jesure gamebirãpũ ñero iiañorã muare. Mña eropa wadiro dopa ta Judea yeba majarã sãre wayoro. Erogue sãre Jesucristore umupeorãre erã ya yeba majarã sã ñero iiañorã. Judio masa Jesure gamebirã

eräre ñero taricũ iiañorã. <sup>15-16</sup> Mata judio masapu iribojegue majarã Goãmu ya weremũhtanirãre wejẽmũrinirã árĩma. Eropirã mari Opũ Jesucristo sãre wejẽñorã erã. Eropirã erã Jesucristo yare gamebirã gũa sãre ñero ii cohãma guare erã ya yebare. Eropirã erã judio masa árĩbirãre erã dederebiriborore gũa erãre Goãmu yare werecũ guare judio masa cãhmotamũrima. Goãmu yare weredorebirima guare. Erã Jesu yarãre ìhaturi árĩmũrima. Erã eropiirare Goãmu gamebirigohracãmi. Eropiro erã judio masa ñero iira dipuwaja wũaro árĩtuhaya. Erãre Goãmu bũrigã dipuwaja moagũcumi.

*Pablo Tesalónica majarã pohrogue dipaturi curigũ wadiaripũ*

<sup>17</sup> Gũa acawererã, mũa mera dohpaguere árĩbiriquererã ta mũare guñarã iiaa. Eropirã mũare bũrigã ìadiarã mũa pohrogue wadiarabũ gũa. <sup>18-19</sup> Bajasuburi yũhũ mũare ìagũ wadiarabũ. Watĩpũ gũa wabodirore goroweoami. Eropirã gũa wabiricarabũ. Gũare mucubiricũ iirã mũa árĩcũ mũare ìadiarabũ. Mari Opũ Jesucristo i yebague dujaricũ turaro mucubirirãca mũa mera. Eropirã mucubirirã mũa mera Jesu core niguirãca. <sup>20</sup> Eropa ta ãhraa. Mũare ìagũ Jesupũ “Õaro buhenirã ãhraa mũa,” arĩgũcumi guare. Eropirã õaro mucubirirãca gũa.

### 3

<sup>1-2</sup> Eropii mũare yoari boje gũa ìabirã mũare bũrigã peediarã irire guñarã Timoteore mũa pohrogue obeoabũ. Ìgũ mari acaweregũ Jesu yagũ Goãmu pohro majagũ gũa mera õari buherire buhegũ ãhrimi. Eropirã ìgũre obeoabũ Jesucristore mũa õaro umupeoburire mũa mucubiriburi sãre. Ìgũre obeorã gũa seyaro Atena maca dujabũ. <sup>3</sup> Mũa Jesucristore umupeora waja gajirã mũare ñero iiañorã. Eropirã mũa Jesu yare mũa cóãbiriboro dopa itamubure obeoabũ Timoteore mũa pohrogue. Mari Jesu yarã árĩrãre eropa ta gajirã marire ñero taricũ iirãcoma. Irire masia mũa. <sup>4</sup> Mũa mera ero coreguere árĩrã õpa arĩ weretuhajabũ mũare: “Mari Jesucristore umupeora waja gajirã marire ñero iirãcoma,” arĩ weretuhajabũ mũare. Eropirã gũa werediro dopa ta erã ñero iima mũaare. Irire mũa õaro masia. <sup>5</sup> Eropigũ mũaare mahitariagũ mũaare yoari boje ìabigũ mũaare bũrigã peediabũ yũhũ. Eropigũ Timoteore obeoabũ yũhũ mũa Jesure umupeorire masibu. “Watĩ mũaare ñero iidoreri,” arĩgũ, “Mũaare gũa buherare mũague duhuri,” arĩgũ ìgũre obeoabũ yũhũ.

<sup>6</sup> Eropigũ dohpaguere Timoteo mũa pohrogue árĩdi gũa pohrogue dujarami. Eropa dujaragũ õari querere guare wereami ìgũ. Jesure mũa õaro umupeorare mũa gajirã mera õaro mahira sãre ìgũ wereami guare. Eroparĩgũ guare mũa õaro guñara sãre wereami. “Erã sã mũaare bũrigã ìadiama,” arĩ wereami ìgũ guare. Ìgũ eropa arĩ werecũ peerã mucubiria. <sup>7</sup> Eropirã gũa dohpaguere ñero tarirã árĩquererã mũa Jesure õaro umupeocũ peerã gũa mucubiria. <sup>8</sup> Jesure mũa õaro umupeorare pee ìgũ yare mũa cóãbirirare peerã õaro pepia gũa. <sup>9</sup> Eropa pepirã Goãmu ìaro gũa bũrigã mucubiria. Eropa mucubirirã Goãmũre serẽa, “Õhaa,” arĩrã. <sup>10</sup> Eropirã gũa basi mũaare ìaburire Goãmũre serẽniguia. Õmũri ñamiri sãre serẽniguicãa. Mũaare ìadiarã

Jesucristo yare mũa ðaro masipehocũ itamudiaca ïgure mũa ðaro umupeonemoboro dopa.

<sup>11</sup> Goãmũ mari Pagũ ïgu basi mari Opũ Jesu mera guare itamuporo mũa pohrogue gũa waburire. <sup>12</sup> Eropigũ mari Opũ Jesu árïpehrerã mũa mera majarãre árïpehrerã gajirã sãre mahinemoburire iiporo mũare. Gũa mũare mahi umupeodiro dopa ta mũa sã burigã mahinemocũ iiporo mũare. <sup>13</sup> Mũare ïgu ðaro itamuri mera mũa dipuwaja marirã ñeri marirã árïrãca Goãmũ mari Pagũ ïacã. Eropa ta árïrãca mũa mari Opũ Jesu dujaricũ árïpehrerã ïgu yarã ðarã mera i yebague.

## 4

*Goãmũre mucubiricũ iidiarã ðpa iique, arï were gojañumi Pablo*

<sup>1-2</sup> Dohpaguere Jesu mari Opũ ïgu dorero mera mũare ðpa werea: “Goãmũre mucubiricũ iidiarã ðpa iique,” arï buheabũ gũa mũare. Gũa eropa buhera pũhrũ gũa buhediro dopa ta iiayoro mũa. Iri buherire ðaro masia mũa. Eropirã mũa Goãmũ yare ðaro iirã àhraa. Eropirã mũa eropa iidiro dopa ta duhubirã ta. Mũraro ta iinemoque daja. Irire burigã werea mũare.

<sup>3</sup> Irire mũare werenemogura. Mũa ðpa árïcũ gahmemi Goãmũ. Ñerire iibirã Goãmũ yare iirã árïque. Eropirã nome mera ñero iiro mariro árïque mũa ũa. Mũa nome sã ũa mera ñero iiro mariro árïque. <sup>4</sup> Ñero iibiraro mariro umupeori mera mũa marasã nomere opaque. Mũa irire masicũ gahmemi Goãmũ. <sup>5</sup> Goãmũre gamebirã Goãmũre masibirã ñerire ¼aribejarã nomere erã gamero dopa ta iibiricãque mũa. <sup>6</sup> Õpa ta mũa iibiricũ gahmemi Goãmũ: Ne yujugu mũa acaweregu marapore yajabiricãporo. Eropa yajagu ïgu acaweregure umupeobigu iimi ïgu. Eropigũ eropa iigure mari Opũ iri ñerire ïgu ya dipuwaja moabu árïgu tiimi. Eropirã mũare gũisãrã irire wereabu mũare. <sup>7</sup> Ñerire pepimorãre, ñerire iimorãre beyebirimi marire Goãmũ. Ñerire iibirimorãre ðarire iimorãre beyemi Goãmũ marire. <sup>8</sup> Eropigũ ðarire mari iimorã árïcũ ïgu Espiritu Santo odigu árïmi marire. Eropirã iri ñerire iibiricãro gahmea. Eropigũ yujugu i gũa wererare yũhribigu Goãmũ yapũ sãre yũhribigu àhrimi.

<sup>9-10</sup> Mũa acawererãre, Jesu yarãre mũa game mahiburire Goãmũ mũare buhetuhajami. ïgu eropa buhecũ mũa diaye ta Jesu yarãre Macedonia majarã sãre árïpehrerãre ðaro mahi umupeo waicua. Mũa eropa mahicũ peegu “Mũa acawererãre mahique,” arï buhebeaa daja mũare. Eropigũ ðpa dorea daja yũhũ. Mũa gajirãre mahiro dopa ta erãre mahinemoque. <sup>11</sup> Eropirã mũa basi game ïhaturiro mariro árïque. Gajirãre gajiropa arï wereniguibiricãque. Eropa ïacãque erãre. Eropirã mũa ya mohmeripũre ðaro mohmeque. Ero coregue ta mũare eropa iidoreabu. <sup>12</sup> Mũa eropa mohmerã gajirãre barire amasome. Eropirã erã mũare ðaro wereniguirãcoma.

*I yebaguere Jesucristo ïgu dujariborore werepũ Pablo*

<sup>13</sup> Jesure gamebirã Jesu pohroguere wasome. Eropirã erã mera marãrã erã sïricũ ïarã burigã bujawerema. Sïrinirã mũra erã waborore diaye ta ðaro mũa masicũ gahmea gũa. Gajirã erã bujawerediro dopa mũa bujawerebiriboro dopa mũare masicũ iidiaa. <sup>14</sup> Jesu ïgu sïrira

pũhrũ masa mũriadigũ árĩmi. “Iri diaye ta áhraa,” arãa mari. Eropa arĩrã árĩrã i sãre “Diaye ta áhraa,” arãa mari. Goãmũpũ ĩgũ yarã sĩrinirã mũrare erã masa mũriacũ Jesu mera aricũ iigũcumĩ. Iri sãre “Diaye ta áhraa,” arãa mari.

<sup>15</sup> Mari Opũ ĩgũ buhediro dopa ta ire werea. Jesucristo ĩgũ dujaricũ ĩgũ yarã ojocarirã sĩrinirã core masa mũriamũhtasome. Sĩrinirã mũrapũ ojocarirã core masa mũriamũhtarãcoma. <sup>16</sup> Őpa árĩroca Jesu ĩgũ dujaricũ: Mari Opũ ĩgũ basi dijarigũcumĩ umũsigue árĩdigũ. Dijarigũ busuro mera werenĩgui, doregũcumĩ. ĩgũ dorecũ ĩgũ anyua opũ bũrigã piyugũcumĩ. Eropa ĩgũ piyucũ Goãmũ ya corneta busumũriroca. Erã eropiicũ Cristore umupeonirã sĩrinirã mũra masamũria mũhtarãcoma. <sup>17</sup> Erã pũhrũ mari ojocarirãre sĩrinirã masanirã mera Goãmũ aĩ mũriagũcumĩ. ĩgũ eropa iicũ mari Opũ Jesure bocatĩrirãca mari. Eropirã mari Opũ Jesu mera árĩnigũicãrãca. <sup>18</sup> Eropirã i yũ wererare mũa mera majarãre wereque. Eropa arĩ wererã mucubirirãca mũa árĩpehrerã. Mari Opũ Goãmũ ĩgũ wereri ta áhraa i.

## 5

<sup>1</sup> Jesu ĩgũ dujariburinũre “Inũri árĩcũ ĩgũ dujarigũcumĩ,” arĩ mũare were gojabeosome. <sup>2</sup> ĩgũ dujaririnũre marire masima masiya mara. Yajari masũ ñamigue guñaña mariro ĩgũ yajagũ ariro dopa ta i yebaguere mari Opũ guñaña mariro dujarigũcumĩ. Iri sãre masia mũa. <sup>3</sup> Eropirã masapũ “Dohpaguere mari õaro árĩcãa. Gũhyari mara marire,” erã eropa arĩ pepirisubu mata ñero waroca erãre. Ero eropa wacũ ne nohogue gohra duhri wiria masisome. Dederea warãcoma. Niji wahgũgo guñaña mariro igo pũriro pepiro dopa guñaña mariro eropa waroca masare Jesu ĩgũ dujaricũ. <sup>4</sup> Yũ acawererã, mũapũre eropa wasome. Yajari masũ wihĩ opũre ĩgũ ucudiro dopa ta mũapũre eropa wasome. Jesu arigũ mũare ucusome. Naitĩarore erã ĩha masibiro dopa gajirã Jesure ne masibeama. Mũapũ erã iro dopa árĩbeaa. <sup>5</sup> Mũa árĩpehrerã Jesu yarã áhraa. Eropirã boyorore erã ĩha masiro dopa ta Jesu ĩgũ ariborore masia mũa. Gajirã ĩgũre masibirã iro dopa árĩbeaa mũa. Eropirã ucasome ĩgũ dujaricũ. <sup>6</sup> Eropirã carĩrã iro dopa árĩbircãro gahmea. Őaro pee masirã áhri Goãmũ yare õaro pepiro gahmea. Eropirã Jesucristo dujariborore õaro corero gahmea. <sup>7</sup> Ñamire carĩrã dopa árĩbircãro gahmea. Ñamire mererã dopa árĩbircãro gahmea. <sup>8</sup> Őmũre árĩro dopa õaro pee masĩ árĩro gahmea. Eropirã marire watĩ ñero iidoreburire iibircãro gahmea. Surara gamewejẽgũ wagũ come suhriro saña, come sãpea peya ĩgũ cãhmotaboro dopa mari sãre watĩ ñero goroweoborore cãhmotaro gahmea. Őpa iiro gahmea watĩre cãhmotabure: Jesucristore “Diaye iigũ áhrimi,” arĩ umupeonigũicãro gahmea. Goãmũre masa sãre mahinigũicãro gahmea. Eropirã Jesu mera mari Goãmũ pohro mari árĩburire masi corero gahmea. Mari eropiirã ñero iiburire cãhmotarã árĩrãca. <sup>9</sup> ĩgũ dipuwaja moamorãre marire beyebiripũ Goãmũ. Jesucristo mari Opũ marire dipuwaja marimorãre, peamegue wabonirãre ĩgũ taumorãre beyepũ marire. <sup>10</sup> ĩgũ Jesu mari ya árĩburire ta sĩribasadigũ árĩmi ĩgũ mera mari árĩburire. Eropirã

ĭgu dujaricũ ojocarirã árĩrã sĭrinirã sã yujuropa ta ĭgu mera árĩrãca mari ĭgu yarã árĩrã. <sup>11</sup> Eropirã mũa mera majarãre dohpague mũa mucubiricũ iidiro dopa ta mũa basi mũa mucubiricũ iique daja. Eropirã mũa basi ta Goãmure umupeonemocũ iique mũa mera majarãre Goãmũ yare wererã.

*Jesu yarãre Pablo weretuñumi*

<sup>12</sup> Jesucristo yare buherã mũa ðaro iiburire wererã àhrima mũa pohro. Erãre mari Opũ Jesucristo buhedoregu beyeñumi. Erã ĭgu beyenirã árĩcũ ðaro umupeoque erãre. Mũa erãre eropa umupeocũ gamegu bũrigã dorea mũare. <sup>13</sup> Erã mohmerire erã iicũ erãre mahiri mera ðaro umupeoque. Eropirã gamequeãro mariro árĩrã gahmea.

<sup>14</sup> Gua acawererãre, mũare, òpa bũrigã werea daja. Mohmedi-abirãre mohmedoreque mũa. Duhudiarãre “Goãmũ itamuri mera duhubiricãque,” arĩque erãre. Jesure merogã umupeorã sãre itamuque. Erã mata pee masibiricũ ĩha guabiricãque erã mera.

<sup>15</sup> Yujugu mũare ĭgu ñero iiquerecũ mũapu dipaturi ĭgure ñero ii gamebiricãque. Mũa mera majarãre árĩpehrerã gajirã sãre ðaro mera umupeoque.

<sup>16</sup> Eropirã umuri nũcu Goãmũ mera eropa mucubiriniguicãro gahmea mũare. <sup>17</sup> Eropirã Goãmure eropa serẽniguicãro gahmea.

<sup>18</sup> Mũa ðaro tarirã, mũa ñero tariquererã Goãmure “Òhaa,” arĩro gahmea. Goãmure “Òhaa,” arĩrã, Goãmũ ĭgu gamediro dopa ta iirãca mũa Jesucristo yarã árĩrã.

<sup>19</sup> Eropirã Espĩritu Santo mũare ĭgu wererire yũhribirã árĩbiricãque. <sup>20</sup> Espĩritu Santo ĭgu masiri mera gajirã mũare buheama. Erã eropa buhecũ erã buherire gamebirã árĩbiricãque. <sup>21</sup> Eropirã gajirã mũare gajiropa erã arĩ buhecũ iri Goãmũ ya árĩbiricũ masique mũa. Eropirã Goãmũ ya buheri iri árĩcũ sãre masique mũa. Eropirã ðari dihtare gameque. <sup>22</sup> Eropirã iri ñerire árĩpehreri ñerire gamebiricãro gahmea.

<sup>23</sup> Eropigu Goãmũ marire ðaro iirã árĩcũ iigu àhrimi. ĭgu ĭgu basi mũare ĭgu yarãre mũa ðarã ñeri marirã árĩcũ inemoporo mũare. Mũa dupũ sãre mũa sĭporã sãre ðaro ĩhadibuporo mũare. Mari Opũ Jesucristo i yebaguere ĭgu dujariboro core Goãmũ mũare ðaro ĩhadibuporo mũa ñerire iibiriboro dopa. ĭgu eropa iicũ Jesucristo dujaricũ ñeri marirã árĩrãca mũa. <sup>24</sup> Eropa ta iigucumi Goãmũ. ĭgu mũare beyedigu ĭgu arĩdiro dopa ta iimi.

*Pablo erãre ðadorebeoñumi*

<sup>25</sup> Gua ya ðaro árĩburire Goãmure serẽbasaque mũa sã, gua acawererã.

<sup>26</sup> Jesu yarãre bocatĩrirã árĩpehrerãre mahiri mera mojoto ñeaque mũa.

<sup>27</sup> Jesu mari Opũ ĭgu doreri mera mũare werea yũhũ. Árĩpehrerã Jesu yarã gamenererãre ipũre buheque mũa.

<sup>28</sup> Jesucristo mari Opũ ĭgu mahiri mera mũare bũrigã ðadorea. Eropa ta árĩniguicãporo. Iripẽta àhraa.



## 2 Tesalonicenses

*Pablo ĭgu mera majarã mera gojabeoñumi daja Jesu yarã Tesalónica majarãre*

<sup>1</sup> Yũhũ Pablo, Silvano mera, Timoteo mera ipũre mũare gojabeogũ iiaa. Mũa Tesalónica majarã mari Pagũ yarã ãhraa. Mari Opũ Jesucristo yarã ãhraa mũa. <sup>2</sup> Eropigũ mari Pagũ Goãmũ, Jesucristo mari Opũ mera mũare ðadorea. ĭgu itamuri mera ðaro árĩque mũa.

*I yebaguere Jesucristo dujarigũ dipuwaja moagũcumi, arĩ gojañumi Pablo*

<sup>3</sup> Mũa Jesucristore “Diaye ta iigũ ãhrimi,” arĩ umupeorã umupe-onemorã árĩ waĩcuabũ. Eropirã mũa gajirãre mahi umupeorã turaro mahi waĩcuabũ. Mũa eropa árĩcũ pee Goãmũre ðaro mera serẽro gahmea gũare. “Mũhũ erã mera ðaro iiaa,” arĩro gahmea Goãmũre. <sup>4</sup> Mũa Jesure umupeora waja gajirã mũare erã ñero iiquerecũ mũa ñero tariquererã Jesure umupeonigui waĩcuabũ. ĭgũre umupeorã duhubirã waĩcuabũ. Mũa eropa iicũ pee mucubiriri mera werea gũa gajirãre Goãmũ yarãre. <sup>5</sup> Eropirã mũa Jesure umupeora waja gajirã mera ñero tariquererã Goãmũre umupeoniguicã waĩcuabũ. Goãmũpũ diaye iigũ ãhrimi. Eropigũ ĭgu mũa ĭgũre eropa umupeocũ ĩha ĭgu Opũ árĩroguere wadoregũcumi mũare.

<sup>6</sup> ĭgu Goãmũ diaye iigũ árĩgũ gajirãpũre mũare ñero iinirãpũre erãpũre ñero taricũ iigũcumi Goãmũ. <sup>7</sup> Eropigũ mari ñero tarinirãre marire soocũ iigũcumi mari Opũ Jesu dujarigũ. ĭgu dujarigũ anyua turarã mera peame ũjũro iro dopa dehyoagũ arigũcumi ũmarogue. <sup>8</sup> Eropa arigũ Goãmũre masibirãre erã ya dipuwaja moagũcumi. Mari Opũ Jesucristo ĭgu ðari buherire tarinũganirãre dipuwaja moagũcumi erãre. <sup>9</sup> Eropirã erã erã ya dipuwaja dedererãcoma. Peamegue ñero tariniguirãcoma. Eropirã erã mari Opũ Jesu ĭgu dorerogue ĭgu ðari árĩroque ne wamasisome. Eropa ta waroca irinũre Jesucristo ĭgu dujaricũ. <sup>10</sup> Irinũ ta ĭgu aricũ ĭgu yarã ĩhamariarã “Diaye ta turagũ, ðagũ ãhrimi,” arĩ wereniguirãcoma. Eropirã ĭgũre ðaro peenirã ĭgũre ĩarã umupeorãcoma ðaro ĭgũre. Mũapũ Jesu yare gũa buherare ðaro peeabũ. Eropirã mũa sã ĭgu mera árĩrãca.

<sup>11</sup> Eropirã Goãmũre serẽniguica gũa mũa ya árĩburire. Őpa arĩ Goãmũre serẽbasaa ĭgũre mũare itamudorerã. “Erã mũ beyenirã mũ árĩro dopa ta erã árĩcũ iique,” arĩ serẽbasaa. “Goãmũ, mũ doreri mera erã ðaro iidiarire erã iicũ itamuque. Erã mũre umupeorã mũ gamerire erã iicũ iique,” gũa arĩ serẽbasaa Goãmũre. <sup>12</sup> Mũa eropa Goãmũ gamerire iicũ ĩha gajirã sã umupeorãcoma mari Opũ Jesucristore. Eropigũ Jesucristopũ mũare ðaro ĩagũcumi. Eropigũ Goãmũ marire mahigũ gũa arĩ serẽbasaro dopa ta iigũcumi mari Opũ Jesucristo mera.

## 2

*Ñeri mera masare weresãgũ dehyoagũcumi, arĩ gojañumi Pablo*

<sup>1</sup> Dohpague mari Opũ Jesucristo i yebaguere ĭgu dujariborore werenemodiaca yũhũ mũare. ĭgũre mari gamenere bocatĩriburire

werediaca. Eropigu õpa arĩ burigã werea muare, gũa acawer-erãre. <sup>2</sup> Gajirã muare õpa arĩbocoma: “Mari Opũ ĩgu dujariburinũ, pehrerinũ árĩroque iiaa,” arĩbocoma muare. Erã eroparicũ peerã pee ucabiricãque. Eropirã peerã peewisibiricãque. “Goãmũ yãre eropa ta arĩdi árĩmi,” arĩbocumi muare gajigu. Gajigu sã muare buhegu eropa ta arĩbocumi. Gajigu sã eropa ta arĩ gojabeobocumi, “Yũhũ Pablõ ta ãhraa,” arĩ gũa gojabeogu. Irire muare weregure masibea yũhũ. <sup>3</sup> Eropirã gajirã muare gũyacũ ne peebiricãque. Irinũ Jesucristo dujariburinũ árĩboro core õpa waroca. Bajarã masa Goãmũre cõãrãcoma. Eropigu ñeri mera masare weresãgu dehyoamãhtagucumi. ĩgu dederebu árĩgu ãhrimi. <sup>4</sup> ĩgu Goãmũre umupeorire, goãmarã sãre umupeorire gamebigucumi. ĩgu dihtare umupeodoregu “Árĩpehreri weca opũ ãhraa yũhũ,” arĩgucumi ĩgu. Eropigu ĩgu Goãmũ ya wihi doagu, “Yũhũ ta Goãmũ ãhraa,” arĩgucumi ĩgu masare ĩgũre umupeodoregu.

<sup>5</sup> Yũhũ mũa mera árĩrasubure irire ta werebũ. ¿Irire guñari mũa? <sup>6</sup> Dohpaguere ĩgũre ñeri mera masare weresãgũre árĩdorebeami dohpa. ĩgũre árĩdorebigũre masica mũa. Queorinũ árĩcũ ĩgu ñeri mera masare weresãgu dehyoagucumi. <sup>7</sup> Dohpaguere ĩaro mariro ĩgu ñerire mohmenũgatuhajacumi. ĩgu ñeri iidiarire árĩpehrerire iimasibeami dohpa. ĩgũre árĩdorebigũ ĩgu wara pũhrũ árĩpehrerire ñerire iigu ĩgu ñeri mera masare weresãgu dehyoagucumi. <sup>8</sup> Eropiira pũhrũ mari Opũ Jesucristo ĩgu wereniguirĩ mera ĩgũre wejẽcãgucumi. Eropigu Jesupũ dujarigu ĩgu dehyoari mera ĩgũre wejẽ dedeocãgucumi ĩgũre. <sup>9</sup> ĩgu ñeri mera masare weresãgũpũ watĩ dorero mera arigu baja deyoro moaro dopa árĩrire ii gũyagucumi masare. <sup>10</sup> ĩgu eropa árĩpehrerire ii gũyacũ peamegue wamorãpũ ĩgũre peerãcoma. Erã diaye árĩrire gamebirã ãhrima. Erã eropa gamebiricũ Goãmũ erãre dederemorãre tausome. <sup>11</sup> Eropigu diaye árĩrire gamebirãre Goãmũ erãre gũyaripũre peecũ iigucumi. <sup>12</sup> Goãmũ árĩpehreri diaye árĩrire peediabirinirãre, ñerire iidianirãre erã ya dipuwaja moagucumi.

*Goãmũ mũapũre beyeñumi ĩgu taumorãre, arĩ gojañumi Pablo*

<sup>13</sup> Acawererã, mari Opũ mahirã, matague ta Goãmũ mũapũre dederebonirãre ĩgu taumorãre beyepũ muare. Mũa Espĩritu Santo itamuri mera ñeri mariro mũa árĩmorã sãre beyepũ. Mũa ĩgu yare peemorã árĩmorãre beyepũ. Eropirã ĩgu muare beyerare guñarã Goãmũre serẽrã “Õhaa,” arĩniguicãro gahmea gũare. <sup>14</sup> Eropigu iri õari buherire gũa buhera mera Goãmũ muare ĩgu yarã árĩcũ iimi mari Opũ Jesucristo ĩgu õari oparire mũa sã opaboro dopa.

<sup>15</sup> Eropirã õaro guñaturarã árĩque mũa. Eropirã gũa wereniguirĩ mera gũa gojabeorapũri mera iri buherire õaro guñaque mũa. Eropirã iri buherire tarinũgabiricãque. <sup>16</sup> Mari Opũ Jesucristo ĩgu basi Goãmũ mari Pagũ mera marire mahigu, umũri nũcu marire mucubiricũ iimi. Marire mahigu peamegue wabonirãre taugucumi marire. Eropirã Goãmũ ĩgu tauborore õaro masĩ mucubirĩa mari. <sup>17</sup> Eropigu Jesucristo mari Pagũ mera muare siporã turaniguicũ iiporo. Eropigu mũa ĩgu

yare duhubiricũ iiporo. Áripehreri ðari iirire ðari wereniguiri sãre mware iicũ iiporo.

### 3

*Gua ya árĩburire Goãmure serēbasaque, arĩ gojañumi Pablo*

<sup>1</sup> Acawererã, dohpague gua ya árĩburire Goãmure serēbasaque. Mari Opũ buheri cãhmotaro mariro bajarã masare buheburire serēbasaque. Eropirã ĩgu buherire mwa ðaro gamediro dopa ta gajirã bajarãpu iri buherire umupeori mera erã gameboro dopa serēbasaque mwa Goãmure. <sup>2</sup> Gajirã Jesure umupeobeama. Eropirã erã Jesure umupeobirã ñerã masa guare erã ñero iidiarire Goãmure serēbasaque guare ĩgu itamuboro dopa. <sup>3</sup> Mari Opũ ðagũ ĩgu werediro dopa ta iimurimi ĩgu. Eropigũ mware ĩgure umupeocũ iigucumi. Eropigũ mwa ñero iibiriburire ĩgu mware cãhmotagucumi. <sup>4</sup> ĩgu mware ĩgu eropa cãhmotarare masia gua. Eropirã mware gua dorediro dopa ta iiaa mwa. Eropirã irire iirãca daja muraro ta. Iri sãre masia gua. <sup>5</sup> Eropigũ mari Opũ Goãmũ ĩgu mware mahirire mware masicũ iiporo. Eropigũ Cristo ñero taririsubu ĩgu sĩporã turadiro dopa ta mwa sãre sĩporã turaniguicũ iiporo mari Opũ.

*Marire turaro mohmero gahmea, arĩ gojañumi Pablo*

<sup>6</sup> Jesucristo mari Opũ ĩgu dorero mera ðpa dorea mware: Mwa Jesu yarã mera majarã mohmediabirãre gua dorerire iibirãre wapicubiricãro gahmea. Eropa ĩacãque erãre. <sup>7</sup> Sohõ árĩrasubu mwa mera gua árĩrasubure gua turaro mohmecũ ĩabu mwa. Eropirã gua iidiro dopa ta mwa sãre mohmero gahmea. Mwa basi irire ðaro masia. <sup>8</sup> Eropirã mwa barire waja mariro ne babirabũ. Eropirã umuri nũcu, ñamiri sãre burigã mohmemurabũ gua mware barire sereri arĩrã. <sup>9</sup> Gua mware buhera waja mware wajayedoreboaya gua. Wajayedorebirã gua basi burigã mohmeabũ mwa guare ĩhacũburire. <sup>10</sup> Mwa mera árĩrasubu ðpa arĩ buheabũ mware: “Mohmebigũ babiricãporo,” arĩ buhemurabũ gua mware. <sup>11</sup> Yujurãyeri mwa mera majarã ne mohmebirañorã. Eropirã gajirãre sererã garibotariañorã erã. <sup>12</sup> Eropirã mohmediabirãre mari Opũ Jesucristo dorero mera ðpa arãa: “Erã yare ĩha erã basi mohmeporo erã baburire,” arãa yũhũ.

<sup>13</sup> Gua acawererã, mwapũ ðarire iiniguirã gariborebiricãque. <sup>14</sup> Eropirã ero majarã yujugũ ire gua gojabeo dorerare tarinugacũ ĩha masi ĩgure wapicubiricãque. ĩgu ñero iira mera ĩgu guhyasiuro pepiboro dopa ĩgure wapicubiricãque. <sup>15</sup> ĩgure wapicubiriquererã ĩgure ĩhaturibiricãro gahmea. ĩgu mwa acaweregũ Jesu yagũ ta àhrimi. Eropirã ĩgu tarinugagũre ðaro wereque ĩgure ĩgu dipaturi irire iibirimaja ðaro dopa.

*Pablo gojatuñumi*

<sup>16</sup> Mari Opũ marire ðaro árĩcũ iigu mera umuri nũcu ðaro árĩque mwa. Eropigũ “Mari Opũ mwa árĩpehrerã mera árĩporo,” arĩgu mware ðadorea.

<sup>17</sup> Dohpaguere yũ basi ta gojatugũ iiaa. Eropigũ mware ðadorea. Árĩpehreri pũrre yũ gojabeori pũrre ðpa ta arĩ gojatuhaa yũhũ. Eropa gojatura pũhrũ yũ basi iripũre arĩ gojagũ árĩcũ masirãca

мѡа. 18 Мари Ору Јесуcrito ĩгу mahiri mera бѣригѣ ѓadoreа мѡаре  
ѣрипехрерѣре. Еропа та ѣринигуицѣпоро. Iripѣта ѣhraа.

# 1 Timoteo

## *Pablo Timoteore gojabeopu*

<sup>1</sup> Yuhu Pablo mure Timoteore ire gojabeogu iiaa. Goamu marire peamegue wabonirare taudigu ahrimi. Jesucristo yare buhedoregu igu apidigu ahraa yuhu. Mari Pagu Jesu mera igu doreldiro dopa igu apidigu ahraa. Jesu ta marire itamumi. Eropira marire igu tauborore masira irire mucubiri cohrea mari. <sup>2</sup> Yuhu mure Jesucristo yare buhecú peegu Jesure umupeonagabu. Eropigu muhu diaye ta yu magu iro dopa arigu ta ahraa. Eropigu Goamu mari Pagu mera, mari Opu Jesucristo mera odadorea mure. Eropigu igu itamuri mera oaro arique muhu.

## *Pablo guya buherire buhedorebiripu*

<sup>3</sup> Sohó arirasubure Macedonia yebague wagu mure Efeso macague api tari wahgabú. Ero yujurayeri gaji buherire guya buhera arima. Iri buherire buhedorebiribure apibu yuhu mure. <sup>4</sup> Era gubará era gamero buhemaacama. Era acawererá iribojegue majará era arí bocarare eropa buheniguicama. Iri buheri mera gajirare dayasocú iima. Eropira Goamu igu dorerare gajirare iicú iibeama era eropa buhera. “Goamu yare itamugucumi,” arí umupeora igu dorerare iima. Eropigu era gamero buhedorebiribure apibu yuhu mure.

<sup>5</sup> Goamu opa gahmemi. Neri dipuwaja mariri mera, oari guñari mera, diaye Jesucristore umupeori mera, gajirare mari mahi umupeoburire gahmemi. Irire era iiboro dopa apibu mure. <sup>6</sup> Era yujurayeri i oari buheripure coatuha gaji buheripure gahmema daja. Eropira iri buheripure dayaso gorowerema. Iri era buheri era game dayasori duhpiburi aribeaa. <sup>7</sup> Era Moise dorerire masare buhera aridiaquerera ta era basi ne oaro masibeama. Eropira guhyadiaro mera buhequerera era buherire ne masibeama era.

<sup>8</sup> Moise dorerire diaye ta mari buhecú oari doreri ahraa. Irire mari oaro masia. <sup>9</sup> Iri dorerire buhera ire masiro gahmea: Iri doreri oaro iirare erare buheburi aribeaa. Nero iirapure erare buheburi ahraa. Opa ta iirare buheburi ahraa: Dorerire tarinugarare, Goamure tarinugarare, neri dihtare iirare, Goamure gamebirare, nero werenigui corerare, era pagu sumarare wejere, era pago sa nomere wejere, gajira masare wejere, <sup>10</sup> nome mera nero iirare, uma mera nero iira nomere, uma seyaro nero iirare, nome seyaro ariquerera nero iirare, masa porare yaja duare, guyaricurare, Moise dorerire erare buheburi ahraa ii. Eropiro gajira aripehrerare oari buherire tarinugarare buheburi ahraa Goamu igu doreri. <sup>11</sup> Goamu dagu igu oari buheri mera iri neri iirare coadoremí. Iri buheripure yare Goamu buhedoremí.

## *Goamu igu marire mojomoro iarire werepu Pablo*

<sup>12</sup> Eropu yu buhecú, Jesucristo mari Opu turarire igu ogu itamumi. “Pablo oaro buhegucumi yahare,” arí pepiñumi Jesu yare. Eropigu yare beyegugue ta igure itamubure apimi yare. Igu eropa

iicũ “Ōhaa,” arãa yũhũ ĩgũre. <sup>13</sup> Iribojegue yũ Jesucristore ñero wereniguiquerecũ ta, ĩgũ yarãre ñero iiquerecũ ta ĩgũ yũre beyemi. Eropigũ ĩgũre masinibigũ ĩgũ yarãre ñero iigu “Ñero iigu iica,” arĩ pepibirimuricarabũ. Yũ eropa masibiricũ ĩagũ ĩgũ mojomoro ĩami yũre. <sup>14</sup> Eropigũ Goãmũ mari Opũ yũre burigã mahigũ ðaro iimi yũre. Eropigũ Jesucristore umupeocũ iimi ĩgũ yũre. Eropigũ ĩgũre masa sãre mahicũ iimi yũre.

<sup>15</sup> Yũ gajirã tauro ñetariagũ árĩribũ. Ñerã mari árĩquerecũ ta Jesucristo mari ñerire cóãbu i yebaguere erami. Marire peamegue wabonirãre taubu erami. Iri diaye ta áhraa. ĩgũ eropa árĩgũ árĩcũ árĩpehrerã irire masiporo. <sup>16</sup> Ñetariagũ yũ árĩquerecũ ta ĩgũ yũre mojomoro ĩami. Eropa mojomoro ĩagũ Jesucristo guaro mariro, ĩgũ yũre ðaro iirare masicũ iigu iimi. Pũhrũ ĩgũre umupeomorã erã sã ĩgũ ðaro mojomoro ĩaburire erã masiboro dopa ðaro iimi yũre. ĩgũre eropa umupeorã árĩpehrerinũri umaroguere eropa ðaro árĩniguicãrãcoma. <sup>17</sup> Goãmũ árĩpehrerinũri masa tauro opũ áhrimi. ĩgũ ne sĩribeami. Mari mera ĩgũ árĩquerecũ ta ĩgũre ĩabeaa mari. Eropigũ ĩgũ dihta Goãmũ gohra áhrimi. Eropirã “Diaye ta ðagũ, turagũ áhrimi ĩgũ,” arĩrã ĩgũre. Umũri nucũ ĩgũre umupeorã. Eropa ta iirã.

<sup>18</sup> Timoteo yũ magũ iro dopa ta áhraa mũhũ. Eropigũ dohpaguere ire mũre dorea. Jesu yarã Goãmũ ya weremuhtarã erã mũre werediro dopa ta mũre dorea. Cristo yare ðaro wereniguique. Eropigũ ñero tariqueregu ta ĩgũre umupeo duhubiricãque mũhũ. <sup>19</sup> Jesure eropa umupeoniguicãque. Ñeri dipuwaja mariro árĩque. Eropigũ ðari dihtare iique. Yujurãyeri irire iibirã Jesu yare erã cohãma. Eropa cóãrã ĩgũre umupeo duhucãma. <sup>20</sup> Eropa ta iiaama Himeneo, Alejandro mera. Eropigũ “Watĩ ĩgũ gamero erãre iiporo,” arĩgũ eropa apicãbũ erãre Goãmũre erã ñero wereniginemobĩrboro dopa.

## 2

### *Goãmũre serēbasarire werepũ Pablo*

<sup>1</sup> Dohpaguere ðpa arĩ doremũhtaa mũare: Árĩpehrerã ya árĩburire Goãmũre serēbasaque. Eropa serērã “Ōhaa,” arĩque Goãmũre. <sup>2</sup> Oparã, gajirã masa tauro dorerã sãre, erã ðaro doreburire Goãmũre serēbasaque erãre mari ðaro árĩricũ árĩboro dopa. Eropirã gamequeãro mariro ñeri marirã Goãmũre umupeorã mari ðaro árĩboro dopa erãre serēbasaque. <sup>3-4</sup> Eropa ta gajirã ya árĩburi sãre mari Goãmũre serēbasacũ ðapũricãa. Irire mari iicũ ĩagũ Goãmũ marire taubupũ marire ðaro ĩhasũami. Árĩpehrerã masa peamegue wabonirãre ĩgũ taumorã dihta árĩcũ gahmemi Goãmũ. Eropigũ ðari buherire diaye majare erã masicũ gahmemi ĩgũ. Eropigũ gajirã ya árĩburire mari ĩgũre serēbasacũ mucubirimi Goãmũ. <sup>5</sup> Yujugũ ta áhrimi Goãmũ. Eropigũ Goãmũ mera mari ðaro árĩcũ amubasagũ yujugũ ta áhrimi. ĩgũ áhrimi Jesucristo. Jesucristo sã masũ ta áhrimi. <sup>6</sup> Eropigũ árĩpehrerã erã ñeri iira dipuwajare wajayebasadigũ árĩmi ĩgũ crusague sĩridigũ. Eropigũ Goãmũ ĩgũ queorasubu masare ire masicũ iimi. <sup>7</sup> Masa masicũ iibure ĩgũ yare werebure irire Goãmũ yũre apimi. Eropigũ judio masa árĩbirãre Jesure umupeoburire ðari

buherire buhebure beyemi yare. Diaye ta mure weregu iiaa yuhu. Guyabeaa.

<sup>8</sup> Árīpehrero majarāpū Goāmū yare ōaro iirā Goāmure erā serēcū gahmea. Eropa Goāmure serērā erā guaro mariro, game dūyaso mariro erā árīcū gahmea. <sup>9-10</sup> Nomepūre Jesu yarā erā ōaro árīcūrire iicū gahmea. Eropirā queoro erā ejatuharo suhri sañarā árīporo. Eropirā gajiropa bejari poaricū “Yuhū ōago āhraa,” arī ĩhmubiricāporo. Eropirā ōari dari oro dari waja pagari buyarire, ōari suhri waja pagari suhri sañarire guñabiricāporo. Eropirā ōaro erā iira mera, erā ōarā nome Jesu yarā nome erā árīrire ii ĩhmuporo. <sup>11</sup> Ejarimariro umupeori mera peerā ōari buherire peeporo erā nome. <sup>12-14</sup> Eropirā nome mūa gamenererogue ũmare buhebiricāporo. Eropirā ũmare dorebiricāporo. Erā nomepū ejarimarirā nome árīporo. Goāmū Adánre ĩhacūnugumāhtañumi. Īgu pūhrū Evare ĩhacūnuguñumi. Eropigū watī Īgu gūyacū peedigū Adán árībirīñumi. Īgu gūyacū peedigopū Eva árīñumo. Eropa Īgu gūyacū peego Goāmure tarinūgago wañumo igo. Eropirā nomepū ũmare dorebiricāporo. <sup>15</sup> Nomeo árīmāhtadigo igo tarinūgaquerecū ta nome erā porāre ōaro opacū ĩagu erāre Goāmū peamegue wabonirāre taugūcumi. Eropirā nomepū Goāmure erā umupeoniguicācū, Goāmū erāre itamugūcumi. Eropigū masare Goāmū sāre erā mahiniguicū pee masirā nome erā árīniguicū Goāmū itamugūcumi erāre.

### 3

#### *Jesu yarā tauro oparā erā iiburire werepū Pablo*

<sup>1</sup> Jesu yarā doregu árīdiagū ōarire iidiagu āhrimi ĩgu. Iri diaye ta āhraa. Eropigū Jesu yarā doregure apigū ōpa árīgūpūre beyeque. <sup>2</sup> Dipuwaja marigūre beyeque. Eropirā gajirā ĩgure weresā masiya mara. Eropigū yujogore ta marapocūgu árīgūre beyeque. Eropigū ōaro pee masigūre, guhyadiagure, masare ōaro mera ĩgu wihire ñajaridoregure, gajirāre ōaro buhemehregure beyeque mūa. <sup>3</sup> Eropa beyegu ne merebigure, gamequeābigure, masare ōaro iigure, game dūyasobigure, niyurure gamebigure beyeque. <sup>4</sup> Īgu porāre ĩgu marapo sāre ĩgure umupeori mera erā yūhrirā árīcū iigure beyeque Jesu yarāre dorebure. <sup>5</sup> Īgu porāre ĩgu marapo sāre ōaro yūhricū iimasibigu árīgu Goāmū yarā sāre ōaro yūhricū iimasibiribocumi. <sup>6</sup> Jesu yarā opū árībure beyegu ne Jesu yagu ñajagure beyebita. Ne ñajagure beyecū ĩgu “Jesu yarāre tauro āhraa yuhū,” arī pepibocumi. Īgu eropa arī pepicū Goāmū ĩgure dipuwaja moadorebocumi watīre ĩgu iidiro dopa ta. Watī Goāmū tauro árīdiari waja Goāmū ĩgure dipuwaja moapū. Eropigū ne Jesure umupeogu árīgūre beyebita. <sup>7</sup> Jesu yarā doregure beyegu Jesu yarā árībirā “Ōagu āhrimi,” erā arīgu dihtare beyeque erā ĩgure werewābiriborore. Ōaro iigu ĩgu árībiricū ĩarā gajirā ĩgure werewābocoma. Eropigū ĩgu watī gamero dopa ta iigu árībocumi.

#### *Jesu yarāre itamurā díaconoare erā iiburire werepū Pablo*

<sup>8</sup> Eropirā Jesu yarāre itamurāpūre beyerā ōarā árīrā sāre beyeque. Erā guhyadiaro árīrāre, ōaro diaye ta wereniguirāre, merebirāre,

niyerure gamebiräre beyeque mũhũ. <sup>9</sup> Eropa ta Jesucristore ðaro umupeorã “Goãmũ yare ðaro diaye ta ãhraa,” arĩrã árĩrãre beyeque. <sup>10</sup> Eropirã Jesu yarãre itamurã árĩdiarãre erã iirare ãamuhtaque mũa. Mũa eropa ãara pũhrũ erãpũ dipuwaja marirã árĩrã Jesu yarãre itamurã ñajaporo erã. <sup>11</sup> Eropirã erã marasã nomepũ òpa árĩporo: Pee masirã nome, ñeri quere iibirã nome, gũhyadiarã nome árĩporo erã nome sã. Eropirã árĩpehreri ðarire iiniguirã nome árĩporo erã nome. <sup>12</sup> Eropirã Jesu yarãre itamurãre beyerã yujurãyeri nome ta marapocurã árĩrãre beyeque. Erã porãre gajirã erã ya wihi majarã sãre ðaro ãhadiburã árĩrãre beyeque. <sup>13</sup> Mũa eropa beyenirã Jesu yarãre ðaro erã itamucũ gajirã erãre ðaro ãhasuarãcoma. Eropirã ðari buherire, Jesucristore erã umupeoburi sãre güiro mariro buherãcoma erã.

### *Goãmũ ya buherire werepũ Pablo*

<sup>14-15</sup> Dohpaguere mũ pohrogue wadiagu iiraa. Eropa wadiaqueregu dohpaguere wanibigu ipũ mera mũre were gojabeogu iiaa. Jesu yarã gamenererã watope mũa dohpa iiborore mũre were gojabeogu iiaa, “Dohparagãre wabiriboca,” arĩgu. Jesu yarã Goãmũ ojocarigu yarã ãhrima. Ĩgu yarã diaye árĩri buherire Goãmũ ya buherire ðaro opama. Eropa oparã irire buheniguima. <sup>16</sup> I diaye ãhraa. Marire Goãmũ ĩgu buherã mari ðaro iiburi buheri ãhraa. Goãmũ iri buherire marire masicũ iimi. Iribojegue mari masibirira mũra ðataritari buheri ãhraa. I buheri òpa ãhraa:

Ĩgu Cristo mari dupũ iro dopa ta dupũcũgu masa dehyoadigu árĩmi. Őagu ñeri marigu ĩgu árĩcũ ĩhmudi árĩmi Espĩritu Santopũ. Anyua sã ĩgũre ãanirã árĩma. Eropirã gũa ĩgu buhedore apinirã gaji yeba majarãre ĩgu yare buhebũ. Eropirã i yebare masa bajarã ĩgũre umupeoama. Pũhrũ umarogue Goãmũ aĩadi árĩmi ĩgũre. Iri ta ãhraa ðari buheri.

## 4

### *Őari buherire cóãrãcoma arĩ werepũ Pablo Timoteore*

<sup>1</sup> Espĩritu Santo ire ðaro weremi: Pehrerinũ coregã yujurãyeri masa Jesu ya buherire cóãrãcoma. Eropirã gũyari buheripũre watĩ yare buherãpũre peenũrũrãcoma erã. <sup>2</sup> Iri buherire buherã gũyaniguirã wererãcoma masare. Erã gũyaniguirãpũ “Gũa tamerare dipuwaja mara,” arĩ pepirã árĩrãcoma. Erã ñero iirapũre ne guñasome. <sup>3</sup> Őpa arĩ buherãcoma erã: “Marapocubiricãque. I barire babiricãque,” arĩ buherãcoma erã. Erã eropa badorebiquerercũ ta Goãmũ barire ãhacũnugudi árĩmi mari baburire apigu. Mari Cristore umupeorã árĩcũ ðari buherire mari masirã árĩcũ, mari ya árĩburire ðarire iri barire apipũ ĩgu. Iri barire oparã ĩgũre “Őhaa,” mari arĩcũ gahmemi ĩgu. <sup>4</sup> Árĩpehreri Goãmũ ĩgu ãhacũnugura ðari ãhraa. Eropirã ĩgu ãhacũnugurare barire aĩrã. Goãmũre “Őhaa,” arĩrã, “Irire basome,” arĩbiricãro gahmea. Iri barire basũaro gahmea marire. Eropirã “Irire babiricãque,” gajirã erã arĩcũ peebiricãque erãre. <sup>5</sup> Ĩgu ãhacũnugura iri ðari árĩcũ weretuhapũ Goãmũ. Eropirã ĩgũre “Őhaa,” mari arĩra pũhrũ “Iri bari ðari bari ãhraa,” arĩ baro gahmea marire.



*Jesu pohro majagu ðagure werepu Pablo Timoteore*

<sup>6</sup> I yu wererare diaye majare Jesu yaräre buhegu Jesucristo pohro majagu ðagu ähraa muhu. Eropa buhegu ðari buherire peenurugu arıguca. Öaro mu peerare peenuru masipehogu arıguca muhu. <sup>7</sup> Eropıgu eropa erä arı bocarare, Goämu ya maja arıbirirare peebiricäque. Eropıgu Goämu gameri dihtare iiniguicägu arıque muhu. <sup>8</sup> Mu mohmepocü ðañaria. Mu mohmepodiro tauro Goämu gamerire mu iipocü ðataria müre. Goämu gamerire iipogu dohpaguere ðaro ähraa muhu. Eropıgu mu sirira puhrugue säre masa muriagu ðaro arıguca muhu. Eropıgu Goämu gamerire iiniguicäque. <sup>9</sup> Iri diaye ta ähraa. Arıpehrerä irire yu arırare masirä, “Diaye ta ähraa,” arıro gahmea eräre. <sup>10</sup> Eropıgu arıpehrerä yu arırare masirä “Diaye ta ähraa,” erä arıburire Goämu gahmemi. Eropirä erä eropa iiburire mari turaro mohmea. Eropirä ñero taria mari gajirä marire ñero erä iicü. Goämu ojocarıgu arıpehreräre peamegue waboniräre taugu ährimi. İgure umupeorä tamerare İgu taumi. Goämu marire ðaro iiburire masirä İgure mucubirirä iiaa. Eropa mucubirirä Goämu gamerıpure masa iiburire burıgä buhe mohmea mari.

<sup>11</sup> Iri arıpehreri yu arırare doreque Jesu yaräre. Eropıgu irire buheque muhu. <sup>12</sup> Mamu mu arıcü İarä gajirä Jesu yarä müre peediabiribocoma. Erä müre peeboro dopa öpa ii İhmuque eräre: Masare mahıque. Eropıgu Jesure umupeoturanıguicäque. Eropa arıgu dipuwaja marıgu arıque. Mamu arıqueregu ta mu irire iicü İarä müre peeräcoma erä. Eropirä mu werenıguirire peerä, mu iirare İarä müre İhacıräcoma. <sup>13</sup> Eropıgu mu pohrogue yu ejaboro core öpa ii ðaro mohmeyuque. Jesu yarä gamenereräre Goämu yare gojarapüre buhe İhmuque eräre. Eropıgu eräre irire buhetuha werenemoque daja. Eropıgu eräre ðaro masinemocü iique. <sup>14</sup> Ero core Jesu yarä oparä Goämu dorecü eräpu mu weca erä mojotorire duhpeoma. Erä müre eropa duhpeocü Goämu İgu turarire odi arımi müre. Eropıgu Goämu ya arıburire mu mohmemasıburire apıdıgu arımi müre Goämu. İgu müre eropa mohmemasıburire apırare cädıjıbita.

<sup>15</sup> Yu eropa wererare guña eropa iinıguicäque muhu. Mu eropiira puhru ðarire mu iinemocü arıpehrerä İaräcoma. <sup>16</sup> Mıpu ðaro iique. Eropıgu ðaro buheque muhu gajiropa buheri arıgu. Mıhu eropiıgu İgu taudıgu arıgu Goämu mera arıııguicäguca. Eropirä müre peenirä sä İgu taunirä arıra Goämu pohro arıräcoma.

## 5

*“Jesu yaräre öpa iique muhu,” arıpu Pablo Timoteore*

<sup>1</sup> Ne buğure turıbiricäque. Mu pagure mu ðaro iıdıro dopa ta, buğü säre ðaro mera wereque. Eropıgu mu pagu poräre mu ðaro iıdıro dopa ta, mamarä säre ðaro umupeori mera eräre wereque. <sup>2</sup> Eropıgu mu pagore mu ðaro iıdıro dopa ta mürä nome säre ðaro umupeori mera wereque. Eropıgu mu pagu porä nomere mu ðaro iıdıro dopa ta, nόμε säre ñero uarıbejaro marıro ðaro umupeori mera wereque eräre.

<sup>3</sup> Eropıgu wapeweyarä nomere diaye ta mojomorocarä nomere umupeori mera itamuque erä nome säre. <sup>4</sup> Wapeweyo poräcugö

igo áricũ pãramerãcũgo igo áricũ sãre, erãpũ igore itamuporo erã masura waja. Eropa itamurã Goãmũ masare erã acawererãre ïgũ itamudorediro dopa ta iirã iima erã. Erã eropiicũ ïagũ ðaro Goãmũ mucubirimi. <sup>5</sup> Mojomorocũgo wapeweyo acawererã noogo áriigo, Goãmũ igore itamuburire cohremo ïgoa. Eropiigo ñamiri nũcũ, Ʃmũri nũcũ igo Goãmũre eropa serẽniguicãmo. <sup>6</sup> Gajigopũ wapeweyo áriigo eropa iimaacãgo áriigo ojocarigo áriiquerego igo sïporã dederebo sïridigo iro dopa ta iimo. <sup>7</sup> Eropiigu i áripehreri yũ werera wapeweyo itamuburire Jesu yarãre iidoreque mũhũ. Õpa wereque erãre ðari dihtare erã iiburire gajirã erãre werewũabiriburire. <sup>8</sup> Eropiigu yujugũ ïgu acawererãre ïhadibubigu, ïgu porã erã pago sãre ðaro ïhadibubigu “Jesu yagũ ãhraa,” arĩmasibeami. Goãmũ dorediro dopa iibeami. Eropiigu Goãmũ ya buherire yũhribigu ãhrimi. Jesure gamebirã tauro ñetariagu ãhrimi ïgũpũ.

<sup>9</sup> Wapeweyarã nome mũa itamumorã áricũ erã waïre gojaturãca. Mũa eropa gojaturã ðpa áriãre erã waïre gojatuque. Sesenta bojori ejabigo igo waïre gojatubiricãque. Eropirã wapeweyo yujugũ ta marapũcũdigore gojatuque. <sup>10</sup> “Ïgo ðarire iigo ãhrimo,” masa erã arĩgore gojatuque. Eropirã igo porãre ðaro masugo áriidigore gojatuque. Eropirã igo ya wihire gajirãre ðaro mera ñajaridoregore gojatuque. Eropirã pohro majago iro dopa Jesu yarãre itamugore ñero tarirãre itamugore, áripehrerãre mojomoro ïagore, ðari dihtare iidiagore gojatuque. Eropa áriãre ïagũ iripũ ta erã waïre gojatuque mũa erã mũa itamumorã áriborore.

<sup>11</sup> Wapeweyarã nóme, nómeñari erã áricũ erã waïre gojatubiricãque erã Jesu yarãre itamumorãre. Pũhrũ erã waïre mũa gojatura pũhrũ erã gamero iidiarã Cristo yare duhu, dipaturi mojoto diribocoma. <sup>12</sup> Eropirã erã mojoto dirirã Cristore “Mũ yarãre itamugora,” erã arĩdiore iibiribocoma. Erã eropa iibirira dipuwaja dipuwajacũrãcoma. <sup>13</sup> Erã nómeñari eropa itamurã áriãre tericũrã nome wahama. Eropirã wirigue ñajacurirã ñeri querere werenĩguĩ curima. Erã weredorebirirare werema erã nome. <sup>14</sup> Eropirã erã Jesu yarãre itamumorã ñajabiricãporo. Eropiigu erã ðpa iicũ gahmea yũhũ: Wapeweyarã nome, nómeñari áriãre mojoto diriporo daja. Eropirã erã porãcũporo. Eropirã erã ya wihi majare ðaro ïhadibuporo. Erã nome wapeweyarã nome eropa ta iicũ marire Jesu yarãre ïhaturirã “Ñerire iirã iima,” arĩmasibeama marire. <sup>15</sup> Dohpague tamerare yujurãyeri nome wapeweyarã nome Cristo yare duhu watĩ gameripũre iinũgatuhamã. Eropiigu ðpa werea mũre.

<sup>16</sup> Jesu yarã erã acawerego wapeweyo igo áricũ erã igo acawererãpũ igore itamuporo. Gajirã Jesu yarãpũre igore itamudorebiricãporo. Eropirã erã Jesu yarã igore acawererã opagore itamubirã, gajirã nome wapeweyarã nomepũre itamumasima.

<sup>17</sup> Jesu yarã oparãre erã mohmerire erã ðaro iicũ ïarã umupeoque erãre. Eropirã ðaro wajayeque. Yujurãyeri mũa mera majarã Goãmũ yare wererã muare buherã sã ãhrima. Erã tamerare tauro umupeo wajayeque. <sup>18</sup> Goãmũ yare erã gojarapũgore mohmegure mũa wajayeborore ðpa werea: “Wecũ trigo yerire cãhratiãcũ ïgu disirore cãhmotabiricãque. ïgu gamero baporo,” arĩ gojañorã. Eropiigo gajipũ ðpa arãa: “Mohmegure ïgu mohmeri wajare oro gahmea,” arãa

Goãmũ yare erã gojarapũgue. Goãmũ ya gojarapũ eropa arĩcũ peerã oparãre òaro umupeoque mũa. Eropirã òaro wajayeque erãre.

<sup>19</sup> Jesu yare mera majagu opure yujugu ta ìgure weresãcũ peebiricãque. “Opũ ìgũ òpa ñeri iirare ìabũ,” perã o urredã arĩ weresãra pũhrũ peeque. <sup>20</sup> Eropa peerã ìgũ ñero iira arĩcũ ìatuhaja Jesu yarã gamenererogue turique ìgure, gajirã ìgure ìha masi gũiporo arĩrã.

<sup>21</sup> Eropigũ Goãmũ Jesucristo ìgũ beyerã anyua erã ìhabeoro ire dorea mũre. Dohpague yũ mũre dorerare iipehoque. Eropa iigu gajigũre gajiropa, gajigũ sãre gajiropa iibiricãque. Yujuropa ta iique arĩpehrerãre Jesu yarãre. <sup>22</sup> Gajirãre Goãmũ mohmerire mũ beyemorãre erã weca mũ mojotorire duhpeoboro core òaro ìaque mũhũ ìha masiri mera yojaro mariro. Ñerire iirã arĩbocoma. Eropigũ mũ erãre beyera pũhrũ erã ñerire iicũ erã ñeri iira dipuwaja opagũca mũ sã. Eropigũ erãre beyeboro core erã arĩricũre òaro masique. Eropigũ arĩpehreri ñeri mariro arĩque mũhũ.

<sup>23</sup> Bajasuburi paru pũrisũgũ àhraa mũhũ. Eropigũ dohpaguere deco dihtare ihrigu arĩgũ, merogã vino sãre ihrique mũhũ ococũgũ.

<sup>24</sup> Yujurãyeri erã ñerire iicũ mari ìhaa. Eropirã Goãmũ erãre dipuwaja moaborore masia mari. Gajirãpũre erã ñeri iirare mari ìha masibeaa. Pũhrũ erã ñeri iirare masirãca Goãmũ dipuwaja moarinũ arĩcũ. <sup>25</sup> Eropa ta yujurãyeri òarire erã iirare masia mari. Gajirã erã òarire erã iirare dohpaguere masibiriquererã ta pũhrũ masirãca mari. Mari ìabirirare arĩpehrerã erã iirare pũhrũ iri dehyoacũ ìarãca.

## 6

<sup>1</sup> Pohro majarã Jesu yarãpũ erã oparãre òaro umupeoporo. Erã eropa umupeocũ ìarã gajirã Goãmũre mari arĩ buheri sãre ñero werewũamasibeama. <sup>2</sup> Erã oparã Jesu yarã arĩcũ ìarã erã pohro majarãpũ gaa oparã sã Jesu yarã ta àhrima. Eropirã “Erãre umupeobiricũ òaroca,” arĩbocoma. Eropa iibiricãro gahmea. Erã oparã Jesu yarã arĩrã erã mahirã yujugu porã iro dopa àhrima. Eropirã erã tamerare turaro itamuporo.

*Goãmũre umupeori sãre, òaro arĩri sãre werepũ Pablo*

<sup>3</sup> I yũ wererare buheque. Eropigũ ire doreque. Gajiropa arĩrire gayarire buherã mari Opũ Jesucristo ya buherire umupeobeamã. Erã Goãmũre umupeori buherire gamebirã òpa iirã àhrima. <sup>4</sup> “Masipehogũ àhraa,” arĩquererã ta diaye majare ne masibeama. Eropirã pee masibirã iro dopa ta turaro game dũyasodiamã erã. Eropirã Goãmũ yare arĩmaacãa dũyatorã àhrima. Eropa dũyatorã, game ìhaturirã wahama. Eropirã gajirãre ñero quere moamasibiriquererã masare ñero arĩ pepima erã. <sup>5</sup> Eropirã erã ñeri dihtare pepiniguirã, diaye arĩrire ne masibirã eropa dũyasoniguicãma. Eropirã “Goãmũ yare buherã niyerure wajatarãca,” arĩ pepirima. Erã eropa arĩrãre wapicũbiricãro gahmea. <sup>6</sup> Mari ya mari opari mera mucubirã Goãmũre umupeorã diaye ta wajatarã ta iiaa. <sup>7</sup> I yebaguere masa dehyoarã ne gajinore aĩgãribiribũ mari. Eropirã mari sãrirã warã ne gajinore aĩgãmasibeaa mari daja. Eropirã mũa opari mera dihta mucubirique. <sup>8</sup> Eropirã mari barire, mari suhri sãre oparã, gajire gamenemobiricãrã. Iri nũcũ mera ta mucubiricãrã mari. <sup>9</sup> Niyerure gamerã doberi wũaro oparã arĩdiarã watĩ ñerire ìgũ

iidorerire árīpehreri ñerire iirā árībocoma. Eropirā erā bajasuburi pee masibirā iro dopa ta gajinore gametarirā, ñeri ñaribejari duhubirā, erā basi ta ñero tarima. Eropa dedererā wacārā iima.<sup>10</sup> Niyerure gametarirā árīpehreri ñerire iinugama masa. Yujurāyeri niyerure gametarirā, Jesure umupeo duhura puhru bajasuburi erā ñero iira waja turaro bujowerema erā. Eropirā mari opariñepē ta mucubiro gahmea marire.

*Goāmũ ya árīburire iiboro dopa ñerire tarinugaque, arī gojañumi Pablo*

<sup>11</sup> Mũ tamera Goāmũ yagu ta āhraa. Eropigu i ñerire iibiricāro gahmea. Eropigu ñaripure gameque. Goāmũ yare iique. Eropa iigu Jesure “Diaye iigu āhrimi,” arī umupeoque. Eropigu gajirāre mahique. Ñero tariqueregu ta bocatiuque. Nijiyajagu árīque masa mera. Eropigu gajirāre tarinugadiagu árībiricāque.<sup>12</sup> Igu mera árīpehrerinari mũ ñaro árīniguicāburire Goāmũ beyemi mũre. Eropigu Jesucristore mũ umupeore bajarā masare ñaro werebũ mahũ. Eropigu ñero tariqueregu ta igure umupeo igu yare duhubita ñumarogue igu mera eropa mũ árīniguicāboro dopa.<sup>13</sup> Goāmũ árīpehrerāre árīpehrerire árīcũ iigu āhrimi. Jesucristopũ Poncio Pilatore Goāmũ yare ñaro werepũ. Eropigu Goāmũ Jesucristo sã erā ihabeoro ire mũre iidoregura:<sup>14</sup> Mũre Goāmũ igu dorerare ipehocāque. Jesucristo igu dujariboro core ñeri mariro, dipuwaja mariro igu dorero dopa ta iiniguicāque.<sup>15</sup> Igu queoranu árīcũ Goāmũ Cristore dujaricũ iigucumi. Goāmũpũ ñagu igu dihta masare doregu āhrimi. Eropigu árīpehrerā gajirā oparā erā tauro opu árīgu āhrimi.<sup>16</sup> Eropigu igu dihta ne sīribigu āhrimi. Igu gosesiriri mera árīgu āhrimi. Eropirā masa igu gosesirogue ejamasibeam. Eropigu masa erā ne ĩabigu āhrimi. Eropirā dohpague sãre igure ĩabeama. Igu eropa árīgure umupeorā. Eropirā árīpehrerinari “Turagu āhrimi igu,” arīrā igure. Eropa ta iirā.

<sup>17</sup> Eropigu i yeba majarāre doberi oparāre ñpa arī doreque mahũ: “Gajirāre tarinugaa yuhũ,” ne arī pepibiricāporo. Erā doberi erā opari pehrea waroca. Eropirā “Yuhũ wũaro opari mera ñaro árīgũca,” arī pepibiricāporo. “Goāmũ yapũ mera ñaro árīgũca,” arī pepiporo. Árīpehreri diaye ta mari gameripure ogũ āhrimi igu Goāmũ. Igupure umupeoturaporo erā doberi oparā.<sup>18</sup> Eropirā erā ñaripure iiporo ñarire erā iirā árīboro dopa. Eropirā erā oparire mojomorocũrāre orā árīporo.<sup>19</sup> Erā eropiicũ ñmũsigue Goāmũ pohrogue erā ya árīroca. Erogue árīcũ iri ne pehresome. Eropirā erogue ñaro árīniguicārācoma erā.

*Pablo Timoteore doretupũ*

<sup>20</sup> Mahgu, mũre Goāmũ igu apirare igu buhedorerare duhubita. Yujurāyeri masa Goāmũre gamebirā iro dopa ta guyarire, pee masibirā ya buherire wereniguima. Eropa wereniguirā “Ñaro masirā buheri āhraa,” arīrima erā. Eropa erā wereniguirire peenũrũbiricāque.<sup>21</sup> Gajirā yujurāyeri erā wereniguirire peenũrũrā Cristo ya buheripure cócāma.

Goāmũ igu mahiri mera mũre turaro ñadorea. Eropa ta árīniguicāporo. Iripēta āhraa.

## 2 Timoteo

*Pablo Timoteore dipaturi gojabeopu*

<sup>1-2</sup> Mũhu Timoteo yu magu iro dopa ta yu mahigu āhraa. Yũhu Pablo mũre ire gojabeoa. “Árĩpehrerã Jesucristore umupeorã umũsigue ðaro árĩniguicãrãcoma,” arĩ apimi marire Goãmũ. Īgu eropa arĩ apirare werebure yũre beye apimi Jesucristo Goãmũ ĩgu gamero dopa ta. Eropigu Goãmũ mari Pagu Jesucristo mari Opu mera mũre ðadorea. Eropigu ĩgu itamuri mera ðaro árĩque mũhu.

*Masare Cristo yare erã wererare werepu Pablo*

<sup>3</sup> Goãmũ mera wereniguigu mũ ya árĩburire serēniguicãa umũri nũcu. Eropa serēgu Goãmũre “Ōhaa,” arãa yũhu. Iribojegue majarã yu acawererã ñeri dipuwaja mariro ĩgu Goãmũre ta umupeoñuma. Erã umupeodiro dopa ta dohpaguere yu sã ĩgu Goãmũre ta umupeoa. Īgu Goãmũ gohra ta āhrimi yu mũre serēbasagu. <sup>4</sup> Sohõ árĩrasubure yu wacũ mũ orenũrusiarare guñagu mũre turaro ĩadiaca daja mũ mera ðaro mucubiridiagu. <sup>5</sup> Eropigu Jesure diaye ta mũ umupeorire guña yũhu. Mũ ñeco bũro Loida, mũ pago Eunice sã Jesure umupeomũtama mũ core. Eropigu dohpaguere ĩgũre mũ umupeocã ðaro masia yũhu.

<sup>6</sup> Eropigu ire mũre guñacã iidiaa. Mũ dipuru weca yu duhpeocã Goãmũ ĩgu ya turarire omi mũre. Īgu ya árĩburire mũ mohmema-siburire mũre omi. Iri mohmemasiburi mera mohmeque mũhu. <sup>7</sup> Goãmũ marire ĩgu Espĩritu Santore omi. Mari mera árĩgu masare marire guicũ iibeami Espĩritu Santo. Eropigu turarã, masare mahirã, pee masirã mari árĩcũ iimi ĩgu. <sup>8</sup> Eropigu mari Opu ya árĩburire gajirãre weregu guhyasĩribita mũhu. Yũhu ĩgu yare iicũ ĩha gajirã gamebirã yũre peresugue doboma. Peresu yu árĩcũ sãre ĩagu yũre guhyasĩrisãbircãque. Mũhu sĩporãguere ñero bujawerebircãque. Ōari buherire mũ buheri dipuwaja mũ sã eropa wagu “Ōaroca,” arĩ pepique mũ sã. Mũ eropa ñero taricũ ĩagu Goãmũ mũre itamugucumi. <sup>9</sup> Eropigu Goãmũpu marire peamegue wabonirãre taumi. Eropigu ðarã ĩgu yarã árĩmorãre beyepu ĩgu. “Ōarã āhrima erã. Eropigu erãre beyegura,” arĩbiripu marire beyegu. Īgu marire mahigu ta negohraguere marire beyepu ĩgu gamero dopa ta ĩgu. “Eropigu Jesucristore erãre taubure obeogura,” arĩ beyepu marire. <sup>10</sup> Eropigu dohpaguere Jesucristore marire taubure obeodigu árĩmi marire diaye ta ĩgu mahirire ĩhmuqu. Eropigu Jesucristo marire taugu marire ĩgu yarãre dederebircũ iimi. Eropa ĩgu “Yũre umupeorã Goãmũ mera ðaro árĩniguicãrãcoma,” arĩgu ðari buherire marire weregu aripu ĩgu.

<sup>11</sup> Eropigu i ðari buherire werebure ĩgu apimi yũre. <sup>12</sup> Eropa ĩgu yare buhegu árĩgu dohpaguere ñero taria yũhu. Eropa ñero tariqueregu ta sĩporã mucubirigu āhraa. Yu guñaturagure Jesure masia yũhu. Turagu āhrimi ĩgu. Eropigu ĩgu yare buhedore apigu ðaro itamugucumi. Eropigu ĩgu yũre apirare yũre buhe ojogorocacũ

ĩhadibugũcumi yũre. “Yũre itamugũcumi,” arĩ irire ðaro masigu sĩporã mucubirigu ãhraa.

<sup>13</sup> Mũre yũ wererare ipehocãque. Jesucristo mũre ĩgũre ðaro umupeocũ iimi. Eropigu ĩgũre gajirã sãre ðaro mahicũ iimi mũre. Eropigu “Diaye ãhraa,” arĩ irire guñaniguicãque mũhũ. <sup>14</sup> Eropigu Espĩritu Santo mari mera arĩgu ĩgu itamuri mera ðari buherire ðaro buheque. Queoro buheque gajiropa arĩro mariro.

<sup>15</sup> Yũ peresugue arĩcũ ĩarã yũre cõãgãpehrea wama. Arĩpehlerã Asia yeba majarã Jesu yarã yũre itamudiabirã cõãgãpehrea wama. Erã mera majarã perã Figelo, Hermõgene eropa ta iima erã sã. Erã eropa cõãgãrare masituhaca mũhũ. <sup>16-17</sup> Erã eropa cõãquerẽcũ ta Onesĩforopũ bajasuburi yũre itamugu ðaro siñajacũ iimi. Eropigu ĩgu yũ peresu arĩcũ ĩgu yũre guhyasĩrisãbeamĩ. Eropigu Romague eragu yũre amaniguicãdi arĩmi. Eropa amaniguigu yũre bocami. Efesogue sãre ĩgu marire itamurare ðaro masia mũhũ. ĩgu eropiira waja ĩgu porãre, erã pago sãre mojomoro ĩagũcumi mari Opũ Jesucristo. Goãmũ eropa iiboro dopa ĩgũre serẽbasaa. <sup>18</sup> Eropigu i yebague Jesu mari Opũ dujaririnũ arigu ĩgũre mojomoro ĩagũcumi. ĩgũre eropa iiboro dopa ta serẽbasaa Goãmũre.

## 2

### *Ñero tariqueregu ta Jesu yagũre bocatĩuro gahmea*

<sup>1</sup> Mũpũ yũ magũ iro dopa ta Jesucristo ĩgu itamuri mera turagu arĩque. <sup>2</sup> Eropigu bajarã masare yũ buherare mũ peerare gajirã sãre wereturiaque mũhũ. Erã mũ buherã Goãmũ gamerire iiniguicãrã arĩporo. Eropirã gajirãre buheturiarã arĩporo erã sã.

<sup>3</sup> Surara ñero tarigu ĩgu yujuro bojero dopa ta Jesu yagu arĩgu ñero tariqueregu yujuro bojeque. Eropa iigu gajirã Jesu yarã iiro dopa iigu iiaa mũhũ. <sup>4</sup> Surara ĩgu opũ ĩgu doreripũre iimi. Eropigu ĩgu surara arĩbirã erã iiripũre iibeami ĩgu. Mũ sã eropa ta mari Opũ ĩgu dorera dihtare iique. <sup>5</sup> Omabiragu erã dorediro dopa queoro iibigu ĩgu omatariara waja wajatabeamĩ. Eropa ta mũ sã Goãmũ dorediro dopa ta iibigu Goãmũ mera wajatasome. <sup>6</sup> Eropigu pohere ðaro mohmedigupũ ĩgu mohmera waja iri pohe majare aĩmũhtami. Eropa ta mũ sã Goãmũ yare ðaro mohmera waja Goãmũ oburire aĩmũhtagũca. <sup>7</sup> Irire ðaro masicũ iigũcumi Jesu mari Opũ mũre. Eropigu dohpaguere yũ mũre arĩdirore ðaro guñaque.

<sup>8</sup> Jesucristore guñaque. ĩgu opũ Davi mũrũ pãrami ĩgu arĩpũ. Eropigu sĩridigu masa mũriapũ ĩgu. ĩgu eropa sĩri masa mũriara marire tauburi buheri ta ãhraa. I ðari buherire buhegu iiaa. <sup>9</sup> Iri buherire buhegu ñero taria yũhũ. Eropirã irire yũ buhecũ ĩha gajirã gamebirã ñegũ iro dopa ta yũre dipuwaja moa yũre peresugue doboama. Masa yũre cãhmotaquererã Goãmũ ya ðari buherire cãhmota masiya mara. <sup>10</sup> Eropigu Goãmũ ĩgu beyenirãre buhegu bajasuburi ñero taria yũhũ erã Jesucristo yarã erã arĩburire. ĩgu yarã arĩborore erã peamegue wabonirãpũ tauborore ñero tarigu yujuro bojea. Eropigu erã Goãmũ mera ðaro arĩniguicãborore ñero taria ĩgu yare buhegu.

<sup>11</sup> I diaye ta ãhraa:

Cristo ya árĩburire mari iira dipuwaja gajirã marire wejẽquerecũ ĩgu mera umũsigue ðaro árĩniguicãrãca. <sup>12</sup> Eropirã ĩgu yare mari iira dipuwaja ñero tariquererã ta ĩgu yare duhubirã árĩrã ĩgu opu árĩroguere ĩgu mera dorerã árĩrãca mari sã. “Cristore yu masibeaa,” mari gajirãre arĩcũ ĩgu sã marire eropa ta arĩgucumi.

<sup>13</sup> ĩgure mari tarinũgacũ ĩagu ĩgu arĩdiro dopa ta marire dipuwaja moagucumi. ĩgu arĩro dopa ta iigu aħrimi ĩgu. Ne gũyabeami ĩgu. I árĩpehreri ĩgu werera diaye ta aħraa.

*Goãmu ĩgu iħasuarãre, ĩgu yare buherãre werepu Pablo Timoteore*

<sup>14</sup> Ire yu wererare mu mera majarãre masicũ iique. Erã ejatuharo game dũyaso wereniguiiri duhpiburi árĩbeaa. Eropirã erãre peerãre ñero wacũ iima. Eropigu mari Opu ĩgu ĩhuro ðpa arĩ wereque erãre. “Mũa eropa wereniguiiro dopa wereniguibiricãque,” arĩque erãre. <sup>15</sup> Mũpu Goãmu yare ðaro buheque. Eropigu Goãmu ya árĩburire turaro iique. Mu eropa iicũ ĩagu “Õaro iibu mũhu,” arĩgucumi Goãmu mũre. Eropigu mu buherare ĩgu ĩacũ gũhyasĩrisome mũhu. ĩgu buheri diaye aħraa. Eropigu ĩgu buherire ðaro masique. Eropigu ire queoro buheque. <sup>16</sup> Erã ejatuharo bu árĩrire wereniguirã ñerire eropa iiniguicãma. Eropigu erã eropa arĩ wereniguiire ĩha gamebiricãque mũhu. <sup>17</sup> Erã wereniguiiri camiro boagãro iro dopa ta aħraa. Erã wereniguiiri gajirã Jesu yarãre ñerã wacũ iiaa. Eropa wereniguirã mera majarã Himeneo, Fileto sã aħrima. <sup>18</sup> Eropirã erã ðari buherire cóarã, “Jesu yarã sĩrinirã erã ya dũpu mũra masa mũriatuhanirã aħrima,” arĩ buhemaacãma. Eropa gajiropa buherã bajamerãgã Jesu yarãre goroweorã iima. <sup>19</sup> Erã eropa ñero buhequerecũ ta, Goãmu ya buheripu ne gohrotobea. ĩgu ya diaye maja árĩro pehrebeaa. Opa arĩ gojara aħraa: “Mari Opu ĩgu yarãre masimi. Eropirã árĩpehrerã ‘Jesu yarã aħraa,’ arĩrã ñerire duhucãporo,” arĩ gojañuma.

<sup>20</sup> Jesu yarã watope aħrima Goãmu yare ðaro iirã. Gajiropa iirã sã aħrima ñeri buherire wereniguirã. <sup>21</sup> Eropigu yujugu Goãmu ya árĩburire ðaro itamudiagu iri ñeri buherire peebiricãporo. Árĩpehreri ñerire duhucãporo. ĩgu eropiigu ðagu arĩgu árĩpehreri Goãmu yare ðaro iimasimi. Goãmu gamegu ðaro arĩgucumi.

<sup>22</sup> Eropigu mu mamu arĩgu mamarã erã ñeri uaribejari iro dopa iibiricãque. Eropigu ðarire iique. Jesure umupeoturaniguicãque. Eropigu ĩgure masa sãre mahi umupeoque. Eropigu gamequeãro mariro gajirã mera ðaro arĩque mũhu. Eropa ta iique gajirã ñeri dipuwaja marirã mera Goãmure game serẽniguirã mera arĩgu. <sup>23</sup> Eropigu pee masibirã erã arĩ dũyatorire mu sã peenũrũbita. Eropigu mu sã dũyasobita. Eropa arĩ dũyatorã masa game gameturinũgama. <sup>24</sup> Mari Opu pohro majagure dũyasobiricãro gahmea. Eropigu árĩpehrerãre ðaro iigu buhemehregu, mata guabigu ĩgure árĩro gahmea. <sup>25</sup> Eropigu gajirã ĩgu mera dũyasocũ ĩgu erãre weregu ðaro mera yojaro mariro mera yũhriro gahmea ĩgure. ĩgu ðaro yũhricũ ĩarã erãpu Goãmu ĩgu itamuri mera erã ñeri iirire bujawerebocoma. Eropirã ðari buherire diaye majare masinũgabocoma. <sup>26</sup> Erãre watĩ oparimi ĩgu gamerire iimorãre. Eropirã erã ñero iirare bujowerera pũhru ðari buheripure masirã, watĩre cóarãcoma.

## 3

*Pehreburinũ majare werepũ Pablo Timoteore*

<sup>1</sup> I umũ pehreburinũ coregã ñero tarirãcoma masa. Irire ðaro masique mũhũ. <sup>2</sup> Irisubure masa gajirãre guñabirã, erã ya árĩburi dihtare guñarã, niyerure gamerã, “Gajirãre tarinũgaa guã,” arĩ erã basi pepirã, masare ñero turirã, erã pagũ sumarãre tarinũgarã, erãre oquerecũ ta “Õhaa,” arĩbirã, Goãmũre umupeobirã árĩrãcoma. <sup>3</sup> Eropirã masare mahibirã, mojomoro ïabirã, ñeri quere iirã, ñeri ùaribejarire duhumasibirã, masare eropa paniguirã, ðarire gamebirã árĩrãcoma. <sup>4</sup> Erã mera majarãre ñero iirã, pepiri moorã, “Masipehorã ãhraa,” arĩ pepirã árĩrãcoma masa. Eropirã erã, erã ùaribejarire iisuarã árĩrã Goãmũre umupeo suabeama. <sup>5</sup> Eropirã erã masa erã ïhabeoro Goãmũre umupeoquererã ta “Goãmũ duhpibu árĩbeami,” arĩ pepirima erã.

Eropa árĩrãre wapicũbircãque mũhũ. <sup>6</sup> Erã mera majarã pee masibirã nome pohro ñaja, erã nomere gũyarire buhema. Erã nomepũ turaro ñerire iiniguirã árĩrã, turaro ñerire iidiarã ãhrima. <sup>7</sup> Erã nome eropa peeniguirã nome árĩquererã ta, diaye majapũre ne masibeama. <sup>8</sup> Iribojegue Jane, Jambre sã yea árĩnirã Moise wererare gamebiridiro dopa ta erã sã ðari wereniguirire diaye majare gamebeama. Erã ñeri dihtare pepirã ãhrima. Eropirã Jesure umupeorã gohra árĩbeama. <sup>9</sup> Eropa iirã gũyari mera erã iidiarire yujuro bojesome. Pũhrũ erã gũyarire, erã pee masibiriri sãre árĩpehrerã ïha masirãcoma. Jane, Jambre mera erã gũyarire iribojegue masa erã ïha masidiro dopa ta eropa ta masirãcoma masa pehreburinũ coregã árĩrã erã gũyarire.

*Pablo Timoteore doretupũ*

<sup>10</sup> Mũpũ yũ buherare, yũ árĩricũrare, yũ iidiarare, Jesure yũ umupeorare ðaro ïhabũ. Eropigũ guaro mariro yũ iirare, masare yũ mahi umupeorare, ñero tariqueregũ yũ yujuro bojerare masia mũhũ. <sup>11</sup> Eropigũ Jesucristo yare yũ iira waja yũre erã ñero iirare, yũ ñero tarirare masia mũhũ. Eropigũ Antioquiague, Iconiogue, Listrague yũre ñetariaro erã iira sãre masia mũhũ. Eropa yũ wacũ ïha mari Opũ Jesucristopũ yũre itamũrimini. <sup>12</sup> Árĩpehrerã Jesucristo yarã árĩdiacũ Goãmũ gamerire iiniguidiacũ gajirã erãre ñero iirãcoma. Iri diaye ta ãhraa. <sup>13</sup> Eropirã ñerãpũ, gũyarã sã, ñetariarã árĩniguicãrãcoma erã. Gajirãre gũyarã, erã basi sã gũyarire peerã eropa ta ñetariarã árĩniguicãrãcoma.

<sup>14</sup> Mũpũ yũhũ mũre buherare ðaro mũ peerare eropa iiniguicãque. Mũre buhenirãre masia mũhũ. <sup>15</sup> Mũ majigũ árĩgũgue ta, Goãmũ yare erã gojarapũre masinũgayoro. Ìgũ yare erã gojarapũ mũ buhegũ masia Jesucristo marire tauburire. Eropa buhegũ “Jesucristore umupeorã dihtare peamegue wabonirãre taumi Goãmũ,” arĩ masia. <sup>16</sup> Goãmũ yare erã gojarapũre árĩpehrerire Goãmũpũ gojadorepũ erãre. Eropirã iripũre buherã mari masinemoa. Iripũre buherã mari ðaro iiburire masia. Eropirã mari ñeri iirire masia iripũre buherã. Eropiro iripũ marire ðaripũre gohrotodorea. Eropiro umũri nũcu mari ðarire mari iiniguiburire werea iripũ. <sup>17</sup> Eropigũ Goãmũ yagũ ïgũ yapũre buhegũ, masipehocãgũcumini. Eropa masigũ árĩpehrerire ðarire iimasigũcumini ïgũ.



## 4

<sup>1</sup> Jesucristo áripehreräre doregu arigu dujarigacumi. Eropa dujarigu ojocariräre, sirinirä säre dipuwaja moagucumi. Eropigu igu ihabeoro ire mare dorea yuhu: Goamu sä igu ihabeoro ire dorea mare. <sup>2</sup> Umuri nucu masa erä peediacü, erä peediabiricü säre Goamu yare wereque. Eropa weregu masare erä ñeri dipuwajare masicü iique eräre. Eropigu “Mua ñeri iirire iinemobiricäque,” arí wereque eräre. Öaripure iidoreque. Eropa weregu ne guabigu gariborebigu aríque muhu. Eropigu gajiräre buhe duhubita. <sup>3-4</sup> Puhru, gajisubuguere masa öari buherire peediasome. Eropa peediabirä erä gamero dopa ta iirä, erä peediari dihtare buhemoräre amaräcoma erä. Eropirä guyarí buherire buherä bajarä oparäcoma erä. Erä eropa iirä öari buheri diaye majapure cohä, erä eropa arí bocara buheripure peenuräräcoma. <sup>5</sup> Eropigu mupu diaye majare buhe duhubita. Eropa iigu umuri nucu öaro pee masigu aríque. Eropigu ñero tariqueregu ta yujuro bojeque. Eropigu öari buherire eropa buheniguique masa Jesu yarä waboro dopa. Goamu mare igu iidorerare ipehocäque muhu.

<sup>6</sup> Yuhu Goamu yare yu iira dipuwaja yu siriboro merogä duhyaa. Eropigu bajamenurigä arínigaca. Eropigu dohpaguere mare dorea. <sup>7</sup> Yu siriboro coregä ire weregura: Jesucristo yare öari buherire buhedoregu igu apirare öaro buhe ojogorocubü. Igu dorerire öaro ipehocäbü. Eropigu ñero tariqueregu ta igure ne umupeo duhubiribü. <sup>8</sup> Yu eropa öarire iira wajare umusigue dibugucumi yare. Eropigu mari Opü arípehreräre masipehogu, diaye ta dipuwaja moabu arígu, queoro weregu igu dujaririnü yu wajatarare ogucumi yare. Gajirä säre igu dujariborore coreräre, igure mahiräre erä wajatarare ogucumi Jesu.

*Pablo werenompu Timoteore*

<sup>9</sup> Yu pohrogue yjaro íagü arique muhu. <sup>10</sup> Dema waícugü i yeba majare arípehrerire gamegu yare cóägä waha wami Tesalónicague. Crescentepü yure cóäbiriqueregu Galacia yebague wahámi Goamu yare buhegu. Tito sä eropa ta Dalmaciague wahámi. <sup>11</sup> Luca dihta yu mera ährimi. Marco yure öaro itamubu ährimi. Eropigu igure aígárique muhu. <sup>12</sup> Tíquicore Efeso macague obeoabü. <sup>13</sup> Eropigu muhu ögue arigu, yu weca sañari suhrirore, Troa maca Carpo ya wihi yu apirañere aígárique. Eropi sohö aríra gojara turirire aígárique. Sohö aríra gojara gasiri tamerare turaro gahmea yuhu. Eropigu iri gasiri säre aígárique.

<sup>14</sup> Alejandro comere mohmegü yure ñetariaro iimi. Eropigu igu eropa iira dipuwaja Goamu dipuwaja moagucumi. <sup>15</sup> Igu Alejandro mari buherire ne gamebirimi. Eropigu müare ñero iiri arígu öaro igure guña masique.

<sup>16</sup> Peresu iidoregure yu iirare igure yu ne werecü ne yujugu Jesu yagu yare itamudiabirimi. Arípehrerä yure itamubirä cóägäpehrea wama. Erä eropa cóäquerecü ta yare erä cóära dipuwaja Goamure “Eräre dipuwaja moabita,” aríbü. <sup>17</sup> Yu yujugu ta aríquerecü ta Goamu öaro ährimi yu mera. Eropigu igu buherire yu öaro wereburire weremasicü igu turari mera itamumi yare. Arípehrerä Judio masa aríbirä iri buherire erä peeburire werecü itamumi. Eropigu masa erä

yure ñero iidiaquerecũ ta yure erã ñero iibodigũre itamumi mari Opũ.  
<sup>18</sup> Árípehrerire erã yure ñero iirire yure taugũcumĩ mari Opũ. Eropigũ  
 umũsigue ĩgũ Opũ árĩrogue yũ árĩborore itamugũcumĩ ĩgũ. Eropirã  
 “Mari Opũ ðatariagu, turatariagu ãhrimi,” árĩpehrerinũri arĩrã mari.  
 Eropa ta arĩrã.

*Pablo ðadorepũ Timoteo pohro árĩrãre*

<sup>19</sup> Priscila, igo marapũ Aquila, Onesíforo ya wihi majarã sã ðaporo.  
<sup>20</sup> Erasto Corintogue dujami. Tróximo dorecũa wahámi. Eropigũ  
 Miletogue apiabũ ĩgũre. <sup>21</sup> Puhiró core yojaro ariqũe mũhũ. Eubulo,  
 Pudente, Lino, Claudia sã, árĩpehrerã Jesu yarã mũre ðadorema.

<sup>22</sup> Mari Opũ Jesucristo mũ mera árĩporo. Eropigũ mũare Goãmũ  
 mera turaro ðadorea. Eropa ta árĩnigũicãporo. Iripẽta ãhraa.

## Tito

### *Pablo Titore gojabeopu*

<sup>1</sup> Yuhu Pablo mure Titore gojaa. Goamu pohro majagu, Jesucristo yare igu buhedore igu apidigu ahraa. Goamu igu beyenira Jesure era umupeoburire, oari buherire era masiburire Jesu buhedoregu yure apimi. Iri buheri Goamu igu doreldiro dopa ta mari iiburire werea. <sup>2</sup> Eropigu aripehrerinari Goamu yara umarogue era oaro ariniguiboro sare buhea erare. Goamu ne guvari marigu i yebare igu ihacinuguboro core "Yu pohrogue eropa oaro ariniguicarcama," ar i apipu marire. <sup>3</sup> Eropigu igu queoranu aricu igu eropa ar i apirare masidoredigu arimi masare. Eropa ta masidoregu yure erare weredoremi igu marire taugu. <sup>4</sup> Mure Jesu yare buhebu. Yu eropa buhec i peegu, Jesure umupeonugabu mahu yu umupeoro dopa. Eropigu mahu yu buhedigu arigu diaye ta yu magu iro dopa arigu ta iiaa. Mure ire gojabeogu iiaa. Eropigu Goamu mari Pagu, Jesucristo marire taugu itamuri mera mure oadorea. Igu itamuri mera oaro arique mahu.

### *Creta waicuri nuguro majarare Tito igu wereburire werepu Pablo*

<sup>5</sup> Creta waicuri nuguro yu mure apicu Jesu yara era buheboro duhyanibu irisubure. Eropigu era iiburire werebure apibu yuhu mure. Eropigu macari nucu majara Jesu yara opara arimorare beyedoregu apibu mure. <sup>6-8</sup> Era opara Goamu pohro majara ahrima. Eropigu erare beyegu oarare beyequ gajiropa iibirare. Eropigu yujugo ta marapocura arirare beyequ. Eropigu "Bu arigu ahraa yuhu," ar i pepirare beyequ. Eropigu mata guabirare, merebirare, masa mera gamequeabirare, niyerure gamebirare beyequ. Eropa beyegu era ya wihire najarare oaro ihadiburare, oaripure suarare, pee masirare, oaripure iiniguirare, neri marirare, era uaribejarire iibirare, teboru mariro mohemerare, oarire iiniguirare beyequ. Eropira mu beyera porare opa ariro gahmea. Jesure umupeora, oarire iiniguira, aripehrerare oaro yuhrira ariro gahmea opara porare. <sup>9-10</sup> Eropira oari buherire queoro mari buhediro dopa ta ne duhubira ariporo opara mu beyenira. Eropira oari buherire werera ariracoma. Eropa iira oari buherire gamebirare buhera era ya guvari aricu masicu iiracoma era. Eropigu oaro beyequ Jesu yara weca opara aripehrerare.

Bajara era oparare tarinugar, oaro pepi wereniguibir, guvara ahrima dohpaguere. Eropa iira yujurayeri Moise dorerire idorer tamera netariaro iira iima. Era buheri iri diaye aribiricu erare masicu iiro gahmea. <sup>11</sup> Era Moise dorerire idorerapu guvarire buhera niyerure wajatadiara buhema. Eropa buhera yujuyeri wiri majarare aripehrerare Goamu yapure cocu iira icoma era. Era eropa iicu erare idorebiricaro gahmea.

<sup>12</sup> Iribojegue weredigu Creta majagu ariqueregu ta opa ar i werepu: "Creta nuguro majara eropa guyaniguira waicuma. Nerire iira diaye iro dopa iira ahrima. Eropira pagari bara arira ne mohmediabeama,"

arĩpũ ĩgu ĩgu ya nuęuro majaräre. <sup>13</sup> ĩgu eropa arĩra diaye ta ähraa. Erä eropa árĩcũ ĩagu eräre turaro wereque Jesu ya buheripũre erä öaro pee masiboro dopa. <sup>14</sup> Eropĩgu “Judio masa iribojegue majarä erä arĩ bocarare peebiricäque,” arĩ wereque eräre. Jesu yare gamebirä erä doreri säre Creta majarä erä peenurubiriborore wereque eräre.

<sup>15</sup> Öpa ähraa. Dipuwaja marirä öari dihtare pepima. Ñerire iiniguiräpũ ñeri dihtare pepima. Erä pepiripũ ñetaria. Eropirä öaripũre beyemasibeama. <sup>16</sup> Erä “Goãmũre masia guu,” arĩquererä ta ñerire iima. Eropa iinirä erä árĩcũ ĩarä Goãmũre masibirä erä árĩcũ masia mari. Eropirä erä ñetariarä, Goãmũ yare tarinugarä ährima. Eropirä öarire iimasibeama.

## 2

### *Öari buherire weredorepũ Pablo Titore*

<sup>1</sup> Mũpũ buhegu öari buheri arĩdiro dopa ta öaro buheque. <sup>2</sup> Mũrãpũre öpa wereque: “Mũa guhyadiarä, masa erä umupeorä, pee masirä, ‘Goãmũ diaye iigu ährimi,’ arĩ umupeorä, öari buherire öaro iirä, Jesure masa säre mahirä, ñero tariquererä ta yujuro bojerä árĩque,” arĩ wereque eräre. <sup>3</sup> Mũrã nome säre eropa ta arĩ wereque: “Guhyadiarä nome, ñeri quere werewuabirä nome, merebirä nome árĩque,” arĩ wereque erä nome säre. Eropirä erä nome öarire gajiräre buheporo. <sup>4</sup> Eropa iirä öpa arĩ buheporo mũrã nome nómeñaripũre: “Mũa marapũ sumaräre mũa porä säre mahique,” arĩ buheporo. <sup>5</sup> “Eropirä mũa pee masirä nome, gajirä mũa mera ñero iibirä nome, mũa ya wihi majare öaro ĩhadiburä nome, öaro iirä nome, mũa marapũ sumaräre öaro yuhrirä nome árĩque,” arĩ buheporo mũrã nome nómeñaripũre. Erä eropiicũ ĩarä gajiräpũ “Goãmũ yare umupeorä ñero iirä ährima,” arĩmasibeama mũare.

<sup>6</sup> Eropĩgu mamarä säre öpa wereque: Pee masirä árĩporo erä. <sup>7</sup> Eropĩgu mũpũ öari dihtare iiniguicäque mũre erä ĩhacũburire. Buhegu ne guyarö mariro buheque. Eropa buhegu guhyadiaro mera buheque mũhu. <sup>8</sup> Eropa buhegu öaro pee masiri mera buheque ne gajirä mũre erä weresãmasibiriburire. Mũ eropa buhecũ ĩarä marire ĩhaturirä árĩquererä ta marire bu gohra ta werewuamasibeama. Marire eropa werewuamaacärä guhyasiuro waräcoma erä.

<sup>9</sup> Eropĩgu pohro majaräre öpa doreque: Erä oparäre öaro yuhrirä árĩporo. Eropirä erä oparäre öaro mucubiricũ iiporo. Eropa dihta iiporo. Eropirä erä oparäre pũriro mera yuhriricãporo. <sup>10</sup> Eropirä erä oparä yare yajabiricãporo. Eropirä öarä erä oparä dorerire öaro iiniguicärä árĩporo. Erä eropa öaro yuhrirä árĩcũ ĩarä Goãmũ marire taugu ĩgu buherire pee suaräcoma gajirä.

<sup>11</sup> Masare ĩgu mahirire Goãmũ mari masare masicũ iituhajami. Mari masare eropa mahigu árĩpehrerä peamegue waboniräre Goãmũ turaro taudiami. <sup>12-13</sup> Masare eropa mahigu Goãmũ marire öpa doremi: Ñeri iirire, ñerire uaribejarire duhucãdoremi marire. Goãmũ turagu, Jesucristo marire taugu ĩgu öarire mari ĩaburinũre, ĩgu öaro mera dujariburinũre mari corerä iiaa. <sup>14</sup> Eropĩgu mari corerĩnũ mari corerĩsubu, mari pee masirä, öarire iiniguirä, Goãmũre umupeoniguirä marire árĩdoremi Goãmũ. <sup>14</sup> ĩgu Jesucristo mari ya árĩburire ta

sīridi árīmi. Árīpehrerā mari űeri iirire duhucū iibu, marire ĩgu yarā wacū iibu sīridi árīmi. Mari űerire ĩgu eropa cóācū mari űerire iira dipuwaja marirā árīrāca. Eropirā turaro ōarire iidiarā árīrāca.

<sup>15</sup> Ire árīpehrerire iri nuġuro majarāre Jesu yarāre buheque muħu. Erā opu árīġu ta iiaa muħu. Eropiġu erāre wereque. Eropiġu erā űerire iicū ĩagu wereque erāre. Eropirā árīpehrerā gajirā mure cóādiabiricāporo.

### 3

#### *Jesu yarā erā iiburire werenemopu Pablo*

<sup>1</sup> Ōpa guñacū iique ero majarā Jesu yarāre: Erā oparāre ōaro yuħrirā árīporo. Eropirā árīpehrerire ōari dihtare iirā árīporo. <sup>2</sup> Eropirā gajirāre ne quere goroweobiricāporo. Game duyasobiricāporo. Eropirā masa ōarā, árīpehrerāre umupeorā árīporo.

<sup>3</sup> Iribojegue mari sā pee masibirā, tarinuġarā, ġuyarire peenururā, űerire iisuarā, űerire uaribeja duhumasibirā, umuri nucū űerire iiniguirā, gajirāre erā gajinore opacū ĩhaturirā árīmuriribu mari sā. Eropirā marire gajirā ĩhaturimurima. Eropirā mari sā erāre ĩhaturimuriribu. <sup>4-5</sup> Eropa árīnirā árīquerecū ta Goāmu marire peamegue wabonirāre taumi. Eropa taugu ĩgu ĩgu ōagu árīrere, masare ĩgu mahirire marire ĩhmudi árīmi. Ōaro mari iira mera taubirimi marire. Mariremojomoro ĩagu mari űeri iirare coegu Espiritu Santo mera marire taumi. Eropa iigu marire ĩgu porā wacū iimi. Eropiġu Espiritu Santopu mari ōarā árīburire marire gohrotomi. <sup>6</sup> Jesucristo mari űeri iira dipuwaja ĩgu sīri, masa mūriara mera Goāmu ĩgu Espiritu Santore omi marire wuaro ĩgu turarire mari opaboro dopa. <sup>7</sup> Marire mahiġu, marire ōaro iidiami. Eropiġu ĩgu, ĩgu Espiritu Santore omi, űeri iira dipuwaja marirā mari árīborore, umarogue mari eropa ōaro árīniguicāborore. Mari eropa árīniguiburire masirā irire mucubiri corerā iiaa mari.

<sup>8</sup> Iri yu werera diaye ta āhraa. Eropiġu irire yu werediro dopa ta masare buheġu iri dorerire iipehodoreque muħu. Eropiġu Goāmure umupeorāre irire buheque ōarire erā ōaro iiboro dopa. I yu arī buhera ōari buheri āhraa. Eropirā masa i buherire erā peenurucū ōaro itamuri árīroca erāre. <sup>9</sup> Gajirā wereniguiripu duħpiburi árībeaa. Erā masibiriquererā ta erā arī duyasoma. Erā űecu sumarā arī bocarare game duyasoma. Moise dorerire arī duyasoma. Erā eropa arī duyasori iri árīpehreri duħpiburi árībeaa. Eropiġu irire peenurubiricāque. Mu sā duyasobiricāque.

<sup>10</sup> Mua mera majagu eropa game duyasogu mua basi game duca wacū ĩgu iicū ĩagu “ĩbiricāque,” arīque ĩġure. Yujusubu, pesubu irire ĩġure mu iidorebirira puħru ĩgu yuħribiricū ĩagu ĩġure wapicu duħucāque. <sup>11</sup> Eropa duyasogu űeri dihtare uaribejaniguigu āhrimi. Eropa ĩgu iicū ĩarā ĩgu űegu árīcū masi, ĩġure wapicubiricāro gahmea.

#### *Pablo doretupu*

<sup>12</sup> Nicopoligue puhirópē árību iiaa. Eropiġu Artemare o Tíquicore mu pohrogue yu obeomahtacū eroguerere yure bocatirigu arīque muħu. <sup>13</sup> Eropiġu dorerire ōaro mehregure Zena waicugure, Apolo säre

õaro itamuque erã waborore. Eropigu erã gamerire árĩpehrerire oque erãre dũhyaro mariro. <sup>14</sup> Eropirã Jesu yarã mari mera majarã õarire iipoporo. Gajinore opapehobirãre erã itamuboro dopa, õarire iiniguirã erã árĩboro dopa eropa iipoporo.

*Pablo õadorebeopũ Jesu yarãre*

<sup>15</sup> Árĩpehrerã yũ mera majarã mũre õadorema. Ero árĩrã Jesu yarã guare mahirã õaporo. Árĩpehrerãre mũare Goãmũ ãgu mahiri mera turaro õadorea. Eropa ta árĩniguicãporo. Iripẽta ãhraa.

## Filemón

### *Pablo Filemo waĩcugure gojanugapu*

<sup>1</sup> Yũhũ Pablo Jesucristo yagu yũ árĩri dipuwaja peresugue árĩgu iiaa. Yũhũ, mari acaweregu Jesu yagu Timoteo mera mũre Filemore gojabeoa gũa. Mũhũ gũa mahigu Cristo yare gũare mohmetamugu āhraa mũhũ. <sup>2</sup> Eropirã Jesu yarã mũ ya wi gamenerẽrã sãre gojabeoa gũa. Mari mahigo mari acawerego Jesu yago Apia sãre gojabeoa gũa. Arquipo sãre gojabeoa gũa. Arquipopũ gũa iro dopa Cristo yare weregu āhrimi. <sup>3</sup> Eropirã Goãmũ mari Pagũ, mari Opũ Jesucristo mera mũare ðadoreã. Īgu itamuri mera ðaro árĩque mũa.

### *Filemo gajirãre ĩgu mahire, Cristore ĩgu umupeorire werepu Pablo*

<sup>4-5</sup> Yũ acaweregu, Filemo, mũre guña Goãmũre mũre serẽbasamũraa. Eropa serẽbasagu “Ōhaa,” arãa yũhũ ĩgure. Cristore mũ mahicũ ĩgure mũ umupeocũ gajirã Jesu yarãre mũ mahicũ peeabũ yũhũ. Eropigu Goãmũre “Ōhaa,” arĩ mucubiria. <sup>6</sup> Cristore mari umupeorire gajirãre weregu āhraa mũhũ. Mũ eropa árĩgu árĩcũ i sãre serẽbasaa Goãmũre. Jesucristo yarã árĩrã wũaro ðarire oparãca mari. Irire mũ opaburire ðaro mũre masipehodoregu serẽbasaa Goãmũre. <sup>7</sup> Acaweregu, gajirãre mũ mahicũ peegu mucubiria yũhũ. Árĩpehrerã Goãmũ yarãre ðaro sĩporã turacũ iigu waĩcũa mũhũ. Mũ eropa iicũ peegu mucubiria yũhũ.

### *Pablo Onésimo ya árĩburire serẽpu Filemore*

<sup>8-10</sup> Eropigu dohpaguere Onésimore mũ pohro majagu árĩdigure mũre serẽbasadiaa. Peresugue gũa árĩrã Cristo yare werebũ yũhũ ĩgure. Irire peegu Cristore gahmeami ĩgu. Eropigu ĩgu Goãmũ yagu wahãmi. Eropa wagũ yũ magũ iro dopa āhrimi. Eropigu yũ bugũ árĩgu Cristo yare yũ buhera dipuwaja peresu árĩgu mũre Onésimo mera werebeogũra ĩgure mũ iiburire. Cristo ĩgu buhedore ĩgu apidigu āhraa yũhũ. Eropa árĩgu, árĩgu ĩgure mũ iiburire mũre dorebu āhraa yũhũ. Eropa árĩgu árĩqueregu ta mũre doresome yũhũ. Mahiri mera mũre werebeogũra iripẽta.

<sup>11</sup> Cristo yagu ĩgu árĩboro core Onésimo mũ pohro majagu árĩgu duhpibu árĩbiridigu arĩmi. Mũre ðaro itamubiridigu arĩmi. Dohpague tamerare yũre ðaro itamugu āhrimi. Mũ sãre ðaro itamugu árĩgũcumi. Dohpaguere bu árĩgu gohra árĩbeami. <sup>12</sup> Eropigu dohpaguere ĩgure mũre wiagu iiaa. Īgure turaro mahia. Īgu yũ turaro mahigũre mũre wiagu iiaa. <sup>13</sup> Īgure mũre wiabiricũ ĩgu yũ pohro dujaboñumi. Ōari buherire yũ buheri dipuwaja peresu yũ árĩrisubu ĩgure yũre itamudoreboya yũhũ. Eropigu yũ mera dujadoreboya yũhũ. Mũpũ yũre itamumasibiricũ ĩgũpũ mũre gohrotogu árĩboñumi. <sup>14</sup> Eropa árĩquerecũ mũre wiagu iiaa ĩgure. Mũhũ ĩgure “Dujaque,” mũ arĩbeocũ, ĩgure dujadoreboya. Yũpũ mũre “Yũ pohro ĩgure apique,” arĩdiabirica. Eropigu ĩgure mũre wiagu iiaa. <sup>15</sup> Īgu Onésimo mũre bajamenũrigã ĩgu mũre duhrigãra pũhrũ dipaturi mũ mera árĩgũcumi daja. Īgu mũre duhricũ Goãmũ gamero dopa ta wahabũ,

arĩ pepia yũhũ, ĩgu Jesu yagu ĩgu árĩborore. Eropigu mũ pohro árĩgu daja ðaro árĩniguigũcumi. <sup>16</sup> Eropigu ĩgu dohpaguere mũ pohro majagu gohra árĩbeami. Pohro majarã tauñariro árĩgu áhrimi ĩgu yũ pepicũre. Dohpaguere ĩgu mũ acaweregu Jesu yagu áhrimi. Eropigu ĩgure turaro mahia. Mũpũ yũ tauro ĩgure mahique. Mũ eropa mahigu mũ pohro majagu ĩgu árĩqueregu ta mũ pohro majagu gohra árĩbeami ĩgu. ĩgu mũ acaweregu Jesucristo yagu áhrimi.

<sup>17</sup> Eropigu yũre mũ bocatĩridiro dopa ta ĩgu sãre ðaro bocatĩrique. Mũ mera majagu yũ árĩcũ ĩgu sãre ðaro bocatĩrique. <sup>18</sup> Eropigu gajiropa mũre ĩgu iicũ, mũre ĩgu wajamogu árĩcũ yũpũ irire wajayegura. <sup>19</sup> Yũhũ Pablo yũ basi ire were gojagura: Yũpũ wajayegura mũre. Mũre yũ buhera pũhrũ Cristo yagu mũ wacũ árĩpehrerinari Goãmũ mera árĩbu áhraa mũhũ. Mũre yũ eropa buhera waja mũ sã yũre wũaro wajamogu árĩboca. Mũ eropa árĩquerecũ ta mũre wajayegura ĩgu mũre wajamorire. <sup>20</sup> Eropigu yũ acaweregu, yũ mahigu, mari Opũ Cristo yagu áhraa mũhũ. Mũ eropa árĩgu Onésimore ðaro bocatĩrique. Cristo yagu árĩgu yũ acaweregu áhraa mũhũ. Eropa árĩgu, árĩgu yũre ðaro mucubiricũ iique.

<sup>21</sup> I yũ wererare ðaro iigũca mũhũ. Eropigu yũ werera tauro iigũca mũhũ. Irire masigu mũre gojabeogu iiaa. <sup>22</sup> I sãre weregura mũre: Mũa pohrogue yũ waborore Goãmũre mũa serẽbasarare ĩgu yũhribocumi. “Áũ,” ĩgu arĩcũ gahmea yũhũ. Eropigu mũa pohrogue yũ ejaburi toẽre amuyuque mũhũ.

*Pablo ðadoretupũ Filemore*

<sup>23</sup> Epafra mũre ðadoremi. ĩgũpũ Cristo yare ĩgu iira dipuwaja yũ mera peresu árĩgu áhrimi. <sup>24</sup> Eropirã Marco, Aristarco, Dema, Luca yũ mera mũre ðadorema. Cristo yare yũ buhecũ erãpũ yũre itamurã áhrima.

<sup>25</sup> Mari Opũ Cristo mera ðadorea mũare. ĩgu mũare ðaro iigũcumi. Eropa ta iiporo. Iripẽta áhraa.



## Hebreos

### *Goãmtu magu Goãmtu yare werepũ marire*

<sup>1</sup> Iribojegue Goãmtu masare werenũgapũ. Īgu bajasuburi mari ñecu sũmarãre iribojegue majarãre ĩgu gamerire weremũripũ. Īgu yare weremũhtanirã mera erãre weremũripũ ĩgu. Gajirãre ĩgu dehyoa weremũripũ. Gajirãre ĩgu bocatĩriro weremũripũ. Gajirãre quẽroque weremũripũ. Eropa weremũripũ ĩgu mari acawererãre. <sup>2</sup> Dohpaguere pehreburiũ coregã arĩrinũrire ĩgu magure ĩgu yare ĩgu weredore obeocũ ĩgũpũ marire wereami. Jesucristo ĩgu Pagũ iidorero mera i yebare umaro sãre iidigu arĩmi. Īgu Pagũpũ pehrerinũ arĩcũ arĩpeherrerire opabure apipũ ĩgure. <sup>3</sup> Eropigu ĩgu magũpũ ĩgu Pagũ õarire opagu arĩgu, ĩgu turari mera marire ii ĩhmudi arĩmi. Eropigu yujuro mera ĩgu Pagũ mera arĩgu, ĩgu Pagũ arĩricũrire marire ĩhmudi arĩmi. Eropigu ĩgu turari mera ĩgu dorecũ i yeba, umaro sã eropa arĩniguia. Eropiro dederebeaa ĩgu doreri mera. Eropigu mari ñero iirare ĩgu coera pũhrũ ĩgu Pagũ turatarigu diayerũ doapũ ĩgu opu ĩgu arĩrire ĩhmubu.

### *Goãmtu magu anyua tauro aħrimi*

<sup>4</sup> Īgu Goãmtu magu waĩcũmi. Eropa waĩcũgu gajirã tauro opu aħrimi. Eropigu ĩgu anyua weca tauro opu aħrimi. <sup>5</sup> Īgu anyuare Goãmtu ne õpa arĩ werebirimũripũ ĩgu magure werediro dopa ta: Yũ magu aħraa mũhũ. Dohpagãre mũre dehyoacũ iabũ, arĩpũ Goãmtu ĩgu magure.

Anyuapũre ne eropa arĩ werebirimũripũ. Eropigu erãre i sãre ne werebirimũripũ:

Īgu pagu aħraa yũhũ. Eropigu ĩgu yũ magu arĩgũcumĩ, arĩpũ Goãmtu ĩgu magure.

Anyuapũre ne eropa arĩ werebirimũripũ. Eropigu ĩgu magu anyua tauro arĩpũ. <sup>6</sup> Eropigu gajisubũ ĩgu magure masa dehyoagũre i yeba apõpa aigũ õpa arĩpũ Goãmtu ĩgure:

Arĩpeherrerã yahrã anyua yũ magure mereja, ĩgure umupeorãcoma erã, arĩpũ ĩgu.

<sup>7</sup> Eropigu ĩgu anyuapũre werebu õpa arĩpũ ĩgu:

Yahrã anyuare miruñe iro dopa dũpũcũrãre iiaa yũhũ. Erã yũ pohro majarã aħrima. Eropigu erãre peame iro dopa arĩcũ iiaa yũhũ, arĩ werepũ Goãmtu mari Pagũ.

<sup>8</sup> Erãre ĩgu eropa arĩqueregũ ta ĩgu magũpũre õpa arĩpũ:

Mũhũ Goãmtu arĩpeherrerã tauro opu eropa arĩniguicãgũca. Diaye ta doregũca mũhũ mũ yarãre. <sup>9</sup> Diaye arĩrire, õaro iirire turaro gahmea mũhũ. Eropigu ñero iirire gamebeaa mũhũ. Mũhũ eropa arĩgu arĩcũ ĩagu, yũhũ mũ Pagũ arĩpeherrerã gajirã tauro mũre mucubiricũ iabũ, arĩpũ Goãmtu.

<sup>10</sup> I sãre arĩpũ ĩgu ĩgu magure "Opu," arĩ piyugũ:

Opu, negohraguere i yebare, umaro sãre ĩhacũnugubũ mũhũ. <sup>11</sup> Iri arĩpeherrerĩ pehrea waroca. Mũpũ eropa arĩniguigũca. I yeba arĩpeherrerĩ suhriro iriñe boaro dopa ta pehrea waroca. <sup>12</sup> Iri

árípehreri i yebare umaro sãre gohrotocũ iigũca mũhũ. Mũrañe suhrirore mũ cohã gajiñe mera gohrotoro dopa ta árípehrerire gohrotocũ iigũca mũhũ. Mũpũ mũ árídiro dopa áríniguicãgũca. Eropigu ne gohrotosome. Eropa áríniguicũca mũhũ, arĩpũ Goãmũ ãgũ magũre.

13 Gajisubu ðpa ãgũ magũre arĩgũ iri sãre anyuapũre ne werebirimũripũ Goãmũ:

Yũ diayepũ doaque mũhũ. Eropigu mũre ãhaturirãre tarinũgabasadoregũra. Eropigu erã weca opũ arĩque mũhũ, arĩpũ Goãmũ ãgũ magũre.

14 Árípehrerã anyuapũ Goãmũ pohro majarã dihta ãhrima. Eropiro Cristo ãgũ taumorãre itamudoregũ Goãmũ obeomũrimi erãre.

## 2

*Goãmũ yare ðari buherire marire eropa pepibircãro gahmea*

<sup>1</sup> Eropigu Goãmũ magũ gohra marire weregũ ãgũ árĩcũ masirã ãgũ wererare mari peerare ðaro guñaro gahmea marire irire cãdijiri arĩrã. <sup>2-3</sup> Anyua masare erã wererare masapũ erã tarinũgacũ ãagũ Goãmũ masare dipuwaja moapũ. Eropigu erã anyua werera iri diaye árĩcũ ãhmũgũ iipũ. Eropiro anyua erã werera iri diaye árĩcũ marire irire peero gahmea. Erã tauro Cristopũre peero gahmea marire. ãgũ mari Opũ ãgũ marire tauboro weremũhtapũ. Eropirã ãgũre peenirãpũ ãgũ wererare marire wereturiañorã marire ðaro masicũ iirã. Eropigu iri buherire “Jesucristo marire ãgũ taugũcumi,” arĩ buherire mari eropa pepicãcũ Goãmũ marire dipuwaja moagũcumi. ãgũ dipuwaja moaborore duhrimasibea mari. <sup>4</sup> Irire peemũhtanirã erã buhe weca peoro watope Goãmũpũ iri buherire diaye ta árĩcũ ãhmudi árĩmi. Eropigu erã irire buherã ãgũ turari mera baja deyoro moari erã ii ãhmucũ iri buherire diaye ta árĩcũ ãhmudi árĩmi masare. Eropigu ãgũ Espĩritu Santo mera iri buheri diaye ta árĩcũ ãhmudi árĩmi. Espĩritu Santo Jesu yarãre yujurãyerire Goãmũ yare erã mohmemasiburire apidi árĩmi erã game itamuboro dopa. ãgũ gamediro dopa ta apidi árĩmi erã mohmemasiburire erãre.

*Jesucristo mari iro dopa ta dupũcũgũ masa dehyoapũ, arĩ gojañumi*

<sup>5</sup> I mũmũ pehrerĩnũ árĩcũ Goãmũ pohro árĩrã tauro oparã árĩsome anyuapũ. Erãre oparã acusome Goãmũ. <sup>6</sup> Anyuare oparã acubiri-querecũ Goãmũ yare weremũhtadigu ðpa arĩ gojañumi iribojeguerẽ Goãmũ ãgũ oparã acumorãre:

Gũa masa bu gohra gũa árĩrã árĩquerecũ ta gũare guñaa mũhũ. Gũa masare ðaro árĩcũ iiaa mũhũ. <sup>7</sup> Bajamenũrigã anyua doca masare apiyoro mũhũ. Eropa apiqueregũ ta gũare turari ogũ oparã acuyoro mũhũ. <sup>8</sup> Mũhũ eropa acucũ i yeba maja weca árípehreri weca ãhraa gũa masa, arĩ gojañumi iribojegue majagũ mari Pagure.

Goãmũ masare apigu i yebaguerẽ árípehrerã waimũrã sãre masa dorero doca árĩmorãre apiñumi. Masare ãgũ eropa oparã acuquerecũ ta erã waimũrãre árípehrerãre doremãsibeama dohpa. <sup>9</sup> Jesupũ árípehrerã weca opũ ãhrimi. Bajamenũrigã anyua doca mari Pagũ ãgũ sãre apipũ. Mari yañe árĩborañere sĩribasabure ãgũre eropa apidi

árĩmi. Mari Pagu marire mahigu Jesure mari ya árĩburire ĩgu sĩricũ gameru. Eropigu ĩgu eropa sĩricũ ĩagu ĩgure turarire ogu, opu acupu ĩgure pare árĩpehrerã ĩgure umupeoborore.

<sup>10</sup> Goãmu árĩpehrerire ĩhacũnuguĩumi. Eropiro árĩpehreri ĩgu ya dihta áhrraa. Eropigu Jesure sĩridoregu masa erã ñerire cãdijicũ iipu ĩgure. ĩgu masa bajarã ĩgu porã árĩmorãre umarogue õarogue aĩgãbu eropa iipu. ĩgu eropiicũ tamera õapũrica. Eropigu Jesupu marire taugu mari opu ta áhrrimi. <sup>11</sup> Árĩpehrerã masa erã ñerire cóadi árĩmi Jesucristopu. Eropigu ĩgu ñerire cóanirã mera Pagucumi Goãmure. Eropigu mari Pagu yujugu ta áhrrimi. Mari Pagu ĩgu árĩcũ Jesu marire ĩgu ñerire cóanirãre “Yu acawererã áhrrima,” arĩ piyugu ne guhyasĩribeamĩ. <sup>12</sup> Õpa arĩgu iipu ĩgu Pagure:

Mu árĩricurire weregura yu acawererãguere. Árĩpehrerã yaharã gamenererã pohro mure umupeogu “Turagu áhrrimi,” arĩ weregura yuhu erãre, arĩpu ĩgu ĩgu Pagure, arĩ gojara áhrraa.

<sup>13</sup> Eropigu õpa arĩpu daja:

Yu Pagure guñaturaguca yuhu, arĩpu, arĩ gojara áhrraa.

I sãre arĩpu ĩgu Jesucristo:

Ohõ áhrraa yuhu. Goãmu porã ĩgu yure apinirã yu acawererã mera ohõ áhrraa, arĩpu ĩgu. ĩgu yarãre “Yu acawererã,” arĩ piyugu eropa arĩpu.

<sup>14</sup> “Yu acawererã,” ĩgu arĩ piyurã dupucurã mari árĩcũ ĩagu, Jesupu mari ya dupu mari iro dopa árĩgu arĩpu. Eropa árĩgu arĩgu ĩgu crusague sĩrigu arĩpu watĩre dederecũ iibu. ĩgu watĩpu sĩridoregu áhrrimi marire. <sup>15</sup> Eropa ii ĩgure dederecũ iidi árĩmi marire tauboro dopa. Maripu umuri nucu mari sĩriborore guĩribu. Eropa guĩrã guĩro doca árĩrã, ñero sĩporãcurã árĩribu mari. Eropa árĩrã mari árĩcũ ĩagu ĩgu marire taumi. <sup>16</sup> Eropa taugu anyuapure itamugu aribiripu ĩgu. Abrahã pãramerãre marĩpũre itamugu arĩpu. <sup>17</sup> Eropigu ĩgu mari acaweregu iro dopa arĩpu. Yujuropa ta mari iro dopa ta dupucugu arĩpu. Eropa arĩgu mari masa ya árĩburire sĩribasagu mari ñeri iirare Goãmure cóãdoregu arĩpu. Eropigu pahia oparã erã Goãmu ya árĩburire serẽbasaro dopa ta õaro itamuboro dopa mari iro dopa dupucugu arĩgu iipu. Erã tauro marire ĩgumojomoro ĩhami. Eropigu marire õaro itamuniguicãmi. <sup>18</sup> ĩgu ñero tarĩpu. Eropigu watĩ ĩgure ñero iidorerĩpu. Iibirĩpu ĩgu. Eropa ñerire tarĩnugadĩgu arĩgu, ĩgu mari sãre ñerire tarĩnugacũ iimasimi. Watĩ ĩgu ñerire iidorecũ ĩagu marire ñerire iibiricũ iimasimi.

### 3

#### *Jesu Moise tauro árĩgu áhrrimi*

<sup>1</sup> Jesu ĩgu eropa árĩgu árĩcũ ĩarã ĩgure burĩgã guñaque muu. Yu acawererã, Jesu yarã, Goãmu ĩgu yarã árĩmorãre muare beyedigu árĩmi ĩgu. ĩgu Jesupu Goãmu ĩgu apidĩgu arĩgu mari pahia opu áhrrimi. I yeba majarã pahia oparã tauro ĩgupu mari ya árĩburire Goãmure serẽbasagu áhrrimi marire. Eropirã ĩgure õaro guñaque muu umupeodĩgure. <sup>2</sup> Goãmu ĩgure marire ĩgu tauborore ĩgu apicũ ĩgupu ĩgu apidĩro dopa ta iipu. Ne tarĩnugabirĩpu. Moise sã iribojegue majagu Goãmu yarã Israe masare itamugu ne tarĩnugabirĩpu. Eropa

ta iipũ Jesu sã. <sup>3</sup> Eropiro Moisere erã umupeodiro tauro Jesupũre umupeoro gahmea marire. Ōpa āhraa iri. Wihire mari “Ōari wihi āhraa,” arĩro tauro wihire iidigũpũre “Ōapũricãmi,” arĩro gahmea marire. Eropigu Jesupũ wihi iidigu iro dopa āhrimi. Īgu eropa árĩgu árĩcũ Īgũpũre Moise tauro umupeoro gahmea marire. <sup>4</sup> Masapũ wirire iirã āhrima. Goãmũpũ árĩpehrerire iigu āhrimi. <sup>5</sup> Moisepũ Goãmũ mohme coregũ árĩgu Goãmũ ya curu majarãre itamuniguigu árĩmũripũ. Pũhrũgue Goãmũ ĩgu masare wereborore weremũripũ masare. <sup>6</sup> Cristopũ Goãmũ magũ árĩgu ta, Goãmũ yare iiniguicãgu árĩgu Goãmũ ya curu majarã tauro opũ āhrimi. Eropirã Moise tauro Cristopũre umupeoro gahmea marire. Eropirã maripũ Cristore guñatura duhubirã árĩrã marire ĩgu tauborore eropa mucubiri coreniguicãrã ĩgu ya curu majarã āhraa mari.

*Goãmũ ĩgu yarãre ĩgu mera ðaro soocũ gameñumi*

<sup>7</sup> Eropirã Jesucristore mari umupeo duhubiriborore ðpa iro gahmea marire. Irire weremi Espĩritu Santo Goãmũ yare gojarapũguere.

Dohpagãre yũhũ Goãmũ mũare yũ werecũ yũhridibirã árĩbircãque mũa. <sup>8</sup> Eropirã ðaro yũhrique yũre mũa. Iribojegue Israe masa masa marĩrogue árĩrã yũ werequerecũ ta umupeodiabirã yũre yũhribirimũrima. Eropa iirã yũre ĩhasuabiricũ iima. Eropirã erã iidiro dopa iibircãque mũapũ yũre. <sup>9</sup> Eroguere cuarenta bojori gohra erãre deyoro moarĩre ii ĩhmuribũ erãre itamugũ. Yũ eropa ii ĩhmuquerecũ ta erãpũ ðpa arĩ pepimũrima yũre ðuyasorã. “Goãmũ marire itamumasosome,” arĩ pepimũrima. Eropa arĩ pepirã ñero iimũrima. <sup>10</sup> Erã eropiicũ ĩagu erã mera guabũ. Eropa guagu ðpa arĩbũ: “Erã yahare peediabirã gajiropa árĩri buherire eropa guñamaacãrã āhrima,” arĩbũ. “Yahapũre ne buhediabeama,” arĩbũ erãre. <sup>11</sup> Eropigu erã mera guagu ðpa arĩ werebũ: “Erã yũ mera majarã ne árĩsome. Eropirã yũ mera ðaro soosome erã,” arĩ werepũ Goãmũ.

<sup>12</sup> Eropirã, yũ acawererã, ðaro iique mũa Goãmũre cohmore arĩrã. Mũa ñerire pepirã, Goãmũ ojocarigure “Diaye iimi ĩgu,” arĩ umupeobirã, ĩgure cõãboca mũa. Ne yujugu mũa mera majagu eropa iibircãporo. <sup>13</sup> Eropirã ipũre iiro gahmea: Mũa mera majarã mũuri nũcũ Goãmũ yare mũa basi game wereniguique ñerire iiri arĩrã. Ñerire iirã “Iri mera mucubiria,” arĩrã, gũyarire pepirã iiaa mari. Eropa pepibircãque. Ñeripũre iiniguirã Goãmũ yapũre sũabeaa mari. Eropa iirã ñerire duhudiabirã wahaa. Eropa iiri arĩrã mũa mera majarãre Goãmũ yare mũa basi game wereniguique. Jesucristo ĩgu dujariboro core eropa game wereniguique. <sup>14</sup> Eropirã negohrare Cristore mari umupeonũgadiro dopa ta eropa ta mari umupeoniguicãrã, mari ojocaripõ ĩgu yare duhubirã ĩgu mera majarã āhraa.

<sup>15</sup> Goãmũ yare erã gojarapũ yũ dohparagã werediro dopa werea daja mũare Goãmũ wereniguire:

Dohpagãre yũhũ Goãmũ mũare werecũ ðaro yũhrique mũa yũre. Iribojegue majarã Israe masa erãre yũ werequerecũ ta umupeodiabirã yũre yũhridibirimã. Eropirã erã iidiro dopa iibircãque mũa, arĩmi Goãmũ, arĩ gojañuma iribojegure.

16 Eropirã Goãmũ Ĩgu werererã árĩquererã erã ĩgure yũhribirimuriñorã. Erã árĩpehrerã Egiptogwe ñero tarinirãre Goãmũ Moise mera ĩgu wiunirã árĩñorã. Erã eropa árĩquererã ĩgure ne yũhribiriñorã. 17 Eropigũ erã ñero iicũ ĩagu cuarenta bojori gohra Goãmũ erã mera guapũ. Erã ñero iira dipuwaja erogwe masa marirogwe erãre dujadorepũ. Eropirã erore sĩaria wamuriñorã erã. 18 ĩgure erã eropa yũhridiabiricũ ĩagu õpa guhyadiaro mera arĩpũ ĩgu: “Erã yũ mera majarã ne árĩsome. Eropirã yũ mera ne õaro soosome erã,” arĩpũ ĩgu. 19 ĩgu eropa arĩcũ peerã ire masia mari: Erã Goãmũre erã umupeobiriri waja, ĩgu mera majarã árĩmasibiriñorã. Eropirã ĩgu mera õaro soomasibiriñorã.

#### 4

1 Eropigũ iribojegue majarãre ĩgu mera õaro erã sooborore gamegũ erãre “Yũ mera soorãca,” arĩ apipũ Goãmũ. Mari sãre eropa ta arĩ apipũ ĩgu. Eropirã guhyadiaro mera Goãmũre õaro yũhrirã mari wieri marigue arĩrã. Eropã wierã ĩgu mera õaro soosome mari. 2 Iribojegue majarã Goãmũ yare erã peediro dopa ta mari sã õari buherire peebũ. Erãpũ peerã “Goãmũ diaye ĩgu àhrimi,” arĩ pepibirimuriñorã. Goãmũre umupeobirimuriñorã. Eropiro Goãmũ yare peequererã yũhribiricũ erã peera ñehe árĩburi árĩbiriyoero erãre. 3 Maripũ ĩgure umupeorã dihta Goãmũ mera majarã árĩrãca. Eropirã ĩgu mera õaro soorãca. Goãmũ õpa arĩpũ:

Erã mera guagu guhyadiaro mera õpa arĩ werebũ: “Yũ mera ne soosome erã,” arĩ werebũ, arĩyoero Goãmũ yare erã gojarapũgue. Eropã arĩpũ ĩgu. I yebare ĩgu ĩhacũnugura pũhrũ soorpũ ĩgu. Eropigũ masa sã ĩgu mera sooborore amuyupũ. Amuqueregũ erãrẽre “Yũ mera ne soosome erã,” arĩpũ Goãmũ. 4 Seis nrĩ ĩgu ĩhacũnugura pũhrũ ĩgu soorare õpa arĩ gojañuma Goãmũ yare erã gojarapũgue: Seis nrĩ pũhrũ árĩpehrerire ĩgu iirare pehogũ, Goãmũ mohmeduhu soorpũ, arĩ gojañuma ĩgu yare erã gojarapũgue.

5 Eropiro Goãmũ yare erã gojarapũ õpa arĩ werea daja ĩgu mera õaro árĩbirinirãre:

Yũ mera majarã ne árĩsome erã. Eropirã ne yũ mera soosome, arĩpũ Goãmũ.

6 Eropirã õari buherire peemũhtanirã, ĩgure erã tarinũgara dipuwaja ĩgu mera majarã árĩbirã ĩgu mera soobiriñorã erã. Gajirãpũ ĩgu mera majarã árĩrãcoma. ĩgu mera soorã árĩrãcoma. 7 Eropigũ masa ĩgu mera õaro árĩburire erã ĩgu mera sooburire apigũ daja, “Dohpaguere àhraa,” arĩ apipũ Goãmũ. Israe masa Goãmũre erã tarinũgara pũhrũ baja bojori pũhrũ irire weredorepũ Davire. Davi were gojarare muare weretuhajaqueregũ weregũra daja yũhũ. Eropigũ õpa arĩ gojañumi Davi Goãmũ wereniguirire:

Dohpagãnũre yũhũ Goãmũ muare yũ werecũ, tarinũgaro mariro õaro yũhrique mũa yũre, arĩ gojañumi iribojeguere.

8 Ero coregue Josué Israe masare Goãmũ ĩgu ora yebague aĩ ejaapũ. “Yũ mera soorã árĩrãcoma,” arĩgũ iri yebague erã sooborore arĩgũ iibiripũ Goãmũ. Iri yeba soodoregũ gajinũ erã sooburire apibiriboñumi ĩgu.

9 Seis nrĩ pũhrũ i yebare ĩgu iira pũhrũ Goãmũ ĩgu mohmeduhu soodiro dopa ta mari ĩgu yarã sã ĩgu mera mari sooburiñe àhraa. ĩgu mera mari õaro árĩburiñe àhraa. 10 Eropigũ Goãmũ soogu, ĩgu

mohmerare duhucānipu. Eropa ta ĩgu mera soorā mari gamero mera iirire duhucārāca. <sup>11</sup> Eropirā mari ĩgu yarā ōaro iirā. Goāmu yare ōaro yuhrirā ĩgu mera mari sooboro dopa. Iribojegue majarā mari acawererā erā tarinugara puhru Goāmu mera majarā ne árīmasibirimuriñorā erā. Erā iidiro dopa iibiricārā mari.

<sup>12</sup> Goāmu ya wereniguiri marire Goāmu mera ōaro árīniguicū iiaa. Ōaripure marire gohrotocū iiaa. Eropiro ĩgu ya wereniguiri bu árīri árībeaa. Eropiro matamiji pepuripu usirimiji mera dirore erā wiri ĩha erā masiro dopa ta, ĩgu ya wereniguiri mari árīricurire mari pepirire ōaro masicū iiaa marire. Eropa masirā mari iiricuri ōaro árīcū, ōaro árībiricū säre masia ĩgu wereniguirire peerā. Iri mari buhecū mari árīricurire ōaro masipehocū iiaa marire. <sup>13</sup> Ne Goāmure mari árīricurire mari iirare duhmasibea mari. Árīpehrerire ĩgu ĩhacūnugurare ĩgu ĩhacūnugunirā säre ĩhami ĩgu. ĩgu tamerare mari iirare mari pepirire werepehorāca mari.

*Jesu turagu mari pahia opu āhrimi*

<sup>14</sup> Jesu Goāmu magu ĩgu sīrira puhru ĩgu Pagu pohrogue dujadigu árīmi. ĩgu turagu mari pahia opu āhrimi. Eropigu mari ya árīburire Goāmure serēbasami. ĩgu eropa árīgu árīcū ĩarā maripu ĩgu yare ōaro yuhrirā árīrā ĩgure ōaro umupeoniguicārā. <sup>15</sup> ĩgu Jesucristo mari pahi árīgu mari ñero taricū ōaro mojomoro ĩagu āhrimi. Mari ñerire uaribejarire masimi ĩgu. Watī árīpehreri ñerire ĩgu marire iidorero dopa ta Jesu säre ñerire iidoreripu. ĩgu eropa iidorequerecū ĩgu ñerire iibiripu. ĩgu eropa ñerire iidorerire iidoredigu árīgu marire mojomoro ĩagu marire itamumasimi. <sup>16</sup> Eropirā “Yure yuhrigucumi,” arīrā Goāmure serērā. ĩgu marire mahimi. Eropigu mari ĩgure serēcū marire mojomoro ĩagu marire itamugucumi. Eropigu mari ñero iidiacū säre ĩgu marire itamugucumi.

## 5

<sup>1</sup> Árīpehrerā pahia oparā, masa mera majarā āhrima. Beyenirā āhrima erā mera majarā yare Goāmure serēbasamorā. Eropirā masa ñerire erā iira dipuwajare Goāmure serēbasama erā mera majarāre. Eropa serēbasarā waibugure wejē soe mujuma Goāmure. <sup>2</sup> Pahia oparā gajirā masa iro dopa ōaro masipehobirā āhrima. Gajisubu ōarire iibirā āhrima erā sā. Eropa masibirā árīrā gajirā masibirāre itamumasima nijiyajaro mera. Eropirā ōarire iibirā säre ōaro mera itamumasima. <sup>3</sup> Eropirā ōaro masipehobirā ñeri iira dipuwajacurā āhrima erā sā. Eropirā erā basi erā ñerire erā iira dipuwaja waibugure wejē soe mujuma Goāmure. Gajirā masa ya árīburire erā ñeri iira dipuwaja erā serēbasadiro dopa ta, erā basi erā ya árīburi säre serēma Goāmure.

<sup>4</sup> Eropigu ĩgu ĩgu gamero pahia opu ñajabeami. Goāmuru ĩgure beyegu, pahia opu acumi. Iribojegue majagu Aarō mure ĩgu apidiro dopa ta gajirā pahia oparā säre apimi ĩgu. <sup>5</sup> Eropa ta Cristo sā ĩgu basi ĩgu gamero pahia opu ñajabiripu. Goāmuru ĩgure opu acugu ōpa arīpu:

Yu magu āhraa muhu. Dohpagāre mure dehyoacū iiba yuhu, arīpu Goāmu.

<sup>6</sup> Gajisubu òpa arìpũ Goãmũ Cristore:

Árìpehrerìnurire pahì árnìguicãgũca mũhũ. Melquisede ìgũ árĩdiro dopa ta pahì árnìguicãgũca mũhũ, arìpũ ìgũ magure.

<sup>7</sup> Cristo i yeba árìgũ bũrìgã gaguinigui, co deco mera Goãmũre turaro serèpũ ìgũ, “Yũre masuque,” arìgũ. Mari Pagupũ Goãmupũ ìgũre sĩridìgũre masumasìgũ árìpũ. Ìgũ eropa serècũ Goãmũ peepũ ìgũre. Goãmũ gameri dihtare ìgũ iidiacũ ìagũ Goãmupũ ìgũ serèrare peegũ yũhrìpũ. <sup>8</sup> Eropìgũ Cristo Goãmũ magũ árìquerègũ ñero tarìpũ ìgũ. Eropa ñero tarìgũ yũhrìpũ Goãmũre. Eropa yũhrìgũ òaro yũhrìrìre masituhapũ. <sup>9</sup> Eropa yũhrìdìgũ crusague sĩrìgũ masa erã ñerire cãdijìgũ árìpehrerã ìgũre yũhrìrãre taubu wapũ. <sup>10</sup> Eropìgũ Goãmupũ ìgũre pahia opũ masa yare serèbasabure apìpũ. Eropìgũ Melquisede pahia opũ ìgũ árĩdiro dopa ta àhrimi Cristo.

*Cristo yarã ìgũre umupeo duhucũ gũhya àhraa*

<sup>11</sup> Baja òpa árìrìre mũare werenemodìaa gũa. Gũa eropa werenemodìaquerecũ ta mũapũ peediabìrã àhraa. Eropìrã mũare gũa werècũ mmasumasìgũ árìpũ. Ìgũ eroasiya mara. <sup>12</sup> Yoari boje Cristo yarã árìraa mũa. Eropa árìrã dohpaguere gajìrãre buherãgũe árìboca mũa. Mũa eropa árìbonìrã árìquerecũ ta gajìrã mũapũre buherãcoma. Goãmũ yare mũare buhemũhtarare mũare buhero gahmea daja. Ne buhenũgarã iro dopa ta àhraa mũa. <sup>13</sup> Apĩco mihrìrã majìrãgã árìnìma. Erã iro dopa ta mũa sã àhraa òaro masìbìrã árìrã. “I ñeri àhraa. Ipũ òari àhraa,” arì ìha masìbeaa mũa. <sup>14</sup> Barìre barãpũ mũrã àhrìma. Erã iro dopa árìrã òaro buhenìrã òaro pepì masìrã mũa árìcũ òaboaya. “I ñeri àhraa. I òari àhraa,” mũa arì ìha masìrã árìcũ òaboaya.

## 6

<sup>1-2</sup> Eropìrã Goãmũ yare òaro masìrã, òaro yũhrìrã árìrã. Cristo yare negohragũere buhenũgarã òpa masìnũgabũ mari: Mari gamero mera mari iiri duhpìburi árìbeaa. Mari iiri mera tarìsòme mari. Tarìmorã Goãmũre umupeoro gahmea marìre. Ire negohragũere buhenũgama marìre. Eropìrã marìre wãiyema. Mojotorìre marìre erã duhpeorìre buhe, sĩrìnìrã erã masa mũrìborore buhe, i mũmũ pehrera pũhrũ Goãmũ ìgũ dipuwaja moaborore buhe, ìgũ dipuwaja moamorã erã ñero tarìnìguìborò sãre buhe, i sãre marìre negohragũere buhenũgama. Eropa árìrì buherìre mari masìtuhajarare buhenemobìrã gajì buherìre òaro buhenemorã. <sup>3</sup> Eropìrã Goãmũre, ìgũ ya sãre masìnemorã. Goãmũ ìgũ gamecũ eropa ta iirãca mari.

<sup>4</sup> Goãmũ yare masìnìrã irìre duhurãre ne dipaturi erãre erã ñeri iirare erãre bũjawerecũ iimasiya mara daja. Eropa árìrã, Cristo ìgũ taunìrã árìrã Espìritu Santore oparìma. <sup>5</sup> Eropìrã Goãmũ ya werenìguìrìre peerã òari werenìguìrì irì árìcũ masìrìma. Eropìrã pehrerìnũ pũhrũgũe Goãmũ ìgũ turari mera mari eropa árìnìguìborore, masare ìgũ dipuwaja moaboro sãre erã masìrìma. <sup>6</sup> Eropa árìrã Cristo yare erã duhurã Goãmũ magũre dipaturi crusague erã pabiadiro dopa ta ìgũre iirã iima. Erã eropìcũ ìarã gajìrã masa Cristore weryama. Eropìrã dipaturi erãre, erã ñeri iirare erã bũjawere òarìre gohrotocũ iimasiya mara. <sup>7</sup> Òpa àhraa irì mari werenìguì queorì mera buhecũ:

Ōari yebare wuaro deco aricū erā oteri ōaro puhri ducacua. Eropigu iri pohe opu ducare opami igu baburire. Iri yeba ōari yeba árīcū iha mucubirimi. Eropa ta Goāmū iimi igu yare peenirā sāre. Erā igu yare ōaro iicū iha mucubirimi erā mera. <sup>8</sup> Gaji yebapu añapora mera, taa mera iri yeba tiaro duhpburi yeba árībeaa. Eropa árīri pohere cóacāro gahmea. Eropa ta Goāmū iimi igu igu yare peequererā iibirāre. Erāre dipuwaja moa peamegue cóāgucumi.

*Cristore eropa umupeoniguirāre taumi Goāmū*

<sup>9</sup> Yu mahirā, muare eropa arī werequeregu ta muapure “Cristore duhuristo yare erā duhurā Goāmū mā āhraa,” arīgu iibeaa. Muapu Cristo igu taurā āhraa. Eropirā ōarire iirā iica mua. Irire masia yūhu. <sup>10</sup> Mari ōaro iira waja Goāmū queoro marire ōaro iigu āhrimi. Eropigu igu ya árīburire mua turaro mohmerare cādijisome igu. Mua igure mahirā igu yarāre itamuabu mua. Dohpague sāre erāre itamuniguia mua. Īgure mua eropa mahirare cādijisome igu. <sup>11</sup> Mua ojocarinigucāropē gajirāre mua umupeocū, mua itaisto yare erā duhurā Goāmū mmuniguicū sāre gahmea gua. Mua eropiicū iagu ōaro iigucumi mari Pagu muare. <sup>12</sup> Eropirā mua tericūrā árīcū gamebeaa gua. Gajirā Cristo yarā ñero tariquererā Goāmure “Īgu diaye ta árīgu āhrimi,” arī umupeonigucāma. Erā eropiicū iagu Goāmū “Masare ōarire ogara,” igu arīdiro dopa ta erāre opehogucumi. Eropirā mua sā erāre ihacūrā erā iro dopa ta iinigucāque.

<sup>13-14</sup> Iribojegue Goāmū Abrahāre ōpa arī apipu: “Yu waī mera diaye ta ire arīgu iiaa mure. Mure ōaro iigura. Eropigu mu pāramerā árīturiarāre bajarā masa árīcū iigura,” arī werepipu Goāmū. Eropa arī werepipu igu ya waī mera waīpeopu. Gajigu igu tauro árīgu ne maricū igu ya waī mera eropa waīpeopu. <sup>15</sup> “Mure ōaro iigura,” Goāmū igu arī apirare Abrahāpu ōaro igu umupeoyura puhru Goāmū igu arīdiro dopa ta igure ōaro iipu. <sup>16</sup> “Goāmū mera diaye arīgu iiaa,” masapu arīrā, erā erā tauro árīgu waī mera waīpeorā iima. “Goāmū mera diaye arīgu iiaa yūhu,” yujugu igu arīcū gajigu peegu “Diaye āhraa,” arīgucumi. Duyasomasibeami. <sup>17</sup> Eropigu Goāmū Abrahāre “Mure ōaro iigura,” arī apigu “Yu waī mera diaye ta arīgu iiaa,” arī waīpeopu. Īgu eropa waīpeo wererare peerā “Diaye ta āhraa iri,” arī masia. Eropirā “Īgu arīrare ne gohrotosome,” arī masia mari. Irire mari masiboro dopa igu arī apira mera igu waīpeogu eropa werepipu. <sup>18</sup> Eropigu igu arī apira mera, igu waīpeora mera diaye igu arīrare masicū iipu Goāmū marire. Eropiro igu waīpeocū igu arī apira ne gohrotosome. Eropigu Goāmū ne gūyabeami. Īgu eropa árīgu árīcū masirā, mari marire igu tauborore mucubiri corerāca, “Eropa ta iigucumi,” arīrā. <sup>19-20</sup> Eropa igu tauborore corerā guñaturarā āhraa mari. Eropa árīrā “Mari sirirā Goāmū pohro warāca,” arī masirā güibeaa. Pahia opu Goāmū igu árīri taribu gohrague ñajagu, cāhmotariñe suhriro pohecague tariñajami. Eropa ñajagu masa ya árīburire serēbasami Goāmure. Īgu eropiidiro dopa ta Jesu sā umarogue Goāmū árīroque ñajamūhtadi árīmi. Eropa ñajamūhtagu mari sāre erogue ñajaburire ahmu serēbasami. Eropigu árīpehrerinūri nucu serēbasagu iimi pahia opu árīgu. Melquisede pahī igu arīdiro dopa ta pahia opu āhrimi igu Jesu.



## 7

*Melquisede pahi ĩgu árĩdiro dopa ta Jesu pahia opu āhrimi, arĩ gojañumi*

<sup>1</sup> Melquisede iribojegue majagu Salem waĩcari maca majagu opu árĩmuriu. Eropigu pahi árĩgu Goamu turagure umaro majagure masare serēbasagu árĩmuriu. Eropigu gajirā oparāre Abrahā gamewejētuhā, ĩgu dujaricū gohra, Melquisede ĩgu ya maca árĩdigu waha, Abrahāre bocatĩriu. Eropā bocatĩrigu ĩgure serēbasapu Goāmure: “Ōaro iique ĩre,” arĩ serēbasapu Abrahāre. <sup>2</sup> Abrahāpu ĩgu gamewejē tarinugara puhru gajirā oparā yare aĩ dujapu. ĩgu eropa aĩ dujarare merogā dūhapu ĩgu Melquisedere. Diez ĩgu aĩ dujara árĩcū yujuñe opu Melquisedere. Melquisede ĩgu waĩ mari ya mera arĩro “Tauro opu ōaro iigu āhrimi,” arĩdiaro iiaa. Eropigu ĩgu Salem waĩcari maca majarā opu ĩgu árĩcū iri maca maja waĩre waĩcari. Salem waĩ ōpa arĩdiaro iiaa: “Tauro opu masare ōaro game mahicū iigu āhrimi,” arĩdiaro iiaa. <sup>3</sup> Ne Melquisede pagu sumārāre, ĩgu core árĩmuhtanirāre, ĩgu acawererāre erā were gojatura mara. ĩgu masa dehyoarare, ĩgu sĩrira sāre were gojatura ne mara. Eropigu eropa árĩniguigu iro dopa árĩpu ĩgu. ĩgu eropa árĩgu árĩcū Goamu ĩgu magu ĩgu pahi ĩgu árĩrare marire buhemi. Melquisede pahi eropa árĩniguigu iro dopa ta āhrimi ĩgu Jesucristo Goamu magu. ĩgu iro dopa ta Cristo sā pahi árĩgu eropa árĩniguicāgu āhrimi.

<sup>4</sup> Eropigu Melquisede turagu árĩrare guñaque. Abrahā mari ñecu muru opu gohra árĩqueregu ta Melquisedepure ĩgu duja aĩrare dūhapu. Diez ĩgu duja aĩra árĩcū yujuñe opu Melquisedere. Eropā ta ĩgu duja aĩ ĩgu dūharare opu ĩgure. <sup>5</sup> Eropiro Moise ĩgu doreri mera árĩpehrerā gajirā Israe masare iripēta wajayedorepu erā pahiare. Eropā doregu Levĩ pāramerā árĩturiarāre erā acawererā árĩturiarā erā wajayerire ñeadoregu apimuriu. Levĩ pāramerā ya curu majarā pahia dihta wamuriñorā. Eropirā gajirā ya curu majarā sā Levĩ pāramerā mera Abrahā pāramerā árĩturiarā árĩmuriñorā. Erā acawererā árĩquererā erā Levĩ pāramerāre wajayemuriñorā. <sup>6</sup> Melquisedepu Levĩ pārami árĩturiagu árĩbiriqueregu ta wajaseapu Abrahāre. Eropigu “Mure ōaro iigura,” ĩgu Goamu arĩ apidigu árĩqueregu Abrahāpu Melquisedere wajayepu. Eropigu Melquisedepu Goāmure Abrahāre serēbasagu ōaro árĩdoremuriu. <sup>7</sup> Ōaro árĩdoregu Melquisedepu ĩgu ōaro árĩdoredigu Abrahā tauro árĩpu. Irire mari ōaro masia. <sup>8</sup> Mari mera majarā pahia marire merogā wajasearā mari iro dopa ta masa āhrima. Eropā árĩrā sĩrimorā ta āhrima erā sā. Iħĩ Melquisedepu iribojegue Abrahāre merogā wajaseadigu eropa árĩniguigu iro dopa āhrimi ĩgu. “ĩgu sĩria wañumi,” arĩ werera ne mara. Eropā ta āhraa Goamu yare erā gojarapūgue. <sup>9</sup> Dohpagu majarā Levĩ pāramerā árĩturiarā pahia árĩrā masare merogā wajaseamuriu. Eropā árĩrā erā árĩquerecū ta Abrahā erā ñecu árĩgu Melquisedere merogā wajayegu árĩpehrerā Levĩ pāramerā ya árĩburi sāre wajayebasagu iimuriu. Eropirā Levĩ pāramerā sā Melquisedere wajayenirā iro dopa āhrima. <sup>10</sup> Melquisedere Abrahā ĩgu wajayerasubure Levĩpu masa dehyoanibiripu dohpa. Eropā masa dehyoabiriqueregu ta ĩgu ñecu Abrahā dūpūgue ĩgu árĩbodiropo dopa ta

Levípa árítuhagpa iippa. Eropigpa Melquisede Abrahãre ígpa bocatírícũ Leví sã ígpa ñecpa mera ígpa áríboro dopa árígp pa iippa. Eropa árígp Leví, ígpa páramerã mera Melquisedere merogã wajayenirã iro dopa árírã erã ígpa doca árírã íñorã.

<sup>11</sup> Ígpa dorerire apigpa Goãmpa Aarõ páramerã áríturiarã Leví ya curu majarãre pahia árídoremurippa. Eropirã ígpa doreri dorediro dopa ta erã pahia waimurãre soe mujurã masa ya áríburire serêbasamuríñorã Goãmure. Erã pahia erã eropiiquerecũ masa Goãmpa mera õaro wamorã áríbirimuríñorã dohpa. Erã pahia erã iira mera masa õarã wacũ Goãmpa erãre gohrotobure Cristore obeobiriboñumi. Eropigpa ígpa obeodigpa marire Goãmpa mera õaro árícũ iigpa aridi árími Cristoppa. Ígpa Leví ya curu majagpa Aarõ muru iro dopa áríbirippa. Melquisede iro dopa áríppa. <sup>12</sup> Eropigpa pahiare gohrotogpa, marire doreri sãre gohroto gãmemi ígure. Pahia erã ítamuri mera mari taribiro dopa ta iri doreri mera mari taribea. Eropiro iri dorerire gohrotopehoro gãmemi. <sup>13</sup> Aarõ Leví sã, erã ya curu majarã dihtare pahiare acumurippa Goãmpa ígpa dorerire apigpa. Ígpa eropa acuquerecũ ta dohpaguere mari Opure Cristore pahire Goãmpa ígpa acudigpa gají curu majagpa ãhrimi. <sup>14</sup> Ígpa mari Opupa Cristo Judá ya curu majagpa masa dehyoapp. Moise pahiare acugpa, Judá ya curu majarãre ne acubirimurippa. Irire õaro masia mari.

<sup>15</sup> Ire masirã, õpa mari õaro masia: Dohpaguere ne ígpa acudigpa pahí Cristo Melquisede iro dopa árígp ãhrimi. <sup>16</sup> Iribojegue maja doreri dorediro dopa ta Leví ya curu majarã dihta pahia ñajamuríñorã. Jesucristoppa Goãmpa ne ígpa acudigpa gajirã pahia erã iro dopa pahí ñajabiridigpa árími. Ígpa Goãmpa turari mera árípehrerinurí árígp ãhrimi. Eropigpa iri turari mera pahí ñajadi árími ígpa. <sup>17</sup> Õpa ãhrra Goãmpa yare weremũhtanirã erã gojarapũgue:

Árípehrerinurire pahí áríniguigũca mũhpa. Melquisede ígpa pahí ígpa áríniguídiro dopa pahí áríniguicãgũca mũhpa, aríppa Goãmpa ígpa magure, arí gojañuma iri bojegure.

<sup>18</sup> Goãmpa ígpa doreri Moiserẽ ígpa apimũhtara doreri turari áríbirippa. Eropigpa iri dorerire duhucãdi árími Goãmpa. <sup>19</sup> Moiserẽ ígpa apira doreri mera ne õaro tariburire opabirimuríp pa mari. Eropigpa dohpaguepura Goãmpa marire ígpa tauborore marire apidigpa árími. Ígpa eropiicũ dohpaguere ígpa pohrogue wamasia mari. Eropirã ígpa mera wereniguimasia.

<sup>20</sup> Eropigpa Cristore pahí acugpa, “Yupa waí mera mũre acugpa iiaa,” aríppa Goãmpa. Gajirã pahia ñajacũ ígpa iro dopa waípeo acubirimurippa erãre. <sup>21</sup> Cristoppa ígpa Pagupa waí werepira mera pahí ñajapp. Õpa arí werepippa ígpa Pagupa Cristore:

Yũhpa mũ opa yupa waí mera mũre weregpa diaye weregura. Eropigpa ire ne gohroto mariro werea mũre. Árípehrerinurire pahí áríniguicãgũca mũhpa, arí werepippa Goãmpa ígpa magure.

<sup>22</sup> Eropa werepigpa mama buherire marire apigpa, marire ígpa tauborore apigpa iippa. Iribojegue maja doreri tauro mari õaro áríborore apigpa iippa. Eropigpa Goãmpa masare “Õaro iigura,” ígpa arídiro dopa ta iibu, Jesure obeodigpa árími marire taubure. <sup>23</sup> Árímũhtanirã pahia erã sírícũ íarã gajirã gohroto ñajamuríñorã daja. Eropirã erã bajarã

pahia wañorã. <sup>24</sup> Jesupu eropa árĩniguicãmi. Eropirã ĩgure gohrotorã ne marima pahia. <sup>25</sup> Eropigu ĩgu eropa árĩniguigu, Goãmure eropa serēbasaniguicãmi ĩgu ĩgu yarã ya árĩburire. Eropigu Goãmu mera erã eropa árĩniguiboro dopa masare taumasimi ĩgu. Árĩpehrerã ĩgure umupeorã Goãmu pohrogue warãca. Eropigu Jesu àhrimi uputu marire taubu.

<sup>26</sup> Eropigu Jesu àhrimi mari pahia opu. ĩgu tamerare burigã gahmea mari. Ne ñeri dipuwaja marigu àhrimi ĩgu. Eropigu masa iro dopa ñerire iibiridi árĩmi. Eropigu Goãmu ĩgure ñerã watope árĩdigure aĩgu, umarogue api, árĩpehrerã gajirã tauro árĩgu opu acupu. <sup>27</sup> Gajirã pahia iro dopa árĩbeami ĩgu. Erãpu umuri nucu waibugure wejẽ, soe muju serēmũrima Goãmure masa ñeri iira dipuwaja cãdijidorerã. Erã basi erã ñeri dipuwajare serēmũhtamũrima. Pũhrũ gajirã ñeri dipuwaja sãre serēbasamũrima erã. Eropirã erã bajasuburi eropa Goãmure serēbasamũrima. Jesupu pahĩ árĩgu, yujusubu ta masa ñeri dipuwajare Goãmure serẽpu. ĩgu waibugure wejẽbiri ĩgu basi sĩridigu árĩmi mari masa ñeri iira dipuwajare taubu. <sup>28</sup> Goãmu doreri Moisere ĩgu apira mura pahia oparã ñajadorea. Eropa erã ñajaquererã, ñeri marirã árĩbeama pahia ñajarã. Iri doreri pũhrũ Goãmu ĩgu magure pahire acugu “Diaye ta pahĩ árĩniguicãgucumi,” arĩ acupu. ĩgupu ñeri mariro eropa árĩniguicãmi.

## 8

*Goãmu masare “Mũare taugura,” arĩ apipu daja ĩgu Moisere arĩ apirare gohrotogu. ĩgu mama apirare werebasagu àhrimi Jesu*

<sup>1</sup> Iri árĩpehrerire arĩ wererã i tamerare mũare arĩrã iiaa: Mũare gua weredigu pahia opu ĩgu tamera mari yagu gohra àhrimi. Mari ya árĩburire Goãmure serēbasagu ta àhrimi. Uмарogue Goãmu turatarigu ĩgu opu doaro pohro ĩgu diayepu doami ĩgu Cristo mari pahia opu. <sup>2</sup> Eropigu Goãmu wihi i yeba maja wihi, masa erã iira wihigue mohmebeami. Uмарogue árĩri wihire mari Opu ĩgu iira wihire Goãmu ya árĩburire mohmebasami. Iri wihi tamera Goãmu ya wihi gohra àhraa.

<sup>3</sup> Eropirã árĩpehrerã i yeba majarã pahia oparã waimũrãre wejẽ soe muju Goãmure omũrima masa ñero iira dipuwajare cãdijidorerã. Eropa ta iimorãre apidigu árĩmi Goãmu. Eropigu mari yagu pahĩ Cristo sãre apigu eropa ta iidorepu. Eropigu mari ñeri iira dipuwajare Jesucristo ĩgu basi sĩridi árĩmi. <sup>4</sup> Moise doreri dorediro dopa ta i yebague pahia masa erã ñeri dipuwaja cóãburire mohmebasama. Eropirã i yebague pahia árĩtuhama. Erã eropa árĩtuhajacũ Jesupu mari yagu pahĩ i yeba árĩniguigu, pahĩ árĩbiriboñumi ĩgu. <sup>5</sup> I yeba majarã pahia erã mohmerire i yeba maja wihi ta Goãmu wihi mohmerã árĩtuhajama. Goãmu wihi gohra umarogue àhraa. Eropiro Goãmu wihi i yeba maja wihi umaro maja wihi ĩnacũ iira wihi àhraa. Eropigu Moise iri wihire i yeba maja wihire ĩgu moaboro coregã Goãmu òpa arĩpu ĩgure. “Utagugue árĩgu mũre yu ĩhmudiro dopa ta yaha wihire òpa iique. Yũhu dorediro dopa ta yaha wihire queoro iique,” arĩmũripũ Goãmu ĩgure. <sup>6</sup> Dohpaguepũre Jesu pahĩ árĩgu ĩgure apira mohmeri i yeba majarã pahia mohmeri tauro òaro àhraa. Bu

gohra áríbeaa. Goãmũ masare “Cristo mera mũare ðaro iigũra,” ïgu arĩ apira iribojegue maja doreri Moise doreri tauro ðari áhraa. Marire ïgu arĩ were apira iri doreri tauro marire ðaro árícũ iiroca. Eropigũ marire Goãmũ mera amubasagũ árĩgu, Cristopũ gajirã tauro pahi áhrimi.

<sup>7</sup> Negohrague Moise dorera mera mari Goãmũ mera ðamasibirimuribũ. Iri doreri mera mari ðacũ gaji buherire apibiriboñumi Goãmũ. Iri doreri mera mari ðacũ, “Cristo mera mũare ðaro taugũra,” arĩ werebiriboñumi marire. <sup>8</sup> Iri dorerire erã bocatũbirirare weregu ðpa arĩpũ ïgu yarãre Israe masare:

ðpa arãa yũhũ mũa Opũ: “ðaro peeque. Pũhrũgue gaji buherire weregũra yaharãre Israe masare, Judã ya curu majarã sãre. <sup>9</sup> Iri buheri erã ñecũ sũmarãre erãre werepira iro dopa ne árísome. Yũ basi erãre Egipto yebague árĩnirãre wiugu erãre werepiribũ. Yũ eropa arĩ werepirare tarinũgama erã. Erã eropiicũ ïagu negohrare erãre yũ wererare duhucãbũ. <sup>10</sup> Eropigũ pũhrũgue Israe masare ðpa arĩ weregũra: Yũ dorerire erãre guñacũ iigũra. Erãre yũ dorerire yũhridiacũ iigũca. Eropigũ yũ Goãmũ erã opu árĩgũra. Eropirã erãpũ yaharã masa árĩrãcoma, arĩ weregũra. <sup>11</sup> Eropirã irisubure erã mera majarãre erã acawererãre ne erã ðpa erã basi game arísome: ‘Dohpaguere mari Opũre Goãmũre masique mũa,’ ne arĩ game buhesome. Erã árĩpehlerã yũre masituharãcoma. Majirãgã, mũrã sã yũre masirã dihta árĩrãcoma. <sup>12</sup> Eropigũ erã ñeri iirare cãdijigũca yũhũ. Eropigũ erãre dipuwaja moasome yũhũ,” arãa yũhũ mũa Opũ, arĩpũ Goãmũ ïgu ya wereniguiri erã gojarapũgue.

<sup>13</sup> Eropa arĩgu mama buherire apigũ, iribojegue maja dorerire duhucũ iigu iimi. Eropiro mũra doreri ïgu duhucũ iira pũhrũ iri doreri mũra gohrotopherea waro iiaa.

## 9

*I yeba maja taribure mũmaro maja taribu sãre Goãmũre umupeori taribure werepũ*

<sup>1</sup> Negohraguere Goãmũ ïgu dorerire Moisere apigũ masa ïgũre umupeoburi sãre werepipũ. Eropigũ Goãmũre erã umupeoburi wihi sãre iidore apipũ. <sup>2</sup> Iri wihi waimurã gasiri wihi árĩyoro. Pe taribu opayoro. Wũari taribu erã ñajamũhtari taribu Goãmũ ya taribu waĩcũyoro. Iri taribure erã sihãgori yucũ duhpeodigu árĩyoro. Eropárícũ mesa sã árĩyoro. Iri mesa weca Goãmũre erã ori pan peyayoro. <sup>3</sup> Gaji taribu suhri mera erã cãhmotara taribu árĩyoro. Iri taribu Goãmũ ïgu árĩri taribu gohra waĩcũyoro. <sup>4</sup> Iri taribugue oro mera erã iira mesa, incienso erã soeri mesa árĩyoro. Eropiro oro ðari mera erã sũra comoro ero oyayoro. Iri comoro waĩcũyoro Goãmũ arĩ werepira gojara dicũri comoro. Iri comoro pohecague dicũyoro. Yuju coro oro coro dicũyoro. ïgu masare ejorañegã mana waĩcũriñegã dicũri coro árĩyoro. Eropiro iri comoro pohecague Aarõ yagu ïgu tuadigu pũcũdigu árĩyoro. Eropiro pemiji utãmiji Goãmũ ïgu doreri ïgu gojatura mijiri iri comoro pohecague dicũyoro. <sup>5</sup> Iri comoro weca perã anyua wéanirã árĩñorã. Erã wéanirã Goãmũ ïgu gosesiriri mera, “Iri taribure ïgu áhrimi,” arĩ werero iiyoro. Iri comoro

buariñe erã quẽdũpũri mera buasũyoro. Iri comoro buariñe weca masa ñero erã iira dipuwajare cãdijidoregũ waimurã di Goãmure erã orare wejẽsiripeopũ pahĩ opũ. Iripẽta weregũra i wihi majare dohpaguere.

<sup>6</sup> Eropirã iri wihire eropa erã ðaro erã amura pũhrũ pahia umuri nũcũ erã ñajajamuhtari taribu erã mohmerire iimuriñorã. <sup>7</sup> Eropigũ pahia opũpũ dihta gajĩ taribugũere ñajapũ. Bojori nũcũ igũ iri taribure yujusubu ta ñajapũ igũ. Eropa ñajagũ erã wejẽdigũ waibugũ dire aĩ ñajagũ, Goãmure umupeopũ. Iri di mariro ne ñajabiripũ. Igũ basi igũ ñeri iira wajare, árĩpehrerã gajirã Israe masa erã ñero iira dipuwaja sãre cãdijidoregũ dire aĩ ñaja apimuripũ igũ Goãmure. <sup>8</sup> Árĩpehreri i mera Espĩritu Santo marire õpa arĩ buhebu iimi: Iri wihi Moisere igũ apira wihigue Goãmure umupeoburi árĩrisubu masapũ Goãmure umupeorã iri wihigue ñajamasibiriñorã. Pahia opũ dihta Goãmũ igũ árĩri taribu gohraguere ñajamasimi masare serẽbasagũ. <sup>9</sup> I árĩpehreri Goãmure umupeori wihi majare masare apira, marire dohpague majarã buheburi dihta árĩyoro. Pahia erã ñeri dipuwajare waimurãre wejẽra mera masa ne Goãmũ mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã. <sup>10</sup> Goãmũ Moisere apira doreri deyoro maja iiri dihta ãhraa. Erã õpa baburi, erã õpa ihiburi, erã õpa coeburi, erã õpa iiri dihta árĩyoro. Eropiro iri doreri marire ðarã wacũ iibiriyoro. Goãmũ iri dorerire masa erã iiburire apiñumi Cristo ariboro core.

<sup>11</sup> Dohpaguere Cristopũ mari pahĩ opũ árĩgũ arituhadigũ ãhrimi. Eropigũ marire sĩribasara mera marire ðarã wacũ iituhadi árĩmi. Eropigũ Goãmure mari ñeri dipuwajare cóãdoregũ Goãmũ árĩrogue ñajaja i yeba maja taribure ñajabiripũ. Umãro maja wihi ñajapũ. Iri wihi i yeba maja wihi tauro ãhraa. Eropiro masa erã iira wihi árĩbea. <sup>12</sup> Eropigũ Cristo umarogue Goãmũ igũ árĩro gohrague yujusubu ta mari ñeri dipuwajare ñajatupũ. Eropa ñajagũ cabritoa dire, wecũa dire Goãmũ árĩri taribugue erã aĩ ñajaro dopa iibiripũ igũ. Igũ basi sĩrigũ igũ di gohrare cóãgũ árĩpehrerinũri Goãmũ mera mari ðaro árĩniguicãborore iipũ. <sup>13</sup> Ñeri oparãre guhraricũrãre coewearã erãre wejẽsiripeomuriñorã cabritoa di mera, wecũa di mera, wecũare erã soera niti mera. <sup>14</sup> Eropa iĩñorã masa erã dũpũre ñerire coewea cóãrã. Iri tauro Cristopũ igũ di mera mari pepirigue mari ñerire ðaro coewea cóãcãdi árĩmi. Iri ñeri dipuwaja oparã peamegue wabonirã árĩribũ mari. Jesucristopũ ñeri marigũ árĩgũ ta igũ basi crusague sĩrigũ Goãmure õpũ. Espĩritu Santo eropa árĩniguigũ igũ itamuri mera eropa õpũ igũ igũ basi. Eropigũ igũ mari ñerire igũ coeweadĩ árĩmi, Goãmũ ojocarigũ ya árĩburire mari ðaro iimasiboro dopa.

<sup>15</sup> Eropigũ “Õpa muare ðaro iigũra,” Goãmũ arĩ igũ mama werepidiro dopa ta Cristopũ iidigũ árĩmi. Eropa iidi árĩmi igũ Goãmũ igũ beyenirãre taubu. Igũ eropa taucũ árĩpehrerinũri igũ mera ðaro árĩrãca mari igũ yarã. Eropirã Goãmũ igũ yarãre igũ oburire oparãca mari. Moise doreri dihta árĩcũ masa erã ñeri iira dipuwajacũrã árĩmuriñorã dohpa. Eropa ñeri iira dipuwajacũrãre taubu igũ crusague sĩribasadi árĩmi. Igũ eropa sĩricũ mari igũ yarãre igũ oburire oparãca. <sup>16-17</sup> Õpa ãhraa mari masare. Yujugũ igũ sĩriboro

core ĩḡu acawererã ĩḡu yare aĩ gueremasibeama. Eropiro ĩḡu oparire ĩḡu acawererãre ĩḡu oburire ĩḡu gojatuyurapũ ĩḡu sĳrĳboro core iripũ wajacubeaa dohpa. ĩḡu sĳricũ ĳarã iripũ ĩḡu arĩ gojadiro dopa ta ĩḡu yare guererãcoma erã. <sup>18</sup> Eropa ta Goãmu masare werepĩmuhtara Moisere ĩḡu apira doreri sĳriro mariro di cõãro mariro ne duhpihuri áribiriyoro. Eropĩḡu waiḡuḡu dire Moise wejẽsirira puhrũ ĩḡu dorerire diaye ta ĩḡu iipũ. <sup>19</sup> Eropĩḡu õpa iimuhtapu Moise: Goãmu ĩḡu apira dorerire masare werepehopũ. Puhru cabritoa dire, wecuã dire deco mera morepu. Eropĩḡu isopo waĩcudĩḡu dupu mera oveja poari diari poari mera erã ñĩmurare turãpu. Iri dupu mera dire yosogu, Goãmu dorerire ĩḡu gojarapũ weca wejẽsiripũ. Áripehrerã masa weca sãre wejẽsiripeopũ. <sup>20</sup> Eropa iĩḡu õpa arĩpu ĩḡu: “Goãmu marire ĩḡu werepira ĩḡu dorera i di mera iri diaye áricũ masia mari. I dire ĳarã diaye ta ĩḡu arĩdiro dopa ta ĩḡu marire iiburire masia. Marĩpũre irire yũhrĩdoremĩ,” arĩpu Moise. <sup>21</sup> Eropĩḡu masare ĩḡu iidiro dopa ta Goãmu umupeori wihi waimurã gasiri wihire, áripehreri iri wihi áriĩri sãre wejẽsiripeopũ. <sup>22</sup> Eropa ta áhraa. ĩḡu doreri iri dorediro dopa ta baja ñerire di mera coeweadoreyoro. Eropĩḡu di cohmore mariro Goãmu mari ñeri iirare ne cãdĩjissime.

*Cristo ĩḡu dire cõãḡu, ĩḡu yarã erã ñeri iirare coewearu*

<sup>23</sup> Eropiro i yeba maja wihire, iri wihi áriĩri sãre ñerire coewearo dopa ta waimurã di mera wejẽsiripeomurĩpu. Eropiro iri tauro umarogue wamorãre erã ñeri dipuwaja oparare coero gahmea. Eropiro waimurã di tauro áriḡu ya di mera erã ñerire coero gahmea. Eropirã Jesucristo ya di mera coenirã wabu marĩpu. <sup>24</sup> Eropĩḡu Cristo mari ñeri iira dipuwajare Goãmure cõãdoreḡu Goãmure erã umupeori wihi masa erã iira wihire ñajabirĩpu. I yeba maja wihi umaro maja wihi ihacũ iira wihi áhraa. Goãmu ya wihi gohra umaro maja wihi áhraa. Eropĩḡu mari ñeri iira dipuwajare cõãdoreḡu Goãmũ áriĩro gohrague ñajapu Cristo. Umarogue wapũ ĩḡu Goãmũ core mari ya áriburire serẽbasabu. <sup>25</sup> Pahia opu bojori nuçu Goãmũ ĩḡu áriĩri taribugue erã ñeri iira dipuwajare cõãdoreḡu ñajamurĩpu waimurã di mera. Cristopũ sĳriḡu ĩḡu dire cõãdĩḡu Goãmure mari ñeri iira dipuwajare cõãdoreḡu erã iiro dopa bajasuburi ñajabirĩpu. <sup>26</sup> Bajasuburi ĩḡu dire cõãbu áriḡu, i yeba áriĩropẽ bajasuburi ĩḡu ñero sĳrinĩguicãboñumi. Yujusubu ta dehyoapu ĩḡu i yebaguere i umu pehrerĩnu coreḡã. ĩḡu dehyoagu ĩḡu yujusubu ta sĳribasara mera mari áripehrerã ñeri iirare cõãbu dehyoapu. <sup>27</sup> Áripehrerã mari masa sã yujusubu ta sĳrirãca. Mari Eropa sĳrira puhru, õarãre, ñerã sãre beyegucumi Goãmũ. <sup>28</sup> Yujusubu ta mari sĳriro dopa ta Cristo sã yujusubu ta sĳripũ bajarã masa erã ñero iirare cõãbu. Puhru dipaturi dujarĩḡucumi. Mari ñerire cõãdĩḡugue dujarĩḡucumi. Eropĩḡu irire dipaturi cõãḡu arissime. Eropa arĩḡu mucubirĩri mera ĩḡure corerãre taḡu arĩḡucumi. ĩḡu pohroḡue erãre aĩḡãbu arĩḡucumi.

## 10

<sup>1</sup> Moise doreri puhru Cristo masare ĩḡu õaro iiburire ĳhmura dihta áribũ. Eropiro Cristo masare erã ñeri iirare õaro cõãboro dopa iri doreri erã ñerire cõãmasibiriyoro dohpa. Eropiro iri doreri iri

iidorero dopa ta pahia bojori nucu Goãmure waimuräre wejê, soe muju, iiniquerecũ masa erã ñerire cóãmasibiriyoro. Goãmure umupeomoräre ðarã áricũ iimasibiriyoro iri doreri. <sup>2</sup> Iri mera masa erã ñerire cóãcũ, yujusubu ta Goãmure erã waimurã wejê di cóãra puhru erã ñerire cóãpehosũboñuma. Eropirã irisubu majarã, “Dipuwaja mara guare,” arĩ pepiboñuma masa. Eropirã iripêta dipaturi Goãmure waimurã wejêburire duhucãboñuma. <sup>3</sup> Õabirimuriñorã dohpa. Eropirã bojori nucu Goãmure waimuräre wejê di cóãcũ masa erã ñeri dipuwajare guñaniguicãñorã. <sup>4</sup> Wecua di mera, cabritoa di mera ne mari ñeri dipuwajare cóãmasiya mariyoro dohpa.

<sup>5</sup> Iri eropa áricũ ïagu Cristo i yebaguere ïgu ariboro core ðpa arĩpu Goãmure ïgu Pagure:

Waimuräre erã soe muju ocũ, trigo pogare erã ocũ sãre mu ïagu ïhasuabeaa muhu. Eropigu masa dehyoacũ iibu muhu yare. Muhu yare iira dupu mure mucubiricũ yu iiburi dupu áriroca.

<sup>6</sup> Ñerire erã cóãborore waimuräre wejê erã soe mujucũ ïagu ïhasuabirabu muhu. <sup>7</sup> Mu eropa ïhasuabiricũ ïagu ðpa arĩbu mure: “Mu gamerire yebague ïgu wagura. Yu eropiiburire arĩ gojara áhraa mu yare erã gojarapũgue,” arĩbu yuhu, arĩmuri pu Cristo ïgu Pagure.

<sup>8</sup> Negohraguere Goãmũ ïgu doreri waimuräre trigo poga sãre erã ori mera erã ïgure umupeodorequerecũ ta ðpa arĩpu Cristo ïgure. “Waimuräre soe muju erã ocũ, trigo pogare erã ocũ sãre gamebiribu muhu,” arĩpu ïgu. <sup>9</sup> Eropa arĩtuhagu ðpa arĩnemopu: “Mu gamerire yebague ïgu wagura,” arĩpu. ïgu eroparicũ ðpa masia mari. Iribojegue Goãmure erã ñerire cóãdorerã waimuräre wejê di cóãrare gohrotogu iipu Goãmũ. Eropa gohrotogu Cristo ïgu sĩridiro mera masare erã ñeri dipuwajare taugucumi Goãmũ. <sup>10</sup> Jesucristo ïgu dũpure ogu sĩrigu arĩpehrerã mari ñero iirare cóãdigu árĩmi. Yujusubu ta Goãmure ïgu dũpure ogu marire dipuwaja maricũ iidi árĩmi. Eropa ïgu Goãmũ ïgu gamediro dopa ta iidi árĩmi.

<sup>11</sup> Árĩpehrerã pahia umuri nucu Goãmure umupeori wihi mohmeniguima. Eropa mohmeniguirã muraro ta waimuräre wejê soe mujuma Goãmure masa ñerire cãdijidoremorã. Erã eropa iiquerecũ ta erã ñero iirire cãdijibeami ïgu. <sup>12</sup> Cristopu yujusubu ta mari ñeri dipuwajare sĩrigu, mari ñero iirare ðaro cãdijipehocãcũ iidigu árĩmi. Irire cãdijipehocũ iituha waha wapu ïgu Pagu pohrogue ïgu diayepu doagu wagu. Opu árĩgu erogue doacumi. <sup>13</sup> Erogure doagu coregu iimi. ïgure ïhaturiräre ïgu Pagu ïgu tarinugabasaborore coregu iimi. <sup>14</sup> Yujusubu ta ïgu sĩridiro mera ïgu coeniräre ðarã ñeri mariro erã árĩniguicũ iidi árĩmi. Eropigu Goãmũ pohro doami pare. <sup>15</sup> Jesucristo eropa iiboro core erã arĩ gojamũhtarare arĩ weremi Espĩritu Santo marire. ðpa arĩ weremi ïgu:

<sup>16</sup> ðpa arĩmi mari Opu: “Puhraguere ðpa arĩ weregura Israe masare. ‘Yu dorerire erã yuhridiacũ ïgu erã pepirigue apigura,’ arĩ weregura,” arĩmi ïgu.

<sup>17</sup> ðpa arĩnemomi Goãmũ:

“Erã ñero iirare dipaturi guñanemosome yuhu,” arĩmi ïgu, arĩ weremi marire Espĩritu Santo Goãmũ yare gojarapũgue.

18 Mari ñeri iirare ĩġu cādijicū dipaturi mari ñeri dipuwajare sĭribure gamebeaa mari.

*Goāmũ pohro mari ejaro dopa ta ĩġu mera ġũiro mariro mari wereniguimasia*

19 Cristo ĩġu sĭriro mera ĩġu di cóaro mera mari sã dohpaguere ġũiro mariro Goāmũ mera wereniguimasia. Eropirã ĩġure serēmasia. 20 Iribojegue Goāmũ ĩġu árĭri taribugue Goãmũre serēbu pahia opu dihta ñajamasimi. Iri taribure Goāmũ árĭrore cãhmotara suhrĭrore ĩġu dihta tari ñaja serēmasimi. Dohpague ta mari basi Goāmũ árĭro ñajaro dopa ta Goãmũre serēmasia. Pahia opu ĩġu iri taribugue ĩġu dire aĭ ñajaro dopa ta Cristopũ Goãmũ pohrogue ejapũ mari ñeri iirare cādijidoreġu eġaġu. Eropa iġu Goãmũ mera mari wereniguibodĭrore cãhmotadĭrore cóadi árĭmi. 21 Goãmũ pohrogue serēbasagũ mari Goãmũ yarã yagũ pahia opu turatariagũ àhrimi Jesucristo. 22 Eropirã, yũ acawererã, Cristo mari pahia opu árĭcũ ĩha mari Goãmũ mera wereniguimasirã árĭrã Goãmũre serērã. Diaye pepirã árĭrã, “ĩġu yũhrĭgucumi,” arĭ umupeorã ĩġure serērã. Cristo mari ñerire ĩġu di mera coenirã àhraa. Eropirã “Dipuwajacurã àhraa,” arĭ pepirã árĭbeaa mari. Eropirã ġuhrari marĭri deco mera coeweasũnirã iro dopa àhraa. Eropa árĭrã Goãmũre serērã. 23 “Muare taugura,” ĩġu arĭdiro dopa ta iġucumi. Eropirã ĩġu marire ĩġu tauborore ôaro mucubirimũhtayua mari. Irĭre mucubirimũhtayurã ne cādijibircãrã. Goãmũre eropa ġuñaturaniguicãrã. Eropa ġuñaturarã irĭre ġajĭrãre wererã mari. 24 Mari mera majarãre mahirã itamurã mari árĭpehrerã mari game mahi mari itamuboro dopa. 25 Eropirã ôaro gamenererã Goãmũre umupeomorã. ġajĭrãpũ gamenerebeama Goãmũ yare buhemorã. Erã ĭiro dopa iibircãrã. Mari mera majarãre Jesucristore umupeonemocũ iirã. I yebaguere mari Opũ ĩġu dujarĭboro merogã dũhyaa. Irĭre masirã turaro itamurã mari mera majarãre, Jesu yarãre erã Jesucristore umupeorire.

26 Diaye árĭri buherire mari masiquererã ta irĭre cóarã ñerire mari eropa iiniguicũ, Jesucristo sĭrĭra mera mari ñerire cóanemoboro ne mara. 27 Eropro eropa iirãre ġuhyaro dujaa. Árĭpehrerã ĩġure ĩhaturirãre dipuwaja moagũ turaro ũġurogue cóãġucumi Goãmũ erãre. Eropirã ĩġu dipuwaja moaborore ġũirã dihta àhrima ĩġu yare cóãnirã. 28 Moise dorerire tarinũġanirãre dipuwaja moarã erãre wejẽmũriñorã. Ne mojomoro ĩaro mariro wejẽmũriñorã erãre. Ũrerã erã ñero iirare weresãcũ peerã erã tarinũġarare masima. Ũrerã maricũ perã erã ñero iirare weresãcũ peerã erãre wejẽmũriñorã Goãmũ dorero dopa ta. 29 Erã ĭiido tauro Goãmũ magure ĩhaturirã dipuwaja moasũmorã árĭrãcoma. Cristo ĩġu di cóaro mera marire mari ñeri iirare cóadi árĭmi Goãmũ. ĩġu eropa cóãborore wereyupũ ĩġu. Eropirã ĩġu cóãnirã erã árĭquererã ta, pũhrũ ĩġu di cóarare “Bu gohra àhraa,” arĭrã ĩġu dipuwaja moamorã gohra árĭrã ta ĭirãcoma. Eropa árĭrã Espĭritu Santore ñero arĭ wereniguirã àhrima. ĩġu erãre mahĭġu àhrimi. Erã eropa ñero wereniguicũ ĩagũ turaro dipuwaja moagũcumi Goãmũ erãre. 30 Goãmũ eropa iġu árĭġure masia. Goãmũ ĩġu basi ta ôpa arĭrũ: “Yũhũ àhraa dipuwaja moabu. Erã ñerire ĭira dipuwaja, dipuwaja moagura yũhũ,” arĭrũ ĩġu. Ôpa arĭnemopũ:



“Yaharäre ñero iiräre dipuwaja moagura,” arĩpũ ĩgu, arĩ gojañuma ĩgu yare gojarapũgue. <sup>31</sup> Goãmũ ojocarĩgu marire dipuwaja moacũ guhyataria.

<sup>32</sup> Iribojegue mũa árĩrare guñaque mũa. Irisubure Goãmũ yare ne masinũgarã ñero tariquererã bajasuburi ñero tariquererã ne ĩgu yare cóãbiribũ mũa. <sup>33</sup> Yujuyerisuburi masa erã ĩhuro gajirã mũare ñero arĩ, ñero pabirama mũare. Eropirã gajirã Jesu yaräre erã ñero iicũ ĩarã eräre mojomoro ĩabũ mũa. <sup>34</sup> Erã Cristo yarã erã árĩra waja erã peresugue árĩräre mojomoro ĩabũ mũa. Eropirã mũa yare erã emaquerecũ ta mucubiriri mera “Ōaroca,” arĩmũribũ mũa. I yeba maja tauro ðarire umaroguere mũa opaburire masimũribũ. Iri ðari pehrebiriborore masibũ mũa. Irire masirã mũa oparire erã emacũ bujawerebiribũ mũa. <sup>35</sup> Eropirã irire guñatura duhubiricãque. Goãmũre eropa umupeoniguicãque. Mũa eropa iira waja mũare ðaro iigũcumĩ. <sup>36</sup> Goãmũ yare ðaro iiniguicãro gahmea ne duhuro mariro. Goãmũ yare iirã bocatiuro gahmea. Eropa iirã árĩrã ĩgu gamerire mũa iira puhũ ĩgu “Mũare ðpa ogura,” ĩgu arĩ apirare oparãca. <sup>37</sup> Ōpa áhrra Goãmũ yare erã gojarapũgue:

Merogã duh, ñero pabirama mũare. Eropiryaa Cristo ĩgu eraboro. Eropa eragũ mata erapurumujugũcumĩ. <sup>38</sup> Yaharã ðarãpũ yare umupeoniguicãrãcoma. Eropirã yaharã árĩniguicãrãcoma. Yũ mera eropa árĩniguirãcoma. Yahare cóãnrãpũre ĩhasũasome yũhũ, arĩmi Goãmũ, arĩ gojañuma.

<sup>39</sup> Maripũ Goãmũ yare cóãrã árĩbeaa mari. Eropirã peamegue wamorã árĩbeaa mari. Goãmũre umupeoa mari. Eropirã ĩgu taunirã áhrra ĩgu pohro wamorã.

## 11

### *Umupeorire werepũ*

<sup>1</sup> Ōpa áhrra umupeori: Goãmũre umupeorã, marire ĩgu ðaro iiburire ðaro masia. ĩgũre ĩabiriquererã ĩgũre umupeorã “Diaye ta iigũ áhrimi,” arĩ pepia mari. <sup>2</sup> Iribojegue majarã Goãmũre “Diaye ta iigũ áhrimi,” erã arĩ umupeocũ ĩagũ ĩhasũapũ Goãmũpũ.

<sup>3</sup> Goãmũ ĩgu wereniguirĩ mera árĩpeherrerire ĩhacũnugupũ. Eropigũ ĩgu mari ĩabirirare árĩpeherrerire mari dohpague mari ĩari sãre ĩhacũnugupũ. Irire mari ðaro masia Goãmũre umupeorã.

<sup>4</sup> Goãmũre umupeogũ Abelpũ cordero wejẽ, soe mujupũ Goãmũre umupeogũ. Eropa iigũ ĩgu tĩgu tauro ðaro umupeopũ ĩgu Goãmũre. Eropigũ Goãmũ ĩgu orare mucubiripũ. Eropa mucubirigũ “Ōagũ áhrimi,” arĩ ĩapũ ĩgu Abelre Goãmũre umupeogũre. Abel iribojegue sĩridigũ mũrũ árĩquerecũ ĩgu Goãmũre eropa ii umupeorare guña mari sã. Eropa guñarã. Goãmũre umupeoa mari sã.

<sup>5</sup> Enoco Goãmũre ĩgu umupeocũ ĩagũ mucubirimũripũ Goãmũ. Eropa mucubirigũ ĩgũre ĩgu pohrogue aĩmũriarũ. Eropa ta werea Goãmũ yare wereniguirire erã gojarapũgue. ĩgu eropa aĩmũriarũ arĩgu ne sĩribiripũ. <sup>6</sup> Goãmũre umupeobirã ĩgũre mucubiricũ iimasibea mari. Goãmũre serẽdiarã ðpa ĩgũre arĩ pepiro gahmea marire. “Diaye ta ĩgu Goãmũ gohra áhrimi. Eropigũ ĩgũre mari umupeocũ marire ðaro

iimi ĩġu,” arĭ pepiro gahmea. Mari eropa arĭ pepibirā mari ĩġure serēmasibeaa.

<sup>7</sup> Noé Goāmure umupeogu ĩġure ĩġu wererare ðaro yħripu. Pħru erā ñero waborore Goām ĩġure werecū peegu ðaro yħripu ĩġu. Eropa yħrigu wuadiru dohodiru ĩpu ĩġu acawererā dia miririñere tarimorā. Noé eropa umupeogu arĭġu i yeba majarā ñerā erā umupeobirirare, erā taribiriboro säre ĩhmugu ĩmuriġu. Eropiġu ĩġu umupeocū ĩagu “Ōagu āhrimi,” arĭ ĩamuriġu Goām ĩġure.

<sup>8</sup> Abrahā sā Goāmure umupeogu ĩġure yħripu. Gaji yebaguere ĩġure ĩġu oburi yebaguere Goām ĩġure wadocū ĩġure yħripu. ĩġu ya yebare wirigāgu ĩġu masibiriri yebague eġapu. <sup>9</sup> “I yebare mure ogura,” Goām ĩġu arĭcū peegu ĩġure umupeogu iri yebague eġa arĭmereġapu ĩġu. Ero arĭmereġaquereġu ĩġu gaji yeba majagu arĭro dopa waimurā gasiri wiri mera wihicu curimuriġu murano arĭbiriniġagu arĭġu. ĩġu magu Isaa sā ĩġu pārami Jacobo sā ĩġu ĩiro dopa ta ĩmuriñorā. “Mware i yebare ogura,” arĭ weremuriġu Goām erā säre. <sup>10</sup> Eropiġu i yebare curiġu macari ĩibirimuriġu Abrahā. Gaji macague Goām ĩġu arĭri macague umarogue ĩġu waborore coreġu ĩpu Abrahā. Iri maca Goām ĩira macau. Eropiġu ĩġu umupeocū ĩ arĭyoro. Eropiġu iri macare ne pehrebiriburi macare coreġu ĩpu.

<sup>11</sup> Goāmure umupeogo Sara waĭcugo, buro gohra arĭquerego porā marigo arĭquerego ta porācupo. “Goām ĩġu arĭdiro dopa ta ĩġucumi,” arĭgo ĩġure umupeogo porācupo. <sup>12</sup> Eropiġu Abrahā buġu gohra arĭquereġu ta porācupu. Eropirā ĩġu pāramerā arĭturiarāgue bajarā wacāñorā. Necāre, imipa yerire mari queorā yujuro bojeya mariro dopa ta, ĩġu pāramerā arĭturiarā säre queo bocafuaya mariñorā.

<sup>13</sup> Arĭpehrerā oā yu werenirā murague Goāmure umupeotuhajanirāgue siriñorā. Goām “Mware ogura,” ĩġu arĭrare opanibirāgue siriñorā. Eropa opabiriquererā “Goām ĩġu arĭdiro dopa ta pħrūgue ogucumi ġuare,” arĭ masiñorā. Eropa masirā mucubirimuhtañorā. Eropirā ðpa arĭñorā erā: “I yebague curirā āhraa. Gaji yeba majarā āhraa,” arĭmuriñorā erā. <sup>14</sup> Eropa arĭrā gaji yebare erā ya yeba arĭborore corerā ĩiñorā. Irire ðaro masia mari. <sup>15</sup> “Gaji yeba majarā āhraa,” erā arĭrā iribojegue erā cóara yebare ġuñarā ĩbiriñorā. Iri yebague dujaa wadiarā dujaa waboñuma. <sup>16</sup> Ōari yebapure gahme corerā ĩiñorā. Iri yeba umarogue āhraa. Erā eropa gahme corecū ĩagu Goāmure “ġua opu āhrimi,” erā arĭcū peegu ne ġuhyasiribiripu Goām. ĩġu pohro erā ya maca arĭborore ĩbasatuhadi arĭmi ĩġu. Eropiġu ġuhyasiribiripu.

<sup>17-18</sup> Goām Abrahāre ĩġu magure Isaare wejē soe mujadoreġu. ĩġure ĩadiagu eropa doreġu, “¿Diaye ta yure umupeori?” arĭġu. Eropiġu Goāmure umupeogu ĩġu arĭdiro dopa ta ĩiripu Abrahā. “Mu magu Isaa mera mu pāramerā arĭturiarāre opaguca muħu,” Goām ĩġu arĭdiro arĭquerecū ĩġu magure wejēbu ĩiripu Goām dorero dopa ta. <sup>19</sup> “Yu magure Isaare yu wejēcū Goām ĩġure masugucumi,” arĭ pepiġu ĩġure wejēbu ĩiripu. Eropiġu Goām ĩġure cāhmota ĩġure wejēdorebiripu. ĩġu pagu ĩġu eropa wejēbu arĭġu Isaa siriġu

árīpū. Eropigū sīridi masadigū iro dopa árīpū īgū. Eropigū Abrahā īgūre ojocarigū dipaturi opapū īgūre.

<sup>20</sup> Isaa Goāmure umupeogū īgū porāre Jacobore, Esaú sāre “Pūhrūgue Goāmū mūare ōaro iigūcumi,” arīpū.

<sup>21</sup> Goāmure umupeogū Jacobo īgū sīriboro coregā wahgānūgaja īgū tuadigū mera tuañanūgaja Goāmure serē umupeopū. Eropa serēgū José porāre ūmare “Goāmū mūare ōaro iigūcumi,” arīpū Jacobo.

<sup>22</sup> Goāmure umupeogū José īgū sīriboro coregā Israe masa Egipto árīrā erā wiriaborore weremūhtapū. Eropa erā wiriaborore masiyugū īgū sīrira dupū mūrarore aīgādorepū īgū porāre.

<sup>23</sup> Goāmure umupeorā ūrerā abe gohra Moisere dibuñorā īgū pagū sūmarā īgū masa dehyoara pūhrū. Ōagūgā īgū árīcū īarā īgūgāre dibuñorā. Iri yeba majagū tauro árīgū opū īgū majirāre wejēdorerire tarinūgarā īgūre dibuñorā erā. Erā erā opūre gūibiriñorā. <sup>24</sup> Moisere masudigo i yeba majarā opū mago árīpo. Eropa igo masudigū árīqueregū, Goāmure umupeogū “Opū mago magū āhrimi,” erā arī piyucū gamebiripū īgū Moise. Oparā mera majagū árīdiabigū Goāmū yarā mera majagū árīdiapū. <sup>25</sup> Goāmure tarinūgadiagu árīgū īgūre masudigo pohrogue bajamenūrigā ōaro árīboñumi. Eropa ōaro árību árīqueregū īgū Goāmū yarā mera ñero taridiapū. <sup>26</sup> Eropigū Egipto majarā ya ōarire tauro Cristo ya árīburire ñero tariburire gamepū. Pūhrūgue Goāmū īgūre īgū ōarire oborore masigū ñero taridiapū. <sup>27</sup> Goāmure umupeogū Egipto majagū tauro opū, īgū mera īgū guacū gūibiripū. Eropa gūibigū iri yeba árīdigū iri yebare cóācā waha wapū. Goāmure īabiriqueregū “Goāmū árīcumi,” arī pepipū īgū. Eropigū īgū iiborore ne duhubiripū.

<sup>28</sup> Goāmure umupeogū Moise Israe masare Goāmū īgū tauborore masipū. Eropa masigū Goāmū īgū dorediro dopa ta Israe masa erā disīpororire erā tura mijirire dī mera wejēsiri tuhdorepū. Eropa dorepū anyu masare wejēgū erā masa tīrāre wejēbodigū Israe masa erā masa tīrāre wejēbiriboro dopa. <sup>29</sup> Goāmure umupeorā Israe masa deco diariya waīcūriya deco watope árīri maha deco mariri maha taribujañorā. Erā eropa taribujacū īarā Egipto majarāpū erāre nūrsiarā erāre īhacū taribujanirā miri sīria wañorā.

<sup>30</sup> Goāmure umupeorā Israe masa Jericó maca sāriro, wūari sāriro pūrapū majisora curiñorā. Siete nūri gohra iri macare majisora curiñorā erā. Iri nūcū nūri erā majisorara pūhrū iri sāriropū dijapehrea wayoro. <sup>31</sup> Iri maca majago ūma mera ñero iidigo Rahab waīcūgo Goāmure umupeogo Israe masare itamupo. Iri macare erā cóāboro core bajamerāgā Israe masa erogue erā ñaja duhricū īha igo erāre itamupo. Eropirā Israe masa iri maca majarāre Goāmure tarinūganirāre wejēpehoquererā ta igopūre wejēbiriñorā.

<sup>32</sup> Gajirāre Goāmure umupeonirāre werenemoboya yūhū. Eropa werediaqueregū ta bajarāre eropa Goāmure umupeorā sāre were gojapehomasibirica yūhū. Gedeō, Baraca, Sansō, Jefté, Davi, Samue, Goāmū yare weremūhtanirā sā árīpehrerā yū werebonirā āhrima. <sup>33</sup> Goāmure umupeorā yujurāyeri gajī yebarigue árīri macari majarāre gameweje tarinūgañorā. Eropirā gajirā diaye dorenirā árīñorā. Gajirā Goāmū erāre “Mūare itamugūra,” īgū arīdiro dopa ta īgū itamurire bocañorā. Eropa īgūre umupeorā yee erāre badiacū erāre erā

babiricũ iĩnorã erã. <sup>34</sup> Turaro ʔjuri peameri árĩquerecũ ta ʔjubiriĩnorã erã Goãmure umupeonijarã. Gajirã erãre ñose wejediãcũ duhrigã waĩnorã erã Goãmure umupeorã. Turabirã árĩquererã Goãmure umupeo, turarã waĩnorã. “Goãmure umupeorã áhraa. Gameweje turarã áhraa,” eropa arĩrã árĩcũ gaji yebari majarã surara erã wejẽrã arirã ne yujuro bojebiriĩnorã. <sup>35</sup> Goãmure erã umupeocũ ĩagu yujurãyeri nome erã acawererã sĩricũ ĩagu Goãmupũ erãre masupũ.

Gajirãpũre “Goãmure gamebiriãcãque,” erã arĩ peresu iicũ erãpũ Goãmure duhudiabiriĩnorã. “Mũa Goãmure duhucũ mũare taurãca,” arĩĩnorã erãre. Erãpũ duhubiriĩnorã Goãmũ mera erã òaro masaborore gamerã. Eropirã erãre erã ñero iicũ sĩria waĩnorã. <sup>36</sup> Gajirãre Goãmure umupeorãre ñero arĩ wereya erãre tãramuriĩnorã. Eropirã gajirãre guburire, mojotorire diricãa peresu iĩnorã. <sup>37</sup> Goãmure umupeorãre ñerã utã mera dea wejẽmuriĩnorã. Gajirãre erã dupũre serotĩ mera wiritamuriĩnorã. Gajirãre ñoserimijiri mera ñose wejẽmuriĩnorã. Erãre Cristore cóãdorerã erã ñero iimuriĩnorã. Gajirã erãre ñero iicũ oveja gasiri mera, cabra gasiri mera suhrĩcũrã mojomorocũrã árĩmuriĩnorã. <sup>38</sup> Erã òatararã erã árĩcũ i yeba majarã ñerã erã mera majarã árĩbonirã árĩbeama. Wiri marirã árĩrã, masa marirogue utã yucũgue árĩgãri siaricãmuriĩnorã. Eropa árĩgãri siarirã utã yucũgue árĩri goberigue, yebague árĩri goberi sãre carĩgãri siaricãmuriĩnorã. <sup>39</sup> Oã árĩpehrerã Goãmure erã umupeocũ ĩagu mucubiripũ ĩgu. “Òaro iibabũ mũa,” arĩpũ. Erã eropa òaro umupeoquerecũ Goãmũ erãre “Mũare taugũra,” ĩgu arĩdiro ejanibiriya dohpa. <sup>40</sup> Òpa arĩ pepipũ Goãmũ: “Oãre yaharãre, pũhrũgue árĩrã yaharã mera yujuro mera taugũra,” arĩ pepipũ. ĩgu eropa arĩ pepidiro dopa ta iigũcumĩ. ĩgu eropiicũ òatariaro árĩroca ero core ĩgu iidiro tauro.

## 12

### *Jesure eropa umupeonigũicãrã mari*

<sup>1</sup> Eropirã oãre yũ werenirãre bajarã Goãmure umupeonirãre, ñerire iibirinirãre masirã árĩpehreri ñero iirire duhucãrã mari sã. Òpa áhraa mari queoriĩne mera werecũ: Nũcurire opagu omari masũ turaro omamasibeamĩ. Eropa ta mari Goãmũ gamerire iimasibea mari ñerire iicũ. Eropirã irire duhucãrã mari. Eropirã Goãmũ ĩgu gamero dopa ta òarire iinigũicãrã. <sup>2</sup> Eropirã Jesure eropa guñanigũirã. ĩgu ta áhrimi marire umupeo guñaturacũ ĩgu. Eropigu marire umupeonemocũ sãre iimi ĩgu. Crusague sĩrigũ yujuro bojepũ. Pũhrũ ĩgu mucubiriborore masigu crusague sĩripũ. Eropa sĩrigũ guhyasĩribodigu árĩqueregu guhyasĩribiripũ ĩgu. Eropa iira pũhrũ dohpague Goãmũ ĩgu opũ ĩgu doaro diayepũ doanjagu ĩgu dorebu iimi.

<sup>3</sup> Ñerã masa ĩgũre ñero erã iicũ yujuro bojepũ ĩgu. ĩgu eropa iidigũre guñaque mũa, mũa sã ñero tarirã “Yujuro bojebiriboca,” arĩrã. Irere guñaque mũa ĩgũre umupeo duhuri arĩrã. <sup>4</sup> Ñerire mũa tarinũgaboro dopa Jesu iro dopa ñetariaro gohra tarinibea mũa. Ñerã mũare wejẽnibeamã. <sup>5</sup> ¿Goãmũ mũare ĩgu porãre ĩgu wererare cãdijicãri mũa? Òpa arĩpũ ĩgu:

Yũ magũ, yũhũ mũre werecũ eropa pepicãbita. Yũhũ mũre turicũ peegũ bujawerebita. <sup>6</sup> Árípehrerã yũ mahirãre werea. Eropigũ arípehrerã “Yũ porã áhraa mũa,” yũ arĩ íarãre tarinũgadorebeaa. Eropigũ erã tarinũgacũ íha erãre yũ porãre merogã dipuwaja moaa, arĩpũ Goãmũ.

<sup>7</sup> Ñero tarirã yujuro bojeque “Goãmũ yũre weregũ iimi,” arĩrã. Ígũ yare duhubiricãque. Goãmũ mũare ígũ porãre merogã dipuwaja moagũ iimi. Erã pagũ sumarã erã porãre eropa werema. Eropirã erãre dipuwaja moama. Eropa ta iimi Goãmũ sã marire ígũ porãre. <sup>8</sup> Goãmũ arípehrerãre weremi. Goãmũ mũare ígũ werebircũ ígũ porã gohra áríbeaa mũa. Eropirã ígũ porã árĩbirã yujugũ majigũ ígũ pagure ígũ masibiro dopa ta ígũ weresũya marigũ árĩro dopa ta áhraa mũa. Eropirã Goãmũre “Yũ pagũ gohra áhrimi,” arĩmasíbeaa mũa ígũ mũare werebircũ. <sup>9</sup> Mari pagũ sumarã marire erã werecũ peerã erãre umupeoa mari. Mari pagũ sumarãre mari umupeoro tauro umupeoro gahmea mari Pagũ Goãmũ ígũ werecũ. Eropirã ígũre yũhriro gahmea marire. Eropa yũhriřã arípehrerĩnari ígũ mera árĩrãca. <sup>10</sup> Bajamenũrigã mari pagũ sumarã erã gamero dopa marire were dipuwaja moama. Goãmũpũ marire ðaro weremi. Eropigũ ígũ masiri mera marire dipuwaja moami marire ðarã masadoregũ. Eropa iimi ígũ marire ígũ iro dopa ðarã mari árĩboro dopa. <sup>11</sup> Marire ígũ dipuwaja moacũ mucubiríbeaa mari. Mari bu bujawerea. Eropa bujawerequererã ta ígũ eropa dipuwaja moara pũhrũ ðarã árĩrãca mari. Eropirã ígũ wererire peenirã árĩrã gajiropa iiro mariro ðaro árĩrãca.

*Goãmũ marire ígũ dorerire mari yũhribircũ gũhya áhraa marire*

<sup>12</sup> Eropirã guñaturabirã árĩquererã ta Goãmũre ðaro guñaturarã árĩque. Ígũre duhubiricãque. <sup>13</sup> Õaro diaye maja mare mũa waro dopa ta pee gorowerero mariro ðaro diaye ta Goãmũre yũhrique. Mũa eropiicũ íhacũrã gajirã Jesu yarã gajiropa árĩrĩre iisome. Eropirã turabirã turarã warãcoma.

<sup>14</sup> Árípehrerã masa mera ðaro árĩque gamequeãro mariro. Eropirã ñero iibircãque. Ñeri marirã dihta mari Opũ Cristore íarãcoma. <sup>15</sup> Õaro iique mũa. Goãmũ mũare ígũ itamucũ ðaro yũhrique. Ñeri tiari iri oterire iri goroweoro dopa ta mũa sã Cristo yare duhu ñerire guñaniguibircãque gajirãre goroweori arĩrã. <sup>16</sup> Ne nome mera ñero iirã árĩbircãque. Eropirã Goãmũ yare gamebirã árĩbircãque. Eropa árĩgũ arĩpũ Esaú. Ígũ masa tígũ arĩripũ. Eropigũ ígũ pagũ yare ígũ sĩrira pũhrũ opabu arĩripũ. Eropa árĩqueregũ yujunũ barire gametarigũ iri bari mera ígũ pagũ magũre ígũ tígũ opaborore bu gohrotopũ. <sup>17</sup> Pũhrũ ígũre warare masia mũa. Ígũ eropiira pũhrũ ígũ pagũ ígũre Esaũre ðaro árĩdoreburire Goãmũre serẽbasarire turaro gameripũ daja Esaúpũ. Ígũ eropa gamequerecũ ta ígũ pagũ magũpũre ígũ tígũ opaburire gohrotora dipuwaja ígjiropa árĩrĩre iisome. Eropirã pagũ ígũre obiripũ. Eropa gamegũ turaro orequeregũ ígũ pagure serẽqueregũ irire opamasibiripũ Esaú.

<sup>18</sup> Goãmũ dorerire Moiserẽ ígũ apicũgũ mari acawererã Israe masa mũra Goãmũ pohro ejaboro gũhya árĩyoro. Dohpaguere mũapũre eropa árĩbeaa. Õpa wayoro erãre. Goãmũ ígũ dorerire Moiserẽ iri

dorerire apigu erã áriri yeba majagu utãgugue árĩpu. Irigupu Sinaí waĩcudigu árĩyoro. Eropiro erã Goãmu pohro ejamorã irigugue erã ejacũ turaro peame ùjayoro. Eropiro naitiãro, imica curu, turaro miru sã árĩyoro irigu utãgure. <sup>19-20</sup> Erogu erã ejacũ corneta busuyoro. Eropiro wereniguiro cariyo. Ìgu eropa wereniguiro ejaricucũ peerã masa yujuro bojebiriñorã. Goãmu erãre guhyaro mera õpa arĩ dorepu erãre: “Árĩpehrerã irigu utãgure pẽhrerãre utã mera dea wejẽque erãre. Irigu utãgure pẽhregu waibugu gohra ìgu árĩquerecũ ìgu sãre utã mera dea wejẽcãque. O ñoserimiji mera ñose wejẽque ìgure,” arĩpu Goãmu. Ìgu eroparĩcũ peerã yujuro bojebiriñorã erã. <sup>21</sup> Eropigu árĩpehrerire utãgugure guhyaro árĩrere ìagu õpa arĩpu Moise: “Buriã gũigu naragãgu iiaa,” arĩpu ìgu.

<sup>22</sup> Iribojegue Israe masa Goãmu ìgu árĩdigu utãgugue ejamasi-biriñorã sĩriri arĩã. Dohpaguere mũapu Jesu yarãpu Goãmu árĩdigu utãgugue, Siõn waĩcudigugue, umaro majagugue mũrijarõ dopa ta diaye ta Goãmu mera wereniguiasia. Goãmu ojocarigu ìgu ya macague mũrijarõ dopa ta diaye ta ìgu mera wereniguiã mua. Iri maca gajõ maca mama maca Jerusalén umaro maja maca ãhraa. Ero anyua bajarã gohra ãhrima. Goãmure umupeorã mucubiriri mera gamenererã ãhrima. <sup>23</sup> Eropirã mũapu ìgu ya maca majarã árĩã, erogue Goãmu porã árĩmũhtarã mera mua gamenere árĩbodiõ dopa ta ãhraa. Ìgu porã erã waĩre ìgu gojaturapũgue umarogue erã waĩre gojatunirã ãhrima. Ìgupu mari Pagupu árĩpehrerã beyebu ãhrimi. Ìgu mera majarã ãhraa mũapu. Eropirã gajirã õarã Goãmu yarã mera gamenererã dopa ta ãhraa mua sã. Erãre ta ñeri marirã iituhapu Goãmu. <sup>24</sup> Eropirã Jesu mera majarã ãhraa mũapu. Negohraguere ìgu dore apirare gohrotogu “Muare õaro iigura yũhu,” arĩ apĩpu Goãmu marire. Ìgu eropa arĩ apidiõ dopa ta iidigu árĩmi Jesu. Ìgu dire cohã ìgu sĩrirañe mera marire õaro taricũ iimi ìgu. Abelre ìgu di cóãrere ìagu Goãmu Abelre wejẽdigure dipuwaja moapu. Jesucristo ìgu di cóãrapure ìagu marire dipuwaja marirã árĩcũ iipu. Eropiro Abel ìgu di cóãra bu gohra árĩya. Cristopu ìgu di cóãra pũhrũ õatariario iipu Goãmu marire. Eropiro Cristo ìgu di cóãra bu gohra árĩbiriya.

<sup>25</sup> Eropirã õaro iique mua. Goãmu yare muare weregure õaro yũhrirã árĩque. Iribojegue i yeba árĩdigu Moise Goãmu yare ìgu werecũ peerã, bajarã irire peediabiriñorã. Erã eropa peediabirira dipuwaja, dipuwaja moapu Goãmu erãre. Erã tauro dipuwaja moagucumi Cristore cóãrãre. Cristopu umarogue árĩgu Goãmu yare weregu ãhrimi. <sup>26</sup> Irisubure Moiserẽ ìgu dorerire ìgu apirasubure Goãmu ìgu wereniguiro mera yeba ñohmecũ iipu. Dohpaguere õpa weremi ìgu: “I yeba ñohmecũ yujusubu ta iinemogura. I yeba dihta ñohmecũ iisome yũhu. Umarogue sãre ñohmecũ iigura,” arĩ werepu ìgu. <sup>27</sup> “I yeba ñohmecũ yujusubu iinemogura,” arĩgu, “Árĩpehrerire yũ ìhacũnugurare cóãgura,” arĩgu iipu. Goãmu ìgu opu árĩroguere cóãmasiya mara. Eropiro ìgu ìhacũnugurare ìgu cóãcũ ìgu opu árĩro dihta dujaroca. <sup>28</sup> Ìgu opu árĩrogue warãca mari. Eropirã ìgu opu árĩrore ìgu cóãbiricũ ìarã, Goãmure “Õhaa,” arĩã mari. Eropirã umupeori mera, guhyadiaro mera ìgu yare iirã mari ìgure mucubiricũ

iimorã. <sup>29</sup> Peame ũjuro guhyaro dopa ta Goãmũ guhyaro dipuwaja moagu aħrimi. Eropirã ĩgure guhyadiaro mera umupeorã.

## 13

*Ōpa Goãmũre mucubiricũ iique*

<sup>1</sup> Mũa mera majarãre mahi duhubiricãque. <sup>2</sup> Masa mũa masibirã áriquerecũ erãre ôaro mera mũa ya wirigue ñajaridoreque. Gajirã eropiirã, masibiriquererã anyuare erã ya wirigue ñajaridoreñorã. Eropirã mũa sã eropa ta iique.

<sup>3</sup> Peresu áriřãre mojomoro ĩaque. Mũapũ erã mera peresugue áriřã mũa áriboro dopa ta erãre mojomoro ĩaque. Gajirã erã ñero tarirã sãre mojomoro ĩaque. Erã iro dopa mũa sã ñero tariro dopa ta erãre mojomoro ĩaque.

<sup>4</sup> Mũa mojoto dirinirãre áriřehrerã ôaro game umupeoque mũa. Eropirã mojoto dirinirã gajirã mera ñero iirã áriřiricãque. Áriřehrerã ũama nome mera ñero iinirãre, nome ũama mera ñero iinirã sãre dipuwaja moagucumi Goãmũ.

<sup>5</sup> Niyerure gamerã ne áriřiricãque. Ōpa arĩpũ Goãmũ: “Mũare ne cóãsome. Eropa itamuniguğura,” arĩpũ ĩgu. Eropirã mũa opari mera iripêta mucubirique. Wũaro gamenemobiricãque. <sup>6</sup> Eropirã guïro mariro ôpa arĩ pepirãca marmera mũa ya wirigue ñajaridori:

Mari Opũ marire itamugu aħrimi. Eropirã ne guïsome mari. Masa marire erã ñero iiborore guïsome mari, arĩ pepirãca mari.

<sup>7</sup> Goãmũ yare mũare werenirãre mũare dorenirãre guñaque mũa. Eropirã ôaro erã áriřicũrare guñaque. Eropa guñarã, Cristore erã umupeorare ĩhacũque mũa.

<sup>8</sup> Jesucristo ne gohrotobeami. Iribojegue, dohpague sãre, pũhrugue sãre ĩgu áriřidiro dopa ta áriřnigucãgucumi ĩgu. <sup>9</sup> Baja buheri gajiropa áriři buherire peebiricãque ôari buherire guague cohãri arĩřã. “Īre baque. Īre babiricãque,” arĩ buhemaacãma gajirã. Eropa arĩřire mari yũhricũ iri marire itamubeeaa. Eropiro eropa arĩ buherire mari iicũ bu gohra ta aħraa. Iri marire guñaturarã áriřcũ iibeeaa. Goãmũ marire guñaturacũ iimi.

<sup>10</sup> Cristo mari ñeri dipuwajare sĩridi áriřmi mari ñerire cóãbu. Pahiapũ ôpa arĩřã aħrima: “Waibugũ yũ Goãmũre wejẽ soe mujucũ, Goãmũ mera tarigũca,” arĩřã iirima erã. Eropa arĩřã erã ñeri iirare ne cóãnirã áriřmasibeama. <sup>11</sup> Pahia opũ Goãmũ ĩgu áriři taribu gohrague waibugũ wejẽdigũ dire aĩ ñajagũ Goãmũre ópũ masa erã ñerire cóãdoregũ. Eropigũ ĩgu wejẽdigũ waibugũre iri maca tũrogue soe cóãcãñorã. <sup>12</sup> Eropa ta Jesu sã maca tũrogue sĩripũ. ĩgu di cóãri mera masa ñeri marirã wacũ iibu sĩripũ. <sup>13</sup> Maca tũrogue ĩgu sĩricũ ĩarã, erã buherire ĩgu cóãcũ ĩarã judio masa ĩgure ĩhaturĩñorã. Eropirã mari sã ĩgu mera majarã áriřã. Mari eropa áriřcũ ĩarã masa mari sãre ĩhaturĩřãcoma. <sup>14</sup> Erã marire ĩhaturĩquerecũ aħraa. I yebague mari áriřwajaburi maca áriřbeaa. Mari pũhrugue áriřburi macare corerã iiaa mari. <sup>15</sup> Eropirã Jesu ĩgu itamuro mera ĩgu Pagũ mera werenigũia mari. Eropirã ĩgure ôaro serẽnigucãrã. “Mari Pagũ turagũ aħrimi,” arĩ umupeonigũirã gajirãre wererã. Mari eropa arĩ werecũ ĩgu mucubirigũcumi. <sup>16</sup> Mũa mera majarãre ôaro iique. Mũa

oparire gajirã sãre oque. Irire cãdijibiricãque. Mũa eropa ðaro iirã Goãmure umupeorã iica. Eropa iirã ïgure mucubiricũ iirãca.

<sup>17</sup> Mũa oparãre ðaro yuhrique. Erã dorero dopa ta yuhrique. Goãmũ mũare ïhadibu buhedoregũ apimi erã oparãre. ïgu eropa apinirã árĩrã eropa mũare ïhadibuniguirã iima Goãmure tarinugadiabirã. Eropirã erãre ðaro yuhrique mũa erã mucubiriri mera mũare itamuboro dopa ta. Mũa yuhribiricũ ïarã erã bujawererãcoma. Eropa yuhribirã ðaro árĩsome mũa.

<sup>18</sup> Guare serëbasaniguque Goãmure. Æmuri nucũ ðari dihtare iidiaa gua. Eropirã “Ñerire iirã iiaa,” arĩ pepibea gua. <sup>19</sup> I tamerare turaro serëbasaque Goãmure yure: Yojaro mera yũ mũa pohroque wamasiborore serëque Goãmure.

*Ipũ gojabeodigu ðadoretupũ*

<sup>20</sup> Goãmũ marire ðaro árĩcũ iigu ãhrimi. ïgu mari Opũ Jesucristo sĩridigũre masupũ. ïgu “Mũare ðaro iigũra,” marire arĩ apidigu ãhrimi. ïgu eropa arĩrare iinijagu Jesupũ marire taugũ ãhrimi. Mari ñeri dipuwajare ïgu di cohã sĩripũ ïgu. Eropigu ïgu turagũ, ovejare ïhadibugũ iro dopa árĩgu, marire ïgu yarãre ðaro ïhadibumi.

<sup>21</sup> Eropigu Goãmũ ïgure masudigu mũa sãre itamuporo árĩpehreri ïgu gamerire mũa iiboro dopa. Eropigu Jesucristo ïgu itamuri mera Goãmũ ïgu gamero dopa ta árĩpehrerã marire ðarire gohrotocũ iiporo. Eropirã árĩpehrerinuri Cristore umupeorã. Eropa ta iirã.

<sup>22</sup> Yũ acawererã, ire turaro mũare doregura: Ipũ mũare yũ wererare ðaro mera peeque mũa. I yũ mũare gojabeoripũ wuaripũ árĩbeaa. Eropirã ire ðaro peeque. <sup>23</sup> I sãre mũare weregura: Mari acaweregure Timoteore peresu árĩdigũre wiuañorã. Dohpagohragã ïgu aricũ yũhũ ïgu mera mũare ïagũ wagũra.

<sup>24</sup> Mũa oparãre, árĩpehrerã gajirãre Goãmũ yarãre ero árĩrãre ðadorea. Italia majarã Jesu yarã sã mũare ðadorema.

<sup>25</sup> Árĩpehreri mera Goãmũ mũare ðaro iiporo. Eropa ta iiporo. Iripëta ãhraa.



## Santiago

*Santiago Israe masare macari wasirininirãre gojabeoñumi*

<sup>1</sup> Yuhũ Santiago ipũ mera mũare ðadore gojabeogu iiaa. Goãmũ mari Pagũ pohro majagũ ãhraa. Mari Opũ Jesucristo yare mohmegũ ta ãhraa yuhũ. Eropigũ mũare Israe masare doce cururi majarãre Jesu yarãre macari wasirininirãre yũ acawererãre gojabeogu iiaa.

*Goãmũ ðaro pee masirire ohomi marire, arĩ gojañumi Santiago*

<sup>2</sup> Yũ acawererã, baja árfiroca mũa ñero tariburi. Mũa ñero tariquererã ðaro mucubiriri mera pepicãque. <sup>3</sup> Eropa ñero tarirã, Jesure mũa umupeorire diaye ta árficũ íhmurã iica. Eropirã ñero tariquererã Jesure mũa ðaro umupeoniguicãnirã ígũre umupeonemorã warãca. Eropa warã mũa ñero taririre bocatũurãca. <sup>4</sup> Eropirã eropa bocatũurã árfique mũa duhuro mariro ðaro pee masirã mũa áríboro dopa.

<sup>5</sup> Goãmũ duhyaro mariro árfípehrerãre ohomi. Eropa ogũ ígũre serẽrãre turibeami ígũ. Ígũ eropa árfígu árficũ masirã mũare pee masiri duhyarire ígũre serẽque. Mũa eropa serẽcũ mũa masiburire onemogucumi ígũ mũare duhyaro mariro. <sup>6</sup> Eropa serẽrã Goãmũre ðaro guñaturanijarã serẽque mũa. “Gua serẽcũ Goãmũ guare obiribocumi,” arĩ pepibiricãque. Eropa arĩ pepirã wũariya maja pãgũri iro dopa ãhrima. Pãgũri iri dũrũro gohrotoro dopa ta erã sã erã guñarire dũrũro gohrotoma. Eropirã Goãmũre “Diaye ta iigu ãhrimi,” arĩ umupeobeama. <sup>7</sup> Eropa arĩ pepirãre erã serẽquerẽcũ ta ne merogã erã serẽrere osome erãre mari Opũ. <sup>8</sup> Dohpagãre ire gamedigu árfiqueregũ daja ñamigãre gajiropa guña wahgãmi daja. Eropa guñagũre ero wabeaa.

<sup>9</sup> Jesu yarã bu árfĩrãre mojomorocurãre Goãmũpũ oparã iro dopa íhami erãre. Ígũ eropa íarã árfĩrã mucubiriri mera árfíporo. <sup>10</sup> Eropirã Jesu yarã doberi oparã árfĩrãpũ erã doberi pehrebore masirã mucubiriporo. Erã doberi bu árfĩri ãhraa Goãmũ ígũ íacũ. Doberi oparã erã doberi taa gori iro dopa pehrea waroca. Eropirã erã sã mucubiriporo. <sup>11</sup> Abe mũaririgũ ígũ turaro asicũ taapũ ñañia waha. Eropiro goripũ ñañi dija wa, ðari gori iri árfĩra pehrea waha. Eropa ta waroca doberi oparã erã doberire erã aĩ gameneoro watope. Erã iri doberi mera ta dederea warãcoma.

*Ñero iidorerire tarinũgagũ mucubirigũ ãhrimi, arĩ gojañumi Santiago*

<sup>12</sup> Ñero tarigũ bocatũugũ, ñero iidorerire tarinũgagũ mucubirigũ ãhrimi. Ígũ eropa bocatũucũ, ígũ ñerire tarinũgacũ árfípehrerinũri nũcũ umaro maja ojocaririre ígũre ogucumi Goãmũ. “Iri ojocaririre ogũca,” arĩ apipũ Goãmũ árfípehrerã ígũre mahirãre. <sup>13</sup> Mũa ñerire iidiarã “Goãmũ yũre ñero iidoregũ iimi,” arĩ pepibita. Ñerire iidorebeamĩ Goãmũ marire. Eropigũ ígũpũ masare ñero iidoregũ árfíbeamĩ. <sup>14</sup> Masa erã turaro ñerire erã uaribejari ta iri ta erãre ñero iicũ iiaa. <sup>15</sup> Eropirã iri ñerire uaribejama masa. Eropirã iripũre

pepima. Eropa pepirā iri ñeripure iiniguicāma erā. Erā eropa iiniguiri dipuwaja Goām̄ erāre peamegue cóāgucumi.

<sup>16</sup> Eropirā yu acawererā, yu mahirā, ne yujugu mu basi guyabita. “Goām̄ yare dorecū ñero iabū,” arī pepibita. Diaye árībeaa iri. <sup>17</sup> Mari Pagu umaro majagu marire ðari dihtare ohomi. Īgu tamera abe um̄ majagure, ñami majagure, necā säre ihacūnugudigu árīgu, ĩguru ne gohrotobeami. Eropigu ĩgu árīniguidiro dopa árīniguicāmi. <sup>18</sup> Īgu gamediro dopa ta ĩgu ðari buheri mera marire ĩgu porā wacū iimi mari ĩgu yarā árīmūhtarā árīboro dopa.

*Diaye maja Goām̄re umupeori ðpa āhraa, arī gojañumi*

<sup>19</sup> Yu mahirā, yu acawererā, ire ðaro peeque m̄ua. Goām̄ yare ðaro peeque m̄ua. Eropa peerā, pepiro mariro wereniguibiricāque. Eropirā guabiricāque. <sup>20</sup> Yujugu ĩgu guagu árīcū suabeami Goām̄. <sup>21</sup> Eropirā árīpehreri m̄ua ñeri iirire, m̄ua ñerire uaribejarare duhuque m̄ua. Eropirā Goām̄re ðaro yuhrirā árīrā ĩgu buherire peeñaque m̄ua. Īgu ya buherire m̄ua peecū Goām̄uru m̄uare peamegue wabonirāre taugucumi.

<sup>22</sup> Īgu yare peequererā ta yuhribirā ñerire guyarire pepirā iiaa m̄ua. “Yuhribiricū ðaroca,” arī pepirā guyarire pepirā iica m̄ua. Eropirā ĩgu yare peerā iripure iique. <sup>23</sup> Goām̄ yare peequererā ta yuhribirā, ĩgu diapore diuru mera aī ĩaro dopa āhraa m̄ua. <sup>24</sup> Īgu ĩgu diapore ĩara p̄hru waha, ĩgu ĩarare cādijiro dopa ta m̄ua Goām̄ yare peequererā irire cādija waha. <sup>25</sup> Eropigu gajiguru ĩgu peerare cādijibiguru Cristo ĩgu dorerare ðaro guñagu irire iigu mucubirigu árīgucumi. Īgu tamera ĩgu peerare iicū Goām̄ ðaro iimi ĩgure. Iri doreri “Cristo ĩgu mahiri mera masare taumi,” arī buheri āhraa. Iri buherire ne cóābigu mucubirigu árīgucumi.

<sup>26</sup> Yujugu ĩgu gamero arīmaacāgu, diaye ta Goām̄re umupeobeami. “Goām̄re ðaro umupeoa,” arī pepibodigu árīqueregu ta ĩgu basi ta guyagu iimi. “Goām̄re umupeoa,” arīgu árīqueregu ĩgu Goām̄ yare yuhribiricū ĩgu umupeori ne duhpiburi árībeaa. <sup>27</sup> Diaye ta Goām̄ mari Pagure mari umupeorā, ĩgu gamero dopa ta umupeorā ðpa iiaa mari: Pagu sumará marirāre, wapeweyarā säre erā ñero taricū ĩarā, erāre itamua mari. Eropirā i yeba majarā ñeri erā iirinore iidiabeaa mari. Eropa iirā diaye ta Goām̄re umupeorā iiaa mari.

## 2

*Masare yujuropa ðaro iiro gahmea marire, arī gojañumi*

<sup>1</sup> Yu acawererā, ðatariagure Jesucristo mari Opure peerā, ĩgure umupeorā āhraa m̄ua. Eropa umupeorā árīrā masare yujuropa ðaro iiro gahmea m̄uare. <sup>2-3</sup> Eropi doberi opu oro berorire, mojoto sañari berorire opagu, wajacurire suhricugu m̄ua Jesu yarā gamenerero pohrogu ĩgu aricū ĩarā ĩgure ðaro mera bocatīriboca. “Ohō doaro āhraa,” arīboca m̄ua ĩgure. Eropa ĩgure arīquererā ta irisubu ta gajino moogu mojomorocugu sã ñeriñe suhricugu sã m̄ua pohro ĩgu aricū ĩarā ĩgure ðaro bocatīribiriboca m̄ua. “Ohō niguique. Ohō yeba doaque,” arīboca m̄ua ĩgure. <sup>4</sup> M̄ua eropa iirā masare yujuropa iibirā iiaa m̄ua. Eropirā ñerire pepirā masare beyerā iro dopa árīrā

iica mua. “Ípũ niyerucũgũ ðagũ áhrimi. Ípũ gajino moogũ ñegũ áhrimi,” arĩ beyea mua.

<sup>5</sup> Yũ acawererã, yũ mahirã, yũre peeque. Bajarã mojomorocũrãpũre Goãmũre erã ðaro umupeomorãre, ígũ opũ árĩroguere árĩmorãre beyepũ Goãmũ. “Eroguere warãca mua,” arĩ apípũ Goãmũ ígũre mahirãre. <sup>6</sup> Erãre ígũ beyequerecũ ta mũapũ mojomorocũrãre ðaro umupeobea. Doberi oparãpũ mũare ñero iimurima. Eropirã erã opũ pohrogue mũare aĩ taragãma mũare weresãmorã. <sup>7</sup> Mũapũ “Cristo ðagũ yarã,” masa erã arĩrã áhraa. Baja doberi oparãpũ Cristore ñero arĩ wereniguima.

<sup>8</sup> Goãmũ mari Opũ doreri tauro doreri ðpa arãa: “Mũ basi mahiro dopa ta mũ pohro árĩrã sãre mahique,” arãa. Íñe doreriñere iirã, ðarire iiaa mua. <sup>9</sup> Masare yujuropa umupeobirã ñero iirã iiaa mua. Eropa iirã Goãmũ dorerire tarinũgarã áhraa mua. Eropa ta arãa Goãmũ yare erã gojarapũ. <sup>10</sup> Goãmũ dorerire iirã árĩquererã ta yujuñe doreriñegãre mua iibirã ñeri dipuwajacũrã wahaa. Mũa yujuñegãre tarinũgarã árĩpehreri ígũ dorerire tarinũgarã wahaa. Eropa iirã ñeri dipuwajacũrã árĩnia mua dohpa. <sup>11</sup> “Gajigũ marapo mera ñero iibita,” arĩgũ Goãmũ ta áhrimi. “Masare wejẽbita,” arĩ doregũ ígũ ta áhrimi Goãmũ. Gajigũ marapo mera ñero iibiriqueregũ ta masure wejẽgũ Goãmũ ígũ dorerire tarinũgagũ áhrimi ígũ. <sup>12</sup> Cristo marire turaro mahigũ, marire doremi taubu. Ígũ dorerare mari iirare, mari iibirira sãre íagũ marire beyegũ arigũcumi. Ígũ eropa beyemorã árĩrã ígũ dorerire ðaro iirã. Eropirã ígũ gamero dopa ta wereniguirã mari. <sup>13</sup> Dohpaguere mari gajirãre mojomoro íabiricũ Goãmũ mũare ígũ masare beyerinũ árĩcũ mũare mojomoro íasome. Eropigũ mari mojomoro íacũ íagũ Goãmũpũ marire dipuwaja moasome.

*Cristore umupeorãpũ ðarire iima, arĩ gojañumi*

<sup>14</sup> Yũ acawererã, peeque mua yũre. “Cristore umupeoa yũhũ,” yujugũ ígũ arĩ pepiquerecũ ta gajirãre ígũ ðaro itamubiricũ ígũ “Cristore umupeoa yũhũ,” ígũ arĩrapũ ne duhpiburi árĩbeaa. Eropa arĩ pepimaacãgũre Goãmũ tausome. <sup>15-16</sup> ¿Jesu yagũ, Jesu yago ñeri dihta erã suhri opacũ íarã erã bari moocũ íarã dohpa iiri mua erãre? “Õaro árĩque mua. Eropirã ðaro suhricũque. Õaro bari mera yapĩ wahgãque,” arĩquererã erã gamerire mua obiricũ mua eropa arĩri ne duhpiburi árĩbeaa. <sup>17</sup> Eropirã “Cristore umupeoaa yũhũ,” mua arĩquererã ta ðarire mua iibiricũ Cristore mua umupeori ne duhpiburi árĩbeaa.

<sup>18</sup> Gajigũ i yũ wererire ígũ peediabiricũ ðpa arĩnemoboya yũhũ ígũre. ðarire iibiriqueregũ ta “Cristore umupeoa yũhũ,” arĩraa mũhũ. Mũhũ ðarire iibigũ Cristore mũ umupeorire íhmupiburi árĩbeaa. Eropa arĩ pemasibea mũhũ. Yũpũ yũ ðari iiri mera Cristore yũ umupeorire íhmua, arĩnemoboya yũhũ ígũre. <sup>19</sup> “Goãmũ yujugũ ta áhrimi,” arĩ pepima masa. Mũa eropa arĩ pepicũ ðapũricãa. Eropa árĩquerecũ ta iripẽta mua Goãmũre yũhribiricũ “Ígũ Goãmũ áhrimi,” mua arĩri duhpiburi árĩbeaa. Watẽa sã mua pepiro dopa ta “Goãmũ ta áhrimi yujugũ ta,” arĩ pepima. Eropirã Goãmũ ígũ árĩricũrere masima erã. Eropa masirã gũĩ naragãma. <sup>20</sup> Yujugũ ðarire iibiriqueregũ ta “Cristore umupeoa,” arĩ pepigũ arĩgũ pee masibigũ

ãhrimi. “Cristore umupeoa,” arĩgũno gajirãre ðaro iibigu diaye ta Cristore umupeobeami. Òpa arĩ weregũra mũare irire: <sup>21</sup> Iribojegue Abrahã mari ñecũ ĩgũre umupeorire Goãmũ masidiañumi. Eropigu ĩgũ magure Isaa waĩcũgure aĩgã wejẽdoreñumi. “Yũre umupeogu yũre yũhribocumi,” arĩ ĩgũ áríricũre masima erã. Eropa masirã gũĩ naragãmagũ wejẽdoreñumi. Eropigu Abrahã Goãmũ ĩgũ dorediro dopa ta ĩgũ magure aĩgã Goãmũre obu ĩgũre wejẽbu iiriñumi. ĩgũ eropa yũhricũ Goãmũ ĩgũre “Wejẽbita,” arĩñumi. ĩgũ dorediro dopa ta iibocuricũ ĩagũ “Diaye ta ðagũ ãhrimi,” arĩ ĩañumi Goãmũ ĩgũre. <sup>22</sup> ĩgũ eropa arĩ ĩacũ ire masia mũa: Abrahã Goãmũre umupeogu ĩgũ dorerire yũhriñumi. Eropa yũhriũ Goãmũre ĩgũ umupeorire ii ĩhmuñumi. <sup>23</sup> Eropigu erã Goãmũ yare erã gojarapũ erã arĩ gojadiro dopa ta eropa wayoro: “Abrahã Goãmũre umupeorũ. ĩgũ eropa umupeocũ ĩagũ “Õagũ ãhrimi ĩgũ,” arĩ ĩapũ Goãmũ ĩgũre,” arĩ gojañuma Goãmũ yare erã gojarapũguere. ĩgũ eropa arĩ ĩacũ masirã “Abrahã Goãmũ mera majagũ ãhrimi,” arĩñuma masa ĩgũre.

<sup>24</sup> Eropirã ire masia mũa: “Goãmũre umupeoa,” arĩgũ, ĩgũ ðarire iibiricũ ĩagũ Goãmũpũ ĩgũre “Õagũ ãhrimi,” arĩ ĩabeami. Goãmũre umupeogupũ diaye ta ĩgũ ðaro iicũ ĩagũ “Õagũ ãhrimi,” arĩ ĩhami Goãmũ ĩgũpũre. <sup>25</sup> Eropa ta arĩ ĩañumi Goãmũ Rahab waĩcũgore mũa mera ñero iimũridigore. Josué ĩgũ obeonirãre ðaro bocatĩri “Õaro ñajarique,” arĩñumo igo erãre. Eropa iigo erã dujadiacũ igopũ erãre gaji mare ĩhmuñumo erãre ĩhaturirã wejẽri arĩgo. Eropa Goãmũ yarãre itamugo Goãmũre igo umupeorire ĩhmuñumo. Igo eropa iicũ ĩagũ “Õago ãhrimo,” arĩ ĩañumi Goãmũ igore. <sup>26</sup> Eropa ta ãhraa. Mari dũpũre sĩporã maricũ ojocaribea mari. Eropiro sĩporã mariro mari dũpũ duhpiburi dũpũ árĩbeaa. Eropa ta “Goãmũre umupeoa,” arĩquererã ta gajirãre ðaro iibirã mari árĩcũ diaye árĩbeaa mari umupeori. Eropiro mari umupeori duhpiburi árĩbeaa. Sĩporã mariro erãre ĩhaturirã wejẽri arĩgo. Eropa Goãmũ yarãre itami dũpũ iro dopa ta ãhraa.

### 3

#### *Mari disiro wiririre wereñumi*

<sup>1</sup> Goãmũ yare masare buherãre ĩgũ yare erã buhemaacãcũ, erã ðaro iibiricũ ĩagũ erã tamerare gajirã tauro dipuwaja moagũcumi Goãmũ. Irire mũa masia. Eropirã mũa mera majarã masare buherã bajarã árĩbita. <sup>2</sup> Árĩpehrerã mari bajasuburi ñerire iiaa. Yujugũ ñerire ne wereniguibigu Goãmũ gamerire ðaro iigu ãhrimi ĩgũ. Eropigu gaji ñeri sãre iibeami. <sup>3</sup> Mari werenigui queori mera buhecũ ðpa ãhraa i: Cabayure ĩgũ disiro comemiji ĩgũ nerore ñehadiuburimijire mari apia ĩgũre majinũgacũ iimorã. Eropirã irimiji comemiji mera ĩgũre ĩgũ waborore mari taramajinugua. Irimijigã mirimijigã árĩquerecũ ta irimiji mera ĩgũ dũpũre wacũ iiaa. Eropa ta mari disiro mera miri disirogã árĩquerecũ ta wũaro wacũ iiaa mari. <sup>4</sup> Dohodiru queoriñere werenemogura mũare: Gasiru wũadiru iriru árĩquerecũ ta irirure miruñe turaro weãquerecũ ta autugũpũ miri mijigã mera iriru waborore autumi. <sup>5</sup> Eropa ãhraa mari wereniguri. Mari disiro miri disirogã árĩquerecũ ta baja wereniguri wiria. Miri peamegã

wuaro ũju wahgũro dopa ta mari disiro mera wuaro ñero wacũ iiaa. <sup>6</sup> Eropiro mari wereniguiri peame iro dopa aħraa. Mari wereniguiri árĩpehrerire ñerire iicũ iiaa marire. Peame ũjunũguro 4 Dohodiru queoriñere werenemogura mũare: Gasiru wuadiru iriru árĩquerecũ ta irirure m dopa ta mari wereniguiri mera mari õaro árĩbodirore goroweoa mari. Mari ñerire wereniguirã watĩ dorero dopa ta eropa iirã iiaa. <sup>7</sup> Árĩpehrerãre nũgu majarãre waimurãre, mirimagu porãgãre, waimurã paharãre, waire mari masa seyacũ iimasia. Eropirã mari bajarã erãnore masa seyacũ iituhabu. Eropirã erã õaro masa seyacoma. <sup>8</sup> Erãre masa seyacũ iiquererã ta mari wereniguiri mera mari basi pee masiri mera wereniguicũ iimasibea. Marriru árĩquerecũ ta irirure mi ejorãre nijiyajaro dopa ta mari disiropu ne nijiyajabirigohracãa. Mari wereniguiri ñetariari aħraa. Eropiro aña gajirãre ĩgu wejẽro dopa ta marire gajirã sãre ñetariaro wacũ iiaa mari disiro. <sup>9</sup> Mari disiro mera mari Pagu mari Opu Goãmure mari õaro arĩ wereniguia. Eropã wereniguiquererã ta masapure ñero arĩ wereniguia. Goãmũ iro dopa árĩrã ĩgu ĩhacũnugunirã árĩquerecũ ta erãre ñero arĩ wereniguia mari. <sup>10</sup> Yuju disirorriru árĩquerecũ ta irirure me ta ñeri wereniguiri sã, õari wereniguiri sã wiria. Yu acawererã eropa arĩ wereniguibiricãro gahmea. <sup>11</sup> Maugã dipa ohma wiuri gobere yuju gobere õari dihta wiria. Gaji gobere ñeri dihta wiria. Eropirã Goãmũ yarã sãre õari dihtare wereniguio gahmea. <sup>12</sup> Yu acawererã, iguigu poegu ducare ducacumasibea. Eropiro poegupu iguigu ducare ducacumasibea. Eropi maugã dipa ohma wiuri gobere moayuari deco wiricũ, imisiri deco sã wirimasibea. Eropã ta mari disirore õari wereniguiri, ñeri wereniguiri mera wiricũ gamebiricãro gahmea.

*Diaye maja masiri õpa aħraa, arĩ gojañumi Santiago*

<sup>13</sup> Yujurãyeri mua mera majarã masirã aħrima. Eropirã “Gajirã tauro gua masirã aħraa,” arĩbiricãporo. Eropã arĩbirã ta õarire iique mua. Eropã õarire iirã diaye ta masirã aħraa mua. <sup>14</sup> Eropirã gajigu gajinore ĩgu opacũ ĩhaturirã, mua ya árĩburi dihtare iidiarã árĩrã, “Goãmũ yare õaro masia gua,” arĩbiricãque. Mua eropa arĩrã árĩrã guyarã aħraa mua. <sup>15</sup> Eropã ñerire pepirã erã ya pepiri Goãmũ ya pepiri árĩbeaa. Erã pepiri i yeba majarã erã ñero pepiri aħraa. Erã pepiripu watĩ ya aħraa. <sup>16</sup> Masare ĩhaturirã, erã ya árĩburi dihtare iidiarã eropa game dũyasoniguicãma. Árĩpehreri ñerire iima. <sup>17</sup> Gajirãpu Goãmũ yare õaro masiri oparãpu erã tamera eropa iimaacãrã iibeama. Eropirã erã ne game dũyasobeama. Eropã iirã masa õarã, dorerire õaro yãhrirã, mojomoro ĩarã, masare itamurã, masare yujuropa iirã aħrima erã. Iire iirã guyarõ mariro iima erã. Eropirã pee masirã gohra aħrima. <sup>18</sup> Eropirã gamequeãro mariro árĩrã, gajirãre “Gamequeãbiricãrã mari,” arĩ bosarã õarã wacũ iirã iiaa mari masare.

## 4

*I yeba maja ñerire gamerã, Goãmure gamebirã aħraa mua, arĩ gojañumi ĩgu*

<sup>1</sup> ¿Duhpirã mua game d̄ayasori? ¿Eropirã duhpirã gamequeãri mua? Ñerire ñaribejarã gamequeãdiaa mua. <sup>2</sup> Gajinore mua gahmea. Eropa gamerã masare wejẽa mua mua erã yare emamorã. Eropirã gajigu gajinore ïgu opacũ ïarã irire mua burigã gahmea. Eropa gamerã irire aĩmasibeaã mua. Eropirã irire game d̄yaso gamequeãã mua. Goãmure serẽbirã, mua gamerire bocabeaã. <sup>3</sup> Eropirã serẽrã mua ya árburi dihtare serẽa mua mua gamero dopa ta iiniguicãmorã. Eropa mua serẽcũ Goãmũ mua serẽrere obeami. <sup>4</sup> Goãmure cóãrã ñã mua. I yeba maja ñerire gamerã, Goãmũpũre gamebirã ãhraa mua. ¿Irire masibeari mua? Eropigu i yeba majarã ñerire gamegu Goãmure gamebigũ árituhami. <sup>5</sup> Õpa arĩñumi Goãmũ yare erã gojarapũ: “Goãmũ ïgu Espĩritu Santore mari mera árbure apimi. Eropigu Espĩritu Santopũ marire mahigu ñerire mari ñaribejarire gamesãbeami ïgu. Eropigu doero dopa ta marire turaro mahimi erãgue ñerire iiri arĩgu,” arĩ gojañumi iribojeguerẽ. ïgu eropa arĩ gojara bu gohra árbẽaã. Diaye ártĩro tiaa. <sup>6</sup> Eropigu Goãmũ marire õaro itamumi mari ñerire iibiriburire. Õpa ãhraa Goãmũ yare erã gojarapũ: “Yũ tamera gajirãre masi tarinũgaa,’ arĩgure Goãmũ ïhaturimi. Gajigũpũre ‘Ñegu bu ártĩgu ãhraa yũhũ,’ arĩgũpũre Goãmũ itamumi ñerire ïgu iibiriborore,” arãã ïgu yare erã gojarapũ. <sup>7</sup> Eropirã Goãmure õaro yũhrirã ártĩque mua. Eropirã watĩre yũhribircãque. Mua eropa yũhribircũ ïagu ïgũpũ mũare duhucãgũcumi. <sup>8</sup> Goãmure õaro yũhrique mua. Mua eropa iicũ ïgũpũ mũare mahi itamugãcumi. Ñerã ãhraa mua. Eropirã ñerire iinemboricãque. Ñeri sãre gahme, õari sãre gamerã ãhraa mua. Eropirã mua ñeri iirare bujawereque. Mua eropa iicũ ïagu Goãmũ mua ñeri iirare cãdijigũcumi. <sup>9</sup> Mua ñeri iirare turaro bujawereque. Eropirã mua ñeri iira dipuwajare oreque. Mucubirirã árbircãque. Eropirã mua ñeri iirare ñero sĩporãcũ, irire guhyasĩrĩnariro pepique. <sup>10</sup> “Ñegu bu ártĩgu ãhraa yũhũ,” arĩrã Goãmure umupeoque. Mua eropa iicũ ïagu ïgũpũ mua ñeri iirare cóãgu “Õarã ãhraa,” arĩ ïagũcumi mũare.

*Erã acawererãre Jesu yarãre erã basi ñeri quere iidorebiriñumi*

<sup>11</sup> Yũ acawererã, Jesu yarã ártĩrã, mua basi ñeri quere iibircãque. Mua acaweregure ñeri quere iirã ïgure dipuwaja moadorediarã ártĩca mua. Cristo doreripũ masare dipuwaja moadoreri ártĩhuaã. Eropirã masare ñeri quere iirã Cristo ya dorerire õpa arĩrã iica: “Marire õaro dorebeaã Cristo ya. Eropirã mari gamero dipuwaja moadorerã,” arĩrã iica masare ñero werewuarã. Eropa arĩrã Cristo dorerire ñero arĩ wereniguirã dujaa mua. Eropirã iri dorerire yũhribirã dujaa. <sup>12</sup> Masare dorerire ogũ, masare beyegu Goãmũ ta áhrimi. Eropigu masare peamegue wabonirãre ïgu ta taumasimi. Eropigu ïgu ta masare peamegue cóãmasimi. Eropirã maripũ masare “Ñerã áhrima,” arĩmasibeaã. Mari acawererãre beyebu Goãmũ dihta áhrimi.

*Ñamigãguere dohpa marire waborore masibeaã mari*

<sup>13</sup> Dohpaguere yũre peeque mua. Õpa arĩboca mua Goãmure guñaro mariro: “Dohpagãre o ñamigãre gajĩ macague ártĩrã warãca. Eroguere yuju bojori ártĩrã, gajinore dua, asũ iirãca. Eropa iirã wajatarãca mari,” arĩboca mua. Eropa arĩrã ártĩrã, yũpũre peeque

mua. Eropa arĩrãre ire werebu iiaa: <sup>14</sup> Ñamigãguere dohpa marire waborere masibea mari. Imica ãhri, mata pehremaaro dopa ta ãhrea mari arĩricuri. Imica merogã arĩniguiiri pehrea wahaa. Eropa mari sã merogã arĩniguiiri sĩa warãca. <sup>15</sup> Eropirã õpa arĩ pepiro gahmea muare: “Goãmu ïgu gameropẽ arĩrãca mari. Eropirã ïgu gamero mera iirãca mari,” arĩ pepiro gahmea muare. <sup>16</sup> Muapu “Dohpaguere mari gamero õpa iirãca,” arĩniguiraa mua Goãmure guñaro mariro. Eropa arĩ wereniguirã ñerire iirã iiaa mua. <sup>17</sup> Eropirã õarire mari iiburire masiquererã ta irire iibirã ñerire iirã iiaa mari.

## 5

### *Doberi oparãre wereñumi Santiago*

<sup>1</sup> Doberi oparã mua dohpaguere peeque yure. Pũhrũguere mua ñero tarirãca. Eropirã gaguiniguĩ orerãca mua. <sup>2</sup> Mua doberi boapehrea waroca. Eropiro mua suhrire sũrirã sã bapehocãrãcoma. <sup>3</sup> Mua niyerure mua wũaro dibura ne duhpiburi arĩbeaa. Mua eropa dibucũ ïagu mua niyerure mahicũ masimi Goãmũ. Eropirã niyerure mua mahira dipuwaja ñero tarirãca. Iri dipuwaja peamegue warãca. <sup>4</sup> Mua ya poerire mohme corerãre wajayebeaa mua. Eropirã mua erãre gũyaa. Eropigu erãre mua wajayebirira niyerure ïagu, mua gũyarare masimi Goãmũ. Muare mohme corerã wajaseadjarã, gaguiniguima erã. Erã eropa arĩ gaguiniguicã mari Opũ turatarigu peemi erãre. <sup>5</sup> I yebaguere baja doberi mera arĩricua mua. Arĩpehrerire oparã mua gameri dihtare mua uaribejarire iiaa mua. Eropirã wũagu wecu erã õaro ejogu iro dopa arĩricua mua. Eropirã wũagu wecu ïgu diserecũ ïarã ïgure erã wejẽburi gorogue aĩ wahãma. Eropa ta mua sãre wũaro mua opara pũhrũ muare ïgu dipuwaja moarogue aĩgãgũcumĩ Goãmũ muare. <sup>6</sup> Õarãre peresu iidore wejẽdorebu mua erãre. Mua eropa iicũ erãpu duhri wiriamasibirama.

### *Cristo ïgu dujariborore õaro coredorepu marire Santiago*

<sup>7</sup> Eropirã yũ acawererã, mari Opũ Cristo ïgu i yeba ïgu dujariborore õaro coreyuque. Pohe opũ ïgu oteri dũcacũburisubure ïgu õaro corero dopa ta õaro coreyuque Cristo dujariborore. ïgu oteriguere “Deco ariporo,” arĩgu ïgu pohere õaro puhriburire õaro cohremi ïgu. <sup>8</sup> Eropa ta mua sã õaro coreyuque. Mari Opũ ïgu dujariboro merogã dũhyaa. Eropirã Goãmure eropa guñaturaniguicãque mua. Eropirã eropa coreniguicãque mua.

<sup>9</sup> Yũ acawererã, mua basi dũyasobiricãque Goãmũ muare dipuwaja moabiriboro dopa. Eropirã ire guñaque mua. Dipuwaja moabu ïgu dujariboro merogã dũhyaa. <sup>10</sup> Yũ acawererã, ñero tariquererã ta yujuro bojeque Goãmure cóaro mariro. Goãmũ yare weremuhtanirã mura erã Goãmũ ya arĩburire iirã ñero tariquererã duhubirimũriñuma. Erã duhubiridiro dopa ta duhubiricãque mua sã. <sup>11</sup> Eropirã ire guñaque mua. Ñero tariquererã ta Goãmure duhubirãre Goãmũ õaro iigũcumĩ. Iribojegue majagu Job waĩcũgure peebe mua. ïgu ñero tariqeregu ta Goãmure duhubiriñumi. Eropigu ïgu ñero tarira pũhrũ, Goãmũ ïgure õaro iĩñumi. Goãmũ mari Opũ marire

õaro mojomoro ïagu áriḡu eropa iĩñumi ïḡure. Iri áriḡpehrerire masia mña.

<sup>12</sup> Yñ acawererã ire masique. Őpa arĩma waĩpeo piyurã: “Ŭmaro majagu mera diaye arĩrã iiaa,” arĩ waĩpeoma masare peedorerã. Erã iro dopa arĩ waĩpeo piyubiricãque. Ire mñare turaro dorea. Mña gajirãre wererã, õaro diaye wereque erãre ḡyaro mariro. Arĩnemopeobiricãque. Eropo mña diaye werecũ ïagu Goãmñ mña gajiropa arĩra dipuwajare dipuwaja moasome.

<sup>13</sup> Mña mera majagu ñero tarigu áriḡu, Goãmñre serẽporo ïḡu. Gajigu mucubirigu áriḡu Goãmñre mucubiriri mera bayaporo. <sup>14</sup> Mña dorecurã, Jesu yarã oparãre sihubeoque mña. Mña eropa sihubeocũ erãpñ mñare yñ mera sũrãcoma. Eropo iirã Goãmñre mari Opñre mña dorecurare serẽbasarãcoma erã. <sup>15</sup> Eropo arĩ serẽbasarã “Mari serẽro dopa ta ïḡu iigucumi,” erã arĩ pepicũ mñare dorecurãre Goãmñ itamugucumi. Eropo iigñ mñare õarã wacũ iigucumi mari Opñ. Eropigu mña ñeri iira dipuwaja mña dorecurã áriḡcũ ïarã mñare serẽbasarãcoma. Erã eropa serẽbasacũ ïagu mña ñeri iirare cãdijigucumi Goãmñ. <sup>16</sup> Eropirã mña mera majarãre mña ñeri iirare game pepñri weretarique. Eropirã mña basi Goãmñre game serẽbasaque. Mña eropa arĩ serẽbasacũ mña serẽbasanirãre Goãmñ taugucumi. Őarire iirã mña áriḡcũ Goãmñre mña turaro serẽbasadiro dopa ta iigucumi Goãmñ. Eropiro mña erãre serẽbasari bu áriḡri áriḡbeaa. <sup>17</sup> Goãmñ ya weremñtadigñ mñrñ Elia mñrñ mari iro dopa masñ áriḡñumi. Eropigu masa ñero iira dipuwaja “Deco aribiricãporo,” arĩ turaro serẽñumi Goãmñre. ïḡu eropa arĩ serẽcñ ùhre bojori gohra gajñ bojori deco deco aribiriyoro i yebaguere. <sup>18</sup> Eropigu dipaturi Goãmñre deco ïḡu aridore serẽcũ deco mereyoro daja. Eropiro dipaturi i yebaguere yucñ buḡñ dñca dñcacuyoro. Eropiro Goãmñre mari serẽri bu áriḡri áriḡbeaa.

<sup>19</sup> Yñ acawererã, mña mera majagu Goãmñ yare diaye maja áriḡrire duhudigñ Goãmñ yare dipaturi ïḡu gameborore ïḡure wererã, õaro iirã iiaa mña. <sup>20</sup> Eropirã ire masique mña: Goãmñre duhudigure Goãmñre dipaturi gamecũ iirã, peamegue wabodigure taricũ iirã iica mña. Eropigu baja ïḡu ñeri iirare Goãmñ cãdijicũ iirãca mña ïḡure.



## 1 San Pedro

*Jesu gaji macari wanirãre gojabeoñumi Pedro*

<sup>1</sup> Yũhu Pedro Jesucristo ïgu buhedore apidigu ta ãhraa. Eropigu mũare yoaro maja macarigue wanirãre, Ponto yebague wanirãre, Galacia yebague, Capadocia yebague, Asia yebague, Bitinia yebague wanirã sãre mũare árĩpehrerãre gojabeogu iiaa yũhu. Mũare ðadore gojabeoa yũhu. <sup>2</sup> Negohraguere Goãmũ mari Pagũ “Õpa iigũra,” ïgu arĩdiro dopa ta mũare beyepũ. ïgu beyera pũhrũ ïgu Espĩritu Santo mera mũare Goãmũ yarã árĩmorãre acupũ. Õpa ta acupũ ïgu Jesucristore ðaro yũhrimorã mũa árĩboro dopa. ïgu di cóãro mera ñerire coenirã mũa árĩboro dopa iipũ. Eropirã Goãmũ ïgu mahiri mera ðaro árĩque mũa.

*Jesu yarã árĩrã marire umarogue ïgu aĩgãborore corerã iiaa mari, arĩ gojañumi Pedro*

<sup>3-5</sup> Goãmũ marire turaro mojomoro ïagu, Jesucristo sĩridigu ïgu masa mũriaro mera marire ðarã gohrotocũ iimi. Eropa iigu ïgu gohrotori mera Goãmũ porã ta wahaa mari. Eropa warã ïgu mera eropa mari ðaro árĩniguicãborore ðaro masia mari. Eropigu mũare ïgu ðari opaburire odiagu mũare coregu iimi. Iri mũare ïgu oburi ne pehresome. Eropigu ïgure mũa umupeorãre Goãmũ ïgu turari mera mũare ñhadibugu, taricũ iigucumi. Pehrerinũ árĩcũ mũare ïgu taurare masicũ iigucumi ïgu. Eropirã ïgu marire ðaro mojomoro ïacũ ïarã, ïgure Goãmũre mari Opũ Jesucristo Pagũre “Õagu, turagu ãhrimi,” arĩ umupeoro gahmea marire.

<sup>6</sup> Eropa ïgu taumorã árĩrã burigã mucubiro gahmea. Mero i yeba mũa árĩropẽ, bajasuburi mũa ñero tariquererã ta burigã mucubiro gahmea. <sup>7</sup> Eropa ñero tariquererã ta Goãmũre cóãbirã mũa árĩrã “Queoro Jesucristore umupeoa gũa,” arĩmasia mũa ïgure. Mũa ñero tariquererã Jesucristore umupeoniguicũ mũa umupeoripũ yuju diaye árĩbeaa. Eropigu mũa ñero taricũ ïagu “¿Árĩro ta mũa yũre umupeori?” arĩ queoñagu iimi Goãmũ mũare. Mũa eropa ñero tarirã diaye ta Cristore ðaro umupeoniguicũ “Õaro iiaabũ mũa,” arĩgucumi Cristo mũare. Eropigu Jesucristo dujarigu mũa ïgure ðaro umupeoniguinirãre ðaro ïagucumi mucubiriri mera.

<sup>8</sup> ïgure Jesucristore ñabiriquererã mahia mũa. Eropirã dohpaguere ïgure ñabiriquererã ta ïgure “Diaye ta iigu ãhrimi,” arĩ umupeoa. Eropa umupeorã turaro mucubiria mũa. Mũa eropa mucubirirã mũa Goãmũ pohro mucubiriboro dopa ta mucubiria. Mũare eropa mucubiricũ iimi Goãmũ. Eropirã turaro mucubiria. <sup>9</sup> Eropigu Goãmũ mũare peamegue wabonirãre taricũ iigucumi mũa ïgure ðaro umupeoro mera.

<sup>10</sup> Goãmũ ïgu masare eropa tauborore iribojegue Goãmũ yare weremãhtanirã irire masidiarã serẽpi ñamuriñuma. <sup>11</sup> Cristo ïgu ñero tariborore, ïgu sĩridigu masa mũriaborore, árĩpehrerã tauro opũ ïgu árĩborore erã ero coregue ta weremãhtañuma. Jesucristo ïgu Espĩritu Santo ïgu itamuri mera eropa wereñuma erã. Erã

eropa weremuhtaquererã erã wererare masibiriñuma. Eropirã erã wererare ðaro masidiarã serêpi ïamuriñuma erã Goãmure. <sup>12</sup> Iri erã werera Jesucristo ariburi erã ya árĩburi árĩburiyoro. Mari ðaro árĩburi árĩyoro. Irire erãre masicũ iĩnumi Goãmũ. Eropirã dohpaguere umarogue obeodigu Espĩritu Santo ïgu itamuri mera ðari buherire muare gua werea. Iribojegue mua ya árĩburire erã weremuhtara iri ta árĩcãro tiiaa dohpaguere gua muare wereri. Iri buherire anyua sã burigã masidiariñuma.

*Goãmũ marire ñeri marirã árĩdoremi, arĩ gojañumi Pedro*

<sup>13</sup> Eropirã ðarire guña masi árĩyuque mua. Eropirã guhyadiaro árĩque. Cristo ïgu dujaricũ Goãmũ muare ïgu ðaro tauborore guñaque. Eropirã irire ðaro mucubirimuhtarã coreque. <sup>14</sup> Iribojegue Goãmure masinibirãgue ñerire uaribejarã árĩmurinirã árĩribũ mua. Dohpaguere irire iibiricãque. Eropirã majirã erã pagu sumarãre ðaro yuħriro dopa ta Goãmure ðaro yuħrique daja. <sup>15</sup> Eropirã ïgu yarã árĩmorãre muare sihubeodigu ñeri marigu ïgu árĩro dopa ta mua sã ñeri marirã ta árĩque. Eropirã ðari dihtare iirã árĩque. <sup>16</sup> Eropa ta arĩ gojañuma Goãmũ yare erã gojarapũgue: “Ñeri marigu aħraa yuħũ. Yu eropa árĩcũ mua sã ñeri marirã árĩque,” arĩmi Goãmũ, arĩ gojañuma.

<sup>17</sup> ïgu Goãmũ mari Pagu yujurãyeri árĩpehrerã erã iirare ïagu yujuro mera beyemi ïgu erãre. ïgu eropiigu árĩcũ ïgure “Aħũ,” arĩdiarã ðaro iigunerire uaribejarã árĩmurine. I yeba mua árĩropẽ guhyadiaro mera ðaro iique mua. <sup>18</sup> Mua ñecu sumarã mura erã árĩricuri ne duħpiburi árĩburiyoro. Mua sã erã iidiro dopa ta iinirã mua árĩquerecũ ta Cristo muare ïgu yarã árĩmorãre iimi. Mari wajamorire ïgu wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Irire ðaro masia mua. Eropa wajayebasagu ïgu niyeru mera, oro mera wajayebasabirimi. Niyeru, oro sã dederea waroca. <sup>19</sup> ïgu di cóara mera ta wajayebasami mari ñeri iira dipuwajare. Ovejagã erã Goãmure obodigu ðagu ïgu árĩdiro dopa ta Jesucristo ðagu ñeri marigu árĩdigũ arĩmi. <sup>20</sup> Iribojeguere i yebare ïgu ïhacũnuguboro coregue Jesucristo ïgu eropa waborore masituhapu mari Pagu Goãmũ. Dohpaguere pehrerinũ coregã árĩcũ, Cristo siribasami muare mua ya árĩburire. <sup>21</sup> Eropirã Jesucristo ïgu itamuro mera Goãmure umupeoa mua. Goãmũpũ Cristore siridigũre masudigu arĩmi. Eropigu ïgure umarogue apigu, árĩpehrerãre ïgure umupeocũ iipũ mari Pagu. ïgu eropiicũ ïgure mari Pagure “Diaye ta iigu aħrimi,” arĩ umupeoa mua. Mua eropa umupeocũ ðaro iimi muare. Eropirã mua ïgu mera ðaro árĩniguiborore ðaro masia mua.

<sup>22</sup> Õari buherire diaye majare yuħrirã mua ñerire duħunirã aħraa mua. Eropa árĩrã, diaye ta mari acawererã Jesu yarãre mahi umupeomasia mua. Eropirã mua mera majarãre mua siporãri mera turaro mahi umupeoque. <sup>23</sup> Mua dipaturi masa dehyoaro dopa ta Goãmũ porã wahabu mua. Mari pagu sumarã mera masa dehyoanirã árĩrã, puħrũ siria warãca. Iri iro dopa árĩbeaa Goãmũ porã mua wacũ. Goãmũ mera árĩniguicãrãca. Goãmũ ïgu buheri mera ïgu porã wahabu mua. Iri buheri peħrebiriburi buheri marire Goãmũ mera eropa árĩniguicã iiaa. <sup>24</sup> Õpa aħraa Goãmũ yare erã gojarapũ:

Árīpehrerā masa taa iro dopa wahama. Eropiro ōari erā opari sã gori iro dopa āhraa. Taa masa, sīria wahaa. Gori sã masa, sīria wahaa. Iri taa iro dopa ta mari masa sã wahaa. <sup>25</sup> Mari Opu ya buheripu ne pehresome. Īgu arīdiro dopa ta eropa waroca, arī gojañuma.

Iri buheri mũare erā werera ōari buheri ta Jesucristo marire tauburi buheri ta āhraa.

## 2

<sup>1</sup> Eropirā árīpehreri ñeri iirire, erā pũrũpũ erā ñero ii corerire, gajirā gajinore opacũ ihaturirire, gajirā ñeri quere moarire, irire duhuque mua. <sup>2-3</sup> Mari Opu mũare ōaro ĩgu iirire dabero masituhaa mua. Eropirā ne masa dehyoarāgā apĩcore erā gamero dopa ta mua sã ōari buherire Goāmũ yare turaro gameque. Eropa ĩgu yare gamerā mua ĩgure mua guñaturanemorāca. ĩgu yarā ōaro pee masirā árĩrāca.

*Cristo ojocaricũ iigu utāye iro dopa árĩgu āhrimi, arĩ gojañumi Pedro*

<sup>4</sup> Cristo ojocaricũ iigu utāye iro dopa árĩgu āhrimi. Masa Cristore gamebirima. Erā gamebiriqerēcũ Goāmũpũ ĩgu Pagũpũ ĩgure beyedigũ árĩmi. Ōatariagu āhrimi. ĩgu eropa árĩgu árĩcũ ĩgure gameque. <sup>5</sup> Eropirā mua Jesu yarā árĩrā mera Goāmũ āhrimi. Eropirā yujuro mera ĩgu yare ōaro iirā árĩque mua. ĩgu ya árĩburire mua iimorāre beyedigũ árĩmi. Eropirā mua Jesucristo itamuri mera ĩgu yare ōaro iirā ĩgu Goāmũre mucubiricũ iiaa. <sup>6</sup> Ōpa āhraa Jesucristore Goāmũ yare erā gojarapũ:

Cristo utāye iro dopa ya beyedigũ āhrimi. Eropigu ōatariagu āhrimi. ĩgu mariro yaharā wamasibeam. Eropigu ĩgure Jerusaléngue dohpague apigu iiaa. ĩgu masare ōaro árĩcũ iigucumi. Eropirā ĩgure umupeorā mucubiriniguirācoma, arĩmi Goāmũ, arĩ gojañuma Goāmũ yare weremũhtanirāgue.

<sup>7</sup> ĩgure umupeorāpũ “Ōatariagu āhrimi,” arĩrācoma. ĩgure umupeobirāpũ ñero warācoma. Erāre ōpa āhraa Goāmũ yare erā gojarapũgue:

Ihĩ Cristo utāye iro dopa ta Goāmũ beyedigũ āhrimi. ĩgu Goāmũ beyedigũ árĩqerēcũ masa ĩgure gamesome. ĩgure gamebiriqerēcũ Goāmũ ĩgure opu acumi árīpehrerāre dorebure, arĩ gojañuma.

<sup>8</sup> Ō säre arāa Goāmũ yare erā gojarapũ:

ĩgu utāye iro dopa árĩgure gamebirā dederea warācoma, arĩ gojañuma iribojeguer.

Eropa gojarā Jesucristore masa gamebiriburire ōpa arĩ gojamũhtañuma. Erā ĩgure gamebirā Goāmũ ya buherire yũhribirima. Cristore gamebirā, ĩgure tarinugarā, Goāmũ pohrogue ejasome erā. Erā eropa waborore apipũ Goāmũ erāre.

*Ōpa āhrima Goāmũ yarā, arĩ gojañumi Pedro*

<sup>9</sup> Mũapũ Goāmũ ĩgu beyenirā āhraa. ĩgu mari Opu ĩgu yarā pahia ĩgu yare itamurā āhraa mua. Eropirā ĩgu ya curu majarā ñeri marirā

Goãmũ yarã ta ãhraa mũa. Eropigu mũare naitãaro áribonirãre boyoropũ árimorãre, ñerire iibirimorãre, ðaripũre iimorãre aĩdigũ árimi mũare. Eropa ta aĩdigũ árimi Goãmũ mũa ĩgu ðarire ĩgu ðaro iirare gajirãre weremorãre. <sup>10</sup> Ero coregue duhpimorã áribirimũrĩribũ mũa. Dohpague tamerare Goãmũ yarã ãhraa mũa. Ero core mũare mojomoro ĩabupũ marinimi mũare dohpa. Dohpaguepũre mũare Goãmũ mojomoro ĩagũ ãhrimi.

*Goãmũ yare iirã áriique mũa, arĩ gojañumi*

<sup>11</sup> Yũ mahirã, mũa i mũure wari masa iro dopa ãhraa dohpague. Goãmũ pohro wamorã ta ãhraa. Mũa eropa árirã áricũ, ire turaro werea mũare: Mũa ñeri uaribegarire iibiricãque. Iri ñerire uaribegarã, ñerã warã iica mũa. <sup>12</sup> Goãmũre gamebirã watope árirã ðaro iirã áriique mũa guare werewũari arĩrã. Mũa eropa iirã áricũ mũare dohpague ñero werewũadiaquererã mũa ðaro iirire masirãcoma erã. Eropa masirã erã Goãmũre “Õagũ, turagũ ãhrimi,” arĩrãcoma. Õpa ta arĩrãcoma Cristo ĩgu i yebague ĩgu dujaricũ.

<sup>13</sup> Mari Opũ yare iirã árirã õ majarã oparã sãre yũhriique mũa. I yeba majagure mũa áripehrerã tauro opũ árigũre ĩgu sãre yũhriique. <sup>14</sup> Goãmũ erã oparãre apipũ tarinũgarãre dipuwaja moamorãre. Eropigu ðaro iirãre “Õaro iiabũ mũa,” arĩdoregu apipũ erãre. ĩgu eropa apicũ erãre yũhriique mũa. <sup>15</sup> Mũa ðaro iicũ ĩarã, pee masibirã erã sihajaro mũare weresãdiaquererã ta weresãmasibeama. Eropigu mũa ðaro iicũ gahmemi Goãmũ.

<sup>16</sup> Mũa ñecu sumarã áriřicũri doca árinirãre Goãmũ mũare taudigu árimi. Eropa taunirã áriřiquererã ta, “Guare doreri mara. Eropirã gua ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã ãhraa gua,” arĩ pepique mũa. Eropa arĩ pepirã ĩgu dorerire iique mũa. <sup>17</sup> Áripehrerã masare mahi umupeoque. Mari acawererã Jesu yarãre mahi umupeoque. Goãmũre guhyadiaro ĩaque. I yeba majagũ opũ sãre umupeoque.

*Cristo ñero tarigu ĩgu yujuro bojediro dopa ta yujuro bojeque mũa sã, arĩ gojañumi Pedro*

<sup>18</sup> Mũa pohro majarãre weregu iiaa dohpague. Mũa ðaro umupeori mera mũa oparãre yũhrirã áriique. Õarã, mũare ðaro iirã mera dihtare yũhrirã áribiricãque. Mũa mera guarã sãre yũhriique mũa. <sup>19</sup> Mũa ñero iibiriquerecũ, mũare erã dipuwaja moabocoma. Erã eropa dipuwaja moarare Goãmũ ĩgu gamero dopa ta irire mũa yujuro bojecũ “Õaro iiabũ mũa,” arĩgũcumi Goãmũ mũare. <sup>20</sup> Mũa ñero iira wajapũ erã mũare dipuwaja moasũcũ irire mũa yujuro bojequerecũ Goãmũ “Õaro iiabũ mũa,” arĩsome. Mari ðaro iiquererã erã dipuwaja moasũcũ irire mari ðaro mera guaro mariro áricũ yujuro bojecũ Goãmũ marire ðaro ĩhasuagũcumi. <sup>21</sup> Eropa iimorãre ĩgu yarã áriřoremi Goãmũ mũare. Cristo sã mũa ya áriburire ñero tarimi mũa ĩgũre ĩhacũboro dopa. <sup>22</sup> ĩgu ne ñero iibirimi. Eropigu ne guyabirimi. <sup>23</sup> ĩgũre turicũ, ĩgũpũ erãre ne turi gamebirimi. ĩgũre erã ñero iiquerecũ ta “Mũare ñero iigura,” ne arĩbirimi ĩgu. Eropigu “Ahũ queoro dipuwaja moagu ãhrimi. ĩgũgue amugũcumi,” arĩ pepiñumi ĩgu. Eropirã mari sãre ĩgu iidiro dopa ta iiro gahmea. <sup>24</sup> ĩgu Cristo

Īġu basi crusague mari ñeri dipuwaja sĭrimi. Eropa sĭrimi dipaturi mari ñerire iibiriboro dopa, Goãmu gameripure mari iiboro dopa. Īġu ñero camicumi marire peamegue wabonirãre marire taricã iibu.<sup>25</sup> Oveja erã dedereboro dopa ta mua sã peamegue dederebonirã áriribũ. Dohpaguepare Cristore umupeorã Īġu yarã wahabũ pare. Eropigũ ovejare ĩhadibugũ iro dopa Cristo muare ĩhadibumi. Mua sĭporã mera dederebiriborore ðaro ĩhadibumi.

### 3

*Mojoto dirirãre ðpa iiro gahmea erãre, arĭ gojañumi Pedro*

<sup>1</sup> Eropigũ pohro majarãre yũ dorediro dopa ta mua marasã nomere doregura. Mua marapũ sumarãre ðaro yũhrique erã Goãmu buherire erã gameboro dopa. Yujurãyeri mua marapũ sumarã Goãmu buherire gamebirã áhrima. Erãre mua yũhricũ ĩarã Goãmu ya buherire gamebocoma erã. Eropirã iri buherire mua erãre werebiriquerecũ ta Īġu yare gamebocoma erã. <sup>2</sup> Eropa ta gamebocoma mua erãre ðaro iirire, mua umupeori sãre ĩarã. <sup>3</sup> Mua nome, mua poarire wũapuwea seapatanirã nome, oro dari bũyanirã nome, ðari suhri sañanirã nome árdiarire guñabiricãque mua. Mua ya dupũ masare ĩhasuacũ iibiricãque. <sup>4</sup> Eropa iibirã ðpa iique. Mua pepiri ðaro áricũ guñaque. Eropirã mua guhyadiarã nome iro dopa gajirãre nijiyajaro mera iirã nome árique. Guhyadiaro mera weretamurã árirã ipure masare ĩhasuacũ iique. Iripũ pehresome. Iri ðatariari áhraa Goãmu ĩacũ. <sup>5</sup> Òpa ta iimuriñuma iribojegue majarã nome Goãmu yarã nome. Erã nome Goãmure umupeorã nome árirã, erã marapũ sumarãre ðaro yũhrimuriñuma. <sup>6</sup> Eropa Sara igo marapure Abrahãre ðaro mera yũhrimuriñumo. Eropigo ĩġure “Opũ,” arĭ piyumuriñumo. Eropirã mua ðaro iirã nome árirã, güiri marirã nome árirã, Sara árdiro dopa áhraa mua.

<sup>7</sup> Òpa ta mua marapũ sumarã sã mua marapo sãre ðaro iique. Erã nome mari uma iro dopa turarã árĭbeama. Eropirã umupeori mera ðaro iique erã nomere. Goãmu árĭpehrerinuri Īġu mera mari árĭniguiborore Īġu muare odiro dopa ta ogucumi erã nome sãre. Erã eropa árĭmorã áricũ erã nomere ðaro iique. Goãmure mua serẽrire Īġu yũhriboro dopa erã nomere ðaro iique mua.

*Òaro erã iiquerecũ ta gajirã erãre erã ñero iirire werepũ Pedro*

<sup>8</sup> I mera weretugura: Mua árĭpehrerã yujuro mera ðaro árique. Eropirã mua mera majarãre ðaro mojomoro ĩarã árique. Mua acawererã Jesu yarãre pepuri majarã game umupeoque. Eropirã ðaro iique erãre. Eropirã “Gajirãre masitaugũ áhraa,” arĭ pepibirã erã gamero dopa ta iique. <sup>9</sup> Gajirã muare erã ñero iicũ erãre ñero ii gamebiricãque. Muare erã turicũ erãre turi gamebiricãque. Muare erã eropa iiquerecũ ta ðaro iique erãre. Eropirã ðaro yũhrique erãre. Iirire iimorãre ta apimi Goãmu muare ðaro iibu. <sup>10</sup> Eropa ta áhraa Goãmũ yare erã gojarapũ:

Mua ðaro mucubiriri mera árdiarã ne ñero wereniguibiricãque.

<sup>11</sup> Árĭpehreri ñeri iirire duhucãque. Óaripure iique. Game mua basi ĩhaturiro mariro árique. Iirire turaro iique. <sup>12</sup> Óarãre mari Opũ eropa ĩhadibuniguicãgũ iimi. Eropigũ ĩġure erã serẽrire

eropa peeniguicãgu iimi. Ñero iirãpũre ïgu gamebeami, arĩ gojañuma Goãmũ yare gojarapũgue.

<sup>13</sup> Óarire mũa turaro iidiacũ gajirãpũ mũaare ñero iidiaquererã ta ne yujuro bojesome. <sup>14</sup> Óaro mũa iiquerecũ ta mũaare erã ñero iicũ ïagu Goãmũpũ mũaare óaro iigũcumi. Eropirã mũaare ñero iidiarãre, “Mũaare wejêrãca,” arĩrãre gũibiricãque. Eropirã bũjawerebiricãque. Irire pee guñaricũbiricãque. <sup>15</sup> Eropirã mũa Cristore “Gũa Opũ ãhrimi,” arĩ pepirã, umupeoque ïgure. Eropirã Cristore mũa umupeorire, Goãmũ mera mũa áriborore, gajirã mũaare serêpibocoma: Erã mũaare serêpiboro core erãre yũhriburire óaro guñayuque. Eropa erãre yũhrirã nijiyajaro mera, óaro umupeori mera wereque erãre. <sup>16</sup> Óarã árĩque. Eropirã “Ñerire iiaa,” arĩ pepisome mũa. Eropirã Cristo yare mũa óaro iirã árĩcũ gajirã mũaare ñeri quere moarã guhyasiuro warãcoma. <sup>17</sup> Ñerire mari iira dipuwaja mari ñero taricũ óabeaa marire. Eropiro Goãmũ gamecũ óarire mari iira dipuwaja mari gajirã mera ñero taricũ óapũrica iri tamera.

<sup>18</sup> Eropa ta ñero tarimi Cristo. Yujusubu ta árĩpehrerã ñeri dipuwajare sĩrimi ïgu. Óagu árĩmi. Eropa árĩgu ñerã mari árĩcũ mari ya áriborare ñero tarimi ïgu. Ñero tarimi ïgu Goãmũ yarã mari wacũ iibu. ïgu sĩria wami. Eropa sĩriquerecũ ta ïgu sĩporã ojocariyoro. <sup>19</sup> Eropigu ïgu sĩporã mera sĩrinirã mũa erã dipuwaja moaburire corerã erã pohrogue Goãmũ yare werepũ erã sĩporãrere. <sup>20</sup> Erã mũrapũ iribojegue Goãmũre yũhribirimũriñuma. Irisubuguere Noé ïgu árĩrasubuguere, wũadiru dohodirure dohogũ iĩnumi. Irirure ïgu dohorisubu Goãmũre yũhribirinirã mũa erã yũhricũ gameriñumi. Eropigu erã yũhriborore yoari boje dipuwaja moabigu coreriñumi Goãmũ. Yũhribirimũriñuma. Eropigu erãre dipuwaja moañumi. Eropirã bajamerãgã ocho dihta dia miririñere tariwereñuma. <sup>21</sup> Miricũ erã taridiro dopa ta marire wãiyecũ peamegue wabonirãre mari tariborore ïhmua. Deco mera marire wãiyecũ mari dũpũre mari guhrrarire tu coero dopa árĩbeaa. Marire wãiyecũ ñeri marirã mari áriborore Goãmũre mari serêa. Eropirã Jesucristo ïgu masa mũriara mera peamegue wabonirã taria mari. <sup>22</sup> ïgu Jesucristo mũmarogue wadi árĩmi Goãmũ mera dorebu. Eropigu ïgu anyua tauro, mũmaro majarã oparã tauro, árĩpehrerã dorerã tauro erãre doregu ãhrimi.

## 4

*Cristo yarã árĩrã óarire gohrotonirã árĩrãca, arĩ wereñumi*

<sup>1-2</sup> Mari ñero tarirã mari ñero iirire duhucãa mari. Eropa duhucãrã mari dipaturi mari mũaribejarire iibeaa. I yebe mari árĩropê Goãmũ gamerire iiniguirãca. Eropirã Cristo ïgu ñero tarigu ïgu gũibiridiro dopa ta mũa sã ñero tariborore gũibiricãque. <sup>3</sup> Iribojegue Goãmũre gamebirã erã ñerire mũaribejadiro dopa ta iimũriyoro mũa. Guhyasiĩro mariro ñerire iirã, ñeri mũaribejarire iirã, mereri bosenuri iirã, Goãmũ dorerire tarinũgarã, goãmarã wéanirãpũre umupeorã iimũriyoro. Eropirã iripêta iri ñerire iipurumujucãque pare. <sup>4</sup> Eropirã erã mũraro ta iirãpũ mũa dohpaguere iri ñerire erã mera iibiricũ ïarã erãpũ ïha uca wahama. Eropirã erã mũapũre ñero wereniguirã,

querere goroweoma. <sup>5</sup> Erã eropiicũ ïagu erã ñeri iirare Goãmupũ serẽpi ïagu, weretaridoregucumi erãre. Ïgu ojocarirãre, sîrinerã sãre beyebu ãhrimi. <sup>6</sup> Ïgu eropa beyebu arïgu erã sîrinerãpũre ðari buherire werepũ Goãmũ mera erã ðaro arîninguiborore. Eropirã i yebare erã arïpehrerã masa iiro dopa sîrinerã arïquerecũ Goãmũ Ïgu mera erã ðaro arîninguiborore werepũ erãre.

<sup>7</sup> Pehreburinũ merogã dahyaa. Eropirã ðaro pee masirã arïque. Eropirã Goãmũre serêniguiçãque. <sup>8</sup> Gajirãre mari ðaro mahirã baja gajiropa erã marire ñero iiquerecũ ta eropa ïacãa mari. Eropirã mũa mera majarãre burigã umupeo mahiniguicãque. <sup>9</sup> Mũa mera majarãre mucubiriri mera mũa ya wirigue ñajaridoreque. <sup>10</sup> Goãmũ Ïgu yarã nũcũre Ïgu yare mũa mohmemasiburi nũcũre apimi. Ïgu eropa apicũ mũa iimasiro dopa ta mũa mera majarãre irire ðaro itamuque. Goãmũ mũa nũcũre mũa Ïgu yare mohmemasiburi nũcũre apimi. Ïgu apirañe mera gajirãre ðaro itamurã, Goãmũ Ïgu apidiro dopa ta ðaro iirã iiaa mũa. <sup>11</sup> Eropirã mũa ðaro wererã arïrã, Goãmũ Ïgu werebodiro dopa ta ðaro wereque mũa sã. Masare itamurã arïrã, Goãmũ Ïgu apira turari mera gajirãre itamuque. Arïpehreri mũa iira nũcũ Goãmũre masa erã umupeoboro dopa irire iique. Jesucristopũ mũa irire iicũ itamugucumi. Ïgũre arïpehrerinũri umupeoque. “Õagu, turagu ãhrimi,” arïro gahmea arïpehrerãre. Eropa ta arïporo.

*Jesu yarã erã arïri dipuwaja erã ñero taririre were gojañumi Pedro*

<sup>12</sup> Yũ mahirã, dohpaguere ñetariaro tarirã, “Gajiropa arïro wãca yũre,” arï guña iibiricãque. Mucubirirã arïque. <sup>13</sup> Bujawerebirã ta mucubirirãpũ arïque. Eropirã “Cristo Ïgu ñero taridiro dopa ta gũa sã eropa ta wahaa,” arï mucubirique mũa. Eropa mucubirirã Cristo Ïgu ðarire Ïgu ïhmugũ dujaricũ mũa turaro mucubirirãca. <sup>14</sup> Cristo yarã mũa arïri dipuwaja gajirã mũare erã turicũ Goãmũ Ïgu Espiritu Santo Ïgu ðagu mũa mera arïgu iimi. Eropirã ðaro mucubirirã ãhraa mũa. <sup>15</sup> Eropirã masare wejẽra waja dipuwajacurã, yajara waja dipuwajacurã, ñero iira waja dipuwajacurã, gajiropa arï goroweora waja dipuwajacurã arïbiricãque. Iri dipuwaja mũa ñero taricũ ñehe ãhraa. <sup>16</sup> Cristo yarã mũa arïra wajapũ ñero taricũ õhaa. Eropirã Cristo yarã mũa arïcũ ïha ñero iima mũare. Erã eropiicũ gũhyasîribiricãque. Ñero tariquererã ta Cristo yarã mũa arïrĩre mucubirirã, Goãmũre “Õhaa,” arï umupeoque mũa.

<sup>17</sup> Goãmũ Ïgu yarã erã iirare Ïgu beyerisubu arïro iiaa dohpaguere. Arïpehrerã mari Ïgu yarã mari iirare ïha serẽpimũhtagucumi. ¿Eropa marire serẽpimũhtagũ dohpa iigucuri Ïgu yarã arïbirãpũre mũa pepicũ? Ïgũre yũhribirinirãpũre turaro dipuwaja moagucumi. <sup>18</sup> Eropirã ðarã Ïgu yarã eropa ñero tarira pũhrũ Goãmũ erãre tau erãre Ïgu pohro aïagucumi. Goãmũre gamebirãpũ ñetariaro tarirãcoma. Eropirã dederea wa peamegue warãcoma. <sup>19</sup> Eropirã Goãmũ Ïgu gamecũ mũa ñero tarirã arïrã, ðarire mũa iirare duhubiricãque. Eropirã mũare ïhacũnugudigũre mũare ne duhubigũre Ïgũre umupeoro gahmea. “Yũre ïhadibugucumi,” arïro gahmea.

## 5

*Jesu yarã erã iiborore were gojañumi Pedro*

<sup>1</sup> Dohpaguere muare Jesu yarã oparãre weregura: Yũhu Jesu yarã opu ãhraa. Mũa sã erã oparã ta ãhraa. Muare yũ iro dopa oparã árĩrãre ire werebu iiaa yũhu: Cristo ãgu ñero tarirare ãdigũ árĩgu, mũa mera umarogue Cristo mera ðaro árĩniguibu árĩgu ire muare weregura: <sup>2</sup> Goãmũ yarã oveja iro dopa ãhrima. Muapũ ovejare ãhadiburã iro dopa ãhraa. Eropirã Goãmũ muare ãgu apinirãre ãgu yarãre ðaro ãhadibuque mũa. Eropirã Goãmũ ãgu gamediro dopa ta ðaro sĩporãcũri mera erãre ãhadibuque. Eropirã erãre ãhadiburã “Niyerure wajatarãca,” arĩ pepibircãque mũa. <sup>3</sup> Eropa ãhadiburã erãre pũriro mera dorebirabircãque. Eropirã ðaro iique mũa Jesu yarã muare erã ãhacũboro dopa. <sup>4</sup> Mũa eropa iirã Cristo marire árĩpehrerãre ãhadibugũ ãgu dujaricũ ãgu muare ðarire oburire oparãca. Iri mũa opaburi ne pehresome.

<sup>5</sup> Erãre yũ dorero dopa ta mũa mamarã sã erãre mũa oparãre yũhrirã árĩque. Eropirã mũa Jesu yarã árĩpehrerã game yũhri árĩque. “Õatariagu ãhraa,” arĩ pepirãre Goãmũ gamebeamĩ. Gajirãre umupeorãpũre “Bu árĩrã ãhraa,” arĩ pepirãpũre ðaro mahi itamumi ãgu, arĩ gojara ãhraa.

<sup>6</sup> Eropirã Goãmũ turagũpũre muare dorecũ yũhriique. Eropirã mũa basi “Yũ ðagu ãhraa,” arĩ pepibircãque. Mũa eropa ðarire iicũ ãgu Goãmũ ãgu queoranũ árĩcũ masa ãhuro muare “Õarã ãhrima,” arĩ ãhmuũcumi. <sup>7</sup> ãgu muare wũaro pepi ãhadibumi. Eropirã ãgũre guñaturarã, ne wũaro bujawere guñaricũbircãque muapũ.

<sup>8</sup> Muare ãhaturigũ watĩ yee guagu ãgu ehma baro iro dopa ta ãhrimi. Muare ñero iidoregu goroweodiami. Eropirã pee masi árĩque. <sup>9</sup> Árĩpehrerogue sãre gajirã Jesu yarã eropa dihta teboricũma watĩ goroweodiari mera. Irire masirã ãgũre yũhribircãque. Eropirã Cristore umupeorã turaro guñaturaque mũa. <sup>10</sup> Mũa i yeba árĩrisubu dihta watĩ ñero iidorediario mera teboricũrãca. Merogã ãhraa. Pũhrũ mũa Jesucristo pohro árĩrã, muare ðarã turarã árĩcũ iigũcumi. Eropigu mũa sĩñajarã ðaro árĩcũ iigũcumi muare. ãgu Jesucristo iira mera árĩpehrerinũri umũsigue mũa ðaro árĩborore muare apigũcumi. ãgu Goãmũ ãhrimi árĩpehrerãre mojomoro ãgu. <sup>11</sup> Eropirã umũri nũcũ “ãgu turagu ãhrimi,” arĩ umupeorã ãgũre. Eropa ta iirã.

*Õadoretuñumi Pedro*

<sup>12</sup> Ipũgãre miripũgãre yũ muare gojabeocũ Silvanopũ yũre gojabasami. Silvano Jesu yagu yũ acaweregu Jesure duhubigu ãhrimi yũ pepicũ. Muare ðaro werediaa. Eropigu “I buheri diaye ta Goãmũ muare ãgu mahiri buheri ãhraa,” arĩ weregu muare ipũre gojabeoa. Eropirã i buheri mera sĩporã turarã árĩque mũa.

<sup>13</sup> Muare ãgu beyediro dopa ta Jesu yarã Babilonia majarã sãre beyedigũ árĩmi Goãmũ. Erã muare ðadorema. Marco sã yũ magũ iro dopa árĩgu sã muare ðadoremi. <sup>14</sup> Mũa mera majarãre bocatĩrĩrã ðaro mera mojoto ñeaque.

Árĩpehrerã muare Jesucristo yarãre gua ðadorea. Eropa ta árĩque. Iripẽta ãhraa.



## 2 San Pedro

### *Jesu yaräre gojabeoñumi daja Pedro*

<sup>1</sup> Yuhũ Simo Pedro Jesucristo ïgu buhedore ïgu apidigu añraa. Eropigu ïgu pohro majagu ta añraa. Eropigu mũare gojabeoa yuhũ. Goãmũ marire taudigu Jesucristo mera marire árïpehreräre diaye iigu añhrimi. Eropa iigu árïgu Cristore umupeocũ, ïgu yarã wacũ iimi mũare. Eropa warã mũa sã gũa iro dopa ta ïgu yarã añraa. Mari yujuro mera ïgu yarã árïräre mũare gojabeoa. <sup>2</sup> Eropirã Goãmũ sãre mari Opũ Jesucristo sãre masinemorã ïgu mahiri mera ðaro árïrãca mũa. Eropa ðaro mũa árïboro dopa mũare serëbasaa Goãmũre yuhũ. Eropa arïgu mũare ðadorea.

### *Õpa añhrima Cristo yarã, arï gojañumi Pedro*

<sup>3-4</sup> ïgu yarã árïmoräre Cristo marire aïdigu árïmi. ïgu eropa aïcũ peerã, ïgũre yuhribũ mari. Eropa yuhrirã Jesucristo ðagũ, ðarirepa ta ïgu yarã añraa. Mari yujuro mera ïgu yarã árïrã iimasigu árïro dopa ta mari sã ïgu iro dopa ta árïmasia. Eropa Goãmũre mari masinemorã, ïgu turari mera ïgu gamero dopa ta ðarã árïrãca. ïgu añhrimi ïgu yarã árïmoräre marire aïdigu. Õagu ðarire iimasipehogũ ïgu árïro dopa ta marire árïpehreräre aïdigu árïmi. Eropa ta iri ïgu turari mera marire ðatarario wahabũ. “Õpa ta mũare ðaro iigũra,” ïgu arïdiro dopa ta marire ðatarario iimi ïgu. Marire ïgu eropiicũ i yeba maja ñerire mari uaribejarire mari duhucãa. Iri ñeripũ marire goroweotariaca. Eropirã ïgũre yuhrirã árïrã Goãmũ ïgu arïdiro dopa dujarãca mari. <sup>5</sup> Eropirã Cristore umupeorã árïtuhaa mũa. Eropirã ïgu turarire oparã õpa iinemoque daja: Õarã árïque mũa. Eropa ðarã árïrã ðaro pee masirã árïque mũa. <sup>6</sup> Eropa pee masirã árïrã ñerire iidiaquererã ta Goãmũ ïgu gameripũre iiniguicãrã árïque. Eropa iirã Cristo yarã mũa árïri dipuwaja gajirã mũare ñero iiquerecũ ta eropa yujuro bojeniguicãque mũa. Eropa yujuro bojerã Goãmũre umupeorã, ïgu gamerire iirã árïque mũa. <sup>7</sup> Eropa iirã mũa mera majaräre mahi umupeoque. Erãre ðaro itamurã árïque. Eropa iirã árïpehrerã gajirã sãre mahi umupeoque.

<sup>8</sup> Mũa eropa iinemocũpũre ðataria. Mũa eropa iinemorã, ðaro iirã árïrãca. Eropirã mari Opũ Jesucristore ðaro guñaturarã ïgu gamerire ðaro iiniguirã árïrãca mũa. Bu árïrãre iisome. <sup>9</sup> Mũa eropa iinemobirã Goãmũ yare ne masibirigohraboja mũa. Eropirã Cristo mũa ñeri iirare ïgu coerare ne guñabiriboya mũa. Eropa ta cãdijicãdiaboja mũa. <sup>10</sup> Eropirã yũ acawererã, Goãmũ yarã árïmoräre mũare ïgu arïdorecũ yuhrinirã árïbũ mũa. Eropa yuhrirã árïrã, ïgu yare guña duhudiabirã ïgu gamerire turaro eropa iiniguicãque. Mũa eropa iirã diaye ta Goãmũ mera árïrãca mũa. Eropirã diaye ta ïgu beyenirã árïrãca mũa. Eropirã ñerire iiniguirã árïsome. <sup>11</sup> Mũa eropa ïgu gamero dopa ta iirã árïrã mari Opũ marire taudigu Jesucristo ïgu árïroque ðaro warãca mũa. Diaye ta ïgu yarã mũa árïcũ ïagu “Õaro mera yũ mera árïque mũa,” arïgũcumĩ Jesu mũare.

<sup>12</sup> Eropigū m̄are ire eropa guñaniguicū iigura. I m̄are yū wererare masituhabū m̄a. Eropa masirā Goāmū yare m̄a peediro dopa ta ōaro iirā iiaa m̄a. Eropa iirā m̄a árīquerecū ta i m̄are yū wererare eropa guñanemocū werenemogura. <sup>13-14</sup> “Merogā d̄ahyaa m̄a s̄iriboro,” arī weremi yare mari Opū Jesucristo. Eropigū ojocarinigū ire yū m̄are wererare eropa guñaniguicācū iiniguigura. Yū eropa iicū ōapūrica. <sup>15</sup> Eropigū i yū were gojara m̄are gojapipehogura yū s̄irira p̄hru m̄a ōaro masiboro dopa. Eropirā i yū wererare eropa guñaniguirāca m̄a.

*Cristo ĩgū turagū árīricurire ĩabū yuhu, arī gojañumi Pedro*

<sup>16</sup> Eropirā mari Opū Jesucristo ĩgū turari s̄are, ĩgū dujariboro s̄are m̄are wererā, gua gamero gua arī bocarire wererā iibiribū. Turagū ĩgū árīr̄ire gua basi ta ĩabū. <sup>17</sup> Cristo ĩgū turatariagū ĩgū árīr̄ire guare ĩhmumi Goāmū mari Pagū. ĩgū eropa ĩhmucū Cristo ōaro gosesiricū ĩabū. ĩgū eropa gosesiricū ōpa arīro caribū: “Īh̄i yū magū yū mahigū āhrimi. ĩgū mera ōaro mucubiria,” arīro caribū gua peecū. <sup>18</sup> Ūmarogue eropa arīro caricū peebū gua. Ūtāgū wecague Goāmū yagū Ūtāgū wecague Cristo mera ejarā eroparīcū peebū gua irire.

<sup>19</sup> Ir̄ire ĩanirā árīrā, Goāmū yare werem̄htanirā iribojegue majarā erā gojara diaye árīcū ōaro masia gua. Erā gojarare m̄a ōaro buheniguirā ōaro iirā iica m̄a. Iri erā gojara m̄are sihāgodiru iro dopa āhraa. Nait̄arogue ōaro sihāgodiru mera mari ĩhamasiro dopa ta erā gojarapū marire Goāmū yare ōaro masicū iiaa. Eropirā ĩgū yare eropa buheniguique ne ĩgū Jesucristo dujaricūgue. Jesucristo dujaricū ĩgū yare masipehorāca mari pare. <sup>20-21</sup> Yū werediro tauro ip̄are ōaro masique m̄a: Iribojegue majarā ōarā Goāmū yare erā werem̄htarā erā guñabocarire wereniguibiriñuma. Esp̄iritu Santopū erā Goāmū yare wereniguiburire erāre masicū iin̄umi. Eropirā mari erā wereniguiiri gojarare buherā mari pepiri mera irire buherā “Ōpa arīro iica,” arīmasibirica. Esp̄iritu Santo ĩgū itamuri mera mari masia.

## 2

*Goāmū yare diaye buhebirāre were gojañumi Pedro*

<sup>1</sup> Iribojegue mari acawererā judio masa mera majarā gajirā “Goāmū yare werem̄htarā āhraa,” arī ḡyam̄riñuma. Erā iidiro dopa ta dohpague s̄are m̄a mera majarāre eropa ta arī ḡyarā árīrācoma. Erā diaye Goāmū yare buherā arī buheboro dopa ta ḡyarip̄ure buherācoma. Eropa buherā Cristo yap̄are goroweorācoma. Eropa iirā Cristo erā ya dipuwajare s̄iribasadiḡure guñabirācoma. Eropirā ĩgure “Gua Opū āhrimi,” arī ne pepisome. Iri árīpehr̄erire erā eropa iira dipuwajare mata Goāmū erāre peamegue wadoreḡucumi. <sup>2</sup> Eropa erā ḡya buhecū peerā erā, erā ñerire ūaribejaro dopa ta bajarā masa erāre ĩhacū ñero iirācoma. Erā ñero iicū ĩha gajirā Jesucristo yare diaye majare ñero wereniguirācoma. <sup>3</sup> Eropirā erā ḡyaricurā niyerure waja gamerā ḡyari buherire buherācoma m̄are. Eropa buhera dipuwaja Goāmū erāre peamegue wadoreḡucumi. Iribojegue ta eropa iinirāre dipuwaja moadoretuhañumi ĩgū.

<sup>4</sup> Eropa ta iribojegue dipuwaja moadoreñumi ñerā anyua s̄are. Erāre peamegue peresu iin̄umi. Eropa iigū i ūmū pehr̄erinū árīcū erāre dipuwaja moaḡucumi. <sup>5</sup> Eropa ta iribojegue majarāre Goām̄ure

gamebiriniräre dipuwaja moañumi ĩġu. Eropiġu árĭpehrero i yebare miuġu, árĭpehrerã ñerã masare miu wejêpehocãñumi. Noé dihtare gajirã siete masa mera tauñumi. Noépũ irisubu majarãre Goãmũ yare ôarire buhemuririñumi. <sup>6</sup> Eropa ta Sodoma waïcũri maca majarãre Gomorra waïcũri maca majarã sãre Goãmũ dipuwaja moañumi. Iri macarire pa iinirãre dipuwaja moadoretupeame mera ôaro soepehocãñumi. Eropiġu pũhrũgue árĩmorãre ĩġure gamebirinirãre ĩġu dipuwaja moaborore ĩhmũġu iinũumi. Ñerãre ĩġu dipuwaja moaborore ĩhmũġu iinũumi “Gũiporo,” arĩġu. <sup>7</sup> Eropiġu Lote waïcũġure tauñumi. Lotepũ ôagũ árĩñumi. Eropa árĩġu Sodoma majarã Goãmũ dorerire tarinũgarã ñetariaro erã iicũ ĩagũ gariborea wañumi. Eropiġu ıma erã basi erã ñero iicũ ĩagũ gariboretaria wañumi ĩġu. <sup>8</sup> ĩġu ôagũ ñerã watope árĩñumi. Eropiġu ımũri nũcũ ñetariaro erã iicũ ĩagũ ñero erã wereniguicũ peegũ ñero sĩporãcũñumi. <sup>9</sup> ĩġure Goãmũ taucũ ĩarã ire masia mari. Goãmũ mari Opũ marire ĩġure gamerãre mari ñerã watope árĩcũ marire taugũcumi mari ñero iibiriboro dopa. Eropiġu ñerãpũre erã ñero iira dipuwajacũrã árĩcũ apĩġucumi. Pehrerinũ árĩcũġure erãre dipuwaja moagũcumi.

<sup>10</sup> Ñerire turaro ıaribejarã Goãmũ dorerire tarinũgarã erã tamerare ñero dipuwaja moagũcumi ĩġu. Oã mũa mera majarãre ġuya buherã ñeri ıaribejarire iirã ne mari Opũre umupeobeama. “Gajirãre mari tarinũgaa,” arĩ pepirã áhrima erã. Eropa arĩrã erã deyobirãre ımaro majarãre, ñerã turarãre ne ġuibirã ñero arĩ wereyama erãre. Erãpũre tauro dipuwaja moagũcumi Goãmũ. <sup>11</sup> Goãmũ yarã anyuapũ ne erã iiro dopa iibeama. Erã tauro turarã áhrima. Eropa turarã árĩquererã ta erã ne wereyari mera ımaro majarãre ñerã turarãre “Peamegue waporu,” arĩ weresãbeama mari Opũre.

<sup>12</sup> Erã ġuya buherãpũ nũġu majarã waimũrã iro dopa pee masibirã áhrima. Erã gamero dopa ta iima erã. Eropirã erã masibirirare wereya ñero arĩ wereniguicorema. Eropa iirã erã árĩcũ waimũrãre mari wejêro dopa ta Goãmũ erãre peamegue cóagũcumi. <sup>13</sup> Eropiġu erã ñero iira dipuwaja dipuwaja moagũcumi Goãmũ. Erã ñerire ıaribejataricãma. Eropirã ñerire ñero iiniguicãma. Mũa mera bosenu iiquererã iri bosenu iri ñerire iidiana. Erã eropiirã ġuhyasĩricũ iima erã querecũrã árĩrã.

<sup>14</sup> Eropirã nomere ĩarã ñeadiama erã. Eropirã ñerire eropa iiniguidiama. Goãmũ yare dabero masinũgarãre ñerire iidorerã, eropa árĩrãre erã ĩhacũcũ iima. Eropirã erã seyaro gajinore, niyeru sãre ġuya emamehrerã áhrima. Eropirã erã Goãmũ ĩġu dipuwaja moamorã áhrima. <sup>15</sup> Erã diaye majare duhu Balaam ĩġu iidiro dopa iirã iima. Balaam mũrũ Beor mũrũ magũ árĩñumi. ĩġu iriboġue ĩġu ñeri iiri mera niyerure wajatadiariñumi. <sup>16</sup> ĩġu eropa iigũ wacũ ĩġu burropũ ĩġure turiñumi. ĩġu burro wereniguimasibĩġu ĩġu árĩquerecũ ta Goãmũ ĩġure wereniguicũ iinũumi. ĩġu eropa wereniguicũ peegũ Balaam turaro ĩġu ñeri iidiarare duhucãñumi.

<sup>17</sup> Erã ġuyaricũrã maũ dipague deco mariro iro dopa áhrima. Deco mariri maũri dipari iri duhpiburi árĩbiriro dopa ta erã ġuyaricũrã ne duhpimorã árĩbeama. Eropirã imica cururi miruñe weãbeori cururi

gohrotoro dopa ta erã gúyaricurã sã erã wereniguirire gohrotonigu-ima. Eropigũ naitĩarogue erã warore amutuhapũ Goãmũ erogue erãre dipuwaja moabu. <sup>18</sup> Erã gúyaricurã erã wereniguirire duhpiburi gohra árĩbeaa. Masirã iro dopa masare eropa buhemaacãma. Ôpa arĩ buhema erã: “Mari gamero dopa ta mari iicũ ðapũrica,” arĩ buherima erã. Erã eropa arĩ buhecũ masa peerã, erã ñaribejarire iidiarã erã ya buherire gahmema. Gajirã masa Goãmũ ne umupeonugarã erã gúyaricurire peerã ãhrima. Erã ñerire erã duhura pũhrũgã erã gúyarire peenũgama daja. Eropa peerã Goãmũ yapũre erã peeborapũre peebeama daja. Ñeripũre gohrotoma daja Goãmũ yarã árĩbonirã. <sup>19</sup> Erãre ôpa arĩ buhema gúyarã: “Mari iidiaro dopa ta mari iiasia,” arĩrima erã. Erã eropa arĩ buhequerecũ ta erã arĩdiro dopa wabeaa erãre. Ôaripũre iidiaquererã iimasibeama. Ñerire yoari boje duhudiabirã, pũhrũ irire duhudiaquererã duhumasibeama. Iri ñeri erãre dorea. Erã ñeri ñaribejari erãre dorea. Eropiro yujugũre ñeripũ tarinũgacũ ãgũpũre ñerire duhumasiya mara. <sup>20</sup> Mari Opũ Jesucristore marire taugũre ne masinũgarã i yeba maja ñerire duhucãma. Erã eropa duhura pũhrũ dipaturi ñerire gohrotorã daja, ñero gohra dujaboũuma erã. Cristore erã masiboro core erã árĩmũhtadiro tauro ñetariaro dujama pare dipaturi ñerire gohrotorã daja. <sup>21</sup> Eropa ñero dujarã ðari buheripũre erã ne masinũgabiricũ ðatariaboya erãre. Erã Goãmũ dorerire masira pũhrũ irire cõanirã ñetariaro dujarãcoma. <sup>22</sup> Eropirã dipaturi ñerire gohrotorã, masa nũcu erã ôpa arĩ wereniguidiro dopa ta iirã iima erã. “Diaye etocapi ãgũ etocapirare dipaturi ãgũ basi ta bahami daja. Eropigũ yese ãgũre guhbura pũhrũ dipaturi ãgũ ñeri tarague oyami daja,” arĩ wereniguima masa. Eropa ta iima ðarire ne gamenũgarã dipaturi ñerire gohrotorã daja.

### 3

*Cristo ãgũ i yeba ãgũ dujariborore were gojañumi Pedro*

<sup>1</sup> Yũ mahirã, mũare yujupũ gojabeotuhabũ. Eropigũ ipũre daja dohpaguere mũare gojabeogũ iiaa. Eropigũ mũare pesubu gojabeogũ i árĩpehrerire guñacũ iidiaũgũ iiaa ðari dihtare mũa iiboro dopa. <sup>2</sup> Irire guñaque mũa: Iribojegue majarã ðarã Goãmũ yare weremũhtanirã erã were gojarare guñaque. Eropirã mari Opũ marire taugũ Cristo ãgũ doreri sãre guñaque. Iri dorerire gũa ãgũ apinirã mũare buheabũ.

<sup>3-4</sup> Eropirã negohrare ire guñamũhtaque: Pehrerinũ coregãgue Goãmũ yare wereyarã árĩrãcoma. Erã ñerire ñaribejaniguirã árĩrãcoma. Ôpa arĩ wereyarãcoma: “‘Cristo dujarigara,’ ãgũ arĩqueregũ ne dujarisome. ¿Dujaridiaqueregũ duhpigũ ne deyobeari ãgũ? I yeba árĩnũgara pũhrũ mari ñecu sumarã mũra erã sĩrira pũhrũ árĩpehrero mũraro ta árĩnũguia. Eropigũ i yebague dujaribu ne ñmaroguere marimi,” arĩ wereyarã árĩrãcoma. <sup>5</sup> Eropa arĩ wereyarã ipũre ne guñadiabeama erã: Iribojeguerẽ Goãmũ ãgũ dorediro mera i yebare ñmũsi sãre ñhacũnuguñumi. Eropa ñhacũnugugũ deco mera i yebare iĩñumi. Eropigũ i yeba deco mera árĩcũ iĩñumi. <sup>6</sup> ãgũ eropiira pũhrũ i yebare miũñumi. Miugũ i yeba maja dederepehrecũ iĩñumi. <sup>7</sup> Eropigũ ãgũ ta ñmũsire, i yeba sãre dipaturi dederepehrecũ iigũcumĩ ãgũ. Peame mera dederecũ iigũcumĩ. Dohpaguere ãgũ ãgũ dorero mera

i yebare uməsi säre áríniguicũ iimi dohpa. Eropigu coregu iimi puhru árĩpehrerore soebu. Eropa coregu iimi Goãmũ ĩgũre gamebirãre dipuwaja moabu. Eropigu ĩgũ beyerinũ árĩcũ soepehocãgũcumi. Irisubu erã ñerãre dedeogũcumi.

<sup>8</sup> Yũ mahirã, ipũre guñaque mũa: “Yoatariari boje ãhraa,” mari arĩ pepiquerecũ ta, mil bojori yujunũ iro dopa ta ãhraa Goãmũ ĩgũ ĩacũpure. <sup>9</sup> “Goãmũ ĩgũ arĩdiro dopa ta ne yojaro mera iibeami,” arĩma masa. Eropa árĩbeaa. Masare õaro iidiagu corenigu iimi. Ne yujugu masũre peamegue cóãdiabeami ĩgũ. Eropigu árĩpehrerã erã ñeri iirire bujawerecũ, ñerire ii duhucũ corenimi ĩgũ dohpa.

<sup>10</sup> Ñamigue yajari bugu, ĩgũ guñaña mariro yajagu ñajariro dopa ta Cristo i yebaguere guñaña mariro arigũcumi. ĩgũ aricũ uməsi maja pehrea waroca turaro busuro mera. Ujũpehrea waroca. I yeba maja sã ujupehrea waroca.

<sup>11</sup> “I árĩpehreri pehrea waroca,” Goãmũ ĩgũ eroparĩcũ peerã ñerire duhu, Goãmũ gameripũre iirã arĩro gahmea marire. <sup>12</sup> Mari Opũ i yebague ĩgũ dujariborore mũa corerã arĩrã yojaro mera ĩgũ aricũ iique mũa. Irinũre uməsi maja ujupehrea waroca. <sup>13</sup> Eropa guhyaro watope adopa maripũ Goãmũ ĩgũ arĩ apidiro dopa ta árĩpehrerire ĩgũ gohrotoburire cohre mucubiriyua mari. Árĩpehreri iri ujuara puhru õpa árĩroca: Uməsi i yeba sã gaji dihta árĩroca. Eropirã irisubuguere õari dihtare iirãcoma árĩpehrerã. Irire ta cohrea mari.

<sup>14</sup> Eropirã yũ mahirã, mari Opũ ĩgũ dujariborore corerã Goãmũ ĩgũ ĩarore ñeri marirã, ñerire iibirã árĩque mũa. Eropirã Goãmũre ĩadiabirã árĩbircãque mũa. Eropirã Goãmũ mera õaro árĩque. <sup>15</sup> Eropirã yoañariri boje ĩgũ deyobiricũ ĩarã õpa masique mũa. Masa erã ñerire bujawerecũ corenigu iimi dohpa Goãmũ erãre tauborore. Eropa ta arĩ muare gojabeodigu arĩmi mari mahigu mari acaweregu Pablo. Goãmũ masiri mera irire gojabeodigu arĩmi ĩgũ. <sup>16</sup> Eropa dihta arĩ gojabeodi arĩmi Pablo ĩgũ gojabeora nũcũ. Cristo ĩgũ dujariborore, ñerire iibirã mari árĩboro sãre weregu õpa dihta arĩ gojabeodigu arĩmi ĩgũ. Yujuyerisuburi diasarire were gojabeodigu arĩmi. Gajirã ne masibirã, pee masibirã guyarĩ mera ĩgũ eropa arĩrare gohrotomũrima. Eropirã ĩgũ eropa werera árĩquerecũ ta gajiropa arĩ gohroto werecãma erã. Goãmũ yare erã gojarapũgue gaji sãre eropa ta iima erã. Erã eropiicũ ĩagu Goãmũ erãre dipuwaja moagu peamegue cóãgũcumi.

<sup>17</sup> Yũ acawererã, yũ mahirã, i árĩpehrerire i eropa waboro core weretuhabu muare. Eropirã ire masirã õaro iique mũa. Ñerã muare erã gajiropa arĩ buhecũ, peeigu arĩmi. Gajirã ne masibirã, pee masibirã guyarĩ mera ĩgũ eropa arĩrare gohrotomũrbircãque erãre Cristo yare duhuri arĩrã. <sup>18</sup> Eropa duhubirã mari Opũre marire taudigũre Cristore õaro umupeonemoque mũapũ. ĩgũre õaro masinemoque. Árĩpehrerinũri ĩgũre õaro umupeorã mari. “Õagu turagu ãhrimi,” arĩrã mari ĩgũre. Eropa ta arĩrã. Iripẽta ãhraa.

## 1 San Juan

*Ñu Jesucristore were gojara āhraa*

<sup>1</sup> Dohpague ta gūa Jesucristo yare were gojarā iiaa mūare. Mata negue ta árīdigū āhrimi ĩgū. ĩgū masare mari Pagū mera eropa árīniguicū iigū āhrimi. ĩgūre ĩabu gūa. ĩgū wereniguirire pee gūa ya cuiri mera ĩabu gūa ĩgūre. Eropirā ĩgūre ĩarā, gūa ya mojotori mera mohmepibū ĩgūre. <sup>2</sup> ĩgū masare mari Pagū mera árīniguicū iibu árīgū ĩgū i yebague ĩgū dehyoami. ĩgū masa dehyoacū gūa ĩabu ĩgūre. Eropirā ĩgūre werea gūa mūare. ĩgū ũmuri nūcū mari Pagū mera árīniguicādigū mari pohro erami. Eropirā ĩgūre gūa ĩarare werea mūare. <sup>3</sup> Mari Pagū mera gūa ōaro āhraa. ĩgū magū Jesucristo mera sāre gūa ōaro āhraa. Eropirā mūa sā gūa mera, mari Pagū mera, ĩgū magū mera mūa ōaro árīburire gūa mūa sāre Jesucristore werea. Gūa ĩarare gūa peerare werea. <sup>4</sup> Irire ta gūa gojaa mūa ōaro mucubiriburire.

*Goāmū mera ōaro árīburi āhraa*

<sup>5</sup> Dohpague ta Jesucristo wereniguirare werea gūa mūare. Iri buherire Jesucristo gūare buhecū gūa peebū. Ōpa āhraa. Goāmū ōagū dihta āhrimi. Ñeripū ne mara ĩgūre. Irire werea mūare. <sup>6</sup> Eropirā mari ñeri iirire iiniguirā, “Goāmū mera ōaro árīcāa yūhū,” arīquererā mari gūyarā iiaa. Eropirā diaye majare iibea. <sup>7</sup> Eropirā mari Goāmū iidiro dopa ta mari ōarire iiniguirā tamera, Goāmū mera ōaro árīrā iiaa. Mari basi sā ōaro árīrā iiaa. Eropigū Jesucristo Goāmū magū mari ñeri iirire árīpehrerire coegū āhrimi. ĩgū crusague sīrigū ĩgū dire cóāmi. ĩgū eropiigū mari ñeri iirire coeniguicāmi.

<sup>8</sup> Yujugū “Yū tamera ne ñerire iibea,” eropa arīgū ĩgū basi ta gūyami. Eropigū diaye majare pepibeami. <sup>9</sup> Eropirā mari ñero iirare werero gahmea Goāmūre. Eropa wererā mari ñero iira pūhrū Goāmūre mari weretarīpehocācū, ĩgū mari ñero iirare cādijipehocāgūcumī. ĩgū arīdiro dopa ta diaye ta iigū ōagū āhrimi. Eropigū daja mari ñeri árīpehreri sāre coeweagūcumī. <sup>10</sup> “Árīpehrerā ñerire iirā āhrima,” arītuhajapū Goāmū. Eropirā “Ne ñerire iibea yūpū,” mari arīrā ōaro arībeaa mari. Mari eropa arīrā “Goāmū gūyaricūgū āhrimi,” arīdiarā iiaa. Ōpa arīrā ĩgū ya buherire gamebirā āhraa.

## 2

*Jesucristo marire itamumi, arī wereñumi Ñu*

<sup>1-2</sup> Yū porā, mūa ñerire iibiriboro dopa ire gojagū iiaa. Yujugū ñero iirare iicū Jesucristo itamumi marire mari Pagū iri ñero iirare cādijiboro dopa. ĩgū Jesucristo ōagū Pagū pohro árīgū ĩgū Pagure ōpa arī serēbasacumi mari ñero iira pūhrū: “Ihī ñero iira dipuwaja moabita ĩgūre,” arīrā “Goāmū gūyaricūgū āhrimi,” arīdiarā iiaa. Ōpa arīrā ĩgū ya buhe arīcumī mari Pagure. Eropigū Jesucristo mari ñero iira dipuwaja wajayebasadi árīmi. Mari ñero iira dihtare

wajayebasabiridigu árĩmi. Árĩpehrero majarãguere erã ñero iirare wajayebasadi árĩmi.

<sup>3</sup> Maripũ Goãmu dorerire iirã árĩrã “Goãmure diaye ta masia yũhũ,” arĩ masia mari. <sup>4</sup> Yujugu Goãmu dorerire iibigu, “Yũ sã Goãmure diaye ta masia yũhũ,” arĩgu gũyagu ãhrimi. Eropigu Cristo yare masibeami. iiaa. Ōpa arĩrã ĩgu ya buhe <sup>5</sup> Goãmu dorerire iigupũ ĩgu Goãmure ðaro mahigu ãhrimi. Eropa árĩgu ta “Yũhũ Goãmu mera ðaro árĩcãgu ãhraa,” arĩ masimi ĩgu. <sup>6</sup> Mari “Goãmu mera ðaro ãhraa,” arĩrã Jesucristo ĩgu ðaro árĩricũdiro dopa ta iiro gahmea.

*Goãmu doreriñe ãhraa*

<sup>7</sup> Yũ acawererã, yũhũ muare dohpaguere werebeoburi mama doreriñe árĩbeaa. I doreriñe mua negohraguere Jesu buherire peerañe ta ãhraa. Eropirã iriñe doreriñere peetuhajabũ mua. <sup>8</sup> Iri doreriñe “Gajirãre mahi umupeoque,” arãa. Cristo iri doreriñere iigu masare umupeomi. Eropiro dohpaguere iri doreriñe murañe doreriñe árĩquerero ta mama doreriñe sã ãhraa. Dohpaguere mua pee masibirañe pehre wahgãro iiaa ðaro. Jesucristo muare pee masicũ iigu eraturajami. Eropirã mua sã masare umupeorã iiaa.

<sup>9</sup> Eropigu yujugu gajigure ĩhaturigu árĩgu ñerire iigu ãhrimi. ĩgu ta “Yũhũ ðarire iigu ãhraa,” arĩmasibeami ĩgu gajigure ĩhaturinijagu. <sup>10</sup> Eropigu yujugu gajirãre mahi umupeogu tamera ðarire iigu ðaro ãhrimi. Eropigu ñerire iibeami. <sup>11</sup> Gajirãre ĩhaturigupũ ñerire iigu ãhrimi. Eropigu ĩgu ðaro iiburire pee masibeami ĩgu.

<sup>12</sup> Yũ porã, Goãmu mua ñeri dipuwajare cãdijipehodi árĩmi Cristo ĩgu sĩrirañe mera. Eropa mua ñerire cãdijisũrã árĩcũ muare wegũ árĩgu ñerire iigu ãhrimi. ĩgu ta “Yũhũ ðarire iigu ãhraa,” arĩmasibre gojagu iiaa. <sup>13</sup> Mua pagu sumarã sã, mua Cristore negohraguere árĩdigure masirã ãhraa pare. Mua eropa masicũ mua sãre were gojagu iiaa. Mua mamarã, mua watĩre tarinũgabũ mua. Mua eropa tarinũgarã árĩcũ muare were gojagu iiaa.

Yũ porã, mua mari Pagure masia. Mua eropa masirã árĩcũ were gojagu iiaa. <sup>14</sup> Mua pagu sumarã, mua Cristore negohraguere árĩdigure masia mua. Mua eropa masirã árĩcũ muare were gojagu iiaa. Mua mamarã, mua Goãmu yare umupeoturã ãhraa. Eropirã ĩgu yare diaye majare iiaa. Goãmu wereniguirire masia. Mua eropiirã watĩre tarinũgabũ. Eropigu muare were gojagu iiaa.

<sup>15</sup> I yebare, i yeba majare gamebircãque. I yeba majare gamerã maripũ mari Pagure gamebeaa mari. <sup>16</sup> I yeba maja ãhraa: Masa erã ñerire uaribejari, ñero ĩha iidiari ãhraa. Eropárĩcũ masa erã ya dihta guña mecubiriri ãhraa. Iri Goãmu mari Pagu ya árĩbeaa. Iri árĩpehreri i yeba maja ãhraa. <sup>17</sup> Eropirã i yeba majare iirã erã ñero iidiari mera dederea wahama i yeba mera. Goãmu yapũ pehresome. Eropirã Goãmu yare iirãpũ Goãmu mera árĩniguicãrãcoma.

*Diaye maja árĩri, diaye maja árĩbiriri ãhraa, arĩ gojañumi Ñu*

<sup>18</sup> Yũ porã, i umũ pehrebro merogã duhyaa. “Cristore ĩhaturidigu gohra arigucumi,” arĩ Jesu yarã muare weretuhajama. Dohpaguere Cristore ĩhaturirã bajarã árĩtuhajama. Eropirã dohpaguere i umũ pehreburiñũ merogã ero duhyacũ mari masia. <sup>19</sup> Ōã Cristore ĩhaturirãpũ mari mera árĩquererã mari yarã diaye árĩbeama. Eropirã

marire cohã wiriama. Erã mari yarã árĩrã mari mera dujaboañuma. Eropirã marire cohã wiriama. Erã eropa wiriacũ mari mera majarã erã árĩbirirare masia mari.

<sup>20</sup> Muapure Cristo Espĩritu Santore muare otuhajadi árĩmi. Eropigu Espĩpehreri i yeba maja ãhraa. íritu Santo mua mera ãhrimi. Ĩgu árĩro mera mua árĩpehreri diaye maja árĩrire masia. <sup>21</sup> Eropigu yu muare weregũ, “Diaye maja árĩrire masibeaã mua,” arĩbeaa yũhũ. Mua diaye maja árĩrire masirã gũyacũ sãre masia. Eropigu muare werea yũhũ.

<sup>22</sup> Ihĩ diaye majare masibigu ãhrimi gũyagũpũ. “Jesucristo Goãmu magũ arĩbeami,” arĩgũpũ gũyagu ãhrimi. Ĩgu Cristore ĩhaturigu ãhrimi ĩgu. Eropigu mari Pagure ĩgu magũ sãre “Erã diaye ta arĩbeama,” arĩgu Cristore ĩhaturigu ta ãhrimi. <sup>23</sup> Ōpa ãhraa: Jesure gamebigũpũ mari Pagũ sãre gamebeami. Jesure umupeogu mari Pagũ sãre umupeomi.

<sup>24</sup> Negohraguere mua Goãmu yare peebu. Irire õaro guñaque. Irire guñarã Jesucristo mera õaro árĩrãca. Eropirã mari Pagũ mera sãre õaro árĩrãca. <sup>25</sup> Jesucristo marire weremi: Ōpa ãhraa ĩgu werera: “Mua umuri nũcu Goãmu mera árĩrãca,” arĩ werepimi Jesu marire.

<sup>26</sup> Gajirã muare gũyadiarima. Eropigu muare were gojaa. <sup>27</sup> Muapure Cristo Espĩritu Santore otuhajami. Espĩritu Santo mua mera árĩniguimi. Eropigu Espĩritu Santo mua mera árĩgu diaye majare muare masicũ iimi. Espĩritu Santo muare buhecũ ĩha gajigu muare buhegure amabeaa mua. Árĩpehrerire diaye maja árĩrire buhemi muare Espĩritu Santopũ. Gũyarire ne buhebeami ĩgu. Eropirã Espĩritu Santo ĩgu muare buhediro dopa ta Jesucristo yare peerã ĩgu mera õaro árĩque.

<sup>28</sup> Eropirã, yu porã, Jesucristo mera majarã árĩque. Mua eropiirã Cristo ĩgu dujaririnu árĩcũ ne gũisome ĩgure. Eropirã ĩgu dujaririnu árĩcũ mua guhyasĩriri mariro árĩrãca. <sup>29</sup> Cristo Goãmu magũ ĩgu õari dihta iidigu árĩcũ mua masia. Irire masirã iri sãre masia mua. “Árĩpehrerã diaye maja õarire iirã Goãmu porã ta ãhrima,” arĩ masia mua.

### 3

*Mua ta Goãmu porã ãhraa, arĩ werera ãhraa*

<sup>1</sup> Goãmu mahitaricãmi marire. Eropigu ĩgu marire “Mua yu porã ta ãhraa,” arĩmi. Eropirã ĩgu porã ta ãhraa mari. I yeba majarã ñerã Goãmure masibeamã. Eropirã erã mari sãre masibeamã Goãmu porã mari árĩcũ. <sup>2</sup> Yu mahirã, dohpague Goãmu porã ãhraa mari. Pũhrugue mari dohpa árĩburire mari õaro masibeaã dohpa. Cristo dehyoacũ daja diaye ta irire masirãca. Ĩgu árĩricurire ĩha masirãca. Eropirã Cristo marire dehyoacũ daja ĩgu iro dopa ta mari gohroto árĩrãca. Eropirã ĩgu õagu iiro dopa ta iirãca pare. Irire masia mari. <sup>3</sup> Eropa masirã ñerire duhu Cristo ĩgu árĩro dopa ta õarire iidiaa dohpague sãre.

<sup>4</sup> Árĩpehrerã ñerire iirã Goãmu dorerire tarinũgarã ãhrima. Ñero iiri Goãmu dorerire tarinũgari ãhraa. <sup>5</sup> Cristo mārĩburire mari õaro masibeaã dohpa. Cristo dehyoacũ daja diaye ta irire masirãca. Ĩgu



árĩricũre ĩha masirãca. Eropirã Cristo marire dehyoacũ daja ĩgu iro dopa ta mari gohroto árĩrãca. Eropirã ĩgu õagũ iiro dopa ta iirãca pare. Irire ari masa ñerire cóãbu erami. ĩgũpũre ñeri ne mara. Mũa irire masia. <sup>6</sup> Eropirã árĩpehrerã Cristo mera majarã árĩrã erã sã ñerire eropa iiniguicãbeama. Ñerire eropa iiniguicãrã Cristore ne masibeama. Eropa iirã Cristo yarã árĩbeama. <sup>7</sup> Yũ buherã, mũare gũyarãre peebiricãque. Árĩpehrerã diaye majare iirã, Cristo iro dopa õarã àhrima. <sup>8</sup> Ñerire eropa iiniguicãgũ watĩ yagũ àhrimi. Watĩ tamera mata ñerire iinugadigu árĩñumi. Eropigu Goãmũ magũ Jesucristo watĩ dorerire cóãgũ erami.

<sup>9</sup> Eropirã Goãmũ porã ĩgu árĩrĩre opama. Eropirã erã ñerire eropa iiniguicãbeama. Goãmũ erã Pagũ árĩcũ erãpũ ñerire iiniguicãmasibeama. <sup>10</sup> Õpa Goãmũ porã árĩrãre, watĩ porã árĩrã sãre masirãca. Watĩ porã Goãmũ porã iro dopa ta árĩbeama. Diaye maja árĩrĩre iibirã, gajirãre umupeobirã Goãmũ porã árĩbeama.

*Mũa mera majarãre mahi umupeoque, arĩ werera àhraa*

<sup>11</sup> “Mari mera majarãre mahi umupeoro gahmea,” ne arĩ buhecũ peeabũ mũa. <sup>12</sup> Eropirã mari Caĩn iribojegue majagũ ĩgu ñero iidiro dopa ta ñerire iibiricãrã. ĩgu Caĩn watĩ yagũ árĩdi ĩgu pagũ magũre wejẽcãñumi. Caĩn ñerire iimũriñumi. ĩgu pagũ magũpũ õarire iimũriñumi. ĩgu eropa õarire iira dipuwaja Caĩnpũ ĩgũre ĩhaturĩñumi. Eropigu ĩgũre wejẽcãñumi.

<sup>13</sup> Eropirã i mũa majarã ñero iiricũrã mari õarire iicũ ĩha ĩhaturima marire. Eropirã “¿Duhpirã yũre ĩhaturiri erã?” arĩrĩre masirãca. <sup>14</sup> Negohrãre mari Goãmũ yare iibirã árĩnirã mari dederebonirã árĩribũ. Dohpagũre pare Goãmũ yare iirã árĩrã ĩgu mera árĩniguimorã àhraa. Eropirã ĩgu itamuri mera Jesu yarãre mahi umupeorã àhraa. Eropa umupeorã árĩrã “Goãmũ yarã àhraa,” arĩ masia mari. Masare mahibirã peamegue wamorã àhrima. <sup>15</sup> Eropirã erã erã mera majarãre ĩhaturirãpũ masare wejẽrã iro dopa ta ĩma Goãmũ ĩgu ĩacũ. Masare wejẽrã mũarogue árĩmorã árĩbeama. Irire õaro masia mũa. <sup>16</sup> Cristo ĩgu sĩrĩrañere guñarã marire ĩgu mahira gohrare masia. Cristo mari masare mahitarigu mari dipuwajare aĩ mari Goãmũ mera árĩniguiborore sĩrimi. Mari sã gajirãre itamugũ sĩribu ta árĩqueregũ mari acawererãre mahi itamuro gahmea. <sup>17</sup> Yujugũ baja opagũ Jesucristo yagũre mojomorocũgũre ĩaqueregũ ta ĩgũre mojomoro ĩabigũ Goãmũre mahibeami ĩgũ. <sup>18</sup> Yũ porã, mari “Yũhũ masare umupeoa,” mari arĩ wererã erãre itamuro gahmea. Erãre itamubirã erãre mahi umupeobirã iiaa.

*Gũiro mariro Goãmũ pohro árĩmasia mari*

<sup>19</sup> Eropa gajirãre mahi umupeorã, “Mari diaye ta Goãmũ yarã àhraa,” arĩmasia. <sup>20</sup> Eropirã mari basi “Gajino yũ ñero iira dipuwaja árĩca yũre,” arĩ pepĩquererã ta Goãmũ mera õaro sĩporãcũrã árĩmasia. Goãmũpũ árĩpehrerire masigũ õaro masimi mari sĩporãrĩre. <sup>21</sup> Eropirã mari “Ñeri dipuwaja marica yũre,” arĩ pepirã õarire iirã Goãmũ mera mari gũiro mariro árĩmasia. <sup>22</sup> Goãmũ ĩgu dorerire ĩgu gamerire mari iicũ ĩgũre mari serẽri nũcũre ogũcumi marire. <sup>23</sup> Õpa doremi ĩgu marire: “Goãmũ magũ Jesucristore

umupeoque. Eropirã mũa mera majarãre mahi umupeoque Cristo marire ĩgũ dorediro dopa ta,” arĩ doremi marire. <sup>24</sup> Goãmũ dorerire iirã Goãmũ mera õaro árĩcãa mari. ĩgũ Goãmũ sã mari mera õaro àhrimi. Goãmũ ĩgũ Espĩritu Santore obeomi marire. Mari mera árĩgũ “Goãmũ yũ mera àhrimi,” mari arĩ masiburire Espĩritu Santo marire masicũ iimi.

## 4

*Goãmũ yarã gohrare masiro gahmea marire, arĩ werera àhraa*

<sup>1</sup> Yũ mera majarã, dohpaguere i umũre bajarã gũyarã àhrima, “Goãmũ yare wererã àhraa,” arĩquererã. Eropirã gajirã mũa watopegue Goãmũ yare buherã aricũ õaro ĩaque erãre. “¿Erã buheri noa buheri àhriri?” arĩ ĩaque. “¿Erã Goãmũ yarã àhriri?” arĩ ĩaque. <sup>2</sup> Őpa masique erãre serẽpirã: “¿Jesucristo i yebague aridigũ diaye ta masũ gohra árĩyuri?” arĩ serẽpiñaque erãre. Mũa eroparĩcũ pee erã Goãmũ yarã árĩrã “Masũ ta árĩñumi Jesu,” arĩ yũhrirãcoma. <sup>3</sup> Erã Goãmũ yarã árĩbirãpũ “Jesucristo masũ gohra árĩbiriñumi,” arĩ yũhrirãcoma. Erã eropa arĩ yũhricũ “Erã ya pepiri Cristore ĩhaturigũ ya dorero dopa ta àhraa,” arĩ masirãca mũa. “Cristore ĩhaturigũ arigũcumĩ,” peetuhajabũ mũa. Eropigũ ĩgũ ya buheri i yebaguere árĩtuhajaa.

<sup>4</sup> Yũ porã, Goãmũ yarã àhraa mũapũ. Eropirã mũa Goãmũ yare were gũyarãre tarinũgatuhajabũ. Mũa mera árĩgũ Espĩritu Santopũ watĩ tauro àhrimi. Watĩ i umũ majarã yagũ àhrimi. Eropirã mũare gũyarãre tarinũga, erãre peebirabũ mũa. <sup>5</sup> Gũyarãpũ i umũ majarã àhrima. Eropirã erã i umũ majare gũyarire buhecũ i umũ majarã dihta erãre peema. <sup>6</sup> Maripũ Goãmũ yarã àhraa. Eropirã Goãmũre masirãpũ marire peema. Gajirãpũ Goãmũ yarã árĩbirãpũ marire peebeama. Eropirã õpa arĩ masia mari. “Erã Goãmũ yare peerã Goãmũ doreri diaye majare opama. Erã Goãmũ yare peebirãpũ watĩ doreri gũyari majare opama,” arĩ masia mari.

*Goãmũ árĩpehrerãre bũrigã mahiniguigũ àhrimi, arĩ werera àhraa*

<sup>7</sup> Yũ mahirã, mari gajirãre mahicũ Goãmũ iigũ àhrimi. ĩgũ eroparĩcũ ĩarã mari mera majarãre mahirã. Masare õaro mahirãpũ Goãmũ porã àhrima. Eropirã erã Goãmũre õaro masima. <sup>8</sup> Masare árĩpehrerãre Goãmũ bũrigã mahiniguigũ àhrimi. ĩgũ eropa mahiniguigũ árĩcũ masare mahibirãpũ Goãmũre masibeama. <sup>9</sup> Goãmũ marire ĩgũ mahirare ĩhmudi árĩmi ĩgũ magũre obeogu. ĩgũ magũre yujugũ ta árĩgũre marire taubu obeodi árĩmi i yebaguere. Eropa obeogu marire ĩgũ mahirire masicũ iidi árĩmi. <sup>10</sup> ĩgũ magũre obeora mahiri gohra àhraa. Mari masa Goãmũre mahibiriqerrecũ ĩgũ Goãmũpũ marire bũrigã mahidi árĩmi. Eropigũ ĩgũ magũre obeodi árĩmi mari ñerire cõábure. ĩgũ magũre obeora iri ta àhraa marire ĩgũ mahiri gohra.

<sup>11</sup> Eropirã, yũ mahirã, Goãmũ bũrigã marire mahicũ ĩarã mari sã mari mera majarãre mahirã. <sup>12</sup> Masapũ ne mari Pagũre Goãmũre ĩabeama. ĩgũre ĩabirã mari árĩqerrecũ ta mari mera majarãre mari mahicũ Goãmũpũ mari mera õaro eropa árĩniguicãmi. Eropigũ ĩgũ mari mera árĩgũ marire gajirãre õaro mahinemocũ iimi. <sup>13</sup> Goãmũ

marire ĩġu Espírítu ohami. Eropirã ĩġu Espírítu mari oparã “Goãmu mari mera õaro àhrimi,” arĩ masia mari. <sup>14</sup> Mari Pagu ĩġu magure i yeba majarãre taubure ĩġu obeocũ gua ĩabu. Eropirã irire ãanirã gajirãguere irire werea gua. <sup>15</sup> “Jesucristo Goãmu magu ta àhrimi,” arĩġu ĩġu ta Goãmu mera õaro arĩġu iimi. Eropigũ Goãmu sã ĩġu mera õaro arĩcãġu iimi.

<sup>16</sup> Eropirã Goãmu marire mahirire masia mari. Eropirã marire diaye ta mahigũ ĩġu arĩcũ masia mari. Goãmu masare arĩpehrerãre burigã mahiniguicãġu àhrimi. Eropirã masare mahiniguirãpũ Goãmu mera õaro àhrima. Goãmu sã erã mera õaro àhrimi. <sup>17</sup> I yeba arĩdigũ Cristo Goãmure gajirã sãre ĩġu mahidiro dopa ta mari sã Goãmure gajirã sãre mahia. Eropirã mari eropa mahirã mahinemoa, dipuwaja moarinũ arĩcũ mari ġuibiriboro dopa. <sup>18</sup> Eropirã mari Goãmure mahirã ġuibeaa. “Goãmu marire burigã mahimi,” arĩ õaro masirã ġuisome pare. “Mata Goãmu yure dipuwaja moagucumi,” arĩ pepirãpũ ġuia mari. Mari eropa pepirã Goãmu marire ĩġu mahirire õaro masibeaa.

<sup>19</sup> Marire Goãmu mahimãhtami. Eropirã mari sã ĩġure mahia. <sup>20</sup> Yujugũ masũ gajigũre ĩhaturigũ arĩquereġu “Yũ sã Goãmure mahia,” arĩġu ġuyagũ àhrimi. Gajigũre ĩhaturigũ Goãmure mahibeami ĩġu. Gajigũre ĩġu masigũ arĩquereġu ta mahibigũ Goãmure sãre ĩġu ne ĩabigũre mahimasibeami ĩġu. <sup>21</sup> Eropa àhraa marire Cristo ĩġu doreri: Goãmure mahirã arĩrã mũa pohro arĩrã sãre mahi umupeoque.

## 5

*Goãmu porã arĩrã Goãmu dorerire iima, arĩ werera àhraa*

<sup>1</sup> Arĩpehrerã Jesupure “Cristo àhrimi. Goãmu obeodigũ ire burigã mahimi,” arĩàhrimi,” arĩrã Goãmu porã ta àhrima. Gajirã pagure mahirã ĩġu porã sãre mahia mari. Eropa ta mari mari Pagure Goãmure mahirã, ĩġu porã sãre mahia. <sup>2</sup> Eropirã Goãmu porãre mari mahirire mari õpa masirãca: Goãmure mahi, ĩġu dorerire õaro ii, ĩġu porã sãre mari mahirã iiaa. <sup>3-4</sup> ĩġu dorerire õaro iirã Goãmure mahirã iiaa mari. Marire Goãmu ĩġu dorerire iicũ teboricusũya mara. Eropirã mari arĩpehrerã Goãmu porã arĩrã, i mũa maja ñerire eropa iiniguicãsome. Goãmure umupeorã ne ñerire gamebeaa. Eropirã ĩġure mari umupeora puhru ñerire iidiabeaa. <sup>5</sup> Ñerire gamebirã õpa arĩrã àhraa mari Jesucristore. “Jesu Goãmu magu ta àhrimi,” arĩ umupeorã ta àhraa. Eropa arĩrã arĩrã ñerire gamebirã àhraa mari.

*Goãmu magu arĩricũre werera àhraa*

<sup>6</sup> Jesucristo i yebague erami. I yebaguere arĩġu deco mera waĩyesũmi. Deco dihta arĩbeaa. Puhru sĩrigũ ĩġu di cõami. Eropirã Jesucristore ĩġu deco mera waĩyecũ ĩha ĩġu ya di cõacũ ĩha “ĩġu Goãmu magu ta àhrimi,” arĩ masia mari. Jesucristo arĩricũre diaye ta marire arĩpehrerãre masicũ iimi Espírítu Santo. Espírítu Santo diaye majare marire masicũ iimi. <sup>7-8</sup> Umarogue sãre irire “Jesucristo Goãmu magu ta àhrimi,” arĩ wererã urerã àhrima. Mari Pagu, ĩġu magu, Espírítu Santo erã ta àhrima. Erã urerã ta àhrima. Eropirã yujugũ iro dopa ta àhrima. I yebague sãre “Jesucristo Goãmu magu àhrimi,”

arĩ masisũa. Īgu magu ĩgu árĩricurire Espĩritu Santo marire masicũ iimi. Eropi Jesure deco mera ĩgu waĩyerare masirã “Īgu Goãmũ magu āhrimi,” arĩ mari masia. Eropirã mari árĩburire Jesu sĩrigu ĩgu di cóarañere ĩha masirã “Goãmũ magu ta āhrimi,” arĩ masia mari. Iri mera marire masiro gahmea. <sup>9</sup> Mari masa dihta wereniguicũ mari peea. Eropirã marire Goãmũpu ĩgu magu árĩricurire wereniguicũ ðaro peero gahmea. <sup>10</sup> Eropirã Goãmũ magure umupeorã ĩgu Jesure were buherire ðaro peema. “Diaye ta āhraa,” arĩ pepima erã Jesu yare buherire. Goãmũ ĩgu magu yare “Diaye árĩbeaa,” arĩ pepirãpu “Goãmũ gũyagu āhrimi,” arĩrã āhrima erã. Goãmũ ĩgu magure arĩ wererire peebirã āhrima. <sup>11</sup> Goãmũ marire umuri nucu ĩgu mera mari árĩniguicũ iigucumi. Goãmũ magure gamerã árĩrã mari árĩcũ ĩgu mera eropa árĩniguicũ iigucumi marire. I āhraa Goãmũ magure ĩgu wereri. <sup>12</sup> Eropirã Goãmũ magure umupeorã Goãmũ mera árĩniguicãrãca. Eropirã gajirã ĩgure gamebirãpu ĩgu mera árĩsome.

*Weretu ĩgu gojara āhraa*

<sup>13</sup> Mũa Goãmũ magure umupeorã ĩgure peerã mũa Goãmũ mera eropa árĩniguicãrãca. Mũa Goãmũ mera árĩburire ðaro masicũ mũare were gojagu iiaa.

<sup>14</sup> Mari, mari dohpa árĩrire Goãmũre serẽrã ĩgu gamediro dopa ta mari serẽcũ ĩgu marire ðaro peenũrugucumi. Eropa mari serẽrã, “Diaye ta ðaro peemi ĩgu,” arĩ masia mari. <sup>15</sup> ĩgure mari eropa serẽcũ ĩgu marire peemi. Īgu pee mari serẽropẽ ta ogucumi. Īgu eropa peecũ masirã ĩgure mari serẽropẽ ta ĩgu obu árĩcũ sãre masia mari.

<sup>16</sup> Mari mera majagu gajigu Jesucristore umupeogu ñerire ĩgu iigu árĩcũ ĩha ĩgure Goãmũre serẽbasaro gahmea. Eropa serẽcũ Goãmũ ĩgure taugucumi ĩgu dedereborañere. Gaji ñero iiri āhraa. Iri ñero iirire gajigu ĩgu iigu árĩcũ ĩha Goãmũ ĩgure dedereburiñere taubeami. Eropigu mũ acaweregu iri ñerire iicũ Goãmũ taubiriburire iicũ “Īgure Goãmũre serẽbasaque,” arĩbeaa yũhu mũare. <sup>17</sup> Árĩpehleri ñero iiri ñetariari āhraa Goãmũ ĩgu iacũ. Eropa árĩquerecũ gaji ñeri iiri peamegue wacũ iibeaa masare.

<sup>18</sup> Goãmũ magu Jesucristo Goãmũ porãre ðaro cãhmotami. Eropigu watĩpu Goãmũ porãre ñero iirire doremasibeami. Eropirã Jesucristo cãhmotari mera Goãmũ porã ne ñero iirire eropa iiniguicãbeama. Irire mari masia.

<sup>19</sup> Mari Goãmũ porã āhraa. Watĩ i umu majarã opu āhrimi. Iri sãre masia mari.

<sup>20</sup> Goãmũ magu i yebague aridi Goãmũre ðaro masicũ iimi ĩgu marire. Eropirã Goãmũre “Diaye ta āhrimi,” arĩ masia mari. Eropirã Goãmũ magu Jesucristo yarã āhraa mari. Eropirã Goãmũ mera mari ðaro árĩniguicãrã iiaa. Ihĩ diaye ta Goãmũ gohra ta āhrimi. Eropirã ĩgu mera árĩniguicãrãca.

<sup>21</sup> Yũ buherã, goãmãrã wéanirãre “Goãmũ āhrimi,” arĩ umupeobiricãque. Goãmũ dihtare umupeoque. Iripẽta āhraa.

## 2 San Juan

*Gajiräre were gojañumi Ñu. Jesu yare, diaye mahiri säre wereñumi*  
<sup>1-2</sup> Yuhũ buçu mure Goãmũ beyedigore mũ porã säre ipũre gojabeoa. Jesucristo yare diaye majare opaa mari. Iri mari mera árĩniguicãroca. Eropigũ diaye ta mahia yuhũ mũare. Yũ dihta mahibea mũare. Gajirã Jesu yare masirã sã diaye ta mũare mahima. <sup>3</sup> Goãmũ mari Pagũ, Jesucristo ãgũ magũ mera diaye ãgũ mahiri mera marire ðaro iigũcumĩ. Eropigũ marire mojomoro ãgũcumĩ. Eropigũ marire ðaro árĩcũ iigũcumĩ ãgũ.

<sup>4</sup> Mari Pagũ marire ãgũ dorediro dopa ta mũ porã yujurãyeri ãgũ yare ðaro yuhrirã árĩcũ peebũ. Eropa peegũ mucubiriabũ. <sup>5</sup> Eropigũ, acawerego, mari mera majaräre mahi umupeodorea marire. Yũ doreri mama doreriñe árĩbeaa. Iri doreriñe marire mata árĩtuhaya. <sup>6</sup> Eropirã Goãmũ dorerire iipehorã mari ãgũre mahia. Eropiro iri doreriñe ãhraa mũa negohrare peerañe. Gajiräre eropa mahiniguicãrã árĩque.

*Bajarã gũyaricũrã árĩrãcoma, arĩ werera ãhraa*

<sup>7</sup> Bajarã gũyarã i mũmũ majaräre buherã wahama. “Jesucristo i yebaguere aridigũ masũ dũpũ gohra árĩgũ aribiriñumi,” arĩma. Erã gũyarã Cristore ãhaturigũ iro dopa ta iima. <sup>8</sup> Eropirã ðaro pee masique mũa. Mũare gũyaräre peebiricãque Goãmũ mũare ãgũ ðaro iiburire cóãri arĩrã. Erãre peebiricũ Goãmũ mũa ðari iira waja obeogũcumĩ mũare.

<sup>9</sup> Árĩpehrerã Jesucristo buherire peenirã irire cóãrã Goãmũ yarã árĩbeama pare. Jesucristo buherire ðaro peenurũrãpũ Goãmũ mari Pagũ yarã ãhrima. Goãmũ magũ Jesucristo yarã sã ãhrima. <sup>10</sup> Eropirã mũa yujugũ Jesucristo ya buherire gamebigũ gaji buherire buhegũ mũa pohro eracũ ãgũre game bocatĩribiricãque. Mũa ya wirigũ ñajadorebiricãque. <sup>11</sup> Gaji buherire buhegũ Jesucristo yare umupeobigũ ñero iigũ ãhrimi. Eropirã mũa ãgũre bocatĩri serẽrã ñero iidigũre itamurã iiaa. Eropirã ãgũre bocatĩri serẽbiricãque.

*Were gojatura ãhraa*

<sup>12</sup> Baja yuhũ mũare werediaqueregũ ta irire paperapũgue gojabeodiabirica. Yũ basi ta mũare ãgũ wadiaca. Mũare ãgũ weretamugũca mari ðaro mucubiriburire.

<sup>13</sup> Mũ pagũ mago Goãmũ beyedigo igo porãpũ mũare ðadorema. Iripẽta ãhraa.

### 3 San Juan

*Gaji carta gojañumi daja Ñu. Gayo ĩgu ðaro iirare wereñumi*

<sup>1</sup> Yuhũ bugu mure Gayore diaye ta yũ mahigure ipũre gojabeoa.

<sup>2</sup> Yũ mahigu, mũhu Goãmure ðaro umupeocũ masia yũhu. Mũhu Goãmũ mera ðaro árĩro dopa ta mũ dupũ sã ðaro árĩcũ serẽbasaa yũhu Goãmure. <sup>3</sup> Gajirã Jesucristo yarã yũ pohro erarã mũ árĩricũre yũre wereama. Cristo gamerire diaye mũ iirare wereama erã yũre. Erã eropa werecũ peegu bũrigã mucubiriabũ yũhu. <sup>4</sup> Jesucristo yarã yũ buhenirã Jesucristo yare diaye ta árĩre erã iicũ pee bũrigã mucubiria yũhu.

<sup>5</sup> Yũ mahigu, mũhu Jesucristo yarãre itamugu ðaro iiaa mũhu. Jesucristo yarã mũ ĩha masibirã sãre itamugu ðatariaro iiaa. <sup>6</sup> Erãpũ erãre mũ umupeorare wereama guare Jesucristo yarã gamenererogue. Eropigu Goãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa iigu ðaro iigu árĩgũca mũhu. Eropa ta marire itamuro gahmea Goãmũ yare buherãre. <sup>7</sup> Erã Jesucristo ya árĩburire buhe curirã warã, Jesucristore umupeobirãpũre erã itamurire ne serẽbeama. <sup>8</sup> Eropirã marire Jesucristo yare buhe curirãre itamuro gahmea. Erãre eropa itamurã erã iiro dopa ta mari sã Goãmũ yare buherire itamurã iiaa.

*Diotrefe ĩgu ñero iira ãhrra*

<sup>9</sup> Eoãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa ro majarãre Jesucristo yarãre yũ go-jarapũre gojabeorabũ. Diotrefepũ ĩgu basi erã opu árĩdiagũ yũ wererare peediabiripũ. <sup>10</sup> Eropigu mũa pohro yũ ejara pũhrũ ĩgu iirare werepehogũra. Guare ñero werenĩguipũ. Eropigu Jesucristo yare buhe curirãre bocatĩbiripũ. Gajirã ero árĩrã erãre bocatĩrdiacũ gamebiripũ. Gajirãpũ erã buhe curirãre bocatĩricũ ĩha ĩgu Diotrefe erã bocatĩrira waja erãre cohã wiupũ Jesucristo yarã gamenereri wihigue.

<sup>11</sup> Yũ mahirã, ñero iirãre ĩhacũbircãque. Õaro iirãre ĩhacũque. Õarire iirã Goãmũ yarã ãhrrima. Ñerire iirã Goãmure masibeama.

*Demetrio ĩgu ðari iira ãhrra*

<sup>12</sup> Árĩpẽherã “Demetrio ðagu ãhrrima,” arĩma. Eropirã ĩgu iirire ĩarã ðaro ĩgu iira árĩcũ masima masa. Gũa sã ĩgu ðaro iirare eropa ta werea. Gũa werenĩguiripũ diaye árĩcũ masia mũa.

*Ñu weretura ãhrra*

<sup>13</sup> Mũare baja werediarabũ. Irire gojasome. <sup>14</sup> Merogã pũhrũ mũare ĩagu wadiaca. Eropirã mari basi weretamurãca.

<sup>15</sup> Õaro árĩque mũhu. Mari mera majarã Jesucristo yarã mure ðadorema. Ero majarã mari mera majarã sã ðaporo. Iripẽta ãhrra.

## San Judas

### *Juda Jesu yaräre gojabeoñumi*

<sup>1</sup> Yuhũ Juda Santiago pagũ magũ Jesucristo pohro majagũ mũare Jesu yaräre ipũre gojabeoa. Mũare mari Pagũ Goãmu ïgu beyenirã áhrra. Eropirã ïgu mahiri mera õaro áhrra mũa. Eropigũ mũare Jesucristo ïhadibumi mũa ñerire iibiriborore. <sup>2</sup> Óadorea mũare. Goãmu itamuro mera õaro árĩque mũa. Eropigũ Goãmũre mojomoro ïhadore, mũare mahidoregũ serẽbasaa yuhũ Goãmũre. Mũa gajirã mera õaro áhri erãre mahiborore serẽbasaa Goãmũre.

### *Gũyarã erã buherire werenũgañumi Juda*

<sup>3</sup> Goãmũ marire peamegue wabonirãre ïgu itamuripũre turaro gojabeodiarabũ mũare, yũ mahirãre. Eropa gojadiaqueregũ ta dohpaguere gũyari buherire gamedorebigũ mũare gojabeoa. Gajirã mũa pohro ejanirã erã gũyari buherire mũa peebiriboro dopa mũare gojabeoa dohpaguere. Eropirã Jesucristo ya buheripũre buhe tarinũgaque. I buheripũre peerã, mari Goãmũre õaro umupeoa. I buheripũ Jesu ïgu apinirã ïgu yaräre erã buhera eropa árĩniguicãro ïaa gohrotoro mariro. <sup>4</sup> Bajamerãgã masa ñerã ïha masiya marirã mũa pohro ejanirã árĩma. Mũa mera árĩrã erã buherire buhe gũyama gũare ïha masiri arĩrã. Ópa arĩ buhema: “Goãmũ yarã mũa árĩcũ, ïgu mahimi mũare. Eropigũ nome mera mũa ñero ïicũ ïgu mũare ne dipuwaja moasome,” arĩ buherima erã. Eropirã mari Opũre yujugũ ta árĩgũre Jesucristore “Goãmũ magũ árĩbeami,” arĩ buherima erã. Eropa arĩ buherãre Goãmũ ïgu dipuwaja moaborore wereñumi iribojeguere ïgu yare erã gojarapũgue.

<sup>5</sup> Dohpaguere gajire guñacũ iidiaa mũare. Ire mũa masiquerecũ ta dipaturi mũare ïre guñacũ iidiaa. Goãmũ ïgu yaräre Egipto árĩnirãre ïgu wiura pũhrũ erã mera majarã ïgũre umupeobirinirãre Goãmũ wejẽñumi. <sup>6</sup> Eropirã mũa gajirã sãre guñaque. Gajirã anyuapũ Goãmũ doreri iinirã, pũhrũ iidiabiriñuma. Eropirã erã ïgu árĩdore apidiro sãre erã árĩdiabiriñuma. Eropirã erã árĩdirore cóacãñuma erã. Erã eropa cóacũ ïagũ Goãmũ erãre naitãroque erãre peresu iĩñumi. Eropirã erã pehrerinũ core comedare dirinirã iro dopa árĩniguicãrãcoma. Eropigũ pehrerinũ árĩcũ dipuwaja moagũcumi Goãmũ erãre. <sup>7</sup> Eropa ta ñero iĩñuma gajirã sã. Erã sãre guñaque mũa. Erã Sodoma waĩcũri maca majarã, Gomorra waĩcũri maca majarã iri macari pohro árĩri macari majarã sã nome mera ñero iimũriñuma. Eropirã gajiropa árĩri sãre iĩñuma. Erã umapũ erã basi ta erã dũpũ mera ñero iĩñuma. Nome sã eropa ta iĩñuma erã seyaro. Erã eropa iira dipuwaja Goãmũ erãre soepehocãñumi. Erãre soegu Goãmũ árĩpehrerã ïgũre tarinũgarãre ïgu dipuwaja moaburire ïhmugũ iĩñumi. Erãre ïgu dipuwaja moari peame ne yarisome.

<sup>8</sup> Erã Goãmũre tarinũganirã iidiro dopa dohpague sã eropa ta iiniguicãma gũyarire buherã. Erã pee masibirã iro dopa ta erã dũpũ mera ñero iima. Eropirã mari Opũ dorerire gamebeama erã. Eropirã deyobirãre, umaro oparãre, turarãre erãpũ ñero werenigui

corema. <sup>9</sup> Ōagu anyua opupu Migue waicugu igu turagu ariqueregu ta watipure ñero werenigui corebiripu. Igu Moise dupu murarore gamegu, wati mera game duyasopu. Turagu ariqueregu ta igu wati tauro “Yu tamera turaa,” arī pepibiripu. Eropigu igu gamero watire “Peamegue waporu,” arī weresābiripu Goāmure. Eropigu opa arīpu watire. “Goāmugue mure turiporo,” arīpu Migue watire. <sup>10</sup> Oā guyarāpu erā masibirare ñero werenigui corema. Eropirā waimurā pee masibirā erā gamero ñero iiro dopa ta erā guyari wererāpu eropa iimaacāma. Eropa iirā arīrā peamegue warācoma.

<sup>11</sup> Erā ta ñero tarirācoma. Caín iribojegue majagu iidiro dopa ta ñero iima erā. Eropirā Balam sā igu iidiro dopa ta erā niyerure mahi, aidiarā guyarire buhema. Eropirā niyeru airi dihtare pepima erā. Eropirā iribojegue majagu Coré waicugu igu opure Moisere igu cóadorediagu igu iidoreldiro dopa ta erā sā Jesure eropa ta cóadorediama. Eropirā igu iidiro dopa ta erā sā peamegue warācoma. <sup>12</sup> Erā muare guya wererāpu mua game mahi ii ihmuburi bosenurire barā, umupeori mariro erā erā gamero bira, erā seyaro ta barire bapehocāma gajirāre oro mariro. Eropirā ñerire iirā erā mua bosenurire oarinuri waborañere goroweoma. Deco mariri imica cururi iri mari otera itamubiro dopa ta erā guyarire buherā ne muare itamubeama. Eropiro iri imica cururi miruñe weacū eropa gohrotoniguuro dopa ta erā guyarā sā erā wereniguirire gohrotoniguicāma. Yucu ducacubiriri yucu duhpiburi arībiro dopa erā duhpimorā arībeama. Erā buheri mera gajirāre Goāmure umupeocū iibeama. Yucugu dūca maricū iha mari duha peamegue soe cóacāa irigure. Eropa ta Goāmu erāre guyarāre peamegue cóagucumi. <sup>13</sup> Pāguri pumarare pamujupira iro dopa erā ñerire guhyašurire wereniguima. Necāmu yuridija igu pehrero dopa ta erā sā pehrea warācoma. Erā eropa ñero iira dipuwaja dederea warācoma. Goāmu erāre dipuwaja moacū naitfarogue arīniguicārācoma.

<sup>14-15</sup> Enoco iribojegue majagu Adán puhru siete cururi puhru majagu opa arīmariñumi. “Peeque yure. Goāmu bajarā igu anyua oarā mera arīpehrerā ñerāre erā ñerire iira dipuwaja moagu arigucumi. Eropigu arīpehrerā Goāmure ihatirirāre erā ñeri iira dipuwajare erāre masicū iigu arigucumi Goāmu. Eropigu Goāmure erā ñero wereniguira dipuwaja sāre erāre masicū iigu arigucumi,” arīmariñumi Enoco muru. <sup>16</sup> Erā guyarā gajirāre duyaso ñero werenigui corerā, erā ñero uaribejari dihtare iirā āhrima erā. Eropirā “Gajirāre masitarinugaa gua,” arīrima erā. Eropirā erā gamero dopa iidiarā gajinore emadiarā, peemaja oaro wereniguima masare.

### *Jesu yarāre werenemoñumi Juda*

<sup>17</sup> Mari Opu Jesucristo buhedore igu apinirā erā buherare guñaque mupū, yu mahirā. <sup>18</sup> Ōpa arīma erā muare. “I yeba pehrebore coregā Goāmure ñero arī werayarā arīrācoma. Eropirā erā Goāmure gamebirā, ñerire erā uaribejarire iirācoma erā,” arī werema Jesu igu apinirā muare. <sup>19</sup> Jesu yarāre erā basi erā game ihaturicū iima erā guya wererāpu. Eropirā ñerā erā ñeri uaribejarire iirā arīrā, Espiritu Santore ne opabeama erā.



<sup>20</sup> Мѡарѡ уѡ mahirã, Jesucristo ya buherire ðaro peenemoque guñaturarã mѡa árĭboro dopa. Iri buheripѡ ðataria. Espírĭtu Santo itamuri mera Goãmѡ mera wereniguique mѡa. <sup>21</sup> Goãmѡ mѡare burigã mahimi. Eropirã ĩgѡ mѡare mahiniguiboro dopa ñeri mariro árĭniguiçãque Goãmѡ ĩgѡ dorero dopa. Eropirã Jesucristo mera mѡa eropa árĭniguiburire coreque. ĩgѡ marire mojomoro ĩagѡ ɯmaroguere eropa árĭniguiçã ĩigѡcumĭ.

<sup>22</sup> Cristo yare peediabiriñarirãre mojomoro ĩaque. Eropirã erãre Jesucristo ya diaye árĭrĭre wereque. <sup>23</sup> Erãre peamegue wabonirãre Goãmѡre itamucã ĩique mѡa. Gajirã ñerire iirã wahama. Erã ñerire dooque. Erãpѡre mojomoro ĩaque mѡa. Erãre itamurã mѡa sã ðaro ĩique erã ñeri iirire ĩhacũri arĩrã. Gũhraricũri suhrĭrore mѡa gamebiro dopa ta, gajirã erã ñeri iirire gamebircãque ĩrĭre pẽhreri arĩrã.

*Juda Goãmѡre ĩgѡ umupeori ãhrѡ ɯmaroguere eropa árĭniguiçaa*

<sup>24-25</sup> Goãmѡ mari Opѡ marire ĩhadibumasimi ñerire mari iĭbirĭboro dopa. Eropigѡ ĩgѡ marire ñeri dipuwaja marirãre ɯmarogue ĩgѡ pohroque apĭmasimi. Eropa marire ĩgѡ erogue apicã mari mucubirirãca. ĩgѡ Goãmѡ yujugѡ ta ãhrĭmi. Eropigѡ peamegue wabonirãre taugѡ ãhrĭmi ĩgѡa. ĩgѡpѡ ĩribojegue dohpague sãre ðatariagѡ, mari tauro opѡ árĭgѡ, turatariagѡ, árĭpehrerãre doregѡ ãhrĭmi. ĩgѡ eropa árĭgѡ árĭcã Jesucristo yarã árĩrã ĩgѡre umupeorã. Eropa ta iirã. Iripẽta ãhraa.

## Apocalipsis

*Puhrugueru I utu dohpa waborore marire masicũ iimi Jesucristo, arĩ gojañumi Ñu*

<sup>1</sup> Ipũ mera Jesucristo igu yarãre masicũ iirare were gojabeogu iiaa. Mari Pagu Goãmuru irire weredoregu apipu Jesucristore. Igu yarãre igu pohro majarãre masicũ iidoregu apipu. Eropigu puhru waburire marire masicũ iidoregu apipu Jesucristore. Eropigu Jesucristo marire eropa masicũ iibu igu anyure obeodigu arĩmi yure Ñure irire weredoregu. <sup>2</sup> Eropigu yuhu Ñu baja ãamũtabu Goãmu igu dohpa iiburire. Goãmu igu werenigui ri sãre peeabu. Eropigu arĩpehleri yu ãarare yu peerare were gojabeogu iiaa. Jesucristo igu basi ta diaye arĩrãre were gojabeogu iiaa.

<sup>3</sup> Ipũ mera puhru guere dohpa waburire were gojagu iiaa. Merogã duhyaro iiaa iri arĩpehleri eropa waboro. Eropirã arĩpehleri ipũre buherã, yu wererire ðaro yuhirã ðaro mucubirã arĩrãcoma.

*Siete iglesia majarãre Jesu yarã gamenererãre gojabeopu Ñu*

<sup>4</sup> Yuhu Ñu mũare siete cururi majarãre Jesu yarãre Asia yeba majarãre gojabeoa. Goãmu igu mahiri mera mũare ðadorea. Eropirã igu itamuri mera ðaro arĩque mũa. Igu negohraguere eropa arĩniguidigu arĩñumi. Dohpague sãre eropa ta arĩnigui. Puhru guere sãre eropa ta arĩnigugucumi. Goãmu igu opu doaro core Espiritu Santo ahrimi. Siete suburi maja turari arĩpehleri opagu ahrimi. Igu mera sãre yu mũare ðadorea daja. <sup>5</sup> Cristo igu mahiri mera mũare ðadorea daja. Igu Cristo Goãmu yare gayaro mariro weregu ahrimi. Eropigu igu siridigu igu masa mũriadigu ne dipaturi sirisome igu. Igu yarã waborore masa mũriamũhtadigu ahrimi. Eropigu i yeba majarã arĩpehleri oparã tauro opu ahrimi igu. Marire mahigu igu di cóãra mera mari ñeri iirare cóãdi arĩmi igu. <sup>6</sup> Eropã cóãgu marire oparã wamorãre wacũ iidigu arĩmi igu. Eropigu marire pahia masare Goãmure serẽbasarã wamorã sãre wacũ iidigu arĩmi. Eropigu Goãmu mari Pagu yare iimorãre wacũ iidigu arĩmi igu eropa sirigu. Igu eropa iidigu ðaro werenigui umupeoro gahmea arĩpehleri. Arĩpehleri tauro opu eropa arĩnigui igu. Eropã ta arĩporo.

<sup>7</sup> ðaro pee masi coreque mũa. Imica cururi weca دچارigucumi Cristo. Igu eropa aricũ ãarãcoma arĩpehleri. Iguere crusague pabia wejẽnirã mura sã ãarãcoma. Eropirã igu aricũ ãarã i yeba majarã arĩpehleri cururi majarã orerãcoma gũirã. Eropã ta arĩporo.

<sup>8</sup> Opa arĩmi mari Opu Goãmu: “Yuhu arĩpehleri ãhacũnugudigu ahraa. Eropigu arĩpehleri pehrecũ iibu ahraa, arĩmi. Iribojegue sãre eropa arĩnigui mũribu. Dohpague sãre eropa ahraa. Puhru guere sãre arĩgura,” arĩmi Goãmu.

*Jesucristore gosesirigueru yu ãhabu, arĩ werepu Ñu*

<sup>9</sup> Yuhu Ñu mũa acaweregu Jesu yagu ahraa. Eropigu mũa iro dopa ta yu sã Jesu ya arĩburire yu iira dipuwaja ñero taribu. Eropigu mũa iro

dopa ta yure erã ñero iiquerecũ ĩgu itamuri mera Jesure cóãbiribũ. Mari yujuro mera ĩgu Opũ árĩro majarã árĩmorã áhrra. Yaha yeba majarã erã cóãdigũ árĩgu Patmo waĩcũri ñugurogue áhrra. Goãmu yare Jesucristo ĩgu werera sãre gajirãre yũ wereri dipuwaja õgue erã cóãbeodigũ áhrra. <sup>10</sup> Ohõ yujunũ soorinũ árĩcũ Espĩritu Santo yure quẽrogue ĩhmuami. ĩgu eropa ĩhmucũ yũ pũrũpũrũ burigã wereniguiri busuro dopa carabũ. Corneta turaro busuro dopa eropa ta busuro carabũ ĩgu wereniguicã. <sup>11</sup> Őpa arĩgu carami yũ peecã:

—Yũhũ árĩpeherrerire ĩhacũnugudigũ áhrra. Eropigũ yũhũ árĩpeherrerire pehrecũ iibu áhrra. Dohpague mu ĩaburire gojaripũgue goja aĩque. Mu eropa goja aĩra pũhrũ siete cururi majarãre Goãmu yarãre obeoque iripũre. Erã siete cururi majarã Asia yeba árĩri macari majarã áhrrima. Eropigũ Efeso majarãre, Esmirna majarãre, Pẽrgamo majarãre, Tiatira majarãre, Sardis majarãre, Filadelfia majarãre, Laodicea majarãre mu ĩaburire gojabeoque, arĩgu carami yure.

<sup>12</sup> ĩgu eroparĩcũ peegu majinũgajabũ yure wereniguigũre ĩabu. Eropa majinũgajagũ siete sihãgori yucũre erã duhpeora yucũre oro mera erã ĩira yucũre ĩhabũ. <sup>13</sup> Iri yucũ watope masũ iro dopa bejagũre ĩhabũ yũhũ. ĩgu yoari suhriro sañagũ áhrrami. ĩgu guburigue dijimerejabũ ĩgu suhriro. Eropigũ oro mera erã ĩira gasiro mera ĩgu coretihbire tũãdiudigũ áhrrami. <sup>14</sup> Eropiro ĩgu poari yaji poari iro dopa boreabũ. ĩgu cuiiri peame porã iro dopa goseabũ. <sup>15</sup> ĩgu guburi bronze waĩcũri come timura come iro dopa gosesiriabũ. Eropiro ĩgu wereniguiri baja utã dipabu iro dopa busuro carabũ. <sup>16</sup> ĩgu mojoto diaye maja mojtõpũ siete necã opãmi. Eropiro ĩgu disirore ñoserimiji pepũri usirimiji cuũuami. Eropiro abe umũ majagũ ĩgu cuimijuro dopa ĩgu diapo turaro gosesiriamĩ.

<sup>17</sup> Eropigũ ĩgũre ĩagũ uca waha ĩgu guburi pohro mehmerejabũ sĩrigũ iro dopa. Yũ eropa mehmerejacã ĩagũ ĩgu, ĩgu mojoto diayepũ mera yure duhpeo õpa arãmi:

—Ucabitã. Yũ árĩpeherrerire ĩhacũnugudigũ áhrra. Eropigũ árĩpeherrerire pehrecũ iibu áhrra. <sup>18</sup> Ojocarĩnigũgũ áhrra yũhũ. Sĩridigũ árĩribũ. Dohpaguere ĩaque. Árĩpeherrerinũri eropa ojocarĩniguicãa yũhũ. Sĩridi dipaturi masagũ dipaturi masare sĩribiricũ iimasia yũhũ. Eropigũ masare peamegue wabiricũ ĩigu áhrra yũhũ. <sup>19</sup> Eropigũ dohpague mu ĩarare gojaque. Pũhrũgue eropa waboro sãre ĩagũ gojaque. <sup>20</sup> Oã siete necãre yũ mojoto diayepũ oparãre weregũra mũre. Eropigũ siete sihãgori yucũre erã duhpeora yucũ oro yucũ sãre weregũra. Yũ õpa arĩ wererire iribõjegue majarãre ne werebirimũribũ. Őpa áhrra iri: Siete necã siete cururi majarã yaharã oparã árĩrã iro dopa áhrrima. Eropiro siete sihãgori yucũre erã duhpeora yucũ siete cururi majarã yaharã iro dopa áhrrima, arãmi yure Jesucristo.

## 2

*Efeso majarãre Jesu yarãre gojanũgadoreñumi Ñure*

<sup>1</sup> Eropa arĩtuhaja õpa arĩnemoami yure gojadoregũ:

—Efeso majarã yaharãre, erã opũ sãre õpa yũ arĩrĩre arĩ gojabeoque mũhũ. Yũhũ mojoto diayepũ siete necãre opagũ áhrra. Eropigũ

siete sihāgori yucu watope curigu āhraa. Eropa curigu árīgu muare òpa arī werea: <sup>2</sup> Árīpehreri mua iirare masipehoa. Yaha árīburire turaro mohmeabu mua. Yure mua umupeo duhubirabu. Ñerire iirāre mua ĩadiabirabu. Eropirā “Jesu buhedoregu ĩgu apinirā āhraa,” arīmaacānirāre queoro erā buhebiricū ĩarā, gūyarā erā árīcū masiabu mua. <sup>3</sup> Yahare mua iira dipuwaja mua ñero tariquererā erā gūyarāre tarinugabu mua. Eropirā yure ne duhubirabu mua. “Irire gariborea waca pare,” arībirabu mua. <sup>4</sup> Eropa mua òarā árīquererā ta yujuñere òaro iibea mua. I āhraa iri: Yure òaro mua mahimūhtadiro dopa dohpaguere iibea mua. <sup>5</sup> Yure mua umupeomūhtarare guñaque mūraro ta daja. Dohpaguere mua yure umupeobiriqueyarire guñaque. Eropirā mua irire mua ñeri iirare bujawereque. Irire duhuque. Eropa duhurā yahare mua iimūhtadiro dopa ta iique daja. Mua ñeri iirare mua duhubiricū ĩagu, yujugu mua yagure sihāgodigure aĩ cóāgura. Eropa iigu mua yuju curu majarāre cóāgura. Mua ñeri iirare duhubiricū mua yaha curu majarā árīnirāre duhupehrecū iigura. <sup>6</sup> Yure umupeobiriqueyarā árīquererā ta ire òaro iiabū mua: Nicolaita yare buherāre ñerāre ĩadiabea mua. Yū sā erāre ĩadiabea. <sup>7</sup> Gamiricurā āhraa mua. Eropirā peeque. Muare yaha curu majarāre Espiritu Santo ĩgu wererare peeque mua sā. Òpa arīmi ĩgu: “Árīpehrerā Jesure umupeo duhubirāre Goāmū ya pohe majagu dūcare paraíso majagu dūcare badoregura. Irigu dūca ojocaririre odigu āhraa,” arīmi Espiritu Santo, arī were gojabeoque Efeso majarā yaharāre erā opu sāre, arāmi yure Jesucristo.

*Esmirna majarāre Jesu yarāre gojabeodoreñumi Ñure*

<sup>8</sup>—Esmirna majarā yaharāre erā opu sāre òpa yū arīrīre gojabeoque mūhū, arāmi yure Jesucristo. Yūhū árīpehrerire ĩhacūnugudigu āhraa. Eropigu árīpehreri pehrecū iibu āhraa. Sīria wabū. Dipaturi ojocaria daja. Eropigu òpa arī werea muare: <sup>9</sup> Mua ñero tarirare masia. Mojomorocurā mua árīcū sāre masia. Eropa mojomorocurā árīquererā ta ĩgu wereniguirire peerā Goāmū yare òarire wūaro opaa mua. Gajirāpū muare ĩhaturirā muare erā ñero quere moarare masia. Erā “Gua judio masa Goāmū yarā āhraa,” arīquererā gūyarā iima. Erā Satanare umupeorā āhrima. <sup>10</sup> Dohpaguere mua ñero tariburire gūibiricāque. Peeque mua. Watī muare Goāmure duhudoregu yujurāyeri mua mera majarāre peresu iidoregucumi. Diez nuri gohra ñero tarirāca mua. Erā eropa ñero iicū muare erā wejēdiaquerecū ta yure yaha sāre ne cóābiricāque. Mua yure eropa cóābiricū ĩagu árīpehrerinuri muare òaro árīcū iigura. <sup>11</sup> Gamiricurā āhraa mua. Eropirā peeque. Muare yaha curu majarāre Espiritu Santo ĩgu wererare peeque mua. Òpa arīmi ĩgu: “Árīpehrerā Jesure umupeo duhubirā peameguere wasome,” arīmi Espiritu Santo, arī gojabeoque Esmirna majarā yaharāre erā opu sāre, arāmi Jesucristo yure.

*Pérgamo majarāre Jesu yarāre gojabeodoreñumi Ñure*

<sup>12</sup>—Pérgamo majarā yaharā erā opu sāre òpa yū arīrīre gojabeoque mūhū, arāmi yure Jesucristo. Yūhū ñoserimijire pepuri usirimijire opagu āhraa. Muare òpa arī werregura: <sup>13</sup> Mua árīrore masia. Erogue

mua ya maca majarã opu Satana ahrimi. Erã Satanare umupeo-  
 querecũ m̄arpu yure umupeoa. Erã mua mera majagu m̄arure Antipa  
 m̄arure yahare ôaro weredigu m̄arure wejẽma. Igure erã wejẽcũ  
 ãaquererã ta yure ne umupeo duhubirabu mua. <sup>14</sup> Mua eropa umupeo  
 duhubiriquerã merogã yure tarinugabu mua. Yujurãyeri mua mera  
 majarã Balaam ya buherire gahmema. Iribojegue majagu igu Balaam  
 waicugu ôpa arĩmuriñumi Israe masare ãhaturirã erã opure: “Israe  
 masare tarinugadiagu ôpa iique. Goãmarã wãanirãre mua orare  
 barire badoreque erãre. Eropigu nome mera ñero iicũ iique erãre,”  
 arĩ weremuriñumi Balaam gajirã opure Balaco waicugure. Iribojegue  
 igu eropa ñero iidoreldiro dopa ta dohpague sãre ñero iicũ iima  
 yujurãyeri mua mera majarãre. <sup>15</sup> Eropirã erã iro dopa ta gajirã mua  
 mera majarã Nicolaita buherire gahmema. Iri buheri sãre ãdiabeaa  
 yuhũ. <sup>16</sup> Eropirã mua iri ñeri iirire duhuque mua. Mua eropa  
 duhubiricã ãagu yojaro mera mua pohrogue wagu, eropa ñero iirã  
 mera gamequeãgũca. Yuhũ disirogue cuñurimiji ñoserimiji mera  
 gamequeãgũca erã mera. <sup>17</sup> Gamiricurã ahraa mua. Eropirã mua  
 ya curu majarãre yaharãre Espĩritu Santo igu wererare peeque mua.  
 Ôpa arĩmi igu: “Arĩpehrerã Jesure umupeo duhubirãre mana waicuri  
 barire umaro maja waire yu gojaturayeri arĩroca. Gajirã iri waire  
 ne masisome. Iri utãyerire airã dihta iri waire masirãcoma,” arĩmi  
 Espĩritu Santo, arĩ gojabeoque Pãrgamo majarãre erã opu sãre, arãmi  
 yure Jesucristo.

*Tiatira majarã sãre Jesu yarãre gojabeodoreñumi Ñure*

<sup>18</sup> —Tiatira majarã yaharã erã opu sãre ôpa yu arĩrire gojabeoque  
 m̄uhũ, arãmi daja yure Jesucristo. Yuhũ Goãmu magu yu cuirĩ peame  
 porã iro dopa gosesirigu ahraa. Eropiro yu guburi bronce waicuri  
 come erã timura iro dopa gosesiria. Muare ôpa arĩ werea: <sup>19</sup> Mua  
 iirare masia yuhũ. Goãmure masa sãre mua umupeoare, yure  
 mua cóãbirirare, gajirãre mua itamurare, ñero tariquererã mua yure  
 duhubirare masia. Negohraguere mua iidiro tauro dohpaguepũre  
 ôaro iinemorã iiaa mua. Iri sãre masia yuhũ. <sup>20</sup> Mua eropa ôaro  
 iirã arĩquererã ta ôpa yure tarinugabu mua: Jezabe waicugo “Goãmu  
 yare werego ahraa,” arĩ guyago mua watope ta ahrimo. Muare  
 igo ñero buhecũ peerã igore turibirabu mua. Eropa guya buhego  
 yaharãre yu pohro majarãre nome mera ñero iicũ iimo. Eropigo  
 goãmarã wãanirãre erã orare barire badoremo igo yaharãre. <sup>21</sup> Igo  
 ñerire igo bujawereborore coreniribu. Yu eropa corequerecũ igo  
 ñero iirire duhudiabiramo. <sup>22</sup> Eropirã yure peeque mua. Igo  
 dorecucũ iigura. Igo mera ñero iinirã sãre dorecucũ iigura. Eropirã  
 erã burigã ñero tarirãcoma. Eropa ta iigũca erãre igo mera erã  
 ñero iirare erã bujawerebiricũ, irire erã duhubiricũ. <sup>23</sup> Eropigu igo  
 porãre wejẽgura. Yu eropa iicũ ãarã arĩpehrerã yaharã yu ôaro  
 masirire masirãcoma. Masa erã pepiri sãre erã uaribejari sãre masia.  
 Yu eropa masicũ masirãcoma erã igore yu eropa dipuwaja moacũ.  
 Arĩpehrerã mua ñerire iira dipuwaja, dipuwaja moagura muare.  
 Eropigu mua ôarire iira wajapũre ôaro iigura muare. <sup>24</sup> Mua Tiatira  
 majarã gajirã mua mera majarã igo ya buherire gamebirabu. M̄arpu

Satana ya buherire “Wuaro ĩgu masiri āhraa,” erā arĩrare gamebirabu mũa. Eropigu mũapũre gajino mũa iiburire dorenemosome yũhũ. <sup>25</sup> Dorenemobiriqueregu ĩne dihtare dorea mũare: Mũa pohrogue yũ dujariboro core yũ buherire mũa masirare ne merogā mera cādijibiricāque. <sup>26-27</sup> Áripehrerā ñerire tarinũganirāre, yũ gamerire eropa iiniguirāre oparā árĩmorāre acugũra. Yũ Pagũ ĩgu yũre opu acudiro dopa ta mũare oparā acugũra yũ sã. Áripehreri yeba majarā tauru árĩrā oparā árĩmorā acugũra mũare. Eropa oparā ñajarā, mũa doca árĩrāre árĩpehreri yeba majarāre turaro dorerāca. Eropa turaro dorerā mũare tarinũganirā mata pehrea wacũ iirāca mũa erāre. <sup>28</sup> Eropigu mũare yahare ne duhubirininirāre boyomũrĩridirure ogũra. Eropigu mũa mera árĩgũca yũhũ. <sup>29</sup> Gamiricũrā āhraa mũa. Eropirā mũa ya curu majarāre yaharāre Espĩritu Santo ĩgu wererare peeque mũa, arĩ gojabeoque Tiatira majarāre, arāmi yũre Jesucristo.

### 3

#### *Sardis majarāre Jesu yarāre gojabeodoreñumi Ñure Jesucristo*

<sup>1</sup>—Sardis majarā yaharāre erā oparā sãre õpa yũ arĩrire gojabeoque mũhũ, arāmi daja yũre Jesucristo. Yũhũ ĩgu Espĩritu Santo siete suburi maja turarire opaa. Eropigu siete necãre opaa. Mũare õpa arĩ werea: Mũa iirare masia. Õpa arĩ pepirima mũare gajirā: “Erā Goãmũ yare õaro iipehorā āhrima,” arĩ pepirima mũare. Erā eropa arĩ pepiquerecũ, Goãmũ yare õaro iibea mũaapũ. <sup>2</sup> Eropirā mũa iirare õaro guñaque mũa. Goãmũ yare mũa masirare õaro guñaque daja cādijiro mariro. Goãmũ ĩgu ĩacũ õaro iipehobirabu mũa. <sup>3</sup> Eropirā yahare mũa peemũhtarare mũraro ta õaro guñaque mũa daja. Eropa guñarā yahare iique mũa daja. Mũa ñeri iirare duhuque. Yũ arĩro dopa mũa iibiricũ guñaña mariro mũare dipuwaja moagũra. Yajari masũ ĩgu guñaña mariro ĩgu yajagu ñajaro dopa ta mũare guñaña mariro dipuwaja moagu arigũca. <sup>4</sup> Yujurāyeri mũa mera majarā Sardis majarā ñero erā iirire ĩhacũbeama. Eropa õarā árĩrā, boreri suhriro sañarā yũ mera curirācoma. <sup>5</sup> Áripehrerā yahare duhubirā eropa ta boreri suhri sañarā árĩniguirācoma. Eropirā yũ mera eropa árĩniguimorā erā waĩre yũ gojaturipũgue erā sã erā waĩre gojatunirā árĩrācoma. Erā erā waĩre yũ gojaturare coesome yũhũ. Yũ Pagũ ĩgu ĩhabeorogue, anyua sã erā ĩhabeorogue, “Yaharā āhrima,” arĩ weregũca erāre. <sup>6</sup> Gamiricũrā āhraa mũa. Eropirā mũa ya cururi majarāre yaharāre Espĩritu Santo ĩgu wererare peeque mũa, arĩ gojabeoque Sardis majarāre yaharāre erā opu sãre, arāmi yũre Jesucristo.

#### *Filadelfia majarāre Jesu yarāre gojabeodoreñumi Ñure*

<sup>7</sup>—Filadelfia majarā yaharā erā opu sãre õpa yũ arĩrire arĩ gojabeoque mũhũ, arāmi daja yũre Jesucristo. Yũhũ ñeri marigu āhraa. Diaye maja weregu āhraa. Davi mũrũ iribojegue majagu opu masare ĩgu dorediro dopa ta turari mera doregũra yũ sã. Iri turari mera iidorecũ ne gajirā irire cãhmotamasibeama. Yũ iidorebiricũ ne gajirā irire iimasibeama. <sup>8</sup> Áripehreri mũa iirire masia yũhũ. Guñaturabiriñarirā árĩquererā ta yaha buherire õaro peeabu mũa.

Yure waĩpeo duhubirabũ mũa erã mũare ñero iidiaquerecũ ta. Eropigũ yahare iimorã apiabũ mũare. Eropirã yũ dorerire mũa iicũ gajirã cãhmotamasibeama mũare. <sup>9</sup> Gajirã mũa pohro arĩrã “Gũa judio masa Goãmũ yarã ãhraa,” arĩquererã ta gũyarã ãhrama. Goãmũ yarã árĩbeama. Satanare umupeorã ãhrama. Eropigũ erãpũre mũa core mereja mũare erã umupeocũ iigũra erãre. Yũ eropiicũ ãarã yũ mũare mahirire masirãcoma erã. <sup>10</sup> Mũare yahare yũ duhudorebiricũ peerã õaro yũhriabũ mũa yure. Mũa eropa iicũ ãagũ i yeba majarã árĩpehrerã erã ñero tariburisubu árĩcũ mũare ãhadibugũra. Irisubu árĩpehrerã erã ñero tariburisubu árĩroca. <sup>11</sup> Merogã duhyaa i yebague yũ dujariboro. Yahare mũa masirare cãdijibiricãque. Eropirã yure eropa yũhriniguicãque mũa wajataboro dedeori arĩrã. <sup>12</sup> Eropigũ yahare duhubirãre yũ Pagũ ya wihi majarã apigũra erãre. ãgũ ya wihi maja borari iro dopa árĩcũ apigũra erãre. Eropirã Goãmũ mera majarã eropa árĩniguirãcoma. Eropirã Goãmũ yũ Pagũ yarã waĩcurã, ãgũ ya maca majarã waĩcurã sã árĩrãcoma. ãgũ ya maca mama maca Jerusalén árĩroca. Iri maca umarogue Goãmũ pohrogue dijariri maca árĩroca. Yũ waĩ sãre mama waĩ opagũca. Iri waĩ sãre waĩcurãcoma yahaarã. <sup>13</sup> Gamiricũrã ãhraa mũa. Eropirã mũa ya cururi majarãre, yahaarã Espĩritu Santo ãgũ wererare peeque mũa, arĩ gojabeoque Filadelfia majarãre yahaarã erã opũ sãre, arãmi yure Jesucristo.

*Laodicea majarãre Jesu yarãre gojabeodoreñumi Ñure Jesucristo*

<sup>14</sup> —Laodicea majarãre yahaarã erã opũ sãre õpa yũ arĩrĩre gojabeoque mũhũ, arãmi daja yure Jesucristo. Yũ arĩro dopa ta iigũ ãhraa yũhũ. Eropigũ gũyaro mariro yũ ãarare eropa wereniguigũ ãhraa. Árĩpehrerire mari Pagũ ãgũ ãhacũnugurare iibasagũ ãhraa yũhũ. <sup>15</sup> Árĩpehreri mũa iirare masia yũhũ. Mũa “Jesu yarã ãhraa gũa,” arĩquererã yure merogã umupeoa. Yure mũa merogã umupeorã mũa árĩcũ yũhũ gamebeaa mũare. Mũa “Jesure umupeobeaa gũa,” arĩbeaa mũa. “Jesure umupeorã ãhraa gũa,” arĩquererã ta yure õaro umupeobeaa. Mũa yure umupeodiaro dopa ta yure wũaro umupeocũ õaboaya. <sup>16</sup> Mũa eropa yure õaro umupeobiricũ ãagũ mũare gamebirigohracãgũra. <sup>17</sup> Eropirã õpa arĩ pepiraa mũa: “Árĩpehrerire opaa. Ne gajino duhyabeaa guare,” arĩ pepiraa mũa. Eropa arĩquererã mojomorocũrã iro dopa ta ãhraa mũa yũ ãacũ. Duhyataria mũare. Eropirã ne moonijarã, suhri marirã, cuiiri ãhajabirã iro dopa ãhraa mũa yũ ãacũ. Mũare duhyarire masibeaa mũa. <sup>18</sup> Mũa eropa masibirã árĩcũ ãagũ õpa arĩ weregũra mũare: Mũare duhyarire masique. Eropirã yure serẽque. Oro gohrare mũa asũro dopa ta õarire yũ oparire yũpũre aĩque mũa. Mũare yure õaro umupeocũ iigũra. Eropirã diaye ta Goãmũ ya mera wũaro oparãca mũa. Eropirã yũ sĩrira mera mũa ñero iirare cóãnirã árĩque mũa. Eropirã suhri sañarã erã guhyasĩribiro dopa ta mũa ñeri iirare cóãnirã õarire iimorã árĩrã guhyasĩrisome mũa. Eropirã mũa cuiiri ococũra pũhrũ õaro mũare deyoro dopa ta Goãmũ yare õaro peeque mũa õaro masiboro dopa. <sup>19</sup> Árĩpehrerã yũ mahirãre erã ñero iirare werea. Eropigũ yũ mahirãre dipuwaja moaa gajisubu erãre itamubu. Eropirã yũpũre turaro gameque. Eropirã mũa ñerire bũjawere duhuque. <sup>20</sup> Peeque yure. Mũa wirire bihara wirire yũ ejanũgaja ñajadiabodiro dopa ta

mua mera árīdiagu coregu iiaa. Yũ eropa árīdiacũ peerã yũre mua mera árīdoreque. Yaharã árīque. Mua eropa árīdorecũ mua mera árīgũra. Eropigũ mari sihu baro dopa ta mua mera õaro árīgũra. Eropirã yũ mera õaro árīrãca mua. <sup>21</sup> Ñerire yũ tarinũgara pũhrũ yũ Pagũ opu ĩgu doaro pohro doaa yũ sã dorebu. Eropa ta mua sã ñerire mua tarinũgara pũhrũ yũ opu doaro pohro doarãca doremorã. Mũare yũ pohro doacũ iigũra. <sup>22</sup> Gamiricurã ãhraa mua. Eropirã mua ya cururi majarãre yaharãre Espĩritu Santo ĩgu wererare peeque mua, arĩ gojabeoque Laodicea majarãre yaharã erã opu sãre, arãmi Jesucristo yũre.

## 4

*Umarogue Goãtũre erã mereja umupearare ĩapu Ñũ*

<sup>1</sup> Yũre ĩgu eropa arĩ werera pũhrũ umũsiguere pãgũra disiporore ĩhabũ. Dĩpaturĩ corneta turaro bũsũro watope turaro wereniguirĩ bũsũro carabũ yũ peecã. Őpa arĩro carabũ yũre:

—Őgue mũririique. I yũ wereburi pũhrũguere waroca. Eropa waborore mũre ĩhmũgũra. Yũ arĩdiro dopa ta eropa waroca, arĩro carabũ umarogue.

<sup>2</sup> ĩgu eropa arĩ werecũ ta erogue mũrijagu Espĩritu Santo ĩgu turarĩ mera ĩagu iiabũ. Eropigũ opu doarore umarogue ĩhabũ. Ero yujugu doãmi. <sup>3</sup> Eropigũ õaro goesirigu doãmi. Jaspe waĩcurĩ utãye goesiriro dopa ta, cornalina waĩcurĩ utãye goesiriro dopa ta õaro goesirigu doãmi ĩgu. Eropigũ õaro goesiriri bero esmeralda iro dopa goesiriri bero pohecague doãmi ĩgu. <sup>4</sup> Eropigũ ĩgu doaro tũrore yuju bero ĩhabũ oparã doari berorire. Veinticuatro gohra ãhrabũ. Iri oparã doarire veinticuatro gohra Jesu yarã oparã doãma. Boreri suhricurã ãhrama. Eropirã oparã erã peyari berorire oro berorire peyanirã ãhrama erã. <sup>5</sup> Doariñe yũ ĩamũhtarañegue miamaabũ. Eropiro gajiropa wereniguirĩ bũsũro carabũ. Bupu sã bũsũgu carami. Iri doaro core siete sihãgori yucu ãhrabũ. Iri siete sihãgori yucu Espĩritu Santo ĩgu siete suburi maja turarĩ opari iro dopa ãhrabũ. <sup>6</sup> Eropiro ĩgu doaro core wũariya ãhrabũ. Vidrio iro dopa árĩriya ãhrabũ. Őaro deco sũririya ãhrabũ.

ĩgu doaro pohro wapicurã gajiropa bejarã ãhrama. Ojocarirã ãhrama. Erã diaporire erã pũrũpũrũre baja cuiricurã ãhrama. <sup>7</sup> Yũ ĩamũhtadigu gajiropa bejagu yee diagu iro dopa bejagu ãhrami. ĩgu pũhrũ árĩgu wecu iro dopa bejagu ãhrami. Erã pũhrũ árĩgu masũ diapo iro dopa diapocũgu ãhrami. Erã wũerã pũhrũ árĩgu gaa ĩgu quẽ dũpũre sũegũ iro dopa ãhrami. <sup>8</sup> Erã wapicurã nũcu seis quẽ dũpũricurã ãhrama. Eropiro erã quẽ dũpũri pepũrigue ta baja cuiricuri quẽ dũpũri ãhrabũ. Eropirã umũri nũcu, ñamiri nũcu eropa bayaniguirã iiaa. Ne baya duhubirama. Őpa arĩ bayãma:

Őagũ, õagũ, õagũ Goãmũ mari Opu turatariagu ãhrimi. ĩgu iribojegue eropa ta árĩniguicãpũ. Dohpague sãre eropa ta árĩniguimi.

Pũhrũgue sãre eropa árĩniguicãgũcumi, arĩ bayaniguirã iiaa.

<sup>9</sup> Eropa bayarã erã wapicurã gajiropa bejarã ĩgu turarire bayarã iiaa. Eropirã ĩgũre árĩpehrerinũri árĩniguigũre “Őhaa,” arĩrã umupearã iiaa. <sup>10</sup> Erã eropa baya umupearã ĩarã veinticuatro



Jesu yarã oparãpu opu doaro core mereja, ïgure umupeqoama. Ïgu áriþehrerinãri áriniguigu áhrimi. Eropa umupeqorã erã oparã erã peyari berorire ïgu doaro core mehpeqoama. Eropa mehpeqorã opa arãma erã:

<sup>11</sup> Mũhu Goãmu gũa opu gohra áhraa. Turagu ðagu áhraa mũhu. Mũhu gũa umupeqogu árigu ta iiaa. Mũre eropa umupeqoro gahmea gũare. Áriþehrerire ïhacũnugudigu áhraa mũhu. Mũ gamediro dopa ta iri áriþehrerire ïhacũnuguyoro mũhu, arãma erã Goãmũre ero doagure.

## 5

*Gojarapũ tũrara tũrure cordero sãre werepu Ñũ*

<sup>1</sup> Pũhrũ ero doadigu ïgu mojoto diayepũ ïgu oparipũre gojarapũre ïhabũ. Iripũ pepũri ïgu gojarapũ ïgu tũrara tũru áhrabu. Eropiro siete suburi pihañari mera ïgu pihañara tũru áhrabu. <sup>2</sup> Eropigu turagu anyure ïhabũ. Ïgu turaro wereniguiuri mera ðpa arĩ wereami:

—I tũrure pihañarare ðagu dihta pãñamasimi. ¿Nihipu áhriri iripũre pãbu? arãmi ïgu anyu.

<sup>3</sup> Eropa arĩqueregu ta iri tũrure pãñabure bocabirami. Eropa ðagure bocabirami. Ũmarogue i yebague ojocarirã watope, sirinirã watope ne iri tũrure pãñabu marami. Eropigu iri tũru majare buhebu marami. <sup>4</sup> Eropigu iripũre pãñabodigure erã bocabiricũ ïagu turaro oreabu yũpu. <sup>5</sup> Yũ eropa orecũ ïagu yujugu erã Jesu yarã oparã mera majagu ðpa arãmi yũre:

—Orebiricãque. Iri tũrure ñearire yujugu pãñamasimi. Ïgu Juda ya curu majagu turagu áhrimi. Ïgu opu Davi pãrami árituriagu áhrimi. Watũre tarinugadigu áhrimi ïgu. Eropigu ïgu iri tũrure siete ñearire pãmasigu áhrimi, arãmi ïgu yũre.

<sup>6</sup> Ïgu eroparicũ peegu opu ïgu doaro core Cordero ïgu niguicũ ïhabũ. Wapicũrã gajiropa bejarã, Jesu yarã oparã sã erã watope niguiami ïgu Cordero. Ïgu eropa niguiqueregu ïgu masa erã wejẽdigu mũru dopa dehyoami. Siete cusaricũgu, siete cuiricũgu áhrami. Iri siete cuiuri ïgu Espĩritu Santo ïgu siete suburi maja turari áhrabu ïgu áriþehrero ïhamasiburi. Espĩritu Santo áriþehrero i yebaguere Goãmu ïgu obeodigu áhrimi. <sup>7</sup> Eropigu Corderopũ opu doaro pohrogue ejaqu, ero doagure ïgure ïgu diayepũ opara tũrure tũaweã aĩami. <sup>8</sup> Ïgu eropa tũaweã aĩcũ ïarã wapicũrã gajiropa bejarã, veinticuatro Jesu yarã oparã sã Cordero core mereja ïgure umupeqoama. Erã Jesu yarã oparã áriþehrerã arpa waĩcũri bũamutẽrre opãma. Oropari sãre opãma. Iripari incienso ujtũriripari dihta áhrabu. Iri incienso Goãmu yarã ïgure erã serẽra áhrabu. <sup>9-10</sup> Eropa ïgure umupeqorã opa arĩ mama bayarire bayãma erã Corderore:

Erã wejẽdigu mũhu áhraa. Eropigu mũ ya di mera masa ñeri iirare coeabu mũhu Goãmu yarã erã áriþoro dopa. Eropigu masare áriþehrerĩ cururi majarãre yujurãyerire, áriþehrerã yare wereniguirãre, áriþehrerĩ yeba majarãre erã ñero iirare wajayebasabu. Eropa iigu erãre oparã áriþorã, pahia masare Goãmũre serẽbasarã áriþorã sã áricũ iabũ. Eropigu i yeba majarã weca oparã áriþorã acubu mũhu gũare. Eropa iigu

árídigu iri tûrure aĩ pãñamasibu àhraa mũhũ, arĩ bayáma erã Corderore.

<sup>11</sup> Yu ïagu daja bajarãre millones anyua majarãre ïhabũ. Opu doarore, wapicurã gajiropa bejarãre, veinticuatro Jesu yarã oparãre anyuapu erãre gãhrišanuğajáma. Erã anyua majarã turaro mera erã bayacũ ïhabũ. <sup>12</sup> Ōpa arĩ turaro bayapeoama erã:

Cordero, mũhũ erã wejëdigu árĩgu árĩpehrerãre doremasibu, árĩpehrerire opamasibu àhraa. Eropigu masipehogu, turatariagu àhraa mũhũ. Mu eropa árĩgu àhraa masa erã ñerire erã iira dipuwaja erã wejëdigu. Eropirã gua mũre umupeorãca. “Ōtariagu àhrimi,” arĩrãca mũre. Mũre òaro wereniguirãca, arĩ bayáma anyua majarã.

<sup>13</sup> Eropigu gajirã erã bayacũ peeabũ. Árĩpehrerã i yeba majarã, umaro majarã sã, ojocarirã, sĩrinirã, wũariya majarã sã, árĩpehrerogue arĩrã òpa arĩ bayarã carama:

Goãmũre ïgu doarogue doagũre, Cordero sãre òaro wereniguirãca.

Mũare umupeorãca. “Ōatariarã àhrima. Turatariarã àhrima,” arĩrã árĩpehrerineri eropa arĩniguicãrãca mũare, arĩ bayapeorã carama.

<sup>14</sup> Eropirã erã wapicurã gajiropa bejarã erã eropa arĩ bayacũ peerã “Eropa ta arĩ bayaporo,” arãma. Eropirã Jesu yarã oparãpu mereja Goãmũre, Cordero sãre umupeoama.

## 6

*Papera tûrure ïgu aĩra tûrure pihãñarare pãmi Cordero, arĩ werẽpu*

*Ñu*

<sup>1</sup> Pũhũ papera tûrure ïgu aĩgãra tûrure Cordero pihãnamũhtarañere pãmi. ïgu eropa pãcũ ïhabũ. ïgu eropa pãra pũhũ yujugu gajiropa bejarã mera majagu “Ïagu arique,” arãmi. Eropa arĩgu bupu busũro dopa ta wereniguiami. <sup>2</sup> ïgu eropa arĩra pũhũ ïhabũ yũhũ. Boregu cabayure ïhabũ. ïgu weca peyagu buiri berore opãmi. ïgũre opu peyari berore ohami gajigũpu. ïgu eropa ora pũhũ ïgũpu ïgũre ïhaturirãre tarinũgagu wahãmi.

<sup>3</sup> Pũhũ yujuñe pihãnarañere pãtuhaja Cordero gajĩne pihãnarañere pãmi daja. ïgu eropa pãra pũhũ gajigu gajiropa bejarã mera majagu “Ïagu arique,” ïgu arĩcũ peeabũ daja. <sup>4</sup> Eropigu gajigu cabayure diagũre ïhabũ daja. ïgu weca peyagũre turarire ohami gajigũpu. I yeba majarãre erã basi gamewejëcũ iibure apiami ïgũre. Eropirã árĩpehrero majarã gamewejërãcoma i yebague. Eropigu wũarimiji ñoserimijire ohami ïgũre.

<sup>5</sup> Pũhũ peñere pãtuhaja Cordero gajĩñere pãmi daja. Eropigu gajigu gajiropa bejarã mera majagu ïgu sã “Ïagu arique,” arĩcũ peeabũ daja. ïgu eropa arĩra pũhũ cabayu ñigũre ïhabũ. ïgu weca peyagu nũcũri queoriñere opãmi. <sup>6</sup> ïgũre yũ ïara pũhũ gajiropa bejarã watope òpa busũro carabũ:

—Trigo cebada sã pehrea waroca. Eropiro iri waja pagari arĩroca. Eropirã yujunũ mohmeri waja mera trigore yuju kilo ta asũrãcoma. Yujunũ mohmeri waja mera cebada yerire uñre kilo ta asũrãcoma. Bari moari uypũ, vino sã baja arĩcãniroca, arĩro carabũ.

7 Puhru uhreñere pätuhaja Cordero gajiñere pāmi daja. Īgu eropa pāra puhru gajigu gajiropa bejarā mera majagu árítugu Īgu sã “Īagu arique,” Īgu arícũ peeabu daja. 8 Īgu eroparícũ peegu borewijigu cabayure ĩhabu. Īgu weca peyagu sĭririñe waĭcuami. Eropigu Īgu puhru arigu peame waĭcuami. Eropigu erāre cabayua weca peyarāre turarire ohami corderopu. Wapicurā masa árícũ yujugu erā mera majagare wejēdoreami. Eropa ta árĭpehrero i yebaguere yujurāyeri masare wejēdoreami. Gamewejēri mera, oaboari mera, dorecuri mera, waimurā nuguri majarā guarā mera, yujurāyeri masare erā wejēburire apiami erā perāre.

9 Puhru wapicuriñere pätuhaja gajiñere pāmi daja Cordero. Īgu eropa pācũ Goāmure umupeoburi mesa doca Jesu yarāre erā wejēnirāre erā sĭporārire ĩhabu. Goāmũ yare erā werera dipuwaja, “Jesu yarā āhraa,” arĭ erā werera dipuwaja gajirā erā wejēnirā āhrama. 10 Erā gaguiniguirā ōpa Goāmure erā arícũ peeabu:

—Muhũ gua Opũ ñeri marigu, guyarō mariro mũ arĭro dopa ta iigu āhraa muhu. ¿Eropigu i yeba majarāre guare wejēnirāre dohpárícũ dipuwaja moagucuri muhu erāre? arĭ gaguiniguiama erā.

11 Eropigu erāre boreri suhri yoari suhrire ohami. Erāre eropa ogũ ōpa arāmi erāre:

—Soonique dohpa. Gajirā mũa acawererā Jesu yarā mũa iidiro dopa ta dohpague säre ōari buherire buhenirā iima masare. Mũare wejēdiro dopa ta erā säre erā wejēpehoboro duhyaa dohpa. Eropirā erāre árĭpehrerāre erā wejēboro core merogā corenique mũa, arāmi erāre.

12 Puhru cinco ñearire pätuhaja Cordero gajiñe ñeariñere pācũ ĩhabu daja. Iriñere Īgu pācũ ta, turaro yeba ñohmeabu. Eropigu umũ majagu abe ñigu guhyaro wahámi. Ñiriñe suhriro iro dopa ta bejagu Īgu guhyaro wahámi. Eropigu abe ñami majagu di iro dopa ta diagu guhyaro wahámi. 13 Eropirā necā yebague yuhridija waháma. Yucugũ ducare miruñe weāburĭboro dopa ta necā yuhridija waháma.

14 Eropiro umusi dederea wahaabu. Paperapũre mari tũrabeo dedeodiro dopa ta dederea wahaabu umusi. Eropiro árĭpehreri utā yucu sã árĭpehreri nudgorori sã gajipugue ejanugaja waha wahaabu.

15 Eropa wacũ ĩarā i yeba majarā tauro oparā, utā yucu maja wiri poheca maja goberigue duhrirā waháma. Gajirā oparā, surara oparā, doberi oparā, turarā, árĭpehrerā erā pohro majarā, erā pohro majarā árĭbirā sã yujuro ta duhrirama. 16 Eropirā duhrirā utā yucure utā säre ōpa arĭrama:

—Gua weca yuhridijari wejēcāque. Sihire opare Īgu doaro doagure gũitaria. Cordero guare ñero dipuwaja moagucumi. 17 Guare árĭpehrerāre turaro dipuwaja moaburinũ árĭtuhajaa. Eropirā Īgu dipuwaja moaborore ne bocatiusome gua. Eropa dipuwaja moari arĭrā gua weca yuhridijari wejēcāque, arĭrama utā yucure árĭpehrerā.

## 7

*Israe masa diaporire Goāmũ Īgu wā tuhaborore werepũ Ñũ*

1 Puhru wapicurā anyuare ĩhabu. Erā árĭpehroerogwe waháma. Yujugu nortepũ wagũ erogwe arirañere miruñere arĭbircũ iiami.

Gajigu surgue, gajigu abe m̄aririrogue, gajigu abe ñajarogue waha ĩḡu iro dopa ta miruñere aribiricũ iiami erã sã. Eropro i yebague, w̄ariyague sãre ne miruñe aribiricũ iiami. Ne yujugu yucũgure miruñe weã ñohmecũ iibirama. <sup>2</sup> Eropigu gajigu anyure ĩhabũ daja. Abe m̄aririrogue arigu iiami ĩḡu. Goãmu ojocariniḡu ĩḡu waĩ aĩturiñere sello waĩcuriñere aĩḡarigu iiami ĩḡu. Eropa aĩḡarigu gajirã anyua wapicũrãre ĩḡu gaguiniḡuami. Erã anyuapũ i yebare, w̄ariya sãre ñero wacũ Goãmu ĩḡu iidorenirã ãhrama erã. <sup>3</sup> Erãre gaguiniḡu õpa arãmi ihĩ anyu:

—Corenique. Goãmu pohro majarãre erã diaporire ĩḡu waĩ aĩturiñere tuhunimorã iiaa ḡua. ḡua eropa tuhuboro core i yebare, w̄ariyare, yucu sãre ñero wacũ iibiricãque mua dohpa, arãmi ĩḡu gajirã wapicũrã anyuare.

<sup>4</sup> Eropigu Goãmu ĩḡu waĩ mera erã diaporire erã tuhumorã “Oã nũcu ãhrama,” arĩ wereami yare yujugu. Israe masa doce cururi majarã ciento cuarenta y cuatro mil gohra masa erã tuhumorã árĩñorã. <sup>5</sup> Oã árĩñorã erã tuhumorã: Doce mil masa Judã pãramerã árĩturiarã erã tuhumorã árĩñorã. Doce mil masa Ruben pãramerã árĩturiarã árĩñorã erã tuhumorã. Gajirã doce mil masa Gad pãramerã árĩturiarã árĩñorã erã tuhumorã. <sup>6</sup> Gajirã Aser pãramerã árĩturiarã doce mil gohra, gajirã doce mil gohra Neftalĩ pãramerã árĩturiarã, gajirã doce mil Manase pãramerã árĩturiarã erã tuhumorã árĩñorã. <sup>7</sup> Gajirã doce mil masa Simeo pãramerã árĩturiarã, gajirã doce mil masa Levĩ pãramerã árĩturiarã, gajirã doce mil masa Isaca pãramerã árĩturiarã árĩñorã erã tuhumorã. <sup>8</sup> Gajirã doce mil masa Zabulon pãramerã árĩturiarã, gajirã doce mil masa Josẽ pãramerã árĩturiarã, gajirã doce mil masa Benjami pãramerã árĩturiarã, erã tuhumorã árĩñorã. Erã nũcu árĩpehrerã masa ciento cuarenta y cuatro mil gohra árĩñorã erã tuhumorã.

*Bajarã boreri suhricũrãre werepũ Ñũ*

<sup>9</sup> Pũhrũ masa bajarãre ĩhabũ. Árĩpehreri yeba majarãre, árĩpehreri cururi majarãre, árĩpehrerã yare wereniguirãre, árĩpehreri macari majarãre, yujurãyerire Cristo gamerã dihtare erã niguirãre ĩhabũ. Opũ ĩḡu doaro pohro, Cordero core niguiama erã masa. Bajarã masa ãhrama. Eropirã erãre queorã bocatĩurã mejeta ãhrama. Boreri suhricũrã ãhrama erã. Eropirã mijipũrire opãma. <sup>10</sup> Eropirã erã árĩpehrerã õpa arĩ gaguiniḡuama:

Goãmu ãhrimi marire taugũ. ĩḡu, ĩḡu doaro doagu ãhrimi. Cordero sã marire taugũ ãhrimi, arĩ gaguiniḡuama erã.

<sup>11</sup> Eropirã árĩpehrerã anyua, Jesu yarã oparã, gajiropa bejarã mera Opũ ĩḡu doaro tũrore yuju bero niguiama. Eropa niguirã ĩḡu doaro core mereja, Goãmũre umupeoama. <sup>12</sup> Opã arĩ umupeoama erã:

Eropa ta ãhraa. Goãmu ḡua Opũre mũre õaro wereniguiã. Oatariagu ãhraa mũhu. Masipehogũ ãhraa mũhu. Mũre “Õhaa,” arãa. Mũre umupeoa. Turatariagu ãhraa mũhu. Mũ turari mera ĩḡu ãhraa mũhu. Mũre eropa arĩã árĩpehrerĩnũri eropa mũre arĩniguirãca. Eropa ta iirã, arĩ umupeoama erã Goãmũre.

<sup>13</sup> Eropigu yujugu Jesu yarã oparã mera majagu yare wereami:

—¿Oã boreri suhricũrãre masiri mũhu? ¿Erã aridirore masiri mũhu? arĩ serẽpiami yare.

<sup>14</sup> Īḡu eroparīcū peegu,

—Masibea, arī yuhriabu yurū.

—¿Noa āhriri erā? arī serēriabu ġure.

Yū eroparīcū peegu ōpa arāmi yure:

—Oā űetariaro taririnuri árīcū yujuro bojerā āhrima, arāmi ġu yure. Erā suhrire coewearo dopa ta Cordero ġu di cóāra mera erā űerire coenirā āhrima. Eropirā ōari boreri suhricurā āhrima. <sup>15</sup> Eropa ġu coenirā árīrā Goāmū ġu doarō core ġure eropa umupeoniguicāma. Ūmuri űamiri nūcū ġure eropa umupeoniguicāma pahia Goāmū wihigue erā iiro dopa ta. Eropiḡu erā mera eropa árīniguigu erāre itamugūcumi Goāmū gajiropa warī arīḡu. <sup>16</sup> Eropirā ne dipaturi oaboasome erā. Eropirā ne űemesibusome. Ne abe ũmū majagu asiriñere pabusome erā. Turaro asiri erā űero taricū iisome. <sup>17</sup> Opu doarō core niguigu Cordero erāre ĩhadibugūcumi. Ovejare ĩhadibugū iro dopa erāre ĩhadibugūcumi. Eropiḡu maurīgā dipague ojocaricū iiriyarīgā dipague erāre muhta wahgāgūcumi oveja ĩhadibugū iiro dopa ta. Eropiḡu eropa mucubiricū ġūcumi erāre. Eropirā ũmarogue árīrā ne dipaturi oresome erā, arāmi Jesu yarā oparā mera majagu yure.

## 8

*Seis papera erā pihañarare pātuhaja gajīñere pāpehorū Cordero*

<sup>1</sup> Seis papera erā pihañarare pātuhagu dūharañere pātuhami Cordero. Īḡu eropa pātuhacū yuju hora deco ũmarogue ne ejarimaria wahabu. <sup>2</sup> Eropiḡu siete anyuare Goāmū pohro niguirāre ĩhabū. Eropiḡu erāre siete cornetarire ohami gajigu. <sup>3</sup> Gajigu anyu oropari incienso dicuburipari opadigu Goāmure umupeori mesa pohrogue eja, niguiami. Ero ġu niguicū baja inciensore ġure ohama. Árīpehrerā Goāmū yarā ġure erā serēra mera moreburi inciensore ohama. Eropiḡu oro mera iira mesague, Goāmū ġu doarō pohro árīri mesague iri incienso Goāmure soe mujuburi āhrabu. <sup>4</sup> Eropiḡu anyu ġu oparapari maja inciensore mesa weca pohsiri peo soeami. Īḡu eropa soera pūhrū iri incienso maja imica Goāmū yarā ġure erā serēra mera mūria wahabu Goāmū pohrogue. <sup>5</sup> Eropa wara pūhrū ġu anyu i mesa maja nitire iriparigue aī pohsātuhaja, yebague pohmehdijucāmi. Īḡu eropa pohmehdijucū miāmi. Turaro bupu paāmi. Eropiro gajiropa būsūmaa, yeba űohmemaabu.

*Cornetarire werepū űu*

<sup>6</sup> Pūhrū siete anyua yujurāyeri erā cornetarire purimorā iima.

<sup>7</sup> Yujugū anyu ġu yarure purimūhtami. Īḡu eropa puricū decoyeri yūsariyeri peame mera, di mera moreriyeri yebague yurimerejabū. Iriyeri yurimerejacū ta yeba ũjūa wahabu. Ipē ũjūabu: I yeba deco ejaboro pohro gohra ũjūa wahabu. Eropiro iripēta yucū sā taa yahsari sā ũjūa wahabu.

<sup>8</sup> Anyu yujugū ġu eropa purimūhtara pūhrū gajigu anyu ġu yaru cornetare puriami daja. Īḡu eropa puricū wūadigu utāgu iro dopa bejadigu ōaro ũjūniguidigu wūariyaguere mihrua dijabu. Eropiro yeba ũjūdiropē ta wūariya diya poya wahabu. <sup>9</sup> Eropirā wūariya majarā wai sā deco mera ejarā gohra yujupū majase majarā

sīria waháma. Eropiro iri núcũ gasi ta dohori gasi miria wahabũ wũariyaguere.

<sup>10</sup> Perã anyua erã purira pũhrũ gajigũ anyu sã ĩgũ yaru cornetare puriami daja. ĩgũ eropa puricũ wũadiru necãru, sihãdiru dopa ta bejadiru yebaguere yurimereja wahabũ. I yeba maja diarire mau diparire yujupũ majase yurimerejabũ necãru. <sup>11</sup> Eropiro iri núcũ mauri ta sũiriyari dujabũ. Eropa wacũ bajarã masa iri decore sũiri decore ihrinijarã sīria waháma. Iriru necãru sũidiru waĩcuabũ.

<sup>12</sup> Ūrerã anyua erã purira pũhrũ gajigũ anyu sã ĩgũ yaru cornetare puriami daja. ĩgũ eropa puricũ abe umũ majagũ, ñami majagũ sã deco erabonirã gohra poya waháma. Necã majarã sã deco erabonirã dipuru ta poya waháma. Eropiro umũgue wapicũri horari gohra abe ne boyobirami. Ñami sãre wapicũri horari gohra abe ñami majagũ, necã sã ne boyobirama.

<sup>13</sup> Pũhrũ ĩhamemujuabũ daja. Ūmarogue gaa wũwahgãgũre ĩhabũ. Eropigũ ĩgũ gaguinigicũ peeabũ. Ōpa arãmi ĩgũ:

—Ñetariaa. Ñetariaa. Ūrerã anyua purinibeama dohpa. Erã purira pũhrũ ñetariaro waroca. Eropa wacũ i yeba árĩrã ñetariaro warãcoma, arĩ dijuami ĩgũ.

## 9

<sup>1</sup> Pũhrũ wapicũrã anyua erã purira pũhrũ gajigũ anyu ĩgũ yaru cornetare puriami daja. ĩgũ eropa puricũ necãru iro dopa bejagũ árĩgũ anyu umarogue árĩdigũ yebague yuhridijaricũ ĩhabũ. Eropigũ ĩgũ peame gobe ũhcãri gobe maja sawire ohami gajigũ. <sup>2</sup> Eropigũ ĩgũ iri gobere pãgũcũ peame imica wiriabũ. Wũari peame imica iro dopa ta wũaro imica wiriabũ iri gobere. Eropiro iri imica mata abe umũ majagũre, umaro sãre dederea wacũ iabũ. <sup>3</sup> Eropirã iri imica pohecague árĩrã poreroa yebague wũdijarama. Eropirã coreba erã bũrigã pũriro dopa ta erã bũrigã pũriama. <sup>4</sup> Eropigũ taare, yucũre, gaji taare ñero iidorebirami erãre. Masa dihtare ñero iidoreami erãre. Goãmũ ĩgũ waĩ aĩturiñere erã diaporire tuhuya marirã dihtare ñero iidoreami erãre poreroare. <sup>5</sup> Eropa ñero iidorequeregũ ta erãre wejẽdorebirami. Erãre wejẽdorebiriquiregũ ta cinco aberi gohra masare bũrigã pũricũ iidoreami. Coreba toarã erã pũriro dopa ta pũricũ iirã àhrama poreroa sã.

<sup>6</sup> Irinũrire erãre erã pũriro iicũ masa sīridiarãcoma. Erã eropa sīridiaquerecũ ta erãre sīridoresome Goãmũ.

<sup>7</sup> Oã poreroapũ cabayua iro dopa dehyoama. Surara cabayuare erã come suhri cãhmotari suhri sãnirã dopa ta dehyoama erã poreroa. Erã dipu weca oparã erã peyari berori oro berori iro dopa peyãma. Erã diapori masa diapori iro dopa bejãma. <sup>8</sup> Erã poari nome poari iro dopa àhrabũ. Eropirã erã gũcũri yea gũcũri iro dopa àhrabũ. <sup>9</sup> Sīporã cãhmotari gasiro come gasiro iro dopa cãhmotama erã coretihbire. Eropiro erã wũcũ bajarã cabayua omarã erã omaro dopa erã wũuri dũpũri bũsuabũ. Cabayua tũruri gasire tararã erã gamewejẽrogue warã erã bũsuro dopa ta bũsuabũ poreroa wũuri dũpũri. <sup>10</sup> Eropirã coreba ĩgũ pĩgurucũro dopa ta toadiru ĩgũ oparo dopa ta àhrabũ erã poreroa. Eropirã erã pore mera masare cinco aberi gohra pũricũ

toáma. <sup>11</sup> Eropirã erã opu áhrami. Æhcãri gobe opu áhrami erã opu. Ígu anyu muru áhrami. Hebreo ya mera Abadón waicwami ígu. Griego ya mera Apolión waicwami. Apolión, mari ya mera arĩrã, “Ñero goroweogu” waicwami iimi.

<sup>12</sup> Poreroa masare erã ñero pūricū toara pūhrū i ñero erã tarimūhtadiro pehrea wahabū. Iri pūhrū pesubu ñero tarinirācoma daja masa.

<sup>13</sup> Pūhrū yuju mojótoçu majarã anyua erã purira pūhrū gajigū anyu ígu yaru cornetare puriami daja. Ígu eropa puricū Goāmū core niguiiri mesague oro mera iira mesague wereniguiiri busuro carabū. Iri mesa maja sari wapicuri sarogue wereniguiiri busuro carabū. <sup>14</sup> Eropa wereniguiiro cornetare purigūre anyure ōpa wereniguiiri mera busuro carabū:

—Wuariyague Eufrate waicuriyague peresu árīnirāre anyuare wiuque. Erã wapicurā anyua áhrima, arīro carabū.

<sup>15</sup> Eroparicū peegu anyupu erāre wapicurāre wiuami bajarā masare wejēmorāre. I bojorire, inure, i horare queoro corerā iama erã wiu-morā wapicurā anyua. Erã corediro sihajaa. Eropirā wejēnugagārĩrā iama. Árīpehrerā deco mera erabonirāre masare wejēmorā áhrama. <sup>16</sup> Eropigū erã anyua yarā surara, “Oā nūçu áhrima,” erã aricū peeabū. Erã cabayua weca peyarā áhrama. Doscientos millones surara áhrama.

<sup>17</sup> Eropigū cabayua erã weca peyarā yū ĩanirā ōpa dehyoama. Erã sīporārire cāhmotari suhri come suhri diari suhri, yahsari suhri, boreri suhri suhricwama. Eropirā cabayuapu erã dipu yea diarā iro dopa dehyoama. Erã disirogue peame, imica, azufre ūjuri imica sã wiriabū. <sup>18</sup> Eropiro cabayua disiro wiriri mera masare wejēabū. Árīpehrerā masa deco erabonirāre masa bajarāre wejēama. Eropirā peame mera imica mera, azufre ūjuri imica mera bajarā masare wejēama. <sup>19</sup> Erã cabayua erã disiro wiriri mera wejēama. Eropirā erã pore mera sã wejēama daja. Erã pore ojogorogue añaa dipu dopa bejabū. Eropirā iri pore mera camicucū iama erã masare.

<sup>20</sup> Bajarā masa erã wejē duhanirāpū erã mera majarāre wejēcū ĩaquererā erã ñeri iirare ne duhubirama. Watēare umupeo duhubirama. Erã goāmarā wéanirāre umupeo duhubirama. Erã wéanirāpū oro mera, plata mera, bronce mera, utā mera, yucu mera erã wéanirā áhrama. Erã wéanirā ojocaribirama. Peebirama. Nohmebirama. Erã eropa árīquerecū ta erāre masa umupeoama. <sup>21</sup> Eropirā erã wejē duhanirā gajī ñeri sãre ne bujawerebirama. Masare erã wejērare, erã nome mera erã ñero iirare, erã yajara sãre ne bujawere duhubirama erã.

## 10

*Miri tūrugāre papera tūrugāre aīgārīmi anyu*

<sup>1</sup> Pūhrū gajigū turagū anyu ūmarogue dijaricū ĩhabū. Imica curu watope áhrami. Eropigū buibuguda ígu dipuru weca peyabū. Ígu diapo ūmū majagū abe iro dopa goesiriabū. Ígu ñigari peame iro dopa goseabū. <sup>2</sup> Eropigū miri tūrugāre papera tūrugāre ígu pāra tūrugāre opāmi ígu. Ígu guburu diayerū maja guburu mera

wɔariyague cɔhɔrapi niguiami. Īgu guburu copu maja guburupu yebague cɔhɔrapi niguiami. <sup>3</sup> Eropa niguigu yeea erā gaguiniguiro dopa ta Īgu turaro gaguiniguiami. Īgu eropa gaguiniguiro pɔhrɔ siete bupua wereniguirā carirama. <sup>4</sup> Erā eropa wereniguicū peegu gojanɔgarabu yuɔhɔ. Yu eropa gojanɔgacū ta ɔmarogue yure wereniguiro carabu.

—Siete bupua erā arĩrare gajĩrāre werebita. Eropigu irire goja aĩbita, arĩro carabu yure.

<sup>5</sup> Īgu eropa arĩra pɔhrɔ wɔariyague niguidigu, yeba niguidigu anyu Īgu mojoto diayeru mera sĩme mujuami ɔmarogue. <sup>6</sup> Eropa sĩme mujugu Goãmu eropa ojocarinigugu waĩ mera waĩpeoami. Īgu Goãmuru arĩpehɔrere, ɔmusire, ɔmusi majarāre, i yebare, i yeba arĩrāre, paɔayarire, paɔayari majarāre iigu aħrimi. Eropigu opa arāmi anyu:

—Goãmu mera diaye arĩgu iiaa. Iripeta corerāra. <sup>7</sup> Seis anyua erā corneta dipurure erā purira pɔhrɔ gajigu anyu Īgu puritucū Goãmu iribojegue Īgu “Opa iigura,” Īgu arĩdiro dopa ta iigucumi. Iribojegue masare irire oaro werebiripu. Pɔhrɔ Īgu pohro majarāre, Īgu yare weremɔhtarāre oaro werepehɔpu Īgu. Iri Īgu werepirare dohpaguere iigucumi, arāmi anyu.

<sup>8</sup> Īgu eropa arĩra pɔhrɔ ɔmarogue yure wereniguidiro dopa ta dipaturi werenigugu carami daja. Opa arĩgu carami yure:

—Wɔariyague niguigu yebague niguigu sihi anyu pohrogue waque. Eropa wagu papera tũrugāre Īgu opari tũrugāre aĩque, arĩgu carami yure. <sup>9</sup> Īgu eroparicū peegu anyu pohrogue wahabu. Īgure papera tũrugāre yu serēcū peegu opa arĩ yuħriami yure:

—Aĩque. Eropigu i papera tũrugāre baque muɔhɔ. Mu ne bacū mome iro dopa oaro imisiroca. Mu parogue mu acura pɔhrɔ sũia waroca, arāmi yure.

<sup>10</sup> Īgu eroparicū peegu iri tũrugāre anyure yu aĩra pɔhrɔ bahabu. Yu ne bacū mome iro dopa imisiabu. Yu ba acura pɔhrɔ yu parogue sũiro carabu yure. <sup>11</sup> Yu eropa bara pɔhrɔ opa arāmi yure:

—Dipaturi bajarā masare, macari majarāre, yebari majarāre, baja disirori wereniguirāre, erā tauro oparā sare pɔhrɔ erā dohpa waborore wereyumuħtaque, arāmi yure.

## 11

*Perā Goãmu yare weremorāre were gojapu Ńu marire*

<sup>1</sup> Pɔhrɔ yure queodigure odoreami Goãmu. Tuadigupē yoadigu aħrabu irigu. Irigure odoregu opa arāmi yure:

—Yaha wihire queogu waque. Iri wihi majañe yure umupeori mesa sare queoque. Eropigu iri wihiguere masare yure umupeorā sare queoque. <sup>2</sup> Disiporo wirinɔgaropare queobita. Iripu yure gamebirā erā cɔhɔrapirapu aħraa. Erā cuarenta y dos aberi gohra Goãmu ya macare iri maca majarā sare ñero iirācoma. Eropigu queobita iripure. <sup>3</sup> Eropigu yahare wererāre perāre obeogura. Mil doscientos sesenta nuri gohra yahare wererācoma. Co suhri sañanirā arĩrācoma erā yu weredorenirā, arĩ wereami yure.

<sup>4</sup> —I yeba majarā tauro opu pohro pegu olivo waicuri yucu niguia. Pegu siħagori yucu sã iri yucu pohro niguia. Iri yucu oã perā yahare



weremorā iro dopa āhraa, arī wereami daja yare. <sup>5</sup> Eropirā erāre īhaturirā erāre erā ñero iidiacū erā disirogue pea porā wirimaaro soe wejēpehocāroca erāre īhaturirāre. Eropa ta erāre ñero iirāre wejērācoma erā perā. <sup>6</sup> Eropiro erā perā erā deco aridorebircū deco arisome. Eropiro yahare erā wereropē deco arisome. Eropirā maurire diyari poyacū iirācoma erā. Eropirā i yebare ñero wacū iirācoma erā. Árīpehreri dohpa árīrore, dohpa árīrāre, masare ñero wacū iirācoma erā. Erā noho gamero iidiaropē eropa ñero wacū iirācoma i yebare.

<sup>7</sup> Erā Goāmū yare weretuhajacū ũhcāri gobegue árīgu ñegu nuḡu majagu wirigucumi. Eropigu Goāmū yare wererā erā perā mera gamequeāḡucumi. Eropa gamequeāḡu turatarinugagu erāre wejēcāḡucumi. <sup>8</sup> Īgu eropa wejēra pūhrū erā ya dūpuri mura wūari maca maja mague oyaroca. Mari Opure Jesucristore erā pabia wejēra maca āhraa iri maca. Iri maca majarā ñerā árīrā, Sodoma majarā mura, Egipto majarā mura iro dopa āhrama. <sup>9</sup> Erā dūpuri mura oyaro ũhrenū ōaro oya, gajinū deco erā ya dūpuri mura iri mare oyaroca. Eropirā árīpehreri yeba majarā yujurāyeri, árīpehreri cururi majarā yujurāyeri, árīpehrerā yare wereniguirā yujurāyeri iri nūcu nūri gohra erā ya dūpuri murare iarācoma. Eropirā iri nūcu nūri gohra erāre yaadoresome. <sup>10</sup> Erā perā Goāmū yare weremūhtanirā i yeba majarāre erā ñero iira dipuwaja moanirā árīrācoma. Eropirā erā eropa sīrinirā árīcū iarā árīpehrero majarā mucubirirācoma. Eropa mucubirirā bosenu ii, erā basi gajinore eropa ocārācoma.

<sup>11</sup> Erā eropa iiquerēcū ũhrenū pūhrū gajinū deco gohra Goāmū erāre masugucumi daja. Īgu eropa masucū erā dipaturi wahḡānugajarācoma. Erā eropa wahḡānugajacū iarā árīpehrerā burigā güirācoma erāre. <sup>12</sup> Pūhrū ũmarogue burigā erāre perāre wereniguicū peerācoma masa. Ōpa arīri busuroca erāre:

—Ōgue muririque maa, arīri busuroca.

Erāre eropa arī wereniguirire busucū peerā imica cururi watope mūria warācoma. Erāre doonirā mura erā mūriacū iarācoma. <sup>13</sup> Erā eropa mūriarisubu yeba turaro ñohmeroca. Eropa ñohmecū ta iri maca maja wiri baja wiri mihrua dija waroca. Eropirā yeba ñohmero mera siete mil masa sīria warācoma. Gajirā dūhyarāpū ũca wa, Goāmure ũmaro majagure “Turagu āhrimi,” arī umupeorācoma pare īḡure.

<sup>14</sup> I árīpehreri eropa wara pūhrū pesubu masa erā ñero tarituhajanirā árīrācoma. Eropa tarira pūhrūgā ta dipaturi masa mata daja ñero tarirācoma.

*Seis corneta dipurure erā purira pūhrū gajigu puripū*

<sup>15</sup> Pūhrū seis corneta dipurure erā purira pūhrū gajigu anyu Īgu yarure puriami. Īgu eropa puricū ũmarogue turaro wereniguiro carabū. Ōpa arīro carabū:

Dohpague mari Pagū, Cristo mera i yeba majarā tauro opū árīḡucumi. Eropigu eropa opū árīniguigucumi Goāmū, arīro carabū.

<sup>16</sup> Eropirā Goāmū core oparā doarigue doarā veinticuatro Jesu yarā oparā Goāmū core mereja, īḡure umupeoama. <sup>17</sup> Eropa umupeorā ōpa arāma:

Gua opa Goamu, turatariagu ahraa mahu. Mahu negohraguere eropa arimariyoro. Eropigu dohpague sare eropa ariniguia. Puhruague ariguca mahu. Ma turari mera masa era opa ma arinugacu, "Ohaa," araa gua mre. <sup>18</sup> Aripehrera i yeba majara mre gamebira ma mera guarima. Dohpaguere erare ma dipuwaja moaburibusu ahraa. Sirinira sare ma dipuwaja moaburibusu ahraa. Eropiro ma yarapure oarire era iira wajare ma oburinosubu ahraa. Yujurayeri era ma yare weremantaniara arima. Eropira era gajira ma yara mera aripehrera mre oaro umupeonira arima. Eropigu oparare, bu arira sare ma yara era aricu iha oaro iguca mahu erare. Eropiro i yeba majare goroweocerare ma coaburibusuno ariro iiaa dohpaguere, ari umupeoama Jesu yara opara Goamre.

<sup>19</sup> Era eropa ari umupeora puhru umaro maja wihi Goamu ya wihi igu pagura wihi ihabu. Eropira iri wihi ariri comorore ihabu gua. Iri comoro pohcague Goamu "Masare itamugura," igu ari werepirapu sahabu. Gua eropa iacu ta miamaa, bupu paamaa, gajiropa busumaa, i yeba nohmemaahababu. Deco yasariyeri deco buriga umarogue dijaribu.

## 12

### *Nomeore, piru sare werepu Nu*

<sup>1</sup> Puhru i yeba dohpa waborore umarogue dehyoabu yare. Eropa dehyoari guhyadiaro maja ahraabu. Opa iamuhatabu: Umarogue nomeore ihabu. Igo suhriro abe umu majagu iro dopa gosesiriabu. Eropigo abe nami majagu weca niguiamo. Opu igu peyarino berore doce neca opari berore peyadigo niguiamo. <sup>2</sup> Eropiro igo poracuboro meroga duhyabu. Eropigo igo niji wahguigo puriro mera gaguiniguiamo. <sup>3</sup> Puhru dipaturi ihabu daja umarogue: Wuagu pirure diagure ihabu. Siete dipu dipucugu ahrami. Aripehreri igu dipu opara era peyarino berorire peyara dipu dihta ahraabu. Eropigu diez cusaricugu ahrami igu. <sup>4</sup> Igu piguru mera neca dipurure wejesiri medijuami. Aripehrera necare deco gohra wejesiri medijuami. Eropigu nomeo poracugo pohro niguiami piru. Igo maguga dehyoacu babu iirami. <sup>5</sup> Meroga puhrugā ta masa dehyoatuhami majiguga. Aripehreri yeba majara opa aribu ahrami iguga. Igu eropa opa turagu aricu masa igure tarinugarā yujuro bojesome. Igu eropa masa dehyoacu ta Goamu igu doaro pohrogu igugare aibeocami. <sup>6</sup> Igu eropa iicu nomeopu masa marirogu pirure duhriga wahamo. Goamu igu amuyudirogu duhriga wahamo igo. Eroguere mil doscientos sesenta nuri gohra Goamu igore ihadibumi.

<sup>7</sup> Eropira umarogue gamewejenugama. Migue waicugu anyu igu yara anyua sa piru mera gamequeama. Era eropa gamequeacu piru igu yara anyua mera Miguere gamequeami. <sup>8</sup> Eropira Migue sa pirure tarinugama. Eropigu pirure igu yare anyuare umaroguere arinomodorebirami. <sup>9</sup> Eropigu wuagu pirure cocami Goamu. Igu piru wati ta arigu iiami. Satana waicugu ahrimi. Iribojeguere igu piru dupu dopa deyogu arifumi. Eropigu aripehreri yeba majare

guyagu āhrimi. Goāmū ĩgure cóāgu ĩgu yarā anyua mera yebague cohā dijuami.

<sup>10</sup> Pūhrū ʔmarogue turaro wereniguicū peeabū:

—Dohpaguere mari Pagū masare taumi pare. Dohpague tamerare mari Pagū mari Opū árĭgu āhrimi ĩgu turarire ĩhmubu. Eropĭgu ĩgu obeodigu Cristo sã ĩgu opu árĭrĭre ĩgu turarire ĩhmumi árĭpehrerãre. Watĭre ʔmarogue árĭdigure cohā dijuami i yebague. Eropĭgu ĩgu turarire ĩhmumi mari Pagū. ĩgu watĭpū ʔmuri nucu, ñamiri nucu Jesu yarãre, “Oã ñerã āhrima,” arĭ weresãgu iimi mari Pagure. Eropĭgu mari acawererãre Jesu yarãre weresãgu árĭmi. <sup>11</sup> Cristo Cordero waĭcugu ĩgu di cóaro mera mari acawererã ĩgure umupeorã erã ñeri iirare cóãsünirã árĭma. Eropa árĭrã watĭre tarinugãma. Eropirã õari buherire wererã, watĭre tarinugãma. ĩgu yare werera dipuwaja gajirã erãre wejediaquerecū ta, Cristo yare duhubirã árĭrã ĩgure tarinugãma. <sup>12</sup> Eropirã mũa ʔmaro majarã mucubirique. Watĭre ĩgu yebague cohā dijucū ĩarã mucubirique. Mũa yeba majarãpū, wũariya majarã sãmojomorocurã warãca mũa. Mũa pohrogue dijami watĭ. ĩgure dipuwaja moaboro merogã duhyaa. Eropĭgu guataricãmi ĩgu. Mũa pohrogue ĩgu ejacūmojomorocuro ducacū iigucumi ĩgu mũare, arĭ gaguiniguero caricū peeabū.

<sup>13</sup> Eropĭgu pĭrupū cohā dijudigu nomeore, majigugã pagore nũrasia wahgãmi. <sup>14</sup> Eropĭgu Goãmū gaa wuagu quẽ dũpũre ohami igore masa marirogue igo wũũ duhri wahgãboro dopa. Erogu igo ejara pũhrũ ʔhre bojori õaro gaji bojori deco gohra õaro ĩhadibuami Goãmũ igore. ĩgu eropa ĩhadibucū pĭru igore ñero iimasibirami. <sup>15</sup> Ero igo árĭcū ĩagu pĭru igore miudiagu wũaro decore etocabeocãmi. <sup>16</sup> ĩgu eropa iiquerecū yebapū igore itamuabū. Pĭru ĩgu disiro wiriri decore yebapū yehrimaa wa uju aĩbeocãbū. <sup>17-18</sup> Eropa wacū ĩagu pĭru guatariami. Eropa guagu yujurãyeri igo pãramerã árĭturiarã mera gamewejẽgu wahãmi. Erãpū Goãmũ dorerire iirã āhrama. Jesu yare õari buherire ne duhubirã āhrama. Erã mera gamewejẽgu wahãmi. Eropĭgu pĭru wũariya tãro pohro niguiami.

## 13

### *Perã nuĝu majarãre werepũ Ñu*

<sup>1</sup> Wũariya tãro niguiĝu, nuĝu majagu iriya árĭgure ĩgu wahgãpacū ĩhabū. ĩgu siete dipu, diez gohra cusaricugū āhrami. ĩgu cusari oparã erã peyarino berori peyãmi. Eropiro ĩgu dipure ĩgu waĩre ĩgu gojatura āhrabū. ĩgu waĩ iri ñeri waĩ árĭro Goãmũre ĩhaturiri waĩ āhrabū. <sup>2</sup> Eropĭgu ĩgu nuĝu majagu yee dorogu guagu iro dopa bejãmi. Eropĭgu bugu iro dopa guburicugū āhrami. Eropĭgu yee wũaguro iro dopa disirocugū āhrami. Eropĭgu pĭrupū ĩgu turarire ohami nuĝu majagure. Eropa ogū ĩgure ĩgu opu doarõ apĭgu ĩgu iro dopa ta masa bajarãre dorecū iiami pĭru nuĝu majagure. <sup>3</sup> ĩgu nuĝu majagu dipuru yuju dipuru camirocũri dipuru dopa bejabū. Iri camiro ĩgure wejẽbocurira camiro árĭquerero yarira camiro āhrabū. Iri dipuru ojocaricū ĩarã, ʔca wahãma i yeba majarã árĭpehrerã. Eropa ĩha ʔcarã, nuĝu majagure “Turagu āhrimi,” arĭ umupeoama. Eropirã ĩgu yarã wahãma masa. <sup>4</sup> Eropirã nuĝu majagure pĭru ĩgu turarire ocū

Īarā masapu ģure pīrure mereja umupeoama. Eropirā nuḡu majagu sāre mereja ģure umupeoama. Eropa umupeorā ōpa arāma:

—Ne gajigu ma iro dopa turagu marimi. Gajigu mure ne tarinugamasibeami, arī umupeoama masa nuḡu majagure.

<sup>5</sup> Eropigu ģu nuḡu majagu “Turatoriagu āhrimi,” erā ģure arīquerecū ta, ģu Goāmure ņero wereniguiquerecū ta eropa pepicāniami Goāmuru. Eropigu cuarenta y dos aberi gohra ģu nuḡu majagu masare dorenigucumi. Iripēta ģu opu ārīcū gahmemi Goāmuru.

<sup>6</sup> Eropigu Goāmure ņero wereniguiami ģu. Ģu waire, ģu wihire, umarogue ģu ārīro, ģu pohro majarā sāre ņero wereniguiami nuḡu majagu. <sup>7</sup> Eropigu Goāmuru yarāre gamewejēgu erāre tarinugāmi. Ģu eropa tarinugaquerecū ta eropa ĩacāniami Goāmuru. Goāmuru ģu eropa iidorebiricūre iisome ģu. Eropigu ārīpehrerā i yeba majarā tauro opu ārīnirami nuḡu majagu. Árīpehreri cururi majarā, ārīpehreri yebari majarā tauro, ārīpehreri macari majarā tauro, ārīpehrerā yare wereniguirā tauro opu ārīnirami ģu. <sup>8</sup> Eropirā ārīpehrerā i yeba majarā ģu nuḡu majagu pohro mereja ģure umupeorācoma Goāmuru yarā ārībirāpu. I yebare Goāmuru ģu ĩhacūnuguboro core ģu yarā ārīmorāre ģu mera ārīniguiamorāre erā waire gojatutuhañumi. Iripū ģu eropa gojaturapū Cordero erā wejēdigu yapū āhraa. Iripū erā waire gojatubirā dihta Goāmuru yarā ārībirā nuḡu majagure umupeorācoma.

<sup>9</sup> Gamiricurā āhraa ma. Eropirā peeque ma Jesu yarā ārīrā. <sup>10</sup> Árīpehrerā mure peresu iinirāre erā sāre peresu iigucumi puhrū. Árīpehrerā masare ņose wejēnirāre erā sāre ņose wejēgucumi puhrū. Irīre masirā mari Goāmuru yarā ņero tariquererā ta ģure cóābiricārā. Eropirā yujuro boje ģure guñaturarā.

<sup>11</sup> Puhrū gajigu nuḡu majagure ĩhabu daja. Yeba pohecague ģu árīdigu ģu wiriricū ĩhabu. Pegasus oveja cusaro iro dopa bejari cusaro cusarocagu āhrami. Eropa arīqueregu pīru iro dopa wereniguiami. <sup>12</sup> Eropigu nuḡu majagu árīmuhtadiguru puhrū árīdigure opu acuami. Ģu eropa opu acuguru árīpehreri yeba majarāre árīmuhtadire umupeodreami. Árīmuhtadi nuḡu majagu erā wejēbocuridi camiro yaridigu āhrami. <sup>13</sup> Eropigu puhrū árīdigu deyro moarīre ii ĩhmuami masa erā ĩha ucaboro dopa. Eropa iigu masa erā ĩaro peame wuari peame umarogue dijaricū iiami. <sup>14</sup> Eropigu árīmuhtadigu ģu ĩhuro gajigu nuḡu majaguru deyro moari mera masare guyāmi, “Īhī ma umupeobu āhrimi,” arīgu. Eropigu ģu gajigu nuḡu majagu árīmuhtadigure wéadoreami masare. Ģu árīmuhtadigu ņoserimiji mera erā ņosedigu arīqueregu ta ojocarīgu āhrami. Ģu iro dopa bejagure ta wéadoreami gajigu nuḡu majagu masare. Erā eropa ĩcū ĩagu Goāmuru dooqueregu ta eropa ĩacāniami. <sup>15</sup> Eropigu puhrū árīdigu nuḡu majaguru árīmuhtadire wéadigure ojocaricū iiami masare ģu doreboro dopa. Eropigu wéadiguru erā ģure umupeobirāre wejēdoreami. <sup>16</sup> Eropigu ārīpehrerāre erā mojotori diayepu sāre ģu waire gojatudoreami nuḡu majagu puhrū árīdigu. Erā mojotorire gojatubirīnirāre erā diaporire gojatudoreami ģu waire. Bu ārīrāre, oparāre, doberi oparāre, mojomorocurāre, erā pohro majarāre, erā pohro majarā árībirāre, árīpehrerāre ģu waire

gojatudoreami. <sup>17</sup> Īḡu árĩmuhtadigũ nuḡu majagu Īḡu waĩre, Īḡu numero gojatubirãre ne asũdorebirami. Eropigũ erãre duadorebirami.

<sup>18</sup> Irire õaro masique mũa. Pee masirã árĩrã nuḡu majagu Īḡu numero õaro ĩha masique. Iri numero ũama waĩ iro dopa ãhraa. Iri numero seiscientos sesenta y seis gohra ãhraa.

## 14

### *Goãmu ĩḡu taunirã mama bayariñere bayañorã*

<sup>1</sup> Pũhrũ Siõn waĩcũdigũ utãḡu weca niguigũre Corderore ĩhabũ. Īḡu mera ciento cuarenta y cuatro mil masa ãhrama. Erã Īḡu ya waĩre ĩḡu Pagũ ya waĩ sãre erã diaporire erã gojatunirã ãhrama.

<sup>2</sup> Erãre yũ ĩacũ ta ũamarogue busũro carabũ. Wũari utãmu busũro dopa ta, bupu ĩḡu wũaro busũro dopa ta busũro carabũ. Eropigũ arpa waĩcũrĩre erã buamutẽro dopa ta busũro carabũ.

<sup>3</sup> Erã ciento cuarenta y cuatro mil masa bayarã ãhrama. Ero opu ĩḡu doaro pohro wapicũrã gajiropa bejarã, Jesu yarã oparã sã core bayarã ãhrama erã. Erã bayarĩfe mama bayarĩfe ãhrabũ. Iri bayarire erã dihta masiama. Cristo ĩḡu taunirã dihta iri bayarire masiama. Erã i yeba árĩnirã mũa ĩḡu aĩ mujunirã ãhrama.

<sup>4</sup> “Ne ñerire iisome,” arĩnirã ñerire iibirinirã ãhrama. Ne erã yujusubugã nome mera ñero iibirinirã ãhrama. Eropirã Corderore ĩhacũnirã árĩrã, ĩḡu yare eropa iiniguimũrama. Eropigũ erãre ñerã watope árĩnirãre ĩḡu taumorãre aĩami Goãmũpũ. Eropa ĩḡu taunirã árĩrã, Goãmũ yarã árĩmorã, Cordero yarã sã árĩmuhtanirã ãhrama. <sup>5</sup> Eropirã erã mera majarã ne yujugũ ḡuyagũ marami. Eropirã Goãmũ ĩḡu pepicũ ñeri iira dipuwaja marirã ãhrama erã.

### *Hrerã anyua weremedijuñorã*

<sup>6</sup> Pũhrũ ũamarogue wũũḡure anyure ĩhabũ. Īḡu i yeba majarãre árĩpehreri cururi majarãre, árĩpehrerã yare wereniguirãre, árĩpehreri yebari majarãre õari buherire werebu ãhrami. Iri buheri ne gohrotobea. Eropa árĩniguicãa. <sup>7</sup> Eropigũ anyu gaguinigũ õpa arĩ medijuami:

—Goãmũre ḡũique. “Turatariagũ, õatariagũ ãhrimi,” arĩ umupeoque ĩḡure. Dohpaguere masare ĩḡu dipuwaja moaburĩsubu árĩro ĩaa. Īḡu ũaũsire, yebare, pagayarire, mutayarigã sãre iidigũ ãhrimi. Eropirã ĩḡure mereja umupeoque, arĩ gaguinigũ dijuami anyu.

<sup>8</sup> Īḡu eropa arĩra pũhrũ gajigũ anyu ũamaro wũũḡu õpa arĩ medijuami:

—Erãre cóãcãmi. Wũari maca Babilonia waĩcũri maca majarãre cóãcãmi Goãmũ. Erã ĩḡu cóãnirãpũ árĩpehrerã gajirãre ñero iicũ iima. Masa erãre ĩhacũrã, ñerire ũaribejarã, goãmarã wéanirãre umupeoma. Merericũrã vinore erã turaro ũaribejaro dopa ta erã ñerire turaro ũaribejama Babilonia majarãre ĩhacũrã, arĩ were medijuami gajigũ anyu.

<sup>9-10</sup> Erã perã anyua eropa arĩra pũhrũ gajigũ anyu erã pũhrũ wũũḡu gaguinigũ õpa arĩ medijuami ĩḡu sã:

—Árĩpehrerã nuḡu majagũre umupeorãre, ĩḡure wéadigũre umupeorãre erã diaporire, erã mojotorire ĩḡu waĩre gojatunirãre

dipuwaja moagucumi Goāmũ. Erã mera guagu erã tamerare turaro dipuwaja moagucumi Goāmũ. Eropigu Goāmũ erãre buriã dipuwaja moaniguicumi cãdijiro mariro. Nugu majagure umupeorã áripehrerã peamegue warãcoma. Eroge buriã pũiroca erãre. Azufre waĩcũri mera erã dihura peame áriroca. Goãmũ yarã anyua, Cordero sã erã ihuro ñero tarirãcoma erã. <sup>11</sup> Iri peame eropa imicacũniguicãroca. Ne yarisome. Erãre eropa pũriniguicũ iiroca. Áripehrerã nugu majagure mereja umupeorãre eropa pũriniguicãroca. Umũri sãre, ñamiri sãre eropa pũriniguicãroca sooro mariro erãre. Igu nugu majagure igu wéadigure umupeorã, igu waĩre erã gojatu-nirã sã, eropa ta ñero tarirãcoma, arĩ medijuami anyu.

<sup>12</sup> Eropigu õpa arĩ werea mũare ire: Mũa erã eropa ñero tariborore masirã, Goãmũ yarã igu dorerire iirã, Jesure cóãbirã áriãrã, igu yare duhubiricãque. Ñero tarirã áriquererã ta Goãmũ yare duhubiricãque, arãa yũhũ mũare.

<sup>13</sup> Pũhrũ umarogue yare wereniguio caracã peeabu daja. Õpa arãmi yũre:

—Ire gojaque mũhũ. Goãmũ yarã igure cóãbirã árinirã dohpaguere mũa sĩrira pũhrũ sãre õaro mucubirirã áriãrãca mũa, arĩ medijugu carami yũre. Igu eropa arĩra pũhrũ Espiritu Santopũ õpa arĩnemoami daja:

—Eropa ta ãhraa. Diaye ta ãhraa. Erã turaro erã mohmerire duhpiicã soorãcoma. Umarogue erã wacũ õaro erã iirare guãagucumi Goãmũ. Eropigu erãre õaro iigucumi. Eropirã erã mucubirirã áriãrãcoma, arĩnemoami Espiritu Santo.

*Pohe maja oteri dũcare mari beye aĩro dopa ta Goãmũ igu yarãre beye aĩgucumi. Ñerãpũre boje beye dobogucumi, arĩ gojaũmi Ñu*

<sup>14</sup> Pũhrũ imica curu boreri curure ihabũ. Iri curu weca masũ dopa bejagu doami. Igu oro bero opa igu peyarino berore peyami. Eropigu matamiji usiri mijire opami igu. <sup>15</sup> Pũhrũ gajigu anyu Goãmũ wihigue áridigu wirirami. Eropa wiririgu turaro gaguiniami imica curu weca doagure:

—Mũhũ matamiji mera pohe maja dũcare i yeba maja dũcare tabe aĩpehocãque. Dohpaguere mũ queodiro ejaa. Dũca boretuhabũ, arãmi anyu.

<sup>16</sup> Igu eroparicũ peegu igu matamiji mera i yebare tãranugami igu imica curu weca doagu. Eropa tãranugagu i yeba maja dũcare aĩro dopa iiami.

<sup>17</sup> Pũhrũ gajigu anyu sã Goãmũ wihigue áridigu wirirami. Igu sã matamiji usirimijire opami. <sup>18</sup> Eropigu gajigu anyu Goãmũre umupeori mesa pohroge áridigu wirirami. Iguũpũ mesa maja peamere ihadibugũ ãhrami. Eropa wiririgu matamiji usirimiji opagure gaguiniguiami:

—Mũhũ matamiji mera i yeba áriãrã pohere, igui pohe maja dũcare aĩque. Iguipũ ñiituhabũ, arĩ gaguiniguiami.

<sup>19</sup> Igu eroparicũ peegu anyu igu matamiji mera i yebare tãragu, iguitõrre wĩrita aĩami. Igu eropa iira pũhrũ iritõrre iguitõrre igu ñatĩarogue cóhãmi. Igu eropa ñatĩaro dopa ta Goãmũ igure

gamebirāre turaro guagu, dipuwaja moagucumi. <sup>20</sup> Iri maca turo pohro erā ñatīaro iri iguitōrire ñatīama. Ero erā ñatīacū igui deco wiriro dopa di wiriabu. Trescientos kilómetros yoariya, yuju metro ōaro gaji metro deco ūhcāriya āhrabu di mera. Irire ūha masiabu. Yujunū anyu Goāmure gamebirāre ñerire iinirāre gameneo erā ñeri iira dipuwaja moagucumi. Īgu eropiicū masa bajarā sīrirācoma. Eropa sīrirā di pagari cóārācoma, arī masiabu yuhu.

## 15

### *Masa erā ñero tariborore anyua apituñorā masare*

<sup>1</sup> Puhru umarogue gajiropa árīrore ūhabu. Guhyadiaro árīro i yebague dohpa waborore ūhmuriñe āhrabu. Ōpa ūhabu: Siete anyua āhrama. Goāmū guagu siete suburi masare dipuwaja moatubu iiami. Eropirā erā siete anyuapū dipuwaja moadore Īgu apimorā āhrama.

<sup>2</sup> Anyuare yū ūara puhru wuariyare ōaro deco suririya dopa árīriyare ūhabu. Iriya peame mera árīriya āhrabu. Eropigu iriya pohro niguirāre nuḡu majagure ĩgure wéadigu sāre tarinūganirāre ūhabu. Erā nuḡu majagu numerore ĩgu ya waī maja numerore gojatudorebirinirā āhrama. Ero niguirā arpa waicuri buamutērire opāma. Iri buamutēri Goāmū ĩgu ora āhrabu. <sup>3</sup> Eropirā Goāmū pohro majagu Moise ya bayarire bajarā iama. Cordero ya bayariñe sāre bajarā iama. Ōpa arī bayāma:

Gua opu mūhu Goāmū turatariagu āhraa. Mū iirare ūarā ūha ūca wahaa gua. Mū iira ōataria. Mūhu árīpehreri yeba majarā tauro opu āhraa. Ōaro ḡyaro mariro diaye iiaa mūhu.

<sup>4</sup> Árīpehrerā mure ḡūima. Árīpehrerā mure “Turagu āhrimi,” arīrācoma. Mū dihta ñeri marigu āhraa. Árīpehrerā i yeba majarā mū pohrogue ejarā mereja mure umupeorācoma. Eropa ta iirācoma erā árīpehrerā ōaro mū iirare ūarā, arī bajarā iama erā.

<sup>5</sup> Puhru umarogue ūhamemujugu, Goāmū ya wihire pāḡūra wihire ūhabu. Iri wihigue Goāmū ĩgu doreri ĩgu gojara mijiri ūtā mijiri erā dibura mijiri āhrabu. <sup>6</sup> Iri wihire yū ūacū ta siete anyua iri wihi pohecague árīnirā wirirama. Erā Goāmū ĩgu dipuwaja moadoreḡu ĩgu apimorā āhrama. Erā nuḡu erā dipuwaja moaburire opāma erā anyua. Ōari suhri, boreri suhricurā āhrama. Eropiro erā coretihi weca oro gasiro mera tuādīunirā āhrama. <sup>7</sup> Iri wihigue árīnirā erā wiriricū wapicurā gajiropa bejarā mera majagu erāre siete anyuare oroparire ohami. Iripari Goāmū gua ĩgu dipuwaja moadoreburi mera ōaro ūjuturiabu iripari. Īgu Goāmū eropa árīniguigu āhrimi. <sup>8</sup> Īgu iriparire erāre ocū ta Goāmū wihi pohecague ĩgu gosesiriri mera ĩgu turari mera imicacu sehya wahaabu. Iri wihi eropa imicacu sehya wacū iri wihire ne yujugu ñaja masiya marabu. Siete anyua Goāmū dipuwaja moadoreḡu ĩgu apidiro dopa ta erā masare dipuwaja moatura puhru dipaturi iri wihigue ñajamasirācoma daja. Īgu dipuwaja moaboro core ñaja masiya mara. apidiro dopa ta erā masare dipuwaja moatura puhru dipaturi iri wihigue ñajamasirācoma daja. Īgu dipuwaja moaboro core ñaja masiya mara.

## 16

*Goām̄ masare ĩḡu dipuwaja moaborore werep̄u*

<sup>1</sup> P̄hr̄u Goām̄ wihigue turaro wereniguiro carab̄u. Siete anyuare wereḡu iḡu carami:

—Goām̄ ĩḡure tarinuganirā mera guami. Eropirā ĩḡu dipuwaja moadorerare iḡue. Eropirā dohpaguere siete pari dic̄urire yebague pisiri medijurā waque i yeba majarāre, arī wereniguiḡu carami.

<sup>2</sup> Eroparīc̄ū peeḡu árĩm̄htadiḡu anyu ĩḡu oparipa dic̄urire yebague pisiri medijuami. ĩḡu eropa pisiri medijuc̄ū n̄ḡu majaḡu waĩre gojatunirā ĩḡure wéadiḡure umupeonirā ñero camic̄uama. Iri cami turaro p̄uriyoro erāre.

<sup>3</sup> ĩḡu eropa pisirira p̄hr̄u gajiḡu anyu daja ĩḡu oparipa dic̄urire pisiri medijuami daja w̄ariyague. ĩḡu eropa pisiric̄ū iriya diya wahab̄u. S̄iridiḡu di iro dopa āhrab̄u iri di. Eropa wac̄ū iriya pohecague árĩnirā s̄iripehrea waháma.

<sup>4</sup> Perā eropa pisiri dijura p̄hr̄u gajiḡu anyu ĩḡu oparipa dic̄urire pisiri medijuami daja mārigue, iri māri diparigue s̄are. ĩḡu eropa pisiric̄ū māri diyari dihta wahab̄u. <sup>5</sup> Eropa wac̄ū ĩaḡu gajiḡu anyu mārire coreḡu ōpa arīḡu carami:

—Goām̄, m̄h̄u ñeri mariḡu āhraa. Dohpague s̄are eropa árĩniguic̄aḡu āhraa m̄h̄u. Iribojegue s̄are eropa árĩniguic̄am̄rib̄u m̄h̄u. Eropiḡu dipuwaja moaḡu diyarire iḡu diaye iiab̄u m̄h̄u. <sup>6</sup> N̄ḡu majaḡu yarāp̄u m̄ yarāre wejērā di cóac̄ū iima. M̄ yare wererā s̄are wejērā di cóac̄ū iima erā. Erā eropa wejēra dipuwaja iriyari diyari wahab̄u erā ihriburi. Ōpa ta m̄ iic̄ū gahmeama erā, arīḡu carami mārire coreḡu anyu.

<sup>7</sup> ĩḡu eropa arīra p̄hr̄u Goām̄re umupeori mesague wereniguiro carab̄u daja:

—Eropa ta āhraa. Goām̄ ḡa op̄u turatariaḡu āhraa m̄h̄u. ḡyaro mariro, queoro masare beye, dipuwaja moaa m̄h̄u, arī wereniguiro carab̄u.

<sup>8</sup> Ūrerā anyua erā pisirira p̄hr̄u gajiḡu anyu ĩḡu oparipa dic̄urire pisiri medijuami daja. Abe um̄ majaḡu weca pisiri medijuami. ĩḡu eropa pisiric̄ū abere masare turaro asic̄ū iiami Goām̄. <sup>9</sup> Eropiḡu abe um̄ majaḡu masare turaro asiami. Erāre eropa asic̄ū erā Goām̄ erāre ĩḡu dipuwaja moadorec̄ū masirā, ĩḡure ñero wereniguiama masa. Eropa ñero tariquererā ta erā ñero iirare ne b̄jawerebirama. Eropirā duhubirama. Goām̄re “Turaḡu āhrimi,” arī umupeodiabirama.

<sup>10</sup> Wapic̄urā anyua erā pisirira p̄hr̄u gajiḡu anyu daja ĩḡu oparipa dic̄urire pisiri medijuami daja. N̄ḡu majaḡu ĩḡu doaro weca pisiri medijuami. Op̄u doaro āhrab̄u ĩḡu doaro. ĩḡu eropa pisirira p̄hr̄u ĩḡu yarā árĩri yebague naitiāro wahab̄u. Eropirā ĩḡu yarā masa ñero p̄ric̄ū ḡc̄urire c̄uridihuama. <sup>11</sup> Erāre ñero p̄ric̄ū ta, erā ñero camic̄urā ta Goām̄re umaro majaḡure ñero wereniguiama. Erā ñero iirap̄ure b̄jawerebirama. Eropirā irire duhubirama.

<sup>12</sup> Yuju mojtoc̄u majarā anyua erā pisirira p̄hr̄u gajiḡu anyu daja ĩḡu oparipa dic̄urire pisiri medijuami daja. Eufrate waĩc̄uriya w̄ariyague pisiri medijuami. ĩḡu eropa pisiric̄ū iriya bojomerea



wahabũ. Abe mũririro majarã oparã erã gamewejẽrã warã erã iriya taribujariboro dopa eropa iiami.

<sup>13</sup> Pũhrũ urerã watẽare tarumurã iro dopa bejarãre ñhabũ. Yujugũ tarubũgũ pĩru pohecague árdĩdigũ ñgũ disirogue wirirami. Gajigũ tarubũgũ watĩ daja “Goãmũ yare weregu ãhraa,” arĩ guyadigũ ya disirogue wirirami. <sup>14</sup> Eropirã erã urerã watẽa tarumurã iro dopa bejarã deyoro moarire ii ñhmurã ãhrama. Eropirã árĩpehrero majarã oparãre gamenerecũ iiama erã basi Goãmũ mera gamewejẽdorera. Erã eropa gamewejẽburinũ Goãmũ turatariagu árĩpehrerãre ñgũ dipuwaja moaburinũ, pehreburiũ árĩroca.

<sup>15</sup> Ero coregue õpa arĩmi Jesu guare: Ñaque mũa. Yajari masũ ñgũ yajagu ariro dopa ta yũ sã guñãña mariro arigũca. Yũ ariborore ðaro coredigũ mucubirigũ árĩgũcumĩ. Ñgũ yaha árĩburire iinigidigũ ñeri marigũ mucubirigũcumĩ. Yũ mera árĩgũcumĩ. Eropa iidigũ árĩgũ yũ dujaricũ guhyasĩrisome ñgũ, arĩmi Jesu guare.

<sup>16</sup> Eropirã urerã watẽa i yeba majarã tauro oparãre gamewejẽcũ iituhãma. Erã gamewejẽro Hebreo ya disiro mera Armagedón waĩcũa.

<sup>17</sup> Seis anyua erã pisirira pũhrũ daja gajigũ anyu ñgũ oparipa dicurire imica cururi weca pisiri medijuami daja. Ñgũ eropa pisirira pũhrũ Goãmũ wihigũ ñgũ opũ doarogue turaro werenĩguĩro carabũ:

—Iripẽta árĩroca, arĩro carabũ.

<sup>18</sup> Ñgũ eroparicũ ta miamaa, bupu pamaa, gajiropa busumaa, guhyaro yeba ñohmeabũ. I yeba masa erã árĩnũgara pũhrũ eropa siari ñohmebirabũ i yeba. Gajisubu ñohmediro tauro guhyaro yeba ñohmemaabũ. <sup>19</sup> Eropa ñohmecũ wũari macare Babilonia waĩcũri macare uñrema yehremaa wahabũ. Eropiro paga macari i yeba árĩri macari dija wahabũ. Eropigũ Babilonia waĩcũri maca majarãre wũari maca majarãre guñãmi Goãmũ erãre dipuwaja moabu. Erã ñerire iiri dipuwaja erã mera turaro guãmi. Eropa guagu erãre bũrigã dipuwaja moãmi. <sup>20</sup> Ñgũ eropa iicũ árĩpehreri nũgari, utã yucũ sã pehrea wahabũ. Eropiro ne marabũ. <sup>21</sup> Eropiro decoyeri pagayeri yũsariyeri yebague masa weca dijarabũ. Árĩpehreri decoyeri cuarenta kilo nũcũriyeri ãhrabũ. Erã weca iri eropa dijaricũ Goãmũ erãre ñgũ turaro dipuwaja moacũ masirã ñero werenĩguĩama masa Goãmũre.

## 17

*Ñerire ñigore dipuwaja moadoregũcumĩ, arĩ werepũ Ñũ*

<sup>1</sup> Pũhrũ siete parire oparã anyua mera majagu yũ pohroque eragu õpa arãmi yũre:

—Ñagu arique. Diari bajayari weca doagore uña mera ñero iiricudigore Goãmũ ñgũ dipuwaja moaborore ñagu arique mũhũ. <sup>2</sup> I yeba majarã oparã igo mera ñero iiro dopa ta igo yapũre gamema. Goãmũpũre gamebirama. I yeba majarãre igo sihu merecũ iiro dopa ta, erã mera igo ñero iiro dopa ta igo masare ñero iirire uaribejacũ iimo igo. Eropa iigo árĩpehreri ñerire erã iicũ iimũrimo igo masare, arĩ wereami anyu yũre.

<sup>3</sup> Ñgũ eropa arĩra pũhrũ Espĩritu Santo yũre deyoro moarire ñacũ iiami. Eropigũ anyu masa marirogue aĩ wahgãmi yũre. Ero igo

nomeore ìhabũ. Igo nũgu majagu diagu weca peyago àhramo. Nũgu majaguru ìgu dũru baja waì erã gojatudigu àhrami. Iri waì ñeri waì Goãmure ñeri wereniguiri waì àhrabu. Eropigu siete dipucũgu, diez gohra cusaricũgu àhrami nũgu majagu. <sup>4</sup> Eropigo nomeoru òaro yahsari suhri oparã erã sañarino suhrire sañadigo àhramo. Diari suhri sãre sañadigo àhramo. Baja orore, wajacuri utãre, perlayeri sãre tuhura suhrirore sañadigo àhramo igo. Eropigo oropare opãmo igo. Iripare dicuri ñeri igo iira àhrabu. Nero iigo burigã ñero iidigo árĩmo igo. Iri ñeri Goãmũ ìgu ìadiabirira àhrabu. <sup>5</sup> Igo diapo igo waì erã gojatudigo àhramo. Iri waìre òaro masibea mari. Òpa arĩ gojatura àhrabu igo diapogue: “Wũari maca Babilonia àhrimo. Igo árĩpehreri ñeri iinũgadigo àhrimo. Árĩpehrero majarã erã ñerire, Goãmure erã gamebiririre iinũgadigo àhrimo. Eropirã erã igore ìhacũrã ñetariaro iirã iima,” arĩ, igo diapore erã gojatudigo àhramo. <sup>6</sup> Eropã igore ìagu igo bajarã Goãmũ yarãre igo wejẽdigo árĩcũ masiabũ yũhũ. Mererã erã mucubiriro dopa ta igo erãre wejẽgo erã di cóãcũ ìago mucubiridigo àhramo igo. Jesure erã cóãbiriri dipuwaja erãre wejẽdigo àhramo igo.

Igore ìagu, ìha uca waha. <sup>7</sup> Eropigu ìgu anyu arãmi yure:

—¿Duhpigũ ìha uca wahari mũhũ? arãmi yure. —Mũ masibirirare mũre ìhmugũra. Igo nomeore mũre weregũra. Igo peyagu sãre weregũra. ìgu nũgu majagu àhrimi. Eropigu siete dipucũgu, diez cusaricũgu àhrimi. <sup>8</sup> ìgu mũ ìadigu iribojegue árĩdigu árĩmi. Dohpaguere marimi ìgu. Pũhrũ ìgu ùhcãri gobegue árĩdigu wiriri dehyoagũcumi daja. ìgu eropa wiririra pũhrũ dederebu peamegue wagũcumi. I yeba majarã ìgu dehyoacũ ìha uca wa, ìgure umupeorãcoma. I yeba árĩboro core Goãmũ ìgu yarã árĩmorãre erã waìre gojatudigu árĩmi. ìgu gojatubirininã àhrima nũgu majagure umupeorã. ìgũru iribojegue árĩdi árĩmi. Dohpaguere marimi. Pũhrũ dipaturi dehyoagũcumi daja. Eropirã masa ìgu dehyoacũ ìarã, ìha uca warãcoma.

<sup>9</sup> “Dohpaguere yũ wereburire òaro masidiarã, òaro peerãca mũa, arĩnemoami yure daja. Eropirã pee masirã árĩque mũa. Nũgu majagu dipu, siete dipu siete utã yucu iro dopa àhraa. Iri utã yucu weca peyamo igo ñero iiricũgo. <sup>10</sup> Iri dipu siete oparã sã iro dopa àhraa. Bajarã masa tauro oparã àhrima. Cinco oparãre cóãtuhama. Gajigu erã pũhrũ árĩgu opu àhrimi dohpaguere. Gajiguru pũhrũ opu ñajagũcumi. Eropã ñajagu merogã opu árĩgũcumi ìgu. <sup>11</sup> Eropigu nũgu majagu diagu core árĩdigu, dohpaguere marigu erã siete oparã pũhrũ opu árĩgũcumi. Siete oparã mera majagu àhrimi. Pũhrũ peamegue dederea wagũcumi.

<sup>12</sup> “Nũgu majagu cusari diez cusari diez oparã iro dopa àhraa. Bajarã masa tauro oparã àhrima. Erã oparã ñajanibeama dohpa. Pũhrũgue oparã ñajarã merogã oparã árĩrãcoma. Yoari boje oparã árĩdoresome erãre. Eropã oparã árĩrã nũgu majagu mera oparã árĩrãcoma. <sup>13</sup> Erã diez oparã yujuro mera pepirã árĩrãcoma. Eropirã erã nũgu majagure erã ya yebari majarã tauro opu acurãcoma. <sup>14</sup> Eropirã Cordero mera gamewejẽ warãcoma erã. Erã eropa gamewejẽquerecũ ta Cordero ìgu beyenirã mera ìgure ne cóãbirininã mera erãre tarinũgarãcoma. ìgu

árīpehrerā gajirā tauro opu āhrimi. Eropigu erāre tarinugagucumi,” arāmi anyu yure.

<sup>15</sup> Ire yure werenemoami anyu:

—Ñero iiricugo mañri weca doago iimo. Iri mañri opa iro dopa āhrra: Baja yebari majarā, baja cururi majarā, baja disiri wereniguirā iro dopa āhrra iri mañri. Erā bajarā weca āhrimo igo. <sup>16</sup> Nugu majagu, diez oparā mera ñero iiricugore ihaturirācoma. Erā diez oparā nugu majagu mera igore goroweopeho igo yare emapehocā, suhri marigo cóārācoma igore. Eropā iirā igo dupure barācoma. Erā eropa iira puñru igore soepehocārācoma. <sup>17</sup> Erā diez oparā yujuro mera pepirā nugu majagure erā ya yeba majarā tauro opure acurācoma. Erā eropa iicū apimi Goāmū ĩgu gamediro dopa ta iibure. Eropigu nugu majagupu opu árīgucumi. Árīpehreri Goāmū ĩgu iribojegue ĩgu werediro dopa ta ĩgu iira puñru nugu majagure cóāgucumi. <sup>18</sup> Igo mū ĩadigo mera opa arī buhema: Igo wuñri maca Babilonia waicuri maca iro dopa āhrimo. Árīpehrerā gaji macari majarā tauro āhrima iri maca majarā, arāmi anyu yure.

## 18

### *Babilonia waicuri maca coh moyoro*

<sup>1</sup> Puñru gajigu anyure umarogue دچارigure ĩhabu. ĩgu opu gohra āhrami. Eropigu ĩgu goesiriri árīpehreroguerē oaro boyoro wahabu.

<sup>2</sup> ĩgu eropa dijara puñru turaro gaguinigui wereami:

—Cóācāmi. Babilonia waicuri macare wuñri macare iri maca majarā säre cóācāmi. Dohpaguere watēa bajarā ñerā dupu deyobirā sā iri maca mūraro árīrā iima. Ñerā mirimagu porā majarā sā masa erā ĩha doorā iri maca mūraro árīrā iima. <sup>3</sup> Iri maca majarā mura árīpehreri yeba majarāre goroweonirā árīma. Eropirā baja yebari majarā tauro oparā iri maca majarāre pee Goāmure cóānirā árīma. Erā ñeri uaribejarire iidiarā cóānirā árīma Goāmure. Iri maca majarā baja gajinore wajapagari duarire gamenirā árīma. Eropirā gaji macari majarā erāre duarā pagari dihta wajatanirā árīma, arī wereami anyu.

<sup>4</sup> Puñru dipaturi umarogue werenigucū peeabu. Ōpa arīro carabu iri macare cóāboro core ĩgu wereniguirire:

—Mua yaharā, iri maca majarā mera árībircāque mua. Iri maca majarā mera mua árīcū mua säre dipuwaja moagucumi. Eropirā iri macague ñero iirire ĩhacūbircāque. <sup>5</sup> Ero ñero iira baja árīcāa. Iri maca majarā yoari boje burigā ñerire iituhajama. Eropigu yuhū Goāmū iripēta erā ñero iicū gahmea. Eropigu erāre dipuwaja moaguca. <sup>6</sup> Iri maca turaro dipuwajacuporo. Ero majarā masare erā ñero iidiro dopa ta erā säre ñero taricū iiporo. Masare erā ñero iidiro dopa ta erā tauro erāre ñero dipuwaja moaporo, arīro carabu. <sup>7</sup> Iri maca majarā “Ōarā āhrra gua,” arī pepirima. Eropā arī pepirā, wajapagarire wuñro opāma erā. Erā wajapagarire wuñro erā oparopē ta turaro ñero taricū iiporo. Eropirā erāre bujawerecū iiporo. Erā basi opa arī pepirima erā: “Gua i yeba majarā oparā árīrā iiaa. Mojomorocurā árībeaa. Eropirā ne ñero tarisome gua,” arī pepirima erā. <sup>8</sup> Eropā arī erā pepirā árīcū yujunū erāre guñaña mariro dipuwaja moaburinu árīroca, arīro carabu. Irinu siriri, dorecari, co

oreri, oaboari árïroca. Eropigũ iri macare soepehocãgũcumĩ, arïro carabũ. Mũa opũ Goãmũ iri macare dipuwaja moadoregũ turatariaguã ãhrimi. Eropigũ eropa ta ãgũ arïdiro dopa ta iri macare dipuwaja moadoregũcumĩ, arïro carabũ amarogue.

<sup>9</sup> Eropirã Goãmũ iri macare ãgũ dipuwaja moacũ ãha i yeba majarã oparã burigã bujawere orerãcoma. Erã iri maca majarã mera ñerire iirã ðaro mucubirirã árïmũrinirã árïma. Eropirã iri maca ãjucũ ãarã orerãcoma erã. <sup>10</sup> ãgũ iri macare eropa soecũ ãarã oparã gajĩ yeba majarã yoarogue ãhabeoniguirãcoma gũa sãre dipuwaja moari arïrã. Ero ãhabeoniguirã ðpa arïrãcoma:

—Ade. Mojomorocũri maca ãhraa Babilonia. Si maca wũari maca turari maca árïrabũ. Mata yojaro mera si macare dipuwaja moami, arïrãcoma erã.

<sup>11</sup> I yeba majarã doberi duarã iri maca ãjucũ ãarã burigã bujawere orerãcoma erã sã. Iri maca pehrecũ ãarã, erã ya doberire asũrã maricũ ãarã bujawere orerãcoma. Eropirã orerãcoma. <sup>12</sup> Erã aĩgãrirare, orore, platare, wajacũri utãre, perla waĩcũri dipu sãre asũrã marirãcoma. Eropi gajĩ erã aĩgãrirare suhri ðarire wajapagarire, yahsari suhrire, oparã erã sañari suhri dopa bejarire, seda waĩcũri suhrire, diari suhrire asũrã marirãcoma. Eropi gajĩ erã aĩgãrirare yucũ poresuri yucũre asũrã marirãcoma. Eropi gajire erã aĩgãrirare marfil waĩcũri mera erã iirare, wajacũri yucũ mera erã iirare, bronce mera erã iirare, come mera erã iirare, marmol mera erã iirare asũrã marirãcoma. <sup>13</sup> Eropi erã aĩgãrirare canela waĩcũrire, gajĩ bari usũricũ iirire, inciensore, mirra waĩcũri poresurire, gajĩ poresurire asũrã marirãcoma. Eropi gajĩ erã aĩgãrirare vinore, uyuare, trigo pogare, trigore, wecuare, ovejare, cabayuare, tũruri gasire, pohro majarãre asũrã marirãcoma. Eropirã bujawererãcoma doberi duari masa. <sup>14</sup> Eropirã ðpa arïrãcoma erã iri maca majarã mũrare:

—Ade. Ñetariaro wahari erã. Árïpehreri erã mahira mũra pehrea wahaa. Eropiro árïpehreri erã ðarire erã wajapagari opara pehrea wahaa. Eropirã iri dipaturi bocasome mari, arïrãcoma doberi duari masa.

<sup>15</sup> Erã iri macare doberi duarã wũaro wajatamũrinirã árïma. Eropirã erã iri macare yoarogue ãhu niguirãcoma gũa sãre dipuwaja moari arïrã ucarã. Eropa ãhabeorã iri macare burigã bujawere orerãcoma. <sup>16</sup> ðpa arïrãcoma iri macare:

—Ade. Ñetariaro wahaa iri maca wũari maca. Si maca majarã ðarire opamũririma. Nomeo ðari suhrire, wajapagari suhrire, yahsari suhrire, diari suhri sãre sañago dopa ðarire opamũririma. Eropirã oro wajapagari utã, perla dipu waĩcũri tuhura suhriro sañamũrima. Wũaro opamũrima si maca majarã. <sup>17</sup> Eropiro mata si maca wũaro dobericũri maca dederea wahaa, arïrãcoma iri macare.

Eropirã árïpehrerã dohori gasi mera curirã, iri gasi oparã, erã uma, gajirã wũariyague mohme wajatarã sã iri macare yoarogue ãhu niguirãcoma erã sã. <sup>18</sup> Ero ãhabeorã iri macare ãjucũ ãarã ðpa arï gaguiniguirãcoma:

—Paga macari si maca iro dopa árïri macari ne gajĩ maca mara, arï gaguiniguirãcoma erã. <sup>19</sup> Eropa bujawererã árïri erã dipu weca nicure ñaji peorãcoma. Eropirã co orerã ðpa arïrãcoma:

—Ade. Ñetariaro wahaa si maca m̄araro. Ōari maca ár̄irib̄u. Ár̄ipehr̄er̄a dohori gasi opar̄a w̄uariyague curir̄a si maca maja doberi mera ōaro wajatarib̄u mari. Eropiro mata si maca dederepehrea wahaa, ar̄ir̄acom̄a gasi majar̄a, ar̄i werero carab̄u ȳure am̄arogue.

<sup>20</sup> —Iri macare ĩḡu cóác̄c̄ũ ĩar̄a mucubirique m̄ua, um̄aro majar̄ap̄u, ar̄iro carab̄u. —Goãm̄u yar̄a, Jesu ĩḡu apinir̄a, ĩḡu yare werem̄htanir̄a ár̄ipehr̄er̄a m̄ua mucubirique. Iri maca majar̄a m̄uare ñero taric̄ũ iima. Er̄a eropa iira dipuwaja, dipuwaja moami Goãm̄u. Eropir̄a mucubirique m̄ua, ar̄iro carab̄u.

<sup>21</sup> Eropa ar̄i wereniguirare peera p̄uhr̄u ōpa ĩhab̄u ȳuh̄u. Turaḡu anyu w̄uariye ut̄ayer̄e ar̄i wahḡũ, w̄uariyague mehyuami. Eropa mehyugu ōpa ar̄ami:

—Iye ut̄aye yuriñajadiro dopa ta w̄uari maca Babilonia waic̄uri maca turaro yuhridijaro bus̄uroca. Eropa yuhridijara p̄uhr̄u iri macare dipaturi ĩasome m̄ua. <sup>22</sup> Iri macare dederea wac̄ũ iigucumi. Eropiro ne iri macare bayarire m̄ua peediro dopa ar̄isome. Arpa buam̄t̄eri, flauta dipurure, corneta s̄are ne dipaturi peeya mariroca. Eropir̄a iri maca maric̄ũ ero mohmenir̄a dipaturi erore mohmesome. Eropiro trigo yeri ut̄a mera er̄a oera s̄a ne peeya mariroca. <sup>23</sup> Iri maca boyo oyadiro dopa ne ar̄isome. Eropir̄a mojoto dirinir̄a er̄a mucubiri wereniguidiro dopa ne dipaturi ar̄isome. Iri maca majar̄a doberi duar̄a as̄ur̄a mera gajir̄a tauro opam̄urima er̄a. Eropir̄a iri maca majar̄a yea er̄a purisiriri mera ár̄ipehr̄ero majar̄are ḡuyam̄urima. Eropir̄a ñerire uaribeja, Goãm̄up̄ure gamebirim̄urima masa, ar̄ami ȳure turaḡu anyu.

<sup>24</sup> Iri maca majar̄a Goãm̄u yare werem̄htanir̄are gajir̄a ĩḡu yar̄a s̄are ár̄ipehr̄ero majar̄are wej̄em̄ur̄inir̄a ar̄ima. Er̄a eropa wej̄era dipuwaja, gaj̄i ñero iira dipuwaja s̄are dipuwaja moami Goãm̄u iri macare.

## 19

<sup>1</sup> Babilonia macare ĩḡu cóarare ȳu ĩara p̄uhr̄u um̄arogue bajar̄a gaguiniguir̄a carama ȳu peec̄ũ. Ōpa ar̄i gaguiniguir̄a carama:

Aleluya. Goãm̄ure ōaro wereniguir̄a. Goãm̄u marire taugu ahr̄imi. ĩḡure ōaro umupear̄a. Turatariagu ahr̄imi ĩḡu. <sup>2</sup> Ḡuyaro mariro queoro iiḡu masare dipuwaja moami ĩḡu. Ñeri dipuwaja moor̄are er̄are dipuwaja moabeami. Igo nomeo ñerire ĩric̄ugo Babilonia waic̄uri maca ahr̄imo. Iri maca majar̄are ĩhac̄ur̄a i yeba majar̄a ñero iim̄urima. Eropiḡu iri maca majar̄are dipuwaja moami Goãm̄u. Eropiḡu ĩḡu dorerire iinir̄are ĩḡu pohro majar̄are er̄a wej̄era dipuwaja dipuwaja moami ĩḡu, ar̄i gaguiniguir̄a carama.

<sup>3</sup> Dipaturi gaguiniguir̄a carama daja:

—Aleluya. Goãm̄ure ōaro wereniguir̄a. Iri maca ñero iira maca ĩḡu soera maca eropa imicac̄uniguic̄aroca, ar̄i gaguiniguir̄a carama.

<sup>4</sup> Eropir̄a veinticuatro Jesu yar̄a opar̄a, wapic̄ur̄a gajiropa bejar̄a mera mereja, Goãm̄ure mari Pagure ĩḡu doaro doagure umupear̄a. Ōpa ar̄i umupear̄a er̄a:

—Amén. Aleluya. Eropa ahraa. Mari Pagure ōaro wereniguir̄a, ar̄ama er̄a.

<sup>5</sup> P̄uhr̄u op̄u doarogue ōpa ar̄iro carab̄u:

Mari Opu Goãmure umupeoque. Mua ïgu pohro majarã, ïgure umupeorã bu árĩrã, oparã sã árĩpehrerã mua ïgure ðaro wereniguique, arĩro carabu.

*Cordero ïgu mojoto diriburinũ bosenũre werepu Ñu*

<sup>6</sup> Pũhrũ bajarã masa erã wereniguirã caracũ peeabu. Erã utãmu iro dopa bupu iro dopa busurã carama yu peecã. Õpa arĩ gaguiniguirã carama:

Aleluya. Goãmure ðaro wereniguirã. ïgu mari Opupu opu ñajatuhami. Turatariagu ahrimi ïgu. <sup>7-8</sup> Cordero ïgu mojoto diriburi bosenu ahraa dohpaguere. ïgu mojoto diribo ðaro amudigogue ahrimo. Igo ðari suhrirore guhrari mariri suhrirore sañatuhamo. Iri suhriro Goãmure yarã ðarire erã iira iro dopa ahraa. Eropirã mucubirã mari. Goãmure “Õatariagu ahrimi,” arĩ umupeorã mari ïgure, arĩ wereniguirã carama.

<sup>9</sup> Erã eropa arĩra pũhrũ anyupu arãmi yure:

—Ire goja aĩque. “Cordero ïgu mojoto diriri bosenu ïgu sihubeonirã mucubirã ahrima,” arĩ goja aĩque, arãmi yure anyu.

Eropa arĩgu ta ðpa arĩnemoami:

—Diaye ta ahraa i yu werera. Goãmũ ya wereniguri ahraa, arĩnemoami yure.

<sup>10</sup> ïgu eroparĩcũ peegu ïgure mereja umupeobu iirabu. Yu merejacũ gohra ðpa arãmi yure:

—Yure mereja umupeobita. Mu árĩro dopa ta Goãmũ pohro majagu ta ahraa yu sã. Mu acawererã Jesu yarã árĩpehrerã ïgu ya buherire werenirã iro dopa yu sã Goãmũ pohro majagu ahraa. Eropigu Goãmũre mereja ïgũpũre umupeoque, arãmi yure anyu.

Goãmũ yare weremũhtanirã iribojegue majarã Espiritu Santo ïgu itamuro mera Jesu ya buherire ta wereyuñuma.

*Cabayu boregu weca peyagure werepu Ñu*

<sup>11</sup> Pũhrũ umaro pãrimaacũ ihabũ. Ero cabayu boregu ahrami. ïgu weca peyagu ðpa waĩcuami: ïgu arĩro dopa ta iigu diaye iigu waĩcuami ïgu. Eropigu masare dipuwajare moagu ïgu iħaturirã mera gamewejẽgu ðaro guyarõ mariro iiami. <sup>12</sup> ïgu cui ri peame porã iro dopa ahrabu. Eropiro ïgu dipuru weca baja oparã peyari berori ahrabu. Eropigu ïgu dupũre ïgu waĩre gojatudigu ahrami. Iri waĩre ïgu dihta masiami. Gajirã masibirama. <sup>13</sup> ïgu sañariñe yoariñe di tuyariñe ahrabu. ïgu ðpa waĩcuami: Goãmũ ya wereniguirire weregu waĩcuami ïgu. <sup>14</sup> Eropirã ïgu yarã surara umarogue majarã ïgure nũrsiãma. Borerã cabayua weca peyarã ahrama. Õari suhriro boreri suhriro, guhrari mariri suhriro sañanirã ahrama. <sup>15</sup> ïgu erã opu wamũhtadigu ïgu disiro ñoserimiji usirimiji cuñuami. Irimiji i yeba majarãre ïgu tarinũgaurimiji ahrabu. Eropigu ïgu turari mera ïgu dorecũ ne yujugu ïgure tarinũgagu ïgure bocatũsome. Igu dipurare erã ñatĩacũ igui deco wiriro dopa ta i yeba majarã ñerãre di wiriroca ïgu erãre dipuwaja moacũ. Goãmũ erã mera guami. ïgu eropa guagu arĩcũ cabayua weca peyagu dipuwaja burigã moagucumi. <sup>16</sup> ïgu suhriro, ïgu ñigagu sãre iri waĩre gojatudigu ahrami: “Árĩpehrerã gajirã tauro opu waĩcuami,” arĩ gojatudigu ahrami.

17 Puhru abegue niguigure anyu niguigure ihabu. Aripehrerã umarogue wuarãre goro porã majarãre gaguiniguibeoami igu. Opa arĩ turaro gaguiniguibeoami erãre:

—Gamenererã arique. Goãmu igu bosenu wuari bosenu barã arique. 18 Baja yebari majarã tauro oparã murare, surara oparã murare, surara bajarã murare, cabayua murare, erã weca peyarã murare, aripehrerã gajirã masa murare, pohro majarã murare, pohro majarã arĩbirã murare, gajirã oparã murare, bu arĩrã murare barã arique. Erã aripehrerã dupu murare barã arique, arĩ gaguiniguibeoami anyu goro porã majarãre.

19 Eropigu nugũ majagure, i yeba majarã tauro oparã erã surara bajarã sãre ihabu. Erã gamenerenirã ahrama cabayu weca peyagu mera igu surara bajarã mera gamewejemorã. 20 Erã eropa gamewejẽcũ cabayu weca peyagu nugũ majagure peresu iiami. Gajigu “Goãmu yare wereniguigu ahraa,” arĩ guyadigu sãre peresu iiami. Igu guyadigupu nugũ majagu igu ihuro deyro moarire iibasadigu ahrami. Igu deyro moari mera nugũ majagu igu waĩre tuyanirãre, igu masu wẽadigure umupeorãre guyadigu ahrami. “I Goãmu ya ahraa,” arĩgu guyamuridigu ahrami. Erãre perãre igu peresu iira puhru erãre ojocarirãre ta peamegue cõhãmi. Iri peame wuariya iro dopa wuari peame azufre mera ujuri peame ahraabũ. 21 Eropigu duhyarãre erã surara arĩnirãre fioserimiji mera igu disiro cuñurimiji mera wejẽami cabayua weca peyagupu. Eropa igu wejẽra puhru goro porã majarã erã dupu murare barã yapitaria wahãma.

## 20

*Mil bojori gohra Cristo igu yarã mera masare doregucumi, arĩ gojañumi Nu*

1 Puhru gajigu anyu umarogue igu dijaricũ ihabu. Uhcãri gobe maja sawire, wuarida comeda sãre opãmi igu. 2 Eropa dijarigu pĩrure ñeãmi igu. Igu pĩru iribojegue pĩru dupucugu arĩgu, watĩ Satana waĩcugu ahrami. Igure ñeagu dihriami mil bojori gohra peresu iibu. 3 Eropa dirituha uhcãri gobegue cohã dijuami igu i yeba majarãre mil bojori gohra igu guyamasibiriborore. Eropa cõatuhagu iri gobere biha, sawi biacãmi. Eropigu mil bojori puhru dipaturi igure bajamenurigã wiunigucumi daja.

4 Puhru oparã doarire ihabu. Iri doarire doarã sãre ihabu. Erãre masare erã beyedoboborore apiami Cristo. Gajirã sãre ihabu. Erãpu Jesu yare Goãmu yare erã werera dipuwaja erãre dipure tabe cõãnirã ahrama. Nugũ majagure, igu wẽadigu sãre ne umupeobirininã ahrama. Eropirã erã diaporire erã mojotori sãre igu waĩre gojatu-dorebirininã ahrama erã. Eropirã gajirã erãre wejẽnirã arĩma. Erãre wejẽra puhru masa muria wanirã arĩma. Masa muriarã erã mil bojori gohra Cristo mera oparã arĩrãcoma. 5 Gajirã Cristo yarã sirininã mura masa murianibirama dohpa. Erã wejenirã erã masa muriarã puhru mil bojori oparã erã arĩra puhru gajirã sã masa muriarãcoma. Eropirã erã wejẽnirã mura Cristo puhru masa muriamhtarã arĩrãcoma. 6 Igu masumhtarãrã turaro mucubirirã arĩrãcoma. Ñeri marirã arĩrãcoma erã. Eropirã peamegue wasome erã. Eropirã Goãmu

yare Cristo yare erā sā serēbasarā pahia árīrācoma erā. Eropirā erā masa m̄riam̄htarā mil bojori gohra Cristo mera masa tauro oparā árīrācoma.

*Satana dederea waḡucumi, arī gojañumi Ñu*

<sup>7</sup> Mil bojori p̄hr̄u Satanare peresu árīḡure wiuḡucumi. <sup>8</sup> Īḡu eropa wirira p̄hr̄u árīpehrero i yeba majarāre ḡuyaḡu waḡucumi Īḡu, “Ina gamewejērā warā,” arīḡu. Gog waīcurāre, Magog waīcurā sāre ḡuyaḡu waḡucumi. Eropirā erā Īḡu ḡuyarire peerā, erā surara majarāre gamenorācoma gamewejēmōrā. Erā surara majarā bajarā gohra árīrācoma. W̄uariya maja imipa árīro utāburuyeri n̄c̄u dopa erā surara bajarā árīrācoma

<sup>9</sup> Eropirā i yebaguere wasirirā, Goām̄u yarā erā árīri macare Goām̄u Īḡu mahiri macare cāhmotan̄gajarācoma. Erā eropa cāhmotan̄gajara p̄hr̄u Goām̄u erāre umaro maja peame mera soe mehdijucāḡucumi. <sup>10</sup> Eropa wara p̄hr̄u watīre erāre ḡuyaḡure peamegue cóāḡucumi. Iri peame w̄uariya iro dopa árīri peame azufre mera ūj̄uri peame āhrab̄u. Erogue n̄ḡu majaḡure “Goām̄u yare wereḡu āhraa,” arī ḡuyaḡure cóātuhajami. Ero erā árīc̄ū um̄uri n̄c̄u p̄ūriroca erāre.

*Masare Goām̄u dipuwaja moatuḡucumi, arī gojañumi Ñu*

<sup>11</sup> P̄hr̄u w̄uaro op̄u Īḡu doarore ōaro borero ĩhab̄u. Iri doaro weca doaḡu sāre ĩhab̄u. Eropiro Īḡu árīroque mata i yeba umaro sā dederea wahab̄u. Ne deyobirab̄u pare. <sup>12</sup> Eropiḡu op̄u pohro s̄irinirā m̄ura erā niḡuic̄ū ĩhab̄u. Erā bu árīrā, oparā m̄ura sā āhrama. Ero erā niḡuic̄ū Īḡu gojaturap̄ūrire p̄āḡūami. Irip̄uri masa erā iirare Īḡu gojaturap̄uri āhrab̄u. Eropiḡu Īḡu op̄u beyeḡu irip̄ure ĩatuha erā iirare masiami. Irire masiḡu s̄irinirāre beyeami ñerā, ōarā. P̄hr̄u gajip̄ū sāre p̄āḡūami. Irip̄ū Goām̄u mera eropa árīniḡuimōrāre erā waīre erā gojaturap̄ū āhrab̄u. <sup>13</sup> W̄uariyague miri s̄irinirā m̄ura, diague erā cóānirā m̄ura sā masa m̄uria wahāma. Eropirā yeba pohecague árīnirā m̄ura, s̄irinirā erā árīroque árīnirā m̄ura sā masa m̄uria wahāma. Erā eropa m̄urijac̄ū ero doaḡu erā iirare masiḡu erāre beyeami. Ōarāre, ñerāre beyeami. <sup>14</sup> P̄hr̄u s̄iririñere, s̄irinirā erā árīro sāre cóācāmi Goām̄u dipaturi mari s̄iribiriboro dopa. Peamegue ĩrire cóācāmi. Iri peame w̄uariya iro dopa árīri peame āhrab̄u. Goām̄ure gamebirāp̄u peamegue warā dipaturi s̄irirā dopa wahama. <sup>15</sup> Eropiḡu Īḡu mera árīniḡuimōrā erā waīre Goām̄u Īḡu gojaturap̄ū árīpehrerā gojatus̄uya marirāp̄ure peamegue cōhāmi Īḡu.

## 21

*Um̄aro, yeba sāre mamare gohrotoḡucumi Goām̄u, arī gojañumi Ñu*

<sup>1</sup> P̄hr̄u um̄aro, yeba sāre mamare Īḡu gohrotorare ĩhab̄u. Árīm̄htarā m̄ura um̄aro, yeba, pagayari sā pehrea wahab̄u. Marab̄u. <sup>2</sup> Eropiḡu ȳh̄u Ñu ōari macare, mama macare Jerusalén waīcuri macare ĩhab̄u. Iri maca um̄arogue Goām̄u pohrogue dijarič̄ū ĩhab̄u. Ōaro dehyoab̄u iri maca. Mojoto diribo igo marap̄ure mucubiriborore ōari suhri sā igore ōaro amuro dopa āhrab̄u iri maca. Ōpa iro dopa ta



iri macare amuyudi árĩmi Goãmu ĩgu yarãre mucubiricũ iibu. <sup>3</sup> Irire yu ĩara pũhrũ opu doarogue gaguiniguicũ peeabũ:

—Īaque. Dohpaguere masa watope árĩgu iimi Goãmu. Erã mera árĩgucumi ĩgu. Eropirã ĩgu yarã árĩrãcoma erã. Eropigu Goãmu ĩgu basi erã mera majagu árĩgu, erã yagu Goãmu árĩgucumi. <sup>4</sup> Eropigu eropa mucubirinigucũ iigucumi ĩgu erãre. Eropirã dipaturi bujaweresome erã. Eropirã ne dipaturi sĩrisome erã. Ne ñero sĩporãcũri, co oreri, pũriri sã mariroca erãre. I árĩpehreri iribojegue maja pehrea waroca erãre, arĩ gaguiniguigu carami.

<sup>5</sup> Pũhrũ opu doarogue doagu õpa arãmi:

—Īaque. Árĩpehrerire mama gohrotocũ iiguca, arãmi.

Īgu eropa arĩra pũhrũ yũre õpa arãmi daja:

—Yu arĩrire goja aĩque. Yu arĩri diaye ta ãhraa. Eropiro yu arĩdĩro dopa ta eropa waroca. Eropigu yu arĩrire goja aĩque, arãmi yũre.

<sup>6</sup> Pũhrũ õpa arãmi daja yũre:

—Iripẽta arĩca. Yu árĩpehrerire ĩhacũnugudigu ãhraa. Eropigu árĩpehrerire pehrecũ iibu ãhraa daja. Ñemesiburã erã turaro ihridiario dopa ta yu pohrogue wadiarã Jesure gamerãcoma. Eropirã Jesure yũhrirãcoma. Īgu ojocaririre oro deco iro dopa ãhrimi. Īgure gamerãre waja gamero mariro yu mera eropa árĩniguiborore ogũra erãre. <sup>7</sup> Árĩpehrerã ñero tariquererã yũre umupeoduhubirãre õpa iigũra: Erã Goãmu árĩgũra. Eropirã erãpu yu porã árĩrãcoma. <sup>8</sup> Erã eropa árĩquerecũ masare gũi yaharare duhurã, yahare gamebirã, ñetariarire iirã, masare wejẽrã, nome mera ñero iirã, ɯma mera ñero iirã nome, yeea, goãmarã wéanirãre umupeorã, árĩpehrerã gũyarã peamegue warãcoma. Ero wũariya iro dopa árĩri peame azufre mera ũjuri peame ãhraa. Erogu warã dipaturi erã sĩriro dopa ta warã iirãcoma, arãmi yũre.

### *Mama maca Jerusalénre werepu*

<sup>9</sup> Pũhrũ yujugu anyu yu pohrogue erãmi. Īgu siete pari opanirã mera majagu ãhrami. Īgu dipuwaja moadoregu ĩgu apinirã mera majagu sã ĩgu anyua mera majagu ãhrami. Eropa eragu õpa arãmi yũre:

—Īagu ariqũe. Cordero ĩgu mojoto diribore ĩhmugũca mũre, arãmi anyu yũre. <sup>10</sup> Eropigu Espĩritu Santo yũre Goãmu ya macare ĩacũ iiami. Eropigu ɯmadigu ɯtãgu wecague yũre aĩ mũriãmi. Erogu Goãmu ya macare Jerusalénre õari macare ĩhmuami yũre. Iri maca ĩgu mojoto diribo iro dopa ãhrabũ. Goãmu pohrogue ɯmarogue dijariro iiabũ iri maca. <sup>11</sup> Goãmu ĩgu gosesiriri mera gosesiriabũ iri maca. Wajacũri ɯtã iro dopa gosesiriabũ. Jaspe waĩcũri ɯtã gosesiriro dopa gosesiriabũ. Eropiro vidrio iro dopa õaro deco sũriabũ iri maca. <sup>12</sup> Eropiro wũari sãriro ɯmari sãriro erã sãri sãra maca ãhrabũ. Doce gohra disipororicũabũ iri sãriro. Iri disiporore cohreama anyua. Iri maca disiporori bihariserigue Israe masa cururi doce cururi nũcũ erã waĩ tuhyabũ. <sup>13</sup> Abe mũririropũ iri sãriro opabũ ɯhre disiporo. Surpu ɯhre disiporo opabũ. Nortepũre ɯhre disiporo opabũ. Abe ñajaropũ sãre ɯhre disiporo opabũ. Árĩpehrero doce disiporori gohra opabũ iri sãriro. <sup>14</sup> Iri sãriro doce ɯtã weca peyabũ. Iri ɯtã nũcũ Cordero ĩgu apinirã doce ĩgu apinirã gũa yujurãyeri waĩ tuhyabũ.

<sup>15</sup> Eropigu anyu yure weregu queodigu oro mera erā iidigure opāmi. Iri macare, iri maca maja disiporori säre, iri sāriro säre queobu iiami. <sup>16</sup> “Iri maca yoaropē ta ehyaā,” arāmi queotuhagu. “Ūmaro sā iripēta ūmaa,” arāmi. Eropigu anyu igu queodigu mera iri macare queoami. Iri maca dos mil doscientos kilómetros yoari maca āhrabū. Iripēta ehvari maca āhrabū. Iripēta ūmaro āhrabū. <sup>17</sup> Eropigu iri maca maja sārirore queoami anyu. “Sesenta y cuatro metros ūmaa,” arāmi. Mari masa queoro dopa ta queogu iiami igu.

<sup>18</sup> Iri sāriro jaspe waīcūri utā mera igu iira sāriro āhrabū. Eropiro iri macapu oro mera igu iira maca āhrabū. Iri oro guhrari mariri arīro ōaro deco sūriabū. <sup>19</sup> Iri sāriro doca arīri utāre baja gajiropa arīriyeri tuhyabū ōaro deyoboro dopa. Iriyeri wajapagariyeri āhrabū. Iriyeri tuyara utā sāriro doca oyari utā doce utā āhrabū. Arīmuhtari yegue jaspe waīcūri utāyeri tuhyabū. Iriye puhrū maja yeguere safiro waīcūri utāyeri tuhyabū. Peye puhrū maja yeguere ágata waīcūri tuhyabū. Ūhreye puhrū yeguere esmeralda waīcūri utāyeri tuhyabū. <sup>20</sup> Wapicūriye utāye puhrū maja yeguere ónice waīcūri utāyeri tuhyabū. Yuju mojotocu maja pehreri utā puhrū maja yeguere cornalina waīcūri utāyeri tuhyabū. Seis puhrū majaye utāyeguere crisólito waīcūri utāyeri tuhyabū. Siete puhrū arīriye utāyeguere berilo waīcūri utāyeri tuhyabū. Ocho puhrū arīriyeguere topacio waīcūri utāyeri tuhyabū. Nueve puhrū arīriyeguere crisoprasa waīcūri utāyeri tuhyabū. Diez puhrū arīriyeguere jacinto waīcūri utāyeri tuhyabū. Once puhrū arīriyeguere amatista waīcūri utāyeri ūjutuyabū. <sup>21</sup> Eropiro doce disiporori doce perla mera igu iiraseri āhrabū. Iriseri nucu yujuye perlaye mera igu iira dihta āhrabū. Eropiro iri maca wari maha oro mera igu iira maha āhrabū. Iri oro guhrari mariri oro āhrabū. Eropiro ōaro deco sūrii maha āhrabū iri maha.

<sup>22</sup> Iri macare Goāmū wihire īabirabū. Marabū. Iri maca arīpehrerogue mari Opure Goāmū turatariagure, Cordero säre umupeoama masa. Eropiro iri maca arīpehrero Goāmū ya wihi iro dopa āhrabū. <sup>23</sup> Eropigu iri maca Goāmū igu gosesiriri mera ōaro boyoabū. Cordero sā sihāgodiru iro dopa boyoami. Eropirā abe ūmu majagu säre űami majagu säre ero boyocū gamebirama. <sup>24</sup> Eropirā i yeba majarā Goāmū Cordero sā boyori mera arīrācoma Goāmū igu taunirā. Eropirā arīpehreri yeba majarā oparā iri macague ōatariari erā oparire aīrā erarācoma. <sup>25</sup> Eropiro ūmare iri maca maja disiporori pāgūra disiporori arīroca. Eroguere ne űami mariroca. Eropirā iri disiporore ne bihasome. Eropiro toyoniguia. <sup>26</sup> Eropirā baja yebari majarā ōarire erā oparire iri macague aīrā erarācoma. <sup>27</sup> űeripure iri macaguere ne aīsome. Guhyasīricū iirā, űerire iirā, ne iri macaguere wasome. Guyarā sā wasome. Cordero igu gojarapū erā waī gojatusūnirā dihta iri macaguere warācoma. Iripū igu taurā erā waīre igu gojaturapū āhrra. Iripūgue erā waī gojatusūnirā eropa arīniguicārācoma igu mera.

## 22

<sup>1</sup> Puhrū ōariyare ojocaricū iiriyaie ihmuami yure anyu. Iriya deco sūriiya Goāmū, Cordero sā erā doarogue aririya āhrabū. <sup>2</sup> Eropiro

iri maca deco yuriabu iriya. Iriya pepuri masegue ojocaricu iiri yucu niguiabu. Iri yucu aberi nucu ducacua. Yuju bojorire doce suburi ducacua. Eropira iri yucu maja puri mera oaro ococuracoma masa i yeba majara. <sup>3</sup> Iri macare ne puriri mariroca. Iri maca Goamu igu opu ariro ariroca. Cordero igu opu ariro sa ariroca iri maca. Eropira igu pohro majara arira igu pohro mereja igure umupeoracoma. <sup>4</sup> Era Goamure oaro Ianiguicuracoma. Eropira era diaporire era igu waire tuyasura ariracoma. <sup>5</sup> Eroguere nami ne mariroca. Eropira sihagori dipurure gamesome ero arira. Abe igu boyocu sare gamesome. Mari Opu Goamu igu boyoro ariroca. Eropira iri maca arira gajira tauro opara eropa ariniguiracoma.

*Jesucristo i yebague igu dujariboro meroga duhyaa, ari gojani Niu*  
<sup>6</sup> Puhru anyu yure opa arami:

—Aripehrerire mu iha gojara diaye ahraa. Eropiro gua mure eropa aridiro dopa ta eropa waroca. Mari Opu Goamu igu yare weremhtarare masicu igu ahrimi. Igupu dohpagure yure igu yagu anyure obeomi igu pohro majara masicu iibu. Puhru maja dohpa waborore masicu iibu, igu yure igu yagu anyure obeomi, arami anyu yure.

<sup>7</sup> Jesupu opa arami:

—Peeque mua. Meroga duhyaa yu dujariboro. Ipu maja weremhtarire tarinugabirinira mucubirira ariracoma, arami Jesu.

<sup>8</sup> Yuhu Niu i aripehrerire yu goja airare peeabu. Eropigu irire ihabu. Eropigu yu peera puhru, yu iara puhru yure ihmudigu anyu pohro merejarabu umupeobu. <sup>9</sup> Yu eropa icu igu opa arami yure:

—Yure mereja umupeobita. Mu iro dopa ta yu sa Goamu pohro majagu ta ahraa. Mu acawereru Goamu yare weremhtarara, aripehrerira ipu maja dorerire iira sa era ariro dopa ta yu sa Goamu pohro majagu ta ahraa. Eropigu Goamupure mereja igure umupeoque, arami anyu yure.

<sup>10</sup> Eropigu opa ari werenemoami yure:

—Ipu mu goja airapu puhru maja dohpa waborore werea. Eropa waboro meroga duhyaa. Eropa aricu ipu wererare dibubita muhu.

<sup>11</sup> Irisubu yu wererisubure nerapu eropa iiniguicoma nerire. Oarapu oaro iiniguima. Eropira erapu neri marira ariracoma, arami yure anyu.

<sup>12</sup> Opa arami Jesu:

—Peeque mua. Meroga duhyaa yu dujariboro. Muare yaharare yu wajayeborore aigaribu iiaa. Eropigu oarire mua iira waja muare oaro igura. <sup>13</sup> Yuhu aripehrerire ihacunugudigu ahraa. Eropigu aripehrerire pehrecu iibu ahraa.

<sup>14</sup> “Aripehrerira guhrari mariri suhrere sananira ariro dopa ta era neri iirare coenira iri macaguere ejaracoma. Eropira iri maca maja yucu ojocaricu iiri yucu ducare baracoma. Eropira mucubirira ariracoma era. <sup>15</sup> Iri macague ejabirapu opa ahrima: Netariara, yea sa, nome mera nero iira, uma mera nero iira nome, masare wejera, goamaru wananire umupeora, guyaricura sa ahrima iri macague ejabira, arami Jesu.

<sup>16</sup> Eropigu opa arinemoami Jesu yure:

—Yũhũ Jesu yahagũ anyure obeoabũ mũare yaharãre ipũ majare werebure. Opũ Davi árituriagũ pãrami áhraa yũhũ. Yũhũ boyomãriridiru iro dopa árigũ mũare ðaro áricũ igũ áhraa, arĩ werenemoami Jesu.

<sup>17</sup> Espiritu Santo Jesure “Dujarique,” arĩmi. Jesu yarã sã igũ mojoto diribo dopa árirã, “Dujarique,” arĩma. Áripheerã erã “Dujarique,” erã arĩcũ peerã sã, “Dujarique,” arĩporo Jesure. Nemesiburã decore erã turaro gamero dopa ta Goãmũ pohrogue wadiarã Jesure turaro gameporo. Igũ ojocaricũ iiri deco iro dopa áhrimi. Igũ gamerãre waja gamero mariro umarogue erã eropa áriniguicãborore ogucumi Goãmũ.

<sup>18</sup> Yũhũ Ñu áripheerã ipũ maja wererire, Goãmũ yare weremũhtarare peenirãre ðpa arĩ mũare gũhyadiaro mera weregura. I buheri mera gaji buheri mera moresũ werenemorã Goãmũre tarinũgarã iima. Erã eropa tarinũgacũ ãagũ áripheerã ipũ igũ dipuwaja moaburire igũ werero dopa ta apigucumi erã sãre. Eropigũ eropa erã sãre dipuwaja moagucumi. <sup>19</sup> Eropirã ipũ maja wererire i Goãmũ yare weremũhtarare goroweorã Goãmũre tarinũgarã árirãcoma. Erã eropa tarinũgacũ ãagũ ojocaricũ iiri yuca ducare erãre badoresome. Eropirã Goãmũ mera áriniguisme erã. Eropirã igũ ya macague ðari macague wasome erã. Iri yucare, iri maca sãre ipũ mera erã wererague áhraa.

<sup>20</sup> Áripheerã ipũ majare weregũ Jesucristo ðpa arĩmi.

—Eropa ta áhraa. Merogã dũhyaa yũ i yebague dujariboro, arĩmi igũ.

Eropigũ yũpũ ðpa arĩtugũ iiaa.

—Eropa ta iique. Gũa Opũ Jesu dujarique, arãa yũhũ.

<sup>21</sup> Mari Opũ Jesu igũ itamuro mera áripheerã mũa Goãmũ yarã ðaro árique. Eropa ta árirã. Iripẽta áhraa.